


Se-nānā Diosē nanā  
sā' me rá catūū  
nimán ní' a



New Testament in Triqui, Copala (MX:trc:Triqui, Copala)

# Se-nānā Diosē nanā sã' me rá catũũ nimán ní' a New Testament in Triqui, Copala (MX:trc:Triqui, Copala)

copyright © 1987 Wycliffe Bible Translators, Inc.

Language: Triqui, Copala

Translation by: Wycliffe Bible Translators, Inc.

Triqui, Copala [trc], Mexico

## Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Triqui, Copala

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files dated 29 Jan 2022  
3a8f2838-fe9f-5490-8d78-a7bbfddab871

## Contents

San Mateo . . . . .	1
San Marcos . . . . .	90
San Lucas . . . . .	144
San Juan . . . . .	234
Hechos . . . . .	300
Romanos . . . . .	379
I Corintios . . . . .	415
II Corintios . . . . .	450
Gálatas . . . . .	472
Efesios . . . . .	486
Filipenses . . . . .	498
Colosenses . . . . .	506
1 Tesalonicenses . . . . .	514
2 Tesalonicenses . . . . .	521
1 Timoteo . . . . .	525
2 Timoteo . . . . .	535
Tito . . . . .	542
Filemón . . . . .	547
Hebreos . . . . .	549
Santiago . . . . .	575
1 Pedro . . . . .	583
2 Pedro . . . . .	593
1 Juan . . . . .	599
2 Juan . . . . .	607
3 Juan . . . . .	608
Judas . . . . .	610
Apocalipsis . . . . .	613

## Nihánj me se-nana Jesucristó nana sa' cachrón síi cu'naj Mateo rihaan yanj a

*Nana nihánj taj xna'anj che'é nij xii Jesucristó nij síi man gaa naá a*

<sup>1</sup> Yanj nihánj me taj xna'anj che'é nij xii Jesucristó a. Veé xii Jesucristó me síi cu'naj David síi cane gaa naá, ne xii David me síi cu'naj Abraham síi cane gaa naá adonj.

<sup>2</sup> Dan me se síi cu'naj Abraham me rej síi cu'naj Isaac, ne Isaac me rej síi cu'naj Jacob, ne Jacob me rej nij tinuj síi cu'naj Judá,

<sup>3</sup> ne Judá me rej síi cu'naj Fares ga síi cu'naj Zara, ne chana cu'naj Tamar me nii roj so' a. Ne Fares me rej síi cu'naj Esrom, ne Esrom me rej síi cu'naj Aram,

<sup>4</sup> ne Aram me rej síi cu'naj Aminadab, ne Aminadab me rej síi cu'naj Naasón, ne Naasón me rej síi cu'naj Salmón,

<sup>5</sup> ne Salmón me rej síi cu'naj Booz, ne nii Booz me chana cu'naj Rahab a. Ne Booz me rej síi cu'naj Obed, ne nii Obed me chana cu'naj Rut a. Ne Obed me rej síi cu'naj Isai,

<sup>6</sup> ne Isai me rej síi cu'naj David, ne síi cu'naj David ro', me síi nicaj suun rey uun chij rihaan nij yuvií israelitá gaa cane so' adonj.

Ne David me rej síi cu'naj Salomón, ne nii Salomón me nica síi cu'naj Urías a.

<sup>7</sup> Ne Salomón me rej síi cu'naj Roboam, ne Roboam me rej síi cu'naj Abías, ne Abías me rej síi cu'naj Asa a.

<sup>8</sup> Ne Asa me rej síi cu'naj Josafat, ne Josafat me rej síi cu'naj Joram, ne Joram me rej síi cu'naj Uzías a.

<sup>9</sup> Ne Uzías me rej síi cu'naj Jotam, ne Jotam me rej síi cu'naj Acaz, ne Acaz me rej síi cu'naj Ezequías a.

<sup>10</sup> Ne Ezequías me rej síi cu'naj Manasés, ne Manasés me rej síi cu'naj Amón, ne Amón me rej síi cu'naj Josías a.

<sup>11</sup> Ne Josías me rej nij tinuj síi cu'naj Jeconías, ne cayáan nij so' yo' qui'yaj canaán nij síi man Babilonia rihaan nij yuvií israelitá, ne ca'anj nicaj nij so' man nij yuvií israelitá chiháan nij so' guun nij yuvií israelitá mozó rihaan nij so' adonj.

<sup>12</sup> Guun naá doj, ne guun Jeconías rej síi cu'naj Salatiel, ne Salatiel me rej síi cu'naj Zorobabel,

<sup>13</sup> ne Zorobabel me rej síi cu'naj Abiud, ne Abiud me rej síi cu'naj Eliaquim, ne Eliaquim me rej síi cu'naj Azor,

<sup>14</sup> ne Azor me rej síi cu'naj Sadoc, ne Sadoc me rej síi cu'naj Aquim, ne Aquim me rej síi cu'naj Eliud,

<sup>15</sup> ne Eliud me rej síi cu'naj Eleazar, ne Eleazar me rej síi cu'naj Matán, ne Matán me rej síi cu'naj Jacob,

<sup>16</sup> ne Jacob me rej síi cu'naj José, ne José me síi xcaj man chana cu'naj Mariá, ne no' me nii síi cu'naj Jesús, ne síi ca'née Diose tinanii man yuvií man rihaan chumií nihánj rihaan sayuun me Jesús adonj.

<sup>17</sup> Dan me se asij síi cu'naj Abraham ndaa síi cu'naj David síj xca'anj xii síi cu'naj Jesucristó a. Ne asij síi cu'naj David ndaa ca'anj nicaj nij síi man Babilonia man nij yuvií israelitá chiháan nij so' síj yo'ó xca'anj xii síi cu'naj

Jesucristó a. Ne asij ca'anj nicaj nij síi man Babilonia man nij yuvii israelitá chiháán nij so' ndaa ca'ngaa síi cu'naj Jesucristó, ne sji yo'ó xca'anj nij xii Jesucristó uún adonj.

*Nana nihánj taj xna'anj daj guun gaa ca'ngaa Jesucristó rihaan chumii nihánj a*

<sup>18</sup> Ne nihánj me se vaa guun asij rque gaa ataa ca'ngaa Jesucristó a. Dan me se nii Jesucristó me chana cu'naj Mariá a. Gaa asino yaan guun ya rá no' ga síi cu'naj José se vaa xcaj tuvi' roj so' a. Tzaj ne ataa cunu rcua'aaan roj so' a. Tzaj ne xcaj no' cuentá se vaa aj nari' no' ne'ej qui'yaj Nimán Diose a.

<sup>19</sup> Dan me se síi cu'naj José me síi xcaj man chana cu'naj Mariá, ne xcaj so' cuentá se vaa aj nuú rque no' ne'ej a. Che'é dan nuchruj raá so', ne guun rá so' se vaa tanáj yuve so' man no' adonj. Dan me se sji vaa nica nimán me so', ne guun rá so' cataj xna'anj so' rihaan nij síi nicaj suun, tzaj ne guun vij rá so', ne ne ca'vej rá so' cuta' so' cacun' xráa chana cu'naj Mariá rihaan nij síi nicaj suun a.

<sup>20</sup> Dan me se nuchruj raá so' daj qui'yaj so', gaa ne rej nii ca'mii nej rihaan so' a. Dan me se cotoj so', ne naquiyaa rihaan so' se vaa ca'na' yo'q se-mozó síi 'nij ra'a man ní', ne cataj se-mozó síi 'nij ra'a man ní' rihaan so' a:

—Cunó so' ca'mii 'unj, José. 'O se ta'nij si'no síi cu'naj David síi cane gaa naá mé so' adonj. Se chuchuvi' so' xcaj so' man chana cu'naj Mariá ma'. Ne tumé no' cacun' ma'. Maan se nayón ne'ej rque no' qui'yaj Nimán Diose adonj.

<sup>21</sup> Dan me se cuchruj no' ne'ej sno'o cunii, ne asa' cuchruj no' ne'ej, ne Jesús tucu'náj so' man ne'ej yo' á. Danj tucu'náj soj man so', che'é se guun so' síi tñanii man nij tuvi' so' rihaan chrej chi'ii uun chij nimán nij so' adonj. —Danj ca'mii se-mozó síi 'nij ra'a man ní' rihaan síi cu'naj José a.

<sup>22</sup> Nu' nihánj me se vaa qui'yaj síi 'nij ra'a man ní' a. Qui'yaj guee so' nu' nana cataj xna'anj so' gaa naá rihaan 'o síi nata' se-nana Diose rihaan yuvii, ne nihánj me nana ca'mii so' rihaan síi nata' se-nana Diose yo' a:

<sup>23</sup> “Quene'en soj se vaa quinari' 'o chana yaan ne'ej, ne cuchruj no' ne'ej sno'o cunii, ne Emanuel cu'naj ne'ej adonj”. Danj ca'mii síi 'nij ra'a man ní' gaa naá rihaan síi nata' se-nana Diose, ne nana “Emanuel” taj se vaa cane ma'an Diose ga ní' adonj.

<sup>24</sup> Veé dan, ne quinanuú rá síi cu'naj José, ne qui'yaj so' nu' ndaa vaa cataj xna'anj se-mozó síi 'nij ra'a man ní' rihaan so', ne xcaj so' man chana cu'naj Mariá a.

<sup>25</sup> Tzaj ne ne cotoj so' ga no' ndaa se quisj cuchruj no' ne'ej sno'o cunii a. Ne tucu'náj José Jesús man ne'ej adonj.

## 2

*Nana nihánj taj xna'anj che'é nij síi tucu'yón ndo'o che'é yati' a*

<sup>1</sup> Dan me se ca'ngaa Jesucristó chuman' Belén chuman' naj estadó Judea, ne síi cu'naj Herodes me síi nicaj suun rey uun chij rihaan chuman' rej ca'ngaa Jesucristó a. Quisj ca'ngaa Jesucristó, gaa ne ca'na' nij síi tucu'yón ndo'o che'é yati' chuman' cu'naj Jerusalén, ne nij síi cavii rej sji güii me nij so' a.

<sup>2</sup> Ne xná'anj nij so' man nij síi man Jerusalén, cataj nij so':

—Ne'ej guun síi nicaj suun rey guun chij rihaan nij yuvii israelitá ro', me rej ca'ngaa so' ga. Quene'en núj yati' taj xna'anj yo' se vaa ca'ngaa so' nanj á.

Cavii yati' yo' xta' rej síj güii, ne che'é dan ca'na' núj quina'v'ij núj rihaan so' adonj —taj nij sí tucu'yón ndo'o che'é yati' a.

<sup>3</sup> Gaa ne cuchi' nana rihaan sí nicaj suun rey cu'naj Herodes se vaa xná'anj ndo'o nij sí tucu'yón ndo'o che'é yati' me rej ca'ngaa ne'ej yo', gaa ne cucu'vi' ndo'o so' se vaa cachij ne'ej yo', ne ca'nee ne'ej yo' se-suun so' ra'a so' vaa güii, rá so' a. Ne cucu'vi' ndo'o nij sí man chuman' Jerusalén se vaa caxrij yuva Herodes man ma'an nij so' a.

<sup>4</sup> Veé dan, ne cunuu chre' taran' nij xrej ata suun nocgo doj cunuu chre' nij sí naqui'yaj cuu se-tucuanj Moisés rihaan nij yuvij cunuu chre' rihaan so', qui'yaj so', ne xná'anj Herodes man nij so' me rej ca'ngaa sí ca'nej Diose tinanii man yuvij man rihaan chumij rihaan sayuun a.

<sup>5</sup> Gaa ne cataj nij so' rihaan Herodes a:

—Ca'ngaa so' chuman' Belén chuman' naj estadó Judea a —taj nij so' rihaan sí nicaj suun rey cu'naj Herodes a.

Danj ca'mii nij so' che'é nana nihánj nana cachrón sí nata' se-nana Diose rihaan yanj a:

<sup>6</sup> “Ne ma'an so', chuman' Belén chuman' naj estadó Judea ro', chuman' sa' ndo'o 'nij ra'a man tuvi' chuman' naj estadó Judea mé so' á. Dan me se vaa sí guun chihanj man so', ne guun chij uxrá so', ne uxrá cutumé so' man nij yuvij israelitá yuvij cuné' 'unj canoco' manj a”. Nihánj me nana cachrón sí nata' se-nana Diose rihaan yanj gaa naá a.

<sup>7</sup> Cuno sí nicaj suun Herodes nana ca'mii nij so', gaa ne ca'neé yuve so' nana rihaan nij sí tucu'yón ndo'o che'é yati' se vaa ca'na' nij so' rihaan Herodes a. Gaa ne xná'anj Herodes man nij so' me yavii curuvi' naca yati' taj xna'anj che'é ne'ej yo', taj Herodes a. Gaa ne cataj xna'anj nij so' rihaan Herodes a.

<sup>8</sup> Gaa ne ca'neé Herodes man nij so' ca'anj nij so' chuman' Belén, ne ca'ne' Herodes suun rihaan nij so', ne cataj Herodes:

—Nano' uxrá soj man ne'ej yo', ne asa' nari' soj man ne'ej, ne cataj xna'anj soj rihanj me rej ne ne'ej yo', gaa ne ca'anj ma'anj quina'v'ij ma'anj rihaan ne'ej yo' adonj —taj Herodes rihaan nij sí tucu'yón ndo'o che'é yati', ca'mii ne so' rihaan nij sí tucu'yón ndo'o che'é yati' a.

<sup>9</sup> Quisij cuno nij so' nana cataj xna'anj sí nicaj suun rey rihaan nij so', gaa ne curihanj nij so', ca'anj nij so', gaa ne quene'en uún nij so' man yati' yo' a. Yati' aj quene'en nij so' rej síj güii me yati' yo', ne dan me se vaj yati' yo', ne yo'q canoco' nij so' man yati' yo', ndaa se canicun' yati' yo' rej xta' rej yanj ne'ej yo' a.

<sup>10</sup> Gaa quene'en nij so' man yati' yo', gaa ne uxrá guun niha' rá nij so',

<sup>11</sup> gaa ne catúj nij so' rá ve' rej canicun' yati' xta', gaa ne nari' nij so' man ne'ej ga nii ne'ej chana cu'naj Mariá, gaa ne canicun' ruj nij so', ne quina'v'ij nij so' rihaan ne'ej yo' a. Veé dan, gaa ne nuxra' nij so' se-chrunj nij so', gaa ne rqué ndo'o nij so' rasuun sa' rihaan ne'ej yo' a. Dan me se aga' oró míí dō', squíí cu'naj incienso dō', squíí cu'naj mirra dō', rqué uún nij so' rihaan ne'ej yo' a.

<sup>12</sup> Ne rej nij ca'mii nej rihaan nij so', ne cataj xna'anj Diose rihaan nij so' se vaa se canicaj uún nij so' ca'anj nij so' rihaan sí nicaj suun rey cu'naj Herodes, taj nej rihaan nij so' a. Che'é dan yo'ó chrej canicaj nij so' quinan' nij so' chiháan nij so' a.

*Nana nihánj taj xna'anj se vaa ca'anj nicaj José ga Mariá man Jesucristó rej cu'naj Egiptó a*

<sup>13</sup> Quisij quinan' nij sí tucu'yón ndo'o che'é yati', gaa ne rej nij ca'mii nej rihaan sí cu'naj José a. Dan me se naqui'yaa yo'ó se-mozó sí 'nij ra'a man ní rihaan so', ne cataj se-mozó sí 'nij ra'a man ní rihaan so' a:

—Naxagaa so', ne nicaj so' man roj nii ne'ej, ne cunanj so' ca'anj so' rej cu'naj Egiptó, ne cayáán so' Egiptó ndaa güii ca'mii uún 'unj rihaan so' á. 'O se nano' ndo'o sí nicaj suun rey cu'naj Herodes man ne'ej, ne ticavi' so' man ne'ej yo' vaa taj so' adonj —taj se-mozó sí 'nij ra'a man ní rihaan sí cu'naj José a.

<sup>14</sup> Gaa ne naxagaa sí cu'naj José, ne nicaj so' man roj nii ne'ej, ne rej nij cavií nij so' ca'anj nij rej so' Egiptó,

<sup>15</sup> ne cane nij so' Egiptó yo' ndaa se cavi' sí nicaj suun rey cu'naj Herodes a.

Dan me se quisij ya nu' nana ndaa vaa cataj xna'anj sí 'nij ra'a man ní rihaan 'o sí nata' se-nana Diose gaa naá, se vaa cataj so': “Canacúun 'unj man ta'nij se vaa cavií so' Egiptó ca'na' so' adonj”. Danj taj Diose gaa naá che'é ta'níi so' Jesucristó adonj.

*Nana nihánj taj xna'anj se vaa cavi' ndo'o ne'ej man chuman' Belén, qui'yaj sí nicaj suun cu'naj Herodes a*

<sup>16</sup> Quisij ca'anj nij rej Jesucristó rej cu'naj Egiptó, gaa ne xcax sí nicaj suun rey cu'naj Herodes cuentá se vaa aj tiha' yu'unj nij sí tucu'yón che'é yati' man so', gaa ne ca'maan ndo'o rá so', ne che'é dan ca'ne' so' suun rihaan tanuu se vaa ticavi' tanuu man nu' ne'ej snó'o cunii yanj nu' anicaj chuman' Belén a. Ne'ej vaj víj yo' rej rque ro', cavi', taj so' a. Danj qui'yaj so', gaa ne cavi' ne'ej ca'mii yati' che'é taj nij sí tucu'yón che'é yati' rihaan so', rá so' a.

<sup>17</sup> Danj qui'yaj so', ne quisij ya nu' nana cataj xna'anj sí nata' se-nana Diose gaa naá sí cu'naj Jeremías, se vaa cataj so':

<sup>18</sup> “Cuno nii ta'vee ndo'o chana man chuman' cu'naj Ramá a. Ase vaa chana cu'naj Raquel chana cane gaa naá gaa nij chana, ta'vee ndo'o nij no' che'é ta'níi nij no' a. Ne se ca'vej uxrá rá nij chana naqui'yaj niha' no' nimán no', che'é se navij ta'níi nij no' cavi' nanj adonj”. Danj ca'mii sí cu'naj Jeremías gaa naá a.

*Nana nihánj taj xna'anj se vaa curihanj uún nij rej Jesucristó rej cu'naj Egiptó, ca'anj nij so' chuman' Nazaret a*

<sup>19</sup> Gaa quisij cavi' sí nicaj suun rey cu'naj Herodes, gaa ne naqui'yaa uún yo'ó se-mozó sí 'nij ra'a man ní rihaan sí cu'naj José gaa yáán so' Egiptó gaa otoj so' rej nii a.

<sup>20</sup> Ne cataj xna'anj se-mozó sí 'nij ra'a man ní rihaan José a:

—Naxagaa so', ne nicaj so' roj nii ne'ej, ne ca'anj so' rej cu'naj Israel á. 'O se yaj me se cavi' nij sí me rá ticavi' man ne'ej yaj nanj adonj —taj se-mozó sí 'nij ra'a man ní rihaan sí cu'naj José a.

<sup>21</sup> Gaa ne naxagaa sí cu'naj José, ne nicaj uún so' roj nii ne'ej ca'anj so' rej cu'naj Israel a.

<sup>22</sup> Ne cuchi' nana rihaan so' se vaa sí cu'naj Arquelao guun sí nicaj suun rey uun chij rihaan estadó Judea a. Dan me se nayón sí cu'naj Arquelao rihaan rej so' sí cu'naj Herodes a. Che'é dan cucu'vi' ndo'o sí cu'naj José ca'anj so' estadó Judea, gaa ne ca'mii nej rihaan uún so' se vaa se ca'anj so' estadó Judea ma'. Che'é dan ca'anj so' estadó Galilea,

<sup>23</sup> ne cuchi' so' chuman' Nazaret, ne cayáan so' chuman' yo' a. Dan me se cayáan nij so' chuman' Nazaret, ne quisij ya nu' nana cataj nij sí nata' se-nana Diose gaa naá, se vaa sí cavii Nazaret me sí ca'nej Diose tinanii man yuvij rihaan sayuun adonj. Inanj danj ca'mii nij sí nata' se-nana Diose gaa naá yo' a.

### 3

*Nana nihánj taj xna'anj daj vaa ca'mii natáj sí cu'naj Juan sí cuta' ne yuvij a*

<sup>1</sup> Dan me se yo'o yáan Jesucristó chuman' Nazaret, ne cavii sí cu'naj Juan tacaan estadó Judea, ne ca'mii natáj ndo'o so',

<sup>2</sup> cataj so':

—Nuchran' nimán soj, ne tanáj soj chrej chi'ij ei. 'O se nichrun' guun chij Diose rihaan chumij nihánj nanj adonj —taj so', a'mii natáj so' a.

<sup>3</sup> Sí nata' se-nana Diose rihaan yuvij gaa naá sí cu'naj Isaías ro', cataj xna'anj che'é sí cu'naj Juan, cataj so': “Nucuaj ndo'o ca'mii natáj 'o so' rej tacaan, ne cataj so' se vaa nuchran'nimán yuvij, ne ve'é ca'mii nij yuvij ga sí 'nij ra'a man ní' asa' ca'na' so' a”, taj sí cu'naj Isaías gaa naá a.

<sup>4</sup> Dan me se sí cu'naj Juan me se nuu so' yatzij nuj xcuu camelló ne 'nij catuun so' merque nuj, ne chá so' inanj rquí, ne catzi' xtaan man quij co'o so' adonj.

<sup>5</sup> Ne curihanj ndo'o yuvij man chuman' Jerusalén do', yuvij man nu' estadó Judea do', yuvij man nij chuman' naj tu'va chráa cu'naj Jordán do', ca'na' rihaan sí cu'naj Juan,

<sup>6</sup> gaa ne cata' ne nij yuvij rá chráa cu'naj Jordán, qui'yaj Juan a. Dan me se nata' ya nij yuvij che'é nu' cacun' tumé nij yuvij, gaa ne cata' ne nij yuvij adonj.

<sup>7</sup> Gaa ne quene'en sí cu'naj Juan se vaa ca'na' ndo'o nij sí fariseo do', nij sí saduceo do', me rá nij so' cuta' ne Juan man nij so' a. Gaa ne ca'mii natáj so' rihaan nij so', cataj so':

—Ase vaa xcuáa yuvaa vaa soj á. Me sí cataj xna'anj rihaan soj cunanj soj, ne quinaniij soj rihaan sayuun qui'yaj Diose ga. Asa' ca'vee quinaniij soj rihaan sayuun, qui'yaj inanj na cata' ne soj ga.

<sup>8</sup> Sese ya cunuu sa' nimán soj, ne ca'anj soj qui'yaj soj ndaa vaa 'yaj yuvij cunuu sa' nimán á.

<sup>9</sup> Ne tadó soj sese quisij rá soj cataj soj se vaa ta'níi ta'nij si'no sí cu'naj Abraham sí cane gaa naá me soj, ne ne tumé soj cacun', cataj soj á. Se ca'mii soj daj chihaa míj danj ma'. Maan se cataj xna'anj 'unj rihaan soj se vaa nuveé se ya'anj tiha' ta'níi ta'nij si'no sí cu'naj Abraham me soj a ma'. Maan se sese Diose rá, ne ca'vee nıcaj Diose náá guun yahij naj rihaan yo'óo nihánj, ne qui'yaj Diose man 'o ta'níi ta'nij si'no sí cu'naj Abraham adonj. Che'é dan canoco' ya soj man Diose á.

<sup>10</sup> "O se nichrun' qui'yaj Diose sayuun man nij sí na'vej rá cunó rihaan so' nanj á. Ase vaa sí oro' aga' a'ne' chruun, ne oro' so' aga' ca'ne' so' chruun ro', danj vaa Diose cunó ei. Che'é dan ase vaa 'yaj nii man chruun ro', ta'nga' danj qui'yaj Diose man nij sí ne uno rihaan so' a. Dan me se a'ne' nii chruun nuvi' chruj sa' raá, ne araa nii man chruun yo' rihaan ya'an a. Ta'nga' danj qui'yaj Diose man nij sí na'vej rá canoco' chrej sa' adonj.



11 "Unj nihánj me síi cuta' ne uun man soj sij nuchran' nimán canoco' chrej sa' a. Tzaj ne vaa yo'ó síi ca'na', ne sij sca' doj guun so' rihanj a. Che'é dan me aj ne nó xcúnj nachej nuj correá 'nij tacanj so' ma'. Ne ca'na' so', ne ca'na' Nimán Diose ga so', ne caxrii ya'an so' man soj sij na'vej rá cunõ rihaan Diose, ne cacaa soj adõnj.

12 Dan me se ase vaa síi oro' chruun palá vaa so' cuano adõnj. Dan me se síi nicaj chruun palá ro', rii nu' 'núú trigó naj rihaan yo'óó, ne naqui'yaj chre' so' man 'núú trigó sa', ne araa so' man 'núú trigó sa' rá ve', ne anicaj so' araa so' squij ni'ya xraá trigó rihaan ya'an a. Ne ase vaa síi nicaj palá man cuano ro', danj qui'yaj síi ca'na', ne naqui'yaj chre' so' man cunudanj nij síi cunuu sa' nimán, ne caraa so' man nij síi chi'ii rihaan ya'an, ne cacaa nij so' nu' cavii nu' ca'anj, ne daj chihaa mij se quina'áj ya'an yo' a man adõnj. —Danj ca'mii síi cu'naj Juan rihaan nij yuvi' yo' a.

### *Nana nihánj taj xna'anj se vaa cata' ne Jesucristó a*

13 Gaa ne curihanj Jesucristó estadó Galilea ca'anj so' chraá cu'naj Jordán rihaan síi cu'naj Juan, ne cuta' ne Juan man Jesucristó, rá so' a. Dan me se cuchí' Jesucristó rihaan síi cu'naj Juan,

14 tzaj ne veé dan me se ne ca'vej rá síi cu'naj Juan cuta' ne so' man Jesucristó ma'. Maan se cataj síi cu'naj Juan rihaan Jesucristó a:

—Me che'é 'ná' so' cuta' ne 'unj mán so' ga. Tananj ma'an so' me síi vaa che'é cuta' ne man ma'anj nanj á. Tzaj ne xa' 'unj me se ne nó xcúún 'unj cuta' nej mán so' ma' —taj síi cu'naj Juan rihaan Jesucristó a.

15 Gaa ne cataj Jesucristó rihaan so' a:

—Ca'vej so' cuta' ne so' manj ei. Danj qui'yaj ní', che'é se nõ xcúún ní' qui'yaj ní' nu' se vaa me rá Diose qui'yaj ní' adõnj —taj Jesucristó rihaan síi cu'naj Juan, gaa ne ca'vej rá so', gaa ne cuta' ne so' man Jesucristó a.

16 Quisij cata' ne Jesucristó, gaa ne curihanj so' rá na, gaa ne taj ni'yón naxra' rej xta', ne quene'en so' se vaa nanij Nimán Diose rej xta', ne ase vaa cha'aan ro', vaa Nimán Diose, curuvi' yo' rej xta' nanij yo' raq Jesucristó a.

17 Gaa ne rej xta' ca'mii Diose rihaan Jesucristó, ne cuno nij síi nicun' ga Jesucristó nana ca'mii Diose, ne dan me se cataj Diose a:

—Ta'níi 'unj síi 'eë ndo'o raj man mé so', ne niha' ndo'o raj ni'yaj 'unj mán so' adõnj —taj nana cavii rej xta' ca'mii Diose rihaan Jesucristó a.

## 4

### *Nana nihánj taj xna'anj se vaa guun ndo'o rá síi chree tihá' yu'unj síi chree man Jesucristó a*

1 Gaa ne ca'anj Jesucristó rej tacaan, qui'yaj Nimán Diose, che'é rej ca'vee guun rá síi chree tihá' yu'unj síi chree man Jesucristó a.

2 Ne vij chihaa ya güii quisij Jesucristó toco' Jesucristó x'naa man ma'an so' che'é se aráj guee so' rihaan Diose, gaa ne quina'aan ndo'o rque Jesucristó a.

3 Dan me se cuchí' síi chree rihaan Jesucristó, gaa ne guun rá so' tihá' yu'unj so' man Jesucristó, che'é se guun rá so' canoco' Jesucristó man so' adõnj. Che'é dan cataj so' rihaan Jesucristó, ne:

—Sese ya ya ta'nij Diose mé so', ne cataj so' rihaan yahij nihánj se vaa guun yo' rachrúún cha so' á —taj síi chree rihaan Jesucristó a.

4 Gaa ne cataj Jesucristó rihaan síi chree a:

—Tzaj ne danj Diose taj: “Nuveé inañj se chá me se achiin rihaan yuvij, ne ca'vee cayáán sa' yuvij ma'. Tanañj achiin cunudanj se-nanā Diose cuno yuvij, ne ve'é cayáán yuvij ei”. Inañj danj taj danj Diose —taj Jesucristó rihaan sí chree yo' a.

<sup>5</sup> Gaa ne ca'anj nicaj sí chree man Jesucristó chuman' guęę chuman' Jerusalén, ne tacavii so' man Jesucristó raq nuví nocqo,

<sup>6</sup> ne cataj so' rihaan so':

—Sese ya ta'nij Diose mé so', ne güej so', ne nanij guęę so' rihaan yo'óó á. 'O se danj Diose taj: “Yo' o a'ne' Diose suun rihaan nij se-mozó so' se vaa cutumé nij so' mán so', ne caráán ra'a nij so' mán so', se gaa nanj cacq' che'é so' yahij a”. Inañj danj a'mii danj Diose —taj sí chree rihaan Jesucristó adonj.

<sup>7</sup> Gaa ne cataj Jesucristó rihaan so' a:

—Tzaj ne ne nó xcúnj quiyáaj danj ma'. 'O se taj uún danj Diose: “Se guun quiri'yunj so' man Diose sí 'nij ra'a man ní ne tihá' so' man so' ma'”. Inañj danj a'mii danj Diose rihaan ní adonj —taj Jesucristó rihaan sí chree a.

<sup>8</sup> Gaa ne nicaj sí chree man Jesucristó ca'anj so' raq 'o quij xcaan ndo'o uún a. Ne tihaan so' man nu' chuman' man rihaan cunuj' chumij rihaan Jesucristó, ne tihaan so' rihaan Jesucristó se vaa ve'é ndo'o vaa nu' chuman' yo' adonj.

<sup>9</sup> Dan me se cataj uún sí chree rihaan Jesucristó a:

—Guun chij so' rihaan cunudanj chuman' naj rihaan chumij, quiyáá 'unj, sese canicun' ruj so' quina'vij so' rihaan 'unj á —taj sí chree yo' rihaan Jesucristó a.

<sup>10</sup> Gaa ne cataj xna'anj Jesucristó rihaan sí chree a:

—Naxuun yanij so' mán so', Satanás. 'O se danj Diose taj: “Rihaan orún' Diose sí 'nij ra'a man ní canicun' ruj so', ne a 'ó rihaan tuvi' so' se ca'vee na'vij so' ma'”. Danj taj danj Diose adonj —taj Jesucristó rihaan sí chree yo' a.

<sup>11</sup> Gaa ne tanáj sí chree man so', ca'anj sí chree yo', gaa ne cuchí' nij se-mozó Diose rihaan Jesucristó, rqué nij so' me ma'an se cachiin rihaan Jesucristó a.

### *Nanā nihánj taj xna'anj se vaa ca'anj Jesucristó estadó cu'naj Galilea a*

<sup>12</sup> Cuchí' nanā rihaan Jesucristó se vaa quita'aa nij tanuu man sí cu'naj Juan, caxrij tanuu taga' man so', ne che'é dan ca'anj Jesucristó estadó Galilea,

<sup>13</sup> tzaj ne ne cayáán so' chuman' Nazaret ma'. Cavii so' chuman' Nazaret yo', ne ca'anj so' cayáán so' chuman' Capernaum chuman' naj tu'va na lacuaná a. Chuman' yo' naj rihaan to'óó nij ta'níi ta'nij si'no sí cu'naj Zabolón dɔ', sí cu'naj Neftalí dɔ', sí man gaa naá yo' a.

<sup>14</sup> Dan me se danj quiyaj Jesucristó ca'anj so' rej yo', gaa ne guun ya nu' ndaa vaa cataj sí cu'naj Isaías sí nata' se-nanā Diose gaa naá se vaa cataj so':

<sup>15</sup> “To'óó nij ta'níi ta'nij si'no Zabolón dɔ', to'óó nij ta'níi ta'nij si'no Neftalí dɔ', me yo'óó naj tu'va na lacuaná rej rnej tu'va chráá cu'naj Jordán, ne estadó Galilea estadó yanj nij sí yanij me uún yo' a.

<sup>16</sup> Ne nij sí man rej yo' ro', guun que'ęę yo' ne quene'ęn uxrá nij so' rasuun che'é Diose ma'. Maan se ase vaa yuvij ne rej rmi' ro', danj vaa nij so' ne nij so' nanj adonj. 'O se vaa güii, ne caví' uun nij so', ne danj uun ma'an, rá nij so' adonj. Tzaj ne ca'na' 'o ya'an, ne cuchuguun rej yanj nij so', quiyaj ya'an yo', ne ve'é ndo'o xcaj nij so' cuentá adonj”. Yo' me se vaa cataj sí cu'naj Isaías gaa naá a.

<sup>17</sup> Gaa ne guun che'e Jesucristó ca'mii natáj so' rihaan yuvij, ne cataj so':  
—Nuchran' nimán soj ei. 'O se nichrun' quisij güii ca'na' Diose guun chij  
Diose rihaan chumij nihánj nanj adonj. —Inanj danj ca'mii natáj Jesucristó  
rihaan nij yuvij a.

*Nana nihánj taj xna'anj se vaa cataj xna'anj Jesucristó rihaan ca'anj síi rii  
xcuaj se vaa canoco' nij so' man Jesucristó a*

<sup>18</sup> 'O güii cachén Jesucristó tu'va na lacuaná cu'naj na Galilea, ne quene'en  
so' man roj tinuj roj so' a. Yo'o so' me síi cu'naj Simón, ne Pedró cu'naj yo'ó  
se-chuvij síi cu'naj Simón yo' a. Ne tinúú so' me síi cu'naj Andrés a. Dan me  
se gaa quene'en Jesucristó man roj so', ne nicun' roj so' tu'va na lacuaná, ne  
tiguíj roj so' nanj rque na, ne dan me se síi rii xcuaj me roj so' a.

<sup>19</sup> Ne cataj Jesucristó rihaan roj so' a:

—Canoco' roj soj manj á. 'O se síi naqui'yaj chre' xcuaj me roj soj, tzaj ne  
rej rihaan ní' me se guun roj soj síi naqui'yaj chre' yuvij, qui'yáj, ne canoco'  
nij yuvij manj a —taj Jesucristó rihaan roj tinuj roj so' a.

<sup>20</sup> Ne nu' canicaj roj so' tanáj roj so' xnánj roj so', ne canoco' roj so' man  
Jesucristó ca'anj roj so' nanj adonj.

<sup>21</sup> Veé dan, ne cachée nij so' doj, ne quene'en Jesucristó man yavíj roj tinuj  
roj so' a. Yo'o so' me síi cu'naj Jacobo, ne tinúú so' me síi cu'naj Juan, ne ta'níi  
síi cu'naj Zebedeo me roj tinuj roj so' a. Dan me se nuu roj so' rque rihoo  
chéé rihaan na ga rej roj so' síi cu'naj Zebedeo, ne naqui'yaj sa' nij so' nanj  
rii xcuaj, ne canacúun Jesucristó man roj tinuj roj so' canoco' roj so' man  
Jesucristó a.

<sup>22</sup> Veé dan, ne canicaj roj so' tanáj roj so' rihoo do', rej roj so' do', ne canoco'  
roj so' man Jesucristó ca'anj roj so' nanj adonj.

*Nana nihánj taj xna'anj se vaa nahuun ndo'o yuvij, qui'yaj Jesucristó a*

<sup>23</sup> Veé dan, ne cachée Jesucristó nu' estadó Galilea, ne tucu'yón so' se-nana  
Diose man nij yuvij nuu chre' rá ve' tucu'yón nij yuvij israelitá se-tucuñj  
Moisés, ne ca'mii natáj so' nana sa' rihaan nij yuvij che'é yan guun chij Diose  
rihaan chumij nihánj me nana sa' ca'mii natáj so' a. Ne nahuun cunudanj nij  
yuvij ran' do', cunudanj nij yuvij ninaj do', qui'yaj so' a.

<sup>24</sup> Ne cuchí' nana che'é so' nu' estadó Siria, gaa ne nicaj ndo'o nij yuvij tuvi'  
nij yuvij síi ran' ndo'o, ca'anj nij yuvij rej vaj Jesucristó a. Dan me se nij yuvij  
ran' ndo'o qui'yaj chí'ij do', nij yuvij a'ngaj ndo'o cúú man do', nij yuvij nuu  
nana chree nimán do', nij yuvij snúú qui'yaj yavii do', nij yuvij na'vee cachee  
do', cuchí' rihaan Jesucristó, qui'yaj tuvi' nij yuvij, ne nahuun cunudanj nij  
so', qui'yaj Jesucristó nanj adonj.

<sup>25</sup> Veé dan, ne canoco' que'ee ndo'o yuvij man so', ne dan me se yuvij man  
estadó Galilea do', yuvij man rej cu'naj Chí' Chuman' do', yuvij man chuman'  
Jerusalén do', yuvij man estadó Judea do', yuvij man ndaa rnej tu'va chráá  
cu'naj Jordán do', canoco' man so' nanj adonj.

## 5

*Nana nihánj taj xna'anj se vaa cavii Jesucristó raq quij ga nij yuvij, ne nago'  
so' chrej man nij yuvij a*

<sup>1</sup> Quene'en Jesucristó man ndo'o yuvij nu' anicaj x'núú so', ne che'é dan  
cavii so' ca'anj so' raq 'o quij, ne ndaa dan ca'anj cayáán so', gaa ne cuchí' nij  
síi tucu'yón se-nana so' rihaan so' a.

*Nana nihánj taj xna'anj me yuvij cavij sa' doj a*

<sup>2</sup> Gaa ne guun che'e Jesucristó tucu'yón Jesucristó rihaan nij so', cataj so':

<sup>3</sup> —Cavij sa' taran' nij síi vaa nicá' nimán adonj. 'O se nij so' me síi cayáan ga Diose güii guun chij Diose rihaan chumij nihánj adonj.

<sup>4</sup> "Cavij sa' taran' nij síi nanó ndo'o rá adonj. 'O se guun niha' nimán ma'an nij so', qui'yaj Diose vaa güii adonj.

<sup>5</sup> "Cavij sa' taran' nij síi ni'yanj a'mii adonj. 'O se guun to'óó ma'an nij so' man nu' chumij vaa güii adonj.

<sup>6</sup> "Cavij sa' taran' nij síi me ndo'o rá cunu sa' nimán adonj. 'O se cunu sa' ma'an nij so' vaa güii, qui'yaj Diose adonj.

<sup>7</sup> "Cavij sa' taran' nij síi 'ee rá man tuvi' adonj. 'O se cunu 'ee rá Diose man ma'an nij so', ne taj sayuun quiran' nij so', qui'yaj Diose a man adonj.

<sup>8</sup> "Cavij sa' taran' nij síi vaa sa' nimán adonj. 'O se quene'en ma'an nij so' man Diose vaa güii adonj.

<sup>9</sup> "Cavij sa' taran' nij síi nacaj man síi me rá cunu' adonj. 'O se ase vaa Diose ro', danj gaa ma'an nij so' vaa güii adonj.

<sup>10</sup> "Cavij sa' taran' nij síi ran' sayuun 'yaj tuvi' che'é se ve'é 'yaj sa' nij so' adonj. 'O se cayáan ma'an nij so' ga Diose güii guun chij Diose rihaan chumij nihánj adonj.

<sup>11</sup> "Ne cavij sa' ndo'o soj sese ca'mij yuvij nana nij rihaan soj do', sese qui'yaj yuvij sayuun man soj do', sese ca'mij ne yuvij cataj yuvij se vaa tumé ndo'o soj cacun' do', che'é se me soj síi noco' mán 'unj adonj. Ne quene'en soj se vaa ya cavij sa' soj adonj.

<sup>12</sup> Gaa ne no xcuún soj guun niha' uxrá rá soj, che'é se uxrá naru'vee Diose rihaan soj asa' nucui' soj rej xta' adonj. 'O se ase vaa 'yaj nii sayuun man soj ro', ta'nga' danj qui'yaj nii sayuun man nij síi nata' se-nana Diose rihaan yuvij gaa naá uún adonj.

*Nana nihánj taj xna'anj se vaa ase vaa yaan do', ase vaa ya'an chuguun do', danj vaa ni' a*

<sup>13</sup> "Ase vaa yaan ga chraa ro', danj vaa soj ga chumij nihánj ei. Dan me se sese ne 'ne' chá yaan yo', gaa ne taj se qui'yá' cunu sa' yaan gaa a ma'. Taj se gún' man yaan yo' gaa ma'. Maan se qui'rij' nii man yaan yo' xe', ne cachee un yuvij xráa yaan yo' nanj ei. Ne danj vaa uún soj ei. Sese taj se gún' man soj rihaan chumij nihánj, ne daj chihaa mij se cavij sa' soj a man adonj.

<sup>14</sup> "Ne ase vaa ya'an vaa soj chuguun soj rihaan chumij nihánj a. Ne'en soj se vaa sese naj 'o chuman' raá tacaan, ne quene'en cunudanj yuvij naj chuman' yo' raá tacaan ei.

<sup>15</sup> Ne gaa rmi', ne a 'ó yuvij uta' ya'an raá aga' ya'an ne axrij yuve nij so' rque 'o chrúun ma'. Sese rmi', ne achrón nii ya'an raá aga' ya'an ne uta' nii aga' yo' rej xta', ne daj a nij yuvij atúj rá ve' ro', chuguun ni'yaj nij so' adonj.

<sup>16</sup> Ne veé danj vaa guue soj, ne ase vaa aga' ya'an ro', vaa soj rihaan chumij nihánj, ne sese sa' qui'yaj soj, ne sa' doj xcaj yuvij cuentá, qui'yaj soj ei. Che'é dan se guun na'aj soj quene'en yuvij daj vaa 'yaj soj ma'. Tananj guun niha' rá soj quene'en yuvij se vaa ve'é 'yaj soj, ne che'é dan danj nanj ve'é ca'mij nij yuvij che'é Rej ní' Diose, qui'yaj soj nanj adonj.

*Nana nihánj taj xna'anj se vaa no xcuún ndo'o ní' cunó ní' se-nana Jesucristó a*

<sup>17</sup> "Se guun rá soj se vaa ca'ná' 'unj tiri' 'unj se-tucuanj Moisés tucuaán cuchruj so' gaa naá ma'. Se guun rá soj se vaa ca'ná' 'unj tiri' 'unj nana ca'mii

natáj nij síí nata' se-nānā Diose gaa naá ma'. Nuveé che'e yo' ca'naj ma'. Tanānj ca'naj che'é rej quinavij quisij nu' tucuáan yo', gaa ne nari' nu' soj daj me rá Diose qui'yaj soj adonj.

<sup>18</sup> Ya uxrá cataj xna'anj 'unj rihaan soj se vaa gaa ataa navij chumiij nihánj do', gaa ataa navij xta' nihánj do', ne qui'yaj Diose nu' se vaa me rá Diose qui'yaj Diose rihaan chumiij nihánj, ne che'é dan se tanáj xco ní a 'ó nana rqué Diose rihaan ní canoco' ní ma'.

<sup>19</sup> Dan me se me ma'an 'o síí tirí 'o nana le'ej a'mij nihánj ne ino vaa nana tihāan so' man nij tuvi' so', ne asa' guun chij Diose, ne guun so' síí le'ej uxrá rihaan Diose nanj adonj. Tzaj ne sese me ma'an 'o síí 'yaj ya ndaa vaa taj 'unj nihánj ne tihāan ya so' man tuvi' so' ndaa vaa taj 'unj nihánj, ne síí nihánj ro', me síí guun síí chij rej guun chij Diose vaa güiij adonj.

<sup>20</sup> "O se cataj xna'anj 'unj rihaan soj, ne sese nij síí naqui'yaj cuu se-tucuānj Moisés rihaan yuviij ga nij síí fariseo me se 'yaj sa' nij so' rihaan yuviij, rá nij so', tzaj ne sese se qui'yaj sa' soj doj rihaan nij yuviij ndaa vaa 'yaj nij síí naqui'yaj cuu se-tucuānj Moisés ga nij síí fariseo, gaa ne daj chihāa mij se cayáan soj ga Diose asa' guun chij Diose rihaan chumiij nihánj a man adonj.

*Nana nihánj taj xna'anj se vaa sese axríj yuvāa ní man tuvi' ní, ne tumé ní cacun' a*

<sup>21</sup> "Aj ne'en soj nana nihánj nana ca'na' rihaan nij síí man gaa naá ei: "Se ticavi' soj man yuviij ma'. Dan me se qui'yaj Diose sayuun man cunudanj yuviij ticavi' tuvi' adonj", me nana ca'na' rihaan nij so' a.

<sup>22</sup> Tzaj ne 'unj nihánj me se cataj xna'anj 'unj, ne a me ma'an 'o síí ca'maan rá ni'yaj man tinúú, ne aj tumé so' cacun' rihaan Diose, ne veé danj qui'yaj Diose sayuun man so' uún adonj. Ne a me ma'an síí cataj rihaan tuvi': "Síí snúú rma'an mé so' ei", cataj so' rihaan tinúú so', ne aj tumé ndo'o so' cacun' rihaan Diose nanj adonj. Ne a me ma'an 'o síí cataj rihaan tuvi' se vaa mayán tuvi' so' me se vaa che'é ca'anj ma'an so' rihaan ya'an cacāa so' nanj adonj.

<sup>23</sup> "Che'é dan me sese ca'anj nīcaj so' rasuun rihaan chraan altar, rque so' rasuun guēe rihaan Diose, rá so', ne sese ninuj rá so' se vaa qui'yáa so' cacun' man tinúú so',

<sup>24</sup> ne se guun go' so' rasuun yo' rihaan Diose ma'. Maan se cuchruj so' rasuun yo' rihaan yo'óo, ne ca'anj so' rej yanj tinúú so', gaa ne na'miij sa' so' ga so', gaa ne canīcaj so' rej naj si'yáa so', gaa ne rque so' si'yáa so' rihaan Diose adonj.

<sup>25</sup> "Ne so' me se sese vaa síí taj se vaa nij qui'yáa so' rihaan so', ne gaa tihaj vaj so' chrej ga so', ne ve'é ca'miij so' ga so', cataj so' rihaan so' se vaa: "Ca'ne' rá so', ne se cutá' so' cacun' xráj ma'", cataj so', ne ve'é ca'miij so' ga so' á. Ne sese se qui'yáa so' danj ve'é ca'miij so' ga so' gaa tihaj vaj roj soj chrej rihaan chumiij nihánj, ne nīcaj so' mán so' ca'anj so' rihaan cuese, ne cuese yo' ro', tačuachén mán so' ra'a síí tumé taga', ne so' me síí caxriij taga' mán so',

<sup>26</sup> ne yo' me se guun raan ndo'o so', ne ndaa navij naru'vee so' nu' cacun' qui'yáa so', gaa ne curihanj so' taga' nanj adonj.

*Nana nihánj taj xna'anj se vaa tumé ní man ní se qui'yaj ní cacun' ga yo'ó chana a*

<sup>27</sup> "Aj ne'en soj nana nihánj a: "Orún' nīca soj cotoj ga soj á", me nana ca'na' rihaan soj gaa naá a.

<sup>28</sup> Ne cataj xna'anj 'unj rihaan soj se vaa naj guun síí ni'yaj ni'yaj man yo'ó chana, ne che'é rej guun ndo'o rá so' cotoj so' ga no' ro', ase vaa nimán síí otoj

ga yo'ó chana ro', ta'nga' danj vaa nimán sí ni'yaj ndo'o man yo'ó chana yo' nanj adonj. Ne tumé ya so' cacun' adonj.

<sup>29</sup> Danj nanj uún, ne sese 'o rlij rihaan so' rej nuva' so' me rá qui'yaj cacun', ne táa a se quirii' so' man yo', ne taj se 'yaj ma'. Ca'vee a doj quiri' orún' yo' ne se cacaa nu' nee mán so' ma'.

<sup>30</sup> Danj nanj uún, ne sese 'o ra'á so' rej nuva' so' me rá qui'yaj cacun', ne táa a se ca'ne' so' man yo', ne taj se 'yaj ma'. Ca'vee a doj ca'anj ni'ya orún' yo' ne se ca'anj ni'ya cunudanj nee man ma'án so' ma'.

*Nana nihánj taj xna'anj che'é sí me rá quiri'ij nica' a*

<sup>31</sup> Ne gaa naá me se ca'na' nana nihánj a: “Sese me rá yo'ó so' quiri'ij so' nica' so', ne naxcaj so' 'o yanj cataj xna'anj se vaa ya quiri'ij so' nica' so' á”. Danj vaa nana ca'na' rihaan nij yuvij ei.

<sup>32</sup> Ne cataj xna'anj 'unj rihaan soj se vaa sese quiri'ij yo'ó so' man nica' so', ne sese nuvi' cacun' tumé no' se vaa cotoj no' ga yo'ó chii, ne ma'an sí ri'ij man no' qui'yaj tumé no' cacun' gaa ei. Ne che'é se quiri'ij nica' chana man no', che'é dan xcaj no' yo'ó snó'o, ne ase vaa chana otoj ga naj guun snó'o ro', danj gaa ma'an no', qui'yaj sí quiri'ij man no' adonj. Ne sí xcaj man chana quiri'ij nica' me se ase vaa sí otoj ga nica' yo'ó snó'o ro', vaa uún so' adonj.

*Nana nihánj taj xna'anj se vaa ca'mii ya ní a*

<sup>33</sup> Ne aj ne'en soj nana nihánj nana ca'na' rihaan nij sí man gaa naá adonj: “Sese cata' tu'vá so' rihaan sí 'nij ra'a man ní se vaa qui'yáa so', ne se ca'ne' rá so' qui'yáa so' danj ma'. Maan se ya qui'yáa so' nu' se vaa cataj xna'anj so' rihaan so', gaa ne ca'vee nanj adonj”.

<sup>34</sup> Ne cuano nihánj ro', cataj xna'anj 'unj rihaan soj se vaa asa' ca'mii soj 'o nana guun ya ya rá soj, ne daj chihaa mij se cuta' soj raq xta' ma'. 'O se xta' ro', nicun' ma'an Diose ya ya nanj adonj.

<sup>35</sup> Ne raq chumij se cuta' soj ma'. 'O se chumij nihánj me rej taj tacóo Diose nanj adonj. Ne raq chuman' Jerusalén se cuta' soj ma'. Ése chuman' yo' ne ma'an Diose sí nica' yu'unj man ní nanj adonj.

<sup>36</sup> Ne raq ma'an soj se cuta' soj ma'. 'O se se guun nucua' soj naquiyaj catzji soj yo'ó yuvé raq soj, ne se guun nucua' soj naquiyaj maruu soj yo'ó yuvé raq soj ma'.

<sup>37</sup> Veé dan, ne sese ya a'mii soj, rá soj, ne cataj soj: “Ya ei”. Ne sese ne ya vaa 'o nana, rá soj, ne cataj soj: “Ne ya ma'”, cataj soj á. Inanj danj ca'mii soj ei. Sese nano' soj yo'ó nana, ne chi'ii vaa nimán soj nanj adonj.

*Nana nihánj taj xna'anj daj qui'yaj ní rihaan yuvij yaj chi'ii rihaan ní a*

<sup>38</sup> Aj ne'en soj nana nihánj nana ca'na' gaa naá a: “Sese curihanj rlij rihaan so' qui'yaj tuví' so', ne ca'vee quirii' so' rlij rihaan tuví' so' á. Ne sese curihanj cúu yán' so', qui'yaj tuví' so', ne ca'vee quirii' so' cúu yan' tuví' so' á”. Danj vaa nana ca'na' rihaan yuvij nanj adonj.

<sup>39</sup> Tzaj ne cuano nihánj ro', cataj xna'anj 'unj rihaan soj se vaa se qui'yaj soj sayuun man sí 'yaj sayuun man soj ma'. Tananj sese vaa sí coxro nichrej xruú so', gaa ne ca'ne' rá so' coxro so' nichrej xruú so' uún ei.

<sup>40</sup> Ne sese me rá yo'ó so' cuta' so' cacun' xraá so' rihaan cuese ca'nee so' cotoo nuu so', ne go' uun so' cotoo yo' do', ndaa se-rotó so' do', go' so' man so' ei.

<sup>41</sup> Ne sese ca'ne' yo'ó so' suun rihaan so' ca'anj tanáj so' si'yaj so' yo'ó kilómetro, ne ca'vej so' ca'anj tanáj so' si'yaj so' ndaa vij kilómetro ei.

<sup>42</sup> Sese achíin yo'ò so' rasuun mán so', ne go' so' se achíin man so' ei. Ne sese me rá yo'ò so' raçuíj so' sa'anj man so', ne se cataj so' se vaa taj vaj sa'anj ma'. Raçuíj so' man so' ei.

*Nana nihánj taj xna'anj daj qui'yaj ni' gaa 'ee rá ní' man nij síí taj ri'yunj man ní' a*

<sup>43</sup> "Aj ne'en soj nana nihánj nana ca'na' gaa naá a: "Gaa 'ee rá so' man tuví' so', tzaj ne se guun gaa 'ee rá so' man nij síí taj ri'yunj mán so' ma". Daj vaa nana ca'na' gaa naá nanj adonj.

<sup>44</sup> Tzaj ne cuano nihánj me cataj xna'anj 'unj rihaan soj se vaa no xcuún soj cunu 'ee rá soj ni'yaj soj man nij síí taj ri'yunj man soj, ne cachinj ni'yaj soj rihaan Diose che'é nij síí 'yaj sayuun man soj á.

<sup>45</sup> Gaa ne guun soj ta'níí Rej soj Diose síí nicun' xta' ei. 'Q se Diose 'yaj síí güií, ne o' naán rihaan to'óo nij síí chí'íi do', rihaan to'óo nij síí sa' do', 'yaj Diose, ne aman' rihaan to'óo nij síí 'yaj sa' do', rihaan to'óo nij síí 'yaj chí'íi do', 'yaj uún Diose adonj.

<sup>46</sup> 'Q se sese 'ee rá soj man inanj nij síí 'ee rá man soj, gaa ne me che'é naru'vee Diose rihaan soj, rá soj ga. 'Q se ne'en soj se vaa ndaa nij síí tiha' yu'unj man soj che'é puextó ro', 'ee rá nij so' man tuví' ma'an nij so' adonj.

<sup>47</sup> Che'é dan, sese ve'é a'mii soj ga inanj tinúú soj, ne sa' doj vaa soj rihaan yo'ó nij yuvií, rá soj na'. Taj ma'. Ne ndaa nij síí ne ne'en daj vaa Diose ro', ne'en soj se vaa 'ee rá nij so' man tuví' ma'an nij so' nanj á.

<sup>48</sup> Che'é dan sese nuveé sij tiha' yu'unj do', sij yanj do', me soj, ne no xcuún soj guun soj síí vaa sa' inanj nimán adonj. Ne ase vaa síí sa' inanj me Diose ro', danj gaa ma'an soj, síí sa' inanj guun soj adonj.

## 6

*Nana nihánj taj xna'anj daj qui'yaj ni' gaa rque ní' sa'anj man nij síí nique a*

<sup>1</sup> "Ne cütumé soj man soj gaa 'yaj soj se sa' do', se luj do' á. Se guun rá soj quene'en yuvií man soj ne cataj nij yuvií che'é soj se vaa síí sa' inanj me soj ma'. Sese danj qui'yaj soj, ne daj chíhaa míj se rque Rej soj síí nicun' xta' a doj rasuun sa' man soj a man adonj.

<sup>2</sup> Che'é dan sese me rá so' rque so' sa'anj man nij síí nique, ne se guun rá so' ca'yanj nii chruun a'yánj qui'yáa so', ne ni'yaj yuvií go' so' sa'anj man síí nique, ne cataj nij yuvií se vaa ve'é qui'yáa so' ma'. 'Q se inanj danj 'yaj nij síí nucui' rá gaa vaj nij so' rá ve' tucu'yón ní' se-tucuanj Moisés do', rihaan nij callé do', ne uno cunudanj yuvií, 'yaj nij so' adonj. Ya ya cataj xna'anj 'unj rihaan soj se vaa aj ve'é ca'mii yuvií che'é nij so', tzaj ne a 'ó rasuun se quirí' uún nij so' a ma'. A 'ó xco' se naru'vee Diose rihaan nij so' man adonj.

<sup>3</sup> Tzaj ne so' ro', sese me rá so' rque so' sa'anj man nij síí nique, ne se natá' so' rihaan yuvií daj 'yáa so' ma'. Dan me se daj chíhaa míj se cataj xna'anj so' rihaan ra'á so' rej nichruún so' se vaa rque ra'á so' rej nuva' so' ma'.

<sup>4</sup> Asá' quisíj rque yuve so' sa'anj yo', gaa ne orún' Réé so' Diose me síí quene'en daj qui'yaj yuve so', gaa ne so' me síí naru'vee rihaan so' quene'en cunudanj yuvií nanj adonj.

*Nana nihánj taj xna'anj daj qui'yaj ni' gaa achíin ni'yaj ni' rihaan Diose a*

<sup>5</sup> "Ne gaa achíin ni'yaj soj rihaan Diose, ne se qui'yaj soj se vaa 'yaj nij síí nucui' rá ma'. 'Q se niha' rá nij so' canicun' nij so' rá ve' tucu'yón yuvií se-tucuanj Moisés, ne niha' rá nij so' canicun' nij so' rej nuná tuví' chrej

ca'aan nocoo, ne achíin ni'yaj nij so' rihaan Diose, tzaj ne inanj me rá nij so' quene'en yuvií man nij so', ne ve'é ca'mii yuvií che'é nij so', rá nij so' adonj. Ya ya cataj xna'anj 'unj rihaan soj se vaa aj ve'é ca'mii yuvií che'é nij so', ne aj navij quiri' nij so' tu'vee nij so' vaa, ne a 'ó xco' se naru'vee uún Diose rihaan nij so' a ma'.

<sup>6</sup>Tzaj ne so' ro', gaa me rá so' cachinj ni'yáa so' rihaan Diose, ne asino catuú so' rá ve', gaa ne caráan so' ta'yaa, gaa ne cachinj ni'yaj yuve so' rihaan Rej ní' Diose á. Ne Rej ní' Diose me síí ne'en se vaa achíin ni'yaj niganj so' rihaan so', ne naru'vee so' rihaan so' adonj.

<sup>7</sup>Ne gaa achíin ni'yaj soj rihaan Diose, ne se qui'yaj soj se vaa 'yaj nij síí ne ne'en daj vaa Diose ma'. Dan me se a'mii rma'an ndo'o nij so' nana, tzaj ne ne ne'en nij so' me taj nana yo' ma'. Maan che'é se a'mii a'mii nij so', che'é dan guun niha' rá Diose ne cuno Diose nu' nana a'mii nij so', rá nij so' nanj adonj.

<sup>8</sup>Che'é dan se qui'yaj soj danj ma'. 'O se asij ataa cachinj ni'yaj soj rihaan Rej soj Diose, ne aj ne'en so' nu' se vaa achíin man soj nanj adonj.

<sup>9</sup>"Che'é dan asa' achíin ni'yaj soj, ne nihánj cataj soj á: "Ataj Chij síí nicun' xta', me rá núj xcaj yuvií cuentá se vaa inanj sa' 'yáa so' a.

<sup>10</sup>Ne me rá núj quisij güii guun chij so' rihaan chumii nihánj, ne me rá núj qui'yaj yuvií nu' se vaa me rá so' qui'yaj yuvií a. Dan me se ase vaa 'yaj nij síí man xta' nu' se vaa me rá so' qui'yaj nij so' ro', danj gaa qui'yaj núj sij man rihaan chumii nihánj nu' se vaa me rá so' qui'yaj núj, rá núj a.

<sup>11</sup>Ne rqaé so' nu' rasuun achíin rihaan núj cha núj cuan' á.

<sup>12</sup>Ne caraa x'naa so' che'é xcúun taj xráa núj rihaan so' á. Dan me se ase vaa qui'yaj núj caráj x'naa núj che'é cacun' qui'yaj tuvi' núj rihaan núj ro', ta'nga' danj qui'yáa so' che'é ma'an núj caraa x'naa so' rihaan núj á.

<sup>13</sup>Dan me se caráan ra'á so' xráa núj rihaan chrej chi'ii á. Ne tinanii so' man núj se guun qui'yaj núj cacun' a". Inanj danj ca'mii soj cachinj ni'yaj soj rihaan Diose adonj.

<sup>14</sup>'O se sese caraa x'naa soj che'é cacun' qui'yaj tuvi' soj rihaan soj, ne danj qui'yaj uún Rej soj síí nicun' xta', ne caraa x'naa so' rihaan soj uún adonj.

<sup>15</sup>Tzaj ne sese se ca'vej rá soj caraa x'naa soj che'é cacun' qui'yaj tuvi' soj rihaan soj, ne daj chihaa mij se tinavij Rej soj Diose cacun' tumé ma'an soj a man adonj.

### *Nana nihánj taj xna'anj daj qui'yaj ní' gaa caraa guée ní' rihaan Diose a*

<sup>16</sup>"Ne gaa toco' soj x'naa man soj che'é se aráj guée soj rihaan Diose, ne se qui'yaj soj ndaa vaa 'yaj nij síí nucui' rá ma'. Dan me se gaa aráj guée nij so', ne ase vaa rihaan síí nanó ndo'o rá ro', vaa rihaan nij so', 'yaj nij so', ne anó ndo'o nacaj rihaan nij so', 'yaj uún nij so', ne me inanj rá nij so' quene'en yuvií man nij so' daj 'yaj nij so' gaa ne xcaj nij yuvií cuentá se vaa aráj guée nij so' rihaan Diose, rá nij so' nanj adonj. Ya ya cataj xna'anj 'unj rihaan soj cuano se vaa aj quiri' nij so' tu'vee nij so' vaa, ése aj ve'é ca'mii yuvií che'é nij so' nanj adonj. Ne a 'ó rasuun se quiri' nij so' rihaan Diose a ma'.

<sup>17</sup>Tzaj ne soj ro', ino qui'yaj soj á. Gaa toco' soj x'naa man ma'an soj che'é se aráj guée soj rihaan Diose, ne canaan soj rihaan soj ne caxrii soj casté raa soj á.

<sup>18</sup>Dan me se se guun rá soj quene'en yuvií se vaa aráj guée soj a ma'. Ne ca'vee se taj vaj yuvií quene'en man soj aráj guée soj, tzaj ne quene'en Rej soj Diose daj 'yaj soj, ne so' me síí naru'vee rihaan soj nanj adonj.



*Nana nihánj taj xna'anj se vaa qui'yaj suun ní' che'é yan cumán si'yaj ní' rej xta' a*

<sup>19</sup> "Se qui'yaj suun soj cumán ndo'o si'yaj soj rihaan chumiij nihánj ma'. 'O se rihaan chumiij nihánj mán ndo'o xcuu xluú xij rasuun do', tacunj yoo do', chá si'yaj yuviij nihánj a. Ne vaa síi ituu atúj rá ve' ne 'yaj ituu si'yaj tuvi' uún a.

<sup>20</sup> 'O se taj che'é naqui'yaj ru'vee soj man soj nihánj ma'. Tananj qui'yaj suun ndo'o soj che'é yan cumán si'yaj soj rej xta' á. Dan me se xta' ro', taj se chá si'yaj soj ma'. Ne taj síi qui'yaj ituu si'yaj soj man adonj.

<sup>21</sup> Ne sese inanj che'é rasuun man rihaan chumiij nihánj quinaj nimán soj gaa nanj adonj. Ne sese inanj che'é rasuun man xta' ro', qui'yaj suun soj, gaa ne veé rej xta' ro', ca'anj nimán soj nanj adonj. Me rej ma'an araa sa' soj rasuun, ne veé rej danj vaj nimán soj nanj adonj.

*Nana nihánj taj xna'anj se vaa no xcuún ní' xcax ní' cuentá daj qui'yaj ní' a*

<sup>22</sup> "Rlij rihaan ní' me ya'an nicaj yu'unj man ní' ei. Dan me se sese rlij rihaan ní' ro', ni'yaj yo' ne nuu sa' rá yo', gaa ne nu' nee man ní' ro', sa' vaa, ne adi' se chuguun aga' ya'an ro', danj chuguun man ní' gaa sa' rihaan ní' adonj.

<sup>23</sup> Tzaj ne sese rlij rihaan ní' ro', ni'yaj yo' ne inanj uun chi'ij rá yo', gaa ne nu' nee man ní' ro', uun chi'ij rá, gaa ne adi' síi nicun' yan rmi' ne cunudanj man so' ro', rmi', ne danj vaa síi uun chi'ij rá, ne rmi' uxrá nu' man so' adonj.

*Nana nihánj taj xna'anj se vaa se guun nucuaj ní' ca'nej nucuaj ní' nimán ní' qui'yaj suun ní' se-suun Diose, sese me rá ní' qui'yaj suun ní' che'é sa'anj a*

<sup>24</sup> "Taj vaj síi guun nucuaj qui'yaj suun sa' rihaan vij ru'vee ma'. Sese qui'yaj suun 'o so' rihaan vij ru'vee, ne nachri' so' ni'yaj so' man 'o ru'vee yo', ne caran' rá so' ni'yaj so' man yo'ó ru'vee yo' a. Se guun nucuaj so' caran' rá so' ni'yaj so' man vij ru'vee ma'. Ne xa' soj, tzaj ne se ca'vee qui'yaj suun soj che'é Diose ne qui'yaj suun soj che'é nij rasuun man rihaan chumiij nihánj a ma'.

*Nana nihánj taj xna'anj se vaa ne nó xcuún ní' nano ndo'o rá ní' che'é se chá ní' do', che'é yatzij cunuú ní' do' a*

<sup>25</sup> "Che'é dan cataj xna'anj 'unj rihaan soj se vaa taj che'é nano ndo'o rá soj che'é soj ma'. Ne che'é dan se nanó rá soj che'é se chá soj do', che'é yan quirij soj se caráan xráa soj do', se nanó rá soj ma'. Dan me se aj ne'en soj vaa i'na' soj, qui'yaj Diose, ne se guun nucuaj Diose rque Diose se chá soj, rá soj gaa a na'. Daj chihaa mij se guun danj rá soj ma'. Ne Diose me síi ca'vee rque se chá soj ei. Ne Diose me síi qui'yaj nee man soj, ne se guun nucuaj Diose rque Diose yatzij caráan xráa soj, rá soj gaa a na'. Daj chihaa mij se guun danj rá soj ma'. Ne Diose me síi ca'vee rque se caráan xráa soj ei.

<sup>26</sup> "Xcax soj cuentá daj 'yaj nij xtâj vaj xta', ne ne unó nij xo' 'núu, ne ne rii nij xo' naa, ne ne araa nij xo' tan' rá cuchruu, tzaj ne Rej soj síi nicun' xta' ro', a'vee rque se chá nij xo' ei. Ne táa a soj, ne sa' doj vaa soj rihaan xtâj ne'en Diose a adonj. Ya sa' doj vaa soj chuguanj.

<sup>27</sup> Ne nda' se nanó ndo'o rá soj che'é yan chre' vaa soj, tzaj ne a 'ó xco' se guun nucuaj soj cachij xcaan soj doj qui'yaj ma'an soj ma'. Maan Diose ro', me síi ne'en daj gaa cachij soj, ne che'é dan taj che'é nano rá soj a ma'.

<sup>28</sup> "Ne me che'é nanó rá soj che'é yatzij caráan xráa soj ga. 'O se xcax soj cuentá ni'yaj soj nij yâj man tacaan se vaa ve'é ndo'o vaa nij yâj man tacaan

ei. Ne 'yaj suun nij yâj, tzaj ne ma'an Diose ro', me síi sa' ndo'o vaa qui'yaj man nij yâj adonj. Ne ne rii nij yâj yu'vej ma'.

<sup>29</sup> Tzaj ne adj' se vaa síi ru'vee ne sa' uxrá vaa sagan' so' ro', vaa nij yatzíj nuu nij yâj adonj. Dan me se cataj xna'anj 'unj rihaan soj se vaa síi cu'naj Salomón síi cane gaa naá, ne ve'é uxrá vaa yatzíj nuu so', qui'yaj cunudanj sa'anj vaa rihaan so', tzaj ne nij doj vaa yatzíj nuu so' rihaan nij yâj man tacaan yo', qui'yaj Diose adonj.

<sup>30</sup> Dan me se danj nanj nij yâj man tacaan yo', tzaj ne sa' uxrá vaa nij yatzíj nuu nij yâj yo', 'yaj Diose, ne cuan' ro', mán nij yâj tacaan, tzaj ne a'yuj ne ca'ne' nii man nu' coj do', yâj do', man tacaan, ne caraa nii man yo' rihaan ya'an, ne cacaa nu' nij yâj yo' nanj adonj. Ne a doj yu'vee taj nó yâj yo' a ma'. Táa a soj yuvii, ne se nanó rá soj ma'. Diose me síi rque sagan' soj adonj. Tzaj ne ne guun ya sa' rá soj se vaa Diose me síi racúij ya man soj man adonj.

<sup>31</sup> "Dan me se se nanó ndo'o rá soj cataj soj: "Me se cha ní' ga. Me se co'o ní' ga. Me se caráán xráá ní' ga". Se guun rá soj danj ma'.

<sup>32</sup> 'O se nij síi ne ne'en daj vaa Diose ro', inanj 'yaj suun ndo'o nij so' che'é rasuun man rihaan chumií nihánj adonj. Tzaj ne nu' rasuun achiin man soj ro', aj ne'en Rej soj síi nicun' xta' se vaa achiin nu' rasuun yo' man soj adonj.

<sup>33</sup> Che'é dan nanó' soj rej daj qui'yaj soj ne guun chij Diose nimán soj ne cunqu sa' nimán soj, gaa ne rque Diose nu' rasuun yo' man soj ei.

<sup>34</sup> Che'é dan se se nanó rá soj che'é se vaa cachíin rihaan soj a'yuj ma'. 'O se vaa sayuun 'na' daj a 'o 'o güii adonj. Che'é dan xcaj soj cuentá daj qui'yaj soj güii cuan', ne se nanó rá soj che'é se vaa qui'yaj soj güii a'yuj ma'.

## 7

*Nana nihánj taj xna'anj daj qui'yaj ní' gaa ca'mii ní' ga tinúú ní' che'é cacun' tumé tinúú ní' a*

<sup>1</sup> "Se guun niha' rá soj cuta' soj cacun' xráá tinúú soj, gaa ne taj cacun' cuta' Diose xráá ma'an soj man adonj.

<sup>2</sup> Dan me se sese guun niha' rá soj cuta' soj cacun' xráá tinúú soj, ne cuta' Diose cacun' yo' xráá ma'an soj ei. Ne sese se cuta' soj cacun' xráá tinúú soj, ne cunqu 'ee rá Diose man ma'an soj uún nanj adonj.

<sup>3</sup> Me che'é guun chree rá so' ni'yaj so' ni'ya nuu rihaan tinúú so' ga. Ne ne ni'yaj so' chruun manj nuu rihaan ma'an so' a.

<sup>4</sup> Asa' ca'vee cataj so' rihaan tinúú so', "rque so' rihaan so' quirii 'unj ni'ya á". Se guun a doj cataj so' danj tihá' so' man tinúú so' ma'. 'O se ni'yaj so', ne chruun manj vaa guee nuú rihaan so' ei.

<sup>5</sup> Síi nucui' rá mé so' ei. Asino quirii so' chruun manj nuu rihaan so', gaa ne ca'vee quirii so' ni'ya nuu rihaan tinúú so' adonj. Dan me se ase vaa aráán ni'ya rihaan yuvii ro', danj vaa aráán rihaan yuvii 'yaj cacun' ata yuvii adonj.

<sup>6</sup> "Tzaj ne ne'en soj se vaa ne nó xcúún soj go' soj rasuun guee man chuvee ma'. Ne se caraa soj chruj perlá tu'vee ndo'o rihaan xcáá ma'. 'O se chuvee yo' ro', canicaj ne cha man soj, ne xcáá yo' ro', tuguáj che'é xcáá man se sa' yo', ne quinavij nu' yo' xtun', qui'yaj xcáá nanj adonj. Ne se sa' yo' me chrej noco' ní' adonj. Che'é dan sese na'vej uxrá rá yuvii cunó yuvii chrej nago' soj rihaan nij yuvii, ne ase vaa xcáá do', ase vaa chuvee do', danj vaa nij yuvii ei. Ne se nago' soj doj chrej sa' man nij yuvii 'yaj danj a ma'.

*Nana nihánj taj xna'anj se vaa no xcúún ní cachinj ni'yaj ní rihaan Diose che'é rasuun achiin man ní' ei*

<sup>7</sup> "Cachinj soj se vaa achiin man soj rihaan Diose, ne so' me sí rque man soj, ne nano' soj rasuun achiin man soj, ne nari' soj rasuun yo', ne ase vaa 'yaj sí tica'mii ta'yaa tucua' tuvi' ro', danj qui'yaj soj ga Diose, ne ca'nuu Diose ta'yaa yo', ne rque Diose rasuun achiin man soj adonj.

<sup>8</sup> "Q se sí achín rasuun rihaan Diose ro', quiri' so' rasuun achiin man so', ne sí nano' rasuun achiin man ro', quiri' so' rasuun yo', ne sí tica'mii ta'yaa rej yanj Diose ro', ca'nuu Diose ta'yaa, ne quiri' sí tica'mii ta'yaa rasuun achiin man so' adonj.

<sup>9</sup> Xcaj soj cuentá se vaa ma'an soj, nanj yuvii me soj, tzaj ne sese achín ta'nii yo'o soj chraa cha yo' man soj, ne se ca'vee nano' soj yahij ne caxrii soj ston yo' ma'.

<sup>10</sup> Ne sese achín ta'nii soj ne xcaj cha yo' man soj, ne se ca'vee nano' soj xcuáa ne caxrii soj ston so' ma'.

<sup>11</sup> Dan me se danj nanj soj, ne sí chi'ii nimán me soj, tzaj ne ne'en soj rque soj se sa' cha ta'nii soj ei. Che'é dan táa a Rej soj sí nicun' xta', ne sij sa' inanj me so', ne so' me sí rque ya rasuun sa' man nij sí achín rasuun man so' nanj adonj.

*Nana nihánj taj xna'anj daj qui'yaj ní rihaan tuvi' ní' a*

<sup>12</sup> "Dan me se daj se uun rá soj qui'yaj sa' yuvii rihaan soj ro', ta'nga' danj qui'yaj sa' soj rihaan tuvi' soj á. Sese danj qui'yaj soj rihaan tuvi' soj, ne sí uno nu' se-tucuanj Moisés me soj, ne sí uno nu' se-nana nij sí nata' se-nana Diose gaa naá me uún soj adonj.

*Nana nihánj taj xna'anj che'é vij chrej a*

<sup>13</sup> "Ase vaa vij chrej vaa rej vaa rihaan soj, ne dan me se chrej ca'aan me yo'o chrej yo', ne caxra' ndo'o vaa rej nayón yuvii, ne rihaan ya'an ro', vaj chrej yo' nanj adonj. Ne man uxrá yuvii vaj chrej yo' ei. Se ca'anj soj chrej yo' ma'. Nanj vaa chrej ca'anj soj ei. Chrej catuun me chrej ca'anj soj,

<sup>14</sup> ne chruj vaa rej nayón yuvii a. Sayuun ndo'o vaa vaj yuvii chrej yo', tzaj ne vaj chrej yo' rej gaa i'na' yuvii cayáan yuvii ga Diose nu' cavii nu' ca'anj adonj. Tzaj ne doj nij yuvii nari' chrej catuun nanj ei.

*Nana nihánj taj xna'anj daj gaa qui'yaj ní quene'en ní' daj vaa nimán yuvii a*

<sup>15</sup> "Vaa yuvii taj se vaa me nij so' sí nata' se-nana Diose, tzaj ne ne ya a'mii nij so' ma'. Cutumé soj man soj, se gaa nanj qui'yaj nij so' sayuun man soj á. Dan me se vaa güii cuchí' nij so' rihaan soj, ne ase vaa matzinj ro', danj gaa nij so' cuchí' nij so' rihaan soj, ne ni'yanj ndo'o ca'mii nij so' rihaan soj, tzaj ne nimán nij so' ro', ase vaa nimán xca'yanj ca'nu' ro', gaa nimán nij so', guun rá nij so' qui'yaj nij so' sayuun man soj nanj adonj.

<sup>16</sup> Che'é dan xcaj soj cuentá ni'yaj soj man nij so' daj qui'yaj nij so', gaa ne quene'en nij soj daj vaa nimán nij so' ei. Uta nii chruj chá raá chruun tanj, rá soj na'. Taj ma'. Ne uta nii chruj chá raá coj yâ ya'aa, rá soj na'. Taj ma'.

<sup>17</sup> Dan me se chruun sa' ro', man chruj chá raá a. Ne chruun tanj ro', man chruj xnaj raá uún a. Sese chruu chruun, ne se cumán chruj sa' raá chruun yo' a ma'.

<sup>18</sup> Chruun sa' ro', se guun cumán chruj nij raá ma'. Ne chruun nij ro', se guun cumán chruj sa' raá ma'. Ase vaa chruun yo' ro', danj vaa nimán yuvii, ne ase vaa chruj yo' ro', danj vaa rasuun 'yaj yuvii adonj.

19 Ne sese nuvi' chruj sa' raq 'o chruun, ne a'ne' nii man chruun yo', ne axrj'j ya'an nii man chruun yo' nanj adonj. Ne ase vaa ran' chruun yo' ro', ta'nga' danj quiran' uun nij yuvij 'yaj se chi'ij nanj adonj.

20 Dan me se sese xcaj soj cuentá ni'yaj soj man yuvij, gaa ne quene'en soj daj vaa nimán nij yuvij, gaa ne quene'en soj daj yuvij me nij so' adonj.

*Nana nihánj taj xna'anj me sí cayáan ga Diose asa' guun chij Diose rihaan chumij nihánj a*

21 "Ne'en soj se vaa man ndo'o yuvij taj rihanj se vaa uno nij so' rihanj, tzaj ne tu'va rma'an ta'aj nij so' nanj á. Nuveé cunudanj nij sí taj ne'en manj ca'anj cayáan ga Diose asa' guun chij Diose rihaan chumij nihánj ma'. Tanaanj orún' me se inanj nij sí uno rihaan Réé 'unj sí nicun' xtá' me sí cayáan ga so' nanj adonj.

22 Ne güii ca'ne' 'unj cacun' che'é yuvij me se cumán ndo'o yuvij cataj rihaan 'unj: "Sí uno rihaan so' me núj, Señor. Aj nata' núj nana rque so' man núj rihaan yuvij á. Ne cata' tu'va núj se-chuvií so', ne quirii núj nana chree nimán yuvij á. Ne qui'yaj suun ndo'o núj suun sa' che'é so' adonj". Danj ca'mij nij yuvij yo' rihaan 'unj vaa güii nanj adonj.

23 Gaa ne cataj yá 'unj rihaan nij yuvij a: "A 'o güii ne ne'én 'unj man soj ma'. Maan sí 'yaj inanj cacun' me soj nanj adonj. Naxuun soj man soj rihanj á". Danj cataj 'unj rihaan nij sí 'yaj cacun' vaa güii nanj adonj.

*Nana nihánj taj xna'anj daj quiran' nij sí uno rihaan Jesucristó do', nij sí ne uno rihaan Jesucristó do' a*

24 "Dan me se a me ma'an sí uno sa' nana nihánj nana cataj xna'anj 'unj rihaan soj ne 'yaj so' ndaa vaa taj 'unj, ne ase vaa 'o sí cune' ve' tucua' rihaan yuvej vaa so' ei. Sí cune' ve' yo' me se sí acaj ndo'o cuentá me so', ne cune' so' ve' yo' rihaan 'o yuvej adonj.

25 Gaa ne ca'na' maan, ne go' ndo'o maan raa ve', ne cavii ni'yoy chráá, ne ca'na' go' tacóo ve', ne ca'na' uxrá nana yuvaá, ne go' rihaan ve' yo' a. Tzaj ne ne canee ve' yo' a ma'. 'O se raan inanj ne ve' yo' rihaan yuvej nanj adonj.

26 Tzaj ne sí na'vej rá cunq nana nihánj nana cataj xna'anj 'unj rihaan soj me se ase vaa sí cune' ve' rihaan yo'óo vaa so' adonj. Ne sí ni'yon rmiij me so', ne cune' so' ve' rihaan yo'óo chruu,

27 ne veé dan, gaa ca'na' uxrá maan yuvaá go' yo' xráá ve', ne cavii ni'yoy chráá, ne ca'na' na xee go' na xee tacóo ve', ne ca'na' uxrá nana yuvaá ne go' xráá ve' yo' a. Veé dan, ne canee nu' ve' tucua' sí ni'yon yo' nanj adonj. Che'é dan xcaj soj cuentá, ne ve'é cunq soj nana nihánj, ne se quiran' soj sayuun ma'. —Inanj nana nihánj ca'mij Jesucristó rihaan nij sí tucu'yón se-nana so' a.

28 Veé dan, ne quisij tucu'yón Jesucristó nu' nana nihánj rihaan nij yuvij, gaa ne caraya'anj ndo'o nij yuvij nocq' man so' che'é nana nihánj, nana cataj xna'anj Jesucristó rihaan nij so' a.

29 'O se xcaj nij yuvij cuentá se vaa ase vaa a'mii 'o sí nicaj suun avii tu'va ro', vaa a'mii Jesucristó, rá nij so' a. Ne cju doj vaa se-nana so' ga se-nana nij sí naqui'yaj cju se-tucuanj Moisés, rá nij so' a.

## 8

*Nana nihánj taj xna'anj daj vaa nahuun sa' 'o sí ran' luj ri'yuj, qui'yaj Jesucristó a*

<sup>1</sup> Gaa ne nanij Jesucristó quiy yo', ne cachéé ndo'o yuvij ga so' a.

<sup>2</sup> Dan me se cuchi' yo'o síi ran' luj ri'yuj rihaan Jesucristó, ne canicun' ruj so' rihaan Jesucristó, ne cataj so':

—Sese me rá so', ne ca'vee ca'nee so' chi'ij xráj, Señor —taj so' rihaan Jesucristó a.

<sup>3</sup> Gaa ne cuta' Jesucristó ra'a Jesucristó raá síi ran', ne cataj Jesucristó:

—Me raj qui'yáj danj ei. Nahuún so', qui'yáj adonj —taj Jesucristó rihaan so' a.

Nu' danj cataj Jesucristó, ne nu' quinavij luj xráá síi ran' a.

<sup>4</sup> Gaa ne cataj Jesucristó rihaan so' a:

—Cutumé so' mán so' se cataj xna'anj so' rihaan yuvij che'é se qui'yáá 'unj che'é so' ma'. Maan se cuchi' so' rihaan xrej, ne tijaán so' mán so' rihaan xrej se vaa nahuún so', ne rque so' rihaan Diose se vaa cataj síi cu'naj Moisés gaa naá ndaa vaa no xcuún so' rque so' rihaan Diose á. Gaa ne xcáj nij xrej cuentá se vaa nahuún so' qui'yáj adonj —taj Jesucristó rihaan síi nahuun yo' a.

*Nana nihánj taj xna'anj se vaa nahuun se-mozó yo'o tanuu capitán, qui'yaj Jesucristó a*

<sup>5</sup> Dan me se cuchi' Jesucristó chuman' Capernaum, ne catúj so' chuman' yo', ne cuchi' yo'o tanuu capitán rihaan so' a. Ne so' ro', me síi rii ta'nga' rihaan 'o cientó tanuu adonj. Dan me se cachúin ni'yaj so' rihaan Jesucristó,

<sup>6</sup> cataj so':

—Canó chi'ij man se-mozó 'unj, Señor. Ne ne nasqui' so' ma'. 'O se yo'o naj so' rá ve', ne ran' uxrá so' sayuun, 'yaj chi'ij nanj á —taj tanuu capitán yo' rihaan Jesucristó a.

<sup>7</sup> Ne cataj Jesucristó rihaan so':

—Ca'anj ní', gaa ne nahuun so', qui'yáj á —taj Jesucristó a.

<sup>8</sup> Gaa ne cataj uún tanuu capitán yo':

—'O se nuveé sjj sa' mé 'unj ma'. Ne nó xcuún 'unj catuú so' rá ve' tucuj qui'yáj a ma'. Maan se ca'ne' uun so' suun se vaa nahuun se-mozó 'unj, gaa ne nahuun ma'an so' adonj.

<sup>9</sup> 'O se vaa síi rii ta'nga' rihaan 'unj, ne rii ta'ngá' 'unj rihaan tanuu, ne taj xna'anj 'unj rihaan tanuu se vaa ca'anj nij so', ne 'anj nij so', ne taj xna'anj 'unj rihaan nij so' se vaa ca'na' nij so', ne 'na' nij so' rihaan 'unj, ne taj xna'anj 'unj daj qui'yaj nij so', ne veé danj 'yaj tanuu adonj. Ne ne'én 'unj se vaa ase vaa rii ta'ngá' 'unj rihaan nij tanuu nocó' manj ro', danj rii ta'nga' guee so' rihaan chi'ij anó man yuvij nanj á —taj tanuu capitán yo' rihaan Jesucristó a.

<sup>10</sup> Dan me se, gaa cuno Jesucristó nana ca'mii tanuu capitán yo', ne ca'anj rá Jesucristó, ne cataj so' rihaan nij síi nocó' rej xco so' a:

—Ya ya cataj xna'anj 'unj rihaan soj se vaa taj vaj a 'ó rej ne narij man yo'o síi israelitá síi cuchumán ndo'o rá nana a'mii 'unj ndaa vaa amán rá tanuu capitán nihánj a ma'.

<sup>11</sup> Ne cataj xna'anj 'unj rihaan soj se vaa güii guun chij Diose rihaan chumij nihánj ro', ca'na' ndo'o yuvij man cunu' chumij, ne cayáán nij so' rihaan se-mesa Diose, ne cha nij so' chraa ga síi cu'naj Abraham do', ga síi cu'naj Isaac do', ga síi cu'naj Jacob do', adonj.

<sup>12</sup> Ne nij síi israelitá ro', no xcuún nij so' cuchuman rá nij so' ni'yaj nij so' manj, ne sese cuchuman rá nij so' ni'yaj nij so' manj, ne ca'vee cane nij so'

uún gā Dioṣe nanj á. Tzaj ne na'vej rá nij so' a man adonj. Che'é se na'vej rá nij so' qui'yaj nij so' danj, che'é dan quiri'lj gan' ndo'o nii man nij so' rej rmj', ne ta'vee uxrá nij so', ne ndaa chá ruj ma'an nij so' cúu yan' nij so' nanj adonj. Danj quirān' nij so' che'é se na'vej rá nij so' cuchuman rá nij so' nī'yaj nij so' manj nanj á —taj Jesucristó rihaan nij yuvij canoco' man so' a.

<sup>13</sup> Canicaj uún Jesucristó cataj Jesucristó rihaan tanuu capitán:

—Ca'vee ca'anj so' yaj a. Ya cuchumán rá so' se vaa nahuun se-mozó so' qui'yáj a. Ne nahuun so' ei —taj Jesucristó rihaan so' a.

Ne veé maan orá yo' ro', nahuun se-mozó tanuu capitán yo', qui'yaj Jesucristó adonj.

*Nana nihánj taj xna'anj daj qui'yaj Jesucristó, nahuun nii chej Pedró do', que'ee uxrá yo'ó yuvij do', qui'yaj Jesucristó a*

<sup>14</sup> Gaa ne ca'anj Jesucristó tucúá síí cu'naj Pedró, ne quene'en so' se vaa naj nii chej Pedró ran' no', ne caxrij uxrá cachi' man no' a.

<sup>15</sup> Ne quita'aa Jesucristó ra'a no', gaa ne veé maan orá dan nahuun no', qui'yaj Jesucristó, ne naxagaa no', ne qui'yaj chuvij no' chá nij so' nanj adonj.

<sup>16</sup> Rej ca'anj güii cuchi' yuvij rihaan Jesucristó a. Dan me se nicaj nij yuvij man que'ee uxrá síí nuu nana chree nimán, cuchi' nij yuvij rihaan Jesucristó, ne cataj xna'anj uun Jesucristó rihaan nij nana chree se vaa naxuun nij so' man nij so', gaa ne, veé dan, ne curihanj nij nana chree nimán nij yuvij, gaa ne cunuun sa' nimán nij yuvij yo' cuaj nanj adonj. Ne quinahuun sa' cunudanj nij síí ran', qui'yaj uún Jesucristó a.

<sup>17</sup> Dan me se quisij ya nu' nana nihánj nana ca'mii síí cu'naj Isaías síí nata' se-nana Dioṣe gaa naá, se vaa cataj so': “Ninaj ní, ne canó chi'ij man ní, tzaj ne nahuun ní, qui'yaj síí ca'na' vaa güii nanj adonj”, taj síí cu'naj Isaías gaa nata' so' adonj.

*Nana nihánj taj xna'anj daj ca'mii Jesucristó rihaan vij síí tihaj guun rá canoco' man so' a*

<sup>18</sup> Quene'en Jesucristó se vaa man ndo'o yuvij anicaj rej nicun' so' ni'yaj man so' a. Che'é dan ca'ne' so' suun rihaan nij síí tucuyón se-nana so' se vaa ca'anj nij so' ga so' ndaa rnej na lacuaná cu'naj Galilea a.

<sup>19</sup> Gaa ne cuchi' yo'o so' rihaan Jesucristó a. So' ro', me síí naquiyaj cuu se-tucuanj Moisés rihaan yuvij adonj. Ne cataj so' rihaan Jesucristó a:

—Canocó' 'unj mán so' daj rej ma'an vaj so', maestro —cataj so' rihaan Jesucristó a.

<sup>20</sup> Gaa ne cataj ya Jesucristó se vaa ran' so' chéé so' a:

—'Q se nij chunee ro', otoj sa' nij xo' rá yu'uj taj rque yo'óo, ne nij xtâj chéé xta' ro', vaa saca' nij xo' a. Ne xa' 'unj sij ca'néé Dioṣe nicaj yu'unj man yuvij, tzaj ne taj a 'ó rej quináá 'unj cotoj 'unj a ma' —taj Jesucristó rihaan so' a.

<sup>21</sup> Ne vaa yo'ó síí tucuyón se-nana Jesucristó cuchi' rihaan so', ne cataj so':

—Ca'vej so' nanj tucua, ne ndaa cavi' réj, gaa ne cachin' 'unj man réj, gaa ne canocó' 'unj mán so', Señor —taj yo'ó so' a.

<sup>22</sup> Tzaj ne cataj Jesucristó rihaan so' a:

—Ca'ne' rá so' cachin' ma'an nij síí cavi' nimán man tuvi' so' xngá á. Tzaj ne cuano nihánj ro', no xcúun so' yo'o canocó' so' manj adonj —taj Jesucristó rihaan yo'ó so' a.

*Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a*

23 Gaa ne catúj Jesucristó rque rihoo chéé rihaan na, gaa ne catúj nij síí tucu'yón se-nanā so' rque rihoo ga so' a.

24 Veé dan, ne nasqui' nucuaj ndo'o rihaan na lacuaná, ne me ndo'o rá na yo' guun nucuaj yo' caráan yo' xráá rihoo a. Ne veé dan vaj Jesucristó, ne cotoj so' adonj.

25 Gaa ne ca'anj nij síí tucu'yón se-nanā Jesucristó rej naj so' cotoj so', ne narii nij so' nej rihaan so', ne cataj nij so':

—Tinanii so' man ní' se cavi' nu' ní', man Señor —taj nij so' rihaan Jesucristó a.

26 Dan me se ma'an Jesucristó cataj, ne:

—Me che'é chu'vi' ndo'o nimán soj ga. Yo' me rej ataa cuchuman sa' rá soj ni'yaj soj manj adonj —taj Jesucristó rihaan nij so' a.

Gaa ne canicun' caya so', ne caxrj yuvaa so' man na do', man nanā do' a. Gaa ne canicun' dínj uxrá rihaan na lacuaná yo', qui'yaj Jesucristó nanj adonj.

27 Ne chucu'vi' nij snó'o yo' ni'yaj nij so' man Jesucristó, cataj nij so':

—Daj sij me síí nihánj ga. 'O se ndaa nanā ndaa na uno a'mii so' ason —taj nij so' rihaan tuvi' nij so' a.

*Nanā nihánj taj xna'anj se vaa quirii Jesucristó man nij nanā chree nimán vij snó'o a*

28 Gaa ne cuchi' Jesucristó ndaa rnej na lacuaná yo' rej ne nij síí man chuman' cu'naj Gadara a. Ne vaa yu'uj yuvej, rej cachin' nij yuvi' xngá a. Dan me se cavii vij snó'o yu'uj yuvej yo', ne cuchi' roj so' rihaan Jesucristó a. Roj so' me síí nuu nanā chree nimán, ne yuvaa ndo'o roj so' adonj. Che'é roj so' na'vee cachēn yuvi' rej yo' a ma'.

29 Dan me se caguáj roj so' rihaan Jesucristó, cataj roj so':

—Veé ne'en núj se vaa ta'nij Diose mé so' á. Me che'é ca'ná' so' rej ne núj ga. Ca'ná' so' qui'yáá so' sayuun man núj na'. 'O se ataa doj quisij güii qui'yáá so' sayuun man núj adonj —taj roj so' rihaan Jesucristó a.

30 Dan me se rej xcō roj so' ro', vaj que'ee xcáá chá coj man tacaan a.

31 Ne nij nanā chree nuu nimán roj snó'o yo' ro', cachín ni'yaj nij so' rihaan Jesucristó, cataj nij so':

—Sese quirii so' man núj nimán roj snó'o nihánj, ne qui'yáá so' se ndo'o ca'nej so' man núj, catuū núj nimán xcáá yo' ruguanj —taj nij nanā chree yo' rihaan Jesucristó a.

32 —Ca'anj soj cuaj á —taj Jesucristó rihaan nij so' a.

Gaa ne ca'anj nij so' catúj nij so' nimán xcáá yo', ne dan me se ruvaa uxrá tacaan nicun' tu'va na lacuaná rej vaj nij xcáá yo', ne gaa catúj nij nanā chree nimán nij xcáá yo' me se cunánj ndo'o nij xo' ca'anj xo', ne veé danj vaj nij xo', ne quinj cunudanj nij xo' rque na, ne canó xráá nij xo', qui'yaj na nanj adonj.

33 Ne nij síí tumé xcáá yo' ro', cunánj nij so' ca'anj nij so' ndaa chuman', ne catúj nij so' chuman', ne cataj xna'anj nij so' rihaan nij síí man chuman' yo' nu' se vaa quiran' roj snó'o do', nij xcáá do' a.

34 Gaa ne curihanj cunudanj nij síí man chuman' yo', guun rá nij so' narj' nij so' man Jesucristó a. Dan me se quene'en nij so' man so', ne cachín ni'yaj nij so' rihaan so' se vaa curihanj so' rej yanj nij so' ca'anj so' rej yanj a.

## 9

*Nana nihánj taj xna'anj se vaa nahuun sa' 'o sí na'vee cachee, qui'yaj Jesucristó a*

<sup>1</sup> Gaa ne cavii Jesucristó rihoo chée rihaan na, ne ca'anj so' chuman' cayáan so', ne catúj so' chuman' yo' a.

<sup>2</sup> Ne veé nicaj nii man 'o sí na'vee cachee táa rihaan yuvéé, ne ca'na' nii rihaan Jesucristó a. Ne quene'en Jesucristó se vaa cuchumán uxrá rá nij yuvij se vaa nahuun sa' sí na'vee cachee yo' qui'yaj so' a. Che'é dan cataj so' rihaan sí ran' yo' a:

—No xcúun so' guun niha' rá so' che'é se navij cacun' xráá so', nanj tinuj —taj Jesucristó rihaan sí na'vee cachee yo' a.

<sup>3</sup> Dan me se cane doj sí naqui'yaj cju se-tucuanj Moisés rihaan yuvij rá ve' ga Jesucristó, ne cataj nij so' rihaan tuvi' nij so' a:

—Nij vaa nana ca'mii sí nihánj rihaan Diose á. 'O se orún' Diose no xcúun cataj se vaa navij cacun' xráá yuvij á —taj nij sí tucu'yón se-tucuanj Moisés ni'yaj nij so' man Jesucristó a.

<sup>4</sup> Ne quene'en Jesucristó me nana guun rá nij so' ca'mii nij so', ne che'é dan cataj so':

—Me che'é avii ndo'o nana chi'ij raq soj ga.

<sup>5</sup> Tu'va ruma'an 'unj se vaa navij cacun' xráá sí nihánj, rá soj a na'. Ca'vee cataj un ní' navij cacun' xráá sí nihánj na'. Ase ca'vee doj cataj ní' naxagaa so', ne cachee so' cuaj, cataj ní' xa'.

<sup>6</sup> Dan me se me rá 'unj xcaj soj cuentá se vaa sí ca'née Diose nicaj yu'unj man yuvij mej ne no xcúun 'unj tinaví 'unj cacun' xráá nij yuvij man rihaan chumij nihánj adonj —taj Jesucristó rihaan nij so' a.

Dan me se cataj Jesucristó rihaan sí na'vee cachee a:

—Nacue so' tuvée so', ne nan' so' tucua so' á —taj Jesucristó rihaan sí naj rihaan yuvéé yo' a.

<sup>7</sup> Gaa ne naxagaa so', ne cavii so', ne quinan' so' tucua so' adonj.

<sup>8</sup> Ne quene'en nij yuvij se vaa nahuun sa' so', qui'yaj Jesucristó, ne che'é dan chucu'vi' nimán nij so', quene'en nij so' Jesucristó, ne ve'é ndo'o ca'mii nij so' che'é Diose, se vaa guun nucuaj Jesucristó racuj ndo'o Jesucristó man yuvij, qui'yaj Diose adonj.

*Nana nihánj taj xna'anj se vaa cataj xna'anj Jesucristó rihaan sí cu'naj Mateo se vaa canoco' so' man Jesucristó a*

<sup>9</sup> Gaa ne cavii Jesucristó rej yo', ne quene'en so' man yo'o sí yanj 'o ve' a'néj nii puextó man yuvij a. Mateo cu'naj sí ne rej yo' a.

Dan me se cataj Jesucristó rihaan so', ne:

—Canocó' so' manj, ca'anj ní' á —taj Jesucristó rihaan so' a.

Gaa ne naxumaan so', ne canoco' so' man Jesucristó, ca'anj so' a.

*Nana nihánj taj xna'anj se vaa me rá Jesucristó racuj so' man nij sí tumé cacun' a*

<sup>10</sup> Dan me se 'o güii cayáan Jesucristó rá ve', ne ca'na' ndo'o tuvi' so' sí a'néj puextó do', yo'ó nij sí tumé ndo'o cacun' do', ne catúj nij so' rá ve', ne ca'anj cayáan nij so' ga Jesucristó, ne dan me se man rcua'aan nij sí tucu'yón se-nana Jesucristó do', ne chá cunudanj nij so' chraa a.



<sup>11</sup> Ne quene'en nij síi fariseo se vaa chá Jesucristó chraa gá nij síi a'néj puextó dɔ', gá yo'ó nij síi tumé ndo'o cacun' dɔ', ne xná'anj nij so' man nij síi tucu'yón se-nānā Jesucristó, cataj nij so':

—Síi tucu'yón nana rihaan soj ro', me che'é chá so' chraa gá nij síi a'néj puextó dɔ', gá yo'ó nij síi tumé ndo'o cacun' dɔ', rá núj a —taj nij síi fariseo rihaan nij síi tucu'yón se-nānā Jesucristó a.

<sup>12</sup> Ne cuno Jesucristó nana ca'mii nij so', ne cataj so' rihaan nij so' a:

—Síi vaa nucuaj ro', ne nano' nij so' man doctor ma'. Maan síi ran' ro', me síi nano' man doctor adonj. Gaa ne ase vaa síi ran' ro', danj vaa nij síi nihánj adonj.

<sup>13</sup> O se vaa che'é ca'anj soj tucu'yón soj daj taj nana nihánj nana nɔ rihaan danj Diose á: “Ne uun niha' rá 'unj ni'yaj 'unj yuvii nago' xcuu rihaan 'unj ma'. Tananj uun niha' rá 'unj ni'yaj 'unj yuvii 'ee rá man tuvi' adonj”. Inanj danj me se-nānā Diose nana tucu'yón soj á. Dan me se xcax soj cuentá se vaa ne ca'na' 'unj canacunj 'unj man síi sá' ma'. Che'é nij síi tumé cacun' ca'naj se vaa canocɔ' nij so' se-nānā adonj. Tzaj ne sese síi sá' me soj, rá soj, ne nuveé sɔj canacunj 'unj man me soj ma' —taj Jesucristó rihaan nij so' a.

*Nana nihánj taj xna'anj me che'é ne toco' nij síi tucu'yón se-nānā Jesucristó x'naa man ma'an nij so' a*

<sup>14</sup> Gaa ne nij síi tucu'yón se-nānā síi cu'naj Juan cuchi' rihaan Jesucristó, ne xná'anj nij so' man so', cataj nij so':

—Me che'é, ne toco' núj x'naa man ma'an núj che'é se aráj guēē núj rihaan Diose, ne toco' nij síi fariseo x'naa man ma'an nij so' uún, tzaj ne nij síi tucu'yón se-nānā so' me se ne toco' nij so' x'naa man ma'an nij so' gá —taj nij so' rihaan Jesucristó a.

<sup>15</sup> Gaa ne cataj Jesucristó rihaan nij so' a:

—Ase vaa síi cuchruj sa'anj vaa 'unj, ne asa' ca'vee toco' nij síi man gaj x'naa man ma'an nij so', rá soj gá. Ase vaa síi cataj xcax man chana ne man tuvi' so' dɔ', danj vaa nij síi man nihánj cuano, ne anuú ndo'o cha'anj man nij so', ne se ca'vee toco' nij so' x'naa man ma'an nij so' ma'. Tzaj ne vaa güii, ne guun yaníj 'unj rihaan nij so' qui'yaj yuvii, gaa ne nana rá nij síi nihánj, gaa ne toco' nij so' x'naa man ma'an nij so' adonj.

*Nana nihánj taj xna'anj se vaa nij síi noco' tucuáán nga ro', se guun nucuaj nij so' cuno nij so' se-nānā Jesucristó ma'*

<sup>16</sup> “Tzaj ne ase vaa yatzíj sin' vaa tucuáán nga noco' soj, ne se guun na'nej ní' mantá naca man yatzíj nga yo' ma'. 'O se sese qui'yaj ní' danj, ne güii quinanj yuvii yatzíj yo', gaa ne nagüej mantá naca yo', ne sese cuxuun yuvii man yatzíj yo', ne quisín' yo', gaa ne cunux xij doj yu'uj aj taj man yatzíj nga yo' nanj adonj.

<sup>17</sup> Ne dan me se ase vaa nuj nga nuj araa nii na vinó vaa uún soj a. Ne se ca'vee tucu'yón 'unj se-tucuanj 'unj rihaan soj ma'. 'O se ase vaa na vinó naca vaa nana tucu'yón 'unj, ne se guun caraa yuvii na vinó naca rque nuj nga ma'. Sese danj qui'yaj yuvii, ne cuyan na vinó cunux xee na vinó, ne se cacua nuj nga ma'. Che'é dan canux yo', ne cayan na vinó rihaan yo'óo a. Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan síi naca síi ne noco' tucuáán nga tucu'yón 'unj se-nānā nanj adonj —taj Jesucristó rihaan nij síi tucu'yón se-nānā síi cu'naj Juan yo' a.

*Nana nihánj taj xna'anj che'é chala cunii do', che'é chana chij do', nahuun sa', qui'yaj Jesucristó a*

18 Asij ca'mii Jesucristó nana yo' rihaan nij síi tucu'yón se-nana síi cu'naj Juan, ne cuchi' 'o síi nicaj suun rihaan Jesucristó, ne canicun' ruj so', cachíin ni'yaj so' rihaan Jesucristó, cataj so':

—Cuanó cavi' ta'nij chala cunii a. Tzaj ne qui'yáa so' se ndo'o, ca'anj ní', ne cuta' so' ra'á so' xráá no', ne cunuu i'na' uún no' nanj ruguanj —taj so', cachíin ni'yaj so' rihaan Jesucristó a.

19 Gaa ne naxumaan Jesucristó, ne canoco' so' do', nij síi tucu'yón se-nana so' do', man síi nicaj suun yo' a.

20 Gaa ne ca'na' 'o chana rej xco Jesucristó, ne quisij 'o chuvij yo' xra' ton man chana yo', ne canó ra'a no' doj tu'va sagan' Jesucristó a.

21 'O se: “Sese canó ra'aj sagan' Jesucristó, ne nahuun sa' 'unj nanj adonj”, guun rá no' a.

22 Gaa ne canicaj Jesucristó quene'en Jesucristó man no', ne cataj so':

—No xcúún so' guun niha' rá so', nocoj. 'O se che'é se amán rá so' ni'yaj so' manj ro', che'é dan nahuun sa' so' á —taj Jesucristó rihaan chana yo' a.

Ne veé maan orá dan nahuun sa' chana yo' adonj.

23 Gaa ne ca'anj Jesucristó ve' tucua' síi nicaj suun yo', ne catúj so' rá ve', ne quene'en so' se vaa man síi o' chra' man rihuu flauta, ne quene'en so' se vaa man ndo'o yuvij rá ve', ne nanó ndo'o rá nij yuvij che'é se cavi' chala cunii yo' adonj.

24 Gaa ne cataj so':

—Curihanj soj xe' á. 'O se ne cavi' chala cunii nihánj ma'. Maan se otoj uun no' nanj á —taj Jesucristó rihaan nij yuvij man rá ve' yo' a.

Gaa ne ca'nga' nacoo nij yuvij ni'yaj nij so' man Jesucristó a.

25 Gaa quisij quirii Jesucristó man cunudanj nij yuvij xe', ne catúj Jesucristó rej táa chala cunii yo', ne quita'aa so' ra'a no', ne cunuu i'na' uún chala cunii, ne naxagaa no' adonj.

26 Ne cuchi' nana rihaan cunudanj nij yuvij man rej yo' che'é se vaa qui'yaj Jesucristó, se vaa cunuu i'na' chala cunii yo' qui'yaj so' adonj.

*Nana nihánj taj xna'anj se vaa naxra' rihaan vij síi tuchrii, qui'yaj Jesucristó a*

27 Dan me se gaa cavij Jesucristó tucua' síi nicaj suun yo', ne canoco' vij síi tuchrii man so' a. Ne caguáj roj so', cataj roj so':

—Ne'en rój se vaa tuvi' síi cu'naj David síi cane gaa naá mé so' á. Che'é dan cunuu 'ee rá so' man rój ruguanj —taj roj so', caguáj roj so' a.

28 Dan me se catúj Jesucristó rá ve', ne cuchi' roj síi tuchrii yo' rihaan so' a. Gaa ne cataj Jesucristó rihaan roj so':

—Amán rá roj soj se vaa guun nucuáj naxra' rihaan roj soj qui'yaj na' —taj Jesucristó, xna'anj Jesucristó man roj so' a.

—Amán rá rój, Señor —taj roj so' rihaan Jesucristó a.

29 Gaa ne cuta' ra'a Jesucristó rihaan roj so', ne cataj Jesucristó:

—Che'é se amán rá roj soj, ne che'é dan naxra' rihaan roj soj adonj —taj Jesucristó a.

30 Veé dan, ne naxra' rihaan roj so' nanj adonj.

Gaa ne caxrj yuvaa Jesucristó rihaan roj so', ne cataj Jesucristó rihaan roj so' a:

—Cūtumé uxrá roj soj man roj soj, ne a 'ó yuvij se cuno se vaa qui'yáá 'unj che'é roj soj á. —Dan me se nucuaj ndo'o ca'mii Jesucristó nana yo' rihaan roj so' a.

<sup>31</sup> Tzaj ne curihañj roj so' ca'anj roj so', ne uxrá nata' roj so' rihaan cunudanj nij yuvij man rej yo' che'é yan qui'yaj sa' Jesucristó che'é roj so' nanj adonj.

*Nana nihánj taj xna'anj se vaa ca'vee ca'mii 'o sí ya'mii, qui'yaj Jesucristó a*

<sup>32</sup> Dan me se tanáj roj so' man Jesucristó, gaa ne ca'anj Jesucristó, gaa ne cuchí' yuvij rihaan so' a. Dan me se nicaj nij yuvij man 'o sí ya'mii cuchí' nij yuvij rihaan Jesucristó a. Sí ya'mii yo' me se nana chree nuú nimán so', ne che'é dan ne ca'mii so', qui'yaj nana chree yo' a.

<sup>33</sup> Dan me se quirii Jesucristó man nana chree yo' nimán so', gaa ne guun che'e sí ya'mii ca'mii so' nanj adonj. Veé dan quene'en nij yuvij, ne caraya'anj uxrá nij yuvij, ne cataj nij so':

—Xa' ní' sij israelitá, tzaj ne a 'ó sí 'yaj danj ne quene'en ní' ma' —taj nij yuvij che'é Jesucristó a.

<sup>34</sup> Tzaj ne nij sí fariseo cataj me se:

—Guun nucuaj so' quirii so' man nana chree, che'é se a'mii so' ga ma'an sí chree uun chij adonj —taj nij sí fariseo, ca'mii ne nij so' che'é Jesucristó a.

*Nana nihánj taj xna'anj daj qui'yaj Jesucristó gaa cunuu 'ee ndo'o rá so' man nij yuvij a*

<sup>35</sup> Gaa ne ca'anj Jesucristó nu' nij chuman' nocgo nu' nij chuman' cunii nu', ne tucu'yón so' rihaan nij yuvij man rá ve' tucu'yón nij yuvij israelitá se-tucuañj Moisés, ne ca'mii natáj so' nana sa' che'é güii guun chij Diose rihaan chumij nihánj, ne nahuun sa' taran' nij sí ran' do', nij sí ninaj do', qui'yaj uún so' adonj.

<sup>36</sup> Ne quene'en so' man cunudanj nij yuvij, ne cunuu 'ee rá so' man nij yuvij yo' a. 'O se quene'en so' se vaa ase vaa matzinj vaj ma'an vaa nij yuvij, nuvi' sí tumé man nij so', ne aj quiran' ndo'o nij so' sayuun, ne ninaj ndo'o nij so' adonj.

<sup>37</sup> Gaa ne cataj so' rihaan nij sí tucu'yón se-nana so' a:

—Ya uxrá, ne vaa ndo'o suun rihaan ní', ne nij sí 'yaj suun me se doj nij so' nanj adonj.

<sup>38</sup> Ne cachinj ni'yaj ní' doj nij sí qui'yaj suun rihaan Diose sí uun chij 'nij ra'a suun, gaa ne ca'nej so' doj yuvij qui'yaj suun se-suun so' adonj —taj Jesucristó rihaan nij sí tucu'yón se-nana so' a.

## 10

*Nana nihánj taj xna'anj se vaa ca'néé Jesucristó man chuvij nij sí tucu'yón se-nana so' ca'anj ca'mii natáj nij so' a*

<sup>1</sup> Gaa ne canacúun Jesucristó man chuvij nij sí tucu'yón se-nana so', ne cuchí' nij so' rihaan so', ne go' so' rej nucuaj man nij so', gaa ne ca'vee qui'yaj canaán nij so' rihaan nij nana chree a. Dan me se guun nucuaj nij so' quirii' yuj so' man nij nana chree nimán yuvij, ne guun nucuaj nij so' nahuun sa' yuvij ran' do', yuvij ninaj do', qui'yaj uún nij so' a.

<sup>2</sup> Ne nihánj me se-chuvij chuvij nij apóstol cune' Jesucristó man nata' rihaan yuvij che'é so' a. Yo'ó so' me sí cu'naj Simón, ne Pedró cu'naj yo'ó se-chuvij sí cu'naj Simón a. Ne yo'ó so' me tinúú Simón, sí cu'naj Andrés a.

Ne yo'ó so' me sí cu'naj Jacobo, ne ta'níí sí cu'naj Zebedeo me so' a. Ne yo'ó so' me tinúú Jacobo, sí cu'naj Juan a.

<sup>3</sup> Ne vaa sí cu'naj Felipé vaa sí cu'naj Bartolomé vaa sí cu'naj Tomás vaa a. Ne yo'ó so' me sí cu'naj Mateo sí ca'néj puextó man yuvií a. Ne yo'ó so' me sí cu'naj Jacobo uún, ne ta'níí sí cu'naj Alfeo me so' a. Ne yo'ó so' me sí cu'naj Lebeo, ne Tadeo cu'naj yo'ó se-chuvií sí cu'naj Lebeo a.

<sup>4</sup> Ne yo'ó so' me sí cu'naj Simón uún, ne so' me tuvi' nij sí me rá cunú' ga gobiernó man Romá a. Ne yo'ó so' me sí cu'naj Judas Iscariote, ne so' me sí tacuachén man Jesucristó rihaan nij sí taj ri'yun man Jesucristó a.

<sup>5</sup> Dan me se ca'néé Jesucristó man chuvij nij snó'o yo', ne cataj xna'anj so' rihaan nij so' daj qui'yaj nij so' a:

—Se ca'anj nij soj rej man nij sí yaníj ma'. Se ca'anj soj chiháán nij yuvií samaritana ma'.

<sup>6</sup> Rihaan orún' nij yuvií israelitá ca'anj soj á. 'Q se ase vaa daán Diose matzinj vaa nij so', tzaj ne ca'anj ni'ya nij so', ne ne noco' sa' nij so' man Diose ma'.

<sup>7</sup> Dan me se ca'anj soj, ne ca'mii natáj soj rihaan nij so', cataj soj: “Nichrun' quisij güii guun chij Diose rihaan chumií nihánj adonj”. Danj cataj soj á.

<sup>8</sup> Nahuun sa' nij sí ran', qui'yaj soj, ne cunuú i'na' uún nij sí cavi', qui'yaj soj, ne nahuun sa' nij sí ran' luj ri'yuj, qui'yaj uún soj, ne quirii soj man nij nana chree nimán nij yuvií á. Cuanó nihánj me rquej rej nucuaj man soj qui'yaj soj danj a. Che'é dan nihánj me cataj xna'anj 'unj rihaan soj se ca'néj soj sa'anj man nij yuvií ma'.

<sup>9</sup> “Se nano' soj aga' oró mí do', aga' platá catzii do', naj guun sa'anj do', caraa soj rque se-caxran' soj a ma'.

<sup>10</sup> Se nicaj soj xnánj soj ma'. Se ca'anj vij cotoó ga soj ma'. Se qui'nij tacóo soj canj ma'. Ne chruun garroté se coró' soj cachee soj ma'. Maan se gaa uun soj ca'anj soj á. 'Q se nq xcúun yuvií rque yuvií chraa cha soj che'é suun sa' 'yaj suun soj nanj adonj.

<sup>11</sup> Asa' catúj soj chuman' noco do', chuman' ra'a do', ne xna'anj soj man nij yuvií me sí ne chuman' yo' me sí sa', gaa ne cuchi' soj tucua sí sa' yo', ne cayáán soj tucua so' ndaa se cavii uún soj ca'anj soj á.

<sup>12</sup> Asa' cuchi' soj tucua sí sa' yo', ne ve'é ca'mii soj nana sa' rihaan nij sí tucua yo', cataj soj se vaa dínj gaa cumán nij so' á.

<sup>13</sup> Ne sese ya sí sa' me nij sí tucua yo', ne ya dínj gaa cumán nij so', qui'yá a. Tzaj ne sese nuvé sij sa' me nij so', ne canicaj uún nana sa' ca'mii soj rihaan ma'an soj, qui'yáj, tzaj ne se cavii sa' nij sí tucua yo' a ma'.

<sup>14</sup> Ne naj guun yuvií se ca'mii sa' ga soj do', naj guun yuvií se ca'vej rá cunó nana a'mii soj do', cavii soj ve' tucua so' cavii soj chiháán so' cavii soj, ne nacunan' soj tacóo soj tucuyuu soj yo'óo tachruu avii chuman' yo' rihaan yo'óo, ne ndaa dan, gaa ne quene'en yuvií se vaa sí man chuman' yo' tumé cacun' se vaa ne uno nij so' rihaan Diose ma'.

<sup>15</sup> Ya ya cataj xna'anj 'unj rihaan soj se vaa güii ca'ne' 'unj cacun' che'é nij yuvií, gaa ne quiran' yuvií man chuman' yo' doj sayuun rihaan nij sí chi'ii man chuman' Sodoma do', rihaan yuvií man chuman' Gomorra do' adonj.

*Nana nihánj me taj xna'anj Jesucristó rihaan nij sí tucuyón se-nana so' daj gaa sayuun quiran' nij so' a*

<sup>16</sup> “Dan me se ca'ne' 'unj man soj rej man sí me rá qui'yaj sayuun man soj a. Ase vaa matzinj vaj rej man xca'yanj ca'nu' ro', danj gaa soj adonj. Che'é

dan gaa cuu raa soj á. Ase cacujj raa xtaa ro', danj cacujj gaa raa soj á. Tzaj ne ase vaa taj vaj cacun' tumé cha'aan ro', danj gaa soj, se cutumé soj cacun' ma'.

17 Cutumé ndo'o soj man soj se qui'yaj yuvij sayuun man soj ma'. Dan me se ca'anj nıcaj nij yuvij man soj rihaan cuesę, ne go' ndo'o nij so' vará xráá soj rá ve' tucu'yón nij so' se-tucuanj Moisés a.

18 Ne ca'anj nıcaj nij yuvij man soj rihaan sí nıcaj suun do', rihaan sí nıcaj suun rey do', che'é se me soj sí noco' manj a. Ne cataj xna'anj soj rihaan nij sí nıcaj suun do', rihaan nij sí yanj do', che'ej a.

19 Asa' tacuachén nij so' man soj rihaan nij sí nıcaj suun, ne se nanó rá soj daj ca'mıj soj rihaan nij so' ma'. Maan Nimán Diose rque nu' nana ca'mıj soj maan ora' yo' nanj adonj.

20 O se nuveé ma'an soj me nij sí ca'mıj rihaan nij so' ma'. 'O se Nimán Rej ní' me sí rque nana ca'mıj soj nanj adonj.

21 "Dan me se ca'anj nıcaj snó'o man tinúú snó'o rihaan yuvij, ne ticavi' nii man tinúú snó'o yo', qui'yaj ma'an so' nanj adonj. Ne ca'anj nıcaj snó'o man ta'nıí snó'o rihaan yuvij, ne ticavi' nii man ta'nıí snó'o yo', qui'yaj so' ei. Ne cunu' xnıi ga rej xnıi, ne ca'anj nıcaj xnıi man rej xnıi rihaan yuvij, ne ticavi' nii man rej xnıi yo', qui'yaj xnıi ei.

22 Ne quitaj ri'yunj cunudanj yuvij man soj che'é se me soj sí noco' manj a. Tzaj ne sí yo'o canoco' manj ndaa se quisıj nu' sayuun yo' ro', ve'é cavıj sa' so' rihaan Diose adonj.

23 Ne sese qui'yaj nij sí man yo'o chuman' sayuun man soj, ne cunanj soj ca'anj soj yo'ó chuman' á. Ya ya cataj xna'anj 'unj rihaan soj se vaa se canó cunudanj nij chuman' man nij yuvij israelıtá ca'anj soj, ne ca'na' uún 'unj sıj ca'néé Diose nıcaj yu'unj man yuvij rihaan chumıj nihánj adonj.

24 "Dan me se tucu'yón 'unj se-nanaj rihaan soj, ne noco' soj se-nanaj a. Ne ase vaa uno mozó rihaan se-ru'veę mozó ro', danj vaa uno soj rihanj nanj á. Ne ne'en soj se vaa ase vaa 'yaj yuvij man sí tucu'yón nana rihaan tuvi' ro', danj qui'yaj uún nij yuvij man sí noco' nana yo' a. Ne ase vaa 'yaj yuvij man nij ru'vee ro', danj qui'yaj uún nij yuvij man se-mozó ru'vee yo' a.

25 Dan me se ne'en sí noco' nana ne'en mozó ne'en daj qui'yaj yuvij man ma'an so', tzaj ne me inanj rá so' guun so' ndaa vaa sí tucu'yón nana man so' do', ndaa vaa se-ru'vee so' do' a. Dan me se tucu'náj nij yuvij Beelzebú manj, cataj nij yuvij se vaa sí chree mej a. Ne ase vaa rej soj vaa 'unj a. Che'é dan danj ca'mıj nij yuvij nana vaa danj che'é ma'an soj nanj adonj.

### *Nana nihánj taj xna'anj se vaa se cuchu'vi' ní' quene'en ní' yuvij ma'*

26 "Che'é dan se cuchu'vi' soj nı'yaj soj yuvij me rá qui'yaj sayuun man soj ma'. 'O se nu' nana ca'mıi yuve nij yuvij do', nu' se vaa qui'yaj yuve nij yuvij do', nu' yo' ro', nurihanj quene'en cunudanj yuvij vaa güiı adonj.

27 Nana a'mıi yuve 'unj rihaan soj cuano ro', ca'mıi ranga' soj á. Ne nu' se vaa a'mıi 'unj xreé soj ro', cavıj soj rej quene'en yuvij man soj, ne ca'mıi natáj soj nana yo' á.

28 "Ne se cuchu'vi' soj quene'en soj nij sí guun nucuaj ticavi' man inanj nee man soj ma'. 'O se se guun nucuaj nij so' ticavi' nij so' man nimán soj a ma'. Tzaj ne vaa che'é cuchu'vi' soj nı'yaj soj Diose nanj á. 'O se so' me sí guun nucuaj qui'yaj cacaa nimán soj cacaa nee man soj cacaa rihaan ya'an adonj.

29 "Ne'en soj daj vaa nij xtâj chr̄in' se vaa vij ùn' yo' nó yo'ò sa'anj nii cuartó a. Tzaj ne se guun cavj' yo'ò xo' quinj xo' rihaan yo'óó, sese na'vej Rej soj sí nicun' xtâ' cavj' yo'ò xo' ma'.

30 Ne Diose me se vaa cuentá yuvé raá soj 'yaj so', ne ne'en so' me daj yuvé raá soj,

31 ne che'é dan se cuchu'vi' soj che'é sayuun qui'yaj yuvij man soj ma'. 'O se uxrá vaa yu'vee doj nó soj rihaan xtâj chr̄in' yo', 'yaj Diose adonj.

*Nana nihánj taj xna'anj se vaa nò xcúún ní cataj xna'anj ní rihaan yuvij che'é Jesucristó a*

32 "Che'é se tumé Diose man soj, che'é dan nò xcúún soj nata' ya soj rihaan yuvij se vaa me soj sí noco' manj, ne nu' sí 'yaj danj ro', vaa güii, ne nata' 'unj rihaan Réé 'unj sí nicun' xtâ' se vaa sij noco' manj me so' a.

33 Ne sí taj xna'anj rihaan yuvij se vaa ne noco' so' manj ro', vaa güii, ne cataj xna'anj 'unj rihaan Réé 'unj sí nicun' xtâ' se vaa nuveé sij noco' manj me so' a ma'.

*Nana nihánj taj xna'anj se vaa cunu' ndo'o yuvij ga tuvi' yuvij che'é Jesucristó a*

34 "Se guun rá soj se vaa ca'ná' 'unj rihaan chumij nihánj che'é rej dínj doj cayáán nij yuvij man rihaan chumij nihánj ga tuvi' yuvij ma'. Ne qui'yáj danj ma'. 'O se che'é se ca'ná' 'unj rihaan chumij nihánj, che'é dan cunu' ndo'o yuvij ga tuvi' yuvij adonj.

35 'O se ca'ná' 'unj che'é rej nata' 'unj se-nanaj rihaan yuvij, tzaj ne se cunodanj nij yuvij rihanj ma'. Che'é dan cunu' snó'o ga rej ma'an so', ne xa' chana, tzaj ne cunu' no' ga nii no' do', ga nii chej no' do', che'ej a.

36 Ne nij tuvi' yuvij sí man rá ve' tucúa yuvij cunu' ga yuvij nanj á.

37 Sese guun rá yo'ò so' se vaa sa' doj vaa rej so' do', nii so' do', rihanj, ne taj che'é cataj so' se vaa sij noco' manj me so' ma'. Ne sese guun rá yo'ò so' se vaa sa' doj vaa ta'ní so' rihanj, ne taj che'é cataj so' se vaa sij noco' manj me so' ma'.

38 Ne sí na'vej rá quiran' sayuun che'é se me so' sí noco' manj ro', taj che'é cataj so' se vaa me so' sí noco' manj ma'.

39 Sí cavij sa' nimán rihaan chumij nihánj ro', cavj' nu' so' a. Ne sí cavij che'é se noco' so' manj ro', so' me sí gaá i'na' nimán nu' cavij nu' ca'anj adonj.

*Nana nihánj taj xna'anj daj quiran' nij yuvij racuj man nij sí 'yaj suun rihaan Diose a*

40 "Sese a'mii sa' yo'ò so' ga soj, ne sij a'mii sa' gaj me so' adonj. Ne sese a'mii sa' so' gaj, ne sij a'mii sa' ga sí ca'néé manj rihaan chumij nihánj me uún so' adonj.

41 Sese a'mii sa' yo'ò so' ga 'ò sí nata' se-nana Diose, che'é se ve'é 'yaj so' nata' so' se-nana Diose, ne rá se vaa ma'an sí nata' se-nana Diose vaa so' uún adonj. Dan me se 'ò cuyaán naru'vee Diose rihaan so' ga ma'an sí nata' se-nana Diose ei. Ne sese a'mii sa' yo'ò so' ga yo'ò sí sa' 'yaj, ne naru'vee Diose rihaan so' uún adonj. 'O cuyaán naru'vee Diose rihaan so' ga ma'an sí sa' 'yaj ei.

42 Dan me se a me ma'an yo'ò sí rqué doj na acoj co'ò yo'ò nij sí noco' uún nihánj che'é se-chuvij 'unj, ne ya ya cataj xna'anj 'unj rihaan soj se vaa daj chiháa mij se quinavij se sa' naru'vee Diose rihaan sí rqué doj na yo' ma'.

# 11

<sup>1</sup> Dan me se quisíj nana yo' nana cataj xna'anj Jesucristó rihaan chuvij nij sí tucu'yón se-nana so', ne curihanj Jesucristó rej yo', ne ca'anj so' chiháan nij yuvij israelitá tucu'yón so' rihaan nij so' ne ca'mii natáj so' rihaan nij so' a.

*Nana nihánj taj xna'anj che'é nana ca'mii Jesucristó che'é sí cu'naj Juan sí cuta' ne man yuvij a*

<sup>2</sup> Dan me se 'nij sí cu'naj Juan sí cuta' ne man yuvij taga', ne cuchi' nana rihaan so' che'é nu' se vaa qui'yaj Jesucristó a. Che'é dan ca'née so' vj tuvi' nij sí tucu'yón se-nana so' rihaan Jesucristó a.

<sup>3</sup> Ne nana nihánj ro', xná'anj roj so' man Jesucristó, qui'yaj sí cu'naj Juan a:

—So' me sí ca'na' tñanii man yuvij rihaan sayuun na'. Ase na'vjj ní ca'na' yo'ó so' xa'. —Dan me nana me rá sí cu'naj Juan xna'anj roj so' man Jesucristó a.

<sup>4</sup> Gaa ne cataj xna'anj Jesucristó rihaan roj so' a:

—Cavij roj soj cuchi' uún roj soj rihaan sí cu'naj Juan, ne cataj xna'anj roj soj rihaan so' nu' nana cuno roj soj do', nu' se vaa quene'en roj soj do' á.

<sup>5</sup> Dan me se nij sí tuchrij ro', naxra' rihaan, ne nij sí na'vee cachee ro', chée nij so', ne nij sí ran' luj ri'yuj ro', nahuun sa', ne nij sí so'ro ro', nachuguun xrée nij so', ne nij sí cavi' ro', cunuu i'na' uún, ne nij sí niqne ro', uno nij so' nana sa' a. Nu' nihánj cataj xna'anj roj soj rihaan sí cu'naj Juan yo' á.

<sup>6</sup> Ne cataj uún roj soj rihaan sí cu'naj Juan se vaa cavij sa' so' qui'yaj Diose, sese se guun na'aj so' ni'yaj so' man j. Danj ca'mii roj soj rihaan sí cu'naj Juan yo' á —taj Jesucristó rihaan roj sí tucu'yón se-nana Juan yo' a.

<sup>7</sup> Dan me se ca'anj roj so', gaa ne guun che'é Jesucristó ca'mii so' rihaan cunudanj nij yuvij che'é sí cu'naj Juan sí cuta' ne man yuvij a:

—Asij ca'anj soj rej tacaan quene'en soj man sí cu'naj Juan ro', ne daj gaa so' quene'en soj, rá soj ga. Ase vaa yo'ro rcoo naan ndo'o 'yaj nana vaa so', rá soj na'. Guun vj nimán so' che'é tucuaán noco' so', rá soj na'. Taj ma'.

<sup>8</sup> Maan se daj gaa so' rá soj, asij ca'anj soj quene'en soj man so' ga. Sij nuu yatzij laruu ndo'o me so', rá soj na'. Taj ma'. 'O se nij sí nuu yatzij laruu ro', yanj rá ve' tucua sí nicaj suun rey adonj.

<sup>9</sup> Maan se daj gaa sí cu'naj Juan rá soj, asij ca'anj soj quene'en soj man so' ga. Sij nata' se-nana Diose me so', rá soj na'. Ya uxrá ei. Ne cataj xna'anj 'unj rihaan soj se vaa sa' doj vaa so' rihaan cunudanj nij sí nata' se-nana Diose adonj.

<sup>10</sup> "O se nana nihánj nana no rihaan danj Diose ro', taj xna'anj che'é sí cu'naj Juan a: "Vaa sí ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvij ve'é ca'mii nij yuvij ga so', qui'yaj so' a". Danj taj danj Diose che'é sí cu'naj Juan se vaa nuchran' nimán yuvij ve'é ca'mii nij yuvij ga sí ca'na' tñanii man nij yuvij rihaan sayuun, qui'yaj sí cu'naj Juan, taj danj Diose, ne danj qui'yaj so' adonj.

<sup>11</sup> "Ya ya cataj xna'anj 'unj rihaan soj cuano se vaa sij sa' doj rihaan cunudanj nij yuvij man rihaan chumij me sí cu'naj Juan sí cuta' ne man yuvij a. A 'ó yuvij ne vaa sa' doj rihaan so' ma'. Tzaj ne cuano ro', uun chij Diose nimán yuvij man rihaan chumij nihánj, ne naj guun yuvij uun chij Diose nimán ro', me sí sa' doj rihaan sí cu'naj Juan a.

<sup>12</sup> Dan me se asij tucu'yón sí cu'naj Juan rihaan yuvij ndaa cuano me se naqui'yaj ino ndo'o yuvij se-nana Dioso se vaa guun chij so' rihaan chumij nihánj, ne vaa sí sca' ndo'o sí me inanj rá cataj daj qui'yaj Dioso asa' guun chij Dioso adonj.

<sup>13</sup> 'O se nij sí nata' se-nana Dioso rihaan yuvij gaa naá do', nu' se-tucuanj Moisés do', ndaa ma'an sí cu'naj Juan do', cataj xna'anj ndo'o nij so' che'é güii guun chij Dioso nimán yuvij man rihaan chumij nihánj nanj á.

<sup>14</sup> Dan me se aj ne'en soj se vaa sí cu'naj Elías sí nata' se-nana Dioso rihaan yuvij gaa naá ro', ca'na' uún so' rihaan chumij nihánj, taj danj Dioso a. Dan me se sese me rá soj guun ya rá soj cunō soj nana nihánj, ne cataj xna'anj 'unj rihaan soj se vaa sí cu'naj Juan me sí atā se-suun sí cu'naj Elías sí cane gaa naá yo' á.

<sup>15</sup> Sese taj yu'uj xréé soj, ne cunō soj nana nihánj ei.

<sup>16</sup> "Ne taj vaa yuvij man rihaan chumij nihánj cuano, rá soj ga. Dan me se cataj xna'anj 'unj rihaan soj á. Ase vaa xnii ca'anj rihaan yu'vee ne tico ga tuvi' ro', vaa nij yuvij man rihaan chumij nihánj adonj. Dan me se yáán nij xnii yo' rihaan yo'óó,

<sup>17</sup> ne aguáj nij xnii rihaan tuvi' xnii, taj nij xnii: "Nicaj núj ta'ánj núj, go' núj chra' choco', tzaj ne me che'é ne ra'anj soj ga. Ne go' núj chra' xngá, tzaj ne me che'é ne ta'vee soj ga. Me che'é ne 'yaj soj ndaa vaa me rá núj gā", taj nij xnii rihaan tuvi' nij so' a.

<sup>18</sup> 'O se ca'na' sí cu'naj Juan sí cuta' ne man yuvij, gaa ne ne cha' so' do', ne co'ō so' do', ma'. Ne che'é dan taj nij yuvij se vaa nuu nana chree nimán so', taj nij yuvij a.

<sup>19</sup> Ne ca'na' 'unj sij ca'née Dioso nicaj yu'unj man yuvij, gaa ne niha' rá 'unj chá 'unj do', co'ō 'unj do', gaa ne che'é dan taj uún nij yuvij se vaa sí cachén chá do', sí cachén co'ō do', mé 'unj, taj uún nij yuvij a. Ne taj uún nij so' se vaa tuví 'unj me sí a'néj puextó man yuvij do', yo'óó nij sí tumé cacun' do', taj nii a. Danj tu'va nij so', tzaj ne ne ne'en uxrá nij so' ma'. Sese xcaj yuvij cuentá daj vaa 'yaj rój, ne guun ya rá nij yuvij se vaa sij cuu raā me rój ga sí cu'naj Juan yo' adonj —taj Jesucristó rihaan nij yuvij a.

*Nana nihánj taj xna'anj se vaa cataj xna'anj Jesucristó che'é sayuun quiran' yuvij man va'núj chuman' yuvij ne ca'vej rá cunō se-nana Jesucristó a*

<sup>20</sup> Sij, gaa ne guun che'e Jesucristó cuta' Jesucristó cacun' xráá nij yuvij man va'núj chuman' a. Dan me se cuta' so' cacun' xráá nij so' se vaa guun nichraj nimán nij so' a. Dan me se nda' se doj a vaa suun sa' qui'yaj suun so' chiháán nij so' quene'en nij so' rihaan suun sa' qui'yaj suun so' yo'óó chuman', tzaj ne ne canicaj nimán nij so' a ma', taj Jesucristó a.

<sup>21</sup> Ne nihánj me nana ca'mii Jesucristó che'é nij yuvij man nij chuman' yo' a:

—Nique soj sij man chuman' Corazín a. Nique soj sij man chuman' Betsaida a. 'O se quiran' uxrá soj sayuun nanj á. Dan me se nij sí man chuman' Tiro do', nij sí man chuman' Sidón do', me sí chi'ii nimán nanj á. Tzaj ne sese ca'anj 'unj chiháán nij so' ne sese qui'yáj suun sa' nocōo ni'yaj nij so', gaa ne cunō nij so' se-nana, ne guun ya rá nij so' se vaa tumé nij so' cacun', ne canicaj nimán nij so', ne quinanó ndo'o rá nij so' che'é cacun' tumé nij so', ne ndaa yatzj ya' cunuú nij so', ne ndaa yaj chruun acaa ruvaj caraa nij so' raā nij so', che'é se quinanó rá nij so' che'é cacun' tumé nij so' asuun saj



adonj. Nihánj, ne ne ca'anj 'unj ma'. Maan inanj chiháán soj 'naj, ne qui'yáj suun sa' nocoo quene'en ma'an soj, tzaj ne ne canicaj nimán nij soj a ma'.

22 Dan me se yaj cataj xna'anj 'unj rihaan soj se vaa güii ca'ne' 'unj cacun' che'é nij yuvij ro', doj a gaa sayuun quiran' soj rihaan sayuun quiran' nij sí chí'ij man chuman' Tiro do', man chuman' Sidón do' adonj.

23 "Ne vaa soj sij man chuman' Capernaum uún á. Ne sí sa' inanj me ma'an soj, rá soj na'. Nuveé sij sa' me soj ma'. Sí ca'anj rihaan ya'an guun soj á. Dan me se nij sí man chuman' Sodoma ro', me sí chí'ij nimán a. Tzaj ne sese ca'anj 'unj chiháán nij so' ne sese qui'yáj suun sa' nocoo ni'yaj nij so', ne cuno nij so' se-nanaj, ne guun ya rá nij so' se vaa tumé nij so' cacun', ne canicaj nimán nij so', ne ne cacaa chiháán nij so' ma'. Ne naj chiháán nij so' ndaa cuano asuun saj a. Tzaj ne ne ca'anj 'unj ma'. Maan se inanj chiháán soj 'naj, ne qui'yáj suun sa' nocoo yo' quene'en ma'an soj, tzaj ne ne canicaj nimán nij soj a ma'.

24 Dan me se cataj xna'anj 'unj rihaan soj se vaa güii ca'ne' 'unj cacun' che'é nij yuvij ro', doj a gaa sayuun quiran' soj rihaan sayuun quiran' nij sí chí'ij man chuman' Sodoma yo' adonj —taj Jesucristó che'é nij yuvij ne ca'vej rá cuno se-nana so' a.

### *Nana nihánj taj xna'anj me sí nari' sa' se-nana Jesucristó a*

25 Dan me se güii yo' cachín ni'yaj Jesucristó rihaan Diose, cataj so':

—Sí 'nij ra'a xta' do', sí 'nij ra'a chumi do', mé so', Ataj Chij. Ne sa' uxrá qui'yáa so' caráán so' rihaan nij sí avii raá do', rihaan nij sí acaj cuentá do', se vaa se cuno nij so' se-nanaj ma'. Maan nij sí vaa nica' nimán ro', ve'é cuno nij so', qui'yáa so' á.

26 Danj inanj qui'yáa so', che'é yan danj me rá so' qui'yáa so', Ataj —taj Jesucristó rihaan Rej so' Diose a.

27 Canicaj Jesucristó ca'mii so' rihaan nij yuvij, cataj so' a:

—Aj rqué Réé 'unj Diose cunudanj rasuun rihanj á. Ne a 'ó síi ne ne'en daj vaa 'unj; maan orún' Réj ne'en a. 'O se ta'níi so' mej adonj. Ne a 'ó yuvij ne ne'en daj vaa Réj ma'. Maan orún' 'unj ne'en daj vaa so' adonj. Ne sese me rá 'unj cataj xna'anj 'unj rihaan yo'ó nij yuvij daj vaa Réj, ne quene'en yo'ó nij so' uún adonj.

28 Ne sese vaa sí navij ndo'o rá che'é yan nano' uxrá so' tucuáán sa' do', sese vaa sí nanó ndo'o rá che'é yan ne guun nucuaj so' qui'yaj so' nu' tucuáán sa' tucuáán noco' so' do', ne ca'na' nij sí vaa danj rihanj á. 'O se naraan rá nij sí vaa danj, qui'yáj nanj á.

29 Dan me se canoco' soj manj, ne qui'yaj soj tucuáán tucu'yón 'unj man soj á. 'O se síi vaa nica' nimán mej, ne quinari' soj chrej quinarajan rá soj adonj.

30 'O se ne sayuun vaa tucuáán cuchruj 'unj canoco' soj ma'. 'O se guun nucuaj soj qui'yaj soj cunudanj adonj —taj Jesucristó a.

## 12

### *Nana nihánj taj xna'anj che'é güii naránj rá ní a*

1 Dan me se naca ca'mii Jesucristó nana yo', ne 'o güii naránj rá nij yuvij israelitá me yo', ne vaj Jesucristó rque 'o naa 'núu trigó a. Vaj nij sí tucu'yón se-nana so' ga so' a. Veé dan vaj nij so', ne na'aan rque nij so' a. Che'é dan me guun che'e nij so' cuta nij so' doj 'núu trigó chá nij so' a.

<sup>2</sup> Tzaj ne quene'en nij sí fariseo se vaa cuta nij so' doj 'núú trigó, ne cataj nij so' rihaan Jesucristó a:

—Nì'yaj so' ei. Güii naránj rá yuvií me güii cuan' á. Ne nó xcúún nij sí tucu'yón se-nanā so' cutā nij so' 'núú trigó cuan' a ma' —taj nij so' rihaan Jesucristó a.

<sup>3</sup> Gaa ne cataj Jesucristó rihaan nij so' a:

—Me che'é, ne ne nayaā soj rihaan danj Diose daj qui'yaj sí cu'naj David gaa naá a. Gaa quina'aan rque nij tuvì' nij so',

<sup>4</sup> gaa ne catúj nij tuvì' nij so' rá nuvíí, ne chá nij so' rachrúún taj rihaan se-mesā Diose a. Ne ne nó xcúún nij so' chá nij so' rachrúún yo'; maan se orún' nij xrej nó xcúún chá rachrúún yo' a. Tzaj ne maan che'é se rque nij so' na'aan uxrā, gaa ne chá nij so' rachrúún yo' nanj adonj. Tzaj ne ne cataj Diose se vaa tumé sí cu'naj David cacun' ma'.

<sup>5</sup> Ne ne nayaā soj me taj se-tucañj Moisés che'é nij xrej 'yaj suun nuvíí na'. 'O se che'é se-suun nij so', 'yaj nij so' se vaa ne nó xcúún yuvií qui'yaj yuvií güii naránj rá ní' sji israelitá ma'. Tzaj ne ne tumé nij so' cacun' che'é se vaa 'yaj nij so' ma'.

<sup>6</sup> Ne cuano nihánj me cataj xna'anj 'unj rihaan soj se vaa vaa sí nicun' rihaan soj cuano, ne sa' doj vaa so' rihaan nuvíí yo' adonj.

<sup>7</sup> Ne vaa yo'ó nana no rihaan danj Diose taj: “Ne uun niha' rá 'unj ni'yaj 'unj sí rque xcuu rihaan 'unj ma'. 'O se uun niha' rá 'unj ni'yaj 'unj yuvií 'ee rá man tuvi' adonj”. Yo' me se-nanā Diose nana no rihaan yanj yo' a. Sese cuno soj me taj nana yo', ne ne cutā' soj cacun' xráá nij sí nihánj saj ma'. Ne ne tumé nij sí nihánj cacun' ma'.

<sup>8</sup> 'O se sí ca'née Diose nīcaj yu'unj man yuvií mej, ne no xcúnj quiríi ta'ngaj daj qui'yaj yuvií güii naránj rá yuvií adonj —taj Jesucristó rihaan nij sí fariseo yo' a.

*Nana nihánj taj xna'anj se vaa nahuun sa' 'o sí nacoo ra'a, qui'yaj Jesucristó a*

<sup>9</sup> Gaa ne curihanj Jesucristó rej naj naā yo', ne catúj so' rá ve' tucu'yón nij sí man chuman' yo' se-tucañj Moisés a.

<sup>10</sup> Dan me se yáán 'o sí nacoo ra'a rá ve' yo' a. Ne xná'anj nij sí fariseo man Jesucristó sese no xcúún yuvií qui'yaj cono'ó yuvií man tuvi' yuvií güii naránj rá yuvií a. Danj tu'va nij so' rihaan Jesucristó, che'é yan me rá nij so' cuta' nij so' cacun' xráá Jesucristó che'é nana ca'mii Jesucristó adonj.

<sup>11</sup> Gaa ne cataj Jesucristó rihaan nij so' a:

—Sese vaa daán yo'o soj matzinj, ne sese quinij xo' rá yu'uj güii naránj rá yuvií, ne cuxuun sí daan man xo' quiríi so' man xo' rque yu'uj yo', raj a.

<sup>12</sup> Ne sa' uxrā doj vaa yuvií rihaan matzinj yo' adonj. Che'é dan no xcúún yuvií racuj yuvií man tuvi' yuvií güii naránj rá yuvií á —taj Jesucristó rihaan nij sí fariseo yo' a.

<sup>13</sup> Canicaj Jesucristó cataj Jesucristó rihaan sí nacoo ra'a yo':

—Tucúá so' ra'á so' á —taj Jesucristó rihaan so' a.

Gaa ne tucúá so' ra'a so', ne cunuu sa' ra'a so', ne ase vaa guēē nīchrej ra'a so' rej vaa sa' ro', danj vaa guēē nīchrej ra'a so' uún a.

<sup>14</sup> Dan me se curihanj nij sí fariseo rá ve' yo', ne ca'anj nij so' rej yaníj, ne guun rá taran' nij so' daj gaa qui'yaj nij so' ne cavi' Jesucristó a.

*Nana nihánj taj xna'anj se vaa ca'ne' Jesucristó suun rihaan yuvij se vaa se nata' nij yuvij rihaan tuvi' yuvij che'é so' a*

15 Tzaj ne quene'en Jesucristó daj me rá nij síi fariseo qui'yaj nij so' man Jesucristó a. Che'é dan cavii so' rej yo', ne ca'anj ndo'o yuvij ga so', ne nahuun cunudanj nij síi ran' vaj ga nij yuvij, qui'yaj Jesucristó a.

16 Ne ca'ne' so' suun rihaan nij yuvij se vaa se nata' nij yuvij rihaan tuvi' yuvij che'é yan vaa 'yaj so' a.

17 Danj ca'mii Jesucristó, gaa ne quisj ya nu' nana nihánj nana cataj xna'anj Diose rihaan yuvij gaa naá a. Dan me se ca'mii Diose nana nihánj cuno síi cu'naj Isaías síi nata' se-nana Diose gaa naá, ne nata' síi cu'naj Isaías nana nihánj rihaan yuvij che'é Diose a. Nana ca'mii ma'an Diose, cataj xna'anj Diose che'é Jesucristó me nana nihánj a:

18 "Xcáj soj cuentá se vaa síi nihánj me síi 'yaj suun rihanj a. Narii 'unj man so' cunuú so' rihanj, ne 'ee rá 'unj man so', ne aran' raj ni'yaj 'unj man so' a. Ca'nej 'unj Nimanj nimán so', ne nata' so' rihaan nij síi yanj se vaa ve'é ca'ne' 'unj cacun' che'é nij so' a.

19 Se cunu' so' ga yuvij ma'. Se caguáj so' rihaan yuvij ma'. Se canicun' so' chrej ca'gan ca'mii natáj so' rihaan yuvij ma'.

20 Ne sese nari' so' man yo'o síi quiri' rá síi ne uun nucuaj noco' chrej sa', ne se tiri' nu' so' man síi quiri' rá yo' ma'. 'O se racuj' so' man so' adonj. Dan me se ca'vee se ase vaa rcoá xtun' do', ca'vee se ase vaa aga' ya'an navij na acaa rque do', vaa síi quiri' rá yo', tzaj ne racuj' so' man so', yan cunu sa' so' adonj. Dan me se qui'yaj canaan nana ya ca'mii síi 'yaj suun rihanj gaa ve'é ca'ne' so' cacun' che'é yuvij nanj adonj.

21 Ne gaá nucuaj rá nij síi yanj man so' se vaa racuj' so' man nij síi yanj adonj", taj Diose gaa naá a.

*Nana nihánj taj xna'anj se vaa cuta' nij síi fariseo cacun' rmi' xráa Jesucristó se vaa ca'mii Jesucristó ga síi chree a*

22 Guun naá doj, gaa ne ca'na' yuvij rihaan Jesucristó, ne nicaj nij yuvij man 'o síi ya'mii aráán rihaan nuu nana chree nimán a. Xa' síi nuu nana chree nimán, tzaj ne caráán rihaan so', ne ya'mii so' a. Ne nahuun nu' so', qui'yaj Jesucristó, ne naxra' rihaan so', ne ca'mii so' adonj.

23 Dan me se quene'en nij yuvij se vaa nahuun sa' so' qui'yaj Jesucristó, ne guun nihá' rá nij yuvij, ne cataj nij yuvij:

—Síi nihánj me tuvi' síi cu'naj David gaa naá, rá soj na'. Síi tinanii man ní rihaan sayuun me síi nihánj, rá soj na' —taj nij yuvij, xna'anj nij yuvij man tuvi' yuvij me síi me Jesucristó a.

24 Tzaj ne cuno nij síi fariseo daj ca'mii nij yuvij che'é Jesucristó, ne cataj nij so':

—Nuveé ma'an síi nihánj rii nana chree ma'. Maan se a'mii so' ga síi chree uun chij síi cu'naj Beelzebú, ne che'é dan rii so' nij nana chree nimán yuvij adonj —taj nij síi fariseo che'é Jesucristó, ca'mii ne nij so' a.

25 Dan me se quene'en Jesucristó daj vaa nimán nij síi fariseo yo', gaa ne ca'mii so' rihaan nij síi fariseo a:

—Ne'en soj se vaa sese vaa 'o nación, ne sese xra' ta'aj nij síi uun chij rihaan nación yo' ne cunu' nij ma'an nij so' ga tuvi' nij so', ne vaa güii, ne nu' nación yo' quirj' nu' nanj adonj. Ne sese cunu' ta'aj nij yuvij man ma'an chuman' ga tuvi' yuvij, ne vaa güii quirj' nu' chiháán nij so', qui'yaj nij so' nanj adonj.

Ne sese cunu' ta'aj nij yuviñ man 'o barrió ga ma'an tuvi' yuviñ síñ man ma'an barrió yo', ne vaa güii quirí' nu' barrió yo', qui'yaj nij so' nanj adonj.

26 Che'é dan me sese racuñ síñ chree síñ cu'naj Satanás manj rii 'unñ tuvi' so' nana chree nimán nij yuviñ, gaa ne asa' ca'vee guun chij ndo'o so' rihaan nij yuviñ man rihaan chumiñ nihánj, rá soj ga.

27 Dan me se sese rii 'unñ nana chree nimán nij yuviñ, 'yaj síñ chree cu'naj Beelzebú, che'é se a'mii 'unñ ga so', rá soj a. Tzaj ne nij síñ tucu'yón se-nana soj me se veé danj rii uún nij so' nij nana chree nimán yuviñ uún á. Ne asa' a'vee 'yaj nij so' danj, rá soj ga. Ne vaa nij so' vaa, veé danj a'mii nij so' ga síñ chree, rá soj gaa na'. Che'é nana ca'mii soj me se ma'an nij síñ tucu'yón se-nana soj cuta' cacun' xráá soj se vaa ca'mii ne soj adonj.

28 Tzaj ne 'unñ me se ya Nimán Diose me síñ racuñ manj rii 'unñ nana chree nimán yuviñ adonj. Che'é dan xcaj soj cuentá se vaa aj guun che'e Diose uun chij Diose rihaan chumiñ nihánj adonj.

29 "Ne sese me rá yo'o so' catuñ so' rá ve' tucua' síñ ru'vee qui'yaj ituñ so' si'yaj síñ ru'vee yo', ne asino numíj so' man síñ ru'vee yo', gaa ne canicaj so' catzij so' tucua' síñ ru'vee yo' ei. Ne ase vaa 'yaj síñ atuñ tucua' síñ ru'vee ro', danj 'yáj man síñ chree yo' chuguñj. Dan me se numíj 'unñ man so', ne cuano nihánj a'néj 'unñ man nu' nij síñ 'nij ra'a so' adonj.

30 "Naj guun síñ na'vej rá qui'yaj suun ga 'unñ ro', síñ taj ri'yunñ manj me so' a. Ne naj guun síñ ne racuñ manj naqui'yaj chre' 'unñ man yuviñ canoco' man Diose ro', so' me síñ ticha'nuñ man nij yuviñ, ne aráán so' rihaan nij yuviñ se canoco' nij yuviñ man Diose ei.

31 Che'é dan cataj xna'anj 'unñ rihaan soj se vaa nu' cacun' tumé yuviñ do', nu' nana chí'ii ca'mii yuviñ do', ca'vee tinavij Diose cacun' yo' che'é nij yuviñ a. Tzaj ne sese nachri' yo'o so' ni'yaj so' man Nimán Diose, ne daj chihaa mój se quinavij cacun' yo' xráá so' a ma'.

32 Dan me se 'unñ sñj ca'née Diose ñicaj yu'unñ man yuviñ ro', ca'vee se ca'mii yo'o so' nana chí'ii che'ej, tzaj ne ca'vee navij cacun' yo' xráá so' qui'yaj Diose ei. Tzaj ne sese ca'mii chí'ii yo'o so' che'é Nimán Diose, ne daj chihaa mój se tinavij Diose cacun' yo' xráá so' a ma'. Dan me se ca'vee se rihaan chumiñ nihánj do', ca'vee se ndaa cavi' so' do', tzaj ne se quinavij cacun' yo' nu' caviñ nu' ca'anj xráá so' a ma'.

*Nana nihánj taj xna'anj se vaa ase vaa nimán yuviñ ro', danj vaa nana a'mii yuviñ a*

33 "Sese sa' vaa 'o chruun ne sa' vaa chruj man raá chruun yo' a. Sese chí'ii vaa 'o chruun ne chí'ii vaa chruj man raá chruun yo' a. Dan me se sese ne'en yuviñ se vaa vaa sa' chruj man raá chruun, ne ne'en yuviñ se vaa chruun sa' me yo' a. Ne sese ne'en yuviñ se vaa vaa chí'ii chruj man raá chruun, ne ne'en uún yuviñ se vaa chruun chí'ii me yo' adonj.

34 'O se ase vaa xcuáá yuvaá vaa soj ei. Chí'ii vaa nimán soj, ne chí'ii vaa nana a'mii soj ei. 'O se ase vaa se man nimán yuviñ ro', danj vaa nana avii tu'va yuviñ adonj.

35 Dan me se síñ sa' ro', man ndo'o se sa' nimán so', ne inañ nana sa' a'mii so' adonj. Síñ chí'ii ro', man ndo'o se chí'ii nimán so', ne inañ nana chí'ii a'mii so' adonj.

36 Ne cuano nihánj me cataj xna'anj 'unñ rihaan soj se vaa nu' nana a'mii ne nij yuviñ ro', cataj xna'anj nij yuviñ rihaan Diose me che'é ca'mii nij yuviñ

nana vaa danj asa' quisij güii ca'ne' Diose cacun' che'é cunudanj nij yuvij man rihaan chumij nihánj adonj.

<sup>37</sup> 'O se sese sa' vaa nana ca'mii so', ne cataj Diose se vaa ne tumé so' cacun' ma'. Ne sese chi'ii vaa nana ca'mii so', ne cuta' Diose cacun' xraá so' adonj —taj Jesucristó rihaan nij síi fariseo yo' a.

*Nana nihánj me taj xna'anj Jesucristó me suun sa' nocoo me qui'yaj Jesucristó, gaa ne guun ya rá yuvij se vaa ya vaa nana a'mii so' a*

<sup>38</sup> Cachén doj, gaa ne ca'na' uún doj síi naqui'yaj cju se-tucuanj Moisés ga doj síi fariseo rihaan Jesucristó, ne cataj nij so':

—Qui'yáa so' 'o suun sa' nocoo quene'en núj, maestro. Gaa ne guun ya rá núj se vaa ya a'mii so' á —taj nij so' rihaan Jesucristó a.

<sup>39</sup> Gaa ne cataj Jesucristó rihaan nij so' a:

—Xa' soj sij 'na' inanj rej chi'ii do', rej cacun' do', me se me rá gaa soj qui'yáj suun sa' nocoo ni'yaj soj, tzaj ne daj chihaa míj se qui'yáj ndaa vaa me rá soj ma'. Maan se quene'en soj se vaa ase vaa quiran' síi cu'naj Jonás síi nata' se-nana Diose gaa naá ro', danj quiran' 'unj, vaa güii, ni'yaj soj adonj.

<sup>40</sup> 'O se ase vaa cunuú síi cu'naj Jonás va'núj ya güii rque xcuu xij vaj rque na ya'anj ro', ta'nga' danj gaa va'núj ya güii nuvi nigan' quínáa 'unj rque yo'óo quene'en soj adonj.

<sup>41</sup> Nij síi man chuman' cu'naj Nínive ro', canicun' nij so' ga ma'an soj sij vaa i'na' rihaan chumij nihánj cuano asa' quisij güii ca'ne' Diose cacun' che'é yuvij, ne cuta' nij síi man chuman' Nínive yo' cacun' xraá soj adonj. Cuno nij so' nana ca'mii natáj síi cu'naj Jonás, ne nuchran' nimán nij so', ne canoco' nij so' man Diose adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síi cu'naj Jonás yo', tzaj ne taj se qui'yá' nuchran' nimán soj ma'.

<sup>42</sup> Ne güii ca'ne' Diose cacun' che'é yuvij ro', cuchij' chana nicaj suun reiná guun chij rihaan chuman' naj gan' ndo'o rej sur, ne canicun' no' rihaan soj, qui'yaj Diose, ne cuta' no' cacun' xraá soj adonj. 'O se gan' ndo'o cachéé no' cuchij' no' rihaan síi cu'naj Salomón, ne cuno no' nana cju tucu'yón Salomón man no' adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síi cu'naj Salomón yo' a adonj. Tzaj ne na'vej rá soj cunoo soj nana a'mii 'unj rihaan soj a man adonj.

*Nana nihánj taj xna'anj daj 'yaj nana chree gaa anicaj uún nana chree nimán yuvij a*

<sup>43-44</sup> "Ne gaa tihaj yuun avii yo' o nana chree nimán snó'o, ne chéé rma'an nana chree yo' nano' so' rej cayáán so', tzaj ne taj se qui'yá' quiri' nana chree yo' rej cayáán so', gaa ne me rá uún nana chree yo' canicaj so' rej cavii so' gaa naá a. Dan me se taj nana chree yo': "Canicaj uún 'unj nan' 'unj rej cavii 'unj a. Ve'é nanj vaa tucua, ne naruvii rá ve' tucua cuano, ne uun yaj yanj rá ve' tucua cuano adonj", taj nana chree yo' a.

<sup>45</sup> Gaa ne dan me se anicaj uún nana chree yo' nimán snó'o yo', ne nano' nana chree yo' yo'óo chij tuvi' nana chree yo' síi chi'ii doj, ne 'na' nique uún so' nimán snó'o yo', gaa ne cayáán taran' nij nana chree yo' a. Dan me se gaa naá gaa cayáán orún' nana chree yo', ne maan ta'nga' quij vaa nimán snó'o yo', tzaj gaa namán yo'óo chij nana chree yo', gaa ne doj a tico nana chree man so', ne doj a quij vaa nimán snó'o yo', 'yaj nana chree yo' a adonj.

"Ne ase vaa ran' snó'o yo' ro', ta'nga' danj quiran' soj sij israelitá sij na'vej rá cunoo se-nana 'unj ei. 'O se che'é se natá' 'unj se-nanaj rihaan soj ro', che'é

dan doj a gaa sayuun quiran' soj rihaan sayuun quiran' nij sí ataa cuno se-nanaj adonj —taj Jesucristó rihaan nij sí naqui'yaj cuu se-tucuanj Moisés do', rihaan nij sí fariseo do' a.

*Nana nihánj taj xna'anj se vaa ase vaa nii Jesucristó do', ase vaa tinúú Jesucristó do', ase vaa ra'vij Jesucristó do', vaa nij sí uno rihaan Diose a*

<sup>46</sup> Ataa quisij ca'mii Jesucristó rihaan nij yuvij, ne cuchi' nii Jesucristó do', tinúú Jesucristó do', rihaan ve' a. Nanó rá nij so' daj qui'yaj nij so' ca'mii nij so' ga Jesucristó a.

<sup>47</sup> Ne cataj yo'q so' rihaan Jesucristó a:

—Xe' ro', nicun' nii so' nicun' tinúú so' nicun', ne me ndo'o rá nij so' ca'mii nij so' ga so' á —taj so' rihaan Jesucristó a.

<sup>48</sup> Ne cataj uún Jesucristó rihaan sí cataj xna'anj rihaan Jesucristó a:

—Me chana me ní 'unj rihaan 'unj, rá so' ga. Me sí me tinúú 'unj rihaan 'unj, rá so' ga —taj Jesucristó rihaan so' a.

<sup>49</sup> Ne ticun' so' ra'a so' rihaan nij sí tucu'yón se-nana so', ne cataj so':

—Ní'yaj so' ei. Ase vaa ní 'unj do', ase vaa tinúú 'unj do', vaa nij sí nihánj adonj.

<sup>50</sup> 'Q se yuvij uno rihaan Réé 'unj sí nicun' xta' ro', ase vaa tinúú 'unj do', ase vaa ra'vij 'unj do', ase vaa ní 'unj do', vaa nij so' rihanj adonj —taj Jesucristó a.

## 13

*Nihánj me cuentó nanó Jesucristó che'é 'núú trigó tix'nuu yo'q so' a*

<sup>1</sup> Dan me se guun naá doj, ne curihanj Jesucristó rá ve', ne cane so' tu'va na lacuaná,

<sup>2</sup> ne ca'na' ndo'o yuvij rihaan so', ne che'é dan cavii so' rque 'o rihoo chéé rihaan na, ne ca'anj cané so' rque rihoo yo', ne canicun' nij yuvij tu'va na lacuaná yo' a.

<sup>3</sup> Ne nanó ndo'o Jesucristó cuentó rihaan nij yuvij, cataj so':

—Dan me se curihanj 'o sí me rá cuchruj naá 'núú trigó, ne tix'nuu so' 'núú trigó yo' rihaan yo'ó,

<sup>4</sup> ne cayuu doj 'núú trigó yo' rá chrej chéé yuvij, ne ca'na' xtâj chá xtâj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâj nanj adonj.

<sup>5</sup> Ne yo'ó ta'aj 'núú trigó yo' ro', cayuu rihaan yuvej rej taj catun' yo'ó a. Che'é dan cuaj xra' stanj le'ej a.

<sup>6</sup> Veé dan, ne quisij güii, ne cuchrii naá le'ej, qui'yaj naán, che'é se ne ca'vee ca'anj nij yáa naá le'ej yo' a man adonj.

<sup>7</sup> Ne yo'ó ta'aj 'núú trigó yo' ro', cayuu sca'núj coj tanj, ne dan me se yoq doj cachij coj tanj yo' rihaan naá le'ej, ne quinavij nu' naá le'ej, qui'yaj coj tanj yo' nanj adonj.

<sup>8</sup> Ne yo'ó ta'aj 'núú trigó yo' ro', cayuu rihaan yo'ó sa', ne naá yo' ro', cachij sa' a. Dan me se rihaan ta'aj yo'ó sa' yo' cientó ya 'núú cavii, qui'yaj 'o 'o 'núú le'ej nij quinij rihaan yo'ó sa' yo', ne rihaan yo'ó ta'aj yo'ó sa' yo' va'nuj chihaa ya 'núú cavii, qui'yaj 'o 'o 'núú le'ej nii quinij rihaan yo'ó sa' yo', ne rihaan yo'ó ta'aj yo'ó sa' yo' icq chi' ya 'núú trigó cavii, qui'yaj 'o 'o 'núú le'ej nii quinij rihaan yo'ó sa' yo' nanj adonj.

9 "Sese taj yu'uj xréé soj, ne cunō soj nana nihánj ei. —Veé dan quisíj cuentó yo' cuentó nanó Jesucristó a.

*Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvií a*

10 Gaa ne quinichrun' nij sí tucu'yón se-nana Jesucristó rihaan so', ne xná'anj nij so' man Jesucristó a:

—Me che'é nanó so' cuentó che'é nij rasuun rihaan nij yuvií ga —taj nij so', xná'anj nij so' man Jesucristó a.

11 Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose asa' guun chij Diose rihaan chumií nihánj adonj. Dan me se nana ne ne'en cunudanj yuvií me nana tihaan Diose rihaan soj adonj. Ne ne raçuíj Diose man yo'ó ta'aj nij yuvií quene'en nij yuvií daj qui'yaj Diose asa' guun chij Diose rihaan chumií nihánj ma'.

12 'Q se sí aj nari' nana ro', doj a nari' uún so', ne uxrá quene'en ndo'o so', qui'yaj Diose nanj adonj. Ne sí na'vej rá nari' sa' nana ro', tanañ ca'nee Diose doj nij nana nari' so' man so', ne quinañ uun so' nanj adonj.

13 Che'é dan nanój cuentó che'é nij rasuun rihaan nij yuvií yo', che'é se ni'yaj nij so' do', nanó xrej nij so' do', tzaj ne ne ne'en nij so' do', ne acaj nij so' cuentá do', ma'.

14 Ne ase vaa nana nihánj nana nata' sí cu'naj Isaías che'é Diose gaa naá ro', veé danj vaa nij yuvií ne veé danj 'yaj nij yuvií cuano ei: "Catuu uxrá nana xréé soj, tzaj ne se xcaj soj cuentá ma'. Ne ni'yaj uxrá soj, tzaj ne se quene'en soj ma'.

15 'Q se caráan ma'an nij yuvií nihánj rihaan nij so', che'é rej na'vej rá nij so' quene'en ma'an nij so', ne caráan nij so' xréé nij so', che'é rej na'vej rá nij so' cunō nij so' uún a. Ne ne atúj nana nimán nij so', 'yaj nij so', che'é yan na'vej rá nij so' xcaj nij so' cuentá ne canicaj nimán nij so' a ma'. 'Q se na'vej uxrá rá nij so' quinañuun sa' nimán nij so' qui'yáa 'unj a man adonj". Yo' me se-nana Diose nana nata' sí cu'naj Isaías che'é ma'an Diose gaa naá a.

16 "Tzaj ne vaa che'é gaa niha' rá soj che'é rihaan soj do', che'é xréé soj do' ei. 'Q se aj quene'en soj se vaa qui'yaj, ne aj cunō soj nana ca'mij á.

17 Ya ya cataj xna'anj 'unj rihaan soj se vaa man ndo'o sí man gaa naá sí nata' se-nana Diose do', sí sa' do', guun rá quene'en se vaa quene'en nij soj, tzaj ne ne quene'en nij so' ma'. Ne guun rá nij so' cunō nij so' se vaa uno soj, tzaj ne ne cunō nij so' man adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj me taj cuentó che'é 'núú trigó yo' a*

18 Gaa ne cataj uún Jesucristó:

—Che'é dan cunō ma'an soj, cataj xna'anj 'unj rihaan soj me taj cuentó che'é 'núú trigó tix'nuu sí cuchruj naa yo' á.

19 Cunudanj yuvií uno nana che'é daj qui'yaj Diose asa' guun chij Diose rihaan chumií ro', sese ne acaj sa' nij so' cuentá, ne 'na' sí chree, ne a'néj sí chree nana yo' nimán yuvií yo' a. Dan me se ase vaa 'núú trigó cayuu rá chrej chéé yuvií vaa yuvií yo' a.

20 Ne 'núú trigó cayuu rihaan yo'óo taj rihaan yujej ro', ase vaa sí uno se-nana Diose vaa yo', ne cuaj uun niha' rá so' canoco' so' nana yo',

<sup>21</sup> tzaj ne ataa xcaj sa' so' cuentá, ne gaa uun che'e yuvij 'yaj yuvij sayuun man so' che'é nana noco' so', ne cuaj nu' uun na'aj so', ne tanáj so' nana yo' cuaj nanj adonj.

<sup>22</sup> Ne 'núu trigó cayuu sca'núj coj tanj ro', ase vaa síi uno se-nana Diose vaa yo', tzaj ne nanó ndo'o rá so' che'é rasuun man rihaan chumij nihánj, ne me ndo'o rá so' qui'yaj canaan so' sa'anj, ne che'é dan tiha' yu'unj so' man ma'an so' che'é sa'anj a. Che'é dan me taj se 'yá' canoco' sa' so' nana nari' so', ne ne nuu sa' nimán so' rihaan Diose ma'.

<sup>23</sup> Ne 'núu trigó cayuu rihaan yo'óo sa' ro', ase vaa síi uno se-nana Diose vaa yo', ne xcaj sa' so' cuentá, ne nuu sa' nimán so' rihaan Diose a. Ne sa' uxrá 'yaj ta'aj nij so', ne sa' doj 'yaj yo'ó ta'aj nij so', ne sa' doj tzin' 'yaj yo'ó ta'aj nij so' nanj adonj. —Veé danj quisij nana ca'mii Jesucristó che'é cuentó yo' a.

### *Nihánj me cuentó nanó Jesucristó che'é coj cachij sca'núj 'núu trigó a*

<sup>24</sup> Ne nanó so' yo'ó cuentó nii rihaan nij so', cataj so':

—Ase vaa qui'yaj 'o síi tix'nuu 'núu trigó sa' to'óo so' ro', danj gaa qui'yaj Diose asa' guun chij Diose rihaan chumij nihánj adonj.

<sup>25</sup> Dan me se quisij tix'nuu so' 'núu trigó yo', ne rej nii orá otoj yuvij catúj 'o síi taj ri'yunj man so' to'óo so', ne tix'nuu síi chí'ij yo' caân coj chí'ij rihaan yo'óo naj 'núu trigó yo', ne veé dan me se ca'anj uún so',

<sup>26</sup> ne dan me se xra' 'núu trigó xra' coj xra', gaa ne quichihón caa raa 'núu trigó do', raa coj do', ne xcaj nij se-mozó síi to'oj yo' cuentá se vaa nuveé 'nuj trigó me nu' naa a. Maan se man uxrá coj rque naa yo' nanj adonj.

<sup>27</sup> Che'é dan cuchi' nij se-mozó síi to'oj yo' rihaan síi to'oj, ne cataj xna'anj nij so' rihaan so', cataj nij so': “Ya inanj 'núu trigó sa' tix'nuu so' na'. Me rej cavii coj chí'ij nihánj ga, señor”, taj nij mozó rihaan síi to'oj yo' a.

<sup>28</sup> Gaa ne cataj so' rihaan nij se-mozó so' a: “Síi taj ri'yunj manj me síi tix'nuu caân coj chí'ij rihaan to'ój ei”, taj so' rihaan nij se-mozó so' a. “Ne me rá so' quirihaa núj coj ne naquiyaj chre' núj coj na'”, taj nij mozó rihaan ru'vee yo' a.

<sup>29</sup> “Taj che'é qui'yaj soj danj ma'. Sese quirihaa soj man coj yo', gaa ne quirihaa uún soj man ta'aj 'núu trigó yo' gaa nanj adonj.

<sup>30</sup> Maan se ca'ne' rá soj cachij rcua'aan coj yo' ga 'núu trigó yo', gaa ne yavii quirij ní' naa trigó, gaa ne cataj xna'anj 'unj rihaan nij síi quirij naa se vaa asino naquiyaj chre' nij so' coj yo', gaa ne numij nij so' coj yo', gaa ne cacaa coj yo' adonj. Gaa ne naquiyaj chre' nij so' 'núu trigó sa', gaa ne caraa sa' nij so' man yo' rá cuchruu adonj”, cataj síi to'oj rihaan se-mozó so' a —cataj Jesucristó rihaan nij yuvij a.

### *Nihánj me cuentó nanó Jesucristó che'é caân cuêj mostazá xlá a*

<sup>31</sup> Ne nihánj me yo'ó cuentó nanó Jesucristó rihaan nij yuvij a:

—Ase vaa achij caân cuêj mostazá xlá ro', danj gaa guun chij Diose rihaan chumij nihánj adonj. Dan me se nicaj yo' o so' man caân cuêj mostazá xlá, ne axrij so' caân yo' rihaan to'óo so' a.

<sup>32</sup> Dan me se le'ej doj vaa caân cuêj mostazá xlá rihaan cunudanj nij caân, tzaj ne asa' cachij yo', ne xij doj vaa yo' rihaan nu' coj man tacaan, ne ase vaa chruun vaa yo' a. Dan me se ayuu nij xtâj vaj rej xtâ' raa cuêj yo', ne 'yaj nij xo' se-sca' nij xo' raa cuêj yo' adonj. —Danj ca'mii Jesucristó rihaan nij so' a.



*Nihánj me cuentó nanó Jesucristó che'é levadura se 'yaj naraa naná rque rachrúún a*

<sup>33</sup> Ne nihánj me yo'ó cuentó nanó Jesucristó rihaan nij yuvij a:

—Dan me se naqui'yaj ní 'o chana caxrij yo'ó levadura rque cunj hariná gaa 'yaj no' rachrúún a. Dan me se ase vaa 'o chana, ne cuxra' ta'aj no' 'o va'nuj ya aga' yo'óo hariná, ne caxrij ndo'o no' yo'óo levadura, ne caxrij yuve no' man yo' ndaa navij naraa ndo'o naná rque yo' a. Ase vaa uun chij yo'óo levadura rihaan cunj hariná ro', danj gaa guun chij Diose rihaan chumij nihánj adonj. —Danj ca'mii Jesucristó rihaan nij so' a.

*Nana nihánj taj xna'anj se vaa inanj cuentó nanó Jesucristó rihaan nij yuvij a*

<sup>34</sup> Inanj cuentó che'é nij rasuun nanó Jesucristó rihaan nij yuvij, gaa ne a'vee nata' so' rihaan nij yuvij a.

<sup>35</sup> Danj qui'yaj so', che'é yan me rá so' qui'yaj so' nu' se vaa cataj 'o sí nata' se-nana Diose gaa naá, cataj so': “Inanj cuentó che'é nij rasuun nanó 'unj rihaan yuvij, ne dan me se cataj xna'anj 'unj rihaan nij so' che'é se vaa qui'yaj Diose asij qui'yaj Diose man nu' chumij nihánj adonj”. Danj ca'mii sí nata' se-nana Diose gaa naá a.

*Nana nihánj taj xna'anj me taj cuentó che'é coj cachij sca'núj 'núú trigó yo' a*

<sup>36</sup> Gaa ne na'née Jesucristó chrej man nij yuvij, ne catúj so' rá ve', gaa ne cuchí' nij sí tucu'yón se-nana so' rihaan so' a. Ne xna'anj nij so' man so', cataj nij so':

—Cataj xna'anj so' rihaan núj me taj cuentó che'é coj cachij sca'núj 'núú trigó yo' á —taj nij so' rihaan Jesucristó a.

<sup>37</sup> Gaa ne cataj xna'anj Jesucristó rihaan nij so', cataj so':

—Sí tix'nuu 'núú trigó sa' rihaan yo'óo ro', ase vaa 'unj sij ca'née Diose nıcaj yu'unj man yuvij vaa so',

<sup>38</sup> ne ase vaa chumij nihánj vaa yo'óo yo', ne 'núú trigó sa' ro', ase vaa nij sí cayáan ga Diose asa' guun chij Diose rihaan chumij vaa yo', ne ase vaa coj chí'ij yo' ro', vaa nij sí noco' man sí chree,

<sup>39</sup> ne ase vaa sí tix'nuu caán coj chí'ij rihaan yo'óo yo' ro', vaa ma'an sí chree yo', ne ase vaa güii ca'ne' Diose cacun' che'é yuvij man rihaan chumij nihánj ro', danj vaa güii quirij nii naa yo', ne ase vaa nij se-mozó Diose vaa nij sí quirij naa yo' á.

<sup>40</sup> Dan me se ase vaa naqui'yaj chre' nii man coj yo' ne cacaa yo' rihaan ya'an ro', danj gaa quiran' nij sí noco' man sí chree güii ca'ne' Diose cacun' che'é yuvij man rihaan chumij nihánj adonj.

<sup>41</sup> Dan me se sí ca'née Diose nıcaj yu'unj man yuvij mej, ne güii dan ca'nej 'unj man nij se-mozó 'unj, ne narij nij so' man nij sí chí'ij 'nij sca'núj nij yuvij guun chij 'unj rihaan a. Dan me se nu' sí tumé cacun' do', nu' sí na'vej rá cuno rihaan Diose do', quirij nij se-mozó 'unj man nij so' rihaan chumij nihánj,

<sup>42</sup> ne ca'nej nij so' man nij sí chí'ij rque chrúún acaa ndo'o nanj adonj. Ne yuvij cumán rej yo' me se ta'vee ndo'o nij so', ne ndaa cha ruj ma'an nij so' cóo yan' nij so' nanj adonj.

<sup>43</sup> Gaa ne cuchuguun nij sí sa' yo' adonj. Dan me se ase vaa chuguun güii ro', danj gaa cuchuguun nij so', ne guun chij Rej nij so' sí nicun' xta' rihaan nij so' ei.

"Dan me se sese taj yu'uj xrée soj, ne cunq soj nana nihánj ei.

*Nihánj me cuentó nanó Jesucristó che'é chrúún sa'anj nari' yo'q so' a*

<sup>44</sup> "Ase vaa 'o chrúún sa'anj 'nij yuve rque yo'óo vaa rej rihaan soj se vaa cayáan soj ga Diose asa' guun chij Diose rihaan chumij nihánj adonj. Dan me se nari' 'o snó'o man chrúún sa'anj yo', gaa ne naráan uún so' yo'óo xráa yo', ne guun niha' uxrá rá so' che'é chrúún sa'anj nari' so', ne ca'anj so' cutu'vej so' nu' si'yaj so', ne nicaj so' sa'anj, ca'anj so', quiránj so' nu' yo'óo 'nij chrúún sa'anj yo' nanj adonj.

*Nihánj me cuentó nanó Jesucristó che'é chruj perlá tu'vee ndo'o a*

<sup>45</sup> "Ne ase vaa síi ne tiendá ne nano' chruj perlá tu'vee ndo'o quiraa ro', danj vaa síi cayáan ga Diose asa' guun chij Diose rihaan chumij nihánj adonj.

<sup>46</sup> Dan me se nari' síi ne tiendá yo' 'o chruj perlá sa' uxrá doj rihaan yo'ó perlá, gaa ne ca'anj so' cutu'vej so' cunudanj si'yaj so', ne nicaj so' sa'anj, quiránj so' man chruj perlá sa' doj yo' nanj adonj.

*Nana nihánj me cuentó nanó Jesucristó che'é xcuaaj atúj rque nanj tiguíj nii rá na a*

<sup>47</sup> "Ne ase vaa quiran' xcuaaj catúj rque nanj tiguíj nii rá na ro', danj gaa quiran' yuvij asa' guun chij Diose rihaan chumij nihánj ei. Dan me se tiguíj yuvij man nanj yo' rque na, ne dan me se me ma'an xcuaaj catúj rque nanj yo' a.

<sup>48</sup> Ndaa síj gaa caraa nanj yo', gaa ne cuxuun nij yuvij man nanj yo' ndaa tu'va na yo', gaa ne ca'anj cayáan nij so' rihaan yo'óo, gaa ne narii nij so' man xcuaaj sa', ne narii nij so' man xcuaaj nij uún a. Gaa ne xcuaaj sa' yo' me se caraa nij so' man xcuaaj sa' yo' rá scaa a. Tzaj ne xcuaaj nij me se quiri'ij uun nij so' man yo' nanj ei.

<sup>49</sup> Ne ase vaa quiran' nij xcuaaj yo' ro', danj quiran' yuvij asa' ca'ne' Diose cacun' che'é yuvij, ne cavij nij se-mozó Diose ne cuxra' ta'aj nij so' man nij síi chí'ij ga nij síi vaa sa',

<sup>50</sup> ne quiri'ij nij so' man nij síi chí'ij yo' rque chrúún ya'aan ndo'o, gaa ne dan me se ta'vee uxrá nij so', ne ndaa cha' ruj ma'an nij so' cúu yan' nij so' nanj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj che'é síi ne'en cunudanj se-nana Diose a*

<sup>51</sup> Ne xna'anj Jesucristó man nij síi tucu'yón se-nana so', cataj so':

—Cuno soj nu' cuentó nanó 'unj cuano na' —taj Jesucristó, xna'anj so' man nij síi tucu'yón se-nana so' a.

—Cuno núj nu' cuentó yo' á —taj nij so' a.

<sup>52</sup> Ne cataj Jesucristó rihaan nij so' a:

—Che'é dan cataj xna'anj 'unj rihaan soj se vaa nij síi naqui'yaj cuu se-tucuanj Moisés me se sese nari' uún nij so' nana che'é güi guun chij Diose rihaan chumij nihánj, ne síi ne'en nu' nana me nij so', ne síi cuu raá guun nij so', qui'yaj nu' nana nari' nij so' adonj. Dan me se ase vaa síi ru'vee ne man rasuun nga do', rasuun naca do', rihaan ro', danj gaa nij so', ne cavij sa' uxrá nij so' nanj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa ne ca'vej rá nij síi man chiháan Jesucristó chuman' cu'naj Nazaret cunq nij so' nana ca'mii Jesucristó ma'*

<sup>53</sup> Dan me se quisij nanó Jesucristó nu' cuentó nihánj rihaan yuvij, ne curihanj so' rej yo', ne ca'anj so' a.

<sup>54</sup> Gaa ne nucui' so' rej chiháán so', ne ca'anj so' ve' tucu'yón nij síi man chiháán so' se-tucuanj Moisés, ne tucu'yón so' man nij síi man rá ve' yo' a. Dan me se caráya'anj nij so', ne cataj nij so':

—Me rej nari' síi nihánj nana cuu avii raá síi nihánj ga. Me rej nari' so' suun sa' 'yaj suun so' ga.

<sup>55</sup> Nuveé ta'nij síi acóij chruun síi ne chiháán ní' me so' na'. Ne nii so' me chana cu'naj Mariá á. Ne tinúú so' me síi cu'naj Jacobo do', síi cu'naj José do', síi cu'naj Simón do', síi cu'naj Judas do' á.

<sup>56</sup> Ne nij ra'vij so' me chana ne chiháán ní' á. Tzaj ne ne ne'enj me rej me nari' so' suun nihánj qui'yaj suun so' ma' —taj nij síi man chiháán Jesucristó rihaan tuvi' nij so' a.

<sup>57</sup> Ne guun nacoó rá nij so' ni'yaj nij so' man Jesucristó a. Ne cataj Jesucristó rihaan nij so' a:

—Me rej ma'an vaj 'o síi nata' se-nana Diose, ne aráj cochroj nij yuvij rihaan so', tzaj ne nij yuvij man chiháán so' do', nij tuvi' so' síi yanj tucua' so' do', na'vej rá caraá cochroj rihaan so' ma' —taj Jesucristó rihaan nij síi man chiháán so' chuman' cu'naj Nazaret yo' a.

<sup>58</sup> Ne doj vaa suun sa' qui'yaj suun Jesucristó chiháán so', che'é se ne cuchuman rá nij síi man chiháán so' ni'yaj nij so' man so' a.

## 14

*Nana nihánj taj xna'anj se vaa cavi' Juan síi cuta' ne man yuvij, qui'yaj síi nicaj suun cu'naj Herodes a*

<sup>1</sup> Dan me se cachén doj güii, gaa ne cuchi' nana rihaan síi nicaj suun cu'naj Herodes che'é nu' se vaa qui'yaj Jesucristó a.

<sup>2</sup> Gaa ne cataj so' rihaan nij se-mozó so' a:

—Síi cu'naj Jesucristó ro', ya síi cu'naj Juan síi cuta' ne man yuvij me so' á. Dan me se cunuu i'na' ya uún síi cu'naj Juan, raj á. Ése síi cu'naj Juan me síi guun nucuaj qui'yaj nij suun sa' nocoo yo' nanj adonj —taj Herodes rihaan nij se-mozó so' a.

<sup>3</sup> Danj ca'mii síi cu'naj Herodes, che'é se gaa rque doj, ne so' me síi qui'yaj quita'aa nij tanuu man síi cu'naj Juan, ne numíj nij tanuu man síi cu'naj Juan, ne caxríj síi cu'naj Herodes taga' man síi cu'naj Juan gaa rque doj a. Danj qui'yaj so' che'é chana cu'naj Herodías nicá tinúú Herodes síi cu'naj Felipé a.

<sup>4</sup> Dan me se xcaj síi cu'naj Herodes man no', ne cataj xna'anj síi cu'naj Juan rihaan so' se vaa ne nó xcúún so' xcaj so' man chocó' so' ma'.

<sup>5</sup> Che'é se cataj síi cu'naj Juan rihaan so', gaa ne guun ndo'o rá síi cu'naj Herodes cavi' síi cu'naj Juan yo' a. Tzaj ne cuchu'vi' so' se vaa ca'maan rá nij yuvij a. 'O se síi nata' se-nana Diose me síi cu'naj Juan, rá nij yuvij a.

<sup>6</sup> Dan me se quisj güii canuú se-cha'anj ma'an síi cu'naj Herodes, gaa ne quira'ánj ndo'o ta'nii chana cu'naj Herodías ni'yaj cunudanj nij síi ca'na' a. Ne guun niha' rá síi cu'naj Herodes quene'en so' man chana yaan quira'ánj,

<sup>7</sup> gaa ne che'é dan cata' tu'va so' se vaa ya uxrá rque so' rihaan no' me ma'an rasuun cachinj no' rihaan so' a.

<sup>8</sup> Dan me se cataj xna'anj chana cu'naj Herodías rihaan ta'nii no' daj ca'mij no' rihaan síi cu'naj Herodes, gaa ne canicun' chana yaan yo' rihaan síi cu'naj Herodes, qui'yaj nii no' chana cu'naj Herodías a. Ne cataj chana yaan yo':

—Ca'nej so' cúu yave síi cu'naj Juan rque aga' rco'oo, ne rque so' manj nihánj á —taj chana yaan yo' rihaan síi cu'naj Herodes, qui'yaj nii no' chana cu'naj Herodías a.

<sup>9</sup> Gaa ne quinano' ndo'o rá síi cu'naj Herodes yo' gaa cuno so' nana yo' a. Quinano' rá so' se vaa cuno cunudanj nij síi ca'na' nana ca'mii so' se vaa rque so' me ma'an rasuun rihaan chana yaan yo' a. Tzaj ne cataj xna'anj so' se vaa nicaj ya chana yaan se vaa cachín no' rihaan so' nanj á.

<sup>10</sup> Ne ca'ne' so' suun rihaan tanuu ca'anj tanuu taga' ca'ne' tanuu cúu yave síi cu'naj Juan yo' a. Ne danj qui'yaj nij tanuu a.

<sup>11</sup> Ne ca'neé nij tanuu cúu yave Juan rque aga' rco'oo, ne ca'anj nicaj nij tanuu cúu yave Juan rihaan chana yaan yo', ne caxrj nij so' man yo' ston chana yaan yo' a. Ne ca'anj nicaj chana yaan yo' man cúu yave Juan rihaan nii no' a.

<sup>12</sup> Gaa ne cuchi' nij síi tucu'yón se-nana Juan taga', ne ca'anj nacaj nij so' cúu man síi cu'naj Juan, ne cachin' nij so' man so' rque yo'óo a. Gaa ne ca'anj nij so', cataj xna'anj nij so' rihaan Jesucristó se vaa cavi' síi cu'naj Juan yo' a.

*Nana nihánj taj xna'anj se vaa ca'vee quirii Jesucristó se chá 'un' mǐj snó'o a*

<sup>13</sup> Dan me se cuno Jesucristó daj cataj síi cu'naj Herodes che'é so', ne che'é dan curihanj Jesucristó rej yo', ne dan me se cavii so' rque rihoo chéé rihaan na, ne ca'anj so' rej quij rej taj vaj yuvií mán a. Ne cuno nij yuvií nana se vaa ca'anj so' rej quij yo' a. Che'é dan curihanj nij yuvií chiháán nij yuvií, ne cachéé tajoj nij yuvií tu'va na lacuaná, ne ca'anj nij yuvií rej ca'anj Jesucristó a.

<sup>14</sup> Ne nanij Jesucristó rá rihoo, ne quene'en so' se vaa aj mán uxrá yuvií, ne cunuu 'eé rá so' man nij yuvií, ne nahuun sa' taran' nij síi ran' ca'na', qui'yaj so' nanj adonj.

<sup>15</sup> Dan me se cachén ndo'o orá, ne nanij güii, ne cuchi' nij síi tucu'yón se-nana Jesucristó rihaan so', ne cataj nij so':

—Rco' quij uun me nihánj, ne taj se chá chá nij yuvií nihánj, ne cachén ndo'o orá nanj á. Qui'yáá so' se ndo'o, ne na'nej so' chrej man nij yuvií, ca'anj nij yuvií chuman' quiraan nij yuvií se chá nij yuvií á —taj nij so' rihaan Jesucristó a.

<sup>16</sup> —Taj che'é ca'anj nij yuvií ma'. Maan se go' ma'an soj se chá chá nij yuvií á —taj Jesucristó rihaan nij so' a.

<sup>17</sup> —Tzaj ne taj se chá rihaan núj nihánj ma'. Maan orún' 'un' rachrúún do', vij guéé xcuaj do', vaa rihaan núj nanj á —taj nij so' rihaan Jesucristó a.

<sup>18</sup> —Rque soj man yo' rihanj nihánj á —taj Jesucristó rihaan nij so' a.

<sup>19</sup> Gaa ne ca'ne' Jesucristó suun rihaan nij yuvií ca'anj cayáán nij yuvií rihaan coj chrín', gaa ne coro' so' 'un' nij rachrúún ne vij roj xcuaj, ne ni'yaj so' rej xta', ne nago' so' graciá rihaan Diose, gaa ne cuxra' ta'aj so' man rachrúún yo', ne caxrj so' ston nij síi tucu'yón se-nana so', ne caxrj nij so' ston nij yuvií a.

<sup>20</sup> Gaa ne chá taran' nij yuvií, ne caraa rque cunudanj nij so', ne ndaa quináj ndo'o se chá, qui'yaj nij yuvií a. Gaa ne naqui'yaj chre' nii man se quináj tu'va nij yuvií, ne caraa yo'óo chuvij ya scaa a.

<sup>21</sup> Ne nij snó'o rqué Jesucristó chraa me se 'un' mǐj snó'o me nij so', ne ne qui'yaj contá nii man chana man xnii man chá se chá yo' ma'.

*Nana nihánj taj xna'anj se vaa cachéé Jesucristó rihaan na a*

22 Gaa ne ra'yanj ca'ne! Jesucristó suun rihaan nij sí tucu'yón se-nānā so' se vaa cavii nij so' rihoo chéé rihaan na ca'anj nij so' rej xco na lacuaná yo', quitaj yaan nij so' rihaan Jesucristó, ne dan me se ma'an Jesucristó na'nej chrej man nij yuvij, taj Jesucristó rihaan nij sí tucu'yón se-nānā so' a.

23 Dan me se ca'anj nij so', ne cataj Jesucristó rihaan nij yuvij se vaa ca'vee ca'anj nij yuvij a. Gaa ne cavii orún' so' raá quij, ne cachín ni'yaj so' rihaan Diose a. Ne daj doj cata' güii raá quij, ne so' me se quináj so' raá quij yo' a.

24 Dan me se gan' uxrá vaj rihoo nuu nij sí tucu'yón se-nānā Jesucristó rihaan na, ne güej ndo'o rihoo yo' rihaan na, qui'yaj nana, che'é se go' nana rej rihaan rihoo yo' a.

25 Dan me se yan' si'nu' ca'anj Jesucristó rej vaj nij so', chéé tacoj uun so' rihaan na yo', vaj so' nanj adonj.

26 Ne quene'en nij sí tucu'yón se-nānā so' man so' se vaa chéé uun so' rihaan na, ne cuchu'vi' ndo'o nimán nij so' a.

—Ta'naj me yo' ei —taj nij so' rihaan tuvi' nij so', ne caguáj nij so', che'é se cuchu'vi' nij so' a.

27 Veé dan, ne nu' cataj Jesucristó rihaan nij so' a:

—Naqui'yaj nucuaj soj nimán soj ei. 'Uñj 'na' ei. Se cuchu'vi' soj ma' —taj so' rihaan nij so' a.

28 Gaa ne cataj Pedró rihaan so' a:

—Sese ya ya veé so' 'na', ne qui'yáá so' se ndo'o, ne ca'vee cachee 'unj rihaan na qui'yáá so', Señor —taj Pedró rihaan Jesucristó a.

29 —Ca'vee ca'na' so' á —taj Jesucristó rihaan Pedró a.

Ne nanij Pedró rá rihoo, ne cachéé so' rihaan na, ne ca'anj so' rihaan Jesucristó a.

30 Tzaj ne ni'yaj so' na se vaa cavii ndo'o nana yo', ne cuchu'vi' so', ne guun che'e so' ca'anj nij so' rque na yo' a. Che'é dan caguáj so' rihaan Jesucristó, cataj so':

—Tinanii so' manj rihaan na, Señor —taj so' a.

31 Veé dan, ne nu' quita'aa Jesucristó ra'a Pedró, ne quirii Jesucristó man so' rque na, ne cataj Jesucristó:

—Doj amán rá so' ni'yaj so' manj á. Me che'é guun vijj nimán so' ga —taj Jesucristó rihaan so' a.

32 Gaa ne catúj roj so' rque rihoo chéé rihaan na, gaa ne canicun' nana yo' a.

33 Gaa ne canicun' ruj nij sí man rque rihoo rihaan Jesucristó, ne cataj nij so':

—Ya ta'nij Diose mé so' á —taj nij so' a.

*Nana nihánj taj xna'anj se vaa nari' nucuaj nij sí ran' man rej cu'naj Genesaret, qui'yaj Jesucristó a*

34 Gaa ne cuchi' nij so' tu'va na lacuaná, ne ca'anj nij so' rej cu'naj Genesaret a.

35 Ne nuu yaan nij sí man rej yo' man Jesucristó, ne ca'née nij so' nana rihaan cunudanj nij sí yanj nu' anicaj se vaa ca'na' Jesucristó a. Ne nicaj nii man cunudanj nij sí ran' yanj rej yo' ca'na' nii rihaan Jesucristó a.

36 Ne cachín ni'yaj uxrá nij yuvij rihaan Jesucristó se vaa ca'vej Jesucristó cano ra'a nij so' doj tu'va sagan' so' a. Ne nu' nij sí cano ra'a doj tu'va sagan' so' ro', nahuun sa' cunudanj nij so' cuaj nanj adonj.

## 15

*Nana nihánj taj xna'anj me che'é ne na'ya' nij sí tucu'yón se-nana Jesucristó gaa chá nij so' chraa a*

<sup>1</sup> Gaa ne quinichrun' sí fariseo do', quinichrun' sí naqui'yaj cū se-tucuañj Moisés do', rihaan Jesucristó, ne sí cavii chuman' Jerusalén me nij so' a. Ne xná'anj nij so' man Jesucristó, cataj nij so':

<sup>2</sup>—Nij sí tucu'yón se-nana so' ro', me che'é ne uno nij so' nana cataj xna'anj nij sí man gaa naá ga. 'O se ne na'ya' nij so' gaa chá nij so' chraa ma' —taj nij so' rihaan Jesucristó a.

<sup>3</sup>Gaa ne cataj Jesucristó rihaan nij so' a:

—Danj nanj ma'an soj, ne me che'é ne uno ma'an soj se-nana Diose 'yaj ma'an tucuaán noco' soj ga.

<sup>4</sup>'O se ca'ne' Diose suun se vaa: “Caraa cochróo so' rihaan rée so' do', rihaan nii so' do' á”. Ne: “Sí a'mii chree rihaan rej do', rihaan nii do', me se vaj so' ne nu' che'e caví' so' á”. Danj vaa nana cataj xna'anj Diose rihaan ní á.

<sup>5</sup>Tzaj ne taj soj se vaa sese cataj yo'o so' rihaan rej so' do', rihaan nii so' do', se vaa aj rque' so' nu' si'yaj so' rihaan Diose ne che'é dan se ca'vee racuíj so' man rej so' do', man nii so' do',

<sup>6</sup>ne daj chihaa mij ne nó xcúun so' racuíj so' man rej so' do', man nii so' do', taj soj a. Dan me se danj inanj a'mii soj gaa tucu'yón soj se-nana nij sí man gaa naá, ne axrj yuve soj man se-nana Diose nanj adonj.

<sup>7</sup>”Dan me se sí tu'va rma'an me soj nanj á. Dan me se ca'mii natáj sí cu'naj Isaias se-nana Diose gaa naá, ne cataj xna'anj so' daj sij me soj a. Cataj so':

<sup>8</sup>“Yuvij nihánj ro', ase vaa nana a'mii sí aráj cochroj rihanj vaa nana a'mii nij so', tzaj ne tu'va rma'an nij so' nanj á. Nimán nij so' me se ino vaa nanj adonj. 'O se ne noco' uxrá nimán nij so' manj ma'.

<sup>9</sup>Na'víj rma'an nij so' rihanj nanj á. 'O se nanj se-nana yuvij me nana tucu'yón nij so' nanj adonj”. Dan me se-nana Diose nana a'mii che'é soj á —taj Jesucristó rihaan nij sí fariseo do', rihaan nij sí naqui'yaj cū se-tucuañj Moisés rihaan yuvij do' a.

<sup>10</sup>Gaa ne canacúun Jesucristó man nij yuvij ca'na' nij yuvij rihaan so' a. Gaa ne cataj so' rihaan nij yuvij:

—Cuno soj nana nihánj, ne xcaj soj cuentá nedí'.

<sup>11</sup>Nuvee se atúj tu'va yuvij me se 'yaj chí'ij man yuvij ma'. Se avii tu'va yuvij ro', 'yaj chí'ij man yuvij adonj —taj Jesucristó rihaan nij yuvij a.

<sup>12</sup>Gaa ne cuchi' nij sí tucu'yón se-nana Jesucristó rihaan Jesucristó, ne cataj nij so':

—Ne'én so' se vaa ca'maan rá nij sí fariseo che'é nana ca'mii so' rihaan nij so' na' —taj nij so', xná'anj nij so' man Jesucristó a.

<sup>13</sup>Gaa ne cataj Jesucristó:

—Xa' nij so', tzaj ne ase vaa coj xra' ma'an vaa nij so' do', vaa nana tucu'yón nij so' do' adonj. Nuvee sij tucu'yón se-nana Diose me nij so' ma'. Che'é dan, ase vaa tiri' nii man coj xra' ma'an ro', danj gaa tiri' Diose man nij so' ga nana tucu'yón ma'an nij so' nanj adonj.

<sup>14</sup>Tanáj nij soj man nij so' á. Me rá nij so' cataj xna'anj nij so' rihaan yuvij daj qui'yaj yuvij á. Tzaj ne ase vaa sí aráan rihaan vaa nij so' adonj. Dan me se ne'en soj se vaa sese guun rá sí tuchrii racuíj so' man yo'ó sí tuchrii narí'

so' chrej ca'anj so', ne quinij roj síf tuchrij yo' rá yu'uj nanj ei —taj Jesucristó rihaan nij síf tucu'yón se-nanā so' a.

<sup>15</sup> Gaa ne cataj Pedró rihaan so' a:

—Cataj xna'anj so' rihaan núj me taj nanā ca'mii so' che'é se atúj tu'va yuvij á —taj Pedró a.

<sup>16</sup> Gaa ne cataj Jesucristó:

—Vaa soj vaa, ne ataa xcaj ma'an soj do' cuentá a na'.

<sup>17</sup> Ne ne'en soj se vaa nu' se atúj tu'va yuvij ro', achén yo' rque yuvij, ne urihanj yo' gaa re'é yuvij nanj á.

<sup>18</sup> Tzaj ne se urihanj tu'va yuvij ro', yo' me nanā avii nimán yuvij, ne nanā yo' me 'yaj chi'ij ndo'o man yuvij adonj.

<sup>19</sup> 'Q se nihánj me se chi'ij avii nimán yuvij a: se chi'ij do', yan ticavi' man tuvi' do', yan cotoj ga nica tuvi' do', che'é yan qui'yaj ituy si'yaj tuvi' do', che'é yan ca'mij ne che'é tuvi' do', che'é yan nachrij ni'yaj man tuvi' do', me nu' se avii nimán yuvij,

<sup>20</sup> ne nu' yo' me se vaa 'yaj chi'ij man yuvij nanj adonj. Tzaj ne che'é nu' se chá yuvij me se ca'vee se ne na'ya' yuvij gaa chá yuvij chraa, tzaj ne se qui'yaj chi'ij yo' man yuvij ma' —taj Jesucristó rihaan nij síf tucu'yón se-nanā so' a.

*Nanā nihánj taj xna'anj se vaa cuchumán rá 'o chana cananea se vaa racuíj Jesucristó man no' a*

<sup>21</sup> Gaa ne curihanj Jesucristó rej yo', ne ca'anj so' rej naj chuman' cu'naj Tiro do', chuman' cu'naj Sidón do' a.

<sup>22</sup> Gaa ne curihanj 'o chana cananea chana ne rej yo' a. Ne caguáj ndo'o no' rihaan Jesucristó, cataj no':

—Ne'enj se vaa tuvi' síf cu'naj David síf cane gaa naá mé so', Señor. Che'é dan cunu 'ee rá so' manj á. 'Q se canó uxrá nanā chrej man ta'nij chalā cunii nanj á —taj chana yo', caguáj no' rihaan Jesucristó a.

<sup>23</sup> Tzaj ne a 'ó nanā ne ca'mij Jesucristó rihaan no' a. Gaa ne cuchi' nij síf tucu'yón se-nanā Jesucristó rihaan so', ne cachíin ni'yaj nij so' rihaan so', cataj nij so':

—Qui'yáá so' se ndo'o, ne cataj xna'anj so' rihaan chana yo' se vaa ca'anj chana yo' nanj ruguanj. 'Q se nocq' uxrá no' man ní', ne aguáj ndo'o no' nanj asanj —taj nij so' a.

<sup>24</sup> Gaa ne cataj so':

—Nanj chana yanj me no', ne inanj rihaan nij yuvij israelitá ca'neé Diose manj nanj á. 'Q se ase vaa daán Diose matzinj ro', vaa nij síf israelitá rihaan Diose, ne aj ca'anj ni'ya uxrá nij so', ne che'é yan nanq' 'unj man síf ca'anj ni'ya 'naj nanj adonj —taj Jesucristó rihaan nij so' a.

<sup>25</sup> Gaa ne cuchi' chana yo' rihaan Jesucristó, ne canicun' ruj no' rihaan Jesucristó, ne:

—Racuíj so' manj, Señor —taj no' a.

<sup>26</sup> Gaa ne cataj so':

—Dan me se ne'en so' se vaa se ca'vee čata'aa ní' co'oo man rihaan nij xnii ne go' ní' ča nij chuvee ma'. Che'é dan ne nó xcúnj racuíj man soj sij yanj a man adonj. Maan se inanj ma'an nij yuvij israelitá me no' xcúin 'unj racuíj 'unj nanj adonj —taj Jesucristó rihaan chana yo' a.

<sup>27</sup> Gaa ne cataj no':

—Veé danj vaa guęę, Señor. Ne nij chuvee ro', chá nij xo' tachruu ayuu tu'va se-xqui' nij xo' nanj á. Ne ase vaa chuvee chá tachruu vaa 'unj rihaan so' nanj adonj. Che'é dan me ndo'o raj raçułj so' doj manj, raj nanj adonj —taj chana yo' rihaan Jesucristó a.

<sup>28</sup> Gaa ne cataj Jesucristó:

—Cuchumán uxrá rá so' ni'yaj so' manj, nocoj. Che'é dan qui'yáj se vaa achúın so' rihanj nanj ei —taj Jesucristó rihaan no' a.

Ne veé maan orá dan nahuun sa' ta'níı chana yo' a.

*Nana nihánj taj xna'anj se vaa nahuun sa' uxrá yuviı, qui'yaj Jesucristó a*

<sup>29</sup> Gaa ne curihanj Jesucristó rej yo', ne cachén so' na lacuaná cu'naj Galilea, gaa ne cavii so' raa 'o quij, ne ca'anj cayáán so' rihaan yo'óo a.

<sup>30</sup> Ne cuchi' uxrá yuviı rihaan so', ne ca'na' nij yuviı nicaj nij yuviı man tuvi' nij yuviı síı ran' rihaan so' a. Dan me se síı chéé rengo do', síı tuchrıı do', síı ya'mıı do', síı anó chi'ıı do', cuchi' rihaan Jesucristó, qui'yaj nij yuviı, ne cuchruj nij yuviı man nij síı ran' yo' tacóo Jesucristó, ne nahuun sa' nij so', qui'yaj Jesucristó a.

<sup>31</sup> Ne caráya'anj ndo'o nij yuviı quene'en nij yuviı se vaa ca'mii nij síı ya'mıı yo' do', se vaa cachéé sa' nij síı rengo do', se vaa nachuguun rihaan nij síı tuchrıı do' a. Ne sa' uxrá ca'mii nij yuviı che'é Diose se vaa ve'é ndo'o vaa Diose síı noco' nij yuviı israelitá man a.

*Nana nihánj taj xna'anj se vaa go' Jesucristó se chá rihaan ca'anj mıj snó'o a*

<sup>32</sup> Gaa ne canacúın Jesucristó ca'na' nij síı tucu'yón se-nana so' rihaan so', ne cataj so':

—Cunuu 'eę raj man nij yuviı nihánj nanj á. 'O se quisıj va'nuj güıı mán nij so' gaj, ne taj yan vaj se chá nij so' a ma'. Ne na'vej raj ca'nej 'unj man nij so' ca'anj nij so' ma'. 'O se vaj nij so' chrej, ne na'aan rque nij so', ne ninaj nij so' rá chrej, rá 'unj nanj adonj —taj Jesucristó a.

<sup>33</sup> Ne cataj nij síı tucu'yón se-nana so' rihaan so' a:

—'O se rco' quij uun me nihánj, ne me rej quirı' ní' rachrúın chá cunudanj nij yuviı nihánj ga —taj nij so' a.

<sup>34</sup> —Me daj rachrúın vaa rihaan soj ga —taj Jesucristó, xná'anj so' man nij síı tucu'yón se-nana so' a.

—Daj 'o chıj rachrúın ne daj doj xcuaj le'ej nii ne, vaa rihaan nıj nanj adonj —taj nij so' a.

<sup>35</sup> Gaa ne ca'ne' Jesucristó suun rihaan nij yuviı se vaa cayáán nij yuviı rihaan yo'óo a.

<sup>36</sup> Gaa ne nicaj so' chıj rachrúın yo' ne doj xcuaj, ne nago' so' graciá rihaan Diose, gaa ne cuxra' ta'aj so' man rachrúın yo' do', man neę xcuaj yo' do', ne caxrıj so' ston nij síı tucu'yón se-nana so', ne rque nij so' rihaan nij yuviı a.

<sup>37</sup> Gaa ne chá cunudanj nij yuviı, ne ndaa caraa rque nij so' a. Gaa ne naqui'yaj chre' nii se vaa quináj tu'va nij yuviı yo', ne quisıj 'o cunu' chıj ya scaa caraa qui'yaj se quináj tu'va nij yuviı yo' a.

<sup>38</sup> Dan me se cunudanj nij so' chá, ne quisıj ndaa ca'anj mıj nij snó'o chá, ne ino me se chá nij chana do', nij xniı do', nanj adonj.

<sup>39</sup> Gaa ne na'née Jesucristó chrej man nij yuviı, ne cavii so' rá rihoo chéé rihaan na, ne ca'anj so' rej cu'naj Magadán a.



## 16

*Nana nihánj taj xna'anj se vaa cachúin nij síi fariseo do', nij síi saduceo do', qui'yaj Jesucristó 'o suun sa' nocoo quene'en nij so' a*

<sup>1</sup> Gaa ne cuchi' nij síi fariseo cuchi' nij síi saduceo cuchi' rihaan Jesucristó, ne me rá nij so' quene'en nij so' sese ya síi ca'née Diose me Jesucristó a. Che'é dan cachúin ni'yaj nij so' rihaan Jesucristó se vaa racuj Diose man Jesucristó, ne qui'yaj Jesucristó 'o suun sa' nocoo quene'en nij so', gaa ne guun ya rá nij so' se vaa síi ca'née ya Diose me Jesucristó, rá nij so' a.

<sup>2</sup> Gaa ne ca'mii Jesucristó rihaan nij so', cataj so':

—Dan me se gaa ata' güii, ne ni'yaj soj xta', ne sese maree vaa xta', ne: “Xraj, ne x'nuu a'yuj”, taj soj á.

<sup>3</sup> Ne rej na'yaan ni'yaj soj xta', ne sese maree vaa rej xta', ne sese aráan ndo'o ngaa rej xta', ne: “Corá caman' uxrá maan”, taj uún soj á. Dan me se ne'en soj xcaj soj cuentá che'é se vaa ne'en soj rej xta', tzaj ne ne ne'en soj xcaj soj cuentá che'é sayuun quirán' soj sij man rihaan chumi' nihánj vaa güii a ma'.

<sup>4</sup> Maan che'é se yuvii 'na' rej chi'ii na'vej rá canoc'o sa' man Diose me soj sij israelitá, ne che'é dan me rá soj qui'yaj suun sa' nocoo á. Tzaj ne se qui'yaj suun sa' nocoo ma'. Maan se quene'en soj se vaa ase vaa quirán' síi cu'naj Jonás síi nata' se-nana Diose gaa naá ro', danj quirán' 'unj, vaa güii nanj á —taj Jesucristó rihaan nij síi fariseo do', rihaan nij síi saduceo do' a. Gaa ne tanáj Jesucristó man nij so', ne ca'anj so' a.

*Nana nihánj taj xna'anj se vaa ne ca'vej rá Jesucristó cunq nij síi tucu'yón se-nana so' man nana tucu'yón nij síi fariseo do', nij síi saduceo do' a*

<sup>5</sup> Gaa ne ca'anj nij síi tucu'yón se-nana Jesucristó rej xc'o na lacuaná, gaa ne xcaj nij so' cuentá se vaa quini'yón nij so', ne nicaj nij so' rachrúun cha' nij so' a.

<sup>6</sup> Gaa ne cataj Jesucristó rihaan nij so' a:

—Cutumé soj man soj se gaa nanj quirán' soj sayuun, qui'yaj se-levadura nij síi fariseo do', nij síi saduceo do' á —taj Jesucristó no nij so' a.

<sup>7</sup> Ne nuchruj raá ndo'o nij síi tucu'yón se-nana Jesucristó che'é nana ca'mii so', ne:

—Che'é se taj rachrúun nicaj ní', ne che'é dan a'mii so' che'é levadura se 'yaj naraa nana rque rachrúun nanj adonj —taj nij so' a.

<sup>8</sup> Ne aj ne'en Jesucristó daj uun nimán nij so', ne che'é dan cataj so':

—Me che'é nanó ndo'o rá soj se vaa taj rachrúun rihaan soj ga. 'O se doj amán rá soj ne'en soj manj vaa gaa nanj asan.

<sup>9</sup> Me che'é ataa xcaj soj cuentá ga. Ne ne nuú rá soj gaa vaa daj 'o 'un' guee rachrúun rihaan ní' tzaj ne quisij chá cunu' 'un' mǐj snó'o, qui'yaj a. Ne ndaa que'ee scaa se chá quináj tu'va yuvii gaa naqui'yaj chre' soj a.

<sup>10</sup> Ne me che'é quini'yón soj che'é chij rachrúun ga. Ne nuú rá soj gaa vaa daj 'o chij guee rachrúun rihaan ní' tzaj ne quisij chá cunu' ca'anj mǐj snó'o, qui'yaj a. Ne ndaa que'ee scaa se chá quináj gaa naqui'yaj chre' uún soj a.

<sup>11</sup> Daj me che'é ne ne cunq soj ga. Nuveé che'e nanj rachrúun ca'mij rihaan soj ma'. Maan se cutumé soj man soj se gaa nanj quirán' soj sayuun qui'yaj se-levadura nij síi fariseo do', nij síi saduceo do' adonj —taj Jesucristó rihaan nij so' a.

<sup>12</sup> Gaa ne xcaj nij so' cuentá se vaa nuveé che'e nanj levadura se 'yaj naraa nana rque rachrúun me cataj xna'anj Jesucristó rihaan nij so' se vaa cutumé

nij so' man nij so'; maan ne 'o se che'e se ne ca'vej rá Jesucristó tiha' yu'unj nij sí fariseo do', nij sí saduceo do', man nij so' ga se-nana nij so' ro', che'é dan ca'mii Jesucristó nana vaa danj rihaan nij sí noco' man so' nanj adonj.

*Nana nihánj taj xna'anj se vaa cataj xna'anj Pedró me sí me Jesucristó a*

13 Gaa ne ca'anj Jesucristó rej naj chuman' cu'naj Cesarea de Filipino, gaa ne xna'anj so' man nij sí tucu'yón se-nana so', cataj so':

—Daj taj nij yuvii che'é 'unj sij ca'née Diose nıcaj yu'unj man yuvii ga. Ne me sí mé 'unj, taj nij yuvii ga —taj Jesucristó, xna'anj so' man nij so' a.

14 —Vaa sí taj se vaa sí cu'naj Juan sí cuta' ne man yuvii mé so' ei. Ne vaa sí taj uún se vaa sí cu'naj Elías sí nata' se-nana Diose gaa naá me uún so' chuguanj. Ne vaa sí taj uún se vaa sí cu'naj Jeremías do', yo'ó sí nata' se-nana Diose gaa naá do', me uún so' xa'. 'O se danj taj 'o 'o nij yuvii che'é so' nanj adonj —cataj nij so' rihaan Jesucristó a.

15 —Ne ma'an soj, gaa ne me sí mé 'unj, rá ma'an soj ga —taj Jesucristó, xna'anj so' man nij sí tucu'yón se-nana so' a.

16 Gaa ne cataj sí cu'naj Simón Pedró:

—Sí ca'née Diose tinanii man yuvii rihaan sayuun mé so', ne ta'nij Diose sí vaa i'na' ya mé so' ei —taj so' rihaan Jesucristó a.

17 Gaa ne cataj Jesucristó rihaan Pedró a:

—Qui'yaj uxrá Diose se luj che'é so', Simón ta'nij sí cu'naj Jonás á. 'O se nuveé nana cataj xna'anj yuvii rihaan so' me nana ca'mii so' cuano ma'. 'O se Réé 'unj sí nicun' xta' me sí racuíj mán so' narí so' nana yo' nanj adonj.

18 Ne cuano nihánj me se cataj xna'anj 'unj rihaan so' se vaa ya Pedró cu'naj so', che'é se ase vaa yuvej ne tacóo ve' ro', vaa so', ne sí nucaj ndo'o nimán mé so' ei. Che'é dan, ase vaa 'yaj nii une' nii ve' xráa yuvej ro', danj gaa qui'yáj, cune' 'unj man nij sí noco' manj, se vaa guun nucaj rá nij so' mán so', ne nıcaj yu'unj so' man nij so', qui'yáj nanj adonj. Ne se cavi' nu' soj sij noco' manj a ma'. 'O se gaa i'na' soj nu' cavi' nu' ca'anj nanj adonj.

19 Ne cune' 'unj mán so' se vaa guún so' sí qui'yaj cayáan yuvii ga Diose asa' guun hij Diose rihaan chumii nihánj, ne naj guun rasuun cataj xna'anj so' se vaa ne nó xcúun yuvii qui'yaj yuvii me se veé danj ma'an Diose na'vej qui'yaj yuvii danj ma'. Ne naj guun rasuun cataj xna'anj so' se vaa ca'vee qui'yaj yuvii me se veé danj ma'an Diose a'vej qui'yaj yuvii danj adonj. —Inanj danj ca'mii Jesucristó rihaan sí cu'naj Pedró a.

20 Gaa ne cataj xna'anj Jesucristó rihaan nij sí tucu'yón se-nana so' se vaa se nata' nij so' rihaan a 'o yuvii se vaa sí ca'née Diose tinanii man yuvii rihaan sayuun me so', taj so' a.

*Nana nihánj taj xna'anj se vaa cataj xna'anj Jesucristó se vaa cavi' so', ne cunu i'na' uún so' a*

21 Dan me se güii yo' guun che'e Jesucristó cataj xna'anj Jesucristó rihaan nij sí tucu'yón se-nana so' se vaa no xcúun so' cavi' so' chuman' Jerusalén, ne quirán' ndo'o so' sayuun qui'yaj nij sí uun hij do', nij xrej ata suun noco' doj do', nij sí naqui'yaj cuu se-tucuanj Moisés rihaan nij yuvii do' a. Ne ticavi' nii man so', ne cachén va'nuj güii, gaa ne cunu i'na' uún so', cataj so' a.

22 Gaa ne quirii yanj sí cu'naj Pedró man Jesucristó, ne guun che'e so' cataj so' se vaa ne nó xcúun Jesucristó ca'mii Jesucristó danj a. Ne cataj Pedró:

—Cunu 'ee rá Diose mán so', Señor. Daj chihaa mij se quirán' so' danj ma' —taj Pedró rihaan Jesucristó a.

23 Gaa ne canicaj Jesucristó, ne ca'mii so' rihaan Pedró a:

—Naxuun so' mán so' rihanj á. Na'vej raj quene'enj mán so' ma'. 'O se ase tu'va síi chree síi cu'naj Satanás ro', danj tu'vá so', ne aráán so' chrej rihanj cunoj rihaan Diose ei. Danj tu'vá so', che'é se ne acaj so' cuentá daj me rá Diose adonj. Maan se inanj acaj so' cuentá daj me rá yuvij nanj adonj —taj Jesucristó rihaan síi cu'naj Pedró yo' a.

24 Gaa ne cataj Jesucristó rihaan nij síi tucu'yón se-nana so' a:

—Sese me rá yo'ó so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quiran' uxrá so' sayuun do', ca'vee se ndaa cachron nii man so' rihaan rcutzé do', tzaj ne yo'ó qui'yaj suun so' che'ej, ne yo'ó canoco' raan so' manj adonj.

25 Tzaj ne sese vaa 'o síi me rá tjananii man ma'an rihaan sayuun, ne vaa güii yo'ó cavi' nimán so' adonj. Tzaj ne sese cavi' yo'ó so' che'é se vaa me so' síi noco' manj, ne vaa güii cunuú i'na' uún so' adonj.

26 Ne a me se quirij 'o so' sese qui'yaj canaán so' nu' rasuun man rihaan chumij nihánj ne ca'anj ni'ya nimán so', rá soj ga. Daj chihaa mij se ca'vee cavi' sa' so', qui'yaj rasuun man rihaan chumij nihánj a ma'. Tzaj ne ca'vee se navij nu' si'yaj yo'ó so' rihaan chumij nihánj, tzaj ne sese gaa i'na' nimán so' nu' cavi' nu' ca'anj, ne quinano rá so', rá soj na'. Daj chihaa mij se quinano rá so' a ma'. 'O se cavi' sa' uxrá so' nanj adonj.

27 "'O se ya ya ca'na' 'unj sij ca'née Diose nıcaj yu'unj man yuvij, ne uxrá ve'é gaa 'unj, qui'yaj Réé 'unj, ne ca'na' nij se-mozó so' ga 'unj nanj adonj. Gaa ne naru'vee 'unj rihaan 'o 'o so' che'é suun qui'yaj suun 'o 'o so' nanj adonj.

28 Ya ya cataj xna'anj 'unj rihaan soj cuano se vaa xa' ta'aj soj sij nicun' nihánj cuano me se gaa ataa a cavi' ta'aj soj, ne ya quene'en ta'aj soj asa' ca'ná' 'unj guun chij 'unj rihaan chumij nihánj, ne quene'en ta'aj soj manj nanj adonj. Dan me se síi ca'née Diose nıcaj yu'unj man yuvij mej nanj adonj —taj Jesucristó rihaan nij síi tucu'yón se-nana so' a.

## 17

*Nana nihánj taj xna'anj se vaa chuguun ndo'o man Jesucristó ni'yaj nij síi tucu'yón se-nana so' a*

1 Cachén vatan' güii, gaa ne nicaj Jesucristó man síi cu'naj Pedró do', síi cu'naj Jacobo do', tinúú Jacobo síi cu'naj Juan do', ca'anj so' raá 'o quij xcaan rej taj vaj a 'ó yuvij ne a.

2 Gaa ne yo'ó cunuun ino cunudanj man Jesucristó ni'yaj nij síi tucu'yón se-nana so', ne dan me se chuguun ndo'o rihaan so', ne ase vaa chuguun güii ro', danj chuguun rihaan so' nanj á. Ne nuu catzii ndo'o sagan' so', ne ase vaa ya'an chuguun vaa sagan' so' a.

3 Gaa ne naquiyaa síi cu'naj Moisés síi cane gaa naá ga síi cu'naj Elías síi cane gaa naá rihaan nij so', ne nanó roj so' cuentó ga Jesucristó a.

4 Gaa ne cataj Pedró rihaan Jesucristó a:

—Cunaj uxrá vaa mán núj nihánj ga so', Señor. Sese me rá so', ne qui'yáa 'unj va'núj ve' yacataj cane soj nanj á. 'O ve' cané so', ne yo'ó ve' cané síi cu'naj Moisés, ne yo'ó ve' cané síi cu'naj Elías ei —taj Pedró rihaan Jesucristó a.

5 Ataa quisij ca'mii Pedró, ne ca'na' 'o ngaa chuguun ndo'o, ne caráan ngaa chuguun yo' man taran' nij so' a. Gaa ne Diose ro', ca'mii nana cuno nij so' rque ngaa yo', ne cataj Diose:

—Sí níhánj me ta'níj adonj. 'Ee raj man so', níhã' raj ni'yaj 'unj man so' adonj. Cuno soj rihaan so' ei —taj Diose cuno nij so' a.

<sup>6</sup> Dan me se cuno nij sí tucu'yón se-nãã Jesucristó nãã yo', gaa ne ca'anj quinaj nij so' rihaan yo'óó, ne cuchu'vi' ndo'o nij so' a.

<sup>7</sup> Gaa ne cuchi' Jesucristó rihaan nij so', ne cuta' ra'a so' xráá nij so', ne cataj so':

—Canicun' caya soj, ne se cuchu'vi' soj ma' —taj so' a.

<sup>8</sup> Gaa ne naxcaj rihaan nij so' ni'yaj nij so', ne daj orún' Jesucristó nicun', quene'en nij so' nanj adonj.

*Nãã níhánj taj xna'anj se vaa ase vaa sí cu'naj Elías ro', danj vaa sí cu'naj Juan sí cuta' ne man yuvií a*

<sup>9</sup> Gaa ne gaa nanij nij so' tacóó quij yo' me se ca'ne' Jesucristó suun rihaan nij so', cataj so':

—Se nata' soj rihaan a 'ó yuvií che'é se vaa quene'en soj cuan' ma'. Yo'ó dínj gaa tu'va soj che'é se vaa quene'en soj á. Nãã quisíj cavi' 'unj ne cunuu i'na' uún 'unj, gaa ne ca'vee nata' soj se vaa quene'en soj daj quirán' 'unj sij ca'néé Diose nĩcaj yu'unj man yuvií nanj adonj —taj Jesucristó rihaan nij so' a.

<sup>10</sup> Gaa ne xná'anj nij sí tucu'yón se-nãã so' man so', cataj nij so':

—Me che'é taj nij sí naqui'yaj çuu se-tucuanj Moisés rihaan yuvií se vaa asino ca'na' sí cu'naj Elías sí nata' se-nãã Diose gaa naá, gaa ne ca'vee ca'ne' Diose cacun' che'é yuvií ga —taj nij sí tucu'yón se-nãã Jesucristó, xná'anj nij so' man Jesucristó a.

<sup>11</sup> Gaa ne cataj Jesucristó:

—Ya a'mii nij sí naqui'yaj çuu se-tucuanj Moisés, taj nij so' se vaa asino ca'na' sí cu'naj Elías, gaa ne naqui'yaj sa' so' nu' rasuun adonj.

<sup>12</sup> Tzaj ne cuano níhánj me se cataj xna'anj 'unj rihaan soj se vaa aj ca'na' sí cu'naj Elías yo', tzaj ne ne cuno nij yuvií rihaan so' ma'. Maan se qui'yaj ya nij yuvií ndaa vaa me rá ma'an nij yuvií man so' nanj adonj. Ne nda' se sij ca'néé Diose nĩcaj yu'unj man yuvií mej, tzaj ne ase vaa quirán' so' sayuun qui'yaj nij yuvií ro', danj inanj quirán' 'unj sayuun qui'yaj uún nij yuvií nanj adonj —taj Jesucristó a.

<sup>13</sup> Gaa ne xcaj nij sí tucu'yón se-nãã Jesucristó cuentá se vaa ca'mii Jesucristó che'é sí cu'naj Juan sí cuta' ne man yuvií cataj Jesucristó se vaa sí nacaj se-suun sí cu'naj Elías me sí cu'naj Juan yo' a.

*Nãã níhánj taj xna'anj se vaa nahuun sa' 'o xnii nuu nãã chree nimán, qui'yaj Jesucristó a*

<sup>14</sup> Gaa ne ca'anj nij so' rej vaj ndo'o yuvií, ne cuchi' 'o snó'o rihaan Jesucristó, gaa ne canicun' ruj so' rihaan Jesucristó, gaa ne cataj so':

<sup>15</sup> —Cunuu 'ee rá so' man ta'níj, Señor. 'Q se quisnúú so', qui'yaj yavii, ne inanj naxru' so' rihaan ya'an, ne ran' ndo'o so' sayuun nanj adonj. Veé dan, ne inanj naxru' so' rque na uún, ne ne ni'yanj uxrá ran' so' ma'.

<sup>16</sup> Ne ca'anj nicaj 'unj man so' rihaan nij sí tucu'yón se-nãã so', tzaj ne taj se qui'yá' nahuun sa' so', qui'yaj nij so' ma' —taj snó'o yo' a.

<sup>17</sup> Gaa ne cataj Jesucristó:

—Dan me se sí ne amán rá me soj sij man rihaan chumii níhánj cuano, ne chi'ii vaa nimán soj, ne a me daj cachej ga soj, ne a me daj gaa naj nimanj ni'yaj 'unj man soj, gaa ne ca'vee qui'yaj canaán soj ga. Nĩcaj soj man xnii ca'na' soj rihanj cuaj á —taj Jesucristó a.

<sup>18</sup> Gaa ne ca'ne' Jesucristó suun rihaan nana chree nuu nimán xnii se vaa tanáj so' man xnii yo' a. Gaa ne curihanj so' nimán xnii, ca'anj so', ne veé maan orá dan nahuun sa' xnii yo' a.

<sup>19</sup> Gaa ne cuchi' inanj nij ma'an nij sí tucu'yón se-nana Jesucristó rihaan Jesucristó, ne xná'anj nij so' man so', cataj nij so':

—Me che'é ne guun nucuaj núj ca'vee quirii núj man nana chree yo' nimán xnii ga —cataj nij so', xná'anj nij so' man Jesucristó a.

<sup>20</sup> Gaa ne cataj Jesucristó:

—Che'é se doj amán rá soj, che'é dan ne ca'vee guun nucuaj soj ei. Tzaj ne ne'en soj se vaa caân man raá cuêj mostazá xlá, ne nda' se tzin' vaa yo', tzaj ne asa' achij yo', ne ase vaa caân chruun chii ndo'o ro', vaa yo' ei. Ne ase vaa caân cuêj mostazá xlá yo' ro', danj gaa ma'an soj á. Ya ya cataj xna'anj 'unj rihaan soj se vaa sese ya amán rá soj ne sese cataj soj rihaan 'o quij se vaa curihanj quij yo' rej nicun' yo' ne natuna quij yo' rej nicun' quij yo', ne sese ya ya cuchuman rá soj se vaa ca'anj quij yo', ne cavi' quij yo' rej nicun' yo', ne ca'anj yo' níchrej ei. Ne guun nucuaj soj qui'yaj soj cunudanj nanj adonj.

<sup>21</sup> Ne nana chree vaa danj ro', se ca'vee qui'yaj ní curihanj nij so' nimán yuvii sese ne achín ni'yaj ndo'o ní rihaan Diosé ne sese ne toco' ní x'naa man ma'an ní che'é se aráj guéé ní rihaan Diosé a —taj Jesucristó rihaan nij so' a.

*Nana nihánj taj xna'anj se vaa cataj xna'anj uún Jesucristó se vaa cavi' so' ne cunuú i'na' uún so' a*

<sup>22</sup> Dan me se cunuú chre' uún taran' nij so' estadó Galilea, gaa ne cataj Jesucristó rihaan nij sí tucu'yón se-nana so' a:

—O se sí ca'néé Diosé nicaj yu'unj man yuvii mej, ne vaa güii nago' nii manj rihaan yuvii adonj.

<sup>23</sup> Dan me se ticavi' nij yuvii manj, gaa ne cachén va'núj güii, gaa ne cunuú i'na' uún 'unj nanj adonj —taj Jesucristó a.

Gaa ne quinanó ndo'o rá nij sí tucu'yón se-nana so' a.

*Nana nihánj taj xna'anj me che'é ne nó xcúún Jesucristó go' so' puextó che'é nuví a*

<sup>24</sup> Catúj nij so' chuman' Capernaum, gaa ne cuchi' nij sí ca'néj puextó che'é nuví rihaan sí cu'naj Pedró, ne xná'anj nij so' man Pedró, cataj nij so':

—Sí tucu'yón nana rihaan soj ro', o' so' puextó che'é nuví na' —taj nij so' a.

<sup>25</sup> —O' so' ei —taj Pedró rihaan nij so' a.

Gaa ne catúj Pedró rá ve', tzaj ne aj ne'en Jesucristó se vaa me rá Pedró xna'anj Pedró sese ya o' Jesucristó puextó che'é nuví a. Che'é dan asino Jesucristó xná'anj man Pedró, cataj so':

—Daj uun rá so', ga Simón'. Nij sí nicaj suun rey uun chij rihaan yuvii man rihaan chumii nihánj me se me sí a'néj nij so' puextó rihaan ga. Rihaan ma'an ta'níi nij so' na'. Ase rihaan yo'ó yuvii xa' —taj Jesucristó, xná'anj so' man Pedró a.

<sup>26</sup> —Rihaan yo'ó yuvii adonj —taj Pedró rihaan Jesucristó a.

Gaa ne cataj Jesucristó:

—Che'é dan taj che'é go' ta'núí sí nicaj suun puextó ma'. Ne ase vaa sí nicaj suun vaa Réé 'unj Diosé, ne rii ta'nga' so' rihaan nuví, ne che'é dan ne nó xcúnj goj puextó che'é nuví ma'.

27 "Tzaj ne se guun ca'mañan rá nij síí a'néj puextó che'é nuvíí, qui'yaj ní ma'. Che'é dan ca'anj so' tu'va na lacuaná, ne tagüéj so' 'o aga' ata'aa xcuaj rque na, ne quita'aa so' xcuaj cano aga' asino yaan á. Gaa ne nuxra' so' tu'va xcuaj yo', ne quirí' so' sa'anj aga' estatero tu'va xcuaj yo', ne go' so' sa'anj yo' che'é ní rihaan nij síí a'néj puextó á —taj Jesucristó a.

## 18

*Nana nihánj taj xna'anj me síí me síí guun chij doj asa' guun chij Diose rihaan chumií nihánj a*

1 Veé mañan orá dan cuchi' nij síí tucu'yón se-nana Jesucristó rihaan so', ne xná'anj nij so' man so' a:

—Ne me síí me síí guun chij doj asa' guun chij Diose rihaan chumií nihánj ga —taj nij so' a.

2 Gaa ne canacúún Jesucristó ca'na' 'o ne'ej rihaan so', ne cachrón so' man ne'ej yo' tanuú nij síí tucu'yón se-nana so',

3 ne cataj so':

—Ya ya cataj xna'anj 'unj rihaan soj cuano se vaa no xcúún soj nuchran' nimán soj, ne ase vaa ne'ej nihánj ro', danj gaa soj á. Sese na'vej rá soj qui'yaj soj danj, ne daj chihaa mij se cayáán soj ga Diose asa' guun chij Diose rihaan chumií nihánj a ma'.

4 Dan me se sese naqui'yaj nica' yo'o so' nimán so', ne sese ase vaa nimán ne'ej nihánj danj gaa nimán so', ne so' me síí guun chij doj asa' guun chij Diose rihaan chumií nihánj nanj adonj.

*Nana nihánj taj xna'anj daj quiran' síí qui'yaj chi'ii nimán 'o síí nica' nimán síí cuchumán rá ni'yaj man Jesucristó a*

5 "Ne me ma'an 'o síí aráj cochroj ne a'mii sa' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj.

6 Dan me se me ma'an 'o síí qui'yaj chi'ii nimán 'o síí le'ej amán rá ni'yaj manj, ne ca'vee a doj cavii sa' síí qui'yaj danj sese toco' nii 'o yuvej xij váj 'núú trigó gaán chihá so' ne tagüéj nii man so' rque na ya'anj nanj adonj. Dan me se doj a sayuun quiran' so', sese qui'yaj chi'ii so' nimán 'o síí le'ej amán rá ni'yaj manj adonj.

7 Niqúe ndo'o nij síí man rihaan chumií nihánj, che'é se vaa ya'núj uxrá rihaan nij so' canoco' nij so' chrej chi'ii ei. Ne inanj danj vaa chumií nihánj, man ndo'o chrej chi'ii canoco' yuvii ei. Tzaj ne niqúe síí 'yaj anoco' yuvii chrej chi'ii yo' nanj adonj. 'O se daj chihaa mij se cavii sa' so' ma'.

8 "Dan me se sese ra'á so' do', tacóo so' do', me rá qui'yaj cacun', ne táa a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' ei. Taj se 'yaj sese taj váj tacóo so' do', ra'á so' do', tzaj ne ca'vee cayáán so' ga Diose gaa ei. Tzaj ne sese quita' ra'á so' do', tacóo so' do', ne qui'yaj nij yo' cacun', ne ca'anj so' rihaan ya'an, qui'yaj nij yo', ne dan me se yo' me se cunuú so' nu' cavii nu' ca'anj ei.

9 Veé danj uún sese me rá rlij rihaan so' qui'yaj yo' cacun', ne táa a se quirii so' man yo', ne síí rihaan canuú gaa so', tzaj ne ca'vee cayáán so' ga Diose gaa ei. Tzaj ne sese cunuú rlij rihaan so' ne qui'yaj yo' cacun', ne ca'anj so' rihaan ya'an, qui'yaj yo' ei.

*Nana nihánj taj xna'anj se vaa ve'é ndo'o tumé Diose man nij síí vaa nica' nimán síí noco' man so' a*

10 "Cütumé soj man soj se cataj soj se vaa taj yu'vee nó yo' o tuvi' soj sí nica' nimán ei. 'O se cataj xna'anj 'unj rihaan soj cuano se vaa vaa se-mozó Réé 'unj sí nicun' xtá' tumé man 'o 'o nij so' nanj adonj. Ne niganj nicun' nij so' rihaan Réj, ne uno Réj nu' nana nata' nij so' rihaan Réj ei.

11 'O se xa' 'unj sij ca'née Diosé nicaj yu'unj man yuvij, tzaj ne ca'ná' 'unj che'é rej tinani' 'unj man nij sí ca'anj ni'ya rihaan sayuun a.

12 "Tumé Diosé man nij sí nica' nimán sí noco' man so', rá soj na'. Nihánj me cataj xna'anj 'unj rihaan soj á. Ne'en soj se vaa sese vaa 'o cientó daán yo' o so' matzinj, ne sese ca'anj ni'ya orún' matzinj yo', ne tanáj sí daan matzinj yo' man ca'anj chihaa xnu' ca'anj matzinj yo' raá quij, ne ca'anj so' nano' so' matzinj ca'anj ni'ya yo' ei.

13 Ne cataj xna'anj 'unj rihaan soj se vaa sese nari' so' daán so' matzinj, ne guun niha' uxrá rá so' nanj adonj. Doj tzin' gaa niha' rá so' che'é ca'anj chihaa xnu' ca'anj nij matzinj ne ca'anj ni'ya a. Tzaj ne che'é matzinj nari' uún so' doj a gaa niha' rá so' nanj adonj.

14 Dan me se ase vaa na'vej rá so' ca'anj ni'ya orún' daán so' matzinj ro', danj vaa na'vej rá Rej ní' sí nicun' xtá' ca'anj ni'ya a 'o sí nica' vaa nimán sí noco' man so' nanj adonj.

*Nana nihánj taj xna'anj se vaa vaa suun rihaan ní' ca'mii ní' rihaan tinúú ní' che'é cacun' tumé tinúú ní' a*

15 "Ne sese qui'yaj tinúú so' cacun' rihaan so', ne ca'anj orún' so' rihaan so', ne cataj xna'anj so' rihaan so' che'é cacun' tumé so' á. Ne sese cunó so' rihaan so', ne dan me se aj qui'yaj canaán so', ne yo' o canoco' tinúú so' man Diosé ga so' vaa gaa nanj adonj.

16 Tzaj ne sese ne cunó so' rihaan so' ne nicaj so' yo' o do', yavíj do', tinúú so' ca'anj so' rihaan tinúú so' sí tumé cacun' yo', ne ndaa sj, gaa ne canicun' vij va'naj soj sij cunó nana ca'mii so', gaa ne guun ya rá soj a. Sese 'o cuyaan gaa nana ca'mii vij va'naj sí quene'en, ne ya vaa nana ca'mii nij so' a.

17 Ne sese ne cunó sí tumé cacun' rihaan vij va'naj nij tinuj nij soj, gaa ne ca'anj soj nata' soj rihaan taran' nij sí noco' man Diosé yanj chiháan soj á. Ne sese ne cunó so' rihaan taran' nij sí noco' man Diosé, gaa ne guun yaníj soj rihaan so' á. Dan me se ase vaa 'o sí yaníj do', ase vaa 'o sí tiha' yu'unj che'é puextó do', danj gaa so' rihaan soj ei.

18 "Cuanó nihánj me cataj ya 'unj rihaan soj se vaa a me ma'an rasuun se ca'vee qui'yaj yuvij rá soj, ne veé danj na'vej rá Diosé qui'yaj yuvij uún a. Ne naj guun rasuun cataj soj se vaa ca'vee qui'yaj yuvij, ne veé danj gaa qui'yaj yuvij, rá ma'an Diosé uún a.

19 Dan me se cataj uún 'unj rihaan soj, ne sese vaa vij soj me rá cachinj ni'yaj rihaan Réj sí nicun' xtá', ne cachinj ni'yaj soj se vaa achiin rihaan soj, ne rque so' man soj se vaa achiin man soj a.

20 Ése me rej ma'an nuu chre' 'o vij sí noco' manj cachinj ni'yaj nij so', ne veé danj nicun' ma'anj ga nij so' a —taj Jesucristó a.

*Nana nihánj taj xna'anj se vaa no xcúún ndo'o ní' caraa x'naa ní' che'é tinúú ní' a*

21 Gaa ne cuchi' sí cu'naj Pedró rihaan Jesucristó, ne xná'anj so' man so', cataj so':

—Me daj nó xcúnj caraa x'naj che'é tinúj sí qui'yaj chi'ij manj ga. Chij ya caraa x'naj na' —taj Pedró, xná'anj so' a.

22 Gaa ne cataj Jesucristó rihaan so' a:

—Ne ne'en uxrá so' á. 'O se naj guun cacun' qui'yaj tinúú so', ne yo' o caraá x'naa niganj so' che'é tinúú so' nu' cavii nu' ca'anj nanj adonj.

23 Dan me se ase vaa 'o sí nicaj suun rey ro', danj gaa Diose asa' guun chij Diose rihaan chumij nihánj adonj. Dan me se sí nicaj suun rey yo' me se 'o güii, ne guun rá so' nachin' so' sa'anj man nij se-mozó so' a.

24 Dan me se guun che'e so' ca'neé so' sa'anj vaa xcúun, ne asino yaan nicaj nii man 'o sí 'yaj xcúun que'ee millón pesó ca'na' nii rihaan sí nicaj suun rey yo' a.

25 Ne taj yan vaj a doj sa'anj nicaj sí 'yaj xcúun yo' narque so' rihaan rey a ma'. Che'é dan cataj xna'anj sí nicaj suun rey yo' se vaa cane' mozó cane' nica mozó cane' ta'níi mozó cane' nu' si'yaj mozó cane', gaa ne nari' rey se-sa'anj rey, taj rey a.

26 Gaa ne canicun' ruj mozó yo' rihaan sí nicaj suun rey yo', ne cachín ni'yaj uxrá so', cataj so': “Caraá x'naa uxrá so' doj, ne vaa güii narquej cunudanj sa'anj mán so', sí chij”, taj se-mozó so' rihaan so' a.

27 Gaa ne cunuu 'ee rá sí nicaj suun rey ni'yaj so' man se-mozó so', ne ca'néj so' xcúun xráá mozó yo', ne ca'ne' rá so', ca'anj un mozó yo', qui'yaj so' a.

28 “Veé dan, gaa ne curihanj mozó yo', ca'anj so', gaa ne nari' tuvi' so' ga yo' o mozó 'yaj suun rcua'aaan ga so', gaa ne yo' o mozó yo' me sí qui'yaj xcúun doj pesó rihaan mozó caráj x'naa rey a. Gaa ne quita'aa so' man tuvi' so' mozó yo', ne cataj so': “Narque so' nu' se vaa 'yaj xcúun so' rihanj cuaj vij”, taj so' rihaan tuvi' so' a.

29 Gaa ne canicun' ruj yo' o mozó yo' rihaan tuvi' so' sí nachin' xcúun yo', gaa ne cataj so': “Caraá x'naa so', ne vaa güii, ne narquej sa'anj mán so' ei”, taj mozó yo' rihaan tuvi' so' a.

30 Tzaj ne ne ca'vej rá so' caraá x'naa so' rihaan tuvi' so' mozó yo' a ma'. Maan se ca'anj so', ne caxrj so' taga' man tuvi' so', ne ndaa se narque ya tuvi' so' nu' se vaa 'yaj xcúun yo' rihaan so', gaa ne ca'ne' rá so' a.

31 “Veé dan, gaa ne quene'en yo' o nij se-mozó sí nicaj suun rey daj qui'yaj sí caxrj taga' man tuvi', ne nanó ndo' o rá nij so' che'é sí 'nj taga' yo' a. Che'é dan cuchi' nij so' rihaan sí nicaj suun rey yo', ne nata' nij so' cunudanj rihaan rey a.

32 Gaa ne ca'néé sí nicaj suun rey yo' nana rihaan mozó caxrj taga' man tuvi' se vaa ca'na' so' rihaan so' a. Dan me se ca'na' so' rihaan rey, gaa ne ca'mii rey rihaan so' a: “Mozó chi'ij nimán mé so' ei. 'Unj me se ca'néj un 'unj xcúun xráá so', che'é se cachín ni'yáá so' rihanj a.

33 Ne ase vaa cunuu 'ee raj mán so' ro', danj vaa no xcúun so' cunuu 'ee rá so' man tuvi' so' mozó 'yaj suun ga so' adonj”, taj so' rihaan se-mozó so' a.

34 Gaa ne ca'maan ndo' o rá sí nicaj suun, ne tacuachén sí nicaj suun man mozó yo' rihaan sí 'nj ra'a taga', ne naqui'yaj naca' sí nicaj suun yo' xcúun xráá mozó, ne cataj xna'anj so' se vaa se curihanj mozó yo' taga' ndaa naru'vee ya so' nu' se vaa qui'yaj xcúun so', gaa ne curihanj so' a.

35 “Ne ase vaa qui'yaj sí nicaj suun yo' ro', ta'nga' danj qui'yaj uún Réj sí nicun' xta' che'é soj, sese na'vej rá soj caraá x'naa soj rihaan tinúú soj nanj adonj —taj Jesucristó a.



## 19

*Nana nihánj taj xna'anj se vaa ne nó xcúún yuvij quiri'ij yuvij man nica yuvij*

<sup>1</sup> Gaa ne quisij ca'mii Jesucristó nana yo', gaa ne curihanj so' estadó Galilea, ne ca'anj so' ndaa rnej tu'va chraá cu'naj Jordán, ndaa estadó Judea a.

<sup>2</sup> Ne canoco' xraá yuvij man so', ne nahuun sa' nij sí ran', qui'yaj so' a.

<sup>3</sup> Gaa ne cuchi' doj sí fariseo rihaan Jesucristó, ne me rá nij so' cuta' nij so' cacun' xraá Jesucristó che'é nana ca'mii Jesucristó a. Che'é dan xna'anj nij so' man Jesucristó, cataj nij so':

—Sese ne chihan' 'yaj chana nica yo'o snó'o, rá snó'o yo', ne nō xcúún so' quiri'ij so' man no' na' —taj nij so' a.

<sup>4</sup> Gaa ne cataj Jesucristó:

—Aj nayaa soj nana nō rihaan danj Diose nana taj se vaa asij qui'yaj Diose chumij, ne qui'yaj Diose snó'o, ne qui'yaj Diose chana, ne vij roj so' me yuvij, qui'yaj Diose a.

<sup>5</sup> Ne vaa yo'ó nana taj: “Che'é dan tanáj snó'o man rej so' do', man nii so' do', ne ve'é nacaj snó'o man chana nica so', ne ase vaa orún' yuvij ro', danj gaa roj so' adonj”. Danj taj danj Diose a.

<sup>6</sup> Dan me se nuveé vij ran' yuvij me roj so' asij xcax tuvi' roj so' a ma'. 'O se ase vaa orún' yuvij ro', vaa roj so' nanj adonj. Dan me se ma'an Diose qui'yaj xcax tuvi' roj so', ne che'é dan ne nó xcúún a 'o yuvij ca'ne' tanuu yuvij man roj so' ma' —taj Jesucristó rihaan nij sí fariseo yo' a.

<sup>7</sup> Gaa ne cataj nij sí fariseo:

—Che'é dan, me che'é cataj xna'anj Moisés se vaa naxcaj snó'o 'o yanj cataj xna'anj se vaa quiri'ij so' chana nica so', ne ca'vee quiri'ij so' man no' ga —taj nij so' a.

<sup>8</sup> Ne cataj Jesucristó rihaan nij so' a:

—Che'é se nichraj ndo'o nimán soj ro', che'é dan cataj xna'anj Moisés rihaan soj se vaa naxcaj soj yanj yo', ne quiri'ij soj nica soj a. Tzaj ne asij guun che'é Diose qui'yaj Diose man yuvij, ne ne vaa danj ma'.

<sup>9</sup> Cuanō nihánj me se cataj xna'anj 'unj rihaan soj se vaa sese ne cotoj chana nica yo'o so' ga yo'ó chii, ne sese ri'ij rma'an so' man chana yo' ne xcax so' man yo'ó chana, ne sí tumé ndo'o cacun' me ma'an so' nanj adonj. Veé ase vaa sí cotoj ga naj guun chana ro', vaa so' rihaan Diose nanj adonj —taj Jesucristó rihaan nij so' a.

<sup>10</sup> Gaa ne cataj nij sí tucu'yón se-nana Jesucristó rihaan so':

—Sese ne nó xcúún snó'o quiri'ij so' man chana nica so', ne taj che'é xcax snó'o man chana ma'. Maan se sa' doj cavij sí ne uun adonj —taj nij so' a.

<sup>11</sup> Gaa ne cataj Jesucristó:

—Nuveé tucuanj canoco' cunudanj yuvij me nana ca'mii soj ma'. Maan se doj vaa nij yuvij canoco' tucuáan yo', qui'yaj Diose nanj ei.

<sup>12</sup> Dan me se vaa sí asij ca'ngaa so', danj na'vej rá so' xcax so' man chana, tzaj ne vaa yo'ó so' uún, ne gaa me so' xnii, ne ta'aj nij sí xcoj ruvaa rá ne ma'an nij so' naqui'yaj capuu man ta'aj xnii, ne gaa achij xnii, gaa ne na'vej rá so' xcax so' man chana gaa a man adonj. Dan me se vaa yo'ó so' uún, ne ca'vee nanj xcax so' chana, tzaj ne maan se noco' ndo'o so' man Diose, ne me ndo'o rá so' guun chij Diose rihaan chumij nihánj, ne 'yaj suun ndo'o so', ne ne vaa ya'núj rihaan so' xcax so' chana, rá so', gaa ne che'é dan na'vej inanj rá ma'an so' xcax so' chana a man adonj. Sese guun nucuaj yo'o so' canoco' so' tucuáan yo', ne ve'é canoco' so' tucuáan yo' nanj adonj —taj Jesucristó a.

*Nana nihánj taj xna'anj me che'é caran' rá Jesucristó ni'yaj so' man ne'ej a*

13 Gaa ne nicaj nij yuvij man nij ne'ej ca'na' nij yuvij rihaan Jesucristó a. Me rá nij yuvij cuta' Jesucristó ra'a so' raá nij ne'ej, ne cachinj ni'yaj so' rihaan Diose che'é nij ne'ej yo' a. Tzaj ne cataj xna'anj nij sí tucu'yón se-nana Jesucristó rihaan nij yuvij se vaa ne nó xcúún nij ne'ej ca'na' nij ne'ej rihaan Jesucristó, taj nij so' a.

14 Tzaj ne cataj Jesucristó:

—Ca'ne' rá soj ca'na' nij ne'ej rihanj á. Se caráán soj chrej rihaan nij ne'ej mei. 'O se tucua' nij sí vaa danj ro', me rej yanj Diose uun chij Diose nanj adonj —taj Jesucristó a.

15 Gaa ne cuta' so' ra'a so' raá nij ne'ej, gaa ne curihanj so' rej yo' a.

*Nana nihánj taj xna'anj che'é yo'q sí me rá cayáán ga Diose nu' cavii nu' ca'anj a*

16 Dan me se cuchi' yo'q sí tachruu yo' rihaan Jesucristó, ne xná'anj so' man Jesucristó, cataj so':

—Me suun sa' qui'yaj sunj, ne ca'vee cayánj ga Diose nu' cavii nu' ca'anj, ga maestro' —taj so' a.

17 Gaa ne cataj Jesucristó:

—Me che'é xná'anj so' manj che'é se sa' ga. 'O se orún' Diose vaa sa' á. Tzaj ne sese me rá so' cayáán so' ga Diose nu' cavii nu' ca'anj, ne cunó so' nij nana nocoo ya ya nana cataj xna'anj Diose rihaan ni' á —taj Jesucristó a.

18 —Me nana ga —taj sí tachruu yo', xná'anj so' man Jesucristó a.

Gaa ne cataj Jesucristó:

—Nana nihánj a: “Se ticaví' so' yuvij ma'. Se cotoj so' ga chana' nica' yo'ó yuvij ma'. Se qui'yaj ituu' so' si'yaj yo'ó yuvij ma'. Se nanó so' cuentó ne che'é yuvij ma'.

19 Caraa cochróo so' rihaan rée so' do', rihaan ní so' do' á. Ase vaa 'ee rá so' man ma'án so' ro', danj gaa 'ee rá so' man tuví' so' á.” Yo' me nana cunó so' ei —taj Jesucristó rihaan sí tachruu yo' a.

20 —Nu' nana yo' unoj adonj. Vaa yo'ó se vaa achiin qui'yaj na' —taj sí tachruu yo' rihaan Jesucristó a.

21 Gaa ne cataj Jesucristó rihaan so' a:

—Sese me rá so' cunuu sa' inanj nimán so', ne cavii so' ca'anj so', ne cutu'vee so' nu' si'yáá so', ne sa'anj quirí' so' ro', caxrii so' ston nij sí nique, ne cumán ndo'o si'yáá so' rej xta', qui'yaj Diose nanj ei. Ne dan me se ca'na' so', ne canocó' so' manj, ca'anj ní' á —taj Jesucristó a.

22 Dan me se cuno sí tachruu yo' nana cataj xna'anj Jesucristó rihaan so', ne ca'anj uun so', ne nanó ndo'o rá so' a. 'O se sí ru'vee me so', ne vaa ndo'o si'yaj so' a.

23 Gaa ne ca'mii Jesucristó rihaan nij sí tucu'yón se-nana so', cataj so':

—Ya ya cataj xna'anj 'unj rihaan soj se vaa sayuun uxrá vaa quisij sí ru'vee cayáán sí ru'vee ga Diose asa' guun chij Diose rihaan chumij nihánj nanj adonj.

24 Dan me se ne'en soj se vaa sayuun ndo'o vaa cachén xcuu camelló rihaan yu'uj taj tacúún cúu nuvá, tzaj ne cuano nihánj me se cataj xna'anj 'unj rihaan soj se vaa ca'vee a doj cachén xcuu yo' yu'uj taj tacúún cúu nuvá, ndaa rá se vaa sí ru'vee, ne se guun cachén so' cayáán so' ga Diose asa' guun chij Diose rihaan chumij nihánj a ma' —taj Jesucristó a.

<sup>25</sup> Dan me se cuno nij sí tucu'yón se-nānā Jesucristó nanā ca'mii so', ne caráya'anj uxrá nij so', cataj nij so':

—Che'é dan me se me sí guun nucuaj quinaniij rihaan sayuun ga —taj nij so' a.

<sup>26</sup> Ni'yaj Jesucristó man nij so', ne cataj so':

—Se guun nucuaj yuvij quinaniij ma'an nij yuvij rihaan sayuun ma'. Sayuun uxrá vaa rihaan nij so' nanj adonj. Tzaj ne xa' Diose me se ne sayuun a doj vaa rihaan so' a ma'. Canó rasuun ca'vee qui'yaj so' nanj adonj —taj so' a.

<sup>27</sup> Gaa ne cataj Pedró rihaan Jesucristó a:

—Ne núj ga. Aj tanáj núj nu' si'yaj núj, ne canoco' núj mán so' á. Daj quirān' núj ga —taj Pedró, xná'anj so' a.

<sup>28</sup> Gaa ne cataj Jesucristó:

—Veé sí noco' manj me soj, ne sí ca'née Diose nicaj yu'unj man yuvij mej adonj. Ne ya ya cataj xna'anj 'unj rihaan soj se vaa asa' cunuu naca chumiij nihánj, ne asa' guun che'ej cayánj gunj sí rii ta'nga' rihaan chumiij nihánj, ne cayáán chuvij nij soj ca'ne' soj cacun' che'é chuvij nij x'ne' nij yuvij israelitá adonj.

<sup>29</sup> Ne sí tanáj ve' tucúa tanáj tinúú tanáj ra'vij tanáj rej tanáj nii tanáj ta'nii tanáj yo'óo tanáj canoco' so' manj ro', uxrá doj rasuun quirí' uún so', ne cayáán so' ga Diose nu' cavii nu' ca'anj adonj.

<sup>30</sup> Tzaj ne que'ee nij sí guun chij ndo'o rihaan chumiij nihánj ro', guun nij so' sí noco' ei. Ne que'ee nij sí ne guun chij rihaan chumiij nihánj me se guun chij nij so', qui'yaj Diose nanj adonj.

## 20

*Cuentó nihánj taj xna'anj daj qui'yaj Diose naru'vee Diose rihaan taran' ní sij yaj suun che'é so' a*

<sup>1</sup> "Ase vaa qui'yaj 'o sí to'oj rej man ndo'o coj chruj uvá ro', danj qui'yaj Diose asa' guun chij Diose rihaan chumiij nihánj adonj. Dan me se sí to'oj yo' ro', rej taxrej curihanj so' nano' so' sí qui'yaj suun rihaan to'óo so' rej man coj chruj uvá yo' a.

<sup>2</sup> Gaa ne yo' o ca'mii so' ga nij sí qui'yaj suun rihaan to'óo so', se vaa 'o sa'anj denario go' so' che'é suun qui'yaj suun 'o 'o nij so' 'o güii, ne ca'née so' man nij so', qui'yaj suun nij so' rihaan to'óo so' a.

<sup>3</sup> "Gaa ne aga' uun curihanj uún sí to'oj yo', ca'anj so' rihaan yu'vee, gaa ne quene'en so' doj snó'o nicun' ma'an uun rihaan yu'vee, ne taj vaj suun rihaan nij so' a.

<sup>4</sup> Gaa ne cataj so' rihaan nij so': "Ca'anj soj qui'yaj suun soj rihaan to'ój ei. Naru'vee 'unj rihaan soj che'é nu' suun qui'yaj suun soj ei", taj so' rihaan nij mozó a.

<sup>5</sup> Dan me se ca'anj nij snó'o yo' qui'yaj suun nij so' uún to'óo sí to'oj yo' a.

"Gaa ne caxuj do', aga' va'núj do', curihanj uún sí to'oj yo', ne nari' so' doj sí qui'yaj suun rihaan to'óo so', ne ca'née so' man nij so' qui'yaj suun nij so' rihaan to'óo so' uún a.

<sup>6</sup> "Gaa ne aga' 'un' curihanj uún sí to'oj yo', ne nari' so' doj sí nicun' ma'an rihaan yu'vee a. "Me che'é nicun' ma'an soj nu' güii nihánj ga. Taj vaj suun qui'yaj suun soj á", taj so', xná'anj so' man nij so' a.

<sup>7</sup> "Maan se taj sí rqué suun man núj qui'yaj suun núj ma'", taj nij so' a. "Ca'anj soj qui'yaj suun soj rihaan to'ój ei", taj so' rihaan nij so' a.

8 "Veé dan, gaa ne nichrun' cata' güii tu'va quij, gaa ne ca'ne' sí to'oj yo' suun rihaan se-mozó so' sí tumé sa'anj se vaa naru'vee so' sa'anj rihaan nij sí qui'yaj suun rihaan to'óo so' yo' a. "Canacunj so' ca'na' nij sí qui'yaj suun yo', ne naru'vee so' rihaan nij so' á. Asino yaan naru'vee so' rihaan nij sí catúj suun aga' 'un', gaa ne naru'vee so' rihaan nij sí catúj suun rej na'yaan á", taj so' rihaan sí tumé sa'anj yo' a.

9 "Dan me se asino yaan ca'na' nij sí catúj naa aga' 'un' rihaan sí tumé sa'anj, ne 'o sa'anj denario quirí' 'o 'o nij so' a.

10 Gaa ne ca'na' nij sí catúj suun rej na'yaan rihaan sí tumé sa'anj yo' a. Nocoqo doj sa'anj quirí' nij so', rá nij so', tzaj ne veé danj 'o sa'anj denario quirí' 'o 'o nij so' uún a.

11 Nicaj nij so' sa'anj, gaa ne guun che'e nij so' ca'maan rá nij so' ni'yaj nij so' sí to'oj yo',

12 gaa ne cataj nij so': "Sí nihánj me se orún' orá guee qui'yaj suun nij so', tzaj ne 'o cyaan naru'vee so' rihaan nij so' ga núj, ne qui'yaj suun núj nu' güii, ne go' uxrá naán xráá núj á", taj nij so' rihaan sí to'oj yo' a.

13 Gaa ne sí to'oj yo' cataj rihaan yo'q tuvi' nij mozó: "Ne ta'yunj mán so', man tinuj. Maan se aj ca'mii ní' che'é se vaa qui'yaj suun so' che'é 'o sa'anj denario che'é 'o güii a.

14 Nacaj so' sa'anj qui'yaj canaán so', ca'anj so' á. Maan se inanj me raj cyaan naru'vej rihaan soj nanj adonj.

15 Ne nó xcúnj qui'yaj se vaa rii nimanj, rá so' na'. Xcoj ruvaa rá so', che'é se qui'yaj se luj rihaan tuvi' so' na'", taj sí to'oj yo' rihaan sí qui'yaj suun rihaan to'óo so' a.

16 "Dan me se ase vaa qui'yaj sí to'oj yo' ro', danj qui'yaj uún Diose che'é nij sí 'yaj suun che'é Diose nanj adonj. Che'é dan nij sí ne guun chij rihaan chumi' nihánj me se xta' ro', guun chij nij so' a. Ne nij sí guun chij ndo'o rihaan chumi' nihánj me se xta' ro', guun nij so' sí nocoqo, qui'yaj Diose nanj adonj —taj Jesucristó a.

*Nana nihánj taj xna'anj se vaa stj va'nuj cataj xna'anj Jesucristó se vaa cavi' so' ne cunuu i'na' uún so' a*

17 Gaa ne cavi' Jesucristó ca'anj so' chuman' Jerusalén, ne ca'anj chuvij nij sí tucuyón se-nana so' ga so', qui'yaj so' a. Veé asij vaj orún' cha'nuj nij so' ga Jesucristó chrej, ne ca'mii Jesucristó rihaan nij so', cataj so'.

18 —Nihánj me ca'anj ní' chuman' Jerusalén, ne quita'aa nii manj sij ca'neé Diose nicaj yu'unj man yuvij, ne nago' nii manj rihaan nij xrej ata suun nocoqo doj do', rihaan nij sí naqui'yaj cuu se-tucuanj Moisés rihaan yuvij do' a. Ne cuta' nij so' cacun' xráj, ne cataj nij so' se vaa cavi' 'unj a.

19 Gaa ne nago' nij so' manj rihaan nij sí yanij, ne ca'nga' nacqoqo nij sí yanij quene'en nij so' manj, ne go' nij so' cuartá xráj, ne cachron nij so' manj rihaan rcutze a. Gaa ne cachén va'nuj güii, gaa ne cunuu i'na' uún 'unj, qui'yaj Diose ei —taj Jesucristó a.

*Nana nihánj taj xna'anj se vaa cachún ni'yaj nii sí cu'naj Jacobo do', sí cu'naj Juan do', se vaa cataj roj so' suun sa' doj qui'yaj Jesucristó a*

20 Gaa ne cuchi' nii sí cu'naj Jacobo do', sí cu'naj Juan do', rihaan Jesucristó, ne ta'núí sí cu'naj Zebedeo me uún roj so' a. Dan me se cuchi' nij ta'nij no' rihaan Jesucristó, gaa ne canicun' ruj no' rihaan Jesucristó, ne cataj no' se vaa vaa se cachinj ni'yaj no' rihaan so', rá no' a.

21 —Me se achiin mán so' ga —taj Jesucristó, xná'anj so' man no' a.

Ne cataj no':

—Cataj xna'anj so' se vaa asa' guun chij so' rihaan chumiñ nihánj, ne quitaj roj ta'níj x'núu so', ne cata roj so' suun sa' doj qui'yáa so' á. Dan me se yo'ó so' cayaán rej nuva' so', ne yo'ó so' cayaán rej nichruún so', ne quirii ta'nga' roj so' ga so', cataj so', raj a —taj chana yo' a.

22 Gaa ne cataj Jesucristó rihaan roj tinuj roj so' a:

—Ne ne'en roj soj me rasuun cachíin ni'yaj roj soj rihanj nihánj a ma'. 'O se guun nucuaj roj soj quirán' roj soj sayuun ndaa vaa quirán' 'unj na' —taj Jesucristó, xná'anj so' a.

—Guun nucuaj rój nanj adonj —taj roj so' a.

23 Gaa ne cataj Jesucristó:

—Ya ya quirán' soj sayuun gaj nanj á. Tzaj ne ne nó xcúnj cataj xna'anj 'unj me sí cayaán x'núu 'unj rej nuva' 'unj do', rej nichrunj do', ma'. Qrún' Réj sí nicun' xta' cataj xna'anj me sí quirii ta'nga' gaj nanj adonj —taj Jesucristó a.

24 Gaa ne cuno yo'ó ch'i' nij sí tucu'yón se-nana Jesucristó se vaa ca'mii roj tinuj roj so' rihaan Jesucristó, ne ca'maan rá nij so' ni'yaj nij so' man roj so' a.

25 Gaa ne canacúun Jesucristó man cunudanj nij so' se vaa ca'na' nij so' rihaan so', ne cataj so':

—Ne'en soj se vaa nij sí ata suun man rihaan chumiñ nihánj me se rii ta'nga' uxrá nij so' rihaan tuvi' nij so' nanj adonj.

26 Tzaj ne se gaa danj sca'núj nij soj a ma'. 'O se sese me rá nij soj guun chij nij soj rihaan tuvi' nij soj, ne guun nij soj sí qui'yaj suun rihaan taran' tuvi' nij soj,

27 ne ase vaa mozó ro', danj gaa xa' nij soj rihaan taran' tuvi' nij soj nanj adonj.

28 Dan me se ca'née Diose manj nicaj yu'unj 'unj man yuviñ, tzaj ne ne ca'na' 'unj ne guun nij yuviñ mozó rihanj ma'. 'O se ca'ná' 'unj qui'yaj suun ma'anj rihaan nij yuviñ nanj adonj. Ne ca'ná' 'unj nayon ma'anj rihaan yuviñ ne cavi' 'unj che'é cacun' ata nij so', gaa ne caviñ sa' uxrá nij so', qui'yaj nanj adonj —taj Jesucristó a.

*Nana nihánj taj xna'anj se vaa naxra' rihaan vij sí tuchrii, qui'yaj Jesucristó a*

29 Gaa ne cavii nij so' chuman' Jericó, ne cachée ndo'o yuviñ xcó Jesucristó a.

30 Ne vaa vij sí tuchrii ne tu'va chrej, ne cuno roj so' cuentó se vaa cachén Jesucristó rej ne roj so' a. Che'é dan caguáj roj so', cataj roj so':

—Ya ya ta'níi ta'nij si'no' sí cu'naj David sí cane gaa naá mé so', Señor. Cunuu 'ee rá so' man rój ei —taj roj so' a.

31 Tzaj ne:

—Dínj tu'va roj soj á —taj nij yuviñ rihaan roj so' a.

Tzaj ne doj a nucuaj caguáj roj so', cataj roj so':

—Ta'níi ta'nij si'no' sí cu'naj David sí cane gaa naá mé so', Señor. Cunuu 'ee rá so' man rój ei —taj uún roj so' a.

32 Gaa ne canicun' Jesucristó, ne canacúun Jesucristó man roj so' se vaa ca'na' roj so' rihaan so', ne cataj so':

—Daj qui'yaj man roj soj, rá roj soj ga —taj Jesucristó, xná'anj so' man roj so' a.

33 —Cunuu sa' rihaan rój, rá rój, Señor —cataj roj so' a.

<sup>34</sup> Gaa ne cunuu 'ee rá Jesucristó man roj so', ne cuta' Jesucristó ra'a Jesucristó rihaan roj so', gaa ne veé maan orá dan cunuu sa' rihaan roj so' nanj adonj. Gaa ne ca'anj roj so' ga Jesucristó a.

## 21

*Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a*

<sup>1</sup> Gaa ne cuchi' Jesucristó cuchi' nij sí tucu'yón se-nana so' cuchi' tu'va chuman' cu'naj Betfagé a. Naj chuman' yo' tacóo quij cu'naj Quij man Chruun Olivó, ne nichrun' naj chuman' Jerusalén ga chuman' cu'naj Betfagé yo' a. Gaa ne ca'née Jesucristó man vij tuvi' nij sí tucu'yón se-nana so' ca'anj roj so' rque chuman' yo',

<sup>2</sup> ne cataj so' rihaan roj so' a:

—Catuu roj soj chuman' nihánj, chuman' naj rihaan ní', ne nari' nu' roj soj yo'o burró chana numii, ne vaa ta'núí xo' burró le'ej ya'anj nicun' ga xo' adonj. Nache roj soj man burró chana yo', ne nicaj roj soj man roj xo' ca'na' roj soj rihaan 'unj á.

<sup>3</sup> Ne sese xna'anj nii man roj soj me che'é nache roj soj burró, ne cataj roj soj: “Sí 'nij ra'a man ní' achiin xcuu nihánj rihaan chuguanj”, cataj roj soj, gaa ne nu' ca'nej nij so' man roj xcuu ca'na' roj xcuu ga roj soj ei —taj Jesucristó rihaan roj so' a.

<sup>4</sup> Dan me se nu' yo' qui'yaj Jesucristó, qui'yaj guee so' ndaa vaa taj sí nata' se-nana Diose gaa naá a. Ne sí nata' yo' ro', cataj so':

<sup>5</sup> “Dan me se cataj xna'anj soj rihaan nij sí man chuman' Jerusalén se vaa xcax nij so' cuentá se vaa ca'na' sí guun chij rihaan nij so' adonj. Dan me se sí nica' nimán me so', quitaj so' xráá burró a. Dan me se quitaj so' xráá ta'núí xcuu 'yaj suun nanj adonj”, taj sí nata' yo' a.

<sup>6</sup> Dan me se ca'anj roj sí tucu'yón se-nana Jesucristó, ne qui'yaj roj so' nu' ndaa vaa cataj xna'anj Jesucristó rihaan roj so' a.

<sup>7</sup> Dan me se nicaj roj so' man roj ta'nij roj burró chana yo' ca'anj roj so' rihaan Jesucristó, ne cuta' roj so' yatzíj xráá roj xcuu, ne cavii Jesucristó a.

<sup>8</sup> Ne que'ee nij yuvii cuchruy yatzíj sagan' nij yuvii rá chrej, ne ta'aj nij tuvi' nij so' ro', ca'ne' ra'a chruun, ne caraa nij so' rá chrej, cachee roj burró yo' rihaan yatzíj do', rihaan ra'a chruun do' a.

<sup>9</sup> Ne man uxrá yuvii quitáá yaan rihaan Jesucristó, ne man uxrá yuvii noco' rej xco Jesucristó a. Ne caguáj nij yuvii, cataj nij yuvii:

—Caraa guee ní' rihaan ta'núí ta'nij si'no sí cu'naj David sí cane gaa naá nanj á. Cunaj ndo'o vaa ca'na' sí ca'née sí 'nij ra'a man ní' adonj. Se luj ndo'o me 'yaj Diose che'é ní' á. Caraa guee ní' rihaan Diose sí nicun' xta' ei —taj nij yuvii, caguáj nij yuvii a.

<sup>10</sup> Dan me se catúj Jesucristó chuman' Jerusalén, ne caráya'anj taran' nij yuvii man chuman' yo', ne cataj nij so':

—Me sí atúj chuman' ga —cataj nij sí man chuman' Jerusalén, xna'anj nij so' man nij yuvii atúj chuman' Jerusalén a.

<sup>11</sup> —Sí nihánj me Jesucristó sí cavii chuman' Nazaret chuman' naj estadó Galilea, ne sí nata' se-nana Diose me so' adonj —taj nij yuvii catúj chuman' Jerusalén, ni'yaj nij so' man Jesucristó a.

*Nana nihánj taj xna'anj se vaa quirii Jesucristó man nij yuvií tu'vej rasuun man rá nuvíi nocoo a*

<sup>12</sup> Gaa ne catúj Jesucristó rá nuvíi nocoo, gaa ne quirii so' man taran' nij síi tu'vej rasuun do', man taran' nij síi quiránj rasuun man rá nuvíi do' a. Ne tiguíj ra'a so' nij chruun mesá natuná nii sa'anj rihaan, ne tiguíj ra'a so' chruun xlá taj nij síi tu'vej cha'aan a.

<sup>13</sup> Gaa ne ca'mii so' rihaan nij so', cataj so':

—Danj Diose taj se vaa tucua Diose rej na'vúj yuvií rihaan Diose me nihánj á. Tzaj ne guun tucua síi ituu man tucua Diose nihánj, qui'yaj soj nanj á —taj Jesucristó a.

<sup>14</sup> Gaa ne catúj síi tuchrii catúj síi rengó catúj rá nuvíi, ne nahuun sa' nij so', qui'yaj Jesucristó a.

<sup>15</sup> Ne man xnii catúj rá nuvíi, ne caguáj nij xnii cataj nij xnii:

—Caraa guce ní' rihaan síi nihánj ta'núí ta'nij si'nó síi cu'naj David síi cane gaa naá ei —taj nij xnii a.

Ne vaa xrej atá suun nocoo doj vaa síi naqui'yaj cçu se-tucuanj Moisés vaa, ne quene'en nij so' nu' suun sa' qui'yaj Jesucristó rá nuvíi, ne cuno nij so' nana caguáj nij xnii a. Gaa ne ca'maan rá nij so',

<sup>16</sup> ne cataj nij so':

—Unó so' nana aguáj xnii nihánj na'. Me che'é a'vej so' caguaj xnii danj ga —taj nij so', xna'anj nij so' man Jesucristó a.

Ne cataj Jesucristó:

—Unó 'unj ei. Me che'é na'vej rá nij soj ca'mii xnii danj ga. Ne ni'yaj soj, ne Diose ca'née nana vaa danj nimán xnii ca'mii xnii danj a. Me che'é ne nayaá nij soj nana no rihaan danj Diose ga. Ése gaa naá, ne ca'mii yo'o so' rihaan Diose, cataj so' se vaa ve'é ca'mii xnii do', ve'é ca'mii ne'ej utzii too do', rihaan Diose, qui'yaj ma'an Diose, taj nana no rihaan danj Diose a —taj Jesucristó rihaan nij so' a.

<sup>17</sup> Gaa ne tanáj Jesucristó man nij so', ne curihanj so' chuman' Jerusalén, ne ca'anj so' chuman' Betania, ne caran' so' 'o yan' a.

*Nana nihánj taj xna'anj se vaa canacoo 'o chruun man chruj higó, qui'yaj Jesucristó a*

<sup>18</sup> Rej ranga' cavii uún Jesucristó ca'anj so' chuman' Jerusalén, ne na'aan rque so' a.

<sup>19</sup> Gaa ne quene'en so' 'o chruun man chruj higó nicun' tu'va chrej, ne ca'anj so' tacóo chruun yo', tzaj ne taj vaj á 'ó chruj higó ne quirí' so' á ma'. Maan nanj coj uun táa raá chruun yo' a. Gaa ne ca'mii so' rihaan chruun yo', cataj so':

—Daj chihaa mój se cumán chruj raá so' ma' —taj Jesucristó a.

Ne nu' ca'mii so' ga chruun, ne maan orá dan canacoo chruun man chruj higó yo' a.

<sup>20</sup> Gaa ne caráya'anj nij síi tucu'yón se-nana Jesucristó, quene'en nij so' se vaa quiran' chruun yo' a. Ne cataj nij so':

—Asa' ca'vee nu' nacoo chruun nihánj cuano ga —taj nij so', caráya'anj nij so' a.

<sup>21</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa sese se guun vij rá soj ne yo'o cuchuman rá soj, ne doj á qui'yaj soj vaa güii, se vaa qui'yáá 'unj man chruun nihánj á adonj. Dan me se catáj xna'anj nij soj rihaan qui' xcaan yo'

se vaa cūrihanj quij rej nicun' quij ne ca'anj nij quij rque na ya'anj, ne ya ca'anj nij yo' rque na ya'anj, qui'yaj soj adonj.

<sup>22</sup> Ne nu' se vaa cachinj ni'yaj soj rihaan Diose ro', rque Diose rihaan soj, sese ya ya cuchuman rá soj nanj adonj —taj Jesucristó a.

*Nana nihánj taj xna'anj se vaa xná'anj nii man Jesucristó me sí ca'ne' suun rihaan so' qui'yaj so' ndaa vaa 'yaj so' a*

<sup>23</sup> Gaa ne catuj Jesucristó rá nuvií, ne tucul'yón so' nana man nij sí man rá nuvií yo' a. Gaa ne cuchi' nij xrej ata suun nocoo doj do', nij sí uun chij rihaan nij yuvií do', rihaan so', ne xná'anj nij so' man so', cataj nij so':

—Me sí ca'ne' suun rihaan so' qui'yáá so' ndaa vaa 'yáá so' ga —taj nij so' a.

<sup>24</sup> Gaa ne cataj Jesucristó rihaan nij so' a:

—Ne vaa yo'o nana xná'anj 'unj man nij soj, ne sese ya cataj xna'anj nij soj nana yo' rihanj, ne cataj xna'anj 'unj rihaan soj me sí ca'ne' suun rihanj a.

<sup>25</sup> Dan me se me sí ca'ne' suun rihaan sí cu'naj Juan cuta' ne so' man yuvií, rá soj ga. Ma'an Juan cavii raá na'. Ase Diose cataj xna'anj rihaan so' xa'. Cataj xna'anj nij soj rihanj á —taj Jesucristó a.

Gaa ne nuchruij raá ndo'o nij so' ga tuvi' nij so', cataj nij so':

—Sese cataj ní' se vaa Diose ca'ne' suun rihaan sí cu'naj Juan cuta' ne so' man yuvií, ne cataj Jesucristó rihaan ní' me che'é ne cuchuman rá ní' nana ca'mii Juan, cataj so' a.

<sup>26</sup> Tzaj ne sese cataj ní' se vaa nuveé sij ca'ne' Diose suun rihaan me sí cu'naj Juan, ne ca'maan rá nij yuvií, ne quiran' ní' sayuun, qui'yaj nij yuvií nanj á. 'O se nij yuvií me se sí ca'née Diose nata' se-nana Diose me sí cu'naj Juan, rá cunudanj nij yuvií nanj á —taj nij so' rihaan tuvi' nij so' a.

<sup>27</sup> Gaa ne cataj nij so' rihaan Jesucristó:

—Ne ne'en núj me sí ca'ne' suun rihaan sí cu'naj Juan cuta' ne so' man yuvií ma' —taj nij so' a.

—Che'é dan se cataj xna'anj 'unj rihaan nij soj me sí ca'ne' suun rihanj qui'yaj ndaa vaa 'yaj ma' —taj Jesucristó rihaan nij so' a.

*Nana nihánj me cuentó nanó Jesucristó che'é roj ta'nii 'o so' a*

<sup>28</sup> Gaa ne nanó Jesucristó cuentó nihánj cuno nij so' a:

—Ne daj vaa nana nihánj nana cataj xna'anj 'unj rihaan soj, rá soj ga. Vaa vij ta'nii 'o so' a. Ne cuchi' so' rihaan yo'o ta'nii so', cataj so': “Cuan' cavii so' qui'yaj suun so' rque naa chruij uvá, rej”, taj so' rihaan ta'nii so' a.

<sup>29</sup> “Se ca'anj 'unj ma'”, taj xnii yo' rihaan rej so' a. Tzaj ne orá nii doj naqui'yaj nica' so' nimán so', ne ca'anj qui'yaj suun so' a.

<sup>30</sup> Gaa ne cuchi' rej xnii rihaan yo'ó ta'nii so', ne cataj xna'anj so' se vaa ca'anj xnii yo', qui'yaj suun yo' a. “Ca'anj 'unj, ataj”, taj so' rihaan rej so' a. Tzaj ne ne ca'anj so' qui'yaj suun so', ne tiha' so' man rej so' a.

<sup>31</sup> Ne me ta'nii snó'o yo' cuno sa' rihaan so', rá soj ga —taj Jesucristó, xná'anj Jesucristó man nij so' a.

—Xnii ca'anj qui'yaj suun ro', cuno ya so' rihaan rej so' ei —taj nij so' rihaan Jesucristó a.

Gaa ne cataj Jesucristó rihaan nij so' a:

—Ya ya cataj xna'anj 'unj rihaan nij soj cuano se vaa nij sí tiha' yu'unj man yuvií che'é puextó do', nij chana niha' rá ga chii do', quitaj yaan rihaan soj catuu nij so' rihaan Diose asa' guun chij Diose rihaan chumii nihánj, ne quinaj xco nij soj adonj.



<sup>32</sup> 'O se cuchi' sí cu'naj Juan rihaan nij soj, ne tucu'yón so' rihaan nij soj daj qui'yaj soj cunō sa' soj rihaan Diose, tzaj ne ne cuchuman rá nij soj nana ca'mii so' ma'. Tzaj ne nij sí tiha' yu'unj man yuvi che'é puextō do', nij chana niha' rá ga chii do', cuchumán rá nana ca'mii Juan nanj adonj. Ne quene'en soj se vaa cuchumán rá nij so', tzaj ne ne nuchran' nimán soj, ne ne cuchuman rá ma'an soj ma'.

*Nana nihánj me cuentó nanó Jesucristó che'é yuvi chi'ij yaj suun rihaan yo'ó a*

<sup>33</sup> "Ne cunō uún nij soj yo'ó cuentó nihánj á. Dan me se vaa yo'ó sí to'oj, ne cuchruj so' yo'ó naa chruj uvá, ne qui'yaj so' chingá nu' anicaj tu'va naa yo', gaa ne gáan so' yu'uj rej xtun' chruj uvá ne cavi na, ne cune' so' 'o ve' nata' cayáan nij sí cutumē naa yo' a. Gaa ne tanáj so' man naa yo' rihaan sí qui'yaj suun naa yo', ne curiñanj so' ca'anj so' gan' a.

<sup>34</sup> Cachén doj yavii, ne quisij yavii cutá nii chruj uvá, ne ca'néé sí xnaa yo' man yo'ó ta'aj nij se-mozó so' rihaan nij sí nuu tumé xnaa so' a. Me rá so' ca'na' nīcay yo'ó nij se-mozó so' doj chruj uvá rihaan ma'an so' a.

<sup>35</sup> Gaa ne quita'aa nij sí nuu tumé naa man yo'ó nij mozó cuchi' uún a. Dan me se go' uxrá nij so' chruun xráa yo'ó mozó yo', ne ticavi' nij so' man yo'ó mozó yo', ne go' uxrá nij so' yahij man yo'ó mozó yo' ne yuun che'e cavi' so' nanj adonj.

<sup>36</sup> Gaa ne ca'néé uún sí xnaa yo' man yo'ó danj mozó ca'anj uún rej naj xnaa so' a. Tzaj ne nij sí nuu tumé naa ro', yo'ó danj qui'yaj uún nij so' man uún nij sí cuchi' uún a.

<sup>37</sup> Veé dan, gaa ne ca'néé sí xnaa yo' ta'níi so' rej man nij sí nuu tumé xnaa so' a. "Caraa cochroj nij sí tumé naa rihaan ta'nij sese ca'anj ta'nij saj xee", taj sí xnaa yo' a.

<sup>38</sup> Tzaj ne quene'en nij sí tumé naa man ta'níi sí xnaa, ne cataj nij so': "Síi nihánj me síi guun sí xnaa naa nihánj vaa güii ei. Che'é dan ticavi' ní' man so', ne vaa güii, ne guun xnaa ma'an ní' man naa nihánj chuguñj", taj nij so' rihaan tuvi' nij so' a.

<sup>39</sup> Gaa ne quita'aa nij so' man ta'níi sí xnaa yo', ne quirrii nij so' xe', ne ticavi' nij so' man ta'níi sí xnaa adonj.

<sup>40</sup> Ne vaa güii, ne ca'na' uún sí xnaa yo', ne daj qui'yaj so' man nij sí nuu tumé xnaa so', rá nij soj ga —taj Jesucristó, xná'anj so' man nij xrej do', man nij sí uun chij do' a.

<sup>41</sup> —Qui'yaj ndo'o sí xnaa yo' sayuun man nij sí chi'ij yaj suun xnaa so', ticavi' so' man nij so' nanj á. Ne taquachén so' xnaa so' rihaan yo'ó sí tumé xnaa so', ne yavii cutá nii chruj uvá ro', ve'é rque nij so' chruj yo' rihaan sí xnaa yo' nanj adonj —taj nij so' rihaan Jesucristó a.

<sup>42</sup> Gaa ne cataj Jesucristó:

—Me che'é ne nayaaj nij soj nana nihánj nana nō rihaan danj Diose ga: "Yuvej quiri'ij nij sí cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj. Ma'an sí' nīj ra'a man ní' qui'yaj yo', ne cunaj uxrá vaa yo', rá ní' á", taj danj Diose a.

<sup>43</sup> Che'é dan cuano nihánj me se cataj xna'anj 'unj rihaan nij soj se vaa ca'neé Diose se-suun soj suun guun chij ga Diose rihaan chumij nihánj, gaa ne cune' Diose man yo'ó yuvi se vaa guun chij yo'ó nij yuvi rihaan chumij

nihánj gá so', ne ve'é qui'yaj yo'ó nij yuvií yo' nu' se vaa me rá Diose qui'yaj nij so' nanj á.

<sup>44</sup> Ne yuvej yo' me se ase vaa yuvej yo' vaa 'unj, ne ase vaa yuvií tíxé yuvej yo' vaa yuvií na'vej rá cunō rihaan 'unj, ne uxrá quirán' nij so' sayuun nanj adonj. Ne ase vaa yuvií quiniñ yuvej yo' xráá vaa nij yuvií qui'yáá 'unj sayuun man, ne yuun che'e quinañij nij so' nu' cavií nu' ca'anj nanj adonj —taj Jesucristó a.

<sup>45</sup> Dan me se cuno nij xrej atā suun nocoō doj cuno nij síí fariseo cuno cuentó nanó Jesucristó, ne quene'en nij so' se vaa che'e ma'an nij so' me cuentó nanó Jesucristó a. Ase vaa nij síí nuu tumé naā vaa ma'an nij so' ni'yaj Jesucristó, ne quene'en nij so' se vaa che'é dan nanó Jesucristó cuentó yo' a.

<sup>46</sup> Gaa ne nanó rá nij so' daj gaa quita'aa nij so' man Jesucristó, tzaj ne cucu'vi' nij so' ni'yaj nij so' man nij yuvií a. 'O se síí nata' se-nanā Diose me Jesucristó, rá nij yuvií a.

## 22

*Nanā nihánj me cuentó nanó Jesucristó che'é nij síí catuu rihaan Diose asa' guun chij Diose rihaan chumií nihánj a*

<sup>1</sup> Gaa ne ca'mii uún Jesucristó, nanó so' doj cuentó rihaan nij so', cataj so':

<sup>2</sup> —Ase vaa qui'yaj yo'ó síí nicaj suun rey ro', danj qui'yaj uún Diose asa' guun chij Diose rihaan chumií nihánj ei. Dan me se síí nicaj suun rey yo' me se qui'yaj so' cha'anj che'é ta'níí so' síí nara'aa,

<sup>3</sup> ne vaa yuvií navij rá cha'anj gā so', ne ca'née so' se-mozó so' ca'anj nij so' rihaan nij yuvií, cataj xna'anj se-mozó so' rihaan nij yuvií se vaa ca'na' nij so' tucua' so' navij rá nij so' cha'anj nara'aa yo', tzaj ne ne ca'vej nij yuvií yo' ca'na' nij so' tucua' síí nicaj suun rey a.

<sup>4</sup> Gaa ne ca'née uún so' man doj se-mozó so' rihaan nij síí navij rá cha'anj gā so', ne ca'née so' nana rihaan nij yuvií yo' se vaa aj qui'yaj chuvii so' cha ni'yánj nij so' do', se vaa aj ticavi' so' scúj aj ticavi' so' scúj le'ej ramii ndo'o aj ticavi' so' do', se vaa aj vaa chuvii nu' rasuun qui'yaj so' a. Che'é dan ca'na' nij so', ne navij rá nij so' cha'anj gā so', ne che'é dan ca'née so' nana rihaan nij síí navij rá cha'anj gā so' a.

<sup>5</sup> "Tzaj ne ne ca'na' a' ó nij so' a ma'. Maan se ta'aj nij so' ca'anj qui'yaj suun xnaa nij so', ne yo'ó ta'aj nij so' ca'anj cutu'vee rasuun rihaan yuvií uún a.

<sup>6</sup> Ne yo'ó nij so' quita'aa man nij se-mozó síí nicaj suun rey, ne qui'yaj chi'ii nij so' man mozó yo', ne ticavi' nij so' man mozó nacúun man nij so' a.

<sup>7</sup> Gaa ne ca'maan ndo'o rá síí nicaj suun rey yo', ne ca'née so' man nij se-tanuú so' ca'anj ticavi' nij so' man síí ticavi' man se-mozó so' a. Cuchi' nij tanuu rihaan nij síí ticavi' man mozó yo', ne ticavi' nij tanuu man nij so', ne caxrj ya'an nij tanuu man se-chuman' nij so', ne cacaa nu' chuman' yo' a.

<sup>8</sup> "Gaa ne ca'mii síí nicaj suun rey rihaan nij se-mozó so', cataj so': "Sij qui'yaj chuvii ni' navij rá ni' cha'anj, tzaj ne nij síí me rá 'unj navij rá cha'anj gaj me se nuveé sjj sa' me nij so' a ma'. Ne nó xcúun nij so' ca'na' nij so' ma'.

<sup>9</sup> Che'é dan ca'anj soj rej nuná tuvi' chrej, ne naj guun yuvií nari' soj ro', cataj xna'anj soj rihaan yuvií yo' se vaa ca'na' nij so' navij rá nij so' cha'anj gā ni' á". Danj ca'mii so' rihaan se-mozó so',

<sup>10</sup> gaa ne curihanj nij mozó, ne naqui'yaj chre' nij so' man cunudanj nij yuvií nari' nij so' rá chrej, ne dan me se ta'aj nij yuvií yo' me síí chi'ii, ne ta'aj

nij yuvij yo' me sí sa' a. Dan me se quisij caraa nu' ve' canuú cha'anj, gaa ne ca'anj cayáan taran' nij yuvij rihaan mesá cha ni'yánj nij so' a.

<sup>11</sup> "Gaa ne catúj sí nicaj suun rey yo' rá ve' chá ni'yánj nij so', ne quene'en so' man yo' o' so', se vaa nuvi' yatzij nuu nij sí navij rá cha'anj nara'aa nuú so' a.

<sup>12</sup> Gaa ne ca'mii sí nicaj suun rey rihaan so', cataj so': "Me che'é catúj so' rá ve' nihánj ve' anuú cha'anj, ne nuvi' yatzij nara'aa nuú so', ga tinu'", taj so' a. Ne guun na'aj so', ne ne ca'mii so' a.

<sup>13</sup> Gaa ne ca'ne' sí nicaj suun rey yo' suun rihaan nij se-mozó so', cataj so': "Numij soj tacóo sí nihánj numij soj ra'a sí nihánj numij soj, ne quiri'ij soj man so' xe' ca'anj so' rej rmi' á", taj sí nicaj suun rey yo' a. Rej rmi' yo' me se yo' me rej ta'vee ndo'o yuvij ne ndaa cha ruj yuvij cuú yan' yuvij adonj.

<sup>14</sup> 'Q se nacúun Diose man uxrá yuvij ca'na' nij yuvij cayáan nij yuvij ga so', tzaj ne doj vaa nij yuvij narii Diose cane ga so' nanj adonj —taj Jesucristó a.

*Nana nihánj taj xna'anj che'é puextó go' ní rihaan gobiernó ne che'é se rque ní rihaan Diose do' a*

<sup>15</sup> Gaa ne curihanj nij sí fariseo, ne nuchruij raa nij so' ga tuvi' nij so' daj qui'yaj nij so' cuta' nij so' cacun' xráa Jesucristó che'é nana ca'mii Jesucristó a.

<sup>16</sup> Gaa ne ca'neé nij so' man nij sí tucu'yón se-nana ma'an nij so' do', man nij sí noco' man sí cu'naj Herodes do', cuchí' nij so' rihaan Jesucristó a. Ne cataj nij so' rihaan Jesucristó a:

—Ne'en núj se vaa nana ya inanj a'mii so', ne ya tucu'yón so' rihaan yuvij daj qui'yaj yuvij canoco' yuvij man Diose, maestro. Ne ne chu'ví' so' ni'yaj so' man nij yuvij daj cataj yuvij ma'. Ne 'o cuyaan vaa nu' yuvij rihaan so' chuguanj.

<sup>17</sup> Che'é dan cataj xna'anj so' rihaan núj daj qui'yaj yuvij, rá so' á. No xcúun yuvij go' yuvij puextó rihaan sí nicaj suun cu'naj César na'. Ase se go' yuvij xa' —taj nij so', xna'anj nij so' nana tiha' yu'unj man Jesucristó a.

<sup>18</sup> Tzaj ne quene'en Jesucristó se vaa me rá nij so' qui'yaj chí'ij nij so' man so' a. Che'é dan cataj so':

—Me che'é me rá soj tiha' yu'unj soj manj ne cuta' soj cacun' xráa ga. 'Q se sí tiha' yu'unj man yuvij me soj, ne quij vaa nimán soj adonj.

<sup>19</sup> Tihaan soj rihanj daj vaa sa'anj o' nii che'é puextó á —taj Jesucristó rihaan nij sí me rá tiha' yu'unj yo' a.

Gaa ne nano' nij so' sa'anj aga' o' yuvij che'é puextó, ne tihaan nij so' sa'anj aga' yo' rihaan Jesucristó a.

<sup>20</sup> —Me sí nó rihaan sa'anj aga' nihánj ga. Ne me sí se-chuvij nó rihaan sa'anj aga' nihánj ga —taj Jesucristó, xna'anj so' man nij sí me rá tiha' yu'unj yo' a.

<sup>21</sup> —Sí nicaj suun cu'naj César me nó rihaan sa'anj aga' yo', ne nó se-chuvij so' rihaan sa'anj ei —taj nij so' a.

Gaa ne cataj Jesucristó:

—Che'é dan go' soj si'yaj sí nicaj suun cu'naj César rihaan ma'an so', ne rque soj si'yaj Diose rihaan Diose á —taj Jesucristó a.

<sup>22</sup> Dan me se cuno nij so' nana ca'mii Jesucristó, ne ca'anj rá nij so', ne tanáj nij so' man Jesucristó, ca'anj nij so' a.

*Nana nihánj taj xna'anj se vaa ya cunu i'nq' uún nij sí cavi' a*

<sup>23</sup> Ne corá cuchi' doj nij síi saduceo rihaan Jesucristó a. Nij síi saduceo ro', a'mii naná nihánj se vaa daj chihaa mǎj se cunuu i'na' uún yuvií asa' cavi' yuvií, taj nij so' a. Dan me se xná'anj nij so' man Jesucristó,

<sup>24</sup> ne cataj nij so' naná nihánj a:

—Cataj xna'anj síi cu'naj Moisés naná nihánj cunó ní' a: “Sese cavi' yo'ó so', ne sese taj vaj ta'níi so', ne no xcúun tinúu so' xcaj tinúu so' man choco' so' chana quináj, ne cotoj tinúu síi cavi' ga choco' so', ne cuchruj no' ne'ej, ne guun ta'nij síi cavi' man ne'ej yo', ne cunuú ne'ej yo' rihaan to'óó síi cavi' yo' a”, taj síi cu'naj Moisés gaa naá, maestro.

<sup>25</sup> Dan me se vaa chij nij tinuj 'o nij so' ne ga núj a. Síi chava' ro', xcaj man chana, tzaj ne cavi' so', ne taj vaj ne'ej cuchruj chana nica' so', qui'yaj so', ne che'é dan quináj uun chana yo', ne che'é dan xcaj scue'ee síi cavi' yo' man choco' so' a.

<sup>26</sup> Tzaj ne cavi' so' uún, ne quináj uun chana xcaj scue'ee so' uún, ne veé dan me se xcaj chij nij tinuj nij so' man chana yo', tzaj ne cavi' taran' nij so' nanj á.

<sup>27</sup> Sij, gaa ne cavi' ma'an chana yo' uún,

<sup>28</sup> ne dan me se asa' cunuu i'na' uún nij síi cavi', gaa ne me nij tinuj nij so' nijaj man chana yo', rá so' ga. 'O se gaa vaa i'na' nij so', ne nica' taran' nij tinuj nij so' guun orún' no' a —taj nij síi saduceo, xná'anj nij so' man Jesucristó a.

<sup>29</sup> Gaa ne cataj Jesucristó rihaan nij so' a:

—Ne ne'en uxrá soj ma'. 'O se ne ne'en soj me taj danj Diose, ne ne ne'en soj sese nucuaj ndo'o Diose a.

<sup>30</sup> 'O se asa' cunuu i'na' uún nij síi cavi', ne se xcaj tuvi' nij so' a ma'. 'O se ase vaa yaán nij se-mozó Diose rej xta' ro', danj gaa cayáán nij so' nanj adonj.

<sup>31</sup> Gaa ne cataj xna'anj 'unj rihaan soj daj gaa quene'en soj se vaa ya ya cunuu i'na' uún yuvií asa' cavi' yuvií ei. Ataa nayaá soj naná nihánj nana ca'mii ma'an Diose na'. Dan me se se-nana Diose taj:

<sup>32</sup> “Diose síi noco' nij síi man gaa naá síi cu'naj Abraham do', síi cu'naj Isaac do', síi cu'naj Jacob do', mej a.” Danj ca'mii Diose che'é nij síi man gaa naá yo' a. Dan me se nuveé se-Diose nij xngamá me Diose ma'. Inanj nij síi vaa i'na' a'vee noco' man Diose nanj adonj. Che'é dan, nda' se síi cane gaa naá me va'nuj nij so', tzaj ne vaa i'na' nij so' rihaan Diose nanj ei —taj Jesucristó a.

<sup>33</sup> Dan me se cuno nij yuvií naná ca'mii Jesucristó, gaa ne guun niha' uxrá rá nij so' se vaa ve'é uxrá tucu'yón so' a.

### *Naná nihánj taj xna'anj me naná me naná nocoo doj cunó ní' a*

<sup>34</sup> Dan me se cuchi' naná rihaan nij síi fariseo se vaa sa' uxrá ca'mii Jesucristó rihaan nij síi saduceo ne taj vaj naná nari' nij síi saduceo ca'mii uún nij so' rihaan Jesucristó ma'. Gaa ne cunuu chre' nij síi fariseo nuchruj raa' nij so' daj qui'yaj ma'an nij so' a.

<sup>35</sup> Gaa ne xná'anj yo'ó tuvi' nij so' yo'ó naná man Jesucristó, quene'en so' sese guun nucuaj Jesucristó cataj xna'anj Jesucristó naná yo' a. Dan me se cataj so':

<sup>36</sup> —Me naná cataj xna'anj Moisés me naná nocoo ndo'o naná cunó uxrá ní' ga —taj so', xná'anj so' a.

<sup>37</sup> Gaa ne cataj Jesucristó:

—“Ndaa nimán yá so' guun rá so' nǎ'yaj so' man Diose síi 'nij ra'a man ní', ne yo'ó ndaa cúu yave' mán so' cuchuman rá nǎ'yaj man Diose nanj adonj”.

<sup>38</sup> Ne nihánj me ya nana uun chij ya nanj ei.

<sup>39</sup> Ne ase vaa nana yo', danj vaa yo'ó nana nihánj nana me rá Diose cunō uún ní' a: "Adi' se 'ee rá so' man ma'an so' ro', danj gaa 'ee rá so' man tuví' so' á".

<sup>40</sup> 'O cuyaan a'mii roj nana nihánj ga nu' tucuáan cuchruj síi cu'naj Moisés gaa naá do', ga nu' nana nata' nij síi nata' se-nana Diose gaa naá do' nanj adonj —taj Jesucristó a.

*Nana nihánj taj xna'anj se vaa síi ca'nej Diose t̄inani man yuvii rihaan sayuun ro', nuveé nanj yuvii me so' ma'*

<sup>41</sup> Dan me se nuu chre' nij síi fariseo rihaan Jesucristó, gaa ne xna'anj Jesucristó man nij so', cataj so':

<sup>42</sup> —Daj sij me síi ca'nej Diose t̄inani man yuvii rihaan sayuun, rá nij soj ga. Me síi tuví' me so', rá soj ga —taj Jesucristó, xna'anj so' man nij síi fariseo a.

—Ta'núí ta'nij si'no' síi cu'naj David síi cane gaa naá me síi ca'na' t̄inani man yuvii rihaan sayuun nanj á —taj nij síi fariseo a.

<sup>43</sup> Gaa ne cataj Jesucristó:

—Tzaj ne gaa cunuú Nimán Diose nimán síi cu'naj David, ne cataj David se vaa síi 'nij ra'a man ma'an so' me síi ca'nej Diose t̄inani man yuvii rihaan sayuun nanj á. Dan me se cataj so':

<sup>44</sup> "Ca'mii Diose síi 'nij ra'a man ní' rihaan síi 'nij ra'a manj, cataj so' se vaa cayáán síi 'nij ra'a manj x'núú Diose rej nuva' Diose ndaa se quisij qui'yaj canaán Diose rihaan taran' nij síi taj ri'yunj man síi 'nij ra'a manj ne quirii ta'nga' síi 'nij ra'a manj rihaan nij so' nanj adonj", taj síi cu'naj David yo' a.

<sup>45</sup> Dan me se síi 'nij ra'a man síi cu'naj David me síi ca'nej Diose t̄inani man yuvii rihaan sayuun, taj síi cu'naj David yo' a. Sese 'nij ra'a so' man David, ne me che'é taj soj se vaa nanj ta'núí ta'nij si'no' David me so' ga. Taj che'é cataj soj se vaa nanj yuvii me so' ma' —taj Jesucristó rihaan nij síi fariseo yo' a.

<sup>46</sup> Ne a' lo' nij so' ne guun nucuaj cataj xna'anj 'o nana rihaan Jesucristó, ne a' lo' nij so' ne quisij rá xna'anj doj nana man Jesucristó a ma'.

## 23

*Nana nihánj taj xna'anj che'é cacun' tumé nij síi naquiyaj cuu se-tucuanj Moisés do', che'é cacun' tumé nij síi fariseo do' a*

<sup>1</sup> Gaa ne ca'mii Jesucristó rihaan nij yuvii do', rihaan nij síi tucu'yón se-nana so' do',

<sup>2</sup> cataj so':

—Nij síi naquiyaj cuu se-tucuanj Moisés do', nij síi fariseo do', ata' nij so' se-suun síi cu'naj Moisés síi cane gaa naá a.

<sup>3</sup> Che'é dan, naj guun nana cataj nij so' rihaan soj ro', cunō soj nu' nana yo', ne danj qui'yaj gué soj á. Tzaj ne se qui'yaj soj ndaa vaa 'yaj nij so' a ma'. 'O se taj xna'anj nij so' daj qui'yaj yuvii, tzaj ne ne 'yaj ma'an nij so' se vaa taj nij so' ma'.

<sup>4</sup> Ne a'ne' uxrá nij so' suun rihaan yuvii daj qui'yaj yuvii canoco' yuvii man Diose, ne dan me se ase vaa yuvii araa ndo'o rasuun 'ee xráa tuvi' vaa nij so', tzaj ne a doj ne racuíj nij so' man yuvii cata yuvii rasuun 'ee yo' a ma'. A' lo' raá ra'a nij so' ne racuíj nij so' man yuvii nanj man adonj.

<sup>5</sup> Naj guun suun sa' 'yaj nij so' ro', tzaj ne maan che'é rej me rá nij so' quene'en yuvii, ne che'é dan 'yaj nij so' danj nanj adonj. 'O se caxra' ndo'o

vaa nij caxran' nuu se-nana Diose noco' rihaan nij so', 'yaj nij so', ne xcaan ndo'o vaa yiquitzij noco' tu'va sagan' nij so', 'yaj uun nij so',

6 ne niha' ra nij so' nano' nij so' rej sa' doj quitaj nij so' gaa 'anj nij so' cha'anj, ne niha' ra nij so' nano' nij so' chruun xla sa' doj quitaj nij so' ra ve' tucu'yon yuvij se-tucuanj Moisés,

7 ne niha' ra nij so' gaa ve'é a'mii yuvij ga nij so' gaa chéé nij so' yu'vee, ne niha' ra nij so' cataj yuvij "Sí guun chij" rihaan nij so',

8 tzaj ne ma'an soj ro', se guun cataj yuvij "Sí guun chij" rihaan ma'an soj, qui'yaj soj a ma'. 'Q se vaa orún' sí uun chij rihaan soj, ne tinuj taran' soj nanj á.

9 Ne se guun cataj soj "Ataj chij" rihaan yuvij man rihaan chumij nihánj a ma'. 'Q se vaa orún' Rej soj sí nicun' xta' á.

10 Ne se guun cataj yuvij se vaa noco' nij yuvij man soj, qui'yaj soj a ma'. 'Q se orún' sí ca'néé Diose tinanii man yuvij rihaan sayuun me sí canoco' soj man nanj adonj.

11 Ne me ma'an tuvi' soj sí 'yaj suun che'é soj ro', yo' me sí sa' doj rihaan taran' soj,

12 ne xa' sí me rá tjavii sa' man ma'an, tzaj ne quirí' so', ne guun na'aj so', ne xa' sí 'yaj nica' nimán, tzaj ne cavii sa' so' adonj —taj Jesucristó rihaan nij yuvij a.

13 Gaa ne canicaj Jesucristó ca'mii Jesucristó rihaan nij sí fariseo do', rihaan nij sí naqui'yaj cuu se-tucuanj Moisés rihaan yuvij do', cataj so':

—Nique soj sij fariseo do', sij naqui'yaj cuu se-tucuanj Moisés rihaan yuvij do' a. Quiran' uxrá soj sayuun adonj. Dan me se a'néj nij soj ve' tucua' chana cavi' nica, ne yuun che'e guun tucua' nij soj man ve' yo', 'yaj ma'an nij soj, ne raan ndo'o achin' ni'yaj nij soj rihaan Diose, che'é rej sa' doj guun nucuaj nij soj tiha' yu'unj soj man yuvij a. Che'é dan doj a gaa sayuun quiran' soj qui'yaj Diose, asa' ca'ne' Diose cacun' che'é yuvij adonj.

14 "Nique soj sij fariseo do', sij naqui'yaj cuu se-tucuanj Moisés rihaan yuvij do' a. Quiran' uxrá nij soj sayuun nanj adonj. Sí nucui' rá me nij soj adonj. Dan me se aráan soj chrej catuu yuvij rihaan Diose asa' guun chij Diose rihaan chumij nihánj á. 'Q se ne uun chij Diose nimán soj, 'yaj soj ma'. Ne ndaa nij sí me rá guun chij Diose nimán ro', aráan soj chrej cunq nij so' rihaan Diose adonj.

15 "Nique soj sij naqui'yaj cuu se-tucuanj Moisés rihaan yuvij do', sij fariseo do' ei. Quiran' uxrá nij soj sayuun nanj adonj. Sí nucui' rá me nij soj á. Dan me se chéé soj ndaa rej xco tu'va na ya'anj do', ndaa rej xco quij do', nano' soj yo'q sí canoco' man soj, gaa ne quisij canoco' yo'q so' man soj 'yaj soj, gaa ne nuu chilij doj nimán so' rihaan nimán soj, 'yaj soj, ne quitaj yaan so' rihaan soj ca'anj taran' nij soj rihaan ya'an adonj.

16 "Nique soj che'é sayuun quiran' soj nanj á. Ase vaa sí tuchrij vaa soj, tzaj ne me rá soj tihaa soj rihaan yuvij daj gaa qui'yaj yuvij a. Ca'vee se cuta' yo'q so' raq nuvií noco se vaa ya vaa nana ca'mii so', tzaj ne taj se 'yaj sese ca'mii ne so' ma', taj soj a. Tzaj ne sese cuta' yo'q so' raq aga' oró mii nuu rá nuvií, gaa ne che'é dan ya vaa nana ca'mii so', ne nq xcúun so' qui'yaj so' nu' ndaa vaa cataj so', taj soj a.

17 Ase vaa sí ni'yon do', ase vaa sí tuchrij do', vaa soj adonj. Me che'é ne ne'en soj se vaa nuvií noco me se sa' doj vaa yo' rihaan aga' oró mii nuu

rque nuvií yo' ga. 'O se ne'en soj se vaa che'é ma'an nuvií nocqo yo' ro', nuu guëë aga' oró míi yo' rihaan Diose á.

18 Ne taj uún soj se vaa sese cuta' yo'q so' raá chraan altar acaa xcuu rqué yuvií rihaan Diose se vaa ya vaa nana ca'mii so', ne taj se 'yaj sese ca'mii ne so' ma', taj uún soj a. Tzaj ne sese cuta' so' raá xcuu naj rihaan chraan altar yo', ne no xcuún so' qui'yaj so' nu' ndaa vaa cataj so', taj uún soj a.

19 Dan me se ase vaa síi tuchrii vaa soj adonj. Me che'é ne ne'en soj se vaa sa' doj vaa chraan altar yo' rihaan xcuu naj rihaan yo' ga. 'O se che'é ma'an chraan altar ro', che'é dan nuu guëë xcuu yo' rihaan Diose nanj á.

20 Che'é dan sese cuta' yo'q so' raá chraan altar yo', ne nuveé raá chraan altar yo' me se cuta' so' raá ma'. 'O se cuta' so' raá chraan altar do', raá nu' se taj rihaan chraan altar yo' do' adonj.

21 Ne sese cuta' yo'q so' raá nuvií nocqo, ne nuveé inanj raá nuvií nocqo me se cuta' so' raá ma'. 'O se cuta' so' raá nuvií nocqo do', raá ma'an Diose síi yanj nuvií nocqo do' adonj.

22 Ne sese cuta' yo'q so' raá rej xta', ne nuveé inanj rej xta' me se cuta' so' raá ma'. 'O se cuta' so' raá rej xta' do', raá chruun xlá chruun taj ma'an Diose gaa rii ta'nga' Diose do', raá ma'an Diose síi taj rihaan chruun xlá yo' do', cuta' so' nanj adonj.

23 "Nique soj sji naqui'yaj cuu se-tucuanj Moisés rihaan yuvií do', sji fariseo do' ei. Quiran' uxrá soj sayuun adonj. Síi nucui' rá me nij soj nanj á. Dan me se sese vaa nuu xlá do', coj eneldo do', coj cominó do', rihaan soj, ne rqué soj 'o nanj coj rihaan Diose rihaan daj a chi' nánj coj yo' a. Tzaj ne nana nocqo doj ne 'yaj soj ma'. Ne a'ne' nicá soj cacun' che'é tuvi' soj ma'. Ne 'eë rá soj tuvi' soj ma'. Ne uun nucuj rá tuvi' soj man soj ma'. Tzaj ne Diose ro', me rá qui'yaj soj nu' nana nocqo nihánj, ne na'vej rá Diose tanáj xco soj a yo'o nana le'ej doj ma'.

24 Dan me se ase vaa síi tuchrii vaa soj, tzaj ne me rá soj tijaan soj rihaan yuvií daj qui'yaj yuvií adonj. Ase vaa síi rii ndaa 'o yacoo le'ej rque na co'q ro', vaa soj, tzaj ne chumánj uún soj cunu' xcuu camello vaa guëë nanj adonj.

25 "Nique soj sji naqui'yaj cuu se-tucuanj Moisés rihaan yuvií do', sji fariseo do' a. Quiran' uxrá nij soj sayuun adonj. Síi nucui' rá me nij soj nanj á. Dan me se ase vaa rasuun, ne sa' uxrá na'nu' nii xráá yo', tzaj ne rque yo' ro', me se vaa nacaj guëë yo', ta'nga' danj vaa guëë soj, ne xráá soj me se ve'é naruvii, tzaj ne nimán soj me se quij vaa, ne niha' uxrá rá soj ca'neë soj si'yaj tuvi' soj, ne taj se 'yá' ca'ne' rá soj a ma'.

26 Ase vaa síi tuchrii vaa soj sji fariseo ei. Ase vaa 'yaj yuvií na'nu' rque rasuun ro', danj qui'yaj uún soj, naqui'yaj sa' soj nimán soj á. Ndaa síj, gaa ne sa' inanj qui'yaj soj quene'en yuvií ei.

27 "Nique soj sji naqui'yaj cuu se-tucuanj Moisés rihaan yuvií do', sji fariseo do' a. Quiran' uxrá nij soj sayuun adonj. Síi nucui' rá me nij soj nanj á. Dan me se ase vaa chraan naj xngá rihaan santó ro', vaa soj, ne xráá soj ro', vaa catzii, ne ve'é ndo'o ruvi' man soj, tzaj ne nimán soj me se adi' se vaa cúu ri'yuj ro', vaa nimán soj, ne chi'ii vaa nu' nimán soj adonj.

28 Dan me se ase vaa síi nicá nimán vaa soj chéé soj ni'yaj yuvií, tzaj ne 'yaj yuve' ndo'o soj se chi'ii, ne ne uno uxrá soj rihaan Diose a ma'. Inanj danj vaa nimán soj nanj adonj.

29 "Nique soj sji naqui'yaj cuu se-tucuanj Moisés rihaan yuvií do', sji fariseo do' a. Quiran' uxrá soj sayuun adonj. Síi nucui' rá me nij soj nanj á. Dan me

se ve'é une! soj chraan yan naj cúu man nij sí nata' se-nana Diose gaa naá do', man nij sí vaa sa' cane gaa naá do', ne ve'é tumé soj man chraan yo' a.

<sup>30</sup> Ne taj soj se vaa sese cayáan soj ga xii soj nij sí man gaa naá ro', ne ne ticavi' soj man nij sí nata' se-nana Diose ndaa vaa qui'yaj ma'an xii soj a ma'. Danj a'mii soj,

<sup>31</sup> taj xna'anj ma'an soj se vaa ya tuvi' nij sí ticavi' man nij sí nata' se-nana Diose gaa naá me ma'an soj nanj á.

<sup>32</sup> Ne ataa quisij cacun' qui'yaj nij tuvi' soj nij sí man gaa naá yo' a. Tzaj ne tísj soj cacun' yo' adonj.

<sup>33</sup> "Ase vaa xcuáá yuvaa vaa soj, ne taj se qui'yá' quinanii soj rihaan sayuun qui'yaj Diose man soj ma'. Cacaá soj rihaan ya'an adonj.

<sup>34</sup> Che'é dan xa' soj, tzaj ne ca'nej 'unj sí nata' se-nana Diose ca'nej 'unj sí ca'mii nana cuu ca'nej 'unj sí tucu'yón se-nana Diose ca'nej 'unj rihaan soj, gaa ne ticavi' soj man ta'aj nij so', ne cachron soj man ta'aj nij so' rihaan rcutze, ne go' soj cuartá xráa ta'aj nij so', ne cunanj nij so' rihaan soj, curihanj nij so' 'o chuman', ne canoco' uxrá soj man nij so' ndaa 'ó chuman' uún, qui'yaj soj vaa güii nanj adonj.

<sup>35</sup> Ndaa sñj, gaa ne nu' ton cayanj man nij sí sa' rihaan Diose rihaan chumii nihánj ro', nu' cacun' yo' ro', nata' xráa nij soj a. Dan me se asij ton cayanj man sí sa' cu'naj Abel ne ndaa ton cayanj man sí cu'naj Zacarías ta'nii sí cu'naj Berequías gaa cavi' so' rihaan nuví yan nicun' chraan altar ro', nu' cacun' yo' ro', nata' xráa nij soj a.

<sup>36</sup> Ya ya cataj xna'anj 'unj rihaan soj cuano se vaa quiran' ma'an nij tuvi' nij soj sayuun che'é nu' cacun' yo' adonj —taj Jesucristó rihaan nij sí fariseo do', rihaan nij sí naqui'yaj cuu se-tucuanj Moisés rihaan yuvi' do' a.

### *Nana nihánj taj xna'anj daj quiran' nij sí man chuman' Jerusalén a*

<sup>37</sup> Gaa ne cataj uún Jesucristó a:

—Nanó uxrá raj che'é soj sij man chuman' Jerusalén nihánj nanj á. Dan me se ticavi' soj man nij sí nata' se-nana Diose, ne go' soj yahij man nij sí ca'néé Diose cuchí' rihaan soj á. Guun que'ee ndo'o guun rá 'unj naqui'yaj chre' 'unj man soj cutumé 'unj man soj, tzaj ne taj se qui'yá' ca'vee ma'. Dan me se ase vaa 'yaj chuchee naqui'yaj chre' chuchee man ta'nii xo' caráan xo' xcóo xo' xráa ta'nii xo' ro', danj guun raj qui'yáj man soj, tzaj ne ne ca'vej rá soj qui'yáj danj a ma'.

<sup>38</sup> Yaj me se cutumé ma'an soj man soj nanj adonj.

<sup>39</sup> 'O se cuano nihánj me se cataj xna'anj 'unj rihaan soj se vaa rej rihaan ní ro', se quene'en uún soj manj ma'. Tzaj ne ndaa güii ca'na' uún 'unj rihaan chumii nihánj quene'en soj manj, ne cataj soj: "Ve'é uxrá 'na' sí a'néé sí 'nij ra'a man ní á", cataj soj a —taj Jesucristó ni'yaj so' man nij sí man Jerusalén yo' a.

## 24

### *Nana nihánj taj xna'anj se vaa canee nu' nuví nocoo ne chuman' Jerusalén a*

<sup>1</sup> Gaa ne curihanj Jesucristó nuví nocoo, ca'anj so', ne cuchí' nij sí tucu'yón se-nana so' rihaan so' a. Guun rá nij so' quene'en Jesucristó daj vaa nij ve' man nuví nocoo yo' a.

<sup>2</sup> Gaa ne cataj Jesucristó rihaan nij so' a:



—Dan me se ne'en soj nu' ve' man nuvií nocço nihánj na'. Ya ya cataj xna'anj 'unj rihaan soj cuano se vaa vaa güii, ne canee nu' nuvií nocço nihánj, ne a 'ó yuvej se quitáa xráa tuvi' yuvej nihánj a ma' —taj Jesucristó a.

*Nana nihánj taj xna'anj che'é sayuun guun rihaan chumií nihánj vaa güii a*

<sup>3</sup>Dan me se ca'anj cayáan Jesucristó raá quij cu'naj Quij man Chruun Olivó, ne cuchí orún' nij sí tucu'yón se-nana so' rihaan so', ne cataj nij so':

—Cataj xna'anj so' rihaan núj aman canee nu' nuvií nocço yo' do', a me rasuun ca'na' quí'yáa so' asa' quisíj ca'na' so' quene'en núj ne quinavíj nu' chumií nihánj, maestro —taj nij so', xna'anj nij so' man Jesucristó a.

<sup>4</sup>Gaa ne cataj Jesucristó:

—Cutumé ndo'o soj man soj se gaa nanj tihá' yu'unj yuvií man soj á.

<sup>5</sup>'O se ca'na' uxrá yuvií cataj: "Unj me sí ca'née Diose tinanii man yuvií rihaan sayuun", cataj nij so', ne dan me se tihá' yu'unj uxrá nij so' man tuvi' nij so' nanj á.

<sup>6</sup>"Dan me se vaa güii, ne quene'en soj se vaa cunu' uxrá chuman' ga tuvi' chuman' a. Ne cunó uxrá soj nana se vaa unu' chuman' man gan' ga tuvi' chuman' yo' a. Cutumé soj man soj se kuchu'vi' nimán soj ma'. Maan se vaa che'é guun sayuun yo' rihaan chumií nihánj adonj. Tzaj ne asa' quisíj guun danj, gaa ne se ca'anj ni'ya chumií nihánj nu' orá ma'. 'O se quinaj chumií nihánj doj adonj.

<sup>7</sup>Dan me se cunu' uxrá yuvií man chuman' nocço ga yo'ó chuman' nocço, ne cunu' gobiernó ga tuvi' gobiernó a. Ne cachén x'naa cachén yuún nocço cachén que'ee chuman' a.

<sup>8</sup>Nu' sayuun nihánj ro', ase vaa guun che'e 'o chana ve'ee rque no' cuchruj no' ne'ej ro', danj gaa nu' sayuun nihánj nanj ei. Dan me se nu' ne'en chana ve'ee rque yo', ne ne'en no' doj a quirán' no' sayuun rej rihaan, ne ase uun rá chana yo', danj guun rá soj gaa ca'na' sayuun yo', guun rá soj se vaa daj doj guun uxrá sayuun rihaan chumií nihánj nanj adonj.

<sup>9</sup>"Gaa ne ca'anj nicaj yuvií man ta'aj soj rihaan nij sí nicaj suun, ne quirán' ta'aj soj sayuun ne cavi' ta'aj soj nanj á. Ne nachri' cunudanj nij sí yaníj ni'yaj nij so' man soj, che'é se me soj sí nocó' manj adonj.

<sup>10</sup>Gaa ne tanáj que'ee tinúú soj chrej sa', ne taçuachén tinúú soj sí tanáj chrej sa' man yo'ó tinúú soj rihaan sí nicaj suun, ne nachri' uún tinúú soj sí tanáj chrej sa' man ta'aj soj sij nocó' manj nanj á.

<sup>11</sup>Gaa ne ca'na' uxrá sí nata' rihaan yuvií se vaa sij nata' se-nana Diose me nij so', cataj nij so', tzaj ne ca'mii ne uun nij so', ne tihá' yu'unj uxrá nij so' man yuvií adonj.

<sup>12</sup>Gaa ne xna'anj ndo'o se chi'ii qui'yaj yuvií, ne ca'ne' rá nij yuvií ga suun nocó' se-nana Diose, ne che'é dan tanáj uxrá nij sí nocó' manj chrej sa' chrej 'ee rá man tuvi' a.

<sup>13</sup>Tzaj ne sí nocó' raan manj ndaa se ca'anj ni'ya chumií nihánj ro', so' me sí quinanií rihaan sayuun adonj.

<sup>14</sup>Ne ca'mii natáj yuvií nana sa' nihánj nana che'é güii guun chij Diose rihaan chumií nihánj cunó yuvií man cunudanj chuman' man rihaan chumií, ne xcax nij yuvií cuentá che'ej, gaa ne guun che'e chumií nihánj quinavíj chumií nihánj nanj adonj —taj Jesucristó rihaan nij sí tucu'yón se-nana so' a.

<sup>15</sup>Ne soj sij nayaá nana nihánj nana cachronj rihaan yanj nihánj ro', xcax uxrá soj cuentá me taj nana nihánj nana ca'mii Jesucristó che'é se chi'ii á.

Dan me se cataj uún Jesucristó:

—Aj ne'en soj se vaa cataj xna'anj síi cu'naj Daniel síi nata' se-nana Diose gaa naá che'é yo'q se chí'ii qui'yaj ndo'o sayuun man yuvii, ne dan me se güii quene'en soj se chí'ii yo' re j guee,

<sup>16</sup> ne yo'q cunanj nij síi man estadó Judea ca'anj nij so' raa quij á.

<sup>17</sup> Ne síi taj xráá ve' tucua' ro', se catú'j so' rá ve' tucua' so' quí'rii so' si'yaj so' ma'.

<sup>18</sup> Ne síi 'yaj suun tacaan ro', se canicaj so' nano' so' sagan' so' tanáj so' rihaan yo'óo ma'. Se guun raan nij so' ma'. Maan se yo'q cunanj nij so' á.

<sup>19</sup> Nique chana nuu rque do', chana vaa ta'nú'í ne'ej utzii do', güii ca'na' sayuun yo' a. 'Q se se guun nucuj chana yo' cunanj chana yo' ma'.

<sup>20</sup> Cachinj ni'yaj soj rihaan Diose se vaa se ca'na' sayuun yo' güii gaa maan do', güii nq xcúun yuvii naraan rá yuvii do' ma'.

<sup>21</sup> 'Q se güii ca'na' sayuun ro', quij ndo'o guun nanj á. Quij doj gaa sayuun yo' rihaan nu' nij sayuun quiran' yuvii gaa nu' ca'na', ne daj chihaa míj se quiran' uún yuvii sayuun vaa danj ma'.

<sup>22</sup> Sese que'ee uxrá güii guun sayuun, ne se quinanii yuvii rihaan sayuun yo' ma'. Tzaj ne vaa güii quisij sayuun, qui'yaj Diose, che'é rej quinanii nij síi narii so' canoco' man so' adonj.

<sup>23</sup> "Ne güii yo' me se sese cataj yuvii rihaan soj: "Ní'yaj so' ei. Nihánj 'na' síi tinanii man ní' rihaan sayuun á", ne se cuchumán rá soj ma'.

<sup>24</sup> 'Q se ca'na' uxrá síi ne síi cataj se vaa síi tinanii man yuvii rihaan sayuun me nij so', ne ca'na' uxrá síi ne síi cataj se vaa nata' nij so' se-nana Diose, ne qui'yaj nij so' suun sa' nocoo, ne tiha' yu'unj nij so' man cunudanj nij yuvii man rihaan chumii nanj adonj. Ndaa nij síi narii Diose man ro', sese taj vaj Diose tumé man nij so', ne cuchuman rá nij so' ni'yaj nij so' man nij síi tiha' yu'unj yo' nanj adonj.

<sup>25</sup> Nihánj me se cataj xna'anj 'unj rihaan soj daj guun rihaan chumii nihánj nanj á.

<sup>26</sup> Che'é dan me sese cataj yuvii rihaan soj se vaa vaj 'unj rej quij, ne se ca'anj soj rej quij nano' soj manj ma'. Ne sese cataj yuvii rihaan soj se vaa yaán 'unj rá 'o ve', ne se cuchumán rá soj ma'.

<sup>27</sup> Dan me se ndaa rá se uun gaa raan rej síj güii ne 'o chuguun nu' xtá' ndaa rej ata' güii ro', ne ne'en cunudanj yuvii se vaa raan rihaan chumii a. Ne ase un rá soj ne'en soj gaa raan ro', danj guun rá soj asa' ca'na' 'unj sij ca'née Diose nıcaj yu'unj man yuvii, ne yo'q quene'en nu' yuvii man rihaan chumii nihánj se vaa ca'na' 'unj adonj.

<sup>28</sup> Aj ne'en soj daj 'yaj yachrúu vaj rej xtá', ne ne'en ma'an xo' me rej naj nee cha xo' a. Taj síi nata' rihaan xo' me rej naj nee yo' ma'. Ne ase un rá yachrúu ro', danj guun rá ma'an soj asa' ca'na' uún 'unj rihaan chumii nihánj adonj. Quene'en ma'an soj sij man rihaan chumii nihánj me rej ca'na' 'unj adonj.

*Nana nihánj taj xna'anj daj gaa ca'na' uún Jesucristó rihaan chumii nihánj a*

<sup>29</sup> "Síj quiran' yuvii sayuun yo', gaa ne guun rmj' güii guun rmj' yavii guun rmj', ne cayuu nij yati' xtá' ne quinaan taran' nij rasuun nucuj man rej xtá' do' a.

<sup>30</sup> Gaa ne vaa se curuvi' rej xtá' quene'en soj, ne quene'en soj se vaa daj doj ca'na' uún 'unj sij ca'née Diose nıcaj yu'unj man yuvii a. Gaa ne cunudanj nij síi man rihaan chumii nihánj ro', quinanq ndo'o rá ma'an nij so', gaa ne

quene'en nij so' mán 'un̄j sij ca'néé Diose n̄icaj yu'un̄j man yuvīj á. Dan me se xráá ngaa quitaj 'un̄j ca'na' 'un̄j, ne guun nucuaj ndo'oj quirii' ta'ngaj, ne ve'é uxrá curuvij ca'naj á.

<sup>31</sup> Gaa ne ca'yanj nii chruun a'yánj, qui'yáj, ne ca'nej 'un̄j man nij se-mozó 'un̄j ca'na' nij so' rihaan chumii nihánj, ne naquiyaj chre' nij se-mozó 'un̄j man nij sí narii Diose man canoco' manj a. Dan me se cachee nij se-mozó 'un̄j rihaan nu' chumii nihánj, nana' nij so' taran' nij sí cunu ro' ga' 'un̄j nan̄j adon̄j.

*Nana' nihánj taj xna'an̄j se vaa ya quene'en ní' se vaa nichrun' ca'na' uún Jesucristó a*

<sup>32</sup> "Tucu'yón soj nana' nihánj nana' che'é chruun man chruj higó raá á. Gaa quisij guun laruu ra'a chruun, ne naca coj ya'lij raá chruun, ne ne'en soj se vaa nichrun' 'na' dió naman maan a.

<sup>33</sup> Dan me se xcáj uún soj cuentá se vaa asa' quene'en soj nu' se vaa cataj xna'an̄j 'un̄j rihaan soj cuano, ne nichrun' ca'na' uún 'un̄j nan̄j adon̄j. Dan me se ase vaa sí nicun' ta'yaa ro', gaa 'un̄j ei.

<sup>34</sup> Ya ya cataj xna'an̄j 'un̄j rihaan soj cuano quisij nu' rasuun nihánj nu' se vaa cataj xna'an̄j 'un̄j rihaan soj cuano ei. Ne ya quene'en soj nu' nihánj gaa ataa caví' soj ei.

<sup>35</sup> Vaa güii ca'an̄j ni'ya yo'óo do', xta' do', tzaj ne se-nan̄j me se daj chihaa mij se quinavij yo' ma'.

*Nana' nihánj taj xna'an̄j se vaa ne ne'en ní' me güii ca'na' uún Jesucristó ma'*

<sup>36</sup> "Nihánj me cataj xna'an̄j 'un̄j rihaan soj se vaa á 'o sí ne ne'en me güii ca'na' uún 'un̄j rihaan chumii nihánj ma'. Ca'vee se ndaa se-mozó Diose 'yaj suun rej xta', ca'vee se ndaa ma'an̄j ta'n̄j Diose, tzaj ne ne ne'en núj me güii me yo' ma'. Qrún' Réj me sí ne'en nan̄j adon̄j.

<sup>37</sup> Ase vaa qui'yaj yuvīj gaa cayáán sí cu'naj Noé rihaan chumii ro', dan̄j gaa qui'yaj uún yuvīj asa' ca'na' uún 'un̄j sij ca'néé Diose n̄icaj yu'un̄j man yuvīj rihaan chumii nihánj adon̄j.

<sup>38</sup> Dan me se gaa cayáán sí cu'naj Noé, ne daj doj caráán na ya'an̄j rihaan chumii, tzaj ne chá yuvīj do', co'o yuvīj do', ne xcáj tuvi' nij yuvīj do'; inanj dan̄j qui'yaj nij yuvīj ndaa quisij güii catúj nij tuvi' sí cu'naj Noé rque rihoo xij chéé rihaan na a.

<sup>39</sup> Ne ne xcáj nij yuvīj cuentá sese caráán na ya'an̄j xráá nij so' ma'. Maan se ndaa quisij caráán na ya'an̄j xráá cunudan̄j nij so', ne dan̄j gaa xcáj nij so' cuentá nan̄j á. Ne ase vaa ne xcáj nij yuvīj man gaa naá cuentá se vaa quiran' nij so' sayuun ro', dan̄j gaa uún yuvīj asa' quisij ca'na' uún 'un̄j sij ca'néé Diose n̄icaj yu'un̄j man yuvīj rihaan chumii nihánj adon̄j. 'O se ndaa síj güii quene'en nij so' manj, gaa ne xcáj nij so' cuentá nan̄j á.

<sup>40</sup> "Ne asa' quisij güii yo', ne cunuú vij roj snó'o qui'yaj suun roj so' yo'óo, ne nacaj se-mozó Diose man yo'o so', ne quinaj yo'óo so' a.

<sup>41</sup> Ne cunuú vij roj chana' gaj roj no' 'núú trigó, ne nacaj se-mozó Diose man yo'o no', ne quinaj yo'óo no' nan̄j adon̄j.

<sup>42</sup> Che'é dan cutumé uxrá soj man soj á. 'O se ne ne'en soj me güii ca'na' sí 'n̄j ra'a man soj a ma'.

<sup>43</sup> Dan me se sese 'o sí tucua ve' ro', aj ne'en so' me orá ca'na' sí ituu ne qui'yaj ituu sí ituu rasuun man tucua so', ne uxrá cutumé so' tucua so', ne se

qui'yaj ituu sí ituu tucua' so' tzaj ma'. Maan se ne ne'en soj me ora' ca'na' sí ituu man adonj.

<sup>44</sup> Dan me se ta'nga' danj vaa guęę 'unj sij ca'neé Diose nıcaj yu'unj man yuvıı, ne ne ne'en soj me ora' ca'na' uún 'unj man adonj. Che'é dan yo'o nı'yaj soj á.

*Nana nihánj taj xna'anj daj quirán' sí ve'é 'yaj suun rihaan Diose do', daj quirán' sí ne 'yaj suun sa' rihaan Diose do' a*

<sup>45</sup> "Che'é dan me sese cune' sí tucua' yo'o ve' man yo'o se-mozó so' se vaa cıtumá mozó yo' man tuvi' mozó rque so' se chá rihaan nij so' ora' chá nij so' chraa, ne daj qui'yaj mozó yo', rá soj ga. Sese ya ya sij ve'é 'yaj suun me so' do', sese ya ya sij avıı raą me so' do', ne daj qui'yaj so', rá soj ga.

<sup>46</sup> Gaą ne güıı naman se-ru'vee mozó ro', sese quene'en se-ru'vee mozó se vaa ve'é 'yaj suun mozó se-suun ru'vee, ne cavıı sa' uxrá mozó yo', qui'yaj se-ru'vee mozó yo' adonj.

<sup>47</sup> Ya ya cataj xna'anj 'unj rihaan soj cuano se vaa cune' ru'vee yo' man mozó yo' guun so' sí tumé man cunudanj si'yaj ru'vee yo' a.

<sup>48</sup> Tzaj ne sese vaa chi'ıı nimán mozó yo', ne guun rá so' se vaa guun raan ndo'o se-ru'vee so',

<sup>49</sup> gaą ne guun che'e so' go' so' man tuvi' so' mozó, ne cha so' co'o so', ne guun xnq so' a.

<sup>50</sup> Dan me se ne ne'en so' aman naman se-ru'vee so' a. Ne na'vıı so' ca'na' ru'vee a. Tzaj ne sıj güıı sıj ora' sıj, ne ca'na' ma'an se-ru'vee mozó yo',

<sup>51</sup> gaą ne ca'ne' nu' so' man mozó yo' ne cataj so' se vaa ca'anj mozó yo' rihaan ya'an ga yo'o' nij sí nucui' rá a. Ne yuvıı man rihaan ya'an yo' ro', ta'vee uxrá, ne ndaa chá ruj ma'an nij yuvıı cúu yan' yuvıı ei.

## 25

*Nihánj me cuentó nanó Jesucristó che'é chi' chana yaan me rá catuu rej anuu cha'anj nara'qa a*

<sup>1</sup> "Ne asa' ca'na' uún 'unj rihaan chumıı nihánj, ne ase vaa chi' chana yaan ro', danj gaą nij yuvıı me rá catuu rihaan Diose asa' guun chıj Diose á. Dan me se nıcaj nij chana yaan yo' saga' nij no' aga' ya'an, ne ca'anj na'vıı nij no' man sí nara'aa a.

<sup>2</sup> Dan me se 'un' nij chana yaan yo' ro', me chana ni'yon, ne yu'un' nij chana yaan yo' ro', me chana nıcaj cuentá a.

<sup>3</sup> O se nij chana ni'yon yo' ro', nıcaj nij no' saga' nij no' aga' ya'an, tzaj ne taj vaj casté acaa nıcaj nij no' a ma'.

<sup>4</sup> Ne nij chana nıcaj cuentá ro', nij no' me se nıcaj nij no' saga' nij no' aga' ya'an do', aga' nuu casté acaa do' a.

<sup>5</sup> Dan me se guun raan sí nara'aa, ne ca'na' nej rihaan taran' nij chana yaan yo', ne cotoj taran' nij no' a.

<sup>6</sup> Guun yan', ne caguáj yuvıı cataj yuvıı: "Na' sí nara'aa ga chana yaan ei. Cuvá' soj narı' tuvi' soj ga so' ei", cataj yuvıı rihaan chi' nij chana yaan yo' a.

<sup>7</sup> Gaą ne cuno nij chana yaan, ne ra'yanj naxagaa taran' nij no', ne naqui'yaj sa' nij no' saga' nij no' aga' ya'an a.

<sup>8</sup> Ne cataj nij chana ni'yon rihaan nij chana nıcaj cuentá, ne: "Qui'yaj soj doj se ndo'o, rque soj doj casté acaa rihaan núj ruguanj. Quina'áj saga' núj aga' ya'an nanj achuguanj", taj nij chana ni'yon yo' rihaan tuvi' no' a.

<sup>9</sup> Gaa ne tuvi' no' chana nicaj cuentá me se cataj: “Maan se se quisij casté acaa cacaa rihaan taran' ní' ma'. Ca'anj soj rej ane' casté acaa, ne quiraan soj man yo' á”, taj nij chana nicaj cuentá yo' rihaan nij chana ni'yon a.

<sup>10</sup> Veé dan, ne ca'anj nij chana ni'yon yo' quiraan nij no' casté acaa, ne ca'na' sí nara'aa, ne nij chana nicaj cuentá me se ne cachin casté acaa rihaan nij no' ma'. Che'é dan catúj nij no' rá ve' canuú cha'anj ga sí nara'aa, ne caráan nii ta'yaa yo' a.

<sup>11</sup> Cachén doj orá, gaa ne ca'na' nij chana ni'yon uún, ne cataj nij no': “Ca'nuu so' ta'yaa catuu núj, socoj”, cataj nij no' rihaan sí nara'aa a.

<sup>12</sup> Ne cataj sí nara'aa yo': “Ya ya cataj xna'anj 'unj rihaan soj se vaa ne ne'én 'unj man soj ma'”, taj so' rihaan nij chana ni'yon yo' a.

<sup>13</sup> “Che'é dan cutumé uxrá nij soj man soj á. 'O se ne ne'en soj me güii ca'na' 'unj ne ne'en soj me orá ca'na' 'unj ne ne'en soj ma'.

*Nana nihánj me cuentó nanó Jesucristó che'é sí racuj sa'anj rihaan se-mozó so' a*

<sup>14</sup> “O se güii ca'na' 'unj me se ase vaa qui'yaj yo' o ru'vee ga se-mozó ru'vee ro', danj gaa qui'yáj ga soj sij noco' manj adonj. Dan me se guun rá ru'vee yo' ca'anj so' yo'ó chuman', ne canacúun so' man nij se-mozó so', ne racuj so' se-sa'anj so' rihaan nij mozó yo' a.

<sup>15</sup> Dan me se rihaan yo' o so' racuj so' 'un' sa'anj noco' uxrá cu'naj talento a. Rihaan yo'ó so' racuj so' vj sa'anj talento a. Ne rihaan yo'ó so' racuj so' yo' o sa'anj talento a. Danj qui'yaj so', racuj so' sa'anj rihaan 'o 'o nij se-mozó so', ne rihaan 'o 'o mozó yo' racuj so' ndaa vaa guun nucuaj mozó tinaca mozó yo' a. Dan me se me rá so' qui'yaj suun 'o 'o mozó tinaca 'o 'o mozó sa'anj rque so' rihaan mozó yo', ne che'é dan qui'yaj so' danj a. Ne cavii so', ca'anj so' a.

<sup>16</sup> “Sij ca'anj so', ne cavii sí nicaj 'un' sa'anj talento ca'anj so', ne qui'yaj suun so', ne quisij, gaa ne qui'yaj canaán so' yu'un' sa'anj talento ga sa'anj uún a.

<sup>17</sup> Ne ase vaa qui'yaj so' ro', danj vaa qui'yaj sí nicaj vj sa'anj talento uún, ne qui'yaj canaán so' yavj sa'anj talento uún a.

<sup>18</sup> Tzaj ne sí quirí 'o sa'anj talento yo' me se cavii so' ca'anj so', ne gáan so' 'o yu'uj, ne caxrj yuve so' man sa'anj racuj ru'vee rihaan so' a.

<sup>19</sup> “Veé dan, ne guun raan uxrá, ne namán se-ru'vee va'nuj nij mozó, ne xná'anj ru'vee man 'o 'o nij so' daj qui'yaj nij so' a.

<sup>20</sup> Ne cuchi' sí nicaj 'un' sa'anj talento rihaan ru'vee, ne rque so' chj' sa'anj talento man se-ru'vee so', cataj so': “Un' sa'anj talento racuj so' manj, señor. Ne yaj ro', nuu yo' chj' sa'anj talento, qui'yáj nanj á”, taj so' a.

<sup>21</sup> Ne cataj ru'vee yo' rihaan se-mozó so': “Cunaj uxrá vaa qui'yáa so' ei. Mozó sa' mé so', ne gaa nucuaj raj mán so' adonj. Ve'é cutumé so' man doj si'yáj á. Che'é dan, ne yaj cané so' tumé so' noco' doj si'yáj á. Cuvá' so' cayáan so' ga 'unj, ne ve'é cayáan ní' nanj ei”, taj so' rihaan se-mozó so' a.

<sup>22</sup> “Gaa ne cuchi' sí nicaj vj sa'anj talento uún, ne cataj so': “Racuj so' vj sa'anj talento rihanj, señor. Ne yaj, ne nuu yo' ca'anj sa'anj talento, qui'yáj nanj á”, taj so' a.

<sup>23</sup> Ne cataj ru'vee yo' rihaan so': “Cunaj uxrá vaa qui'yáa so' ei. Mozó sa' mé so' uún, ne gaa nucuaj raj mán so' uún adonj. Ve'é cutumé so' man doj si'yáj, ne che'é dan yaj cané so' tumé so' noco' doj si'yáj ya ei. Cuvá' so', cayáan so' ga 'unj, ne ve'é cayáan ní' ya ei”, taj ru'vee yo' rihaan yo'ó se-mozó so' a.

24 "Veé dan, ne cuchi' síf nicaj yo'q sa'anj talento uún rihaan se-ru'vee so', ne cataj so': "Ne'én 'unj se vaa sij sca' ndo'o nimán mé so', señor. Ne'én 'unj se vaa yo'ó yuvij unô 'núú, ne ma'án so' me síf rii un naa nanj adonj. Ne yo'ó yuvij narii squij man 'núú trigó, 'yáá so', ne ma'án so' naran' un man 'núú trigó sa' yo' nanj adonj.

25 Che'é dan cuchu'ví 'unj, ne ca'anj 'unj, ne caxrij yuve 'unj se-sa'anj so' rque yo'óo nanj adonj. Dan me se nacaj guee uún so' se-sa'anj so' nanj ei", taj mozó yo' rihaan ru'vee a.

26 Ne cataj ru'vee yo' rihaan mozó: "Mozó chi'ij nimán do', mozó rmij do', mé so' ei. Se danj ne'én so' se vaa yo'ó yuvij unô 'núú, ne ma'anj rii naa, ne ne'én so' se vaa yo'ó yuvij narii squij man 'núú trigó, ne 'unj naran' 'núú trigó sa' yo',

27 ne me che'é ne taçuachén so' se-sa'anj 'unj rihaan nij síf nuta' raq sa'anj ga. Gaa ne asa' 'ná' 'unj, ne nicaj 'unj se-sa'anj 'unj ga sa'anj nata' raq yo' ga", taj ru'vee yo' rihaan yo'ó mozó yo' a.

28 "Ne ca'mii uún ru'vee yo' rihaan yo'óo nij se-mozó so', cataj so': "Ca'nee soj sa'anj nicaj mozó chi'ij nihánj, ne taçuachén soj rihaan síf nicaj chi' sa'anj talento á.

29 "Q se síf ne'en sa' qui'yaj suun rihanj me se vaa güii, ne doj a guun nucuaj so' qui'yaj suun so' rihanj adonj. Ne síf ne ne'en qui'yaj suun rihanj me se ca'nee 'unj suun le'ej nii atá so', ne quinaj un so', qui'yá adonj.

30 Ne mozó chi'ij yo' me se taj se uun so' rihanj ma'. Quiri'ij soj man so' xe' rej rmij' á. Ne yuvij man rej rmij' yo' me se ta'vee uxrá ne ndaa chá ruj ma'an nij yuvij cúu yan' nij so' nanj adonj", taj ru'vee rihaan yo'óo nij se-mozó so' a.

### *Nana nihánj taj xna'anj che'é güii ca'ne' Jesucristó cacun' che'é yuvij man rihaan chumij a*

31 "Dan me se síf ca'née Diosé nicaj yu'unj man yuvij mé 'unj, ne ca'na' uún 'unj rihaan chumij nihánj, ne ve'é uxrá gaa ca'na' 'unj, ne ca'na' cunudanj nij se-mozó 'unj, ne asa' ca'ná' 'unj, ne quitaj 'unj rihaan xrúun 'unj chruun xlá sa', ne ca'ne' 'unj cacun' che'é yuvij adonj.

32 Dan me se naqui'yaj chre' nij se-mozó 'unj man cunudanj nij yuvij man rihaan chumij, ne canicun' nij yuvij rihaan 'unj, ne cuxra' ta'aj 'unj man nij yuvij, ne dan me se ase vaa 'yaj síf tumé matzinj uxra' ta'aj so' man nij matzinj ga nij tana ro', danj gaa qui'yáa 'unj, cuxra' ta'aj 'unj man nij yuvij yo' nanj adonj.

33 Dan me se nij síf sa' ro', ase vaa matzinj gaa nij so' rihanj, ne cachen nij so' canicun' nij so' rej nuva' 'unj, ne nij síf chi'ij ro', ase vaa tana gaa nij so' rihanj, ne cachen nij so' canicun' nij so' rej nichruun 'unj a.

34 "Ne guún 'unj síf nicaj suun rey, quirij ta'ngá' 'unj rihaan nij so', ne dan me se ca'mij 'unj rihaan nij síf nicun' rej nuva' 'unj, cataj 'unj: "Cuvá' soj ei. Nihá' uxrá rá Réé 'unj ni'yaj so' man soj á. Dan me se asij qui'yaj Réé 'unj man chumij nihánj, ne cachron so' güii guun chij ma'an soj rihaan chumij nihánj a. Che'é dan ca'na' soj, ne nacaj soj nu' se sa' qui'yaj Réj á.

35 "Q se gaa naá, ne quina'aan rquej, ne rqué soj se chay á. Ne nacoó 'unj na, ne rqué soj na co'oj á. Ne ase vaa síf 'na' yo'óo chuman' vaa 'unj rihaan soj, tzaj ne ve'é ca'mii soj gaj a.

36 Tachrinj un vaa sagan' 'unj, tzaj ne rqué soj yatzij manj á. Ne canó chi'ij manj, ne cuchi' soj rej náj, ne taj ya'anj soj manj á. Qui'nij 'unj taga', ne cuchi'

soj taga', ne ca'mii soj gaj adonj", cataj 'unj rihaan nij sí nicun' rej nuva' 'unj a.

<sup>37</sup> "Gaa ne ca'mii nij sí sa' yo' rihanj, cataj nij so': "Aman quene'en núj se vaa na'aan rque so', ne rque núj se chá so', Señor. Aman quene'en núj se vaa nacoó so' na, ne rque núj na co'o so' ga.

<sup>38</sup> Aman ase vaa sí 'na' yo'ó chuman' vaa so' rihaan núj, ne ca'mii núj ga so' ga. Aman quene'en núj se vaa tachrinj un vaa sagan' so', ne rque núj yatzij cunuú so' ga.

<sup>39</sup> Aman quene'en núj se vaa canó chi'ii mán so' do', se vaa catúj so' taga' do', ne cuchí' núj racuíj núj mán so' ga", cataj nij sí sa', xna'anj nij so' manj a.

<sup>40</sup> "Gaa ne cataj 'unj rihaan nij so': "Ya ya cataj xna'anj 'unj rihaan soj cuano se vaa racuíj ndo'o soj man nij tinúú 'unj gaa quiran' nij so' sayuun vaa danj á. Nda' se sí nica' ndo'o me ta'aj nij so', tzaj ne racuíj ndo'o soj man nij so', ne che'é se racuíj ndo'o soj man tinúú 'unj, ne che'é dan nuchruij 'unj cuentá se vaa me soj sí racuíj man ma'anj adonj", cataj 'unj rihaan nij so' a.

<sup>41</sup> "Gaa ne cataj 'unj rihaan nij sí nicun' rej nichruún 'unj a: "Naxuun soj man soj rihanj ei. Maan se cataj ya Dióse se vaa inanj sayuun quiran' soj, ca'anj soj rihaan ya'an, cacaa soj nu' cavii nu' ca'anj nanj á. Dan me se qui'yaj Dióse ya'an yo' cacaa sí chree cacaa nij nana chree cacaa, ne cacaa nij soj cacaa ga so' adonj.

<sup>42</sup> "O se quina'aan rquej gaa naá, tzaj ne ne rque soj a doj se chá chaj ma'. Nacoó 'unj na, tzaj ne ne rque soj a doj na co'oj ma'.

<sup>43</sup> Ase vaa sí 'na' yo'ó chuman' vaa 'unj rihaan soj, tzaj ne ne ca'mii soj gaj ma'. Tachrinj un nuú 'unj, tzaj ne ne rque soj a doj yatzij ma'. Canó chi'ii manj do', qui'nij 'unj taga' do', tzaj ne a 'ó güii ne cuchí' soj rihanj ma'", cataj 'unj rihaan nij so' a.

<sup>44</sup> "Gaa ne cataj ma'anj nij sí chi'ii yo': "Aman quene'en núj mán so' se vaa na'aan rque so' do', se vaa nacoó so' na do', se vaa ase vaa sí ca'na' yo'ó chuman' vaa so' do', se vaa achiin yatzij cunuú so' do', se vaa canó chi'ii mán so' do', se vaa qui'nij so' taga' do', ne ne racuíj núj mán so', Señor", cataj nij so', xna'anj nij so' manj a.

<sup>45</sup> "Gaa ne cataj 'unj rihaan nij so': "Ya ya cataj xna'anj 'unj rihaan soj cuano se vaa a 'ó xco' ne racuíj soj man nij tinúú 'unj gaa quiran' nij so' sayuun vaa danj ma'. Ne nda' se sí nica' ndo'o me ta'aj nij so', tzaj ne no xcúún nij soj racuíj soj man nij so' adonj. Ne che'é se ne racuíj soj man nij so' ro', che'é dan nuchruij 'unj cuentá se vaa nuveé sij racuíj manj me soj ma'", cataj 'unj rihaan nij so' a.

<sup>46</sup> "Gaa ne cavii nij so' ca'anj nij so', ne quiran' ndo'o nij so' sayuun nu' cavii nu' ca'anj, tzaj ne nij sí sa' ro', ve'é cayáan nij so' ga Dióse nu' cavii nu' ca'anj nanj adonj —taj Jesucristó rihaan nij sí tucu'yón se-nana so' a.

## 26

*Nana nihánj taj xna'anj se vaa 'o guun rá nij xrej atq suun nocoo doj do', nij sí uun chij do', se vaa cavi' Jesucristó a*

<sup>1</sup> Síj cataj xna'anj Jesucristó nu' nana yo', gaa ne ca'mii uún so' rihaan nij sí tucu'yón se-nana so', cataj so':

<sup>2</sup> —Ne'en soj se vaa cachén vij güii, gaa ne canuú cha'anj pascuá, ne taquachén nii manj rihaan nij sí cachron manj rihaan rcutze nanj adonj.

Danj qui'yaj nij so', che'é se sí ca'néé Diosē nīcaj yu'unj man yuviī mej a —taj Jesucristó a.

<sup>3</sup> Gaa ne cunuu chre' nij xrej atā suun nocōo doj dō', nij sí uun chij dō', rihaan ve' xij tucúa xrej atā suun nocōo doj sí cu'naj Caifás a.

<sup>4</sup> Ne 'o guun rá cunudanj nij so' se vaa tihā' yu'unj nij so' man Jesucristó, ne quita'aa yuve nij so' man Jesucristó, ne cavi' Jesucristó, qui'yaj nij so', rá nij so' a.

<sup>5</sup> Tzaj ne cataj nij so':

—Se quita'aa ní' man so' gaa aman anuú cha'anj ma'. Maan se sese danj qui'yaj ní', ne ca'maan rá nij yuviī, ne guun sayuun, qui'yaj nij yuviī nanj adonj —taj nij so' a.

*Nana nihánj taj xna'anj se vaa caxrj 'o chana casté raq Jesucristó a*

<sup>6</sup> Dan me se yáan Jesucristó chuman' cu'naj Betania, ne ne so' rá 'o ve' tucúa sí cu'naj Simón sí canó luj ri'yuj man,

<sup>7</sup> ne yáan Jesucristó rihaan mesá, ne cuchi' yo'o chana rihaan so', ne nicaj chana yo'o aga' catzīi nuu casté gun' daj, ne casté tu'vee ndo'o me yo' a. Gaa ne caxrj chana casté raq Jesucristó a.

<sup>8</sup> Ne ca'maan rá nij sí tucuyón se-nana Jesucristó, ne cataj nij so':

—Me che'é tiri' rma'an chana nihánj casté sa' ga.

<sup>9</sup> Me che'é ne cutu'vee no' casté, ne quiri' uxrá no' sa'anj, ne go' no' sa'anj yo' man sí nique ga —cataj nij so', ni'yaj nij so' man chana yo' a.

<sup>10</sup> Ne quene'en Jesucristó daj vaa ca'mii nij so', ne cataj so' rihaan nij so' a: —Me che'é a'mii soj danj ni'yaj soj man chana ga. 'O se ve'é uxrá vaa qui'yaj no' manj á.

<sup>11</sup> 'O se sí nique me se daj a güii mán nij sí nique ga soj, ne ca'vee qui'yaj soj danj ga sí nique ei. Tzaj ne 'unj me se vaa güii ca'anj 'unj, ne quinaj uun soj, ne se ca'vee qui'yaj soj se luj che'ej ma'.

<sup>12</sup> Dan me se caxrj chana nihánj casté raj, ne che'é dan ne'en soj se vaa cachin' nii manj adonj.

<sup>13</sup> Ya ya cataj xna'anj 'unj rihaan soj cuano se vaa me rej ma'an ca'mii natáj yuviī se-nanaj nana sa' rihaan nij yuviī man rihaan nu' chumiī nihánj ro', ne cataj xna'anj uún nij yuviī rihaan tuvi' yuviī che'é se vaa qui'yaj chana nihánj manj, ne se quini'yón yuviī man chana nihánj ma' —taj Jesucristó a.

*Nana nihánj taj xna'anj se vaa cutu'vej sí cu'naj Judas man Jesucristó rihaan nij sí taj ri'yunj man Jesucristó a*

<sup>14</sup> Gaa ne caviī sí cu'naj Judas Iscariote, ca'anj so' rihaan nij xrej atā suun nocōo doj a. Dan me se yo'o tuvi' chuvij nij sí tucuyón se-nana Jesucristó me sí cu'naj Judas yo' a.

<sup>15</sup> Dan me se cataj so' rihaan nij xrej a:

—A me se rque soj manj, ne racuj 'unj man soj tacuachén 'unj man Jesucristó rihaan soj ga —taj so', xna'anj so' man nij xrej a.

Ne go' nij so' icō chi' sa'anj platá catzīi man sí cu'naj Judas yo' a.

<sup>16</sup> Gaa ne guun che'e sí cu'naj Judas nuchruj raq so' aman guun nucaj so' racuj so' man nij xrej atā suun nocōo doj, tacuachén so' man Jesucristó rihaan nij so' a.

*Nana nihánj taj xna'anj se vaa ma'an Jesucristó taj xna'anj se vaa tacuachén yo'o tuvi' nij sí tucuyón se-nana so' man so' rihaan nij sí taj ri'yunj man so' a*



17 Ne güii canuú cha'anj pascuá ro', cuchi' nij sí tucu'yón se-nanā Jesucristó rihaan Jesucristó, ne xná'anj nij so' man so', cataj nij so':

—Me rej qui'yaj chuvji núj chá xti'nō nī' cha'anj pascuá, rá sō' ga —taj nij so' rihaan Jesucristó a.

18 Ne cataj xna'anj Jesucristó rihaan nij so' se vaa catuu nij so' chuman' Jerusalén, ne cuchī' nij so' rihaan yo'ō so', ne ca'miī nij so' nanā nihánj rihaan so' a: “Taj xna'anj maestró rihaan so' se vaa daj doj quisij se-ora so' a. Ne chá xti'nō so' dō', nij sí tucu'yón se-nanā so' dō', cha'anj pascuá tucuá sō' á”, cataj nij so' rihaan sí ne chuman' yo', taj Jesucristó rihaan nij so' a.

19 Dan me se qui'yaj nij sí tucu'yón se-nanā Jesucristó ndaa vaa cataj xna'anj Jesucristó rihaan nij so', ne qui'yaj chuvji nij so' chá xti'nō nij so' cha'anj pascuá a.

20 Ne rej ti'nuu, ne cayáan Jesucristó ga chuvjij nij sí tucu'yón se-nanā so' rihaan mesá a.

21 Ne gaa chá nij so' chraa, ne cataj Jesucristó:

—Ya ya cataj xna'anj 'unj rihaan soj se vaa tacuachén yo'ō tuvi' soj manj rihaan nij sí taj ri'yunj manj ei —taj Jesucristó a.

22 Gaa ne quinano ndo'ō rá nij sí tucu'yón se-nanā Jesucristó, ne guun che'ē nij so' ndaa 'ō 'ō nij so' xná'anj man Jesucristó, cataj 'ō 'ō nij so':

—'Unj me sí qui'yaj danj ni', Señor! —taj 'ō 'ō nij so' a.

23 Gaa ne cataj Jesucristó:

—Sí tiguíj rachrúun ga 'unj rá co'oo ro', so' me sí tacuachén manj rihaan nij sí taj ri'yunj manj adonj.

24 'Q se taj danj Diosē se vaa ca'anj 'unj cavi' 'unj sij ca'néé Diosē nīcaj yu'unj man yuviī ne ya danj quírán' 'unj adonj. Tzaj ne niqē ndo'ō sí tacuachén manj rihaan nij sí taj ri'yunj manj nanj á. Quiran' uxrá so' sayuun nanj á. Snó'ō yo' me se sese ne ca'ngaa so', ne cavii sá' so' doj tzaj adonj —taj Jesucristó a.

25 Ne sí cu'naj Judas sí me rá tacuachén man Jesucristó rihaan nij sí taj ri'yunj man Jesucristó me se xná'anj so' man Jesucristó, cataj so':

—'Unj me sí qui'yaj danj ni', maestro! —taj ma'an so', xná'anj ma'an so' man Jesucristó uún a.

—Ya uxrá cataj sō', veé sō' qui'yaj danj ei —taj Jesucristó rihaan so' a.

*Nanā nihánj taj xna'anj che'ē rachrúun rquē Jesucristó rihaan nij sí tucu'yón se-nanā so' chá nij so' dō', che'ē na vinó rquē so' co'ō nij so' dō' a*

26 Ne gaa chá nij so' chraa ne quita'aa Jesucristó yo'ō rachrúun, ne nago' so' graciá rihaan Diosē, ne cuxra' ta'aj so' rachrúun, ne rquē so' rihaan nij sí tucu'yón se-nanā so', ne cataj so':

—Quita'aa soj rachrúun nihánj, chá soj man yo' á. Neē manj me rachrúun nihánj ei —taj so' a.

27 Gaa ne quita'aa Jesucristó aga' tazá nuu na vinó, ne nago' so' graciá rihaan Diosē, ne tacuachén so' aga' nuu na vinó rihaan nij so', ne cataj so':

—Co'ō taran' soj na vinó nihánj á.

28 'Q se ton manj me na nihánj, ne che'ē ton manj ro', rquē Diosē 'ō nanā rihaan soj daj qui'yaj Diosē ga soj a. Dan me se che'ē se cayanj ton manj ro', che'ē dan me caraā x'naa Diosē nī'yaj Diosē cacun' tumé que'ēē yuviī adonj.

29 Ne cuano nihánj me se cataj xna'anj 'unj rihaan soj se vaa veé doj nihánj me co'oj, ne se co'oj yaj a ma'. Tzaj ne asá' quisij güii guun chij Réé 'unj rihaan

chumiġ nihánj, ne cunuū naca chumiġ nihánj, ne co'ō ní' na vinó naca ei —taj Jesucristó rihaan nij sí' tucu'yón se-nana so' a.

<sup>30</sup> Gaa ne cachráá taran' nij so' chra' rihaan Diose, ne cavii nij so', ca'anġ nij so' quij cu'naj Quij man Chruun Olivó a.

*Nana nihánj taj xna'anġ se vaa cataġ xna'anġ Jesucristó se vaa guun na'aj sí' cu'naj Pedró ne cataġ so' se vaa nuveé sij noco' man Jesucristó me so' a*

<sup>31</sup> Gaa ne cataġ Jesucristó rihaan nij so' a:

—Danġ Diose taj se vaa go' Diose man sí' tumé matzinġ, ne cunanġ nij matzinġ cha'nuū nij xo' a. Ne ya ase vaa daán 'unġ matzinġ vaa soġ, ne niġ corá guun na'aj taran' soġ, ne se canoco' soġ manġ a ma'.

<sup>32</sup> Tzaj ne asa' quisġ cunuū i'na' uún 'unġ, ne quitaj yaan 'unġ rihaan soġ ca'anġ 'unġ estadó Galilea, ne nari' tuvi' ní' estadó Galilea nanġ adonġ —taj Jesucristó rihaan nij sí' tucu'yón se-nana so' a.

<sup>33</sup> Gaa ne cataġ sí' cu'naj Pedró rihaan so' a:

—Ca'vee se tanáj taran' nij so' mán so', tzaj ne daj chihaa míġ se tanáj 'unġ mán so' ma' —taj Pedró a.

<sup>34</sup> Ne cataġ Jesucristó:

—Ya ya cataġ xna'anġ 'unġ rihaan so' cuano se vaa aj ne'én 'unġ se vaa niġ corá gaa ataa caguaj to'loo, ne va'nuj ya cataġ so' rihaan yuviġ se vaa nuveé sij noco' manġ mé so' a —taj Jesucristó rihaan Pedró a.

<sup>35</sup> Ne cataġ Pedró:

—Taj ma'. Ca'vee se ticavi' yuviġ man ní', tzaj ne daj chihaa míġ se cataġ 'unġ se vaa nuveé sij noco' mán so' mej ma' —taj Pedró rihaan Jesucristó a.

Ne ase vaa cataġ Pedró ro', danġ cataġ taran' nij sí' tucu'yón se-nana Jesucristó a.

*Nana nihánj taj xna'anġ daj qui'yaj Jesucristó gaa cachín ni'yaj Jesucristó rihaan Diose a*

<sup>36</sup> Gaa ne ca'anġ Jesucristó ga nij so' ndaa yo'ó rej cu'naj Getsemaní, ne cataġ xna'anġ Jesucristó rihaan nij so':

—Canġ soġ nihánj, na'vij soġ mán 'unġ, ne ca'anġ 'unġ gan' doġ tzin', ne cachinġ ni'yáj rihaan Réj a —taj Jesucristó a.

<sup>37</sup> Ne nicaj Jesucristó man Pedró do', man roġ ta'ní' sí' cu'naj Zebedeo do', ca'anġ so', ne guun che'e so' quinanó ndo'o rá so' a.

<sup>38</sup> Gaa ne cataġ so' rihaan va'nuj nij sí' ca'anġ ga so' a:

—Naná uxrá raj adonġ. Maan che'é rej nanó ndo'o raj, qui'yaj cavi' 'unġ, raj a. Qui'yaj soġ se ndo'o quinaġ soġ nihánj, ne se cotoġ soġ ma' —taj Jesucristó rihaan va'nuj nij so' a.

<sup>39</sup> Gaa ne cavii so' yanġ doġ tzin', ne ca'anġ cayáán rno so' rihaan yo'óó, ne cachín ni'yaj so' rihaan Diose, ne cataġ so' rihaan Diose a:

—Sese ca'vee, ne caráán ra'á so' xráj, se gaa nanġ quirañ' uxrá 'unġ sayuun, tzaj ne sese ma'án so' me rá quirañ' 'unġ sayuun, ne qui'yáá so' ndaa vaa me rá ma'án so', ne se qui'yáá so' ndaa vaa me rá ma'anġ, man Ataj —taj Jesucristó, cachín ni'yaj so' rihaan Diose a.

<sup>40</sup> Gaa ne canicaj uún so' ca'na' so' rihaan va'nuj nij sí' tucu'yón se-nana so', ne quene'en so' se vaa cotoġ cunudanj nij so' a. Gaa ne cataġ so' rihaan Pedró a:

—Dan me se xa' soġ me se a' ó orá ne guun nucaġ soġ ni'yaj soġ gaj a ma'. Ya na'.

41 Maan se ni'yaj soj, ne cachinj ni'yaj soj rihaan Diose se vaa caráán Diose rihaan sí chree se caxrij sí chree chrej chi'ij rque soj á. 'O se niha' rá soj qui'yaj soj se sa', tzaj ne ne guun nucuaj soj ma' —taj Jesucristó rihaan nij so' a.

42 Gaa ne cavii uún so', ne cachín ni'yaj uún so' rihaan Diose, cataj so':  
—Sese se ca'vee quinani' unj rihaan sayuun ase vaa, ne qui'yáa so' ndaa vaa me rá so', Ataj —taj Jesucristó, cachín ni'yaj so' a.

43 Gaa ne canicaj uún so' ca'na' so', ne quene'en so' se vaa cotoj uún va'nuj nij sí tucu'yón se-nana so' a. 'O se ca'na' ndo'o nej rihaan nij so' a.

44 Gaa ne tanáj so' man nij so', ne cavii uún so', ne cachín ni'yaj uún so' rihaan Diose, ne ase vaa cachín ni'yaj so' gaa rque ro', danj vaa cachín ni'yaj uún so' rihaan Diose a.

45 Gaa ne canicaj uún so' ca'na' so' rihaan va'nuj nij sí tucu'yón se-nana so', ne cataj so':

—Ca'vee cotoj soj ca'vee naraan rá soj ca'vee sese vaa ya'núj rihaan soj á. Dan me se daj doj quisij orá tucuachén yo'o so' manj rihaan sí tumé ndo'o cacun', che'é se mé unj sí ca'née Diose nicaj yu'unj man yuvi adonj.

46 Naxagaa soj, ca'anj ní nanj ei. Ni'yaj soj nedi'. 'Na' sí tucuachén manj rihaan sí taj ri'yunj manj nanj chuguanj —taj Jesucristó a.

*Nana nihánj taj xna'anj daj qui'yaj nii gaa quita'aa nii man Jesucristó a*

47 Dan me se nicun' Jesucristó ca'mii so', ne nu' ca'na' sí cu'naj Judas yo'o tuvi' chujij nij sí tucu'yón se-nana Jesucristó, ne ca'na' uxrá yuvi ga so', ne nicaj nij yuvi neê espadá do', chruun do' a. Dan me se nij yuvi ca'née nij xrej ata suun nocoo doj do', nij yuvi ca'née nij sí uun chij rihaan nij yuvi israelitá do', me nij yuvi ca'na' a.

48 Ne sí cu'naj Judas cataj xna'anj rihaan nij yuvi se vaa daj gaa qui'yaj so' ga Jesucristó, gaa ne cunu yaan nij yuvi man Jesucristó, ne cataj so':

—Sí cachron tu'vaj ro', so' me sí quita'aa soj cuaj á —taj sí cu'naj Judas a.

49 Gaa ne nu' cuchi' so' cuaj rihaan Jesucristó, ne cataj so':

—Ca'na' uxraj, nanj maestro —taj so' rihaan Jesucristó a.

Gaa ne nu' cachron tu'va so' xruu Jesucristó a.

50 Gaa ne xna'anj Jesucristó man Judas, cataj so':

—Me che'é ca'ná' so', ga tinu' —taj so' rihaan Judas a.

Gaa ne cuchi' nij yuvi rihaan Jesucristó, ne quita'aa nij yuvi man Jesucristó a.

51 Ne yo'o sí nicun' ga Jesucristó me se quirii so' taneê so' neê espadá, ne go' so' neê espadá yo' raq yo'o se-mozó xrej ata suun nocoo doj, ne veé dan güej nu' xreé mozó yo', qui'yaj so' a.

52 Gaa ne cataj Jesucristó rihaan sí nicaj neê espadá yo' a:

—Na'nej so' taneê so' á. 'O se nu' yuvi nicaj neê espadá ro', veé neê espadá qui'yaj cavi' nij yuvi nanj adonj.

53 Ne ne ne'en so' se vaa guun nucuaj cachinj ni'yaj rihaan Réj, ne ca'na' que'ee ndo'o se-mozó Réj rihanj cuano, ne ca'vee qui'yaj cananj a.

54 Tzaj ne sese danj qui'yaj, gaa ne asa' ca'vee qui'yaj ní nu' nana no rihaan danj Diose nana taj xna'anj daj gaa quirán' unj ga —taj Jesucristó rihaan sí nicaj neê espadá yo' a.

55 Ne canicaj Jesucristó, cataj Jesucristó rihaan nij yuvi a:

—Me che'é nicaj soj neê espadá nicaj soj chruun nicaj soj, ca'na' soj ga. Síi itüü mé 'un̄j, rá soj na'. Ne 'o se guun que'eē güii cayáan 'un̄j rá nuvíi nocōo, tucu'yón 'un̄j se-nan̄aj rihaan nij yuvīi, tzaj ne ne quita'aa soj manj a.

<sup>56</sup> Tzaj ne nihánj me se quirán' 'un̄j nu' se vaa taj nana cachrón nij síi nata' se-nana Diose gaa naá rihaan yanj a —taj Jesucristó a.

Gaa ne tanáj cunudan̄j nij síi tucu'yón se-nana Jesucristó man so', ne cunan̄j nij so', ca'an̄j nij so' a.

*Nana nihánj taj xna'an̄j daj qui'yaj nii gaa cuta' nii cacun' xráa Jesucristó a*

<sup>57</sup> Dan me se nij síi quita'aa man Jesucristó me se nicaj nij so' man Jesucristó ca'an̄j nij so' rihaan síi cu'naj Caifás xrej atá suun nocōo doj a. Ne aj mán chre' nij síi naqui'yaj cuu se-tucuan̄j Moisés do', nij síi uun chij do', rihaan síi cu'naj Caifás yo' a.

<sup>58</sup> Ne gan' gan' canoco' síi cu'naj Pedró xcó Jesucristó, ne cuchi' so' rihaan chingá rej yan̄j síi cu'naj Caifás yo', ne catúj so' rá chingá ne ca'an̄j cayáan so' ga nij se-mozó xrej man rá chingá, quene'en so' daj quirán' Jesucristó a.

<sup>59</sup> Dan me se nana' nij xrej atá suun nocōo doj nana' nij cuese nana' man yuvīi cataj xna'an̄j che'é cacun' tumé Jesucristó a. Me rá nij so' narí' nij so' cacun' rmí' cuta' nij so' xráa Jesucristó ne cavi' Jesucristó, rá nij so' a. Tzaj ne taj vaj a 'ó cacun' tumé Jesucristó a ma'.

<sup>60</sup> Che'é dan nda' se cuchi' uxrá síi ne rihaan nij cuese ca'mii ne nij so', tzaj ne taj vaj cacun' quiri' nij so' cuta' nij so' xráa Jesucristó a ma'. Veé dan, ne cuchi' vj' roj so',

<sup>61</sup> ne cataj roj so':

—Síi nihánj cataj se vaa guun nucuaj so' taucanee so' nuvíi nocōo nuvíi na'vij ní' rihaan Diose, ne rque va'nuj güii cunē' uún so' nuvíi yo', taj so' ei —taj roj so' a.

<sup>62</sup> Gaa ne canicun' xrej atá suun nocōo doj, ne xná'an̄j so' man Jesucristó, cataj so':

—Me che'é ne a'mii so' ga. Daj vaa nana nihánj nana a'mii roj síi nihánj che'é so' ga —taj so', xná'an̄j so' man Jesucristó a.

<sup>63</sup> Tzaj ne dínj táa Jesucristó a. Gaa ne cataj uún xrej atá suun nocōo doj rihaan Jesucristó a:

—Ase vaa nana taj xna'an̄j ma'an̄ Diose rihaan so' ro', dan̄j gaa nana nihánj nana cataj xna'an̄j 'un̄j rihaan so' á. 'Un̄j me síi ya ya ca'ne' suun rihaan so' cataj xna'an̄j so' sese ya ya mé so' ta'níi Diose síi tinanii man yuvīi rihaan sayuun á —taj so' rihaan Jesucristó a.

<sup>64</sup> Gaa ne cataj Jesucristó rihaan so' a:

—Ya vaa nana ca'mii ma'an̄ so' ei. Ne vaj a doj cataj xna'an̄j 'un̄j rihaan so' se vaa ndaa yaj quene'en soj se vaa síi ca'née Diose nicaj yu'un̄j man yuvīi mej, ne quene'en soj se vaa cayáan 'un̄j rej nuva' Diose síi nucuaj ndo'o ei. Ne quene'en uún soj se vaa ca'na' uún 'un̄j rihaan chumīi nihánj, ne quita' 'un̄j xráa ngaa xta' ca'naj adon̄j —taj Jesucristó rihaan xrej atá suun nocōo doj yo' a.

<sup>65</sup> Gaa ne ca'maan rá xrej yo', ne cutzin' xrej yo' sagan' ma'an̄ xrej, ne cataj xrej rihaan tuvi' xrej a:

—Ní'yaj soj vj. Quij uxrá tu'va síi nihánj rihaan Diose nan̄j ei. Se cachiin doj síi ca'na' cataj xna'an̄j rihaan ní' che'é cacun' tumé síi nihánj a ma'. Maan̄ se cuano nihánj me se cuno ma'an̄ soj nana quij ca'mii so' se vaa cayáan ma'an̄ so' rej x'nuj Diose, taj so' ei.

66 Daj qui'yaj ní' man so', rá soj ga —taj xrej, xná'anj xrej man nij tuvi' xrej a.

—Cavi' so' ei —taj nij so' a.

67 Gaa ne quirii talúj nij so' rihaan Jesucristó, ne go' nij so' man Jesucristó a. Ne coxro ta'aj nij so' xruu Jesucristó,

68 ne cataj nij so':

—Sese ya yá ca'néé Diose mán so' tinanii so' man yuvij rihaan sayuun, ne raçuuj Diose mán so' cataj xna'anj so' rihaan núj me sí go' mán so' vij —taj nij so', ca'mii nacoo nij so' man Jesucristó a.

*Nana nihánj taj xna'anj daj qui'yaj sí cu'naj Pedró gaa cataj so' se vaa nuveé sij noco' man Jesucristó me so' a*

69 Veé dan, ne ne Jesucristó ga yo'ó nij so' rá ve', ne ne sí cu'naj Pedró xe' rá chingá a.

Ne cuchi' yo'q mozó chana rihaan so', ne cataj no':

—Ne so' me yo'q sí cachéé ga Jesucristó sí cavii estadó Galilea á —taj mozó chana yo' rihaan Pedró a.

70 —Taj ma'. Ne unó 'unj me taj so' ma' —taj Pedró cuno taran' nij yuvij cayáan ga so' a.

71 Gaa ne curihanj Pedró, ne canicun' so' rej atúj yuvij chingá a.

Gaa ne quene'en yo'ó mozó chana man so', ne ca'mii no' rihaan nij yuvij nicun' rihaan ve' ga Pedró, cataj no':

—Sí nihánj cachéé ga Jesucristó sí cavii chuman' Nazaret asuun asanj —taj chana yo' a.

72 Gaa ne nucuaj ndo'o ca'mii uún Pedró, cataj so':

—Taj ma'. A doj ne ne'enj man snó'o yo' ma' —taj Pedró yo' a.

73 Ne corá nii cuchi' nij sí nicun' ga Pedró rihaan Pedró, ne cataj nij so':

—Ya ya yo'q sí cachéé ga Jesucristó mé so' ei. 'Q se ase vaa nana a'mii nij sí cachéé ga Jesucristó ro', vaa nana a'mii so' chuguaj —taj nij so' rihaan Pedró a.

74 Gaa ne guun che'e Pedró nucuaj doj ca'mii Pedró, cataj Pedró se vaa ca'vee qui'yaj Diose sayuun man so' sese nuveé nana ya me nana a'mii so', ne cataj so':

—Ne ne'enj man snó'o yo' ma' —taj uún Pedró, gaa ne nu' caguáj to'loo a.

75 Gaa ne ninuj rá Pedró ndaa vaa cataj Jesucristó rihaan so' quii se vaa gaa ataa caguaj to'loo, ne va'nuj cataj Pedró se vaa nuveé sij noco' man Jesucristó me ma'an Pedró ma'. Gaa ne curihanj Pedró xe', ne uxrá ta'vee Pedró a.

## 27

*Nana nihánj taj xna'anj se vaa nicaj nii man Jesucristó, ca'anj nii rihaan sí cu'naj Pilato a*

1 Rej ranga' nuchruj raá taran' nij xrej atá suun nocoqo doj do', nij sí uun chij do', daj qui'yaj nij so', ne cavi' Jesucristó a.

2 Gaa ne numij nij so' man so', ne nicaj nij so' man so' ca'anj nij so' rihaan sí nicaj suun gobernador cu'naj Pilato, ne tacuachén nij so' man Jesucristó rihaan so' a.

*Nana nihánj taj xna'anj daj quiran' sí cu'naj Judas gaa cavi' so' a*

3 Dan me se sí cu'naj Judas me sí tacuachén man Jesucristó rihaan nij sí taj ri'yunj man Jesucristó gaa asino yaan, ne xcaj so' cuentá se vaa ya

ya ticavi' nii man Jesucristó ne ma'an so' me sí tumé cacun' se vaa cavi' Jesucristó a. Che'é dan nanó ndo'o rá so', ne me rá so' narque uún so' ico chi' sa'anj platá catzji yo' rihaan nij xrej ata suun nocqo doj do', rihaan nij sí uun chij do' a. Dan me se cuchi' so' rihaan nij so',

<sup>4</sup> ne cataj so':

—Tumé 'unj cacun' se vaa tacuachén 'unj man yo'o sí sa' inanj rihaan soj á —taj sí cu'naj Judas yo' a.

—Nuveé se-cacun' núj me cacun' tumé so' ma'. Xcaj ma'an so' cuentá daj gaa qui'yáa so' ei —taj nij so' rihaan sí cu'naj Judas a.

<sup>5</sup> Gaa ne nicaj so' sa'anj aga' yo', ri'ij uun so' rá nuvií nocqo, ne cavií so' ca'anj so', ne toco' vaj ma'an so' man so', ne cavi' so' a.

<sup>6</sup> Gaa ne naran' nij xrej ata suun nocqo doj man sa'anj aga' yo', ne cataj nij so':

—Ne nó xcúún ní' caraa ní' sa'anj nihánj rá chrúún sa'anj taj rihaan Diose ma'. 'O se sa'anj go' ní' che'é rej cavi' yo'o yuvií me sa'anj nihánj á —taj nij so' a.

<sup>7</sup> Dan me se nuchruij raa nij so' daj qui'yaj nij so', ne nicaj nij so' sa'anj yo', ne quiránj nij so' to'óo sí rii xruj a. Ne guun yo'óo yo' santó cachin' nii man náa guun yuvií 'na' yo'óo chuman' yuvií cavi' chuman' Jerusalén a.

<sup>8</sup> Che'é dan cu'naj yo'óo yo' Yo'óo Ton cuano ei.

<sup>9</sup> Dan me se quisij qui'yaj nij so' nu' se vaa cataj sí cu'naj Jeremías sí nata' se-nanā Diose gaa náa gaa cataj so': “Gaa ne nicaj nij so' ico chi' sa'anj aga' a. Sa'anj yo' me sa'anj no' yo'o so', cataj nij yuvií israelitá a.

<sup>10</sup> Ne nicaj nij so' sa'anj yo' quiránj nij so' to'óo sí rii xruj, ndaa vaa cataj xna'anj sí 'nij ra'a man ní' rihanj nanj adonj”, taj sí cu'naj Jeremías a.

### *Nana nihánj taj xna'anj daj ca'mii sí cu'naj Pilato ga Jesucristó a*

<sup>11</sup> Dan me se canicun' Jesucristó rihaan sí nicaj suun gobernador yo', ne xna'anj sí nicaj suun yo' man Jesucristó, cataj so':

—So' me sí nicaj suun rey uun chij rihaan nij yuvií israelitá na' —taj so', xna'anj so' man Jesucristó a.

—Vej ei —taj Jesucristó rihaan so' a.

<sup>12</sup> Ne xna'anj sí nicaj suun gobernador yo' man Jesucristó che'é cacun' cuta' nij xrej ata suun nocqo doj do', nij sí uun chij do', xráa Jesucristó a. Tzaj ne ne ca'mij Jesucristó a 'ó nana rihaan so' ma'.

<sup>13</sup> Gaa ne xna'anj uún sí nicaj suun yo' man Jesucristó, cataj so':

—Aj cunó so' cataj nij so' se vaa tumé so' cacun' na'. Me che'é ne a'mii so' ga —taj so', xna'anj so' man Jesucristó a.

<sup>14</sup> Tzaj ne yuun che'e ne ca'mij Jesucristó a 'ó nana rihaan so' che'é cacun' cuta' nii xráa so' a. Veé dan, ne caráya'anj xráa sí nicaj suun gobernador yo' che'é yan qui'yaj so' danj a.

### *Nana nihánj taj xna'anj se vaa cataj xna'anj sí cu'naj Pilato se vaa cavi' Jesucristó rihaan rcutze a*

<sup>15</sup> Ne vaa yo'o tucuáán nocq' sí nicaj suun gobernador se vaa rii so' man yo'o sí 'nij taga' 'o' 'o cha'anj pascuá, ne tinavij uun so' cacun' tumé sí urihanj taga' yo' a. Me ma'an 'o' sí 'nij taga' a'mii nij yuvií che'é se vaa quirij so', ne ca'vee qui'yaj so' ndaa vaa taj nij yuvií a.

<sup>16</sup> Ne veé yo' yo' ro', 'nij yo'o sí cu'naj Barrabás taga', ne quene'en cunudanj nij yuvií se vaa tumé ndo'o so' cacun' a.

<sup>17</sup> Dan me se nuu chre' nij yuvij rihaan sí nicaj suun gobernador cu'naj Pilato, ne xná'anj so' man nij yuvij, cataj so':

—Me sí quirij 'unj, rá soj ga. Sí cu'naj Barrabás na'. Ase sí cu'naj Jesucristó xá' —taj so', xná'anj so' man nij yuvij a.

<sup>18</sup> Danj ca'mii so', ne'en so' se vaa maan che'é se guun xcqj ruvaa rá nij xrej atá suun nocqo doj me tacuachén nij xrej man Jesucristó rihaan ma'an so' a.

<sup>19</sup> Ne asij yáán sí cu'naj Pilato yo' rihaan xrúun so' chruun xlá, ne ca'néé nicá so' naná cuchi' rihaan so', taj no':

—Se guun ca'ne' so' cacun' che'é sí sa' yo' ma'. 'O se asij cua'aa me se nanó ndo'o raj che'é yan tucua'nu' snó'o yo' manj adonj —taj nicá sí cu'naj Pilato rihaan so' a.

<sup>20</sup> Tzaj ne cataj xna'anj nij xrej atá suun nocqo doj do', nij sí uun chij do', rihaan nij yuvij se vaa ca'mij nij yuvij che'é sí cu'naj Barrabás rihaan sí cu'naj Pilato, ne cataj nij yuvij se vaa cavi' Jesucristó a. Ne cuchumán rá nij yuvij a.

<sup>21</sup> Gaa ne xná'anj sí nicaj suun gobernador cu'naj Pilato man nij yuvij, cataj so':

—Me ya ya sí quirij, rá soj ga —taj so', xná'anj so' man nij yuvij a.

—Quirij so' man sí cu'naj Barrabás ei —taj nij yuvij rihaan so' a.

<sup>22</sup> —Ne me qui'yáa 'unj ga sí cu'naj Jesucristó, rá soj ga —taj uún sí cu'naj Pilato, xná'anj so' man nij yuvij a.

—Cavi' so' rihaan rcutze, rá núj ei —taj taran' nij yuvij a.

<sup>23</sup> —Tzaj ne me cacun' tumé so' ga —taj sí cu'naj Pilato, xná'anj so' man nij yuvij a.

Tzaj ne doj a caguáj nij yuvij, cataj nij yuvij:

—Cavi' so' rihaan rcutze ei. —Danj inanj caguáj nij yuvij a.

<sup>24</sup> Dan me se quene'en sí cu'naj Pilato se vaa taj se 'yá' quina'maan rá nij yuvij, ne maan se doj a ca'maan rá nij yuvij, ne doj a qui'yaj nij yuvij sayuun a. Che'é dan nicaj so' na, ne na'ya' so' ni'yaj nij yuvij a. Ne cataj so':

—Se tumé 'unj cacun' sese cavi' sí nihánj a ma'. 'O se ma'an soj me sí qui'yaj cavi' so' adonj —taj sí cu'naj Pilato a.

<sup>25</sup> Gaa ne cataj nij yuvij rihaan so' a:

—Veé ma'an núj, ma'an ta'níi núj do', me sí tumé cacun' se vaa cavi' so' ei —taj nij yuvij yo' a.

<sup>26</sup> Gaa ne quirii sí cu'naj Pilato man sí cu'naj Barrabás taga' che'é nij yuvij, ne go' nij tanuu cuartá xráá Jesucristó, qui'yaj sí cu'naj Pilato, ne tacuachén sí cu'naj Pilato man so' rihaan nij tanuu se vaa cachron nij tanuu man so' rihaan rcutze a.

*Nanā nihánj taj xna'anj se vaa ca'nga' nacqo nij tanuu ni'yaj nij tanuu man Jesucristó a*

<sup>27</sup> Gaa ne ca'anj nicaj nij tanuu 'yaj suun rihaan sí nicaj suun gobernador man Jesucristó rá ve' tucua' sí nicaj suun gobernador yo' a. Ne naqui'yaj chre' nij tanuu man taran' nij tuvi' tanuunij so' a.

<sup>28</sup> Gaa ne quirii nij so' sagan' Jesucristó man Jesucristó, ne na'néé nij so' sagan' rey yatzij maree man Jesucristó,

<sup>29</sup> ne qui'yaj nij so' cachriin tanj, ne cuta' nij so' cachriin tanj raq Jesucristó, ne caxrij nij so' yo'q vará ticq uun ston Jesucristó a. Gaa ne canicun' ruj nij tanuu rihaan Jesucristó, ne ca'nga' nacqo nij so' ni'yaj nij so' man Jesucristó, ne cataj nij so':

—Ya ya sĳ nicaj suun rey rii ta'nga' rihaan nij yuviĳ israelitá mé so' ei —taj nij so' tiha' nij so' man Jesucristó a.

<sup>30</sup> Gaa ne quirii talúj nij so' man Jesucristó, ne nacaj nij so' vará noco' ra'a Jesucristó, ne go' nij so' vará raq Jesucristó a.

<sup>31</sup> Sĳ ca'nga' nacoo nij so' ni'yaj nij so' man Jesucristó, gaa ne quirii uún nij so' sagan' rey yatzĳ maree nuu Jesucristó, ne na'née uún nij so' sagan' uún Jesucristó man uún so', gaa ne nicaj nij so' man Jesucristó cavii nij so' ca'anĳ nij so' yan cachron nij so' man Jesucristó rihaan rcutze a.

*Nana nihánĳ taj xna'anĳ daĳ qui'yaj nij yuviĳ gaa cachrón nij yuviĳ man Jesucristó rihaan rcutze a*

<sup>32</sup> Dan me se cavii nij so', ne nari' nij so' man yo'o sí ne chuman' Cirene, ne so' me sí cu'naj Simón a. Veé dan, ne qui'yaj uxrá nij tanuu fuerzá man sí cu'naj Simón yo' cata so' rcutze cano Jesucristó rihaan a.

<sup>33</sup> Gaa ne cuchi' nij so' tacaan cu'naj Gólgota, ne Gólgota ro', me rej cu'naj Tacaan Cúu Yave Xngá a.

<sup>34</sup> Gaa ne rque nij tanuu doj na vinó nahej ga na e' man Jesucristó co'o so' a. Ne doj tzin' tiguĳ daa Jesucristó, ne ne ca'vej rá so' co'o so' ma'.

<sup>35</sup> Veé dan, ne cachrón nij tanuu man Jesucristó rihaan rcutze, ne tico tixaj nij so' che'é sagan' Jesucristó,

<sup>36</sup> gaa ne ca'anĳ cane nij so' rihaan yo'óo, ne tumé nij so' man Jesucristó a.

<sup>37</sup> Ne cachrón nij tanuu yo'o rcuchra' raq rcutze, ne no letrá rihaan rcuchra' yo', ne taj xna'anĳ letrá yo' me che'é cavi' Jesucristó, ne: “Sí nihánĳ me sí cu'naj Jesucristó, ne sí nicaj suun rey uun chĳ rihaan nij yuviĳ israelitá me so' a”, taj letrá yo' a.

<sup>38</sup> Gaa ne cachrón nij tanuu man yavĳ snó'o rihaan yavĳ rcutze yo', ne yavĳ roĳ so' me sí ituu a. Dan me se nicun' yo'o so' rej nuva' Jesucristó, ne nicun' yo'ó so' rej nichrun Jesucristó a.

<sup>39</sup> Gaa ne cachén yuviĳ rej nicun' Jesucristó, ne ca'mii chi'ĳi ndo'o nij so' ni'yaj nij so' man Jesucristó a. Dan me se tucunó nij yuviĳ raq nij yuviĳ,

<sup>40</sup> cataĳ nij yuviĳ:

—Tacuane so' man nuví noco, ne rque va'nuj güi cune' so' yo'ó nuví noco, rá so' na'. Dan me se sese ya ya ta'nĳ Diose mé so', ne tĳnani so' mán so' rihaan rcutze, ne nanĳ so' rihaan yo'óo yaj vĳ —taj nij yuviĳ rihaan Jesucristó a.

<sup>41</sup> Ne ase vaa qui'yaj nij yuviĳ yo' ro', danĳ qui'yaj uún nij xrej ata suun noco doj do', nij sí naqui'yaj cuu se-tucuanĳ Moisés do', nij sí uun chĳ do', ca'mii chi'ĳi nij so', cataĳ nij so':

<sup>42</sup> —Tĳnani sí nihánĳ man yo'ó yuviĳ rihaan sayuun, rá so', tzaj ne ne guun nucuaj so' tĳnani so' man ma'an so' rihaan rcutze danĳ. Sese ya ya sĳ nicaj suun rey uun chĳ rihaan ní' sĳ israelitá me so', ne nanĳ so' cuano rihaan yo'óo, ne cuchuman rá ní' ni'yaj ní' man so' ei.

<sup>43</sup> Dan me se nucuaĳ rá so' man Diose se vaa cavii sa' so', qui'yaj Diose, rá so' a. Ca'vee tĳnani Diose man so' cuano, sese sĳ 'eĳ rá Diose man me so' á. 'Q se ma'an so' taj se vaa ta'nĳ Diose me ma'an so' adonĳ —taj nij so', chi'ĳi ndo'o ca'mii nij so' ni'yaj nij so' man Jesucristó a.

<sup>44</sup> Ne ase vaa ca'mii nij so' ro', danĳ ca'mii uún roĳ sí ituu noco' rihaan rcutze rej x'nuj Jesucristó, ca'mii roĳ so' nana nij rihaan Jesucristó a.

*Nana nihánĳ taj xna'anĳ daĳ guun gaa cavi' Jesucristó a*



<sup>45</sup> Veé dan, ne caxuj, ne yuun che'e guun rmi' rihaan chumij, ne yo'o guun rmi' chumij ndaa quisij aga' va'nuj rej anoco' güii a.

<sup>46</sup> Veé dan, ne quisij aga' va'nuj, gaa ne nucuaj ndo'o caguáj Jesucristó, cataj so':

—Elí, Elí, lama sabactani —taj so', caguáj so' xna'ánj a'mii ma'an so', ne nana caguáj so' taj: “Diose noco' 'unj mé so' á. Me che'é tanáj yuun so' mán 'unj ga”, taj nana caguáj Jesucristó a.

<sup>47</sup> Ne cuno ta'aj nij sí nicun' rej x'nuj Jesucristó nana caguáj so', tzaj ne ne cunō nij so' me taj Jesucristó ma'. Maan se:

—Nacúún sí nihánj man sí cu'naj Elías tadonj —taj nij so' rihaan tuvi' nij so' a.

<sup>48</sup> Gaa ne nu' ra'yanj cunánj yo'o sí nicun' rej x'nuj Jesucristó, ne nicaj so' yataan esponja, ne caraa so' na vinó yuū rque yataan, ne cuta' so' raā yo'o vará, ne ru'maan so' yataan tu'va Jesucristó, ne co'o Jesucristó na yuū yo', qui'yaj so' a.

<sup>49</sup> Tzaj ne ca'mii yo'ó nij yuvij, cataj nij so':

—Dínj qui'yáá so' á. Quene'en ní sese ca'na' sí cu'naj Elías tinanii sí cu'naj Elías man so' rihaan rcutzē ei —taj nij yuvij yo' a.

<sup>50</sup> Gaa ne sca' caguáj uún Jesucristó, ne cavi' so' a.

<sup>51</sup> Veé dan, ne quisin' yatzíj mantá cortiná noco' rá nuví nocōo ndaa rej raā, ne 'o quiniñ ca'anj ndaa tacóo yo' a. Dan me se cachén yuún, ne quixra' ta'aj nij yuvej,

<sup>52</sup> ne x'núj rej cachin' nii man nij sí cavi', ne cunuu i'na' uún que'ee nij sí sa' cavi' asij rque a.

<sup>53</sup> Ne gaa quisij orá cunuu i'na' uún ma'an Jesucristó, ne curihanj nij sí cunuu i'na' uún yo', ne catúj nij so' chuman' guee chuman' Jerusalén, ne quene'en uxrá yuvij man nij so' a.

<sup>54</sup> Veé dan, ne nicun' tanuu capitán nicun' yo'ó nij tanuu nicun' cutumé man Jesucristó a. Ne quene'en nij so' cachén yuún, ne quene'en nij so' nu' se vaa guun, ne cuchu'vi' ndo'o nij so', ne ndaa dan asuun gaa xcaxaj nij so' cuentá se vaa ya uxrá ta'nij Diōse me Jesucristó, ne dan me se cataj nij so':

—Ya ta'nij Diōse me sí nihánj tadonj —taj nij so' a.

<sup>55</sup> Ne gan' doj nicun' que'ee chana, ni'yaj yuun nij chana man Jesucristó a. Chana cuno se-nana Jesucristó asij cavií Jesucristó estadó Galilea me nij chana yo', ne qui'yaj suun nij chana yo' che'é Jesucristó a.

<sup>56</sup> Yo'o no' me chana cu'naj Mariá Magdalena, ne yo'ó no' me chana cu'naj Mariá nii sí cu'naj Jacobo ga sí cu'naj José a. Ne yo'ó no' me nii roj ta'ní sí cu'naj Zebedeo a.

*Nana nihánj taj xna'anj se vaa cachin' nii man Jesucristó rque yu'uj yuvej a*

<sup>57</sup> Ne rej ata' güii ca'na' yo'o sí ru'vee sí ne chuman' Arimatea a. José cu'naj so', ne so' me sí tucu'yón se-nana Jesucristó a.

<sup>58</sup> Dan me se ca'anj so' rihaan sí cu'naj Pilato, ne cachín ni'yaj so' rihaan sí cu'naj Pilato se vaa ca'vej sí cu'naj Pilato cachin' so' man Jesucristó a. Ne sí cu'naj Pilato ro', cataj se vaa ca'vee qui'yaj so' danj a.

<sup>59</sup> Ne nicaj sí cu'naj José man Jesucristó, ne nacutáj so' yatzíj mantá naruvii xraá Jesucristó,

<sup>60</sup> ne vaa yu'uj yuvej rihaan so', rej achin' nii man nij sí cavi', tzaj ne yu'uj naca me yo' a. Ma'an so' me sí qui'yaj gáán nii yu'uj yo', ne taj vaj xngangá

naj rque yu'uj ma'. Ne caxrj so' man Jesucristó rque yu'uj yo', ne caráan so' yuvej xij tu'va yu'uj yo' a.

<sup>61</sup> Ne cayáan chana cu'naj Mariá Magdalena cayáan yo'ó chana cu'naj Mariá cayáan tu'va yu'uj yo' a.

*Nana nihánj taj xna'anj se vaa tumé uxrá nii man yu'uj nuu Jesucristó a*

<sup>62</sup> Veé dan, ne taxrej, ne ndaa quisj qui'yaj chuvii nij yuvii israelitá che'é güii naraan rá nij so', ne cunuu chre' nij xrej atá suun nocoo doj do', nij sí fariseo do', ne ca'anj nij so' rihaan sí cu'naj Pilato,

<sup>63</sup> ne cataj nij so':

—Nuu rá núj daj cataj sí tiha' yu'unj yo' gaa gaa i'na' so', señor. Dan me se cataj so' se vaa cachén va'núj güii, gaa ne cunuu i'na' uún so', cataj so' adonj.

<sup>64</sup> Che'é dan ca'ne' so' suun rihaan tanuu se vaa tumé tanuu man yu'uj naj so' ndaa se quisj va'núj güii yo' ruguanj. Sese se qui'yaj ní danj, ne ca'na' nij sí tucu'yón se-nana so', ne quirii nij so' man so', ne cataj nij so' rihaan nij yuvii se vaa cunuu i'na' uún so' nanj adonj. Asa' quisj, gaa ne doj a tiha' yu'unj uún nij so' man nij yuvii nanj adonj —taj nij so' rihaan sí cu'naj Pilato a.

<sup>65</sup> Ne cataj sí cu'naj Pilato rihaan nij so' a:

—Vaa tanuu rihaan soj ei. Njcaj soj man tanuu ca'anj soj cutumé soj man yu'uj yo' á. Ne'en ma'an soj daj qui'yaj soj á —taj Pilato rihaan nij so' a.

<sup>66</sup> Gaa ne cavii nij so' ca'anj nij so' tumé nij so' man yu'uj yuvej yo' a. Dan me se ca'ne' nij so' suun rihaan tanuu cutumé tanuu yu'uj, ne cachrón nij so' yánj nichraj tu'va yuvej caráan tu'va yu'uj yo' a.

## 28

*Nana nihánj taj xna'anj se vaa cunuu i'na' uún Jesucristó a*

<sup>1</sup> Dan me se ca'anj güii cuetan' güii naránj rá nij yuvii israelitá, ne na'yaan cotungó me yo', ne daj doj quisj güii a. Ne ca'na' chana cu'naj Mariá Magdalena do', yo'ó chana cu'naj Mariá do', quene'en roj chana yu'uj catúj Jesucristó a.

<sup>2</sup> Veé dan, ne cachén uxrá yuún, ne cavii yo'ó se-mozó sí 'nij ra'a man ní rej xtá', ca'na' so', nanij so' tu'va yu'uj yo', gaa ne quirii yanij so' yuvej aráan tu'va yu'uj yo', ne ca'anj cané so' xráa yuvej yo' a.

<sup>3</sup> Daj se uun rá roj no' ne'en roj no' gaa raan ro', danj guun rá roj no' gaa curuvi' so' a. Ne daj se uun rá roj no' ne'en roj no' yu've' catzj ndo'o ro', danj guun rá roj no' ne'en roj no' sagan' so' a.

<sup>4</sup> Gaa ne cuchu'vi' ndo'o nij tanuu man tumé tu'va yu'uj yo', ne quiri'lj ndo'o man nij so' a. Dan me se ase vaa mán sí cavi' vaa mán nij so' rihaan yo'ó a.

<sup>5</sup> Veé dan, ne cuchi' roj chana yo' rihaan se-mozó Diose, ne cataj se-mozó Diose rihaan roj no' a:

—Se cuchu'vi' roj soj ma'. 'Q se aj ne'en 'unj se vaa nano' roj soj man Jesucristó sí cavi' rihaan rcutze adonj.

<sup>6</sup> Taj vaj so' naj nihánj a ma'. 'Q se cunuu i'na' uún so', ndaa vaa cataj xna'anj so' rihaan soj á. Catuu roj soj ni'yaj roj soj rej quinaj so' á.

<sup>7</sup> Gaa ne ra'yanj ca'anj roj soj, cataj xna'anj roj soj rihaan nij sí tucu'yón se-nana so' se vaa cunuu i'na' uún so' á. Veé dan me se quitaj yaan so' rihaan soj ca'anj so' estadó Galilea, ne ca'anj soj ndaa yo', ne quene'en soj man so'

á. *Danj gaa cataj xna'anj soj rihaan nij sí tucu'yón se-nana so' á. Veé dan me quisij nana cataj xna'anj 'unj rihaan soj a —taj se-mozó Diose rihaan roj chana yo' a.*

<sup>8</sup> *Veé dan, ne curihanj roj chana ca'anj roj no' a. Veé roj no' cuchu'vi, ne veé roj no' guun niha' rá uún a. Veé dan me se cunanj ndo'o roj no', cataj xna'anj roj no' rihaan nij sí tucu'yón se-nana Jesucristó nuj' se vaa quene'en roj no' do', nu' nana cataj xna'anj se-mozó Diose rihaan roj no' do' a.*

<sup>9</sup> *Ne maan orá dan nari' tuvi' ma'an Jesucristó ga roj chana yo', ne cataj so': —Gaa niha' nimán roj soj á —taj Jesucristó rihaan roj no' a.*

*Gaa ne cuchi' roj chana yo' rihaan Jesucristó, ne ca'anj canicun' ruj roj no' rihaan so', ne quita'aa roj no' tacóo Jesucristó, ne na'vij roj no' rihaan Jesucristó a.*

<sup>10</sup> *Gaa ne cataj Jesucristó rihaan roj chana a:*

—*Se cuchu'vi' roj soj ma'. Maan se ca'anj roj soj cataj xna'anj roj soj rihaan nij tinúu 'unj se vaa cavii nij so' ca'anj nij so' estadó Galilea, ne ndaa yo' quene'en nij so' manj á —taj Jesucristó rihaan roj chana yo' a.*

*Nana nihánj taj xna'anj che'é nana cataj xna'anj nij tanuu rihaan nij xrej atá suun nocoo doj a*

<sup>11</sup> *Ne gaa quisij ca'anj roj chana yo', ne dan me se cavii ta'aj nij tanuu man tu'va yu'uj yo' rque chuman', ne cataj xna'anj nij tanuu rihaan nij xrej atá suun nocoo doj nu' se vaa guun a.*

<sup>12</sup> *Ne cunuu chre' nij xrej atá suun nocoo doj ga nij sí uun chij, ne nuchruj raá nij so' daj qui'yaj nij so' a. Gaa ne go' uxrá nij so' sa'anj rihaan nij tanuu yo',*

<sup>13</sup> *ne cataj nij so':*

—*Cataj soj se vaa rej nij cotoj soj, ne nij sí tucu'yón se-nana so' ro', ca'na' quiri man so' a. Danj cataj soj á.*

<sup>14</sup> *Ne sese cuchi' nana yo' rihaan sí nicaj suun gobernador, ne sese me rá so' qui'yaj so' sayuun man soj, ne ma'an núj caráán ra'a sayuun xráá soj á —taj nij so' rihaan nij tanuu a.*

<sup>15</sup> *Dan me se guun ya rá nij tanuu, ne quita'aa nij so' sa'anj yo', ne qui'yaj nij so' nu' se vaa cataj xna'anj nij xrej atá suun nocoo doj do', nij sí uun chij do', rihaan nij so' a. Ne ase vaa nana ca'mii nij tanuu rihaan yuvi ro', ta'nga' danj vaa nana ticha'nuu nij yuvi israelitá rihaan yuvi ndaa yo' yaj nanj adonj.*

*Nana nihánj taj xna'anj che'é suun ca'ne' Jesucristó rihaan nij sí tucu'yón se-nana so' a*

<sup>16</sup> *Gaa ne ca'anj xaan nij sí tucu'yón se-nana Jesucristó estadó Galilea, ne cavii nij so' raá 'o quij a. Danj qui'yaj nij so', ése cuno nij so' nana cataj xna'anj Jesucristó rihaan nij so' gaa rque a.*

<sup>17</sup> *Gaa ne quene'en nij so' man Jesucristó, ne na'vij nij so' rihaan so', tzaj ne ne guun ya rá ta'aj nij so' se vaa ya ya Jesucristó me so' a.*

<sup>18</sup> *Gaa ne cuchi' Jesucristó rihaan nij so', ne cataj so' rihaan nij so':*

—*Yaj me se 'unj me sí uun chij xta' do', nu' rihaan yo'óo do', qui'yaj Diose ei.*

<sup>19</sup> *Che'é dan ca'anj soj tucu'yón soj se-nanaj rihaan nij yuvi man 'o 'o chuman' naj rihaan chumi, ne canoco' nij yuvi manj, qui'yaj soj, ne cutá' ne soj man nij so', ne cata' tu'va soj se-chuvi Réé 'unj Diose do', se-chuvi 'unj ta'nij Diose do', se-chuvi Nimán Diose do' á.*

<sup>20</sup> Ne tucu'yón soj rihaan nij yuvī se vaa cunō nij yuvī nu' nana cataj xna'anj 'un̄j rihaan soj á. Veé dan yuun che'e cachee 'un̄j ga soj nu' güii cachee soj rihaan chumī nihánj, ndaa se quinavij nu' chumī nihánj nanj adonj —taj Jesucristó rihaan nij so' a.

## Nihánj me se-nānā Jesucristó nana sa' cachrón síí cu'naj Marcos rihaan yanj a

*Nana nihánj taj xna'anj che'é síí cu'naj Juan síí cuta' ne man yuvii a*

<sup>1</sup> Nānj vaa guun che'e se-nānā Jesucristó nana sa' a.

<sup>2</sup> Dan me se síí cu'naj Isaías síí nata' se-nānā Diose gaa naá ro', cachrón so' nana nihánj rihaan yanj, ne: “Vaa síí ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvii ve'é ca'mii nij yuvii ga so', qui'yaj so' a”, me se-nānā Diose nana cachrón síí cu'naj Isaías rihaan yanj a.

<sup>3</sup> Ne yo'ó nana cachrón uún so' me nana nihánj, ne: “Nucuj ndo'o ca'mii natáj 'o so' rej tacaan, ne cataj so' se vaa nuchran' nimán yuvii, ne ve'é ca'mii nij yuvii ga síí 'nij ra'a man ní' asá' ca'na' so' adonj”, taj síí cu'naj Isaías gaa naá, ne ase vaa cataj so' ro', ta'nga' danj guun adonj.

<sup>4</sup> Dan me se cavii síí cu'naj Juan síí cuta' ne man yuvii, ne vaj so' rej tacaan, ne ca'mii natáj so' rihaan nij yuvii, cataj so' se vaa nuchran' nimán nij yuvii, ne tanáj nij yuvii chrej chí'ii, ne ca'vee tinavij Diose cacun' tumé nij yuvii, taj Juan adonj.

<sup>5</sup> Ne dan me se curihanj ndo'o nij yuvii man estadó Judea do', man ma'an chuman' Jerusalén do', ca'na' nij yuvii rihaan síí cu'naj Juan, ne cata' ne nij yuvii rá chráá cu'naj Jordán, qui'yaj Juan a. Dan me se nata' ya' nij yuvii che'é cacun' tumé nij yuvii, gaa ne cata' ne nij yuvii adonj.

<sup>6</sup> Dan me se síí cu'naj Juan me se cachij taj xráá xcuu camelló guun yatzíj nuu so', ne 'nij catuun so' 'o nuj, ne chá so' rquíí chá so' catzi' xtaan man quií chá so' a.

<sup>7</sup> Ne ca'mii natáj so', ne cataj so':

—Vaa 'o síí sca' doj rihanj, ne so' me síí ca'na' rej rihaan ní', ne 'unj nihánj me se ne nó xcúnj nachej nuj correa' 'nij tacanj so' ma'.

<sup>8</sup> Ne síí uta' ne na uun man soj mej, tzaj ne ca'na' so', ne ca'na' Nimán Diose rihaan soj, qui'yaj so' adonj —taj síí cu'naj Juan rihaan nij yuvii a.

*Nana nihánj taj xna'anj se vaa cuta' ne Juan man Jesucristó a*

<sup>9</sup> Ne güii yo' ta' asuun me se cavii Jesucristó chuman' Nazaret chuman' naj estadó Galilea, ne cata' ne so' rá chráá cu'naj Jordán, qui'yaj síí cu'naj Juan a.

<sup>10</sup> Nu' curihanj uún Jesucristó rque na, ne nu' quene'en so' se vaa naxra' rej xta', ne quene'en so' se vaa nanij Nimán Diose raá ma'an so', ne ase vaa cha'aan ro', vaa Nimán Diose, curuvi' yo' a.

<sup>11</sup> Gaa ne rej xta' ca'mii Diose rihaan Jesucristó, ne cuno nij síí nicun' ga Jesucristó nana ca'mii Diose, ne dan me se cataj Diose a:

—Ta'níí 'unj síí 'ee ndo'o raj man mé so', ne niha' ndo'o raj ni'yaj 'unj mán so' adonj —taj nana cavii rej xta' ca'mii Diose rihaan Jesucristó a.

*Nana nihánj taj xna'anj se vaa guun ndo'o rá síí chree tihq' yu'unj síí chree man Jesucristó a*

<sup>12</sup> Ne dan me se ca'anj ndo'o Jesucristó rej tacaan, qui'yaj Nimán Diose a.

13 Ne vj chihaa güii vaj so' rej tacaan, ne guun rá síi chree tiha' yu'unj so' man Jesucristó, ne vaj Jesucristó rej man xcuu yuvaa, ne rque nij se-mozó Diose me ma'an se cachiin rihaan Jesucristó a.

*Nana nihánj taj xna'anj se vaa ca'anj Jesucristó estadó cu'naj Galilea a*

14 Dan me se gaa quisij quita'aa nij tanuu man síi cu'naj Juan, ne ca'anj Jesucristó estadó cu'naj Galilea,

15 ne ca'mii natáj so' se-nana Diose nana sa', ne cataj so' se vaa nichrun' quisij güii ca'na' Diose guun chij Diose rihaan chumii nihánj, ne:

—Che'é dan nuchran' nimán soj, ne cuchuman rá soj cunó soj se-nanaj nana sa' á —taj so' rihaan nij yuvií a.

*Nana nihánj taj xna'anj se vaa cataj xna'anj Jesucristó rihaan ca'anj síi rii xcuaj se vaa canoco' nij so' man Jesucristó a*

16 'O güii cachén Jesucristó tu'va na lacuaná cu'naj na Galilea, ne quene'en so' síi cu'naj Simón ga tinúú Simón síi cu'naj Andrés, ne dan me se nicun' roj so' tu'va na lacuaná, ne tiguú roj so' nanj rque na, ne dan me se síi rii xcuaj me roj so' a.

17 Gaa ne cataj Jesucristó rihaan roj so' a:

—Canoco' roj soj manj á. 'O se síi naqui'yaj chre' xcuaj me roj soj, tzaj ne rej rihaan ní' me se guun roj soj síi naqui'yaj chre' yuvií, qui'yáj, ne canoco' nij yuvií manj a —taj Jesucristó rihaan roj tinuj roj so' a.

18 Ne nu' canicaj roj so' tanáj roj so' xnánj roj so', ne canoco' roj so' man Jesucristó, ca'anj roj so' nanj adonj.

19 Veé dan, ne cachéé nij so' doj, gaa ne quene'en Jesucristó man síi cu'naj Jacobo ta'ní síi cu'naj Zebedeo do', man tinúú Jacobo síi cu'naj Juan do' a. Dan me se nuu roj so' rque rihoo chéé rihaan na, ne naqui'yaj sa' roj so' nanj rii xcuaj, ne canacúún Jesucristó man roj tinuj roj so' canoco' roj so' man Jesucristó a.

20 Veé dan, ne canicaj roj so', tanáj roj so' man rej roj so' síi cu'naj Zebedeo rá rihoo ga nij se-mozó so', gaa ne cavii roj so' canoco' roj so' man Jesucristó, ca'anj roj so' nanj adonj.

*Nana nihánj taj xna'anj se vaa quirii Jesucristó man yo' o nana chree nimán 'o snó'o a*

21 Dan me se catúj nij so' chuman' Capernaum, ne daj a güii naránj rá nij yuvií israelitá ca'anj Jesucristó ve' tucu'yón nij so' se-tucuanj Moisés, ne tucu'yón so' se-nana Diose man nij yuvií a.

22 Ne caráya'anj nij yuvií se-nana so', che'é se cuu doj vaa se-nana so' ga se-nana nij síi naqui'yaj cuu se-tucuanj Moisés a. 'O se ase vaa a'mii 'o síi uun chij ndo'o ro', danj ca'mii so' rihaan nij yuvií a.

23 Ne dan me se 'o güii naránj rá nij yuvií israelitá, ne yáán 'o síi nuu nana chree nimán rá ve' yo', ne caguá so',

24 ne cataj so' se vaa:

—Me che'é ra'yunj so' man núj, ga Jesús Nazareno'. 'Na' so' tarí' so' man núj na'. Ne'enj mán so' se vaa síi guée cavii rihaan Diose mé so' adonj —taj síi nuu nana chree nimán rihaan Jesucristó a.

25 Gaa ne canicaj Jesucristó, caxrj yuvaa Jesucristó man nana chree nuu nimán snó'o yo', ne cataj so':

—Dínj tu'vá so', curihanj so' cuaj nimán síi nihánj á —taj Jesucristó rihaan nana chree yo' a.

<sup>26</sup> Ndaa quisnúú ma'an snó'o yo', qui'yaj nana chree, ne nucuaj ndo'o caguáj nana chree, ne curihanj nana chree nimán snó'o yo', ne nahuun sa' so' a.

<sup>27</sup> Gaa ne ca'anj uxrá rá nij yuvij, ne xná'anj nij yuvij man tuvi' nij yuvij, cataj nij yuvij:

—Asa' ca'vee qui'yaj so' danj ga. Tucuáán naca me nihánj chuguanj. 'O se guun chij ndo'o síi nihánj, ne ndaa rihaan nij nana chree taj xna'anj síi nihánj daj qui'yaj nij so', ne uno nij nana chree yo' rihaan so' ga —taj nij yuvij rihaan tuvi' nij yuvij a.

<sup>28</sup> Gaa ne cuchi' nana che'é Jesucristó rihaan cunudanj nij yuvij man nichrun' estadó Galilea yo' a.

*Nana nihánj taj xna'anj se vaa nahuun sa' nii chej Simón Pedró, qui'yaj Jesucristó a*

<sup>29</sup> Dan me se curihanj nij tuvi' Jesucristó rá ve' tucu'yón nii se-tucuanj Moisés, gaa ne catúj taran' nij so' rá ve' tucuá Simón ga Andrés, ne 'na' Juan ga Jacobo ga nij so' a.

<sup>30</sup> Dan me se nii chej Simón ro', ran' no' chi'ij naca yuvaa, ne naj no', ne cataj xna'anj yo'q nij so' rihaan Jesucristó se vaa ran' uxrá no' a.

<sup>31</sup> Gaa ne cuchi' Jesucristó rej naj no', ne canó so' ra'a no', ne naxcaj so' man no', ne naxagaa no', ne nu' x'néj chi'ij xráa no', qui'yaj Jesucristó a. Ne veé man orá dan qui'yaj chujij no' cha nij so' nanj adonj.

*Nana nihánj taj xna'anj se vaa nahuun que'ee síi ran', qui'yaj Jesucristó a*

<sup>32</sup> Dan me se cata' güii, ne ti'nuu, ne nicaj nij yuvij cunudanj tuvi' nij yuvij síi ran' do', síi nuu nana chree nimán do', vaj nij yuvij rej ne Jesucristó a.

<sup>33</sup> Ne dan me se que'ee nij yuvij man chuman' Capernaum yo' nuu chre' rihaan ta'yaa ve' ne Jesucristó a.

<sup>34</sup> Gaa ne nahuun que'ee nij síi ran' daj a chi'ij, qui'yaj Jesucristó, ne quirii ndo'o so' nana chree nimán nij yuvij, ne ca'ne' so' suun rihaan nij nana chree se vaa se ca'mii nij nana chree a doj nana a. Dan me se ne ca'vej rá Jesucristó cataj nij nana chree se vaa cunuu yaan nij nana chree man Jesucristó a.

*Nana nihánj taj xna'anj se vaa ca'anj Jesucristó nu' nij ve' tucu'yón nij yuvij israelitá se-tucuanj Moisés, ca'mii natáj so' a*

<sup>35</sup> Gaa ne rej taxrej naxagaa Jesucristó, ne cavii so' chuman' Capernaum, ne ca'anj so' rej tacaan cachinj ni'yaj so' rihaan Diósé a.

<sup>36</sup> Gaa ne canoco' nij tuvij' Simón man so',

<sup>37</sup> gaa ne nari' nij so' man so', ne cataj nij so' rihaan so' se vaa:

—Cunudanj nij yuvij nano' mán so' á —taj nij tuvij' Simón rihaan Jesucristó a.

<sup>38</sup> Gaa ne cataj Jesucristó rihaan nij so':

—Cavij ní' rej nihánj, ca'anj ní' yo'ó nij chuman' naj nichrun', ne ca'mij natáj 'unj rihaan nij yuvij man yo'ó nij chuman' uún á. 'O se che'é dan ca'ná' 'unj adonj —taj Jesucristó rihaan nij so' a.

<sup>39</sup> Gaa ne ca'anj so' nu' nij chuman' naj estadó Galilea, ne ca'mii natáj so' rá ve' tucu'yón nij síi man nij chuman' yo' se-tucuanj Moisés, ne quirii so' man nij nana chree nuu nimán yuvij a.

*Nana nihánj taj xna'anj se vaa nahuun sa' 'o síi ran' luj ri'yuj, qui'yaj Jesucristó a*

<sup>40</sup> Gaa ne ca'na' 'o sí ran' luj ri'yuj, ne canicun' ruj so' rihaan Jesucristó, ne cachín ni'yaj so' rihaan Jesucristó, ne cataj so' se vaa:

—Sese me rá so', ne ca'vee ca'nee so' chi'ii xrá á —taj sí ran' luj ri'yuj yo' rihaan Jesucristó a.

<sup>41</sup> Gaa ne cunuu 'ee rá Jesucristó man so', ne cuta' Jesucristó ra'a Jesucristó raá so', ne cataj Jesucristó:

—Me raj qui'yáj danj ei. Nahuún so' qui'yáj adonj —taj Jesucristó rihaan so' a.

<sup>42</sup> Nu' danj cataj Jesucristó, ne nu' quinavij luj xráá sí ran', ne nahuun sa' so' cuáj a.

<sup>43</sup> Gaa ne ca'mii yuvaá Jesucristó ga so', ne quirii Jesucristó man so' rá ve',

<sup>44</sup> ne cataj Jesucristó rihaan so':

—Se guun cataj xna'anj so' a doj nana rihaan a 'ó yuvii ma'. Maan se ca'anj so' rihaan xrej, ne tiháan so' mán so' rihaan xrej se vaa nahuún so', qui'yaj Diose, ne rque so' rihaan Diose ndaa vaa cataj sí cu'naj Moisés gaa naá ndaa vaa nō xcúun so' rque so' rihaan Diose che'é yan nahuún so' adonj. Gaa ne xcaj nij xrej cuentá se vaa nahuún so' qui'yáj adonj —taj Jesucristó rihaan sí nahuun yo' a.

<sup>45</sup> Tzaj ne curihanj sí nahuun yo', ne guun che'e so' ca'mii natáj ndo'o so', ndaa síj, gaa ne cha'nuu ndo'o nana se vaa nahuun so' qui'yaj Jesucristó a. Ne dan me se ne ca'vee a doj catuu ranga' Jesucristó rá nij chuman', qui'yaj nij nana yo', ne inanj rej tacaan vaj so', ne canó nij yuvii cuchí' rej vaj so' a.

## 2

*Nana nihánj taj xna'anj se vaa nahuun sa' 'o sí na'vee cachee, qui'yaj Jesucristó a*

<sup>1</sup> Dan me se cachén doj güii, gaa ne catúy uún Jesucristó chuman' Capernaum, gaa ne cuchí' nana rihaan nij yuvii se vaa yanj so' rá ve' a.

<sup>2</sup> Gaa ne cunuu chre' que'ee ndo'o nij yuvii rihaan ve' yo', ne ndaa raan ma'an mán nij yuvii, ne ndaa rihaan ta'yaa ve' yo' taj rej quisij doj cumán nij yuvii a. Ne nata' Jesucristó se-nana so' rihaan nij yuvii a.

<sup>3</sup> Ne dan me se ca'na' doj yuvii uún, ne nij so' me se nicaj nij so' yo'o tuvi' nij so' sí na'vee cachee, ne táa chiha ca'anj nij so' man sí na'vee cachee yo', ne dan me se guun rá nij so' cuchí' sí na'vee cachee yo' rihaan Jesucristó a.

<sup>4</sup> Tzaj ne ne ca'vee cuchí' sí na'vee cachee yo' rihaan Jesucristó, qui'yaj nij so' a ma'. 'O se man uxrá yuvii, ne ne ca'vee cachén nij so' a. Che'é dan cavii nij so' xráá ve', ne caya' nij so' yu'uj xráá ve' rej nicun' Jesucristó rá ve', ne tananij nij so' yuvéé táa sí na'vee cachee yo' rihaan Jesucristó a.

<sup>5</sup> Dan me se gaa quene'en Jesucristó se vaa cuchumán uxrá rá nij tuvi' sí na'vee cachee yo' se vaa ca'vee nahuun so' qui'yaj Jesucristó, gaa ne cataj so' rihaan sí na'vee cachee yo':

—Navij cacun' xráá so', nanj tinuj —taj Jesucristó rihaan so' a.

<sup>6</sup> Ne ne doj sí naqui'yaj cuu se-tucuanj Moisés rá ve' yo' ga Jesucristó, ne nuchruj raá nij so', ne guun rá nij so':

<sup>7</sup> “Me che'é a'mii sí nihánj danj ga. 'O se a'mii so' nana vaa nij rihaan Diose asan. Qrún' Diose guun nucuaj tinavij cacun' xráá yuvii nanj á”, guun rá nij sí naqui'yaj cuu se-tucuanj Moisés yo' a.

<sup>8</sup> Dan me se quene'en ma'an Jesucristó se vaa guun rá nij so' danj, ne che'é dan cataj so':



—Me che'é nuchruj raḡ soj nanḡ nanj ga.

<sup>9</sup> Tu'va rma'an 'uñj se vaa navij cacun' xraá sí nihánj, rá soj a na'. Ca'vee cataj uñ n' navij cacun' xraá sí nihánj na'. Ase ca'vee doj cataj n' naḡaxaa so', ne nacue so' tuvée so', ne cachee so' cuaj, cataj n' xa'.

<sup>10</sup> Dan me se me rá 'uñj xcax soj cuentá se vaa sí ca'née Diose n'icaj yu'unj man yuvi me ne no xcuún 'uñj t'naví 'uñj cacun' xraá nij yuvi man rihaan chumi nihánj adonj —taj Jesucristó rihaan nij so' a.

Dan me se cataj Jesucristó rihaan sí na'vee cachee a:

<sup>11</sup> —Rihaan so' sij na'vee cachee taj 'uñj, ne nacue so' tuvée so', ne nan' so' tucua so' á —taj Jesucristó rihaan sí naj rihaan yuvé yo' a.

<sup>12</sup> Gaa ne naxagaa sí na'vee cachee yo', ne nacué so' tuvée so', gaa ne curihanj so' rá ve', ni'yaj taran' nij yuvi man rá ve' a. Ndaa sij, gaa ne ca'anj rá nij yuvi, ne cataj nij yuvi se vaa sa' uxrá qui'yaj Diose, ne:

—Daj chihaa m'j ne quene'en ní suun danj a man adonj —taj nij yuvi yo' a.

*Nana nihánj taj xna'anj se vaa nacúún Jesucristó man Leví, ne canoco' Leví man so' a*

<sup>13</sup> Gaa ne curihanj uún Jesucristó, ca'anj so' tu'va na lacuaná, gaa ne ca'na' cunudanj nij yuvi rej vaj so', gaa ne tucu'yón so' man nij yuvi a.

<sup>14</sup> Veé danj vaj so', ne quene'en so' man sí cu'naj Leví ta'nú sí cu'naj Alfeo, ne dan me se ne so' 'o ve' a'néj nii puextó, ne a'néj so' puextó man yuvi a. Gaa ne cataj Jesucristó rihaan so', ne:

—Canocó so' manj, ca'anj ní á —taj Jesucristó rihaan so' a.

Gaa ne naxumaan so', ne canoco' so' man Jesucristó, ca'anj so' a.

*Nana nihánj taj xna'anj se vaa me rá Jesucristó raçuíj so' man nij sí tumé cacun' a*

<sup>15</sup> Dan me se 'o güii yáan Jesucristó rá ve' tucua sí cu'naj Leví yo', ne ca'na' ndo'o tuvi' so' sí a'néj puextó do', yo'ó nij sí tumé ndo'o cacun' do', ne catúj nij so' rá ve', ne ca'anj cayáan nij so' ga Jesucristó, ne dan me se man rcua'aan nij sí tucu'yón se-nana Jesucristó do', ne chá cunudanj nij so' chraa a. 'O se que'ee ndo'o nij sí tumé cacun' yo' me canoco' se-nana Jesucristó a.

<sup>16</sup> Gaa ne nij sí fariseo naqui'yaj cu se-tucuanj Moisés rihaan yuvi ro', quene'en nij so' se vaa chá Jesucristó chraa do', co'o Jesucristó do', ga nij sí a'néj puextó do', ga yo'ó nij sí tumé ndo'o cacun' do', gaa ne cataj nij so' rihaan nij sí tucu'yón se-nana Jesucristó, ne:

—Me che'é chá sí nihánj chraa ne co'o so' na ga nij sí a'néj puextó do', ga yo'ó nij sí tumé cacun' do', ga —taj nij so', xna'anj nij so' man nij sí tucu'yón se-nana Jesucristó a.

<sup>17</sup> Ne cuno Jesucristó nana ca'mii nij so', gaa ne cataj so' rihaan nij so' a:

—Sí vaa nucuaj ro', ne nano' nij so' man doctor ma'. Maan sí ran' ro', me sí nano' man doctor adonj. Gaa ne ase vaa sí ran' ro', danj vaa nij sí nihánj adonj. Ne ca'na' 'uñj canacunj 'uñj man sí sa' ma'. Che'é nij sí tumé cacun' ca'naj se vaa canoco' nij so' se-nana adonj. Tzaj ne sese sí sa' me soj, rá soj, ne nuveé sij canacunj 'uñj man me soj ma' —taj Jesucristó rihaan nij so' a.

*Nana nihánj taj xna'anj me che'é ne toco' nij sí tucu'yón se-nana Jesucristó x'naa man ma'an nij so' a*

18 Ne dan me se toco' nij sí tucu'yón se-nana Juan do', nij sí fariseo do', x'naa man ma'an nij so', ne ca'na' nij so' rihaan Jesucristó, ne xná'anj nij so' man Jesucristó, cataj nij so':

—Me che'é, ne toco' núj sij tucu'yón se-nana Juan do', sij tucu'yón se-nana nij sí fariseo do', x'naa man ma'an núj che'é se aráj guge núj rihaan Diose, tzaj ne nij sí tucu'yón se-nana so' me se ne toco' nij so' x'naa man ma'an nij so' ga —taj nij so', xná'anj nij so' man Jesucristó a.

19 Gaa ne cataj Jesucristó rihaan nij so' a:

—Ase vaa sí cuchruij sa'anj vaa 'unj, ne asa' ca'vee toco' nij sí man gaj x'naa man ma'an nij so', rá soj ga. Ase vaa sí cataj xcaj man chana ne man tuvi' so' do', danj vaa nij sí man nihánj cuano, ne anuú ndo'o cha'anj man nij so', ne se ca'vee toco' nij so' x'naa man ma'an nij so' cuano ma'.

20 Tzaj ne vaa güii, ne guun yanj 'unj rihaan nij so', qui'yaj yuvi, gaa ne nana rá nij sí nihánj, gaa ne toco' nij so' x'naa man ma'an nij so' adonj.

*Nana nihánj taj xna'anj se vaa nij sí noco' tucuáan nga ro', se guun nucujij nij so' cunó nij so' se-nana Jesucristó ma'*

21 "Tzaj ne ase vaa yatzij sin' vaa tucuáan nga noco' soj, ne se guun na'neij ní mantá naca man yatzij nga yo' ma'. 'O se sese qui'yaj ní danj, ne güii quinanj yuvi yatzij yo', gaa ne nagüej mantá naca yo', ne sese cuxuun yuvi man yatzij yo', ne quisin' yo', gaa ne cunuu xij doj yu'uj taj man yatzij nga yo' nanj adonj.

22 Ne dan me se ase vaa nuj nga nuj araa nii na vinó vaa uún soj ei. Ne se ca'vee tucu'yón 'unj se-tucuanj 'unj rihaan soj ma'. 'O se ase vaa na vinó naca vaa nana tucu'yón 'unj, ne se guun caraa yuvi na vinó naca rque nuj nga ma'. Sese danj qui'yaj yuvi, ne cuyan na vinó cunuu xee na vinó, ne se cacua nuj nga ma'. Che'é dan canuu yo', ne cayan na vinó rihaan yo'óo a. Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan sí naca sí ne noco' tucuáan nga tucu'yón 'unj se-nanaj nanj adonj —taj Jesucristó rihaan nij sí tucu'yón se-nana sí cu'naj Juan do', rihaan nij sí tucu'yón se-nana nij sí fariseo do' a.

*Nana nihánj taj xna'anj che'é güii naránj rá ní a*

23 'O güii naránj rá nij yuvi israelitá cachén Jesucristó ga nij sí tucu'yón se-nana so' rque 'o naa 'núú trigó, ne guun che'e nij sí tucu'yón se-nana so' vaj nij so' ne cuta nij so' doj caa trigó a.

24 Gaa ne cataj nij sí fariseo rihaan Jesucristó a:

—Ní'yaj so' ei. Me che'é 'yaj nij sí tucu'yón se-nana so' danj ga. Ne nó xcúún ní qui'yaj ní danj güii naránj rá ma' —taj nij sí fariseo rihaan Jesucristó a.

25 Gaa ne cataj Jesucristó rihaan nij so' a:

—Me che'é, ne ne nayaá soj rihaan danj Diose daj qui'yaj sí cu'naj David gaa naá a. Gaa quina'aan rque nij tuvi' nij so',

26 gaa ne catúj so' rá nuvi' gaa cayáan sí cu'naj Abiatar xrej atá suun nocoj doj, ne chá so' rachrúún taj rihaan se-mesa Diose a. Ne ne nó xcúún so' chá so' rachrúún yo', maan orún' nij xrej nó xcúún chá rachrúún yo' a. Ne go' uún sí cu'naj David yo' chá nij tuvi' so' uún a. Tzaj ne ne cataj Diose se vaa tumé sí cu'naj David cacun' ma' —taj Jesucristó rihaan nij sí fariseo,

<sup>27</sup> gaa ne cataj uún so' rihaan nij sí fariseo a— Maan che'é rej ca'vee cavij sa' nij yuvij me cuchruj Diose güii naránj rá nanj á. Nuveé che'e rej cata nij yuvij suun navij rá güii naránj rá me qui'yaj Diose man nij yuvij a ma'.

<sup>28</sup> Che'é dan me, 'unj sij ca'née Diose nıcaj yu'unj man yuvij ro', no xcúnj quirij ta'ngaj daj qui'yaj yuvij güii naránj rá nanj adonj —taj Jesucristó rihaan nij sí fariseo a.

### 3

*Nana nihánj taj xna'anj se vaa nahuun sa' o síi nacoo ra'a, qui'yaj Jesucristó a*

<sup>1</sup> Gaa ne natú Jesucristó rá ve' tucu'yón nij sí israelitá se-tucuanj Moisés, ne dan me se yáan 'o snó'o nacoo ra'a rá ve' yo' a.

<sup>2</sup> Ne nij sí fariseo me se yáan nij so' rá ve' yo', ne tumé uxrá nij so' man Jesucristó sese nahuun yuvij qui'yaj so' gaa güii naránj rá nij yuvij israelitá a. Daj qui'yaj nij so' che'é rej guun rá nij so' cutá' nij so' cacun' xráá Jesucristó a.

<sup>3</sup> Gaa ne cataj Jesucristó rihaan síi nacoo ra'a a:

—Naxumaan so' canicun' cayá so' sca'núj núj á —taj Jesucristó rihaan so' a.

<sup>4</sup> Gaa ne xná'anj Jesucristó man nij sí fariseo yo', cataj so', ne:

—No xcúun ní' račuj ní' man tuvi' ní' güii naránj rá ní' na', ase no xcúun ní' qui'yaj chí'ij ní' man tuvi' ní' xa'. Daj qui'yaj ní' rá soj gaa güii naránj rá ní' ga. Ne nó xcúun ní' tinanii ní' man tuvi' ní' rihaan sayuun gaa güii naránj rá gaa a na'. Nı'yaj un' ní' cavı' so' gaa güii naránj rá gaa a na'. —Daj taj Jesucristó rihaan nij so' a.

Tzaj ne dınj tu'va nij so' a.

<sup>5</sup> Gaa ne ca'maan rá Jesucristó, ne ni'yaj so' man nij sí fariseo yo' a. 'O se nanó ndo'o rá so' che'é nij so' se vaa síi nichraj ndo'o nimán me nij so' a.

Gaa ne cataj Jesucristó rihaan síi nacoo ra'a yo' a:

—Tucúa so' ra'á so' á —taj Jesucristó rihaan so' a.

Ne tucúa so' ra'a so', ne cunuu sa' ra'a so' nanj adonj.

<sup>6</sup> Gaa ne curihanj nij sí fariseo yo', ne cunuu chre' nij so' ga nij síi noco' man síi cu'naj Herodes, ne ca'anj nij so' rej yanıj, ne guun rá taran' nij so' daj gaa qui'yaj nij so' ne cavı' Jesucristó a.

*Nana nihánj taj xna'anj se vaa xcaxj ndo'o nij yuvij cuentá se vaa síi 'yaj nahuun sa'yuvij me Jesucristó a*

<sup>7</sup> Gaa ne cavii Jesucristó ga nij sí tucu'yón se-nana so' rej yo', ne ca'anj so' tu'va na lacuaná a. Ne canoco' uxrá yuvij man so' a. Dan me se síi man estadó Galilea do',

<sup>8</sup> síi man estadó Judea do', síi man chuman' Jerusalén do', síi man estadó Idumea do', síi man rej rnej chráa cu'naj Jordán do', síi man chuman' Tiro do', síi man chuman' Sidón do', cuno nij so' nana daj qui'yaj Jesucristó che'é nij sí ran', ne che'é dan ca'na' ndo'o nij so' rihaan Jesucristó a.

<sup>9</sup> Gaa ne cataj Jesucristó rihaan nij sí tucu'yón se-nana so' se vaa qui'yaj chuvij nij so' 'o rihoo chée rihaan na catuu so', gaa ne se gaa nanj curu'maan nij yuvij man so', taj so' a.

<sup>10</sup> 'O se nahuun sa' uxrá yuvij, qui'yaj Jesucristó, ndaa síj, gaa ne taran' nij sí ran' ro', canoco' uxrá nij so' man Jesucristó che'é rej ca'vee cano ra'a nij so' man so' gaa ne nahuun sa' nij so', rá nij so' a.

11 Ne nij síi nuu nana chree nimán ro', gaa quene'en nij so' man Jesucristó, ne ca'anj quinaj nij so' rihaan yo'óo tacóo Jesucristó, ne cataj nij nana chree se vaa:

—So' me ta'níi Diose ya adonj —taj nij nana chree rihaan Jesucristó a.

12 Gaa ne ca'ne' ndo'o Jesucristó suun rihaan nij nana chree se vaa se guun nata' nij so' rihaan nij yuvi che'é so' a.

*Nana nihánj taj xna'anj se vaa quinarii Jesucristó chuvij síi ca'anj nata' se-nana so' a*

13 Gaa ne cavii Jesucristó xráá quij, ne canacúun so' man nij síi me rá so' ca'na' rihaan so', gaa ne cavii nij so', ne cuchi' nij so' rihaan Jesucristó a.

14 Gaa ne quinarii Jesucristó man chuvij nij so' se vaa guun nij so' apóstol nata' rihaan yuvi che'é so' a. 'Q se guun rá so' se vaa cachee chuvij nij so' ga so', ne guun rá so' ca'nej so' man chuvij nij so' ca'mii nataj nij so' rihaan nij yuvi a.

15 Ne guun rá so' nago' so' suun uun chij ra'a nij so' che'é rej ca'vee nahuun sa' nij síi ran' ne quirii nij so' man nij nana chree nimán nij yuvi a.

16 Dan me se cune' Jesucristó man síi cu'naj Simón, ne tucu'náj so' Pedró man Simón a.

17 Ne cune' so' man síi cu'naj Jacobo ta'níi síi cu'naj Zebedeo, ne cune' so' man tinúu Jacobo síi cu'naj Juan, ne tucu'náj so' Boanerges man roj so', ne nana “Boanerges” ro', taj se vaa ase vaa ta'níi ya'anj tu'vii vaa roj so' a.

18 Ne cune' so' man síi cu'naj Andrés do', man síi cu'naj Felipé do', man síi cu'naj Bartolomé do', man síi cu'naj Mateo do', man síi cu'naj Tomás do', man síi cu'naj Jacobo ta'níi síi cu'naj Alfeo do', man síi cu'naj Tadeo do' a. Ne cune' so' man yo'ó síi cu'naj Simón, ne tuvi' nij síi me rá cunu' ga gobiernó man Romá me so' a.

19 Ne cune' Jesucristó man síi cu'naj Judas Iscariote, ne so' me síi tacuachén man Jesucristó rihaan nij síi taj ri'yunj man Jesucristó a.

*Nana nihánj taj xna'anj se vaa cuta' nij síi fariseo cacun' rmi' xráá Jesucristó se vaa ca'mii Jesucristó ga síi chree a*

Gaa ne catúj Jesucristó rá ve' a.

20 Gaa ne cunuu chre' ndo'o uún nij yuvi rihaan so', ne dan me se guun chruj ndo'o rihaan Jesucristó ga nij síi tucu'yón se-nana so', qui'yaj nij yuvi, ne ndaa ne gaa ya'núj rihaan Jesucristó ga nij síi tucu'yón se-nana so' cha nij so' chraa, qui'yaj nij yuvi a.

21 Gaa ne cuchi' nana rihaan nij tuvi' Jesucristó daj ran' so' 'yaj nij yuvi, ne che'é dan ca'anj nij tuvi' Jesucristó quita'aa nij so' man Jesucristó a. 'Q se guun rá nij tuvi' Jesucristó se vaa guun snuj Jesucristó a.

22 Gaa ne nij síi naqui'yaj cuu se-tucuanj Moisés síi cavii chuman' Jerusalén ro', cataj nij so' se vaa síi chree uun chij síi cu'naj Beelzebú nuú nimán Jesucristó, ne che'é dan guun nucuaj Jesucristó quirii Jesucristó nana chree nimán yuvi qui'yaj síi chree uun chij yo', taj nij síi naqui'yaj cuu se-tucuanj Moisés yo' a.

23 Gaa ne canacúun Jesucristó man nij síi naqui'yaj cuu se-tucuanj Moisés, ne nanó so' doj cuentó rihaan nij so', ne dan me se cataj so', ne:

—Asa' ca'vee quirii síi chree síi cu'naj Satanás man ma'an tuvi' so' nana chree nimán nij yuvi, rá nij soj ga. Daj chihaa míj se ca'vee qui'yaj so' danj a man adonj.

<sup>24</sup> Ne'en soj se vaa sese vaa 'o nación, ne sese xra' ta'aj nij sí uun chij rihaan nación yo' ne cunu' ma'an nij so' ga tuvi' nij so', ne vaa güii, ne nu' nación yo' quirí' nu' nanj adonj.

<sup>25</sup> Ne sese unu' ta'aj nij yuvij man 'o barrió ga tuvi' yuvij sí man ma'an barrió yo', ne vaa güii, ne quirí' nu' barrió yo', qui'yaj nij so' nanj adonj.

<sup>26</sup> Che'é dan me sese unu' sí chree sí cu'naj Satanás ga tuvi' ma'an so', ne sese racuíj sí chree mán 'unj quiríj 'unj nana chree nimán nij yuvij, ne se ca'vee guun chij sí chree yo' sese navij tuvi' so' ma'. Maan se quirí' nu' so' nanj adonj.

<sup>27</sup> "Ne sese me rá yo'o so' catuu so' rá ve' tucúa sí ru'vee qui'yaj ituu so' si'yaj sí ru'vee yo', ne asino numij so' man sí ru'vee yo', gaa ne canicaj so' catzij so' tucúa sí ru'vee yo' ei. Ne ase vaa 'yaj sí atij tucúa sí ru'vee ro', danj 'yáj man sí chree yo' chuguanj. Dan me se numij 'unj man so', ne cuano nihánj a'néj 'unj man nu' nij sí 'nij ra'a so' adonj.

<sup>28</sup> "Cataj xna'anj yá yá 'unj rihaan soj cuano se vaa nu' cacun' tumé yuvij do', me ma'an nana chí'ii ca'mii yuvij do', ca'vee tinavij Diose cacun' yo' che'é nij yuvij a.

<sup>29</sup> Tzaj ne sese nachri' yo'o so' ni'yaj so' man Nimán Diose, ne daj chihaj mij se quinaavij cacun' yo' xráa so' a ma'. Tananj quitaj cacun' yo' xráa so' nu' cavii nu' ca'anj nanj adonj.

<sup>30</sup> —Danj cataj Jesucristó rihaan nij sí naquiyaj cuu se-tucuanj Moisés, che'é se aj cataj nij so' se vaa nana chree nuu nimán so' a.

*Nana nihánj taj xna'anj se vaa ase vaa nii Jesucristó do', ase vaa tinúu Jesucristó do', ase vaa ra'vij Jesucristó do', vaa nij sí uno rihaan Diose a*

<sup>31</sup> Gaa ne ca'na' nii Jesucristó do', tinúu Jesucristó do', ne nicun' nij so' xe' rihaan ve' nuu Jesucristó, ne ca'née nij so' nana rihaan Jesucristó se vaa curihanj so' ca'na' so' rej nicun' nij so' a.

<sup>32</sup> Ne yáan ndo'o yuvij nu' anicaj rej ne Jesucristó, ne cataj nii rihaan Jesucristó a:

—Nicun' ní so' nicun' tinúu so' nicun' xe', ne me rá nij so' quene'en nij so' mán so', Jesús —taj nii rihaan Jesucristó a.

<sup>33</sup> Gaa ne cataj Jesucristó rihaan nij sí nata' rihaan so' se vaa:

—Me chana me ní 'unj, rá soj ga. Me sí me tinúu 'unj, rá soj ga —taj Jesucristó rihaan nij so' a.

<sup>34</sup> Gaa ne ni'yaj Jesucristó man nij sí yanj nu' anicaj rej ne so', ne cataj so' a:

—Ni'yaj soj ei. Ase vaa ní 'unj do', ase vaa tinúu 'unj do', vaa nij sí nihánj adonj.

<sup>35</sup> Yuvij uno rihaan Diose ro', ase vaa tinúu 'unj do', ase vaa ra'vij 'unj do', ase vaa ní 'unj do', vaa nij so' adonj —taj Jesucristó a.

## 4

*Nihánj me cuentó nanó Jesucristó che'é 'núu trigó tix'nuu yo'o so' a*

<sup>1</sup> Gaa ne ca'anj Jesucristó tu'va na lacuaná, ne guun che'e so' tucu'yón so' se-nana so' rihaan yuvij tu'va na lacuaná a. Ne dan me se ca'na' ndo'o yuvij rihaan so', ne che'é dan cavii so' rque 'o rihoo chéé rihaan na, ne ca'anj cane so' rque rihoo yo', ne canicun' nij yuvij rihaan yo'óo tu'va na lacuaná yo' a.

<sup>2</sup> Gaa ne tucu'yón so' man nij yuvij, nanó ndo'o so' cuentó rihaan nij yuvij, ne dan me se cataj so' rihaan nij yuvij a:

3—Cunō soj ca'mij á. Dan me se curihañj 'o síi me rá cuchruj naq 'núu trigó, ne tix'nuu so' 'núu trigó yo' rihaan yo'óo,

4 ne cayuu doj 'núu trigó yo' rá chrej chéé yuvij, ne ca'na' xtâj chá xtâj man 'núu trigó naj rá chrej yo', ne dan me se navij nu' 'núu trigó yo', qui'yaj nij xtâj nanj adonj.

5 Ne yo'ó ta'aj 'núu trigó yo' ro', cayuu rihaan yuvej rej taj catun' yo'óo a. Che'é dan cuaj xra' stanj le'ej a.

6 Veé dan, ne quisij güii, ne cuchrii naq le'ej, qui'yaj naán, che'é se ne ca'vee ca'anj nij yáa naq le'ej yo' a man adonj.

7 Ne yo'ó ta'aj 'núu trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naq le'ej, ne quinavij nu' naq le'ej, qui'yaj coj tanj yo', ne ne cavii sa' naq yo' a man adonj.

8 Ne yo'ó ta'aj 'núu trigó yo' ro', cayuu rihaan yo'óo sa', ne naq yo' ro', cachij sa' a. Dan me se rihaan ta'aj yo'óo sa' yo' ico chí' ya 'núu cavii, qui'yaj 'o 'o 'núu le'ej nii quinij rihaan yo'óo sa' yo', ne rihaan yo'ó ta'aj yo'óo sa' yo' va'núj chihaa ya 'núu cavii, qui'yaj 'o 'o 'núu le'ej nii quinij rihaan yo'óo sa' yo', ne rihaan yo'ó ta'aj yo'óo sa' yo' cientó ya 'núu trigó cavii, qui'yaj 'o 'o 'núu le'ej nii cayuu rihaan yo'óo sa' yo' uún nanj adonj —taj Jesucristó,

9 gaa ne cataj uún so'— Sese taj yu'uj xréé soj, ne cunō soj nana nihánj ei. —Veé danj quisij cuentó yo' cuentó nanó Jesucristó a.

*Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvij a*

10 Gaa ne gaa guun yanj so' rihaan nij yuvij, ne nij síi chéé ga so' do', chuvij nij apóstol cune' so' man nata' rihaan yuvij che'é so' do', xna'anj nij so' man so' che'é nij cuentó nanó so' rihaan nij yuvij a.

11 Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose gaa guun chíj Diose rihaan chumij nihánj adonj. Dan me se nana ne ne'en cunudanj yuvij me nana yo' nana tihaan Diose rihaan soj adonj. Ne rihaan yo'óo nij yuvij man rihaan chumij me se inanj cuentó che'é nij rasuun nanej rihaan nij yuvij,

12 gaa ne ni'yaj nij so' do', nana xrej nij so' do', tzaj ne se quene'en nij so' do', se xcaj nij so' cuentá do', a ma'. 'O se na'vej uxrá rá nij so' canicaj nimán nij so' ne güej cacun' xráa nij so' a man adonj —taj Jesucristó rihaan nij so' a.

*Nana nihánj taj xna'anj me taj cuentó che'é 'núu trigó yo' a*

13 Gaa ne cataj uún Jesucristó rihaan nij so' a:

—Ne ne ne'en soj me taj cuentó nihánj cuentó che'é 'núu trigó tix'nuu yo' so' na'. Ne asa' ca'vee xcaj soj cuentá che'é yo'óo nij cuentó, rá soj ga.

14 "Dan me se síi tix'nuu 'núu trigó ro', so' me síi nata' se-nana Diose rihaan yuvij adonj.

15 Ne ase vaa 'núu cayuu rá chrej qui'yaj síi tix'nuu 'núu ro', danj vaa ta'aj nij síi uno se-nana Diose, ne dan me se uno nij so' doj tzin', tzaj ne nu' cuno nij so', ne nu' 'na' síi chree síi cu'naj Satanás, ne a'néj síi chree se-nana Diose nana cayuu rque nimán nij so' a.

16 "Ne vaa ta'aj 'núu trigó cayuu rihaan yuvej uún, ne 'núu trigó yo' ro', ase vaa nij síi uno se-nana Diose vaa yo', ne cuaj uun niha' rá nij so' canoco' nij so' nana yo' a.

17 Tzaj ne ataa xcaj sa' nij so' cuentá, ne gaa uun che'e yuvii 'yaj yuvii sayuun man nij so' che'é nana noco' nij so', ne cuaj nu' uun na'aj nij so', ne tanáj nij so' nana yo' cuaj nanj adonj.

18 "Ne ase vaa nij 'núu trigó cayuu sca'núj coj tanj ro', danj vaa yo'ó ta'aj nij yuvii uún, ne dan me se uno nij so' se-nana Diose,

19 tzaj ne nanó ndo'o rá nij so' che'é se man rihaan chumij nihánj, ne me ndo'o rá nij so' qui'yaj canaan nij so' sa'anj, don tiha' yu'unj nij so' man ma'an nij so' che'é sa'anj, ne me ma'an yo'ó nij rasuun nano' ndo'o nij so', ne che'é dan tanáj xco nij so' se-nana Diose, ne ne 'yaj nij so' se sa' a ma'.

20 "Ne 'núu trigó cayuu rihaan yo'óo sa' ro', ase vaa síi uno se-nana Diose vaa yo', ne uun niha' rá so' uno so' nana yo', ne nuu sa' nimán so' rihaan Diose a. Ne sa' doj tzin' 'yaj ta'aj nij so', ne sa' doj 'yaj yo'ó ta'aj nij so', ne sa' uxrá doj 'yaj yo'ó ta'aj nij so' uún nanj adonj. —Veé danj quisij nana ca'mii Jesucristó che'é cuentó yo' a.

### *Nihánj me cuentó nanó Jesucristó che'é aga' ya'an a*

21 Gaa ne cataj Jesucristó rihaan nij so' a:

—Ne gaa rmi' me se achrón nii ya'an raá aga' ya'an, ne axríj yuve nii aga' ya'an yo' rque 'o chruún do', rque yuvéé do', rá soj na'. Taj ma'. Sese rmi', ne uta' nii aga' yo' rej xta', gaa ne cuchuguun sa' ndo'o adonj.

22 Dan me se a 'ó rasuun caxríj yuve yuvii se qui'nij yuve ma'. Ya nurihanj yo' vaa güii, ne cunudanj yuvii quene'en, vaa güii adonj. Ne cunudanj rasuun 'yaj yuve yuvii quene'en daj a yuvii vaa güii ei.

23 Sese taj yu'uj xréé soj, ne cunó soj nana nihánj ei —taj Jesucristó rihaan nij so',

24 gaa ne cataj uún so' se vaa— Nuchruj raá soj nana ca'mij nihánj ei. Sese qui'yaj suun uxrá soj nari' soj nana nihánj, ne rque ndo'o Diose doj nana nari' uún soj nanj adonj.

25 'Q se síi nari' nana ro', doj a nari' uún so', qui'yaj Diose nanj adonj. Ne síi na'vej rá nari' sa' nana ro', tananj ca'nee Diose doj nij nana nari' so' man so', ne quinaj uun so' nanj adonj —taj Jesucristó rihaan nij so' a.

### *Nihánj me cuentó nanó Jesucristó che'é naa a*

26 Gaa ne cataj Jesucristó:

—Dan me se ase vaa achij naa cuchruj 'o snó'o ro', danj gaa guun chij Diose rihaan chumij nihánj, ne snó'o yo' ro', cunó so' 'núu rihaan yo'óo,

27 ne síj cunó so', ne otoj so' rej nij, ne naxagaa so', ne danj 'yaj so' daj a güii, ne dan me se xra' naa le'ej, ne achij naa le'ej, ne ne ne'en uxrá snó'o me che'é me xra' naa ne achij naa a ma'.

28 Achij ma'an naa rihaan yo'óo, ne dan me se asino yaan xra' naa, gaa ne anó tihaj, gaa ne uun xij yumii naa a.

29 Gaa ne gaa quisij tan' xráa naa, ne a'neé snó'o man nij síi quirii naa nanj á. 'Q se quisij tió quirii nii naa nanj adonj —taj Jesucristó a.

### *Nihánj me cuentó nanó Jesucristó che'é caân cuêj mostazá xlá a*

30 Gaa ne cataj uún Jesucristó:

—Daj gaa guun chij Diose rihaan chumij nihánj, rá soj ga.

31 Dan me se ase vaa achij caân cuêj mostazá xlá ro', danj gaa guun chij Diose rihaan chumij nihánj adonj. Dan me se axríj nii caân yo' rihaan yo'óo, ne caân yo' me se caân le'ej nii doj vaa caân yo' rihaan cunudanj nij caân man rihaan chumij nihánj,

<sup>32</sup> tʒaj ne dan me se gaa axrɨj nii caân yo' rihaan yo'óo, ne achij caân yo', ne xij doj uun yo' rihaan cunudanɨj nij coj man tacaan, ne xcaan ndo'o vaa ra'a cuêj yo', ne a'vee 'yaj nij xtâj vaj rej xta' saca' nij xo' raâ cuêj yo', ne arâan cachun' xrâá nij xo', 'yaj cuêj mostazá xlá yo' nanɨj adonɨj —taj Jesucristó a.

*Nana nihánj taj xna'anj se vaa inanj cuentó nanó Jesucristó rihaan nij yuvií a*

<sup>33</sup> Dan me se que'ee cuentó vaa danɨj cuentó che'é nij rasuun nanó Jesucristó rihaan nij yuvií, nata' so' se-nana Diose rihaan nij yuvií, ndaa vaa guun nucuaj nij yuvií cunó nij yuvií a.

<sup>34</sup> Taj vaj yo'ó nana nanó Jesucristó rihaan nij yuvií a ma'. Maan inanj cuentó che'é nij rasuun nanó Jesucristó rihaan nij so', tʒaj ne rihaan ma'an nij sí tucu'yón se-nana so' me se ataj xna'anj so' che'é nij cuentó yo' rihaan nij so' a.

*Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a*

<sup>35</sup> Gaa ne rej ti'nuu güii yo' me se cataj Jesucristó rihaan nij sí tucu'yón se-nana so', ne:

—Ca'anj ní ndaa yo'ó níchrej tu'va na lacuaná á —taj so' rihaan nij so' a.

<sup>36</sup> Gaa ne nij sí tucu'yón se-nana Jesucristó me se ca'anj rihoo nuu nij so' ga Jesucristó, qui'yaj nij so', ne quináj nij yuvií tu'va na lacuaná, ne vaa doj nij rihoo canoco' xcó nij so' a.

<sup>37</sup> Gaa ne cavii uxrá nana yuvaá rihaan na lacuaná, ne quinaan ndo'o rihaan na, ne catúj uxrá na rque rihoo yo', ne daj doj caraá nu' rque rihoo, qui'yaj na a.

<sup>38</sup> Ne Jesucristó me se naj so' rej sihuu rihoo, ne 'nij raá so' camá, otoj so' a. Gaa ne narii nij sí tucu'yón se-nana Jesucristó nej rihaan Jesucristó, ne cataj nij so':

—Nihánj me se daj doj cavi' ní, maestro, ne che'é ne rihuun rá so' ga —taj nij so' rihaan Jesucristó a.

<sup>39</sup> Gaa ne canicun' caya Jesucristó, ne caxrɨj yuvaá so' man nana, ne cataj so' rihaan na lacuaná:

—Gaa dínj rihaan so', ne se quinaán so' ma' —taj so', gaa ne nu' canicun' nana, ne canicun' dínj rihaan na lacuaná yo', qui'yaj Jesucristó nanɨj adonɨj.

<sup>40</sup> Gaa ne cataj Jesucristó rihaan nij sí tucu'yón se-nana so' a:

—Me che'é chu'vi' ndo'o nimán soj ga. Ataa cuchuman sa' rá soj ni'yaj soj manj na' —taj so' rihaan nij so' a.

<sup>41</sup> Gaa ne cuchu'vi' ndo'o nij so', ne xná'anj nij so' man tuvi' nij so', cataj nij so':

—Daj sij me sí nihánj ga. Ndaa nana do', ndaa na do', uno a'mii so' ason —taj nij so' rihaan tuvi' nij so' a.

## 5

*Nana nihánj taj xna'anj se vaa quirii Jesucristó man nij nana chree nimán 'o snó'o a*

<sup>1</sup> Gaa ne ca'anj nij so' ndaa níchrej tu'va na lacuaná yo', ndaa rej ne nij sí man chuman' Gadara a.

<sup>2</sup> Ne rej yo' me se taj yu'uj yuvej rej achin' nii xngá a. Dan me se naniɨ Jesucristó ga nij sí tucu'yón se-nana so' rque rihoo, ne nu' curihanɨj 'o snó'o nuu nana chree nimán rque yu'uj yuvej yo', ne cuci' so' rihaan Jesucristó a.



3 Ne síi nuu nana chree nimán me se cu'yón so' cayáan so' rque yu'uj yuvej yo', ne ne ca'vee numíj nij yuviíj man rej yo' aga' ne' man so' a.

4 O se aj uun que'ee ndo'o numíj nij yuviíj ne' do', aga' ne' do', man so', tzaj ne cuxra' so' aga' ne', ne ca'ne' so' ne' do', ne a 'ó yuviíj taj quisíj naquí'yaj camanj man so' a.

5 Ne niganj me se nuvíj nigan' cayáan so' rque nij yu'uj yuvej do', vaj so' xráá quíj do', ne caguáj ndo'o so', ne nicaj so' yahíj sihaa ca'ne' ndo'o so' nee man ma'an so' uún a.

6 Dan me se gaa quene'en so' man Jesucristó se vaa gan' uxrá vaj Jesucristó, ne cunánj so' ndaa rej vaj Jesucristó, ne na'víj so' rihaan Jesucristó,

7 ne nucaj ndo'o caguáj so' rihaan Jesucristó, ne cataj so':

—Aj ne'én 'unj se vaa ta'nij Diose síi sa' ndo'o mé so', Jesús. Me che'é 'ná so' rej né 'unj ga. Cataj xna'anj sa' 'unj rihaan so' ni'yaj Diose se vaa se qui'yáá so' sayuun manj ma' —taj síi nuu nana chree nimán rihaan Jesucristó a.

8 Danj ca'mii so' rihaan Jesucristó che'é se aj cataj Jesucristó rihaan so' se vaa: “Rihaan so' nana chree nuu nimán síi nihánj cataj xna'anj 'unj se vaa curihanj so' nimán síi nihánj á”, taj Jesucristó, tzaj ne ne guun rá nana chree curihanj so' ma'.

9 Gaa ne xná'anj Jesucristó man nana chree, ne cataj so':

—Daj cu'naj so' ga —taj Jesucristó rihaan so' a.

Ne:

—X'ne' nocoo ndo'o me núj, ne que'ee ndo'o núj á —taj nana chree rihaan Jesucristó,

10 ne cachíin ni'yaj nij nana chree yo' rihaan Jesucristó se vaa se ca'neé Jesucristó man nij nana chree ndaa yo'ó rej yaníj ma'.

11 Dan me se rej tacaan rej nicun' nij so' me se chéé 'o x'ne' nocoo xcáá, chá nij xo' coj,

12 gaa ne cachíin ni'yaj nij nana chree rihaan Jesucristó, cataj nij so':

—Ca'nej so' man núj catuu núj nimán nij xcáá á —taj nij nana chree rihaan Jesucristó a.

13 Gaa ne ca'vej rá Jesucristó qui'yaj nij so' danj, gaa ne curihanj nij so' nimán snó'o yo', gaa ne catúj nij so' nimán nij xcáá, ne dan me se ruvaa uxrá tacaan nicun' tu'va na lacuaná rej vaj nij xcáá yo', ne gaa catúj nij nana chree yo' nimán nij xcáá yo', gaa ne cunánj ndo'o nij xo', ca'anj nij xo', ne veé danj vaj nij xo', ne quiniij nij xo' rque na, ne canó xráá nij xo' nanj adonj. Ne dan me se vij míj xcáá me nij xcáá canó xráá rque na a.

14 “Ne nij síi tumé nij xcáá ro', cunánj nij so' ca'anj cataj xna'anj nij so' rihaan nij yuviíj man chuman' do', rihaan nij yuviíj man tacaan do' a. Gaa ne dan me se ca'na' ni'yaj nij yuviíj se vaa guun, gaa ne ca'na' nij so' rihaan Jesucristó,

15 gaa ne quene'en nij so' man síi curihanj nana chree nimán a. Aj nanuú so' sagan' so', ne dínj ne so' rihaan Jesucristó a. Ne aj ti'inj se snúu so', ne nuu sa' so' a. Gaa ne cucu'vi' ndo'o nij yuviíj se vaa qui'yaj Jesucristó,

16 gaa ne cataj xna'anj nij síi quene'en yo' rihaan nij yuviíj daj qui'yaj Jesucristó che'é síi nuu nana chree nimán do', ga nij xcáá do',

17 gaa ne guun che'e nij yuviíj cachíin ni'yaj nij yuviíj rihaan Jesucristó se vaa curihanj so' rej yanj nij so' ca'anj so' rej yaníj a.

18 "Che'é dan cavii Jesucristó rque rihoo chéé rihaan na, gaa ne dan me se cachíin ni'yaj síi curihañj nana chree nimán rihaan Jesucristó se vaa ca'vej rá Jesucristó ca'anj so' ga Jesucristó a.

19 Tzaj ne ne ca'vej rá Jesucristó ca'anj so' ga Jesucristó a. Tananj cataj Jesucristó rihaan so' se vaa:

—Cavii so' nán' so' ve' tucua' so' rej yanj nij tuví' so', ne cataj xna'anj so' rihaan nij so' nu' se vaa qui'yaj síi 'nij ra'a man ní' che'é so', ne cataj so' se vaa cunuu 'ee rá so' ni'yaj so' mán so' á —taj Jesucristó rihaan síi curihañj nana chree nimán a.

20 Gaa ne ca'anj síi curihañj nana chree nimán, ne guun che'e so' ca'mii natáj so' rihaan nij yuvij man rej cu'naj Chi' Chuman', ne cataj xna'anj so' nu' se vaa qui'yaj Jesucristó che'é so' a. Ne ca'anj ndo'o rá cunudanj nij yuvij cuno se-nana so' a.

*Nana nihanj taj xna'anj che'é chala cunii do', che'é chana chij do', nahuun sa', qui'yaj Jesucristó a*

21 Dan me se nuu Jesucristó rque rihoo chéé rihaan na, ne ca'anj uún so' ndaa níchrej tu'va na lacuaná, gaa ne cunuu chre' ndo'o yuvij rihaan so', ne vaj so' tu'va na lacuaná a.

22 Gaa ne dan me se ca'na' yo'q nij síi 'nij ra'a ve' tucu'yón nij yuvij israelita se-tucuañj Moisés, ne Jairo cu'naj so' a. Dan me se quene'en síi cu'naj Jairo man Jesucristó, gaa ne canicun' ruj so' rihaan Jesucristó,

23 gaa ne cachíin ni'yaj uxrá so' rihaan Jesucristó, ne dan me se cataj so' se vaa:

—Ta'nij chala cunii ro', ran' ndo'o no', ne daj doj cavi' no', ne me rá 'unj cuchí' so' ve' tucuañj, ne cuta' so' ra'á so' raá no', ne nahuun sa' no', ne se cavi' no', qui'yáa so' ma' —taj síi cu'naj Jairo rihaan Jesucristó a.

24 Gaa ne ca'anj Jesucristó ga so', ne canoco' uxrá yuvij xcó roj so', ne ndaa raan ma'an chrej vaj yuvij ga nij so' a.

25 Dan me se sca'núj nij so' vaj 'o chana ran' ndo'o, ne quisij chuvij ya yo' xra' ton man no' a.

26 Ne aj quiran' ndo'o no' sayuun, qui'yaj que'ee nij doctor, ne aj cutun' no' cunudanj sa'anj vaa rihaan no', tzaj ne taj se qui'yá' a doj nahuun sa' no' qui'yaj nij doctor yo' a ma'. Tananj doj a ran' no' nanj adonj.

27 Gaa ne aj cuchí' nana rihaan no' che'é nu' se vaa qui'yaj Jesucristó che'é nij yuvij, ne che'é dan ca'na' no' sca'núj nij yuvij rej xcó Jesucristó, gaa ne canó ra'a no' doj tu'va sagan' so' a.

28 'Q se guun rá no' se vaa: "Sese cano ra'aj sagan' Jesucristó, ne nahuun sa' 'unj nanj adonj", guun rá no' a.

29 Dan me se síj canó ra'a no' sagan' Jesucristó, gaa ne nu' canicun' ton man no' cuaj a. Ne quene'en no' se vaa nahuun sa' no', qui'yaj Jesucristó a.

30 Dan me se nu' canó ra'a no' sagan' Jesucristó, ne nu' xcaj Jesucristó cuentá se vaa nahuun yuvij qui'yaj so' a. Che'é dan canicaj so', ne xná'anj so', cataj so':

—Me síi canó ra'a sagan' 'unj ga —taj so' a.

31 Gaa ne cataj nij síi tucu'yón se-nana Jesucristó se vaa:

—Ne'én so' se vaa raan ndo'o vaj nij yuvij ga so', ne me che'é xná'anj so' me síi canó ra'a sagan' so' ga —taj nij so', xná'anj nij so' man Jesucristó a.

32 Gaa ne canicaj Jesucristó, ne quene'en so' man chana canó ra'a tu'va sagan' so' a.

33 Ne dan me se cuchu'vi' ndo'o no' ne ndaa ri'ij man no', ne aj ne'en no' se vaa nahuun sa' no' a. Gaa ne ca'anj no', ne canicun' ruj no' rihaan Jesucristó, ne cataj ya no' rihaan Jesucristó nu' se vaa qui'yaj no' a.

34 Gaa ne cataj Jesucristó rihaan no' a:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne dínj gaa nimán so' ca'anj so' á. Gaa nu'cuáá so', ne aj x'néj nu' chi'ij yo' xráá so' nanj ei —taj Jesucristó rihaan chana yo' a.

35 Ataa navij ca'mii Jesucristó, ne ca'na' 'o síi cavii tucua síi cu'naj Jairo, ne cataj so' rihaan Jairo a:

—Aj cavi' ta'níi so', ne taj che'é caraa chruú so' rihaan maestró a ma' —taj síi 'na' cataj xna'anj rihaan Jairo a.

36 Dan me se cuno Jesucristó nana ca'mii síi ca'na', gaa ne cataj so' rihaan síi cu'naj Jairo a:

—Se chahu'vi' so' ma'. Maan se cuchuman ya rá so' ni'yaj so' manj á —taj Jesucristó rihaan so' a.

37 Dan me se ne ca'vej rá Jesucristó canoco' a doj nij yuvij man so', ne maan Pedró do', Jacobo do', Juan tinúu Jacobo do', ca'vej so' canoco' man so' a.

38 Gaa ne cuchi' so' rihaan ve' tucua Jairo, ne quene'en Jesucristó se vaa ta'vee uxrá nij yuvij man rá ve' a.

39 Gaa ne catúj Jesucristó rá ve', ne cataj so' rihaan nij yuvij a:

—Me che'é ta'vee ndo'o nij soj ga. Ne cavi' chala cunii nihánj ma'. Maan se otoj uun no' nanj á —taj Jesucristó rihaan nij so' a.

40 Gaa ne ca'nga' nacoj nij yuvij ni'yaj nij yuvij man Jesucristó a. Tzaj ne quirii Jesucristó man cunudanj nij yuvij xe', gaa ne nicaj so' man rej chala cunii do', man nii chala cunii do', man va'nuj nij síi ca'na' ga so' do', ne catúj so' rá cuarto naj chala cunii yo' a.

41 Gaa ne quita'aa Jesucristó ra'a chala cunii, ne cataj so' rihaan chala cunii yo' a:

—Talita, cumi —taj so' rihaan no' xna'anj a'mii ma'an so' a. Ne se-nana so' taj: “Naxagaa so', chala cunii”, taj nana ca'mii Jesucristó rihaan chala cunii yo' a.

42 Nu' ca'mii Jesucristó nana dan, ne nu' naxagaa chala cunii yo', chéé no' cuaj a. Nahuun i'na' no' a.

Ne chala cunii vaj chujj yo' me no' a.

Ne nij síi quene'en, tzaj ne ca'anj ndo'o rá nij so' a.

43 Gaa ne ca'ne' uxrá Jesucristó suun rihaan nij so' a:

—A 'o yuvij se cataj xna'anj nij soj rihaan daj qui'yaj che'é chala cunii ma' —taj Jesucristó rihaan nij so', ne cataj so' se vaa rque nii doj se chá cha no' a.

## 6

*Nana nihánj taj xna'anj se vaa ne ca'vej rá nij síi man chiháán Jesucristó chuman' cu'naj Nazaret cunoj nij so' nana ca'mii Jesucristó a*

1 Gaa ne curihanj Jesucristó ve' yo', gaa ne namán so' rej chiháán so', ne canoco' nij síi tucuyón se-nana so' man so' a.

2 Ne güii naránj rá nij yuvij israelita me se ca'anj so' ve' tucuyón nij síi man chiháán so' se-tucuanj Moisés, ne guun che'e so' tucuyón so' man nij síi man rá ve' yo' a. Ne ca'anj ndo'o rá nij yuvij gaa cuno nij yuvij se-nana Jesucristó, gaa ne cataj nij yuvij:

—Me rej nari' sí nihánj nanā cuu avii rā sí nihánj ga. Me rej nari' so' suun sa' 'yaj so' ga.

<sup>3</sup> Nuveé sij acóy chruun sí ne chiháán ní' me so' na'. Ne ta'níí chanā cu'naj Mariá me so' á. Ne tinúú sí cu'naj Jacobo do', sí cu'naj José do', sí cu'naj Judas do', sí cu'naj Simón do', me so' á. Ne nij ra'vij so' me chanā ne chiháán ní' á —taj nij sí man chiháán Jesucristó rihaan tuvi' nij so', ne guun nacōo rá nij so' ni'yaj nij so' man Jesucristó a.

<sup>4</sup> Gaa ne cataj Jesucristó rihaan nij so' a:

—Me rej ma'an vaj 'o sí nata' se-nanā Diose, ne aráj cochroj nij yuvii rihaan so', tzaj ne nij yuvii man chiháán so' do', nij tuvi' so' do', nij sí yanj tucua' so' do', na'vej rá carāa cochroj rihaan so' ma' —taj Jesucristó rihaan nij sí man chiháán so' chuman' cu'naj Nazaret yo' a.

<sup>5</sup> Ne ne guun nucuaj Jesucristó qui'yaj so' a doj suun sa' nocōo chiháán so', maan se doj sí ran' me se cuta' so' ra'a so' rāa ne nahuun sa' nij so', qui'yaj so' a.

<sup>6</sup> Ne caráya'anj ndo'o so' se vaa ne cuchuman rá nij sí man chiháán so' ni'yaj nij so' man so' a. Ne cavii so' ca'anj so' nij chuman' naj nichrun', tucuyón so' se-nanā so' man nij yuvii a.

*Nanā nihánj taj xna'anj se vaa ca'néé Jesucristó man chuvij nij sí tucuyón se-nanā so' ca'anj ca'mii natáj nij so' a*

<sup>7</sup> Gaa ne canacúun Jesucristó man chuvij nij sí tucuyón se-nanā so', ne cuchi' nij so' rihaan so', gaa ne guun che'e so' ca'néé so' man vjij vjij nij so', ne go' so' se nucuaj man nij so', gaa ne ca'vee qui'yaj canaán nij so' rihaan nij nanā chree a.

<sup>8</sup> Ne ca'ne' so' suun rihaan nij so' se vaa a doj rasuun se nicaj nij so' gaa vaj nij so' chrej; maan orún' chruun garroté me se ca'vee nīcaj nij so', tzaj ne rachrúun do', nanj do', se nicaj nij so', ne se ca'vee cunuú sa'anj rque se-caxran' nij so',

<sup>9</sup> tzaj ne qui'nij tacóo nij so' canj, ne orún' yatzíj quitaj xráá nij so', taj Jesucristó rihaan nij so',

<sup>10</sup> ne:

—Me ma'an ve' caran' soj, ne yo'o cayáán soj ve' yo' ndaa se curihanj soj chuman' yo' á.

<sup>11</sup> Ne me rej ma'an se ca'mii sa' nij yuvii ga soj do', se ca'vej rá nij yuvii cunó nij yuvii nanā a'mii soj do', ne asa' cavii soj rej yo', ne nacunan' soj tacóo soj tucuyaju soj yo'óo tachruu canó tacóo soj, ne ndaa dan, gaa ne xcay nij sí man rej yo' cuentá se vaa tumé ndo'o nij so' cacun' se vaa ne ca'vej rá nij so' cunó nij so' se-nanā soj adonj. Cataj xna'anj yá yá 'unj rihaan soj cuano se vaa doj a quiran' nij so' cacun' rihaan nij yuvii man chuman' Sodoma ga chuman' Gomorra nanj adonj —taj Jesucristó rihaan chuvij nij so' a.

<sup>12</sup> Gaa ne ca'anj nij so', gaa ne ca'mii natáj nij so' rihaan nij yuvii se vaa canicaj rá nij yuvii canoco' nij yuvii chrej sa',

<sup>13</sup> ne quiirí ndo'o nij so' man nij nanā chree nimán nij yuvii, ne cutáj ndo'o nij so' casté rāa nij sí ran', ne nahuun sa' nij sí ran', qui'yaj nij so' a.

*Nanā nihánj taj xna'anj se vaa cavi' Juan sí cuta' ne man yuvii, qui'yaj sí nicaj suun cu'naj Herodes a*

<sup>14</sup> Dan me se cuchi' nanā rihaan sí nicaj suun rey cu'naj Herodes che'e nu' se vaa qui'yaj nij sí tucuyón se-nanā Jesucristó, ne nu' cachra' cha'nuu ndo'o se-nanā Jesucristó a. Gaa ne cataj sí cu'naj Herodes se vaa:

—Cunuu i'na' ya uún sí cu'naj Juan, raj á. Ése sí cu'naj Juan me sí guun nucuaj qui'yaj nij suun sa' nocoo yo' nanj adonj —taj sí cu'naj Herodes a.

<sup>15</sup> Ne yo'ó ta'aj nij yuvi me se cataj se vaa sí cu'naj Elías sí nata' se-nana Diose gaa naá me Jesucristó, ne yo'ó ta'aj nij yuvi uún cataj se vaa yo'ó nij sí nata' se-nana Diose gaa naá me Jesucristó a.

<sup>16</sup> Dan me se cuno sí cu'naj Herodes daj guun rá nij yuvi, gaa ne cataj so': —Sí cu'naj Juan sí ca'ne' nij tanuu cúu yave qui'yáj ro', aj cunuu i'na' ya so' chuguanj —taj Herodes a.

<sup>17</sup> 'Q se ma'an sí cu'naj Herodes me sí ca'née man nij tanuu quita'aa nij tanuu man sí cu'naj Juan asij rque doj, ne numíj nij tanuu man sí cu'naj Juan, ne caxríj sí cu'naj Herodes taga' man sí cu'naj Juan, che'é chana cu'naj Herodías nica tinúú Herodes sí cu'naj Felipé a. 'Q se xcaj sí cu'naj Herodes man chana Herodías yo',

<sup>18</sup> gaa ne cataj sí cu'naj Juan rihaan sí cu'naj Herodes se vaa:

—Ne nó xcúún so' xcaj so' man choco' so' ma' —taj Juan rihaan Herodes a.

<sup>19</sup> Che'é dan nachri' chana cu'naj Herodías ni'yaj no' man Juan, ne guun ndo'o rá no' cavi' Juan, tzaj ne ne ca'vee ma'.

<sup>20</sup> 'Q se cuchu'vi' sí cu'naj Herodes ni'yaj so' man Juan, che'é se quene'en Herodes se vaa sí nica rá sí sa' inanj nimán rihaan Diose me Juan, ne che'é dan caráan Herodes rihaan chi'ij che'é Juan a. Dan me se gaa cuno Herodes se-nana Juan, ne quinanó ndo'o rá so', tzaj ne guun niha' rá so' ca'mí Juan rihaan so' a.

<sup>21</sup> Dan me se quisíj 'o güii ca'vee qui'yaj canaán chana cu'naj Herodías yo', ne dan me se se-cha'anj sí cu'naj Herodes me yo', ne ca'ne' so' suun se vaa canuú se-cha'anj so', ne canacúún so' ca'na' nij sí 'yaj suun ga ma'an so' do', nij tanuu uun chij doj do', níj sí uun chij rihaan estadó Galilea do', ca'na' cha ni'yánj nij so' ga so' a.

<sup>22</sup> Gaa ne catúj ta'níi chana cu'naj Herodías rej anuú cha'anj, ne ra'ánj no', ne guun niha' uxrá rá Herodes ga nij sí ca'na' cha'anj yo' ni'yaj taran' nij so' man ta'níi Herodías a. Gaa ne cataj Herodes rihaan chana yaan yo':

—Cuanó nihánj me se a me ma'an rasuun me rá so' cachínj so' rihanj, ne rque 'unj mán so' ei —taj so',

<sup>23</sup> gaa ne cataj uún so'— Cuta' yá 'unj raá Diose se vaa a me ma'an rasuun cachínj so' rihanj, ne rque 'unj mán so' á. Ndaa yanej yo'óo uun chij 'unj rihaan ro', rque 'unj mán so' nanj adonj —taj Herodes rihaan chana yaan yo' a.

<sup>24</sup> Gaa ne curihanj chana yaan, ne xná'anj no' man nii no' chana cu'naj Herodías, ne cataj no':

—Me se cachínj 'unj, ga nahiin —taj no' rihaan nii no' a.

Gaa ne chana cu'naj Herodías cataj:

—Cachínj so' cúu yave sí cu'naj Juan sí cuta' ne man yuvi á —taj no' rihaan ta'níi no' chana yaan yo' a.

<sup>25</sup> Gaa ne nu' catúj ra'yanj chana yaan yo' rej man sí nica'j suun rey cu'naj Herodes, ne cachínj ni'yaj no' rihaan so', cataj no':

—Me rá 'unj se vaa maan orá cuanó ro', ca'nej so' cúu yave sí cu'naj Juan sí cuta' ne man yuvi rque aga' rco'oo, ne rque so' rihanj cuaj á —taj no' rihaan Herodes a.

<sup>26</sup> Gaa ne nanó ndo'o rá sí nica'j suun rey cu'naj Herodes yo' che'é se aj cuta' so' raá Diose ne aj cuno taran' nij sí yanj rihaan mesá ga so', ne che'é

dan ne ca'vej rá so' tari' so' se-nānā so' se vaa se qui'yaj so' ndaa vaa taj chana yaan yo' rihaan so' a.

<sup>27</sup> Gaa ne nu' ca'née so' man sí ticavi' man sí cu'naj Juan, ne ca'ne' so' suun se vaa nicaj so' cúu yave Juan ca'na' so' a.

<sup>28</sup> Gaa ne ca'anj sí ticavi' man Juan taga', ne ca'ne' so' cúu yave Juan, ne ca'née so' cúu yave Juan rque aga' rco'oo, nicaj so', ca'na' so', ne rqué so' man chana yaan, ne nago' chana yaan yo' man ni' no' a.

<sup>29</sup> Gaa ne gaa cuhi' nana rihaan nij sí tucu'yón se-nānā Juan se vaa cavi' Juan, ne ca'na' nij so', ne nicaj nij so' cúu man Juan, cachin' nij so' rque yu'uj yuvej a.

*Nana nihánj taj xna'anj se vaa ca'vee quirii Jesucristó se chá 'un' mǐj snó'o a*

<sup>30</sup> Dan me se nij sí ca'née Jesucristó ca'anj nata' rihaan yuvii che'é so' ro', cunuu chre' nij so' ga Jesucristó, ne nata' nij so' rihaan Jesucristó che'é cunudanj nij suun sa' nocoo qui'yaj nij so' do', che'é cunudanj nij nana tucu'yón nij so' man nij yuvii do' a.

<sup>31</sup> Gaa ne cataj Jesucristó rihaan nij so' a:

—Ca'anj ní' doj rej tacaan rej taj vaj yuvii ne, gaa ne ca'vee naraan rá nij soj doj á —taj Jesucristó rihaan nij so' a.

'O se ca'na' ndo'o yuvii do', ca'anj ndo'o yuvii do', ne ne vaa ya'núj rihaan nij so' chá nij so' a doj chraa a.

<sup>32</sup> Gaa ne cavii nij so' rque rihoo chée rihaan na, ne ca'anj orún' nij so' rej tacaan a.

<sup>33</sup> Tzaj ne quene'en ndo'o nij yuvii se vaa ca'anj nij so', ne xcaj yuvii cuenta se vaa ca'anj nij so', qui'yaj nij sí quene'en, gaa ne chée tacoj nij yuvii man cunudanj nij chuman' naj rej yo', ne cunánj nij yuvii, cunuu chre' nij yuvii rej ca'anj nij tuvii' Jesucristó, ne asino nij yuvii cuhi', ne na'vij nij yuvii ca'na' Jesucristó a.

<sup>34</sup> Ne nanij Jesucristó rá rihoo, ne quene'en so' se vaa aj mán uxrá yuvii, ne cunuu 'eje rá so' man nij yuvii a. 'O se ase vaa matzin' nuvi' sí tumé man vaa nij yuvii, ni'yaj Jesucristó, gaa ne guun che'e so' tucu'yón ndo'o so' se-nānā so' man nij yuvii a.

<sup>35</sup> Dan me se cachén ndo'o orá, gaa ne ca'na' nij sí tucu'yón se-nānā Jesucristó rihaan Jesucristó, gaa ne cataj nij so' se vaa:

—Rco' quij uun me nihánj, ne taj se chá chá nij yuvii nihánj, ne cachén ndo'o orá nanj á.

<sup>36</sup> Qui'yáá so' se ndo'o, ne na'nej so' chrej man nij yuvii, ca'anj nij yuvii chuman' naj nichrun' do', nij rancho naj nichrun' do', quiraan nij yuvii se chá chá nij yuvii nanj á —taj nij sí tucu'yón se-nānā Jesucristó rihaan Jesucristó a.

<sup>37</sup> Gaa ne cataj Jesucristó rihaan nij so' a:

—Go' ma'an soj se chá chá nij yuvii á —taj so' a.

Gaa ne cataj nij so' rihaan Jesucristó a:

—Ca'anj núj go' núj sa'anj vaa tu'vee yuvii 'yaj suun tunj yavii ne quiraan núj rachrúun, ne rque núj chá nij yuvii, rá so' na' —taj nij so' rihaan Jesucristó a.

<sup>38</sup> Gaa ne cataj Jesucristó rihaan nij so' a:

—Me daj rachrúun vaa rihaan soj ga. Cavii soj, ne xcaj soj cuenta á —taj so' a.

Gaa ne ca'anj nij so' qui'yaj contá nij so' rachrúun vaa rihaan nij so', gaa ne canicaj nij so', ne cataj nij so':

—Vaa 'un' guęę rachrúun ne vjį guęę xcuaj rihaan núj nanj á —taj nij so' rihaan Jesucristó a.

<sup>39</sup> Gaa ne ca'ne' Jesucristó suun rihaan nij yuvij se vaa ca'anj cayáan cunudanj nij yuvij rihaan coj chrin', ne ca'anj cumān x'ne' nij yuvij rihaan coj chrin', taj Jesucristó rihaan nij yuvij a.

<sup>40</sup> Gaa ne naqui'yaj x'ne' nij yuvij man nij yuvij, ne cayáan nij yuvij rihaan coj chrin', ne dan me se cientó yuvij do', vjį chíhaa chí' yuvij do', me 'o 'o x'ne' nij yuvij a.

<sup>41</sup> Gaa ne quita'aa Jesucristó 'un' nij rachrúun ne vjį roj xcuaj, gaa ne ni'yaj so' rej xta', ne nago' so' graciá rihaan Diose, gaa ne cuxra' ta'aj so' man rachrúun yo', ne caxrij so' ston nij sí tucu'yón se-nānā so', che'é rej caxrij nij so' ston nij yuvij a. Gaa ne cuxra' ta'aj so' nee xcuaj chá cunudanj nij yuvij a.

<sup>42</sup> Gaa ne chá taran' nij yuvij, ne caraa rque cunudanj nij so',

<sup>43</sup> ne ndaa quináj ndo'o se chá, qui'yaj nij yuvij a. Gaa ne naqui'yaj chre' nii se vaa quináj tu'va yuvij, ne caraa yo'ó chuvij ya scaa, ne ta'aj rachrúun do', ta'aj nee xcuaj do', me se chá naqui'yaj chre' nii a.

<sup>44</sup> Ne nij snó'o rqué Jesucristó chraa me se 'un' mįj snó'o me nij so' a.

#### *Nana nihánj taj xna'anj se vaa cachée Jesucristó rihaan na a*

<sup>45</sup> Gaa ne ra'yanj ca'ne' Jesucristó suun rihaan nij sí tucu'yón se-nānā so' se vaa cavij nij so' rihoo chée rihaan na ca'anj nij so' rej xco na lacuaná yo' ndaa chuman' cu'naj Betsaida, quitaj yaan nij so' rihaan Jesucristó, ne dan me se ma'an Jesucristó na'nej chrej man nij yuvij, taj Jesucristó rihaan nij sí tucu'yón se-nānā so' a.

<sup>46</sup> Dan me se ca'anj nij so', ne cataj Jesucristó rihaan nij yuvij se vaa ca'vee ca'anj nij yuvij a. Gaa ne cavij so' raą quij, ne cachín ni'yaj so' rihaan Diose a.

<sup>47</sup> Dan me se daj doj cata' güii raą quij, ne vaj rihoo tanuų rihaan na lacuaná, ne orún' Jesucristó me sí nicun' rihaan yo'óo a.

<sup>48</sup> Ne quene'en so' man nij sí tucu'yón se-nānā so' se vaa güéj ndo'o rihoo yo' rihaan na qui'yaj nana, che'é se go' nana rej rihaan rihoo yo' a. Dan me se yan' si'nu' ca'anj Jesucristó rej vaj nij so', chée tacoj uun so' rihaan na yo', vaj so' nanj adonj. Ne guun rá so' cachēn so' rej x'nuj nij so' a.

<sup>49</sup> Ne quene'en nij sí tucu'yón se-nānā so' man so' se vaa chée uun so' rihaan na, ne guun rá nij so' se vaa ta'naj me so', ne che'é dan caguáj ndo'o nij so' a.

<sup>50</sup> O se quene'en cunudanj nij so' man so', ne cuchu'vi' ndo'o nimán nij so' a. Veé dan, ne nu' cataj Jesucristó rihaan nij so' a:

—Naqui'yaj nucaj soj nimán soj ei. 'Uņj 'na' ei. Se cuchu'vi' soj ma' —taj so' rihaan nij so' a.

<sup>51</sup> Gaa ne catúj so' rque rihoo rej nuų nij sí tucu'yón se-nānā so', gaa ne canicun' nana yo', ne ca'anj ndo'o rá nij so' a.

<sup>52</sup> 'O se ne xcaj sa' nij so' cuentá che'é se nucaj nicaj Jesucristó gaa cuxra' ta'aj Jesucristó rachrúun chá nij yuvij a. Maan se nichraj ndo'o nimán nij so' a.

#### *Nana nihánj taj xna'anj se vaa nari' nucaj nij sí ran' man rej cu'naj Genesaret, qui'yaj Jesucristó a*

<sup>53</sup> Gaa ne cuchu'vi' nij so' tu'va na lacuaná rej cu'naj Genesaret, ne numįj nij so' rihoo tu'va na lacuaná a.

<sup>54</sup> Gaa ne nanij nij so' rá rihoo, ne nu' cunuu yaan nij síi man rej yo' man Jesucristó,

<sup>55</sup> ne yoo ca'anj cunudanj nij síi yanj nu' anicaj, ne guun che'e nij so' cuchruj nij so' tuvi' nij so' síi ran' rihaan yuvée, ne quitáa chihá nij so' nij síi ran' yo', vaj nij so' me rej ma'an vaj Jesucristó a.

<sup>56</sup> Ne me ma'an chuman' ra'a do', chuman' noco do', rancho do', catúj Jesucristó me se cuchruj nij yuvij man nij síi ran' rihaan yu'vee, ne cachín ni'yaj uxrá nij yuvij rihaan Jesucristó se vaa ca'vej rá Jesucristó cano ra'a nij so' doj tu'va sagan' so' a. Ne nu' nij síi canó ra'a doj man so' ro', nahuun sa' cunudanj nij so' cuaj nanj adonj.

## 7

*Nana nihánj taj xna'anj me che'é ne na'ya' nij síi tucu'yón se-nana Jesucristó gaa chá nij so' chraa a*

<sup>1</sup> Gaa ne quinichrun' síi fariseo do', quinichrun' síi naqui'yaj cuu se-tucuanj Moisés do', rihaan Jesucristó, ne síi cavii chuman' Jerusalén me nij so' a.

<sup>2</sup> Ne quene'en nij so' se vaa gaa chá nij síi tucu'yón se-nana Jesucristó chraa, ne ne na'ya' nij so', ne che'é dan ne naruvij ra'a nij síi tucu'yón se-nana Jesucristó ni'yaj Diose, rá nij síi fariseo do', nij síi naqui'yaj cuu se-tucuanj Moisés do' a.

<sup>3</sup> O se xa' nij síi fariseo ga cunudanj yo'ó nij síi israelitá, tzaj ne a doj ne chá nij so' chraa sese ataa na'ya' nij so' ma'. Danj 'yaj nij so', che'é se noco' nij so' tucuaán cuchruj nij síi chij cayáan gaa naá a.

<sup>4</sup> Ne gaa 'na' nij so' yu'vee, ne ane nij so', ne sese ataa cane nij so', ne ne chá nij so' chraa a ma'. Ne vaa uxrá doj tucuaán nicaj nij so', ne ndaa vaa tucuaán che'é tazá do', che'é xrux do', che'é aga' do', daj qui'yaj nij so' gaa na'nu' nij so' man nij rasuun vaa nacaj do' a.

<sup>5</sup> Gaa ne xná'anj nij síi fariseo ga nij síi naqui'yaj cuu se-tucuanj Moisés man Jesucristó, ne cataj nij so', ne:

—Nij síi tucu'yón se-nana so' me se me che'é ne noco' nij so' tucuaán cuchruj nij síi chij cayáan gaa naá, ne nihánj me se chá nij so' chraa, ne ne naruvij ra'a nij so' ni'yaj Diose a ma' —taj nij so' rihaan Jesucristó a.

<sup>6</sup> Gaa ne cataj Jesucristó rihaan nij so' a:

—Cunaj uxrá vaa nana nata' síi cu'naj Isaías gaa naá gaa ca'mii so' che'é nij soj sij nucu'í rá, ne dan me se ca'mii so' se-nana Diose, ne cataj so' se vaa: “Yuvij nihánj me se gan' uxrá nicun' nimán nij so' ga 'unj nanj adonj.

<sup>7</sup> Na'v'j rma'an nij so' rihanj, ne dan me se nanj se-nana nij síi man rihaan chumij tucu'yón nij so' rihaan tuvi' nij so', ne taj nij so' se vaa se-nanaj me se-nana nij yuvij yo' a”, taj se-nana Diose nata' síi cu'naj Isaías gaa naá a.

<sup>8</sup> O se aj tanáj xco soj nana cataj xna'anj Diose rihaan ní', ne nanj tucuaán cuchruj yuvij uun noco' soj nanj ei —taj Jesucristó,

<sup>9</sup> ne cataj uún so' se vaa— Cunaj uxrá vaa 'yaj soj, ne uta' yanij soj nana cataj xna'anj Diose rihaan ní', che'é rej ca'vee canoco' soj se-tucuanj ma'an soj asan.

<sup>10</sup> O se ca'ne' Moisés suun se vaa: “Caraa cochróo so' rihaan rée so' do', rihaan níi so' do' á”. Tzaj ne: “Síi a'mii chre rihaan rej do', rihaan níi do', me se vaj so' ne nu' che'e caví' so' á”. Danj vaa cataj xna'anj Moisés rihaan ní' a.



<sup>11</sup> Tzaj ne taj soj se vaa sese cataj yo'q so' rihaan rej so' do', rihaan nii so' do', se vaa aj rque so' nu' si'yaj so' rihaan Diose ne che'é dan se ca'vee racuj so' man rej so' do', man nii so' do', taj soj a.

<sup>12</sup> Ne ne ca'vej soj racuj so' man rej so' do', man nii so' do' a.

<sup>13</sup> Dan me se danj inanj a'mii soj gaa tucu'yón soj se-nana nij síi man gaa naá, ne axríj yuve soj man se-nana Diose nanj adonj —taj Jesucristó rihaan nij síi fariseo do', rihaan nij síi naquiyaj cuu se-tucuanj Moisés rihaan yuvij do' a.

<sup>14</sup> Gaa ne canacúun uún Jesucristó man nij yuvij ca'na' nij yuvij rihaan so', gaa ne cataj so' rihaan nij yuvij a:

—Cuno taran' soj nana nihánj, ne xcaj soj cuentá nedj'.

<sup>15</sup> A doj rasuun atúj tu'va yuvij se ca'vee qui'yaj chi'ij man yuvij ma'. Se avii tu'va yuvij ro', 'yaj chi'ij man yuvij adonj.

<sup>16</sup> Sese taj yu'uj xréé soj, ne cuno soj nana nihánj ei —taj Jesucristó rihaan nij yuvij a.

<sup>17</sup> Dan me se corá ca'anj yanj Jesucristó ga nij síi tucu'yón se-nana so' rihaan nij yuvij, ne catúj nij so' rá ve', gaa ne xná'anj nij síi tucu'yón se-nana Jesucristó man so' me taj nana ca'mii so' che'é se atúj tu'va yuvij gaa.

<sup>18</sup> Gaa ne cataj Jesucristó rihaan nij so' a:

—Vaa soj vaa, ne ne xcaj ma'an soj do' cuentá a na'. Ne ne'en soj se vaa nu' se atúj tu'va yuvij ro', se ca'vee qui'yaj chi'ij yo' man yuvij a.

<sup>19</sup> 'Q se ne atúj yo' ndaa nimán yuvij ma'. Tananj achén yo' rque yuvij, ne urihanj yo' gaa re'é yuvij nanj á —taj Jesucristó, ne nana yo' taj se vaa ca'vee cha yuvij me ma'an rasuun ne nuveé cacun' me yo' rihaan Diose a.

<sup>20</sup> Ne cataj uún so' a— Tzaj ne se urihanj tu'va yuvij ro', yo' me nana avii nimán yuvij, ne nana yo' me 'yaj chi'ij ndo'o man yuvij adonj.

<sup>21</sup> 'Q se nihánj me se chi'ij avii nimán yuvij a. Se chi'ij do', che'é yan qui'yaj ituu si'yaj tuvi' do', yan cotoj ga nica tuvi' do', yan ticavij man tuvi' do',

<sup>22</sup> yan guun rá nicaj si'yaj tuvi' do', yan tihaj yu'unj man tuvi' do', yan ni'yaj ndo'o man yo'ó chana do', yan guun xcoj ruvaa rá ni'yaj tuvi' do', che'é yan nachri' ni'yaj man tuvi' do', yan ca'mii xta' do', yan qui'yaj rma'an náa guun se nij do', me nu' se avii nimán yuvij,

<sup>23</sup> ne nu' yo' me se avii nimán yuvij ne 'yaj chi'ij man yuvij nanj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa cuchumán rá 'q chana sirofenicia se vaa racuj Jesucristó man no' a*

<sup>24</sup> Gaa ne canicun' Jesucristó, ne curihanj so' rej yo', ne ca'anj so' rej naj chuman' cu'naj Tiro a. Ne catúj so' rá 'q ve', ne ne ca'vej rá so' quene'en nij yuvij me rej vaj so' a. Tzaj ne ne ca'vee qui'nij yuve so' ma'.

<sup>25</sup> Tananj ra'yanj cuchí' nana rihaan 'q chana se vaa yanj so', ne ta'nii chana ro', me nú nuu nana chree nimán, ne ca'na' chana, ne canicun' ruj chana yo' rihaan Jesucristó a.

<sup>26</sup> Dan me se chana sirofenicia a'mii xna'ánj griego me chana yo', ne cachín ni'yaj no' rihaan Jesucristó se vaa quirij Jesucristó nana chree nimán ta'nii no' a.

<sup>27</sup> Gaa ne cataj Jesucristó rihaan no' a:

—Dan me se canicún' so' doj, ne cha asino nij xnii tucua, ne ne'en so' se vaa se ca'vee cata'aa ní' co'oo man rihaan nij xnii ne go' ní' cha nij chuvee ma'. Dan me se ndaa síj chá nij xnii tucua, gaa ne sese náj se chá tu'va nij

xnii yo', gaa ne ca'vee go' chá chuvee nanj adonj. Che'é dan ase vaa ne nó xcúún yuvii ca'nee yuvii rachrúún tu'va ta'níi yuvii go' yuvii rachrúún yo' chá chuvee ro', danj vaa ne nó xcúnj racuíj man soj sij yanij a man adonj. Maan inanj ma'an nij yuvii israelitá me nó xcúún 'unj racuíj 'unj nanj adonj —taj Jesucristó rihaan chana yo' a.

Gaa ne cataj no':

<sup>28</sup> —Veé dan vaa guee, Señor. Tzaj ne nij chuvee nicun' rque chruun mesa ro', chá nij xo' tachruu ayuu tu'va nij xnii nanj á. Ne ase vaa chuvee chá tachruu vaa 'unj rihaan so' nanj adonj. Che'é dan me ndo'o raj racuíj so' doj manj, raj nanj adonj —taj chana yo' rihaan Jesucristó a.

<sup>29</sup> Gaa ne cataj Jesucristó:

—Che'é nana ca'mii so' nihánj ro', ca'vee cavii so' ca'anj so', ne aj curihanj nana chree nimán ta'níi so' nanj ei —taj so' rihaan no' a.

<sup>30</sup> Gaa ne ca'anj chana, catúj chana rá ve' tucua chana, ne quene'en chana se vaa dínj naj ta'níi chana rihaan yuvéé, ne aj curihanj nana chree nimán ta'níi chana adonj.

*Nana nihánj taj xna'anj che'é síi naxra' tu'va do', nachuguun xrée do', qui'yaj Jesucristó a*

<sup>31</sup> Gaa ne curihanj uún Jesucristó rej naj chuman' Tiro, ne cachén so' sca'núj chuman' cu'naj Sidón, ca'anj uún so' tu'va na lacuaná cu'naj Galilea, ne cachén so' sca'núj rej cu'naj Chí' Chuman' a.

<sup>32</sup> Ne nicaj nij yuvii man 'o síi so' o ya'mii ca'na' nij yuvii rihaan Jesucristó, ne cachín ni'yaj uxrá nij yuvii rihaan Jesucristó se vaa cuta' ra'a Jesucristó xráá síi so' o ya'mii yo' a.

<sup>33</sup> Gaa ne nicaj Jesucristó man síi so' o ya'mii ca'anj yanij so' rihaan yo'ó nij yuvii, gaa ne tucua'anj Jesucristó ra'a Jesucristó yu'uj xrée síi so' o ya'mii, gaa ne quirii talúj Jesucristó ra'a Jesucristó, ne canó ra'a Jesucristó daa síi so' o ya'mii yo' a.

<sup>34</sup> Gaa ne ni'yaj Jesucristó rej xta', gaa ne caráchej Jesucristó, ne cataj Jesucristó:

—Efata —taj Jesucristó, ne nana “Efata” taj: “Nachuguun xrée so' á”, me nana ca'mii Jesucristó rihaan síi so' o ya'mii yo' a.

<sup>35</sup> Gaa ne nachuguun xrée so', ne nahuun sa' daa so', gaa ne ca'mii sa' so' a.

<sup>36</sup> Gaa ne ca'ne' Jesucristó suun rihaan nij síi quene'en daj qui'yaj Jesucristó che'é síi so' o ya'mii se vaa se guun cataj xna'anj nij so' rihaan a 'o yuvii a. Dan me se doj a na'vej rá Jesucristó cataj xna'anj nij so' rihaan tuvi' nij so', tzaj ne doj a nata' nij so' rihaan tuvi' nij so' a.

<sup>37</sup> Gaa ne ca'anj uxrá rá nij yuvii xcaj cuentá daj qui'yaj Jesucristó, ne cataj nij yuvii se vaa sa' uxrá vaa nu' se vaa qui'yaj Jesucristó, ne ndaa nachuguun xrée nij síi so' o do', ndaa a'mii sa' nij síi ya'mii do', 'yaj Jesucristó, taj nij yuvii yo' a.

## 8

*Nana nihánj taj xna'anj se vaa go' Jesucristó se chá rihaan ca'anj mjí snó'o a*

<sup>1</sup> Ne güii dan me se vaj uún que'ee yuvii ga Jesucristó, ne nuvi' uún se chá rihaan nij yuvii, gaa ne canacúún Jesucristó man nij síi tucu'yón se-nana so' se vaa ca'na' nij so' rihaan so', gaa ne cataj so' rihaan nij so' a:

2 —'Ee rá 'unj man nij yuvii nihánj, ne nihánj me se síj va'nuj ya güii 'o vaj nij yuvii ga 'unj, ne taj vaj se chá rihaan nij yuvii cuano a ma'.

3 Ne sese na'nej 'unj chrej man nij yuvii cuano quinán' nij so' gaa na'aan rque nij so', ne ninaj nij so' rá chrej, ne dan me se ta'aj nij so' me síi yanj rej gan' ndo'o nanj adonj —taj Jesucristó rihaan nij síi tucu'yón se-nana so' a.

4 Gaa ne cataj nij so' rihaan Jesucristó a:

—Tzaj ne rej tacaan unu me nihánj, ne nuvi' rachrúun nihánj go' ní' chá nij yuvii a ma' —taj nij síi tucu'yón se-nana Jesucristó a.

5 Gaa ne xná'anj Jesucristó man nij so', cataj so':

—Me daj rachrúun vaa rihaan soj ga —taj so', xná'anj so' man nij síi tucu'yón se-nana so' a.

—Chij rachrúun vaa rihaan núj nanj á —taj nij so' rihaan Jesucristó a.

6 Gaa ne ca'ne' Jesucristó suun rihaan nij yuvii se vaa ca'anj cayáan nij yuvii rihaan yo'óo a. Gaa ne nicaj so' chij nij rachrúun, ne nago' so' graciá rihaan Diose, gaa ne cuxra' ta'aj so' rachrúun yo', ne caxrj so' ston nij síi tucu'yón se-nana so', ne tucuachén nij so' rihaan nij yuvii, ne dan me se rqué nij so' rachrúun yo' rihaan nij yuvii a.

7 Ne nicaj Jesucristó doj xcuaj le'ej uún, ne nago' so' graciá rihaan Diose che'é nij xcuaj le'ej, ne cataj so' rihaan nij síi tucu'yón se-nana so' se vaa tucuachén nij so' ne xcuaj le'ej uún rihaan nij yuvii uún a.

8 Gaa ne chá cunudanj nij yuvii, ne ndaa caraa rque nij so' a. Gaa ne naqui'yaj chre' nii se vaa quináj tu'va nij yuvii, ne quisj 'o cunu' chij ya scaa caraa qui'yaj se quináj tu'va nij yuvii yo' a.

9 Dan me se cunudanj nij so' chá, ne quisj ndaa ca'anj mój yuvii chá nanj adonj.

Gaa ne na'née Jesucristó chrej man nij yuvii,

10 gaa ne nu' cavii Jesucristó ga nij síi tucu'yón se-nana so' rá rihoo chée rihaan na, ne ca'anj nij so' rej cu'naj Dalmanuta a.

*Nana nihánj taj xna'anj se vaa cachín nij síi fariseo se vaa qui'yaj Jesucristó 'o suun sa' nocoo quene'en nij so' a*

11 Dan me se curihanj doj nij síi fariseo, gaa ne guun che'e nij so' canó tuvi' nij so' ga Jesucristó, ne dan me se cachín ni'yaj nij so' rihaan Jesucristó se vaa raçuuj Diose man Jesucristó, ne qui'yaj Jesucristó 'o suun sa' nocoo quene'en nij so', gaa ne guun ya rá nij so' se vaa síi ca'née ya Diose me Jesucristó, rá nij so' a.

12 Gaa ne nucuaj ndo'o caráchej Jesucristó, ne cataj so' rihaan nij so' a:

—Ne me che'é me rá soj sij israelitá qui'yáj suun sa' nocoo quene'en soj ga. Dan me se daj chihaa mój se qui'yáj suun sa' nocoo che'é soj a ma' —taj Jesucristó rihaan nij síi fariseo yo' a.

13 Gaa ne tanáj Jesucristó man nij so', gaa ne cavii uún so' rque rihoo chée rihaan na, ne ca'anj so' rej xcó na lacuaná a.

*Nana nihánj taj xna'anj se vaa ne ca'vej rá Jesucristó cunq nij síi tucu'yón se-nana so' man nana tucu'yón nij síi fariseo do', síi cu'naj Herodes do' a*

14 Dan me se quini'yón nij síi tucu'yón se-nana Jesucristó nicaj nij so' rachrúun chá nij so', ne vaa orún' rachrúun rá rihoo vaj ga nij so' a.

15 Gaa ne ca'ne' Jesucristó suun rihaan nij so', cataj Jesucristó:

—Cutumé soj man soj se gaa nanj quirán' soj sayuun, qui'yaj se-levadura nij síi fariseo do', síi cu'naj Herodes do' á —taj Jesucristó no nij so' a.

16 Ne nuchruj raꝥ ndo'o nij sí tucu'yón se-nana Jesucristó che'é nana ca'mii so', ne:

—Che'é se taj rachrúun nicaj ní, ne che'é dan a'mii so' che'é levadura se 'yaj naraa nana rque rachrúun nanj adonj —taj nij so' a.

17 Ne aj ne'en Jesucristó daj uun nimán nij so', ne che'é dan cataj so':

—Me che'é nanó ndo'o rá soj se vaa taj rachrúun rihaan soj ga. Me che'é ataa xcaj soj cuentá ga. 'O se vaa nichraj ndo'o nimán soj nanj adonj.

18 'O se vaa rlij rihaan soj, tzaj ne ne ni'yaj soj a ma'. Vaa xrée soj, tzaj ne ne uno soj a ma'.

19 Ne ne nuú rá soj gaa vaa daj 'o 'un' gueꝥ rachrúun cuxra' ta'aj 'unj tzaj ne quisj chá cunu' 'un' mǐj snó'o, qui'yáj a. Ne me daj scaa se chá quináj tu'va yuvi' naqui'yaj chre' soj, rá soj ga —taj Jesucristó, xná'anj Jesucristó man nij so' a.

Gaa ne:

—Chuvj a —taj nij so' rihaan Jesucristó a.

20 Gaa ne cataj uún Jesucristó:

—Ne ne nuú rá soj gaa vaa daj 'o chij gueꝥ rachrúun cuxra' ta'aj 'unj tzaj ne quisj chá cunu' ca'anj mǐj yuvi', qui'yáj a. Ne me daj scaa se chá quináj tu'va yuvi' naqui'yaj chre' soj, rá soj ga —xná'anj uún Jesucristó man nij so' a.

Gaa ne:

—Chij a —taj nij so' rihaan Jesucristó a.

21 Gaa ne cataj Jesucristó rihaan nij so' a:

—Ne me che'é me ataa xcaj soj cuentá se vaa ca'vee rque 'unj nu' se vaa achiin man soj ne nuveé inanj che'é rej nanó rá soj che'é rachrúun me ca'mij rihaan soj che'é se-levadura nij sí fariseo do', sí cu'naj Herodes do' ma' —taj Jesucristó rihaan nij so' a.

*Nana nihánj taj xna'anj se vaa naxra' rihaan 'o sí tuchrii, qui'yaj Jesucristó a*

22 Gaa ne catúj Jesucristó ga nij sí tucu'yón se-nana so' rá chuman' cu'naj Betsaida a. Gaa ne nicaj yuvi' 'o sí tuchrii ca'na' nij yuvi' rihaan Jesucristó, ne cachúin ni'yaj nij yuvi' rihaan Jesucristó se vaa cutá' Jesucristó ra'a Jesucristó raꝥ sí tuchrii che'é rej naxra' rihaan sí tuchrii yo' a.

23 Gaa ne quita'aa Jesucristó ra'a sí tuchrii yo', ne curihanj so' rej tu'va chuman' ga sí tuchrii, ne quirii talúj Jesucristó rihaan sí tuchrii yo', ne cuta' ra'a Jesucristó xráa so', gaa ne xná'anj Jesucristó man so' a:

—Ruvi' rihaan so' na' —taj Jesucristó, xná'anj so' man sí tuchrii yo' a.

24 Gaa ne ni'yaj sí tuchrii yo' doj, gaa ne cataj so':

—Ne'én 'unj nij snó'o, ne ase vaa chruun vaa nij so', tzaj ne chéé nij so' ni'yaj 'unj nanj asanj —taj so' rihaan Jesucristó a.

25 Gaa ne cuta' ra'a uún Jesucristó rihaan sí tuchrii yo', gaa ne ni'yaj ni'yaj sí tuchrii, ne dan me se nahuun sa' nu' rlij rihaan so', ne curuvi' sa' cunudanj rasuun ni'yaj so' nanj adonj.

26 Gaa ne ca'neé Jesucristó man so' quinān' so', tzaj ne cataj Jesucristó rihaan so' se vaa:

—A doj se catúj so' rá chuman', ne se cataj so' rihaan a 'o nij yuvi', gaa ne se gaa nanj xcaj nij yuvi' cuentá daj qui'yáj che'é so' a —taj Jesucristó rihaan so' a.

*Nana nihánj taj xna'anj se vaa cataj xna'anj Pedró me sí me Jesucristó a*

<sup>27</sup> Gaa ne curihanj Jesucristó ga nij sí tucu'yón se-nana so' chuman' Betsaida yo', ne ca'anj nij so' nij chuman' ra'a noco' man chuman' cu'naj Cesarea de Filipino do' a.

Dan me se vaj nij so', ne xná'anj Jesucristó man nij sí tucu'yón se-nana so', ne cataj so':

—Daj taj nij yuvij che'é 'unj ga. Ne me sí mé 'unj, taj nij yuvij ga —taj Jesucristó, xná'anj so' man nij so' a.

<sup>28</sup> —Vaa sí taj se vaa sí cu'naj Juan sí cuta' ne man yuvij mé so' ei. Ne vaa sí taj uún se vaa sí cu'naj Elías sí nata' se-nana Diose gaa naá me uún so' chuguanj. Ne vaa sí taj uún se vaa yo'ó sí nata' se-nana Diose gaa naá me uún so' chiha'. 'O se danj taj 'o 'o nij yuvij che'é so' nanj adonj —cataj nij so' rihaan Jesucristó a.

<sup>29</sup> —Ne ma'an soj, gaa ne me sí mé 'unj, rá ma'an soj ga —taj Jesucristó, xná'anj so' man nij sí tucu'yón se-nana so' a.

Gaa ne cataj sí cu'naj Pedró:

—Sí ca'née Diose tinanii man yuvij rihaan sayuun mé so' ei —taj so' rihaan Jesucristó a.

<sup>30</sup> Gaa ne cataj xna'anj Jesucristó rihaan nij sí tucu'yón se-nana so' se vaa se nata' nij so' rihaan a 'ó yuvij me sí me so', taj so' a.

*Nana nihánj taj xna'anj se vaa cataj xna'anj Jesucristó se vaa cavi' so' ne cunyu i'na' uún so' a*

<sup>31</sup> Gaa ne guun che'e Jesucristó tucu'yón so' man nij sí tucu'yón se-nana so' se vaa che'é se sí ca'née Diose nıcaj yu'unj man yuvij me so' ro', che'é dan no xcuún so' quiran' ndo'o so' sayuun, qui'yaj nij sí uun chij do', nij xrej atá suun nocoj doj do', nij sí naqui'yaj cuu se-tucuanj Moisés rihaan nij yuvij do', ne nachri' nij so' ni'yaj nij so' man so', ne ticavi' nii man so', ne cachen va'nuj güii, gaa ne cunyu i'na' uún so', cataj so' a.

<sup>32</sup> Ne nucuaj ndo'o nata' so' nana yo' rihaan nij sí tucu'yón se-nana so' a. Gaa ne quirii yanj sí cu'naj Pedró man Jesucristó, ne guun che'e so' cataj so' se vaa ne nó xcuún Jesucristó ca'mij Jesucristó nana vaa danj a.

<sup>33</sup> Gaa ne canicaj Jesucristó, ne ni'yaj so' man nij sí tucu'yón se-nana so', ne cataj so' rihaan Pedró se vaa ne nó xcuún uxrá ma'an Pedró ca'mij Pedró danj, ne cataj so':

—Naxuun so' mán so' rihanj á. Na'vej raj quene'enj mán so' a ma'. 'O se ase tu'va sí chree sí cu'naj Satanás ro', danj tu'vá so' ei. Danj tu'vá so', che'é se ne acaj so' cuentá daj me rá Diose adonj. Maan se inanj acaj so' cuentá daj me rá yuvij nanj adonj —taj Jesucristó rihaan sí cu'naj Pedró a.

<sup>34</sup> Gaa ne canacúun Jesucristó man nij yuvij ca'na' nij yuvij rej nicun' so' ga nij sí tucu'yón se-nana so', gaa ne cataj so' rihaan taran' nij so' a:

—Sese me rá yo'ó so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quiran' uxrá so' sayuun do', ca'vee se ndaa cachron nii man so' rihaan rcutzé do', tzaj ne yo'ó qui'yaj suun so' che'ej, ne yo'ó canoco' raan so' manj adonj.

<sup>35</sup> Tzaj ne sese vaa 'o sí me rá tinanii man ma'an rihaan sayuun, ne vaa güii, ne yo'ó cavi' nimán so' adonj. Tzaj ne sese cavi' yo'ó so' che'é se vaa me so' sí noco' manj do', che'é se nata' so' se-nanaj nana sa' do', ne vaa güii, ne cunyu i'na' uún so' adonj.

<sup>36</sup> Ne a me se quirij! 'o so' sese qui'yaj canaán so' nu' rasuun man rihaan chumiñ nihánj ne ca'anj ni'ya nimán so', rá soj ga. Daj chihaa mǐj se ca'vee cavij sa' so', qui'yaj rasuun man rihaan chumiñ nihánj a ma'.

<sup>37</sup> Tzaj ne ca'vee se navij nu' si'yaj yo'q so' rihaan chumiñ nihánj, tzaj ne sese gaa i'na' nimán so' nu' cavij nu' ca'anj, ne quinano rá so', rá soj na'. Daj chihaa mǐj se quinano rá so' a ma'. 'Q se cavij sa' uxrá so' nanj adonj.

<sup>38</sup> "Dan me se xa' sí uun na'aj ni'yaj manj ne uun na'aj ni'yaj se-nanaj ro', ase vaa nij sí chi'ij tumé ndo'o cacun' man rihaan chumiñ nihánj cuano vaa so' adonj. Ne vaa güii guun na'aj 'unj sij ca'née Diose nıcaj yu'unj man yuvij ni'yaj 'unj man so' asa' ca'na' uun 'unj rihaan chumiñ nihánj, ne dan me se uxrá ve'é gaa 'unj, qui'yaj Réé 'unj, ne ca'na' nij se-mozó so' ga 'unj asa' ca'na' 'unj nanj adonj —taj Jesucristó rihaan nij so'a.

## 9

<sup>1</sup> Gaa ne cataj uún so' se vaa:

—Ya ya cataj xna'anj 'unj rihaan soj cuano se vaa xa' ta'aj soj sij nicun' nihánj cuano, me se gaa ataa a cavij' ta'aj soj, ne ya quene'en ta'aj soj asa' guun che'e Diose nucuaj ndo'o guun chij Diose rihaan chumiñ nihánj nanj adonj —taj Jesucristó rihaan taran' nij so'a.

*Nana nihánj taj xna'anj se vaa chuguun ndo'o man Jesucristó ni'yaj nij sí tucu'yón se-nana so' a*

<sup>2</sup> Cachén vatan' güii, gaa ne nicaj Jesucristó man sí cu'naj Pedró do', sí cu'naj Jacobo do', sí cu'naj Juan do', ca'anj so' raá 'o quij xcaan rej taj vaj a 'ó yuvij ne a. Gaa ne yo'q cunuu ino cunudanj man Jesucristó ni'yaj nij sí tucu'yón se-nana so' yo' a.

<sup>3</sup> Ne dan me se cunuu catzij ndo'o sagan' so', ne ndaa raan lá ma'an sagan' so' ni'yaj nij so' a. Ne taj vaj a yo'ó sí man rihaan chumiñ nihánj ca'vee qui'yaj catzij yatjij ndaa rá se vaa sagan' Jesucristó a.

<sup>4</sup> Ne ni'yaj va'nuj nij so', ne dan me se naqui'yaa sí cu'naj Elías sí cane gaa naá ga sí cu'naj Moisés rihaan nij so', ne nanó roj so' cuentó ga Jesucristó ni'yaj nij so' a.

<sup>5</sup> Gaa ne cataj Pedró rihaan Jesucristó a:

—Cunaj uxrá vaa mán núj nihánj ga so', maestro. Ne qui'yaj núj va'nuj ve' yacataj cane soj nanj á. 'Q ve' cané so', ne yo'ó ve' cané sí cu'naj Moisés, ne yo'ó ve' cané sí cu'naj Elías ei —taj Pedró rihaan Jesucristó a.

<sup>6</sup> 'Q se ne quene'en uxrá Pedró daj me che'é ca'mii so' rihaan Jesucristó danj a ma'. 'Q se cuchu'vi' ndo'o va'nuj nij so' che'é se vaa quene'en nij so' nanj adonj.

<sup>7</sup> Gaa ne ca'na' 'o ngaa, ne caráan ngaa man taran' nij so' a. Gaa ne Diose ro', ca'mii nana cuno nij so' rque ngaa yo', ne cataj Diose a:

—Síi nihánj me ta'nij adonj. 'Ee raj man so' adonj. Cuno soj rihaan so' ei —taj Diose cuno nij so' a.

<sup>8</sup> Gaa ne nu' ni'yaj nij so', ne daj orún' Jesucristó nicun' ga nij so', quene'en nij so' nanj adonj.

*Nana nihánj taj xna'anj se vaa ase vaa sí cu'naj Elías ro', danj vaa sí cu'naj Juan sí cuta' ne man yuvij a*

<sup>9</sup> Gaa ne gaa nanij nij so' tacóo quij yo' me se ca'ne' Jesucristó suun rihaan nij so' se vaa se nata' nij so' rihaan a doj yuvij che'é se vaa quene'en nij so' a. Yo'q dınj gaa tu'va nij so' che'é rasuun quene'en nij so' a. Ndaa quisij cavi'

so' ne cunuu i'na' uún so', gaa ne ca'vee nata' nij so' se vaa quene'en nij so' daj quiran' so' sí ca'née Diose nıcaj yu'unj man yuvıı, taj Jesucristó rihaan nij so' a.

<sup>10</sup> Ne yo' o nuú rá nij so' nana yo', ne xná'anj ndo'o nij so' man tuvi' ma'an nij so' me che'é me cataj Jesucristó se vaa cavı' so' ne cunuu i'na' uún so' a.

<sup>11</sup> Gaa ne xná'anj nij so' man Jesucristó, cataj nij so':

—Me che'é taj nij sí naqui'yaj cıu se-tucuanj Moisés rihaan yuvıı se vaa asino ca'na' sí cu'naj Elías sí nata' se-nana Diose gaa naá, gaa ne ca'vee ca'ne' Diose cacun' che'é yuvıı ga —taj nij sí tucu'yón se-nana Jesucristó, xná'anj nij so' man Jesucristó a.

<sup>12</sup> Gaa ne cataj Jesucristó rihaan nij so' a:

—Ya a'mii nij sí naqui'yaj cıu se-tucuanj Moisés, taj nij so' se vaa asino ca'na' sí cu'naj Elías, gaa ne naqui'yaj sa' so' nu' rasuun adonj. Ne me che'é taj danj Diose se vaa sí ca'née Diose nıcaj yu'unj man yuvıı me se quiran' ndo'o so' sayuun ne nachrı' nij yuvıı nı'yaj nij yuvıı man so', rá soj ga.

<sup>13</sup> Tzaj ne cataj xna'anj 'unj rihaan soj se vaa aj ca'na' ya sí cu'naj Elías, tzaj ne qui'yaj ya yuvıı ndaa vaa me rá ma'an nij yuvıı man so' ndaa vaa taj danj Diose che'é so' nanj adonj. Che'é dan ca'vee xcaj soj cuentá daj quıran' 'unj qui'yaj uún nij yuvıı adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa nahuun sa' 'o xnii nuu nana chree nimán, qui'yaj Jesucristó a*

<sup>14</sup> Dan me se cuchi' nij so' rej nicun' yo'ó nij sí tucu'yón se-nana Jesucristó, ne quene'en nij so' se vaa mán que'ee yuvıı anıcaj rej nicun' nij so', ne nicun' doj nij sí naqui'yaj cıu se-tucuanj Moisés, ne ca'mii cunu' uxrá nij so' ga nij sí tucu'yón se-nana Jesucristó yo' a.

<sup>15</sup> Ne nu' quene'en nij yuvıı man Jesucristó, ne nu' ca'anj ndo'o rá nij yuvıı, ne cunánj nij yuvıı ndaa rej vaj Jesucristó ca'mıı nij so' ga so' a.

<sup>16</sup> Gaa ne xná'anj Jesucristó man nij yuvıı a:

—Me che'é me ca'mii cunu' nij soj ga nij sí tucu'yón se-nana ga —taj so' rihaan nij yuvıı a.

<sup>17</sup> Gaa ne yo' o nij yuvıı cataj rihaan Jesucristó a:

—'Unj me se nıcaj 'unj ta'nıj ca'ná' 'unj nano' 'unj mán so', maestro. Ne ta'nıj me se ya'mıı so' che'é se nuu nana chree nimán so',

<sup>18</sup> ne me rej ma'an me rá nana chree quıta'aa nana chree man so', ne cagan' nana chree man so' rihaan yo'óo, ne avıı yatan' tu'va so', ne chá ruj so' cúú yan' so', ne nuu chrúnj nu' so' nanj adonj. Ne cataj 'unj rihaan nij sí tucu'yón se-nana so' se vaa quıriıı nij so' man nana chree nimán ta'nıj, tzaj ne ne ca'vee qui'yaj canaán nij so' ma' —taj snó'o yo' rihaan Jesucristó a.

<sup>19</sup> Gaa ne cataj Jesucristó rihaan nij yuvıı a:

—Dan me se sí ne amán rá me soj sıj man rihaan chumiıı nihánj cuano, ne a me daj cachej ga soj, ne a me daj gaa naj nımanj nı'yaj 'unj man soj, gaa ne ca'vee qui'yaj canaán soj ga. Nıcaj soj man xnıı ca'na' soj rihanj cuaj á —taj Jesucristó a.

<sup>20</sup> Gaa ne nıcaj nij yuvıı man xnıı ca'na' nij yuvıı rihaan Jesucristó a. Ne dan me se gaa quene'en nana chree man Jesucristó, ne nu' snúú xnıı, ne naxru' xnıı, qui'yaj nana chree yo', ne natúıı rmiıı xnıı, ne cavıı yatan' tu'va xnıı a.

<sup>21</sup> Gaa ne xná'anj Jesucristó man rej xnıı, cataj Jesucristó:

—Me daj güıı ran' ta'nıı so' danj ga —taj Jesucristó rihaan rej xnıı a.

<sup>22</sup> Gaa ne cataj rej xnii:

—Danj ran' so' asij ne'ej me so', ne que'ee ndo'o cagan' nana chree man so' rihaan ya'an do', rihaan na do', qui'yaj nana chree, che'é rej me rá nana chree cavi' so', tzaj ne sese ca'vee, ne cunu'u 'ee rá so' manj ne racu'j so' man nij ruguanj —taj rej xnii yo' rihaan Jesucristó a.

<sup>23</sup> Gaa ne cataj Jesucristó rihaan so' a:

—Taj che'é cataj so' nana “sese ca'vee” ma'. 'O se sí amán rá ni'yaj man Diose ro', ca'vee qui'yaj so' cunudanj nanj adonj —taj Jesucristó rihaan so' a.

<sup>24</sup> Nu' ca'mii Jesucristó danj, ne nu' caguáj rej xnii, cataj so':

—Amán rá 'unj ni'yaj 'unj Diose á. Racu'j so' manj cuchuman raj doj, Señor —taj so' rihaan Jesucristó a.

<sup>25</sup> Dan me se quene'en Jesucristó se vaa cunanj ndo'o yuvij ca'na' nij yuvij rej nicun' so', ne che'é dan ca'ne' Jesucristó suun rihaan nana chree yo', ne cataj Jesucristó:

—Rihaan so' nana chree qui'yaj ya'mii ne qui'yaj so'o man xnii nihánj a'mij, ne cataj xna'anj 'unj rihaan so' se vaa curihanj so' cuaj nimán so' cuano, ne daj chihaa mij se catúj uún so' nimán so' mei —taj Jesucristó rihaan nana chree yo' a.

<sup>26</sup> Gaa ne caguáj nana chree, ne guun snuj ndo'o xnii naxru' xnii, qui'yaj nana chree, ne dan me se curihanj nana chree nimán xnii yo' a. Gaa ne ase vaa sí cavi' ro', danj vaa xnii, naj xnii rihaan yo'óo, ne cataj nij yuvij se vaa ya ya cavi' so' a.

<sup>27</sup> Tzaj ne quita'aa Jesucristó ra'a xnii, ne naxcaj Jesucristó man xnii, ne naxagaa so' a.

<sup>28</sup> Dan me se corá catúj Jesucristó rá ve', ne inanj nij ma'an nij sí tucu'yón se-nana so' ro', man rá ve' ga so', ne xna'anj nij so' man so', ne cataj nij so':

—Me che'é ne guun nucuaj núj quirij núj man nana chree yo' ga —taj nij so' rihaan Jesucristó a.

<sup>29</sup> Gaa ne cataj Jesucristó rihaan nij so' se vaa:

—Xa' nana chree vaa danj ro', se ca'vee qui'yaj ní' curihanj nij so' nimán yuvij sese ne achíin ni'yaj ndo'o ní' rihaan Diose ma'. Dan me se cachinj ni'yaj uxrá', ne caraa gu'ee ndo'o, gaa ne ca'vee adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa cataj xna'anj uún Jesucristó se vaa cavi' so' ne cunu'u i'na' uún so' a*

<sup>30</sup> Gaa ne cavii Jesucristó ga nij sí tucu'yón se-nana so' rej yo', ne ca'anj nij so' estadó Galilea, ne ne ca'vej rá Jesucristó xcaj nij yuvij cuentá me rej vaj so' a.

<sup>31</sup> 'O se tucu'yón so' man nij sí tucu'yón se-nana so', ne dan me se cataj so' rihaan nij so' se vaa:

—'O se sí ca'née Diose nicaj yu'unj man yuvij mej, ne vaa güii, ne nago' nii manj rihaan yuvij adonj. Dan me se ticavi' nij yuvij manj, gaa ne cachén va'núj güii, gaa ne cunu'u i'na' uún 'unj nanj adonj —taj Jesucristó rihaan nij sí tucu'yón se-nana so' a.

<sup>32</sup> Tzaj ne ne cunó nij so' nana ca'mii Jesucristó, ne chu'vi' nij so' xna'anj nij so' man Jesucristó me taj nana yo' a.

*Nana nihánj taj xna'anj me sí me sí guun chij doj asa' guun chij Diose rihaan chumij nihánj a*



33 Gaa ne catúj Jesucristó ga nij sí tucu'yón se-nanā so' chuman' cu'naj Capernaum a.

Dan me se gaa mán nij so' rá ve', ne xná'anj Jesucristó man nij sí tucu'yón se-nanā so', ne cataj so':

—Me che'é me canó tuvi' nij soj gaa vaj ní' chrej asij cua'aa ga —taj Jesucristó, xná'anj so' man nij so' a.

34 Gaa ne cunuu dínj tu'va nij so' a. 'O se gaa vaj nij so' chrej, ne canó tuvi' nij so' ga ma'an tuvi' nij so' se vaa cataj nij so' me nij so' me sí guun chij doj a.

35 Gaa ne ca'anj quitaj Jesucristó chruun xlá, ne canacúún so' man chujij nij so' se vaa ca'ná' nij so' rihaan so', gaa ne cataj so' rihaan nij so' a:

—Me ma'an 'o sí me rá guun chij doj, ne so' me sí guun sí noco', ne ndaa guun so' mozó rihaan daj a tuvi' so' adonj —taj Jesucristó rihaan chujij nij so' a.

36 Gaa ne nicaj Jesucristó man 'o ne'ej, ne cachrón so' man ne'ej yo' tanuu nij sí tucu'yón se-nanā so', ne na'yaan so' man ne'ej, ne cataj so' rihaan nij sí tucu'yón se-nanā so' a:

37 —Me ma'an 'o sí aráj cochroj ne a'mii sa' so' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj. Dan me se sí a'mii sa' ga 'unj me se nuveé orún' 'unj me a'mii sa' so' ga ma'. Maan Diosé ya sí ca'néé mán 'unj rihaan chumij nihánj me aráj cochroj ya so' ne a'mii sa' ya so' ga vaa nanj adonj —taj Jesucristó rihaan nij sí tucu'yón se-nanā so' a.

*Nanā nihánj taj xna'anj se vaa cataj xna'anj Jesucristó se vaa me ma'an sí ne unu' ga so' me tuvi' so' a*

38 Cataj sí cu'naj Juan rihaan Jesucristó a:

—Quene'en núj man 'o sí ata' tu'va se-chuvií so', ne urihanj nanā chree nimán nij yuvij, 'yaj so', nanj maestro. Tzaj ne caráán núj chrej ca'mii so' ne se qui'yaj so' danj, che'é se nuveé sij cheé ga ní' me so', taj núj, nanj maestro —taj Juan rihaan Jesucristó a.

39 Gaa ne cataj Jesucristó rihaan chujij nij sí tucu'yón se-nanā so' a:

—Ca'ne' sa' guee rá soj qui'yaj ma'an so' danj ei. 'O se taj a 'o sí ata' tu'va se-chuvií 'unj ne qui'yaj so' suun sa' nocoo che'é se-chuvií 'unj, ne sij, gaa ne canicaj so' ne ca'mii chree so' che'é 'unj ma'.

40 'O se xa' sí ne unu' ga ní', tzaj ne tuvi' ní' me so' adonj.

41 'O se a me ma'an yo' sí rqué doj na co'o nij soj che'é se-chuvií 'unj, ne ya ya cataj xna'anj 'unj rihaan soj se vaa daj chiháa mij se quinavij se sa' naru'vee Diosé rihaan sí rqué doj na yo' co'o soj ma'.

*Nanā nihánj taj xna'anj daj quiran' sí qui'yaj chí'ij nimán 'o sí cuchumán rá ni'yaj man Jesucristó a*

42 "Dan me se me ma'an 'o sí qui'yaj chí'ij nimán 'o sí le'ej amán rá ni'yaj manj, ne ca'vee a doj cavij sa' sí qui'yaj danj sese toco' nii 'o yuvej xij vāj 'núú trigó gaán chihá so' ne tagüéj nii man so' rque na ya'anj nanj adonj. Dan me se doj a sayuun quiran' so', sese qui'yaj chí'ij so' nimán 'o sí le'ej amán rá ni'yaj manj adonj.

43 "Dan me se sese ra'á so' me rá qui'yaj cacun', ne táa a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' ei. Taj se 'yaj se nuj se taj yan vaj ra'á so', tzaj ne ca'vee cayáán so' ga Diosé gaa ei. Tzaj ne sese quitaj ra'á so' ne qui'yaj yo' cacun', ne ca'anj so' rihaan ya'an, qui'yaj yo', ne

dan me se ya'an yo' me se daj chihaa mǐj se quina'áj ya'an yo' nuvji nigan' a mei.

<sup>44</sup> Ne nij síi man rihaan ya'an yo' me se se ca'vee cavi' xluú chá man nij so', ne daj chihaa mǐj se quina'áj ya'an rej cunuú nij so' cacaa nij so' a man adonj.

<sup>45</sup> Ne sese tacóo so' me rá qui'yaj cacun', ne táa a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' nanj ei. Taj se 'yaj se nuj se taj yan vaj tacóo so', tzaj ne ca'vee cayáan so' ga Diose ei. Tzaj ne sese quitaj tacóo so' ne qui'yaj yo' cacun', ne ca'anj so' rihaan ya'an, qui'yaj yo' ei.

<sup>46</sup> Ne nij síi man rihaan ya'an yo' me se se ca'vee cavi' xluú chá man nij so', ne daj chihaa mǐj se quina'áj ya'an rej cunuú nij so' cacaa nij so' a man adonj.

<sup>47</sup> "Veé danj uún sese me rá rlij rihaan so' qui'yaj yo' cacun', ne táa a se quirí so' man yo', ne síi rihaan canuu gaa so', tzaj ne ca'vee catuu so' rej guun chij Diose ei. Tzaj ne sese cunuú rlij rihaan so' ne qui'yaj yo' cacun', ne ca'anj so' rihaan ya'an, qui'yaj yo' ei.

<sup>48</sup> Ne nij síi man rihaan ya'an yo' me se se ca'vee cavi' xluú chá man nij so', ne daj chihaa mǐj se quina'áj ya'an rej cumān nij so' cacaa nij so' a man adonj.

<sup>49</sup> "Q se vaa sayuun quirān' cunudanj nij rasuun man rihaan chumij nihánj, qui'yaj Diose, ne dan me se ase vaa nuu sa' nee 'yaj yaan ro', danj gaa cunuú sa' nij síi man rihaan chumij nihánj, qui'yaj ya'an ei.

<sup>50</sup> "Ne ase vaa yaan ga chraa ro', danj vaa nij soj sij tucu'yón se-nānāj ga chumij nihánj, ne vaa se uun ndo'o yaan ei. Dan me se sese ne 'ne' chá yaan yo', gaa ne taj se qui'yá' cunuú sa' yaan gaa a ma'. Che'é dan, ase vaa yaan 'ne' sa' ro', danj gaa soj, ne dínj cayáan soj ga tuvi' soj, ne ca'vee cunuú sa' chumij nihánj qui'yaj soj nanj adonj —taj Jesucristó rihaan nij síi tucu'yón se-nānā so' a.

## 10

*Nana nihánj taj xna'anj se vaa ne nó xcúún yuvij quirí'ij yuvij man nicā yuvij a*

<sup>1</sup> Gaa ne curihanj Jesucristó rej yo', ne ca'anj so' ndaa rnej tu'va chráa cu'naj Jordán, ndaa estadó Judea a. Gaa ne cunuú chre' uún que'ee yuvij rihaan so', ne tucu'yón uún so' se-nānā so' rihaan nij yuvij, ndaa vaa u'yón so' 'yaj so' a.

<sup>2</sup> Gaa ne ca'na' doj síi fariseo rihaan so', ne xná'anj nij so' man Jesucristó sese no xcúún snó'o quirí'ij snó'o man nicā so' a. Danj cataj nij síi fariseo, che'é se guun rá nij so' cutā' nij so' cacun' xráa Jesucristó che'é nana ca'mij Jesucristó a.

<sup>3</sup> Gaa ne cataj Jesucristó rihaan nij so' a:

—Ne daj cataj síi cu'naj Moisés qui'yaj soj ga —taj Jesucristó, xná'anj so' man nij síi fariseo a.

<sup>4</sup> Gaa ne cataj nij so' se vaa:

—Ca'ne' síi cu'naj Moisés suun se vaa naxcaj yuvij yanj rihaan nij síi nicāj suun, ne ca'vee quirí'ij yuvij man nicā yuvij á —taj nij síi fariseo a.

<sup>5</sup> Gaa ne cataj Jesucristó rihaan nij so' a:

—Maan che'é se síi nichraj ndo'o rá me nij soj ro', che'é dan cachrón Moisés nana yo' rihaan yanj cunó soj a.

<sup>6</sup> Tzaj ne asij qui'yaj Diose chumij, ne qui'yaj Diose snó'o, ne qui'yaj Diose chana, ne vij roj so' me yuvij, qui'yaj Diose a.

<sup>7</sup> Che'é dan tanáj snó'o man rej so', man nii so' do',

<sup>8</sup> ne ase vaa orún' yuviij ro', danj gaa snó'o ga nica snó'o, taj danj Diose a. Dan me se nuveé vij ran' yuviij me roj so' asij xcaj tuvi' roj so' a ma'. 'Q se ase vaa orún' yuviij ro', vaa roj so' nanj adonj.

<sup>9</sup> Dan me se Diose me síi qui'yaj xcaj tuvi' roj so', ne che'é dan ne nó xcúun a 'o yuviij ca'ne' tanuü yuviij man roj so' ma' —taj Jesucristó rihaan nij síi fariseo yo' a.

<sup>10</sup> Dan me se gaa man nij síi tucu'yón se-nana Jesucristó rá 'o ve' ga so', gaa ne xná'anj nij so' man so' che'é nana ca'mii so' rihaan nij síi fariseo a.

<sup>11</sup> Ne cataj Jesucristó rihaan nij so' a:

—Me ma'an 'o síi ri'ij man nica ne xcaj so' man yo'ó chana, ne tumé ndo'o so' cacun', ne nij qui'yaj so' rihaan nica so' ei.

<sup>12</sup> Tzaj ne sese cunanj chana rihaan nica no', ne xcaj no' man yo'ó chii, ne tumé ndo'o no' cacun' uún adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj me che'é caran' rá Jesucristó ni'yaj so' man ne'ej a*

<sup>13</sup> Gaa ne nicaj nij yuviij man nij ne'ej ca'na' nij yuviij rihaan Jesucristó, che'é rej cutá' Jesucristó ra'a so' raá nij ne'ej a. Tzaj ne nij síi tucu'yón se-nana Jesucristó me se cataj xna'anj nij so' rihaan nij yuviij se vaa ne nó xcúun nij ne'ej ca'na' nij ne'ej rihaan Jesucristó, taj nij so' a.

<sup>14</sup> Tzaj ne xcaj Jesucristó cuentá daj qui'yaj nij síi tucu'yón se-nana so', gaa ne ca'maan rá Jesucristó, ne cataj so' rihaan nij síi tucu'yón se-nana so' a:

—Ca'ne' rá soj ca'na' nij ne'ej rihanj á. Se caráán soj chrej rihaan nij ne'ej mei. 'Q se tucua nij síi vaa danj ro', me rej yanj Diose uun chij Diose nanj adonj.

<sup>15</sup> Ya ya cataj xna'anj 'unj rihaan soj se vaa me ma'an 'o síi na'vej rá guun chij Diose nimán, ndaa vaa uun chij Diose nimán ne'ej, ne daj chihaa mij se ca'vee cayáán so' ga Diose asa' guun chij Diose rihaan chumij nihánj ma' —taj Jesucristó rihaan nij síi tucu'yón se-nana so' a.

<sup>16</sup> Gaa ne na'yaan Jesucristó man nij ne'ej, ne uta' so' ra'a so' raá nij ne'ej, ne achíin ni'yaj so' rihaan Diose che'é nij ne'ej a.

*Nana nihánj taj xna'anj che'é yo'q síi me rá cayáán ga Diose nu' cavii nu' ca'anj a*

<sup>17</sup> Dan me se gaa nayón Jesucristó chrej, ne dan me se cunanj 'o síi tachruü yo' ca'na' so' rihaan Jesucristó, ne canicun' ruj síi tachruü yo' rihaan Jesucristó, ne xná'anj so' man Jesucristó, cataj so', ne:

—Maestro. Síi sa' uxrá mé so' adonj. Daj qui'yaj ne ca'vee cayánj ga Diose nu' cavii nu' ca'anj ga —taj síi tachruü yo', xná'anj so' man Jesucristó a.

<sup>18</sup> Gaa ne cataj Jesucristó rihaan so' a:

—Me che'é cataj so' se vaa síi sa' uxrá mej ga. 'Q se orún' Diose me síi sa' ei.

<sup>19</sup> Ne aj ne'én so' nij nana nocqo ya ya nana cataj xna'anj Diose se vaa canocq' ní' á. Dan me se taj nana yo': “Se ticavi' so' yuviij ma'. Se cotoj so' ga chana nica yo'ó yuviij ma'. Se qui'yaj ituü so' si'yaj yo'ó yuviij ma'. Se nanó so' cuentó ne che'é yuviij ma'. Se tiha' yu'unj so' man yuviij che'é sa'anj ma'. Caraa cochróo so' rihaan rée so' do', rihaan níi so' do' á” —taj Jesucristó rihaan síi tachruü yo' a.

<sup>20</sup> —Asij gaa mej xnii me ve'é unó 'unj nu' nij nana yo', nanj maestro —taj so' rihaan Jesucristó a.

<sup>21</sup> Gaa ne ni'yaj uxrá Jesucristó man so', ne cunuu lee rá Jesucristó man so', ne cataj Jesucristó rihaan so' a:

—Daj orún' rasuun achiin ya mán so' nanj ei. Cavii so' ca'anj so', ne cutu'vee so' nu' si'yáá so', ne sa'anj quirí' so' ro', caxrii so' ston nij síi ni'que, ne cumañ ndo'o si'yáá so' rej xta', qui'yaj Diose nanj ei. Ne dan me se ca'na' so', ne canocó' so' manj, ca'anj ní' á —taj Jesucristó a.

<sup>22</sup> Gaa ne quirí' ndo'o rá síi tachruu, qui'yaj se-nana Jesucristó, ne ca'anj uuun so', ne nanó ndo'o rá so' a. 'Q se síi ru'vee me so', ne vaa ndo'o si'yaj so' a.

<sup>23</sup> Gaa ne ni'yaj Jesucristó, ne cataj so' rihaan nij síi tucu'yón se-nana so' a:

—Sayuun uxrá vaa quisij nij síi vaa ndo'o sa'anj rihaan cayáan ga Diose asa' guun chij Diose rihaan chumií nihánj nanj adonj —taj Jesucristó rihaan nij síi tucu'yón se-nana so' a.

<sup>24</sup> Gaa ne ca'anj ndo'o rá nij so' gaa cuno nij so' nana yo' nana ca'mii Jesucristó a. Gaa ne cataj uún Jesucristó rihaan nij so' a:

—Sayuun uxrá vaa quisij yuvií cayáan nij yuvií ga Diose asa' guun chij Diose rihaan chumií nihánj nanj chuguanj.

<sup>25</sup> Dan me se ne'en soj se vaa sayuun ndo'o vaa cachén xcuu camelló rihaan yu'uj taj tacúún cúu nuvá, tzaj ne cuano nihánj me se cataj xna'anj 'unj rihaan soj se vaa ca'vee a doj cachén xcuu yo' yu'uj taj tacúún cúu nuvá, ndaa rá se vaa síi ru'vee, ne se guun cachén so' cayáan so' ga Diose asa' guun chij Diose rihaan chumií nihánj a ma' —taj Jesucristó rihaan nij so' a.

<sup>26</sup> Gaa ne ca'anj ndo'o rá nij so', ne cataj nij so' rihaan Jesucristó a:

—Che'é dan me se me síi guun nucaj quinanií rihaan sayuun ga —taj nij so', xna'anj nij so' man so' a.

<sup>27</sup> Ni'yaj Jesucristó man nij so', ne cataj so':

—Se guun nucaj yuvií quinanií ma'an nij yuvií rihaan sayuun ma'. Sayuun uxrá vaa rihaan nij so' nanj adonj. Tzaj ne xa' rihaan Diose me se ne sayuun a doj vaa rihaan so' a ma'. Canó rasuun ca'vee qui'yaj so' nanj adonj —taj Jesucristó a.

<sup>28</sup> Gaa ne guun che'é Pedró cataj Pedró:

—Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

<sup>29</sup> Gaa ne cataj Jesucristó:

—Ya ya cataj xna'anj 'unj rihaan nij soj se vaa síi tanáj ve' tucúa tanáj tinúú tanáj ra'vij tanáj nii tanáj rej tanáj ta'níi tanáj to'óo tanáj che'é se me rá so' canoco' so' manj ne nata' so' se-nanaj nana sa' rihaan yuvií,

<sup>30</sup> ne cientó doj a rasuun quirí' uún so' gaa vaa i'na' so' rihaan chumií nihánj cuano adonj. Dan me se cumañ que'ee ve' tucúa so' do', tinúú so' do', ra'vij so' do', nii so' do', ta'níi so' do', to'óo so' do', rihaan so' gaa vaa i'na' so' rihaan chumií nihánj, tzaj ne vaa sayuun quiran' so' che'é 'unj adonj. Ne asa' guun chij Diose rihaan chumií nihánj me se yo'o cayáan so' ga Diose nu' cavii nu' ca'anj nanj adonj.

<sup>31</sup> Tzaj ne que'ee nij síi guun chij ndo'o rihaan chumií nihánj ro', guun nij so' síi noco' ei. Ne que'ee nij síi ne guun chij rihaan chumií nihánj me se guun chij nij so', qui'yaj Diose nanj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa síj va'nuj cataj xna'anj Jesucristó se vaa caví' so' ne cunuu i'na' uún so' a*

32 Dan me se vaj nij so' chrej avii nij so' chuman' Jerusalén, ne táá yaan Jesucristó rihaan nij sí tucu'yón se-nana so', ne ma'anj ndo'o rá nij so', ne nij sí nocó' xcó nij so' me se cucu'vi' ndo'o nij so' a. Dan me se narii Jesucristó man chuvij nij sí tucu'yón se-nana so', ne guun che'e so' cataj xna'anj so' rihaan nij so' daj quirán' so' a.

33 Dan me se cataj Jesucristó rihaan nij so', ne:

—Nihánj me ca'anj ní' chuman' Jerusalén, ne quita'aa nii manj sij ca'neé Diose nica'yu'unj man yuvij, ne nago' nii manj rihaan nij xrej ata suun nocóo doj do', rihaan nij sí naqui'yaj cuu se-tucuanj Moisés rihaan yuvij do' a. Ne cuta' nij so' cacun' xráj, ne cataj nij so' se vaa cavi' 'unj a. Gaa ne nago' nij so' manj rihaan nij sí yanij,

34 ne ca'nga' nacoó nij sí yanij quene'en nij so' manj, ne quirij talúj nij so' rihanj, ne go' nij so' cuartá xráj, ne ticavi' nij so' manj a. Gaa ne cachén va'núj güii, gaa ne cunu'u i'na' uún 'unj, qui'yaj Diose ei —taj Jesucristó rihaan chuvij nij sí tucu'yón se-nana so' a.

*Nana nihánj taj xna'anj se vaa achín ni'yaj sí cu'naj Jacobo do', sí cu'naj Juan do', se vaa cataj roj so' suun sa' doj qui'yaj Jesucristó a*

35 Gaa ne cuchi' sí cu'naj Jacobo do', sí cu'naj Juan do', rihaan Jesucristó, ne ta'níi sí cu'naj Zebedeo me roj so' a. Gaa ne cataj roj so' rihaan Jesucristó a:

—Me rá rój se vaa qui'yáá so' ndaa vaa cachinj ni'yaj rój rihaan so' che'e rój, maestro —taj roj so' rihaan Jesucristó a.

36 Gaa ne cataj Jesucristó rihaan roj so' a:

—Daj qui'yáj che'é roj soj, rá roj soj ga —taj so', xná'anj so' man roj so' a.

37 Gaa ne cataj roj so' rihaan Jesucristó a:

—Cataj xna'anj so' se vaa asa' guun chij so' rihaan chumij nihánj, ne quitaj rój x'núú so', ne cata' rój suun sa' doj, qui'yáá so' á. Dan me se yo'ó rój cayáán rej nuva' so', ne yo'ó rój cayáán rej nichruún so', ne quirij ta'nga' rój ga so', cataj so', rá rój a —taj roj sí cu'naj Jacobo ga Juan rihaan Jesucristó a.

38 Gaa ne cataj Jesucristó rihaan roj tinuj roj so' a:

—Ne ne'en roj soj me rasuun cachín ni'yaj roj soj rihanj nihánj a ma'. 'O se guun nucua' roj soj quirán' roj soj sayuun ndaa vaa quirán' 'unj na' —taj Jesucristó, xná'anj Jesucristó man roj so' a.

39 —Guun nucua' rój ei —taj roj so' a.

Gaa ne cataj Jesucristó rihaan roj so' a:

—Ya ya quirán' roj soj sayuun gaj nanj á.

40 Tzaj ne ne nó xcúnj cataj xna'anj 'unj me sí cayáán x'núú 'unj rej nuva' 'unj do', rej nichrunj do', ma'. Orún' Diose me sí cataj xna'anj me sí quirij ta'nga' gaj nanj adonj —taj Jesucristó a.

41 Gaa ne cuno yo'ó chi' nij sí tucu'yón se-nana Jesucristó se vaa ca'mii roj sí cu'naj Jacobo ga Juan rihaan Jesucristó, gaa ne guun che'e nij so' ca'maan rá nij so' ni'yaj nij so' man roj so' a.

42 Gaa ne canacúun Jesucristó man cunudanj nij so' se vaa ca'na' nij so' rihaan so' a. Ne cataj so':

—Ne'en soj se vaa nij sí ata suun man rihaan chumij nihánj me se rii ta'nga' uxrá nij so' rihaan tuvi' nij so' nanj adonj.

43 Tzaj ne se gaa danj se a nuj ní' qui'yaj ní' ma'. 'O se sese me rá ní' guun chij ní' rihaan tuvi' ní', ne guun ní' sí qui'yaj suun rihaan taran' tuvi' ní',

44 ne ase vaa mozó ro', danj gaa xa' ní' rihaan tuvi' ní' nanj adonj.

<sup>45</sup> Dan me se ca'néé Diose manj nıcaj yu'unj 'unj man yuvıı, tzaj ne ne ca'na' 'unj ne guun nij yuvıı mozó rihanj ma'. 'O se ca'ná' 'unj qui'yaj suun ma'anj rihaan nij yuvıı nanj adonj. Ne ca'ná' 'unj nayon ma'anj rihaan yuvıı ne cavı' 'unj che'é cacun' atá nij so', gaa ne cavıı sa' uxrá nij so', qui'yaj nanj adonj —taj Jesucristó a.

*Nana nihánj taj xna'anj se vaa naxra' rihaan síı cu'naj Bartimeo, qui'yaj Jesucristó a*

<sup>46</sup> Gaa ne catúj nij so' chuman' Jericó a. Gaa ne curihanj Jesucristó do', nij síı tucu'yón se-nana so' do', que'ee yuvıı do', chuman' Jericó, ne dan me se yáan 'o síı tuchrıı cu'naj Bartimeo tu'va chrej, ne ta'nıı síı cu'naj Timeo me so', ne síı achıın caridad me so' a.

<sup>47</sup> Gaa ne xcaj so' cuentá se vaa Jesucristó síı cavıı chuman' Nazaret me síı cachen rej ne so', ne che'é dan guun che'e so' caguáj so', ne cataj so':

—Ya ya ta'nıı ta'nıı si'no síı cu'naj David síı cane gaa naá mé so', Jesús. Cunuu 'ee rá so' manj ei —taj so' a.

<sup>48</sup> Tzaj ne:

—Dııj tu'vá so' á —taj que'ee nij yuvıı rihaan so' a.

Tzaj ne doj a nucuaj caguáj so', cataj so':

—Ta'nıı ta'nıı si'no síı cu'naj David síı cane gaa naá ei. Cunuu 'ee rá so' manj ei —taj uún so' a.

<sup>49</sup> Gaa ne canıcnun' Jesucristó, ne ca'ne' Jesucristó suun rihaan nij síı nicun' ga so' se vaa ca'anj nacaj nij so' man síı tuchrıı yo' ne ca'na' so' rihaan Jesucristó a. Gaa ne ca'anj canacunj nij so' man síı tuchrıı, ne cataj nij so':

—Yo' o ca'nej nucuaj nimán so' ei. Nacúún so' mán so', ne naxumagan so', ca'anj ní' á —taj nij so' rihaan síı tuchrıı cu'naj Bartimeo a.

<sup>50</sup> Gaa ne tanáj so' yatzıj taj xráá so', ne güéj so', ne ca'na' so' rihaan Jesucristó a.

<sup>51</sup> Gaa ne xná'anj Jesucristó man so', cataj Jesucristó:

—Daj qui'yaj mán so', rá so' ga —taj Jesucristó a.

Ne:

—Cunuu sa' rihanj, raj, maestro —taj so' rihaan Jesucristó a.

<sup>52</sup> Gaa ne cataj Jesucristó rihaan so' a:

—Ca'vee ca'anj so' á. Maan che'é se amán rá so' ni'yaj so' manj ro', che'é dan cunuu sa' rihaan so' ei —taj Jesucristó rihaan so' a.

Nu' ca'mıı Jesucristó danj, ne nu' curuvi' rihaan síı tuchrıı yo', ne ca'anj so' ga Jesucristó chrej vaj Jesucristó a.

## 11

*Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a*

<sup>1</sup> Gaa ne quınıchrun' Jesucristó ga nij síı tucu'yón se-nana so' roj chuman' cu'naj Betfagé ga Betania, ne roj chuman' yo' ro', naj nıchrun' tu'va chuman' Jerusalén, ne tacóó quıı cu'naj Quiı man Chruun Olivó naj roj chuman' yo' a. Gaa ne ca'néé Jesucristó man vııj tuvi' nij síı tucu'yón se-nana so' ca'anj rque chuman' Betfagé yo',

<sup>2</sup> ne cataj so' rihaan roj so' a:

—Cavıı roj soj ca'anj soj, ne catuu roj soj chuman' nihánj chuman' naj rihaan ní', ne nu' catúj roj soj, ne nu' narı' roj soj man yo' o burró le'ej ya'anj

num̄i a. Dan me se nache roj soj man xo', ne n̄icaj roj soj ca'na' roj soj rihanj nihánj á.

<sup>3</sup> Ne sese xna'anj nii man roj soj me che'é 'yaj roj soj danj ga burró, ne cataj roj soj: "Síi 'nij ra'a man ní' achiin xcuu nihánj rihaan chuguanj. Ne nu' navij suun rihaan burró nihánj, ne nu' ca'nej uún so' man núj ca'na' tanáj uún núj man burró nihánj ei", cataj roj soj á —taj Jesucristó rihaan roj síi tucu'yón se-nana so' a.

<sup>4</sup> Dan me se ca'anj roj so', ne catúj roj so' chuman', ne nari' roj so' man burró le'ej, ne nicun' xo' rá 'o callé rihaan ta'yaa, ne num̄i xo' a. Dan me se nache roj so' man xo' a.

<sup>5</sup> Ne nicun' doj nij yuvij rej yo', ne xna'anj nij so' man roj so', ne cataj nij so':

—Me che'é nache roj soj burró ga —taj nij síi nicun' rej yo' a.

<sup>6</sup> Ne ca'mii roj síi tucu'yón se-nana Jesucristó ndaa vaa ca'ne' Jesucristó suun rihaan roj so', gaa ne ca'vej rá nij síi nicun' rej yo' n̄icaj roj so' burró ca'na' roj so' a.

<sup>7</sup> Dan me se nicaj roj so' burró ca'na' uún roj so' rej nicun' Jesucristó, ne cuta' roj so' sagan' roj so' xráá burró, ne cavii Jesucristó xráá burró yo' a.

<sup>8</sup> Dan me se uchruj ndo'o nij yuvij yatzij sagan' nij so' rá chrej, ne achén Jesucristó ga burró yo' rihaan yatzij a. Ne yo'ó ta'aj nij yuvij ro', a'ne' nij so' rcoj ra'a chruun do', coj man tacaan do', uchruj nij so' rá chrej, ne achén Jesucristó ga burró le'ej a.

<sup>9</sup> Ne vaj yuvij taj yaan rihaan Jesucristó, ne 'na' yuvij noco' rej xco Jesucristó, ne caguáj nij yuvij, cataj nij yuvij:

—Caraa guee ní' rihaan Diose ei. 'Na' síi ca'néé síi 'nij ra'a man ní' ei. Se luj ndo'o me 'yaj Diose che'é ní' ei.

<sup>10</sup> Cunaj uxrá vaa 'na' síi guun chij ndaa vaa guun chij xii ní' síi cu'naj David gaa naá ei. Caraa guee ní' rihaan Diose síi nicun' xtá' ei —taj nij yuvij yo', caguáj nij so' a.

<sup>11</sup> Gaa ne catúj taran' nij so' rihaan nuvíi noco' ne chuman' Jerusalén, ne ni'yaj Jesucristó man cunudanj nij rasuun man anicaj rihaan nuvíi noco', ne maan che'é se nichrun' guun rm̄i', ne che'é dan curihanj uún Jesucristó ga chuvij nij síi tucu'yón se-nana so', ne nanicaj so' ca'anj so' chuman' Betania a.

*Nana nihánj taj xna'anj daj ca'mii Jesucristó rihaan chruun nuvi' chruj raq a*

<sup>12</sup> Ne yo'ó güii me se curihanj uún nij so' chuman' Betania, ne na'aan rque Jesucristó a.

<sup>13</sup> Gaa ne gan' nicun' 'o chruun man chruj higó quene'en Jesucristó, ne taj coj raq chruun yo' a. Ne cuchi' so' tacóo chruun, ne ni'yaj so', ne taj vaj a doj chruj man raq chruun a. Maan nanj coj uun táá raq chruun yo' a. 'O se nuveé tió man chruj higó me yo' a.

<sup>14</sup> Gaa ne cataj Jesucristó rihaan chruun a:

—Daj chíhaa mij se cumán chruj raá so' cha yuvij a ma' —taj so' rihaan chruun man chruj higó yo' a.

Ne cuno nij síi tucu'yón se-nana so' se vaa ca'mii so' danj rihaan chruun yo' a.

*Nana nihánj taj xna'anj se vaa quirii Jesucristó man nij yuvij tu'vej rasuun man rá nuvíi noco' a*

15 Gaa ne catúj Jesucristó ga nij síi tucu'yón se-nana so' chuman' Jerusalén, gaa ne catúj Jesucristó rá nuvíi nocoo, gaa ne guun che'e so' quirii so' man nu' nij síi tu'vej rasuun do', man nij síi quiránj rasuun man rá nuvíi nocoo do' a. Ne tiguúj ra'a so' nij chruun mesá natuná nii sa'anj rihaan, ne tiguúj ra'a so' chruun xlá taj nij síi tu'vej cha'aan a.

16 Ne caráán so' chrej se cataj nij yuviij rasuun 'ee cachén nij so' rque nuvíi a.

17 Gaa ne tucu'yón so' man nij síi man rihaan nuvíi, ne cataj so':

—Ya uxrá danj Diose taj se vaa tucua Diose rej na'víj ndaa nij yuviij yanij rihaan Diose me nihánj á. Tzaj ne guun tucua síi ituu man tucua Diose nihánj, qui'yaj soj nanj á —taj Jesucristó a.

18 Ne cuno nij xrej do', nij síi naqui'yaj cuu se-tucuanj Moisés rihaan yuviij do', se-nana Jesucristó, gaa ne nano' uxrá nij so' daj qui'yaj nij so' ne ca'vee cavi' Jesucristó a. 'O se chu'vi' nij so' ni'yaj nij so' man Jesucristó, che'é se ca'anj ndo'o rá cunudanj nij yuviij cuno nij yuviij nana tucu'yón Jesucristó a.

19 Tzaj ne ca'anj güii, ne nichrun' guun rmi', ne curihanj uun Jesucristó ga nij síi tucu'yón se-nana so' chuman' Jerusalén ca'anj nij so' a.

*Nana nihánj taj xna'anj daj quiran' chruun man chruj higó raq a*

20 Gaa ne rej na'yaan yo'ó güii me se vaj Jesucristó ga nij síi tucu'yón se-nana so' chrej, ne cachén nij so' rej nicun' chruun higó ca'mii Jesucristó rihaan gaa güii quii, ne dan me se yo'ó nacoq ndaa yaá nu' chruun yo' a.

21 Dan me se nanuj rá síi cu'naj Pedró daj ca'mii Jesucristó rihaan chruun yo', ne che'é dan cataj so' rihaan Jesucristó a:

—Ní'yaj so', maestro. Nacoq nu' chruun ca'mii chreé so' rihaan gaa quii nanj á —taj Pedró rihaan Jesucristó a.

22 Gaa ne cataj Jesucristó rihaan taran' nij so' a:

23 —Cuchuman rá soj ní'yaj soj Diose ei. Ya ya cataj xna'anj 'unj rihaan soj se vaa me ma'an 'o síi cataj rihaan ndaa quij xcaan yo' se vaa curihanj quij rej nicun' quij ne ca'anj nij quij rque na ya'anj, ne sese se guun vij rá so' ne cuchuman ya rá so' se vaa guun nu' ndaa vaa cataj so', ne ya guun ndaa vaa cataj so' adonj.

24 Che'é dan cataj xna'anj 'unj rihaan soj se vaa nu' se vaa cachin' ni'yaj soj rihaan Diose ro', sese cuchuman rá soj se vaa aj qui'yaj Diose danj che'é soj, ne ya ya guun ndaa vaa cachín ni'yaj soj adonj.

25 Ne gaa nicun' soj achín ni'yaj soj rihaan Diose, ne sese vaa cacun' qui'yaj yo'ó so' rihaan soj, ne caraq x'naa soj che'é cacun' tumé tuvi' soj, gaa ne ca'vee caraq x'naa Rej soj síi nicun' xtá' ní'yaj so' cacun' tumé ma'an soj adonj.

26 Tzaj ne sese se ca'vej rá soj caraq x'naa soj che'é cacun' qui'yaj tuvi' soj rihaan soj, ne daj chihaa míj se tinavij Rej soj síi nicun' xtá' cacun' tumé ma'an soj a ma' —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa xná'anj nii man Jesucristó me síi ca'ne' suun rihaan so' qui'yaj so' ndaa vaa 'yaj so' a*

27 Gaa ne catúj uun Jesucristó ga nij síi tucu'yón se-nana so' rque chuman' Jerusalén, gaa ne chéé Jesucristó rá nuvíi nocoo, ne cuchí' nij xrej atá suun nocoo doj do', nij síi naqui'yaj cuu se-tucuanj Moisés rihaan yuviij do', nij síi uun chij rihaan nij yuviij do', rihaan so',

28 gaa ne cataj nij so' rihaan so' a:



—Me sí ca'ne' suun rihaan so' qui'yáa so' ndaa vaa 'yáa so' ga —taj nij so' a.

<sup>29</sup> Gaa ne cataj Jesucristó rihaan nij so' a:

—Ne vaa yo' o nana xna'anj 'unj man nij soj, ne sese ya cataj xna'anj nij soj nana yo' rihanj, ne cataj xna'anj 'unj rihaan soj me sí ca'ne' suun rihanj a.

<sup>30</sup> Dan me se me sí ca'ne' suun rihaan sí cu'naj Juan cuta' ne so' man yuvi, rá soj ga. Ma'an Juan cavii raq na'. Ase Diose cataj xna'anj rihaan so' xa'. Cataj xna'anj nij soj rihanj á —taj Jesucristó a.

<sup>31</sup> Gaa ne nuchruj raq ndo'o nij so' ga tuvi' nij so', ne cataj nij so':

—Sese cataj ní se vaa Diose ca'ne' suun rihaan sí cu'naj Juan cuta' ne so' man yuvi, ne cataj Jesucristó rihaan ní me che'é ne cuchuman rá ní nana ca'mú Juan, cataj so' a.

<sup>32</sup> Tzaj ne daj chihaa mij se ca'vee cataj ní se vaa ma'an Juan cavii raq qui'yaj danj ma' —taj nij so' rihaan tuvi' nij so', che'é se cuchu'vi' nij so' ni'yaj nij so' man nij yuvi a.

'Q se nij yuvi me se sí ca'née Diose nata' se-nana Diose rihaan yuvi me ya sí cu'naj Juan, rá cunudanj nij yuvi a.

<sup>33</sup> Gaa ne cataj nij so' rihaan Jesucristó a:

—Ne ne'en núj me sí ca'ne' suun rihaan sí cu'naj Juan cuta' ne so' man yuvi ma' —taj nij so' a.

—Che'é dan se cataj xna'anj 'unj rihaan nij soj me sí ca'ne' suun rihanj qui'yaj ndaa vaa 'yá ma' —taj Jesucristó rihaan nij so' a.

## 12

### *Nana nihánj me cuentó nanó Jesucristó che'é yuvi chi'ij yaj suun rihaan yo'ó a*

<sup>1</sup> Gaa ne guun che'e Jesucristó nanó so' cuentó rihaan nij so' a:

—Dan me se chruj yo' o so' naa chruj uvá, ne qui'yaj so' chingá nu' anicaj tu'va naa yo', gaa ne gáan so' yu'uj rej xtun' chruj uvá ne cavii na, ne cune' so' 'o ve' nata' cayáan nij sí cutumé naa yo' a. Gaa ne tanáj so' naa yo' rihaan sí qui'yaj suun naa yo', ne curihanj so' ca'anj so' gan' a.

<sup>2</sup> Cachén doj yavii, ne quisij yavii cuta' nii chruj uvá, ne ca'née sí xnaa yo' man yo' o se-mozó so' rihaan nij sí nuu tumé xnaa so' a. Me rá so' ca'na' njcaj se-mozó so' doj chruj uvá rihaan ma'an so' a.

<sup>3</sup> Gaa ne quita'aa nij sí nuu tumé naa man se-mozó sí xnaa, ne go' uxrá nij so' chruun xráa so', ne ca'née nij so' man so' rihaan sí xnaa a. Tzaj ne a doj chruj uvá ne njcaj so' ca'anj so', qui'yaj nij so' a ma'.

<sup>4</sup> Gaa ne ca'née sí xnaa man yo' o mozó rihaan nij sí nuu tumé xnaa so' uún a. Tzaj ne go' nij so' raq so', ne qui'yaj chi'ij nij so' man so' a.

<sup>5</sup> Gaa ne ca'née sí xnaa yo' o mozó uún, ne ticavi' nij sí nuu tumé naa man so', ne que'ee doj mozó ca'née uún sí xnaa, ne ta'aj nij so' go' nij sí nuu tumé naa xráa, ne yo' o ta'aj nij so' ticavi' nij sí nuu tumé naa,

<sup>6</sup> ne daj orún' so' quináj, ne sí quináj me ta'ní sí xnaa, ne 'ee ndo'o rá sí xnaa man ta'ní so' a. Tzaj ne ca'née sí xnaa yo' man ta'ní so' rihaan nij sí tumé xnaa so' a. “Caraj cochroj nij sí tumé naa rihaan ta'nij sese ca'anj ta'nij saj xee”, taj sí xnaa yo' a.

<sup>7</sup> Tzaj ne cataj nij sí tumé naa rihaan tuvi' nij so': “Sí nihánj me sí guun xnaa naa nihánj vaa güii ei. Che'é dan ticavi' ní' man so', ne vaa güii, ne guun

xnaa ma'an ní' man naa nihánj chuguñj", taj nij so' ni'yaj nij so' man ta'níí síí xnaa a.

<sup>8</sup> Gaa ne quita'aa nij so' man ta'níí síí xnaa yo', ne ticavi' nij so' man so', ne quiril'j nij so' man so' xe' a.

<sup>9</sup> Ne daj qui'yaj síí xnaa man nij síí tumé xnaa so', rá soj ga. Dan me se ca'na' so', ne ticavi' so' man nij so', ne tucuachén so' xnaa so' rihaan yo'ó síí tumé xnaa so' a.

<sup>10</sup> Ne me che'é ne nayaa nij soj nana nihánj nana no rihaan danj Diose ga: "Yuvej quiril'j nij síí cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj.

<sup>11</sup> Ma'an síí 'nij ra'a man ní' qui'yaj yo', ne cunaj uxrá vaa yo', rá ní' á", taj danj Diose a —taj Jesucristó rihaan nij síí uun chij rihaan nij yuvi' israelitá a.

<sup>12</sup> Gaa ne nanó rá nij so' daj gaa quita'aa nij so' man Jesucristó, tzaj ne cuhu'vi' nij so' ni'yaj nij so' man nij yuvi' a. Ése che'e ma'an nij so' me cuentó nanó Jesucristó a. Ase vaa nij síí nuu tumé naa vaa ma'an nij so' ni'yaj Jesucristó, ne quene'en nij so' se vaa che'é dan nanó Jesucristó cuentó yo' a. Gaa ne tanáj nij so' man Jesucristó, ne ca'anj nij so' a.

*Nana nihánj taj xna'anj che'é puextó go' ní' rihaan gobiernó ne che'é se rque ní' rihaan Diose do' a*

<sup>13</sup> Gaa ne ca'néé nij síí uun chij yo' doj síí fariseo do', doj síí noco' man síí cu'naj Herodes do', rihaan Jesucristó, che'é rej cuta' nij so' cacun' xráá Jesucristó che'é nana ca'mii Jesucristó a.

<sup>14</sup> Dan me se cuhi' nij síí tiha' yu'unj yo' rihaan Jesucristó, ne cataj nij so' rihaan so' a:

—Ne'en núj se vaa nana ya inanj a'mii so', maestro. Ne ne chu'ví' so' ni'yaj so' man nij yuvi' daj cataj nij yuvi' ma'. Ne 'o cyaan vaa nu' yuvi' rihaan so' chuguñj. Maan se ya tucu'yón so' rihaan yuvi' daj qui'yaj yuvi' canoco' yuvi' man Diose adonj. Ne no xcuún yuvi' go' yuvi' puextó rihaan síí nicaj suun gobiernó na'. Ase se go' yuvi' xa'. Dan me se go' núj na'. Se go' núj xa' —taj nij so', xna'anj nij so' man Jesucristó a.

<sup>15</sup> Dan me se aj ne'en Jesucristó se vaa síí nucui' rá me nij síí xna'anj nana yo' man so', ne che'é dan cataj so' rihaan nij so' a:

—Me che'é me rá soj tiha' yu'unj soj manj ne cuta' soj cacun' xraj ga. Tihaan soj 'o sa'anj aga' rihanj ni'yaj á —taj Jesucristó rihaan nij síí me rá tiha' yu'unj man so' a.

<sup>16</sup> Ne tihaan nij so' 'o sa'anj aga' rihaan so', ne xna'anj so' man nij so', cataj so':

—Me síí nó rihaan sa'anj aga' nihánj ga. Ne me síí se-chuvii nó rihaan sa'anj aga' nihánj ga —taj Jesucristó, xna'anj so' man nij síí me rá tiha' yu'unj yo' a.

—Síí nicaj suun gobiernó me nó rihaan sa'anj aga' yo', ne nó se-chuvii so' rihaan sa'anj ei —taj nij so' a.

<sup>17</sup> Gaa ne cataj Jesucristó:

—Go' soj si'yaj síí nicaj suun rihaan ma'an so', ne rque soj si'yaj Diose rihaan Diose á —taj Jesucristó a.

Gaa ne ca'anj ndo'o rá nij síí me rá tiha' yu'unj yo' ni'yaj nij so' man Jesucristó a.

*Nana nihánj taj xna'anj se vaa ya cunu'u i'na' uún nij síí cavi' a*

18 Gaa ne cuchi' doj sí saduceo rihaan Jesucristó a. Nij sí saduceo ro', a'mii nana nihánj se vaa daj chihaa mij se cunuu i'na' uún yuvij asa' cavi' yuvij, taj nij so' a. Dan me se xná'anj nij so' man Jesucristó, ne cataj nij so' nana nihánj a:

19 —Cachrón sí cu'naj Moisés nana nihánj rihaan yanj cunó ní' a: “Sese cavi' yo'q so', ne sese quináj uun nica so', ne sese taj vaj ta'níu so', ne no xcúun tinúu so' xcaj tinúu so' man choco' so' chana quináj, ne cotoj tinúu sí cavi' ga choco' so', ne cuchruj no' ne'ej, ne guun ta'nij sí cavi' man ne'ej yo' ne cunuú ne'ej yo' rihaan to'óo sí cavi' yo' a”, me nana cachrón sí cu'naj Moisés rihaan yanj gaa naá, maestro.

20 Dan me se vaa chij nij tinuj 'o nij so', ne sí chava' me se xcax so' chana, gaa ne cavi' so', ne taj vaj ne'ej cuchruj chana nica so', qui'yaj so' a.

21 Gaa ne xcax scue'ee sí cavi' man choco' so' chana cavi' nica, gaa ne cavi' so' uún, ne taj vaj ne'ej cuchruj chana yo', qui'yaj so', ne veé danj xcax scue'ee so' uún man chana, ne so' cavi' uún, ne veé danj qui'yaj cunudanj chij nij tinuj nij so', ne xcax cunudanj nij so' man orún' chana yo', tzaj ne cavi' cunudanj nij so', ne taj vaj a 'ó ne'ej cuchruj chana yo' a man adonj.

22 Ndaa síj, gaa ne cavi' ma'an chana uún,

23 ne dan me se asa' cunuu i'na' uún nij sí cavi', gaa ne me tuvi' nij so' njcaj man chana yo', rá so' ga. 'O se gaa vaa i'na' nij so', ne nica taran' nij tinuj nij so' guun orún' no' a —taj nij sí saduceo, xná'anj nij so' man Jesucristó a.

24 Gaa ne cataj Jesucristó rihaan nij so' a:

—Ne ne'en uxrá soj ma'. 'O se ne ne'en soj me taj danj Diose, ne ne ne'en soj sese nucuaj ndo'o Diose a.

25 'O se asa' cunuu i'na' uún nij sí cavi', ne se xcax tuvi' nij so' a ma'. 'O se ase vaa yáán nij se-mozó Diose rej xta' ro', danj gaa cayáán nij so' nanj adonj.

26 Gaa ne cataj xna'anj 'unj rihaan soj daj gaa quene'en soj se vaa ya ya cunuu i'na' uún yuvij asa' cavi' yuvij ei. Ataa nayaá soj nana nihánj nana no rihaan danj Moisés nana che'é coj aco' ya'an raá na'. Ne dan me se gaa quene'en Moisés coj yo', ne cataj Diose rihaan Moisés: “Diose sí noco' nij sí man gaa naá sí cu'naj Abraham do', sí cu'naj Isaac do', sí cu'naj Jacobo do', mej a”. Danj cataj Diose che'é nij sí man gaa naá yo' a.

27 Dan me se nuveé se-Diose nij xngá me Diose ma'. Inanj nij sí vaa i'na' a'vee noco' man Diose nanj adonj. Che'é dan, nda' se sí cane gaa naá me va'nuj nij so', tzaj ne vaa i'na' nij so' rihaan Diose nanj ei. Ne ne'en uxrá soj a ma' —taj Jesucristó rihaan nij sí saduceo yo' a.

### *Nana nihánj taj xna'anj me nana me nana nocoo doj cunó ní' a*

28 Gaa ne yo'q nij sí naqui'yaj cuu se-tucuanj Moisés cuchi' rihaan Jesucristó, ne so' ro', me sí cuno daj ca'mii Jesucristó ga nij sí saduceo yo', ne quene'en so' se vaa sa' uxrá ca'mii Jesucristó, ne che'é dan xná'anj so' man Jesucristó, ne cataj so':

—Me nana me nana nocoo doj rihaan cunudanj nij nana cataj xna'anj Diose rihaan ní' cunó ní' ga —taj so', xná'anj so' man Jesucristó a.

29 Gaa ne cataj Jesucristó rihaan so' a:

—Nana nocoo doj rihaan cunudanj nij nana cunó ní' me nana nihánj, ne: “Cunó soj síj israelítá, ne Diose sí 'nij ra'a man ní' me se oruun so',

30 ne ndaa nimán yá so' guun rá so' ni'yaj so' man Diose sí 'nij ra'a man ní', ne yo'q ndaa cúu yave yá so' cuchuman ya rá ni'yaj man Diose, ne ndaa

nu' se nucuaj yá so' caraa cochroj rihaan Diose nanj adonj". Ne nihánj me ya nana uun chij ya nanj ei.

<sup>31</sup> Ne vaa yo'ó nana nihánj nana me rá Diose cunq uún ní a: "Adjí se 'ee rá so' man ma'an so' ro', danj gaa 'ee rá so' man tuví so' á". Taj vaj yo'ó nana nocoo doj rihaan roj nana nihánj nana cataj xna'anj Diose rihaan ní a man adonj —taj Jesucristó rihaan sí naqui'yaj cuu se-tucuanj Moisés yo' a.

<sup>32</sup> Gaa ne cataj sí naqui'yaj cuu se-tucuanj Moisés yo' rihaan Jesucristó a: —Cunaj uxrá ca'mii so', maestro, ne ya uxrá vaa nana ca'mii so', se vaa oruun Diose, ne taj vaj tuví Diose, maan se oruun so' nicun',

<sup>33</sup> ne ya uxrá vaa nana se vaa sese ndaa nimán ya ní guun rá ní ni'yaj ní man Diose do', sese yo'q cuchuman rá ndaa cúu yave ya ní ni'yaj ní man Diose do', sese ndaa nu' se nucuaj man ní caraa cochroj rihaan Diose do', sese gaa 'ee rá ní man tuví ní ndaa se 'ee rá ní man ma'an ní do', ne sa' doj vaa tucuaán nihánj rihaan nu' tucuaán nago' que'ee scúj cacaa rihaan Diose nanj chuguanj —taj sí naqui'yaj cuu se-tucuanj Moisés yo' rihaan Jesucristó a.

<sup>34</sup> Gaa ne quene'en Jesucristó se vaa ya cavii raá sí ca'mii danj rihaan so', ne che'é dan cataj Jesucristó rihaan so':

—So' me se nichrun' ya guun chij Diose nimán so' nanj ei —taj Jesucristó rihaan so' a.

Ne taj vaj sí quisíj rá xna'anj yo'ó nana man Jesucristó a ma'.

*Nana nihánj taj xna'anj se vaa sí ca'néé Diose tinanii man yuvií rihaan sayuun ro', nuveé nanj yuvií me so' ma'*

<sup>35</sup> Dan me se gaa tucu'yón Jesucristó se-nana so' man nij yuvií rá nuví nocoo, ne cataj so':

—Nij sí naqui'yaj cuu se-tucuanj Moisés rihaan yuvií ro', me che'é taj nij so' se vaa nanj ta'ní ta'nij si'no sí cu'naj David sí cane gaa naá me sí ca'na' tinanii man yuvií rihaan sayuun, rá soj ga.

<sup>36</sup> O se nuú Nimán Diose nimán sí cu'naj David, ne cataj sí cu'naj David: "Ca'mii Diose sí 'nij ra'a man ní rihaan sí 'nij ra'a manj, cataj so' se vaa cayáán sí 'nij ra'a manj x'núú Diose rej nuva' Diose ndaa se quisíj qui'yaj canaán Diose rihaan taran' nij sí taj ri'yunj man sí 'nij ra'a manj ne quiríi ta'nga' sí 'nij ra'a manj rihaan nij so' nanj adonj", taj sí cu'naj David yo' a.

<sup>37</sup> Dan me se sí 'nij ra'a man sí cu'naj David me sí ca'nej Diose tinanii man yuvií rihaan sayuun, taj sí cu'naj David yo' a. Sese 'nij ra'a so' man David, ne me che'é taj nij sí naqui'yaj cuu se-tucuanj Moisés se vaa nanj ta'ní ta'nij si'no David me soj ga. Taj che'é cataj nij so' se vaa nanj yuvií me so' ma' —taj Jesucristó rihaan nij yuvií man rá nuví nocoo a.

Que'ee nij yuvií cuno se-nana Jesucristó, ne guun niha' rá nij so' cunq nij so' se-nana so' a.

*Nana nihánj taj xna'anj che'é cacun' tumé nij sí naqui'yaj cuu se-tucuanj Moisés rihaan yuvií a*

<sup>38</sup> Dan me se gaa tucu'yón Jesucristó se-nana so' man nij yuvií, ne cataj so':

—Xca' nij soj cuentá daj 'yaj nij sí naqui'yaj cuu se-tucuanj Moisés rihaan yuvií, ne tumé soj man soj se gaa nanj qui'yaj soj ndaa vaa 'yaj nij so' á. Dan me se niha' rá nij so' cunúú nij so' yatzi' sa' xcaan cachee nij so' rej quene'en yuvií man nij so', ne me rá nij so' ca'mii sa' yuvií ga nij so' gaa chéé nij so' rihaan yu'vee a.

<sup>39</sup> Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní' tucu'yón ní' se-tucuanj Moisés do', gaa 'anj nij so' cha'anj do' a.

<sup>40</sup> Ne a'néj nij so' ve' tucua chana cavi' nica, ne yuun che'e guun tucua nij so' man ve' yo', ne 'yaj xcaan ndo'o nij so' cuentó achún ni'yaj nij so' rihaan Diose, che'é rej sa' doj guun nucuaj nij so' tihá' yu'unj nij so' man yuvií a. Xa' nij so', tzaj ne che'é se vaa 'yaj nij so' ro', che'é dan do' a gaa sayuun quirán' nij so' qui'yaj Diose, asa' ca'ne' Diose cacun' che'é yuvií adonj —taj Jesucristó rihaan nij yuvií a.

*Nana nihánj taj xna'anj che'é chana nique cavi' nica qui'yaj sa' doj rihaan nij ru'vee, ni'yaj Diose a*

<sup>41</sup> Dan me se taj Jesucristó rej taj chrúún sa'anj taj rihaan nuvií nocoo, ne ne'en so' daj qui'yaj nij yuvií gaa araa nij yuvií sa'anj aga' rque chrúún sa'anj yo' che'é Diose, ne dan me se man ndo'o síí ru'vee araa uxrá sa'anj rque chrúún yo' a.

<sup>42</sup> Ne dan me se ca'na' 'o chana cavi' nica chana nique, ne caraa no' vij guee sa'anj aga' le'ej rque chrúún yo' a.

<sup>43</sup> Gaa ne canacúún Jesucristó man nij síí tucu'yón se-nana so' ca'na' nij so' rihaan so', gaa ne cataj so' rihaan nij so' a:

—Cataj xna'anj yá yá 'unj rihaan nij soj cuano se vaa xa' chana cavi' nica chana nique nihánj, tzaj ne doj a caraa no' sa'anj rque chrúún yo' rihaan sa'anj caraa cunudanj yo'ó nij yuvií nanj adonj.

<sup>44</sup> O se nij so', daj doj sa'anj quínaj raá se-sa'anj nij so' ro', caraa nij so' rque chrúún, ne xa' no', tzaj ne ndá' se achiin ndo'o sa'anj rihaan no', tzaj ne rque no' rihaan Diose cunudanj sa'anj nicaj no' sa'anj quiragan no' se cha no' nanj adonj —taj Jesucristó rihaan nij síí tucu'yón se-nana so' a.

## 13

*Nana nihánj taj xna'anj se vaa canee nu' nuvií nocoo ne chuman' Jerusalén a*

<sup>1</sup> Gaa ne curihanj Jesucristó rá nuvií nocoo, gaa ne yo' o tuvi' nij síí tucu'yón se-nana so' cataj rihaan so' a:

—Ni'yaj so', ne yujej sa' inanj me yujej guun nuvií nocoo, ne ve'é ndo'o vaa nu' nij ve' man nuvií nocoo, maestro —taj yo' o tuvi' nij síí tucu'yón se-nana Jesucristó a.

<sup>2</sup> Gaa ne cataj Jesucristó rihaan so' a:

—Ne'én so' nu' nij ve' nocoo man nuvií nihánj na'. Vaa güii, ne canee nu' nuvií nocoo nihánj, ne a 'o yujej se quitáa xráa tuvi' yujej nihánj a ma' —taj Jesucristó rihaan síí tucu'yón se-nana so' a.

*Nana nihánj taj xna'anj che'é sayuun guun rihaan chumií nihánj vaa güii a*

<sup>3</sup> Dan me se ca'anj cayáán Jesucristó raá quij cu'naj Quij man Chruun Olivó, ne ni'yaj so' nuvií nocoo, ne cuchi' orún' ca'anj nij síí cu'naj Pedró do', Jacobo do', Juan do', Andrés do', rihaan so', ne xná'anj nij so' man so', cataj nij so':

<sup>4</sup> —Cataj xna'anj so' rihaan núj aman canee nu' nuvií nocoo yo' do', a me rasuun ca'na' qui'yáa so' asa' quisíj ca'na' nu' nij sayuun ndaa vaa cataj xna'anj so' rihaan núj, maestro —taj ca'anj tuvi' nij síí tucu'yón se-nana Jesucristó rihaan Jesucristó a.

<sup>5</sup> Gaa ne guun che'e Jesucristó cataj xna'anj Jesucristó rihaan nij so', ne:

—Cutumé ndo'o soj man soj se gaa nanj tihá' yu'unj yuvií man soj á.

6 'O se ca'na' uxrá yuviij cataj: "Unj me sí na'vij soj, ne Cristó mej á", cataj nij so', ne dan me se tiha' yu'unj uxrá nij so' man tuvi' nij so' nanj á.

7 "Dan me se asa' quene'en soj se vaa unu' uxrá chuman' ga tuvi' chuman', ne asa' cuno uxrá soj nana se vaa unu' chuman' man gan' ga tuvi' chuman' yo', ne cutumé soj man soj se cuchu'vi' nimán soj ma'. Maan se vaa che'é guun sayuun yo' rihaan chumiij nihánj adonj. Tzaj ne asa' quisij guun danj, gaa ne se ca'anj ni'ya chumiij nihánj nu' orá ma'. 'O se quinaj chumiij nihánj doj adonj.

8 Dan me se cunu' uxrá yuviij man chuman' nocoo ga yo'ó chuman' nocoo, ne cunu' gobiernó ga tuvi' gobiernó a. Ne cachén yuún nocoo que'ee chuman', ne cachén ndo'o x'naa uún a. Nu' sayuun nihánj ro', ase vaa guun che'e 'o chana' que'ee rque no' cuchruj no' ne'ej ro', danj gaa nu' sayuun nihánj nanj ei. Dan me se nu' ne'en chana' ve'ee rque no', ne ne'en no' doj a quirán' no' sayuun rej rihaan no', ne ase uun rá chana' yo', danj guun rá soj gaa ca'na' sayuun yo', guun rá soj se vaa daj doj guun uxrá sayuun rihaan chumiij nihánj nanj adonj.

9 "Ne tadó soj che'é sayuun quirán' ma'an soj ei. 'O se taquachén nii man soj rihaan nij sí uun chij rihaan ní' sij israelitá, ne taquachén nii man soj rihaan nij sí man rá ve' tucu'yón ní' se-tucuanj Moisés, ne maan yo' go' nii cuartá xraá soj a. Ne taquachén nii man soj canicun' soj rihaan sí nicaj suun do', rihaan sí nicaj suun rey do', che'é se me soj sí noco' manj a. Ne cataj xna'anj soj rihaan nij sí nicaj suun che'ej a.

10 Ne asino ca'miij natáj soj se-nanaj nana sa' rihaan cunudanj nij sí yanij, gaa ne ca'vee quina'vij chumiij nihánj adonj.

11 "Dan me se asa' ca'anj nicaj nii man soj rihaan nij sí nicaj suun, ne se nanó rá soj daj ca'miij soj rihaan nij so' ma'. Maan Nimán Dióse rque nu' nana ca'miij soj man orá yo' nanj adonj. 'O se nuveé ma'an soj me nij sí ca'miij rihaan nij so' ma'. 'O se Nimán Dióse me sí ca'miij rihaan nij so' nanj adonj.

12 Dan me se ca'anj nicaj snó'o man tinúú snó'o rihaan yuviij, ne ticavi' nii man tinúú snó'o yo', qui'yaj ma'an so' nanj adonj. Ne ca'anj nicaj snó'o man ta'níí snó'o rihaan yuviij, ne ticavi' nii man ta'níí snó'o yo', qui'yaj so' ei. Ne cunu' xniij ga rej xniij, ne ca'anj nicaj xniij man rej xniij rihaan yuviij, ne ticavi' nii man rej xniij yo', qui'yaj so' ei.

13 Ne nachri' cunudanj nij yuviij man rihaan chumiij ni'yaj nij so' man soj, che'é se me soj sí noco' manj adonj. Tzaj ne sí noco' raan manj ndaa se ca'anj ni'ya chumiij nihánj ro', so' me sí quina'niij rihaan sayuun adonj —taj Jesucristó rihaan ca'anj tuvi' nij sí tucu'yón se-nana so' a.

14 Ne soj sij nayaa nana nihánj ro', xcaj uxrá soj cuentá me taj nana nihánj nana ca'miij Jesucristó che'é se chi'ii á.

Dan me se cataj uún Jesucristó:

—Aj ne'en soj se vaa vaa 'o se chi'ii qui'yaj ndo'o sayuun man yuviij, ne dan me se güiij quene'en soj man se chi'ii yo' rej ne nó xcúun yo' nicun' yo', ne yo'ó cunanj nij sí man estadó Judea ca'anj nij so' raaj quij á.

15 Ne sí taj xraá ve' tucua' ro', se catúj so' rá ve' tucua' so' quirij so' si'yaj so' ma'.

16 Ne sí yaj suun tacaan ro', se canicaj so' nana' so' sagan' so' se vaa tanáj so' rihaan yo'óo ma'. Se guun raan nij so' ma'. Maan se yo'ó cunanj nij so' á.

17 Nique nij chana' nuu rque do', chana' vaa ta'níí ne'ej utzii do', güiij ca'na' sayuun yo' a. 'O se se guun nucuaj chana' yo' cunanj chana' yo' ma'.

18 Cachinj ni'yaj soj rihaan Diose se vaa se ca'na' sayuun yo' güii gaa maan ma'.

19 "O se güii yo' me se ca'na' uxrá sayuun, ne quij doj gaa sayuun yo' rihaan nu' nij sayuun quiran' yuvij asij qui'yaj Diose chumij, ne daj chihaa mij se quiran' uún yuvij sayuun vaa danj ma'.

20 Sese que'ee uxrá güii guun sayuun, ne se quinanii yuvij rihaan sayuun yo' ma'. Tzaj ne vaa güii quisij sayuun, qui'yaj sí 'nij ra'a man ní, che'é rej quinanj nij sí narii so' canoco' man so' adonj.

21 "Ne güii yo' me se sese cataj yuvij rihaan soj: "Ni'yaj soj ei. Nihánj 'na' sí tinanii man ní' rihaan sayuun á", ne se cuchumán rá soj ma'.

22 'O se ca'na' uxrá sí ne sí cataj se vaa sí tinanii man yuvij rihaan sayuun me nij so', ne ca'na' uxrá sí ne sí cataj se vaa nata' nij so' se-nana Diose, ne qui'yaj nij so' suun sa' nocoo, ne tiha' yu'unj nij so' man cunudanj nij yuvij man rihaan chumij nanj adonj. Ndaa nij sí narii Diose man ro', sese taj vaj Diose tumé man nij so', ne cuchuman rá nij so' ni'yaj nij so' man sí tiha' yu'unj yo' nanj adonj.

23 Tadó uxrá soj á. Nihánj me se cataj xna'anj 'unj rihaan soj daj guun rihaan chumij nihánj nanj á.

24 "Tzaj ne güii yo' me se asa' navij quisij sayuun yo', gaa ne guun rmi' güii guun rmi' yavii guun rmi',

25 ne cayuu nij yati' xta', ne quinaan taran' nij rasuun nucuaj man rej xta' a.

26 Gaa ne quene'en nii mán 'unj sij ca'née Diose nijaj yu'unj man yuvij á. Dan me se xraá ngaa quitaj 'unj ca'na' 'unj, ne guun nucuaj ndo'oj quirri ta'ngaj, ne ve'é uxrá curuvij ca'naj a.

27 Gaa ne ca'nej 'unj man nij se-mozó 'unj cuchí' nij so' rihaan chumij nihánj, ne dan me se naqui'yaj chre' 'unj man nij sí narii Diose man canoco' manj a. Dan me se cachee nij se-mozó 'unj rihaan nu' chumij nihánj, nano' nij so' taran' nij sí cunuu chre' ga 'unj nanj adonj.

### *Nana nihánj taj xna'anj se vaa ya quene'en ní' se vaa nichrun' ca'na' uún Jesucristó a*

28 "Tucu'yón soj nana nihánj nana che'é chruun man chruj higó raá á. Gaa quisij guun laruu ra'a chruun, ne naca coj ya'lij ra'a chruun, ne ne'en soj se vaa nichrun' 'na' tió naman maan a.

29 Dan me se xcaj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne nichrun' ca'na' uún 'unj nanj adonj. Dan me se ase vaa sí nicun' ta'yaa ro', gaa 'unj ei.

30 Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumij nihánj cuano se vaa quisij ya 'unj nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei.

31 Vaa güii ca'anj ni'ya yo'óo do', xta' do', tzaj ne se-nanaj me se daj chihaa mij se quinavij yo' ma'.

### *Nana nihánj taj xna'anj se vaa ne ne'en ní' me güii ca'na' uún Jesucristó ma'*

32 "Nihánj me cataj xna'anj 'unj rihaan soj se vaa á' o' sí ne ne'en me güii ca'na' uún 'unj rihaan chumij nihánj ma'. Ca'vee se ndaa se-mozó Diose 'yaj suun rej xta', ca'vee se ndaa ma'anj ta'nij Diose, tzaj ne ne ne'en núj me güii me yo' ma'. Qrún' Réj me sí ne'en nanj adonj.

<sup>33</sup> Yo'ò nì'yaj soj, ne se guun cotoj soj ma'. 'Q se ne ne'en uxrá soj me güii me ca'naj ma'.

<sup>34</sup> Dan me se ase vaa síi ca'anj yo'ó chuman' naj gan' vaa 'unj, ne aj tanáj 'unj ve' tucua, ne ca'ne' 'unj suun rihaan 'o 'o nij mozó nuu rihanj se vaa ve'é cutumé nij so' nu' si'yáj, ne ase vaa síi tumé ta'yaa vaa nij soj, ne aj cataj xna'anj 'unj rihaan nij soj se vaa nì'yaj soj a.

<sup>35</sup> Che'é dan tumé uxrá soj man soj, ne nì'yaj soj á. 'Q se ne ne'en soj aman ca'na' 'unj sij tucua ve' ma'. Ca'vee ca'naj rej ti'nuu, ca'vee rej yan', ca'vee orá aguáj to'loo ca'vee rej na'yaan ca'vee,

<sup>36</sup> ne tādó soj se guun taj ni'yón ca'naj ne narí' 'unj man soj ne xcaj 'unj cuentá se vaa otoj rma'an soj ei.

<sup>37</sup> Ne nana nihánj nana taj xna'anj 'unj rihaan nij soj ro', veé nana nihánj taj xna'anj 'unj rihaan cunudanj nij yuvií, se vaa tumé soj man soj se gaa nanj cotoj rma'an soj a —taj Jesucristó rihaan ca'anj tuvi' nij síi tucu'yón se-nana so' a.

## 14

*Nana nihánj taj xna'anj se vaa 'o guun rá nij xrej atq suun nocqo doj dō', ni síi naqui'yaj cuu se-tucuañ Moisés rihaan yuvií dō', se vaa cavi' Jesucristó a*

<sup>1</sup> Dan me se rque vij güii canuú cha'anj pascuá cha'anj chá nij yuvií israelitá chraa yo'óo trigó, ne dan me se 'o guun rá nij xrej atq suun nocqo doj ga nij síi naqui'yaj cuu se-tucuañ Moisés rihaan yuvií se vaa tihá' yu'unj nij so' man Jesucristó, ne quita'aa yuve nij so' man Jesucristó, ne cavi' Jesucristó, qui'yaj nij so', rá nij so' a.

<sup>2</sup> Ne cataj nij so':

—Se quita'aa ní' man so' gaa aman anuú cha'anj ma'. Sese danj qui'yaj ní', ne ca'maan rá nij yuvií, ne guun sayuun, qui'yaj nij yuvií nanj adonj —taj nij so' a.

*Nana nihánj taj xna'anj se vaa caxríj 'o chana casté raq Jesucristó a*

<sup>3</sup> Dan me se yáan Jesucristó chuman' cu'naj Betania, ne ne so' rá 'o ve' tucua síi cu'naj Simón síi canó luj ri'yuj man, ne yáan Jesucristó rihaan mesá, ne cuchi' yo'ó chana rihaan so', ne nicaj chana yo'ó aga' catzií nuu casté gun' daj rii nii man coj cu'naj nardo, ne casté tu'vee ndo'o me yo' a. Naxra' chana yo' aga', ne caxríj chana casté raq Jesucristó a.

<sup>4</sup> Ne ca'maan rá ta'aj nij síi quene'en, ne cataj nij so' rihaan tuvi' nij so':

—Me che'é tiri' rma'an chana nihánj casté sa' ga.

<sup>5</sup> Me che'é ne cutu'vee no' casté, ne quirí' no' sa'anj ase vaa 'yaj canaan yuvií rque 'o yo', ne go' no' sa'anj yo' man nij síi nique ga —taj nij so' rihaan tuvi' nij so', gaa ne guun che'e nij so' caxríj yuvaq nij so' man chana yo' a.

<sup>6</sup> Gaa ne cataj Jesucristó rihaan nij so' a:

—Me che'é a'mii soj danj ni'yaj soj man chana ga. Ca'ne' guee rá nij soj doj nanj á. 'Q se ve'é uxrá qui'yaj no' manj ei.

<sup>7</sup> 'Q se síi nique me se daj a güii mán nij síi nique ga soj, ne me ma'an güii guun rá soj, ne ca'vee qui'yaj soj se luj ga nij síi nique ei. Tzaj ne 'unj me se vaa güii ca'anj 'unj, ne quinañ unj soj, ne se ca'vee qui'yaj soj se luj che'ej ma'.

<sup>8</sup> Ne chana nihánj me se qui'yaj ma'an no' nu' ndaa vaa ca'vee qui'yaj no', ne dan me se gaa ataa cavi' 'unj ne aj caxríj no' casté gun' daj manj che'é rej xcaj soj cuentá se vaa cachin' nii manj adonj.



<sup>9</sup> Ne cataj yá yá 'unj rihaan nij soj cuano se vaa me rej ma'an ca'mij natáj yuvij se-nanaj nana sa' rihaan nij yuvij man rihaan nu' chumij nihánj ro', ne cataj xna'anj uún yuvij rihaan tuvi' yuvij che'é se vaa qui'yaj chana nihánj manj, ne se quini'yón yuvij man chana nihánj ma' —taj Jesucristó a.

*Nana nihánj taj xna'anj se vaa cutu'vej sí cu'naj Judas man Jesucristó rihaan nij sí taj ri'yunj man Jesucristó a*

<sup>10</sup> Gaa ne sí cu'naj Judas Iscariote yo'q tuvi' chuvij nij sí tucu'yón se-nana Jesucristó me se cavij so' ca'anj so' rihaan nij xrej atá suun nocqo doj, che'é rej racuíj so' man nij so' quita'aa nij so' man Jesucristó a.

<sup>11</sup> Ne gaa cuno nij xrej atá suun nocqo doj, ne guun niha' uxrá rá nij so', ne cata' tu'va nij so' se vaa nago' nij so' sa'anj man sí cu'naj Judas a. Gaa ne guun che'é sí cu'naj Judas nuchruij raq so' aman ca'vee racuíj so' man nij xrej atá suun nocqo doj quita'aa nij so' man Jesucristó a.

*Nana nihánj taj xna'anj se vaa ma'an Jesucristó taj xna'anj se vaa tacuachén yo'q tuvi' nij sí tucu'yón se-nana so' man so' rihaan nij sí taj ri'yunj man so' a*

<sup>12</sup> Dan me se quisij güii yaan canuú cha'anj chá nij yuvij israelitá chraa yo'óo trigó, ne güii ticavi' nij so' matzinj le'ej che'é Diosé me yo', ne dan me se nij sí tucu'yón se-nana Jesucristó me se xná'anj nij so' man Jesucristó, cataj nij so':

—Me rej ca'anj núj qui'yaj chuvij núj chá xti'nq ní' cha'anj pascuá, rá so' ga —taj nij so' rihaan Jesucristó a.

<sup>13</sup> Gaa ne ca'née Jesucristó man vij tuvi' nij sí tucu'yón se-nana so', ne cataj so' rihaan roj so' a:

—Cavij roj soj, ne catuu roj soj chuman' Jerusalén nihánj, ne nari' tuvi' roj soj ga 'o sí atá 'o cacuaj na,

<sup>14</sup> ne canoco' roj soj man so', ne rihaan sí tucua ve' catuu so' me se cataj soj: “Xná'anj maestró mán so' se vaa me rej ne ve' chá xti'nq maestró chraa ga nij sí tucu'yón se-nana so' che'é cha'anj pascuá, taj so' a”, cataj roj soj rihaan sí tucua ve' yo' á.

<sup>15</sup> Gaa ne tihaa so' 'o ve' nata' xij rihaan roj soj, ne aj vaa chuvij rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvij roj soj á —taj Jesucristó rihaan roj so' a.

<sup>16</sup> Gaa ne curihañ roj sí tucu'yón se-nana Jesucristó, ne catúj roj so' chuman' Jerusalén, ne nari' roj so' nu' ndaa vaa cataj xna'anj Jesucristó rihaan roj so', gaa ne qui'yaj chuvij roj so' chá xti'nq nij so' chraa che'é cha'anj pascuá a.

<sup>17</sup> Ne rej ti'nuu, ne ca'na' Jesucristó ga yo'ó chí' nij sí tucu'yón se-nana so' a.

<sup>18</sup> Dan me se yáan nij so' rihaan mesá, chá nij so' chraa, ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa yo'q tuvi' nij soj me sí tacuachén manj rihaan nij sí taj ri'yunj manj, ne sí chá chraa ga 'unj cuano me sí qui'yaj danj ei —taj Jesucristó a.

<sup>19</sup> Gaa ne guun che'é nij sí tucu'yón se-nana so' quinanó ndo'o rá nij so', ne guun che'é nij so' ndaa 'o 'o nij so' xná'anj man Jesucristó, cataj 'o 'o nij so':

—'Unj me sí qui'yaj danj na' —taj 'o 'o nij so' a.

<sup>20</sup> Gaa ne cataj Jesucristó rihaan nij so' a:

—Yo'q tuvi' chuvij nij soj sij tucu'yón se-nanaj me sí tacuachén manj rihaan nij sí taj ri'yunj manj, ne sí tiguíj rachrúun ga 'unj rá co'oo me so' adonj.

<sup>21</sup> Q se taj danj Diose se vaa ca'anj 'unj cavi' 'unj sij ca'née Diose nicañ yu'unj man yuvij, ne ya danj quirán' 'unj adonj. Tzaj ne nique ndo'o sí tacuachén manj rihaan nij sí taj ri'yunj manj nanj á. Quiran' uxrá so' sayuun nanj á. Snó'o yo' me se sese ne ca'ngaa so', ne cavií sa' so' doj tzaj adonj —taj Jesucristó a.

*Nana nihánj taj xna'anj che'é rachrúun rqué Jesucristó rihaan nij sí tucu'yón se-nana so' cha nij so' do', che'é na vinó rqué so' co'oj nij so' do' a*

<sup>22</sup> Ne gaa chá nij so' chraa, ne quita'aa Jesucristó yo'q rachrúun, ne nago' so' graciá rihaan Diose, ne cuxra' ta'aj so' rachrúun, ne rqué so' rihaan nij sí tucu'yón se-nana so', ne cataj so':

—Quita'aa soj rachrúun nihánj á. Neñ manj me rachrúun nihánj ei —taj so' a.

<sup>23</sup> Gaa ne quita'aa Jesucristó aga' tazá nuu na vinó, ne nago' so' graciá rihaan Diose, ne tacuachén so' aga' nuu na vinó rihaan nij so', ne co'o cunudanj nij so' na vinó yo' a.

<sup>24</sup> Gaa ne cataj so' rihaan nij so' a:

—Ton manj me na nihánj, ne che'é ton manj ro', rqué Diose 'o nana rihaan soj daj qui'yaj Diose ga soj a. Dan me se cayanj ton manj che'é que'ee yuvij adonj.

<sup>25</sup> Ne cataj yá yá 'unj rihaan soj cuano se vaa veé doj nihánj me co'oj, ne se co'oj yaj a ma'. Tzaj ne asa' quisij güii guun chij Diose rihaan chumij nihánj, ne cunuú naca chumij nihánj, gaa ne co'oj na vinó naca ei —taj Jesucristó rihaan nij sí tucu'yón se-nana so' a.

<sup>26</sup> Gaa ne cachraá taran' nij so' chra' rihaan Diose, ne cavií nij so', ca'anj nij so' quij cu'naj Quij man Chruun Olivó a.

*Nana nihánj taj xna'anj se vaa cataj xna'anj Jesucristó se vaa guun na'aj sí cu'naj Pedró, ne cataj so' se vaa nuveé sij noco' man Jesucristó me so' a*

<sup>27</sup> Gaa ne cataj Jesucristó rihaan nij so' a:

—Danj Diose taj se vaa go' Diose man sí tumé matzinj, ne cunanj nij matzinj cha'nuu nij xo' a. Ne ya ase vaa daán 'unj matzinj vaa soj, ne guun na'aj taran' soj, ne se canoco' soj manj a ma'.

<sup>28</sup> Tzaj ne asa' quisij cunuú i'na' uún 'unj, ne quitaj yaan 'unj rihaan soj ca'anj 'unj estadó Galilea, ne nari' tuvi' ní' estadó Galilea nanj adonj —taj Jesucristó rihaan nij sí tucu'yón se-nana so' a.

<sup>29</sup> Gaa ne cataj sí cu'naj Pedró rihaan so' a:

—Ca'vee se tanáj taran' nij so' mán so', tzaj ne daj chihaa mij se tanáj 'unj mán so' ma' —taj Pedró a.

<sup>30</sup> Ne cataj Jesucristó:

—Ya ya cataj xna'anj 'unj rihaan so' cuano se vaa aj ne'én 'unj se vaa nij cuan' gaa ataa quisij vij caguáj to'loo, ne va'nuy ya cataj so' rihaan yuvij se vaa nuveé sij noco' manj mé so' a —taj Jesucristó rihaan Pedró a.

<sup>31</sup> Gaa ne nucuaj uxrá cataj Pedró rihaan Jesucristó, ne:

—Taj ma'. Ca'vee se ticavi' yuvij man ní', tzaj ne daj chihaa mij se cataj 'unj se vaa nuveé sij noco' mán so' mej ma' —taj Pedró rihaan Jesucristó a.

Ne ase vaa cataj Pedró ro', danj cataj taran' nij sí tucu'yón se-nanā Jesucristó a.

*Nanā nihánj taj xna'anj daj qui'yaj Jesucristó gaa cachín ni'yaj Jesucristó rihaan Diose a*

<sup>32</sup> Gaa ne ca'anj Jesucristó ga nij so' ndaa yo'ó rej cu'naj Getsemaní, ne cataj xna'anj Jesucristó rihaan nij so' a:

—Canē soj nihánj, na'v'ij soj mán 'unj, ne ca'anj 'unj, cachinj ni'yáj rihaan Réj a —taj Jesucristó a.

<sup>33</sup> Ne nicaj Jesucristó man Pedró do', man Jacobo do', man Juan do', ca'anj so', ne guun che'e so' quinanó ndo'o rá so' a.

<sup>34</sup> Gaa ne cataj so' rihaan va'nuj nij sí ca'anj ga so' a:

—Naná uxrá raj adonj. Maan che'é rej nanó ndo'o raj, qui'yaj cavi' 'unj, raj a. Qui'yaj soj se ndo'o quinaj soj nihánj, ne se cotoj soj ma' —taj Jesucristó rihaan va'nuj nij so' a.

<sup>35</sup> Gaa ne cavii so' yaníj doj tzin', ne ca'anj çayáán rno so' rihaan yo'óó, ne cachín ni'yaj so' rihaan Diose se vaa sese ca'vee, ne çaráán ra'a Diose xráá so', ne gaa nanj quirán' so' sayuun a.

<sup>36</sup> Dan me se cataj so':

—Ca'vee qui'yáá so' cunudanj, Ataj. Çaráán ra'á so' xráj, se gaa nanj quirán' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáá so' ndaa vaa me rá ma'án so', ne se qui'yáá so' ndaa vaa me rá ma'anj ma' —taj Jesucristó, cachín ni'yaj so' rihaan Diose a.

<sup>37</sup> Gaa ne canicaj uún so' ca'na' so' rihaan va'nuj nij sí tucu'yón se-nanā so', ne quene'en so' se vaa cotoj cunudanj nij so' a. Gaa ne cataj so' rihaan Pedró a:

—Otoj so', nanj Pedro. A' ó orá ne guun nucuáá so' ni'yaj so' a ma'. Ya na'.

<sup>38</sup> Maan se ni'yaj soj, ne cachinj ni'yaj soj rihaan Diose se vaa çaráán Diose rihaan sí chree se çaxríj sí chree chrej chi'ij rque soj á. 'Q se niha' rá soj qui'yaj soj se sa', tzaj ne ne uun nucuaj soj ma' —taj Jesucristó rihaan nij so' a.

<sup>39</sup> Gaa ne cavii uún Jesucristó, ca'anj so', ne cachín ni'yaj uún so' rihaan Diose, ne cuyaan vaa nanā ca'mii so' rihaan Diose ga nanā ca'mii so' asij cua'aa doj a.

<sup>40</sup> Gaa ne canicaj uún so' ca'na' so', ne quene'en so' se vaa cotoj uún va'nuj nij sí tucu'yón se-nanā so' a. 'Q se ca'na' ndo'o nej rihaan nij so' a. Ne ne narí' nij so' nanā ca'mii nij so' rihaan so' a.

<sup>41</sup> Gaa ne corá me se ca'na' uún so' rej man va'nuj nij sí tucu'yón se-nanā so', ne cataj so':

—Ca'vee cotoj soj ca'vee naraan rá soj ca'vee sese vaa ya'núj rihaan soj á. Ni'yaj soj, ne nihánj me se quisíj orá tacuachén yo'o so' manj rihaan sí tumé ndo'o cacun', che'é se mé 'unj sí ca'néé Diose nicaj yu'unj man yuvij adonj.

<sup>42</sup> Naxagaa soj, ca'anj ní' nanj ei. Ni'yaj soj nedí'. 'Na' sí tacuachén manj rihaan sí taj ri'yunj manj nanj chuguanj —taj Jesucristó a.

*Nanā nihánj taj xna'anj daj qui'yaj nii gaa quita'aa nii man Jesucristó a*

<sup>43</sup> Dan me se nicun' Jesucristó ca'mii so', ne nu' ca'na' sí cu'naj Judas yo'o tuvi' chuvij nij sí tucu'yón se-nanā Jesucristó, ne ca'na' uxrá yuvij ga so', ne nicaj nij yuvij neé espadá do', chruun do' a. Dan me se nij yuvij ca'néé nij xrej atā suun nocqo doj do', nij yuvij ca'néé nij sí naquiyaj çu se-tucuanj

Moisés do', nij yuviḡ ca'neé nij sí uun chij rihaan nij yuviḡ israelitá do', me nij yuviḡ ca'na' a.

<sup>44</sup> Ne sí cu'naj Judas cataj xna'anj rihaan nij yuviḡ se vaa daj qui'yaj so' ga Jesucristó, gaa ne cunuḡ yaan nij yuviḡ man Jesucristó, ne cataj so':

—Sí rutu'vaj ro', so' me sí quita'aa soj cuaj á. Raan cano soj man so', ca'anj soj á —taj sí cu'naj Judas a.

<sup>45</sup> Gaa ne nu' cuchi' so' cuaj rihaan Jesucristó, ne cataj so':

—Maestro —taj so', ne nu' cachrón tu'va so' xruḡ Jesucristó a.

<sup>46</sup> Gaa ne cuchi' nij yuviḡ rihaan Jesucristó, ne quita'aa nij yuviḡ man Jesucristó a.

<sup>47</sup> Ne yo'ó sí nicun' ga Jesucristó me se quirii so' taneé so' neé espadá, ne go' so' neé espadá yo' raḡ yo'ó se-mozó xrej atá suun nocoo doj, ne veé dan güéj nu' xrée mozó yo', qui'yaj so' a.

<sup>48</sup> Gaa ne cataj Jesucristó rihaan nij yuviḡ a:

—Me che'é nicaj soj neé espadá nicaj soj chruun nicaj soj, ca'na' soj ga. Sí ituḡ mé 'unj, rá soj na'.

<sup>49</sup> Ne 'o se guun que'ee güii cayáan 'unj rá nuví nocoo, tucu'yón 'unj se-nanaj rihaan soj, tzaj ne ne quita'aa soj manj ma'. Tzaj ne nihánj me se quirán' 'unj nu' se vaa taj nana no rihaan danj Diosé a —taj Jesucristó a.

<sup>50</sup> Gaa ne tanáj cunudanj nij sí tucu'yón se-nana Jesucristó man so', ne cunánj nij so', ca'anj nij so' a.

<sup>51</sup> Ne vaa 'o sí tachruḡ noco' xcó Jesucristó, ne orún' yatzíj mantá niquee so', ne quita'aa nij yuviḡ man so',

<sup>52</sup> gaa ne tanáj so' yatzíj mantá ra'a nij yuviḡ, cunánj so', ne cánj uun vaa so', cunánj so' a.

*Nana nihánj taj xna'anj daj qui'yaj nii gaa cuta' nii cacun' xráa Jesucristó a*

<sup>53</sup> Dan me se nij sí quita'aa man Jesucristó me se nicaj nij so' man Jesucristó ca'anj nij so' rihaan sí yanj xrej atá suun nocoo doj, gaa ne cunuḡ chre' yo'ó nij xrej atá suun nocoo doj do', nij sí naqui'yaj cuḡ se-tucuanj Moisés rihaan nij yuviḡ do', nij sí uun chij do', rej mán nij so' a.

<sup>54</sup> Ne gan' gan' canoco' sí cu'naj Pedró xcó Jesucristó, ne cuchi' so' rihaan ve' yanj xrej atá suun nocoo doj yo', ne catúj so' rá ve', ne ca'anj cayáan so' ga nij se-mozó xrej man rá ve', tinaguun so' ra'a so' rihaan ya'an a.

<sup>55</sup> Dan me se nano' nij xrej atá suun nocoo doj nano' nij cuese nano' man yuviḡ cataj xna'anj che'é cacun' tumé Jesucristó a. Me rá nij so' nari' nij so' cacun' cuta' nij so' xráa Jesucristó, ne cavi' Jesucristó, rá nij so' a. Tzaj ne nuvi' cacun' tumé Jesucristó nari' nij so' ma'.

<sup>56</sup> 'o se cuchi' uxrá sí ne rihaan nij cuese ca'mii ne nij so', tzaj ne ino vaa nana ca'mii 'o 'o nij so' a.

<sup>57</sup> Gaa ne canicun' yo'ó doj sí ne uún, ne guun rá nij so' cuta' nij so' cacun' xráa Jesucristó, ne dan me se cataj nij so':

<sup>58</sup> —Cuno núj se vaa cataj Jesucristó se vaa: “'Unj me sí tucuanee nuví nocoo nihánj nuví cune' yuviḡ, ne rque va'núj güii cune' 'unj yo'oj uún, tzaj ne nuveé nuví cune' ma'an yuviḡ me nuví cune' 'unj a man adonj”, taj Jesucristó cuno núj ei —taj sí ne ni'yaj nij so' man Jesucristó,

<sup>59</sup> tzaj ne ndaa se-nana nij so' me se ne 'o cuyaḡ vaa nana ca'mii 'o 'o nij so' a ma'.

<sup>60</sup> Gaa ne canicun' xrej atá suun nocoo doj tanuḡ yo'ó nij sí man rá ve' yo', ne xná'anj so' man Jesucristó, cataj so':

—Me che'é ne a'mii so' ga. Daj vaa nana nihánj nana a'mii roj sí nihánj che'é so' ga —taj so', xná'anj so' man Jesucristó a.

<sup>61</sup> Tzaj ne dínj táá Jesucristó, ne ca'mii so' a doj nana a. Gaa ne xná'anj uún xrej atá suun nocoo doj man Jesucristó, ne:

—So' me ta'ní Diose sí tñanii man yuvi rihaan sayuun na' —taj so', xná'anj so' man Jesucristó a.

<sup>62</sup> Gaa ne cataj Jesucristó rihaan so' a:

—Veé danj vaa ya ei. Ne quene'en soj se vaa quitaj 'unj rej nuva' Diose sí nucuaj ndo'o á. Ne quene'en uún soj se vaa ca'na' uún 'unj rihaan chumii nihánj, ne quitaj 'unj xráá ngaa xta' ca'naj adonj —taj Jesucristó rihaan xrej atá suun nocoo doj yo' a.

<sup>63</sup> Gaa ne ca'maan rá xrej yo', ne cutzin' xrej yo' sagan' ma'an xrej, ne cataj xrej rihaan tuvi' xrej a:

—Ni'yaj soj vij. Se cachiin doj sí ca'na' cataj xna'anj rihaan ní' che'é cacun' tumé sí nihánj a ma'.

<sup>64</sup> Ne cuno soj nana quij ca'mii so' se vaa quitaj ma'an so' rej x'nuj Diose na'. Aj cuno soj chuguanj. Ne daj qui'yaj ní' man so', rá soj ga —taj xrej, xná'anj xrej man nij tuvi' xrej a.

Gaa ne cunudanj nij so' cuta' cacun' xráá Jesucristó se vaa nq xcúun Jesucristó cavi' Jesucristó a.

<sup>65</sup> Gaa ne guun che'e ta'aj nij so' quirii talúj nij so' man Jesucristó, ne caráan nij so' yatzij rihaan Jesucristó, ne go' nij so' man Jesucristó, ne cataj nij so':

—Racu'j Diose mán so' cataj xna'anj so' rihaan núj me sí go' mán so' vij —taj nij so', tiha' yu'unj nij so' man Jesucristó a.

Ne nicaj nij tanuu man so', ne go' nij tanuu chruun xráá so' a.

*Nana nihánj taj xna'anj daj qui'yaj sí cu'naj Pedró gaa cataj so' se vaa nuveé sij nocoo' man Jesucristó me so' a*

<sup>66</sup> Veé dan, ne yanj Jesucristó ga yo'o nij so' rá ve', ne yanj sí cu'naj Pedró rej rque doj rej rihaan ve' yo' a. Gaa ne ca'na' yo'o mozó chana nuu rihaan xrej atá suun nocoo doj,

<sup>67</sup> ne quene'en no' man Pedró gaa tinaguun Pedró ra'a Pedró rihaan ya'an a. Gaa ne ni'yaj uxrá mozó chana yo' man Pedró, gaa ne cataj no':

—Ne ma'an so' me yo'o sí cachée ga Jesucristó sí cavii chuman' Nazaret á —taj mozó chana yo' rihaan Pedró a.

<sup>68</sup> —Taj ma'. Ne unó 'unj me taj so' ma' —taj Pedró rihaan mozó chana, gaa ne curihanj so', ne canicun' so' rihaan chingá a.

<sup>69</sup> Gaa ne quene'en mozó chana se vaa nicun' Pedró rihaan chingá, ne guun che'e no' ca'mii no' rihaan nij yuvi nicun' rihaan chingá ga Pedró, cataj no':

—Sí nihánj me yo'o nij sí cachée ga Jesucristó asuun asán —taj mozó chana yo' a.

<sup>70</sup> Gaa ne cataj uún Pedró se vaa ne ne'en so' man Jesucristó a.

Dan me se corá nii me se cataj nij sí nicun' ga Pedró rihaan Pedró a:

—Ya ya yo'o sí cachée ga Jesucristó mé so' ei. 'Q se sij cavii estadó Galilea mé so' chuguanj —taj nij so' rihaan Pedró a.

<sup>71</sup> Gaa ne guun che'e Pedró nucuaj doj ca'mii Pedró, cataj Pedró se vaa ca'vee qui'yaj Diose sayuun man so' sese nuveé nana ya me nana a'mii so', ne cataj so':

—Ne ne'enj man snó'o nihánj sí a'mii soj che'é a ma' —taj uún Pedró,

<sup>72</sup> gaa ne nu' quisij vij caguáj to'loo a.

Gaa ne nanuj rá Pedró ndaa vaa cataj Jesucristó rihaan so' quii se vaa gaa ataa quisij vij caguáj to'loo, ne va'nuj cataj Pedró se vaa nuveé sij noco' man Jesucristó me ma'an Pedró a. Gaa ne guun che'e Pedró ta'vee ndo'o Pedró a.

## 15

### *Nana nihánj taj xna'anj daj ca'mii sí cu'naj Pilato ga Jesucristó a*

<sup>1</sup> Gaa ne rej ranga' cunuu chre' nij xrej atá suun noco'oj doj do', nij sí uun chij do', nij sí naqui'yaj cuu se-tucuanj Moisés do', cunudanj nij cuese do', qui'yaj nij so' juntá, gaa ne numíj nij so' man Jesucristó, ne nicaj nij so' man Jesucristó ca'anj nij so' rihaan sí cu'naj Pilato, ne tacuachén nij so' man Jesucristó rihaan so' a.

<sup>2</sup> Gaa ne xná'anj sí cu'naj Pilato man Jesucristó, cataj so':

—So' me sí nicaj suun rey uun chij rihaan nij yuvií israelitá na' —taj so', xná'anj so' man Jesucristó a.

—Vej ei —taj Jesucristó rihaan so' a.

<sup>3</sup> Ne cuta' ndo'o nij xrej atá suun noco'oj doj cacun' xráá Jesucristó a.

<sup>4</sup> Gaa ne xná'anj uún sí cu'naj Pilato man Jesucristó, cataj so':

—Me che'é ne a'mii so' ga. Nihánj me se uta' uxrá nii cacun' xráá so' ei —taj sí cu'naj Pilato rihaan Jesucristó a.

<sup>5</sup> Tzaj ne yuun che'é ne ca'mii Jesucristó a doj nana rihaan so', ne caráya'anj uxrá sí cu'naj Pilato che'é yan qui'yaj so' danj a.

### *Nana nihánj taj xna'anj se vaa cataj xna'anj sí cu'naj Pilato se vaa cavi' Jesucristó rihaan rcutze a*

<sup>6</sup> Ne vaa yo'o tucuáán noco' sí cu'naj Pilato se vaa rii so' man yo'o yo'o sí 'nij taga' 'o 'o cha'anj pascuá, ne tinavij uun so' cacun' tumé sí urihanj taga' yo' a. Me ma'an 'o sí 'nij taga' achín nij yuvií se vaa quirí so', ne ca'vee qui'yaj so' ndaa vaa taj nij yuvií a.

<sup>7</sup> Dan me se vaa 'o sí cu'naj Barrabás 'nij taga' ga yo'ó nij sí guun rá cunu' ga gobiernó, ne nij so' me se gaa cunu' nij so' ga gobiernó ne ticavi' ndo'o nij so' yuvií a.

<sup>8</sup> Dan me se cavii nij yuvií israelitá, ne guun che'e nij so' cachín nij so' man sí cu'naj Pilato se vaa quirí so' man 'o sí 'nij taga' ndaa vaa u'yón so' 'yaj so' che'é nij so' a.

<sup>9</sup> Gaa ne xná'anj sí cu'naj Pilato man nij yuvií, cataj so':

—Ne me rá soj quirí 'unj man sí nicaj suun rey uun chij rihaan soj sij israelitá na' —taj so', xná'anj so' man nij yuvií a.

<sup>10</sup> Danj ca'mii so', ne'en so' se vaa maan che'é se guun xcoj ruvaá rá nij xrej atá suun noco'oj doj me tacuachén nij xrej man Jesucristó rihaan so' a.

<sup>11</sup> Tzaj ne nij xrej atá suun noco'oj doj me se cataj xna'anj nij so' rihaan nij yuvií se vaa quirí sí cu'naj Pilato man sí cu'naj Barrabás taga' qui'yaj nij yuvií a.

<sup>12</sup> Gaa ne xná'anj uún sí cu'naj Pilato man nij yuvií, cataj so':

—Che'é se me rá soj quirí 'unj man sí cu'naj Barrabás rihaan soj, ne che'é dan daj qui'yáj man sí tucu'náj soj sí nicaj suun rey uun chij rihaan soj ga —taj so', xná'anj so' man nij yuvií a.

<sup>13</sup> Gaa ne caguáj uún nij yuvií, cataj nij yuvií:

—Cavi' so' rihaan rcutze, qui'yáá so' ei —taj nij yuvií a.

<sup>14</sup> —Tzaj ne me cacun' tumé so' ga —taj sí cu'naj Pilato, xná'anj so' man nij yuvií a.

Tzaj ne doj a caguáj nij yuvi, cataj nij yuvi:

—Cavj' so' rihaan rcutze, qui'yáa so' cuaj ei. —Danj inanj caguáj nij yuvi a.

<sup>15</sup> Ne sí cu'naj Pilato me se guun rá so' qui'yaj so' ndaa vaa nq xcúún so' qui'yaj so' che'é nij yuvi, ne che'é dan quirii so' man sí cu'naj Barrabás taga' che'é nij yuvi, ne go' nij tanuu cuartá xráá Jesucristó, qui'yaj so', ne tacuachén so' man Jesucristó rihaan nij tanuu che'é rej cachron nij tanuu man Jesucristó rihaan rcutze a.

*Nana nihánj taj xna'anj se vaa ca'nga' nacoj nij tanuu ni'yaj nij tanuu man Jesucristó a*

<sup>16</sup> Gaa ne ca'anj nicaj nij tanuu man Jesucristó rá ve' tucúa sí nicaj suun gobernador, gaa ne canacúún nij tanuu man taran' nij tuvi' tanuu nij so' cunu chre' taran' nij so' a.

<sup>17</sup> Gaa ne nanuú Jesucristó sagan' rey yatzj tintá, qui'yaj nij tanuu, ne qui'yaj nij so' cachriin tanj, cuta' nij so' raaj Jesucristó a.

<sup>18</sup> Gaa ne guun che'e nij tanuu caguáj nij tanuu rihaan Jesucristó, cataj nij tanuu:

—Ya ya sij nicaj suun rey rii ta'nga' rihaan nij yuvi israelitá mé so' ei —taj nij so', tiha' nij so' man Jesucristó a.

<sup>19</sup> Gaa ne go' nij so' vará raaj Jesucristó, ne quirii talúj nij so' man Jesucristó, ne canicun' ruj nij so' rihaan Jesucristó, ne qui'yaj nij so' ndaa vaa 'yaj yuvi na'víj rihaan ya'anj a.

<sup>20</sup> Sij ca'nga' nacoj nij so' ni'yaj nij so' man Jesucristó, gaa ne quirii uún nij so' sagan' rey yatzj tintá nuu Jesucristó, ne na'née uún nij so' sagan' uún Jesucristó man uún so', gaa ne nicaj nij so' man Jesucristó cavii nij so' ca'anj nij so' yan cachron nij so' man Jesucristó rihaan rcutze a.

*Nana nihánj taj xna'anj daj qui'yaj nij yuvi gaa cachrón nij tanuu man Jesucristó rihaan rcutze a*

<sup>21</sup> Dan me se gaa vaj nij tanuu ga Jesucristó, ne 'na' nique yo'o sí cu'naj Simón sí cavii chuman' Cirene rej tacaan, ne so' me se rej roj sí cu'naj Alejandro ga Rufo me so', ne dan me se quita'aa nij tanuu man so', ne qui'yaj uxrá nij tanuu fuerzá man sí cu'naj Simón yo' çatá so' rcutze cano Jesucristó rihaan a.

<sup>22</sup> Dan me se nicaj nij tanuu man Jesucristó ca'anj nij tanuu tacaan cu'naj Gólgota, ne nana “Gólgota” ro', taj Tacaan Cúu Yave Xnangá a.

<sup>23</sup> Gaa ne rque nij tanuu doj na vinó nachej ga na e' cu'naj mirra man Jesucristó co'o so' a. Tzaj ne ne co'o so' ma'.

<sup>24</sup> Veé dan, ne cachrón nij tanuu man Jesucristó rihaan rcutze, ne tico tixaj nij so' che'é sagan' Jesucristó me sí qui'yaj canaán 'o 'o ta'aj sagan' so' a.

<sup>25</sup> Dan me se aga' uun rej xta' güii me cachrón nij tanuu man Jesucristó rihaan rcutze a.

<sup>26</sup> Ne cachrón nij tanuu letrá rihaan 'o rcuchra', ne taj xna'anj letrá yo' me che'é cavi' Jesucristó, ne: “Sí nihánj me sí nicaj suun rey uun chij rihaan nij yuvi israelitá a”, taj letrá yo' a.

<sup>27</sup> Gaa ne cachrón nij tanuu man yavj snó'o rihaan yavj rcutze yo', ne yavj roj so' me sí ituu a. Dan me se nicun' yo'o so' rej nuva' Jesucristó, ne nicun' yo'o so' rej nichruun Jesucristó a.

28 Ne veé danj quisíj ya nu' nanaŋ no rihaan danj Diose nanaŋ taj: “Guun rá nii se vaa yo'ŋ tuvi' nij síi tumé cacun' me so', rá nii a”, taj se-nanaŋ Diose yo' a.

29 Gaa ne cachén yuvií rej nicun' Jesucristó, ne ca'mii chí'ii ndo'o nij yuvií ni'yaj nij yuvií man Jesucristó a. Dan me se tucunó nij yuvií raá nij yuvií, cataj nij yuvií:

—Nihánj táa so' sij guun rá taćuanee man nuvií nocoo ne cune' yo'ó nuvií nocoo rque va'nuj güii na'.

30 Tinanii so' mán so' rihaan rcutze, ne nanij so' rihaan yo'óŋ yaj vij —taj nij yuvií rihaan Jesucristó a.

31 Ne ase vaa qui'yaj nij yuvií ro', danj qui'yaj uún nij xrej ata suun nocoo doj do', nij síi naqui'yaj cuu se-tucañj Moisés do', ca'mii chí'ii nij so' rihaan tuvi' nij so' ni'yaj nij so' man Jesucristó, ne cataj nij so':

—Tinanii síi nihánj man yo'ó yuvií rihaan sayuun, rá so', tzaj ne ne guun nucuaj so' tinanii so' man ma'an so' rihaan rcutze danj.

32 Sese ya ya sij ca'née Diose tinanii man yuvií rihaan sayuun me so' do', sese ya ya sij nicaj suun rey uun chij rihaan ní' sij israelitá me so' do', ne nanij so' cuano rihaan yo'óŋ, ne quene'en ní', ne cuchuman rá ní' ni'yaj ní' man so' adonj —taj nij so', chí'ii ndo'o ca'mii nij so' ni'yaj nij so' man Jesucristó a.

Ne roj síi ituu nicun' rihaan rcutze rej x'nuj Jesucristó me se ca'mii roj so' nanaŋ nij rihaan Jesucristó a.

### *Nanaŋ nihánj taj xna'anj daj guun gaa cavi' Jesucristó a*

33 Veé dan, ne caxuj, ne yuun che'e guun rmi' rihaan chumií, ne yo'ŋ guun rmi' chumií ndaa quisíj aga' va'nuj rej anoco' güii a.

34 Veé dan, ne quisíj aga' va'nuj, gaa ne nucuaj ndo'o caguáj Jesucristó, cataj so':

—Eloi, Eloi, lama sabactani —taj so', caguáj so' xna'anj a'mii ma'an so' a. Ne nanaŋ caguáj so' taj: “Diose síi nocoo' 'unj mé so' á. Me che'é tanáj uun so' mán 'unj ga”, taj nanaŋ caguáj Jesucristó a.

35 Ne cuno ta'aj nij síi nicun' rej x'nuj Jesucristó nanaŋ caguáj so', tzaj ne ne cunoo nij so' me taj Jesucristó a ma'. Maan se:

—Ni'yaj so' ei. Nacúun síi nihánj man síi cu'naj Elías tadonj —taj nij so' rihaan tuvi' nij so' a.

36 Gaa ne cunánj yo'ŋ so', ne caraa so' na vinó yuu rque 'ŋ yataaŋ esponja, ne cuta' so' raá yo'ŋ vará, ne ru'maan so' yataaŋ tu'va Jesucristó, ne co'ŋ Jesucristó na yuu yo', qui'yaj so', ne cataj síi qui'yaj danj:

—Dínj qui'yaj soj á. Quene'en ní' sese ca'na' síi cu'naj Elías tananij síi cu'naj Elías man so' rihaan yo'óŋ ei —taj so' rihaan tuvi' so' a.

37 Gaa ne sca' gaguáj Jesucristó, ne cavi' so' a.

38 Gaa ne quisin' yatzíj mantá cortiná nocoo' rá nuvií nocoo yo' ndaa rej raá, ne 'ŋ quiniñ ca'anj ndaa tacóŋ yo' a.

39 Veé dan, ne nicun' tanuu capitán rihaan Jesucristó, ne quene'en so' nu' se vaa guun gaa cavi' Jesucristó, ne ndaa dan asuun gaa xcaj so' cuentá se vaa ya uxrá ta'nij Diose me Jesucristó, ne dan me se cataj so':

—Ya ta'nij Diose me snó'ŋ nihánj tadonj —taj tanuu capitán yo' a.

40 Ne gan' doj nicun' que'ee chana, ni'yaj uun nij chanaŋ man Jesucristó a. Yo'ŋ no' me chana cu'naj Mariá Magdalena, ne yo'ŋ no' me chana cu'naj Mariá níi síi cu'naj Jacobo Cunij ga síi cu'naj José a. Ne yo'ŋ no' me chana cu'naj Salomé a.



41 Dan me se gaa vaj Jesucristó estadó Galilea, ne qui'yaj suun nij chana che'é Jesucristó a. Ne vaa que'eej doj chana uún ní ca'anj chuman' Jerusalén ga Jesucristó a.

*Nana nihánj taj xna'anj se vaa cachin' nii man Jesucristó rque yu'uj yuvej a*

42 Dan me se rej ata' güii me yo', ne güii no xcúun nij yuvij israelitá qui'yaj chuvij nij so' che'é güii a'yuj güii naránj rá nij so' me yo',

43 ne che'é dan ca'na' yo'o síi cu'naj José síi ne chuman' Arimatea, ne yo'o síi sa' uun chij rihaan nij yuvij israelitá me so', ne síi me ndo'o rá guun chij Diose rihaan chumij nihánj me uún so' a. Dan me se quisij rá so', ne catúj so' rihaan síi cu'naj Pilato, ne cachín ni'yaj so' rihaan síi cu'naj Pilato se vaa ca'vej síi cu'naj Pilato cachin' so' man Jesucristó a.

44 Dan me se caráya'anj ndo'o síi cu'naj Pilato nana se vaa aj cavi' Jesucristó, gaa ne canacúun so' ca'na' tanuu capitán rihaan so', ne xná'anj so' man tanuu capitán sese ya ya cavi' Jesucristó a.

45 Gaa ne cataj tanuu capitán se vaa ya ya cavi' Jesucristó, ne che'é dan ca'vej rá síi cu'naj Pilato nica'j síi cu'naj José man Jesucristó ca'anj cachinj so' a.

46 Gaa ne xcaj síi cu'naj José yatzij mantá, gaa ne tananij so' man Jesucristó, ne nacadáj so' yatzij mantá xraá Jesucristó, ne caxrij so' man Jesucristó rque yu'uj gaán nii rque yuvej, ne caráan so' yuvej xij tu'va yu'uj yo' a.

47 Ne quene'en chana cu'naj Mariá Magdalena do', chana cu'naj Mariá nii síi cu'naj José do', rej cachin' so' man Jesucristó a.

## 16

*Nana nihánj taj xna'anj se vaa cunuu i'na' uún Jesucristó a*

1 Ne ti'nuu güii naránj rá nij yuvij israelitá me se quiránj chana cu'naj Mariá Magdalena do', chana cu'naj Mariá nii Jacobo do', chana cu'naj Salomé do', yo'óo gun' daj, che'é rej ca'anj caxrij nij no' yo'óo gun' daj man Jesucristó a.

2 Gaa ne taxrej cotungó me se ca'anj va'nuj nij chana rej cachin' nii man Jesucristó, ne dan me se aj quisij güii,

3 ne cataj nij chana rihaan tuvi' chana, ne:

—Me síi quirij yanij yuvej aráan tu'va yu'uj gaa ne catuj ní ga —taj nij no', xná'anj nij no' man tuvi' nij no' a.

4 Gaa ne ni'yaj nij chana, ne quene'en nij chana se vaa aj naj yanij yuvej, ne dan me se yuvej xij ndo'o me yo' a.

5 Gaa ne catúj nij chana rque yu'uj, gaa ne quene'en nij chana se vaa yanj 'o síi yaan rej nuva' nij chana, ne nuu so' yatzij xcaan catzii, ne ca'anj ndo'o rá nij chana a.

6 Gaa ne cataj síi yaan rihaan nij chana a:

—Taj che'é ca'anj rá nij soj ma'. Nihánj me nano' nij soj man Jesucristó síi cavij chuman' Nazaret síi cachrón nii rihaan rcutzé, ne so' me se aj cunuu i'na' uún so' ei. Ne ni'yaj soj rej cuchruj nii man so', ne xcaj soj cuentá se vaa nuvi' so' naj nihánj a man adonj.

7 Tananj cavij soj cataj soj rihaan nij síi tucu'yón se-nana so' do', ndaa rihaan Pedró do', cataj soj: “Táa yaan Jesucristó rihaan soj 'anj so' estadó Galilea, ne yo' me rej quene'en nij soj man so' ndaa vaa cataj ma'an so' rihaan soj á”, cataj nij soj rihaan Pedró ga yo'óo nij síi tucu'yón se-nana so' á —taj síi yaan rihaan va'nuj nij chana a.

<sup>8</sup> Gaa ne curihanj nij chana rque yu'uj, ne cunanj nij chana, ca'anj nij no' a. 'O se ca'anj ndo'o ra nij chana, ne ndaa ri'fj man nij chana a. Ne ne ca'vee ca'mij nij no' a doj nana rihaan a 'o yuvi, che'e se cuchu'vi' ndo'o nij no' a.

*Nana nihanj taj xna'anj se vaa quene'en chana cu'naj Maria Magdalena man Jesucristo a*

<sup>9</sup> Dan me se cunuu i'na' uun Jesucristo taxrej cotungo, gaa ne curuvi' so' asino yaan rihaan chana cu'naj Maria Magdalena, ne no' me chana quirii so' chij nana chree niman asij rque doj a.

<sup>10-11</sup> Dan me se ca'anj no' rej man nij sii chee ga Jesucristo, ne dan me se nanó ndo'o ra nij so', ne ta'vee nij so', ne dan me se cataj xna'anj no' rihaan nij so' se vaa vaa i'na' Jesucristo ne quene'en no' man Jesucristo, taj no', tzaj ne ne cuchuman ra nij so' a ma'.

*Nana nihanj taj xna'anj se vaa curuvi' Jesucristo rihaan vij tuvi' nij sii tucu'yón se-nana so' gaa vajroj so' rej tacaan a*

<sup>12</sup> Cachén doj, gaa ne dan me se chee vij tuvi' nij sii tucu'yón se-nana Jesucristo rej tacaan, ne curuvi' Jesucristo rihaan roj so', tzaj ne ino doj vaa so', ruvi' so', ni'yaj roj so' a.

<sup>13</sup> Gaa ne cavii roj so' uun, nata' roj so' rihaan yo'ó nij sii tucu'yón se-nana Jesucristo, tzaj ne nij so' me se ne cuchuman ra nij so' se-nana roj so' a.

*Nana nihanj taj xna'anj se vaa curuvi' Jesucristo rihaan xaan nij sii tucu'yón se-nana so' a*

<sup>14</sup> Corá me se gaa yaan xaan nij sii tucu'yón se-nana Jesucristo rihaan mesá, ne curuvi' ma'an Jesucristo rihaan nij so', ne cuta' so' cacun' xraá nij so' se vaa guun nichraj ra nij so' ne ne cuchuman ra nij so' se-nana nij sii quene'en man so' gaa cunuu i'na' uun so' a.

<sup>15</sup> Gaa ne cataj Jesucristo rihaan nij so' a:

—Ca'anj nij soj rihaan nu' cachra' chumij, ne ca'mij natáj soj se-nana nana sa' rihaan cunudanj nij yuvi a.

<sup>16</sup> Ne me ma'an 'o sii cuchuman ra se-nana soj ne cata' ne, ne so' me sii quinanj rihaan sayuun, tzaj ne sii na'vej ra cuchuman ra se-nana soj me se qui'yaj Dioso sayuun man so' che'e cacun' tumé so' adonj.

<sup>17</sup> Ne nihanj me suun sa' nocoo qui'yaj nij sii cuchuman ya ra ni'yaj manj, ne dan me se quitaj tu'va nij so' se-chuvi' 'unj, quirij nij so' nana chree niman yuvi, ne ca'mij nij so' xna'anj naca xna'anj ne ne'en ma'an nij so',

<sup>18</sup> ne ma'an ra'a nij so' quita'aa nij so' xcuáa yuvaa, ne ca'vee se co'o nij so' se xnaj, tzaj ne a doj se quiran' nij so' chi'ij ma'. Ne cuta' ra'a nij so' xraá sii ran', ne nahuun sa' nij sii ran' yo' a —taj Jesucristo rihaan xaan nij sii tucu'yón se-nana so' a.

*Nana nihanj taj xna'anj se vaa cavii Jesucristo xta' a*

<sup>19</sup> Dan me se quisij ca'mii Jesucristo nana dan rihaan nij sii tucu'yón se-nana so', gaa ne cavii so' xta', gaa ne cayáan so' rej nuva' Dioso a.

<sup>20</sup> Gaa ne nij sii tucu'yón se-nana so' me se ca'anj ca'mij natáj nij so' se-nana so' nu' nij chuman', ne racuíj sii 'nij ra'a man ni' man nij so', ne dan me se che'e suun sa' nocoo qui'yaj nij so' me se raan doj canoco' nij yuvi se-nana Jesucristo a. Veé danj gaa ya ei.

## Nihánj me se-nanā Jesucristó nana sa' cachrón síí cu'naj Lucas rihaan yanj a

*Nana nihánj taj xna'anj se vaa qui'yaj síí cu'naj Lucas yanj nihánj ca'nej so' rihaan síí cu'naj Teófilo a*

<sup>1</sup> Dan me se que'ee uxrá yuvij guun rá cachrón nica nana rihaan yanj che'é nu' se vaa qui'yaj Jesucristó sca'núj ní' asij rque doj a.

<sup>2</sup> Dan me se cachrón nij so' nana cataj xna'anj nij síí quene'en cunudanj se vaa qui'yaj Jesucristó asij guun che'e so' cayáan so' rihaan chumij nihánj, ne nij síí quene'en ro', me síí ata suun nata' nana yo' rihaan nu' yuvij a.

<sup>3</sup> Ne 'unj nihánj me síí tucu'yón uxrá, don ca'vee narij cunudanj rasuun yo', ne che'é dan vaa che'é cachrón nica 'unj cunudanj se vaa qui'yaj Jesucristó rihaan yanj nihánj nayaá so' sij cu'naj Teófilo sij sa' ndo'o, raj adonj.

<sup>4</sup> Nanj qui'yáj, gaa ne ca'vee guun ya rá so' se vaa ya vaa nu' nana cataj xna'anj nii rihaan so' che'é Jesucristó adonj.

*Nana nihánj taj xna'anj se vaa cataj xna'anj se-mozó Diose se vaa ca'ngaa Juan síí cuta' ne man yuvij a*

<sup>5</sup> Gaa cayáan síí cu'naj Herodes síí nica suun rey uun chij rihaan estadó Judea, gaa ne 'o xrej canicun' rihaan yuvij israelitá me 'o síí cu'naj Zacarías, ne cachéé so' ga 'o ta'aj nij xrej, ne ta'níí ta'nij si'no Abías me nij so' a. Ne nica Zacarías me chana cu'naj Elisabet, ne ta'nij 'o xrej me no',

<sup>6</sup> ne síí yanj sa' rihaan Diose me roj nica roj so', ne sa' uxrá cuno roj so' nu' nij nana me rá Diose cuno ní', ne nuvi' cacun' tumé roj so' a doj a ma'.

<sup>7</sup> Tzaj ne taj vaj ta'níí roj so', che'é se chana ituun me Elisabet adonj. Ne aj cachén ndo'o yo' ne roj nica roj so' nanj á.

<sup>8</sup> Dan me se gaa natúj nij ta'níí ta'nij si'no Abías qui'yaj suun nij so' se-suun Diose,

<sup>9</sup> ne 'o güii quiri' ni'yaj Zacarías catuú so' nuvií nocoo caraa so' squíí xlá rihaan ya'an a. 'O se tucuaán nocoo' nij xrej me se daj a güii tico tixaj nij so' se-chuvij nij so', se vaa quene'en nij so' a me síí quiri' ni'yaj caraa squíí rihaan ya'an a.

<sup>10</sup> Dan me se catúj Zacarías rque nuvií nocoo, ne xe' nicun' 'o x'ne' yuvij, cachín ni'yaj nij so' rihaan Diose gaa caraa Zacarías squíí rihaan ya'an a.

<sup>11</sup> Dan me se naqui'yaa 'o se-mozó Diose rihaan Zacarías, ne nicun' so' rej nuva' mesá altar acaa squíí a.

<sup>12</sup> Dan me se gaa quene'en Zacarías man se-mozó Diose, gaa ne cuchu'vi' ndo'o so' a.

<sup>13</sup> Tzaj ne cataj se-mozó Diose rihaan so', ne:

—Se cuchu'vi' so', man Zacarías. 'O se aj cuno Diose nana cachín ni'yáá so' rihaan so', ne che'é dan cuchruj nica so' Elisabet ta'nij snó'o so' adonj.

<sup>14</sup> Juan tucu'náj so' man so' á. Guun niha' ndo'o rá so', ne guun niha' rá que'ee yuvij asa' ca'ngaa so' adonj.

<sup>15</sup> 'O se ta'níí so' me síí guun síí sa' ndo'o rihaan Diose nanj adonj. Se co'o so' tzi' se co'o so' rinté se co'o so' ma'. Asij güii ataa ca'ngaa so', ne guun che'e Nimán Diose yo'o cayáan Nimán Diose ga so' nanj á.

16 Ne que'ee sí israelitá canicaj nimán canoco' uún man Diose sí 'nij ra'a man nij so', qui'yaj ta'níi so' adonj.

17 Dan me se guun so' sí ca'anj suun rihaan Diose adonj. Asino ta'níi so' guun che'e ca'mii natáj rihaan yuvií, gaa ne ca'mii sí ca'nej Diose man a. Daj se qui'yaj Nimán Diose, racuíj Nimán Diose man sí cu'naj Elías gaa naá ro', danj qui'yaj guee Nimán Diose, racuíj ndo'o so' man ta'níi so' a. Ca'mii luj yuvií ga ta'níi yuvií, qui'yaj so', natuna nimán nij sí chi'ii cunq nij so' rihaan Diose, qui'yaj so' nanj á. Juan me sí qui'yaj, ne caraya'anj nu' yuvií che'é se ca'na' sí qui'nij ra'a man ní' adonj. —Nu' nana nihánj cataj xna'anj se-mozó Diose rihaan Zacarías a.

18 Gaa ne cataj Zacarías rihaan se-mozó Diose a:

—Asa' ca'vee cuchuman raj se vaa ya ca'mii so' ga. Chii nga mé 'unj nihánj, ne chana chij me nica 'unj nihánj nanj á —taj Zacarías rihaan se-mozó Diose yo' a.

19 Gaa ne cataj se-mozó Diose rihaan Zacarías a:

—Gabriel sí nicun' rihaan Diose mé 'unj adonj. Ma'an Diose me sí ca'neé manj ca'naj ca'mij ga so' adonj. Ca'ne' so' suun rihanj se vaa cataj xna'anj 'unj nana sa' nihánj rihaan so',

20 tzaj ne ne cuchuman rá so' nana nihánj, ne che'é dan me guun ya'mii so' adonj. A'ó nana se ca'vee ca'mii so' ndaa quisij güii quisij ya nu' nana nihánj ndaa vaa cataj xna'anj 'unj rihaan so' adonj. Ne ya quisij nana nihánj güii aj cachron Diose adonj. —Danj cataj se-mozó Diose rihaan Zacarías a.

21 Dan me se xe' mán nij yuvií, na'vij nij yuvií a me orá curihanj Zacarías rque nuvií, ne caraya'anj nij so' se vaa guun raan so' rque nuvií a.

22 Dan me se gaa curihanj so' rque nuvií, gaa ne ne ca'vee ca'mii so' ga nij so' a ma'. Che'é dan xcax nij so' cuentá se vaa naqui'yaa 'o rasuun rihaan Zacarías, qui'yaj Diose, gaa nuu so' rque nuvií a. Daj doj ra'a so' tucunó so' che'é se yo'o guun ya'mii so' a.

23 Gaa cachén Zacarías se-suun Diose, gaa ne quinan' so' tucua so' a.

24 Cachén doj güii, gaa ne nari' nica so' Elisabet 'o ne'ej a. 'Un' yavii cayáan no' tucua no',

25 ne nuchruj raq no' nana nihánj a: “Ga naá guun na'aj uxraj rihaan yuvií che'é se chana ituun mej, tzaj ne ndaa yaj racuíj Diose manj á”. Danj guun rá no' a.

### *Nana nihánj taj xna'anj se vaa cataj xna'anj se-mozó Diose se vaa ca'ngaa Jesucristó a*

26 Gaa quisij vatan' yavii cunuú rque Elisabet, gaa ne ca'neé Diose man se-mozó so' sí cu'naj Gabriel ca'anj so' ndaa 'o chuman' naj rihaan estadó Galilea chuman' cu'naj Nazaret a.

27 Ne ca'anj cataj xna'anj so' 'o nana rihaan 'o chana yaan cu'naj Mariá a. Aj guun ya xcax 'o sí cu'naj José man no', ne 'o ta'níi ta'nij si'no sí guun chij ndo'o gaa naá sí cu'naj David me so' a.

28 Gaa ne dan me se cuchí' se-mozó Diose rihaan Mariá, ne cataj so':

—Racuíj Diose mán so' á. 'O se qui'yaj ndo'o Diose se luj che'é so', ne yo'o yáan Diose ga so' á. Sa' doj cavii uruún so' rihaan cunudanj nij chana, qui'yaj Diose a. —Danj cataj se-mozó Diose rihaan Mariá a.

29 Tzaj ne caraya'anj Mariá nana ca'mii se-mozó Diose, ne ne quene'en no' me che'é ca'mii so' nana vaa danj ma'.

30 Gaa ne cataj uún se-mozó Diose rihaan no' a:

—Se kuchu'ví' so', man Mariá. Aran' rá Diosē qui'yaj Diosē se luj che'é so' á.

<sup>31</sup> Nari' so' 'o ne'ej, ne kuchruj so' 'o ne'ej sno'o adonj. Jesús tuču'náj so' man so' á.

<sup>32-33</sup> Sii sa' ndo'o guun so', ne ta'níí Diosē síí sa' ndo'o me so' adonj. Guun so' síí guun chij rihaan ní', qui'yaj Diosē síí 'nij ra'a man ní' a. Ase vaa guun chij xji so' síí cu'naj David rihaan soj sij israelitá gaa naá ro', danj qui'yaj ma'an so' guun chij so' rihaan soj nu' cavii nu' ca'anj adonj. —Danj cataj Gabriel rihaan Mariá a.

<sup>34</sup> Ne cataj Mariá rihaan se-mozó Diosē, ne:

—Chana yaan mej á. Asa' ca'vee kuchruj 'unj ne'ej, rá so' ga —taj Mariá, xná'anj no' man se-mozó Diosē a.

<sup>35</sup> Gaa ne cataj se-mozó Diosē rihaan Mariá a:

—Cayáán Nimán Diosē ga so', ne račuúj Diosē síí nucuaj ndo'o mán so', ne che'é dan kuchruj so' ne'ej sa' rihaan Diosē, ne ta'níí Diosē me ne'ej kuchruj so' a.

<sup>36</sup> Ne xcaj so' cuentá che'é tuvi' chana so' Elisabet se vaa nda' se chana itupun me no', taj nii, ne nda' se chana chij me no', tzaj ne aj quisíj vatan' yavii nuú rque no' cuano nanj á.

<sup>37</sup> Diosē me síí a'vee 'yaj cunudanj a —taj se-mozó Diosē rihaan Mariá a.

<sup>38</sup> Ne cataj Mariá rihaan se-mozó Diosē a:

—Dan me se nanj chana 'yaj suun che'é síí 'nij ra'a man ní' mej, ne ca'vee qui'yaj so' ndaa vaa cataj so' rihanj á —taj Mariá rihaan se-mozó Diosē yo' a. Gaa ne naxuun se-mozó Diosē man so' a.

*Nana nihánj taj xna'anj se vaa ca'anj Mariá ca'mii no' ga Elisabet a*

<sup>39</sup> Cachén doj güii, gaa ne qui'yaj chuvii Mariá si'yaj no', ne yoo ndo'o ca'anj no' 'o chuman' naj estadó Judea, 'o chuman' naj rej xraj a.

<sup>40</sup> Ne ca'anj no' tucúa Zacarías, ne catúj no' rá ve', ne cataj no': “Vaa nučuáá so' na”, taj no' rihaan Elisabet a.

<sup>41</sup> Nu' cuno Elisabet nana ca'mii Mariá, ne nu' güéj ne'ej rque no' a. Dan me se catúj Nimán Diosē nimán Elisabet,

<sup>42</sup> ne nucuaj ca'mii no' ga Mariá, cataj no':

—Rqué Diosē xna'anj ni'yaj uruún so' rihaan cunu' danj chana a. Ne uxrá rque Diosē xna'anj ni'yaj ne'ej kuchruj so' a.

<sup>43</sup> Ve'é ndo'o quirán' 'unj se vaa ca'na' roj nji síí qui'nij ra'a man ní' tucuaaj a.

<sup>44</sup> Nu' cunoj nana cataj so' rihanj, ne nu' guun niha' rá ne'ej, ne nu' güéj ne'ej rque a.

<sup>45</sup> Cavii sa' so' che'é se amán rá so' se-nana Diosē, se vaa quisij ya nu' nana ca'mii Diosē rihaan so' adonj —taj Elisabet rihaan Mariá a.

<sup>46-48</sup> Gaa ne cataj Mariá nana nihánj a:

—Nda' se chana yanj rma'an mé 'unj, tzaj ne cunuu 'ee rá Diosē ni'yaj so' manj a. Che'é dan me daj cataj ma'an Diosē, ne ca'vee qui'yaj a. Nanuj rá Diosē manj, ne che'é dan sa' vaa Diosē, rá nimanj, ne guun niha' ndo'o rá nimanj ni'yaj nimanj man Diosē síí tinanii manj rihaan sayuun nanj adonj. Ne yaj cataj cunudanj yuvii se vaa chana quiri' ndo'o xna'anj ni'yaj mej a.

<sup>49</sup> Danj cataj nij so' che'é se sa' qui'yaj Diosē síí nucuaj ndo'o che'ej a. Ne síí vaa sa' inanj me so' adonj.

<sup>50</sup> 'Q 'ee rá so' man taran' nij síí uno rihaan so' a.

<sup>51</sup> Qui'yaj Diose suun nocqo uxrá a. Nu' nij sí xta' nimán ro', qui'yaj canaán Diose rihaan nij so', ne quinavij se-nana nij so' nanj adonj.

<sup>52</sup> Nu' nij sí rii ta'nga' ro', ca'neq Diose suun ra'a nij so', ne guun nij so' sí nocq' nanj adonj. Ne nu' nij sí nocq' ro', guun nij so' sí quirí ta'nga' naca, qui'yaj Diose nanj a.

<sup>53</sup> Nu' nij sí na'aan rque ro', rque Diose chraa cha nij so', ne nu' nij ru'vee ro', cunu niqwe nij so', qui'yaj Diose a.

<sup>54</sup> Quisíj ya nu' nana ca'mii Diose rihaan xii ní' nij sí man gaa naá a. Racuíj so' man ní' sij israelitá, che'é se sij nocq' man so' me ní' adonj.

<sup>55</sup> Nanuj rá so' ndaa vaa cataj so' rihaan xii ní' sí cu'naj Abraham, ne che'é dan 'ee rá so' man ní' sij israelitá, che'é se ta'ní ta'nij si'no Abraham me ní' a. —Nu' nana nihánj me nana cataj María a.

<sup>56</sup> Gaa ne va'nuj yavii cayáan Mariá tucúa Elisabet, gaa ne quinan' no' tucúa no' a.

*Nana nihánj taj xna'anj se vaa ca'ngaa Juan sí cuta' ne man yuvij a*

<sup>57</sup> Gaa quisíj güii ca'ngaa ta'ní Elisabet, gaa ne dan me se cuchruij no' 'o ne'ej sno'o cunii a.

<sup>58</sup> Cuno nij tuvi' no' se vaa ve'é uxrá qui'yaj Diose ga no', ne guun niha' uxrá rá nij so' che'é no' a.

<sup>59</sup> Gaa quisíj ne'ej tunj güii, gaa ne dan me se cuchi' nij sí cuta' ta'nga' nee man ne'ej ve' a. Ne nij so' me rá tucunáj Zacarías man ne'ej che'é se Zacarías cu'naj rej ne'ej,

<sup>60</sup> tzaj ne ne ca'vej rá nii ne'ej cu'naj ne'ej danj ma'. 'O se cataj no':  
—Juan cu'naj se-chuvii ta'níj á —taj no' rihaan nij so' a.

<sup>61</sup> Tzaj ne cataj nij sí ca'na' rihaan no' a:

—Tzaj ne a 'ó tuvi' soj ne cu'naj Juan ma' —taj nij so' rihaan no' a.

<sup>62</sup> Che'é dan xná'anj nij so' man rej ne'ej, daj doj ra'a nij so' tucunó nij so' a. Guun rá nij so' quene'en nij so' daj quinaj se-chuvii ne'ej, qui'yaj rej ne'ej, rá nij so' a.

<sup>63</sup> Cachín Zacarías yanj ga ra'a so', ne cachrón so' letrá rihaan yanj yo', ne: “Juan cu'naj se-chuvii ne'ej”, taj letrá cachrón so' rihaan yanj, ne che'é dan caráya'anj ndo'o nij sí ca'na' a.

<sup>64</sup> Nu' cachrón Zacarías letrá, ne nu' ca'vee ca'mii uún so' nanj adonj. Gaa ne guun che'e so' cataj so' se vaa ve'é uxrá qui'yaj Diose a.

<sup>65</sup> Ne caráya'anj nij sí yanj nichrun' se vaa quiran' Zacarías se vaa guun ya'mii so', ne ndaa taran' nij sí yanj quij nicun' estadó Judea ro', cuno ndaa vaa quiran' so' a.

<sup>66</sup> Taran' nij sí cuno ro', nuchruij raa, ne xná'anj nij so' man tuvi' nij so' me suun cata Juan asa' cachij so' a. Danj tu'va nij so' che'é se quene'en nij so' se vaa rque ndo'o Diose xna'anj ni'yaj Juan a.

*Nana nihánj taj xna'anj se vaa cataj xna'anj Zacarías se vaa racuíj ndo'o Diose man nij yuvij israelitá a*

<sup>67</sup> Racuíj Nimán Diose man rej Juan sí cu'naj Zacarías, ne cataj so':

<sup>68</sup> —Ca'mij sa' ní' che'é Diose sí nocq' ní' sij israelitá a. Ése racuíj so' man ní' sij nocq' man so', ne tinanii so' man ní' rihaan sayuun a.

<sup>69</sup> Ca'na' 'o sí nucaj guun so' sí tinanii sa' man ní' rihaan sayuun, qui'yaj Diose a. 'O ta'ní ta'nij si'no sí guun chij gaa naá sí cu'naj David guun so',

<sup>70</sup> ndaa vaa cataj nij sí nata' se-nana Diose, qui'yaj Diose gaa naá,

<sup>71</sup> ne dan me se ca'na' sít nucuaj t̄inanií so' man ní' rihaan nij sít taj ri'yunj man ní', taj nij so', ne se guun nucuaj nij sít taj ri'yunj man ní' qui'yaj chí'ij̄ nij so' man ní' ma', taj nij so' a.

<sup>72</sup> Dan me se cunuu 'eē rá so' man ní' ndaa vaa cata' tu'va so' rihaan x̄ij̄ ní', ne yo'ō nuū rá so' nu' se vaa cataj xna'anj so' se vaa qui'yaj so' che'é ní' dō' a.

<sup>73-74</sup> "Dan me se cataj so' rihaan x̄ij̄ ní' sít cu'naj Abraham se vaa ya ya t̄inanií so' man ní' rihaan nij sít taj ri'yunj man ní', gaa ne se cuchu'vi' ní' qui'yaj suun ní' che'é so' a.

<sup>75</sup> Ne gaa nicā nimán ní' rihaan Diose nu' güii gaa i'na' ní' adonj —taj Zacarías, gaa ne ca'mii uún Zacarías rihaan ma'an ta'níí so'—

<sup>76</sup> Ne xa' ma'an so', tzaj ne guún so' sít nata' se-nana Diose, ne Diose me sít sa' ndo'o, rej. Asino so' guun che'e ca'mii natáj, gaa ne ca'na' sít qui'nij ra'a man ní' ei. Dan me se cunuu nicā nimán yuvij, qui'yáá so', ne caraya'anj yuvij man sít ca'na' qui'nij ra'a man ní', qui'yáá so',

<sup>77</sup> ne so' qui'yaj xcaj nij sít canoco' man Diose cuentá se vaa ca'vee quinavij cacun' tumé nij so' qui'yaj sít ca'na', ne ca'vee quinanií nij so' rihaan sayuun a.

<sup>78</sup> Danj qui'yaj Diose che'é nij so' che'é se 'eē uxrá rá Diose man nij so', ne che'é dan ca'nej so' man sít qui'nij ra'a man nij so' asa' quisij̄ güii ca'vee cavij̄ sa' ní' qui'yaj Diose adonj.

<sup>79</sup> Gaa ne xa' tuvi' ní' sít ne acaj cuentá dō', xa' tuvi' ní' sít chu'vi' ndo'o se vaa cavij̄ nij so' dō', tzaj ne cuchuguun rihaan nimán nij so', gaa ne xcaj nij so' cuentá, gaa ne nari' taran' ní' daj qui'yaj ní', ne cunuu xej nimán ní' adonj —taj Zacarías rihaan ta'níí so' a.

<sup>80</sup> Dan me se cachij̄ xnii cu'naj Juan, ne guun so' sít nucuaj nimán, ne inanj rej tacaan yáán so' ndaa se quisij̄ güii guun che'e so' nata' so' se-nana Diose rihaan nij sít israelitá a.

## 2

### *Nana nihánj taj xna'anj se vaa ca'ngaa Jesucristó a*

<sup>1</sup> Maan yo' ca'ngaa Juan ro', cayáán sít cu'naj Augusto sít nicaj suun emperador, ne ca'neé so' nana rihaan nij sít man taran' nij chuman' rii ta'nga' so' rihaan se vaa me rá so' naxcaj so' 'o yanj documento no se-chuvij̄ 'o 'o nij yuvij̄ a.

<sup>2</sup> Ne cayáán sít cu'naj Cirenio sít nicaj suun gobernador uun chij rihaan estadó Siria gaa naxagaa yanj yo' a.

<sup>3</sup> Dan me se ca'anj cunudanj nij yuvij chuman' chiháán x̄ij̄ nij so', gaa ne naxagaa yanj no se-chuvij̄ nij yuvij̄ yo' a.

<sup>4</sup> Cavii sít cu'naj José chuman' Nazaret chuman' naj estadó Galilea, ne ca'anj so' chuman' Belén chuman' naj estadó Judea a. Chuman' ca'ngaa x̄ij̄ so' sít guun chij gaa naá sít cu'naj David me Belén, ne che'é dan ca'anj José ndaa Belén, che'é se 'o ta'níí ta'nij si'no David me so' a.

<sup>5</sup> Nicaj so' chana' cu'naj Mariá chana' aj guun ya xcaj so' man, ca'anj so' cano se-chuvij̄ roj so' rihaan yanj a. Nuū rque Mariá,

<sup>6</sup> ne gaa caran' roj so' Belén, ne quisij̄ güii ca'ngaa ne'ej a.

<sup>7</sup> Taj yan vaa ya'núj caran' roj so' ca'ngaa ne'ej a ma'. Dan me se daj doj rej man scúj vaa ya'núj caran' roj so' a. Ne cuchruj no' 'o ne'ej sno' cunii ta'níí no' sít chava' a. Qui'yaj yanu' no' man ne'ej, ne ca'neé no' man ne'ej rá rihoo yan nuū co'yoo chá scúj a.

*Nana nihánj taj xna'anj se vaa curuvi' se-mozó Diose rihaan nij sí tumé matzinj a*

<sup>8</sup> Dan me se mán sí tumé matzinj rej tacaan nichrun' yáj tu'va chuman' Belén, ne nicun' ta'aj nij so' xe' tumé nij so' daán nij so' rej ni a.

<sup>9</sup> Gaa ne dan me se naqui'yaa 'o se-mozó Diose rihaan nij so', ne cuchuguun uxrá rihaan nij so', qui'yaj Diose, gaa ne cuchu'vi' ndo'o nij so' a.

<sup>10</sup> Gaa ne cataj se-mozó Diose rihaan nij so' a:

—Se cuchu'vi' soj ma'. 'Q se ca'ná 'unj nata' 'unj 'o nana sa' rihaan soj che'é rasuun qui'yaj guun niha' rá taran' nij yuvi ei.

<sup>11</sup> 'Q se cuan' me se ca'ngaa 'o ne'ej chuman' chiháán David, ne ne'ej yo' ro', me sí ca'née Diose tinani man yuvi rihaan sayuun, ne sí qui'nij ra'a man ní' me so' ei.

<sup>12</sup> Nanj vaa quene'en soj se vaa ya ca'mij rihaan soj a. Ca'anj nij soj chuman' Belén, ne nari' soj 'o ne'ej guun yanu', ne nuu so' rá rihoo chá xcuu co'yoo, ne so' me sí qui'nij ra'a man ní' a. —Danj cataj se-mozó Diose rihaan nij sí tumé matzinj a.

<sup>13</sup> Dan me se nu' navij ca'mii se-mozó Diose ga nij so', gaa ne veé maan orá dan curuvi' que'ee doj nij se-mozó Diose uún, ne ve'é uxrá ca'mii nij so' che'é Diose, cataj nij so':

<sup>14</sup> —Sa' uxrá vaa Diose, sí nicun' xta', ne gaa xej nimán nij yuvi sij sa' nimán a —taj nij se-mozó Diose rihaan nij sí tumé matzinj a.

<sup>15</sup> Dan me se quinan' nij se-mozó Diose xta', gaa ne cataj nij sí tumé matzinj rihaan tuvi' nij so' a:

—Ca'anj ní' Belén quene'en ní' daj guun se vaa cataj xna'anj Diose rihaan ní' ei —taj nij so' rihaan tuvi' nij so' a.

<sup>16</sup> Yoo ca'anj nij so', ne dan me se nu' cuchi' nij so', ne nu' quinari' nij so' man Mariá ga José, ne dan me se quinari' nij so' man ne'ej, nuu ne'ej rá rihoo a.

<sup>17</sup> Dan me se gaa quene'en nij sí tumé matzinj man ne'ej, gaa ne cataj xna'anj nij so' nana ca'née Diose rihaan nij so' che'é ne'ej rihaan Mariá ga José do', rihaan nij sí man nichrun' do' a.

<sup>18</sup> Gaa ne caráya'anj cunudanj yuvi cuno nana ca'mii nij sí tumé matzinj yo' a.

<sup>19</sup> Ne Mariá me se ca'née no' cunudanj nana yo' cúu yave no', ne nuchruj raa no' che'é nana yo' a.

<sup>20</sup> Dan me se quinan' nij sí tumé matzinj, gaa ne guun niha' uxrá rá nij so' che'é nu' nana cuno nij so' do', che'é nu' se vaa quene'en nij so' do', ne: “Sa' uxrá qui'yaj Diose á”, taj nij so' a. 'Q se ase vaa cataj xna'anj se-mozó Diose rihaan nij so' ro', veé danj vaa guun a.

*Nana nihánj taj xna'anj se vaa caxrj roj nica José ne'ej ston Diose a*

<sup>21</sup> Cachén 'o tunj güii gaa ne cuta' nii ta'nga' nee man ne'ej, ne Jesús cu'naj ne'ej, qui'yaj nii, ndaa vaa cataj xna'anj se-mozó Diose gaa ataa nayon so' rque Mariá a.

<sup>22</sup> Cachén vij chihaa güii, gaa ne quisij güii cunu sa' Mariá rihaan Diose a. Che'é dan nicaj roj so' man ne'ej ca'anj roj so' nuvi nocoo yanj chuman' Jerusalén, ne caxrj roj so' ne'ej ston Diose a.

<sup>23</sup> 'Q se danj Diose taj se vaa daj a ta'nii nij yuvi israelitá sí chava' guun si'yaj Diose, ne che'é dan qui'yaj roj so' danj a.



<sup>24</sup> Dan me se ca'anj roj so' ca'anj go' roj so' xcuu rihaan Diose ndaa vaa taj danj Diose a. Ca'vee go' yuviij vjij cha'aan ca'vee go' yuviij vjij culuj ca'vee, taj danj Diose a.

<sup>25</sup> Dan me se cayáan 'o chii nga cu'naj Simeón chuman' Jerusalén a. Sij vaa nica nimán me so', ne sij noco' uxrá man Diose me uún so', ne quisij que'ee yo' na'vji uxrá so' se vaa tñanii Diose man nij yuviij israelitá rihaan sayuun a. Cayáan Nimán Diose ga so',

<sup>26</sup> ne aj cataj xna'anj Nimán Diose rihaan so' se vaa se cavi' so' ndaa se aj quene'en ya so' man sí ca'nej Diose a.

<sup>27</sup> Dan me se güii cuchi' roj nica José chuman' Jerusalén me se cataj xna'anj Nimán Diose rihaan Simeón se vaa ca'anj so' nuvií noco, ne che'é dan ca'anj so' catúj so' rque nuvií a. Gaa ne catúj roj nica José rque nuvií ga ne'ej che'é se guun rá roj so' qui'yaj roj so' ndaa vaa taj danj Diose a.

<sup>28</sup> Gaa ne tára'a sí cu'naj Simeón ne'ej, ne nago' so' graciá rihaan Diose che'é ne'ej a. Ne nihánj me nana ca'mii so' a:

<sup>29</sup> —Quisij ya nu' ndaa vaa cataj so' rihanj, ne che'é dan ca'vee cavij yaj, ne gaa xej nimanj, Ataj Chij.

<sup>30</sup> Quene'en rihanj man sí ca'neé so' man tñanii man núj rihaan sayuun,

<sup>31</sup> ne quene'en cunudanj yuviij se vaa ca'na' so' qui'yáa so' nanj á.

<sup>32</sup> Ase vaa ya'an chuguun gaa so' tñhaan so' se-tucuñj so' rihaan nij yuviij yanj, ne ca'mii sa' nii che'é núj sij israelitá, qui'yaj uún so', ése sí noco' mán so' me núj nanj adonj —taj Simeón rihaan Diose a.

<sup>33</sup> Caráya'anj roj nica José se-nana sí cu'naj Simeón se vaa ca'mii so' che'é ne'ej,

<sup>34</sup> ne cachín ni'yaj Simeón rihaan Diose se vaa rque Diose xna'anj ni'yaj roj nica José a. Gaa ne cataj so' rihaan Mariá a:

—Cune' Diose man ne'ej nihánj qui'yaj suun so' rihaan Diose, ne dan me se cavij sa' uxrá que'ee tuvi' ní' sij israelitá, qui'yaj so', tzaj ne que'ee tuvi' ní' tuna, qui'yaj uún so' adonj. Dan me se ca'neé Diose man so' che'é rej xcaj yuviij cuentá che'é Diose, tzaj ne ca'mii chí'ii nii ni'yaj nii man so' adonj.

<sup>35</sup> Ne xa' so', tzaj ne quinano ndo'o rá ma'an so' che'é so' vaa güii nanj á. Dan me se ca'vee xcaj ní' cuentá daj vaa nimán que'ee yuviij, qui'yaj so' adonj —taj Simeón rihaan Mariá a.

<sup>36</sup> Ne yáan 'o chana chij cu'naj Ana, ne ní nata' se-nana Diose me no', ne ta'nii sí cu'naj Fanuel me no', ne ta'nii ta'nij si'no sí cu'naj Aser me roj rej roj no' a. Xcaj chii man no' gaa naá, ne nicaj tuvi' roj so' chij yo', gaa ne cavi' nica no',

<sup>37</sup> ne quináj no' ne ma'an no', ne quisij no' ndaa ca'anj chihaa ca'anj yo' gaa ca'ngaa ne'ej cu'naj Jesús a. Chana noco' uxrá man Diose me no', ne che'é dan yo' o cayáan no' nuvií noco, ne niganj yaj a'yuj cará guce no', ne cachín ni'yaj no' rihaan Diose a.

<sup>38</sup> Maan orá ca'mii Simeón che'é ne'ej ro', veé maan orá dan vaj chana chij cu'naj Ana, ne catúj no' rque nuvií, gaa ne nago' no' graciá rihaan Diose che'é ne'ej, ne cataj xna'anj no' che'é ne'ej rihaan nij yuviij man na'vji güii tñanii Diose man nij sí man Jerusalén rihaan sayuun a.

*Nana nihánj taj xna'anj se vaa canicaj roj nica José quinán' roj so' tucua' roj so' a*

<sup>39</sup> Dan me se gaa quisíj qui'yaj roj nica José se vaa taj se-tucuanj Moisés, gaa ne quinán' roj so' estadó Galilea a. Quinan' roj so' chiháán roj so' chuman' Nazaret a.

<sup>40</sup> Cachij ne'ej guun so' síi nucuaj a. Xnii vaa chij rá me so', ne rqué uxrá Diose xna'anj ni'yaj so' a.

*Nana nihánj taj xna'anj se vaa ca'mii Jesucristó rihaan nij síi naqui'yaj cuu se-tucuanj Moisés gaa me Jesucristó xnii a*

<sup>41</sup> Daj a yo' ca'anj roj nica José human' Jerusalén gaa canuú cha'anj pascuá,

<sup>42</sup> ése danj vaa tucuaán nocó' nij síi israelitá a. Dan me se gaa quisíj Jesucristó chuvij yo', gaa ne ca'anj roj nií so' cha'anj ga rej so' a.

<sup>43</sup> Cachén cha'anj, gaa ne quinán' roj nica roj so', tzaj ne xnii ro', quináj Jerusalén, ne ne quene'en roj nica roj so' se vaa quináj xnii a ma'.

<sup>44</sup> Quinan' xnii ga tuvi' roj so', rá roj so', ne che'é dan ca'anj roj so' a. Gaa ne rej ti'nuu guun che'e roj so' nano' roj so' man xnii rihaan tuvi' roj so',

<sup>45</sup> tzaj ne nuvi' yan vaj xnii a ma'. Che'é dan nanicaj uún roj so' ca'anj uún roj so' Jerusalén, ne nano' uxrá roj so' man xnii a.

<sup>46</sup> Quisíj va'nuj güii nano' roj so' man xnii, gaa ne ca'anj roj so' rque nuví nocoo man nij síi naqui'yaj cuu se-tucuanj Moisés, ne maan dan ne xnii nanó xrej xnii nana a'mii nij so', ne achíin na'anj xnii nana cuu man nij so',

<sup>47</sup> ne caráya'anj daj a nij síi cuno nana ca'mii xnii, ése sij nicaj uxrá cuentá me xnii, ne sa' uxrá ca'mii xnii, rá nij so' a.

<sup>48</sup> Ne caráya'anj roj nica roj so' gaa quene'en roj so' se vaa ne xnii sca'núj nij sij a. Gaa ne cataj nií so' rihaan so' a:

—Ne chihan' qui'yáa di' man núj, man rej. Nanó ndo'o rá rée di' do', nanó ndo'o rá 'unj do', qui'yáa di', che'é se nuvíi nano' núj man di', rej —taj nií so' rihaan so' a.

<sup>49</sup> Tzaj ne cataj Jesucristó rihaan roj so' a:

—Taj che'é nano' roj soj manj ma'. Me che'é ne ne'en roj soj se vaa no xcúún 'unj qui'yaj suun 'unj se-tucuanj Réj ga —taj xnii rihaan roj nica roj so' a.

<sup>50</sup> Tzaj ne ne cuno roj so' se-nana xnii se vaa no xcúún so' qui'yaj suun so' se-chrej Réj so' Diose a.

<sup>51</sup> Dan me se quinán' Jesucristó chuman' Nazaret ga roj so', ne yo'o yanj uno sa' so' rihaan roj so' a. Ne yo'o nuú rá Mariá nu' ndaa vaa guun che'é so' gaa ca'ngaa so' do', nu' nana cuu sa' a'mii so' do' a.

<sup>52</sup> Dan me se cachij Jesucristó guun so' síi cuu raq, ne caran' rá Diose ni'yaj Diose man so', ne caran' rá yuvií uún ni'yaj yuvií man so' nanj adonj.

### 3

*Nana nihánj taj xna'anj se vaa ca'anj Juan síi cuta' ne man yuvií tacaan, ca'mii natáj so' a*

<sup>1-2</sup> Yo' xnu' cayáán síi cu'naj Tiberio síi nicaj suun emperador ro', maan yo' dan me rqué Diose se-nana Diose rihaan síi cu'naj Juan ta'nií Zacarías gaa cachéé so' tacaan a. Veé maan yo' ca'mii Diose rihaan Juan, dan me cayáán síi cu'naj Poncio Pilato síi nicaj suun gobernador uun chij rihaan estadó cu'naj Judea a. Ne veé maan yo' dan cayáán síi cu'naj Herodes síi nicaj suun tetarca uun chij rihaan estadó cu'naj Galilea, ne cayáán tinúú so' síi cu'naj Felipé síi nicaj suun tetarca uun chij rihaan roj estadó cu'naj Iturea ga Traconite a. Ne veé maan yo' dan cayáán síi cu'naj Lisaniás síi nicaj suun tetarca uun

chij rihaan estadó cu'naj Abilinia, ne cayáan roj síi cu'naj Anás ga Caifás xrej atá suun nocoo doj rihaan nij yuvií israelitá a. Taran' nij so' me síi uun chij gaa cuchi' se-nanā Diose rihaan Juan gaa cachéé so' tacaan a.

<sup>3</sup> Dan me se cachéé Juan nu' rej naj nichrun' tu'va chráa cu'naj Jordán, ne guun che'ē so' ca'mii natáj so' rihaan yuvií se vaa nuchran' nimán nij yuvií, ne tanáj nij yuvií chrej chí'ii, ne ca'vee tinavij Diose cacun' tumé nij yuvií, taj Juan adonj.

<sup>4</sup> Dan me se qui'yaj Juan nu' ndaa vaa taj nanā cachrón síi cu'naj Isaías síi nata' se-nanā Diose gaa naá rihaan yanj, ne nihánj me nanā cachrón so' a: “Nucuj ndo'o ca'mii natáj 'o so' rej tacaan, ne cataj so' se vaa nuchran' nimán yuvií, ne ve'é ca'mii nij yuvií gaa síi 'nij ra'a man ní' asa' ca'na' so' adonj.

<sup>5</sup> Dan me se se ca'vee quinaj a doj se chí'ii nimán ní' caráan chrej rihaan síi 'nij ra'a man ní' ca'na' so' ma'. Maan se quirii ní' nu' se chí'ii, ne caraa ní' nu' se sa' cachiiin man nimán ní', ne ve'é inanj cunuū nica nimán ní', qui'yaj ní' ei.

<sup>6</sup> Gaa ne quene'en nu' nij síi man daj a chuman' se vaa ca'vee tinanii Diose man yuvií rihaan sayuun nanj á”. Dan me nanā cachrón síi cu'naj Isaías rihaan yanj gaa naá nanā taj xna'anj che'é síi cu'naj Juan a.

<sup>7</sup> Dan me se cuchi' que'ee ndo'o yuvií rihaan Juan che'é se guun rá nij so' cutá' ne Juan man nij so' a. Gaa ne caxrij yuvaa Juan man nij so', cataj so':

—Ase vaa xcuáá yuvaa vaa soj á. Me síi cataj xna'anj rihaan soj cunanj soj, ne quinanií soj rihaan sayuun qui'yaj Diose ga. Asa' ca'vee quinanií soj rihaan sayuun, qui'yaj nanj na catá' ne soj, rá soj ga.

<sup>8</sup> Sese ya cunuū sa' nimán soj, ne ca'anj soj qui'yaj soj ndaa vaa 'yaj yuvií cunuū sa' nimán ei. Ne tadó soj sese guun che'ē soj cataj soj se vaa ta'nii ta'nij si'no síi cu'naj Abraham síi cane gaa naá me soj, ne ne tumé soj cacun', cataj soj á. Se ca'mii soj daj chihaa míj danj ma'. Maan se cataj xna'anj 'unj rihaan soj se vaa nuveé se ya'anj tiha' ta'nii ta'nij si'no síi cu'naj Abraham me soj a ma'. Maan se sese Diose rá, ne ca'vee nicaj Diose náa guun yahij naj rihaan yo'óo nihánj, ne qui'yaj Diose man 'o ta'nii ta'nij si'no síi cu'naj Abraham adonj. Che'é dan canoco' ya soj man Diose ei.

<sup>9</sup> Q se nichrun' qui'yaj Diose sayuun man nij síi na'vej rá cunō rihaan so' nanj á. Ase vaa síi oro' aga' a'ne' chruun, ne oro' so' aga' ca'ne' so' chruun ro', danj vaa Diose cunō ei. Che'é dan ase vaa 'yaj nii man chruun ro', ta'nga' danj qui'yaj Diose man nij síi ne uno rihaan so' a. Dan me se a'ne' nii chruun nuvi' chruj sa' raa, ne araa nii man chruun yo' rihaan ya'an a. Ta'nga' danj qui'yaj Diose man nij síi na'vej rá canoco' chrej sa' adonj. —Danj cataj Juan rihaan nij yuvií a.

<sup>10</sup> Gaa ne xná'anj nij yuvií man Juan, cataj nij yuvií:

—Daj qui'yaj núj, rá so' ga —taj nij so' rihaan Juan a.

<sup>11</sup> Gaa ne cataj Juan rihaan nij so' a:

—Síi vaa vij se-cotoó ro', caxrii uun so' 'o cotoó ston síi nuvi' se-cotoó á. Ne síi vaa se chá rihaan ro', go' so' doj se chá man nij síi nuvi' se chá rihaan á. —Danj cataj Juan rihaan nij so' a.

<sup>12</sup> Doj tuvi' nij síi a'néj puextó ro', ca'na' rihaan Juan che'é se guun rá nij so' cutá' ne Juan man nij so' a. Ne xná'anj nij so' man Juan, cataj nij so':

—Daj qui'yaj núj, rá so', ga maestro' —taj nij so' rihaan Juan a.

<sup>13</sup> Ne cataj Juan rihaan nij so' a:

—Inañj sa'anj no xcuún soj ca'neē soj man yuvij ro', ca'vee ca'neē soj á. Se ca'néj soj doj sa'anj man yuvij ma' —taj Juan rihaan nij so' a.

14 Gaa ne xná'anj doj tanuu man Juan a:

—Daj qui'yaj núj, rá so' ga —taj nij so' rihaan Juan a.

Ne cataj Juan rihaan nij so' a:

—Se qui'yaj soj fuerzá rque yuvij sa'anj rihaan soj a ma'. Se ca'mii ne soj che'é yuvij ne ca'neē soj sa'anj man nij yuvij a ma'. Veé doj sa'anj vaa tu'vee soj ro', guun niha' rá soj nicaj soj nanj á. —Danj cataj Juan rihaan nij tanuu a.

15 Dan me se nuchruj nij yuvij cuentá sese sij ca'neé Diose tinanii man yuvij rihaan sayuun me Juan, ne che'é dan na'vrij ndo'o nij yuvij cataj xna'anj ma'an sí cu'naj Juan daj sij me ma'an so' a.

16 Ne che'é dan cataj Juan rihaan nij so' a:

—Síi uta' ne na uun man soj mej, tzaj ne ca'na' yo'ó síi guun sca' doj rihanj a. Che'é dan me aj ne nó xcúnj nachej nuj correá 'nij tacanj so' ma'. Ne ca'na' so', ne ca'na' Nimán Diose ga so', ne caxrij ya'an so' man soj sij na'vej rá cunjo rihaan Diose, ne cacaa soj adonj.

17 Dan me se ase vaa síi oroj chruun palá vaa so' cuano adonj. Dan me se síi nicaj chruun palá ro', rii nu' 'núú trigó naj rihaan yo'óó, ne naqui'yaj chre' so' man 'núú trigó sa', ne araa so' man 'núú trigó sa' rá ve', ne anicaj so' araa so' squij ni'ya xraá trigó rihaan ya'an a. Ne ase vaa síi nicaj palá man cuano ro', danj qui'yaj síi ca'na', ne naqui'yaj chre' so' man cunudanj nij síi cunuu sa' nimán, ne caraa so' man nij síi chi'ij rihaan ya'an, ne cacaa nij so' nu' cavii nu' ca'anj, ne daj chihaa mij se quina'áj ya'an yo' a man adonj. —Danj ca'mii síi cu'naj Juan rihaan nij yuvij yo' a.

18 Ne vaa uxrá doj chrej sa' nago' so' man nij yuvij, ne ve'é nata' so' se-nana Diose nana sa' rihaan nij so' a.

19 Dan me se cataj Juan se vaa ne chihan' qui'yaj síi nicaj suun rey síi cu'naj Herodes che'é se ca'néj so' nica tinúú so' chana cu'naj Herodías ne xcaj so' man no' do', che'é que'ee ndo'o doj se chi'ij qui'yaj Herodes do' a.

20 Che'é se nij ndo'o qui'yaj Herodes ca'néj so' nica tinúú so' cataj Juan, ne ca'maan ndo'o rá Herodes ni'yaj so' man Juan, ne caxrij so' taga' man Juan nanj á. Maan ta'nga' doj vaa cacun' tumé so' gaa ataa caxrij so' taga' man Juan, tzaj ne yaj caxrij so' taga' man Juan, ne doj a tumé so' cacun' adonj.

### *Nana nihánj taj xna'anj se vaa cuta' ne Juan man Jesucristó a*

21 Dan me se gaa ataa catuu Juan taga', ne cata' ne taran' nij yuvij, qui'yaj Juan, gaa ne cata' ne Jesucristó, ne nu' nago' Jesucristó gracia rihaan Diose, gaa ne naxra' rej xta' a.

22 Gaa ne nanj Nimán Diose raá Jesucristó, ne ase vaa ruvi' 'o cha'aan ro', danj vaa curuvi' Nimán Diose a. Gaa ne ca'mii Diose síi nicun' xta', cataj Diose:

—Ta'nii 'unj síi 'ee ndo'o raj man mé so', ne niha' ndo'o raj ni'yaj 'unj mán so' adonj —taj Diose síi nicun' xta' a.

### *Nana nihánj taj xna'anj che'é taran' nij xii Jesucristó a*

23 Ndaa quisij Jesucristó icó chi' yo' ta' asuun, gaa ne guun che'e so' qui'yaj suun so' se-suun so' a. Dan me se guun rej Jesucristó man síi cu'naj José, ne ta'nij José me Jesucristó, rá nij yuvij a. Ne ta'nii Elí me José a.

24 Ta'nii Matat me Elí, ne ta'nii Leví me Matat, ne ta'nii Melqui me Leví, ne ta'nii Jana me Melqui, ne ta'nii José me Jana a.

<sup>25</sup> Ta'níi Matatías me José, ne ta'níi Amós me Matatías, ne ta'níi Nahum me Amós, ne ta'níi Esli me Nahum, ne ta'níi Nagai me Esli a.

<sup>26</sup> Ta'níi Maat me Nagai, ne ta'níi Matatías me Maat, ne ta'níi Semei me Matatías, ne ta'níi José me Semei, ne ta'níi Judá me José a.

<sup>27</sup> Ta'níi Joana me Judá, ne ta'níi Resa me Joana, ne ta'níi Zorobabel me Resa, ne ta'níi Salatiel me Zorobabel, ne ta'níi Neri me Salatiel a.

<sup>28</sup> Ta'níi Melqui me Neri, ne ta'níi Adi me Melqui, ne ta'níi Cosam me Adi, ne ta'níi Elmodam me Cosam, ne ta'níi Er me Elmodam a.

<sup>29</sup> Ta'níi Josué me Er, ne ta'níi Eliezer me Josué, ne ta'níi Jorim me Eliezer, ne ta'níi Matat me Jorim a.

<sup>30</sup> Ta'níi Leví me Matat, ne ta'níi Simeón me Leví, ne ta'níi Judá me Simeón, ne ta'níi José me Judá, ne ta'níi Jonán me José, ne ta'níi Eliaquim me Jonán a.

<sup>31</sup> Ta'níi Melea me Eliaquim, ne ta'níi Mainán me Melea, ne ta'níi Matata me Mainán, ne ta'níi Natán me Matata a.

<sup>32</sup> Ta'níi David me Natán, ne ta'níi Isaí me David, ne ta'níi Obed me Isaí, ne ta'níi Booz me Obed, ne ta'níi Salmón me Booz, ne ta'níi Naasón me Salmón a.

<sup>33</sup> Ta'níi Aminadab me Naasón, ne ta'níi Aram me Aminadab, ne ta'níi Esrom me Aram, ne ta'níi Fares me Esrom, ne ta'níi Judá me Fares a.

<sup>34</sup> Ta'níi Jacob me Judá, ne ta'níi Isaac me Jacob, ne ta'níi Abraham me Isaac, ne ta'níi Taré me Abraham, ne ta'níi Nacor me Taré a.

<sup>35</sup> Ta'níi Serug me Nacor, ne ta'níi Ragau me Serug, ne ta'níi Peleg me Ragau, ne ta'níi Heber me Peleg, ne ta'níi Sala me Heber a.

<sup>36</sup> Ta'níi Cainán me Sala, ne ta'níi Arfaxad me Cainán, ne ta'níi Sem me Arfaxad, ne ta'níi Noé me Sem, ne ta'níi Lamec me Noé a.

<sup>37</sup> Ta'níi Matusalén me Lamec, ne ta'níi Enoc me Matusalén, ne ta'níi Jared me Enoc, ne ta'níi Mahalaleel me Jared, ne ta'níi Cainán me Mahalaleel a.

<sup>38</sup> Ta'níi Enós me Cainán, ne ta'níi Set me Enós, ne ta'níi Adán me Set a. Ne Adán ro', me sí qui'yaj ma'ǎn Diose man a. Nu' nij so' me xii Jesucristó cumán gaa naá a.

## 4

*Nana nihánj taj xna'anj se vaa guun ndo'o rá síi chree tihá' yu'unj so' man Jesucristó a*

<sup>1</sup> Dan me se naraa Nimán Diose nu' nimán Jesucristó, gaa ne cavii Jesucristó tu'va chráá cu'naj Jordán, ne ca'anj so', vaj so' rej tacaan, qui'yaj Nimán Diose a.

<sup>2</sup> Ne vij chihaa ya güii guun rá síi chree tihá' yu'unj síi chree man Jesucristó, che'é rej guun rá so' canoco' Jesucristó man so' a. Ne a 'ó xco' chraa ne chá Jesucristó cunu' vij chihaa güii ma'. Gaa quisíj nu' vij chihaa güii, gaa ne quina'aan ndo'o rque Jesucristó a.

<sup>3</sup> Gaa ne dan me se cataj síi chree rihaan Jesucristó, ne:

—Sese ya ya ta'nij Diose mé so', ne cataj so' rihaan yahij nihánj se vaa guun yo' rachruún chá so' á —taj síi chree rihaan Jesucristó a.

<sup>4</sup> Gaa ne cataj Jesucristó rihaan so', ne:

—Danj Diose taj: “Nuveé inanj se chá me se achiin rihaan yuvij, ne ca'vee cayáán sa' yuvij ma’”. Inanj danj taj danj Diose —taj Jesucristó rihaan síi chree yo' a.

<sup>5</sup> Gaa ne dan me se nicaj sí chree man Jesucristó cavii so' 'o rej xta' ndo'o, gaa ne tihaan so' man cunudanj nij chuman' naj rihaan chumij rihaan Jesucristó rque orún' orá nii a.

<sup>6</sup> Gaa ne cataj so' rihaan Jesucristó, ne:

—Rque 'unj nu' chuman' nihánj do', nu' se sa' man nij chuman' nihánj do', man so' a. 'O se aj ca'vej Diose guun chij 'unj rihaan nij chuman' yo', ne che'é dan ca'vee qui'yáj guun chij náá guun yuvij rihaan chuman' yo' adonj.

<sup>7</sup> Che'é dan sese canicun' ruj so' rihanj, ne guun sij'yáá so' man nu' nihánj, qui'yáj adonj. —Danj cataj sí chree rihaan Jesucristó a.

<sup>8</sup> Ne canicaj Jesucristó cataj Jesucristó rihaan sí chree:

—Daj chihaa mij se canicun' ruj 'unj rihaan so' a ma'. 'O se danj Diose taj nana nihánj, se vaa: “Rihaan orún' Diose sí 'nij ra'a man ní' canicun' ruj so', ne a'ó rihaan tuví so' se ca'vee na'vij so' ma'”. Danj taj danj Diose adonj —taj Jesucristó rihaan sí chree yo' a.

<sup>9</sup> Gaa ne nicaj sí chree man Jesucristó ca'anj so' chuman' Jerusalén, ne tacavii so' man Jesucristó raá nuví noço,

<sup>10</sup> ne cataj so' rihaan so', ne:

—Sese ya ta'nij Diose mé so', ne güej so', ne nanj guee so' rihaan yo'óó á. 'O se danj Diose taj: “Ca'ne' Diose suun rihaan nij se-mozó so' se vaa cutumé nij so' man so' a”, taj danj Diose, ne taj uún yo'.

<sup>11</sup> “Caráán ra'a nij so' man so', se gaa nanj cano che'é so' yahij ma'”. Danj a'mii danj Diose —taj sí chree rihaan Jesucristó adonj.

<sup>12</sup> Gaa ne cataj Jesucristó rihaan sí chree a:

—Tzaj ne ne nó xcúnj qui'yáj danj ma'. 'O se taj uún danj Diose a: “Se guun qui'ri'yunj so' man Diose sí 'nij ra'a man ní', ne tihá' so' man so' ma'”. Inanjanj danj a'mii danj Diose rihaan ní' adonj —taj Jesucristó rihaan sí chree a.

<sup>13</sup> Danj qui'yaj sí chree, tzaj ne a doj ne cuchuman rá Jesucristó a man adonj. Gaa ne ca'ne' rá sí chree doj güii ga Jesucristó a.

*Nana nihánj taj xna'anj se vaa guun che'e Jesucristó tucu'yón so' se-nana Diose man nij yuvij man estadó Galilea a*

<sup>14</sup> Dan me se nan' Jesucristó estadó Galilea, ne yo'o racuíj ndo'o Nimán Diose man so', ne cuchi' nana che'é so' rihaan nij yuvij man nu' nij chuman' naj estadó Galilea a.

<sup>15</sup> Ca'anj Jesucristó daj a nij ve' tucu'yón nij yuvij israelitá se-tucuanj Moisés, ne tucu'yón so' se-nana Diose man nij yuvij, ne ve'é uxrá ca'mii taran' nij yuvij che'é so' a.

*Nana nihánj taj xna'anj se vaa nucui' Jesucristó chiháán so', ne ca'mii natáj so' a*

<sup>16</sup> Gaa ne dan me se nucui' uún Jesucristó chiháán so' chuman' Nazaret rej cachij so' a. Gaa quisij güii naránj rá nij yuvij israelitá, ne catúj so' rá ve' tucu'yón nij so' se-tucuanj Moisés, ese danj inanjanj cu'yón so' qui'yaj so' a. Gaa ne canicun' caya so' nayaá so' danj Diose rihaan nij yuvij a.

<sup>17</sup> Sí tumé yanj quirii yanj no nana cachrón sí cu'naj Isaías sí nata' se-nana Diose gaa naá, ne caxrij so' ston Jesucristó a. Nacuchra' Jesucristó yanj, ne nari' so' rej no nana nihánj a:

<sup>18</sup> “Yanj Nimán Diose ga 'unj, ne che'é dan narii Diose manj ca'anj ca'mii natáj 'unj nana sa' rihaan nij sí niqwe a. Ca'née Diose manj ca'mii natáj 'unj rihaan nij sí 'nij taga' cataj 'unj se vaa curihanj nij so' cachee yun nij so' a.

Ne ca'néé Diose manj raçuíj 'uñj man nij síi tuchrji naxra' rihaan nij so', ne ca'néé Diose manj raçuíj 'uñj man nij síi ran' sayuun uún nanj á.

19 Ca'néé Diose manj cataj xna'anj 'uñj se vaa yaj ro', me rá Diose cavii sa' nij síi noco' man so' qui'yaj so' adonj."

20 Nu' nihánj me nana nayaa Jesucristó, gaa ne nacué uún so' yanj ne nago' uún so' man síi tumé yanj, gaa ne ca'anj quitaj so' chruun xlá a. Tzaj ne ni'yaj uxrá cunudanj nij yuvij man rque ve' yo' man so',

21 ne che'é dan ca'mii uún so', cataj so':

—Veé cuano nihánj me se aj quisíj ya nu' nana nihánj, ne 'uñj sij nayaa nana nihánj cuno soj me síi qui'yaj nu' se vaa taj nana nihánj adonj —taj Jesucristó rihaan nij so' a.

22 Sa' uxrá ca'mii Jesucristó, cataj nij yuvij, ne caráya'anj nij so' cuno nij so' se vaa ve'é uxrá vaa nana ca'mii Jesucristó a. Gaa ne dan me se xná'anj nij so' man tuvi' nij so' sese nuveé ta'nij José síi ne chiháán ní' me so', xná'anj nij so' man tuvi' nij so' a.

23 Che'é dan me ca'mii Jesucristó nana nihánj rihaan nij so' a:

—Ne'én 'uñj se vaa cataj soj nana nihánj rihanj a: “Sese ya sij 'yaj cono'ó mé so', ne qui'yaj cono'ó so' man ma'án so' á”, cataj soj rihanj che'é se cuno soj se vaa que'ee suun sa' noco qui'yaj chuman' Capernaum a. Ne cataj soj rihanj se vaa qui'yaj suun sa' noco tuvi' yo' chuman' chiháán ní' nihánj uún a.

24 Tzaj ne vaa nana nihánj nana cataj ma'anj rihaan soj uún a: “Xá' síi nata' se-nana Diose, tzaj ne ne amán rá tuvi' so' ni'yaj nij so' man so' ma'”, me nana taj 'uñj no soj a.

25 “Dan me se cuno soj ca'mij á. Ne'en soj se vaa gaa cayáán síi cu'naj Elías síi nata' se-nana Diose gaa naá, ne cachén va'nuj yo' táa yanéé, ne ne caman', ne che'é dan guun uxrá x'naa nu' chiháán nij síi israelitá, ne yo' dan me se cayáán que'ee chana cavi' nica chiháán nij síi israelitá a.

26 Tzaj ne a 'ó chana nique cayáán chiháán nij síi israelitá ro', ne ca'nej Diose man Elías rihaan no', raçuíj so' man no' ma'. Maan se rihaan orún' chana nique ne chuman' Sarepta chuman' noco' man chuman' Sidón ca'néé Diose man Elías, ne nda' se nuveé chana israelitá me no', tzaj ne racuíj Elías man no' adonj.

27 “Ne'en soj se vaa que'ee yuvij quiran' ndo'o luj ri'yuj cayáán chiháán nij síi israelitá gaa cayáán síi cu'naj Eliseo síi nata' se-nana Diose gaa naá a. Tzaj ne a 'ó nij so' ne nahuun ma'. Maan se orún' síi cu'naj Naamán síi cavii rej yanj cu'naj Siria nahuun, qui'yaj Eliseo adonj. —Danj cataj Jesucristó rihaan nij síi man rá ve' tucu'yón nii se-tucuanj Moisés ve' ne chiháán nij so' a.

28 Cuno nij yuvij ndaa vaa cavii sa' nij síi man chuman' yanj, ne guun xcoj ruvaa rá nij so', gaa ne ca'maan rá nij so' ni'yaj nij so' man Jesucristó a.

29 Naxumaan nij so' nicaj nij so' man Jesucristó ca'anj nij so' tu'va chuman' a. Ne dan me se chuman' yo' ro', naj xráá 'o tacaan ruvaa ndo'o a. Ne nicaj nij so' man Jesucristó ca'anj nij so' rej ruvaa, ne guun rá nij so' tanj nij so' man Jesucristó rej ruvaa a.

30 Tzaj ne cachén Jesucristó sca'núj nij yuvij, ne ca'anj so' nanj adonj.

*Nana nihánj taj xna'anj se vaa quirii Jesucristó man yo' o nana chree nimán 'o snó' o a*

31 Gaa ne ca'anj Jesucristó chuman' Capernaum chuman' naj estadó Galilea, ne güii naránj rá nij yuvií israelitá ca'anj Jesucristó ve' tucu'yón nij so' se-tucuañj Moisés, ne tucu'yón so' se-nana Diosé man nij yuvií a.

32 Ne caráya'anj nij yuvií se-nana so', che'é rej ase vaa a'mii 'o síi uun chij ndo'o ro', danj ca'mii so' rihaan nij yuvií a.

33 Ne dan me se yaán 'o síi nuu nana chree nimán rá ve' yo', ne nucuaj ndo'o caguáj so', ne cataj so' se vaa:

34 —Me che'é ra'yunj so' man núj, ga Jesús Nazareno'. 'Ná so' tarí so' man núj na'. Ne'enj man so' se vaa síi guee cavii rihaan Diosé mé so' adonj —taj síi nuu nana chree nimán rihaan Jesucristó a.

35 Gaa ne canicaj Jesucristó caxríj yuvaá so' man nana chree nuu nimán snó'o yo', ne cataj so':

—Dinj tu'vá so' curihañj so' cuaj nimán síi nihánj á —taj Jesucristó rihaan nana chree yo' a.

Ndaa naxru' ma'an snó'o rej tanuu nij yuvií, qui'yaj nana chree, gaa ne curihañj nana chree nimán snó'o yo', ne nahuun sa' so', taj a doj chi'ii ran' so' a ma'.

36 Gaa ne ca'anj uxrá rá nij yuvií, ne xná'anj nij so' man tuvi' nij so', cataj nij so':

—Daj sij me síi a'mii nana nihánj, ne uun chij so' rihaan nana chree, ne urihañj nij nana chree nimán yuvií 'yaj síi nihánj ga —taj nij yuvií ni'yaj nij yuvií man Jesucristó a.

37 Gaa ne cuchi' nana che'é Jesucristó rihaan cunudanj nij yuvií man nichrun' chuman' Capernaum yo' a.

*Nana nihánj taj xna'anj se vaa nahuun nii chej Simón Pedró, qui'yaj Jesucristó a*

38 Dan me se curihañj Jesucristó rá ve' tucu'yón nii se-tucuañj Moisés, ne ca'anj so' tucua síi cu'naj Simón a. Ne ran' nii chej Simón chi'ii nacaá yuvaá, ne che'é dan cachíin ni'yaj nii rihaan Jesucristó che'é no' a.

39 Gaa ne ca'anj Jesucristó canicun' so' rej tu'va yuvéé naj no', ne ca'ne' so' suun rihaan chi'ii se vaa quix'nee chi'ii xraá no' a. Gaa ne nu' quix'néj chi'ii xraá no', qui'yaj Jesucristó a. Ne veé maan orá dan naxagaá no', ne qui'yaj chuvii no' chá nij so' nanj adonj.

*Nana nihánj taj xna'anj se vaa nahuun que'ee síi ran', qui'yaj Jesucristó a*

40 Cata' güii, ne nicaj nij yuvií cunudanj tuvi' nij so' síi ran', vaj nij so' rej ne Jesucristó a. Que'ee ndo'o chi'ii ran' nij so' a. Ne ca'anj Jesucristó, cuta' so' ra'a so' raá ndaa 'o 'o nij síi ran', gaa ne nahuun taran' nij so', qui'yaj Jesucristó a.

41 Ne que'ee nij síi ran' ro', curihañj nana chree nimán uún, ne caguáj nij nana chree yo', ne cataj nij so' se vaa ta'nii Diosé me Jesucristó a. Tzaj ne caxríj yuvaá Jesucristó man nij nana chree, ne ne ca'vej rá Jesucristó ca'mii nij so' nana vaa danj a. 'O se quene'en nij so' se vaa sij ca'née Diosé tinanii man yuvií rihaan sayuun me Jesucristó, ne ne ca'vej rá Jesucristó guun cuentó che'é so' a.

*Nana nihánj taj xna'anj se vaa ca'anj Jesucristó nu' nij ve' tucu'yón nij yuvií israelitá se-tucuañj Moisés, ca'mii natáj so' a*



42 Rej taxrej cavii Jesucristó chuman! Capernaum ca'anj so' rej tacaan a. Gaa ne nano' nij síi man Capernaum man so', ne gaa nari' nij so' man Jesucristó, gaa ne caráan nij so' chrej rihaan Jesucristó, ne:

—Se ca'vee ca'anj so' rej yaníj ma'—taj nij so' rihaan Jesucristó a.

43 Tzaj ne cataj Jesucristó rihaan nij so' a:

—Vaa ndo'o suun rihaan 'unj ca'anj 'unj yo'ó nij chuman' uún, ne nata' 'unj nana sa' nihánj rihaan nij síi ne yo'ó chuman' se vaa guun chij Diose rihaan chumij nihánj adonj. 'O se che'é nana sa' nihánj me ca'née Diose manj ca'naj rihaan chumij nihánj ca'mii natáj 'unj rihaan cunudanj nij yuvij adonj —taj Jesucristó rihaan nij síi man Capernaum a.

44 Gaa ne ca'ne' rá nij so', ne ca'anj Jesucristó nu' nij ve' tucu'yón nij yuvij israelitá se-tucañj Moisés ve' yanj estadó Judea, ne ca'mii natáj so' nana sa' a.

## 5

*Nana nihánj taj xna'anj se vaa quiri' uxrá nij tuvi' Simón Pedró xcuaj, qui'yaj Jesucristó a*

1 Dan me se 'o güii canicun' Jesucristó tu'va na lacuaná cu'naj Genesaret, ne cuchi' uxrá yuvij rej nicun' so', ne cunuu chre' ndo'o nij so' che'é se guun rá nij so' cunq' nij so' se-nana Diose a. Dan me se ndaa raan ma'an man nij so' x'núu Jesucristó a.

2 Dan me se quene'en Jesucristó vij rihoo naj tu'va na lacuaná, ne síi uta xcuaj me nij síi si'yaj rihoo yo', ne tanáj nij so' se-rihoo nij so' 'o orá nii, ne ca'anj na'nu' nij so' xnánj nij so' a.

3 Dan me se catúj Jesucristó rá 'o rihoo, ne se-rihoo síi cu'naj Simón me yo', ne cachún ni'yaj Jesucristó rihaan Simón se vaa qui'yaj so' se ndo'o cuxuun so' rihoo ca'anj rihoo yo' doj rihaan na a. Gaa ne cayáan Jesucristó rque rihoo, ne tucu'yón so' se-nana Diose man nij yuvij man tu'va na a.

4 Quisíj tucu'yón Jesucristó man nij yuvij, gaa ne cataj so' rihaan Simón, ne: —Nícaj so' rihoo ca'anj so' rej cunuú doj na, gaa ne tiguíj soj nanj rá na á —taj Jesucristó rihaan so' a.

5 Tzaj ne cataj Simón rihaan Jesucristó, ne:

—Nígan' qui'yaj suun uxrá núj, tiguíj ndo'o núj nanj rá na, tzaj ne a 'ó xcuaj ne quiri' núj, man maestro. Tzaj ne maan che'é se ma'an so' cataj, ne ca'anj tiguíj uún núj nanj rá na nanj á —taj Simón rihaan Jesucristó a.

6 Dan me se ca'anj tiguíj uún nij tuvi' Simón nanj rá na, ne quiri' uxrá nij so' xcuaj ndaa quisin' ma'an xnánj nij so', qui'yaj xcuaj a.

7 Che'é dan canacúun nij so' man tuvi' nij so' síi nuu rque yo'ó rihoo, che'é rej guun rá nij so' račuúj tuvi' nij so' man nij so' a. Dan me se ca'na' nij tuvi' nij so' yan nicun' nij so', ne caraa uxrá nij so' xcuaj rque roj rihoo a. Ne uxrá caraa roj rihoo, ne daj doj se ca'anj nij roj rihoo rque na nanj á.

8 Dan me se quene'en Simón Pedró se vaa qui'yaj Jesucristó, gaa ne ca'anj canicun' ruj so' rihaan Jesucristó, cataj so':

—Nuveé sij canicun' nichrun' rihaan so' mej a ma'. Sij atá ndo'o cacun' mej nanj á —taj Simón rihaan Jesucristó a.

9 Dan me se ca'anj ndo'o rá nij tuvi' Simón se vaa quiri' uxrá nij so' xcuaj a.

10 Ne ca'anj rá síi cu'naj Jacobo do', síi cu'naj Juan do', che'é xcuaj a. Ne tuvi' Simón me roj so', ne ta'nú síi cu'naj Zebedeo me roj so' a. Ne dan me se cataj Jesucristó rihaan Simón, ne:

—Se kuchu'ví' so' ma'. 'O se rej rihaan ní' me se guún so' sí' naqui'yaj chre' yuvií canoco' yuvií manj á —taj Jesucristó rihaan Simón a.

<sup>11</sup> Gaa ne nicaj nij so' se-rihoḡ nij so' ca'anj nij so' ndaa tu'va na a. Gaa ne tanáj nij so' cunudanj nij rasuun yo', ne canoco' nij so' man Jesucristó, ne ca'anj nij so' ga so' a.

*Nana nihánj taj xna'anj se vaa nahuun sa' 'o sí' ran' luj ri'yuj, qui'yaj Jesucristó a*

<sup>12</sup> Dan me se 'o güii caran' Jesucristó 'o chuman', ne cuchi' 'o sí' ran' ndo'o luj ri'yuj rihaan so' a. Gaa quene'en sí' ran' yo' man Jesucristó, gaa ne canicun' ruj so' rihaan Jesucristó, ne cachín ni'yaj so' rihaan Jesucristó, cataj so':

—Sese me rá so', ne ca'vee ca'nee so' chi'ij xráj, Señor —taj so' rihaan Jesucristó a.

<sup>13</sup> Gaa ne cuta' Jesucristó ra'a Jesucristó raá sí' ran', ne cataj Jesucristó:

—Me raj qui'yáj danj ei. Nahuún so', qui'yáj adonj —taj Jesucristó rihaan so' a.

Nu' danj cataj Jesucristó, ne nu' quinavij luj xráá sí' ran' a.

<sup>14</sup> Dan me se ca'ne' Jesucristó suun rihaan sí' nahuun yo', ne se cataj xna'anj so' rihaan a 'o yuvií che'é se vaa quiran' so' ma'. Gaa ne cataj uún Jesucristó rihaan so' a:

—Ca'anj so' rihaan xrej, ne t̄ihaán so' mán so' rihaan xrej se vaa nahuún so', ne rque so' rihaan Diose se vaa cataj sí' cu'naj Moisés gaa naá ndaa vaa no xcúún so' rque so' rihaan Diose che'é yan nahuún so' adonj. Gaa ne xcax nij xrej cuentá se vaa nahuún so' qui'yáj adonj —taj Jesucristó rihaan sí' nahuun yo' a.

<sup>15</sup> Tzaj ne cha'nuu ndo'o nana che'é se vaa quiran' sí' nahuun yo', ne che'é dan cunuu chre' ndo'o nij yuvií rej vaj Jesucristó a. Guun rá nij so' cunḡ nij so' se-nana Jesucristó, ne guun rá nij sí' ran' x'nee chi'ij xráá nij so' uún a.

<sup>16</sup> Tzaj ne naxuun Jesucristó man so' rihaan nij yuvií, ne ca'anj so' rej tacaan, ne cachín ni'yaj ndo'o so' rihaan Diose a.

*Nana nihánj taj xna'anj se vaa nahuun sa' 'o sí' na'vee cachee, qui'yaj Jesucristó a*

<sup>17</sup> 'O güii me se ne Jesucristó rá 'o ve', ne tucuyón so' se-nana Diose man yuvií, ne ne doj sí' fariseo ga sí' naqui'yaj cuu se-tucuanj Moisés rá ve' yo', ne mán sí' cavii chuman' Jerusalén do', yo'ó nij chuman' naj estadó Judea do', nij chuman' naj estadó Galilea do', mán ga nij so' rá ve' yo' a. Ne Diose sí' 'nij ra'a man ní' ro', racuij ndo'o man Jesucristó, ne nahuun ndo'o nij sí' ran', qui'yaj Jesucristó a.

<sup>18</sup> Dan me se táá 'o sí' na'vee cachee rihaan yuvéé, ne táá chihā nii man so' ca'na' nii rihaan Jesucristó a. Tzaj ne man ndo'o yuvií rá ve' ne Jesucristó, ne nano' nij so' rej catuu nij so' rá ve' cuchruj nij so' man sí' ran' rihaan Jesucristó a.

<sup>19</sup> Tzaj ne taj se qui'yá' ca'vee cachēn nij so' sca'núj nij yuvií a. Che'é dan cavii nij so' xráá ve', ne caya' nij so' yu'uj xráá ve', che'é rej ca'vee t̄inanij nij so' man sí' ran' rihaan Jesucristó a.

<sup>20</sup> Gaa quene'en Jesucristó se vaa cuchumán uxrá rá nij tuví' sí' ran' yo' se vaa ca'vee nahuun so' qui'yaj Jesucristó, gaa ne cataj Jesucristó rihaan sí' ran' yo', ne:

—Navij cacun' xráá so', nanj tinuj —taj Jesucristó rihaan so' a.

21 Ne cuno nij sí fariseo cuno nij sí naqui'yaj çu se-tucuañj Moisés cuno nana ca'mii Jesucristó, gaa ne nuchruj raa nij so' nana nihánj ga tuvi' nij so' a:

—Daj sij me sí nihánj, ne a'mii so' nana vaa nij rihaan Diose ga. Orún' Diose uun nucuaj tinavij cacun' xráa yuviñ nanj á —taj nij so' ga tuvi' nij so' a.

22 Quene'en Jesucristó daj nuchruj raa nij so', ne che'é dan cataj so' rihaan nij so' a:

—Me che'é nuchruj raa soj nana nanj ga.

23 Tu'va rma'án 'unj se vaa navij cacun' xráa sí nihánj, rá soj a na'. Ca'vee cataj uun ní navij cacun' xráa sí nihánj na'. Ase ca'vee doj cataj ní naxagaa so', ne cachee so' cuaj, cataj ní xa'.

24 Dan me se me rá 'unj xcax soj cuentá se vaa sí ca'née Diose nicaj yu'unj man yuviñ mej ne no xcúun 'unj tinaví 'unj cacun' xráa nij yuviñ man rihaan chumij nihánj adonj —taj Jesucristó rihaan nij so' a.

Dan me se cataj Jesucristó rihaan sí na'vee cachee a:

—Rihaan so' sij na'vee cachee taj 'unj, ne nacué so' tuvée so', ne nán' so' tucua so' á —taj Jesucristó rihaan sí naj rihaan yuvéé yo' a.

25 Nu' danj tu'va Jesucristó, gaa ne nu' naxagaa sí ran' yo' ni'yaj taran' nij yuviñ a. Gaa ne nacué so' tuvée so', gaa ne nan' so' tucua so', ne ve'é uxrá ca'mii so' che'é Diose a.

26 Dan me se ca'anj rá taran' nij yuviñ man rá ve' yo', ne cataj nij yuviñ se vaa ve'é uxrá qui'yaj Diose a. Ne chucu'vi' ndo'o nij yuviñ, ne cataj nij yuviñ se vaa:

—Niha' uxrá vaa suun sa' nocoo quene'en ní cuan' adonj —taj nij yuviñ yo' a.

*Nana nihánj taj xna'anj se vaa naciúun Jesucristó man Leví, ne canoco' Leví man so' a*

27 Quisij nahuun sí ran' yo', gaa ne curihanj Jesucristó xe', ne quene'en so' man 'o sí a'néj puextó cu'naj Leví a. Ne ne sí cu'naj Leví 'o ve' a'néj ni puextó man yuviñ a. Gaa ne cataj Jesucristó rihaan so', ne:

—Canoco' so' manj, ca'anj ní' á —taj Jesucristó rihaan so' a.

28 Gaa ne tanáj Leví man cunudanj rasuun nicaj so', ne naxumaan so', canoco' so' man Jesucristó, ca'anj so' a.

*Nana nihánj taj xna'anj se vaa me rá Jesucristó racuj so' man nij sí tumé cacun' a*

29 Gaa ne canuú ndo'o cha'anj nocoo tucua Leví che'é Jesucristó, qui'yaj Leví a. Ne man que'ee ndo'o tuvi' so' sí a'néj puextó do', que'ee yo'ó yuviñ do', man tucua Leví, ne ne nij so' ga nij tuví' Jesucristó a.

30 Dan me se man nij sí fariseo do', sí naqui'yaj çu se-tucuañj Moisés nocoo' man nij sí fariseo do', gaa ne ca'mii chi'iiñ nij so' che'é Jesucristó rihaan nij sí tucu'yón se-nana Jesucristó a. Dan me se cataj nij sí fariseo ga nij sí naqui'yaj çu se-tucuañj Moisés:

—Me che'é chá soj chraa ne 'o soj na ga nij sí a'néj puextó do', ga yo'ó nij sí tumé cacun' do', ga —taj nij so', xná'anj nij so' man nij sí tucu'yón se-nana Jesucristó a.

31 Gaa ne dan me se cataj ma'an Jesucristó rihaan nij so' a:

—Sí vaa nucuaj ro', ne nano' nij so' man doctor ma'. Maan se sí ran' ro', me sí nano' man doctor adonj. Gaa ne ase vaa sí ran' ro', danj vaa nij sí nihánj adonj.

<sup>32</sup> 'O se ne ca'na' 'unj canacunj 'unj man sí sa' ma'. Che'e nij sí tumé cacun' ca'naj se vaa canicaj nimán nij so' ne canoco' nij so' se-nanaj adonj. Tzaj ne sese sí sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

*Nana nihánj taj xna'anj me che'é ne toco' nij sí tucu'yón se-nana Jesucristó x'naa man ma'an nij so' a*

<sup>33</sup> Gaa ne nij sí fariseo ga nij sí naqui'yaj cuu se-tucuanj Moisés me se cataj nij so' rihaan Jesucristó a:

—Me che'é, ne nij sí tucu'yón se-nana Juan sí uta' ne man yuvij me se toco' nij so' x'naa man ma'an nij so' do', na'vij nij so' do', ne veé danj 'yaj nij sí tucu'yón se-nana núj sij fariseo do', tzaj ne nij sí tucu'yón se-nana so' me se ne toco' nij so' x'naa man ma'an nij so' do', ne na'vij nij so' do', rihaan Diose ga —taj nij so' rihaan Jesucristó a.

<sup>34</sup> Ne cataj Jesucristó rihaan nij so':

—Ase vaa sí cuchrui sa'anj vaa 'unj, ne asa' ca'vee toco' nij sí man gaj x'naa man ma'an nij so', rá soj ga. Ase vaa sí cataj xcaj man chana ne man tuvi' so' do', danj vaa nij sí man nihánj cuang, ne anuú ndo'o cha'anj man nij so', ne se ca'vee toco' nij so' x'naa man ma'an nij so' cuano ma'.

<sup>35</sup> Tzaj ne vaa güii, ne guun yanj 'unj rihaan nij so', qui'yaj yuvij, gaa ne nana rá nij sí nihánj, gaa ne toco' nij so' x'naa man ma'an nij so' adonj —taj Jesucristó rihaan nij sí fariseo ga nij sí naqui'yaj cuu se-tucuanj Moisés yo' a.

<sup>36</sup> Gaa ne ca'mii Jesucristó yo'ó nana rihaan nij so', cataj so':

—Ase vaa yatzij sin' vaa tucuáan nga noco' soj, ne se guun cusin' ní' yatzij naca ne na'nej ní' man yatzij nga ma'. Sese danj qui'yaj ní', gaa ne quirij' nu' yatzij naca yo', qui'yaj yatzij nga nanj adonj. Gaa ne ino uxrá gaa yatzij naca, qui'yaj yatzij nga yo' nanj adonj.

<sup>37</sup> Ne dan me se ase vaa nuj nga nuj araa nii na vinó vaa uún soj a. Ne se ca'vee tucu'yón 'unj se-tucuanj 'unj man soj ma'. 'O se ase vaa na vinó naca vaa nana tucu'yón 'unj, ne se guun caraa yuvij na vinó naca rque nuj nga ma'. Sese danj qui'yaj yuvij, ne cuyan na vinó cunuu xee na vinó, ne se cacua nuj nga ma'. Che'é dan canuu yo', ne cayan na vinó rihaan yo'ó a.

<sup>38</sup> Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan sí naca sí ne noco' tucuáan nga tucu'yón 'unj se-nanaj nanj adonj.

<sup>39</sup> Ne taj sí guun rá co'q na vinó naca, sese aj co'o so' na vinó nga ma'. 'O se sa' doj vaa na nga, cataj so' nanj á. Ne danj vaa guce soj, inanj tucuáan nga noco' soj, ne che'é dan na'vej soj canoco' soj tucuáan naca nanj adonj. —Danj cataj Jesucristó rihaan nij sí fariseo do', rihaan nij sí naqui'yaj cuu se-tucuanj Moisés do' a.

## 6

*Nana nihánj taj xna'anj che'é güii naránj rá ní' a*

<sup>1</sup> 'O güii naránj rá nij yuvij israelitá cachén Jesucristó ga nij sí tucu'yón se-nana so' rque 'o naa 'núú trigó a. Ne cuta nij sí tucu'yón se-nana Jesucristó doj caa trigó, ne tuguáj ra'a nij so' caa, gaa ne chá nij so' doj trigó a.

<sup>2</sup> Gaa ne xná'anj ta'aj sí fariseo man nij so', cataj nij so':

—Me che'é 'yaj soj danj ga. Ne nó xcúun ní' cutá ní' trigó güii naránj rá ma' —taj nij síí fariseo rihaan nij síí tucu'yón se-nana Jesucristó a.

<sup>3</sup> Tzaj ne cataj ma'an Jesucristó rihaan nij síí fariseo a:

—Me che'é, ne ne nayaa soj rihaan danj Diose daj qui'yaj síí cu'naj David gaa naá a. Gaa quina'aan rque nij tuvi' nij so',

<sup>4</sup> gaa ne catúj so' rá nuvií, ne chá so' rachrúun taj rihaan se-mesa Diose a. Ne go' uún so' chá nij tuvi' so' uún a. Ne ne nó xcúun nij so' chá nij so' rachrúun yo', maan se orún' nij xrej nó xcúun chá rachrúun yo' a. Tzaj ne maan che'é se rque nij so' na'aan uxrá, gaa ne chá nij so' rachrúun yo' nanj adonj. Tzaj ne ne cataj Diose se vaa tumé síí cu'naj David cacun' ma' —taj Jesucristó rihaan nij síí fariseo a.

<sup>5</sup> Gaa ne canicaj so', cataj uún so' a:

—Síí ca'néé Diose nıcaj yu'unj man yuvií mej, ne no xcúnj quirıı ta'ngaj daj qui'yaj yuvií güii naránj rá yuvií adonj —taj Jesucristó rihaan nij síí fariseo a.

*Nana nihánj taj xna'anj se vaa nahuun sa' o síí nacoq ra'a, qui'yaj Jesucristó a*

<sup>6</sup> Dan me se yo'ó güii naránj rá nij yuvií israelitá ro', catúj Jesucristó rque 'o ve' tucu'yón nij so' se-tucuanj Moisés, ne tucu'yón so' se-nana Diose man nij yuvií a. Ne dan me se yaán 'o snó'o rá ve' yo', ne nacoq ra'a so' rej nuva' so' a.

<sup>7</sup> Ne nij síí naqui'yaj cuu se-tucuanj Moisés rihaan yuvií do', nij síí fariseo do', yaán nij so' rá ve', ne tumé uxrá nij so' man Jesucristó sese nahuun yuvií qui'yaj so' gaa güii naránj rá nij so' a. Danj qui'yaj nij so' che'é rej guun rá nij so' cutá' nij so' cacun' xráá Jesucristó a.

<sup>8</sup> Tzaj ne quene'en Jesucristó se vaa guun rá nij so', gaa ne cataj so' rihaan síí nacoq ra'a a:

—Naxumaan so' canicun' cayá so' sca'núj á —taj Jesucristó rihaan so' a.

Gaa ne naxumaan so', ne canicun' cayá so' sca'núj nij yuvií a.

<sup>9</sup> Gaa ne cataj Jesucristó rihaan nij síí nanó chí'ıı rá a:

—Cuanq nihánj me se xna'anj 'unj man soj che'é güii naránj rá xa'. No xcúun ní' racuj ní' tuvi' ní' na'. Ase no xcúun ní' qui'yaj chí'ıı ní' man tuvi' ní' xa'. Daj qui'yaj ní' rá soj gaa güii naránj rá ní' ga. Ne nó xcúun ní' tınanıı ní' man tuvi' ní' rihaan sayuun gaa güii naránj rá gaa a na'. Nı'yaj uun ní' cavi' so' gaa güii naránj rá gaa a na'. —Danj taj Jesucristó rihaan nij so' a.

<sup>10</sup> Gaa ne ni'yaj Jesucristó man cunudanj nij yuvií man rque ve' yo', gaa ne cataj so' rihaan síí nacoq ra'a a:

—Tucuá so' ra'á so' á —taj Jesucristó rihaan so' a.

Ne tucuá so' ra'a so', ne cunuu sa' ra'a so' adonj.

<sup>11</sup> Tzaj ne ca'maan ndo'o rá nij síí naqui'yaj cuu se-tucuanj Moisés ga nij síí fariseo, ne guun rá nij so' ga tuvi' nij so' daj gaa qui'yaj chí'ıı nij so' man Jesucristó a.

*Nana nihánj taj xna'anj se vaa narii Jesucristó chujij apóstol ca'anj nata' se-nana so' a*

<sup>12</sup> Dan me se cachén doj güii, gaa ne ca'anj Jesucristó rej quij, ca'anj cachınj ni'yaj so' rihaan Diose a. Nıgan' quınáj so' quij cachıın ni'yaj so' rihaan Diose a.

<sup>13</sup> Ranga', gaa ne canacúun Jesucristó man cunudanj nij síí tucu'yón se-nana so' ca'na' nij so' rihaan so', gaa ne narii Jesucristó man chujij nij so' guun nij so' apóstol nata' rihaan yuvií che'é so' a.

14 'O so' me sí cu'naj Simón, ne tucu'náj Jesucristó Pedró man so' a. Yo'ó so' me tinúú Pedró sí cu'naj Andrés a. Yo'ó nij so' me Jacobo do', Juan do', Felipé do', Bartolomé do',

15 Mateo do', Tomás do', Jacobo ta'níí Alfeo do' a. Yo'ó so' uún me Simón, ne tuvi' nij sí me rá cunú' ga gobiernó ne Romá me so' a.

16 Yo'ó so' me Judas tinúú Jacobo, ne yo'ó so' uún me Judas Iscariote sí tacuachén man Jesucristó rihaan nij sí taj ri'yunj man Jesucristó a.

*Nana nihánj taj xna'anj se vaa nago' Jesucristó chrej man 'o x'ne' nocoo yuvií a*

17 Dan me se nanij Jesucristó ga chuvij nij apóstol yo' taa rque doj, ne cuchi' nij so' 'o rej vaa taa, ne nocoo doj sí tucu'yón se-nana so' mán ga so' a. Ne ca'na' ndo'o yuvií cavii chuman' Jerusalén do', yuvií cavii yo'ó nij chuman' naj estadó Judea do', yuvií cavii rej tu'va na ya'anj rej naj chuman' Tiro ga chuman' Sidón do' a.

18 Ne guun rá nij yuvií cunó nij so' se-nana Jesucristó, ne guun rá nij sí ran' nahuun nij so' a. Ne vaa nij yuvií nuu nana chree nimán, ne sayuun ndo'o quiran' nij yuvií, qui'yaj nana chree, tzaj ne quirri' Jesucristó nana chree nuu nimán nij so', ne cunuu sa' nij so', qui'yaj Jesucristó a.

19 Gaa ne guun rá cunudanj nij yuvií cano ra'a nij so' xraá Jesucristó che'é se cavii ndo'o se nucaj man Jesucristó, ne nahuun sa' cunudanj nij yuvií, qui'yaj Jesucristó a.

*Nana nihánj taj xna'anj me yuvií cavii sa' doj ne me yuvií quiran' sayuun a*

20 Gaa ne naxcaj Jesucristó rihaan so' ni'yaj so' man nij sí tucu'yón se-nana so', gaa ne cataj so':

—Cavii sa' taran' soj sij nique, ne soj me sí cayáan ga Diose gaa güii guun chij Diose rihaan chumií nihánj adonj.

21 "Cavii sa' taran' soj sij na'aan rque cuano adonj. Vaa güii quirri' soj se cha soj adonj.

"Cavii sa' taran' soj sij ta'vee cuano adonj. Vaa güii ca'nga' ndo'o soj adonj.

22 "Ne cavii sa' ndo'o soj sese quitaj ri'yunj yuvií man soj do', sese quirrií yaníj yuvií man soj do', sese ca'mii yuvií nana nij rihaan soj do', sese nachri' yuvií ni'yaj yuvií man soj se vaa sij chi'ii me soj do', che'é se me soj sí nocoo manj sij ca'née Diose nıcaj yu'unj man yuvií adonj. Ne quene'en soj se vaa ya cavii sa' soj adonj.

23 Gaa ne güii quiran' soj danj me se no xcúun soj guun niha' uxrá rá soj ne güej ndo'o soj, che'é se uxrá naru'vee Diose rihaan soj asa' cuchi' soj rej xta' adonj. 'O se ase vaa 'yaj nij yuvií man soj ro', ta'nga' danj qui'yaj xii nij yuvií man nij sí nata' se-nana Diose gaa naá uún adonj.

24 "Tzaj ne nique ndo'o soj sij ru'vee nanj á. Soj sij ru'vee me se aj quirri' soj nu' se sa' nıcaj soj, ne taj vaj doj se sa' rque Diose man soj a ma'.

25 "Nique soj sij vaa raan rque cuano nanj á. Vaa güii quina'aan rque soj adonj.

"Nique soj sij a'nga' cuano nanj á. Vaa güii quinano ndo'o rá soj do', ta'vee soj do', adonj.

26 "Ne nique soj sij ve'é inanj a'mii cunudanj yuvií che'é nanj á. 'O se ase vaa ve'é inanj a'mii nij yuvií che'é soj ro', ta'nga' danj ca'mii xii nij yuvií che'é nij sí tiha' yu'unj se vaa sij nata' se-nana Diose me nij so' gaa naá a —taj Jesucristó rihaan cunudanj nij sí tucu'yón se-nana so' a.

*Nana nihánj taj xna'anj se vaa gaa 'ee rá ní' man nij sí taj ri'yunj man ní' a*

<sup>27</sup> Canicaj Jesucristó, cataj so' a:

—Tzaj ne rihaan soj sij man nanó xrej ro', cataj xna'anj 'unj se vaa gaa 'ee rá soj man nij sí taj ri'yunj ni'yaj man soj, ne qui'yaj soj se luj che'é nij sí nachri' ni'yaj man soj ei.

<sup>28</sup> Ve'é ca'mii soj rihaan nij sí a'mii quij rihaan soj, ne cachinj ni'yaj soj rihaan Dioso che'é nij sí 'yaj se nij man soj a.

<sup>29</sup> Sese vaa sí coxro nichrej xruú so', ne ca'ne' rá so' coxro so' nichrej xruú so' uún a. Sese vaa sí ca'néj se-roto so', ne ca'ne' rá so' ca'neé so' se-cootoo so' uún a.

<sup>30</sup> Ne me ma'an yuvij achíin ni'yaj rasuun rihaan soj, ne go' soj rasuun yo' man nij so' ei. Sese vaa yuvij ca'néj si'yaj soj, ne se nachin' soj si'yaj soj ma'.

<sup>31</sup> Dan me se daj se uun rá soj qui'yaj sa' yuvij rihaan soj ro', ta'nga' danj qui'yaj sa' soj rihaan yuvij á.

<sup>32</sup> "Dan me se gaa 'ee rá soj man cunudanj yuvij ei. Sese 'ee rá soj man inanj nij sí 'ee rá man soj, gaa ne me che'é naru'vee Dioso rihaan soj, rá soj ga. 'O se ndaa nij sí chí'ij ro', 'ee rá nij so' man nij sí 'ee rá man nij so' nanj á.

<sup>33</sup> Ne qui'yaj soj se luj rihaan cunudanj yuvij ei. 'O se sese qui'yaj soj se luj rihaan inanj sí 'yaj se luj rihaan soj, gaa ne me che'é naru'vee Dioso rihaan soj, rá soj ga. 'O se ndaa nij sí chí'ij ro', 'yaj nij so' se luj rihaan tuvi' nij so' sij 'yaj se luj rihaan nij so' nanj adonj.

<sup>34</sup> Me ma'an yuvij racuíj soj sa'anj, ne se guun rá soj nacaj uún soj se-sa'anj soj ma'. Sese racuíj soj sa'anj man inanj sí naru'vee rihaan soj, gaa ne me che'é naru'vee Dioso rihaan soj, rá soj ga. 'O se ndaa ma'an nij sí chí'ij ro', racuíj nij so' sa'anj man nij tuvi' so' sij naru'vee rihaan so' adonj.

<sup>35</sup> "Dan me se gaa 'ee rá soj man nij sí taj ri'yunj ni'yaj man soj, ne qui'yaj soj se luj rihaan nij sí nachri' man soj, ne racuíj soj sa'anj man yuvij, ne se guun rá soj nacaj uún soj se-sa'anj soj ma'. Ne vaa güii, ne narque uxrá Dioso se sa' man soj, ne ta'níi Dioso sí sa' ndo'o me soj gaa adonj. 'O se Dioso me sí 'yaj se luj rihaan ndaa sí ne ne'en me se uun se luj do', rihaan ndaa sí chí'ij do', adonj.

<sup>36</sup> Ase vaa 'ee rá Rej ní' Dioso man daj a nij yuvij ro', danj gaa 'ee rá soj man daj a nij yuvij uún adonj. —Danj cataj Jesucristó rihaan nij sí tucu'yón se-nana so' a.

*Nana nihánj taj xna'anj daj qui'yaj ní' gaa ca'mii ní' ga tinúú ní' che'é cacun' tumé tinúú ní' a*

<sup>37</sup> Ne canicaj Jesucristó cataj so' a:

—Se guun niha' rá soj cuta' soj cacun' xráá tinúú soj, gaa ne taj cacun' cuta' Dioso xráá ma'an soj man adonj. Maan se caraá x'naa soj rihaan tinúú soj, ne caraá x'naa Dioso rihaan ma'an soj uún adonj.

<sup>38</sup> Go' soj rasuun man tuvi' soj, ne Dioso me sí narque rasuun rihaan soj uún adonj. So' me sí sa' ndo'o rá, ne adi' se 'yaj sí sa' rá tu'vej 'núú ne araa navii so' rihaan tanej ro', danj qui'yaj guee Dioso ga soj, ne doj a narque Dioso rasuun sa' man soj adonj. Ase vaa 'yaj guee soj ga tuvi' soj ro', danj qui'yaj guee Dioso ga soj uún adonj. —Danj cataj Jesucristó rihaan nij sí tucu'yón se-nana so' a.

<sup>39</sup> Gaa ne nanó Jesucristó se-cuento roj sí tuchrii rihaan nij sí tucu'yón se-nana so' a:

—Ne ca'vee tihaan 'o sí tuchrii chrej rihaan tuvi' tuchrii so', rá soj na'. Taj ma'. Sese danj qui'yaj so', gaa ne quinij roj so' rá yu'uj nanj adonj.

<sup>40</sup> Dənj nənj uún, nə 'o xnii tucu'yón se guun nucuaj so' quene'en so' doj rihaan se-maestro so' ma'. Nə ca'vee se uxrá tucu'yón so', tzaj nə veé ase vaa ne'en se-maestro so' ro', veé dənj quene'en ma'an so' nənj adənj.

<sup>41</sup> Me che'é guun chree rá so' ni'yaj so' ni'ya nuu rihaan tinúú so' ga. Nə ne ni'yaj so' chruun mənj nuu rihaan ma'an so' a.

<sup>42</sup> Asa' ca'vee cataj so' rihaan tinúú so': "Rque so' rihaan so' quirii 'unj ni'ya á". Se guun a doj cataj so' dənj tihá' so' man tinúú so' ma'. Asino quirii so' chruun mənj nuu rihaan so', gaa nə aj ruvi' sa' rihaan so', gaa nə ca'vee quirii so' ni'ya nuu rihaan tinúú so' adənj. Dan me se ase vaa aráan ni'ya rihaan yuvii ro', dənj vaa aráan rihaan yuvii 'yaj cacun' atə yuvii nə na'vee xcəj sa' nij yuvii cuentá man adənj —taj Jesucristó rihaan nij sí tucu'yón se-nəna so' a.

*Nəna nihánj taj xna'anj se vaa ase vaa nimán yuvii ro', dənj vaa a'mii yuvii a*

<sup>43</sup> Gaa nə canicaj Jesucristó, cataj so':

—Chruun sa' ro', se guun cumən chruj nij raə ma'. Nə chruun nij ro', se guun cumən chruj sa' raə ma'. Ase vaa chruun yo' ro', dənj vaa nimán yuvii, nə ase vaa chruj yo' ro', dənj vaa se vaa 'yaj nij yuvii adənj.

<sup>44</sup> Maən chruj mənj raə chruun ro', 'yaj ne'en ni' daj chruun me yo' adənj. Taj rutzí' mán raə chruun tanj yangij ma'. Nə taj rcoo mán raə chruun tanj xcuaa ma'.

<sup>45</sup> Dan me se sí sa' ro', mənj ndo'o se sa' nimán so', nə a'mii so' inənj nana sa' adənj. Síi chi'ii ro', mənj ndo'o se quij nimán so', nə a'mii so' inənj nana chi'ii adənj. 'O se ase vaa se mənj nimán yuvii ro', dənj vaa nana a'mii yuvii nənj á —taj Jesucristó rihaan nij sí tucu'yón se-nəna so' a.

*Nəna nihánj taj xna'anj se vaa ase vaa sí 'yaj ve' sa' ro', dənj vaa síi uno sa' rihaan Jesucristó a*

<sup>46</sup> Canicaj Jesucristó, cataj so' nana nihánj a:

—Me che'é taj soj se vaa síi 'nij ra'a man soj mej, tzaj nə ne uno soj rihanj ga. Nə chihan' 'yaj soj ma'.

<sup>47</sup> Cuanə nihánj me cataj xna'anj 'unj rihaan soj daj sij me síi 'na' nanó xrej nana a'mij, nə 'yaj so' ndəa vaa taj se-nənaj a.

<sup>48</sup> Ase vaa 'o síi cune' ve' tucua rihaan 'o yuvej vaa so' a. Cunuu ndo'o váan so' rej cuchruj so' tacóo ve', nə raan ndo'o yáan ve', 'yaj so' a. Ca'vee se maən nəna yuvaə curihanj go' xráa ve', nə ca'vee se cavii chráa, nə ca'na' na xee go' na xee tacóo ve', tzaj nə se naxru' ve', qui'yaj na xee ma'. Dənj vaa síi uno se-nənaj a.

<sup>49</sup> Tzaj nə inə vaa síi nanó xrej nana a'mij tzaj nə ne 'yaj ndəa vaa taj se-nənaj ma'. Ase vaa 'o síi 'yaj ve' nij vaa so' a. Ne váan cunuu so' rej cuchruj so' tacóo ve' rihaan yo'óo ma'. Che'é dan yáan cuan' uuñ tucua so' a. Sese curihanj maən nəna yuvaə, nə go' yo' xráa ve', nə sese cavii chráa, nə ca'na' na xee go' na xee tacóo ve', gaa nə canee guee ve' nənj á. Nu' canee ve' yo', nə daj chihəə mij se cunuu sa' yo' a ma'. Dənj vaa síi ne uno se-nənaj adənj —taj Jesucristó rihaan nij sí tucu'yón se-nəna so' a.

## 7

*Nəna nihánj taj xna'anj se vaa nahuun se-mozó tanuu capitán, qui'yaj Jesucristó a*



<sup>1</sup> Quisíj ca'mii Jesucristó nu' naná yo' cuno nij yuvií, gaa ne ca'anj so' chuman' Capernaum a.

<sup>2</sup> Dan me se yáán 'o tanuu capitán chuman' yo', ne síi rii ta'nga' rihaan 'o cientó tanuu me so' a. Ne vaa 'o se-mozó so' síi 'ee uxrá rá so' man, ne ran' uxrá mozó yo', ne daj doj cavi' so' a.

<sup>3</sup> Dan me se cuno tanuu capitán se vaa ca'na' Jesucristó chuman' yo', ne ca'née so' doj síi uun chij rihaan nij yuvií israelitá cuchí' nij so' rihaan Jesucristó, ne cachinj ni'yaj nij so' rihaan Jesucristó se vaa ca'na' so' tinahūun so' se-mozó tanuu capitán yo' a.

<sup>4</sup> Dan me se cuchí' nij síi uun chij yo' rihaan Jesucristó, gaa ne cachín ni'yaj uxrá nij so' rihaan Jesucristó, cataj nij so':

—Síi sa' me tanuu capitán yo', ne che'é dan vaa che'é raquíj so' man so' adonj.

<sup>5</sup> 'Ee rá so' man ní' sij israelitá, ne ma'an so' qui'yaj ve' nuu chre' núj tucu'yón núj se-tucuanj Moisés adonj —taj nij so' rihaan Jesucristó a.

<sup>6</sup> Ne ca'anj Jesucristó ga' nij so', ne daj doj cuchí' nij so' ve', gaa ne ca'née tanuu capitán man tuvi' so' ca'anj caran' man Jesucristó, ne cataj nij so':

—Se caraya'áán so', man maestro. 'O se nuveé sij sa' me so', taj so' ma'. Ne nó xcúún so' catuū so' rá ve' tucua' so', taj so' ma'.

<sup>7</sup> Che'é dan ne quisij rá ma'an so' ca'na' so' rihaan so', taj so' ma'. Maan se ca'ne' uun so' suun se vaa nahūun se-mozó so', gaa ne nahūun ma'an se-mozó so', taj so' nanj á.

<sup>8</sup> Ne cataj so' se vaa vaa síi rii ta'nga' rihaan so', ne rii ta'nga' so' rihaan tanuu, ne taj xna'anj so' rihaan tanuu se vaa ca'anj nij so', ne 'anj nij so', ne taj xna'anj so' rihaan nij tanuu se vaa ca'na' nij so', ne 'na' nij so' rihaan so', ne taj xna'anj so' daj qui'yaj nij tanuu, ne veé danj 'yaj nij tanuu adonj. Ne ne'en so' se vaa ase vaa rii ta'nga' so' rihaan nij tanuu nocó' man so' ro', danj rii ta'nga' guēē so' rihaan chí'ij anó man yuvií, taj so' nanj á —taj nij tuvi' tanuu capitán rihaan Jesucristó a.

<sup>9</sup> Dan me se gaa cuno Jesucristó naná ca'mii tuvi' tanuu capitán yo', ne ca'anj rá Jesucristó, ne canicaj so' cataj so' rihaan nij síi nocó' rej xco' so' a:

—Cuanō nihánj me cataj xna'anj 'unj rihaan soj se vaa taj vaj a 'ó rej ne narij man yo' o síi israelitá síi cuchumán ndo'o rá naná a'mii 'unj ndaa vaa amán rá tanuu capitán nihánj a ma' —taj Jesucristó rihaan nij so' a.

<sup>10</sup> Dan me se canicaj uun nij tuvi' tanuu capitán ca'anj nij so' tucua' so', ne gaa cuchí' nij so', ne aj nahuun se-mozó tanuu capitán yo', qui'yaj Jesucristó a.

*Naná nihánj taj xna'anj se vaa cunuu i'na' uún ta'níí 'o chana' cavi' nica, qui'yaj Jesucristó a*

<sup>11</sup> Dan me se cachén doj güii, gaa ne ca'anj Jesucristó chuman' cu'naj Naín ga' nij síi tucu'yón se-nanā so' ga' 'o x'ne' nocōo yuvií a.

<sup>12</sup> Quinichrun' nij so' tu'va chuman', gaa ne dan me se nari' tuvi' Jesucristó ga' nij síi ca'anj cachín 'o xngá a. Ne síi cavi' me se orún' so' me ta'níí chana' cavi' nica, ne vaj 'o x'ne' nocōo yuvií man chuman' yo' ga' nii so' rihaan santó a.

<sup>13</sup> Dan me se quene'en Jesucristó man chana' yo', gaa ne cunuu 'ee rá so' man no', gaa ne cataj so':

—Se ta'veé so' ma' —taj so' a.

14 Gaa ne dan me se ca'anj Jesucristó canó ra'a so' man chrúun taj xngá, gaa ne canicun' nij sí taj chíhá xngá a. Gaa ne cataj Jesucristó rihaan sí cavi' a:

—Cunó so' a'mij, ne naxagaa so', xnii —taj Jesucristó rihaan sí cavi' yo' a.

15 Gaa ne cunuu i'na' ya uún xnii, ne naxagaa so', gaa ne guun che'e xnii ca'mii so' a. Gaa ne:

—Nihánj 'na' ta'núí so' á —taj Jesucristó rihaan nii xnii a.

16 Gaa ne dan me se ca'anj rá taran' nij yuvií se vaa qui'yaj Jesucristó, gaa ne guun niha' rá nij so' se vaa ve'é qui'yaj Diose, gaa ne canicaj nij so' cataj nij so' se vaa ca'née Diose 'o sí nata' se-nana so' rihaan nij so' a. Ne cataj uún nij so' se vaa ca'na' Diose racuj so' man nij so' sij nocó' man Diose a.

17 Gaa ne cuchi' nana rihaan nij yuvií man estadó Judea do', rihaan nu' nij yuvií man anicaj estadó Judea che'é se vaa qui'yaj Jesucristó a.

*Nana nihánj taj xna'anj che'é nana ca'mii Jesucristó che'é sí cu'naj Juan sí cuta' ne man yuvií a*

18 Dan me se cuno nij sí tucu'yón se-nana Juan nu' se vaa qui'yaj Jesucristó, gaa ne cataj xna'anj nij so' rihaan Juan a. Gaa ne canacúun Juan man vj sí tucu'yón se-nana so' ca'na' roj so' rihaan so', gaa ne dan me se ca'née so' man roj so' cuchí' roj so' rihaan sí 'nij ra'a man ní' a.

19 Ne nana nihánj ro', xna'anj roj so' man Jesucristó, taj sí cu'naj Juan rihaan roj so' a: “So' me sí ca'na' tñanii man yuvií rihaan sayuun na'. Ase na'vij ní' ca'na' yo'ó so' xa'”. Dan me nana me rá sí cu'naj Juan xna'anj roj so' man Jesucristó a.

20 Dan me se cuchi' roj so' rihaan Jesucristó, ne cataj roj so':

—Vij ran' rój me sí ca'née Juan sí uta' ne man yuvií ca'na' rihaan so' a. Me rá Juan quene'en so' sese ma'án so' me sí ca'na' tñanii man yuvií rihaan sayuun ní', ase na'vij ní' ca'na' yo'ó so' a —taj roj so' rihaan Jesucristó a.

21 Gaa ne ve'e maan orá ca'na' roj sí ca'née Juan man ro', nahuun que'ee ndo'o sí ran' do', curihanj nana chree nimán que'ee yuvií do', nachuguun rihaan que'ee sí tuchrií do', qui'yaj Jesucristó a.

22 Gaa ne cataj xna'anj Jesucristó rihaan roj so' a:

—Cavii roj soj cuchí' uún roj soj rihaan sí cu'naj Juan, ne cataj xna'anj roj soj rihaan so' nu' nana cuno roj soj do', nu' se vaa quene'en roj soj do' á. Dan me se nij sí tuchrií ro', naxra' rihaan, ne nij sí na'vee cachee ro', chée nij so', ne nij sí ran' luj ri'yuj ro', nahuun sa', ne nij sí so'o ro', nachuguun xrée nij so', ne nij sí cavi' ro', cunuu i'na' uún, ne nij sí niqúe ro', uno nij so' nana sa' a. Nu' nihánj cataj xna'anj roj soj rihaan sí cu'naj Juan yo' á.

23 Ne cataj uún roj soj rihaan sí cu'naj Juan se vaa cavii sa' so' qui'yaj Diose, sese se guun na'aj so' ni'yaj so' manj a. Danj ca'mii roj soj rihaan sí cu'naj Juan yo' ei —taj Jesucristó rihaan roj sí tucu'yón se-nana Juan yo' a.

24 Dan me se gaa ca'anj roj sí ca'anj suun che'é Juan, gaa ne guun che'e Jesucristó ca'mii so' rihaan cunudanj nij yuvií che'é sí cu'naj Juan sí cuta' ne man yuvií a:

—Asij ca'anj soj rej tacaan quene'en soj man sí cu'naj Juan ro', ne daj gaa so' quene'en soj, rá soj ga. Ase vaa yo'o rcoo naan ndo'o 'yaj nana vaa so', rá soj na'. Guun vij nimán so' che'é tucuaán nocó' so', rá soj na'. Taj ma'.

25 Maan se daj gaa so' rá soj, asij ca'anj soj quene'en soj man so' ga. Sij nuu yatzi laruu ndo'o me so', rá soj na'. Taj ma'. 'O se nij sí nuu yatzi sa' ndo'o do', nij sí tun' ndo'o sa'anj do', yanj rá ve' tucua' sí nicaj suun rey adonj.

26 Maan se daj gaa sí cu'naj Juan rá soj, asij ca'anj soj quene'en soj man so' ga. Sij nata' se-nana Diose me so', rá soj na'. Ya uxrá ei. Ne cataj xna'anj 'unj rihaan soj se vaa sa' doj vaa so' rihaan cunudanj nij sí nata' se-nana Diose adonj.

27 "O se nana nihánj nana no' rihaan danj Diose ro', taj xna'anj che'é sí cu'naj Juan a: "Vaa sí ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvii ve'é ca'mii nij yuvii ga so', qui'yaj so' a". Danj taj danj Diose che'é sí cu'naj Juan se vaa nuchran' nimán yuvii ve'é ca'mii nij yuvii ga sí ca'na' tinanii man nij yuvii rihaan sayuun, qui'yaj so' a. Ne danj qui'yaj so' adonj.

28 "Cuanó nihánj me se cataj xna'anj 'unj rihaan soj se vaa sij sa' doj rihaan cunudanj nij yuvii man rihaan chumii me sí cu'naj Juan a. A 'ó yuvii ne vaa sa' doj rihaan so' ma'. Tzaj ne cuano ro', uun chij Diose nimán yuvii man rihaan chumii nihánj, ne naj guun yuvii guun chij Diose nimán ro', me sí sa' doj rihaan sí cu'naj Juan a. —Danj cataj Jesucristó rihaan nij yuvii yo' a.

29 Dan me se nu' nij yuvii mán ne ndaa nij sí a'néj puextó ro', gaa cuno nij so' se-nana Jesucristó, ne cataj nij so' se vaa sa' uxrá qui'yaj Diose a. 'O se sij cata' ne qui'yaj Juan me nij so' a.

30 Ne nij sí naqui'yaj cuu se-tucuanj Moisés do', nij sí fariseo do', ne ca'vej rá nij so' cuno nij so' daj me rá Diose qui'yaj Diose che'é nij so' ma'. 'O se nuveé sij cata' ne qui'yaj Juan me nij sí na'vej rá ma'.

31 Gaa ne cataj uún Jesucristó rihaan nij yuvii a:

—Ne daj vaa nij soj sij man rihaan chumii nihánj cuano, rá soj ga. Dan me se cataj xna'anj 'unj rihaan soj ei.

32 Ase vaa xnii ca'anj rihaan yu'vee ne tico ga tuvi' ro', vaa soj sij man rihaan chumii nihánj adonj. Dan me se yáan nij xnii yo' rihaan yo'óo, ne aguáj nij xnii rihaan tuvi' xnii, taj nij xnii: "Nicaj núj rihuu núj, go' núj chra' choco', tzaj ne me che'é ne ra'anj soj ga. Ne go' núj chra' xnangá, tzaj ne me che'é ne ta'vee soj ga. Me che'é ne tico soj ga núj ga", taj nij xnii rihaan tuvi' nij so' a.

33 'O se ca'na' Juan sí cuta' ne man yuvii, gaa ne ne cha so' chraa do', ne co'lo so' na vinó ga tuvi' so' do', gaa ne che'é dan taj soj se vaa nuu nana chree nimán so', taj soj a.

34 Ne ca'ná' 'unj sij ca'née Diose nicaj yu'unj man yuvii, gaa ne niha' rá 'unj chá 'unj do', co'lo 'unj do', gaa ne che'é dan taj uún soj se vaa sí cachén chá do', sí cachén co'lo do', mé 'unj, taj uún soj a. Ne taj uún soj se vaa tuvi' 'unj me sí tiha' yu'unj man yuvii che'é puextó do', yo'óo nij sí tumé cacun' do', taj soj a. Danj tu'va soj, tzaj ne ne ne'en uxrá soj ma'.

35 Sese xcaj soj cuentá daj vaa 'yaj rój, ne guun ya rá soj se vaa sij cuu raq me rój ga sí cu'naj Juan yo' adonj —taj Jesucristó rihaan nij yuvii a.

### *Nana nihánj taj xna'anj se vaa na'nu' 'o chana tacóo Jesucristó a*

36 Dan me se canacúun 'o sí fariseo man Jesucristó cha Jesucristó chraa tucá so', gaa ne ca'anj cayáan Jesucristó tucá so' cha so' chraa a.

37 Ne dan me se yáan 'o chana niha' rá ga chii chuman' yo', gaa ne cuno no' nana se vaa cuchí' Jesucristó chá so' chraa tucá sí fariseo yo', gaa ne che'é dan nicaj no' 'o aga' catzii ve'é ndo'o vaa nuu casté gun' daj, ca'anj no' tucá sí fariseo yo' a.

38 Gaa ne ca'anj cane ruj no' nichrun' tacóo Jesucristó, ne ta'vee uxrá no', ne na'nu' no' na rihaan no' tacóo Jesucristó a. Gaa ne maan yuvé raq no'

na've no' tacóo Jesucristó a. Cachrón tu'vã no' tacóo Jesucristó, gaa ne caxrj no' casté gun' daj tacóo so' uún a.

<sup>39</sup> Dan me se gaa quene'en síi tucua se vaa qui'yaj chana man Jesucristó, gaa ne guun rá so' nana nihánj ni'yaj so' man Jesucristó a: “Sese ya sij nata' se-nana Diose me síi nihánj, ne aj ne'en so' daj chana me chana nihánj, se vaa chana atã cacun' me no', ne ne ca'vej rá so' qui'yaj no' danj ga so' tzaj man adonj”, guun rá síi tucua yo' a.

<sup>40</sup> Gaa ne cataj Jesucristó rihaan so' a:

—Vaa nana me raj cataj 'unj rihaan so', Simón —taj Jesucristó rihaan so' a.

—Ca'mii so', maestro —taj síi tucua yo' a.

<sup>41</sup> Gaa ne nanó Jesucristó se-cuento vij síi 'yaj xcúun a:

—Vij síi 'yaj xcúun sa'anj rihaan 'o ru'vee me roj so' a. 'O so' ro', 'yaj xcúun 'un' cientó sa'anj denario, ne yo'ó so' ro', 'yaj xcúun vij chihaa chi' sa'anj denario a.

<sup>42</sup> Tzaj ne taj sa'anj rihaan roj so' naru'vee roj so' rihaan ru'vee, gaa ne che'é dan cunuu 'ee rá ru'vee man roj so', ne quinavij uun xcúun xráá roj so', qui'yaj ru'vee a. Me tuvi' roj so' caran' doj rá ni'yaj man ru'vee, rá so' ga —taj Jesucristó, xná'anj so' man síi cu'naj Simón yo' a.

<sup>43</sup> —Caran' doj rá síi navij nocgo doj xcúun xráá ni'yaj so' man ru'vee, che'é rej nocgo doj se luj qui'yaj ru'vee che'é so', raj a —taj síi cu'naj Simón yo' a.

—Veé danj vaa ya —taj Jesucristó rihaan so' a.

<sup>44</sup> Gaa ne canicaj Jesucristó ni'yaj Jesucristó man chana, gaa ne cataj so' rihaan síi cu'naj Simón yo' a:

—Xcaj so' cuentá se vaa qui'yaj chana nihánj ei. Ca'ná' 'unj tucua so', tzaj ne taj na rque so' na'nuj tacój ma'. Tzaj ne chana nihánj me níi na'nu' na rihaan no' tacój, ne maan yuvé raã no' na've no' tacój nanj á.

<sup>45</sup> Ca'naj tucua so', tzaj ne ne cachron tu'vá so' ra'aj ma'. Tzaj ne chana nihánj ro', nu' catúj 'unj rá ve', ne nu' cachrón tu'vã no' tacój, ne veé 'o achrón tu'vã no' tacój nanj á.

<sup>46</sup> Taj vaj casté caxrj so' raj ma'. Tzaj ne chana nihánj me níi caxrj casté gun' daj tacój adonj.

<sup>47</sup> Cuno so' ca'mij á. Ase vaa síi navij uun xcúun 'un' cientó sa'anj denario xráá ro', danj vaa no' a. 'O se ndã' se níi tumé uxrã cacun' me no', tzaj ne che'é se caráya'anj ndo'o no' ni'yaj no' manj ro', che'é dan ne'en ní' se vaa x'néj nu' cacun' xráá no' nanj adonj. Ne xa' síi x'néj doj cacun' xráá, tzaj ne doj aráya'anj so' ni'yaj so' manj nanj adonj —taj Jesucristó rihaan síi cu'naj Simón yo' a.

<sup>48</sup> Gaa ne cataj Jesucristó rihaan chana yo' a:

—Navij cacun' tumé so' ei —taj Jesucristó rihaan no' a.

<sup>49</sup> Gaa ne guun che'e nij síi chá chraa tucua Simón ca'mii nij so' ga tuvi' nij so', cataj nij so' a:

—Daj sij me síi nihánj, ne síj rá so' cataj so' se vaa navij cacun' xráá yuvij, rá soj ga —taj nij so', xná'anj nij so' man tuvi' nij so' a.

<sup>50</sup> Tzaj ne canicaj uún Jesucristó, cataj so' rihaan chana a:

—Quinanj so' rihaan sayuun, che'é se amán rá so' ni'yaj so' manj adonj. Ve'é ca'anj so', ne dínj gaa nimán so' á —taj Jesucristó rihaan chana yo' a.

## 8

*Nana nihánj taj xna'anj che'é nij chana racuj man Jesucristó a*

<sup>1</sup> Dan me se cachén doj güii, gaa ne ca'anj Jesucristó que'ee chuman', ca'mii natáj so' rihaan yuvií che'é güii guun chij Diose rihaan chumií nihánj, ne ca'anj chuvij nij síi tucu'yón se-nana so' ga so' a.

<sup>2</sup> Ne ca'anj chana nahuun sa' qui'yaj Jesucristó ga nij so' a. Dan me se ta'aj no' me níi nahuun qui'yaj Jesucristó, ne yo'ó ta'aj no' me níi curihañj nana chree nimán qui'yaj Jesucristó a. Chana cu'naj Mariá Magdalena me 'o no', ne no' me níi curihañj chij nana chree nimán qui'yaj Jesucristó a.

<sup>3</sup> Ne yo'ó no' ro', me níi cu'naj Juana, ne nicā no' ro', me síi cu'naj Chuza síi nicun' rihaan síi nicaj suun rey cu'naj Herodes a. Ne yo'ó chana ca'anj ga Jesucristó ro', me níi cu'naj Susana a. Ne vaa que'ee doj nij chana ca'anj ga nij so' a. Nu' nij chana nihánj ro', me níi racuáj man nij tuvi' Jesucristó se vaa rquē nij no' si'yaj nij no' rasuun cachiin man nij tuvi' Jesucristó a.

*Nihánj me cuentó nanó Jesucristó che'é 'núu trigó tix'nuu yo'o so' a*

<sup>4</sup> Dan me se cavii que'ee ndo'o nij yuvií daj a chuman', ca'anj ni'yaj nij so' man Jesucristó, ne dan me se quisíj cunuu chre' nij yuvií, gaa ne guun che'e Jesucristó nanó so' se-cuento 'núu trigó rihaan nij so' a.

<sup>5</sup> Cataj Jesucristó nana nihánj a:

—Dan me se curihañj 'o síi me rá cuchruj naā 'núu trigó, ne tix'nuu so' 'núu trigó rihaan yo'óo, ne cayuu doj 'núu trigó yo' rá chrej chéé yuvií, ne curu'maan che'é yuvií man yo', ne ca'na' xtâj, chá xtâj man 'núu trigó naj rá chrej yo', ne dan me se navij nu' 'núu trigó yo', qui'yaj nij xtâj nanj adonj.

<sup>6</sup> Ne yo'ó ta'aj 'núu trigó yo' ro', cayuu rihaan yuvej rej taj catun' yo'óo a. Xra' 'núu, tzaj ne cuchrii naā le'ej che'é se taj nocoo 'yoo táa xráa yuvej yo' nanj adonj.

<sup>7</sup> Ne yo'ó ta'aj 'núu trigó yo' ro', cayuu sca'núj coj tanj, ne dan me se yoo doj cachij coj tanj yo' rihaan naā le'ej, ne quinavij nu' naā le'ej, qui'yaj coj tanj nanj adonj.

<sup>8</sup> Ne yo'ó ta'aj 'núu trigó yo' ro', cayuu rihaan yo'óo sa', ne naā yo' ro', cachij sa', ne cientó ya 'núu cavii, qui'yaj 'o 'o 'núu le'ej nii quiniñ rihaan yo'óo sa' yo' nanj adonj. —Danj cataj Jesucristó rihaan nij so' a.

Gaa ne guun che'e so' ca'mii nucuaj so', cataj so':

—Sese taj yu'uj xrée soj, ne cunō soj nana nihánj ei —taj Jesucristó rihaan nij so' a.

*Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvií a*

<sup>9</sup> Gaa ne xná'anj nij síi tucu'yón se-nana Jesucristó man so' me che'é nanó so' cuentó che'é 'núu trigó yo' a.

<sup>10</sup> Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose gaa guun chij Diose rihaan chumií nihánj adonj. Tzaj ne rihaan yo'óo nij yuvií me se inanj cuentó che'é nij rasuun nanó 'unñ rihaan nij so', gaa ne ni'yaj nij so' do', nana xrej nij so' do', tzaj ne se quene'en nij so' do', se xcaj nij so' cuentá do', a man adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj me taj se-cuento 'núu trigó yo' a*

<sup>11</sup> Canicaj Jesucristó, cataj so':

—Nihánj me cataj xna'anj 'unñ che'é se-cuento 'núu trigó, ne ase vaa 'núu trigó yo' ro', danj vaa se-nana Diose adonj.

12 Ne ase vaa 'núú cayuu rá chrej ro', danj vaa ta'aj nij síi uno se-nana Diose, ne dan me se uno nij so' doj tzin', tzaj ne 'na' síi chree, ne a'néj síi chree se-nana Diose nimán nij so' che'é se na'vej rá síi chree cuchuman rá nij so' ne quinaniij nij so' rihaan sayuun qui'yaj Diose adonj.

13 Ne ase vaa ta'aj 'núú trigó cayuu rihaan yuvej ro', danj vaa yo'ó ta'aj nij síi uno se-nana Diose, ne uun niha' rá nij so', ne doj orá ni gaá chumán xa' rá nij so', tzaj ne nu' 'na' sayuun rihaan nij so', ne nu' tanáj nij so' se-nana Diose, ne ne noco' raan nij so' se-nana Diose ma'.

14 Ne ase vaa ta'aj 'núú cayuu sca'núj tanj ro', danj vaa yo'ó ta'aj nij síi uno se-nana Diose uún, ne dan me se achén güii, gaá ne anicaj nij so' niganj nanó rá nij so' che'é rasuun achiin man nij so' do', che'é sa'anj do', che'é se niha' ndo'o vaa rasuun man rihaan chumiij nihánj rá nij so' do', ne che'é dan me tanáj xcó nij so' se-nana Diose, ne ne 'yaj nij so' se sa' a ma'.

15 Ne yo'ó ta'aj nij síi uno se-nana Diose me se ase vaa 'núú cayuu rihaan yo'óo sa' ne sa' uxrá cachij yo' ro', danj vaa síi sa' uno se-nana Diose, ne sa' uxrá vaa nij so', ne ve'é nanó xrej nij so' se-nana Diose, ne noco' raan nij so' se-nana Diose, ne inanj se sa' 'yaj nij so', ne ne a'ne' rá nij so' ga se-nana Diose ma' —taj Jesucristó rihaan nij síi tucu'yón se-nana so' a.

*Nihánj me cuentó nanó Jesucristó che'é aga' ya'an a*

16 Dan me se guun che'e Jesucristó cataj so':

—Nuvi' a 'ó síi achrón ya'an raá aga' ya'an, ne axrj yuve so' aga' rque xruj do', rque yuvéé do' ma'. Tanánj toco' nii aga' ya'an rej xtá', gaá ne chuguun yo' rihaan cunudanj nij síi atúj rá ve' adonj.

17 Dan me se a 'ó rasuun caxrj yuve yuviij se qui'nij yuve ma'. Ya nurihanj yo', vaa güii, ne cunudanj yuviij quene'en, vaa güii adonj.

18 Che'é dan nuchruj raá soj nana ca'mij nihánj ei. 'Q se síi nari' nana ro', doj a nari' so', qui'yaj Diose, ne síi na'vej rá nari' sa' nana ro', tananj doj a ca'nee Diose nana nari' so' man so', ne quinaj uun so' nanj adonj —taj Jesucristó rihaan nij so' a.

*Nana nihánj taj xna'anj se vaa ase vaa nii Jesucristó do', ase vaa tinúú Jesucristó do', vaa nij síi uno se-nana Diose a*

19 Dan me se cuchi' nii Jesucristó cuchi' nij tinúú Jesucristó cuchi' ndaa rej vaj Jesucristó, tzaj ne ne ca'vee quinichrun' nij so' rihaan Jesucristó, che'é se man ndo'o yuviij a.

20 Ne cataj 'o so' rihaan Jesucristó a:

—Nicun' níi so' nicun' tinúú so' nicun' xe', ne me rá nij so' quene'en nij so' mán so', Jesús —taj so', cataj xna'anj so' rihaan Jesucristó a.

21 Tzaj ne cataj Jesucristó rihaan nij yuviij a:

—Ase vaa níi 'unj do', ase vaa tinúú 'unj do', vaa nij síi nihánj adonj. 'Q se nanó xrej nij so' se-nana Diose, ne 'yaj nij so' ndaa vaa taj nana yo' adonj —taj Jesucristó rihaan nij yuviij a.

*Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a*

22 Dan me se 'o güii catúj Jesucristó rque 'o rihoo ga cunudanj nij síi tucu'yón se-nana so', ne cataj Jesucristó rihaan nij so' se vaa ca'anj cunudanj nij so' ndaa yo'ó níchrej tu'va na lacuaná a. Gaá ne guun che'e rihoo chéé rihoo rihaan na, qui'yaj nij so' a.

<sup>23</sup> Doj ca'anj rihoo, ne cotoj Jesucristó a. Cachén 'o orá nii, gaa ne guun che'e nana yuvaa cavii uxrá yo' go' ndo'o yo' rihaan na, ne dan me se catúj ndo'o na rque rihoo, ne daj doj ca'anj nij rihoo rque na a.

<sup>24</sup> Gaa ne guun che'e nij síi tucuyón se-nana Jesucristó narii nij so' nej rihaan so', ne:

—Daj doj cavi' ní', nanj maestro —taj nij so' rihaan Jesucristó a.

Gaa ne canicun' caya so', ne caxrj yuvaa so' man nana do', man na do' a. Gaa ne canicun' nana canicun' na do', ne canicun' dínj rihaan na lacuaná yo', qui'yaj Jesucristó nanj adonj.

<sup>25</sup> Gaa ne xná'anj Jesucristó man nij síi tucuyón se-nana so', cataj so':

—Me che'é ne amán rá soj ni'yaj soj man Diose ga —taj so' rihaan nij so' a.

Tzaj ne ca'anj rá nij so', ne cuhu'vi' nij so', ne cataj nij so' rihaan tuvi' nij so':

—Daj sij me síi nihánj ga. Ndaa rihaan nana do', ndaa rihaan na do', a'ne' so' suun, ne uno roj yo' a'mii so' ason —taj nij so' rihaan tuvi' nij so' a.

*Nana nihánj taj xna'anj se vaa quirii Jesucristó man nij nana chree nimán 'o snó'o a*

<sup>26</sup> Dan me se guun gan' rihoo nuu Jesucristó ga estadó Galilea, ne cachén yo' ca'anj yo' ndaa níchrej tu'va na lacuaná yo', ndaa rej ne nij síi man chuman' Gadara a.

<sup>27</sup> Cuchi' nij so' yo'óo yo', ne nanij Jesucristó rihoo, gaa ne nari' tuvi' so' ga 'o síi chihanj chuman' yo', ne so' me síi nuu nana chree nimán, ne taj yatzi' nuu so' do', na'vej rá so' cayáan so' ve' tucua' so' do', inanj rihaan santó ne so' do' a.

<sup>28-29</sup> Dan me se ca'ne' Jesucristó suun rihaan nana chree se vaa curihanj nana chree nimán so' a. 'O se quisij que'ee canó nana chree man so' a. Dan me se ndaa aga' ne' numij nii ra'a so' do', tacóo so' do', tzaj ne xuun so', ne x'ne' yo', qui'yaj so', gaa ne nicaj nana chree man so' ca'anj nij so' quij nanj adonj. Dan me se gaa quene'en so' man Jesucristó, ne caguáj so', ne canicun' ruj so' rihaan Jesucristó, ne nucuaj ca'mii so', cataj so':

—Veé ne'én 'unj se vaa ta'nij Diose síi sa' ndo'o mé so', Jesús. Me che'é 'ná' so' rej né 'unj ga. Cataj xna'anj sa' 'unj rihaan so' se vaa se qui'yáa so' sayuun manj ma' —taj so' rihaan Jesucristó a.

<sup>30</sup> Gaa ne xná'anj Jesucristó man nana chree yo', cataj so':

—Daj cu'naj so' ga —taj Jesucristó, xná'anj so' man nana chree a.

Ne dan me se cataj nana chree yo':

—X'ne' nocoo me núj á —taj nij so' che'é rej aj catúj que'ee ndo'o nij so' nimán snó'o yo' a.

<sup>31</sup> Gaa ne cachín ni'yaj nij nana chree rihaan Jesucristó se gaa nanj ca'nej so' man nij so' rej cunuu rej nuu ya'an, ne:

—Achín ni'yaj ndo'o núj rihaan so' se ca'née so' man núj rej nuu ya'an, man Jesús —taj nij so' rihaan Jesucristó a.

<sup>32</sup> Ne dan me se chée 'o x'ne' nocoo xcáa rej tacaan rej yo', chá nij xo' coj, ne dan me se cachín ni'yaj nij nana chree rihaan Jesucristó se vaa ca'vej rá Jesucristó catuu nij so' nimán xcáa, ne cayáan nij so' nimán xcáa a. Ne ca'vej rá Jesucristó catuu nij so' nimán xcáa a.

<sup>33</sup> Che'é dan me curihanj nij nana chree nimán snó'o, ne catúj nij so' nimán xcáa, ne dan me se ruvaa uxrá tacaan nicun' tu'va na lacuaná rej vaj nij xcáa yo', ne gaa catúj nij nana chree nimán xcáa yo', gaa ne cunanj ndo'o nij xo'

ca'anj nij xo', ne veé danj vaj nij xo', ne quiniy nij xo' rque na, ne canó xráa nij xo' nanj adonj.

<sup>34</sup> Dan me se quene'en nij sí tumé xcáa se vaa guun, gaa ne cunánj nij so' ca'anj cataj xna'anj nij so' rihaan nij yuviy man chuman' do', rihaan nij yuviy man tacaan do' a.

<sup>35</sup> Gaa ne dan me se ca'na' ni'yaj nij yuviy se vaa guun, gaa ne ca'na' nij so' rej nicun' Jesucristó, gaa ne quene'en nij so' man sí curihanj nana chree nimán a. Aj nanuú so' sagan' so', ne dínj ne so' rihaan Jesucristó a. Ne aj ti'inj se snúú so', ne nuu sa' so' a. Gaa ne cuchu'vi' ndo'o nij yuviy se vaa qui'yaj Jesucristó a.

<sup>36</sup> Gaa ne cataj xna'anj nij sí quene'en rihaan nij yuviy daj qui'yaj Jesucristó ne nahuun sa' sí nuu nana chree nimán a.

<sup>37</sup> Che'é dan cuchu'vi' ndo'o nij sí man chuman' Gadara, ne che'é dan cachín ni'yaj taran' nij so' rihaan Jesucristó se vaa ca'anj yanij Jesucristó rihaan nij so' a. Gaa ne dan me se catúj Jesucristó rque rihoo, ne canicaj so' ca'anj so' a.

<sup>38</sup> Gaa ne dan me se cachín ni'yaj sí nahuun sa' rihaan Jesucristó se vaa ca'vej rá Jesucristó ca'anj so' ga Jesucristó, tzaj ne ne ca'vej rá Jesucristó ma'.

<sup>39</sup> —Canicaj so' nán' so' tucua' so', ne cataj xna'anj so' rihaan tuví' so' che'é se sa' ndo'o qui'yaj Diose che'é so' á —taj Jesucristó rihaan so' a.

Gaa ne canicaj sí nahuun sa' yo' quinan' so', ne ca'mii natáj so' rihaan taran' nij yuviy yanj chuman' yo' che'é se sa' qui'yaj Jesucristó rihaan so' a.

*Nana nihánj taj xna'anj che'é chala cunii do', che'é chana chij do', nahuun sa', qui'yaj Jesucristó a*

<sup>40</sup> Nanicaj Jesucristó, namán uún so' tu'va na lacuaná a. Gaa ne man ndo'o yuviy na'vij man so', ne guun niha' rá nij yuviy se vaa namán uún so' a.

<sup>41</sup> Gaa ne dan me se ca'na' 'o so' rihaan Jesucristó, ne Jairo cu'naj so', ne so' me sí 'nij ra'a 'o ve' tucu'yón nij yuviy israelitá se-tucuanj Moisés, ne dan me se canicun' ruj so' rihaan Jesucristó, ne cachín ni'yaj so' rihaan Jesucristó se vaa ca'anj Jesucristó tucua' so' a.

<sup>42</sup> Ne orún' raa ta'nij chana so' chala cunii vaj chuvij yo', tzaj ne ran' ndo'o yo', ne daj doj cavi' yo', ne che'é dan guun rá so' ca'anj Jesucristó tucua' so' a.

Veé dan me ca'anj Jesucristó ga so', ne ca'anj ndo'o yuviy ga so', ne ndaa raan ma'an chrej vaj yuviy ga so' a.

<sup>43</sup> Dan me se sca'núj nij so' vaj 'o chana ran' ndo'o, ne quisij chuvij ya yo' xra' ton man no', ne cutun' no' cunudanj sa'anj vaa rihaan no', tzaj ne taj vaj a 'ó sí guun nucuaj qui'yaj nahuun sa' no' ma'.

<sup>44</sup> Dan me se quinchrun' no' rej xco Jesucristó, ne canó ra'a no' doj tu'va sagan' so' a. Dan me se nu' canó ra'a no' tu'va sagan' so', ne nu' canicun' se xra' ton man no' nanj adonj.

<sup>45</sup> Gaa ne xna'anj Jesucristó se vaa me sí canó ra'a sagan' so', tzaj ne a 'ó nij yuviy ne canó ra'a sagan' so' ma', taj nu' nij yuviy a. Gaa ne cataj Pedró rihaan Jesucristó:

—Maan che'é se raan vaj nij yuviy, ne canó rma'an ra'a 'o so' sagan' so', maestro —taj Pedró rihaan Jesucristó a.

<sup>46</sup> Tzaj ne cataj Jesucristó rihaan so' a:

—Vaa 'o yuviy canó ra'a sagan' 'unj adonj. Ne'enj se vaa nahuun yuviy qui'yaj adonj —taj Jesucristó rihaan so' a.



47 Gaa ne xcaj chana cuentá se vaa quene'en Jesucristó se vaa qui'yaj no', gaa ne ri'íj man no', ne ca'na' no', ne canicun' ruj no' rihaan so', gaa ne cataj xna'anj no' rihaan nu' nij yuvij se vaa maan se canó ra'a no' sagan' Jesucristó, ne nu' maan orá dan nahuun sa' no' ne canicun' se xra' ton man no', taj no' rihaan cunudanj nij yuvij a.

48 Gaa ne cataj Jesucristó rihaan no', ne:

—Nahuún so' che'é se amán rá so' ni'yaj so' manj, nocoj. Ve'é ca'anj so', ne díj gaa nimán so' ca'anj so' á —taj Jesucristó rihaan no' a.

49 Ataa navij ca'mii Jesucristó, ne ca'na' 'o síi caviu tucúá Jairo, ne cataj so' rihaan Jairo a:

—Aj cavi' ta'nii so', ne taj che'é caraá chrúu so' rihaan maestró a ma' —taj síi 'na' cataj xna'anj rihaan Jairo a.

50 Dan me se cuno Jesucristó nana ca'mii síi ca'na', gaa ne cataj so' rihaan síi cu'naj Jairo a:

—Se cuchu'ví' so' ma'. Maan se cuchuman ya rá so' ni'yaj so' manj, ne quinahuun ta'nii so' nanj adonj —taj Jesucristó rihaan so' a.

51 Dan me se cuchi' Jesucristó tucúá Jairo, ne ne ca'vej Jesucristó catuu nij yuvij rá ve' ga so', ne maan Pedró do', Juan do', Jacobo do', roj nica Jairo do', ca'vej so' catuu rá ve' ga so' a.

52 Dan me se ta'vee ndo'o nij síi cunuu chre' rá ve' che'é chala cunii cavi', ne nanó uxrá rá nij so', ne go' nij so' cuxru' rucuaa nij so' a. Tzaj ne cataj Jesucristó rihaan nij so':

—Se ta'vee soj ma'. 'Q se ne cavi' no' ma'. Maan se otoj uun no' nanj á —taj Jesucristó rihaan nij so' a.

53 Gaa ne ca'nga' nacoó nij so' ni'yaj nij so' man Jesucristó che'é se aj quene'en nij so' se vaa aj cavi' ya no' a.

54 Tzaj ne catúj Jesucristó rá cuartó naj no', ne quita'aa so' ra'a no', ne nacúun so' man no', cataj so':

—Naxagaa so', chala cunii —taj so' rihaan no' a.

55 Ne cunuu i'na' uún no', gaa ne nu' naxagaa no', ne nu' ca'ne' Jesucristó suun rihaan roj nica Jairo se vaa go' roj so' doj se chá cha chala cunii, taj Jesucristó rihaan roj nica Jairo a.

56 Dan me se ca'anj rá roj so' se vaa qui'yaj Jesucristó, gaa ne cataj Jesucristó rihaan roj so' a:

—A 'ó yuvij se cataj xna'anj roj soj rihaan daj qui'yaj che'é chala cunii ma' —taj Jesucristó rihaan roj nica roj so' a.

## 9

*Nana nihánj taj xna'anj se vaa ca'née Jesucristó man chuvij nij síi tucuyón se-nana so' ca'anj ca'mii natáj nij so' a*

<sup>1</sup> Dan me se canacúun Jesucristó man chuvij nij síi tucuyón se-nana so', ne cunuu chre' nij so', ne go' so' se nucuaj man nij so', gaa ne ca'vee qui'yaj canaán nij so' rihaan me ma'an nana chree do', ca'vee ca'nee nij so' chi'ii xráá síi ran' do' a.

<sup>2</sup> Gaa ne ca'née so' man nij so' ca'anj ca'mii natáj nij so' che'é güii guun chij Diosé rihaan chumiñ nihánj, ne ca'nee nij so' chi'ii xráá nij síi ran' do' a.

<sup>3</sup> Ne cataj so' rihaan nij so' a:

—A 'ó rasuun se nicaj soj ca'anj soj ma'. Chruun garroté do', nanj do', se chá do', sa'anj do', se nicaj soj ma'. Orún' niqee yatzij nuu soj ca'anj ga soj á.

<sup>4</sup> Ne me ma'an ve' cuhi' soj ne ca'vej 'o so' cane soj ro', ne ve'e ve' yo' yo' cane soj ne ve'e ve' yo' cavi' soj ca'anj soj ca'mii natáj soj se-nana Diose á.

<sup>5</sup> Ne me ma'an 'o chuman' se ca'vej rá nij síi chihanj cuno nij so' se-nana soj, tanáj soj chuman' yo', ne cavi' soj tu'va chuman' yo', ne nacunan' soj tacóo soj cayuu yo'óo tachruu man chuman' yo' tacóo soj á. Ndaa dan, gaa ne xcax soj síi chihanj yo' cuentá se vaa tumé nij so' cacun' se vaa ne ca'vej rá nij so' cuno nij so' se-nana soj man adonj —taj Jesucristó rihaan chuvij nij so' a.

<sup>6</sup> Gaa ne dan me se ca'anj nij so' nij chuman', ne ca'mii natáj nij so' se-nana Diose nana sa', ne me rej ma'an vaj nij so' ca'néj nij so' chi'ii xráá nij síi ran' a.

*Nana nihánj taj xna'anj se vaa xcax síi nicaj suun cu'naj Herodes cuentá che'é Jesucristó a*

<sup>7</sup> Dan me se cuno síi nicaj suun cu'naj Herodes nu' se vaa qui'yaj Jesucristó, gaa ne guun rá Herodes quene'en so' me síi me Jesucristó a. 'O se ta'aj yuvii cataj se vaa cunuu i'na' uún Juan síi cuta' ne man yuvii,

<sup>8</sup> ne yo'ó ta'aj yuvii cataj se vaa curuvi' uún síi cu'naj Elías síi cayáan gaa naá, ne yo'ó ta'aj uún yuvii cataj se vaa cunuu i'na' uún 'o síi nata' se-nana Diose gaa naá a.

<sup>9</sup> Tzaj ne ma'an síi cu'naj Herodes cataj, ne:

—Aj cavi' Juan, ne x'ne' chihá Juan, qui'yáj a. Tzaj ne ne ne'enj me yuvii me síi nihánj, ne tu'va nii danj che'é so' rihanj ma' —taj Herodes a.

Gaa ne guun uxrá rá Herodes quene'en so' man Jesucristó a.

*Nana nihánj taj xna'anj se vaa ca'vee quirii Jesucristó se chá 'un' mjí snó'o a*

<sup>10</sup> Dan me se namán chuvij nij síi tucu'yón se-nana Jesucristó rihaan Jesucristó, ne nata' nij so' rihaan Jesucristó che'é nu' nij suun sa' nocoo qui'yaj suun nij so' rej ca'anj nij so' a. Gaa ne nicaj Jesucristó man taran' nij so', ca'anj nij so' ndaa tu'va chuman' cu'naj Betsaída rej yanj a.

<sup>11</sup> Tzaj ne quene'en 'o x'ne' nocoo yuvii rej ca'anj Jesucristó, gaa ne canoco' nij so' man Jesucristó, ca'anj nij so' a. Gaa ne ve'e ca'mii Jesucristó ga x'ne' nocoo yuvii canoco' man so', ne ca'mii natáj so' che'é güii guun chij Diose rihaan chumii nihánj, ne quinahuun nij síi ran', qui'yaj so' do' a.

<sup>12</sup> Dan me se nichrun' cata' güii, ne dan me se quinichrun' chuvij nij síi tucu'yón se-nana Jesucristó rihaan so', ne cataj nij so':

—Qui'yáa so' se ndo'o, ne na'nej so' chrej man nij yuvii, ca'anj nij so' rej chuman' nocoo chuman' rá'a do', gaa ne man ve' caran' nij so' do', man se chá quirii' nij so' chá nij so' do' a. Tzaj ne rej man ní' nihánj me se rco' quij me nihánj, ne taj rej caran' nij so', taj se chá chá nij so' do', nihánj ma' —taj nij so' rihaan Jesucristó a.

<sup>13</sup> Tzaj ne cataj Jesucristó rihaan nij so' a:

—Go' ma'an soj se chá chá nij yuvii ei —taj Jesucristó rihaan nij so' a.

—Tzaj ne taj se chá rihaan núj ma'. Maan se orún' 'un' rachruún ne vij guee xcuaaj ne, vaa rihaan núj nanj á. Tzaj ne ca'vee ca'anj núj, ne quiraaan núj se chá chá cunudanj nij yuvii nihánj nanj á —taj nij so' rihaan Jesucristó a.

<sup>14</sup> Dan me se 'un' mjí snó'o mán rej yo' ta' asuun, ne ino me chana ga xnií adonj. Tzaj ne cataj Jesucristó rihaan nij síi tucu'yón se-nana so' a:

—Cayáan nij yuvii rihaan yo'óo, qui'yaj soj, ne dan me se cunuu chre' 'o vij chihaa chi' vij chihaa chi' yuvii cane 'o 'o rej, qui'yaj soj á —taj Jesucristó rihaan nij so' a.

15 Ne veé danj qui'yaj nij so', ne ca'anj canē cunudanj nij yuvij a.

16 Gaa ne dan me se quita'aa Jesucristó 'un' nij rachruún ga roj xcuaj yo', gaa ne ni'yaj so' rej xta', ne nago' so' graciá rihaan Diose che'é se chá yo', gaa ne cuxra' ta'aj so' rachruún do', nee xcuaj do', ne caxrij so' ston nij sí tucu'yón se-nana so', che'é rej caxrij nij so' ston nij yuvij a.

17 Gaa ne chá taran' nij yuvij, ne caraa rque nij so' ne ndaa quináj ndo'o se chá a. Gaa ne naqui'yaj chre' nij so' nu' se quináj tu'va yuvij, ne caraa nij so' yo'ó cunu' chuvij scaa a.

*Nana nihánj taj xna'anj se vaa cataj xna'anj Pedró me sí me Jesucristó a*

18 Dan me se 'o güii ca'anj Jesucristó 'o rej yanij cachín ni'yaj so' rihaan Diose, ne nij sí tucu'yón se-nana so' ro', mán rej yo' ga so', ne xná'anj so' man nij so', cataj so', ne:

—Me sij mé 'unj, taj nij yuvij ga —taj Jesucristó, xná'anj so' man nij so' a.

19 —Vaa sí taj se vaa sí cu'naj Juan sí cuta' ne man yuvij mé so' ei. Ne vaa sí taj uún se vaa sí cu'naj Elías sí nata' se-nana Diose gaa naá me uún so' chuguanj. Ne vaa sí taj uún se vaa yo'ó sí nata' se-nana Diose gaa naá me uún so' xa'. Danj taj 'o 'o ta'aj nij yuvij nanj á —taj nij so' a.

20 Gaa ne cataj Jesucristó rihaan nij so':

—Ne ma'an soj, gaa ne me sij mé 'unj, rá soj uún ga —taj Jesucristó, xná'anj so' man nij sí tucu'yón se-nana so' a.

Gaa ne cataj Pedró:

—Sí ca'née Diose tinanii man yuvij rihaan sayuun mé so' ei —taj so' rihaan Jesucristó a.

21 Gaa ne cataj xna'anj Jesucristó rihaan nij so' a:

—Se cataj nij soj nana vaa danj rihaan a 'o nij yuvij ma' —taj Jesucristó rihaan nij so' a.

*Nana nihánj taj xna'anj se vaa cataj xna'anj Jesucristó se vaa cavi' so' ne cunu' i'na' uún so' a*

22 Gaa ne cataj uún Jesucristó rihaan nij sí tucu'yón se-nana so' a:

—Xa' 'unj sij ca'née Diose nıcaj yu'unj man yuvij, tzaj ne no xcúun 'unj quiran' ndo'o 'unj sayuun qui'yaj nij sí uun chíj do', qui'yaj nij xrej ata suun nocoo doj do', qui'yaj nij sí naqui'yaj cuu se-tucuanj Moisés rihaan yuvij do', ne nachri' ndo'o nij so' ni'yaj nij so' mán 'unj, ne ticavi' nii mán 'unj, ne cachē va'nuj güii, gaa ne cunu' i'na' uún 'unj adonj —taj Jesucristó rihaan nij so' a.

23 Gaa ne dan me se cataj so' rihaan cunudanj nij yuvij a:

—Sese me rá yo'ó so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quiran' uxrá so' sayuun do', ca'vee se ndaa cachron nii man so' rihaan rcutze do', tzaj ne daj a 'o 'o güii me se yo'ó qui'yaj suun so' che'ej, ne yo'ó canoco' raan so' manj adonj.

24 Tzaj ne sese vaa 'o sí me rá tinanii man ma'an rihaan sayuun, ne vaa güii yo'ó cavi' nimán so' adonj. Tzaj ne sese cavi' yo'ó so' che'é se me so' sí nocoo' manj, ne vaa güii cunu' i'na' uún so' adonj.

25 Ne a me se quiri' 'o so' sese qui'yaj canaán so' nu' rasuun man rihaan chumij nihánj, ne ca'anj ni'ya nimán ma'an so', rá soj ga. Daj chıhaa mį se ca'vee cavi' sa' so', qui'yaj rasuun man rihaan chumij nihánj a ma'.

26 Dan me se xa' sí uun na'aj ni'yaj manj ne uun na'aj ni'yaj se-nana, tzaj ne vaa güii guun na'aj 'unj sij ca'née Diose nıcaj yu'unj man yuvij ni'yaj 'unj man so' asa' ca'na' uún 'unj rihaan chumij nihánj adonj. Ne güii yo' me se

ve'é ndo'o guun chij 'unj, qui'yaj Réj Diose, ne cavij sa' 'unj, qui'yaj se-mozó Diose nij sí guee adonj.

<sup>27</sup> Nihánj me se cataj yá 'unj rihaan soj se vaa xa' ta'aj soj sij nicun' nihánj cuano me se gaa ataa a cavij' ta'aj soj, ne ya quene'en ta'aj soj asa' guun che'e Diose guun chij Diose rihaan chumij nihánj nanj adonj —taj Jesucristó rihaan cunudanj nij so' a.

*Nana nihánj taj xna'anj se vaa chuguun ndo'o man Jesucristó ni'yaj nij sí tucu'yón se-nana so' a*

<sup>28</sup> Quisij ca'mii Jesucristó nana vaa danj, gaa ne cachén 'o tunj güii ta' asuun, gaa ne nicaj Jesucristó man Pedró ga Juan ga Jacobo, ne cavij so' raa 'o quij xcaan, ca'anj cachinj ni'yaj so' rihaan Diose a.

<sup>29</sup> Gaa cachín ni'yaj so' rihaan Diose, ne yo'o cunuu ino rihaan so', ne yuun che'e cunuu catzij sagan' so', ne ndaa raan lá ma'an sagan' so' a.

<sup>30</sup> Gaa ne dan me se naqui'yaa vj snó'o rihaan nij so', ne nanó roj so' cuentó ga Jesucristó, ne Moisés do', Elías sí nata' se-nana Diose gaa naá do', me roj so' a.

<sup>31</sup> Dan me se ve'é ndo'o curuvi' roj so', ne ca'mii roj so' ga Jesucristó che'é se vaa quiran' Jesucristó chuman' Jerusalén, ne cavij so' chumij nihánj, ndaa vaa guun rá Diose qui'yaj so' a.

<sup>32</sup> Dan me se ca'na' ndo'o nej rihaan nij tuvij' Pedró, tzaj ne ne cotoj nij so' ma'. Quene'en nij so' ndaa vaa chuguun sagan' Jesucristó do', ndaa vaa chuguun sagan' roj sí nicun' ga so' do' a.

<sup>33</sup> Gaa ne dan me se guun che'e roj sí nicun' ga Jesucristó ca'anj yanij roj so' ga Jesucristó, gaa ne cataj Pedró rihaan Jesucristó:

—Cunaj uxrá vaa mán núj nihánj ga so', maestro. Ne qui'yaj núj va'núj ve' yacataj cané soj nanj á. 'O ve' cané so', ne yo'ó ve' cané sí cu'naj Moisés, ne yo'ó ve' cané sí cu'naj Elías ei —taj Pedró rihaan Jesucristó, tzaj ne ne quene'en uxrá so' daj me che'é ca'mii so' rihaan Jesucristó danj a ma'.

<sup>34</sup> Quisij ca'mii so' nana vaa danj, gaa ne ca'na' 'o ngaa rej xta', ne caráán ngaa xráá nij so' ne naxij nij so' rque ngaa, ne cuchu'vi' va'núj nij sí tucu'yón se-nana Jesucristó yo' a.

<sup>35</sup> Gaa ne Diose ro', ca'mii nana cuno nij so' rque ngaa yo' a. Ne cataj Diose: —Sí nihánj me ta'nij sí' ee raj adonj. Cunó soj rihaan so' ei —taj Diose cuno nij so' a.

<sup>36</sup> Quisij ca'mii Diose, gaa ne taj orún' Jesucristó nicun', quene'en nij so' a. Tzaj ne yo'ó caráán tu'va nij so' se vaa quene'en nij so', ne güii guun danj me se a 'ó yuvij ne cataj xna'anj nij so' rihaan a.

*Nana nihánj taj xna'anj se vaa nahuun sa' 'o xnii nuu nana chree nimán, qui'yaj Jesucristó a*

<sup>37</sup> Dan me se cachén 'o yan', ne quisij güii, gaa ne ca'anj Jesucristó ga nij sí tucu'yón se-nana so' rej rque a. Gaa ne nari' tuvi' nij so' ga 'o x'ne' nocoo yuvij a.

<sup>38</sup> Gaa ne dan me se nucuaj ndo'o ca'mii yo'ó sí 'na' sca'núj nij yuvij rihaan Jesucristó, ne cataj so':

—Achín ni'yaj rihaan so' se vaa cunu 'ee rá so' ni'yaj so' ta'nij che'é se orún' raa so' me ta'nij, maestro —taj so' rihaan Jesucristó, ne—

<sup>39</sup> Dan me se naruvi' nana chree nimán ta'nij, ne taj ni'yón snúú so', ne aguáj so', ne avii yatan' tu'va so', 'yaj nana chree yo', ne 'yaj chi'ij ndo'o nana

chree yo' man ta'níj, ne sayuun uxrá curihanj nana chree yo' nimán ta'níj adonj.

<sup>40</sup> Ne dan me se cachíin nì'yáj rihaan nij síi tucu'yón se-nana so' se vaa quiríi nij so' nana chree nimán ta'níj, tzaj ne ne ca'vee quiríi nij so' nana chree nimán ta'níj ma'. —Danj cataj snó'o yo' rihaan Jesucristó a.

<sup>41</sup> Gaa ne cataj Jesucristó a:

—Dan me se síi ne amán rá me soj sij man rihaan chumij nihánj cuano, ne chí'ii vaa nimán soj, ne a me daj cachej ga soj, ne a me daj gaa naj nimanj nì'yaj 'unj man soj, gaa ne ca'vee qui'yaj canaán soj ga. Nìcaj so' man xnii ca'na' so' rihanj cuaj á —taj Jesucristó a.

<sup>42</sup> Dan me se gaa 'na' xnii, ne nu' snúú xnii, ne naxru' xnii, qui'yaj nana chree yo', tzaj ne ca'ne' Jesucristó suun rihaan nana chree se vaa curihanj so' nimán xnii, ne dan me se curihanj nana chree yo' nimán xnii, ne nahuun sa' xnii, qui'yaj Jesucristó, ne nago' Jesucristó man xnii rihaan rej xnii a.

<sup>43</sup> Gaa ne quene'en nij yuvií se vaa nucuaj ndo'o Diose síi qui'yaj suun sa' nocoo yo', ne caráya'anj nu' nij so' a.

*Nana nihánj taj xna'anj se vaa cataj xna'anj uún Jesucristó se vaa vaa güii caví' so' a*

Dan me se caráya'anj cunudanj yuvií se vaa qui'yaj Jesucristó a. Gaa ne cataj Jesucristó rihaan nij síi tucu'yón se-nana so' a:

<sup>44</sup> —A 'lo xco' se quini'yón soj nana nihánj nana cataj xna'anj 'unj rihaan soj cuano ma'. Dan me se 'unj sij ca'née Diose nìcaj yu'unj man yuvií me se vaa güii nago' nii mán 'unj rihaan yuvií adonj —taj Jesucristó rihaan nij síi tucu'yón se-nana so' a.

<sup>45</sup> Tzaj ne ne cunoo nij so' nana ca'mii Jesucristó, ne ne ca'vej rá Diose xcax nij so' cuentá ma'. Ne cuchu'vi' nij so' xna'anj nij so' man Jesucristó che'é nana yo' a.

*Nana nihánj taj xna'anj me síi me síi guun chij doj a*

<sup>46</sup> Dan me se guun che'e nij síi tucu'yón se-nana Jesucristó ca'mii cunu' nij so' me nij so' guun chij doj a.

<sup>47</sup> Tzaj ne xcax Jesucristó cuentá daj vaa nimán nij so', ne che'é dan quita'aa so' ra'a 'o ne'ej, ne nìcaj so' cachrón so' x'núú so',

<sup>48</sup> gaa ne cataj Jesucristó rihaan nij so' a:

—Me ma'an 'o síi aráj cochroj ne a'mii sa' so' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj. Dan me se síi a'mii sa' ga 'unj me se nuveé orún' 'unj me a'mii sa' so' ga ma'. Maan Diose ya síi ca'née mán 'unj me aráj cochroj ya so' ne a'mii sa' ya so' ga vaa nanj adonj. 'O se síi nica' doj rihaan taran' soj ro', me síi sa' doj rihaan taran' soj a —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa cataj xna'anj Jesucristó se vaa me ma'an síi ne unu' ga so' me tuvi' so' a*

<sup>49</sup> Gaa ne cataj síi cu'naj Juan rihaan Jesucristó a:

—Quene'en núj man 'o síi ata' tu'va se-chuvií so', ne urihanj nana chree nimán yuvií, 'yaj so', nanj maestro. Tzaj ne caráan núj chrej ca'mii so' ne se qui'yaj so' danj, che'é se nuveé sij chéé ga ní' me so', taj núj, nanj maestro —taj Juan rihaan Jesucristó a.

<sup>50</sup> Tzaj ne cataj Jesucristó rihaan so' a:

—Ca'ne' sa' guęę rá soj qui'yaj ma'an so' đanj ei. 'O se xa' síe ne unu' ga soj, tzaj ne tuvi' soj me so' adonj —taj Jesucristó rihaan Juan do', rihaan yo'ó nij síe tucu'yón se-ñana so' do' a.

*Nana nihánj taj xna'anj se vaa cataj xna'anj Jesucristó rihaan síe cu'naj Jacobo do', rihaan síe cu'naj Juan do', se vaa nij ca'mii roj so' a*

<sup>51</sup> Dan me se gaa nichrun' güii quinan' Jesucristó xta', gaa ne yo'ó ca'neé nucuaj nimán so' ca'anj so' chuman' Jerusalén a.

<sup>52</sup> Dan me se ca'ne' so' suun rihaan doj síe chée ga so' quitaj yaan nij so' nano' nij so' ve' caran' nij tuvi' nij so', gaa ne ca'anj nij síe ca'anj suun, ne cuchi' nij so' 'o chuman' yanj nij síe samaritano a.

<sup>53</sup> Tzaj ne quira'aan nij síe samaritano ve' tucua' nij so' rihaan Jesucristó, che'é se guun rá so' ca'anj so' chuman' Jerusalén a.

<sup>54</sup> Dan me se gaa quene'en roj síe tucu'yón se-ñana Jesucristó roj síe cu'naj Jacobo ga Juan, se vaa quira'aan nij síe samaritano ve', gaa ne xna'anj roj so' man Jesucristó, cataj roj so':

—Me rá so' cachinj ni'yaj núj rihaan Diose, ne ca'nej Diose ya'an, ne cacaa nij síe samaritano na' —taj roj so', xna'anj roj so' man Jesucristó a.

<sup>55</sup> Tzaj ne ni'yaj Jesucristó man roj so', ne caxrij yuvaa Jesucristó man roj so', ne cataj Jesucristó a:

—Ne ne'en soj daj sij me soj ne guun đanj rá soj a. Xa' 'unj, tzaj ne ne ca'na' 'unj ticavi' 'unj man yuvi' ma'. Che'é yan tinanii 'unj man yuvi' rihaan sayuun ca'ná' 'unj adonj —taj Jesucristó rihaan roj so' a.

<sup>56</sup> Gaa ne ca'anj nij tuvi' Jesucristó yo'ó chuman' caran' nij so' a.

*Nana nihánj taj xna'anj daj ca'mii Jesucristó rihaan va'nuj síe tihaj guun rá canoco' man so' a*

<sup>57</sup> Gaa vaj nij so' chrej, gaa ne ca'na' 'o so', ca'mii so' ga Jesucristó a:

—Canocó' 'unj mán so' daj rej ma'an vaj so' ei —taj so' rihaan Jesucristó a.

<sup>58</sup> Gaa ne cataj ya' Jesucristó se vaa ran' so' chée so' a:

—'O se nij chunee ro', otoj sa' nij xo' rá yu'uj taj rque yo'ó, ne nij xtâ chée xta' ro', vaa saca' nij xo' a. Ne xa' 'unj sij ca'neé Diose nicaj yu'unj man yuvi', tzaj ne taj a doj rej quina' 'unj cotoj 'unj a ma' —taj Jesucristó rihaan so' a.

<sup>59</sup> Ne dan me se cataj Jesucristó rihaan yo'ó so' a:

—Canocó' so' manj ca'anj ní' á —taj Jesucristó rihaan so' a.

—Ca'vej so' nanj tucuaj, ne ndaa cavi' réj, gaa ne cachin' 'unj man réj, gaa ne canocó' 'unj mán so' ei —taj so' rihaan Jesucristó a.

<sup>60</sup> Tzaj ne cataj Jesucristó rihaan so' a:

—Ca'ne' rá so' cachin' ma'an nij síe cavi' nimán man tuvi' so' xngá á. Ne ca'anj so', ca'mii nataj so' che'é güii guun chij Diose rihaan chumi' nihánj ei —taj Jesucristó rihaan so' a.

<sup>61</sup> Ne dan me se cataj yo'ó so' uún rihaan Jesucristó a:

—Me raj canocoj mán so', Señor. Tzaj ne asino ca'vej so' ca'anj cataj xna'anj 'unj rihaan nij tuvi', gaa ne ca'naj, ne ca'anj ní' ei —taj so' rihaan Jesucristó a.

<sup>62</sup> Tzaj ne cataj Jesucristó rihaan so' a:

—Síe oro' nee ni'yaj rej xcó ro', daj chihaa mį se cavii nica' tucuaán qui'yaj so' ma'. Ne síe me rá canoco' manj me se se guun canicaj uún so' rej xcó so' ma'. Ne sese đanj qui'yaj so', ne daj chihaa mį se ca'vee guun chij Diose

nimán so' ma'. Ne ase vaa síí oro' nee rii tucuáán ro', vaa síí me rá canoco' manj adonj —taj Jesucristó rihaan so' a.

## 10

*Nana nihánj taj xna'anj se vaa ca'neé Jesucristó man va'núj chihaa chí' síí tucu'yón se-nana so' ca'anj ca'mii natáj nij so' a*

<sup>1</sup> Cachén doj, gaa ne narii Jesucristó man ya'núj chihaa chí' snó'o, ne ca'neé so' man vij vij nij so' quitaj yaan nij so' rihaan Jesucristó ca'anj nij so' daj a chuman' cachén Jesucristó,

<sup>2</sup> ne cataj Jesucristó rihaan nij so' a:

—Ya uxrá, ne vaa ndo'o suun rihaan ní', ne nij síí 'yaj suun me se doj nij so' nanj adonj. Ne cachinj ni'yaj ní' doj nij síí qui'yaj suun rihaan Diose síí uun chíj 'nij ra'a suun, gaa ne ca'nej so' doj yuvií qui'yaj suun se-suun so' adonj.

<sup>3</sup> Dan me se ca'anj ca'mii natáj soj rihaan nij yuvií, tzaj ne xcaj soj cuentá se vaa ca'na' sayuun rihaan soj ei. 'Q se ase vaa matzinj vaj rej man xca'yanj ca'nu' ro', danj gaa soj chuguanj.

<sup>4</sup> Se nicaj soj vitó nuu sa'anj se nicaj soj nanj se nicaj soj yo'ó tacoj canj se nicaj soj ca'anj soj ma'. 'Q rej ca'anj soj, ne 'o rej canicaj soj, ne se canicun' soj nana soj cuentó ga yuvií ma'.

<sup>5</sup> "Asa' catúj soj rá 'o ve', ne asino cataj soj rihaan nij síí yanj rá ve' yo' se vaa dínj gaa cumán nij so', qui'yaj Diose a.

<sup>6</sup> Ne sese yanj 'o síí cayáán sa' ga Diose rá ve' yo', gaa ne ya ve'é cayáán so', qui'yaj Diose a. Tzaj ne sese nuvi' síí cayáán sa' ga Diose yáán rá ve' yo', ne canicaj uún nana sa' ca'mii soj rihaan ma'an soj, qui'yaj Diose, tzaj ne se cavii sa' nij síí tucua yo' a ma'.

<sup>7</sup> Caran' soj ve' yanj síí sa' yo', ne me ma'an se rque síí yanj yo', ne cha soj co'oj soj do', ne no xcúun yuvií rque yuvií chraa cha soj che'é suun sa' 'yaj suun soj a. Se ca'anj soj caran' soj yo'ó yo'ó ve' ma'.

<sup>8</sup> Asa' cuchí' soj 'o chuman', ne sese ve'é ca'mii nij síí man chuman' yo' ga soj, gaa ne cha soj me ma'an se chá rque nij so' man nij soj a.

<sup>9</sup> Ca'nee soj chí'ii xráá nij síí ran' man chuman' yo', ne ca'mii natáj soj rihaan yuvií se vaa nichrun' guun chij Diose chiháán nij so' a.

<sup>10</sup> "Tzaj ne asa' cuchí' soj 'o chuman', ne sese ne ca'vej rá nij yuvií cunoj nij yuvií se-nana soj, gaa ne canicun' soj tanuu rá callé chuman', gaa ne cataj soj rihaan nij yuvií man chuman' yo' a:

<sup>11</sup> "Asa' curihanj núj chuman' nihánj, ne nacunán' núj tacóó núj, ne tucuyuu núj yo'óo tachruu avii chiháán soj tacóó núj cayuu yo' rihaan ma'an soj a. Gaa ne xcaj soj cuentá se vaa guun rá Diose guun chij Diose chiháán soj, tzaj ne ne ca'vej rá soj a". Danj cataj soj rihaan nij síí na'vej rá cunoj nana ca'mii soj a.

<sup>12</sup> Ne cataj xna'anj 'unj rihaan soj cuano se vaa vaa güii ca'ne' 'unj cacun' che'é nij yuvií, gaa ne quirán' nij yuvií man chuman' yo' doj sayuun rihaan nij síí chí'ii man chuman' Sodoma adonj —taj Jesucristó rihaan nij síí ca'neé so' a.

*Nana nihánj taj xna'anj se vaa cataj xna'anj Jesucristó che'é sayuun quirán' yuvií man va'núj chuman' yuvií ne ca'vej rá cunoj se-nana so' a*

<sup>13</sup> Gaa ne dan me se cataj uún Jesucristó a:

—Nique soj sij man chuman' Corazín a. Nique soj sij man chuman' Betsaida a. 'Q se quirán' uxrá soj sayuun nanj á. Dan me se nij síí man

chuman' Tiro do', nij sí man chuman' Sidón do', me sí chi'ii nimán nanj á. Tzaj ne sese ca'anj 'unj chiháán nij so', ne sese qui'yáj suun sa' nocço ni'yaj nij so', ne cuno nij so' se-nanaj ne guun ya rá nij so' se vaa tumé nij so' cacun', ne canicaj nimán nij so', ne quinanó ndo'o rá nij so' che'é cacun' tumé nij so', ne ndaa yatzíj ya' cunuú nij so', ne ndaa yaj chruun acaa ruvaj caraa nij so' raa nij so', che'é yan quinanó rá nij so' che'é cacun' tumé nij so' asuun saj adonj. Nihánj, ne ne ca'anj 'unj ma'. Maan se inanj chiháán soj 'naj, ne qui'yáj suun sa' nocço quene'en ma'an soj, tzaj ne ne canicaj nimán nij soj a ma'.

<sup>14</sup> Dan me se güii ca'ne' 'unj cacun' che'é nij yuvii ro', doj a gaa sayuun quiran' soj rihaan sayuun quiran' nij sí chi'ii man chuman' Tiro do', man chuman' Sidón do' adonj.

<sup>15</sup> Ne vaa soj sij man chuman' Capernaum uún a. Ne sí sa' inanj me ma'an soj, rá soj na'. Nuveé sij sa' me soj ma'. Sí ca'anj rihaan ya'an guun soj adonj —taj Jesucristó a.

<sup>16</sup> Ne cataj uún Jesucristó rihaan nij sí tucu'yón se-nanaj so' a:

—Sí nanó xrej se-nanaj soj ro', so' me sí nanó xrej se-nanaj ma'anj a. Tzaj ne sí uun nacço rá ni'yaj man soj ro', so' me sí uun nacço rá ni'yaj man ndaa ma'anj a. Ne sí uun nacço rá ni'yaj man ma'anj ro', so' me sí uun nacço rá ni'yaj man Diöse sí ca'neé manj adonj —taj Jesucristó rihaan nij sí tucu'yón se-nanaj so' a.

*Nanaj nihánj taj xna'anj se vaa namán va'nuj chihaa chi' nij sí ca'neé Jesucristó a*

<sup>17</sup> Quisíj qui'yaj va'nuj chihaa chi' nij so' ndaa vaa cataj Jesucristó, gaa ne namán uún nij so' a. Niha' rá nij so', ne cataj nij so' rihaan Jesucristó a:

—Ndaa nij nanaj chree uno rihaan núj, Señor. Che'é se se-chuvii so' táa tu'va núj, ne urihanj nij so' nimán yuvii nanj á —taj nij so' rihaan Jesucristó a.

<sup>18</sup> Ne cataj Jesucristó rihaan nij so' a:

—Ne'en yaj cayuu se nucuaj nicaj Satanás, ne ase uun raan ro', me cayuu se nucuaj nicaj Satanás adonj.

<sup>19</sup> Cuno soj ca'mij á. 'Unj ro', me sí qui'yaj guun nucuaj soj qui'yaj canaán soj rihaan daj a se chi'ii a. Ca'vee se ru'maan che'é soj 'o xcuáá do', 'o xcuun do', tzaj ne taj se qui'yaj xo' man soj ma'. Qui'yaj canaán soj rihaan nu' se nucuaj nicaj Satanás sí taj ri'yunj ni'yaj man ní, ne a 'ó xco' se qui'yaj chi'ii a 'ó rasuun man soj ma'.

<sup>20</sup> Tzaj ne taj che'é guun niha' rá soj che'é se uno nij nanaj chree rihaan soj ma'. Guun niha' rá soj, tzaj ne che'é se aj cachrón Diöse se-chuvii soj rej xtá' ro', che'é dan guun niha' rá soj á —taj Jesucristó rihaan va'nuj chihaa chi' nij so' a.

*Nanaj nihánj taj xna'anj se vaa guun niha' rá Jesucristó, qui'yaj Nimán Diöse a*

<sup>21</sup> Maan güii yo' ro', guun niha' rá Jesucristó, qui'yaj Nimán Diöse, ne cataj Jesucristó rihaan Diöse a:

—Sí 'nij ra'a chumii do', sí 'nij ra'a xtá' do', mé so', Ataj Chij. Ne sa' uxrá qui'yáá so' caráán so' rihaan nij sí avii raa do', rihaan nij sí acaj cuentá do', se vaa se cuno nij so' se-nanaj ma'. Maan nij sí vaa nica' nimán ro', ve'é cuno nij so', qui'yáá so' a. Danj inanj qui'yáá so', che'é yan danj me rá so' qui'yáá so', Ataj —taj Jesucristó rihaan Rej so' Diöse a.

<sup>22</sup> Canicaj Jesucristó, ca'mii so' rihaan nij yuvii, cataj so' a:



—Aj rqué Réé 'unj Diose cunudanj rasuun rihanj á. Ne a 'ó síí ne ne'en daj vaa 'unj, maan se orún' Réj ne'en a. 'O se ta'núí so' mej adonj. Ne a 'ó síí ne ne'en daj vaa Réj ma'. Maan se orún' 'unj ne'en daj vaa so' adonj. Ne sese me rá 'unj cataj xna'anj 'unj rihaan yo'ó nij yuvií daj vaa Réj, ne quene'en yo'ó nij so' uún adonj —taj Jesucristó rihaan nij yuvií a.

23 Gaa ne ni'yaj Jesucristó man nij síí tucu'yón se-nana so', ne cataj so' rihaan inanj ma'an nij so' a:

—Vaa che'é gaa niha' rá soj che'é rihaan soj á. 'O se aj quene'en soj se vaa quiyáj nanj á.

24 'O se cataj xna'anj 'unj rihaan soj cuano se vaa man ndo'o síí man gaa naá síí nata' se-nana Diose do', síí nicaj suun rey do', guun rá quene'en se vaa quene'en nij soj, tzaj ne ne quene'en nij so' ma'. Ne guun rá nij so' cuno nij so' se vaa cuno nij soj, tzaj ne ne cuno nij so' a man adonj —taj Jesucristó rihaan nij síí tucu'yón se-nana so' a.

*Nana nihánj me cuentó nanó Jesucristó che'é síí samaritano racuj man síí ran' chi'ii a*

25 Gaa ne dan me se canicun' caya 'o síí naqui'yaj cuu se-tucuanj Moisés rihaan yuvií, ne xná'anj so' 'o nana man Jesucristó, che'é rej guun rá so' quirí' so' rej caraa so' cacun' xráá Jesucristó a.

—Daj quiyáj, gaa ne ca'vee cayánj ga Diose nu' cavii nu' ca'anj, ga maestro' —taj so' rihaan Jesucristó a.

26 Gaa ne cataj Jesucristó rihaan so' a:

—Ne'én so' me nana no' rihaan yanj no' se-tucuanj Moisés na'. Daj taj yanj yo' nayaa so' ga —taj Jesucristó, xná'anj Jesucristó man so' a.

27 Gaa ne cataj so' rihaan Jesucristó a:

—“Ndaa nimán yá so' guun rá so' ni'yaj so' man Diose síí 'nij ra'a man ní', ne ndaa nu' se nucaj yá so' caraa cochroj rihaan Diose, ne yo'o ndaa cúu yave mán so' cuchuman rá ni'yaj man Diose nanj adonj.” Ne, “Adí' se 'ee rá so' man ma'án so' ro', danj gaa 'ee rá so' man tuví' so' á”, taj se-tucuanj Moisés adonj —taj síí naqui'yaj cuu se-tucuanj Moisés yo' a.

28 Gaa ne cataj Jesucristó rihaan so' a:

—Ya uxrá a'mii so' á. Danj quiyáá so', gaa ne cayáán so' ga Diose nu' cavii nu' ca'anj nanj á —taj Jesucristó rihaan so' a.

29 Tzaj ne síí sa' inanj me síí tucu'yón se-tucuanj Moisés, rá ma'an so' a. Che'é dan xná'anj so' nana nihánj man Jesucristó a:

—Me síí me tuví' 'unj ga —taj so' a.

30 Gaa ne canicaj Jesucristó, nanó so' se-cuento síí samaritano a:

—Dan me se cavii 'o síí israelitá chuman' Jerusalén, ca'anj so' chuman' Jericó a. Vaj so' chrej, gaa ne caráán síí ituu man so' chrej, ne go' uxrá nij síí ituu man so', ne quirii nij síí ituu sagan' so', ne daj doj se cavi' so', gaa ne tanáj nij síí ituu man so' a.

31 Gaa ne dan me se vaj 'o xrej nicun' rihaan ní' sij israelitá chrej yo' a. Quene'en so' man síí quiran' chi'ii naj tu'va chrej, tzaj ne cachén yanj so' ca'anj so' a.

32 Gaa ne dan me se vaj 'o ta'núí ta'nij si'no' Leví síí racuj man xrej uún a. Quene'en so' man síí quiran' chi'ii yo', tzaj ne cachén yanj so' ca'anj so' uún a.

<sup>33</sup> "Gaa ne dan me se ca'na' 'o sí samaritano uún a. Nuveé sji israelitá me so' ma'. Sji yaníj avii rej Samaria me so' a. Quene'en so' man sí quiran' chi'ij yo', gaa ne cunuu 'e'e rá so' man sí quiran' chi'ij yo' a.

<sup>34</sup> Ca'anj so' qui'yaj cono'ó so' man sí quiran' chi'ij yo', ne cuta' so' rmedió rej quiran' chi'ij, ne nacutáj so' mantá rej quiran' chi'ij yo' a. Gaa ne cuta' sí samaritano yo' man sí quiran' chi'ij yo' xráá daán so' xcuu vaj ga so', ne ca'anj roj so' ve' aran' yuvií chéé chrej, ne taj ya'anj sí samaritano yo' man sí quiran' chi'ij yo' a.

<sup>35</sup> Cachén 'o yan', ne yo'ó güii me se guun rá sí samaritano ca'anj so', ne quirii so' vij sa'anj denario, ne caxríj so' ston sí tucua ve' se vaa taj ya'anj so' man sí ran', gaa ne cataj so' rihaan sí tucua: "Asa' ca'na' uún 'unj, ne naru'vee 'unj me daj ma'an sa'anj me gaa tu'vee so', rá so'", taj sí samaritano rihaan sí tucua a. —Veé danj síj cuentó nanó Jesucristó rihaan sí naqui'yaj cju se-tucuañj Moisés yo' a.

<sup>36</sup> Gaa ne xná'anj Jesucristó nana nihánj man sí naqui'yaj cju se-tucuañj Moisés yo' a:

—Va'nuj nij sí vaj rá chrej yo', gaa ne me so' me tuvi' sí quiran' chi'ij yo', rá so' ga —taj Jesucristó, xná'anj Jesucristó man so' a.

<sup>37</sup> —Síj cunuu 'e'e rá man so' ro', me tuvi' so', raj a —taj sí naqui'yaj cju se-tucuañj Moisés rihaan Jesucristó a.

Ne cataj uún Jesucristó rihaan so' a:

—Ase vaa qui'yaj síj cunuu 'e'e rá man sí quiran' chi'ij yo' ro', veé danj qui'yaj gu'e'e so', ca'anj so' ei —taj Jesucristó rihaan sí naqui'yaj cju se-tucuañj Moisés yo' a.

### *Nana nihánj taj xna'anj se vaa ca'anj Jesucristó tucua roj chu'vij Marta a*

<sup>38</sup> Dan me se vaj Jesucristó chrej ga nij sí tucuyón se-nana so', ne cuchi' so' 'o chuman', ne dan me se ca'vej rá 'o chana cu'naj Marta yanj chuman' yo' caran' Jesucristó tucua no',

<sup>39</sup> ne yáán chu'vij no' chana cu'naj Mariá ga no', ne dan me se ca'anj cayáán chu'vij no' Mariá tacóó Jesucristó, ne nanó xrej no' se-nana so' a.

<sup>40</sup> Tzaj ne Marta ro', daj a suun caráya'anj no' a. Dan me se quinichrun' Marta rihaan Jesucristó, ne cataj no' rihaan so' a:

—Me che'é ne rihuun rá so' se vaa dínj ne chu'vij 'unj, ne orún' ma'anj 'yaj chujji, ga Señor'. Cataj so' rihaan no' se vaa ra'cujíj no' manj á —taj Marta rihaan Jesucristó a.

<sup>41</sup> Tzaj ne cataj Jesucristó rihaan no' a:

—Xa' che'é suun man rihaan chumij nihánj, tzaj ne taj che'é caraya'áán so' ndaa vaa 'yáá so', man Marta. Snúú rá so', 'yaj suun vaa rihaan so' á. 'Q se taj che'é caraya'anj ní' rasuun man rihaan chumij nihánj ma'.

<sup>42</sup> 'Q se doj a vaa suun achiin qui'yaj ní', ne vaa orún' suun sa' ya ya achiin rihaan ní' nanj á. Ne Mariá nihánj, tzaj ne cunaj 'yaj no' se vaa me rá no' cunó no' se-nanaj, ne taj che'é cataj ní' se vaa nij 'yaj no' uno no' se-nanaj ma' —taj Jesucristó rihaan Marta a.

<sup>1</sup> Gaa ne dan me se cachíin ni'yaj Jesucristó rihaan Diose 'o güii, ne gaa quisij cachíin ni'yaj so' rihaan Diose, gaa ne cataj 'o sí tucu'yón se-nana so' rihaan so' a:

—Tucu'yón so' man núj daj ca'mii núj gaa cachinj ni'yaj núj rihaan Diose, Señor. 'O se xa' sí cu'naj Juan sí cuta' ne man yuvi, tzaj ne tucu'yón so' rihaan nij sí tucu'yón se-nana so' daj ca'mii nij so' gaa cachinj ni'yaj nij so' rihaan Diose, ne danj inanj qui'yáá so' che'é núj, rá núj a —taj so' rihaan Jesucristó a.

<sup>2</sup> Gaa ne dan me se ca'mii Jesucristó nana nihánj rihaan nij so' a:

—Nanj cataj soj gaa cachinj ni'yaj soj rihaan Diose á: “Ataj Chij, me rá núj xcaj yuvi cuentá se vaa inanj sa' 'yáá so' a. Ne me rá núj quisij güii guun chij so' rihaan chumij nihánj a.

<sup>3</sup> Ne 'o 'o güii me se rque so' nu' rasuun achiin man núj cha núj á.

<sup>4</sup> Ne caraá x'naa so' che'é cacun' taj xráá núj á. 'O se ma'an núj me sí aráj x'naa che'é cacun' 'yaj tuvi' núj rihaan núj nanj adonj. Dan me se caraán ra'á so' xráá núj rihaan chrej chi'ii á”. Danj cataj soj gaa cachinj ni'yaj soj rihaan Diose ei —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa no xcuún ni' cachinj ni'yaj ni' rihaan Diose che'é rasuun achiin man ni' a*

<sup>5</sup> Gaa ne canicaj Jesucristó, nanó so' 'o se-cuento sí cachíin rasuun rihaan tuvi' rej nij a:

—Dan me se cataj ní, ne cuchí' 'o so' tucua' tuvi' so' yan', ne cataj so' rihaan tuvi' so': “Qui'yáá so' se ndo'o, ne racuíj so' va'nuj chraa manj, tinuj.

<sup>6</sup> Ca'na' 'o tuvij sí achén chrej, ne caran' so' tucua, tzaj ne taj vaj chraa rihanj goj cha so' ma'”, cataj so' rihaan tuvi' so' a.

<sup>7</sup> Ne daj cataj tuvi' so' rihaan so', rá soj ga. Cataj tuvi' so': “Se narij so' nej rihanj, man tinuj. Aj naqui'yaj raan 'unj ta'yaa, ne aj otoj nij ta'nij núj, ne rmij naxagaj rquej chraa man so' ei”, cataj tuvi' so' rihaan so', rá soj na'. Daj chihaa mij se ca'mii so' danj ma'.

<sup>8</sup> Dan me se cataj xna'anj 'unj rihaan soj cuano se vaa sí otoj yo' ro', nda' se na'vej rá so' naxagaa so' go' so' chraa man tuvi' so', tzaj ne che'é se ne uun na'aj tuvi' so' achíin achíin so' chraa, ne che'é dan guun rmii xréé sí naj otoj, gaa ne naxagaa so', ne go' so' me ma'an rasuun achiin man sí nicun' ta'yaa yo' adonj.

<sup>9</sup> Ne 'unj nihánj me sí cataj xna'anj rihaan soj se vaa cachinj soj se vaa achiin man soj rihaan Diose, ne so' me sí rque man soj, ne nano' soj rasuun achiin man soj, ne narij soj rasuun yo', ne ase vaa 'yaj sí tica'mii ta'yaa tucua' tuvi' ro', danj qui'yaj soj ga Diose, ne ca'nuu Diose ta'yaa yo', ne rque Diose rasuun achiin man soj adonj.

<sup>10</sup> 'O se sí achíin rasuun rihaan Diose ro', quirij' so' rasuun achiin man so', ne sí nano' rasuun achiin man ro', quirij' so' rasuun yo', ne sí tica'mii ta'yaa rej yanj Diose ro', ca'nuu Diose ta'yaa, ne quirij' sí tica'mii ta'yaa rasuun achiin man so' adonj.

<sup>11</sup> Xcaj soj cuentá se vaa ma'an soj, nanj yuvi me soj, tzaj ne sese achíin ta'nii yo' tuvi' soj chraa cha yo' man soj, ne se ca'vee nano' soj yahij ne caxrij soj ston yo' ma'. Ne sese achíin ta'nii soj nee xcua' cha yo' man soj, ne se ca'vee nano' soj xcuáá ne caxrij soj ston yo' ma'.

<sup>12</sup> Ne sese achíin ta'nii soj xruú chuchee cha yo' man soj, ne se ca'vee nano' soj xcuun ne caxrij soj ston yo' ma'.

13 Dan me se danj nanj soj, ne sí chi'ii nimán me soj, tzaj ne ne'en soj rque soj se sa' chá ta'nú soj ei. Che'é dan táa a Rej soj sí nicun' xta', ne sij sa' inanj me so', ne so' me sí rque ya Nimán man nij sí achín Nimán Diosé rihaan so' nanj adonj. —Danj cataj Jesucristó rihaan nij sí tucu'yón se-nana so' a.

*Nana nihánj taj xna'anj se vaa cuta' nij sí fariseo cacun' rmi' xráá Jesucristó se vaa ca'mii Jesucristó ga sí chree a*

14 Dan me se 'o güii quirii Jesucristó yo'o nana chree nimán 'o sí ya'mii, ne dan me se ya'mii so', qui'yaj nana chree yo', tzaj ne curihanj nana chree nimán so', ne guun che'e so' ca'mii so' adonj. Ne caráya'anj uxra' nij yuvií quene'en nij so' se vaa qui'yaj Jesucristó,

15 ne ta'aj nij yuvií cataj se vaa a'mii Jesucristó ga sí chree cu'naj Beelzebú sí uun chij rihaan nij nana chree, ne che'é dan rii so' man nij nana chree nimán yuvií, taj ta'aj nij yuvií, ni'yaj nij yuvií man Jesucristó a.

16 Ne yo'ó ta'aj nij yuvií guun rá cuta' cacun' xráá Jesucristó, ne che'é dan cachín ni'yaj nij so' rihaan Jesucristó se vaa qui'yaj so' 'o suun sa' nocoo 'na' rej xta' ni'yaj nij so', taj nij so' a.

17 Dan me se quene'en ma'an Jesucristó daj vaa nimán nij yuvií, ne che'é dan cataj so':

—Ne'en soj se vaa sese vaa 'o nación, ne sese xra' ta'aj nij sí uun chij rihaan nación yo' ne cunu' ma'an nij so' ga tuvi' nij so', ne vaa güii, ne nu' nación yo' quirí' nu' nanj adonj. Ne sese cunu' ta'aj nij yuvií man 'o barrió ga tuvi' yuvií sí man ma'an barrió yo' ro', ne vaa güii, ne quirí' nu' barrió yo', qui'yaj nij so' nanj adonj.

18 Che'é dan me sese racuíj sí chree sí cu'naj Satanás manj rii 'unj man tuvi' so' nana chree nimán nij yuvií, gaa ne asa' ca'vee guun chij ndo'o so' rihaan nij yuvií man rihaan chumií nihánj, rá soj ga. Nana nihánj xna'anj 'unj man soj che'é se me rá soj cataj soj se vaa sí chree cu'naj Beelzebú ro', me sí racuíj manj rij man nana chree nimán nij yuvií, rá soj vaa nanj á.

19 Dan me se rii 'unj man nij nana chree nimán nij yuvií, 'yaj sí chree cu'naj Beelzebú, che'é se a'mii 'unj ga so', rá soj a. Tzaj ne nij sí tucu'yón se-nana soj me se veé danj rii uún nij so' man nij nana chree nimán nij yuvií uún ei. Ne asa' a'vee 'yaj nij so' danj, rá soj ga. Ne vaa nij so' vaa, veé danj a'mii nij so' ga sí chree, rá soj gaa na'. Che'é nana ca'mii soj me se ma'an nij sí tucu'yón se-nana soj cuta' cacun' xráá soj se vaa ca'mii ne soj adonj.

20 Tzaj ne 'unj me se ya ma'an ra'a Diosé racuíj manj rii 'unj man nij nana chree nimán nij yuvií adonj. Che'é dan xcaj soj cuentá se vaa aj guun che'e Diosé guun chij Diosé rihaan chumií nihánj adonj.

21 "Dan me se sese 'o sí ru'vee yanj rá ve' me se vaa aga' sihaa do', vaa mixté do', rihaan so', ne tumé so' si'yaj so' yáán so', ne taj sí ca'nee si'yaj so' ma'.

22 Tzaj ne sese ca'na' yo'ó sí vaa doj fuerzá rihaan, gaa ne qui'yaj canaán so' rihaan sí yanj raan, gaa ne ca'nee so' nu' saga' so' do', nu' si'yaj so' do', ne cuxra' ta'aj so' ga tuvi' so' nanj adonj. Ta'nga' danj 'yáá 'unj ga sí chree, ne 'yaj canaán 'unj man so' adonj.

23 "Naj guun sí na'vej rá qui'yaj suun ga 'unj ro', sí taj ri'yunj manj me so' a. Ne naj guun sí ne racuíj manj naqui'yaj chre' 'unj man yuvií canoco' man Diosé ro', so' me sí ticha'nuu man nij yuvií, ne aráán so' rihaan nij yuvií se canoco' nij yuvií man Diosé ei —taj Jesucristó rihaan nij yuvií a.

*Nana nihánj taj xna'anj daj 'yaj nana chree gaa anicaj uún nana chree nimán yuvij a*

24-25 Gaa ne cataj uún Jesucristó rihaan nij yuvij a:

—Ne gaa tihaj avii yuun yo' o nana chree nimán snó'o, ne chéé rma'an nana chree yo' nano' so' rej cayáán so', tzaj ne taj se qui'yá' quirí' nana chree yo' rej cayáán so', gaa ne me rá uún nana chree yo' canicaj so' rej cavii so' gaa naá a. Dan me se taj nana chree yo': “Canicaj uún 'unj nán' 'unj rej cavii 'unj a. Ve'é nanj vaa tucuj, ne naruvii rá ve' tucuj cuano, ne uun yâj yanj rá ve' tucuj cuano adonj”, taj nana chree yo' a.

26 Gaa ne dan me se anicaj uún nana chree yo' nimán snó'o yo', ne nano' nana chree yo' yo'ó chij tuvi' nana chree yo' síi chí'ii doj, ne 'na' nique uún so' nimán snó'o yo', gaa ne cayáán taran' nij nana chree yo' a. Dan me se gaa naá gaa cayáán orún' nana chree yo', gaa ne maan ta'nga' quij vaa nimán snó'o yo', tzaj gaa namán yo'ó chij nana chree yo', gaa ne doj a tico nana chree man so', ne doj a quij vaa nimán snó'o yo', 'yaj nana chree yo' a adonj —taj Jesucristó rihaan nij yuvij a.

*Nana nihánj taj xna'anj me síi me nij síi cavij sa' ga Diose a*

27 Dan me se gaa ca'mii Jesucristó nana vaa danj, gaa ne nucuaj ca'mii 'o chana nicun' sca'núj nij yuvij, cataj no':

—Cavij sa' níi so', che'é se cuchruij no' mán so', ne tucutzii no' mán so' á —taj chana yo', caguáj no' rihaan Jesucristó a.

28 Tzaj ne cataj Jesucristó a:

—Síi cavij sa' ya ro', me síi uno se nana Diose ne 'yaj ndaa vaa taj nu' nana yo' adonj —taj Jesucristó rihaan nij yuvij yo' a.

*Nana nihánj taj xna'anj me suun sa' nocoo me qui'yaj Jesucristó, yan guun ya rá nij yuvij se vaa ya vaa nana ca'mii so' a*

29 Dan me se cunuu chre' doj yuvij rihaan Jesucristó, ne che'é dan guun che'e so' ca'mii so' nana nihánj a:

—Inanj che'é se yuvij vaa chí'ii nimán me soj ro', che'é dan me rá soj qui'yá' suun sa' nocoo á. Tzaj ne se qui'yá' suun sa' nocoo che'é soj ma'. Maan se quene'en soj se vaa ase vaa quiran' síi cu'naj Jonás gaa naá ro', danj quirán' 'unj, vaa güii nanj a.

30 Dan me se qui'yaj Diose suun sa' nocoo ga síi cu'naj Jonás quene'en nij síi man chuman' Nínive gaa naá, ne danj inanj qui'yaj uún Diose ga 'unj sij ca'née so' nicaj yu'unj man yuvij, quene'en soj adonj.

31 “Ne güii ca'ne' Diose cacun' che'é yuvij ro', cuchí' chana nicaj suun reiná guun chij rihaan chuman' naj gan' ndo'o rej sur, ne canicun' no' rihaan soj, qui'yaj Diose, ne cutá' no' cacun' xráá soj adonj. 'O se gan' ndo'o cachéé no' cuchí' no' rihaan síi cu'naj Salomón, ne cuno no' nana cuu tucu'yón Salomón man no' adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síi cu'naj Salomón yo' adonj. Tzaj ne na'vej rá soj cuno soj nana a'mii 'unj rihaan soj a man adonj.

32 Ne nij síi man chuman' Nínive ro', canicun' nij so' ga ma'an soj sij vaa i'na' rihaan chumij nihánj cuano asa' quisíj güii ca'ne' Diose cacun' che'é yuvij, ne cutá' nij síi man chuman' Nínive yo' cacun' xráá soj adonj. Cuno nij so' nana ca'mii natáj síi cu'naj Jonás, ne nuchran' nimán nij so', ne canoco' nij so' man Diose adonj. Ne xa' 'unj sij nicun' rihaan soj cuano, tzaj ne sa' doj vaa 'unj

rihaan síi cu'naj Jonás yo', tzej ne taj se qui'yá' naqui'yaj sa' soj nimán soj ma' —taj Jesucristó rihaan nij yuvij yo' a.

*Nana nihánj taj xna'anj se vaa no xcúun ní xcaj ní cuentá daj qui'yaj ní a*

<sup>33</sup> Ne cataj uún Jesucristó rihaan nij so' a:

—Gaa rmi', ne a 'o yuvij ne uta' ya'an raá aga' ya'an ne axríj yuve nij so' rque 'o chruún ma'. Sese rmi', ne achrón nii ya'an raá aga' ya'an ne uta' nii aga' yo' rej xta', ne daj a nij yuvij atúj rá ve' ro', chuguun ni'yaj nij so' adonj.

<sup>34</sup> "Rlij rihaan ní' me ya'an nicaj yu'unj man ní' ei. Dan me se sese rlij rihaan ní' ro', ni'yaj yo' ne uun sa' rá yo', gaa ne nu' nee man ní' ro', sa' vaa, ne adi' se chuguun aga' ya'an ro', danj chuguun man ní' gaa sa' rihaan ní' adonj. Tzej ne sese rlij rihaan ní' ro', ni'yaj yo' ne inanj uun chi'ij rá yo', gaa ne nu' nee man ní' ro', uun chi'ij rá, gaa ne adi' síi nicun' yan rmi' ne cunudanj man so' ro', rmi', ne danj vaa síi uun chi'ij rá adonj.

<sup>35</sup> Xcaj ndo'o soj cuentá se gaa nanj quina'aj ya'an nicaj yu'unj man soj ne guun soj 'o se rmi' a.

<sup>36</sup> Dan me se sese cunudanj man ní' nuú ya'an, gaa ne taj a doj se rmi' nuu man ní', gaa ne cunudanj man ní' ro', chuguun, ne adi' gaa o' cachun' ya'an xráa nii ne chuguun nu' man nii ro', danj vaa ní' adonj —taj Jesucristó rihaan nij yuvij yo' a.

*Nana nihánj taj xna'anj che'é cacun' tumé nij síi fariseo a*

<sup>37</sup> Dan me se gaa ca'mii Jesucristó rihaan nij yuvij, ne canacúun 'o síi fariseo man so' chá so' chraa tucúa síi fariseo yo', gaa ne dan me se ca'anj cayáan roj so' rihaan mesá a.

<sup>38</sup> Dan me se xcaj síi fariseo yo' cuentá se vaa ne noco' Jesucristó se-tucuanj nij síi fariseo se vaa ne na'ya' so' gaa chá so' chraa, gaa ne caráya'anj ndo'o síi fariseo yo' a.

<sup>39</sup> Che'é dan cataj síi 'nij ra'a man ní' rihaan so':

—Xa' soj sij fariseo, tzej ne ase vaa rasuun, ne sa' uxrá na'nu' nii xráa yo', tzej ne rque yo' ro', me se vaa nacaj guee yo', ta'nga' danj vaa guee soj, ne xráa soj me se ve'é naruvij, tzej ne nimán soj me quij vaa, ne niha' uxrá rá soj ca'nee soj si'yaj tuvi' soj, ne noco' ndo'o soj chrej chi'ij adonj.

<sup>40</sup> Nuveé sij acaj cuentá me soj a ma'. Ne'en soj se vaa Diose ro', me síi qui'yaj ra'a soj, ne na'ya' ndo'o soj, ne veé so' me síi qui'yaj nimán soj uún a.

<sup>41</sup> Dan me se go' soj ta'aj se chá do', ta'aj sa'anj do', man nij síi nique, gaa ne xcaj soj cuentá se vaa síi sa' nimán me soj adonj.

<sup>42</sup> "Tzej ne nique soj sij fariseo nanj á. 'O se quirán' uxrá soj sayuun nanj adonj. 'O se sese vaa nuu xlá do', coj ruda do', me ma'an cuéj do', rihaan soj, ne rque soj 'o nanj rasuun yo' rihaan Diose che'é 'o 'o chi' nánj rasuun vaa rihaan soj nanj á. Tzej ne ne a'ne' nicá soj cacun' che'é tuvi' soj ma'. Ne aráj cochroj soj rihaan Diose ma'. Tzej ne me rá Diose qui'yaj soj nu' nana noco' nihánj, ne na'vej rá Diose tanáj xco soj yo'ó nana le'ej doj yo' a ma'.

<sup>43</sup> "Nique soj sij fariseo nanj á. Quirán' uxrá nij soj sayuun adonj. 'O se niha' rá soj quitaj soj chruun xlá sa' doj nicun' rá ve' tucu'yón ní' se-tucuanj Moisés, ne niha' rá soj caráya'anj yuvij man soj gaa chéé soj yu'vee a.

<sup>44</sup> "Nique soj che'é sayuun quirán' soj á. Ne ase vaa chraan naj xnganá rihaan santó ro', vaa soj, ne xráa soj ro', vaa catzji, tzej ne nimán soj me se adi' se vaa cúu ri'yuj ro', vaa nimán soj adonj. Ne vaa chraan naj xnganá rihaan santó, ne xráa yo' me se sa' uxrá vaa yo', ne rque yo' me se cúu ri'yuj

inanj man rque yo', ne nij yuvij me se chée nij yuvij yo' xráá chraan, ne taj nij so' se vaa sa' ndo'o vaa chraan yo', taj nij so', tzaj ne ne ne'en nij so' se vaa inanj cúu ri'yuj man rque yo' a man adonj. Ta'nga' danj vaa guee soj adonj —taj Jesucristó rihaan nij síi fariseo yo' a.

*Nana nihánj taj xna'anj che'é cacun' tumé nij síi naqui'yaj cuu se-tucuanj Moisés rihaan yuvij a*

<sup>45</sup> Gaa ne ca'mii 'o síi naqui'yaj cuu se-tucuanj Moisés rihaan yuvij, ne cataj so' rihaan Jesucristó a:

—Tzaj ne nachrí' so' ni'yaj so' man ma'an núj gaa a'mii so' nana vaa danj á —taj so' rihaan Jesucristó a.

<sup>46</sup> Gaa ne cataj Jesucristó rihaan so' a:

—Ne nique ma'an soj sij naqui'yaj cuu se-tucuanj Moisés rihaan yuvij a. Ma'an soj uún quirán' uxrá sayuun nanj adonj. 'O se a'ne' uxrá soj suun rihaan yuvij daj qui'yaj nij yuvij canocó' nij yuvij man Diose, tzaj ne dan me se ase vaa yuvij araa ndo'o rasuun 'ee xráá tuvi' vaa nij soj, ne a doj ne racuíj soj man yuvij cata yuvij rasuun 'ee yo' a ma'. A 'ó raá ra'a nij soj ne racuíj soj man yuvij a man adonj.

<sup>47</sup> "Nique soj che'é sayuun quirán' soj a. Ve'é une' soj chraan yan naj cúu man nij síi nata' se-nana Diose gaa naá, tzaj ne ma'an xii soj ro', me síi ticavi' man nij so' adonj.

<sup>48</sup> Dan me se che'é se ne'en ní' se vaa 'yaj ma'an soj, ne che'é dan xcaj ní' cuentá se vaa 'o vaa rá soj ga xii soj síi man gaa naá, ne cuyaan 'yaj soj ga xii soj adonj. Dan me se nij so' ro', ticavi' man nij síi nata' se-nana Diose, ne soj ro', une' chraan yan naj cúu man nij so' adonj.

<sup>49</sup> "Che'é dan cavií 'o nana cuu raá Diose, cataj Diose: "Xa' yuvij nihánj, tzaj ne ca'nej 'unj síi nata' se-nanj rihaan nij so' a. Dan me se ticavi' nij so' man ta'aj nij síi ca'nej 'unj, ne yo'ó ta'aj nij so' me se me rej ma'an vaj nij so', ne quitaj ri'yunj uxrá nij so' man nij síi ca'nej a.

<sup>50</sup> Ndaa síj, gaa ne nu' ton cayanj man nij síi nata' se-nana Diose asij gaa guun che'e chumij ro', nu' cacun' yo' ro', nata' xráá nij so' a.

<sup>51</sup> Dan me se asij ton cayanj man síi cu'naj Abel ne ndaa ton cayanj man síi cu'naj Zacarías gaa cavi' so' rihaan nuvíi yan nicun' mesá ton xij ro', nu' cacun' yo' ro', nata' xráá nij so' a", taj Diose a. Dan me se cataj xna'anj 'unj rihaan soj cuano se vaa quirán' ma'an nij tuvi' nij soj sayuun che'é nu' cacun' yo' adonj.

<sup>52</sup> "Nique soj sij naqui'yaj cuu se-tucuanj Moisés rihaan yuvij a. Quirán' uxrá soj sayuun adonj. Taj se qui'yá' xcaj yuvij cuentá, 'yaj soj ma'. Dan me se ma'an soj ro', na'vej rá catuu se-tucuanj Diose, ne nij síi me rá catuu me se aráán soj chrej rihaan nij so', ne na'vej rá soj catuu nij so' a man adonj —taj Jesucristó rihaan nij síi naqui'yaj cuu se-tucuanj Moisés rihaan yuvij a.

<sup>53</sup> Dan me se curihanj Jesucristó ve' yo', ne guun che'e nij síi naqui'yaj cuu se-tucuanj Moisés do', nij síi fariseo do', táá ri'yunj uxrá nij so' man Jesucristó, ne guun che'e nij so' xná'anj nij so' man so' che'é que'ee rasuun a.

<sup>54</sup> Dan me se nanó xrej uxrá nij so' nana ca'mii Jesucristó che'é rej guun ndo'o rá nij so' cutá' nij so' cacun' xráá Jesucristó che'é nana tu'va so' a.

## 12

*Nana nihánj taj xna'anj se vaa ne ca'vej rá Jesucristó qui'yaj nij síi tucuyón se-nana so' ndaa vaa qui'yaj nij síi fariseo a*

<sup>1</sup> Dan me se cunuu chre' uxrá yuvi rej vaj Jesucristó, ne uxrá chruj nij so', ne ndaa tiguíj tuvi' ma'an nij so' a.

Gaa ne guun che'e Jesucristó ca'mii so' asino yaan ga nij sí tucu'yón se-nānā so', cataj so':

—Cutumé soj man soj se gaa nanj quiran' soj sayuun, qui'yaj se-levadura nij sí fariseo á. Dan me se taj nij so', ne inanj nanā sa' a'mii nij so', taj nij so', tzaj ne taj ma'. Tu'va rma'an nij so' nanj adonj. Nuveé nanā sa' a'mii nij so' ma'. Inanj nanā nucu'í rá a'mii nij so' nanj adonj.

<sup>2</sup> Tzaj ne dan me se nu' nanā ca'mii yuve nij so' do', nu' rasuun 'yaj yuve nij so' do', nu' yo' ro', nurihanj quene'en cunudanj yuvi vaa güii adonj.

<sup>3</sup> Che'é dan nu' nanā ca'mii soj rej rmi' ro', vaa güii nurihanj yo' rej chuguun, ne nu' nanā ca'mii soj xréé tuvi' soj rej rá ve', ne nurihanj yo' vaa güii ndaa patio rihaan ve' adonj —taj Jesucristó rihaan nij so' a.

*Nanā nihánj taj xna'anj se vaa se cuchu'vi' ní' quene'en ní' yuvi ma'*

<sup>4</sup> Gaa ne cataj uún Jesucristó a:

—Dan me se tuvi' 'unj me soj, ne che'é dan cataj xna'anj 'unj rihaan soj se vaa se cuchu'vi' soj quene'en soj nij sí ticavi' man nee man soj ma'. 'O se asa' qui'yaj nij so' danj, gaa ne taj vaj doj se chi'ii qui'yaj nij so' man soj a ma'.

<sup>5</sup> Tzaj ne nihánj me se cataj xna'anj 'unj rihaan soj me sí cuchu'vi' soj ni'yaj soj man a. Dan me se vaa che'é cuchu'vi' soj ni'yaj soj Diose adonj. Asa' quisij ticavi' nii man soj, gaa ne so' me sí ca'nej man soj rihaan ya'an cacaa soj sese tumé soj cacun' adonj. Che'é dan taj 'unj rihaan soj se vaa vaa che'é cuchu'vi' soj ni'yaj soj man so' adonj.

<sup>6</sup> Ne'en soj daj vaa nij xtâj chrin' se vaa 'un' ya xo' nó chi' guēē cha'aa a. Tzaj ne taj ya'anj uxrá Diose man 'o' o' nij xo' a.

<sup>7</sup> Ne Diose me se vaa cuentá yuvé raā soj 'yaj so', ne ne'en so' me daj yuvé raā soj, ne che'é dan se cuchu'vi' soj che'é sayuun qui'yaj yuvi man soj ma'. 'O se uxrá vaa yu'vee doj nó soj rihaan xtâj chrin' yo', 'yaj Diose adonj.

<sup>8</sup> Ne cataj xna'anj 'unj rihaan soj cuano se vaa no xcuún soj nata' ya soj rihaan yuvi se vaa me soj sí nocó' manj, ne nu' sí 'yaj danj ro', vaa güii, ne 'unj sij ca'née Diose nijaj yu'unj man yuvi ro', nataj rihaan nij se-mozó Diose se vaa sij nocó' manj me so' a.

<sup>9</sup> Ne sí taj xna'anj rihaan yuvi se vaa nuveé sij nocó' manj me so' ro', vaa güii, ne cataj xna'anj yá 'unj rihaan nij se-mozó Réé 'unj se vaa nuveé sij nocó' manj me so' a ma'.

<sup>10</sup> "Dan me se 'unj sij ca'née Diose nijaj yu'unj man yuvi ro', ca'vee se ca'mii yo'o so' nanā chi'ii che'ej, ne ca'vee navij cacun' xráá so' qui'yaj Diose, tzaj ne sese ca'mii chi'ii yo'o so' che'é Nimán Diose, ne daj chihaa mίj se tinavij Diose cacun' yo' xráá so' a ma'.

<sup>11</sup> "Dan me se asa' tucuatúj nii man soj rá ve' tucu'yón ní' sij israelitá se-tucuanj Moisés ne canicun' soj rihaan nij sí uun chij, ne se nanó rá soj daj ca'mii soj che'é soj rihaan nij so' ma'.

<sup>12</sup> 'O se orá yo' ro', ma'an Nimán Diose ro', tucu'yón man soj daj ca'mii soj rihaan nij so' adonj —taj Jesucristó rihaan nij sí tucu'yón se-nānā so' a.

*Nihánj me cuentó nanó Jesucristó che'é 'o' sí ru'vee caraa sa' que'ē rasuun rihaan chumi nihánj a*

<sup>13</sup> Dan me se cataj yo' tuvi' nij yuvi yo' rihaan Jesucristó a:

—Cataj so' rihaan tinúú 'unj, ne cuxra' ta'aj so' yo'óo do', rasuun do', gaj, maestro —taj so' rihaan Jesucristó a.



14 Gaa ne:

—Me che'é guun rá so' se vaa guún 'un̄j síí a'ne' cacun' che'é soj gā. Me che'é ca'mīi 'un̄j che'é rasuun vaa rihaan roj tinūj soj, rá so', gā tinū' —taj Jesucristó rihaan so' a.

15 Gaa ne cataj Jesucristó rihaan nij yuvīi a:

—Tumé uxrá soj man soj rihaan nij rasuun xcoj ruvaā rá a. Nuveé rasuun man rihaan ní' qui'yaj cavii sa' nimán ní' ma' —taj Jesucristó rihaan nij yuvīi a.

16 Gaa ne dan me se nanó Jesucristó 'o se-cuento 'o síí ru'vee rihaan nij yuvīi a:

—'O síí ru'vee me 'o so', ne cavii ndo'o xnaā so', ne man ndo'o rasuun rihaan so',

17 ne dan me se taj so': "A me se qui'yáj gā rasuun man rihan̄j ne taj rej caraj man rasuun yo' gā", taj so' a.

18 Gaa ne: "Aan a. Aj ne'enj me se qui'yáj á. Tūcuanee 'un̄j man nij cuchruū nii, ne qui'yáj doj ve' xij, ne yo'o caraa chre' 'un̄j man nij rasuun, ne tinavīi 'un̄j man nij yo' rá nij ve',

19 gaa ne cataj 'un̄j rihaan niman̄j se vaa man ndo'o rasuun rihaan ní' cha ní', ne se nanó rá ní', maan se ve'é cha ní' do', ve'é co'lo ní' do', ve'é cayáán ní' do', ve'é cotoj ní' do' a. Danj cataj rihaan niman̄j che'é nij rasuun cumān rihan̄j", taj so' a.

20 Tzaj ne Diose ca'mii rihaan so', cataj Diose: "Síí ni'yon mé so' á. 'O se nij corá me se cavīi so', ne xa' rasuun caraa sa' so', tzaj ne me se guun yo' rihaan so', rá so' gā", taj Diose rihaan ru'vee yo' a.

21 Danj quirān' síí araa sa' rasuun che'é ma'an danj, ne taj vaj a doj rasuun sa' nicaj so', ni'yaj Diose a ma' —taj Jesucristó rihaan nij yuvīi a.

*Nanā nihánj taj xna'an̄j se vaa ne nó xcúún ní' nanā ndo'o rá ní' che'é se cha ní' do', che'é yatzīj cunuú ní' do' a*

22 Gaa ne cataj Jesucristó rihaan nij síí tucu'yón se-nanā so' a:

—Che'é dan cataj xna'an̄j 'un̄j rihaan soj se vaa taj che'é nanā ndo'o rá soj che'é soj ma'. Ne che'é se cha soj do', ne che'é yan quirī' soj se caráán xráá soj se nanó rá soj ma'.

23 Aj ne'en soj se vaa aj vaa i'na' soj, qui'yaj Diose, ne se guun nucaj Diose rque Diose cha soj, rá soj gā a na'. Daj chihāā míj se guun danj rá soj ma'. Ne Diose me síí ca'vee rque se cha soj ei. Ne Diose me síí qui'yaj nee man soj, ne se guun nucaj Diose rque Diose yatzīj caráán xráá soj, rá soj gā a na'. Daj chihāā míj se guun danj rá soj ma'. Ne Diose me síí ca'vee rque se caráán xráá soj ei.

24 "Xcaj soj cuentá daj 'yaj nij xcaa, ne ne unô nij xo' 'núú, ne ne rii nij xo' naa, ne taj se-cuchruū nij xo', tzaj ne Diose ro', rqué se chá nij xo' adonj. Ne sa' doj vaa soj rihaan xcaa ni'yaj Diose adonj. Ya sa' doj vaa soj chuguan̄j.

25 Ne nda' se nanó ndo'o rá soj che'é yan chre' vaa soj, tzaj ne a 'ó xco' se guun nucaj soj cachij xcaan soj doj qui'yaj ma'an soj ma'. Maan se Diose ro', me síí ne'en daj gā cachij soj, ne che'é dan taj che'é nanā rá soj a ma'.

26 Dan me se sese se ca'vee qui'yaj soj rasuun le'ej doj, ne asa' ca'vee qui'yaj soj rasuun nocoo doj, rá soj gā. Che'é dan taj che'é nanā ndo'o rá soj che'é nij rasuun nocoo doj a ma'.

27 "'O se xcaj soj cuentá ni'yaj soj nij yâj se vaa ve'é ndo'o vaa nij yâj a. Ne 'yaj suun nij yâj, tzaj ne ma'an Diose ro', me síí sa' ndo'o vaa qui'yaj man

nij yâj adonj. Ne ne rii nij yâj yu'vej ma'. Tzaj ne adj' se vaa sí rii yu'vej ne sa' uxrá vaa sagan' so' ro', vaa nij yatzíj nuu nij yâj adonj. Dan me se cataj xna'anj 'unj rihaan soj se vaa sí cu'naj Salomón sí cane gaa naá, ne ve'é uxrá vaa yatzíj nuu so', qui'yaj cunudanj sa'anj vaa rihaan so', tzaj ne nij doj vaa yatzíj nuu so' rihaan nij yâj man tacaan yo', qui'yaj Diose adonj.

<sup>28</sup> Dan me se danj nanj nij yâj man tacaan yo', tzaj ne sa' uxrá vaa nij yatzíj nuu nij yâj yo', 'yaj Diose, tzaj ne a'yuj ca'ne' níi man nu' coj do', yâj do', ne caraa níi man yo' rihaan ya'an, ne cacaa nu' nij yâj yo' nanj adonj. Ne a doj yu'vee taj nó yâj yo' a ma'. Táa a soj yuvií, ne se nanó rá soj ma'. Diose me sí rque sagan' soj adonj. Tzaj ne ne guun ya sa' rá soj se vaa Diose me sí racuj yá man soj man adonj.

<sup>29</sup> Ne xa' soj, tzaj ne se nano' ndo'o soj se cha soj do', se co'o soj do' ma'. Ne se nanó ndo'o rá soj che'é nij yo' ma'.

<sup>30</sup> O se nij sí man rihaan chumií nihánj síi ne ne'en daj vaa Diose ro', inanj 'yaj suun ndo'o nij so' che'é rasuun man rihaan chumií nihánj adonj. Tzaj ne nu' rasuun achiin man soj ro', aj ne'en Rej soj Diose se vaa achiin rasuun yo' man soj adonj.

<sup>31</sup> Tzaj ne nano' soj rej daj qui'yaj soj, ne guun chij Diose nimán soj, gaa ne rque Diose rasuun yo' rihaan soj adonj.

<sup>32</sup> Se cuchu'vi' soj ma'. Ase vaa daán Diose matzinj vaa soj, ne Diose tumé man soj, ne aj guun rá Rej soj Diose se vaa guun chij soj rihaan chumií nihánj ga so' vaa güii a.

<sup>33</sup> Cutu'vee soj si'yaj soj, ne go' soj sa'anj man nij síi nique á. Gaa ne vaa güii quirí' soj 'o nanj caraa nu' sa'anj rque, ne xa' nanj yo', tzaj ne daj chíhaa míj se xtuu nanj yo', ne xa' sa'anj yo', tzaj ne daj chíhaa míj se navij sa'anj yo' a. Yo' me se quirí' soj rej xta', ne rej xta' ro', taj vaj síi ituu ma'. Ne taj vaj xlúu chá rasuun ma'.

<sup>34</sup> Ne sese inanj che'é rasuun man rihaan chumií nihánj qui'yaj suun soj, gaa ne veé maan rihaan chumií nihánj quinaj nimán soj gaa nanj adonj. Ne sese inanj che'é rasuun man xta' ro', qui'yaj suun soj, gaa ne veé rej xta' ro', ca'anj nimán soj nanj adonj. Me rej ma'an araa soj rasuun, ne veé rej danj vaj nimán soj nanj adonj —taj Jesucristó rihaan nij síi tucu'yón se-nana so' a.

### *Nihánj me cuentó nanó Jesucristó che'é mozó na'vij naman ru'vee a*

<sup>35</sup> Ne cataj uún Jesucristó rihaan nij so' a:

—Ase vaa sí 'nij raan nuj catuun ro', danj gaa soj ei. Ase vaa sí nicaaj aga' chuguun aco' ya'an ro', danj gaa soj ei.

<sup>36</sup> Dan me se qui'yaj soj ndaa vaa 'yaj mozó na'vij so' naman se-ru'vee so' gaa ca'anj se-ru'vee so' cha'anj nara'aa ei. Dan me se asa' namán ru'vee ne nu' tara'a so' ta'yaa, ne nu' ca'nuu mozó yo' ta'yaa, gaa ne guun niha' rá se-ru'vee mozó yo' adonj.

<sup>37</sup> Ne cavíj sa' uxrá nij mozó 'yaj danj, che'é se ne cotoj nij so' gaa namán se-ru'vee nij so' a. Dan me se quene'en ya so' se vaa ne cotoj nij so' ma'. Cataj yá 'unj rihaan soj cuano se vaa ma'an ru'vee yo' ro', naqui'yaj sa' so' man so', çayáan se-mozó so' rihaan mesá, qui'yaj so', ne qui'yaj chuvíi ma'an so' cha nij se-mozó so' adonj.

<sup>38</sup> Dan me se ca'vee se rej yan' naman so' ni', ca'vee se rej taxrej naman so' ni', tzaj ne aj ne'en so' se vaa ve'é inanj na'vij nij mozó yo' man so', ne cavíj sa' uxrá nij mozó yo' adonj. Che'é dan qui'yaj soj ndaa vaa 'yaj nij mozó yo' ei.

39 Dan me se sese 'o síi tucuá ve' ro', aj ne'en so' me orá ca'na' síi ituu ne qui'yaj ituu síi ituu rasuun man tucuá so', ne uxrá cutumé so' tucuá so', ne se qui'yaj ituu síi ituu tucuá so' tzaj ma'. Maan se ne ne'en so' me orá ca'na' síi ituu man adonj.

40 Dan me se ta'nga' danj vaa guee 'unj sij nicaj yu'unj man yuvij, ne ne ne'en soj me orá ca'na' uún 'unj man adonj. Che'é dan yo' o ni'yaj soj á —taj Jesucristó rihaan nij síi tucu'yón se-nana so' a.

*Nana nihánj taj xna'anj daj quirán' síi ve'é 'yaj suun rihaan Diose do', daj quirán' síi ne 'yaj suun sa' rihaan Diose do' a*

41 Gaa ne xná'anj síi cu'naj Pedró man Jesucristó, cataj so' a:

—Señor. Che'é ma'an núj me nanó so' cuentó yo' na'. Ase che'é cunudanj yuvij xa' —taj Pedró, xná'anj so' man Jesucristó a.

42 Gaa ne cataj síi 'nij ra'a man ní' a:

—Che'é dan me sese cune' síi tucuá yo' o ve' man yo' o se-mozó so' se vaa cutumé mozó yo' man tuvi' mozó rque so' se chá rihaan nij so' orá chá nij so' chraa, ne daj qui'yaj mozó yo', rá soj ga. Sese ya ya sij ve'é 'yaj suun me so' do', sese ya ya sij avii raa me so' do', ne daj qui'yaj so', rá soj ga.

43 Gaa ne güii naman se-ru'vee mozó ro', sese quene'en se-ru'vee mozó se vaa ve'é 'yaj suun mozó se-suun ru'vee, ne cavij sa' uxrá mozó yo', qui'yaj se-ru'vee mozó yo' adonj.

44 Ya ya cataj xna'anj 'unj rihaan soj cuano se vaa cune' ru'vee yo' man mozó yo' guun so' síi tumé man cunudanj si'yaj ru'vee yo' a.

45 Tzaj ne sese guun rá mozó yo' se vaa guun raan ndo'o se-ru'vee so', gaa ne guun che'e so' go' so' man yo' o nij mozó do', man nij mozó chana do', ne cha so' co' o so' ne guun xno so' a.

46 Dan me se ne ne'en so' aman naman se-ru'vee so' a. Ne na'vij so' ca'na' ru'vee a. Tzaj ne sij güii sij orá sij, ne ca'na' ma'an se-ru'vee mozó yo', gaa ne ca'ne' nu' so' man mozó yo', ne cataj so' se vaa ca'anj mozó yo' rihaan ya'an ga yo' o nij síi ne amán rá ni'yaj man Diose a.

47 "Dan me se xa' mozó ne'en daj me rá se-ru'vee so' qui'yaj so', tzaj ne sese se qui'yaj so' danj, ne qui'yaj so' inanj se vaa rii nimán ma'an so' qui'yaj so', ne cayuun uxrá so' vaa güii adonj.

48 Ne xa' síi ne ne'en daj me rá se-ru'vee so' qui'yaj so', ne qui'yaj so' rasuun na'vej rá se-ru'vee so' qui'yaj so', tzaj ne maan che'é se ne ne'en so' ne qui'yaj so' rasuun chi'ij ro', maan che'é dan doj cayuun so' adonj.

"Ne síi ata suun nocoo doj 'yaj Diose ro', doj a guun rá Diose qui'yaj suun so' a. Ne síi tumé doj rasuun che'é Diose ro', doj a gaa rasuun nachin' Diose rihaan so' nanj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa cunu' ndo'o yuvij ga tuvi' yuvij che'é Jesucristó a*

49 Gaa ne cataj uún Jesucristó a:

—Ca'ná' 'unj rihaan chumij nihánj che'é rej guun rá 'unj taquacoj ya'an nimán yuvij, ne guun niha' rá nij yuvij canoco' nij yuvij man Diose adonj. Ne me ndo'o raj se vaa ra'yanj cacó' ya'an yo' nimán nij yuvij adonj.

50 Tzaj ne rej rihaan ní' me se vaa uxrá sayuun quirán' 'unj, se vaa nata' nu' sayuun yo' xráj nanj á.

51 Dan me se ca'ná' 'unj che'é rej dínj doj cayáan nij yuvij man rihaan chumij nihánj ga tuvi' yuvij, rá soj na'. Taj ma'. Cuanó nihánj me cataj 'unj

rihaan soj se vaa ca'ná' 'unj che'é rej nata' 'unj se-nanaj rihaan yuvij, tzaj ne se cuno cunudanj nij yuvij rihanj ma'. Che'é dan cunu' yuvij ga tuvi' yuvij adonj.

<sup>52</sup> Dan me se rej rihaan ní' me se, sese cayáán 'un' yuvij rá 'o ve', ne cunu' va'nuj nij so' ga yavij nij so', ne cunu' vij nij so' ga ya'núj nij so' adonj.

<sup>53</sup> Dan me se cunu' snó'o ga ta'nij snó'o so', ne cunu' ta'nij snó'o so' ga ma'an so', ne cunu' chana ga ta'nij chana no', ne cunu' ta'nij chana no' ga ma'an no' adonj. Ne cunu' chana ga choco' no', ne cunu' choco' no' ga ma'an no', che'é se-nanaj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj se vaa ne quene'en nij yuvij xcaj nij yuvij cuentá che'é sayuun quiran' nij yuvij ma'*

<sup>54</sup> Gaa ne cataj Jesucristó rihaan nij yuvij a:

—Dan me se soj me se sa' uxrá ne'en soj xcaj soj cuentá adonj. Nu' ne'en soj se vaa gaa avii ngaa rej ata' güii, ne nu' taj soj se vaa caman' uxrá maan, taj soj, ne veé danj 'yaj guex xa' maan, ne aman' ndo'o yo' nanj adonj.

<sup>55</sup> Ne nu' ne'en uún soj se vaa avii nana yuvaaj rej rque rej sur, ne nu' taj soj se vaa daj doj ca'na' ndo'o cachi' taj soj, ne veé danj 'yaj xa' cachi', ne maan ndo'o nanj adonj.

<sup>56</sup> Dan me se xa' soj sij nucui' rá me se síi sa' me soj taj soj, tzaj ne tu'va rma'an soj nanj adonj. 'Q se ne'en soj xcaj soj cuentá che'é se vaa rihaan chumij do', che'é se vaa rej xta' do', tzaj ne ne ne'en soj xcaj soj cuentá che'é sayuun quiran' soj sij man rihaan chumij nihánj vaa güii ma'.

<sup>57</sup> "Ne me che'é na'vee xcaj ma'an soj cuentá che'é se vaa no xcuún soj qui'yaj ma'an soj ga.

<sup>58</sup> Ne so' me se sese vaa síi me rá cuta' cacun' xráa so' rihaan nij síi nicaj suun, ne gaa tihaj vaj so' chrej ga so', ne ve'é ca'mij so' ga so', cataj so' rihaan so' se vaa: "Ca'ne' rá so', ne se cutá' so' cacun' xraj ma'", cataj so', ne ve'é ca'mij so' ga so' ei. Ne sese se qui'yáa so' danj ca'mij sa' so' ga so' gaa tihaj vaj roj soj chrej rihaan chumij nihánj, ne nicaj so' man so' ca'anj so' rihaan cuese, ne cuese yo' ro', taquachén man so' ra'a síi tumé taga', ne so' me síi caxrij taga' man so',

<sup>59</sup> ne yo' me se guun raan ndo'o so', ne ndaa navij naru'vee so' nu' cacun' qui'yáa so', gaa ne curihanj so' taga' nanj adonj —taj Jesucristó rihaan nij yuvij a.

## 13

*Nana nihánj taj xna'anj se vaa quirí' nu' ní' sese se ca'vej rá ní' canicaj nimán ní' tanáj ní' chrej chí'ij a*

<sup>1</sup> Güii dan me se man ta'aj nij yuvij, ne nata' nij so' rihaan Jesucristó che'é daj quiran' ta'aj nij síi man estadó Galilea gaa man nij so' ticavi' nij so' xcuu rihaan Diosé gaa ne curihanj nij tanuu 'yaj suun rihaan síi cu'naj Pilato, ne ticavi' nij tanuu man nij síi man estadó Galilea yo' a.

<sup>2</sup> Gaa ne canicaj Jesucristó cataj so' rihaan nij yuvij nata' nana yo' a:

—Che'é yan quiran' nij so' danj, ne che'é dan sij tumé doj cacun' rihaan cunudanj yo'ó nij síi ne estadó Galilea me nij so', ra soj na'.

<sup>3</sup> Taj ma'. Tzaj ne cataj xna'anj 'unj rihaan soj cuano se vaa sese se canicaj nimán soj tanáj soj chrej chí'ij, ne vaa güii quirí' nu' soj ne quiran' soj ndaa vaa quiran' nij so' adonj.

4 "Ñe xa' xnu' va'nuj nij sí cavi' gaa canee ve' nata' xcaan cu'naj Siloé xraá nij so', gaa ñe sij tumé doj cacun' rihaan cunudanj nij sí man chuman' Jerusalén me nij so', rá soj gaa na'.

5 Taj ma'. Tzaj ñe cataj xna'anj 'unj rihaan soj cuano se vaa sese se canicaj nimán soj tanáj soj chrej chí'ij, ñe vaa güii quirí' nu' soj ñe quirán' soj ndaa vaa quirán' nij so' adonj —taj Jesucristó rihaan nij yuvij a.

*Nihánj me cuentó nanó Jesucristó se vaa sese se guun rá ní' qui'yaj ní' ndaa vaa me rá Diose, ñe quirí' ní' a*

6 Gaa ñe nanó Jesucristó cuentó nihánj a:

—Dan me se 'o snó'o me se naj 'o xnaa so' naa chruj uvá, ñe nicun' 'o chruun higó rque naa uvá yo', tzaj ñe 'na' so' nano' so' chruj raá yo' chá so', tzaj ñe a 'o chruj ñe quirí' so' chá so' raá chruun yo', ñe che'é dan quirí' rá so' ní'yaj so' chruun yo' a.

7 Che'é dan cataj so' rihaan sí' yaj suun rque xnaa so': "Ní'yaj so' ei. Síj va'nuj ya yo' 'ná' 'unj nanó' 'unj chruj higó raá chruun nihánj, tzaj ñe a 'o chruj nuvi' raá chruun nihánj chá' ma'. Ca'ne' so' man yo', ñe taj che'é canicun' rma'an yo' rihaan to'ój a ma'", taj so' rihaan sí' yaj suun rque naa uvá yo' a.

8 Tzaj ñe sí' yaj suun rque naa uvá yo' ro', cataj rihaan so' a: "Qui'yáa so' se ndo'o, ñe daj orún' guëe yo' cuano tanáj ní' man chruun nihánj, ñe canaa 'unj nu' anicaj tacóo chruun yo', ñe caraá 'unj ya'luj tacóo chruun yo', señor.

9 Xraj, ñe sese yo' nahuun ro', ñe cumán chruj raá chruun yo', ñe quinaj chruun yo', qui'yaj ní' a. Se taj, ñe ca'ne' cachrij ní' man chruun yo' ei", taj sí' yaj suun naa uvá yo' rihaan sí' si'yaj chruun yo' a. —Dan me cuentó nanó Jesucristó rihaan nij yuvij yo' a.

*Nana nihánj taj xna'anj se vaa nahuun sa' 'o chana guun lacuu xraá, qui'yaj Jesucristó güii naránj rá nij yuvij israelitá a*

10 Dan me se 'o güii naránj rá nij yuvij israelitá me se tucu'yón Jesucristó rihaan nij yuvij cunuu chre' rá ve' tucu'yón nii se-tucuanj Moisés,

11 ñe dan me se rá ve' yo' ro', nicun' 'o chana guun lacuu xraá, ñe nana chree yanj nimán no' ro', me qui'yaj guun lacuu xraá no' a. Ñe aj quisij xnu' va'nuj yo' quirán' no' danj a. Dan me se ne ca'vee canicun' caya no' a ma'.

12 Dan me se quene'en Jesucristó man no', ñe canacúun so' man no', cataj so':

—Cuano nihánj me x'neë chí'ij xraá so', nocoj —taj Jesucristó,

13 ñe cuta' so' ra'a so' xraá no' a.

Nu' xcaj chana cuentá se vaa nahuun sa' no', ñe nu' guun che'e no' cataj no' se vaa sa' uxrá qui'yaj Diose a.

14 Tzaj ñe ca'maan rá sí' 'nij ra'a ve' tucu'yón nii se-tucuanj Moisés, che'é se güii naránj rá nij yuvij israelitá me güii qui'yaj cono'ó Jesucristó man chana yo' a. Che'é dan cataj sí' 'nij ra'a ve' yo' rihaan nij yuvij a:

—Vatan' güii me güii no xcuún ní' qui'yaj suun ní' 'o 'o smaná a. Ca'na' soj güii yo', ñe nahuun sa' soj ei. Se ca'na' soj nahuun sa' soj güii naránj rá ní' ma' —taj so' rihaan nij yuvij a.

15 Gaa ñe cataj sí' 'nij ra'a man ní' rihaan nij tuví' sí' 'nij ra'a ve' a:

—Quij ndo'o vaa nimán soj, ñe sí' nucuí' ndo'o rá me soj adonj. 'Q se taran' soj me se ne nache soj daán soj scúj do', daán soj burró do', rej numij xo', ñe nicaj soj man xo' 'anj soj rej co'q xo' na güii naránj rá ní' gaa na'.

16 Ne nihánj me nicun' chana nihánj, ne ta'níi ta'nij si'no xij ní' síi cu'naj Abraham me no', ne nihánj me quisij xnu' va'nuy yo' numij síi cu'naj Satanás man no', ne ca'vee se güii naránj rá ní' me güii cuan', tzaj ne vaa che'é ndo'o nache ní' man no' ra'a síi cu'naj Satanás adonj —taj Jesucristó rihaan síi 'nij ra'a ve' yo' a.

17 Ne gaa quisij ca'mii so' danj, gaa ne guun na'aj cunudanj nij síi guun rá cunuj ga so', gaa ne guun niha' rá cunudanj nij yuvii che'é cunudanj nij suun sa' nocoo qui'yaj so' a.

*Nihánj me cuentó nanó Jesucristó che'é caân cuêj mostazá xlá a*

18 Che'é dan cataj Jesucristó a:

—Daj gaa guun chij Diose rihaan chumii nihánj, rá soj ga.

19 Dan me se ase vaa achij caân cuêj mostazá xlá ro', danj gaa guun chij Diose rihaan chumii nihánj adonj. Dan me se nicaj yo'o so' man caân cuêj mostazá xlá ne caxrij so' caân yo' rque to'óo so', ne dan me se xra' caân yo', ne cachij yo', ne asa' cachij yo', ne ase vaa 'o chruun ro', danj vaa yo' a. Gaa ne cayuu nij xtâj vaj rej xta' raâ cuêj yo', ne qui'yaj nij xo' saca' nij xo' raâ cuêj yo' adonj. —Danj ca'mii Jesucristó rihaan nij yuvii a.

*Nihánj me cuentó nanó Jesucristó che'é levadura se 'yaj naraa nana rque rachruún a*

20 Gaa ne cataj uún Jesucristó a:

—Daj gaa 'o rasuun naqui'yaj ní' rihaan soj, gaa ne quene'en soj daj gaa guun chij Diose rihaan chumii nihánj, rá soj ga.

21 Dan me se naqui'yaj ní' 'o chana caxrij yo'óo levadura rque cunj hariná gaa 'yaj no' rachruún a. Dan me se ase vaa 'o chana, ne cuxra' ta'aj no' 'o va'nuy ya aga' yo'óo hariná, ne caxrij ndo'o no' yo'óo levadura, ne caxrij yuve no' man yo' ndaa navij naraa ndo'o nana rque yo' a. Ase vaa uun chij yo'óo levadura yo' rihaan cunj hariná ro', danj gaa guun chij Diose rihaan chumii nihánj adonj. —Danj ca'mii Jesucristó rihaan nij yuvii a.

*Nana nihánj taj xna'anj me síi ca'anj cayáán ga Diose ne me síi ca'anj rihaan ya'an a*

22 Gaa ne vaj Jesucristó cachén so' nij chuman' nocoo do', nij chuman' ra'a do', ne tucu'yón so' se-nana so' rihaan nij yuvii a. Ne danj nanj nichrun' so' nichrun' so' chuman' Jerusalén a.

23 Ne xná'anj yo'o so' man Jesucristó, cataj so':

—Ne doj nij síi ca'vee quinanj rihaan sayuun, qui'yaj Diose a na' —taj so', xná'anj so' man Jesucristó a.

Gaa ne cataj Jesucristó rihaan nij yuvii a:

24 —Ase vaa ta'yaa chruj ndo'o vaa rej cachén yuvii catuu yuvii rihaan Diose adonj. Qui'yaj nucuaj soj nimán soj che'é rej catuu soj rej yo' ei. Cataj xna'anj 'unj rihaan soj cuano se vaa guun ndo'o rá nij yuvii catuu nij so' rej yo', tzaj ne se guun nucuaj nij so' catuu nij so' ma'.

25 Ne asa' quisij canicun' caya síi tucua ve' yo' ne caráán so' ta'yaa, gaa ne soj ro', canicun' xe', ne guun che'e soj tica'mii soj ta'yaa, ne cataj soj: “Na'nyu so' ta'yaa catuu núj, Señor”, cataj soj, gaa ne cataj 'unj rihaan soj: “Ne ne'en uxraj me rej cavii soj a ma'”, cataj 'unj rihaan soj gaa nanj adonj.

26 Gaa ne guun che'e soj cataj soj: “Chá núj chraa do', co'o núj na ga so' do', ne tucu'yón so' se-nana so' chiháán núj nanj á”, cataj soj rihanj á.

<sup>27</sup> Gaa ne cataj uún 'unj rihaan soj: “Ne ne'en uxraj me rej cavii cunudanj soj sij 'yaj inanj cacun' a ma'. Naxuun soj man soj rihanj á”, cataj 'unj rihaan soj a.

<sup>28</sup> “Ne rej ca'anj soj me se rej ta'vee ndo'o yuvii me yo', ne ndaa cha ruj ma'an yuvii cúu yan' yuvii, ne quene'en soj man síi cu'naj Abraham do', man síi cu'naj Isaac do', man síi cu'naj Jacob do', man cunudanj nij síi nata' se-nana Diose gaa naá do', se vaa cayáan nij so' ga Diose asa' guun chij Diose rihaan chumii nihánj, ne xa' soj, tzaj ne quene'en soj se vaa aj quirir'ij nii man soj xe' nanj adonj.

<sup>29</sup> Ne güii guun chij Diose rihaan chumii nihánj ro', ca'na' ndo'o yuvii man cunu' chumii, ne cayáan nij so' rihaan se-mesa Diose, ne cha' nij so' chraa adonj.

<sup>30</sup> Ne nij síi ne guun chij rihaan chumii nihánj me se xtá' ro', guun chij nij so' a. Ne nij síi guun chij ndo'o rihaan chumii nihánj me se rej xtá' ro', guun nij so' síi nocó', qui'yaj Diose nanj adonj —taj Jesucristó rihaan nij yuvii yo' a.

*Nana nihánj taj xna'anj se vaa ne cuchu'vi' Jesucristó ni'yaj so' man síi cu'naj Herodes ma'*

<sup>31</sup> Ne güii dan me se chuchi' doj nij síi fariseo rihaan Jesucristó, ne cataj nij so' a:

—Curihanj so' estadó nihánj ca'anj so', ne síi nicaj suun rey cu'naj Herodes me se me ndo'o rá so' ticaví' so' mán so' á —taj nij síi fariseo rihaan Jesucristó a.

<sup>32</sup> Gaa ne cataj Jesucristó rihaan nij so' a:

—Ase vaa chunee avii ndo'o raq qui'yaj sayuun vaa síi cu'naj Herodes yo', ne ca'anj soj, ne cataj soj rihaan so' se vaa 'unj me se rii 'unj nana chree nimán nij yuvii, ne naqui'yaj sa' 'unj man nij síi ran', ne 'o güii cuan' ne 'o güii a'yuj ne rque va'nuj guee güii qui'yaj suun 'unj se-sunj, ne veé danj quisij se-sunj, qui'yaj nanj adonj.

<sup>33</sup> Tzaj ne vaa che'é qui'yaj suun 'unj cuan' ne a'yuj ne yataj, ne rque va'nuj güii qui'yaj suun 'unj che'é xrej 'unj, gaa ne curihanj 'unj estadó nihánj ei. 'Q se taj che'é caví' 'o síi nata' se-nana Diose rej yanij yo'ó chuman', ne veé chuman' Jerusalén caví' so' gaa ca'vee adonj —taj Jesucristó rihaan nij síi fariseo yo' a.

*Nana nihánj taj xna'anj daj quiran' nij síi ne chuman' Jerusalén a*

<sup>34</sup> Gaa ne cataj uún Jesucristó a:

—Naná uxra raj che'é soj sij man chuman' Jerusalén nihánj nanj á. Dan me se ticavi' soj man nij síi nata' se-nana Diose, ne go' soj yahij man nij síi ca'neé Diose cuchí' rihaan soj a. Guun que'ee ndo'o guun rá 'unj naqui'yaj chre' 'unj man soj cutumé 'unj man soj, tzaj ne taj se qui'yá' ca'vee ma'. Dan me se ase vaa 'yaj chuchee naqui'yaj chre' chuchee man ta'nii xo' caráan xo' xcóo xo' xraá ta'nii xo' ro', danj guun raj qui'yaj man soj, tzaj ne ne ca'vej rá soj qui'yaj danj a ma'.

<sup>35</sup> Yaj me se cutumé ma'an soj man soj nanj adonj. 'Q se cuano nihánj me se cataj xna'anj 'unj rihaan soj se vaa rej rihaan ní' ro', se quene'en uún soj manj ma'. Tzaj ne ndaa güii ca'na' uún 'unj rihaan chumii nihánj quene'en soj manj, ne cataj soj: “Ve'é uxra 'na' síi a'neé síi 'nij ra'a man ní' ei”, cataj soj a —taj Jesucristó ni'yaj so' man nij síi man Jerusalén yo' a.

## 14

*Nana nihánj taj xna'anj se vaa nahuun snó'o quixij cu'maan man, qui'yaj Jesucristó güii naránj rá nij yuvij israelitá a*

<sup>1</sup> Dan me se 'o güii naránj rá nij yuvij israelitá me se catúj Jesucristó rá ve' tucúá 'o síi uun chíj rihaan nij síi fariseo chá so' chraa, ne nij síi fariseo ro', tumé uxrá man so' daj qui'yaj so' a.

<sup>2</sup> Ne veé danj nicun' 'o síi quixij cu'maan man rihaan Jesucristó a.

<sup>3</sup> Gaa ne xná'anj Jesucristó man nij síi fariseo do', cataj so':

—No xcúún ní' ca'neé ní' chí'ij xráá síi ran' güii naránj rá ní', rá soj na'. Ase ne nó xcúún ní' xa' —taj Jesucristó, xná'anj Jesucristó man nij so' a.

Tzaj ne guun díj tu'va nij so' a.

<sup>4</sup> Gaa ne quita'aa Jesucristó man síi ran' yo', ne nahuun sa' so', qui'yaj Jesucristó, gaa ne na'néé Jesucristó chrej man so' a.

<sup>5</sup> Gaa ne ni'yaj Jesucristó rihaan nij síi fariseo yo', cataj so' a:

—Ne sese quinij ta'níi 'o tuvi' soj do', 'o daán soj scúj do', rá cuxruj na güii naránj rá ní', ne ra'yanj quirij soj man ta'níi soj do', man daán soj do', rá 'unj ei —taj Jesucristó rihaan nij síi fariseo a.

<sup>6</sup> Veé dan me se a 'o nana ne quirij nij so' ca'mij nij so' rihaan Jesucristó ma'.

*Nana nihánj taj xna'anj se vaa se nano' ní' rej sa' doj quitaj ní' a*

<sup>7</sup> Dan me se quene'en Jesucristó se vaa nij síi 'na' tucúá síi fariseo yo' ro', nano' ndo'o nij so' rej sa' doj quitaj nij so', gaa ne che'é dan tucuyón Jesucristó nana nihánj man nij so', cataj so' a:

<sup>8</sup> —Asa' canacúún ta'aj nii mán so' ca'anj so' cha'anj nara'aa, ne se ca'anj quitaj so' chruun xlá sa' doj ma'. 'O se ne ne'én so' sese canacunj nii man yo'ó síi sa' doj rihaan so' ne quitaj so' chruun xlá taj so' man adonj.

<sup>9</sup> Ne síi 'yaj cha'anj ro', cataj so' rihaan so': “Rque so' chruun yo' quitaj síi nihánj á”, cataj so' rihaan so', gaa ne guun na'aj so', ne chruun xlá nij doj ca'anj quitaj so', qui'yaj so' a.

<sup>10</sup> Dan me se asa' canacúún nii mán so', ne asa' cuchí' so' rej canuú cha'anj, ne rej nij doj ro', quitaj so' ei. Gaa ne asa' ca'na' síi canacúún mán so', gaa ne cataj so' rihaan so': “Cavij so' quitaj so' rej sa' doj nihánj, tinuj”, cataj so' rihaan so', gaa ne caraya'anj uxrá cunudanj nij síi 'na' cha'anj yo' ni'yaj nij so' mán so' nanj adonj.

<sup>11</sup> 'O se xa' síi me rá ticavij sa' man ma'an, tzaj ne quirij so', ne guun na'aj so' adonj. Ne xa' síi 'yaj nica' nimán, tzaj ne cavij sa' so' adonj —taj Jesucristó rihaan nij síi fariseo do', rihaan nij síi naquiyaj cuu se-tucuanj Moisés rihaan yuvij do' a.

*Nana nihánj taj xna'anj me síi canacunj ní' chá chraa ga ní' a*

<sup>12</sup> Gaa ne cataj Jesucristó rihaan síi canacúún man so' chá so' chraa a:

—Asa' guun rá so' ca'na' yuvij chá yuvij chraa ve' tucúá so', ne se canacúún so' man tuvi' so' do', man tinúú so' do', man nij síi ru'vee man chiháán so' do' ma'. Dan me se sese canacunj so' man inanj ma'an nij so', gaa ne vaa güii canacunj nij so' mán so' chá so' chraa ga nij so', gaa ne dan me se aj naru'vee nij so' nu' se chá rihaan so' danj rá se vaa gaa nanj adonj.

<sup>13</sup> Tzaj ne asa' canuú cha'anj qui'yáá so', ne canacunj so' man nij síi nique do', man nij síi rengo do', man nij síi tuchrij do', chá nij so' chraa ei.



14 Danj quí'yáá so', gaa ne nij so' me se taj rasuun rihaan nij so' naru'vee nij so' rihaan so' ma'. Gaa ne asa' cunuu i'na' uún nij sí sa' rihaan Diose, ne ma'an Diose naru'vee rihaan so', gaa ne cavii sa' uxrá so' adonj —taj Jesucristó rihaan sí canacúun man so' chá so' chraa a.

*Cuentó nihánj taj xna'anj me sí chá chraa ga Diose asa' guun chij Diose rihaan chumij nihánj a*

15 Dan me se cuno yo' o sí chá chraa ga Jesucristó nana ca'mii Jesucristó, gaa ne che'é dan cataj so' rihaan Jesucristó a:

—Cavii sa' cunudanj nij sí chá chraa ga Diose asa' guun chij Diose rihaan chumij nihánj nanj ei —taj so' rihaan Jesucristó a.

16 Gaa ne cataj Jesucristó rihaan so' a:

—Sí navij rá cha'anj nocoo ndo'o me so', ne nacúun so' ca'na' que'ee yuvij a.

17 Gaa ne dan me se maan orá chá nij so' chraa me ca'née sí navij rá cha'anj man se-mozó so' ca'anj cataj mozó yo' rihaan nij sí ca'na' se vaa ca'na' nij so' cha'anj chá nij so' chraa a. “Aj quisij guun chuvij, ne ca'anj ní' chá nij soj chraa ei”, taj mozó yo' rihaan nij sí ca'na' cha'anj yo' a.

18 Gaa ne guun che'e nij so' cataj 'o 'o nij so' rihaan mozó yo' se vaa se ca'vee cuchí' nij so' chá nij so' chraa a. Dan me se yo' o so' cataj: “Tzaj ne 'unj me se tihaj quiránj 'unj 'o yo'óó, ne vaa che'é ndo'o ca'anj 'unj quene'én 'unj yo'óó yo' a. Ne quí'yáá so' se ndo'o, cataj so' se vaa se ca'vee cuchí' 'unj ma'”, taj so' rihaan mozó yo' a.

19 Gaa ne yo' o so' cataj: “Maan se 'unj me se 'un' yuntá scúj quiránj 'unj, ne cuano nihánj me se ca'anj 'unj quene'én 'unj daj vaa scúj quiránj sese scúj sa' me xo' a. Ne che'é dan quí'yáá so' se ndo'o cataj so' se vaa se ca'vee cuchí' 'unj ma'”, taj so' rihaan mozó yo' a.

20 Ne yo' o so' ro', cataj uún rihaan mozó yo' a: “Unj me se tihaj xcaj 'unj chana, ne che'é dan se ca'vee cuchí' 'unj ma'”, taj so' rihaan se-mozó sí navij rá cha'anj yo' a. Ne veé danj ca'mii cunudanj nij sí aj quirí' ní'yaj ca'anj cha'anj yo' a.

21 “Dan me se namán mozó, ne nata' mozó nu' se vaa ca'mii 'o 'o nij so' rihaan se-ru'vee mozó a. Gaa ne ca'maan ndo'o rá sí navij rá cha'anj yo' gaa cuno so' se-nana se-mozó so', ne cataj so' rihaan se-mozó so': “Ra'yanj cavii so' ca'anj so' daj a nij callé, ne nicaj so' man nij sí nique do', man nij sí chée rengó do', man nij sí tchríi do', ca'na' so' nihánj, ne chá nij so' chraa ga ní' ei”, taj so' rihaan se-mozó so' a.

22 Veé danj quí'yaj se-mozó so', ne cuchí' uún mozó yo' rihaan se-ru'vee so', ne cataj so': “Aj quí'yáj nu' se vaa cataj so' rihanj, señor. Tzaj ne vaa rej quisij catuu doj yuvij uún a”, taj mozó yo' rihaan se-ru'vee so' a.

23 Gaa ne cataj ru'vee yo' rihaan mozó a: “Cavii so' ca'anj so' nu' nij chrej ca'aan do', nu' nij chrej catuun do', ne quí'yáá so' fuerzá man nij yuvij se vaa ca'na' nij so' á. Gaa ne caraa nu' ve' tucuj ei.

24 'O se cuano nihánj me se cataj xna'anj 'unj rihaan so' se vaa xa' nij sí canacúun ní' asino yaan, tzaj ne a 'o nij so' se ca'vee ca'na' chá chraa ga ní' a man adonj”, taj so' rihaan se-mozó so' a. —Veé danj quisij cuentó nanó Jesucristó a.

*Nana nihánj taj xna'anj se vaa yuun che'e ca'nej nimán ní' canoco' ní' man orún' Jesucristó a*

25 Dan me se que'ee uxrá yuvij vaj ga Jesucristó, ne canicaj so', cataj so' rihaan nij yuvij a:

26 —Sese me rá 'o so' ca'na' so' rihanj, ne sese guun rá so' se vaa sa' doj vaa rej so' do', nii so' do', nica so' do', ta'níu so' do', tinúu so' do', ra'vij so' do', ndaa nimán ma'an so' do', rihanj, ne se ca'vee guun so' 'o síi tucu'yón se-nanaj a ma'.

27 Ne síi na'vej rá quiran' sayuun che'é se me so' síi noco' manj ro', se ca'vee guun so' 'o síi tucu'yón se-nanaj a ma'.

28 "Dan me se soj, tzaj ne sese guun rá yo'o tuvi' soj cune' yo'o soj ve' nata' xcaan, ne síi qui'yaj ve' yo' me se asino nuchruj raq so' cuentá sese quisij se-sa'anj so' quisij nu' ve' yo', raj a.

29 Ne sese se qui'yaj so' danj nuchruj so' cuentá asino yaan, gaa ne asa' cuchruj so' tacóo ve', gaa ne se guun nucuaj so' qui'yaj so' nu' ve' a ma'. Ne nij síi ne'en se vaa qui'yaj so' ro', ca'nga' nacoq nij so' ni'yaj nij so' man so',

30 ne cataj nij so': "Síi nihánj me se guun che'e so' cune' so' ve', tzaj ne ne guun nucuaj so' quisij nu' ve' qui'yaj so' a ma'", cataj nij so' ni'yaj nij so' man síi guun che'e ve' yo' a.

31 "Ne dan me se sese vaa 'o síi nicaj suun rey vaa chi' mij tanuu rihaan, ne sese ca'na' yo'ó síi nicaj suun rey vaa icó mij tanuu rihaan cunu' ga so', gaa ne asino yaan xcaj so' cuentá sese guun nucuaj so' qui'yaj canaán so' rihaan síi vaa icó mij tanuu rihaan yo', ne sese guun nucuaj so' rá so', ne cavij so' cunu' so' ga nij síi 'na' yo' a.

32 Tzaj ne sese se guun nucuaj so' qui'yaj canaán so' rá so', gaa ne ca'nej so' síi ca'anj suun ca'mij ga síi 'na' yo' ndaa vaa se guun cunu' nij so' a. Danj cataj so' gaa tihaj 'na' síi cunu' ga so' gan' a. Gaa ne cachinj ni'yaj síi ca'anj suun yo' rihaan síi 'na', ndaa vaa ca'ne' rá so' ga suun cunu' a.

33 "Dan me se ase vaa xcaj síi cune' ve' do', síi cunu' ga tuvi' do', cuentá sese guun nucuaj roj so' qui'yaj roj so' danj ro', veé danj qui'yaj guee soj sij me rá canoco' manj ei. Ne sese se guun rá soj tanáj xco soj nu' si'yaj soj do', nu' tuvi' soj do', canoco' soj manj, ne se ca'vee guun soj síi tucu'yón se-nanaj a ma'.

34 "Q se ase vaa yaan ga chraa ro', danj vaa nij síi tucu'yón se-nanaj ga chumij nihánj, ne vaa se uun ndo'o yaan nanj á. Dan me se sese ne 'ne' chá yaan yo', gaa ne taj se qui'yá' cunu sa' yaan gaa a ma'.

35 Taj se guun yaan yo' rihaan to'óo ní' cunu sa' to'óo ní' ma'. Taj se guun yaan yo' rihaan ya'luj se vaa cunu sa' doj ya'luj ma'. A doj rasuun se cavii sa', qui'yaj yaan yo' ma'. Maan se ri'ij uun nii man yaan vaa danj xe' a.

"Dan me se sese taj yu'uj xrée soj, ne cunq soj nana nihánj ei —taj Jesucristó rihaan nij yuvij yo' a.

## 15

### *Nihánj me cuentó che'é matzinj ca'anj ni'ya a*

1 Dan me se cuchi' que'ee síi a'néj puextó do', que'ee síi tumé cacun' do', rihaan Jesucristó a. 'Q se guun rá nij so' cunq nij so' se-nana so' a.

2 Ne xa' nij síi fariseo do', nij síi naqui'yaj cju se-tucañ Moisés rihaan yuvij do', tzaj ne ca'maan rá nij so' ni'yaj nij so' man Jesucristó, ne nij ca'mii nij so' che'é so', che'é rej ve'é nicaj tuvi' so' ga nij síi tumé cacun' ne chá so' chraa ga nij so' a.

3 Gaa ne nanó Jesucristó 'o cuentó nihánj rihaan nij so' a:

4 —Dan me se sese yo'q tuvi' nij soj nicaj 'o cientó matzinj, ne sese ca'anj ni'ya orún' guee daán so' matzinj, ne tanáj so' yo'ó ca'anj chihaa xnu' ca'anj daán so' matzinj rej tacaan, ne cavii so' ca'anj nano' so' man orún' daán so' matzinj ca'anj ni'ya á. Ne se ca'ne' rá so' ma'. Tananj ya ca'anj so' nano' so' man daán so' matzinj, gaa ne uun daj nari' so' man yo' adonj.

5 Ne asa' quisij nari' so' man xo', gaa ne cuta' so' man xo' tacaan xcóo so', ne guun niha' ndo'o rá so' a.

6 Ne asa' namán so' tucua' so', gaa ne nacunj so' man nu' tuvi' so' síi ne chiháan so', ne cataj so' rihaan nij tuvi' so': “Guun niha' rá soj gaj ei. 'Q se narij danj matzinj ca'anj ni'ya ei”, cataj so' rihaan tuvi' so' a.

7 Ne cuanoj nihánj me cataj xna'anj 'unj rihaan soj se vaa xta' rej ne Diose ro', guun niha' doj rá nij síi man yo' ni'yaj nij so' man orún' síi tumé cacun' gaa canicaj nimán so' canoco' so' chrej sa' a. Tzaj ne se caráya'anj nij so' man ca'anj chihaa xnu' ca'anj, ése sij sa' me nij so', rá nij so' ma', ne taj che'é canoco' nij so' tucuaán naca narqué Diose, rá nij so' ma' —taj Jesucristó rihaan nij so' a.

### *Nihánj me cuentó che'é pesó xoo ca'anj ni'ya a*

8 Ne cataj uún Jesucristó a:

—Ne sese nıcaj 'o chana chi' pesó xoo, ne sese ca'anj ni'ya orún' pesó xoo yo', ne tucuaq' no' ya'an aga' chuguun, ne naca' no' nu' ve' tucua' no', ne uxrá nano' no' pesó xoo yo', ne se ca'ne' rá no' ma'. Tananj uxrá nano' no' man pesó xoo yo', uun daj nari' ya' no' man yo', gaa ne ca'ne' rá no' adonj.

9 Ne asa' quisij nari' no' pesó xoo yo', gaa ne canacunj no' man nu' tuvi' chana no' níi ne x'nuú ve' tucua' no', ne cataj no' rihaan nij tuvi' chana no': “Guun niha' rá soj gaj á. 'Q se narij se-sa'anj pesó xoo ca'anj ni'ya ei”, cataj no' rihaan tuvi' chana no' a.

10 Dan me se cataj xna'anj 'unj rihaan soj a. Ndaa rá se vaa guun rá chana gaa nari' no' se-sa'anj no' ro', danj guun niha' uxrá rá nij se-mozó Diose ni'yaj nij so' man orún' síi tumé cacun' gaa canicaj nimán so' canoco' so' chrej sa' adonj —taj Jesucristó rihaan nij so' a.

### *Nihánj me cuentó che'é síi tumé cacun' canicaj rihaan rej a*

11 Gaa ne cataj uún Jesucristó a:

—'Q síi vaa vij ta'níi me so' a.

12 Ne cataj síi cunij rihaan rej so' a: “Me rá 'unj cuxra' ta'aj so' rasuun rque so' manj guun si'yaj, ataj”, taj so' rihaan rej so' a. Gaa ne cuxra' ta'aj snó'o yo' nu' si'yaj so', ne rque so' ta'aj si'yaj so' rihaan 'o 'o ta'níi so' a.

13 Dan me se cachén doj güii, gaa ne naquiyaj chre' síi cunij yo' nu' si'yaj so', ne cavii so' ca'anj so' chuman' naj gan', ne quiyaj ndo'o so' se nij, ne cutun' rma'an so' nu' se-sa'anj so' a.

14 Quisij cutun' so' nu' se-sa'anj so', gaa ne cachén ndo'o x'naa chuman' yo', ne guun che'e so' quiran' ndo'o so' sayuun, ne quina'aan ndo'o rque so', ne taj vaj a doj se chá rihaan so' cha so' a.

15 Dan me se catúj so' rihaan 'o síi chihanj chuman' yo', ne ca'ne' síi chihanj chuman' yo' suun rihaan so' ca'anj so' se-rancho síi chihanj yo' cutumé so' xcáa a.

16 Tzaj ne na'aan ndo'o rque so', ne ndaa guun rá so' cha so' coj go' nii cha nij xcáa a. Tzaj ne ne rque nii coj yo' cha so' a ma'.

17 “Dan me se 'o güii ne nahuun sa' raq so', ne guun che'e so' xcaj so' cuentá, ne nanuj rá so' rej so' a. Ne me rá so': “Nij se-mozó réj, tzaj ne man ndo'o se

chá rihaan réj, ne man ndo'o se chá rihaan se-mozó réj a. Ne nihánj me caví 'unj qui'yaj x'naa nanj á.

18 Naxumaan 'unj, ne nán' 'unj rej ne réj, cataj 'unj rihaan réj: Tumej cacun' rihaan Diose, ne tumej cacun' rihaan so', ataj.

19 Taj che'é cataj so' se vaa ta'níi so' mej cuano a ma'. Maan se qui'yáa so' se ndo'o, ne guún 'unj mozó rihaan so', qui'yáa so', ruguanj, cataj 'unj rihaan réj", guun rá síi cunj yo' a.

20 "Gaa ne cavii so' ca'anj so' rej ne rej so' a. Dan me se gan' ndo'o vaj so' chéé so', ne quene'en rej so' man so', ne cunuu 'eé ndo'o rá rej so' man so', ne cunánj rej so' ndaa rej vaj so', ne na'yaan rej so' man so', ne cacrón tu'va rej so' man so' a.

21 Gaa ne cataj síi cunj yo' rihaan rej so' a: "Tumej cacun' rihaan Diose, ne tumej cacun' rihaan so', ataj. Taj che'é cataj so' se vaa ta'níi so' mej cuano a ma'. Maan se qui'yáa so' se ndo'o, ne guún 'unj mozó rihaan so', qui'yáa so', ruguanj", taj so' rihaan rej so' a.

22 Tzaj ne ca'mii rej so' rihaan nij mozó man rihaan rej so', cataj rej so': "Ra'yanj nıcaj soj yatzi sá' ndo'o ca'na' soj cunuú ta'nıj, ne ca'na' se'ej sá' cunuú ra'a ta'nıj, ne ca'na' canj naca qui'nıj tacóo so' á.

23 Ne ticavi' soj man scúj le'ej ramii ndo'o, ne qui'yaj chuvii soj, ne chá ní', ne qui'yaj ní' cha'anj, ne guun niha' uxrá rá ní' ei.

24 "O se ta'nıj nihánj me se ase vaa síi cavi' gaa so' rihanj, tzaj ne nihánj me se cunuu i'na' uún so' rihanj, ne ase vaa síi ca'anj ni'ya gaa so', tzaj ne nihánj me se narij man so' nanj adonj", taj rej so', ne guun che'e nij so' guun niha' uxrá rá nij so' a.

25 "Tzaj ne vaa síi chava' uún, ne 'yaj suun so' se-rancho rej so' a. Dan me se 'na' nique síi chava' yo', ne gaa quinichrun' so' ve', ne cuno so' se vaa go' ndo'o miscá chra' dı', se vaa ra'ánj ndo'o yuvii dı' a.

26 Gaa ne canacúun síi chava' yo' man 'o mozó, ne ca'na' yo'o mozó rihaan so', ne xná'anj so' man mozó, ne: "Me che'é 'yaj nii nu' cha'anj ga", taj so' rihaan mozó yo' a.

27 Gaa ne cataj mozó rihaan so' a: "Namán tinúu so', ne cavi' scúj le'ej ramii ndo'o, qui'yaj rée so', che'é se nari' uún so' ta'níi so' ne vaa nucuaj ta'níi so' nari' so' a", taj mozó rihaan síi chava' yo' a.

28 "Dan me se ca'maan rá síi chava', ne na'vej uxrá rá so' catuu so' rá ve' a. Tzaj ne curihanj rej so', gaa ne canacúun rej so' man so' ca'na' so' a.

29 Tzaj ne cataj so' rihaan rej so' a: "'Unj nihánj me se aj quisj que'eé yo' qui'yaj suun 'unj rihaan so' nihánj, ne cunudanj nij nana cataj xna'anj so' rihanj ve'é cunoj a. Ne a 'o güii ne rque so' a 'o tana le'ej rihanj ne qui'yaj chuvii 'unj ne chaj ga nij tuvij a ma'.

30 Tzaj ne nihánj me se namán ta'níi so' síi chá nu' si'yáa so' gaa chéé so' ga nij chana niha' rá, ne ticavi' so' scúj le'ej ramii che'é so' a", taj síi chava' yo' rihaan rej so' a.

31 "Gaa ne cataj rej so' rihaan so' a: "Maan se so' me se 'o né so' ga 'unj nihánj, rej. Ne nu' rasuun si'yá me si'yáa so', rej.

32 Tzaj ne vaa che'é guun niha' rá ní' gaa namán tinúu so', rej. 'O se tinúu so' ro', ase vaa 'o síi cavi' gaa so' rihanj, tzaj ne nihánj me cunuu i'na' uún so', ne ase vaa 'o síi ca'anj ni'ya gaa so' rihanj, tzaj ne cuano nihánj me se aj narij man so' nanj adonj", taj rej so' rihaan síi chava' yo' a. —Veé danj quisj cuentó nanó Jesucristó rihaan nij so' a.

## 16

*Cuentó nihánj taj xna'anj daj qui'yaj ní' gā si'yaj ní' rihaan chumií nihánj, ne ca'vee cayáán ní' gā Diose asa' guun chíj Diose rihaan chumií nihánj a*

<sup>1</sup> Gaa ne cataj Jesucristó rihaan nij sí tucu'yón se-nanā so' a:

—Sí ru'vee me yo'ó so', ne nuu 'o mayordomo rihaan so' sí tumé nu' si'yaj so' a. Dan me se cuta' ní cacun' xráá mayordomo yo' rihaan ru'vee se vaa cutun' ndo'o so' si'yaj ru'vee a.

<sup>2</sup> Gaa ne canacúun ru'vee man mayordomo, ne ca'na' mayordomo rihaan so', ne cataj so' rihaan mayordomo yo' a: “Aj ca'na' nanā rihanj se vaa cutun' ndo'o so' si'yáj, ne ne ne'en uxraj me che'é qui'yáá so' danj a ma'. Tzaj ne cataj xna'anj so' rihanj daj qui'yáá so' gaa cutumé so' si'yáj á. 'O se se ca'vee cunuú so' doj rihanj cutumé so' si'yáj a ma'”, taj ru'vee rihaan mayordomo yo' a.

<sup>3</sup> “Dan me se curihanj mayordomo, ne guun rá so' a: “Nihánj me se daj qui'yáj, ne ca'nee se-ru'vee 'unj suun ra'aj, ne daj qui'yáj cuano, raj a. 'Unj me se se guun nucuáj qui'yaj suun 'unj suun 'ee, ne na'aj 'unj cachin' 'unj caridad, na'aj 'unj cachee rma'anj nanj á.

<sup>4</sup> Aan a. Nihánj me qui'yáj nanj á. Gaa ne asa' ca'néj ru'vee suun ra'aj gaa ne nuvi' rej ca'anj 'unj, gaa ne canacunj yo'ó nij so' manj ca'anj 'unj tucua' yo'ó nij so' cayánj a”, guun rá so' a.

<sup>5</sup> “Gaa ne canacúun so' man nij sí qui'yaj xcúun rihaan se-ru'vee so', ne ca'na' 'o 'o nij so' rihaan so' a. Gaa ne rihaan sí taj yaan rihaan yo'ó nij so' cataj so': “Me daj qui'yaj xcúun so' rihaan se-ru'vee 'unj gā”, taj so', xna'anj so' man sí taj yaan yo' a.

<sup>6</sup> Gaa ne so' cataj: “'O cientó tambo casté qui'yaj xcúnj rihaan se-ru'vee so' a”, taj so' rihaan mayordomo yo' a. Gaa ne cataj mayordomo yo' rihaan so': “Nícaj so' dáán so' yanj cuentá nihánj, tír'í so' man yo', ne ra'yanj cayáán so', ne qui'yáá so' yo'ó yanj naca, ne cachron so' rihaan yanj naca se vaa vij chihaa chí' guee tambo qui'yaj xcúun so' á”, taj mayordomo yo' rihaan sí taj yaan yo' a.

<sup>7</sup> Gaa ne xna'anj so' man yo'ó so', cataj so': “Ne so' gā. Me daj qui'yaj xcúun so' rihaan se-ru'vee 'unj gā”, taj so', xna'anj so' man yo'ó so' yo' a. “'O cientó nanj 'núú trigó a”, taj yo'ó so' a. “Nícaj so' dáán so' yanj cuentá nihánj, tír'í so' man yo', ne qui'yáá so' yo'ó yanj naca, ne ca'anj chihaa guee nanj cachron so' rihaan yanj naca yo' á”, taj mayordomo rihaan yo'ó so' a.

<sup>8</sup> “Dan me se xcaj se-ru'vee mayordomo yo' cuentá se vaa qui'yaj chí'ij ndo'o mayordomo yo' rihaan so', tzaj ne ca'mii sa' ru'vee che'é mayordomo cataj ru'vee se vaa sij avii ndo'o raá me mayordomo yo' adonj. Danj nanj nij sí man rihaan chumií nihánj cuano, tzaj ne gaa 'yaj suun nij so' gā tuvi' ma'an nij so', ne doj a avii raá nij so' rihaan nij sí nocó' se-nanā Diose nanj á.

<sup>9</sup> “Gaa ne cuano nihánj me se cataj xna'anj 'unj rihaan soj se vaa nij rasuun man rihaan chumií nihánj, tzaj ne 'yaj ndo'o nij yuvií cacun' che'é rej qui'yaj canaán nij yuvií rasuun man rihaan chumií nihánj, ne soj ro', vaa che'é nícaj soj si'yaj soj rasuun man rihaan chumií nihánj, ne go' soj man yuvií gaa ne guun tuvi' soj gā nij yuvií, qui'yaj rasuun yo' a. Ne güií navij nu' rasuun man rihaan chumií nihánj me se aj quiri' ndo'o soj tuvi' soj sí cayáán gā soj, gaa ne ve'é ndo'o cayáán soj gā nij tuvi' soj gā Diose rej xta' nu' cavii nu' ca'anj a.

10 'Q se síí ve'é tumé doj tzin' rasuun ro', so' me síí guun nucuaj cutumé nocoo rasuun, ne síí 'yaj chí'íi ga doj rasuun ro', chí'íi doj qui'yaj so' ga nocoo rasuun ei.

11 Che'é dan sese ne guun nucuaj soj cutumé sa' soj nij rasuun chí'íi man rihaan chumií nihánj, gaa ne me síí guun rá rque nij rasuun ya rihaan soj cutumé soj, rá soj ga. Taj vaj síí guun rá qui'yaj danj a ma'.

12 Ne nuveé si'yaj ma'an ya soj me nij rasuun man rihaan chumií nihánj a man adonj. Ne sese ne guun nucuaj soj cutumé sa' soj nij rasuun man rihaan chumií nihánj, ne me síí guun rá rque rihaan soj rasuun guun si'yaj ma'an ya soj rej xta', rá soj ga. Taj síí guun rá qui'yaj danj ma'.

13 "Taj vaj síí guun nucuaj cutumé sa' si'yaj vij ru'vee ma'. Sese qui'yaj suun ní' rihaan vij ru'vee, ne nachri' ní' ní'yaj ní' man 'o ru'vee yo', ne caran' rá ní' ní'yaj ní' man yo'ó ru'vee yo' a. Se guun nucuaj ní' caran' rá ní' ní'yaj ní' man vij ru'vee ma'. Ne xa' soj, tzaj ne se ca'vee qui'yaj suun soj che'é Diose ne qui'yaj suun soj che'é nij rasuun man rihaan chumií nihánj a ma' —taj Jesucristó rihaan nij síí tucu'yón se-nana so' a.

### *Nana nihánj taj xna'anj se vaa tumé nij síí fariseo cacun' rihaan se-tucuqñj Moisés a*

14 Dan me se nij síí fariseo ro', me síí aran' ndo'o rá ni'yaj sa'anj, ne gaa cuno nij so' cunudanj se-nana Jesucristó nana che'é rasuun man rihaan chumií nihánj, gaa ne ca'nga' nacoq nij so' ni'yaj nij so' man Jesucristó a.

15 Gaa ne cataj Jesucristó rihaan nij so' a:

—Xa' soj, tzaj ne nuvi' cacun' tumé soj ni'yaj yuvij, 'yaj soj ma'. Tzaj ne Diose ro', me síí ne'en daj vaa nimán soj adonj. 'Q se sa' uxrá vaa 'yaj yuvij, rá tuvi' yuvij, tzaj ne chí'íi ndo'o 'yaj nij yuvij, rá Diose nanj adonj.

16 "Q se gaa ataa ca'na' síí cu'naj Juan síí cuta' ne man yuvij me se cuno yuvij rihaan inanj se-tucuqñj Moisés do', rihaan nij síí nata' se-nana Diose gaa naá do', tzaj ne yaj me se uno ndo'o yuvij nana sa' nana che'é güii guun chij Diose nimán yuvij man rihaan chumií nihánj, ne me inanj rá cunudanj nij yuvij cataj ma'an nij yuvij daj qui'yaj Diose asa' guun chij Diose adonj.

17 Tzaj ne ne nó xcúun ní' tanáj ní' a 'ó nana rqué Diose rihaan ní' canoco' ní' ma'. 'Q se ca'vee a doj quinavij rej xta' do', ca'vee a doj quinavij chumií nihánj do', tzaj ne se ca'vee quinavij a doj nana rqué Diose rihaan ní' canoco' ní' ma'.

18 Dan me se sese quiri'ij yo'ó so' man nica so', ne sese xcaj so' man yo'ó chana, ne cutumé so' cacun', ne sese xcaj yo'ó so' man chana quiri'ij chii man, ne cutumé so' cacun' uún adonj —taj Jesucristó rihaan nij síí fariseo yo' a.

### *Nihánj me cuentó nanó Jesucristó che'é ru'vee ne che'é 'o síí niqñe cu'naj Lázaro a*

19 Gaa ne nanó Jesucristó cuentó nihánj a:

—Ru'vee me yo'ó so', ne yatzíj sa' inanj cunuú so', ne daj a güii uun ndo'o nihaa sa' tucuá so', ne guun niha' uxrá rá so' rihaan chumií nihánj a.

20 Ne naj 'o síí niqñe cu'naj Lázaro rihaan yo'óo ta'yaa ve' tucuá ru'vee yo', ne mán ndo'o luj xráá síí niqñe yo',

21 ne guun rá síí cu'naj Lázaro cha so' se quiniñ rihaan yo'óo rej chá ru'vee yo' chraa, tzaj ne daj doj chuvee ca'na' chavé luj xráá so' a.

22 "Dan me se gaa quisíj güii cavi' síi nique yo', gaa ne nicaj nij se-mozó Diose man so' ca'anj so' rej sa', ne na'yaan síi cu'naj Abraham man so' a. Ne cavi' ru'vee uún, ne cachin' nii man so' a.

23 Dan me se ca'anj so' rihaan ya'an, ne quiran' uxrá so' sayuun rihaan ya'an yo', gaa ne naxcaj so' rihaan so', ne quene'en so' se vaa gan' ndo'o ne síi cu'naj Abraham, ne na'yaan Abraham man síi cu'naj Lázaro yo' a.

24 Gaa ne canacúún so' man síi cu'naj Abraham, cataj so': "Cunuu 'ee rá so' manj, ataj Abraham. Ne ca'nej so' man síi cu'naj Lázaro se vaa ca'na' so' ne tiguíj so' raá ra'a so' rque na, ne tucuachree so' ra'a so' daa 'unj, gaa ne cunuu cuj doj raj qui'yaj so', ataj. 'O se na'aan ndo'o manj, 'yaj ya'an nihánj nanj á", taj ru'vee yo' rihaan síi cu'naj Abraham a.

25 "Tzaj ne cataj Abraham rihaan so': "Tzaj ne nanuj rá so', ta'nij, se vaa gaa gaa i'na' so' rihaan chumij ne nicaj so' inanj rasuun sa', ne Lázaro me se inanj rasuun chi'ii nicaj so' nanj á. Ne cuano nihánj me se uun niha' nimán so', ne ma'án so' me se ran' sayuun a.

26 Ne danj inanj uún, ne nuu 'o yu'uj cunuu ndo'o rej ne ní, ne veé danj se ca'vee cuchí' yuvij man nihánj ndaa rej ne nij soj yo', ne síi man yo' se ca'vee ca'na' rej nihánj a ma'", taj Abraham rihaan ru'vee yo' a.

27 "Ne cataj ru'vee yo' rihaan Abraham a: "Che'é dan qui'yáa so' se ndo'o, ataj, ne ca'nej so' man síi cu'naj Lázaro ca'anj so' tucua réj,

28 ne vaa 'un' tinúj, ne me rá 'unj cataj xna'anj so' rihaan nij so' daj rán' 'unj nihánj, ne se ca'na' nij so' uún rej rán' 'unj sayuun nihánj a ma'", taj ru'vee rihaan Abraham a.

29 Gaa ne cataj Abraham rihaan so' a: "Vaa se-nana síi cu'naj Moisés do', se-nana nij síi nata' se-nana Diose gaa naá do', nicaj nij so' á. Ca'vee cunúj nij so' nana yo' ei", taj Abraham rihaan ru'vee a.

30 "Se cuno nij so', man ataj Abraham. Tzaj ne sese ca'anj 'o síi cavi' rihaan nij so', gaa ne canicaj nimán nij so' canoco' nij so' chrej sa', raj a", taj ru'vee rihaan Abraham a.

31 "Tzaj ne cataj Abraham rihaan so' a: "Sese se ca'vej rá nij so' cunúj nij so' rihaan síi cu'naj Moisés do', rihaan nij síi nata' se-nana Diose gaa naá do', ne ca'vee se cunuu i'na' uún 'o síi cavi', tzaj ne se cuchumán rá nij so' ni'yaj nij so' man so' a ma'", taj Abraham rihaan ru'vee yo' a. —Veé danj quisíj cuentó nanó Jesucristó a.

## 17

*Nana nihánj taj xna'anj se vaa no xcúún ní racuj ní man tinúú ní se qui'yaj tinúú ní cacun' a*

1 Gaa ne cataj Jesucristó rihaan nij síi tucu'yón se-nana so' a:

—Xa' chumij nihánj, tzaj ne man ndo'o chrej chi'ii canoco' yuvij, ne vaa ya'núj uxrá rihaan nij yuvij canoco' nij yuvij chrej chi'ii adonj. Tzaj ne nique síi 'yaj anoco' yuvij chrej chi'ii yo' adonj.

2 Daj chihaa míj se cavii sa' so' ma'. Ne'en soj se vaa sese toco' vaj nii yuvej xij váj 'núú trigó man chihá yo'o so', ne sese tagüéj nii man so' rque na ya'anj, ne nij uxrá vaa ran' síi 'anj nij rque na ya'anj yo' nanj adonj. Tzaj ne nij doj quiran' síi qui'yaj chi'ii nimán yo'o tuvi' soj síi nica' nimán nanj á. 'O se quiran' so' sayuun nu' cavii nu' ca'anj nanj adonj.

3 "Tumé uxrá soj man soj daj qui'yaj soj á. Sese qui'yaj tinúú so' cacun', ne cataj so' rihaan so' se vaa nij ndo'o qui'yaj so', ne sese canicaj nimán so' tanáj so' chrej chi'ij, ne caraá x'naa so' che'é cacun' tumé so' ei.

4 Dan me se ca'vee se chij ya qui'yaj so' cacun' rihaan so' rque orún' güii, tzaj ne sese chij cuchí' so' rihaan so' ne cataj so' se vaa canicaj nimán so' ne nij vaa cacun' qui'yaj so' rá so', ne caraá x'naa so' rihaan so' ei —taj Jesucristó rihaan nij síu tucul'yón se-naṇa so' a.

*Nana nihánj taj xna'anj che'é rasuun guun nucuaj ní qui'yaj ní sese cuchuman rá ní ni'yaj ní man Diose a*

5 Gaa ne nij apóstol cune' Jesucristó man ro', cataj chuvij nij so' rihaan ma'an Jesucristó sij 'nij ra'a man ní' a:

—Cataj xna'anj so' rihaan núj daj qui'yaj núj, gaa ne doj a cuchuman rá núj ni'yaj núj Diose á —taj nij so' rihaan Jesucristó a.

6 Gaa ne cataj síu 'nij ra'a man ní' rihaan nij so' a:

—Sese daj se 'o snij cuchuman rá soj ni'yaj soj man Diose, ne sese ase vaa caân cuêj mostazá xlá gaa cuchuman rá soj, ne cataj soj rihaan chruun se vaa curihanj chruun yo'óo rej nicun' chruun ne ca'anj chruun canicun' chruun rque na ya'anj, ne cunḡ chruun rihaan soj ei —taj Jesucristó rihaan nij so' a.

*Nana nihánj taj xna'anj se vaa se ca'mii xtá' ní che'é suun qui'yaj suun ní che'é Diose ma'*

7 Gaa ne cataj uún Jesucristó rihaan nij apóstol cune' so' a:

—Sese vaa mozó nuu rihaan 'o tuvi' soj, ne sese 'yaj suun uxrá mozó uxrá' mozó yo' yo'óo do', sese tumé mozó yo' daán soj xcuu do', ne daj cataj soj rihaan mozó nuu rihaan soj asa' namán mozó yo' ca'anj qui'yaj suun mozó tacaan ga. Ne se cataj soj rihaan mozó yo' se vaa nu' namán mozó ne nu' cayáán mozó cha mozó chraa ma'. Daj chihaa mǐj se tu'va soj danj a ma'.

8 Maan se cataj soj: "Qui'yaj chuvii so' cha 'unj chraa, ne cutá' so' chraa do', na do', rihaan mesá rej cha 'unj chraa, ne rque so' nij rasuun achiin manj, ne asa' quisij chaj chraa gaa ne ca'vee cha so' chraa ne co'o so' na á". Danj ca'mii soj rihaan se-mozó soj nanj á.

9 Ne se caráya'anj soj man mozó sese qui'yaj suun ndo'o mozó yo' suun ca'ne' soj rihaan mozó yo' ma'.

10 Ne ase vaa mozó nuu rihaan Diose vaa soj, ne che'é dan asa' quisij qui'yaj suun soj nu' suun ca'ne' Diose rihaan soj, ne cataj soj se vaa mozó rmii me soj, ne inanj do' suun ataj Diose rihaan soj qui'yaj suun soj nanj adonj —taj Jesucristó rihaan nij so' a.

*Nana nihánj taj xna'anj che'é síu samaritano síu nago' graciá rihaan Diose a*

11 Dan me se vaj Jesucristó chrej ca'anj chuman' Jerusalén, ne cachéé so' chrej uun ran' estadó Samaria ga estadó Galilea,

12 ne dan me se daj doj catuu so' 'o chuman', ne nari' tuvi' so' ga chǐ' síu ran' luj ri'yuj a. Ne gan' canicun' nij so',

13 ne nucuaj canacúun nij so' man Jesucristó, ne cataj nij so':

—Cunuu 'ee rá so' man núj, maestro' Jesucristó —taj nij so', caguáj nij so' a.

14 Gaa ne quene'en Jesucristó man nij so', gaa ne cataj Jesucristó rihaan nij so' a:

—Cavij soj ca'anj soj, ne tihanj soj man soj rihaan nij xrej á —taj Jesucristó rihaan nij so' a.



Dan me se cuno nij so' nana ca'mii Jesucristó, ne caviij nij so', ca'anj nij so', ne gaa vaj nij so' chrej, ne nahuun sa' cunudanj nij so' ta'aj chrej a.

<sup>15</sup> Ne yo'q tuvi' nij so' ro', xcaj cuentá se vaa nahuun sa' so', gaa ne canicaj so' ca'anj so' rej vaj Jesucristó, ne nucuaj ndo'o caguáj so' cataj so' se vaa sa' uxrá qui'yaj Diose ga so' a.

<sup>16</sup> Ne gaa cuchi' so' rihaan Jesucristó, gaa ne canicun' ruj so' ne nago' so' graciá rihaan Jesucristó a. Ne síi samaritano síi yanij ga nij yuviij israelitá me so' a.

<sup>17</sup> Gaa ne cataj Jesucristó rihaan nij síi chéé ga so' a:

—Chí' ya yuviij nahuun sa', qui'yáj, raj a. Ne me rej vaj yo'ó uun nij síi nahuun sa', rá soj ga.

<sup>18</sup> Ne a 'ó nij so' ne canicaj cataj se vaa sa' uxrá qui'yaj Diose che'é so' a ma'. Orún' síi yanij nihánj me síi guun rá cataj daj qui'yaj Diose ga so' na' —taj Jesucristó, xná'anj so' man nij yuviij chéé ga so' a.

<sup>19</sup> Gaa ne canicaj Jesucristó cataj Jesucristó rihaan síi samaritano yo':

—Naxumaan so', ne ca'anj so' á. Che'é se amán rá so' ni'yaj so' Diose ro', che'é dan aj nahuun sa' so' ei —taj Jesucristó rihaan so' a.

*Nana nihánj taj xna'anj che'é güii guun che'e Diose guun chij Diose rihaan chumiij nihánj a*

<sup>20</sup> Dan me se xná'anj nij síi fariseo man Jesucristó me güii guun chij Diose rihaan chumiij nihánj a. Gaa ne cataj so' rihaan nij síi fariseo a:

—Taj che'é ni'yaj ndo'o soj ma'. Ca'vee se guun chij Diose rihaan chumiij nihánj, tzaj ne se quene'en yuviij ma'.

<sup>21</sup> Ne se cataj ni: “Ni'yaj so' ei. Nihánj me guun chij Diose á. Yo' me rej guun chij Diose á”. Se ca'mii yuviij danj ma'. 'Q se sca'núj ma'an soj vaj 'o síi 'yaj uun chij Diose adonj —taj Jesucristó rihaan nij síi fariseo a.

<sup>22</sup> Gaa ne canicaj Jesucristó cataj so' rihaan nij síi tucu'yón se-nana so' a:

—Vaa güii guun ndo'o rá soj quene'en soj güii nihánj güii vaj 'unj sij ca'neé Diose nıcaj yu'unj man yuviij rihaan chumiij nihánj, tzaj ne se ca'vee quene'en soj manj ma'.

<sup>23</sup> Gaa ne cataj yuviij rihaan soj: “Ni'yaj so' ei. Yo' me rej vaj Jesucristó ei”. Ne cataj uún yuviij: “Ni'yaj so' ei. Nihánj me rej vaj Jesucristó ei”, cataj yuviij rihaan soj a. Tzaj ne se caviij soj nano' soj manj ma'.

<sup>24</sup> Dan me se ndaa rá se uun gaa raan rihaan chumiij nihánj, ne 'o chuguun nu' rihaan chumiij nihánj ro', ne ne'en cunudanj yuviij se vaa raan rihaan chumiij á. Ne ase uun rá soj ne'en soj gaa raan ro', danj guun rá soj asa' ca'ná' 'unj sij nıcaj yu'unj man yuviij, ne quene'en nu' yuviij man rihaan chumiij nihánj se vaa ca'ná' 'unj adonj.

<sup>25</sup> Tzaj ne vaa che'é quıran' 'unj que'ee sayuun asino yaan, gaa ne vaa che'é nachrı' nij síi man rihaan chumiij nihánj ni'yaj nij so' manj a.

<sup>26</sup> Ne ase vaa qui'yaj yuviij gaa cayáan síi cu'naj Noé rihaan chumiij ro', danj gaa qui'yaj uún yuviij asa' ca'na' uún 'unj sij ca'neé Diose nıcaj yu'unj man yuviij rihaan chumiij nihánj adonj.

<sup>27</sup> Dan me se chá yuviij do', co'o yuviij do', ne xcaj tuvi' nij yuviij do', inanj danj qui'yaj nij yuviij ndaa quisıj güii catúj nij tuvı' síi cu'naj Noé rque rihoo xıj chéé rihaan na a. Gaa ne taj ni'yón caman' ndo'o, ne ca'na' na ya'anj, ne caráan na ya'anj xráa cunudanj nij so', ne cavi' nij so' a.

<sup>28</sup> Ne ase vaa qui'yaj nij yuviij man chuman' cu'naj Sodoma gaa cayáan síi cu'naj Lot ro', danj qui'yaj uún yuviij asa' ca'na' uún 'unj rihaan chumiij nihánj

adonj. Dan me se chá nij so' do', co'o nij so' do', quiránj nij so' rasuun cutu'vej  
nij so' do', cunô nij so' naa do', cune' nij so' ve' do',

<sup>29</sup> ne nu' curihanj sí cu'naj Lot chuman' Sodoma, ne nu' cavii ya'an rej xta'  
ga yo'óo azufre, cayuu yo' rihaan chuman' yo', ne cacaa nu' chuman' yo', ne  
cavi' cunudanj nij sí man chuman' yo' a.

<sup>30</sup> Ne ase vaa ne xcaj nij yuvij man gaa naá cuentá se vaa quirán' nij so'  
sayuun ro', danj gaa uún yuvij asa' quisij ca'na' uún 'unj sij nica' yu'unj man  
yuvij rihaan chumij nihánj adonj. 'Q se ndaa síj güii quene'en nij so' manj,  
gaa ne xcaj nij so' cuentá a.

<sup>31</sup> Ne güii guun danj me se xa' sí taj xraá ve' tucua' me se se ca'vee catuu  
so' rá ve' tucua' so' quiríj so' si'yaj so' ma'. Ne sí nuu tacaan 'yaj suun tacaan  
ro', se canicaj so' nana' so' si'yaj so' ma'. Maan se yo'o cunanj nij so' á.

<sup>32</sup> Vaa che'é nanuj rá soj daj quirán' nica' sí cu'naj Lot gaa canicaj no' ni'yaj  
no' rej xcq no', ne cavi' no' a.

<sup>33</sup> "Sí chu'vi' ndo'o cavi' rihaan chumij nihánj ro', cavi' nu' so', ne sí cavi'  
ro', so' me sí gaa i'na' nimán nu' cavii nu' ca'anj adonj.

<sup>34</sup> "Cuaño nihánj me se cataj xna'anj 'unj rihaan soj a: Ne güii guun danj  
me se rej ni' ro', quitaj roj nica' roj so' cotoj roj so', ne nacaj se-mozó Diose  
man yo'o so', ne quinaj yo'ó so' a.

<sup>35</sup> Ne cunuú vij roj chana' gaj roj no' 'núú trigó, ne nacaj se-mozó Diose man  
yo'o no', ne quinaj yo'ó no' a.

<sup>36</sup> Ne cunuú vij roj snó'o qui'yaj suun roj so' yo'óo, ne nacaj se-mozó Diose  
man yo'o so', ne quinaj yo'ó so' nanj adonj —taj Jesucristó rihaan nij so' a.

<sup>37</sup> Gaa ne xna'anj nij sí tucu'yón se-nana' Jesucristó man so', ne:

—Ne me rej ca'na' so', ga Señor —taj nij so', xna'anj nij so' a.

Gaa ne cataj Jesucristó rihaan nij so' a:

—Aj ne'en soj daj 'yaj yachruú vaj rej xta', ne ne'en ma'an xo' me rej naj  
nee chá xo' a. Taj sí nata' rihaan xo' me rej naj nee yo' ma'. Ne ase uun rá  
yachruú ro', danj guun rá ma'an soj asa' ca'na' uún 'unj rihaan chumij nihánj  
adonj. Quene'en ma'an soj sij man rihaan chumij nihánj me rej ca'na' 'unj  
adonj —taj Jesucristó rihaan nij so' a.

## 18

*Nihánj me cuentó che'é chana' cavi' nica' cachín ni'yaj ndo'o rihaan cuese a*

<sup>1</sup> Ne nanó Jesucristó cuentó nihánj rihaan nij sí tucu'yón se-nana' so', che'é  
rej guun rá so' xcaj nij sí tucu'yón se-nana' so' cuentá se vaa no' xcúun nij so'  
niganj cachinj ni'yaj nij so' rihaan Diose, ne se guun rmij nij so' ma'.

<sup>2</sup> Dan me se cataj Jesucristó a:

—'Q cuese cayáan rque 'o chuman' me yo'o so', ne nuveé sij amán rá ni'yaj  
man Diose do', nuveé sij aráj cochroj rihaan yuvij do', me cuese yo' a.

<sup>3</sup> Ne yáan 'o chana' cavi' nica' chuman' yo', ne guun che'e no' cachín ni'yaj  
no' rihaan so' se vaa qui'yaj so' sayuun man sí qui'yaj sayuun man no' a.

<sup>4</sup> Ne a doj ne ca'vej rá so' racu'j so' man no' a. Tzaj ne 'o güii me se guun rá  
ma'an cuese yo', ne: "Ca'vee se ne amán raj ni'yaj 'unj Diose do', ca'vee se ne  
aráj cochroj rihaan yuvij do'.

<sup>5</sup> Tzaj ne che'é se guun rmij ndo'oj 'yaj chana' cavi' nica' nihánj, ne che'é dan  
ca'ne' cachr'í 'unj cacun' che'é sí 'yaj sayuun man no', ne ca'vee a. Se taj, ne  
guun rmij xreé 'unj, qui'yaj no' vaa güii adonj", guun rá cuese yo' a

6 —taj síi 'nij ra'a man ní, ne cataj uún so'— Xcaj soj cuentá daj ca'mii cuese vaa quij nimán yo' á.

7 Ne dan me se taá a nij síi narii Diose, ne nuvíi nigan' aguáj ndo'o nij so', achíin ni'yaj nij so' rihaan Diose, ne Diose, tzaj ne se ca'ne' Diose cacun' che'é nij síi 'yaj sayuun man nij so', rá soj na'. Guun raan ndo'o Diose ca'ne' so' cacun', rá soj na'. Se guun danj rá soj ma'.

8 'Q se cataj xna'anj 'unj rihaan soj cuano se vaa ra'yanj uxrá ca'ne' Diose cacun' che'é nij síi 'yaj sayuun man nij síi narii so' man adonj. Tzaj ne dan me se asa' ca'na' uún 'unj sij nicaj yu'unj man yuvií rihaan chumii nihánj, ne me daj yuvií amán rá ni'yaj man Diose naríj ga —taj Jesucristó rihaan nij síi tucu'yón se-nana so' a.

*Nihánj me cuentó nanó Jesucristó che'é vij síi cachíin ni'yaj rihaan Diose a*

9 Gaa ne nanó Jesucristó cuentó nihánj rihaan ta'aj yuvií guun rá se vaa sij sa' inánj me ma'an nij so' ne nachri' nij so' ni'yaj nij so' man yo'ó yuvií a:

10 —Canicun' vij snó'o rá nuvíi nocoo, cachíin ni'yaj roj so' rihaan Diose a. Yo'ó so' ro', me síi fariseo, ne yo'ó so' ro', me síi tiha' yu'unj man yuvií che'é puextó a.

11 "Dan me se canicun' síi fariseo yo', ne cachíin ni'yaj so', ne cataj so' nana nihánj rihaan Diose a. 'Q se ne ca'mii nucuaj so' ma'. Maan se rihaan ma'an so' ca'mii so', cataj so': "Guun ni'yaj uxrá ní, Ataj Diose. Guun ni'yaj uxrá ní se vaa ne 'yáá 'unj ndaa vaa 'yaj yo'ó nij yuvií ma'. Dan me se xa' nij so', tzaj ne sij tiha' yu'unj do', sij tumé cacun' do', sij otoj ga nica yo'ó yuvií do', me nij so', ne ne 'yáá 'unj danj ma'. Ne guun ni'yaj ní se vaa ne 'yáá 'unj ndaa vaa 'yaj síi nihánj síi tiha' yu'unj man yuvií che'é puextó a.

12 Ne vij ya aráj guee 'unj che'é se chá 'o 'o tunj güii, ne rqué 'unj 'o pesó rihaan daj a chí' pesó 'yaj canaán 'unj rihaan so' ei", taj síi fariseo yo' rihaan Diose a.

13 "Ne gan' doj tzin' nicun' síi a'néj puextó man yuvií yo', ne guun na'aj ndo'o so' ni'yaj so' man so' rihaan Diose, ne ne ca'vej rá so' naxcaj so' rihaan so' ni'yaj so' rej nicun' Diose a. Tzaj ne go' so' se-cuxru' so' rucuaa ma'an so', ne cataj so': "Cunuu 'ee rá so' ni'yaj so' manj, Ataj Diose. 'Q se sij tumé cacun' mej adonj", taj so' rihaan Diose a.

14 "Ne cuano nihánj me se cataj xna'anj 'unj rihaan soj se vaa gaa quinan' síi tiha' yu'unj man yuvií che'é puextó yo' tucuá so', gaa ne aj cunuu sa' so' rihaan Diose nanj a. Tzaj ne yo'ó so' ro', taj ma'. 'Q se xa' síi me rá tacavii sa' man ma'an, tzaj ne quirí' so', ne guun na'aj so' a. Ne xa' síi naquí'yaj nica' nimán, tzaj ne cavii sa' ndo'o so' adonj —taj Jesucristó rihaan nij yuvií yo' a.

*Nana nihánj taj xna'anj me che'é caran' rá Jesucristó ni'yaj so' man ne'ej a*

15 Gaa ne nicaj nij yuvií man nij ne'ej ca'na' nij yuvií rihaan Jesucristó a. 'Q se me rá nij yuvií cuta' Jesucristó ra'a so' raaj nij ne'ej che'é rej quirí' ne'ej xna'anj ni'yaj ne'ej a. Tzaj ne quene'en nij síi tucu'yón se-nana Jesucristó daj qui'yaj nij yuvií, gaa ne cataj xna'anj nij so' rihaan nij yuvií se vaa ne nó xcúin nij ne'ej ca'na' nij ne'ej rihaan Jesucristó a.

16 Tzaj ne canacún Jesucristó man nij síi tucu'yón se-nana so', ne cataj Jesucristó rihaan nij so' a:

—Ca'ne' rá soj ca'na' nij ne'ej rihanj á. Se caráan soj chrej rihaan nij ne'ej mei. 'Q se tucua' nij síi vaa danj ro', me rej yanj Diose uun chij Diose nanj adonj.

17 *Yá yá cataj xna'anj 'unj rihaan soj cuano se vaa síi na'vej rá guun chij Diose nimán, ndaa vaa a'vej rá ne'ej guun chij Diose nimán ne'ej ro', daj chihaa mǝ se cayáan so' ga Diose asa' guun chij Diose rihaan chumiǝ nihánj ma' —taj Jesucristó rihaan nij síi tucu'yón se-nana so' a.*

*Nana nihánj taj xna'anj che'é 'o síi me rá cayáan ga Diose nu' cavii nu' ca'anj a*

18 Dan me se xná'anj 'o síi nicaj suun yo' man Jesucristó, cataj so' rihaan Jesucristó a:

—Maestro. Síi sa' uxrá mé so' adonj. Daj qui'yáj, ne ca'vee cayán ga Diose nu' cavii nu' ca'anj ga —taj síi nicaj suun yo', xná'anj so' man Jesucristó a.

19 Gaa ne cataj Jesucristó rihaan so' a:

—Me che'é cataj so' se vaa síi sa' uxrá mej ga. 'O se orún' Diose me síi sa' á.

20 Ne aj ne'én so' nij nana nocojo ya ya nana cataj xna'anj Diose se vaa canoco' ní' á. Dan me se taj nana yo': “Se cotoj so' ga chana nica yo'ó yuviǝ ma'. Se ticavi' so' yuviǝ ma'. Se qui'yaj ituǝ so' si'yaj yo'ó yuviǝ ma'. Se nanó so' cuentó ne che'é yuviǝ ma'. Caraa cochróo so' rihaan rée so' do', rihaan níi so' do' á”. Yo' me nana cunó so' ei —taj Jesucristó rihaan síi nicaj suun yo' a.

21 —Asij gaa mej xniǝ me ve'é unó 'unj nu' nij nana yo' nanj á —taj so' rihaan Jesucristó a.

22 Gaa ne cataj Jesucristó rihaan so' a:

—Daj orún' rasuun achiin ya mán so' nanj ei. Dan me se cutu'vee so' cunudanj si'yáa so', ne sa'anj qui'ri' so' ro', caxriǝ so' ston nij síi nique, ne cumán ndo'o si'yáa so' rej xta', qui'yaj Diose nanj ei. Ne dan me se ca'na' so', ne canoco' so' manj, ca'anj ní' á —taj Jesucristó rihaan so' a.

23 Dan me se cuno síi nicaj suun yo' nana nihánj, gaa ne quinano ndo'o rá so' a. 'O se síi ru'vee ndo'o me so' a.

24 Dan me se ni'yaj Jesucristó man so', ne cataj Jesucristó:

—Sayuun uxrá vaa quisij nij síi vaa ndo'o sa'anj rihaan cayáan nij so' ga Diose asa' guun chij Diose rihaan chumiǝ nihánj nanj adonj.

25 Dan me se ne'en soj se vaa sayuun ndo'o vaa cachén xcuu camelló yu'uj taj tacúún cúu nuvá, tzaj ne ca'vee a doj cachén xcuu yo' yu'uj taj tacúún cúu nuvá, ndaa rá se vaa síi ru'vee, ne se guun cachén ma'an síi ru'vee cayáan so' ga Diose asa' guun chij Diose rihaan chumiǝ nihánj a ma' —taj Jesucristó a.

26 Gaa ne xná'anj nij síi cuno nana nihánj man Jesucristó, cataj nij so':

—Che'é dan me se me síi guun nucuaj quinaniǝ rihaan sayuun ga —taj nij so', xná'anj nij so' man Jesucristó a.

27 Gaa ne cataj Jesucristó rihaan nij so' a:

—Xa' rasuun na'vee qui'yaj ma'an inanj yuviǝ, tzaj ne Diose me síi uun nucuaj qui'yaj nu' rasuun yo' adonj —taj Jesucristó rihaan nij so' a.

28 Gaa ne cataj Pedró rihaan so' a:

—Ne núj ga. Aj tanáj núj nu' si'yaj núj, ne canoco' núj mán so' á —taj Pedró rihaan Jesucristó a.

29 Gaa ne cataj Jesucristó rihaan nij so' a:

—Cuanó nihánj me se cataj yá 'unj rihaan soj se vaa síi tanáj ve' tucúa tanáj nica tanáj tinúu tanáj tuvi' tanáj ta'níi tanáj, che'é rej guun chij Diose rihaan chumiǝ nihánj ro',

30 uxrá doj a rasuun qui'ri' uún so' gaa vaa i'na' so' rihaan chumiǝ nihánj, ne asa' guun chij Diose rihaan chumiǝ nihánj me se yo'ó cayáan so' ga Diose nu' cavii nu' ca'anj nanj adonj —taj Jesucristó rihaan nij so' a.

*Nana nihánj taj xna'anj se vaa síj va'nuj cataj xna'anj Jesucristó se vaa cavi' so' ne cunu i'na' uún so' a*

<sup>31</sup> Dan me se nicaj Jesucristó chuvij nij sí tucu'yón se-nana so' ca'anj so', ne cataj so' rihaan nij so':

—Nihánj me ca'anj ní' chuman' Jerusalén, ne asa' cuchi' ní', ne quisij ya nu' nana cataj xna'anj nij sí nata' se-nana Diose gaa naa che'é 'unj síj ca'née Diose nicaj yu'unj man yuvij,

<sup>32</sup> ne dan me se taçuachén nii manj rihaan nij sí yanij, ne ca'nga' nacoo nij so' quene'en nij so' manj, ne qui'yaj chí'ij nij so' manj, ne quirij talúj nij so' manj,

<sup>33</sup> ne go' nij so' cuartá xráj, gaa ne ticavi' nij so' manj a. Gaa ne cachén va'nuj guii, gaa ne cunu i'na' uún 'unj, qui'yaj Diose ei —taj Jesucristó rihaan nij so' a.

<sup>34</sup> Ne ne quene'en uxrá nij so' me che'é ca'mii Jesucristó danj ma'. 'O se ne ca'vee xcáj nij so' cuentá che'é nana yo' ma'.

*Nana nihánj taj xna'anj se vaa naxra' rihaan 'o sí tuchrij, qui'yaj Jesucristó a*

<sup>35</sup> Dan me se gaa quinichrun' Jesucristó chuman' Jericó, ne yáán 'o sí tuchrij tu'va chrej, ne achín so' caridad rihaan yuvij a.

<sup>36</sup> Dan me se cuno sí tuchrij yo' se vaa cachén ndo'o yuvij chrej rej ne so', ne che'é dan xná'anj so' man yuvij che'é rej vaj ndo'o yuvij chrej yo' a.

<sup>37</sup> Gaa ne cataj xna'anj nii rihaan so' se vaa Jesucristó sí cavi' chuman' Nazaret me sí achén rej ne nij so' a.

<sup>38</sup> Gaa ne dan me se caguáj sí tuchrij yo', cataj so':

—Ya ya ta'nii ta'nij si'no sí cu'naj David sí cane gaa naa mé so', Jesús. Cunuu 'ee rá so' manj ei —taj so', caguáj so' a.

<sup>39</sup> Gaa ne cataj nij sí racuíj man so' chée so' se vaa se tu'va so' danj, maan se:

—Dínj gaa tu'vá so' á —taj nij so' rihaan sí tuchrij, tzaj ne doj a nucaj caguáj so', cataj so':

—Ta'nii ta'nij si'no sí cu'naj David mé so' ei. Cunuu 'ee rá so' manj ei —taj so', caguáj so' rihaan Jesucristó a.

<sup>40</sup> Canicun' Jesucristó, ne canacúun Jesucristó man sí tuchrij se vaa racuíj nii man so' ca'na' so' rihaan Jesucristó a. Ne gaa quinichrun' sí tuchrij yo' rihaan Jesucristó, ne xná'anj Jesucristó man so', cataj Jesucristó rihaan so' a:

<sup>41</sup> —Daj qui'yáj mán so', rá so' ga —taj Jesucristó, xná'anj Jesucristó man so' a.

—Curuvi' rihanj raj, Señor —taj so' rihaan Jesucristó a.

<sup>42</sup> Gaa ne cataj Jesucristó rihaan so':

—Ca'vee curuvi' rihaan so' á. Maan che'é se amán rá so' ni'yaj so' manj ro', che'é dan nahuun sa' so' ei —taj Jesucristó a.

<sup>43</sup> Ne nu' curuvi' rihaan so', gaa ne canoco' so' xcó Jesucristó, ne nata' so' se vaa sa' uxrá qui'yaj Diose ga so' a. Ne nu' nij yuvij quene'en daj quiran' so' cataj se vaa sa' uxrá qui'yaj Diose a.

## 19

*Nana nihánj taj xna'anj daj qui'yaj sí cu'naj Zaqueo gaa guun rá so' quene'en so' man Jesucristó a*

<sup>1</sup> Dan me se catúj Jesucristó chuman' Jericó, ne cachén so' chuman' yo',

<sup>2</sup> ne yáán 'o síí cu'naj Zaqueo chuman' yo', ne so' me síí uun chij rihaan nij síí tiha' yu'unj man yuvii che'é puextó, ne ru'vee ndo'o so' a.

<sup>3</sup> Dan me se guun rá so' quene'en so' me síí me Jesucristó, tzaj ne ne ca'vee quene'en so', che'é se man ndo'o yuvii, ne síí chre' nii vaa síí cu'naj Zaqueo a.

<sup>4</sup> Che'é dan yoo cunanj so' quitáa yaan so' rihaan nij yuvii, gaa ne cavii so' raq 'o chruun man chruj hígó raq, che'é yan me rá so' quene'en so' man Jesucristó a. 'O se cachēn Jesucristó tacóo chruun yo' a.

<sup>5</sup> Dan me se gaa cuchi' Jesucristó tacóo chruun taj Zaqueo, ne ni'yaj Jesucristó raq chruun, ne cataj so' rihaan Zaqueo a:

—Nanij so' cuaj rihaan yo'óo, Zaqueo. 'O se vaa che'é ndo'o carán' 'unj ve' tucúá so' cuan' á —taj Jesucristó rihaan Zaqueo a.

<sup>6</sup> Gaa ne yoo nanij Zaqueo rihaan yo'óo, ne guun niha' uxrá rá so' se vaa caran' Jesucristó tucúá so' a.

<sup>7</sup> Dan me se cuno nij yuvii daj cataj Jesucristó, gaa ne nij ca'mii nij yuvii ni'yaj nij so' man Jesucristó a. Ne cataj nij so' che'é Jesucristó a:

—Nihánj me se caran' so' tucúá 'o síí tumé ndo'o cacun' adonj —taj nij yuvii ni'yaj nij so' man Jesucristó a.

<sup>8</sup> Tzaj ne canicun' ma'an Zaqueo, cataj so' rihaan síí 'nij ra'a man ní' a:

—Cuanō nihánj me se rque 'unj yanej si'yáj rihaan nij síí niqwe, ne nij síí tiha' yu'unj 'unj man, tzaj ne naqui'yáj 'ó cunu' ca'anj narque 'unj rihaan nij so' se vaa ca'néj 'unj man nij so', Señor —taj so' rihaan Jesucristó a.

<sup>9</sup> Gaa ne cataj Jesucristó rihaan so' a:

—Cuan' me se aj cavii sa' nij tucua' síí nihánj, ndaa rá se vaa 'o ta'níí síí cu'naj Abraham gaa naá ro', danj vaa ma'an so' cuano a.

<sup>10</sup> 'O se ca'ná' 'unj sij nicaj yu'unj man yuvii che'é rej ca'vee nano' 'unj man nij síí ca'anj ni'ya, ne cavii sa' nij so' qui'yáj adonj —taj Jesucristó rihaan nij so' a.

*Nana nihánj me cuentó nanó Jesucristó che'é síí racuj sa'anj rihaan se-mozó so' a*

<sup>11</sup> Dan me se cuno nij síí man chuman' Jericó se-nana Jesucristó, tzaj ne guun rá nij so' se vaa che'é se nichrun' Jesucristó chuman' Jerusalén, che'é dan ra'yanj guun chij Diosē rihaan chumi' nihánj adonj, rá nij so', ne che'é dan guun che'e Jesucristó naqui'yaj Jesucristó yo'o cuentó nihánj, gaa ne ca'vee xcaj nij yuvii cuentá a.

<sup>12</sup> Dan me se cataj so' a:

—Yo'o síí xna'anj ru'vee guun rá quinaj suun uun chij chiháán, ne guun rá so' ca'anj so' chuman' raq ne nata suun so' suun guun chij chiháán so', gaa ne canicaj so' namān so' chiháán so', rá so' a.

<sup>13</sup> Gaa ne canacúun so' man chi' nij se-mozó so' ca'na' rihaan so', gaa ne rque so' 'o sa'anj mina rihaan 'o 'o nij so', ne cataj xna'anj so' rihaan nij so' se vaa qui'yaj suun nij so' ga sa'anj, ne tanaca' nij so' man sa'anj, ne ndaa quisij güii namān uun so', gaa ne nuchruj nij so' cuentá, taj so' a. Danj ca'mii so', gaa ne cavii so' ca'anj so' a.

<sup>14</sup> "Tzaj ne nij síí man chiháán so' ro', quitáa ri'yunj man so', ne che'é dan ca'néé nij so' síí ca'anj suun ca'anj cataj xna'anj rihaan síí nicaj suun rej ca'anj síí xna'anj ru'vee yo' se vaa ne ca'vej rá nij so' guun chij síí xna'anj ru'vee yo' rihaan nij so' a.

15 "Dan me se ya qui'yaj canaán sí xna'anj ru'vee yo' guun chij so' chiháan so', gaa ne gaa namán so', ne cataj xna'anj so' se vaa nacunj nii man chi' nij se-mozó so' nij sí rqué so' sa'anj rihaan a. 'Q se guun rá so' xcaj so' cuentá me daj sa'anj qui'yaj canaán nij so' a.

16 "Dan me se sí ca'na' asino yaan rihaan so' ro', cataj: "Xa' sa'anj mina rqué so' manj, tzaj ne qui'yaj canaán 'unj 'ó chi' sa'anj mina uún, qui'yaj sa'anj yo', señor", taj so' rihaan sí xna'anj ru'vee yo' a.

17 Gaa ne cataj sí xna'anj ru'vee yo' rihaan mozó yo': "Cunaj uxrá qui'yáa so' á. Mozó sa' inanj mé so' ei. Che'é dan guun chij so' rihaan chi' ya chuman', qui'yáj a", taj sí xna'anj ru'vee rihaan mozó sa' yo' a.

18 "Dan me se ca'na' uún yo'ó mozó, cataj so': "Xa' sa'anj mina rqué so' manj, tzaj ne qui'yaj canaán 'unj yu'un' sa'anj mina uún, qui'yaj sa'anj yo', señor", taj so' rihaan sí xna'anj ru'vee yo' a.

19 Ne cataj sí xna'anj rihaan so': "Gaa ne guun chij so' rihaan 'un' ya chuman' nanj ei", taj so' rihaan yo'ó mozó yo' a.

20 "Dan me se ca'na' yo'ó so' uún, ne cataj so': "Nihánj me nacaj so' se-sa'anj so', señor. 'Q se caraa sa' 'unj man yo' rque 'o vitó,

21 ne cuchu'ví 'unj ni'yaj 'unj mán so', che'é se sij sca' ndo'o nimán mé so', ne naxcay so' rasuun rej nuvi' rasuun cutá' so', ne yo'ó yuvi' unó caân, ne so' me se, ne ma'án so', ne rii so' naa adonj", taj mozó yo' rihaan sí xna'anj ru'vee yo' a.

22 "Gaa ne cataj sí xna'anj ru'vee rihaan mozó yo': "Mozó chi'ii nimán mé so' ei. Cutá' 'unj cacun' xráa so' che'é nana tu'va ma'án so' á. 'Q se quene'én so' se vaa sij sca' ndo'o nimán mej, ne quene'én so' se vaa naxcay 'unj rasuun rej nuvi' rasuun cutaj, ne quene'én so' se vaa yo'ó yuvi' unó caân ne 'unj rii naa nanj á.

23 Che'é dan me che'é ne taçuachén so' se-sa'anj 'unj rihaan nij sí nuta' sa'anj ga. Gaa ne gaa ca'ná' 'unj, ne nacaj 'unj se-sa'anj 'unj ga sa'anj nata' raá yo' ga", taj sí xna'anj ru'vee yo' rihaan mozó rmi' yo' a.

24 Gaa ne cataj so' rihaan yo'ó nij sí nicun' ga so' a: "Ca'nee soj sa'anj nicaj mozó chi'ii nihánj, ne taçuachén soj rihaan sí nicaj chi' sa'anj mina yo' á", taj sí xna'anj ru'vee yo' rihaan yo'ó nij so' a.

25 "Tzaj ne aj nicaj so' 'o chi' vaa guee á", cataj nij so' rihaan sí xna'anj ru'vee yo' a.

26 "Taj se 'yaj ma'. Cuanó nihánj me se cataj xna'anj 'unj rihaan soj se vaa sí ne'en sa' qui'yaj suun rihanj ro', ne vaa güii, ne doj a guun nucuaj so' qui'yaj suun so' adonj. Ne sí ne ne'en qui'yaj suun rihanj ro', ca'nee 'unj suun le'ej nii atá so', ne quinaj uun so' adonj", taj sí xna'anj ru'vee yo' rihaan nij so' a.

27 Gaa ne cataj uún so': "Tzaj ne xa' nij sí taj ri'yunj manj sí ne ca'vej rá guun chij 'unj rihaan, tzaj ne nicaj soj man nij so' ca'na' soj rihanj, gaa ne ticavi' soj man nij so' rihanj nihánj ei", taj uún so' a.

28 —Veé danj quisíj cuentó nanó Jesucristó a.

Gaa ne cavii so' ca'anj so' chuman' Jerusalén, ne táa yaan so' rihaan nij sí tucuyón se-nana so' a.

*Nana nihánj taj xna'anj daj qui'yaj Jesucristó gaa catúj Jesucristó chuman' Jerusalén a*

29 Dan me quinichrun' Jesucristó roj chuman' cu'naj Betfagé ga Betania a. Naj roj chuman' yo' tacóo quij cu'naj Quij man Chruun Olivó a. Gaa

ne ca'née Jesucristó man vij tuvi' nij sí tucu'yón se-nānā so' ca'anj rque chuman' Betfagé,

<sup>30</sup> ne cataj so' rihaan roj so' a:

—Cavii roj soj ca'anj soj, ne catuū roj soj chuman' nihánj chuman' naj rihaan ní', ne asa' catúj roj soj, ne nari' roj soj man yo'ō burró le'ej ya'anj numij a. Dan me se nache roj soj man xo', ne nicaaj roj soj ca'na' roj soj rihanj nihánj á.

<sup>31</sup> Ne sese xna'anj nii man roj soj me che'é nache roj soj burró, ne cataj roj soj: “Sii 'nij ra'a man ní' achiin xcuu nihánj rihaan chuguānj”, cataj roj soj á —taj Jesucristó rihaan roj sí tucu'yón se-nānā so' a.

<sup>32</sup> Dan me se ca'anj roj so', ne catúj roj so' chuman' yo', ne nari' roj so' man burró le'ej, ndaa vaa cataj xna'anj Jesucristó rihaan roj so' a.

<sup>33</sup> Ne gaa nache roj so' man burró, ne xna'anj nij sí daan burró man roj so' a:

—Me che'é nache soj burró ga —taj nij so', xna'anj nij so' man roj so' a.

<sup>34</sup> Gaa ne cataj roj so' rihaan nij sí daan burró a:

—Sii 'nij ra'a man ní' achiin xcuu nihánj rihaan chuguānj —taj roj so' a.

<sup>35</sup> Gaa ne nicaaj roj so' xcuu ca'na' roj so' rihaan Jesucristó, ne cuta' roj so' sagan' roj so' xráá burró, ne tacavii roj so' man Jesucristó xráá burró yo',

<sup>36</sup> ne gaa vaj Jesucristó, ne cuchruj ndo'ō nij yuvi yatzíj sagan' nij so' rá chrej, ne achén Jesucristó ga burró yo' rihaan yatzíj a.

<sup>37</sup> Dan me se quinichrun' Jesucristó chuman' Jerusalén, ne vaj so' tacóō Quij man Chruun Olivó rej vaj nij chrej, ne guun che'e que'ee nij sí tucu'yón se-nānā so' guun niha' rá nij so', ne aguáj nij so', ca'mii sa' nij so' che'é Diose che'é nu' nij suun sa' nocōō qui'yaj Jesucristó quene'en nij so' a.

<sup>38</sup> Dan me se cataj nij so':

—Cunaj uxrá vaa ca'na' sí ca'née sí 'nij ra'a man ní' ei. Sí nicaaj suun rey uun chij rihaan ní' me so' ei. Ve'é cayáán Diose sí nicun' xtá' á. Cunaj uxrá 'yaj so' ei —taj nij yuvi, caguáj nij so' a.

<sup>39</sup> Dan me se ta'aj nij sí chée ga Jesucristó me sí fariseo, ne ta'aj nij so' cataj rihaan Jesucristó a:

—Cataj xna'anj so' rihaan nij sí tucu'yón se-nānā so' se vaa ca'ne' rá nij so' ga nana vaa danj á —taj nij so' rihaan Jesucristó a.

<sup>40</sup> Gaa ne cataj so' rihaan nij so' a:

—Cataj xna'anj 'unj rihaan soj cuano se vaa sese dínj gaa tu'va nij sí aguáj nana vaa danj, ne ma'an nij yahij naj rihaan yo'óō nihánj caguaj nana vaa danj asuun nanj adonj —taj Jesucristó rihaan nij sí fariseo yo' a.

<sup>41</sup> Ne gaa quinichrun' Jesucristó chuman' Jerusalén yo', ne ta'vee Jesucristó che'é chuman' yo',

<sup>42</sup> ne cataj so':

—Güii cuan' me se me inanj raj quene'en soj sij man chuman' Jerusalén daj qui'yaj soj ne ca'vee dínj cayáán soj, tzej ne cuano nihánj me se se ca'vee xcāj soj cuentá ma'.

<sup>43</sup> Dan me se quisij ya güii, ne ca'na' nij sí taj ri'yunj man soj, ne cunē' nij so' chingá nu' anicaj chiháán soj, ne tucuachriin nij so' man soj, ne se ca'vee cūrihanj soj, qui'yaj nij so' ma'.

<sup>44</sup> Ne tucuanee nij so' nu' chiháán soj, ne cavj' soj, ne a 'ó yuvej se quitáá xráá tuvi' yuvej, qui'yaj nij so' ma'. Danj quirān' soj, che'é se gaa guun rá



Dioṣe raçuij Dioṣe man soj, ne ne xcaj soj cuentá ma' —taj Jesucristó ni'yaj so' man nij síi man chuman Jerusalén yo' a.

*Nana nihánj taj xna'anj se vaa quirii Jesucristó man nij yuvii tu'vej rasuun rá nuvíi nocoo a*

<sup>45</sup> Gaa ne catuj Jesucristó rá nuvíi nocoo, gaa ne guun che'e so' quirii so' man nu' nij yuvij tu'vej rasuun man rá nuvíi nocoo a.

<sup>46</sup> Ne cataj so' rihaan nij so' a:

—Danj Dioṣe taj se vaa tucua Dioṣe me rej na'vij yuvij rihaan Dioṣe á. Tzaj ne guun tucua síi ituu man tucua Dioṣe nihánj, qui'yaj soj nanj á —taj Jesucristó rihaan nij yuvij quirii so' a.

<sup>47</sup> Ne dan me se daj a güii nicun' Jesucristó rá nuvíi nocoo, tucu'yón Jesucristó se-nana so' rihaan yuvij, tzaj ne nij xrej ata suun nocoo doj do', nij síi naqui'yaj çuu se-tucañj Moisés rihaan yuvij do', nij síi uun chij rihaan nij yuvij israelitá do', nano' uxrá nij so' daj qui'yaj nij so' gaa ne ca'vee cavi' Jesucristó a.

<sup>48</sup> Tzaj ne ne nari' nij so' daj qui'yaj nij so' cavi' Jesucristó ma'. 'O se guun niha' uxrá rá nij yuvij cuno nij so' se-nana Jesucristó a.

## 20

*Nana nihánj taj xna'anj se vaa xná'anj nii man Jesucristó me síi ca'ne' suun rihaan so' qui'yaj so' ndaa vaa 'yaj so' a*

<sup>1</sup> Dan me se 'o güii nicun' Jesucristó rá nuvíi nocoo, tucu'yón Jesucristó rihaan yuvij, ne nata' so' se-nana so' nana sa', ne nicun' xrej ata suun nocoo doj nicun' síi naqui'yaj çuu se-tucañj Moisés nicun' síi uun chij nicun' rej tucu'yón Jesucristó a.

<sup>2</sup> Gaa ne cataj nij so' rihaan Jesucristó a:

—Me síi ca'ne' suun rihaan so' qui'yáa so' ndaa vaa 'yáa so' ga —taj nij so', xná'anj nij so' man Jesucristó a.

<sup>3</sup> Gaa ne cataj Jesucristó rihaan nij so' a:

—Ne vaa yo'o nana me raj xna'anj 'unj man nij soj, ne cataj soj rihanj á.

<sup>4</sup> Dan me se me síi ca'ne' suun rihaan síi cu'naj Juan cuta' ne so' man yuvij, rá soj ga. Ma'an Juan cavii raq na'. Ase Dioṣe cataj xna'anj rihaan so' xa'. Cataj xna'anj nij soj rihanj ei —taj Jesucristó rihaan nij so' a.

<sup>5</sup> Gaa ne nuchruij raq ndo'o nij so' ga tuvi' nij so' a:

—Ne sese cataj ní' se vaa Dioṣe ca'ne' suun rihaan síi cu'naj Juan cuta' ne so' man yuvij, ne cataj Jesucristó rihaan ní' me che'é ne cuchuman rá ní' nana ca'mú Juan, cataj so' a.

<sup>6</sup> Tzaj ne sese cataj ní' se vaa nuveé sji ca'ne' Dioṣe suun rihaan me síi cu'naj Juan, ne go' cunudanj nij yuvij yahij man ní' a. 'O se cuchuman rá nij yuvij se vaa síi nata' se-nana Dioṣe me síi cu'naj Juan a —cataj nij so' ga tuvi' ma'an nij so' a.

<sup>7</sup> Gaa ne cataj nij so' rihaan Jesucristó se vaa ne ne'en nij so' me síi ca'ne' suun rihaan síi cu'naj Juan cuta' ne so' man yuvij a.

<sup>8</sup> Gaa ne cataj Jesucristó rihaan nij so' a:

—Che'é dan se cataj xna'anj 'unj rihaan nij soj me síi ca'ne' suun rihanj qui'yáj ndaa vaa 'yáj ma' —taj Jesucristó rihaan nij so' a.

*Nana nihánj me cuentó nanó Jesucristó che'é yuvij chi'ij 'yaj suun rihaan yo'óo a*

<sup>9</sup> Gaa ne guun che'e Jesucristó nanó so' cuentó nihánj rihaan nij yuvií a.

—Dan me se cuchruij yo'q so' yo'q naa chruj uvá a. Gaa ne tanáj so' man naa yo' rihaan síi quí'yaj suun naa yo', ne curihanj so' ca'anj so' gan' que'ee yavii a.

<sup>10</sup> Ne 'o güii ca'neé so' man yo'ó se-mozó so' ca'anj so' rihaan nij síi nuu tumé xnaa so' a. 'Q se me rá so' rque nij síi nuu tumé naa doj chruj uvá rihaan yo'ó mozó yo', tzaj ne a doj chruj ne rque nij síi nuu tumé naa rihaan yo'ó mozó yo' ma'. Maan se go' ndo'o nij so' xráa so', ne quirii nij so' man so' rque naa yo' a.

<sup>11</sup> Che'é dan ca'neé síi to'oj naa yo' man yo'ó mozó uún, tzaj ne nij síi nuu tumé naa ro', go' uún nij so' xráa mozó uún, ne nij uxrá quí'yaj nij so' man so', ne quirii nij so' man so' rque naa, ne a doj chruj ne rque nij so' man mozó yo' a ma'.

<sup>12</sup> Gaa ne ca'neé uún síi xnaa yo' yo'ó mozó uún, tzaj ne quiran' chi'ij ndo'o so', quí'yaj nij síi nuu tumé naa, ne quirii nij so' man so' xe' a.

<sup>13</sup> "Gaa ne guun rá síi xnaa yo': "Daj quí'yáj yaj ga. 'Q se ca'nej 'unj ma'an ta'nij síi 'ee raj man á. Caraa cochroj nij so' rihaan ta'nij sese ca'anj ta'nij saj xee", guun rá síi xnaa, ne ca'neé so' man ta'nii ma'an so' ca'anj a.

<sup>14</sup> Dan me se quene'en nij síi nuu tumé naa se vaa 'na' ta'nii síi xnaa, gaa ne nuchruj raá nij so' ga tuvi' nij so' daj quí'yaj nij so', taj nij so' a: "Síi nihánj me síi guun xnaa man naa nihánj vaa güii ei. Che'é dan ticavi' ní' man so', ne vaa güii, ne guun xnaa ma'an ní' man naa nihánj chuguanj", taj nij so' rihaan tuvi' nij so' a.

<sup>15</sup> Gaa ne quirii nij so' man ta'nii síi xnaa yo' xe', ne ticavi' nij so' man ta'nii síi si'yaj naa nanj adonj. Che'é dan daj quí'yaj síi si'yaj naa yo' man nij síi nuu tumé xnaa so', rá nij soj ga.

<sup>16</sup> 'Q se ca'na' so' vaa güii, ne ticavi' so' man nij síi nuu tumé naa yo', ne tãcuachén so' xnaa so' rihaan yo'ó síi tumé man xnaa so' nanj adonj —taj Jesucristó rihaan nij yuvií a.

Gaa cuno nij yuvií nana nihánj, ne cuhu'vi' ndo'o nij so', ne cataj nij so':

—Orún' raá Diose me síi nacaj man núj rihaan sayuun yo' nanj chuguanj —taj nij so' rihaan Jesucristó a.

<sup>17</sup> Gaa ne ni'yaj Jesucristó man nij so', ne xná'anj Jesucristó man nij so' a:

—Che'é dan me se me che'é nó nana nihánj rihaan danj Diose, rá nij soj ga: "Yuvej quiri'ij nij síi cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj", taj danj Diose a.

<sup>18</sup> Ne yuvej yo' me se ase vaa yuvej yo' vaa 'unj, ne ase vaa yuvií tíxé yuvej yo' vaa yuvií na'vej rá cuno rihaan 'unj, ne uxrá quiran' nij so' sayuun nanj adonj. Ne ase vaa yuvií quiniij yuvej yo' xráa vaa nij yuvií quí'yáa 'unj sayuun man, ne yuun che'e quinaavjij nij so' nu' cavii nu' ca'anj nanj adonj —taj Jesucristó a.

<sup>19</sup> Gaa ne guun rá nij síi naquí'yaj cuu se-tucuanj Moisés rihaan yuvií guun rá nij xrej ata suun nocoq doj guun rá quita'aa ra'yanj man Jesucristó, tzaj ne chu'vi' nij so' ni'yaj nij so' man nij yuvií a. Quene'en nij so' se vaa che'e ma'an nij so' me cuentó nanó Jesucristó a. Ase vaa nij síi nuu tumé naa vaa ma'an nij so' rihaan Jesucristó, ne quene'en nij so' se vaa che'é dan nanó Jesucristó cuentó yo' a.

*Nana nihánj taj xna'anj che'e puextó go' ní' rihaan gobiernó dq', che'é se rque ní' rihaan Diose dq' a*

<sup>20</sup> Dan me se cutumé ndo'o nij síí naqui'yaj cūu se-tucuañj Moisés rihaan yuvií do', nij xrej atā suun nocōo doj do', man Jesucristó daj ca'mií so' a. Ne go' nij so' sa'anj rihaan doj tuvi' nij so' síí tiha' yu'unj cuchí' nij so' rihaan Jesucristó, ne qui'yaj nij so' ndāa vaa 'yaj síí vaa sa' síí me rá xna'anj nana man so' a. 'O se guun rá nij so' cuta' nij so' cacun' xráá Jesucristó che'é nana ca'mií so', gaa ne ca'vee taquachén nij so' man Jesucristó rihaan síí nicaj suun procurador a.

<sup>21</sup> Dan me se xná'anj nij síí tiha' yu'unj yo' man Jesucristó a:

—Ne'en núj se vaa nana nicā inañj a'mií so' ne tucuyón so' do', maestro. Ne 'o cuyaān vaa cunudañj yuvií rihaan so' chuguañj. Ne ya tucuyón so' rihaan yuvií daj qui'yaj yuvií canocō' yuvií man Diose, maestro.

<sup>22</sup> Dan me se nó xcúún ní' go' ní' puextó rihaan síí nicaj suun gobiernó na'. Ase se go' ní' xa' —taj nij síí tiha' yu'unj, xná'anj nij so' man Jesucristó a.

<sup>23</sup> Tzaj ne caxrj rá Jesucristó se vaa me rá nij so' tiha' yu'unj nij so' man so' a. Che'é dan cataj Jesucristó nana nihánj rihaan nij so' a:

<sup>24</sup> —Tīhaān soj sa'anj aga' nī'yaj ní' á —taj Jesucristó rihaan nij so' a.

Gaa ne gaa tihaān nij so' sa'anj aga' yo' rihaan Jesucristó, gaa ne cataj Jesucristó:

—Me síí nó rihaan sa'anj aga' nihánj ga. Ne me síí se-chuvii nó rihaan sa'anj aga' nihánj ga —taj Jesucristó, xná'anj so' man nij síí me rá tiha' yu'unj yo' a.

—Síí nicaj suun gobiernó me nó rihaan sa'anj aga' yo', ne nó se-chuvii so' rihaan sa'anj ei —taj nij so' a.

<sup>25</sup> Gaa ne cataj Jesucristó rihaan nij so' a:

—Che'é dan go' soj si'yaj síí nicaj suun gobiernó rihaan ma'an so', ne rque soj si'yaj Diose rihaan Diose á —taj Jesucristó a.

<sup>26</sup> Gaa ne ne guun nucuaj nij síí tiha' yu'unj yo' cuta' nij so' cacun' xráá Jesucristó che'é se-nānā so' ma'. 'O se cuno cunudañj nij yuvií daj ca'mií nij so', gaa ne ca'anj ndo'o rá nij yuvií cuno nij so' se-nānā Jesucristó, ne ca'ne' rá nij so' nanj adonj.

### *Nana nihánj taj xna'anj se vaa ya cunuu i'na' uún nij síí cavi' a*

<sup>27</sup> Dan me se cuchí' doj nij síí saduceo rihaan Jesucristó a. Nij síí saduceo ro', a'mií nana nihánj se vaa daj chihāā míj se cunuu i'na' uún yuvií asa' cavi' yuvií, taj nij so' a.

<sup>28</sup> Dan me se xná'anj nij so' man Jesucristó, ne cataj nij so' nana nihánj a:

—Cachrón síí cu'naj Moisés nana nihánj rihaan yanj, che'é rej cunō ní' nana nihánj a: “Sese cavi' yo'o síí vaa nicā, ne sese taj vaj ta'níí so', ne nō xcúún tinúú so' xcaj tinúú so' man chocō' so' chana quináj, ne cotoj tinúú síí cavi' ga chocō' so', ne cuchruj no' ne'ej, ne guun ta'nij síí cavi' man ne'ej yo', ne cunuu ne'ej yo' rihaan to'óó síí cavi' yo' a”, taj síí cu'naj Moisés gaa naá, maestro.

<sup>29</sup> Dan me se vaa chij nij tinuj 'o nij so' a. Síí chava' ro', xcaj man chana, tzaj ne cavi' so', ne taj vaj ne'ej cuchruj chana nicā so', qui'yaj so',

<sup>30</sup> ne che'é dan xcaj scue'ee síí cavi' yo' man chocō' so' chana quináj, tzaj ne cavi' so' uún, ne xcaj scue'ee so' uún man chana, tzaj ne cavi' so' uún,

<sup>31</sup> ne dan me se quisj xcaj nu' chij nij tinuj nij so' man orún' chana yo', tzaj ne taj vaj a 'ó ne'ej cuchruj chana yo', qui'yaj nij so' ma'. Ne cavi' taran' nij so' nanj adonj.

<sup>32</sup> Síj, gaa ne cavi' ma'an chana yo' uún,

<sup>33</sup> ne dan me se asa' cunuu i'na' uún nij sí cavi', gaa ne me nij tinuj nij so' nica' man chana' yo', rá so' ga. 'O se gaa vaa i'na' nij so', ne nica' taran' nij tinuj nij so' guun orún' no' a —taj nij sí saduceo, xna'anj nij so' man Jesucristó a.

<sup>34</sup> Gaa ne cataj Jesucristó rihaan nij so' a:

—Xa' nij yuvi' man rihaan chumi' nihánj cuano, tzaj ne uchruj nij so' sa'anj do', xcaj tuvi' nij so' do',

<sup>35</sup> tzaj ne ino' qui'yaj' nij yuvi' cunuu i'na' uún cayáan ga Diose asa' cunuu naca' uún chumi' nihánj nanj á. 'O se rej yanj Diose me se taj yan vaj sí xcaj tuvi' yo' ma'.

<sup>36</sup> 'O se danj nanj uún, ne taj yan vaj sí cavi' uún rej yo' ma'. 'O se ase vaa nij se-mozó Diose ro', danj gaa nij so', ne cuya' gaa nij so' ga nij se-mozó Diose, ése ta'nij Diose me nij so', ne sij aj cavi' ne cunuu i'na' uún me nij so' adonj.

<sup>37</sup> "Ne ma'an sí cu'naj Moisés me sí cataj xna'anj asino yaan se vaa ca'vee cunuu i'na' uún nij sí cavi' ndaa vaa nari' so' gaa canicun' so' rihaan yan nicun' 'o coj aco' ya'an ra' a. Dan me se cataj so' se vaa sí 'nij ra'a man ní' ro', me Diose sí noco' nij sí man gaa naá sí cu'naj Abraham do', sí cu'naj Isaac do', sí cu'naj Jacobo do' a.

<sup>38</sup> Dan me se nuveé se-Diose nij xngá me Diose ma'. Inanj nij sí vaa i'na' a'vee noco' man Diose nanj adonj. Che'é dan, nda' se sí cane gaa naá me va'nuj nij so', tzaj ne vaa i'na' nij so' rihaan Diose nanj ei. 'O se vaa i'na' cunudanj yuvi' ni'yaj Diose nanj adonj —taj Jesucristó rihaan nij so' a.

<sup>39</sup> Gaa ne ta'aj nij sí naqui'yaj cu se-tucuanj Moisés rihaan yuvi' ro', cataj rihaan Jesucristó a:

—Cunaj uxrá ca'mii so', maestro —taj nij so' a.

<sup>40</sup> 'O se ne quisij rá nij so' xna'anj nij so' doj nana man Jesucristó a ma'.

*Nana nihánj taj xna'anj se vaa sí ca'nej Diose tinanii man yuvi' rihaan sayuun ro', nuveé nanj yuvi' me so' ma'*

<sup>41</sup> Gaa ne cataj Jesucristó rihaan nij so' a:

—Me che'é taj nij soj se vaa nanj ta'ní ta'nij si'no' sí cu'naj David sí cane gaa naá me sí ca'nej Diose tinanii man yuvi' rihaan sayuun ga.

<sup>42</sup> 'O se nó se-nana ma'an sí cu'naj David rihaan yanj no' chra' qui'yaj so', se vaa cataj so':

<sup>43</sup> "Ca'mii Diose sí 'nij ra'a man ní' rihaan sí 'nij ra'a manj, cataj so' se vaa cayáan sí 'nij ra'a manj x'núú Diose rej nuva' Diose ndaa se quisij qui'yaj canaan Diose rihaan taran' nij sí taj ri'yunj man sí 'nij ra'a manj ne quirii ta'nga' sí 'nij ra'a manj rihaan nij so' adonj", taj sí cu'naj David yo' a.

<sup>44</sup> Dan me se sí 'nij ra'a man sí cu'naj David me sí ca'nej Diose tinanii man yuvi' rihaan sayuun, taj sí cu'naj David yo' a. Sese 'nij ra'a so' man David, gaa ne me che'é taj soj se vaa nanj ta'ní ta'nij si'no' David me so' ga. Taj che'é cataj soj se vaa nanj yuvi' me so' ma' —taj Jesucristó rihaan nij sí naqui'yaj cu se-tucuanj Moisés a.

*Nana nihánj taj xna'anj che'é cacun' tumé nij sí naqui'yaj cu se-tucuanj Moisés rihaan yuvi' a*

<sup>45</sup> Gaa ne ca'mii so' nana nihánj rihaan nij sí tucu'yón se-nana so', ne cunudanj nij yuvi' daj ca'mii so' a:

<sup>46</sup> —Xcaj nij soj cuentá daj 'yaj nij sí naqui'yaj cu se-tucuanj Moisés rihaan yuvi', ne tumé soj man soj se gaa nanj qui'yaj soj ndaa vaa 'yaj nij

so' á. Dan me se niha' rá nij so' cunuû nij so' yatzíj sa' xcaan cachee nij so' rej quene'en yuvii man nij so', ne aran' rá nij so' se vaa ca'mii sa' yuvii ga nij so' gaa chéé nij so' rihaan yu'vee a. Ne uun rá nij so' quitaj nij so' chruun xlá sa' doj gaa 'anj nij so' ve' nuu chre' ní' tucu'yón ní' se-tucuanj Moisés do', gaa 'anj nij so' cha'anj do' a.

<sup>47</sup> Ne a'néj nij so' ve' tucua' chana cavi' nica, ne yuun che'e guun tucua nij so' man ve' yo', ne 'yaj xcaan ndo'o nij so' cuentó achíin ni'yaj nij so' rihaan Diose, che'é rej sa' doj guun nucua'j nij so' tiha' yu'unj nij so' man yuvii a. Xa' nij so', tzaj ne che'é se vaa 'yaj nij so' ro', che'é dan doj a gaa sayuun quiran' nij so' qui'yaj Diose, asa' ca'ne' Diose cacun' che'é yuvii adonj —taj Jesucristó rihaan nij síi tucu'yón se-nana so' a.

## 21

*Nana nihánj taj xna'anj che'é chana nique cavi' nica qui'yaj sa' doj rihaan nij ru'vee, ni'yaj Diose a*

<sup>1</sup> Dan me se ni'yaj Jesucristó, ne quene'en so' se vaa araa ndo'o nij síi ru'vee sa'anj rque chruún taj rihaan nuvií nocoo che'é Diose a.

<sup>2</sup> Ne quene'en so' 'o chana cavi' nica chana nique se vaa caraa no' vij guee sa'anj aga' le'ej rque chruún yo',

<sup>3</sup> ne cataj so':

—Cataj xna'anj yá yá 'unj rihaan nij soj cuano se vaa xa' chana cavi' nica chana nique nihánj, tzaj ne doj a caraa no' sa'anj rque chruún yo' rihaan sa'anj caraa cunudanj yo'ó nij yuvii nanj adonj.

<sup>4</sup> Q se nij so', daj doj sa'anj quínáj raá se-sa'anj nij so' ro', caraa nij so' rque chruún, ne xa' no', tzaj ne nda' se achiin ndo'o sa'anj rihaan no', tzaj ne rque no' rihaan Diose cunudanj sa'anj nica'j no' sa'anj quiraan no' se cha no' nanj adonj —taj Jesucristó a.

*Nana nihánj taj xna'anj se vaa canee nu' nuvií nocoo ne chuman' Jerusalén a*

<sup>5</sup> Dan me se cataj ta'aj yuvii se vaa xa' nuvií nocoo, tzaj ne yuvej sa' inanj me yuvej guun nuvií nocoo, ne me doj uxrá sa'anj go' nij yuvii rihaan Diose che'é rej ca'vee cune' nii nuvií nocoo yo' a.

<sup>6</sup> Gaa ne cataj Jesucristó rihaan nij so' a:

—Xa' nu' nuvií nocoo ni'yaj soj nihánj, tzaj ne vaa güii canee nu' nuvií nocoo nihánj, ne a 'o yuvej se quitáá xráá tuvi' yuvej nihánj a ma' —taj Jesucristó a.

*Nana nihánj taj xna'anj che'é sayuun guun rihaan chumii nihánj vaa güii a*

<sup>7</sup> Dan me se xna'anj nii man Jesucristó, ne cataj nii rihaan so' a:

—Che'é dan cataj xna'anj so' rihaan núj aman canee nu' nuvií nocoo nihánj do', a me rasuun ca'na' qui'yáá so' asa' quisíj ca'na' sayuun yo', señor —taj nii, xna'anj nii man so' a.

<sup>8</sup> Gaa ne cataj so' rihaan nii:

—Tumé ndo'o soj man soj se gaa nanj tiha' yu'unj yuvii man soj á. 'Q se ca'na' uxrá yuvii cataj: “Unj me síi na'vij soj, ne Cristo mej á”, cataj nij yuvii, ne cataj uún nij yuvii: “Aj quisíj güii ca'anj ni'ya chumii nanj á”, cataj uún nij yuvii rihaan soj a. Tzaj ne se cuchumán rá soj, ne se canoco' soj man yuvii a'mii danj ma'.

9 "Dan me se ca'vee se cunō soj nana se vaa unu' uxrá chuman' ga tuvi' chuman' dō', ca'vee se cunō soj nana se vaa tucuáá ndo'o yuvi' rihaan gobiernó dō', tzaj ne se cuchu'vi' soj ma'. Maan se vaa che'é guun sayuun yo' rihaan chumi' nihánj asino yaan adonj. Tzaj ne asa' quisij guun danj, gaa ne se ca'anj ni'ya chumi' nihánj nu' orá ma'. 'Q se quinaj chumi' nihánj doj adonj —taj so' rihaan nij so' a.

10 Gaa ne cataj uún Jesucristó rihaan nij so' a:

—Dan me se cunu' uxrá yuvi' man chuman' nocōo ga yo'ó chuman' nocōo, ne cunu' gobiernó ga tuvi' gobiernó a.

11 Ne cachēn ndo'o yuún nocōo, ne que'ee chuman' me se cachēn ndo'o chi'i cachēn ndo'o x'naa cachēn ndo'o a. Ne quene'en ndo'o yuvi' rasuun nocōo nij ndo'o rej xta', ne cuchu'vi' nij yuvi', qui'yaj rasuun yo' a.

12 "Tzaj ne asa' ataa guun nu' sayuun yo', ne quita' ri'yunj nii man soj, ne quita'aa nii man soj, ne canocō' nii man soj qui'yaj nii sayuun man soj, ne taquachén nii man soj rihaan nij síi man rá ve' nuu chre' ní' tu'cu'yón ní' se-tucañj Moisés, ne caxri' nii taga' man soj, ne taquachén nii man soj rihaan nij síi nicaj suun, che'é se sij nocō' manj me soj a.

13 Sij, gaa ne quirj' soj cataj xna'anj soj rihaan nij so' che'é 'unj a.

14 Ne asa' nicun' soj rihaan nij so', ne yo'ó ca'nej nimán soj se nanó rá soj che'é nana ca'mii ma'an soj rihaan nij so' ma'.

15 'Q se ma'anj me síi rque nana cuu cavi' tu'va soj nanj á. Ne taj síi guun nucuaj qui'yaj canaán rihaan se-nana soj ma'.

16 Dan me se ndaa ma'an rej soj do', ndaa ma'an tuvi' soj do', ndaa ma'an tinúu soj do', ndaa ma'an nij síi man chiháán soj do', me nij síi taquachén man soj rihaan nij síi qui'yaj sayuun man soj, gaa ne ticavi' nii man ta'aj soj,

17 ne nachri' cunudanj nij yuvi' man rihaan chumi' ni'yaj nij so' man soj, che'é se me soj síi nocō' manj adonj.

18 Tzaj ne daj chihaa mǐj se ca'anj ni'ya a doj yuvé raá soj ma'.

19 'Q se che'é se nocō' raan soj manj ro', che'é dan yo'ó gaa i'na' soj nu' cavii nu' ca'anj adonj.

20 "Dan me se asa' quene'en soj se vaa tucuachriin tanuu nu' chuman' Jerusalén, ne xcaj soj cuentá se vaa daj doj quirj' nu' chuman' yo', ne quina'vij nu' chuman' yo' adonj.

21 Ne güii dan me se yo'ó cunanj nij síi man estadó Judea ca'anj nij so' raá quij, ne nij síi vaj rque chuman' Jerusalén me se ra'yanj curihanj nij so', ne nij síi vaj rej tacaan me se se catúj nij so' chuman' yo' daj chihaa mǐj ma'.

22 'Q se yo' me güii naru'vee Diose sayuun rihaan nij síi ne estadó Judea yo' che'é cacun' tumé nij so', ne ya danj guun, gaa ne quisij ya nu' nana no rihaan danj Diose che'é nij so' a.

23 Nique chana nuu rque do', chana vaa ta'nú' ne'ej utzii dō', güii ca'na' sayuun yo' a. 'Q se se guun nucuaj chana yo' cunanj chana yo' ma'. 'Q se guun ndo'o sayuun rej yo', ne caxri' yuvaa Diose man yuvi' yo',

24 ne cavi' que'ee nij so' raá ne espadá, ne quita'aa nii man que'ee nij so' ca'anj nicaj nii rej ne nij síi yanj a. Ne cachee nij síi yanj xraá nu' chuman' Jerusalén, ndaa se quisij güii ca'nee Diose suun ra'a nij so' a —taj Jesucristó a.

*Nana nihánj taj xna'anj daj gaa ca'na' uún Jesucristó rihaan chumi' nihánj*  
a

25 Ne cataj uún Jesucristó a:

—Gaa ne quene'en yuvij se vaa cunuun ino güii do', yavii do', nij yati' do', ne rihaan ma'an chumij me se cuchu'vi' ndo'o cunudanj nij yuvij cuno nij so' daj gaa cariin ndo'o na ya'anj do', quene'en nij so' daj gaa quinaan rihaan na ya'anj do' a.

<sup>26</sup> Ne cuchu'vi' ndo'o nij yuvij, che'é yan quinanō rá nij so' daj gaa quiran' nu' chumij nihánj a. Ne quinaan taran' nij rasuun nucuaj man rej xta' a.

<sup>27</sup> Gaa ne quene'en nij so' man 'unj sij ca'née Diose nıcaj yu'unj man yuvij á. Dan me se xraá ngaa quitaj 'unj ca'na' 'unj, ne guun nucuaj ndo'oj quirij ta'ngaj, ne ve'é uxrá curuvij ca'naj ei.

<sup>28</sup> Dan me se asa' guun che'e nu' rasuun nihánj guun yo' danj, ne canicun' soj, ne ni'yaj soj xta', ne daj doj nacaj 'unj man soj rihaan chumij nihánj gaa nanj adonj —taj Jesucristó rihaan nij so' a.

### *Nana nihánj taj xna'anj se vaa ya quene'en ní' se vaa daj doj ca'na' uún Jesucristó a*

<sup>29</sup> Gaa ne nanó Jesucristó cuentó nihánj a:

—Xcaj soj cuentá daj 'yaj chruun man chruj higo raá do', daj 'yaj me ma'an chruun do' á.

<sup>30</sup> Gaa naca coj ya'lij ra'a nij chruun, ne ni'yaj soj man nij chruun, ne ne'en soj se vaa daj doj 'na' tió namān maan a.

<sup>31</sup> Dan me se xcaj uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne daj doj guun che'e Diose guun chij Diose rihaan chumij nihánj nanj adonj.

<sup>32</sup> Ya ya cataj xna'anj 'unj rihaan soj cuano se vaa quene'en ta'aj soj sij vaa i'na' rihaan chumij nihánj cuano quisij nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavij soj ei.

<sup>33</sup> Vaa güii ca'anj ni'ya yo'óo do', xta' do', tzaj ne se-nanaj me se daj chihaa mij se quinavij yo' ma' —taj Jesucristó rihaan nij so' a.

### *Nana nihánj taj xna'anj se vaa tumé ní' man ní' daj qui'yaj ní', gaa ne ca'vee canicun' ní' rihaan Jesucristó a*

<sup>34</sup> Ne cataj uún Jesucristó a:

—Dan me se cütumé soj man soj se gaa nanj yo'o guun rá soj rasuun man rihaan chumij nihánj, ne guun rá soj guun xno soj do', guun rá soj ca'mij sca' soj do', guun rá soj guun si'yaj soj nu' rasuun man rihaan chumij nihánj do' a. Se qui'yaj soj danj, tóse taj ni'yón ca'naj, ne se quene'en soj ca'naj a.

<sup>35</sup> 'Q se ndaa rá se vaa 'o lazo ne' ta'aa man nii ro', danj gaa ca'na' xraá cunudanj chumij nihánj adonj.

<sup>36</sup> Che'é dan yo'o ni'yaj soj, ne xcaj soj cuentá nu' güii, ne inanj cachinj ni'yaj soj rihaan Diose se vaa ca'vee quinanij soj rihaan nu' sayuun nihánj asa' guun danj rihaan chumij nihánj, gaa ne ca'vee canicun' soj rihaan 'unj sij ca'née Diose nıcaj yu'unj man yuvij ei —taj Jesucristó a.

<sup>37</sup> Dan me se rej ranga' ro', ne Jesucristó rá nuvií nocoo, ne tucu'yón so' man nij yuvij, ne rej ti'nuu me se curihanj so', ne rej cu'naj Quij man Chruun Olivó aran' so' a.

<sup>38</sup> Ne taxrej uchi' cunudanj nij yuvij cuno nij so' se-nana Jesucristó a.

## 22

*Nana nihánj taj xna'anj daj qui'yaj síi cu'naj Judas gaa cutu'vej yuve so' man Jesucristó a*

<sup>1</sup> Dan me se daj doj canuú cha'anj pascuá cha'anj chá nij yuvij israelitá chraa yo'óo trigó a.

<sup>2</sup> Ne nano' nij xrej atá suun nocoo doj do', nij síi naqui'yaj cuu se-tucuanj Moisés rihaan yuvij do', daj qui'yaj nij so' ne cavi' Jesucristó, che'é se man ndo'o yuvij nocoo' man Jesucristó a.

<sup>3</sup> Ne catúj síi chree cu'naj Satanás nimán síi cu'naj Judas Iscariote, ne so' me se yo'o tuvi' ma'an chuvij nij síi tucu'yón se-nana Jesucristó me so' a.

<sup>4</sup> Dan me se cavii so' ca'anj so', ne ca'mii so' ga nij xrej atá suun nocoo doj do', ga tanuu uun chij rihaan nij tanuu tumé nuviú do', gaa ne cataj so' daj qui'yaj so' ne taçuachén so' man Jesucristó rihaan nij so' a.

<sup>5</sup> Gaa ne guun niha' rá nij so' gaa cuno nij so' se-nana Judas, ne guun ya ca'mii nij so' ga Judas se vaa rque nij so' sa'anj man Judas a.

<sup>6</sup> Dan me se cata' tu'va síi cu'naj Judas se vaa taçuachén so' man Jesucristó rihaan nij so', gaa ne nuchruj raa Judas aman ca'vee taçuachén so' man Jesucristó rihaan nij so', gaa ne se gaa nanj quene'en nij yuvij a.

*Nana nihánj taj xna'anj che'é rachruún rque Jesucristó rihaan nij síi tucu'yón se-nana so' cha' nij so' do', che'é na vinó rque so' co'o nij so' do' a*

<sup>7</sup> Dan me se quisj güii canuú cha'anj chá nii chraa yo'óo trigó, ne güii dan me güii ticavi' nij yuvij israelitá matzinj le'ej che'é Diose a.

<sup>8</sup> Dan me se ca'née Jesucristó man Pedró do', man Juan do', ne cataj so' rihaan roj so':

—Ca'anj roj soj qui'yaj chuvij roj soj cha ní' ne navij rá ní' cha'anj pascuá ei —taj so' rihaan roj so' a.

<sup>9</sup> Gaa ne xná'anj roj so' man Jesucristó a:

—Me rej qui'yaj chuvij núj cha ní' ga —taj roj so' a.

<sup>10</sup> Gaa ne cataj Jesucristó rihaan roj so' a:

—Cuno roj soj nana nihánj, se vaa asa' catúj roj soj chuman' yo', ne nari' tuvi' roj soj ga 'o síi táa chihá 'o cacua' na, ne canoco' roj soj man so', catuu roj soj rá ve' catuu so',

<sup>11</sup> ne cataj roj soj rihaan síi tucua ve' yo': “Xná'anj maestró mán so' se vaa me rej ne ve' cha xti'no maestró chraa ga nij síi tucu'yón se-nana so' che'é cha'anj pascuá, taj so' a”, cataj roj soj rihaan síi tucua ve' yo' a.

<sup>12</sup> Gaa ne tihaa' so' 'o ve' nata' xij rihaan roj soj, ne aj vaa chuvij rá ve' yo', ne man chruun mesá man chruun xlá man rá ve' yo' a. Yo' me rej qui'yaj chuvij roj soj á —taj Jesucristó rihaan roj so' a.

<sup>13</sup> Dan me se cavii roj so' ca'anj roj so', ne nari' roj so' nu' ndaa vaa cataj xna'anj Jesucristó rihaan roj so', gaa ne qui'yaj chuvij roj so' cha xti'no nij so' chraa che'é cha'anj pascuá a.

<sup>14</sup> Ne quisj orá cha xti'no nij so', ne ca'na' Jesucristó ga yo'óo nij apóstol cune' so' man nata' rihaan yuvij che'é so', gaa ne ca'anj cayáán taran' nij so' rihaan mesá a.

<sup>15</sup> Gaa ne cataj Jesucristó rihaan nij so' a:

—Guun ndo'o raj cha xti'no 'unj che'é cha'anj pascuá nihánj ga nij soj cuano nihánj gaa ataa quirán' 'unj sayuun a.



16 'O se cataj xna'anj 'unj rihaan soj cuano se vaa se chá xti'nō uún 'unj ga soj a 'ó cha'anj nihánj ndaa se quisij güii canuú cha'anj pascuá naca asa' guun chij Diose rihaan chumiñ nihánj a man adonj —taj Jesucristó rihaan nij so' a.

17 Gaa ne nicaj so' 'o aga' tazá na vinó, ne nago' so' graciá rihaan Diose, gaa ne cataj so':

—Quita'aa soj na nihánj, cuxra' ta'aj soj, ne co'ō cunudanj soj á.

18 'O se cataj xna'anj 'unj rihaan soj cuano se vaa veé doj nihánj me co'oj, ne se co'oj yaj a ma'. Tzaj ne asa' quisij güii guun chij Diose rihaan chumiñ nihánj, ne co'oj adonj —taj Jesucristó rihaan nij so' a.

19 Gaa ne nicaj so' rachruún, ne nago' so' graciá rihaan Diose, gaa ne cuxra' so' rachruún, ne rque' so' man nij so', ne cataj so':

—Ne manj me rachruún nihánj nanj á. Ca'vej rá 'unj cavi' ne manj che'é soj, ne chá soj man nihánj, gaa ne yo'ō cunuú rá soj manj ei —taj so' rihaan nij apóstol a.

20 Gaa ne ase vaa qui'yaj so' ga rachruún ro', danj qui'yaj uún so' ga aga' nuu na vinó gaa quisij chá xti'nō nij so', ne cataj so':

—Na vinó nihánj ro', me ton manj a. Che'é ton manj ro', rque' Diose 'o nana rihaan soj daj qui'yaj Diose ga soj a. Dan me se che'é se cayanj ton manj ro', che'é dan me caraá x'naa Diose ni'yaj Diose cacun' tumé yuviñ nanj adonj —taj Jesucristó rihaan nij so' a.

*Nana nihánj taj xna'anj se vaa ma'an Jesucristó cataj xna'anj se vaa tacuachén yo'ō sí tucu'yón se-nana so' man so' rihaan nij sí taj ri'yunj man so' a*

21 Ne cataj uún Jesucristó a:

—Tzaj ne xcay soj cuentá se vaa vaa 'o sí tacuachén manj rihaan nij sí taj ri'yunj manj, ne táa ra'a so' rihaan chruun mesá taj ra'aj nihánj cuano ei.

22 'O se xa' 'unj sij ca'néé Diose nicaj yu'unj man yuviñ, tzaj ne ca'anj 'unj cavi' 'unj ndaa vaa cataj xna'anj ma'an Diose a. Tzaj ne nique ndo'ō sí tacuachén manj rihaan nij sí taj ri'yunj manj nanj á. Quiran' uxrá so' sayuun adonj —taj Jesucristó rihaan nij so' a.

23 Gaa ne guun che'e nij sí tucu'yón se-nana Jesucristó nuchruj raa nij so' ga tuvi' nij so' me tuvi' nij so' me sí qui'yaj danj man Jesucristó, rá nij so' a.

*Nana nihánj taj xna'anj daj qui'yaj ní sese me rá ní guun ní sí guun chij doj rihaan tuvi' ní a*

24 Gaa ne ca'mii cunu' cunudanj nij sí tucu'yón se-nana Jesucristó me tuvi' nij so' me sí guun chij doj a.

25 Gaa ne cataj Jesucristó rihaan nij so' a:

—Nij sí nicaj suun rey uun chij rihaan nij yuviñ yanj ro', rii ta'nga' uxrá nij so' rihaan tuvi' nij so', ne tucu'náj nii “sí 'ñj ra'a man ní” man nij so' nanj á.

26 Tzaj ne se guun soj sí vaa danj ma'. Maan se tuvi' soj sí guun rá se vaa guun chij so' doj rihaan soj ro', vaa che'é guun so' sí noco' doj rihaan soj, ne guun so' ase vaa 'o se-mozó soj a.

27 Dan me se me sí me sí uun chij doj, rá soj ga: sí anicaj co'oo rihaan mesá na', ase sí yanj rihaan mesá xa'. Veé sí yanj rihaan mesá me sí uun chij doj, rá soj a. Tzaj ne nihánj me se vaj ma'an 'unj sca'núj nij soj, ne aj guún 'unj mozó rihaan soj vaa nanj adonj.

28 “Ne xa' soj, tzaj ne nij soj me nij sí cachéé ga 'unj gaa quirán' 'unj sayuun,

<sup>29</sup> ne ase vaa cune! Réj Diose manj se vaa guun chij 'unj ro', danj gaa cune! 'unj man soj cuano

<sup>30</sup> se vaa cayáan soj rihaan xrúun 'unj chruun mesá asa' guun chij ma'anj, ne cha soj chraa ne co'q soj na ga 'unj adonj. Ne quitaj soj chruun xlá sa' ndo'o, ne ca'ne! soj cacun' che'é chuvij nij x'ne! yuvij israelitá adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj daj ca'mii Jesucristó ga síi cu'naj Simón Pedró a*

<sup>31</sup> Gaa ne cataj Jesucristó rihaan síi cu'naj Simón Pedró a:

—Cunó so' nana nihánj ca'mij rihaan so', Simón. 'O se aj cachúin ni'yaj síi cu'naj Satanás rihaan Diose se vaa ca'vej rá Diose qui'yaj so' sayuun man nij soj a. Dan me se ase vaa 'yaj nii man 'núu trigó gaa tixrin' nii 'núu trigó rihaan rcuaa ro', danj qui'yaj síi chree man soj, che'é se guun rá so' quirí' soj adonj.

<sup>32</sup> Tzaj ne aj cachúin ni'yáa 'unj rihaan Diose che'é so', se vaa se ca'ne! rá so' ga suun amán rá ni'yaj manj a ma'. Gaa ne asa' nanicaj nimán so' canoco' uún so' manj ro', ne racuj so' man nij tinúu so' se vaa cunyu sca' doj nimán nij so' uún á —taj Jesucristó rihaan síi cu'naj Simón Pedró yo' a.

<sup>33</sup> Gaa ne cataj so' rihaan Jesucristó a:

—Tzaj ne aj ca'neé nimanj yo'q cachee 'unj ga so', Señor. Ca'vee se caxrii nii taga' mán so' ca'vee se ticavi' nii mán so' ca'vee se, tzaj ne se tanáj xco 'unj mán so' ma' —taj so' rihaan Jesucristó a.

<sup>34</sup> Tzaj ne cataj Jesucristó rihaan Pedró a:

—Nihánj me cataj 'unj rihaan so' daj qui'yáa so', Pedró. Ne'én 'unj se vaa asa' ataa caguaj to'loo ni corá, ne va'núj cataj so' se vaa ne ne'én so' manj ma' —taj Jesucristó rihaan Pedró a.

*Nana nihánj taj xna'anj se vaa quiran' nij síi tucu'yón se-nana Jesucristó sayuun a*

<sup>35</sup> Gaa ne cataj Jesucristó rihaan nij síi tucu'yón se-nana so' a:

—Gaa ca'neé 'unj man soj ca'mii natáj soj se-nanaj rihaan nij yuvij israelitá ne taj nanj taj vitó taj canj taj ca'anj nica' soj gaa ca'anj soj, tzaj ne taj vaj rasuun cachiin man soj gaa ca'anj soj, rá 'unj a —taj Jesucristó rihaan nij so' a.

—Taj vaj a doj rasuun ne cachijn man núj ma' —taj nij so' rihaan Jesucristó a.

<sup>36</sup> Gaa ne cataj Jesucristó rihaan nij so' a:

—Yaj me se sese vaa xnánj soj do', se-vito soj do', ne njicaj soj ca'anj soj á. Ne sese taj yan vaj neê espadá rihaan soj, ne quiraan soj 'o taneé soj neê espadá á. Ne sese nuvi' sa'anj rihaan yo'q tuvi' soj, ne vaa che'é cutu'vee so' se-roto so', ne quiraan so' neê espadá ei.

<sup>37</sup> 'O se vaa nana no rihaan danj Diose taj: “Cataj nii se vaa sji 'yaj cacun' me so'”, taj danj Diose che'é 'unj, ne vaa che'é quisij ya nu' nana yo' che'ej a. 'O se daj doj quinavij se vaa 'yáa 'unj rihaan chumii nihánj nanj adonj —taj Jesucristó rihaan nij so' a.

<sup>38</sup> Gaa ne cataj nij so' rihaan Jesucristó a:

—Ni'yaj so' ei. Vaa vij neê espadá rihaan ní' nihánj, Señor —taj nij so' a.

—Vee danj me se danj nanj á —taj Jesucristó rihaan nij so' a.

*Nana nihánj taj xna'anj daj qui'yaj Jesucristó gaa cachúin ni'yaj Jesucristó rihaan Diose a*

39 Gaa ne cavii so' ca'anj so' quij cu'naj Quij man Chruun Olivó, ndaa vaa cu'yón inanj so' qui'yaj so' a. Ne canoco' nij sí tucu'yón se-nana so' rej xco so' a.

40 Ne gaa cuchi' nij so' rej yo', ne cataj Jesucristó rihaan nij so' a:

—Cachinj ni'yaj soj rihaan Diose se vaa caráán Diose chrej rihaan sí chree se gaa nanj guun rá soj qui'yaj soj cacun' qui'yaj sí chree á —taj Jesucristó rihaan nij sí tucu'yón se-nana so' a.

41 Gaa ne naxuun so' man so' rihaan nij sí tucu'yón se-nana so', ne ca'anj so' rej yanij doj, ne canicun' ruj so', ne cachín ni'yaj so' rihaan Diose,

42 ne cataj so' rihaan Diose a:

—Sese ca'vee, ne caráán ra'a so' xráj, se gaa nanj quirán' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáá so' ndaa vaa me rá ma'anj ma' —taj Jesucristó, cachín ni'yaj so' rihaan Diose a.

43 Gaa ne curuvi' yo'o se-mozó Diose cavii rej xtá' rihaan so', ne nari' nucuaj nimán so', qui'yaj se-mozó Diose yo' a.

44 Ne nanó ndo'o rá so', ne nucuaj ndo'o cachín ni'yaj so' rihaan Diose, ne cavii ndo'o nihaa rihaan so', ne ase vaa ton vaa nihaa cavii rihaan so' cayanj rihaan yo'óo a.

45 Ne canicun' caya so', ne ca'anj so' rej ne nij sí tucu'yón se-nana so', tzaj ne quene'en so' se vaa cotoj nu' nij so', che'é se nanó ndo'o rá nij so' a.

46 Gaa ne cataj Jesucristó rihaan nij so' a:

—Me che'é otoj soj ga. Naxumaañ soj cachinj ni'yaj soj rihaan Diose se gaa nanj guun rá soj qui'yaj soj cacun' qui'yaj sí chree á —taj so' rihaan nij sí tucu'yón se-nana so' a.

### *Nana nihánj taj xna'anj daj qui'yaj nii gaa quita'aa nii man Jesucristó a*

47 Dan me se nicun' Jesucristó ca'mii so', ne nu' ca'na' que'ee yuvij, ne sí cu'naj Judas yo'o tuvi' chuvij nij sí tucu'yón se-nana Jesucristó me sí táá yaan rihaan nij yuvij, ne quinichrun' sí cu'naj Judas rihaan Jesucristó, che'é rej guun rá so' cachron tu'va so' xruu Jesucristó a.

48 Gaa ne cataj Jesucristó rihaan Judas a:

—Ne chihán' uxrá 'yáá so', se vaa tacuachén so' manj sij ca'neé Diose njcay yu'unj man yuvij gaa cachron tu'vá so' xruj, man Judas —taj so' rihaan Judas yo' a.

49 Dan me se quene'en nij sí nicun' ga Jesucristó daj qui'yaj nij yuvij man Jesucristó, ne che'é dan xná'anj nij so' man Jesucristó a:

—Go' núj neê espadá rañ nij so', rá so' na' —taj nij so' rihaan Jesucristó a.

50 Ne yo'o tuvi' nij so' ro', go' taneé so' neê espadá rañ se-mozó xrej atá suun nocco doj, ne güéj nu' xréé yo' rej nuva' yo', qui'yaj so' a.

51 Gaa ne cataj Jesucristó rihaan so' a:

—Ca'ne' rá soj ga suun 'yaj danj á —taj Jesucristó rihaan nij so' a.

Gaa ne cuta' Jesucristó ra'a Jesucristó rej quirán' chi'ij xréé mozó yo', ne nu' orá nahuun sa' xréé mozó yo', qui'yaj Jesucristó a.

52 Gaa ne cataj Jesucristó rihaan nij xrej atá suun nocco doj do', rihaan tanuu uun chij rihaan nij tanuu tumé nuvi' do', rihaan nij sí uun chij rihaan nij yuvij israelitá do' a:

—Me che'é 'na' neê espadá 'na' chruun 'na' ga soj ga. Sí ituu mé 'unj, rá soj na'.

53 'Q se daj a güii yáan 'unj gā nij soj rá nuvií nocoo, tzaj ne ne guun rá soj quita'aa soj mán 'unj ma'. Tzaj ne cuano nihánj me se aj quisij orá ca'vee qui'yaj soj ndaa vaa me rá soj qui'yaj soj, ne nihánj me se ca'vee guun nucuaj soj sij vaj rej rmi' a —taj Jesucristó rihaan nij so' a.

*Nana nihánj taj xna'anj daj qui'yaj síi cu'naj Pedró gaa cataj so' se vaa nuveé sij noco' man Jesucristó me so' a*

54 Dan me se quita'aa nij so' man Jesucristó, ne ca'anj nicaj nij so' man Jesucristó rá ve' tucuaá xrej atā suun nocoo doj, ne gan' gan' canoco' síi cu'naj Pedró rej xco Jesucristó, 'na' so' a.

55 Dan me se naran' nii ya'an rá ve', ne yáan tacuachriin taran' nii rihaan ya'an, ne yáan síi cu'naj Pedró sca'núj nij so' a.

56 Dan me se yáan so' rej chuguun ya'an rihaan nij tuvi' xrej, ne quene'en yo'q mozó chana man so', ne ni'yaj uxrá chana yo' man so' a. Gaa ne cataj mozó chana yo' rihaan tuvi' no' síi man gā no' a:

57 —Síi nihánj ro', me yo'q síi cachéé gā Jesucristó a —taj chana yo', ni'yaj yo' man Pedró a.

Gaa ne cataj Pedró rihaan chana yo' a:

—Ne ne'én 'unj man so', man nocoj —taj so' a.

58 Ne yo'ó orá nii me se quene'en yo'ó so' man Pedró uún a:

—Yo'q tuvi' nij síi chéé gā so' mé so' ei —taj so' rihaan Pedró a.

—Taj ma'. Nuveé sij chéé gā so' mé 'unj, man tinuj —taj Pedró yo' a.

59 Dan me se cachén yo'ó orá uún, gaa ne nucuaj ca'mii yo'ó so' a:

—Ya uxrá sij cachéé gā Jesucristó me síi nihánj nanj ei. 'Q se sij cavii estadó Galilea me roj so' gā Jesucristó chuguanj —taj yo'ó so' a.

60 Gaa ne cataj Pedró rihaan síi tu'va danj a:

—Ne uno uxraj me taj so', man tinuj —taj so' rihaan nij so' a.

Ne dan me se nu' ca'mii so' danj, ne nu' caguáj to'loo a.

61 Gaa ne canicaj síi 'nij ra'a man ní, ne ni'yaj so' man Pedró, gaa ne nanuj rá Pedró se-nana síi 'nij ra'a man ní gaa cataj síi 'nij ra'a man ní rihaan so': "Ne'én 'unj se vaa asa' ataa caguaj to'loo nií corá, ne va'nuj cataj so' se vaa ne ne'én so' manj ma'", cataj síi 'nij ra'a man ní rihaan so' quii a.

62 Dan me se gaa ni'yaj síi 'nij ra'a man ní man Pedró, gaa ne curihanj Pedró xe', ne ta'vee ndo'o so' a.

*Nana nihánj taj xna'anj daj qui'yaj nii gaa cuta' nii cacun' xráá Jesucristó a*

63 Gaa ne nij síi quita'aa man Jesucristó ro', tiha' ndo'o nij so' man so', ne go' nij so' xráá so' a.

64 Ne gaa go' nij so' xráá so' me se caráán nij so' rihaan Jesucristó, ne cataj nij so' rihaan so' a:

—Cataj so' rihaan núj me síi go' mán so' á —taj nij so',

65 ne que'ee doj nana nij a'mii uún nij so' rihaan Jesucristó a.

66 Ne gaa quisij güii, ne cunuu chre' nij síi uun chij rihaan nij yuvií israelitá, ne dan me se nij xrej atā suun nocoo doj do', nij síi naqui'yaj cuu se-tucuanj Moisés do', cunuu chre', ne ca'anj nicaj nij so' man Jesucristó rá ve' a'ne' nij so' cacun' che'é yuvií a. Gaa ne xná'anj nij so' man Jesucristó, ne cataj nij so':

67 —Sese ya sij ca'néé Diose tinanii man yuvií rihaan sayuun mé so', rá so', ne cataj xna'anj so' rihaan núj á —taj nij so' a.

Gaa ne cataj Jesucristó rihaan nij so' a:

—Ca'v̄ee se cataj xna'anj 'uj̄n rihaan soj, tzaj n̄e s̄e cuchumán rá soj se-n̄añaj ma'.

<sup>68</sup> N̄e sese xna'anj 'uj̄n 'o nana man soj, tzaj n̄e s̄e cataj xna'anj soj rihanj ma'.

<sup>69</sup> Tzaj n̄e rej rihaan ní' me se xa' 'uj̄n sij ca'née Diose n̄icaj yu'unj man yuvij, tzaj n̄e cayáán 'uj̄n rej nuva' Diose síi nucuaj ndo'o a —taj Jesucristó rihaan nij so' a.

<sup>70</sup> Gaa n̄e xná'anj cunudanj nij so' man Jesucristó, cataj nij so':

—Che'é dan me ta'nij Diose mé so', rá so' na' —taj nij so' rihaan so' a.

Gaa n̄e cataj Jesucristó rihaan nij so' a:

—Veé ya ndaa vaa cataj soj ro', veé danj vaa n̄añ á —taj so' a.

<sup>71</sup> Gaa n̄e cataj nij so' rihaan tuvi' nij so' a:

—Se cachiin doj síi ca'na' cataj xna'anj rihaan ní' che'é cacun' tumé síi nihánj a ma'. 'O se ma'an ní' me síi cuno daj tu'va so' nihánj n̄añ adonj —taj nij so' rihaan tuvi' nij so' a.

## 23

### *Nan̄a nihánj taj xna'anj daj ca'mii síi cu'naj Pilato ga Jesucristó a*

<sup>1</sup> Dan me se que'ee nij so', n̄e naxumañ taran' nij so', n̄e ca'anj nicaj nij so' man Jesucristó rihaan síi cu'naj Pilato a.

<sup>2</sup> Gaa n̄e cuta' nij so' cacun' xráá so' rihaan síi cu'naj Pilato, n̄e cataj nij so' rihaan síi cu'naj Pilato a:

—Síi nihánj ro', me síi tucu'yón tucuáán n̄e rihaan tuvi' n̄uj sij israelitá, n̄e cataj so' se vaa se go' yuvij puextó rihaan síi nicaj suun cu'naj César, n̄e taj so' se vaa sij ca'née Diose guun síi nicaj suun rey me ma'an so', taj so' adonj —taj nij so' rihaan síi cu'naj Pilato, ni'yaj nij so' man Jesucristó a.

<sup>3</sup> Gaa n̄e xná'anj síi cu'naj Pilato man Jesucristó a:

—So' me síi nicaj suun rey uun chij rihaan nij yuvij israelitá na' —taj so', xná'anj so' man Jesucristó a.

—Veé á —taj Jesucristó rihaan so' a.

<sup>4</sup> Gaa n̄e cataj síi cu'naj Pilato rihaan nij xrej at̄a suun nocoo doj do', rihaan nij yuvij do' a:

—Nuvi' cacun' tumé síi nihánj narij ma' —taj so' a:

<sup>5</sup> Tzaj n̄e nucuaj doj ca'mii nij so', cataj nij so':

—Tzaj n̄e que'ee yuvij uno se-n̄añ so', n̄e vaa güii qui'yaj nij so' sayuun n̄añ á. N̄e vaj so' tucu'yón so' se-n̄añ so' nu' estadó Judea nihánj, n̄e guun che'e so' tucu'yón so' se-n̄añ so' estadó Galilea, n̄e 'na' so' ndaa nihánj tucu'yón so' n̄añ adonj —taj nij so' rihaan Pilato a.

<sup>6</sup> Dan me se cuno Pilato se-n̄añ nij so', gaa n̄e xná'anj Pilato man nij so' sese sij cavii estadó Galilea me Jesucristó a.

<sup>7</sup> Gaa n̄e quene'en so' se vaa ya cavii Jesucristó estadó Galilea rej uun chij síi cu'naj Herodes a. Che'é dan cataj so' se vaa ca'anj n̄icaj nij so' man Jesucristó rihaan síi cu'naj Herodes yo' a. 'O se güii dan me se nuú ma'an síi cu'naj Herodes chuman' Jerusalén a.

### *Nan̄a nihánj taj xna'anj daj ca'mii síi cu'naj Herodes ga Jesucristó a*

<sup>8</sup> Gaa quene'en síi cu'naj Herodes man Jesucristó, gaa n̄e guun niha' uxrá rá so' a. 'O se asij rque ndo'o me se guun rá so' quene'en so' man Jesucristó, che'é se aj cuchí' nana rihaan so' daj 'yaj Jesucristó a. N̄e guun rá so' se vaa qui'yaj Jesucristó 'o suun sa' nocoo ni'yaj so' a.

9 Dan me se xná'anj ndo'o so' naná man Jesucristó, tzaj ne a 'ó naná ne ca'mii Jesucristó rihaan so' a ma'.

10 Tzaj ne nicun' nij xrej atá suun nocqo doj nicun' nij sí naqui'yaj cuu se-tucuanj Moisés rihaan nij yuviñ nicun', ne nucuj ndo'o cuta' nij so' cacun' xráá Jesucristó a.

11 Gaa ne nachri' Herodes do', nij tanuu nuu rihaan so' do', ni'yaj nij so' man Jesucristó, ne ca'nga' nacqo nij so' ni'yaj nij so' man Jesucristó a. Gaa ne na'née nij so' yatzíj sedá man Jesucristó qui'yaj Herodes, ne veé dan na'née uún Herodes man so' rihaan Pilato a.

12 Ne güii dan me se guun che'e Herodes ga Pilato na'mii sa' roj so' ga tuvi' roj so' a. 'O se asij rque doj me se sij taj ri'yunj man tuvi' me roj so' a.

*Naná nihánj taj xna'anj se vaa cataj xna'anj sí cu'naj Pilato se vaa cavi' Jesucristó rihaan rcutzé a*

13 Dan me se canacúun sí cu'naj Pilato man nij xrej atá suun nocqo doj do', man nij sí uun chij rihaan nij yuviñ israelitá do', man ma'an nij yuviñ do', se vaa ca'na' nij so' cunu chre' nij so' rihaan so' a.

14 Gaa ne cataj Pilato rihaan nu' nij yuviñ a:

—Dan me se nicaj soj man snó'o nihánj ca'na' soj rihanj, ne cataj soj se vaa so' me sí me rá qui'yaj nij yuviñ sayuun a. Ne veé xná'anj 'unj man so' cuno taran' soj daj 'yaj so', ne xa' cacun' cuta' soj xráá so', tzaj ne taj vaj cacun' vaa danj tumé sí nihánj narij ma'.

15 Ne sí cu'naj Herodes roj, ne nari' so' cacun' tumé sí nihánj a ma'. Maan se na'née uun sí cu'naj Herodes man sí nihánj rihaan ni' nanj á. Ne xcax soj cuentá se vaa taj cacun' qui'yaj sí nihánj, ne ne nó xcúun so' cavi' so' ma'.

16 Che'é dan qui'yaj doj sayuun man so', ne ca'anj uun so', qui'yaj ní nanj á —taj Pilato rihaan taran' nij yuviñ a.

17 'O se maan güii dan me se daj a cha'anj pascuá na'née nij so' man 'o yuviñ 'nij taga' a.

18 Gaa ne caguáj cunudanj nij so', cataj nij so' a:

—Ticavi' soj man sí nihánj ei. Ticavi' soj man sí nihánj ei. Ne quirii so' man sí cu'naj Barrabás taga' che'é núj á —taj nij so', caguáj nij so' rihaan Pilato a.

19 Ne xa' sí cu'naj Barrabás, tzaj ne sij qui'yaj cunu' nij yuviñ man chuman' Jerusalén me so', ne sij ticavi' man yuviñ me so', ne che'é dan caxríj nii taga' man so' a.

20 Gaa ne ca'mii uún Pilato rihaan nij yuviñ a. 'O se guun rá so' quirii so' man Jesucristó ca'anj Jesucristó a.

21 Gaa ne caguáj nu' nij yuviñ, cataj nij so':

—Canq ya so' rihaan rcutzé ei —taj nij yuviñ, caguáj nij yuviñ a.

22 Gaa ne quisíj va'nuj cataj so' rihaan nij yuviñ:

—Tzaj ne taj vaj se chi'ii qui'yaj so' ma'. Taj vaj cacun' tumé so', ne ne nó xcúun so' cavi' so' ma'. Dan me se qui'yaj doj sayuun man so', ne ca'anj uun so' qui'yaj nanj á —taj uún Pilato rihaan nij yuviñ a.

23 Tzaj ne caguáj ndo'o nij yuviñ, ne uxrá ca'ne' nij yuviñ suun rihaan Pilato se vaa ya cavi' Jesucristó rihaan rcutzé qui'yaj so', ne guun nucuj doj se-nana nij yuviñ yo' a.

24 Gaa ne guun ya rá Pilato se vaa qui'yaj so' ndaa vaa cataj nij yuviñ rihaan so' a.

<sup>25</sup> Dan me se síi 'nij taga' tumé cacun' se vaa cunu' yuvii qui'yaj do', se vaa ticavi' yuvii do', quirii Pilato man so' ca'anj uun so', ndaa vaa cataj nij yuvii a. Ne Jesucristó ro', ca'vej rá Pilato quiran' so' ndaa vaa guun rá nij yuvii quiran' so' nanj adonj.

*Nana nihánj taj xna'anj daj qui'yaj nij yuvii gaa cachrón nij yuvii man Jesucristó rihaan rcutze a*

<sup>26</sup> Dan me se nicaj nii man Jesucristó ca'anj nii, gaa ne quita'aa nii man yo'o síi cu'naj Simón síi cavii chuman' Cirene gaa 'na' nique so' rej tacaan, ne cuta' nii rcutze xráá so' atá so' rcutze 'na' so' rej xco Jesucristó a.

<sup>27</sup> Ne noco' que'ee yuvii man Jesucristó, ne ta'aj nij yuvii me chana, ne dan me se go' nij chana se-cuxru' nij no' rucuaa nij no', ne ta'vee ndo'o nij chana ni'yaj nij chana man Jesucristó a.

<sup>28</sup> Gaa ne canicaj Jesucristó, cataj Jesucristó rihaan nij chana yo':

—Cunó soj chana ta'nij chuman' Jerusalén ca'mij á. Se ta'vee nij soj ni'yaj soj man 'unj a ma'. Tzaj ne ta'vee soj ni'yaj soj man ma'an soj do', man ma'an ta'nii soj do' á.

<sup>29</sup> O se vaa güii cataj nii se vaa aj cavii sa' doj nij chana itun do', nij chana ne nari' ne'ej do', nij chana ne tucutzii ne'ej do' a.

<sup>30</sup> O se güii dan me se guun che'e yuvii nacunj yuvii nij quij se vaa canee nij quij caráan nij quij xráá ma'an nij so' a.

<sup>31</sup> O se ase vaa chruun maree vaa i'na' vaa 'unj nihánj, tzaj ne danj nanj ticavi' nii manj a. Táá a nij síi ne chuman' Jerusalén, ne ase vaa chruun nacoó cavi' vaa nij síi tumé cacun' ne chuman' Jerusalén, ne che'é dan chi'ii uxrá doj quiran' nij so' nanj adonj —taj Jesucristó rihaan nij chana a.

<sup>32</sup> Ne nicaj nii man yavíj roj síi tumé cacun', ca'anj nii rej cavi' roj so' ga Jesucristó a.

<sup>33</sup> Ne gaa cuchi' taran' nij so' rej cu'naj Tacaan Cúu Yave Xnangá, ne cachrón nii man Jesucristó ga roj síi tumé cacun' rihaan va'nuj rcutze, ne dan me se yo'ó so' ro', cachrón nii rej nuva' Jesucristó, ne yo'ó so' ro', cachrón nii rej nichruun Jesucristó a.

<sup>34</sup> Gaa ne cachíin ni'yaj Jesucristó rihaan Diose, cataj so':

—Caraa x'naa so', ne se qui'yáá so' sayuun man nij so', man Ataj Chij. 'O se ne ne'en nij so' daj 'yaj nij so' ma' —taj so', cachíin ni'yaj so' rihaan Rej so' Diose a.

Gaa ne tico tixaj nij tanuu che'é sagan' Jesucristó a.

<sup>35</sup> Ne canicun' que'ee yuvii ni'yaj daj quiran' Jesucristó a. Dan me se ca'nga' nacoó nij síi uun chij, cataj nij so':

—Aj tinanii so' man yo'ó yuvii rihaan sayuun, rá so' á. Ca'vee tinanii so' man ma'an so' yaj ei. Sese sij narii Diose me so' do', sese sij ca'née Diose tinanii man yuvii rihaan sayuun me so' do', ne ca'vee tinanii ma'an so' man so' a —taj nij síi uun chij ni'yaj nij so' man Jesucristó a.

<sup>36</sup> Ne nij tanuu, tzaj ne ca'nga' nacoó uun nij tanuu ni'yaj nij tanuu man Jesucristó, ne ru'maan nij tanuu na vinó yuu tu'va Jesucristó,

<sup>37</sup> ne cataj nij so':

—Sese so' me síi nicaj suun rey uun chij rihaan nij yuvii israelitá, ne tinanii so' man ma'an so' rihaan sayuun yaj vij —taj nij tanuu rihaan Jesucristó a.

<sup>38</sup> Ne vaa rcuchra' nó rihaan rcutze yo', ne nó nana rihaan rcuchra' yo' se vaa: “Sij nicaj suun rey uun chij rihaan nij yuvii israelitá me síi nihánj a”, taj nana yo' a.

39 Ne yo'ŋ tuvi' roj síí tumé cacun' noco' rihaan rcutzę rej x'nuj Jesucristó ro', nij ca'mii so' rihaan Jesucristó, cataj so':

—Sij ca'née Diose ținanii man yuvij rihaan sayuun mé so', rá so' na'. Me che'é ne tinanii so' man taran' ní' ga —taj so' rihaan Jesucristó a.

40 Tzaj ne yo'ŋ síí tumé cacun' ro', cataj so' rihaan tuvi' so':

—Nihánj me se cyaan vaa sayuun ran' ní' ga sayuun ran' síí nihánj nanj á. Ne me che'é ne chu'ví' so' a doj ni'yaj so' Diose ga.

41 Dan me se xa' ní', tzaj ne vaa che'é cavi' ní', ne ran' ní' sayuun che'é cacun' tumé ní', tzaj ne xa' síí nihánj, tzaj ne taj vaj a doj se chi'ii ne qui'yaj síí nihánj a ma' —taj yo'ŋ síí tumé cacun' yo' rihaan tuvi' so' a.

42 Gaa ne cataj so' rihaan Jesucristó a:

—Se quini'yón so' raçuíj so' manj, asa' guun che'e so' guun chij so' a ma' —taj so' rihaan Jesucristó a.

43 Gaa ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa güii cuan' me se cayáan so' ga 'unj rej sa' ndo'o rej ne nij síí sa' rihaan Diose ei —taj Jesucristó rihaan so' a.

44 Veé dan, ne caxuj me yo', ne guun rmi' rihaan nu' chumii, ne yo'ŋ guun rmi' rihaan chumii ndaa quisíj aga' va'nuj rej anoco' güii a.

45 Ne guun rmi' rihaan güii, ne sin' nu' yatzíj cortiná noco' rá nuvíi nocoo a.

46 Gaa ne nucuaj ndo'o caguáj Jesucristó, cataj so':

—Nacaj so' nimanj, Ataj Chij —taj so', ne veé dan cavi' so' a.

47 Dan me se quene'en tanuu capitán se vaa guun, gaa ne ve'é uxrá ca'mii so' che'é Diose, ne cataj so':

—Xa' síí nihánj, tzaj ne ya ya síí sa' me so' nanj á —taj tanuu yo' ni'yaj so' man Jesucristó a.

48 Dan me se quene'en taran' nij yuvij cunuu chre' rej yo' se vaa guun, gaa ne go' nij so' se-cuxru' nij so' rucuaga nij so' che'é se nanó ndo'o rá nij so', gaa ne canicaj nij so' ca'anj nij so' chuman' a.

49 Ne canicun' cunudanj nij tuvi' Jesucristó rej gan' doj, ne ta'aj nij so' me chana cuno se-nana Jesucristó asij cavii Jesucristó estadó Galilea a. Ne ni'yaj taran' nij so' man Jesucristó a.

*Nana nihánj taj xna'anj se vaa cachin' nii man Jesucristó rque yu'uj yuvej a*

50 Ne vaa 'ŋ síí cu'naj José, ne yo'ŋ tuvi' nij síí uun chij rihaan nij yuvij israelitá me so' a. Ne síí sa' me so', ne síí nice nimán me so',

51 ne ne vaa rá so' daj se vaa rá yo'ŋ nij síí uun chij rihaan nij yuvij israelitá ma'. Ne guun rá so' qui'yaj so' ndaa vaa qui'yaj yo'ŋ nij so' ma'. Ne síí cavii chuman' Arimatea yo'ŋ chuman' naj estadó Judea me so' a. Ne so' me síí me ndo'o rá guun chij Diose rihaan chumii nihánj a.

52 Dan me se ca'anj so' rihaan síí cu'naj Pilato, ne cachín ni'yaj so' rihaan síí cu'naj Pilato se vaa ca'vej rá síí cu'naj Pilato cachin' so' man Jesucristó a. Dan me se ca'vej síí cu'naj Pilato,

53 gaa ne ca'anj síí cu'naj José, tinanij so' man Jesucristó, ne nacutáj so' yatzij mantá xraá Jesucristó, ne caxríj so' man Jesucristó rque yu'uj yuvej rej nuvi' a 'ó xngá naj a.

54 Veé danj qui'yaj nij so' güii 'yaj chuvii nij yuvij israelitá che'é güii naraan rá nij so', ne veé danj quisíj güii naranj rá nij so' a.



<sup>55</sup> Ne canoco' nij chana cavií estadó Galilea ga Jesucristó rej xco síí cu'naj José, ne quene'en nij chana yu'uj rej caxrií síí cu'naj José man Jesucristó,  
<sup>56</sup> gaa ne canicaj nij chana chuman' Jerusalén, ne qui'yaj chuvii nij chana yo'óo gun' daj do', squíí xlá mirra do', caxrií nij chana man Jesucristó rá nij chana a.

*Nana nihánj taj xna'anj se vaa cunuu i'na' uún Jesucristó a*

Dan me se ma'an güii naránj rá nij yuvií israelitá me se naránj rá nij chana a.

## 24

<sup>1</sup> Ne taxrej güii cotungó, gaa ataa doj quisij güii, me se ca'anj nij chana rej taj yu'uj, ne nicaj nij chana nij rasuun gun' daj se vaa aj qui'yaj chuvii nij no' a.

<sup>2</sup> Gaa ne quene'en nij chana se vaa naj yaní yuvej aráán tu'va yu'uj naj Jesucristó a.

<sup>3</sup> Ne gaa catúj nij chana rá yu'uj, ne ne narí' nij chana man Jesucristó sij 'nij ra'a man ní' a ma'.

<sup>4</sup> Dan me se caráya'anj ndo'o nij chana, ne nicun' vij snó'o rihaan nij chana, ne roj snó'o yo' me se yatzíj chuguun uxrá nuú roj so' a.

<sup>5</sup> Dan me se cuchu'vi' uxrá nij chana, ne ca'anj cayáán ruj nij chana, ne cuchruj nij chana rihaan nij chana rihaan yo'óo a. Gaa ne cataj roj snó'o rihaan nij no':

—Taj che'é nana' soj man síí vaa i'na' rej naj nij síí cavi' ma'.

<sup>6</sup> 'Q se nuvi' so' naj nihánj a ma'. 'Q se cunuu i'na' uún so' nanj á. Dan me se nanuj rá soj se vaa cataj so' gaa vaj nij soj estadó Galilea, ne cataj xna'anj so' rihaan soj se vaa

<sup>7</sup> xa' so' sij ca'née Diosé njacaj yu'unj man yuvií, tzaj ne vaa che'é taçuachén nii man so' rihaan síí tumé cacun', ne cachron nij so' man so' rihaan rcutzé, ne cachén va'nuj güii, gaa ne cunuu i'na' uún so', taj so' a —taj roj snó'o yo' rihaan nij chana a.

<sup>8</sup> Dan me se nanuj rá nij chana nana ca'mii Jesucristó a.

<sup>9</sup> Gaa ne curihanj nij chana yu'uj yuvej, ne canicaj nij chana yo' chuman' Jerusalén, ne cataj xna'anj nij chana nu' se vaa quene'en nij no' rihaan xaan nij apóstol cune' Jesucristó man do', rihaan yo'óo nij síí tucu'yón se-nana Jesucristó uún do' a.

<sup>10</sup> Dan me se va'nuj nij chana me níí cu'naj Mariá Magdalena do', níí cu'naj Juana do', níí cu'naj Mariá nii Jacobo do', ne va'nuj nij no' ga yo'óo nij chana ro', cataj xna'anj rihaan nij apóstol che'é nu' se vaa quene'en nij no' a.

<sup>11</sup> Ne gaa cuno nij apóstol cune' Jesucristó man se-nana nij chana, gaa ne nana snúú rma'an me nana yo', rá nij apóstol cune' Jesucristó man, ne ne cuchuman rá nij so' se-nana nij chana a.

<sup>12</sup> Tzaj ne naxumaan síí cu'naj Pedró, ne cavií so' cunánj so' ca'anj so' ndaa yu'uj yo', ni'yaj so' a. Dan me se canicun' nituu so', ni'yaj so' rque yu'uj, tzaj ne nuvi' Jesucristó naj rque yu'uj quene'en so' a. Maan yatzíj mantá uun naj, ni'yaj so' a. Gaa ne cavií so' quinan' so', ne caráya'anj so' che'é nu' se vaa guun a.

*Nana nihánj taj xna'anj se vaa ca'mii Jesucristó ga vij tuvi' nij síí tucu'yón se-nana so' gaa vaj roj so' chrej ndaa chuman' cu'naj Emaús a*

13 Dan me se vjij tuvi' nij sí tucu'yón se-nānā Jesucristó ro', vaj roj so' chrej veé maan güii cotungó yo', ca'anj roj so' ndaa 'o chuman' naj xaan kilómetro ga chuman' Jerusalén, ne Emaús cu'naj chuman' yo' a.

14 Ne nanó roj so' cuentó che'é nū' se vaa quiran' nij tuvi' Jesucristó a.

15 Dan me se nanó roj so' cuentó, ne nuchruj raa roj so' daj quiran' Jesucristó, gaa ne ma'an Jesucristó quinichrun' rihaan roj so', ne chéé Jesucristó ga roj so' a.

16 Tzaj ne ne ca'vee cunuu yaan roj so' man Jesucristó ma'.

17 Gaa ne cataj Jesucristó rihaan roj so' a:

—Chéé roj soj nanó roj soj cuentó, ne me che'é nanó roj soj cuentó ga tuvi' roj soj, ne me che'é nanó ndo'o rá roj soj ga —taj so', xna'anj so' man roj so' a.

Ne dan me se canicun' roj so', ne nanó ndo'o rá roj so' a.

18 Dan me se yo'o so' me sí cu'naj Cleofas, ne cataj so' rihaan Jesucristó a:

—Cunudanj nij sí aran' chuman' Jerusalén ne'en daj vaa guun chuman' Jerusalén güii cachén nihánj ei. Ne me che'é daj 'o ruún so' me sí ne ne'en daj vaa guun güii cachén nihánj ga —taj so', xna'anj so' man Jesucristó a.

19 Gaa ne:

—Daj guun chuman' Jerusalén ga —taj Jesucristó, xna'anj so' man roj so' a.

Gaa ne cataj roj so' rihaan Jesucristó a:

—Nū' se vaa quiran' Jesucristó sí cavii chuman' Nazaret a. Ne so' me sí guun sí nata' se-nānā Diose rihaan nij yuvij, ne sí uun nucuaj ndo'o qui'yaj suun me so', ne sí cavii ndo'o nana sa' che'é Diose tu'va me so' rihaan cunudanj nij yuvij a.

20 Ne dan me se ca'ne' nij xrej atā suun nocgo doj ca'ne' nij sí nicaj suun ca'ne' suun se vaa cavi' so', gaa ne cachrón nii man so' rihaan rcutze,

21 ne dan me se guun rá nūj se vaa so' me sí tinanii man ní' sji israelitá rihaan sayuun, tzaj ne quiran' so' cunudanj, ne nihánj me se síj va'nuj güii cavi' so' adonj.

22 Tzaj ne caráya'anj ndo'o nūj, qui'yaj chana tuvi' nūj a. 'O se taxrej cuan' me se ca'anj nū'yaj nij chana yu'uj cachin' nii man so',

23 tzaj ne dan me se ne nari' nij chana man so' a ma'. Che'é dan ca'na' uún nij chana rihaan nūj, ne cataj nij chana se vaa ndaa vjij se-mozó Diose naqui'yaa rihaan nij no', ne cataj roj se-mozó Diose se vaa vaa i'na' Jesucristó, taj nij chana rihaan nūj nanj adonj.

24 Dan me se cavii 'o vjij tuvi' nūj ca'anj nū'yaj roj so' yu'uj yo', tzaj ne quene'en roj so' nū' ndaa vaa cataj xna'anj nij chana rihaan nūj, tzaj ne ne nari' roj so' man ma'an Jesucristó a ma' —taj roj so' rihaan Jesucristó a.

25 Gaa ne ma'an Jesucristó cataj rihaan roj so' a:

—Dan me se sí ne acaj cuentá me soj, ne sí ne niha' rá cuchuman rá nū' se-nānā nij sí nata' se-nānā Diose gaa naá me soj nanj á.

26 'O se ne ne'en soj se vaa xa' sí ca'née Diose tinanii man yuvij rihaan sayuun, tzaj ne vaa che'é ndo'o quiran' so' sayuun ne catuu so' rej guun chij ndo'o so' a —taj Jesucristó rihaan roj so' a.

27 Gaa ne dan me se guun che'e so' ca'mii so' che'é se-nānā sí cu'naj Moisés do', che'é se-nānā cunudanj nij sí nata' se-nānā Diose do', gaa ne cataj xna'anj so' rihaan roj so' daj taj nū' danj Diose che'é ma'an so' a.

28 Dan me se quinichrun' nij so' tu'va chuman' rej ca'anj roj so', gaa ne Jesucristó me se ndaa rá se 'yaj síi ca'anj chuman' naj gan' doj ro', qui'yaj so' a.

29 Gaa ne terquee roj so' man Jesucristó a:

—Quinaj cachríi so' ga rój, ne aj ca'anj güii, ne vaj so' chrej, ne guun rmi' nanj á —taj roj so' rihaan Jesucristó a.

Gaa ne quináj so' ga roj so', ne catúj so' chuman' caran' so' ga roj so' a.

30 Dan me se yáan nij so' cha xti'no nij so', ne nicaj Jesucristó rachrúún, ne nago' so' graciá rihaan Diosé che'é rachrúún, gaa ne cuxra' ta'aj so' rachrúún, rqué so' cha roj so' a.

31 Dan me se caxrij rá roj so', ne cunuu yaan roj so' man Jesucristó, ne veé dan nu' ca'anj ni'ya Jesucristó rihaan roj so', ne ne ca'vee quene'en roj so' man so' a ma'.

32 Gaa ne cataj roj so' rihaan tuvi' roj so' a:

—Veé ya ma'an Jesucristó me yo' asan. 'O se gaa ca'mii so' ga ní' gaa vaj ní' chrej do', gaa cataj xna'anj so' che'é danj Diosé do', gaa ne guun niha' uxrá nimán ní', ne ndaa tiquisii ma'an nimán ní', qui'yaj so' a —taj roj so' rihaan tuvi' roj so' a.

33 Gaa ne maan orá dan naxumaan roj so', ne canicaj roj so' ca'anj uún roj so' chuman' Jerusalén, gaa ne cuchí' roj so' yo', gaa ne aj cunuu chre' xaan nij síi tucu'yón se-nana Jesucristó ga yo'ó tuvi' nij so',

34 ne nij so' ro', cataj rihaan roj so' se vaa ya aj cunuu i'na' uún síi 'nij ra'a man ní', ne síi cu'naj Simón me síi quene'en man so', taj nij so' rihaan roj so' a.

35 Gaa ne roj so' ro', cataj xna'anj daj guun gaa quene'en roj so' man Jesucristó gaa vaj roj so' chrej, ne cataj xna'anj roj so' se vaa ndaa cuxra' ta'aj so' rachrúún gaa cunuu yaan roj so' man Jesucristó, taj roj so' a.

*Nana nihánj taj xna'anj se vaa curuvi' Jesucristó rihaan xaan nij síi tucu'yón se-nana so' ga tuvi' nij so' a*

36 Dan me se gaa nanó nij so' cuentó che'é nu' rasuun dan, ne nu' curuvi' Jesucristó tanuu sca'núj nij so', ne:

—Dínj gaa nimán soj á —taj so' rihaan nij so' a.

37 Gaa ne cuchu'vi' ndo'o nij so', ne ta'naj me síi nicun' rihaan nij so', rá nij so' a.

38 Gaa ne cataj Jesucristó rihaan nij so' a:

—Me che'é nanó ndo'o rá soj, ne me che'é uun vij rá soj ga.

39 Ni'yaj soj ra'aj ni'yaj soj tacóo ni'yaj soj, ne xcaj soj cuentá se vaa ma'anj me á. Xa' ta'naj, tzej ne taj nee man so' do', taj cúu man so' do' ma' —taj Jesucristó rihaan nij so',

40 ne tihaan so' ra'a so' do', tacóo so' do', rihaan nij so' a.

41 Dan me se ne ca'vee cuchuman rá nij so' se vaa ma'an Jesucristó me a. 'O se guun niha' uxrá rá nij so', ne ca'anj uxrá rá nij so' a. Che'é dan cataj Jesucristó rihaan nij so' a:

—Vaa doj se chá rihaan soj na' —taj so', xná'anj so' man nij so' a.

42 Gaa ne rqué nij so' 'o xco' nee xcuaj ri'ya do', doj scuuj xtaan do', man so',

43 gaa ne nicaj so', ne chá so' ni'yaj nij so' a.

44 Gaa ne cataj so' rihaan nij so' a:

—Nihánj me nana ca'mii 'unj rihaan nij soj gaa vaj 'unj ga soj, se vaa cataj 'unj vaa che'é quisij ya 'unj nu' nana a'mii che'é 'unj nana no rihaan yanj no

se-tucuañj Moisés do', yanj no se-nanañ nij síi nata' se-nanañ Diose gaa naá do', yanj no nij chra' salmo do' a —taj so' rihaan nij so' a.

<sup>45</sup> Gaa ne guun nucaj nij so' xcaj nij so' cuentá che'é nu' danj Diose, qui'yaj so',

<sup>46</sup> ne cataj so' rihaan nij so':

—Veé danj taj danj Diose se vaa xa' 'unj sij ca'née Diose tinanii man yuvij rihaan sayuun, tzaj ne quiran' ma'anj sayuun, ne cavi' 'unj, ne cachén va'nuj güii, gaa ne cunuu l'na' uún 'unj a.

<sup>47</sup> Gaa ne ca'mij natáj nii rihaan cunudanj nij yuvij man rihaan chumij se vaa che'é se vaa ca'ná' 'unj ro', che'é dan sese canicaj nimán nij yuvij canoco' nij yuvij chrej sa', gaa ne tinavij Diose cacun' tumé nij so' a. Dan me se asino ca'mij natáj nii nanañ dan chuman' Jerusalén, gaa ne ca'mij natáj nii nu' rihaan chumij adonj.

<sup>48</sup> Ne nij soj ro', me nij síi quene'en nu' rasuun qui'yáj ne testigó guun soj,

<sup>49</sup> ne nihánj me se rque 'unj Nimán Diose rihaan soj ndaa vaa cata' tu'va ma'an Diose gaa naá a. Dan me se yo'o cayáán soj chuman' Jerusalén nihánj ndaa se nari' nucaj nimán soj qui'yaj Diose á —taj Jesucristó rihaan nij so' a.

*Nanañ nihánj taj xna'anj se vaa cavii Jesucristó xtá' a*

<sup>50</sup> Gaa ne nicaj Jesucristó man nij so', ca'anj so' ndaa tu'va chuman' Betania, gaa ne naxcaj so' ra'a so', ne cachín ni'yaj so' rihaan Diose se vaa ve'é raçuij Diose man nij so', ne cavii sa' nij so' a.

<sup>51</sup> Ne nu' ca'mii so' danj che'é nij so', ne nu' cavii so' xtá' ca'anj so' a.

<sup>52</sup> Dan me se na'víj nij so' rihaan so', gaa ne canicaj nij so' ca'anj uún nij so' ndaa chuman' Jerusalén, ne guun niha' uxrá rá nij so',

<sup>53</sup> ne yo'o ca'anj nij so' nuvíi nocoo, ne nata' nij so' rihaan nij yuvij se vaa sa' uxrá qui'yaj Diose a. Veé danj gaa ya ei.

## Nihánj me se-nānā Jesucristó nana sa' cachrón sí cu'naj Juan rihaan yanj a

*Nana nihánj taj xna'anj se vaa guun yuvij man se-nānā Diose a*

<sup>1</sup> Asij ataa qui'yaj Diose chumij, ne aj vaa se-nānā Diose, ne se-nānā Diose ro', canicun' so' rihaan ma'an Diose, ne Diose me so' a.

<sup>2</sup> Dan me se asij ataa qui'yaj Diose chumij, ne canicun' se-nānā Diose rihaan Diose,

<sup>3</sup> ne ca'ne' Diose suun rihaan so' qui'yaj so' nu' rasuun a. Ne sese taj se-nānā Diose, ne taj vaj a doj rasuun man nihánj cuano ne guun ma'.

<sup>4</sup> So' me sí qui'yaj cunuu i'na' rasuun, ne che'é se cunuu i'na' yuvij qui'yaj so', che'é dan guun nucuaj yuvij xcaj yuvij cuentá a. Dan me se ase vaa ya'an chuguun vaa so' rihaan yuvij,

<sup>5</sup> ne qui'yaj so' chuguun rej rmi' rej man ní' sij man rihaan chumij nihánj sij ataa xcaj cuentá, ne ne qui'yaj canaán rej rmi' yo' rihaan so' a man adonj.

<sup>6</sup> Ne curihanj yo' o snó'o, ne dan me se sí ca'néé Diose me so', ne Juan cu'naj so',

<sup>7</sup> ne ca'na' so' cataj xna'anj so' che'é ya'an chuguun yo', ne me rá so' cuchuman rá cunudanj yuvij ni'yaj nij yuvij man ya'an chuguun yo' a.

<sup>8</sup> Nuveé ma'an so' me ya'an chuguun yo'; maan se ca'na' so' cataj xna'anj so' che'é ya'an chuguun yo' a.

<sup>9</sup> Ne ya'an chuguun ya yo' ro', yo' me sí 'yaj chuguun rihaan cunudanj yuvij, che'é rej guun nucuaj nij yuvij xcaj nij yuvij cuentá a. Ne ca'na' so' rihaan chumij nihánj,

<sup>10</sup> ne cayáan so' rihaan chumij nihánj, ne ma'an so' me sí qui'yaj chumij nihánj, qui'yaj Diose, tzaj ne ne xcaj nij sí man rihaan chumij nihánj cuentá me sí me so' a ma'.

<sup>11</sup> Ndaa rihaan ma'an nij tuvi' so' cuhi' so', tzaj ne ne ca'mij sa' nij so' ga so' a ma'.

<sup>12</sup> Tzaj ne xa' taran' nij sí ca'mii sa' ga so', tzaj ne sí amán rá ni'yaj man so' me nij so', ne danj nanj rque so' guun nij so' ta'ní ma'an ya Diose a.

<sup>13</sup> Ne nij sí guun ta'nij Diose man, tzaj ne nuveé che'e se nayón nij so' rque nii nij so' me guun ta'nij Diose man nij so' ma'. Ne nuveé che'e se guun rá ma'an rej nij so' nayón nij so' rque nii nij so' me guun ta'nij Diose man nij so' ma'. Nuveé che'e se guun rá rej nij so' ca'ngaa nij so' me guun ta'nij Diose man nij so' ma'. Maan se ma'an Diose me sí qui'yaj guun ta'nij Diose man nij so' adonj.

<sup>14</sup> Gaa ne guun se-nānā Diose yo' yuvij, ne cayáan so' ga ní', ne quene'en núj se vaa ve'é inanj qui'yaj so', ne dan me se taj vaj yo' o ta'ní Rej so' Diose ma'. Tananj orún' so' me sí qui'yaj ndaa vaa qui'yaj so', ne se luj ndo'o qui'yaj so' che'é ní', ne inanj nana ya ca'mii so' adonj.

<sup>15</sup> Ne sí cu'naj Juan me sí cataj xna'anj rihaan yuvij che'é Jesucristó, ne nucuaj ca'mii so', cataj so':

—Sí nihánj ro', aj cataj xna'anj 'unj rihaan soj che'é so' gaa rque á. Dan me se cataj xna'anj 'unj rihaan soj se vaa nda' se sí ca'na' rej rihanj me so', tzaj ne 'o se sij uun chij ndo'o doj me so' rihanj nanj á. 'O se asij ataa ca'ngaa 'unj, ne aj nicun' so' nanj adonj —taj sí cu'naj Juan yo' a.

16 *Dan*j ca'mii síi cu'naj Juan che'é se Jesucristó me síi nicaj nu' rasuun sa', ne so' me síi rqué se sa' man taran' ní, ne dan me se nuveé orún' se luj 'yaj so' che'é ní' ma'. 'Q se que'ee se luj 'yaj so' che'é ní' adonj.

17 'Q se rqué Diose se-tucuaj Mojisés rihaan xii ní' gaa naá, tzaj ne Jesucristó me síi tacuachén nana luj do', nana ya do', rihaan ní' a.

18 Ne xa' Diose, tzaj ne taj vaj a doj síi ne'en rihaan man Diose ma'. Tzaj ne xa' Jesucristó, tzaj ne orún' so' me ta'ní Diose, ne nicun' so' rihaan Diose, ne so' me síi tihaan rihaan ní' daj vaa Diose adonj.

*Nihánj me se-nana síi cu'naj Juan síi cuta' ne man yuvi a*

19 Ne nij síi uun chij rihaan nij yuvi israelitá síi man chuman' Jerusalén me se ca'née nij so' man xrej do', man doj tuvi' síi cu'naj Leví síi cayáan gaa naá do', se vaa ca'anj nij so' xna'anj nij so' man síi cu'naj Juan me síi me Juan a. Dan me se ca'anj nij so' xna'anj nij so' man Juan, gaa ne Juan yo' ro', ca'mii so' nana nihánj rihaan nij so' a.

20 Dan me se yo'o cataj xna'anj síi cu'naj Juan rihaan nij so' daj sij me so', ne ne ca'mii ne so' ma'. 'Q se ca'mii ya so', cataj so':

—Nuveé sij ca'née Diose tinanii man yuvi rihaan sayuun mé 'unj ma' —taj síi cu'naj Juan yo' a.

21 Gaa ne xna'anj uún nij so' man so', cataj nij so':

—Che'é dan me síi mé so' ga. Síi cu'naj Elías síi nata' se-nana Diose gaa naá mé so' na' —taj uún nij so', xna'anj nij so' man Juan a.

—Taj ma'. Nuveé so' mé 'unj ma' —taj uún síi cu'naj Juan yo' a.

—Ne'en núj se vaa vaa güi ca'na' yo'o síi nata' se-nana Diose, ne sij nata' yo' mé so' na' —taj uún nij so', xna'anj nij so' man Juan a.

—Taj ma' —taj síi cu'naj Juan yo' a.

22 Che'é dan cataj nij so':

—Tzaj ne cataj ya so' me sij mé so', gaa ne ca'vee cataj xna'anj núj rihaan nij síi ca'née man núj ca'na' núj daj sij mé so' a. Me sij mé so' ga. Daj vaa yo', rá so' ga —taj uún nij so', xna'anj nij so' man Juan a.

23 Ne cataj síi cu'naj Juan:

—Síi cu'naj Isaías síi nata' se-nana Diose gaa naá ro', cataj xna'anj so' che'é suun 'yaj sunj a. Dan me se 'unj me síi nucuaj ndo'o a'mii rej tacaan, ne taj 'unj rihaan yuvi se vaa nuchran' nimán yuvi, ne ve'é ca'mii nij yuvi ga síi 'nij ra'a man ní' asa' ca'na' so' a —taj síi cu'naj Juan yo' a.

24 Ne ta'aj nij síi ca'na' rihaan síi cu'naj Juan me síi fariseo,

25 ne cataj nij so' rihaan síi cu'naj Juan a:

—Dan me se nuveé sij ca'née Diose tinanii man yuvi rihaan sayuun mé so' ma'. Nuveé sij cu'naj Elías mé so' ma'. Nuveé sij nata' se-nana Diose yo' mé so' ma'. Che'é dan ne nó xcúun so' cuta' ne so' man yuvi —taj nij síi fariseo yo' rihaan síi cu'naj Juan a.

26 Ne cataj xna'anj síi cu'naj Juan rihaan nij so', cataj so':

—'Unj me síi uta' ne un man yuvi a. Tzaj ne vaa yo'ó síi nicun' sca'núj soj, ne ne ne'en soj man so' ma'.

27 Ne so' me síi 'na' rej xcoj, ne sij sa' uxrá doj me so' rihanj, ne daj chihaj mij se quisij raj quirij canj 'nij tacóo so' ma' —taj síi cu'naj Juan rihaan nij síi fariseo yo' a.

28 *Dan*j guun rej Betania rej rnej tu'va chráa cu'naj Jordán, rej vaj síi cu'naj Juan gaa cuta' ne so' man yuvi a.

<sup>29</sup> Dan me se yo'ó güii, ne quene'en síi cu'naj Juan se vaa ca'na' Jesucristó rihaan so', ne cataj so':

—Ni'yaj soj ei. Ase vaa matzinj cavi' rihaan Diose vaa síi nihánj, ne dan me se síi nihánj me síi ca'neē cacun' tumé yuvií man rihaan chumií nihánj,

<sup>30</sup> ne síi nihánj ro', cataj xna'anj 'unj rihaan soj che'é so' gaa rque, ne cataj 'unj se vaa ca'vee se sij 'na' rej xcoj me so', tzaj ne sij uun chij doj rihaan 'unj me so' a. 'Q se asj ataa ca'ngaa 'unj, ne aj nicun' so' nanj adonj.

<sup>31</sup> Dan me se gaa rque ro', ne quene'en ma'anj sese sij nihánj me so' ma'. Tzaj ne maan che'é se me rá 'unj quene'en nij yuvií israelitá man so' ro', che'é dan ca'ná' 'unj, ne che'é dan cuta' ne 'unj man yuvií nanj á —taj síi cu'naj Juan yo' a.

<sup>32</sup> Gaa ne cataj xna'anj ya síi cu'naj Juan che'é se vaa quene'en ma'an so', cataj so':

—Quene'én 'unj se vaa nanij Nimán Diose rej xta', ne ase vaa 'o cha'aan vaa Nimán Diose yo', ne ca'na' yo', quitáa yo' raq Jesucristó ei.

<sup>33</sup> Gaa ne nu' xcaj 'unj cuentá se vaa ma'an so' me síi ca'néé Diose á. 'Q se síi ca'néé mán 'unj cuta' ne 'unj man yuvií me se ma'an so' cataj rihaan 'unj se vaa sese quene'én 'unj nanij Nimán Diose raq yo' so', ne sese quitaj Nimán Diose yo' raq so', ne so' me síi ca'néé Diose, ne cayáan uxrá Nimán Diose ga yuvií, qui'yaj so' a, taj síi ca'néé manj adonj.

<sup>34</sup> Gaa ne quene'en ma'an 'unj man Jesucristó nihánj, se vaa nanij Nimán Diose raq so', ne aj cataj yá 'unj rihaan soj se vaa ta'nij Diose me so' ei —taj síi cu'naj Juan yo' a.

### *Nana nihánj taj xna'anj se vaa guun che'e va'nuj nij snó'o canoco' nij so' man Jesucristó a*

<sup>35</sup> Güii a'yuj me se canicun' uún síi cu'naj Juan ga vj tuvi' nij síi tucu'yón se-nana so' a.

<sup>36</sup> Ne ni'yaj uxrá síi cu'naj Juan man Jesucristó gaa chéé Jesucristó, ne cataj síi cu'naj Juan:

—Ni'yaj roj soj ei. Ase vaa matzinj cavi' rihaan Diose vaa síi nihánj á —taj síi cu'naj Juan a.

<sup>37</sup> Dan me se cuno roj síi tucu'yón se-nana Juan nana ca'mii so', ne canoco' roj so' man Jesucristó a.

<sup>38</sup> Gaa ne canicaj Jesucristó, ne quene'en so' se vaa canoco' roj so' man so', ne cataj Jesucristó rihaan roj so' a:

—Vaa se achiin man roj soj na' —taj Jesucristó, xná'anj Jesucristó man roj so' a.

Gaa ne xná'anj roj so', cataj roj so':

—Me rej né so', rabbí —cataj roj so', xná'anj roj so' man Jesucristó, ne nana “rabbí” yo' taj “maestró” a.

<sup>39</sup> Gaa ne cataj Jesucristó rihaan roj so' a:

—Ca'anj ní, ne quene'en soj á —taj Jesucristó a.

Che'é dan me ca'anj roj so', ne quene'en roj so' rej ne Jesucristó, ne cunuú roj so' tucua' so' cunu' güii yo' a. Dan me se aga' ca'anj rej anoco' güii me orá ca'mii roj so' ga Jesucristó a.

<sup>40</sup> Dan me se yo'q tuvi' roj síi cuno nana ca'mii síi cu'naj Juan ne canoco' man Jesucristó ro', me síi cu'naj Andrés, ne tinúú síi cu'naj Simón Pedró me uún so' a.

<sup>41</sup> Asino yaan nari' síi cu'naj Andrés man tinúú so' síi cu'naj Simón, ne cataj so' rihaan tinúú so':

—Nari' núj man Mesías ei —taj so' rihaan tinúú so' a. Ne nana “Mesías” taj “síi ca'née Diose tinanii man yuvij rihaan sayuun” a.

<sup>42</sup> Ne ca'anj nicaj so' man tinúú so' rihaan Jesucristó, gaa ne ni'yaj uxrá Jesucristó man síi cu'naj Simón yo', ne cataj so':

—Síi cu'naj Simón mé so', ne ta'níi síi cu'naj Juan mé so' á. Tzaj ne ndaa yaj, ne Cefas cu'naj so' á —taj Jesucristó rihaan so' a. Ne nana “Cefas” ro', xna'ánj hebreo me yo', ne 'o cuyaan vaa yo' ga nana “Pedró”, ne taj yo' se vaa ase vaa 'o yuvej vaa síi cu'naj Pedró, ne sca' nimán so' a.

*Nana nihánj taj xna'anj se vaa canacúun Jesucristó man síi cu'naj Felipé do', man síi cu'naj Natanael do', se vaa canoco' roj so' man so' a*

<sup>43</sup> Dan me se yo'ó güi uún me rá Jesucristó cavij so' ca'anj so' estadó Galilea, ne nari' Jesucristó man síi cu'naj Felipé, ne dan me se cataj Jesucristó rihaan so' a:

—Canoco' so' manj, ca'anj ní' á —taj Jesucristó rihaan so' a.

<sup>44</sup> Ne Felipé ro', me síi ne chuman' Betsaida, ne Betsaida me chiháan síi cu'naj Andrés do', síi cu'naj Pedró do', uún a.

<sup>45</sup> Veé dan, ne nari' síi cu'naj Felipé yo' man síi cu'naj Natanael, ne cataj so':

—Aj nari' núj man síi ca'née Diose tinanii man yuvij rihaan sayuun, ne dan me se síi ca'mii Moisés che'é gaa cuchruj so' se-tucuanj so' me so', ne nij síi nata' se-nana Diose gaa naá ro', nata' uún nij so' che'é so' nanj adonj. Ne dan me se Jesús ta'níi síi cu'naj José, síi ne chuman' Nazaret me so' ei —taj Felipé rihaan Natanael yo' a.

<sup>46</sup> Ne cataj Natanael yo':

—Taj vaj síi sa' avii chuman' Nazaret ma' —taj Natanael yo' a.

Ne cataj Felipé:

—Ca'anj ní', quene'én so' man so', sese me rá so' á —taj Felipé rihaan so' a.

<sup>47</sup> Veé dan, ne quene'en Jesucristó se vaa ca'na' Natanael rihaan so', ne ca'mii so' 'o nana che'é Natanael, cataj so':

—Nij'yaj soj ei. Ya sij israelitá me síi 'na' cuano ei. Nicá a'mii so', ne a'mii so' nana tihá' yu'unj ma' —taj Jesucristó ni'yaj so' man Natanael yo' a.

<sup>48</sup> Gaa ne xná'anj Natanael yo' man Jesucristó, cataj so':

—Asa' a'vee ne'én so' manj ga —taj so', xná'anj so' man Jesucristó a.

Ne cataj Jesucristó:

—Asij ataa ca'mii Felipé rihaan so' do', asij cayáan so' tacóo chruun man chruj higó raá do', ne aj quene'én 'unj mán so' ei —taj Jesucristó rihaan so' a.

<sup>49</sup> Gaa ne cataj Natanael:

—Ta'nij Diose mé so', maestro. Sij nicaj suun rey uun chij rihaan ní' sij israelitá mé so' á —taj Natanael a.

<sup>50</sup> Gaa ne cataj Jesucristó rihaan so':

—Che'é se cataj 'unj rihaan so' se vaa quene'én 'unj mán so' gaa cayáan so' tacóo chruun man chruj higó ro', maan che'é dan amán rá so' ni'yaj so' manj na'. Tzaj ne quene'én so' que'eej doj rasuun nocooj doj uún a á.

<sup>51</sup> Ya ya cataj xna'anj 'unj rihaan nij soj cuano se vaa quene'en soj naxra' rej xta', ne quene'en soj man nij se-mozó Diose, ne cavij nij so' xta', ne nanij uún nij so' rihaan 'unj sij ca'née Diose nicaj yu'unj man yuvij adonj —taj Jesucristó rihaan taran' nij so' a.



## 2

*Nana nihánj taj xna'anj se vaa naqui'yaj Jesucristó na vinó man na uun gaa canuú cha'anj nara'aa chuman' Caná a*

<sup>1</sup> Cachén yavij güii, gaa ne canuú cha'anj nara'aa chuman' Caná chuman' naj estadó Galilea, ne ca'anj nii Jesucristó cha'anj yo' a.

<sup>2</sup> Dan me se nacúún nii man Jesucristó do', man nij sí tucu'yón se-nana so' do', ca'na' nij so' cha'anj yo' a.

<sup>3</sup> Veé dan, ne navij na vinó man nij sí navij rá cha'anj yo', ne che'é dan cataj nii Jesucristó rihaan Jesucristó a:

—Taj vaj na vinó rihaan nij sí navij rá cha'anj ma' —taj no' a.

<sup>4</sup> Gaa ne cataj Jesucristó rihaan nii so' a:

—Taj che'é ca'mii so' danj rihanj ma'. Nij'yaj so', ne ataa quisij güii qui'yáj suun sa' nocoo á —taj so' no nii so' a.

<sup>5</sup> Gaa ne cataj xna'anj nii Jesucristó rihaan nij mozó a:

—Cunó nij soj nu' se vaa cataj xna'anj ta'nij rihaan soj, ne qui'yaj soj nu' se vaa cataj so' á —taj no' rihaan nij mozó a.

<sup>6</sup> Veé dan, ne vatan' xruj yahij xij a. Xruj nicaj ca'anj chihaa litró na me xruj yo', ne xruj araa nij yuvij israelitá na rásuun nij so' na'ya' nij so' ndaa vaa taj se-tucuanj Moisés me xruj yo' a.

<sup>7</sup> Ne ca'ne' Jesucristó suun rihaan nij mozó, cataj so':

—Caraa soj na rque nij xruj yahij yo' á —taj so' rihaan nij mozó yo' a.

Gaa ne caraa nij mozó na, ne yo'q caraa ndaa tu'va xruj yo', qui'yaj nij so' a.

<sup>8</sup> Gaa ne cataj xna'anj uún Jesucristó rihaan nij mozó yo', cataj so':

—Yaj ro', quirii soj doj na nuu rque xruj, ne ca'anj nicaj soj na yo' rihaan sí uun chij rihaan nij mozó anicaj co'oo rihaan nij yuvij á —taj Jesucristó a. Ne danj qui'yaj nij so' a.

<sup>9</sup> Veé dan, ne sí uun chij rihaan nij mozó anicaj co'oo rihaan yuvij me se co'oo so' doj tzin' na yo', tzaj ne nuveé na uun me yo' a ma'. Nu' guun na yo' na vinó nanj adonj. Ne ne quene'en so' me rej cavii na vinó yo' a ma'. 'Q se maan inanj nij mozó quirii na yo' rque xruj ro', orún' nij so' me sí quene'en me rej cavii na yo' a. Veé dan, ne nacúún sí uun chij yo' man sí nara'aa ca'na' sí nara'aa rihaan so',

<sup>10</sup> ne cataj so':

—Tucuaán 'yaj ní' ro', me se nanj vaa yo' nanj á. Asino yaan go' ní' na vinó sa' doj co'q nij sí tihaj 'na' cha'anj, gaa ne ndaa quisij guun xno yuvij asuun, gaa ne go' ní' na vinó nij doj co'q nij so' a. Tzaj ne so' me se ino qui'yáa so' chuguanj. Dan me se ndaa yaj quirii so' na vinó sa' doj yo' asanj —taj sí uun chij yo' rihaan sí nara'aa yo' a.

<sup>11</sup> Nihánj me se guun che'e Jesucristó qui'yaj Jesucristó suun sa' nocoo, ne nu' nihánj me se vaa qui'yaj so' chuman' Caná chuman' naj estadó Galilea a. Che'é dan xcaj nij yuvij cuentá se vaa sij sa' uxrá me so', qui'yaj so', ne cuchumán rá nij sí tucu'yón se-nana so' ni'yaj nij so' man so' a.

<sup>12</sup> Gaa quisij canuú cha'anj nara'aa yo', gaa ne ca'anj Jesucristó do', nii so' do', nij tinúú so' do', nij sí tucu'yón se-nana so' do', chuman' Capernaum, ne doj güii cayáan nij so' chuman' yo' a.

*Nana nihánj taj xna'anj daj qui'yaj Jesucristó gaa quirii so' man sí chi'ij rá nuví nocoo a*

13 Dan me se ataa doj quisij cha'anj pascuá cha'anj navij rá nij yuvij israelitá, gaa ne cavii Jesucristó ca'anj so' chuman' Jerusalén a.

14 Gaa ne rá nuvíi nocoo ro', naj 'o yu'vee nocoo 'yaj nij yuvij israelitá, ne maan dan man nij so' tu'véj nij so' scúj do', matzinj do', cha'aan do' a. Ne vaa síi ne rihaan chruun mesá, ne síi natuná sa'anj che'é yuvij atúj rque nuvíi me nij so' a.

15 Gaa ne nicaj Jesucristó ne', qui'yaj so' cuartá, go' so' man nij síi tu'véj xcuu do', man nij síi natuná sa'anj do', ne quirii so' xe' man taran' nij so' a. Ne rano so' man nij scúj do', man nij matzinj do', quirii so' xe' a. Ne ticha'nuu so' se-sa'anj síi natuná sa'anj rihaan yo'óo, ne tinaxru' so' nij chruun mesá a.

16 Gaa ne cataj so' rihaan nij síi tu'véj cha'aan a:

—Quirij soj rasuun nihánj xe' cuaj ei. Se guun qui'yaj soj yu'vee tucua Réj ma' —taj so' rihaan nij síi tu'véj cha'aan man rá nuvíi yo' a.

17 Gaa ne ninuj rá nij síi tucu'yón se-nana Jesucristó se vaa nó nana nihánj rihaan danj Diose a: “Che'é se 'ee ndo'o raj ve' tucua so', che'é dan ca'neé nimanj qui'yaj sunj che'é yo' a”. Yo' me nana nó rihaan danj Diose a.

*Nana nihánj taj xna'anj se vaa ca'mii Jesucristó che'é güii cunuu i'na' uún so' a*

18 Quene'en nij síi uun chij rihaan nij yuvij israelitá se vaa qui'yaj Jesucristó rá nuvíi yo', gaa ne che'é dan cataj nij so' rihaan Jesucristó a:

—Ne nó xcúun so' quirij so' man síi tu'véj xcuu man rá nuvíi nocoo, rá núj ma'. Maan se qui'yáa so' 'o suun sa' nocoo quene'en núj, gaa ne guun ya rá núj se vaa no xcúun so' qui'yáa so' danj ei —taj nij so' rihaan Jesucristó a.

19 Ne cataj Jesucristó rihaan nij so' a:

—Tirij soj man nuvíi nihánj, ne rque va'nuj güii, ne cunuu sa' uún nuvíi nihánj, qui'yáj ei —taj Jesucristó a.

20 Che'é dan cataj nij síi uun chij yo' rihaan Jesucristó a:

—Vij chihaa vatan' ya yo' qui'yaj suun nij síi cune' nuvíi nihánj, tzaj ne asa' ca'vee naqui'yaj sa' so' nuvíi nihánj rque va'nuj güii, rá so' ga —taj nij so' rihaan Jesucristó a.

21 Tzaj ne ne ca'mii Jesucristó che'é maan nuvíi nocoo yo' ma'. Maan se ca'mii so' che'é ma'an yan cunuu i'na' uún so' rque va'nuj güii a.

22 Che'é dan, gaa quisij cavi' so' ne cunuu i'na' uún so', gaa ne nanuj rá nij síi tucu'yón se-nana so' nana nihánj nana aj ca'mii so', ne cuchumán rá nij so' nana no rihaan danj Diose nana taj xna'anj daj quiran' síi ca'nej Diose tinanii man yuvij rihaan sayuun, ne cuchumán rá nij so' nana ca'mii ma'an Jesucristó uún a.

*Nana nihánj taj xna'anj se vaa ne'en Jesucristó daj vaa nimán yuvij a*

23 Dan me se nu' nihánj qui'yaj Jesucristó chuman' Jerusalén gaa canuú cha'anj pascuá, ne che'é dan que'ee ndo'o nij yuvij cuchumán rá se vaa sij ca'neé Diose me so' a. 'O se quene'en nij yuvij nij suun sa' nocoo qui'yaj suun so' a.

24 Tzaj ne ma'an Jesucristó, ne gaa nucuaj rá so' man nij yuvij yo' ma'. 'O se so' me síi ne'en cunudanj,

25 ne ne cachjin yo'o síi cataj xna'anj rihaan Jesucristó daj vaa nimán yuvij ma'. 'O se ma'an so' me síi quene'en daj vaa nimán nu' nij yuvij adonj.

## 3

*Nana nihánj taj xna'anj daj ca'mii Jesucristó ga síi cu'naj Nicodemo a*

<sup>1</sup> Dan me se vaa yo'ŋ síi fariseo cu'naj Nicodemo, ne síi uun chij rihaan nij yuvii israelitá me so' a.

<sup>2</sup> Dan me se rej nij ca'na' so' rihaan Jesucristó, ne cataj so':

—Ne'en núj se vaa sij ca'neé Diose tucu'yón man yuvii mé so', maestro. 'Ŋ se sese nuvi' Diose racuíj mán so', ne ne guun nucuáá so' qui'yáá so' ndaa vaa 'yáá so' nihánj cuano asuun ma' —taj so' rihaan Jesucristó a.

<sup>3</sup> Gaa ne cataj Jesucristó rihaan so' a:

—Ya ya cataj xna'anj 'unj rihaan so' cuano se vaa síi se ca'ngaa naca uún ro', daj chihaa míj se guun nucuaj so' quene'en so' man Diose asa' guun chij Diose rihaan chumii nihánj a ma' —taj Jesucristó rihaan so' a.

<sup>4</sup> Dan me se xná'anj síi cu'naj Nicodemo man Jesucristó, cataj so':

—Asa' ca'vee ca'ngaa uún 'ŋ síi aj cachij ga. Ca'vee xa' catuu uún so' rque nii so' ne ca'ngaa naca uún so' gaa a na' —taj Nicodemo, xná'anj so' man Jesucristó a.

<sup>5</sup> Gaa ne cataj uún Jesucristó:

—Ya ya cataj xna'anj 'unj rihaan so' se vaa sese se ca'ngaa yo'ŋ so' qui'yaj na ne qui'yaj Nimán Diose, ne se guun nucuaj so' catuu so' rihaan Diose asa' guun chij Diose rihaan chumii nihánj ma'.

<sup>6</sup> 'Ŋ se sese nanj yuvii qui'yaj ca'ngaa ní', ne nanj yuvii man rihaan chumii nihánj me ní', tzaj ne sese ca'ngaa ní' qui'yaj Nimán Diose, ne ase vaa sa' Nimán Diose ro', danj gaa sa' nimán ní' nanj adonj.

<sup>7</sup> Se caráya'anj tihá' so' se vaa cataj 'unj rihaan so' ma'. 'Ŋ se nŋ xcúún nij soj ca'ngaa ya uún nij soj adonj.

<sup>8</sup> Dan me se xcaj so' cuentá ni'yaj so' nana a. Avii nana yo', ne cayuj 'yaj yo', tzaj ne ne ne'én so' me rej avii yo' 'na' yo', ne ne ne'én so' me rej ca'anj yo' ma'. Ne ase vaa nana ro', danj vaa Nimán Diose, ne dan me se sese cunuu sa' nimán yo'ŋ so' qui'yaj Nimán Diose, ne taj ne'én' asa' ca'vee cunuu sa' nimán so' qui'yaj Nimán Diose ma' —taj Jesucristó rihaan síi cu'naj Nicodemo yo' a.

<sup>9</sup> Veé dan, ne xná'anj síi cu'naj Nicodemo, cataj so':

—Asa' ca'vee qui'yaj yuvii danj ga —taj so', xná'anj so' a.

<sup>10</sup> Gaa ne xná'anj uún Jesucristó man so', cataj Jesucristó:

—'Ŋ se me che'é sij uun chij sij tucu'yón se-nana Diose rihaan nij yuvii israelitá mé so', tzaj ne ne ne'én so' nana nihánj nana cataj 'unj rihaan so' ga.

<sup>11</sup> Ya ya cataj xna'anj 'unj rihaan so' se vaa xa' núj, tzaj ne che'é inanj se vaa ne'en núj a'mii núj ne che'é se vaa quene'en núj nata' núj adonj. Tzaj ne ne amán rá nij soj nana a'mii núj ma'.

<sup>12</sup> Dan me se nanj che'é rasuun man rihaan chumii nihánj cataj xna'anj 'unj rihaan soj, tzaj ne ne cuchuman rá soj ma'. Asa' ca'vee cuchuman rá soj sese cataj xna'anj 'unj rihaan soj che'é rasuun man rej xta' ga.

<sup>13</sup> 'Ŋ se taj vaj síi cavii rej xta' nanij rihaan yo'óo cataj xna'anj rihaan soj daj vaa nij rasuun man rej xta' ma'. Maan orún' 'unj sij ca'neé Diose njcaj yu'unj man yuvii ro', me síi 'na' rej xta' nanij rihaan yo'óo nihánj, ne che'é dan manj me síi guun nucuaj cataj xna'anj rihaan soj che'é rej xta' adonj.

<sup>14</sup> Dan me se ase vaa tacavii síi cu'naj Moisés xcuáá aga' raá chruun rej tacaan ro', danj qui'yaj nii manj sij ca'neé Diose njcaj yu'unj man yuvii, ne tacavii nii manj raá 'ŋ chruun,

15 ne ndaa síj, gaa ne taran' nij síi cuchuman rá nì'yaj manj ro', cayáan nij so' gá Diose nu' cavii nu' ca'anj nanj adonj —taj Jesucristó rihaan síi cu'naj Nicodemo a.

*Nana nihánj taj xna'anj me che'é ca'na' Jesucristó rihaan chumiij nihánj a*

16 Dan me se 'ee uxrá rá Diose ni'yaj Diose man ní' síj man rihaan chumiij nihánj, ne ndá' se orún' ta'níi Diose, tzaj ne rqué uun Diose ta'níi so' yo', ca'na' ta'níi so' rihaan chumiij nihánj, ne cataj Diose se vaa nij yuvij amán rá ni'yaj man ta'níi so' ro', se cavi' nij so' daj chihaa míj ma'. Tananj cane nij so' ga Diose nu' cavii nu' ca'anj nanj adonj.

17 'Q se ne ca'nej Diose ta'níi so' che'é rej cuta' ta'níi so' cacun' xráa nij yuvij man rihaan chumiij nihánj ma'. Tananj ca'née Diose man ta'níi so' rihaan chumiij nihánj che'é rej tinanii ta'níi so' man nij yuvij rihaan chrej chi'ij uun chij nimán nij so' adonj.

18 Ní' síj amán rá ni'yaj man ta'níi Diose me se taj vaj sayuun quiran' ní' ma'. Tzaj ne síi ne amán rá ni'yaj man so' ro', aj cataj Diose se vaa ya quiran' so' sayuun nanj á. Che'é se ne cuchuman ya rá so' ni'yaj so' orún' ya ta'níi Diose ro', che'é dan quiran' ya so' sayuun adonj.

19 Dan me se nihánj me cacun' tumé nij síi quiran' sayuun yo' a. 'Q se aj ca'na' Jesucristó rihaan chumiij nihánj, ne ase vaa 'o ya'an chuguun vaa so', tzaj ne caran' inanj rá nij síi man rihaan chumiij nihánj cachee nij so' rej rmí', ne ne ca'vej rá nij so' quinichrun' nij so' rihaan ya'an chuguun yo' a. 'Q se chi'ii ndo'o vaa se qui'yaj nij so' adonj.

20 Dan me se nu' yuvij 'yaj se chi'ii ro', taj ri'yunj nij so' ni'yaj nij so' ya'an chuguun yo', ne ne 'na' nij so' rihaan ya'an chuguun yo' ma'. 'Q se na'vej rá nij so' curuvi' se vaa 'yaj nij so' ma'.

21 Tzaj ne nij síi me rá canoc'o nana ya ro', 'na' nij so' rihaan ya'an chuguun yo', ne dan me se gaa 'yaj nij so' danj, ne ruvi' se vaa 'yaj nij so', ne síi noc'o' man Diose me nij so', ne Diose racu'j man nij so' nu' se vaa 'yaj nij so' a.

*Nana nihánj taj xna'anj se vaa sij sa' doj rihaan síi cu'naj Juan me Jesucristó, taj ma'an Juan yo' a*

22 Dan me se gaa quisij nu' se vaa qui'yaj Jesucristó chuman' Jerusalén, gaa ne curihánj Jesucristó do', nij síi tucu'yón se-nana so' do', chuman' Jerusalén, ne ca'anj nij so' ne nij so' chuman' le'ej nii naj estado Judea, ne veé dan vaj nij so' cuta' ne nij so' man yuvij do' a.

23 Ne síi cu'naj Juan ro', ne chuman' cu'naj Enón, ne uta' ne so' man yuvij uun a. 'Q se nichrun' naj chuman' Enón ga chuman' Salim, ne man uxrá na cata' ne yuvij rej yo', ne ca'na' uxrá yuvij, ne ata' ne nij yuvij adonj.

24 'Q se ataa doj caxriij nii taga' man síi cu'naj Juan yo' gaa ei.

25 Veé dan, ne guun che'e nij síi tucu'yón se-nana Juan ca'mii cunu' nij so' ga 'o síi uun chij rihaan nij yuvij israelita che'é nana cataj xna'anj síi cu'naj Moisés, se vaa daj qui'yaj yuvij na'ya' yuvij, gaa ne ca'vee guun niha' rá Diose ni'yaj Diose man nij so' a.

26 Veé dan, ne cuchi' nij síi tucu'yón se-nana Juan rihaan ma'an Juan, ne cataj nij so':

—Síi chéé ga so' gaa vaj ní' rej rnej tu'va chráa cu'naj Jordán ro', síi natá' so' che'é ro', uta' ne so' man yuvij cuano, ne 'anj taran' nij yuvij rej vaj so', maestro —taj nij síi tucu'yón se-nana Juan rihaan Juan a.

27 Gaa ne cataj Juan:

—A'ó yuvij na'vee canoco' daj chihaa mij man so', sese nuveé Diose me sí ca'vej rá ma'.

<sup>28</sup> 'O se aj cuno ma'an soj nana cataj xna'anj 'unj rihaan soj se vaa nuveé sij ca'née Diose tjanii man yuvij rihaan sayuun mej a. Maan se 'unj me sí ca'née Diose ca'na' asino yaan rihaan sí tjanii man yuvij rihaan sayuun ei.

<sup>29</sup> Ase vaa sí xcaj man chana ne nara'aa ro', vaa so', ne ase vaa tuvi' sí nara'aa ro', danj vaa 'unj, ne nicún' 'unj unó 'unj se vaa a'mii so', ne uun niha' uxrá raj, 'yaj nana a'mii sí nara'aa, ne che'é dan me uun niha' uxrá raj adonj.

<sup>30</sup> 'O se no xcúun so' guun chij so' doj, ne 'unj me se no xcúnj gunj sí nica' doj rihaan so' adonj —taj sí cu'naj Juan yo' a.

### *Nana nihánj taj xna'anj se vaa no xcúun ní cuchuman rá ní ni'yaj ní man Jesucristó a*

<sup>31</sup> Sí nanij rihaan chumij nihánj ro', so' me sí uun chij rihaan cunudanj rasuun adonj. Nij sí man rihaan chumij nihánj, tzaj ne che'é inanj rasuun man rihaan chumij nihánj a'mii nij so', ne taj vaj yo'ó rasuun ne'en nij so' ma'. Tzaj ne sí nanij rej xta' ro',

<sup>32</sup> so' me sí a'mii che'é se vaa quene'en so' rej xta' do', che'é nana cuno so' rej xta' do', ne taj vaj sí amán rá uno se-nana so' ma'.

<sup>33</sup> Tzaj ne sí amán rá se-nana so' ro', so' me sí taj se vaa nana ya me se-nana Diose adonj.

<sup>34</sup> Sí ca'née Diose man ro', me sí a'mii se-nana Diose á. 'O se rqué ndo'o Diose Nimán Diose rihaan so' adonj.

<sup>35</sup> 'Ee rá Rej so' man so', che'é yan ta'nij Rej so' me so', ne rqué Rej so' cunudanj rasuun man so', che'é rej guun chij so' rihaan cunudanj nij rasuun yo' adonj.

<sup>36</sup> Sí amán rá ni'yaj man ta'nii Diose ro', so' me sí ve'é cayáan ga Diose nu' cavii nu' ca'anj, tzaj ne sí na'vej rá cunó rihaan ta'nii Diose ro', daj chihaa mij se cayáan so' ga Diose ma'. Tananj yo'o ca'maan rá Diose ni'yaj Diose man so', ne yo'o quiran' so' sayuun, qui'yaj Diose adonj.

## 4

### *Nana nihánj taj xna'anj che'é nana ca'mii Jesucristó ga 'o chana samaritana a*

<sup>1</sup> Dan me se xcaj Jesucristó cuentá se vaa cuchí' nana rihaan nij sí fariseo se vaa doj a vaa nij sí tucu'yón se-nana Jesucristó rihaan nij sí tucu'yón se-nana Juan, ne nocoo doj nij yuvij cata' ne qui'yaj Jesucristó rihaan nij yuvij cata' ne qui'yaj Juan a.

<sup>2</sup> Tzaj ne nuveé ma'an Jesucristó me sí cuta' ne man nij yuvij ma'. Maan nij sí tucu'yón se-nana so' cuta' ne man nij yuvij a.

<sup>3</sup> Dan me se xcaj Jesucristó cuentá se vaa cuchí' nana yo' rihaan nij sí fariseo, ga ne cavii so' estadó Judea ca'anj so' estadó Galilea a.

<sup>4</sup> 'O se ya cachén so' estadó Samaria yo',

<sup>5</sup> ne cuchí' so' tu'va yo'o chuman' naj estadó Samaria, ne Sicar cu'naj chuman' yo' a. Dan me se nichrun' naj chuman' yo' tu'va yo'ó rqué sí cu'naj Jacob rihaan ta'nii so' sí cu'naj José ga naá,

<sup>6</sup> ne tu'va chuman' yo' nuú yo'o na yu'uj qui'yaj sí cu'naj Jacob ga naá a. Dan me se xe' man Jesucristó che'é yan cachéé uxrá so' ca'na' so' chuman' yo', ne che'é dan ca'anj cané so' tu'va na yu'uj yo', ne caxuj me yo' a.

7 Dan me se ca'na' 'o chana samaritana na yu'uj quirii no' na, ne cataj Jesucristó rihaan chana yo' a:

—Qui'yáa so' se ndo'o, ne rque so' doj na co'oj rguanj —taj Jesucristó no chana yo' a.

8 Ne taj vaj nij sí tucu'yón se-nana Jesucristó nicun' ga so' ga ma'. 'O se ca'anj nij so' chuman' quiraan nij so' se chá a.

9 Veé dan, ne cataj chana samaritana yo' rihaan Jesucristó a:

—Me che'é cachín so' na rihanj, co'o so', ne ni'yaj so', ne sij israelitá mé so', ne chana samaritana mej ga —taj chana yo', xná'anj no' man Jesucristó a.

'O se ne a'mii sa' nij sí israelitá ga nij sí samaritano ma'.

10 Gaa ne cataj Jesucristó rihaan no' a:

—Sese xcaj so' cuentá che'é se luj qui'yaj Diose che'é se ne sese quene'én so' me sí achín na mán so' cuano, ne cachín so' na 'yaj vaa i'na' yuvii man so' co'o so', ne rque so' na yo' co'o so' saj adonj —taj Jesucristó no chana yo' a.

11 Gaa ne cataj chana rihaan Jesucristó a:

—Tzaj ne taj vaj sihuu rihaan so' quirii so' na nihánj ma'. Ne cunuu ndo'o nu' na rá yu'uj nihánj, señor. Me rej quirii so' na 'yaj vaa i'na' yuvii rque so' co'oj ga.

12 Dan me se xii ní' sí cu'naj Jacob ro', so' me sí co'o na nuu na yu'uj nihánj, ne veé dan me co'o ta'nii so' do', daán so' xcuu do', ne rque so' na nihánj co'o núj a. Ne sij sa' doj rihaan so' mé so', rá so' na' —taj chana yo' rihaan Jesucristó a.

13 Gaa ne cataj Jesucristó rihaan no':

—Cunudanj nij sí co'o na nuu rá yu'uj nihánj ro', canacoó uún nij so' na vaa güi, ne ca'na' uún nij so' quirii nij so' doj na a adonj.

14 Tzaj ne sí co'o na rque 'unj nihánj me se daj chihaa mij se canacoó uún so' na yo' a ma'. Ase vaa rej ve'é uxrá avii na ro', danj gaa nimán so', ne cunuú uxrá se luj nimán so', ne gaa i'na' so' ga Diose nu' cavii nu' ca'anj, qui'yaj na rquej adonj —taj Jesucristó rihaan chana yo' a.

15 Ne cataj chana rihaan so':

—Rque so' doj na yo' co'oj, señor. Ne se canacoó 'unj na, ne se ca'na' uún 'unj quirii na nihánj a ma' —taj chana rihaan Jesucristó a.

16 Ne cataj Jesucristó rihaan no' a:

—Ca'anj nacunj so' man nica so', ne ca'na' so' nihánj á —taj so' rihaan no' a.

17 Ne cataj chana rihaan so':

—Taj vaj nicaj ma' —taj chana yo' a.

Ne cataj Jesucristó rihaan no' a:

—Cunaj uxrá ca'mii so', cataj so' se vaa taj vaj nica so' ei.

18 'O se asij rque me se quisij ya 'un' snó'o xcaj so', tzaj ne tanáj so' man nij so', ne yaj nihánj me se nicaj so' man 'ó so', tzaj ne nuveé nica so' me so' ma'. Che'é dan ya uxrá ca'mii so' ei —taj Jesucristó no chana yo' a.

19 Ne cataj chana rihaan so':

—Cuano nihánj xcaj 'unj cuentá se vaa sij nata' se-nana Diose mé so', señor.

20 Dan me se xii núj ro', quina'víj nij so' xráa quij nihánj, tzaj ne soj sij israelitá taj se vaa orún' chuman' Jerusalén me rej no xcuún ní' na'víj ní' rihaan Diose, taj soj adonj —taj chana yo' rihaan Jesucristó a.

21 Gaa ne cataj Jesucristó rihaan chana a:

—Cuchuman rá so' naná nihánj naná cataj xna'anj 'unj rihaan so', nocoj. Dan me se vaa güii, ne se cavii nij soj raá quij nihánj do', se ca'anj nij soj chuman' Jerusalén do', na'v'ij soj rihaan Rej ní' Diose ma'.

<sup>22</sup> Dan me se ne ne'en nij soj man síí na'v'ij soj rihaan ma'. Tzaj ne xa' núj s'ij israelitá, tzaj ne ne'en núj man síí na'v'ij núj rihaan a. 'O se núj s'ij israelitá me níí síí qui'yaj quinanii yuvii rihaan sayuun a.

<sup>23</sup> Tzaj ne vaa güii, ne nij síí na'v'ij sa' rihaan Rej ní' Diose ro', guun inanj rá nij so' na'v'ij nij so' rihaan Diose, ne me rej ma'an vaj nij so' na'v'ij ya nij so' rihaan Diose nanj adonj. Ne cuano nihánj me aj guun che'e yuvii qui'yaj yuvii danj adonj. 'O se me ndo'o rá Rej ní' Diose na'v'ij ya yuvii rihaan so' ei.

<sup>24</sup> Dan me se me ma'an rej vaj ní' nicun' Diose, ne che'é dan ní' s'ij na'v'ij rihaan Diose ro', me ma'an rej mán ní', ne no xcúun ní' guun niha' rá ní' na'v'ij ya ní' rihaan so' adonj —taj Jesucristó rihaan chana yo' a.

<sup>25</sup> Gaa ne cataj chana rihaan Jesucristó a:

—Ne'én 'unj se vaa vaa güii, ne ca'na' síí ca'nej Diose tinanii man ní' rihaan sayuun, ne asa' ca'na' so', ne cataj xna'anj ma'an so' che'é cunudanj rasuun rihaan ní' nanj á —taj chana rihaan Jesucristó a.

<sup>26</sup> Gaa ne canicaj Jesucristó cataj Jesucristó rihaan no', ne:

—'Unj s'ij a'mii rihaan so' cuano nihánj ro', me síí ca'née Diose adonj —taj Jesucristó rihaan chana yo' a.

<sup>27</sup> Veé dan, ne nu' 'na' nique nij síí tucu'yón se-nana Jesucristó, ne caraya'anj nij so' se vaa ca'mii Jesucristó ga chana yo' a. Tzaj ne a 'ó nij so' ne na'anj man so' daj qui'yaj so' do', me che'é ca'mii so' ga chana yo' do' a ma'.

<sup>28</sup> Gaa ne tanáj chana se-sihuu chana, ne cavii chana quinan' chana chuman', gaa ne cataj chana rihaan nij yuvii man chuman' a:

<sup>29</sup> —Ca'anj ní', ne quene'en soj 'o snó'o síí cataj xna'anj rihanj che'é nu' se vaa qui'yaj gaa rque á. Nuveé s'ij ca'née Diose tinanii man ní' rihaan sayuun me so', rá soj na' —taj chana rihaan nij snó'o man chuman' yo' a.

<sup>30</sup> Gaa ne curihanj nij so' chuman', ne ca'na' nij so' rihaan Jesucristó a.

<sup>31</sup> Dan me se gaa ca'mii chana ga nij síí man chuman' yo', ne guun che'e nij síí tucu'yón se-nana Jesucristó rquee nij so' chraa man Jesucristó, cataj nij so':

—Chá so' doj chraa, maestro —taj nij so' a.

<sup>32</sup> Tzaj ne cataj Jesucristó rihaan nij so' a:

—Vaa se chá rihanj, tzaj ne ne ne'en soj ma' —taj Jesucristó rihaan nij so' a.

<sup>33</sup> Gaa ne xná'anj nij so' man tuvi' nij so', cataj nij so':

—Vaa síí ca'na' rque se chá so', rá soj na' —taj nij so' rihaan tuvi' nij so' a.

<sup>34</sup> Gaa ne cataj Jesucristó rihaan nij so' a:

—Sese 'yáá 'unj ndaa vaa me rá síí ca'née manj qui'yaj, ne sese navij quisij suun ca'ne' so' rihanj, ne ase vaa se chá vaa yo' rihanj adonj. Dan me se nuu xej nimanj gaa 'yaj sunj suun yo' ei.

<sup>35</sup> Se guun cataj soj se vaa cachén yo'ó ca'anj yavii, gaa ne quirii ní' naa, cataj soj ma'. Maan se cuano nihánj cataj xna'anj 'unj rihaan soj se vaa naxcax soj rihaan soj, ni'yaj soj nij yuvii, se vaa ase vaa naa 'núú trigó vaa nij yuvii, ne catzii ndo'o vaa naa 'núú trigó yo', cachij yo', ne cuano nihánj me se no xcúun ní' quirii ní' 'núú trigó yo' adonj. Dan me se aj guun che'e

<sup>36</sup> Dioso naru'vee Dioso rihaan nij sí rii naa yo', ne naqui'yaj chre' ndo'o nij so' man nij sí cayáan ga Dioso nu' cavii nu' ca'anj, ne rej rihaan guun niha' rá sí cunô naa ga sí rii naa adonj.

<sup>37</sup> 'Q se ya uxrá vaa nana nihánj se vaa ino vaa sí cunô naa ga sí rii naa,

<sup>38</sup> ne aj ca'née 'unj man soj quirij soj naa rej ne qui'yaj suun soj ma'. Yo'ó yuvii me nij sí qui'yaj suun naa yo' gaa rque, ne catúj soj qui'yaj suun soj ga nij so' adonj —taj Jesucristó rihaan nij sí tucu'yón se-nana so' a.

<sup>39</sup> Dan me se che'é se nata' chana yo' rihaan nij yuvij samaritana man chuman' yo' se vaa cataj xna'anj Jesucristó rihaan no' nu' se vaa qui'yaj no' gaa rque ro', che'é dan me cuchumán rá que'ee nij yuvij man chuman' yo' ni'yaj nij yuvij man Jesucristó a.

<sup>40</sup> Dan me se cuci' nij sí man chuman' yo' rihaan Jesucristó, ne cachíin ni'yaj uxrá nij so' rihaan so' se vaa caran' so' doj tucua' nij so', ne che'é dan vij güii quináj so' chuman' yo' a.

<sup>41</sup> Ne guun rij doj nij sí cuchumán rá cuno se-nana Jesucristó a.

<sup>42</sup> Ne nij yuvij amán rá ni'yaj man Jesucristó ro', cataj nij so' rihaan chana yo' a:

—Nuveé che'e doj nana natá' so' rihaan núj me cuchumán rá núj ni'yaj núj man so' ma'. Maan se cuno ma'an núj se-nana so', ne xcaj núj cuentá se vaa ya sí tinanii man yuvij man rihaan chumij nihánj rihaan sayuun me sí nihánj nanj adonj —taj nij so' rihaan chana yo' a.

*Nana nihánj taj xna'anj se vaa nahuun sa' ta'ní yo'o sí nicaj suun, qui'yaj Jesucristó a*

<sup>43</sup> Dan me se quisj vij güii caran' Jesucristó chuman' yo', gaa ne cavii so' ca'anj so' estadó Galilea a.

<sup>44</sup> Dan me se ma'an Jesucristó me sí cataj xna'anj se vaa nij sí man chiháan 'o sí a'mii natáj se-nana Dioso me se ne aráj cochroj nij sí man ma'an dan rihaan so' ma'.

<sup>45</sup> Gaa ca'na' Jesucristó estadó Galilea, gaa ne ve'é uxrá ca'mii nij sí man estadó yo' che'é suun sa' nocoo qui'yaj so' cha'anj canuú chuman' Jerusalén a. 'Q se ma'an nij so' ca'anj cha'anj yo' a.

<sup>46</sup> Dan me se ca'anj uún so' chuman' Caná chuman' naj estadó Galilea a. Chuman' yo' me chuman' naqui'yaj so' na vinó man na uun gaa rque a. Ne chuman' Capernaum ro', ne yo'o sí nicaj suun rihaan rey a. Ne canó chí'ij man ta'ní so' 'o snó'o cunii a.

<sup>47</sup> Dan me se cuci' nana rihaan sí nicaj suun yo' se vaa cavii Jesucristó estadó Judea ca'na' Jesucristó estadó Galilea, gaa ne ca'anj so' cuci' so' rihaan Jesucristó, ne cachíin ni'yaj uxrá so' rihaan Jesucristó se vaa ca'anj Jesucristó qui'yaj cono'ó Jesucristó man ta'ní so' a. Dan me se daj doj cavi' ta'ní so', taj so' a.

<sup>48</sup> Gaa ne cataj Jesucristó rihaan so' a:

—Sese se qui'yaj suun sa' nocoo quene'en soj, ne daj chihaa mij se cuchumán rá soj ni'yaj soj manj ma' —taj Jesucristó rihaan so' a.

<sup>49</sup> Gaa ne cataj sí nicaj suun yo' rihaan Jesucristó a:

—Daj doj cavi' ta'nij, nanj señor. Qui'yáa so' se ndo'o uxrá, ne ca'anj ní' doj ruganjanj —taj so', cachíin ni'yaj so' rihaan Jesucristó a.

<sup>50</sup> Ne cataj Jesucristó rihaan so' a:

—Ca'vee ca'anj so' á. 'Q se aj nahuun sa' ta'ní so' nanj adonj —taj Jesucristó rihaan so' a.



Gaa ne cuchumán rá snó'o yo' naná cataj xna'anj Jesucristó rihaan so', ne cavii so' ca'anj so' a.

<sup>51</sup> Veé dan, ne tihaj nan' so' chrej, ne ca'anj caran' nij se-mozó so' man so', ne cataj xna'anj nij yo' rihaan so' se vaa aj nahuun sa' ta'níi so' nanj adonj.

<sup>52</sup> Veé dan, ne xná'anj so' man nij mozó yo':

—Me orá me guun che'e ta'níj nahuun sa' yo' ga —cataj so' rihaan nij mozó yo' a.

Gaa ne cataj nij mozo yo' rihaan so':

—Quii aga' 'o me na'maân cachi' man xnii nanj á —taj nij mozó yo' rihaan so' a.

<sup>53</sup> Che'é dan me xcax snó'o yo' cuentá se vaa maan orá cataj xna'anj Jesucristó rihaan so' se vaa nahuun sa' ta'níi so' ro', maan orá dan me nahuun sa' ya ta'níi so' a. Gaa ne cuchumán rá nij tucua so' se vaa sij ca'néé Diose me Jesucristó a.

<sup>54</sup> Dan me se quisíj vj suun sa' nocoo qui'yaj Jesucristó gaa quisíj cavii so' estadó Judea ca'anj so' estadó Galilea a.

## 5

*Nanā nihánj taj xna'anj se vaa nahuun sa' 'o síi ninaj cunu' icó xnu' va'nuj yo', qui'yaj Jesucristó a*

<sup>1</sup> Veé dan, ne canuú cha'anj navij rá nij síi israelitá, gaa ne cavii Jesucristó ca'anj so' chuman' Jerusalén a.

<sup>2</sup> Dan me se chuman' Jerusalén ro', vaa 'o na cu'naj Betesda xna'ánj a'mii nij síi israelitá a. Nichrun' naj na yo' ga ta'yaa atúj matzinj, ne vaa 'un' ve' ne nu' anicaj tu'va na yo' a.

<sup>3</sup> Rá ve' yo' mán ndo'o síi ninaj do', síi tuchrii do', síi rengó do', síi nuu chrúnj ra'a do' a.

<sup>4</sup> Dan me se ndaa vaa orá nanij yo'o se-mozó síi 'nij ra'a man ní' rá na yo', ne tanicaj so' na yo', taj nij yuvií yo' a. Ne gaa anicaj na yo', ne síi nanij asino yaan rque na ro', orún' so' güej naj guun chi'íi xráá, taj uún nij yuvií yo' a.

<sup>5</sup> Ne naj yo'o snó'o tu'va na yo', ne síj icó xnu' va'nuj ya yo' ran' so' a.

<sup>6</sup> Dan me se quene'en Jesucristó man so' se vaa naj so' rej yo', ne aj quene'en Jesucristó se vaa guun que'ee yo' ran' so', ne xná'anj Jesucristó man so', cataj Jesucristó a:

—Nahuun sa' so', rá so' na' —taj Jesucristó rihaan so' a.

<sup>7</sup> Ne cataj síi ran' yo' rihaan Jesucristó a:

—Nahuún 'unj raj, tzaj ne taj vaj tuví' 'unj síi tinanij mán 'unj rá na gaa anicaj na, man señor. Che'é dan me gaa 'anj 'unj tu'va na yo', ne guun yucuan' yo'ó so', ne asino so' atúj rque na rihanj nanj adonj —taj so' rihaan Jesucristó a.

<sup>8</sup> Gaa ne cataj Jesucristó rihaan so':

—Naxagaa so', ne naxcaj so' tuvée so', cachee so' á —taj Jesucristó rihaan so' a.

<sup>9</sup> Gaa ne nu' nahuun sa' snó'o yo', ne naxcaj so' tuvée so', ne ca'anj so' a.

*Nanā nihánj taj xna'anj me che'é no xcúún Jesucristó qui'yaj cono'ó so' man yuvií güii naránj rá nij yuvií israelitá a*

Ne güii nahuun sa' snó'o yo' me güii naránj rá nij yuvií israelitá a.

<sup>10</sup> Che'é dan me nij síi uun chij rihaan nij yuvií israelitá me se cataj nij so' rihaan síi nahuun sa' yo':

—Güii naránj rá ní' me nihánj á. Ne nó xcuún so' catá so' tuvée so' cuan' ma' —taj nij so' rihaan so' a.

11 Gaa ne cataj so' rihaan nij so' a:

—Tzaj ne síi qui'yaj nahuun sa' 'unj ro', so' me síi ca'ne' suun rihanj naxcaj 'unj tuvée 'unj ne cachee 'unj adonj —taj so' rihaan nij so' a.

12 Gaa ne xná'anj nij so' man so', cataj nij so':

—Me síi cataj rihaan so' naxcaj so' tuvée so' ne cachee so' ga —taj nij so' rihaan so' a.

13 Tzaj ne ne quene'en síi nahuun sa' me síi qui'yaj danj ma'. 'O se gaa quisj nahuun sa' so', ne naxuun Jesucristó man ma'an so' cachén Jesucristó sca'núj nij yuvií man anicaj ni'yaj man síi nahuun sa' yo', ca'anj so' a.

14 Veé dan, ne nari' Jesucristó man síi nahuun sa' yo' rá nuvií nocqo, ne cataj Jesucristó rihaan so' a:

—Ya nahuun sa' so' á. Tanáj so' chrej chi'ii á. Sese taj, ne canicaj uún chi'ii mán so', ne doj a quirán' so' nanj adonj —taj Jesucristó rihaan so' a.

15 Dan me se cavii snó'o yo', ne nata' so' rihaan nij síi uun chij rihaan nij yuvií israelitá se vaa Jesucristó me síi qui'yaj nahuun sa' so' a.

16 Che'é dan guun rá nij síi uun chij yo' qui'yaj nij so' sayuun man Jesucristó, che'é se güii naránj rá nij so' me güii nahuun snó'o yo', qui'yaj Jesucristó a.

17 Gaa ne cataj Jesucristó rihaan nij so' a:

—Rég me se ne anicun' so' ga suun ma'. Che'é dan yo'o 'yaj suun ma'anj adonj —taj Jesucristó rihaan nij so' a.

18 Che'é dan doj a nano' nij so' daj qui'yaj nij so', gaa ne ca'vee cavi' Jesucristó a. 'O se nuveé che'e inanj tinavij Jesucristó tucuáan nocqo' nij so' che'é güii naránj rá nij so' me guun rá nij so' cavi' Jesucristó ma'. 'O se che'é se cataj so' se vaa Rej ma'an so' me Diose, che'é dan guun doj rá nij so' cavi' Jesucristó nanj adonj. Dan me se ase vaa Diose vaa ma'an so', taj so' a.

19 Che'é dan cataj Jesucristó rihaan nij so' a:

—Dan me se cataj xna'anj yá yá 'unj rihaan soj a. Dan me se ase vaa xnii rihaan rej xnii ro', danj vaa 'unj sij ta'nij Diose nihánj rihaan Rég Diose, ne ne uun nucuáá 'unj 'yáá 'unj se vaa rii nimán ma'anj ma'. 'O se inanj 'yáá 'unj ndaa vaa 'yaj Rég Diose ne'enj a. Ne ase vaa 'yaj guée so' ro', veé danj vaa guée 'yáá 'unj uún adonj.

20 'O se 'ee ndo'o rá Rég Diose ni'yaj so' manj che'é se ta'nij so' mej, ne tihaan so' manj nu' se vaa 'yaj so' a. Ne suun sa' doj rihaan suun sa' qui'yaj quene'en soj cuano ro', tihaan so' manj a. Yo' me se doj a caraya'anj soj ni'yaj soj suun sa' yo' ei.

21 Dan me se ase vaa nuu i'na' uún nij síi cavi' 'yaj Rég ro', danj qui'yáá 'unj uún adonj. Dan me se cunu i'na' uún naj guun yuvií qui'yáá 'unj, sese guun rá 'unj cunu i'na' uún nij so' adonj.

22 Dan me se ne a'ne' Rég Diose cacun' che'é a doj yuvií ma'. 'O se aj ca'ne' so' suun rihanj sij ta'nij so' se vaa ca'ne' ma'anj cacun' che'é cunudanj yuvií,

23 ne ase vaa aráj cochroj yuvií rihaan so' ro', danj gaa caraa cochroj yuvií rihanj adonj. Dan me se síi na'vej rá caraa cochroj rihanj sij ta'nij Diose me se so' me síi se guun rá caraa cochroj rihaan ndaa Rég Diose síi ca'née manj a.

24 "Ya ya cataj xna'anj 'unj rihaan soj cuano se vaa síi uno se-nanaj ne amán rá ni'yaj man síi ca'née manj ro', se cuta' Diose cacun' xráá so' ma'. Dan me

se daj chihaa míj se cavi' nu' so' ma'. Tananj gaa i'na' so' nu' cavii nu' ca'anj ga Diose adonj.

<sup>25</sup> Ya ya cataj xna'anj 'unj rihaan soj cuano se vaa vaa güii, ne nij sí man rihaan chumij nihánj nij sí cavi' vaa güii ro', ca'mij sij ta'nij Diose rihaan nij so', ne nu' nij sí cunō nana ca'mij ro', cunū i'na' ya nimán nij so', ne cuano nihánj me güii a'mij rihaan nij so', sese me rá nij so' cunō nij so' adonj.

<sup>26</sup> 'O se ase vaa vaa i'na' ma'an Diose, ne vaa i'na' taran' nij rasuun 'yaj Diose ro', danj vaa vaa i'na' ma'anj sij ta'nij Diose uún, 'yaj Diose, ne cunū i'na' yuvij, qui'yáa 'unj,

<sup>27</sup> ne 'unj me sí nicaj suun, ne ca'ne' 'unj cacun' che'é yuvij, che'é yan sí ca'née Diose nicaj yu'unj man yuvij mej adonj.

<sup>28</sup> “Se caráya'anj soj nana nihánj ma'. 'O se vaa güii cunō taran' nij sí cavi' naj rihaan santó se-nanaj,

<sup>29</sup> ne curihanj nij so' rque yo'óo nanj adonj. Dan me se, nij sí qui'yaj se sa' gaa vaa i'na' ro', curihanj nij so', ne cunū i'na' uún nij so' canē nij so' ga Diose adonj. Tzaj ne nij sí qui'yaj se chi'ii ro', curihanj nij so', tzaj ne 'o quiran' ndo'o nij so' sayuun che'é cacun' tumé nij so' nanj adonj.

<sup>30</sup> Dan me se a doj ne uun nucuaj ma'anj qui'yaj sunj a ma'. Maan se ase vaa taj xna'anj Réj Diose rihanj ro', veé danj vaa 'yá gaa a'ne' 'unj cacun' che'é nij yuvij, ne 'o nicá a'ne' 'unj cacun' che'é nij yuvij nanj adonj. 'O se ne 'yá inanj se me raj qui'yá ma'. Tananj inanj se ataj xna'anj sí ca'née manj me se vaa 'yá adonj.

<sup>31</sup> “Sese orún' 'unj me sí cataj xna'anj rihaan soj daj sij mej, ne taj che'é cataj soj se vaa ya vaa se-nanaj ma'.

<sup>32</sup> Tzaj ne vaa yo'ó sí cataj xna'anj daj sij mej, ne ne'én 'unj se vaa so' me sí cataj xna'anj ya che'é 'unj ei.

<sup>33</sup> “Dan me se ca'née soj sí cuchi' rihaan sí cu'naj Juan che'é rej nari' nij so' se-nana sí cu'naj Juan, ne cataj xna'anj so' nana ya rihaan nij soj a.

<sup>34</sup> (Dan me se ca'vee se ca'mii ve'é yuvij che'ej ca'vee se se ca'mii ve'é yuvij che'ej, taj se 'yaj ma'. Maan se nanj taj 'unj rihaan soj che'é se me raj quinani' soj rihaan sayuun nanj adonj.)

<sup>35</sup> Dan me se sí cu'naj Juan ro', ase vaa aga' ya'an vaa so', ne ase vaa ruvi' sa' rihaan yuvij gaa chuguun aga' ya'an yo' ro', danj vaa ruvi' sa' tucuáan ya rihaan soj qui'yaj so' nanj adonj. Tzaj ne nij soj ro', guun rá soj cunō soj se-nana so' 'o orá nii, che'é se guun rá soj guun niha' rá soj, qui'yaj se-nana so', tzaj ne qui'yaj rma'an soj doj tzin', ne tanáj uún soj se-nana so' a.

<sup>36</sup> “Ne xa' 'unj nihánj, tzaj ne sa' doj vaa sí taj xna'anj che'é 'unj rihaan sí cu'naj Juan a. Dan me se vaa suun ca'ne' Réj rihanj se vaa ya quisij suun yo' qui'yá, ne che'é dan me 'yaj suun 'unj nij suun yo' a. Che'é ma'an suun sa' yo' ca'vee xcaj soj cuentá se vaa sij ca'née Réj Diose mej adonj.

<sup>37</sup> Ne Réj sí ca'née manj ro', ma'an so' cataj xna'anj daj sij mej, tzaj ne taj se-nana so' cunō soj ma'. Ne ne ne'en soj daj vaa Réj ma'.

<sup>38</sup> Ne taj se-nana so' nayón nimán soj a ma'. Danj vaa soj, che'é yan ne cuchuman rá soj ni'yaj soj manj sij ca'née so' rihaan chumij nihánj man adonj.

<sup>39</sup> Dan me se nayaa uxrá soj danj Diose, che'é se me rá soj xcaj soj cuentá daj qui'yaj soj ne ca'vee cayáan soj ga Diose nu' cavii nu' ca'anj ei. Ne veé ma'an danj Diose ataj xna'anj che'é 'unj a.

<sup>40</sup> Tzaj ne na'vej rá soj ca'na' soj rihanj, yan ca'vee cane soj ga Diose nu' cavii nu' ca'anj qui'yaj ma'.

<sup>41</sup> "Taj se 'yaj sese na'vej rá yuvij ca'mij yuvij nana sa' che'ej ma'.

<sup>42</sup> Tzaj ne ne'én 'unj daj vaa rá soj, se vaa ne niha' rá soj ni'yaj soj Diose ma'.

<sup>43</sup> Dan me se ca'née Réj manj ca'naj rihaan chumij nihánj ca'mij se-nana Réj Diose rihaan soj, tzaj ne ne aran' rá soj ca'mij rihaan soj ma'. Tzaj ne sese ca'na' me ma'an yo'ó so' ca'mij so' nana avii raq ma'an so', ne ve'é cunq soj se-nana so' ei.

<sup>44</sup> Daj chihaa mij se guun nucuaj soj cuchuman rá soj ni'yaj soj manj a ma'. 'Q se me rá soj ve'é ca'mij nij tuvi' soj che'é soj, tzaj ne ne nanó rá soj daj qui'yaj soj, ne ve'é ca'mij Diose che'é soj ma'.

<sup>45</sup> Se guun rá soj se vaa 'unj me sí cuta' cacun' xraá soj rihaan Réj Diose ma'. Maan se vaa sí cu'naj Moisés, ne nucuaj ndo'o rá soj man so' se vaa ca'vee cavii sa' soj rihaan Diose qui'yaj so', tzaj ne ma'an so' me sí cuta' cacun' xraá soj adonj.

<sup>46</sup> 'Q se sese ya amán rá soj ni'yaj soj man sí cu'naj Moisés, ne cuchuman rá uún soj ni'yaj soj manj, ga ne ca'vee ei. 'Q se so' me sí cachrón nana rihaan yanj nana taj xna'anj che'é 'unj adonj.

<sup>47</sup> Tzaj ne sese ne amán rá soj nana cachrón so' rihaan yanj, ga ne asa' ca'vee cuchuman rá soj cunq soj se-nanaj ga —taj Jesucristó rihaan nij sí uun chij rihaan nij yuvij israelitá a.

## 6

### *Nana nihánj taj xna'anj se vaa go' Jesucristó se chá rihaan 'un' mij snó'o a*

<sup>1</sup> Veé dan, ne cavii Jesucristó ca'anj Jesucristó rej xco na lacuaná cu'naj Galilea a. Tiberias cu'naj yo'ó se-chuvij na lacuaná yo' a.

<sup>2</sup> Dan me se rij uxrá yuvij canoco' rej xco so', che'é yan aj quene'en nij yuvij nu' nij suun sa' nocqo qui'yaj suun Jesucristó, se vaa nahuun sa' ndo'o sí ran', qui'yaj so' a.

<sup>3</sup> Dan me se cavii so' raq quij, ne ca'anj cane so' rihaan yo'óo ga nij sí tucu'yón se-nana so',

<sup>4</sup> ne dan me se daj doj güi achiin canuú cha'anj pascuá cha'anj navij rá nij yuvij israelitá a.

<sup>5</sup> Dan me se naxcaj Jesucristó rihaan Jesucristó, ne quene'en so' se vaa ca'na' ndo'o yuvij rihaan so', ne cataj so' rihaan sí cu'naj Felipé a:

—Me rej quiraan ní rachrúun chá taran' nij yuvij nihánj, rá so' ga —taj so', xna'anj so' man sí cu'naj Felipé yo' a.

<sup>6</sup> Danj ca'mii so' rihaan sí cu'naj Felipé, che'é se me rá so' quene'en so' daj cataj sí cu'naj Felipé a. Tzaj ne aj ne'en so' daj qui'yaj ma'an so' nanj adonj.

<sup>7</sup> Dan me se cataj sí cu'naj Felipé rihaan Jesucristó:

—A' sa'anj vaa tu'vee yuvij 'yaj suun tunj yavii se quisij quirj' nij so' doj rachrúun chá nij so' a ma' —taj so' a.

<sup>8</sup> Dan me se 'o sí tucu'yón se-nana so' sí cu'naj Andrés tinúú sí cu'naj Simón Pedró me so' a. Cataj so' rihaan Jesucristó a:

<sup>9</sup> —Nihánj me nicun' 'o xnii, ne nicaj xnii nihánj 'un' guee rachrúun 'núú cebada, ne vij guee xcuaaj nicaj so', tzaj ne asa' ca'vee quisij doj tzin' nihánj chá taran' nij yuvij nihánj ga —taj sí cu'naj Andrés yo' a.

<sup>10</sup> Ga ne cataj Jesucristó:

—Ca'anj canē nij yuvī rihaan coj chr̄n', qui'yaj nij soj ei —taj Jesucristó rihaan nij sí tucu'yón se-nanā so' a.

Dan me se man uxrá coj chr̄n' rej yo', ne ca'anj canē nij yuvī rihaan coj chr̄n' yo', ne 'un' mij snó'o me nij so' a.

<sup>11</sup> Dan me se quita'aa Jesucristó rachrúun, ne nago' so' graciá rihaan Diose, ne cuxra' ta'aj so' rachrúun caxr̄j so' ston nij sí tucu'yón se-nanā so', ne nij sí tucu'yón se-nanā so' ro', rque' nij so' chá taran' nij sí ne rihaan coj chr̄n' yo' a. Ne ase vaa qui'yaj so' gā rachrúun ro', danj qui'yaj uún so' gā nee xcua'j yo', rque' so' nu' se vaa me rá nij yuvī chá nij yuvī yo' a.

<sup>12</sup> Gāa quis̄j caraa rque' nij yuvī, ne cataj Jesucristó rihaan nij sí tucu'yón se-nanā so' a:

—Naqui'yaj chre' nij soj se quináj tu'va nij yuvī, ne se guun quir̄j' uun yo' ma' —taj Jesucristó rihaan nij so' a.

<sup>13</sup> Che'é dan naqui'yaj chre' nij so' nu' se quináj tu'va nij yuvī, ne caraa cunu' chuvij ya scaa, qui'yaj nij xco' nii rachrúun quináj tu'va nij yuvī gāa quis̄j chá nij yuvī yo' 'un' rachrúun yo' nanj adonj.

<sup>14</sup> Dan me se gāa quene'en nij snó'o suun sa' noc̄o qui'yaj suun Jesucristó, ne cataj nij so':

—Sí nihánj ro', ya uxrá sí nata' se-nanā Diose me so', ne sí na'vij ní' ca'na' ya rihaan chumij nihánj me so' ei —taj nij snó'o yo' a.

<sup>15</sup> Tzaj ne aj ne'en Jesucristó se vaa ca'na' nij so', ne quita'aa nij so' man so', ne cune' nij so' man Jesucristó guun so' sí nicaj suun rey guun chij rihaan nij so', ne che'é dan naxuun so' man so', ne cavii uún orún' so' ca'anj so' quij a.

### *Nanā nihánj taj xna'anj se vaa cachéé Jesucristó rihaan na a*

<sup>16</sup> Dan me se rej ti'nuu, ne nanij nij sí tucu'yón se-nanā Jesucristó tu'va na lacuaná,

<sup>17</sup> gāa ne catúj nij so' rihoo, gāa ne cavii nij so' ca'anj nij so' chuman' Capernaum a. Dan me se quis̄j guun rm̄j' rihaan na lacuaná yo', ne ataa namān Jesucristó rihaan nij so' a.

<sup>18</sup> Ne cavii nanā yuvaā, ne uxrá nari' nucua'j ndo'o na lacuaná yo',

<sup>19</sup> ne dan me se 'un' kilómetro ca'anj nij so', gāa ne quene'en nij so' se vaa chéé Jesucristó rihaan na 'na' so', ne gāa quinichrun' so' rihaan rihoo yo', ne cuchu'vi' nij so' a.

<sup>20</sup> Tzaj ne cataj Jesucristó rihaan nij so' a:

—'Unj me yo' ei. Se chu'vi' soj ma' —taj Jesucristó a.

<sup>21</sup> Che'é dan guun niha' uxrá rá nij so', ne nu' catúj Jesucristó rá rihoo, ne nu' cuchu' rihoo tu'va na lacuaná rej vaj nij so' a.

### *Nanā nihánj taj xna'anj se vaa cataj Jesucristó se vaa ase vaa se chá vaa Jesucristó rihaan nimán ní' a*

<sup>22</sup> Dan me se yo'ó güii me se quene'en nij yuvī quináj rej xco' na lacuaná yo' se vaa taj vaj yo'ó rihoo chéé rihaan na rej yo', maan se oruun rihoo catúj nij sí tucu'yón se-nanā Jesucristó gāa ca'anj nij so' a. Tzaj ne ne catuū Jesucristó rá rihoo yo' gā nij sí tucu'yón se-nanā so', ni'yaj nij yuvī a. Che'é dan ne quene'en uxrá nij yuvī me rej ca'anj Jesucristó a.

<sup>23</sup> Tzaj ne ca'na' doj rihoo cavii chuman' Tiberias tu'va na lacuaná nichrun' rej nago' sí 'nij ra'a man ní' graciá rihaan Diose che'é rachrúun ne chá nij yuvī rachrúun yo' a.

24 Che'é dan gaa quene'en nij yuvij se vaa taj vaj Jesucristó gá nij sí tucu'yón se-nanā so' chéé gá nij so', gaa ne catúj nij yuvij rque nij rihoo yo', ne ca'anj nij yuvij chuman' Capernaum, nano' nij yuvij man Jesucristó a.

25 Dan me se nari' nij so' man Jesucristó chuman' Capernaum, gaa ne xná'anj nij so' man so', cataj nij so':

—Me aman ca'ná' so' nihánj, gá maestro —taj nij yuvij, xná'anj nij so' man Jesucristó a.

26 Gaa ne cataj Jesucristó rihaan nij so' a:

—Ya yá cataj xna'anj 'unj rihaan soj cuano se vaa nuveé che'e se quene'en soj nij suun sa' nocoo qui'yáá 'unj me nano' soj manj ma'. Maan che'é se chá soj rachrúun yo' ne caraa rque soj ro', che'é dan nano' soj manj ei.

27 “Se guun qui'yaj suun soj che'é inanj se chá soj ma'. 'O se vaa güii, ne quinvij nu' nij rasuun yo' nanj adonj. Che'é dan qui'yaj suun soj che'é se vaa qui'yaj cavij sa' nimán soj, gaa ne gaa i'na' ya nimán soj nu' cavij nu' ca'anj ei. 'Unj sij ca'née Diose nıcaj yu'unj man yuvij me sí rque se sa' yo' rihaan soj ei. 'O se Réj Diose me sí cataj se vaa ca'vee qui'yáj danj che'é soj adonj —taj Jesucristó rihaan nij yuvij a.

28 Che'é dan cataj nij yuvij rihaan so' a:

—Me suun qui'yaj suun núj, rá Diose gá —taj nij yuvij a.

29 Gaa ne cataj Jesucristó rihaan nij yuvij:

—Nihánj me suun me rá Diose qui'yaj suun soj, se vaa cuchuman rá soj ni'yaj soj mán 'unj sij ca'née so' rihaan soj adonj —taj Jesucristó rihaan nij yuvij a.

30 Che'é dan cataj nij yuvij rihaan so' a:

—Sese danj vaa, ne me suun sa' nocoo qui'yáá so' quene'en núj, gaa ne cuchuman rá núj ni'yaj núj mán so' gá.

31 Dan me se qui'yaj Diose suun sa' nocoo gaa naá, ne xii ní' me se chá nij so' se cu'naj maná gaa chéé nij so' rej tacaan, qui'yaj Diose gaa naá, ne dan me se danj Diose taj se vaa nanij se chá rihaan nij so', qui'yaj Diose, ne chá nij so' se chá nanij rej xta' adonj —taj nij so' rihaan Jesucristó a.

32 Che'é dan cataj Jesucristó rihaan nij so' a:

—Ya yá cataj xna'anj 'unj rihaan soj cuano, ne xa' se rqué Moisés chá soj, tzaj ne nuveé se chá 'yaj vaa i'na' yuvij nu' cavij nu' ca'anj me yo' ma'. Xa' se rqué Réj Diose chá soj, tzaj ne se qui'yaj gaa i'na' soj me ya yo' adonj.

33 'O se se chá rqué Réj Diose rihaan soj mé 'unj sij cavij rej xta', ne 'unj me sí rqué se vaa ca'vee gaa i'na' ya soj sij man rihaan chumij nihánj nu' cavij nu' ca'anj adonj —taj Jesucristó rihaan nij yuvij a.

34 Che'é dan cataj nij yuvij rihaan Jesucristó a:

—Rque so' se chá yo' rihaan núj nu' cavij nu' ca'anj, señor —taj nij yuvij a.

35 Gaa ne cataj Jesucristó rihaan nij yuvij a:

—'Unj nihánj me se chá, ne a'vee 'yá vaa i'na' ya yuvij ei. Sese ca'na' soj rihanj, ne yo'o gaa xej nimán soj, sese ya uxrá amán rá soj ni'yaj soj manj á.

36 Tzaj ne aj cataj 'unj rihaan soj se vaa nda' se quene'en soj manj, tzaj ne ne cuchuman rá soj ni'yaj soj manj a ma'.

37 Xa' nij sí rqué Réj Diose manj, tzaj ne ca'na' nij so' rihanj, ne ve'é ca'mij 'unj gá nij so', ne xa' nij sí 'na' rihanj, tzaj ne daj chihaa mij se quiril'ij yanij 'unj man nij so' ma'.

38 Dan me se ca'ná' 'unj rihaan chumij nihánj, tzaj ne se guun qui'yáá 'unj ndaa vaa me rá ma'anj qui'yá ma'. Tananj che'é rej qui'yáá 'unj se vaa me rá

Dioṣe sí ca'neé mán 'uñj qui'yáá 'uñj ro', che'é dan nanij 'uñj rihaan chumiñ nihánj adonj.

<sup>39</sup> Ne nihánj me se vaa me rá Dioṣe qui'yáj ei. Dan me se na'vej uxrá rá Dioṣe ca'anj ni'ya a 'ó nij sí rqué so' manj ma'. Dan me se me rá Dioṣe cunu i'na' uún taran' nij so', qui'yáj, asa' quisíj güii ca'anj ni'ya chumiñ nihánj adonj.

<sup>40</sup> O se nihánj me se vaa me rá Réj Dioṣe ei. Me rá so' yo'o gaa i'na' taran' nij sí amán rá ni'yaj manj nu' cavii nu' ca'anj ga so', ne 'uñj me sí qui'yaj cunu i'na' uún nij so' asa' quisíj güii ca'anj ni'ya chumiñ nihánj adonj —taj Jesucristó rihaan nij yuviñ a.

<sup>41</sup> Dan me se, che'é se cataj Jesucristó se vaa ma'an so' me se chá nanij rej xta' rihaan chumiñ nihánj, ne che'é dan ca'mii nij sí uun chij rihaan nij yuviñ israelitá nanañ nij ni'yaj nij so' man Jesucristó,

<sup>42</sup> cataj nij so':

—Nuveé sñj cu'naj Jesús me sí nihánj na'. Nuveé ta'nij sí cu'naj José me so' na'. Nuveé sñj ne'en ní' me rej so' me nii so' do' na'. Me che'é guun rá so' cataj so' cuano se vaa me so' sí nanij rej xta' rihaan chumiñ nihánj ga —taj nij sí uun chij ni'yaj nij so' man Jesucristó a.

<sup>43</sup> Gaa ne cataj Jesucristó rihaan nij so' a:

—Se ca'mii soj nanañ nij ga tuvi' soj ma'.

<sup>44</sup> Dan me se ca'neé Réj Dioṣe manj, ne a 'ó yuviñ se ca'vee ca'na' rihanj sese nuveé Réj Dioṣe qui'yaj ca'na' so' rihanj a. Ne xa' sí 'na' rihanj, tzaj ne cunu i'na' uún so' qui'yáj asa' quisíj güii ca'anj ni'ya chumiñ nihánj adonj.

<sup>45</sup> Dan me se vaa 'o sí nata' se-nanañ Dioṣe cachrón nanañ nihánj rihaan yanj gaa naá a: “Ne ma'an Dioṣe tuču'yón man taran' nij so' adonj”, taj sí nata' yo' a. Dan me se taran' nij sí uno rihaan Réj ne nari' se-nanañ Réj me sí 'na' rihanj ei.

<sup>46</sup> Taj vaj yo'ó sí quene'en man Réj a ma'. Tzaj ne orún' 'uñj me sí quene'en man so', che'é se sñj cavii rihaan so' mej adonj.

<sup>47</sup> “Ya ya cataj xna'anj 'uñj rihaan soj cuano se vaa sí amán rá ni'yaj manj me se yo'o cayáán so' ga Dioṣe nu' cavii nu' ca'anj ei.

<sup>48</sup> Dan me se ase vaa i'na' nee man soj 'yaj se chá soj ro', danj gaa i'na' nimán soj qui'yáá 'uñj adonj.

<sup>49</sup> Xa' xii soj sí man gaa naá, tzaj ne chá nij so' se cu'naj maná gaa chéé nij so' rej tacaan, gaa ne cavi' nij so',

<sup>50</sup> tzaj ne vaa 'uñj nihánj, ne ase vaa se chá cu'naj maná cavii rej xta' nanij rihaan xii soj vaa 'uñj, ne sese cha soj mán 'uñj ne daj chihaa mij se cavi' nimán soj ma'.

<sup>51</sup> Dan me se 'uñj me se chá vaa i'na' ya nanij rej xta', ne sese cha yo'o so' man se chá nanij rej xta' nihánj, ne yo'o gaa i'na' so' ei. Tzaj ne se chá rqué 'uñj cha yuviñ ro', nee manj me yo' ei. Ne yo' me qui'yáj, gaa ne ca'vee gaa i'na' ya cunudanj soj sñj man rihaan chumiñ nihánj ei —taj Jesucristó rihaan nij sí uun chij rihaan nij yuviñ israelitá a.

<sup>52</sup> Dan me se nuchruj rañ ndo'o nij sí uun chij yo' ga tuvi' nij so', ne xná'anj nij so' man tuvi' nij so', ne:

—Asa' ca'vee rqué sí nihánj nee man ma'an so' cha yuviñ ga —taj nij so', xná'anj nij so' man tuvi' nij so' a.

<sup>53</sup> Che'é dan cataj Jesucristó rihaan nij so' a:

—Ya ya cataj xna'anj 'uñj rihaan soj cuano se vaa sese se chá soj nee manj, ne sese se co'o soj ton manj, ne se ca'vee gaa i'na' nimán soj a ma'.

<sup>54</sup> Tzaj ne síi chá nee manj ne co'o ton manj me se yo'o gaa i'na' so' nu' cavii nu' ca'anj, ne asa' quisíj güii ca'anj ni'ya chumii nihánj, ne cunuú i'na' uún so', qui'yáj adonj.

<sup>55</sup> Xa' nee manj, tzaj ne nee chá ya ya me yo', ne ton manj me se na co'o ya me yo' ei.

<sup>56</sup> Ne síi chá nee manj ne co'o ton manj me se yo'o cayáan so' ga 'unj, ne yo'o cayáan 'unj ga so' chuguanj.

<sup>57</sup> Ase vaa vaa i'na' Réé 'unj síi ca'neé mán 'unj rihaan chumii nihánj ro', danj vaa vaa i'na' 'unj, 'yaj Réé 'unj a. Ne xa' síi chá mán 'unj, tzaj ne yo'o gaa i'na' nimán so', qui'yáá 'unj a.

<sup>58</sup> 'Unj nihánj me se se chá 'na' rej xta' nanij rihaan yo'óo nihánj mé 'unj ei. Tzaj ne ino uxrá vaa 'unj ga se cu'naj maná chá xii soj gaa naá ei. 'O se cavi' cunudanj nij so' nanj á. Tzaj ne síi chá manj me se yo'o gaa i'na' nimán so' nu' cavii nu' ca'anj adonj.

<sup>59</sup> —Nana nihánj me nana tucu'yón Jesucristó rihaan nij yuvij cunuú chre' rá ve' tucu'yón nij síi israelitá se-tucuanj Moisés ve' ne chuman' Capernaum a.

*Nana nihánj taj xna'anj daj ca'mii síi tanáj xco man Jesucristó ne daj ca'mii síi noco' raan man Jesucristó a*

<sup>60</sup> Que'ee nij síi tucu'yón se-nana Jesucristó cuno nana nihánj nana ca'mii Jesucristó, gaa ne cataj nij so':

—Sayuun uxrá vaa nana nihánj chuguanj. Daj chihaa mój se cuno ní' doj nana tu'va so' a ma' —taj nij so' rihaan tuvi' nij so' a.

<sup>61</sup> Quene'en ma'an Jesucristó se vaa nana nij yo' ca'mii ta'aj nij síi tucu'yón se-nana so', gaa ne cataj Jesucristó rihaan nij so':

—Guun na'aj soj, qui'yaj nana nihánj ei.

<sup>62</sup> Che'é dan sese quene'en soj mán 'unj sij ca'neé Diose nıcaj yu'unj man yuvij se vaa cavii uún 'unj quınán' 'unj rej cayáan 'unj asij rque, ne daj guun rá soj ga. 'O se doj a guun na'aj soj che'é se ne cunō soj se-nanaj chuguanj.

<sup>63</sup> Dan me se Nimán Diose me se vaa 'yaj vaa i'na' nimán yuvij ei. Tzaj ne taj se gún' man nee man yuvij qui'yaj yo' gaa i'na' yuvij a ma'. Xa' nana ca'mij rihaan soj, tzaj ne nana cavii Nimán Diose me nana yo', ne ca'vee gaa i'na' nimán soj, qui'yaj se-nanaj ei.

<sup>64</sup> Tzaj ne ta'aj soj me síi ne amán rá uno se-nanaj a man adonj —taj Jesucristó rihaan nij síi tucu'yón se-nana so' a.

'O se asij guun che'e Jesucristó tucu'yón so' se-nana so' man yuvij, ne aj ne'en so' me síi me síi cuchumán rá ni'yaj man so', ne aj ne'en so' me síi me síi tacuachén man so' rihaan nij síi taj ri'yunj man so' adonj.

<sup>65</sup> Gaa ne cataj uún Jesucristó:

—Che'é se ne cuchuman rá soj ro', che'é dan cataj xna'anj 'unj rihaan soj se vaa a 'ó síi se guun nucuaj ca'na' rihaan 'unj, sese nuveé Réj Diose me síi qui'yaj ca'na' so' rihaan 'unj ma' —taj uún Jesucristó a.

<sup>66</sup> Che'é dan canicaj que'ee nij síi tucu'yón se-nana so', ne ca'ne' rá nij so' ga suun cheé ga Jesucristó a.

<sup>67</sup> Che'é dan xná'anj Jesucristó man chuvij nij síi tucu'yón se-nana so', cataj so':

—Soj do' me rá tanáj manj na' —taj Jesucristó, xná'anj so' man chuvij nij síi tucu'yón se-nana so' a.

<sup>68</sup> Gaa ne cataj síi cu'naj Simón Pedró rihaan so' a:



—Taj yo'ó síf cuch'i' núj rihaan, man Señor. 'Q se so' me síf a'mii naná qui'yaj gaa i'na' núj rihaan Diose nu' cavii nu' ca'anj,

<sup>69</sup> ne amán rá núj ni'yaj núj mán so', ne aj ne'en núj se vaa mé so' síf guee síf ca'née ma'an Diose rihaan chumií nihánj adonj —taj Simón Pedró rihaan Jesucristó a.

<sup>70</sup> Gaa ne cataj Jesucristó rihaan chuvij nij so' a:

—Dan me se 'unj me síf narii man chuvij nij soj se vaa canoco' soj manj, tzaj ne ase vaa ma'an síf chree vaa yo'ó tuvi' soj adonj —taj Jesucristó rihaan chuvij nij so' a.

<sup>71</sup> Naná yo' ca'mii Jesucristó ni'yaj Jesucristó man síf cu'naj Judas ta'nú síf cu'naj Simón Iscariote a. 'Q se síf cu'naj Judas yo', tzaj ne yo'ó tuvi' chuvij nij síf tucu'yón se-nana Jesucristó me so', tzaj ne me so' síf tacuachén man Jesucristó rihaan nij síf taj ri'yunj man Jesucristó a.

## 7

### *Naná nihánj taj xna'anj che'é naná ca'mii Jesucristó ga nij tinúú so' a*

<sup>1</sup> Quisíj ca'mii Jesucristó nu' naná dan, gaa ne cachée Jesucristó estadó Galilea a. 'Q se ne ca'vej rá so' cachee so' estadó Judea, che'é se nano' nij síf uun chij rihaan nij yuvií israelitá man so', ne ticavi' nij so' man Jesucristó, rá nij so' a.

<sup>2</sup> Dan me se daj doj quisij cha'anj navij rá nij yuvií israelitá cha'anj une' nij so' ve' yacataj a.

<sup>3</sup> Che'é dan cataj nij tinúú Jesucristó rihaan so' a:

—Cavij so' ca'anj so' estadó Judea, gaa ne quene'en nij síf tucu'yón se-nana so' nij suun sa' nocço 'yaá so', tinuj.

<sup>4</sup> 'Q se sese me rá so' qui'yáá so' suun sa' nocço, ne ca'anj so' rej quene'en nij síf man rihaan chumií nihánj mán so' á —taj nij tinúú ma'an Jesucristó rihaan so' a.

<sup>5</sup> 'Q se ndaa ma'an nij tinúú Jesucristó ne cuchuman rá ni'yaj man Jesucristó a ma'.

<sup>6</sup> Che'é dan cataj Jesucristó rihaan nij so':

—Ataa quisij güii no xcúún 'unj qui'yaj suun 'unj á. Se-suun ma'an soj me se a me ma'an güii ca'vee qui'yaj suun soj se-suun soj ei.

<sup>7</sup> Taj che'é quitaj ri'yunj nij síf man rihaan chumií nihánj man soj ma'. 'Unj ro', vaa che'é quitaj ri'yunj nij so', ese 'unj me síf taj xna'anj rihaan nij so' se vaa chi'ii ndo'o vaa 'yaj nij so' adonj.

<sup>8</sup> Ca'anj soj cha'anj xraj ei. Xa' 'unj, tzaj ne se ca'anj 'unj cha'anj ma'. 'Q se ataa quisij güii qui'yaj sunj nanj adonj

<sup>9</sup> —taj Jesucristó rihaan nij so', gaa ne quináj so' estadó Galilea a.

### *Naná nihánj taj xna'anj daj qui'yaj Jesucristó gaa canuú cha'anj une' nii ve' yacataj a*

<sup>10</sup> Dan me se gaa quisíj cavii nij tinúú Jesucristó ca'anj nij so' cha'anj, gaa ne cavii ma'an Jesucristó ca'anj so' cha'anj uún a. Tzaj ne ca'anj yuve so' a.

<sup>11</sup> Che'é dan me nano' nij síf uun chij rihaan nij yuvií israelitá man Jesucristó rej canuú cha'anj yo' a. Ne xná'anj nij so' man tuvi' nij so', cataj nij so':

—Me rej vaj so' ga —taj nij so', xná'anj nij so' man tuvi' nij so' a.

<sup>12</sup> Ne nanó yuve ndo'o nij yuvií cuentó che'é Jesucristó a. Dan me se ta'aj nij yuvií cataj:

—Síf sa' me so' á —taj ta'aj nij yuvij a.

Tzaj ne yo'ó ta'aj nij yuvij cataj:

—Taj ma'. Síf tiha' yu'unj man nij yuvij me so' ei —taj yo'ó ta'aj nij yuvij yo' a.

<sup>13</sup> Tzaj ne a 'ó nij yuvij ne ca'mij ranga' che'é Jesucristó ma'. 'Q se cuchu'vi nij yuvij ni'yaj nij yuvij man nij sí uun chij rihaan nij so' a.

<sup>14</sup> Dan me se gaa anuú cha'anj, ne cavij Jesucristó rá nuví nocoo, ne tucu'yón so' man nij yuvij a.

<sup>15</sup> Che'é dan caráya'anj nij sí uun chij rihaan nij yuvij israelitá, ne cataj nij so':

—Nuveé sji tucu'yón me sí nihánj ma'. Me rej nari' so' se-nana Diose ga —taj nij sí uun chij yo' ni'yaj nij so' man Jesucristó a.

<sup>16</sup> Che'é dan cataj Jesucristó rihaan nij so' a:

—Xa' se-nanaj, tzaj ne nuveé nana cavii raá 'unj me nana nihánj ma'. 'Q se se-nana Diose sí ca'née manj me nana nihánj ei.

<sup>17</sup> Dan me se sese me rá yo'ó so' cunoo so' rihaan Diose, ne quene'en so' se vaa nuveé nana avii raá 'unj me nana tucu'yón 'unj ma'. 'Q se quene'en so' se vaa se-nana Diose me nana yo' a.

<sup>18</sup> Xa' sí a'mii se-nana ma'an, tzaj ne inanj me rá so' ca'mij sa' yuvij che'é ma'an so', ne me rá so' cavij sa' ma'an so' ei. Tzaj ne sese me rá yo'ó so' ca'mij sa' yuvij che'é sí ca'née man so', ne inanj nana ya che'é sí ca'née man so' a'mii so', ne ne nano' so' chrej chi'ij ma'.

<sup>19</sup> Ya uxrá rque sí cu'naj Moisés se-tucuanj so' rihaan soj, tzaj ne a 'ó tuvi' soj na'vej rá qui'yaj tucuaán yo' a ma'. Me che'é nano' soj daj qui'yaj soj, ne cavij 'unj ga —taj Jesucristó rihaan nij sí uun chij rihaan nij yuvij israelitá a.

<sup>20</sup> Gaa ne cataj nij yuvij rihaan Jesucristó a:

—Nuú nana chree nimán so' á. Me sí me rá ticavi' mán so', rá so' ga —taj nij yuvij rihaan Jesucristó a.

<sup>21</sup> Gaa ne cataj Jesucristó rihaan nij so' a:

—Gaa rque me se orún' suun sa' nocoo qui'yáj, ne caráya'anj taran' nij soj se vaa qui'yáa 'unj suun sa' nocoo güii naránj rá ní a.

<sup>22</sup> Dan me se ya uxrá cataj xna'anj Moisés rihaan ní' se vaa ca'ne' ní' ta'nga' man snó'o che'é rej ca'vee cunuu sa' ní' rihaan Diose adonj. Tzaj ne nuveé tucuanj cuchruj ma'an Moisés me yo' ma'. 'Q se se-tucuanj xii ní' nij sí man gaa naá me yo' adonj. Ne ndaa güii naránj rá a'ne' soj ta'nga' man snó'o ei.

<sup>23</sup> Dan me se che'é se me rá soj qui'yaj soj nu' se-tucuanj Moisés, che'é dan a'vej rá soj cata' ta'nga' man snó'o güii naránj rá soj, tzaj ne me che'é axrj yuvaá soj manj che'é yan cunuu sa' nu' nee man yo'ó snó'o qui'yáj güii naránj rá soj ga.

<sup>24</sup> Se guun xcaj soj cuentá che'é se vaa 'yaj yuvij ni'yaj soj che'é inanj tucuaán nocoo' soj ma'. 'Q se xcaj soj cuentá daj me rá Diose, ne cunuu cuu soj doj, qui'yaj soj ei —taj Jesucristó rihaan nij yuvij a.

<sup>25</sup> Che'é dan cataj ta'aj nij sí ne chuman' Jerusalén:

—Ne sji nihánj, nuveé sji nano' nii ticavi' Jii man me so' na'.

<sup>26</sup> Ne veé a'mii ranga' so' nihánj, ne a 'ó nana ne a'mii nij so' rihaan so' man asanj. Ya ya sí ca'née Diose tinanii man yuvij rihaan sayuun me so', rá nij xrej ata' suun sa' doj na'.

<sup>27</sup> Tzaj ne ne'en ní' me rej cavii sí' nihánj ei. Tzaj ne taj sí' ne'en me rej cavii sí' ca'nej Diose t̄inanii man yuvii rihaan sayuun asa' ca'na' so' man asanj —taj nij sí' ne chuman' Jerusalén yo' a.

<sup>28</sup> Che'é dan sca' ndo'o ca'mii Jesucristó, cataj so':

—Ne'en soj manj, ne ne'en soj me rej cavii 'unj ei. Tzaj ne ne ca'na' ma'anj ma'. 'Q se ya a'mii sí' ca'néé manj, tzaj ne ne ne'en uxrá soj man so' a ma'.

<sup>29</sup> 'Unj me sí' ne'en man so', che'é se cavii 'unj rihaan so', ne so' me sí' ca'néé manj adonj —taj Jesucristó rihaan nij yuvii a.

<sup>30</sup> Che'é dan nano' nij so' daj qui'yaj nij so' ne quita'aa nij so' man Jesucristó, tzaj ne a 'ó nij so' ne quisij rá quita'aa man so' a ma'. 'Q se ataa quisij güii ca'vée qui'yaj nij so' danj man so' a.

<sup>31</sup> Ne que'ee nij yuvii cuchumán rá ni'yaj man so', ne cataj nij sí' cuchumán rá ni'yaj man so':

—Ca'vée se ca'na' yo'ó so' cataj so' se vaa t̄inanii so' man ní' rihaan sayuun, tzaj ne daj chihaa m̄j se quisij so' qui'yaj so' doj suun sa' nocoo rihaan suun sa' nocoo qui'yaj sí' nihánj a ma'. Ya ya sij t̄inanii man ní' rihaan sayuun me sí' nihánj adonj —taj nij yuvii ni'yaj nij so' man Jesucristó a.

<sup>32</sup> Dan me se gaa cuno nij sí' fariseo se vaa ca'mii yuve nij yuvii nana dan che'é Jesucristó, gaa ne ca'néé nij xrej atá suun nocoo doj ca'néé nij sí' fariseo man tanuu ca'anj nij tanuu quita'aa nij tanuu man Jesucristó a.

<sup>33</sup> Che'é dan cataj Jesucristó:

—Doj güii cayáan 'unj ga' nij soj, ne cavii 'unj quínán' 'unj rihaan sí' ca'néé manj 'na' 'unj nanj ei.

<sup>34</sup> Nano' soj manj, tzaj ne se nari' soj manj a ma'. Ne se guun nucaj soj cuchí' soj rej cayáan 'unj a ma' —taj Jesucristó a.

<sup>35</sup> Che'é dan nij sí' uun chij rihaan nij yuvii israelitá cataj rihaan tuvi' nij so' a:

—Me rej ca'anj sí' nihánj, ne se nari' ní' man so' ga. Ca'anj so' rihaan tuvi' ní' sí' ne chiháan nij yuvii yanj na'. Tucuyón so' se-nana so' rihaan nij yuvii yanj na'.

<sup>36</sup> 'Q se cataj so' nana nihánj se vaa: “Nano' soj manj, tzaj ne se nari' soj manj a ma'. Ne se guun nucaj soj cuchí' soj rej cayáan 'unj a ma'”. Me che'é tu'va so' danj, rá soj ga —taj nij sí' uun chij yo', xná'anj nij so' man tuvi' nij so' a.

<sup>37</sup> Dan me se daj yo'ó güii navij cha'anj nocoo sa' ndo'o yo', ne güii yo' canicun' Jesucristó, ne cataj so':

—Sese ase vaa sí' nacoo ndo'o na vaa soj, ne ca'na' soj rihanj, ne rquej na achiin ya man soj á.

<sup>38</sup> Xa' sí' amán rá ni'yaj manj, tzaj ne quirí' so' se vaa taj danj Diose rihaan ní', ne dan me se ase vaa 'o chráa sa' ndo'o nuu na sa' inanj ro', danj gaa se sa' cunuú nimán sí' amán rá ni'yaj manj, ne ca'vée gaa i'na' nimán so' adonj.

<sup>39</sup> —Danj taj Jesucristó, ca'mii so' che'é Nimán Diose cunuú nimán nij sí' cuchumán rá ni'yaj man so' a. 'Q se ataa ca'na' Nimán Diose rihaan yuvii, ese ataa quisij güii caví' so' rihaan rcutze a.

<sup>40</sup> Che'é dan ta'aj nij yuvii cuno nana nihánj cataj:

—Ya ya sij nata' se-nana Diose gaa naá sij ca'na' uún rihaan chumii nihánj me sí' nihánj nanj á —taj ta'aj nij yuvii a.

<sup>41</sup> Yo'ó ta'aj nij yuvii cataj:

—Sij ca'néé Diose t̄inanii man ní' rihaan sayuun me sí' nihánj ei —taj yo'ó ta'aj nij so' a.

Tzaj ne yo'ó ta'aj nij yuvij cataj:

—Xa' sí ca'nej Diose t̄inanii man ní' rihaan sayuun, tzaj ne nuveé sij cavii estadó Galilea me so' ma'.

<sup>42</sup> 'Q se danj Diose taj se vaa ta'níi ta'nij si'no sí cu'naj David sí cane gaa naá me sí ca'nej Diose, ne sij cavij chiháán sí cu'naj David chuman' Belén me uún so' adonj —taj yo'ó ta'aj nij yuvij uún a.

<sup>43</sup> Che'é dan guun vij ca'mii nij yuvij, ni'yaj nij yuvij man Jesucristó a.

<sup>44</sup> Ne guun rá ta'aj nij so' quita'aa nij so' man Jesucristó, tzaj ne taj vaj sí quisij rá quita'aa man so' a ma'.

<sup>45</sup> Che'é dan canicaj nij tanuu ca'anj uún nij tanuu rihaan nij xrej at̄a suun noc̄o doj do', rihaan nij sí fariseo do', gaa ne cataj nij xrej do', nij sí fariseo do', rihaan nij tanuu:

—Me che'é ne ca'na' Jesucristó ga soj, qui'yaj soj ga —taj nij so', xna'anj nij so' man nij tanuu yo' a.

<sup>46</sup> Gaa ne cataj nij tanuu:

—Tzaj ne cunaj uxrá vaa nana a'mii so', ne taj vaj yo'ó yuvij ne'en ca'mii nana a'mii so' a ma' —taj nij tanuu yo' a.

<sup>47</sup> Che'é dan cataj nij sí fariseo rihaan nij tanuu a:

—Tiha' yu'unj so' man soj do' nanj ei.

<sup>48</sup> 'Q se a'ó nij sí uun chij do', a'ó nij sí fariseo do', ne cuchuman rá se vaa sij ca'neé Diose me so' a ma'.

<sup>49</sup> Ne xa' nij yuvij, tzaj ne ne ne'en nij yuvij se-tucuanj Moisés, ne inanj sayuun quiran' nij yuvij yo', qui'yaj Diose chuguanj —taj nij sí fariseo rihaan nij tanuu yo' a.

<sup>50</sup> Dan me se nicun' sí cu'naj Nicodemo ga nij so', ne yo'q tuvi' nij so' me so', ne sí ca'anj nanq cuentó ga Jesucristó rej nij gaa rque doj me so', ne cataj so':

<sup>51</sup> —Tzaj ne se-tucuanj Moisés taj se vaa ne nó xcúun ní' ca'ne' ní' cacun' che'é yo'q so', sese ataa cunq ní' nana a'mii so' ne sese ataa xcaj ní' cuentá daj 'yaj so' ma' —taj sí cu'naj Nicodemo rihaan yo'ó nij sí fariseo yo' a.

<sup>52</sup> Gaa ne cataj nij so' rihaan sí cu'naj Nicodemo a:

—Me che'é me rá so' ca'mii sa' so' che'é Jesucristó ga. 'Q se sij cavii estadó Galilea mé so' ga so' na'. Tucuyón so', ne xcaj so' cuentá se vaa a'ó sí nata' se-nana Diose ne avii estadó Galilea, 'yaj Diose ma' —taj nij sí fariseo rihaan sí cu'naj Nicodemo yo' a.

<sup>53</sup> Dan me se cavii nij so', ne quinan' 'o' o' nij so' tucua' nij so' a.

## 8

<sup>1</sup> Tzaj ne cavii Jesucristó xraá quij cu'naj Quij man Chruun Olivó a.

*Nana nihánj taj xna'anj daj ca'mii Jesucristó ga nij sí me rá go' yahij man chana tumé cacun' a*

<sup>2</sup> Dan me se rej sij güii me se ca'anj uún Jesucristó rá nuvií noc̄o a. Gaa ne cuchí' cunudanj nij yuvij rihaan so', ne ca'anj quitaj so' chruun xlá, ne tucuyón so' man nij yuvij yo' a.

<sup>3</sup> Veé dan, ne ca'na' nij sí naqui'yaj cuu se-tucuanj Moisés rihaan yuvij ca'na' nij sí fariseo do', ne nicaj nij so' man 'o' chana a. Ne chana nicaj nij so' me se aj nari' nii man chana yo' gaa cotoj no' ga snó'o, tzaj ne nuveé nica no' me snó'o cotoj ga no' a. Che'é dan quita'aa nij so' man no', ne nicaj nij so'

man no' ca'na' nij so' rihaan Jesucristó, ne cachrón nij so' man chana tanu ma'an nij so' ga Jesucristó a.

<sup>4</sup> Gaa ne cataj nij so' rihaan Jesucristó a:

—Chana nihánj me se maan orá cotoj no' ga yo'ó snó'o, ne nari' nii man no', ne quita'aa nii man no', maestro.

<sup>5</sup> Dan me se se-tucuanj Moisés taj se vaa no xcuún ní' go' ní' yahij man chana vaa danj ndaa se cavi' no', taj tucuaán yo' nanj á. Che'é dan me, daj qui'yaj ní', rá so' ga —taj nij so', xná'anj nij so' man Jesucristó a.

<sup>6</sup> O se guun rá nij so' ca'mii Jesucristó yo'o nana vaa nij che'é se-tucuanj Moisés, gaa ne ca'vee cuta' nij so' cacun' xraá Jesucristó che'é nana ca'mii so' a.

Dan me se ca'anj canē ruj Jesucristó, ne cachrón ra'a so' letrá rihaan yo'óo a.

<sup>7</sup> Tzaj ne yo'o tirquee nij so' xná'anj nij so' man so' a. Che'é dan canicun' caya uún so', ne cataj so' rihaan nij so' a:

—Sese danj me rá soj, ne ca'vee, tzaj ne a me ma'an 'o soj taj a doj cacun' tumé ro', ca'vee go' yahij man no' asino yaan ei —taj Jesucristó rihaan nij so', tzaj ne aj ne'en Jesucristó se vaa taran' nij so' atá cacun' a.

<sup>8</sup> Gaa ne ca'anj canē ruj uún Jesucristó, ne cachrón uún so' letrá rihaan yo'óo yo' a.

<sup>9</sup> Veé dan, gaa ne guun na'aj nij so' gaa cuno nij so' se-nana Jesucristó, ne nayón nij so' chrej, ne ca'anj nij so' a. Dan me se ndaa 'o 'o nij so' nayón chrej, ne asino yaan ca'anj nij síi cachij doj, gaa ne canoco' nij síi tachruu doj xó nij so', ne ca'anj cunudanj nij so' nanj adonj. Ndaa síj, gaa ne quináj uun Jesucristó, ne nicun' orún' chana yo' rihaan so' a.

<sup>10</sup> Gaa ne canicun' caya uún Jesucristó, ne cataj so' rihaan chana yo':

—Ca'anj taran' nij so', nanj nocoj. Me rej vaj nij síi cuta' cacun' xraá so' ga. A 'o nij so' ne quisij rá cavi' so' a na' —taj Jesucristó, xná'anj so' man chana yo' a.

<sup>11</sup> Gaa ne cataj chana yo':

—Taj vaj a 'ó síi me rá ca'mii danj, a man Señor —taj chana yo' rihaan Jesucristó a.

Gaa ne cataj Jesucristó rihaan no' a:

—A 'unj se cataj se vaa qui'yaj nii sayuun mán so' a ma'. Dan me se ca'anj so', ne se qui'yáá so' a doj cacun' rej rihaan so' a ma' —taj Jesucristó rihaan chana yo' a.

*Nana nihánj taj xna'anj se vaa cataj Jesucristó se vaa ya vaa se-nana so' a*

<sup>12</sup> Gaa ne cataj uún Jesucristó rihaan nij xrej atá suun nocoo doj do', rihaan nij síi fariseo do' a:

—Ase vaa ya'an chuguun vaa 'unj rihaan soj sij man rihaan chumij nihánj adonj. Dan me se síi noco' manj ro', se cachéé so' rej rmi' ma'. 'Unj ro', me ya'an chuguun cachee ga so', ne xcaj so' cuentá me rej vaj so', qui'yáj, ne che'é dan gaa i'na' ya nimán so' nu' cavii nu' ca'anj adonj —taj Jesucristó no nij so' a.

<sup>13</sup> Che'é dan cataj nij síi fariseo rihaan so' a:

—Tzaj ne inanj ma'án so' me síi taj xna'anj che'é ma'án so' á. Nuveé nana ya me nana a'mii so' che'é ma'án so' a ma' —taj nij síi fariseo rihaan Jesucristó a.

<sup>14</sup> Gaa ne cataj Jesucristó rihaan nij so' a:

—Nda' se ma'anj me sí a'mii che'ej, tzaj ne ya vaa se-nanaj ei. 'O se 'unj me sí ne'en me rej cavij, ne 'unj me sí ne'en me rej ca'anj 'unj ei. Ne xa' soj, tzaj ne ne ne'en soj me rej cavij ne ne'en soj me rej ca'anj 'unj a ma'.

15 Xa' soj, tzaj ne inanj uta' soj cacun' xraá yuvií che'é inanj se vaa ruvi' rihaan soj nanj ei. Tzaj ne 'unj me se ne uta' 'unj cacun' xraá a 'ó yuvií ma'.

16 Tzaj ne ca'vée se xcaj 'unj cuentá che'é yuvií daj vaa yuvií, tzaj ne ya xcaj 'unj cuentá che'é yuvií ei. Dan me se nuveé orún' 'unj me sí xcaj cuentá che'é yuvií ma'. 'O se vaa Réj sí ca'née manj rihaan chumií nihánj, ne so' me sí racuj manj adonj.

17 Ne se-tucuanj Moisés tucuáán nocó' soj me se nana yo' taj se vaa sese cyaan vaa nana a'mii vj roj so', ne ya vaa se-nana roj so', taj nana yo' ei.

18 Dan me se 'unj me sí taj xna'anj che'é ma'anj, ne taj xna'anj Réj sí ca'née manj uún adonj —taj Jesucristó rihaan nij so' a.

19 Che'é dan xná'anj nij so' man Jesucristó, cataj nij so':

—Me rej ne rée so' ga —taj nij so' a.

Gaa ne cataj Jesucristó:

—Ne ne'en uxrá soj manj do', man Réj do' ma'. 'O se sese ne'en ya soj manj, ne ne'en soj man Réj uún adonj —taj Jesucristó rihaan nij so' a.

20 Nu' nihánj me nana tucu'yón Jesucristó gaa canicun' so' rá nuvií nocóo rej rqué yuvií sa'anj rihaan Diose a. Ne taj vaj yuvií quita'aa man so' a ma'. 'O se ataa quisií güii ca'vée qui'yaj nii sayuun man Jesucristó nanj adonj.

*Nana nihánj taj xna'anj se vaa cataj Jesucristó se vaa daj chihqa mij se guun nucuaj nij sí uun chij rihaan nij yuvií israelitá cuchí' nij so' rihaan so' a ma'*

21 Che'é dan cataj uún Jesucristó rihaan nij sí uun chij rihaan nij yuvií israelitá a:

—'Unj nihánj me se cavii 'unj ca'anj 'unj, gaa ne nano' soj manj, tzaj ne asa' cavi' soj, ne yo'ó quitaj nu' cacun' tumé soj xraá soj, ne se guun nucuaj soj cuchí' soj rej ca'anj 'unj ma' —taj Jesucristó rihaan nij so' a.

22 Che'é dan xná'anj nij sí uun chij rihaan nij yuvií israelitá man tuvi' nij so', cataj nij so':

—Ticavi' so' man ma'an so', rá soj na'. Che'é dan cataj so' se vaa se guun nucuaj ní' cuchí' ní' rej ca'anj so', rá soj na' —taj nij so', xná'anj nij so' man tuvi' nij so' a.

23 Gaa ne cataj Jesucristó rihaan nij so':

—Dan me se xa' soj, tzaj ne nanj sij man rihaan chumií nihánj me soj, ne 'unj, tzaj ne sij cavii rej xtá' mej nanj á.

24 Che'é dan cataj xna'anj 'unj rihaan soj se vaa asa' cavi' soj, ne yo'ó quitaj nu' cacun' tumé soj xraá soj nanj ei. 'O se sese se cuchumán rá soj se vaa Diose mé 'unj, ne asa' cavi' soj, ne yo'ó quitaj nu' cacun' tumé soj xraá soj nanj adonj —taj Jesucristó rihaan nij so' a.

25 Che'é dan xná'anj nij so' man Jesucristó, cataj nij so':

—Me sí mé so' ga —taj nij so', xná'anj nij so' man Jesucristó a.

Gaa ne cataj Jesucristó rihaan nij so' a:

—Aj cataj xna'anj 'unj rihaan soj asino yaan me sij mej ei.

26 Vaa ndo'o nana no xcúnj ca'mij che'é soj, ne no xcúun uxraj ya ca'ne' 'unj cacun' che'é soj ei. Dan me se sí ca'née manj, tzaj ne so' me sí a'mii ya uxrá, ne inanj nana ca'mii so' cunoj me nana taj xna'anj 'unj rihaan soj sij man rihaan chumií nihánj adonj —taj Jesucristó rihaan nij so' a.

<sup>27</sup> Tzaj ne ne quene'en nij so' se vaa ca'mii Jesucristó che'é Rej so' Diose síi ca'néé man Jesucristó a ma'.

<sup>28</sup> Che'é dan cataj Jesucristó rihaan nij so' a:

—Asa' quisíj cavii 'unj xta' qui'yaj soj, gaa ne xcaj ya soj cuentá se vaa ya ya sij ca'néé Diose nıcaj yu'unj man yuviı mej ei. Ne ne 'yaá 'unj se vaa avii inanj raá ma'anj ma'. 'O se a'mii 'unj ndaa vaa tucu'yón Réj manj adonj.

<sup>29</sup> Ne so' me síi ca'néé manj rihaan soj, ne yo'q nicun' so' ga 'unj, ne a doj ne tanáj yanıj so' manj a ma'. 'O se 'yaá 'unj se inanj me rá ma'an so' qui'yáj adonj —taj Jesucristó rihaan nij so' a.

<sup>30</sup> Gaa quisíj ca'mii Jesucristó nana vaa danj, gaa ne cuchumán rá que'ee nij síi uun chij rihaan nij yuviı israelitá ni'yaj nij so' man Jesucristó a.

*Nana nihánj taj xna'anj daj ca'mii Jesucristó ga nij síi uun chij rihaan nij yuviı israelitá síi cuchumán rá ni'yaj man so' a*

<sup>31</sup> Che'é dan cataj Jesucristó rihaan nij síi uun chij rihaan nij yuviı israelitá síi cuchumán rá ni'yaj man so' a:

—Sese yo'q canoco' soj se-nanaj, ne sij ya ya tucu'yón se-nanaj me soj,

<sup>32</sup> ne quene'en soj nu' nana ya, ne quinaniı soj rihaan suun uun mozó, qui'yaj nana ya yo' chuguanj —taj Jesucristó rihaan nij so' a.

<sup>33</sup> Gaa ne cataj nij so' rihaan Jesucristó:

—'O se ta'nıı ta'nıj si'nó síi cu'naj Abraham síi cane gaa naá me núj, ne daj chihaa mıj ne guun núj mozó a ma'. Me che'é cataj so' se vaa quinaniı núj rihaan suun uun mozó ga —taj nij so', xna'anj nij so' man Jesucristó a.

<sup>34</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa síi 'yaj cacun' ro', me síi uun mozó rihaan cacun' yo' ei.

<sup>35</sup> Ne xa' mozó, tzaj ne se ca'vee guun chij mozó, ne se ca'vee cane so' nu' cavii nu' ca'anj ma'. Ne xa' ta'nıı síi tucua ve', tzaj ne so' me síi ca'vee cane rá ve' nu' cavii nu' ca'anj adonj.

<sup>36</sup> Che'é dan me sese tinaniı ta'nıı Diose man soj rihaan suun uun mozó, ne ya ya nuveé sij uun mozó me so' a ma'.

<sup>37</sup> “Aj ne'enj se vaa ta'nıı ta'nıj si'nó síi cu'naj Abraham me soj á. Tzaj ne nano' uxrá soj daj qui'yaj soj ne cavi' 'unj ei. Danj 'yaj soj che'é rej na'vej rá soj nari' soj canoco' soj se-nanaj ei.

<sup>38</sup> Dan me se a'mii 'unj inanj se vaa quene'enj qui'yaj Réj a. Tzaj ne nij soj me síi 'yaj ndaa vaa cataj rej soj rihaan soj adonj —taj Jesucristó rihaan nij so' a.

<sup>39</sup> Gaa ne cataj nij so' rihaan Jesucristó a:

—Xiı núj me síi cu'naj Abraham gaa naá adonj —taj nij so' a.

Gaa ne cataj Jesucristó rihaan nij so' a:

—Sese ya ya ta'nıı ta'nıj si'nó síi cu'naj Abraham me soj, ne qui'yaj soj ndaa vaa qui'yaj síi cu'naj Abraham yo' asuun tzaj a.

<sup>40</sup> Tzaj ne cuano nihánj me se nano' soj daj qui'yaj soj ne cavi' 'unj, ne 'unj me síi cataj xna'anj rihaan soj nu' nana ya cataj xna'anj Réj Diose rihanj adonj. Dan me se inó uxrá vaa 'yaj soj ga síi cu'naj Abraham adonj.

<sup>41</sup> Maan se 'yaj soj inanj se vaa 'yaj rej soj nanj á —taj Jesucristó rihaan nij so' a.

Che'é dan cataj nij so' rihaan Jesucristó a:

—Nuveé ta'nıj cacun' me núj ma'. 'O se oruun Rej núj, ne Diose me so' nanj á —taj nij so' a.

42 Gaa ne cataj Jesucristó rihaan nij so' a:

—Sese Diose me Rej soj, ne cunuu 'ee rá soj manj se danj ei. 'O se 'unj me sí cavii rej nicun' Diose, ne ca'ná 'unj nihánj chuguñj. Dan me se ne ca'ná' ma'anj nihánj ma'. 'O se so' me sí ca'néé manj ca'naj nihánj adonj.

43 “Che'é se na'vej rá soj cunō soj se-nanaj, che'é dan sayuun uxrá vaa nana a'mij rihaan soj adonj.

44 'O se ta'níi sí chree me soj, ne me rá soj qui'yaj soj inanj ndaa vaa me rá rej soj sí chree qui'yaj soj adonj. Ne xa' so', tzaj ne sí ticavi' man yuvií me so' asij guun che'e chumii nihánj, ne daj chihaa míj ne ne'en so' ca'mii nica so' nana ya ma'. 'O se ne aran' rá so' ca'mii so' nana ya a man adonj. Danj inanj vaa so', a'mii ne so', che'é se sí ne inanj me so', ne sí tuculyón man yuvií ca'mii ne yuvií me uún so' adonj.

45 “Ne xa' 'unj, tzaj ne che'é se nana ya a'mij rihaan soj, che'é dan ne amán rá soj uno soj se-nanaj a ma'.

46 A 'ó tuvi' soj se ca'vee quirii cacun' cuta' xráj a ma'. Inanj nana ya a'mij rihaan soj ei. Me che'é ne cuchuman rá soj cunō soj se-nanaj ga.

47 'O se sí nocō' ya man Diose me sí uno se-nana Diose adonj. Tzaj ne nuveé sij nocō' man Diose me soj a ma'. Che'é dan ne uno soj a man adonj —taj Jesucristó rihaan nij sí uun chij rihaan nij yuvií israelitá a.

48 Gaa ne cataj nij sí uun chij rihaan nij yuvií israelitá a:

—Ya uxrá vaa nana ca'mii núj se vaa nuveé tuvi' núj mé so' a ma'. 'O se sí cavii estadó Samaria mé so' chuguñj. Nuñ nana chree nimán so' ei —taj nij so' rihaan Jesucristó a.

49 Gaa ne cataj Jesucristó:

—Taj vaj nana chree nuú nimanj ma'. 'O se aráj cochróo 'unj rihaan Réj Diose, tzaj ne ne aráj cochroj soj rihanj a ma'.

50 Ne 'yaj suun 'unj che'é yan cataj yuvií se vaa sij sa' mej ma'. Tzaj ne vaa Diose, ne so' me sí me rá cataj yuvií se vaa sij sa' mé 'unj, ne so' me sí ca'ne' cacun' che'é yuvií adonj.

51 Ya ya cataj xna'anj 'unj rihaan soj cuano se vaa sese cunō soj se-nanaj, ne daj chihaa míj se cavi' soj a ma' —taj Jesucristó a.

52 Che'é dan nij sí uun chij rihaan nij yuvií israelitá cataj rihaan so' a:

—Cuanō nihánj me se ne'en ya núj se vaa nuñ nana chree nimán so' á. 'O se cavi' sí cu'naj Abraham cavi' nij sí nata' se-nana Diose gaa naá cavi', ne nihánj me taj so' se vaa sese cunō núj se-nana so', ne daj chihaa míj se cavi' núj, taj so' man asanj.

53 Dan me se gaa naá me se cavi' xii núj sí cu'naj Abraham, ne sij sa' doj mé so' rihaan so', rá so' na'. Ne cavi' nij sí nata' se-nana Diose uún a. Daj sij mé so', rá so' ga —taj nij so' rihaan Jesucristó a.

54 Gaa ne cataj Jesucristó rihaan nij so' a:

—Sese cataj 'unj se vaa sij sa' me ma'anj, ne taj yu'vee nó se-nanaj a ma'. Tzaj ne vaa Réj, ne so' me sí taj se vaa sa' 'yaj adonj. Dan me se Diose me Réj, ne nij soj me sí taj se vaa nocō' soj man so',

55 tzaj ne ne ne'en uxrá soj man so' a ma'. Tzaj ne 'unj me sí ne'en man so' adonj. Dan me se sese cataj 'unj se vaa ne ne'enj man so', ne tuvi' soj sí ne mej nanj á. Tzaj ne ya ya ne'enj man so', ne nocó' 'unj se-nana so' chuguñj.

56 “Dan me se guun niha' uxrá rá xii soj sí cu'naj Abraham che'é se quene'en so' se vaa vaa güii quene'en so' se vaa ca'ná' 'unj rihaan chumii



nihánj a. Dan me se quene'en so' se vaa ca'ná' 'unj, gaa ne guun niha' ya uxrá rá so' ei —taj Jesucristó rihaan nij so' a.

<sup>57</sup> Che'é dan nij síi uun chij rihaan nij yuvií israelitá cataj rihaan Jesucristó a:

—Ataa quisij so' vjij chihaa chí' yo' a. Asá' a'vee taj so' se vaa quene'én so' man Abraham ga —taj nij so', xná'anj nij so' man Jesucristó a.

<sup>58</sup> Gaa ne cataj Jesucristó rihaan nij so' a:

—Ya ya cataj xna'anj 'unj rihaan soj cuano se vaa asij ataa ca'ngaa síi cu'naj Abraham, ne aj nej nanj adonj —taj Jesucristó rihaan nij so' a.

<sup>59</sup> Che'é dan quita'aa nij so' yahij, ne go' nij so' man Jesucristó, rá nij so' a. Tzaj ne curihanj yuve so' rá nuvíi nocgo yo', ne ca'anj so' a. Dan me se maan tanuú sca'núj nij so' cachén Jesucristó, ca'anj so' a.

## 9

*Nana nihánj taj xna'anj se vaa naxra' rihaan 'o síi tuchrii, qui'yaj Jesucristó a*

<sup>1</sup> Dan me se cavii Jesucristó ca'anj so', gaa ne quene'en so' 'o síi tuchrii a. Dan me se síi tuchrii yo' me se tuchrii so' asij ca'ngaa so' a.

<sup>2</sup> Gaa ne xná'anj nij síi tucu'yón se-nana Jesucristó man Jesucristó, cataj nij so':

—Me che'é tuchrii síi nihánj, ga man maestro'. Ma'an so' qui'yaj cacun' na'. Ase rej so' qui'yaj cacun' xa' —taj nij so', xná'anj nij so' man Jesucristó a.

<sup>3</sup> Gaa ne cataj Jesucristó:

—Nuveé ma'an so', nuveé rej so' ga nii so' do', me síi tumé cacun' ma'. Maan se Diose me rá quene'en ní' daj qui'yaj Diose che'é so' adonj.

<sup>4</sup> Q se no xcúun ní' qui'yaj suun ní' se-suun síi ca'néé manj rihaan chumij nihánj adonj. Ase vaa rej ranga' vaa yo' yaj, ne ca'vee qui'yaj suun ní' yaj ei. Tzaj ne quisij güii ca'ne' rá ní', ne ase vaa rej nij ro', gaa güii yo', ne se ca'vee qui'yaj suun ní' doj a ma'.

<sup>5</sup> Tzaj ne cuano nihánj me se vaj 'unj rihaan chumij nihánj, ne ase vaa ya'an chuguun ro', danj vaa 'unj rihaan chumij nihánj adonj —taj Jesucristó rihaan nij síi tucu'yón se-nana so' a.

<sup>6</sup> Quisij ca'mii so' danj, gaa ne quirri talúj so' rihaan yo'óó, gaa ne qui'yaj so' doj sigui' man yo'óó yo', ne caxrij so' sigui' yo' rihaan síi tuchrii yo' a.

<sup>7</sup> Gaa ne cataj so' rihaan síi tuchrii yo' a:

—Ca'anj so' na'nu' so' rihaan so' rá na Siloé á —taj Jesucristó rihaan so' a. Dan me se cuyaan vaa nana “Siloé” yo' ga nana “rasuun ca'néé nii man” a. Veé dan me se ca'anj síi tuchrii yo', ne na'nu' so' rihaan so' rá na yo', gaa ne canicaj so' ca'na' uún so', ne curuvi' rihaan so' a.

<sup>8</sup> Dan me se nij síi yanj nichrun' yan yanj so' do', nij síi aj ne'en man so' gaa tuchrii so' do', cataj nij so':

—Ne síi nihánj me síi cane cachín caridad gaa rque, rá soj na' —taj nij so' ni'yaj nij so' man síi naxra' rihaan yo' a.

<sup>9</sup> —Danj asanj. Veé ya so' ei —taj ta'aj nij so' a.

Ne yo'ó ta'aj nij so' cataj:

—Taj ma'. Maan se ase ni'yaj guee síi cachín caridad ro', danj ni'yaj guee síi nihánj, tzaj ne nuveé so' ma' —taj yo'ó ta'aj nij so' a.

Tzaj ne ma'an síi naxra' rihaan yo' cataj:

—'Unj me síi cachín caridad yo' ei —taj so' a.

10 Che'é dan xná'anj nij yuvij man so', cataj nij yuvij:

—Daj qui'yáa so', ne ca'vee naxra' rihaan so' ga —taj nij yuvij, xná'anj nij so' man sí tuchrij yo' a.

11 Gaa ne cataj so':

—Sí cu'naj Jesucristó ro', qui'yaj sigui', ne caxrij so' sigui' rihanj, gaa ne cataj xna'anj so' rihanj se vaa ca'anj 'unj na'nu' 'unj rihanj rá na Siloé a. Gaa ne gaa quisij ca'anj na'nu' 'unj rihanj rá na yo', ne naruvi' rihanj nanj á —taj sí naxra' rihaan yo' rihaan nij yuvij a.

12 Gaa ne xná'anj nij yuvij man so', cataj nij yuvij:

—Me rej vaj so' cuano ga —taj nij yuvij, xná'anj nij yuvij man sí tuchrij yo' a.

—Ne ne'enj me rej vaj so' cuano a ma' —taj sí tuchrij yo' rihaan nij yuvij a.

*Nana nihánj taj xna'anj se vaa ca'maan rá nij sí fariseo ni'yaj nij so' man sí naxra' rihaan yo' a*

13 Dan me se ca'anj nicaj nii man sí naxra' rihaan yo' rihaan nij sí fariseo a.

14 Dan me se güii naránj rá nij yuvij israelitá me güii qui'yaj Jesucristó sigui' ne naxra' rihaan sí tuchrij yo' qui'yaj Jesucristó a.

15 Che'é dan xná'anj uún nij sí fariseo man sí naxra' rihaan yo' daj qui'yaj so' ne naxra' rihaan so' a.

Gaa ne cataj sí naxra' rihaan yo':

—Qui'yaj so' sigui', ne caxrij so' rihanj, gaa ne na'nun rihanj, ne cuano nihánj ruvi' rihanj nanj á —taj so' rihaan nij sí fariseo a.

16 Che'é dan cataj ta'aj nij sí fariseo:

—Nuveé sij ca'néé Diosé rihaan ní' me sí qui'yaj naxra' rihaan sí nihánj a ma'. 'O se 'yaj suun so' güii no xcuún ní' naraan rá ní' adonj —taj ta'aj nij sí fariseo yo' a.

Tzaj ne yo'ó ta'aj nij so' cataj:

—Tzaj ne nuveé sij tumé cacun' me so' a ma'. 'O se nij sí tumé cacun' me se daj chihaa míj se guun nucuj nij sí tumé cacun' qui'yaj nij so' suun sa' nocoo ndaa vaa qui'yaj sí qui'yaj naxra' rihaan sí nihánj a adonj —taj yo'ó ta'aj nij sí fariseo yo' a.

Dan me se cuxra' ta'aj nij sí fariseo man nij so', ne ino guun rá nij so' ga tuvi' nij so' ni'yaj nij so' man Jesucristó a.

17 Che'é dan cataj uún nij so' rihaan sí naxra' rihaan yo' a:

—Daj uun rá ma'an so' che'é sí qui'yaj naxra' rihaan so' ga —taj nij sí fariseo, xná'anj nij so' man sí naxra' rihaan yo' a.

Ne cataj so':

—Sij nata' se-nana Diosé me so', rá yá 'unj adonj —taj sí naxra' rihaan yo' che'é Jesucristó a.

18 Tzaj ne ne cuchuman rá nij sí uun chij rihaan nij yuvij israelitá se vaa ya ya tuchrii me so' gaa rque ne naxra' rihaan so' a. Che'é dan ca'néé nij so' nana se vaa ca'na' rej so' do', nii so' do', ga sí naxra' rihaan yo' rihaan nij so' a.

19 Veé dan cuchu' roj so', gaa ne xná'anj nij sí uun chij rihaan nij yuvij israelitá man roj so', cataj nij so':

—Ya ya ta'nú roj soj me sí nihánj na'. Ya ya tuchrii me so' gaa ca'ngaa so' na'. Asa' ca'vee naxra' rihaan so' cuano, rá roj soj ga —taj nij so', xná'anj nij so' man roj nica so' a.

20 Gaa ne cataj roj so':

—Ta'nij ya rój me sí nihánj, ne tuchrii ya me so' asij ca'ngaa so',

21 tzaj ne ne ne'en uxrá rój asa' ca'vee naxra' rihaan so' cuano a ma'. Ne ne ne'en uxrá rój me sí qui'yaj naxra' rihaan so' a ma'. Xna'anj soj man so' á. 'O se sí aj nocoo me so', ca'mii so' che'é ma'an so' nanj á —taj roj so' a.

22 Daj ca'mii roj nica rej sí naxra' rihaan yo' do', nii so' do', che'é se cuhu'vi' roj so' ni'yaj roj so' man nij sí uun chij rihaan nij yuvií israelitá a. Dan me se aj guun ya ca'mii nij sí uun chij rihaan nij yuvií israelitá se vaa sese cataj yo'o so' se vaa sij ca'née Diose tinanii man yuvií rihaan sayuun me Jesucristó, ne quirii nij so' xe' man sí a'mii daj sca'núj nij yuvií israelitá a.

23 Che'é dan cataj rej sí naxra' rihaan do', nii so' do', se vaa sí aj nocoo me so', ne xna'anj nij so' man ma'an so' a.

24 Che'é dan nacúún uún nij so' man sí naxra' rihaan yo', ne cataj nij so' rihaan so' a:

—Ve'é cataj ya so' rihaan Diose daj quirán' so' á. 'O se aj ne'en núj se vaa xa' snó'o ca'mii ga so', tzaj ne sij tumé cacun' me so' ei —taj nij so' rihaan sí naxra' rihaan yo' a.

25 Che'é dan cataj sí naxra' rihaan yo':

—Ne ne'en uxraj sese sij tumé cacun' me so' ma'. Maan se orún' rasuun ne'én 'unj se vaa gaa rque, ne sí tuchrii mej, tzaj ne cuano nihánj me se ruvi' rihanj adonj —taj sí naxra' rihaan yo' a.

26 Che'é dan xna'anj nij so' man so', cataj nij so':

—Ne xa' sí ca'mii ga so', tzaj ne daj qui'yaj so', gaa ne naxra' rihaan so' qui'yaj so' ga —taj nij so', xna'anj nij so' man so' a.

27 Gaa ne cataj sí naxra' rihaan yo' rihaan nij so' a:

—Aj cataj xna'anj 'unj rihaan soj, tzaj ne ne cuno soj a ma'. Me che'é me rá soj cataj xna'anj uún 'unj rihaan soj ga. Guun ma'an soj sí tucu'yón se-nana so', rá soj na' —taj sí naxra' rihaan yo' rihaan nij so' a.

28 Gaa ne nij ca'mii nij so' ga sí naxra' rihaan yo', ne cataj nij so':

—Ma'an so' me sí tucu'yón se-nana so', ne xa' núj, tzaj ne sij tucu'yón se-nana Moisés me núj ei.

29 Ne'en núj se vaa ca'mii ma'an Diose ga sí cu'naj Moisés, tzaj ne ne ne'en núj me rej cavii sí ca'mii ga so' a ma' —taj nij so' rihaan sí naxra' rihaan yo' a.

30 Gaa ne cataj so' rihaan nij so' a:

—Niha' uxrá vaa se-nana soj chihá'. Ne ne'en soj me rej cavii so', tzaj ne sí nacuchra' rihanj me so' nanj adonj.

31 'O se ne'en ní' se vaa ne uno Diose rihaan nij sí tumé cacun' a ma'. Tzaj ne sese aráj cochroj ní' rihaan Diose, ne sese 'yaj ní' se vaa me rá Diose, ne qui'yaj Diose se vaa achíín ni'yaj ní' rihaan Diose nanj á.

32 Dan me se sí tuchrii mej gaa ca'ngaj, ne nu' ca'na' me se ne ca'na' nana rihaan ní' se vaa nacuchra' yo'o so' rihaan sí vaa daj a ma'. Tananj orún' so' me sí qui'yaj daj ei.

33 Dan me se sese nuvéé sij ca'née Diose rihaan ní' me so', ne daj chihaa míj se guun nucuaj so' qui'yaj so' daj ma' —taj sí naxra' rihaan yo' rihaan nij so' a.

34 Gaa ne cataj nij so' rihaan so' a:

—Nanj sí tumé cacun' mé so' asij ca'ngaa so' ei. Ne nó xcúún so' tucu'yón so' a 'o nana rihaan núj a ma' —taj nij so' rihaan so' a.

Gaa ne quirii nij so' man so' xe' a.

<sup>35</sup> Dan me se cuchì' nana rihaan Jesucristó se vaa quirii nij so' man síí naxra' rihaan yo' xe' a. Che'é dan nano' Jesucristó man so', gaa ne cataj Jesucristó rihaan so' a:

—So' me síí amán rá ni'yaj man síí ca'neé Diose nìcaj yu'unj man yuviì na' —taj Jesucristó rihaan síí naxra' rihaan yo' a.

<sup>36</sup> Gaa ne cataj so':

—Ne me síí me síí ca'neé Diose nìcaj yu'unj man yuviì, señor'. Cataj xna'anj so' noj, gaa ne cuchuman raj ni'yaj man so' ei —taj síí naxra' rihaan yo' rihaan Jesucristó a.

<sup>37</sup> Gaa ne cataj Jesucristó rihaan so':

—Aj quene'én so' man so', ne 'unj sijn a'mii ga so' cuano me so' adonj —taj Jesucristó rihaan so' a.

<sup>38</sup> Gaa ne cataj so':

—Cuanò nihánj me se chumán raj ni'yaj mán so', Señor —taj so' a.

Gaa ne canicun' ruj so' rihaan Jesucristó a.

<sup>39</sup> Gaa ne cataj Jesucristó:

—Ca'ná' 'unj rihaan chumiì nihánj che'é se no xcúún 'unj ca'ne' 'unj cacun' che'é yuviì adonj. Dan me se xa' nij síí ne ne'en, tzaj ne quene'én nij so', qui'yá, ne xa' nij síí guun rá se vaa aj quisíj xcaj nij so' cuentá, tzaj ne ase vaa síí aráán rihaan ro', danj gaa nij so' se vaa se ca'vee xcaj nij so' cuentá ma' —taj Jesucristó a.

<sup>40</sup> Dan me se cachéé ta'aj nij síí fariseo ga Jesucristó, ne cuno nij so' nana ca'mii Jesucristó a. Che'é dan xná'anj nij so' man Jesucristó, cataj nij so':

—Ne ase vaa síí aráán rihaan vaa núj, rá so' na' —taj nij so', xná'anj nij so' man Jesucristó a.

<sup>41</sup> Gaa ne cataj Jesucristó rihaan nij so' a:

—Sese sijn ne ne'en me soj, ne taj vaj cacun' tumé soj ma'. Tzaj ne cuano nihánj me se cataj soj se vaa aj ne'en soj a. Che'é dan yo'ò tumé soj cacun' adonj —taj Jesucristó rihaan nij síí fariseo yo' a.

## 10

*Nana nihánj taj xna'anj se vaa ase vaa síí tumé matzinj ro', danj vaa Jesucristó, tumé so' man ní' a*

<sup>1</sup> Gaa ne cataj uún Jesucristó rihaan nij so' a:

—Ya ya cataj xna'anj 'unj rihaan soj cuano se vaa xa' síí ne atúj ta'yaa rej nuu nij matzinj ne avii raá chingá rej nuu nij xo', tzaj ne síí ituu me so' adonj.

<sup>2</sup> Tzaj ne síí atúj ta'yaa ro', so' me síí daan matzinj yo' adonj.

<sup>3</sup> Dan me se x'núj ta'yaa rihaan so', 'yaj síí tumé ta'yaa, gaa ne uno nij matzinj se-nana so', gaa ne nacúún so' man nij matzinj a'mii so' se-chuviì 'o 'o nij xo', gaa ne 'anj nìcaj so' man nij xo' xe' adonj.

<sup>4</sup> Gaa quisíj quirii so' man nij xo' xe', ne noco' nij matzinj xcó so', che'é se u'yón nij xo' se-nana so' ei.

<sup>5</sup> Tzaj ne yo'ò yuviì me se se canoco' nij xo' man yo'ó so', maan se cunanj nij xo' rihaan yo'ó so', che'é se ino ca'mii yo'ó so' xreé nij xo', ne se cu'yón uxrá nij xo' se-nana yo'ó so' a ma' —taj Jesucristó a.

<sup>6</sup> Dan me se ase vaa 'o cuentó vaa nana nihánj nana ca'mii Jesucristó rihaan nij so', tzaj ne ne xcaj nij so' cuentá me taj nana nihánj a ma'.

<sup>7</sup> Che'é dan cataj uún Jesucristó:

—Ya ya cataj xna'anj 'unj rihaan soj cuano se vaa ase vaa ta'yaa rej atúj nij matzinj ro', danj vaa 'unj a.

<sup>8</sup> Dan me se xa' taran' nij sí ca'na' gaa rque doj, tzaj ne ase vaa sí ituu vaa nij so' a. Tzaj ne ne cunq nij matzinj rihaan nij so' a ma'.

<sup>9</sup> Dan me se ase vaa ta'yaa yo' vaa 'unj, ne sí atúj rej nicun' 'unj ro', so' me sí amán rá ni'yaj manj, ne quinanij so' rihaan sayuun, ne ve'é catuu so', ne ve'é curihanj so', ne nari' so' coj chrin' cha so' nanj adonj.

<sup>10</sup> “Xa' sí ituu, tzaj ne me inanj rá so' qui'yaj ituu so' matzinj do', ticavi' so' matzinj do', tinavij so' matzinj do' ei. Che'é dan atúj so' rej nuu nij matzinj a. Tzaj ne 'unj me se ca'ná' 'unj che'é se me rá 'unj yo' o gaa i'na' nij xo', ne ve'é uxrá cayáan nij xo', qui'yáj chuguanj.

<sup>11</sup> “Ne 'unj ro', me sí daan ya ya nij matzinj, ne tumé sa' yá 'unj man nij matzinj, ne ca'nej nimanj cavij che'é nij xo' adonj.

<sup>12</sup> Xa' mozó, tzaj ne nuveé sjj daan matzinj me so' ma'. Sij 'yaj canaán sa'anj uun me so', ne che'é dan sese ne'en so' xcuu ca'yánj ca'nu', ne chu'vi' so', ne tanáj so' matzinj yo', ne unánj so' a. Gaa ne tanáj ma'an so' man nij matzinj, gaa ne quita'aa ca'yánj yo' man nij matzinj, ne ticha'nuu ca'yánj yo' man nij xo' nanj adonj.

<sup>13</sup> Danj 'yaj mozó yo', che'é se mozó uun me so', ne ne rihuun rá so' sese quiran' nij matzinj sayuun ma'.

<sup>14</sup> “Ne xa' 'unj, tzaj ne sjj tumé sa' man nij matzinj mej, ne ne'enj man nij matzinj noco' manj, ne ne'en nij xo' manj ei.

<sup>15</sup> Dan me se ne'en Réj Diose manj, ne ne'enj man Réj, ne ase vaa 'unj ga Réj ro', danj vaa daán 'unj matzinj gaj chuguanj. Ne a'neé nimanj cavij che'é nij xo' adonj.

<sup>16</sup> Ne vaa doj daán 'unj matzinj uún, tzaj ne nuvi' nij xo' rej nuu matzinj nihánj ma'. Ne vaa che'é ca'na' yo'ó matzinj yo' uún, qui'yáj, ne cunq nij xo' se-nanaj, gaa ne cunuu chre' nij xo' ga matzinj nihánj, gaa ne cutumé 'unj man cunudanj nij xo' adonj.

<sup>17</sup> “Dan me se ca'neé nimanj cavij, ne cunuu i'na' uún 'unj, ne che'é dan 'ee rá Réj Diose manj adonj.

<sup>18</sup> Taj vaj sí 'yaj fuerzá manj cavij ma'. 'O se ma'anj a'neé nimanj cavij nanj á. Dan me se no xcúnj ca'nej nimanj cavij, ne no xcúnj cunuu i'na' uún 'unj adonj. Nihánj me suun ca'ne' Réj Diose rihanj nanj adonj —taj Jesucristó rihaan nij so' a.

<sup>19</sup> Gaa ne cuxra' ta'aj uún nij sí uun chij rihaan nij yuvij israelitá man nij so', gaa cuno nij so' nana yo' a.

<sup>20</sup> Dan me se ta'aj nij so' cataj:

—Nuu nana chree nimán so', ne snúu so' nanj á. Taj che'é cunq soj se-nana so' ma' —taj ta'aj nij so' rihaan tuvi' nij so', ni'yaj nij so' man Jesucristó a.

<sup>21</sup> Gaa ne yo'ó ta'aj nij so' cataj:

—Nuveé nana chree nuú nimán sí nihánj a ma'. 'O se se guun nucuaj sí nuu nana chree nimán nacuchra' so' rihaan sí tuchrii a ma' —taj yo'ó ta'aj nij so' a.

*Nana nihánj taj xna'anj se vaa guun rá nij sí uun chij rihaan nij yuvij israelitá go' nij so' yahij man Jesucristó a*

<sup>22</sup> Güii dan me se canuú cha'anj che'é nuvií nocqo chuman' Jerusalén, ne yavii ayuu yu've' me yo' a.

<sup>23</sup> Gaa ne chéé Jesucristó rá chingá cu'naj Corredor Salomón rá nuvíi nocoo yo',

<sup>24</sup> ne che'é dan cunuu chre' nij síi uun chij rihaan nij yuvií israelitá, ne yo' o tucuachriin nij so' nu' anicaj man Jesucristó a. Gaa ne cataj nij so':

—Ndaa aman me quisij güii guun ya ya rá núj ni'yaj núj mán so' ga. 'O se cataj xna'anj ya ya so' rihaan núj sese ya sij ca'neé Diose tñanii man yuvií rihaan sayuun me ya so' ei —taj nij so' rihaan Jesucristó a.

<sup>25</sup> Gaa ne cataj Jesucristó rihaan nij so' a:

—Aj cataj xna'anj 'unj rihaan soj, tzaj ne na'vej rá soj cuchuman rá soj a ma'. Ne xa' suun sa' nocoo 'yáá 'unj che'é Réj Diose, tzaj ne ma'an nij suun sa' nocoo yo' taj xna'anj daj sij mej adonj.

<sup>26</sup> Tzaj ne ne cuchuman rá soj ni'yaj soj manj man asanj. 'O se nuveé daan 'unj matzinj me soj a ma'.

<sup>27</sup> Xa' daán 'unj matzinj, tzaj ne uno nij xo' se-nanaj, ne ne'enj man nij xo', ne nocoo' nij xo' xcoj a.

<sup>28</sup> Gaa ne cunuu i'na' nij xo' cayáán nij xo' ga Diose nu' cavii nu' ca'anj, qui'yáá 'unj, ne daj chihaa míj se cavi' nij xo' a ma'. Ne taj vaj síi ca'nee man nij xo' ra'aj ma'.

<sup>29</sup> 'O se Réj Diose me síi rqué man nij xo' rihanj, ne sij uun chij ya me so' rihaan cunudanj, ne che'é dan taj vaj síi guun nucaj ca'nee man nij xo' ra' a Réj Diose a ma'.

<sup>30</sup> 'O se ase vaa orún' yuvií vaa 'unj ga Réj adonj —taj Jesucristó rihaan nij so' a.

<sup>31</sup> Gaa ne quita'aa uún nij síi uun chij rihaan nij yuvií israelitá yahij go' nij so' man Jesucristó a.

<sup>32</sup> Gaa ne cataj Jesucristó rihaan nij so' a:

—Quisij qui'yaj uxraj suun sa' nocoo quene'en nij soj, ne guun nucaj qui'yáá danj, qui'yaj Réj Diose, ne che'é me suun sa' nocoo me rá soj go' soj yahij manj ga —taj Jesucristó, xna'anj so' man nij so' a.

<sup>33</sup> Gaa ne cataj nij síi uun chij rihaan nij yuvií israelitá:

—Se go' núj yahij mán so' che'é suun sa' nocoo qui'yáá so' a ma'. 'O se go' núj yahij mán so' che'é se ca'mii so' nana nij che'é Diose adonj. Dan me se nanj yuvií uun mé so', ne me che'é cataj so' se vaa Diose mé so' ga —taj nij so' rihaan Jesucristó a.

<sup>34</sup> Gaa ne cataj Jesucristó:

—Maan se vaa nana no rihaan yanj no tucuáán nocoo' soj, ne nana ca'mii ma'an Diose me nana yo', ne dan me se cataj Diose: “'Unj me síi cataj xna'anj se vaa diose me soj á”, taj Diose rihaan nij síi ca'mii se-nana so' gaa naá a.

<sup>35</sup> Dan me se sese ma'an Diose cataj se vaa nij síi ca'mii se-nana so' me ma'an uún diose, gaa ne daj chihaa míj se ca'vee tanáj xco ní' se-nana Diose nana no rihaan yanj gaa ma'.

<sup>36</sup> Ne veé dan me ca'ne' Diose suun guee rihanj, ne ca'neé so' manj rihaan chumií nihánj ne maan che'é se cataj 'unj se vaa ta'nij Diose mej, che'é dan cataj soj se vaa nana nij ca'mij che'é Diose á. Taj che'é ca'mii nij soj danj, raj ma'.

<sup>37</sup> 'O se sese ne 'yaj suun 'unj se-suun Réj Diose, ne ca'vee ca'ne' rá soj ga suun amán rá ni'yaj manj chuguanj.

<sup>38</sup> Tzaj ne sese ya 'yaj suun 'unj se-suun Réj Diose, ne ca'vee se ne amán rá soj ni'yaj soj man ma'anj, tzaj ne vaa che'é cuchuman rá soj ni'yaj soj

man nij suun sa' nocqo qui'yáj ei. Ndaa síj, gaa ne xcaj soj cuentá, gaa ne yo'o quene'en soj se vaa ne Réj Diose gaj, ne nej ga Réj Diose uún adonj —taj Jesucristó a.

<sup>39</sup> Che'é dan guun rá uún nij so' quita'aa nij so' man so' a. Tzaj ne quinani so' rihaan nij so' a.

*Nana nihánj taj xna'anj daj guun rá nij síi cuchumán rá ni'yaj man Jesucristó a*

<sup>40</sup> Gaa ne cavii uún Jesucristó ca'anj so' rej rnej tu'va chraá cu'naj Jordán ndaa rej cuta' ne síi cu'naj Juan man yuvi gaa chée so' a. Gaa ne guun raan so' rej yo' a.

<sup>41</sup> Gaa ne cuchi' uxrá yuvi rihaan so', ne cataj nij yuvi se vaa síi cu'naj Juan síi cuta' ne man yuvi me se a doj suun sa' nocqo ne qui'yaj so', tzaj ne quisíj ya nu' nana cataj xna'anj síi cu'naj Juan che'é Jesucristó a. Daj cataj nij yuvi, ni'yaj nij yuvi nij suun sa' nocqo qui'yaj Jesucristó a.

<sup>42</sup> Gaa ne cuchumán rá que'ee nij so' ni'yaj nij so' man Jesucristó gaa vaj so' rej yo' a.

## 11

*Nana nihánj taj xna'anj che'é se vaa guun gaa cavi' síi cu'naj Lázaro gaa ne cunuu i'na' uún so', qui'yaj Jesucristó a*

<sup>1</sup> Dan me se vaa 'o síi ran', ne síi cu'naj Lázaro me so', ne síi ne chuman' Betania me so' a. Ne chuman' Betania yo' me se chiháan chana cu'naj Mariá ga chu'vij Mariá chana cu'naj Marta me chuman' Betania yo' a.

<sup>2</sup> Ne chana cu'naj Mariá yo' me se no' me chana caxríj casté gun' daj tacóo síi 'nij ra'a man ní', ne yuvé raaj ma'an no' tanacoq no' tacóo so' a. Dan me se ra'vij no' me síi cu'naj Lázaro síi ran' yo' a.

<sup>3</sup> Dan me se ca'née roj ra'vij síi cu'naj Lázaro yo' nana rihaan Jesucristó, cataj roj no': “Xa' síi 'ee rá so' man, tzaj ne ran' so', a Señor”, vaa nana ca'née roj no' rihaan Jesucristó a.

<sup>4</sup> Dan me se cuchi' nana yo' rihaan Jesucristó, gaa ne cataj so':

—Nuveé che'e rej yo'o cavi' síi cu'naj Lázaro me quiran' so' a ma'. 'O se quiran' so' che'é rej ve'é doj xcaj yuvi cuentá che'é Diose adonj. Dan me se ve'é doj xcaj yuvi cuentá che'é ma'anj ta'nij Diose, che'é se quiran' síi cu'naj Lázaro yo' nanj adonj —taj Jesucristó rihaan nij síi nata' nana yo' rihaan so' a.

<sup>5</sup> Ne Jesucristó me se 'ee ndo'o rá Jesucristó man chana cu'naj Marta do', man chu'vij no' chana cu'naj Mariá do', man síi cu'naj Lázaro do' a.

<sup>6</sup> Dan me se gaa cuno Jesucristó nana se vaa ran' síi cu'naj Lázaro, ne ne cavi' ra'yanj so' ca'anj so' a ma'. 'O se guun raan so' yavíj güii rej vaj so' a.

<sup>7</sup> Dan me se cachén yavíj güii yo', gaa ne cataj Jesucristó rihaan nij síi tucu'yón se-nana so' a:

—Cavi' ní' ca'anj uún ní' estadó Judea ei —taj so' rihaan nij so' a.

<sup>8</sup> Gaa ne cataj nij síi tucu'yón se-nana so' rihaan so' a:

—Cuano nihánj me se guun ndo'o rá nij síi uun chij rihaan nij yuvi israelitá go' nij so' yahij mán so' ne cavi' so' á. Se guun ca'anj so' yo' ma' —taj nij so' rihaan Jesucristó a.

<sup>9</sup> Gaa ne cataj Jesucristó:

—Ne'en soj se vaa chuvij orá ranga' rihaan chumij nihánj 'o 'o güii, ne dan me se sese cachee yo'q so' rej ranga', ne se naxru' so' ma'. 'Q se curuvi' sa' rihaan so', qui'yaj güii chuguun rihaan chumij nihánj adonj.

<sup>10</sup> Tzaj ne sese cachee yo'q so' rej nij, ne naxru' so', che'é se taj vaj ya'an chuguun nicaj so' adonj —taj Jesucristó a.

<sup>11</sup> Dan me se quisij ca'mii so' danj, gaa ne cataj uún so'— Ne xa' tuvi' ní' síí cu'naj Lázaro, tzaj ne otoj so' ei. Tzaj ne ca'anj yaj, che'é rej narií 'unj nej rihaan so' a —taj Jesucristó rihaan nij síí tucu'yón se-nana so' a.

<sup>12</sup> Che'é dan cataj nij síí tucu'yón se-nana so' rihaan so':

—'Q se sese otoj so', ne cunu sa' ma'an so', Señor —taj nij so' rihaan Jesucristó a.

<sup>13</sup> Dan me se nana dan ca'mii Jesucristó che'é se aj cavi' síí cu'naj Lázaro, tzaj ne nij síí tucu'yón se-nana Jesucristó me se guun rá nij so' se vaa ya ya otoj uun Lázaro, taj Jesucristó, rá nij so' a.

<sup>14</sup> Che'é dan ca'mii nica Jesucristó rihaan nij so', cataj so':

—Aj cavi' síí cu'naj Lázaro,

<sup>15</sup> ne guun niha' rá 'unj se vaa nuví' 'unj ne ga so' gaa cavi' so' a. 'Q se che'é se cavi' so' ro', che'é dan cuchuman doj rá soj ni'yaj soj manj adonj. Tzaj ne cavi' ní' ca'anj ní' rej naj so' ei —taj Jesucristó rihaan nij so' a.

<sup>16</sup> Che'é dan cataj síí cu'naj Tomás Dídimó rihaan yo'ó nij síí tucu'yón se-nana Jesucristó:

—Cavi' ní' ca'anj ní' ga so', gaa ne cavi' ní' ga so' a —taj so' ni'yaj so' man Jesucristó a.

<sup>17</sup> Veé dan me se cuchi' Jesucristó chuman' Betania, gaa ne cataj xna'anj nii rihaan so' se vaa aj quisij ca'anj güii cachin' nii man síí cu'naj Lázaro rque yu'uj yuvej a.

<sup>18</sup> Dan me se nichrun' naj chuman' Betania ga chuman' Jerusalén, ne orún' va'naj kilómetro naj chuman' Jerusalén yo' a.

<sup>19</sup> Ne aj cavii que'ee nij yuvij israelitá chuman' Jerusalén, ne cuchi' nij so' rihaan chana cu'naj Marta do', rihaan chana cu'naj Mariá do', che'é rej se nanó rá roj no', che'é se aj cavi' ra'vij roj no' a.

<sup>20</sup> Dan me se gaa cuno chana cu'naj Marta se vaa ca'na' Jesucristó, ne curihanj no' nari' tuvi' no' ga Jesucristó, tzaj ne chana cu'naj Mariá me se quínaj no' rá ve' yo' a.

<sup>21</sup> Gaa ne cataj chana cu'naj Marta rihaan Jesucristó a:

—Sese cané so' nihánj, ne ne cavi' ra'vij asuun saj, man Señor.

<sup>22</sup> Tzaj ne cuano nihánj me se ne'enj se vaa me ma'an rasuun cachin' so' rihaan Diose, ne qui'yaj so' nanj á —taj chana cu'naj Marta rihaan Jesucristó a.

<sup>23</sup> Gaa ne cataj Jesucristó rihaan no' a:

—Cunu i'na' uún ra'vij so' —taj so' rihaan no' a.

<sup>24</sup> Gaa ne cataj chana cu'naj Marta rihaan so':

—Aj ne'enj se vaa asa' quisij güii ca'anj ni'ya chumij nihánj, ne cunu i'na' uún so' ga yo'ó nij yuvij cunu i'na' uún ei —taj no' rihaan Jesucristó a.

<sup>25</sup> Gaa ne cataj Jesucristó rihaan no' a:

—Xa' 'unj, tzaj ne sij 'yaj nuu i'na' uún yuvij mej, ne 'unj me síí qui'yaj gaa i'na' yuvij cayan yuvij ga Diose nu' cavi' nu' ca'anj adonj. Ne xa' síí amán rá ni'yaj manj, tzaj ne ca'vee se cavi' so', tzaj ne yo'q gaa i'na' nimán so' chuguanj.



26 Che'é se amán rá so' ni'yaj so' manj, ne che'é dan vaa i'ná' nimán so', ne daj chihaa mij se cavi' nimán so' a ma'. Amán rá so' nana nihánj na' —taj Jesucristó, xná'anj so' man chana cu'naj Marta yo' a.

27 Gaa ne cataj no':

—Chumán raj, Señor. Dan me se aj cuchumán raj se vaa sij ca'née Diose tinanii man núj rihaan sayuun mé so', ne ta'nij Diose mé so', ne ca'ná' so' rihaan chumiñ nihánj a —taj no' rihaan Jesucristó a.

28 Dan me se quisij ca'mii no' danj, gaa ne ca'anj no', ne canacúun yuve no' man chu'vij no' chana cu'naj Mariá, cataj no':

—Aj ca'na' maestró, ne nacúun so' mán so' a —taj no' rihaan chana cu'naj Mariá a.

29 Ne gaa cuno chana cu'naj Mariá nana yo', gaa ne ra'yanj cavii no', ne ca'anj no' rej nicun' Jesucristó a.

30 Dan me se ataa catuu Jesucristó rque chuman' yo', ne nicun' so' rej nari' tuvi' chana cu'naj Marta ga so' a.

31 Dan me se nij yuviñ israelitá yuviñ cane rá ve' nanó cuentó ga chana cu'naj Mariá me se quene'en nij so' se vaa ra'yanj canicun' no' ne curihanj no' xe', ne canoco' nij so' xcó no', ne curihanj nij so' xe' a. 'Q se guun rá nij so' se vaa ca'anj chana cu'naj Mariá rihaan yu'uj yuvej che'é rej ta'vee no', rá nij so' a.

32 Dan me se gaa cuhi' chana cu'naj Mariá rej nicun' Jesucristó, gaa ne quene'en no' man so', gaa ne canicun' ruj no' rihaan Jesucristó, gaa ne cataj no':

—Sese cané so' nihánj, ne ne cavi' ra'vij asuun saj, man Señor —taj no' rihaan Jesucristó a.

33 Dan me se quene'en Jesucristó se vaa ta'vee no', se vaa ta'vee nij yuviñ israelitá ca'na' ga no' do', gaa ne quinanó ndo'o rá so',

34 gaa ne cataj so':

—Me rej cachin' soj man so' ga —taj so', xná'anj so' man nij so' a.

Gaa ne cataj nij so' rihaan so' a:

—Ca'anj ní', gaa ne quene'én so' á —taj nij so' rihaan so' a.

35 Gaa ne ta'vee Jesucristó a.

36 Che'é dan cataj nij yuviñ israelitá rihaan tuvi' nij so' a:

—Ni'yaj soj ei. 'Q se ta'vee so', che'é se ee uxrá rá so' ni'yaj so' man sí cavi' yo' a —taj nij yuviñ ni'yaj nij yuviñ man Jesucristó a.

37 Gaa ne ta'aj nij yuviñ cataj:

—'Q se sij ne'en nacuchra' rihaan sí tuchriñ me sí nihánj á. Che'é dan uun nucuaj so' naqui'yaj sa' so' man sí cu'naj Lázaro, ne sese cane so' nihánj, ne ne cavi' sí cu'naj Lázaro asuun saj ma' —taj ta'aj nij yuviñ yo' a.

38 Dan me se quinanó uun rá Jesucristó, ne cuhi' so' rej cachin' nii man sí cu'naj Lázaro yo' a. Dan me se yu'uj yuvej me yo', ne caráan yahij rihaan yu'uj yo' a.

39 Gaa ne cataj Jesucristó:

—Naxuun soj yahij rihaan yu'uj á —taj Jesucristó a.

Gaa ne cataj ra'vij sí cavi' chana cu'naj Marta rihaan so':

—Tzaj ne gun' ri'yuj man so' yaj, Señor. 'Q se quisij ca'anj ya güii naj so' nanj adonj —taj no' rihaan so' a.

40 Gaa ne cataj Jesucristó rihaan no' a:

—Aj cataj xna'anj 'unj rihaan so' se vaa sese cuchuman rá so' ni'yaj so' manj, gaa ne quene'én so' se vaa nucuaj uxrá Diose á —taj Jesucristó rihaan chana cu'naj Marta yo' a.

<sup>41</sup> Che'é dan naxuun nij so' yahij yo' a. Gaa ne naxcäj Jesucristó rihaan so', ne cataj so':

—Guun ni'yaj ní' se vaa cunó so' se-nanaj, Ataj Chij.

<sup>42</sup> Aj ne'enj se vaa niganj unó so' se-nanaj, tzaj ne a'mij nana nihánj che'é rej cunó nij yuvij nicun' nihánj gaj a. 'Q se me raj cuchuman rá nij yuvij se vaa so' me sí ca'née manj rihaan chumij nihánj nanj adonj —taj Jesucristó, cachín ni'yaj so' rihaan Diose a.

<sup>43</sup> Quisij cataj so' danj, gaa ne nucuaj ndo'o caguáj so', cataj so':

—Lázaro. Caviij so' ca'na' so' nihánj ei —taj so', caguáj so' rihaan sí cu'naj Lázaro yo' a.

<sup>44</sup> Gaa ne curihañj sí cavi' yo' rque yu'uj, ne nacutáj yatzij nu' man so', ne caráan yatzij rihaan so' uún a. Gaa ne cataj Jesucristó rihaan nij yuvij a:

—Nache soj man so', ne cachee so' ca'anj so' á —taj Jesucristó rihaan nij yuvij a.

*Nana nihánj taj xna'anj se vaa guun ndo'o rá nij xrej atä suun nocoo doj do', nij sí fariseo do', cavi' Jesucristó a*

<sup>45</sup> Dan me se ca'na' nij yuvij israelitá ga chana cu'naj Mariá yo', ne quene'en nij so' daj qui'yaj Jesucristó a. Che'é dan cuchuman rá que'ee nij yuvij se vaa sí ca'née Diose me Jesucristó a.

<sup>46</sup> Tzaj ne cavij yo'ó ta'aj nij so' ca'anj nij so' rihaan nij sí fariseo, gaa ne cataj xna'anj nij so' rihaan nij sí fariseo nu' se vaa qui'yaj Jesucristó a.

<sup>47</sup> Che'é dan cunuu chre' nij xrej atä suun nocoo doj do', nij sí fariseo do', qui'yaj nij so' juntá, gaa ne cataj nij so':

—Daj qui'yaj ní', rá soj ga. 'Q se xa' snó'o nihánj, tzaj ne 'yaj suun uxrá so' suun sa' nocoo adonj.

<sup>48</sup> Sese yo'ó tanáj ní' man so' qui'yaj so' danj, ne cuchuman rá cunudanj nij yuvij ni'yaj nij yuvij man so', gaa ne ca'na' nij tanuu 'yaj suun rihaan gobiernó man Romá, gaa ne tirij' nij tanuu man ní' do', man chiháan ní' do', man nu' tuvi' ní' do' á —taj nij so' rihaan tuvi' nij so' a.

<sup>49</sup> Gaa ne ca'mii yo'ó tuvi' nij so', sí cu'naj Caifás, ne so' me xrej atä suun nocoo doj yo' yo' a. Dan me se cataj so' rihaan nij so' a:

—Ne ne'en uxrá nij soj a ma'.

<sup>50</sup> 'Q se ataa xcäj soj cuentá se vaa xa' soj, tzaj ne cavij sa' doj soj sese cavi' grún' snó'o che'é nij yuvij, gaa ne veé danj me se quirí' nu' ní' sij israelitá ma' —taj sí cu'naj Caifás rihaan yo'ó nij so' a.

<sup>51</sup> Dan me se nuveé inañ nana cavij raä ma'an sí cu'naj Caifás me nana nihánj ma'. 'Q se xrej atä suun nocoo doj me so' yo' yo', ne che'é dan ma'an Diose me sí rqué nana ca'mii so', ne che'é dan me ya vaa se-nana so' gaa cataj so' se vaa cavi' Jesucristó che'é taran' nij yuvij israelitá yo' a.

<sup>52</sup> Ne nuveé inañ che'é nij yuvij israelitá me cavi' Jesucristó ma'. 'Q se cavi' so' che'é rej naqui'yaj chre' so' man cunudanj nij ta'níí Diose nij sí man nu' rihaan chumij nihánj, gaa ne cunuu tuvi' cunudanj nij so' adonj.

<sup>53</sup> Dan me se mañ güi dan me se guun che'e nij sí fariseo do', nij xrej atä suun nocoo doj do', nuchruj raä nij so' daj qui'yaj nij so', gaa ne cavi' Jesucristó a.

<sup>54</sup> Che'é dan me ne ca'vee cachee rangá' so' estadó Judea ma'. Gaa ne cavii so' ca'anj so' tu'va rej taj vaj yuvii mán, gaa ne catúy so' yo'o chuman' cu'naj Efraín, gaa ne caran' so' chuman' yo' ga nij sí tucu'yón se-nana so' a.

<sup>55</sup> Dan me se daj doj quisij cha'anj pascuá cha'anj navij rá nij yuvii israelitá, ne che'é dan cavii nij yuvii ne chuman' le'ej, ne ca'anj nij so' chuman' Jerusalén, che'é rej qui'yaj nij so' tucuáan nocó' nij so' ne cunuú guee nij so' rihaan Dióse a.

<sup>56</sup> Gaa ne nano' ndo'o nij yuvii man Jesucristó a. Dan me se canicun' nij yuvii rá nuví nocoo, ne xná'anj nij yuvii man tuvi' yuvii, cataj nij yuvii:

—Daj uun rá soj ga. Ca'na' so' rej canuú cha'anj, rá soj na' —cataj nij yuvii, xná'anj nij yuvii man tuvi' yuvii yo' a.

<sup>57</sup> Ne xa' nij xrej atá suun nocoo doj do', nij sí fariseo do', tzaj ne cataj xna'anj nij so' se vaa sese quene'en nij yuvii me rej vaj Jesucristó, gaa ne cataj xna'anj nij yuvii rihaan ma'an nij so' a. 'O se guun rá nij so' quita'aa nij so' man Jesucristó adonj.

## 12

*Nana nihánj taj xna'anj se vaa caxríj chana cu'naj Mariá casté tacóo Jesucristó a*

<sup>1</sup> Dan me se achiin yatan' güii canuú cha'anj pascuá, ne ca'anj Jesucristó chuman' Betania a. Chuman' Betania ro', ne sí cu'naj Lázaro sí cunuú i'na' uún qui'yaj Jesucristó a.

<sup>2</sup> Dan me se qui'yaj chuvii nii cha ni'yánj Jesucristó, ne chana cu'naj Marta me chana rque chá ni'yánj nij sí 'na', ne ne sí cu'naj Lázaro rihaan mesá ga Jesucristó gaa chá so' chraa a.

<sup>3</sup> Dan me se nicaj chana cu'naj Mariá yo'o aga' xij casté gun' daj tu'vee ndo'o, ne caxríj no' tacóo Jesucristó, gaa ne yuvé raá ma'an no' tanacoo no' tacóo Jesucristó a. Gaa ne nasij toto' nu' rá ve' yo', qui'yaj casté caxríj chana cu'naj Mariá tacóo Jesucristó a.

<sup>4</sup> Dan me se ne sí cu'naj Judas Iscariote, ne yo'o sí tucu'yón se-nana Jesucristó me so', ne sí tacuachén man Jesucristó rihaan nij sí taj ri'yun man Jesucristó me so' a. Dan me se cataj so':

<sup>5</sup> —Me che'é ne cutu'vee nii casté nihánj ne quirí' uxrá nii sa'anj ga. 'O se ase vaa sa'anj 'yaj canaán yuvii rque 'o yo' nó casté nihánj, ne vaa che'é rque ní' sa'anj yo' rihaan nij sí nique nanj á —taj sí cu'naj Judas yo' a.

<sup>6</sup> Dan me se danj tu'va ma'an sí cu'naj Judas yo', tzaj ne a doj ne nanó rá Judas yo' che'é nij sí nique a ma'. Maan se sij tumé se-chrunj nij tuvi' Jesucristó chrúun sa'anj me so', tzaj ne sí ituu me so', ne qui'yaj ituu ndo'o so' sa'anj man rque chrúun yo', ne che'é dan ca'mii so' danj nanj ei.

<sup>7</sup> Dan me se cataj Jesucristó rihaan so' a:

—Ca'ne' rá so' qui'yaj ma'an no' ei. Che'é yan quisij güii cachin' nii manj ro', che'é dan caxríj no' casté tu'vee ndo'o manj nanj á.

<sup>8</sup> Xa' nij sí nique, tzaj ne nu' güii mán nij sí nique ga soj, ne xa' ma'anj, tzaj ne se canicún' 'unj rihaan soj nu' cavii nu' ca'anj ni'yaj soj ma' —taj Jesucristó rihaan sí cu'naj Judas yo' a.

*Nana nihánj taj xna'anj se vaa guun rá nij xrej atá suun nocoo doj se vaa cavi' uún sí cu'naj Lázaro yo' a*

<sup>9</sup> Dan me se xcaj ndo'o nij yuvij israelitá cuentá se vaa ne Jesucristó chuman' Betania, ne che'é dan ca'anj uxrá nij so' chuman' yo' a. Dan me se nuveé inanj che'é ma'an Jesucristó me ca'anj nij so' ma'. 'Q se me rá nij so' quene'en nij so' man sí cu'naj Lázaro sí cunuu i'ná' uún qui'yaj Jesucristó a.

<sup>10</sup> Gaa ne guun 'o rá nij xrej atá suun nocoo doj se vaa cavij' sí cu'naj Lázaro uún, qui'yaj nij so' a.

<sup>11</sup> 'Q se che'é sí cu'naj Lázaro me se cavii ndo'o nij yuvij israelitá canoco' nij so' man Jesucristó, ne cuchumán rá nij yuvij israelitá ni'yaj nij so' man Jesucristó a.

*Nana nihánj taj xna'anj daj qui'yaj nij yuvij gaa canicaj uún Jesucristó ca'anj so' chuman' Jerusalén a*

<sup>12</sup> Gaa ne güii a'yuj me se cuchí' nana rihaan taran' nij yuvij israelitá navij rá cha'anj pascuá se vaa catuu Jesucristó chuman' Jerusalén a.

<sup>13</sup> Che'é dan me cuta nij yuvij ra' a chruun yuun, ne curihanj nij yuvij tu'va chuman' narj' tuvi' nij so' ga Jesucristó a. Gaa ne caguáj nij yuvij, cataj nij yuvij:

—Caraa guee ní' rihaan Diose ei. Cunaj ndo'o vaa ca'na' sí ca'neé sí 'nij ra'a man ní' adonj. Sí uun chij rihaan ní' sij israelitá me so' chuguanj —taj nij yuvij, caguáj nij yuvij a.

<sup>14</sup> Gaa ne nari' Jesucristó yo'o burró, gaa ne cavii so' xráá burró a. Dan me se cuyaán qui'yaj so' ga nana nihánj nana no rihaan danj Diose a:

<sup>15</sup> “Soj sij man chuman' Jerusalén me se se cuchu'vi' soj ma'. 'Q se xcaj soj cuentá se vaa 'na' sí guun chij rihaan soj nanj adonj. Dan me se sí nicá' nimán me so', ne táá so' xráá burró le'ej ta'níi xcuu burró chana adonj”, taj nana no rihaan danj Diose yo' a.

<sup>16</sup> Dan me se nij sí tucu'yón se-nana Jesucristó me se gaa güii catúj Jesucristó chuman' Jerusalén, ne ne xcaj nij so' cuentá, ne ne caxrii rá nij so' se vaa qui'yaj so' ndaa vaa cataj nana no rihaan yanj yo' ma'. Tzaj ne ndaa quisij cavii sa' Jesucristó qui'yaj Diose, gaa ne ninuj rá nij so' nana no rihaan danj Diose, ne ninuj rá nij so' se vaa guun che'é Jesucristó a.

<sup>17</sup> Dan me se nij yuvij cumán ga Jesucristó me se cataj xna'anj nij so' nu' se vaa guun gaa canacúún Jesucristó man sí cu'naj Lázaro se vaa curihanj so' yu'uj yuvej ne cunuu i'ná' uún ya sí cu'naj Lázaro qui'yaj Jesucristó a.

<sup>18</sup> Gaa ne che'é se cuno nij yuvij man chuman' Jerusalén se vaa qui'yaj so' suun sa' nocoo yo', gaa ne che'é dan ca'na' narj' nij so' man Jesucristó a.

<sup>19</sup> Che'é dan cataj nij sí fariseo rihaan tuvi' nij so' a:

—Ni'yaj soj ei. 'Q se ne qui'yaj canaán uxrá ní', qui'yaj soj a ma'. 'Q se veé danj ya canoco' cunudanj nij yuvij man rihaan chumij se-nana so' nanj adonj —taj nij so' rihaan tuvi' nij so' ni'yaj nij so' man Jesucristó a.

*Nana nihánj taj xna'anj se vaa ca'na' doj sí a'mii xna'ánj griego ca'mii nij so' ga Jesucristó a*

<sup>20</sup> Dan me se mán ta'aj nij sí a'mii xna'ánj griego, ne sij cuchí' chuman' Jerusalén gaa anuú cha'anj pascuá me nij so', ne cuchí' nij so' na'vij nij so' rihaan Diose a.

<sup>21</sup> Dan me se cuchí' nij so' rihaan sí cu'naj Felipé sí cavii chuman' Betsaida chuman' naj estadó Galilea, gaa ne xná'anj nij so' man so', ne cataj nij so':

—Me rá núj ca'mii núj doj ga Jesucristó, señor —taj nij so' rihaan sí cu'naj Felipé yo' a.

22 Gaa ne ca'anj sí cu'naj Felipé cataj xna'anj so' rihaan sí cu'naj Andrés se vaa cataj nij sí a'mii xna'anj griego yo' rihaan so' a. Gaa ne ca'anj cataj xna'anj roj so' rihaan Jesucristó, ne cataj roj so' rihaan Jesucristó se vaa ca'na' nij sí a'mii xna'anj griego ne me rá nij so' ca'mii nij so' ga Jesucristó a.

23 Gaa ne cataj Jesucristó rihaan roj so' a:

—'Unj sij ca'néé Diose nıcaj yu'unj man yuviı, tzaj ne cuano nihánj me se quisıj güiı cavıı sa' 'unj, ne guun chıj 'unj, qui'yaj Diose ei.

24 Ya ya cataj xna'anj 'unj rihaan soj cuano se vaa ase vaa 'núú vaa ní', ne sese se quiniı 'núú yaan rihaan yo'óo ne cavi' ma'an 'núú yaan yo', ne quinavıj uun 'núú yaan, tzaj ne sese cavi' 'núú yaan yo', ne quisıj que'ee doj 'núú qui'yaj yo' nanj adonj.

25 Dan me se xa' sí me rá gaa i'na' rihaan chumiı nihánj, tzaj ne yo'ó cavi' so', ne xa' sí a'vej rá cavi' rihaan chumiı nihánj che'é se me so' sí noco' manj, tzaj ne yo'ó gaa i'na' nimán so' nu' caviı nu' ca'anj adonj.

26 Che'é dan me sese vaa 'o so' nuu rihanj 'yaj suun rihanj, ne canoco' so' manj cuaj ei. Ne me rej ma'an canıcun' ma'anj ro', maan dan canıcun' sí nuu rihanj uun nanj ei. Gaa ne caviı sa' uxrá sí 'yaj suun rihanj, qui'yaj Réj adonj.

27 "Cuanó nihánj me se nanó ndo'o raj chuguanj. Ne daj qui'yáj a ranj a. Cachınj ni'yáj rihaan Réj se vaa tinaniı so' manj rihaan sayuun quıranj cuano, rá soj na'. Taj che'é qui'yáj danj ma'. Che'e yan quırán' 'unj sayuun ca'naj adonj —taj Jesucristó rihaan roj so' a.

28 Gaa ne cachıın ni'yaj Jesucristó rihaan Diose, cataj so':

—Caviı sa' doj ma'an so' rihaan chumiı nihánj, qui'yáá so', Ataj —taj Jesucristó, cachıın ni'yaj so' a.

Gaa ne caviı 'o nana rej xta' ca'mii Diose cuno nij so', ne nana caviı rej xta' me:

—Aj caviı sa' 'unj, qui'yáj, tzaj ne caviı sa' 'unj doj, qui'yáj adonj —taj nana yo' nana caviı rej xta' ca'mii Diose cuno nij so' a.

29 Dan me se nicun' uxrá yuviı ga Jesucristó, ne cuno nij so' nana yo', ne cataj nij so' se vaa caguáj tu'vii rej xta' a. Ne yo'ó ta'aj nij so' cataj se vaa ca'mii yo'ó se-mozó Diose nana yo' rihaan Jesucristó a.

30 Gaa ne cataj Jesucristó rihaan nij yuviı:

—Nuveé che'e orún' 'unj me ca'mii Diose nana yo' ma'. 'O se ca'mii Diose nana yo', che'é rej xcıj soj cuentá ei.

31 Che'é se vaa quıranj cuano ca'ne' Diose cacun' che'é nij yuviı man rihaan chumiı nihánj, ne quiriı yanıj Diose man sí chree sí uun chıj rihaan chumiı nihánj chuguanj.

32 Gaa ne asa' quisıj naxcaj nii manj rihaan chumiı nihánj cachron nii manj rihaan rcutze, gaa ne guun rá cunudanj nij yuviı canoco' nij yuviı manj, qui'yáj adonj —taj Jesucristó rihaan nij yuviı a.

33 Ne ma'an nana nihánj nana ca'mii Jesucristó ro', taj xna'anj daj qui'yaj nii man so' ne cavi' so' a.

34 Gaa ne cataj nij yuviı rihaan Jesucristó a:

—Aj ne'en nú nana no rihaan danj Diose se vaa sí ca'nej Diose tinaniı man yuviı rihaan sayuun me se sij cayáan nu' caviı nu' ca'anj me so' a. Ne me che'é cataj so' nihánj se vaa naxcaj nii man sí ca'néé Diose nıcaj yu'unj man yuviı



46 Xa' ma'anj, tzaj ne chuguun ya'an rihaan chumiij nihánj qui'yáj gaa ca'naj rihaan chumiij nihánj, che'é rej se quináj nij sí amán rá ni'yaj manj rej rmi' man chuguanj.

47 “Ne ca'vee se se ca'vej rá yo'o so' cunq so' se-nanaj nana catúj xréé so', tzaj ne nuveé 'unj me sí cutá' cacun' xráá so' a ma'. 'O se nuveé che'e se cutá' 'unj cacun' xráá yuviij me ca'ná' 'unj rihaan chumiij nihánj ma'. Tananj ca'ná' 'unj rihaan chumiij nihánj che'é rej tinanii 'unj man nij yuviij man man rihaan chumiij nihánj rihaan chrej chi'ii uun chij nimán nij so' adonj.

48 Dan me se sí tanáj xco manj ne na'vej rá cunq se-nanaj me se quitaj cacun' xráá so' ei. 'O se che'é se ne cunq so' nana ca'mij rihaan so' ro', che'é dan quitaj cacun' xráá so' asa' quisij güii ca'ne' Diose cacun' che'é yuviij chuguanj.

49 Ne 'unj nihánj me se nuveé inanj nana cavii raj me nana ca'mij ma'. 'O se Réj sí ca'néé manj me sí cataj xna'anj rihanj daj ca'mij ei.

50 Ne aj ne'enj se vaa sese cunq ní' se vaa cataj xna'anj so' rihaan ní', ne cayáán ní' gá so' nu' cavii nu' ca'anj a. Che'é dan nana a'mij me se ma'an nana ca'mii Réj rihanj me nij nana a'mij adonj. —Danj cataj Jesucristó a.

## 13

*Nana nihánj taj xna'anj se vaa na'nu' Jesucristó tacóó nij sí tucu'yón se-nana so' a*

1 Dan me se gaa ataa quisij cha'anj pascuá, ne quene'en Jesucristó se vaa nichrun' quisij orá tanáj so' chumiij nihánj ne quinán' so' rihaan Rej so' Diose a. Dan me se 'ee rá so' man nij sí cachéé gá so' rihaan chumiij nihánj, ne yo'o 'ee rá so' man nij so' ndaa se cavi' so' a.

2 Dan me se quisij orá chá xti'nqo nij so', ne aj guun rá sí chree se vaa sí cu'naj Judas Iscariote ta'ní Simón me sí tacuachén man Jesucristó rihaan nij sí taj ri'yunj man Jesucristó a.

3 Ne aj quene'en Jesucristó se vaa quisij guun chij ma'an so' rihaan cunudanj rasuun, qui'yaj Diose, ne aj quene'en so' se vaa sij cavii rej yanj Diose me so' ne quinán' uun so' rihaan Diose a.

4 Dan me se gaa quisij chá xti'nqo nij so', ne quirii Jesucristó cotoó nuu so', ne cata'aa so' 'o yatzij toalla, ne tumj so' catuun so' a.

5 Veé dan, gaa ne caraa so' na rque rco'oo, gaa ne guun che'e so' na'nu' so' tacóó nij sí tucu'yón se-nana so', ne nachen so' yatzij toalla numji catuun so', ne tinacoó so' tacóó nij sí tucu'yón se-nana so' a.

6 Dan me se cuchi' so' rihaan sí cu'naj Simón Pedró, ne cataj Pedró rihaan so' a:

—Señor. Ma'an so' na'nu' tacóó aj na' —taj Pedró, xná'anj so' man Jesucristó a.

7 Gaa ne cataj Jesucristó rihaan so' a:

—Ne ne'én so' me che'é 'yáj danj cuano ma'. Tzaj ne vaa güii, ne xcaj so' cuentá adonj —taj Jesucristó rihaan Pedró a.

8 —Daj chihaa míj se guun na'nu' so' tacóó a ma' —taj Pedró rihaan Jesucristó a.

Gaa ne cataj Jesucristó rihaan so' a:

—Tzaj ne sese se na'nu' 'unj tacóó so', ne se ca'vee guún so' tuví 'unj ma' —taj Jesucristó rihaan Pedró a.

9 Gaa ne cataj Simón Pedró rihaan Jesucristó a:

—Se na'nú' so' inañj tacój, man Señor. Ndaa nu' ra'aj do', nu' raj do', na'nu' so' ei —taj Pedró rihaan Jesucristó a.

<sup>10</sup> Gaa ne cataj Jesucristó rihaan so' a:

—Xa' sí aj cane, tzaj ne taj che'é na'nu' nii man nu' nee man so' ma'. 'O se aj vaa cuj man so' nanj á. Maan se inañj tacóo so' na'nu' nii nanj adonj. Ne nda' se aj vaa cuj man ta'aj soj, tzaj ne nuveé taran' soj me sí vaa cuj man ma' —taj Jesucristó a.

<sup>11</sup> 'O se aj quene'en Jesucristó se vaa tacuachén yo'o tuvi' nij so' man so' rihaan nij sí taj ri'yunj man so', ne che'é dan cataj so' se vaa nuveé cunudanj nij so' me sí vaa cuj man a.

<sup>12</sup> Dan me se gaa quisij na'nu' Jesucristó tacóo nij so', ne nanuú so' se-cotoó so', ne ca'anj cane uún so' rej ne nij so', gaa ne xna'anj so' man nij so', cataj so':

—Ne'en soj me che'é qui'yáj danj man soj na'.

<sup>13</sup> Xa' soj, tzaj ne ve'é a'mii soj rihanj, taj soj se vaa sij tucu'yón man soj mej, ne sij uun chij rihaan soj mej, ne cunaj uxrá a'mii soj ei. 'O se veé yá 'unj nanj á.

<sup>14</sup> Dan me se 'unj me sí tucu'yón man soj ne 'unj me sí uun chij rihaan soj, tzaj ne guún 'unj mozó rihaan soj ne na'nú' 'unj tacóo soj ei. Che'é dan xcaj soj cuentá se vaa no xcuún soj cunuú nica' nimán soj ne guun soj mozó rihaan tuvi' soj ne na'nu' soj tacóo tuvi' soj nanj adonj.

<sup>15</sup> Danj inañj qui'yáj, che'é rej me raj quene'en soj manj, ne xcaj soj cuentá daj qui'yaj ma'an soj uún adonj.

<sup>16</sup> Cuanó nihánj me cataj xna'anj yá 'unj rihaan soj se vaa nuveé sij uun chij doj me mozó rihaan se-ru'vee mozó ma'. Ne nuveé sij uun chij doj me sí ca'anj suun rihaan sí ca'née man so' ma'. Ne ase vaa mozó do', ase vaa sí ca'anj suun do', vaa soj rihanj a. Che'é dan daj se qui'yáá 'unj ro', danj gaa qui'yaj soj, qui'yaj suun soj che'é tuvi' soj ei.

<sup>17</sup> Ne aj cuno soj nana nihánj, ne sese qui'yaj soj nu' nana nihánj, ne vaa che'é guun niha' rá soj, ne ya cavii sa' soj adonj.

<sup>18</sup> Tzaj ne ne ca'mij nana nihánj che'é taran' nij soj ma'. Dan me se aj ne'enj man soj sij narii 'unj canoco' manj, tzaj ne vaa che'é quisij guee nana nihánj nana no rihaan danj Diose adonj: “Sí chá rachrúun gaj ro', me sí guun rá tiguúj che'é manj adonj”, me nana no rihaan danj Diose a.

<sup>19</sup> “Asij cuanó nihánj nu' rej rihaan cataj xna'anj 'unj rihaan soj daj guun rej rihaan, ne cuanó nihánj me se ataa quiranj se vaa quiranj, tzaj ne asa' quisij quiranj yo', gaa ne cuchuman rá soj daj sij mej ei.

<sup>20</sup> Ya ya cataj xna'anj 'unj rihaan soj se vaa xa' sí ve'é nicaj tuvi' ga sí ca'nej 'unj rihaan chumii nihánj, tzaj ne so' me sí ve'é nicaj tuvi' ga ma'anj, ne xa' sí ve'é nicaj tuvi' ga ma'anj, tzaj ne so' me sí ve'é nicaj tuvi' ga sí ca'née manj nanj adonj —taj Jesucristó rihaan nij sí tucu'yón se-nana so' a.

*Nana nihánj taj xna'anj se vaa cataj xna'anj Jesucristó che'é sí tacuachén man so' rihaan nij sí taj ri'yunj man so' a*

<sup>21</sup> Síj ca'mii Jesucristó nana nihánj, gaa ne quinanó ndo'o rá so', gaa ne guun che'e so' cataj xna'anj so' daj qui'yaj yo'o so' man so', cataj so':

—Cuanó nihánj me se cataj yá 'unj rihaan soj se vaa yo'o tuvi' nij soj me sí tacuachén manj rihaan nij sí taj ri'yunj manj adonj —taj Jesucristó rihaan nij sí tucu'yón se-nana so' a.



<sup>22</sup> Gaa ne ni'yaj taran' nij so' man tuvi' nij so' a. 'Q se ne quene'en nij so' me che'é ca'mii Jesucristó nana vaa danj a ma'.

<sup>23</sup> Dan me se yanj yo'q so' x'nuú Jesucristó, ne nichrun' uxrá ne so' ga Jesucristó, ne síi 'ee rá Jesucristó man me so' a.

<sup>24</sup> Che'é dan ticun' Simón Pedró raq Simón Pedró rihaan so', che'é rej xna'anj so' man Jesucristó me síi che'e a'mii Jesucristó a.

<sup>25</sup> Che'é dan xná'anj tuvi' so' man Jesucristó, cataj so':

—Me síi qui'yaj danj, ga Señor! —taj so', xná'anj so' man Jesucristó a.

<sup>26</sup> Gaa ne cataj Jesucristó:

—Tiguíj 'unj doj rachrúun candó nuu rque co'oo, ne rquej man síi qui'yaj danj manj a —taj Jesucristó a.

Gaa ne tiguíj Jesucristó yo'q xco' rachrúun rque candó nuu rque co'oo, ne go' so' man síi cu'naj Judas ta'nii síi cu'naj Simón Iscariote a.

<sup>27</sup> Ne gaa quisíj quita'aa síi cu'naj Judas rachrúun yo', gaa ne catúj Satanás nimán so' a. Che'é dan cataj Jesucristó rihaan so' a:

—Cavij so' ca'anj so' cuaj qui'yáa so' ndaa vaa me rá so' á —taj Jesucristó rihaan Judas yo' a.

<sup>28</sup> Tzaj ne a 'ó nij so' ne quene'en me che'é ca'mii Jesucristó nana vaa danj rihaan síi cu'naj Judas a ma'.

<sup>29</sup> Dan me se che'é se sij tumé chrúun sa'anj me síi cu'naj Judas, che'é dan guun rá ta'aj nij so' se vaa ca'ne' Jesucristó suun rihaan so' quiraan so' se vaa cachíin rihaan nij so' che'é cha'anj do', se vaa go' so' doj sa'anj rihaan nij síi nique do' a.

<sup>30</sup> Dan me se nicaj Judas rachrúun yo', ne nu' quita'aa so' nu' curihanj so' xe', ne rej niij me yo' a.

*Nana nihánj taj xna'anj che'é suun ca'ne' Jesucristó rihaan ní' a*

<sup>31</sup> Che'é dan gaa quisíj curihanj Judas, ne cataj Jesucristó rihaan yo'ó nij so' a:

—Daj doj quene'en yuvij se vaa sij sa' uxrá mej sij ca'née Diose nıcaj yu'unj man yuvij, ne che'é dan quene'en nij yuvij se vaa sij sa' uxrá me ma'an Diose adonj.

<sup>32</sup> Ne che'é dan quene'en' se vaa sij sa' me ma'anj, qui'yaj Diose, ne nichrun' qui'yaj so' danj nanj adonj.

<sup>33</sup> Nichrun' quinavij orá chée 'unj ga soj, nanj rej. Dan me se aj cataj 'unj rihaan nij síi uun chij rihaan nij yuvij israelitá se vaa cavij 'unj ca'anj 'unj, ne se guun nucujaj nij so' cuchí' nij so' rej ca'anj 'unj ma'. Ne xa' ma'an soj, tzaj ne nano' ma'an soj manj, ne nihánj me cataj xna'anj 'unj rihaan soj se vaa se guun nucujaj ma'an soj cuchí' ma'an soj rej ca'anj 'unj a ma'.

<sup>34</sup> Ne nihánj me suun naca a'nej rihaan soj, se vaa yo'q gaa 'ee rá soj man tuvi' soj ei. Dan me se daj se cunuu 'ee raj ni'yaj man soj ro', danj gaa qui'yaj soj, gaa 'ee rá soj man tuvi' soj a.

<sup>35</sup> Sese gaa 'ee rá soj man tuvi' soj, ne quene'en nu' yuvij man rihaan chumij se vaa sij tucu'yón se-nanaj me soj nanj adonj —taj Jesucristó rihaan nij síi tucu'yón se-nana so' a.

*Nana nihánj taj xna'anj che'é nana nij ca'mii Pedró che'é Jesucristó a*

<sup>36</sup> Gaa ne cataj Simón Pedró rihaan Jesucristó a:

—Me rej ca'anj so', ga Señor! —taj Pedró, xná'anj so' man Jesucristó a.

Gaa ne cataj Jesucristó:

—Xa' rej ca'anj 'unj, tzaj ne se guun nucuáá so' canocó' so' manj cuano ma'. Tzaj ne vaa güii, ne canocó' so' manj adonj —taj so' rihaan Pedró a.

<sup>37</sup> Gaa ne cataj Pedró rihaan so' a:

—Me che'é se guun nucuáj canocoj mán so' cuano, Señor'. 'O se ca'nej nimanj cavij che'é so' á —taj Pedró rihaan Jesucristó a.

<sup>38</sup> Gaa ne cataj Jesucristó rihaan so' a:

—Ya ya ca'nej nimán so' caví' so' che'ej, rá so' na'. Cuano nihánj me se cataj yá 'unj rihaan so' se vaa gaa ataa caguaj to'loo, ne va'nuj ya cataj so' se vaa ne ne'én so' manj chuguaj —taj Jesucristó rihaan Pedró a.

## 14

*Nana nihánj taj xna'anj che'é nu' se vaa qui'yaj Jesucristó che'é ní' a*

<sup>1</sup> Gaa ne cataj Jesucristó rihaan taran' nij so' a:

—Ca'ne' rá soj ga suun guun vij rá á. Cuchuman rá soj ni'yaj soj Diose, ne cuchuman rá soj ni'yaj soj manj ei.

<sup>2</sup> Tucuá Réj me se vaa ndo'o rej cane yuvi ei. Sese ne vaa danj, ne me che'é cataj xna'anj 'unj rihaan soj se vaa ca'anj 'unj naqui'yaj sa' 'unj rej cane ma'an soj, rá soj ga.

<sup>3</sup> Ne che'é se ca'anj 'unj naqui'yaj sa' 'unj rej cane soj, che'é dan ne'en soj se vaa ca'na' uún 'unj rihaan soj, ne nacaj 'unj man soj; ndaa síj, gaa ne cane rcua'aan taran' ní' yo' ei.

<sup>4</sup> Ne aj ne'en soj chrej uchi' ndaa rej ca'anj 'unj nanj adonj —taj Jesucristó rihaan nij sí tucu'yón se-nana so' a.

<sup>5</sup> Gaa ne cataj sí cu'naj Tomás rihaan Jesucristó a:

—Ne ne'en núj rej ca'anj so', man Señor. Asa' ca'vee quene'en núj chrej uchi' ndaa rej ca'anj so' ga —taj sí cu'naj Tomás, xna'anj so' man Jesucristó a.

<sup>6</sup> Gaa ne cataj Jesucristó rihaan so' a:

—Ma'anj me guun chrej rihaan soj, ne ma'anj me nana ya cunó soj, ne ma'anj me sí qui'yaj gaa i'na' nimán soj adonj. Sese se ca'vej rá yo'ó so' canocó' so' manj, ne daj chihaa míj seuchi' so' rihaan Réj Diose a ma'.

<sup>7</sup> Sese ne'en ya soj manj, ne aj ne'en soj man Réj Diose adonj. Dan me se asij cuano ro', ne'en soj man so' nanj adonj —taj Jesucristó rihaan Tomás a.

<sup>8</sup> Gaa ne cataj sí cu'naj Felipé:

—Tíhaán so' man Réé so' rihaan núj, ne guun ya rá núj, Señor —taj Felipé rihaan Jesucristó a.

<sup>9</sup> Gaa ne cataj Jesucristó rihaan Felipé a:

—Síj que'ee ndo'o güii cachéé 'unj ga nij soj, ne me che'é ne quene'én so' manj, ga Felipé'. Xa' sí ne'en manj, tzaj ne so' me sí ne'en Réj Diose adonj. Asa' ca'vee cataj so' se vaa me rá so' tíhaán 'unj man Réj Diose rihaan so' ga.

<sup>10</sup> Ne cuchuman ya rá so' se vaa cuyaán vaa rá 'unj ga Réj Diose a. 'O se xa' nana a'mij, tzaj ne nuveé nana avii raá ma'anj me nana yo' ma'. 'O se nuú Réj Diose nimanj, ne so' me sí 'yaj suun nu' suun 'yaj sunj adonj.

<sup>11</sup> Cuchuman rá soj se vaa cuyaán vaa rá 'unj ga Réj ei. Ca'vee se ne amán rá soj ni'yaj soj man ma'anj, tzaj ne cuchuman rá soj se-nanaj che'é suun 'yaj sunj ei.

<sup>12</sup> Ne cuano nihánj me se cataj yá 'unj rihaan soj se vaa sí amán rá ni'yaj manj me se ase vaa suun 'yaj suun ma'anj ro', danj gaa suun qui'yaj suun

ma'an so' uún nanj adonj. Tzaj ne suun sa' doj qui'yaj suun so', che'é se nucu'i 'unj rihaan Réj Diose ei.

13 Ne me ma'an rasuun cachinj soj rihanj che'é se me soj síi noco' manj, ne nu' yo' qui'yáj che'é soj adonj. Ndaa síj, gaa ne ve'é ca'mii nii che'é Réj Diose, qui'yáj ei.

14 Sese cachinj soj yo'q rasuun rihanj che'é se me soj síi noco' manj, ne veé danj qui'yáj adonj.

15 “Sese ya aráj cochroj soj rihanj, ne cunq soj nij nana cataj xna'anj 'unj rihaan soj a.

16 Gaa ne cachinj ni'yaj ma'anj rihaan Réj Diose, gaa ne ca'nej so' yo'ó síi cuch'i' rihaan soj, ne racuíj ndo'o so' man soj, ne cané so' ga soj nu' cavii nu' ca'anj a.

17 Dan me se Nimán Diose me síi cuch'i' rihaan soj, ne inanj nana ya rque so' man soj a. Tzaj ne se guun nucuaj nij yuvii man rihaan chumii nihánj nacaj nij so' man Nimán Diose a ma'. 'Q se ne ne'en nij so' man so' ma'. Tzaj ne soj me se ne'en soj man so', che'é se ne so' ga soj, ne yo'q cané so' nimán soj adonj.

18 Se quináj ma'an soj ma'. 'Q se ca'na' uún 'unj rihaan soj ei.

19 Nichrun' ca'anj 'unj, ne se quene'en uún nij síi man rihaan chumii nihánj manj ma'. Tzaj ne quene'en ma'an soj manj, che'é se yo'q vaa i'na' 'unj ga Diose, ne gaa i'na' nimán soj ga Diose adonj.

20 Asa' quene'en soj manj ne quene'en soj se vaa cuyaan vaa rá 'unj ga Réj, ne cuyaan gaa rá soj ga 'unj nanj adonj.

21 Síi nari' se-nanaj ne uno nana yo' ro', síi yo' me síi ya ya aráj cochroj rihanj chuguanj. Ne cunqu 'ee rá Réj Diose man síi aráj cochroj rihanj, ne gaa 'ee rá ma'anj man so', ne quene'en so' manj, qui'yáj ei —taj Jesucristó rihaan nij síi tucu'yón se-nana so' a.

22 Dan me se ca'mii síi cu'naj Judas rihaan so' a. Tzaj ne nuveé sij cu'naj Judas Iscariote me so' ma'. Yo'ó síi cu'naj Judas me a. Dan me se xná'anj so' man Jesucristó, cataj so':

—Me che'é cataj so' cuano nihánj se vaa quene'en núj mán so' qui'yáa so', tzaj ne se quene'en nij síi man rihaan chumii nihánj mán so' ga. Me che'é ca'mii so' danj ga —taj Judas, xná'anj so' man Jesucristó a.

23 Gaa ne cataj Jesucristó rihaan so' a:

—Sese aráj cochroj yo'q so' rihanj, ne sese cunq so' se-nanaj, gaa ne cunqu 'ee rá Réj Diose man so', gaa ne cuch'i' núj rihaan so', ne yo'q cayáan núj ga so' adonj.

24 Xa' síi ne aráj cochroj rihanj, tzaj ne ne uno so' se-nanaj ma'. Ne nana ca'mij cunq soj me se nuveé inanj se-nanaj me nana yo' ma'. Se-nana Réj síi ca'née manj rihaan chumii nihánj me nana ca'mij cunq soj nanj adonj.

25 “Dan me se cuano yaj ne ma'anj ga soj, ne ca'mij nu' nana nihánj rihaan soj adonj.

26 Tzaj ne vaa güii ca'nej Réj Diose man Nimán so' cuch'i' Nimán so' rihaan soj, ne racuíj ndo'o Nimán so' man soj, gaa ne tucu'yón Nimán so' nu' nana man soj, ne ninuj rá soj nu' nana ca'mij rihaan soj, qui'yaj Nimán Diose yo' ei.

27 “Dan me se se xej nuu nimán 'unj tanáj 'unj rihaan soj, ne se xej nuu nimán 'unj rquej man soj, ne se tiha' yu'unj 'unj man soj, ndaa vaa 'yaj nij síi

man rihaan chumiñ nihánj ma'. Ya ya gaa xej nimán soj, qui'yaj yá 'unj adonj. Taj che'é quinano rá soj ma'. Se cuchu'vi' nimán soj ma'.

<sup>28</sup> Aj cuno soj nana ca'mij, se vaa cavii 'unj quinán' 'unj, tzaj ne ca'na' uún 'unj rihaan soj adonj. Sese sij aráj cochroj rihanj me soj, ne guun niha' rá soj cuno soj nana se vaa cavii 'unj quinán' 'unj yan yanj Réj Diose ei. Uun chij doj Réj rihanj nanj adonj.

<sup>29</sup> “Cuanō nihánj me se cataj xna'anj 'unj rihaan soj daj quirán' 'unj rej rihaan ní', ne asa' quisíj quirán' 'unj danj, gaa ne me rá 'unj cuchuman rá soj ni'yaj soj manj chuguanj.

<sup>30</sup> Se ca'mij que'ee doj nana rihaan soj a ma'. 'O se daj doj ca'na' síi chree síi guun chij rihaan chumiñ nihánj, ne a doj se ca'vee guun chij so' rihanj a ma'.

<sup>31</sup> Tzaj ne me rá 'unj quene'en nij síi man rihaan chumiñ nihánj se vaa aráj cochróo 'unj rihaan Réj Diose, ne che'é dan qui'yaj ndaa vaa cataj xna'anj so' rihanj adonj. Canicun' caya soj, ne cavii ní' ca'anj ní' ei —taj Jesucristó rihaan nij síi tucuyón se-nana so' a.

## 15

*Nana nihánj taj xna'anj se vaa ase vaa yo'o ya'aa coj chruj uvá ro', danj vaa Jesucristó, ne ase vaa ya'aa ra'a avii xráa ya'aa manj ro', danj vaa ní' a*

<sup>1</sup> Gaa ne cataj uún Jesucristó a: —Ase vaa yo'o ra'a manj chruun uvá ro', danj vaa yá 'unj, ne Réj Diose me síi tumé chruun uvá yo' chuguanj.

<sup>2</sup> Ne a me ma'an 'o ra'a chruun yo' ne rii chruj uvá, ne a'néj so' man ra'a yo' nanj adonj. Tzaj ne ra'a chruun man chruj uvá raá me se ve'é a'ne' so' man yo', gaa ne cumañ doj chruj uvá raá yo' uún ei.

<sup>3</sup> Dan me se ra'a chruun cachij sa' me soj, che'é se aj cuno soj nana ca'mij rihaan soj ei.

<sup>4</sup> 'O nuú rá soj manj, ne 'o nuú 'unj nimán soj a. Dan me se xa' ra'a chruun uvá, tzaj ne se ca'vee cumañ chruj raá yo' sese ma'an inanj yo' a ma'. Ne ase vaa ra'a chruun chruj uvá ro', danj vaa soj, ne sese se cuno sa' soj rihanj, ne sese ca'anj yanj soj rihanj, ne se ca'vee qui'yaj soj ndaa vaa me rá Réj Diose qui'yaj soj ma'.

<sup>5</sup> “Dan me se 'unj nihánj me ma'an ra'a manj coj chruj uvá, ne soj me ra'a catuun avii xráa ra'a manj ei. Ne sese yo'o cuno soj rihanj, ne sese yo'o cunuú 'unj nimán soj, ne qui'yaj uxrá soj se vaa me rá Diose qui'yaj soj chuguanj. 'O se sese se racuj 'unj man soj, ne se guun nucaj soj qui'yaj suun soj a doj suun sa' ma'.

<sup>6</sup> Sese se ca'vej rá yo'o so' quinaj so' ga 'unj, ne quiri'ij nii man so', ndaa vaa 'yaj nii man ra'a chruun yo', ne canaco'o yo', ne naqui'yaj chre' nii man nij ra'a chruun yo', ne quiri'ij nii man nij yo' rihaan ya'an ei. Dan me se cacaa nu' nij síi vaa danj nanj adonj.

<sup>7</sup> “Tzaj ne sese yo'o cuno soj rihanj, ne sese yo'o cunuú se-nanaj nimán soj, ne ca'vee se me ma'an rasuun guun rá soj cachinj soj rihanj, ne rquej man soj chuguanj.

<sup>8</sup> Che'é se uno soj rihanj, che'é dan a'mii sa' yuvij che'é Réj Diose, ne che'é dan guun nucaj soj qui'yaj suun ndo'o soj suun sa', ne sese cuno sa' soj rihanj, ne síi tucuyón se-nanaj me soj adonj.

<sup>9</sup> Dan me se daj se 'ee rá Réj manj ro', danj vaa 'ee raj man soj chuguanj. Ne yo'o gaa 'ee raj ni'yaj 'unj man soj, qui'yaj soj ei.

10 Sese a'néé sa' soj suun a'nej rihaan soj, ne yo'o gaa' ee raj man soj a. Veé danj 'yaá 'unj, ne a'néé sa' 'unj suun a'ne' Réj Diose rihanj, ne yo'o 'ee rá so' manj adonj.

11 "Nu' nana nihánj cataj xna'anj 'unj rihaan soj che'é se me raj gaa' niha' uxrá raj ni'yaj 'unj man soj, ne me raj gaa' niha' uxrá rá ma'an soj uún a.

12 Nihánj me suun sa' ya' a'nej rihaan soj cunō soj ei. Nda' rá se vaa 'ee raj ni'yaj 'unj man soj ro', danj gaa' ee rá soj ni'yaj soj tuvi' soj ei.

13 Dan me se sese ca'vej rá yo'o so' nayon so' rihaan tuvi' so' cavi' so' che'é tuvi' so', ne sij 'ee ya' rá man tuvi' me so', ne taj vaj a doj sí 'ee doj rá man tuvi' rihaan sí ca'vej cavi' che'é tuvi' a ma'.

14 Ne nij soj me se tuvij me soj sese qui'yaj soj ndaa vaa cataj xna'anj 'unj rihaan soj nanj adonj.

15 Rej rihaan ni' me se se cataj 'unj se vaa se-mozó 'unj me soj a ma'. 'O se mozó me se ne ne'en so' daj 'yaj sí uun chij rihaan so' ma'. Xa' soj, tzaj ne aj cataj 'unj se vaa tuvij me soj, che'é se aj cataj xna'anj 'unj rihaan soj nu' se vaa cataj Réj Diose rihanj adonj.

16 Ne quinarij soj manj a ma'. Tananj ma'an 'unj nihánj quinarii man soj ne cuné' 'unj man soj, yan cavij soj qui'yaj ndo'o soj se vaa me rá Diose qui'yaj soj, ne se quinavij suun sa' 'yaj suun soj daj chihaa' mǐj ma'. Ne che'é se cuné' 'unj man soj, che'é dan me ma'an rasuun cachinj soj rihaan Réj Diose che'é se me soj sí nocō' manj, ne rque so' rasuun yo' man soj adonj.

17 Nihánj me se vaa cataj xna'anj 'unj rihaan soj, se vaa gaa' ee rá soj man tuvi' soj ei —taj Jesucristó rihaan nij sí tucu'yón se-nana so' a.

*Nana nihánj me taj xna'anj Jesucristó se vaa nij ndo'o qui'yaj nij sí man rihaan chumij nihánj man ni' a*

18 Gaa ne cataj uún Jesucristó a:

—Sese quitaj ri'yunj nij sí man rihaan chumij nihánj ni'yaj nij so' man soj, ne xcaj soj cuentá se vaa asino yaan quitáa ri'yunj nij so' man ma'anj a.

19 Sese sij man rihaan chumij nihánj uun me ma'an soj, ne gaa niha' rá yo'o nij sí man rihaan chumij nihánj ni'yaj nij so' man soj asuun, tzaj ne narij 'unj man soj se vaa tanáj soj chumij nihánj ne canocō' soj manj, ne che'é dan nuveé sij man rihaan chumij nihánj me soj cuano ma'. Che'é dan táa ri'yunj nij sí man rihaan chumij nihánj ni'yaj nij so' man soj ei.

20 "Yo'o cunuú rá soj nana nihánj nana cataj xna'anj 'unj rihaan soj se vaa nuveé sij uun chij doj me mozó rihaan se-ru'vee mozó ma'. Che'é se canocō' nij sí taj ri'yunj manj qui'yaj nij so' sayuun manj ro', che'é dan ne'en soj se vaa ndaa ma'an soj do', canocō' nij so' qui'yaj nij so' sayuun nanj adonj. Ne che'é se ne cunō nij so' se-nanaj, ne che'é dan ne'en soj se vaa se cunō nij so' se-nana soj a man adonj.

21 Dan me se qui'yaj nij so' nu' se nij yo' man soj, che'é se me soj sí nocō' manj, che'é se ne ne'en nij so' man sí ca'néé manj chuguanj.

22 Sese ne ca'na' 'unj, ne sese ne ca'mij ga' nij so', ne taj vaj cacun' tumé nij so' saj ma'. Tzaj ne cuano nihánj me se natá' 'unj se-nana Diose rihaan nij so', ne se ca'vee cataj nij so' se vaa nuveé sij taj ri'yunj man Diose me nij so' ma'.

23 'O se sí taj ri'yunj manj ro', so' me sí taj ri'yunj man Réj Diose ei.

24 Ne suun sa' nocō qui'yaj sunj quene'en nij so' me se ne qui'yaj a yo'o yuvij suun sa' nocō vaa danj ma'. Ne sese ne qui'yaj suun sa' nocō yo' quene'en nij so', ne ne tumé nij so' cacun' saj ma'. Tzaj ne yaj me se aj

quene'en nij so' nij suun sa' nocoo qui'yaj sunj, ne quitáa ri'yunj nij so' mán 'unj, man Réj Diose do', nanj adonj.

<sup>25</sup> Tzaj ne nihánj me se quisij ya nu' nana nihánj nana no rihaan se-tucuanj Moisés nana nayaa ma'an nij so' se vaa, "Quitáa ri'yunj rma'an nij so' manj", taj se-tucuanj Moisés yo', ne veé danj qui'yaj guée nij so' nanj adonj.

<sup>26</sup> "Dan me se ca'nej 'unj Nimán Diose cavij so' rej ne Diose ca'na' so' rihaan soj, ne racuj so' man soj, ne inanj nana ya rque so' man soj, ne asa' ca'na' Nimán Diose rihaan soj, gaa ne cataj xna'anj so' rihaan soj che'ej ei.

<sup>27</sup> Ne cataj xna'anj ma'an soj che'ej, che'é rej asij guun che'ej cachée 'unj rihaan chumij nihánj, cachée soj gaj ei.

## 16

<sup>1</sup> "Nihánj me quisij cataj xna'anj 'unj nu' nana nihánj rihaan soj, che'é rej na'vej raj guun na'aj soj che'é se vaa quiran' soj a.

<sup>2</sup> 'Q se se ca'vej rá nij sí israelitá cunu chre' soj ga nij so' rá ve' tucuyón nij so' se-tucuanj Moisés ma'. Ne quisij güii guun rá nij so' se vaa nuveé sij nocoo' man Diose me soj, ne guun rá sí ticavi' man soj se vaa ve'é uxrá 'yaj suun so' rihaan Diose gaa ticavi' so' man soj a.

<sup>3</sup> Danj qui'yaj nii, che'é rej ne ne'en uxrá nii man Réj Diose do', man ma'anj do' a.

<sup>4</sup> Tzaj ne nihánj me cataj xna'anj 'unj nu' nana nihánj rihaan soj, che'é rej asa' quiran' soj nu' sayuun nihánj, ne ninuj rá soj se vaa aj cataj xna'anj 'unj rihaan soj che'é nu' nihánj nanj adonj —taj Jesucristó rihaan nij sí tucuyón se-nana so' a.

*Nana nihánj me taj xna'anj Jesucristó se vaa ca'anj so' ne ca'na' Nimán Diose rihaan ní' a*

Gaa ne cataj uún Jesucristó a:

—Ne cataj xna'anj 'unj nu' nana nihánj rihaan soj gaa guun che'e soj cachée soj gaj, che'é se cachée ma'anj ga soj, ne che'é dan ne cachiin nana vaa danj rihaan soj ma'.

<sup>5</sup> Tzaj ne cuano nihánj me se quinan' uún 'unj rihaan sí ca'neé manj rihaan chumij nihánj, ne me che'é ne xná'anj soj manj me rej ca'anj 'unj ga.

<sup>6</sup> Tzaj ne che'é se cataj xna'anj 'unj rihaan soj se vaa ca'anj 'unj ro', che'é dan nanó ndo'o rá soj ne nuu xru' rá soj chuguanj.

<sup>7</sup> Tzaj ne ya vaa nana nihánj nana cataj xna'anj 'unj rihaan soj, se vaa cavij sa' soj doj che'é se ca'anj 'unj adonj. 'Q se sese se ca'anj 'unj, ne se ca'na' Nimán Diose rihaan soj ma'. Tzaj ne sese ca'anj 'unj, ne ca'nej 'unj man so' rihaan soj adonj.

<sup>8</sup> Ne asa' quisij ca'na' so', ne cuta' so' cacun' xráa nij sí man rihaan chumij nihánj se vaa tumé nij so' cacun' do', se vaa ataa cunu sa' nij so' rihaan Diose do', se vaa ca'ne' ya Diose cacun' che'é nij so' do' a.

<sup>9</sup> Dan me se che'é se ne cuchuman rá nij yuvij ni'yaj nij so' manj ro', che'é dan cataj Nimán Diose se vaa tumé nij so' cacun' a.

<sup>10</sup> Che'é se cavij 'unj quinán' 'unj rej yanj Réj Diose ne se quene'en soj doj manj ro', che'é dan cataj Nimán Diose se vaa ataa cunu sa' nij yuvij rihaan Diose a.

<sup>11</sup> Che'é se aj ca'ne' Diose cacun' che'é sí chree sí uun chij rihaan chumij nihánj ro', che'é dan cataj Nimán Diose se vaa ca'ne' Diose cacun' che'é ma'an nij yuvij uún adonj.

12 “Dan me se vaa uxrá doj nana me raj cataj xna'anj 'unj rihaan soj, tzaj ne se guun nucuaj soj cunō soj nana yo' cuano a ma'.

13 Tzaj ne asa' quisij ca'na' Nimán Diose yo', ne tucu'yón so' nu' nana ya rihaan soj nanj ei. 'O se sji a'mii inanj nana ya me so' adonj. 'O se se ca'mii so' nana cavi raá so' ma'. Tananj ca'mii so' inanj nana cataj xna'anj Diose cunō so', ne dan me se cataj xna'anj so' che'é se vaa ca'na' rihaan soj rej rihaan soj nanj adonj.

14 Ca'mii sa' so' che'é 'unj, che'é se nicaj so' se-nanaj, ne nicaj so' nu' si'yáj, ne cataj xna'anj so' nana yo' rihaan soj chuguanj.

15 Nu' se nicaj Réj Diose me se si'yáj me yo' ei. Che'é dan cataj 'unj se vaa nicaj so' si'yáj, ne tijaan so' rihaan soj a —taj Jesucristó rihaan nij sí tucu'yón se-nana so' a.

*Nana nihánj me taj xna'anj Jesucristó che'é güi guun niha' rá nij sí tucu'yón se-nana so' a*

16 Gaa ne cataj uún Jesucristó:

—Cachen doj, gaa ne se quene'en soj manj ma'. Gaa ne cachē doj uún, gaa ne quene'en uún soj manj chuguanj —taj Jesucristó rihaan nij sí tucu'yón se-nana so' a.

17 Che'é dan xná'anj nij sí tucu'yón se-nana so' man tuvi' nij so', cataj nij so':

—Me che'é ca'mii so' nana vaa danj se vaa, “Cachē doj, gaa ne se quene'en soj manj, ne cachē doj uún, gaa ne quene'en uún soj manj, che'é se cavii 'unj quínán' 'unj rej yanj Réj Diose a”. Me che'é tu'va so' danj, rá soj ga —taj nij sí tucu'yón se-nana Jesucristó, xná'anj nij so' man tuvi' nij so' a.

18 Che'é dan xná'anj uún nij so', cataj nij so':

—Me che'é ca'mii so' nana “cachē doj” ga. 'O se ne ne'en uxrá núj daj taj so' a ma' —taj nij so' rihaan tuvi' nij so' a.

19 Quene'en Jesucristó se vaa me rá nij so' xna'anj nij so' man so', ne che'é dan xná'anj ma'an so' man nij so', cataj so':

—Me che'é xná'anj ndo'o soj man tuvi' soj che'é nana ca'mij, se vaa cachē doj, gaa ne se quene'en uún soj manj, gaa ne cachē doj uún, gaa ne quene'en uún soj manj ga.

20 Cuano nihánj me cataj yá yá 'unj rihaan soj se vaa ta'vee soj ne quinanō ndo'o rá soj, tzaj ne guun niha' rá nij sí man rihaan chumij nihánj adonj. Nda' se quinanō ndo'o rá soj, tzaj ne cachē doj, gaa ne guun niha' uxrá nimán soj nanj ei.

21 Dan me se chana uchruj ne'ej me se nanó ndo'o rá no', che'é se daj doj quisij orá cuchruj no' ne'ej, tzaj ne gaa quisij ca'ngaa ne'ej, ne ni'yón no' nu' sayuun quiran' no' nanj ei. 'O se uun niha' ndo'o rá no' che'é se ca'ngaa yuvi rihaan chumij nanj adonj.

22 Ne xa' soj, tzaj ne cuano nihánj me se nanó rá soj, tzaj ne vaa güi quene'en uún 'unj man soj, gaa ne guun niha' uxrá rá soj, ne taj vaj a doj sí ca'ne se niha' nimán soj a ma'.

23 Ne güi dan me se se xná'anj soj a doj nana manj a ma'. Ya ya cataj xna'anj 'unj rihaan soj cuano se vaa me ma'an rasuun cachinj ni'yaj soj rihaan Réj Diose ne cata' tu'va soj se-chuvij, ne rque so' nu' yo' man soj adonj.

24 Dan me se nda' se sji noco' manj me soj, tzaj ne gaa rque me se ne cachinj ni'yaj soj a doj rasuun rihaan Diose ma'. Cachinj ni'yaj soj, ne quirí' soj ei. Ndaa síj, gaa ne gaa niha' uxrá rá soj adonj —taj Jesucristó rihaan nij sí tucu'yón se-nana so' a.

*Nana nihánj me taj xna'anj Jesucristó se vaa quinan' so' rihaan Rej so' Diose ne ca'na' uún so' rihaan chumií a*

<sup>25</sup> Gaa ne cataj uún Jesucristó a:

—Dan me se aj ca'mii cachrón ndo'oj rihaan soj che'é rasuun nihánj, tzaj ne vaa güii, ne se ca'mii cachronj doj rihaan soj a ma'. Tananj nana nica nata' 'unj rihaan soj che'é Réj Diose a.

<sup>26</sup> Ne güii dan me se cachinj ni'yaj soj rasuun rihaan Réj Diose, ne cata' tu'va soj se-chuvij, ne taj che'é cataj 'unj rihaan soj se vaa ma'anj cachinj ni'yaj rihaan Réj che'é soj a ma'.

<sup>27</sup> 'O se ma'an Réj Diose ee rá man soj, che'é se sij aráj cochroj rihanj me soj, ne amán rá soj se vaa cavii 'unj rihaan Réj Diose nanj á.

<sup>28</sup> Dan me se cavii 'unj rihaan Réj Diose, ne ca'ná' 'unj rihaan chumií nihánj, gaa ne cavii uún 'unj rihaan chumií nihánj, ne nucuí' uún 'unj rihaan Réj Diose adonj —taj Jesucristó rihaan nij sí tucu'yón se-nana so' a.

<sup>29</sup> Gaa ne cataj nij sí tucu'yón se-nana so' a:

—Cuanó nihánj me se nana nica a'mii so' no núj, ne a doj ne ca'mii cachrón so' ma'.

<sup>30</sup> Nihánj me se ne'en núj se vaa ne'én so' cunudanj, ne ndaa ne'én so' me nana uun rá yuvij xna'anj yuvij mán so' a. Che'é dan amán rá núj se vaa cavii so' rihaan Diose nanj á —taj nij sí tucu'yón se-nana Jesucristó a.

<sup>31</sup> Gaa ne xna'anj Jesucristó man nij so', cataj so':

—Ndaa yaj cuchumán ya rá soj na'.

<sup>32</sup> Dan me se quisij güii, ne veé aj quisij güii yo', ne cha'nuu soj, ne ino rej cunaj 'o 'o soj, ca'anj soj, ne tanáj soj man orún' 'unj nanj á. Tzaj ne se quináj orún' 'unj ma'. 'O se nicun' Réj Diose gaj adonj.

<sup>33</sup> Nu' nana nihánj ca'mij rihaan soj, che'é se me raj gaa xej nimán soj che'é rej noco' soj manj, tzaj ne quiran' soj sayuun rihaan chumií nihánj, tzaj ne vaa che'é guun niha' rá soj, ne guun ya ya rá soj se vaa 'unj nihánj qui'yaj canaán ya rihaan chumií nihánj ei —taj Jesucristó rihaan nij sí tucu'yón se-nana so' a.

## 17

*Nana nihánj taj xna'anj daj ca'mii Jesucristó gaa cachín ni'yaj so' rihaan Rej so' Diose a*

<sup>1</sup> Quisij ca'mii Jesucristó nana dan rihaan nij sí tucu'yón se-nana so', gaa ne naxcáj rihaan so', ni'yaj so' rej xta', ne cataj so':

—Aj quisij orá yo', Ataj. Ve'é cavii 'unj sij ta'nij so', qui'yáa so', gaa ne ve'é ca'mii yuvij che'é so', qui'yáj,

<sup>2</sup> che'é se guun chij 'unj rihaan cunudanj yuvij, qui'yáa so' a. Ne che'é dan nu' nij sí rqué so' manj me se gaa i'na' nij so' nu' cavii nu' ca'anj, qui'yáj a.

<sup>3</sup> Ne sí gaa i'na' nu' cavii nu' ca'anj me se so' me sí ne'en mán so' do', mán 'unj do' a. Dan me se orún' so' me Diose ya, ne 'unj Jesucristó me sí ca'née so' rihaan chumií nihánj adonj.

<sup>4</sup> Dan me se aj qui'yaj sunj nu' suun ca'né' so' rihanj, ne che'é dan aj ca'mii sa' nij yuvij man rihaan chumií nihánj che'é so' nanj adonj.

<sup>5</sup> Ne cuano nihánj me se qui'yáa so' cavii sa' 'unj ga ma'an so', Ataj Chij, ndaa vaa cavii sa' 'unj ga so' asj ataa guun chumií nihánj a.



6 “Ne xā' nij sí rqué sɔ' manj sí cavii rihaan chumiĭ nihánj, tzaj ne cataj xna'anĭ 'unĭ se-nānā sɔ' rihaan nij so', ne sĭj cuno rihaan sɔ' me nij so', ne rqué sɔ' man nij so' rihanĭ, ne ăj canoco' nij so' se-nānā sɔ' nānj á.

7 Nihánj me se ne'en nij so' se vaa nij rasuun nicaj 'unĭ me se ma'án sɔ' me sí rqué nu' rasuun yo' manj nānj adonĭ.

8 'O se cataj xna'anĭ 'unĭ nu' nānā rqué sɔ' manj rihaan nij so', ne cuno nij so', ne ne'en ya nij so' se vaa cavii 'unĭ rihaan sɔ', ne amán rá nij so' se vaa ca'néé sɔ' manj rihaan chumiĭ nihánj a.

9 “Nihánj me se achíin nĭ'yáá 'unĭ rihaan sɔ' che'é nij so' a. Ne xā' che'é nij sí mān rihaan chumiĭ nihánj, tzaj ne se cachíin nĭ'yáá 'unĭ che'é cunudanĭ nij so' ma'. Maan inānj che'é nij sí rqué sɔ' manj me cachĭnj nĭ'yáá 'unĭ rihaan sɔ' adonĭ. 'O se sĭj uno rihaan sɔ' me nij so' nānj á.

10 Ne nij sí noco' manj me se noco' nij so' mán sɔ', ne nij sí noco' mán sɔ' ro', noco' manj, ne ăj cavii sa' 'unĭ, qui'yaj nij so' nānj á.

11 Ne nihánj me se nuvi' 'unĭ yáán rihaan chumiĭ nihánj a ma'. 'O se nij sí nihánj yáán rihaan chumiĭ nihánj adonĭ. 'Unĭ me se quĭnán' 'unĭ rej yanĭ sɔ' nānj adonĭ. Dan me se nij sí rqué sɔ' manj me se qui'yáá sɔ' se ndo'o, ne cutumé sɔ' man nij so', che'é rej yo'o cuno nij so' rihaan sɔ', Ataj Chij. Ne cuyaan gaa rá nij so' ga ní' ei.

12 Gaa cayáán 'unĭ ga nij so' me se tumej man nij so' cuno nij so' rihaan sɔ' a. Che'é se rqué sɔ' man nij so' rihanĭ ro', che'é dan ve'é tumej man nij so' a. Ne cunaj cutumej man nij so' adonĭ. Ne ă 'ó nij so' ne ca'anĭ nĭ'ya, qui'yáj ma'. Tzaj ne quene'én sɔ' se vaa ca'anĭ nĭ'ya yo'o tuvi' nij so', ne orún' so' ca'anĭ nĭ'ya, ne dan me se quisĭj ya nu' nānā nō rihaan dáán sɔ' adonĭ.

13 “Nihánj me se quĭnán' 'unĭ rej yanĭ sɔ', ne a'mii 'unĭ nu' nānā nihánj gaa vaj 'unĭ rihaan chumiĭ nihánj, che'é se me raj gaa niha' uxrá rá nij so' ndaa se vaa niha' rá ma'anĭ adonĭ.

14 ăj rquej se-nānā sɔ' rihaan nij so', ne che'é dan táá ri'yunĭ nij sí mān rihaan chumiĭ nihánj nĭ'yaj nij so' man nij sí rqué sɔ' manĭ a. 'O se ase vaa 'unĭ ro', danĭ vaa nij sí rqué sɔ' manĭ, ne nuveé sĭj mān rihaan chumiĭ nihánj me nij so' a ma'.

15 “'O se se cachíin nĭ'yáá 'unĭ se vaa ca'neé sɔ' man nij so' rihaan chumiĭ nihánj ma'. 'O se me rá 'unĭ cutumé sɔ' man nij so' se cunuu chí'ii nimán nij so' a man adonĭ.

16 Dan me se ase vaa 'unĭ vaa nij so', ne nuveé sĭj mān rihaan chumiĭ nihánj me nij so' ma'.

17 Inānj nānā ya cuno nij so', qui'yáá sɔ', gaa ne sa' inānj gaa nij so' rihaan sɔ' á. Ne se-nānā ma'án sɔ' me nānā ya yo' ei.

18 Dan me se ca'néé 'unĭ man nij so' rihaan chumiĭ nihánj, ndaa vaa ca'néé sɔ' man ma'anĭ rihaan chumiĭ nihánj a.

19 Ne nihánj me se inānj qui'yaj sunĭ rihaan sɔ' cavĭ 'unĭ che'é nij so', che'é rej cunuu sa' ya nij so' rihaan sɔ' adonĭ.

20 “Ne nuveé inānj che'é nij sí nihánj me achíin nĭ'yáj rihaan sɔ' a ma'. Tanānj achíin nĭ'yáá 'unĭ che'é nij sí cuno se-nānā sɔ' ne cuchuman rá nĭ'yaj manĭ vaa güii, qui'yaj nij sí nihánj sí nata' se-nānā sɔ' nānj adonĭ.

21 Dan me se, né sɔ' ga 'unĭ, Ataj Chij, ne né 'unĭ ga sɔ' a. Ne 'o rcaa'ān ní', ne dan me se achíin nĭ'yáá 'unĭ che'é taran' nij so' se vaa cuyaan gaa rá taran' nij so' uún, ne yo'o noco' nij so' man ní', ne che'é dan cuchuman rá nij sí mān rihaan chumiĭ nihánj se vaa ca'néé sɔ' manĭ rihaan chumiĭ nihánj a.

22 Ne ase vaa cavii sa' 'un̄j qui'yáá so' ro', dan̄j cavii sa' nij so', qui'yáj, che'é se me rá 'un̄j cyaan̄ gaa rá nij so' ndaa rá se vaa 'yaj ma'an̄ ní' a.

23 Dan me se cayáán 'un̄j gā nij so' ndaa vaa yáán so' gā 'un̄j, gaa ne quisij nij so' nar̄i' nij so' nu' nanā ya, ne ase vaa orún' yuvī ro', dan̄j gaā nij so' a. Ndaa s̄ij, gaā ne quene'en̄ nij síi man̄ rihaan̄ chumīi nihán̄j se vaa ca'née so' man̄j ne 'eē rá so' man̄ nij síi rquē so' man̄j ndaa vaa 'eē rá so' man̄j adon̄j.

24 "Ne xa' nij síi rquē so' man̄j, tzaj ne me rá 'un̄j cayáán̄ nij so' gā 'un̄j rej cayáán̄ 'un̄j, Ataj. 'Q se me rá 'un̄j quene'en̄ nij so' se vaa cavii sa' 'un̄j qui'yáá so' á. 'Q se asij ataa qui'yáá so' chumīi nihán̄j me se aj 'eē rá so' man̄j, ne cavii sa' 'un̄j, qui'yáá so' ei.

25 Ataj Chij, sa' inañ 'yáá so' ei. Tzaj ne ne ne'en̄ nij síi man̄ rihaan̄ chumīi nihán̄j mán so' ma'. Tzaj ne 'un̄j me se quene'en̄j mán so', ne quene'en̄ nij síi nihán̄j se vaa ca'née so' man̄j rihaan̄ chumīi nihán̄j a.

26 Ne cataj xna'an̄j 'un̄j rihaan̄ nij so' daj s̄ij mé so', ne cataj 'un̄j doj rihaan̄ nij so', che'é rej gaā 'eē rá so' man̄ nij so' ndaa vaa 'eē rá so' man̄j, ne cayáán̄ 'un̄j gā nij so' a —taj Jesucristó, cachín̄ ni'yaj so' rihaan̄ Diose a.

## 18

### *Nanā nihán̄j taj xna'an̄j daj guun̄ gaā quita'aā nij tanuu man̄ Jesucristó a*

1 Gaā quisij ca'mii Jesucristó nu' nanā vaa dan̄j, gaā ne cavii so' gā nij síi tucu'yón se-nanā so', ne ca'an̄j nij so' rej xc̄o chraá cu'naj Cedrón, ne cuchi' nij so' 'o naā chruun, ne catúj taran̄' nij so' a.

2 Ne síi cu'naj Judas síi tačuachén man̄ Jesucristó rihaan̄ nij síi taj ri'yun̄j man̄ Jesucristó me se aj quene'en̄ so' rej yo' a. 'Q se aj guun̄ que'eē ndo'o cunuu chre' Jesucristó rej yo' gā nij síi tucu'yón se-nanā so' a.

3 Dan me se nicaj Judas man̄ nij tanuu do', man̄ nij se-mozó nij xrej atā suun̄ noc̄o doj do', man̄ nij se-mozó nij síi fariseo do', ca'an̄j so' rej yo' a. Ne nicaj nij so' aga' ya'an̄ do', ca' acaa do', neē espadá do', nicaj nij so' vaj nij so' rej yan̄j Jesucristó gā nij síi tucu'yón se-nanā so' a.

4 Dan me se quene'en̄ Jesucristó nu' se vaa quiran̄' so', tzaj ne curihan̄j so', ne cataj so' rihaan̄ nij so' a:

—Me síi nano' soj gā —taj so', xna'an̄j so' man̄ nij so' a.

5 Gaā ne cataj nij so' rihaan̄ so' a:

—Nano' núj man̄ Jesús síi cavii chuman' Nazaret a —taj nij so' rihaan̄ Jesucristó a.

—'Un̄j me so' ei —taj Jesucristó rihaan̄ nij so' a.

Dan me se canicun' síi cu'naj Judas gā nij so' 'na' so' gā nij so' a.

6 Dan me se gaā cataj Jesucristó se vaa ma'an̄ so' me síi nano' nij so', gaā ne nu' naxuun̄ nij so' man̄ nij so', ne naxru' nij so' rihaan̄ yo'óo a.

7 Gaā ne xna'an̄j uún̄ Jesucristó man̄ nij so', cataj so':

—Me síi nano' soj gā —taj uún̄ Jesucristó a.

Gaā ne cataj uún̄ nij so':

—Jesús síi cavii chuman' Nazaret a —taj uún̄ nij so' a.

8 Gaā ne cataj Jesucristó:

—Aj cataj xna'an̄j 'un̄j rihaan̄ soj se vaa 'un̄j me so' ei. Sese 'un̄j me síi nano' soj, ne ca'ne' rá soj ca'an̄j nij síi nihán̄j á —taj Jesucristó rihaan̄ nij so' a.

9 Dan̄j ca'mii so' rihaan̄ nij tanuu che'é rej ca'vee quisij yā nu' nanā ca'mii so' rihaan̄ Diose se vaa ne ca'an̄j ni'yā a 'ó nij síi rquē Diose man̄ so' a.

<sup>10</sup> Dan me se nicaj sí cu'naj Simón Pedró neê espadá, ne quirii so' taneê so', ne go' so' raq se-mozó xrej atá suun nocoo doj, ne veé danj güéj nuj xréé so' rej nuva' so', qui'yaj Pedró a. Ne mozó yo' ro', cu'naj Malco a.

<sup>11</sup> Dan me se cataj Jesucristó rihaan Pedró a:

—Na'neja sa' so' taneê so' rque nuj á. Dan me se ase vaa 'o tazá nuu na vinó rque Réj Diosé manj co'oj ro', danj vaa sayuun nihánj rihanj, ne me che'é na'vej rá so' co'oj man yo' ga —taj Jesucristó, xná'anj so' man Pedró a.

*Nana nihánj taj xna'anj se vaa ca'anj nicaj nii man Jesucristó rihaan sí cu'naj Anás a*

<sup>12</sup> Dan me se quita'aa nij tanuu do', sí uun chij rihaan nij tanuu do', nij se-mozó nij sí uun chij rihaan nij yuvií israelitá do', man Jesucristó, ne numíj nij so' ra'a so',

<sup>13</sup> ne asino yaan ca'anj nicaj nij so' man so' rihaan sí cu'naj Anás a. Dan me se sí cu'naj Anás yo' me se rej chej sí cu'naj Caifás me so', ne Caifás me sí guun xrej atá suun nocoo doj yo' yo' a.

<sup>14</sup> Ma'an sí cu'naj Caifás me sí narqué chrej rihaan nij sí uun chij rihaan nij yuvií israelitá se vaa vaa che'é cavi' 'o snó'o che'é cunudanj nij yuvií israelitá yo' a.

*Nana nihánj taj xna'anj se vaa cataj sí cu'naj Pedró se vaa nuveé sij nocoo man Jesucristó me so' a*

<sup>15</sup> Dan me se canoco' Simón Pedró do', yo'ó sí tucu'yón se-nana Jesucristó do', rej xcq Jesucristó a. Ne yo'ó so' me se sij ne'en xrej atá suun nocoo doj man me so', ne catúj so' ga Jesucristó ta'yaa tucua xrej atá suun nocoo doj a.

<sup>16</sup> Ne Pedró me se quináj so' xe' rej nichrunj ta'yaa a. Che'é dan curihanj yo'ó sí tucu'yón se-nana Jesucristó yo', ne ca'mii so' ga chana tumé ta'yaa, ne catúj Pedró uún, qui'yaj so' a.

<sup>17</sup> Dan me se xná'anj chana tumé ta'yaa man Pedró, cataj no':

—Ne nuvé so' me sí tucu'yón se-nana sí nihánj na' —taj no', xná'anj no' man Pedró a.

Ne cataj so':

—Taj ma' —taj Pedró yo' a.

<sup>18</sup> Ne nicun' nij mozó do', nij tanuu do', rej nachráj nii ya'an a. 'O se acoj tiha' rej man nij so', ne cunuu guun nij so' ya'an a. Ne ca'anj Pedró uún cunuu guun ma'an so' ya'an a.

*Nana nihánj taj xna'anj daj ca'mii Jesucristó rihaan sí cu'naj Anás a*

<sup>19</sup> Dan me se sí cu'naj Anás sí cayáan xrej atá suun nocoo doj asij rque doj ro', xná'anj so' man Jesucristó che'é nij sí tucu'yón se-nana Jesucristó do', che'é ma'an nana tucu'yón Jesucristó man nij so' do' a.

<sup>20</sup> Gaa ne cataj Jesucristó rihaan nij so' a:

—'Unj ro', ca'mii ranga' rihaan cunudanj nij yuvií a. Nu' güii tucu'yón 'unj se-nanaj rá ve' tucu'yón ní se-tucuanj Moisés do', rá nuvií nocoo do', ne yo' me rej nuu chre' taran' soj sij uun chij rihaan nij yuvií israelitá a. Ne taj vaj nana ne ca'mii yuve 'unj ma'.

<sup>21</sup> Me che'é xná'anj soj manj ga. Xna'anj soj man nij yuvií cuno nana ca'mij á. Veé nij so' ne'en ya daj ca'mii 'unj nanj ei —taj Jesucristó rihaan sí cu'naj Anás yo' a.

<sup>22</sup> Quisij ca'mii Jesucristó danj, gaa ne coxro yo' o mozó nicun' rej yo' xruu Jesucristó, ne cataj so':

—Me che'é ca'mii so' ðanj rihaan xrej atã suun nocõo doj —taj so', guun yuvãã so' man Jesucristó a.

<sup>23</sup> Gaa ne cataj Jesucristó rihaan so' a:

—Sese ca'mii chi'ii 'unj, ne cataj so' me nana chi'ii ca'mij á. Tzaj ne sese ca'mii sa' 'unj, ne me che'é coxro so' manj ga —taj Jesucristó rihaan mozó coxro man so' a.

<sup>24</sup> Veé yo', gaa ne ca'née sí cu'naj Anás man Jesucristó rihaan sí cu'naj Caifás sí cayáan xrej atã suun nocõo doj, ne veé 'o ðanj numii so' ca'anj so' a.

*Nana nihánj taj xna'anj se vaa yavíj cataj Pedró se vaa nuveé sij nocõ' man Jesucristó me so' ma'*

<sup>25</sup> Dan me se nicun' Simón Pedró cunuu guun so' ya'an a. Gaa ne cataj 'o yuvij rihaan so':

—Nuveé yo'q sí nocõ' man so' mé so' na' —taj yuvij, xná'anj yuvij man so' a.

Ne cataj Pedró:

—Taj ma' —taj so' a.

<sup>26</sup> Gaa ne xná'anj yo'q se-mozó xrej atã suun nocõo doj man so', ne tuvi' sí güéj xréé qui'yaj Pedró me so', ne cataj so':

—Nuveé so' me sí vaj ga Jesucristó rque naã chruun quene'enj na' —taj so', xná'anj so' man Pedró a.

<sup>27</sup> Gaa ne cataj uún Pedró se vaa nuveé tuvi' Jesucristó me so' a. Ne nu' ca'mii so' ðanj, gaa ne nu' caguáq to'loo a.

*Nana nihánj taj xna'anj che'é nana ca'mii Jesucristó ga sí cu'naj Pilato a*

<sup>28</sup> Dan me se nicaj nij mozó do', nij tanuu do', man Jesucristó curihanj nij so' rej ne sí cu'naj Caifás, ne ca'anj nij so' tucua suun a. Na'yaan uxrá me yo' a. Ne ne catuu nij sí israelitá rá tucua suun a ma'. 'O se me rá nij so' cha nij so' cha'anj pascuá, ne che'é dan ne ca'vej rá nij so' guun chi'ii nij so' rihaan Diose qui'yaj tucua suun yo' a.

<sup>29</sup> Che'é dan curihanj ma'an sí cu'naj Pilato rej nicun' nij so' a. Ne xná'anj sí cu'naj Pilato man nij so', cataj so':

—Me cacun' cutã' soj xraá snó'o nihánj, rá soj ga —taj so' rihaan nij yuvij ca'na' ga Jesucristó a.

<sup>30</sup> Gaa ne cataj nij so' rihaan sí cu'naj Pilato a:

—Sese nuveé sij 'yaj chi'ii me sí nihánj, ne ne taçuachén núj man so' ndaa rihaan so' tzaj ma' —taj nij yuvij rihaan sí cu'naj Pilato a.

<sup>31</sup> Che'é dan cataj sí cu'naj Pilato rihaan nij so' a:

—Nícaj soj man so', ne ca'ne' soj cacun' che'é so', qui'yaj soj ndaa vaa tucuaan nocõ' ma'an soj á —taj sí cu'naj Pilato rihaan nij so' a.

—Tzaj ne nõ xcúun so' cavi' so', rá núj, tzaj ne na'vej rá soj sij cavi chuman' Romá ticavi' núj man a 'ó yuvij a ma' —taj nij so' rihaan Pilato a.

<sup>32</sup> Che'é se ca'mii nij so' ðanj ro', che'é dan quisij ya nu' se-nana Jesucristó nana a'mii che'é ðaj qui'yaj nii man so' ticavi' nii man so' a. 'O se orún' nij yuvij man chuman' Romá cachrón rihaan rcutzẽ man yuvij tumé cacun' a.

<sup>33</sup> Dan me se catúj uún sí cu'naj Pilato tucua suun, ne canacúun so' ca'na' Jesucristó, ne xná'anj so' man Jesucristó, cataj so':

—Ma'an so' me sí nicaj suun rey uun chij rihaan nij yuvij israelitá na' —taj sí cu'naj Pilato rihaan Jesucristó a.

<sup>34</sup> Gaa ne xná'anj Jesucristó man so', cataj Jesucristó:

—Ma'án so' cavii raá nana vaa danj ca'mii so' na'. Ase yo'ó yuvij cataj xna'anj rihaan so' che'ej xa' —taj Jesucristó, xná'anj so' man sí cu'naj Pilato a.

<sup>35</sup> Gaa ne xná'anj sí cu'naj Pilato man so', cataj so':

—Sij israelitá mé 'unj, rá so' na'. Ne'én 'unj se-tucuanj soj, rá so' na'. 'O se nij tuví' so' do', ma'an nij xrej atá suun nocgo doj do', tacuachén mán so' rihanj á. Me cacun' tumé so' ga —taj sí cu'naj Pilato, xná'anj so' man Jesucristó a.

<sup>36</sup> Gaa ne cataj Jesucristó:

—'O se nuveé rihaan chumij nihánj me rej uun chij 'unj ma'. Sese rihaan chumij nihánj me rej uun chij 'unj, ne gaa tanuu 'yaj suun rihanj, ne cavii nij tanuu, cunu' nij tanuu, che'é rej se cata'aa nij sí uun chij rihaan nij yuvij israelitá manj tzaj adonj. Tzaj ne nuveé rihaan chumij nihánj me rej guun chij 'unj ma' —taj Jesucristó a.

<sup>37</sup> Gaa ne xná'anj sí cu'naj Pilato man so', cataj so':

—Che'é dan sí nicaj suun rey mé so' na'. Ya na' —taj Pilato, xná'anj so' man Jesucristó a.

Gaa ne cataj Jesucristó rihaan so' a:

—Ya uxrá vaa nana ca'mii ma'án so' se vaa sij nicaj suun rey mej á. Ne nihánj me cataj xna'anj 'unj rihaan so' me che'é ca'ngaa 'unj ne me che'é ca'ná' 'unj rihaan chumij nihánj ei. Dan me se ca'ná' 'unj cataj xna'anj 'unj nana ya rihaan yuvij a. Ne cunudanj nij sí ya ro', uno nana ya a'mij adonj —taj Jesucristó rihaan Pilato a.

<sup>38</sup> Ne cataj Pilato rihaan so':

—A me nana cu'naj nana ya ga —taj Pilato, xná'anj Pilato man Jesucristó a.

*Nana nihánj taj xna'anj daj qui'yaj sí cu'naj Pilato gaa ca'ne' so' cacun' che'é Jesucristó a*

Ne gaa quisij ca'mii sí cu'naj Pilato nana vaa danj ga Jesucristó, ne curihanj uún so' rej nicun' nij sí uun chij rihaan nij yuvij israelitá, ne cataj so' rihaan nij so' a:

—Taj vaj a doj cacun' tumé so' nari' 'unj a ma'.

<sup>39</sup> Tzaj ne vaa yo'ó tucuaán nocgo' ní' se vaa rii 'unj 'o tuví' soj sí 'nij taga' 'o 'o cha'anj pascuá a. Ne me rá soj quirii 'unj man ma'an sí nihánj sí nicaj suun rey uun chij rihaan soj sij israelitá na' —taj sí cu'naj Pilato, xná'anj so' man nij yuvij a.

<sup>40</sup> Che'é dan caguáj uún nij yuvij, cataj nij so':

—Se quirii so' man sí nihánj a ma'. Tananj sí cu'naj Barrabás quirii so' ei —taj nij yuvij, caguáj nij yuvij a.

Ne sí cu'naj Barrabás me se sij guun rá cunu' ga gobiernó me so' a.

## 19

<sup>1</sup> Dan me se nicaj sí cu'naj Pilato man Jesucristó, ne go' nij tanuu cuartá xráa so', qui'yaj Pilato yo' a.

<sup>2</sup> Ne qui'yaj nij tanuu cachriin tanj, ne cuta' nij so' raá Jesucristó, ne na'néé nij so' yatzij tintá sa' ndo'o man Jesucristó a.

<sup>3</sup> Gaa ne cuchi' ndo'o nij so' rihaan Jesucristó, ne cataj nij so':

—Veé sí nicaj suun rey uun chij rihaan nij yuvij israelitá mé so' á —taj nij so', ca'mii tico nij so', ne coxro nij so' xruu Jesucristó a.

<sup>4</sup> Gaa ne curihanj uún sí cu'naj Pilato xe', ne cataj so' rihaan nij yuvij a:

—Ní'yaj soj ei. Curihanj uún so' rihaan soj, qui'yáj, che'é rej xcaj soj cuentá se vaa taj vaj cacun' tumé so' nari' 'unj a man chuguanj —taj Pilato rihaan nij yuvij a.

<sup>5</sup> Gaa ne curihanj Jesucristó xe', ne 'nij raá so' cachriin tanj, ne nuu so' yatzij tintá sa' yo' a. Ne cataj Pilato rihaan nij yuvij a:

—Ní'yaj soj man snó'o nihánj vij —taj Pilato rihaan nij yuvij a.

<sup>6</sup> Dan me se gaa quene'en nij xrej atá suun nocqo doj do', nij se-mozó nij so' do', man Jesucristó, ne caguáj nij so', cataj nij so':

—Cavi' so' rihaan rcutze, qui'yáá so' ei —taj nij so', caguáj nij so' a.

Gaa ne cataj Pilato rihaan nij so' a:

—Nícaj ma'an soj man so' cachron soj man so' rihaan rcutze, sese me rá soj ei. Xa' 'unj, tzaj ne taj vaj a doj cacun' tumé so' nari' 'unj a ma' —taj Pilato rihaan nij so' a.

<sup>7</sup> Gaa ne cataj nij sí uun chij rihaan nij yuvij israelitá no sí cu'naj Pilato:

—Vaa tucuáán nocó' núj, ne tucuáán nocó' núj taj se vaa no xcúún so' cavi' so', che'é rej cataj so' se vaa ta'nij Diose me so' adonj —taj nij so' rihaan Pilato a.

<sup>8</sup> Dan me se gaa cuno sí cu'naj Pilato nana vaa danj, gaa ne doj a cuchu'vi' so'.

<sup>9</sup> gaa ne catúj uún so' tucuá suun, ne xná'anj so' man Jesucristó, cataj so':

—Me rej cavi' so' ga —taj so', xná'anj so' man Jesucristó a.

Tzaj ne ne ca'mij Jesucristó a 'o nana rihaan so' a.

<sup>10</sup> Che'é dan cataj Pilato rihaan so' a:

—Me che'é ne a'mii so' ga. Ne ne'én so' sese 'unj ro', me sí no xcúún quirij mán so' taga', ne vej nó xcúún qui'yaj cachron nij tanuu mán so' rihaan rcutze á. Me che'é ne acaj so' cuentá ga —taj Pilato, xná'anj so' man Jesucristó a.

<sup>11</sup> Gaa ne cataj Jesucristó rihaan so' a:

—Sese nuvé Diose me sí cune' so' catá so' suun nihánj, ne ne guun nucaá so' qui'yáá so' a doj rasuun asuun tzaj ma'. Che'é dan sí tacuachén manj rihaan so' me sí tumé doj cacun' rihaan so' adonj —taj Jesucristó rihaan Pilato yo' a.

<sup>12</sup> Quisij cuno Pilato nana dan, gaa ne nano' so' daj qui'yaj so', gaa ne ca'vee tinanii so' man Jesucristó a. Tzaj ne doj a caguáj nij sí uun chij rihaan nij yuvij israelitá, cataj nij so':

—Sese ca'anj uun sí nihánj, qui'yáá so', ne nuvée tuvi' sí nicaj suun cu'naj César mé so' ma'. 'O se sí nihánj me se sij me rá guun sí nicaj suun rey me so', ne dan me se ca'nee so' suun man sí cu'naj César, rá so', ne sij taj ri'yunij man sí cu'naj César me so' adonj —taj nij so', caguáj nij so' a.

<sup>13</sup> Dan me se gaa cuno Pilato nana vaa danj, gaa ne ca'anj nicaj so' man Jesucristó xe', ne ca'anj cayáán so' rihaan xrúún so' chruun xlá rej ca'ne' so' cacun' che'é yuvij a. Ne rej ne chruun xlá yo' ro', me rej cu'naj Litóstratos xna'ánj griego, ne Gabata cu'naj rej yo' xna'ánj hebreo a.

<sup>14</sup> Dan me se güii 'yaj chuvij nii che'é cha'anj pascuá me yo', ne rej caxuj me yo' a. Ne cataj Pilato rihaan nij sí uun chij rihaan nij yuvij israelitá a:

—Ní'yaj soj ei. Nihánj me sí nicaj suun rey uun chij rihaan soj chuguanj —taj so' rihaan nij yuvij a.

<sup>15</sup> Gaa ne caguáj nij yuvij, cataj nij so':

—Nícaj so' man so', ne ca'anj tanuu cachron nij tanuu man so' rihaan rcutze, qui'yáá so' cuaj ei —taj nij so' rihaan Pilato a.

Ne xná'anj Pilato man nij so', cataj so':

—Ma'an sí nicaj suun rey uun chij rihaan soj cachronj rihaan rcutze, rá soj a na' —taj so', xna'anj so' man nij so' a.

—Taj vaj 'ó rey ma'. Orún' sí cu'naj César me sí uun chij rihaan núj ei —taj nij xrej ata suun nocqo doj a.

<sup>16</sup> Gaa ne tacuachén Pilato man Jesucristó rihaan nij so' cachron nij so' man so' rihaan rcutze a.

*Nana nihánj taj xna'anj daj guun gaa cachron nij tanuu man Jesucristó rihaan rcutze a*

Dan me se ca'anj nicaj nij so' man Jesucristó,

<sup>17</sup> ne ma'an so' cata rcutze, ne cavii so' ca'anj so' rej cu'naj tacaan cúu yave, ne rej yo' ro', cu'naj Gólgota xna'anj hebreo a.

<sup>18</sup> Ne gaa cuchi' nij so' rej yo', gaa ne cachron nij tanuu man so' rihaan rcutze, ne yavij roj so' cachron uún nij tanuu rihaan yavij rcutze uún, ne yo' so' ro', nicun' rej nuva' Jesucristó, ne yo' so' ro', nicun' rej nichrun Jesucristó, ne tanuu nicun' ma'an Jesucristó a.

<sup>19</sup> Ne ca'ne' sí cu'naj Pilato suun, se vaa cano letrá rihaan 'o rcuchra', ne cano rcuchra' yo' raá rcutze, ne letrá yo' taj xna'anj me che'é cavi' Jesucristó a. Ne nihánj me se taj letrá no rihaan rcuchra' yo', se vaa “Sí nihánj me Jesucristó sí cavii chuman' Nazaret, ne sí nicaj suun rey me so', uun chij so' rihaan nij yuvij israelitá”, taj letrá yo' a.

<sup>20</sup> Dan me se nayaa que'ee nij sí israelitá nana yo' a. 'O se nichrun' naj rej cachron nii man Jesucristó rihaan rcutze ga ma'an chuman' Jerusalén yo' a. Ne cachron nii nana yo' xna'anj hebreo do', xna'anj latin do', xna'anj griego do' a.

<sup>21</sup> Che'é dan nij xrej ata suun nocqo doj che'é nij yuvij israelitá ro', cataj nij ro' rihaan sí cu'naj Pilato a:

—Se guun cano letrá se vaa sí nicaj suun rey uun chij rihaan núj sij israelitá me so' ma'. Maan se cataj letrá se vaa ma'an so' cataj se vaa sí nicaj suun rey uun chij rihaan nij yuvij israelitá me so' á —taj nij so' rihaan sí cu'naj Pilato a.

<sup>22</sup> —Aj quisij cachron 'unj nana cachronj nanj á —taj Pilato rihaan nij so' a.

<sup>23</sup> Dan me se gaa quisij cachron nij tanuu man Jesucristó rihaan rcutze, ne nicaj nij so' sagan' Jesucristó, ne cuxra' ta'aj nij so' sagan' ni rihaan danj Diose a: “Cuxra' ta'aj nii sagan' 'unj, ne tico tixaj nii che'é se-cotoó 'unj a”, taj danj Diose a. Dan me se nij tanuu me nij sí qui'yaj danj adonj.

<sup>24</sup> Che'é dan cataj nij tanuu rihaan tuvi' nij so' a:

—Se cuxra' ta'aj ní man cotoó nihánj ma'. Maan se tico tixaj ní se-suerté ní' che'é nihánj, ne quene'en ní' me sí nacaj man cotoó yo' ei —taj nij so' a.

Danj qui'yaj nij so', ne quisij ya nu' nana nihánj nana no rihaan danj Diose a: “Cuxra' ta'aj nii sagan' 'unj, ne tico tixaj nii che'é se-cotoó 'unj a”, taj danj Diose a. Dan me se nij tanuu me nij sí qui'yaj danj adonj.

<sup>25</sup> Ne nichrun' nicun' nii Jesucristó do', chu'vij nii so' do', chana cu'naj Mariá nicaj sí cu'naj Cleofas do', chana cu'naj Mariá Magdalena do', rihaan rcutze no Jesucristó a.

<sup>26</sup> Dan me se quene'en Jesucristó man nii so' do', man sí tucu'yón se-nana so' sí 'ee rá so' man do', se vaa nicun' rcua'aan roj so' rihaan so', ne cataj so' rihaan nii so':

—Sí nihánj guun ta'ní so', nahiin —taj Jesucristó no nii so' a.

27 Gaa ne cataj so' rihaan sí tucu'yón se-nanā so' yo' a:

—Chanā nihánj guun ní so' á —taj so' rihaan sí tucu'yón se-nanā so' yo' a.

Ne maan orá dan guun ní sí tucu'yón se-nanā Jesucristó yo' man ní Jesucristó, ne ca'anj nicaj so' man no' ve' tucua ma'an so' a.

*Nanā nihánj taj xna'anj daj guun gaa cavi' Jesucristó a*

28 Quisíj qui'yaj nij so' danj, gaa ne quene'en Jesucristó se vaa aj quisíj ya nu' se vaa taj danj Diose che'é so' a. Che'é dan cataj so':

—Nacoó 'unj na nanj á —taj so' a.

29 Yanj 'o xruj nuu na vinó yuu rihaan yo'óo, ne nicaj nij so' 'o yataaen esponja, ne tucua'anj nij so' yataaen rque na vinó yuu yo', ne cuta' nij so' raa 'o coj hisopo, ne cachrón nij so' yataaen yo' tu'va Jesucristó a.

30 Ne gaa quisíj co'o Jesucristó na vinó yuu nuu rque yataaen yo', ne cataj so':

—Veé danj navij suun, qui'yáj a —taj so', ne ni'naa raa so', ne ca'ne' rá so', ne cavi' so' a.

*Nanā nihánj taj xna'anj se vaa cho'oj 'o tanuu chruun lanzá x'núú Jesucristó a*

31 Dan me se güii 'yaj chuvii nij sí israelitá chá nij so' cha'anj pascuá me yo', ne güii guee ndo'o me cuetan' a'yuj, 'yaj nij yuvii israelitá, ne ne ca'vej rá nij yuvii yo' canoco' xngá rihaan rcutze güii guee yo' a. Che'é dan me cachíin ni'yaj nij sí uun chij rihaan nij yuvii israelitá rihaan sí cu'naj Pilato se vaa ca'ne' so' suun tucuachran' ní tacóo nij sí noco' rihaan rcutze yo' che'é rej ra'yanj doj cavi' nij so', gaa ne quirii yaníj ní man nij sí cavi' yo' a.

32 Qui'yaj Pilato ndaa vaa cachíin ni'yaj nij so' rihaan so', ne ca'anj nij tanuu, ne asino tucuachran' nij tanuu tacóo yo'óo sí noco' rej x'núj Jesucristó, gaa ne tucuachran' uún nij tanuu tacóo sí noco' ní chrej x'núú Jesucristó uún a.

33 Tzaj ne gaa cuchi' nij so' rej noco' ma'an Jesucristó, gaa ne xcax nij so' cuentá se vaa aj cavi' so', ne che'é dan ne tucuachran' nij so' tacóo so' ma'.

34 Tzaj ne yo'óo tuvi' nij tanuu nicaj xrúún so' chruun taj aga' sihaa raa, ne cho'oj so' x'núú Jesucristó, ne nu' qui'yaj so' danj, ne nu' cavii ndo'o ton do', na do', rej catúj aga' sihaa yo' a.

35 Ne sí taj xna'anj nanā nihánj me se sij quene'en nu' se vaa guun me so', ne ya vaa se-nanā so', ne ne'en so' se vaa ya a'mii so', ne taj xna'anj so' nu' nanā nihánj che'é rej cuchuman rá soj sij nayaa nanā nihánj ni'yaj soj Jesucristó a.

36 'O se guun nu' nihánj che'é rej quisij ya nu' nanā nihánj nanā no rihaan danj Diose, se vaa taj yo': “Se cachran' a 'ó cúu man so' ma’”, taj nanā no rihaan danj Diose a.

37 Ne yo'óo nanā ro', taj: “Ni'yaj nij so' man sí cho'oj ma'an nij so' aga' man a”, taj yo'óo nanā no uún rihaan danj Diose a.

*Nanā nihánj taj xna'anj daj guun gaa cachin' ní man Jesucristó rque yu'uj yujej a*

38 Quisíj qui'yaj nij tanuu danj, gaa ne cachíin ni'yaj sí cu'naj José sí cavii chuman' Arimatea rihaan sí cu'naj Pilato se vaa ca'vej rá sí cu'naj Pilato quirii yaníj so' man Jesucristó a. Ne xa' sí cu'naj José yo', tzaj ne sij tucu'yón se-nanā Jesucristó me so', tzaj ne maan se noco' yuve so' man Jesucristó, che'é se cuhu'vi' so' ni'yaj so' man nij sí uun chij rihaan nij yuvii israelitá



a. Dan me se ca'vej rá síí cu'naj Pilato, ne che'é dan quirii yaníj síí cu'naj José man Jesucristó a.

<sup>39</sup> Ne vaa síí cu'naj Nicodemo uún, ne s'ij cuchi' rihaan Jesucristó rej nií asij rque doj me so', ne ca'anj so' ga síí cu'naj José yo', ne cata so' icó chí' kiló taj doj squíí cu'naj mirra nahej ga se cu'naj áloe a.

<sup>40</sup> Dan me se tananij roj so' man Jesucristó, ne nucutáj roj so' mantá sa' man nu' nee man Jesucristó, ne caraa roj so' mirra do', áloe do', rque mantá yo' a. Dan me se tucuáán nocó' nij yuvií israelitá gaa achin' nij so' man nij síí cavi' qui'yaj roj so' a.

<sup>41</sup> Dan me se nichrun' rej cachrón nií man Jesucristó rihaan rcutzé ro', naj 'o naa chruun, ne rque naa yo' ro', táá yu'uj rque yuvej rej achin' nií xngá a. Tzaj ne yu'uj naca me yo', ne a 'ó xngá ne cachin' nií rque yu'uj yo' ma'.

<sup>42</sup> Dan me se güii 'yaj chuvii nij síí israelitá cha' nij so' cha'anj pascuá me yo', ne nichrun' naj rej taj yu'uj yo' ga rej nicun' rcutzé yo', ne che'é dan cachin' roj so' man Jesucristó rque yu'uj yo' a.

## 20

### *Nana nihánj taj xna'anj daj guun gaa quisíj cunuu i'na' uún Jesucristó a*

<sup>1</sup> Dan me se taxrej cotungó vaa rmi' doj, ne ca'anj chana cu'naj Mariá Magdalena rej taj yu'uj rque yuvej yo', ne quene'en no' se vaa taj yaníj yuvej aráán rihaan yu'uj yo' a.

<sup>2</sup> Che'é dan cunánj no', ne cuchi' no' rihaan síí cu'naj Simón Pedró do', rihaan yo'ó síí tucu'yón se-nana Jesucristó síí 'ee rá Jesucristó man do' a. Ne cataj no' rihaan roj so':

—Quirii nií man síí 'nij ra'a man ní' rque yu'uj nanj á. Ne ne me rej ca'anj nicaj nií man so' a ma' —taj no' rihaan roj so' a.

<sup>3</sup> Che'é dan cavii síí cu'naj Pedró ga yo'ó síí tucu'yón se-nana Jesucristó yo', ne ca'anj roj so' rej taj yu'uj yo',

<sup>4</sup> ne cunánj roj so', ne ra'yanj doj cunánj yo'ó so' rihaan síí cu'naj Pedró, ne so' me síí cuchi' asino yaan doj tu'va yu'uj yo' a.

<sup>5</sup> Gaa ne ni'yaj so' rque yu'uj yo', ne quene'en so' rej naj nij yatzíj, tzaj ne ne catú so' ma'.

<sup>6</sup> Dan me se cuchi' síí cu'naj Pedró síí nocó' xcó so', gaa ne catúj ma'an Pedró rque yu'uj yo', ne quene'en so' rej naj nij yatzíj,

<sup>7</sup> ne quene'en so' vitó aráán raá Jesucristó, tzaj ne nuvi' yo' naj rcua'aan ga yo'ó nij yatzíj a ma'. Tananj rej yaníj quinaj orún' yo', ne nacu'lu' yo' a.

<sup>8</sup> Dan me se catúj uún yo'ó síí tucu'yón se-nana Jesucristó síí cuchi' asino yaan, ne quene'en so' nij yatzíj yo', gaa ne cuchumán rá so' se-nana chana cu'naj Mariá Magdalena yo' a.

<sup>9</sup> 'O se ataa nari' roj so' nana no' rihaan danj Diose se vaa cavi' Jesucristó gaa ne cunuu i'na' uún so' a.

<sup>10</sup> Dan me se cavii uún roj síí tucu'yón se-nana Jesucristó yo', quinan' roj so' a.

### *Nana nihánj taj xna'anj se vaa quene'en chana cu'naj Mariá Magdalena man Jesucristó a*

<sup>11</sup> Ne canicun' chana cu'naj Mariá nichrun' tu'va yu'uj yo', ne ta'vee ndo'o no' a.

12 Ne quene'en no' vj se-mozó Diose nuu yatzíj catzji, ne ne roj so' rej cachin' nii man Jesucristó a. Yo'q so' ne rej raa Jesucristó, ne yo'ó so' ne rej tacoj Jesucristó a.

13 Gaa ne xná'anj roj so' man chana cu'naj Mariá, cataj roj so':

—Me che'é ta'veé sq', ga man nocoj —taj roj so' no no' a.

—Ta'veé 'unj che'é se quirii nii man cúu man síi 'nij ra'a manj, ne ne me rej ca'anj nicaj nii man so' a ma' —taj no' rihaan roj so' a.

14 Sij ca'mii no' danj, gaa ne canicaj no' rej xcq no', ne quene'en no' man Jesucristó, nicun' so' rihaan no' a. Tzaj ne ne cunu yaa no' man Jesucristó a.

15 Gaa ne xná'anj Jesucristó man no', cataj so':

—Me che'é ta'veé sq', ga man nocoj. Me síi nanó' sq' ga —taj Jesucristó no no' a.

Dan me se guun rá no' se vaa sij tumé naa naj yo' me síi ca'mii ga no', rá no', ne che'é dan cataj no':

—Sese quirii yanij so' man so', ne cataj xna'anj so' rihanj me rej ca'anj nicaj so' man so', ne nicaj 'unj man so' ca'anj 'unj á —taj no' rihaan síi nicun' rihaan no' a.

16 Gaa ne cataj Jesucristó:

—Mariá —taj so' a.

Canicaj no', cataj no':

—Raboni —taj no' rihaan so' xna'ánj hebreo, ne dan me se “maestró” me se taj nana ca'mii no' rihaan so' a.

17 Gaa ne cataj Jesucristó rihaan no' a:

—Ca'ne' rá so', se catzií so' doj manj ma'. 'O se ataa cavii uún 'unj quínán' 'unj rihaan Réj Diose, ne me rá 'unj ca'anj so' rihaan nij tinúú 'unj ne cataj xna'anj so' rihaan nij so' se vaa cavii 'unj quínán' 'unj rihaan Réj, ne so' me se Rej soj me uún so', ne Diose síi noco' 'unj me so', ne Diose síi noco' soj me uún so' adonj —taj Jesucristó rihaan chana cu'naj Mariá a.

18 Dan me se ca'anj chana cu'naj Mariá Magdalena, ne nata' no' rihaan nij síi tucu'yón se-nana Jesucristó se vaa quene'en no' man síi 'nij ra'a man ní', ne nata' no' nij nana cataj Jesucristó rihaan no' a.

*Nana nihánj taj xna'anj daj guun gaa cuchi' Jesucristó rihaan nij síi tucu'yón se-nana so' a*

19 Dan me se rej ti'nuu ma'an güii cotungó yo' me se caráan nij síi tucu'yón se-nana Jesucristó ta'yaa rihaan ve' man nij so', che'é se cuhu'vi' nij so' ni'yaj nij so' nij síi uun chij rihaan nij yuvii israelitá a. Gaa ne ca'na' Jesucristó, ne canicun' so' tanuu rej man nij so', ne cataj so':

—Gaa dínj nimán soj ei —taj Jesucristó rihaan nij so' a.

20 Quisíj ca'mii so' danj, gaa ne tihaan so' ra'a so' tihaan so' x'núú so' tihaan so' rihaan nij so' a. Gaa quene'en nij so' nu' yo', gaa ne guun niha' uxrá rá nij síi tucu'yón se-nana so' ni'yaj nij so' man síi 'nij ra'a man ní' a.

21 Dan me se yuún ca'mii Jesucristó rihaan nij so', cataj so':

—Gaa dínj nimán soj ei. Ase vaa ca'neé Réj manj ro', danj gaa ca'nej 'unj man soj nu' rihaan chumiij nihánj adonj —taj Jesucristó rihaan nij so' a.

22 Quisíj ca'mii Jesucristó danj, gaa ne ca'yánj Jesucristó rihaan nij so', ne cataj so':

—Nicaj soj Nimán Diose nihánj á.

<sup>23</sup> Ne sese cataj soj se vaa navij cacun' tumé me ma'an yuvij, ne quinavij nu' cacun' tumé so' a. Ne sese cataj soj se vaa se quinavij cacun' tumé me ma'an yuvij, ne veé danj gaa quitaj nu' cacun' tumé so' xraá so' nu' cavii nu' ca'anj uún a —taj Jesucristó rihaan nij sí tucu'yón se-nana so' a.

*Nana nihánj taj xna'anj daj guun gaa quene'en sí cu'naj Tomás man Jesucristó a*

<sup>24</sup> Dan me se yo'q tuvi' chuvij nij sí tucu'yón se-nana Jesucristó me sí cu'naj Tomás, ne yo'ó se-chuvii so' me Dídimó a. Ne nuvi' so' ne ga yo'ó nij so' gaa cuchi' Jesucristó rihaan yo'ó nij so' ma'.

<sup>25</sup> Che'é dan cataj xna'anj yo'ó nij sí tucu'yón se-nana Jesucristó rihaan Tomás se vaa quene'en nij so' man sí 'nj ra'a man ní a. Tzaj ne cataj Tomás rihaan nij so' a:

—Sese se quene'en ma'anj rej catúj caquí ra'a so', ne sese se cutaj ra'aj rej catúj caquí ra'a so' do', sese se cutaj ra'aj rej quiran' chi'ij x'núú so' do', ne daj chihaa mǐ se cuchumán raj se vaa cunuu i'na' uún so' ma' —taj sí cu'naj Tomás rihaan nij so' a.

<sup>26</sup> Dan me se cachén tunj güii, ne mán uún nij sí tucu'yón se-nana Jesucristó, ne ne sí cu'naj Tomás ga nij so', ne dan me se raan nij ta'yaa, tzaj ne taj ni'yón, ne naruvi' Jesucristó tanuu yan man nij so' a. Ne cataj so':

—Gaa dínj nimán soj ei —taj so' rihaan nij so' a.

<sup>27</sup> Gaa ne cataj so' rihaan sí cu'naj Tomás a:

—Tucua'anj so' ra'á so' nihánj, gaa ne xcaj so' cuentá daj vaa ra'aj, ne cuta' so' ra'á so' x'núú 'unj nihánj rej catúj chruun lanzá, gaa ne guun ya ya rá so' se vaa cunuu i'na' uún 'unj á. Cuchumán rá so', ni'yaj so' manj á —taj so' rihaan sí cu'naj Tomás a.

<sup>28</sup> Gaa ne cataj sí cu'naj Tomás rihaan so' a:

—So' me sí 'nj ra'a manj, ne so' me Diose sí nocoj adonj —taj so' rihaan Jesucristó a.

<sup>29</sup> Gaa ne cataj Jesucristó rihaan so' a:

—Uun daj quene'en ya so' manj, gaa ne amán rá so' ni'yaj so' manj nanj á. Tzaj ne vaa che'é guun niha' rá nij sí ne quene'en manj ne amán rá ni'yaj manj ei. 'Q se cavii sa' ya nij so' adonj —taj Jesucristó rihaan sí cu'naj Tomás a.

*Nana nihánj taj xna'anj me che'é cachrón sí cu'naj Juan yanj nihánj a*

<sup>30</sup> Dan me se vaa uxrá yo'ó nij suun sa' nocoo qui'yaj suun Jesucristó quene'en nij sí tucu'yón se-nana so', tzaj ne taj vaj nana che'é yo'ó nij suun sa' nocoo yo'ó ní rihaan yanj nihánj,

<sup>31</sup> tzaj ne no nana nihánj rihaan yanj nihánj che'é rej yo'q cuchumán rá soj sij nayaá nana nihánj se vaa Jesucristó ro', me sí ca'née Diose tinanii man yuvij rihaan sayuun, ne ta'nij Diose me ya uún so' ei. Ne che'é se amán rá soj ni'yaj soj man so' ro', che'é dan gaa i'na' nimán soj rihaan Diose nu' cavii nu' ca'anj che'é ma'an Jesucristó chuguanj.

## 21

*Nana nihánj taj xna'anj se vaa nari' tuvi' uún Jesucristó ga chij nij sí tucu'yón se-nana so' a*

<sup>1</sup> Cachén doj, gaa ne cuchi' uún Jesucristó rihaan nij sí tucu'yón se-nana so' rej nuu na lacuaná cu'naj Tiberias a. Ne nihánj me se vaa qui'yaj so' a.

<sup>2</sup> Aj cunuu chre' síi cu'naj Simón Pedró do', síi cu'naj Tomás Dídimó do', Natanael síi cavii chuman' Caná chuman' naj estadó Galilea do', roj ta'níi síi cu'naj Zebedeo do', yavíj síi tucu'yón se-nānā Jesucristó do' a.

<sup>3</sup> Gaa ne cataj Simón Pedró rihaan yo'ó nij so' a:

—Ca'anj 'unj tiguúj 'unj nanj rque na quiríj xcuaj, raj chuguanj —taj so' rihaan nij so' a.

—Ca'anj ní' chihā —taj yo'ó nij so' rihaan Simón Pedró a.

Gaa ne cavii nij so' catúj nij so' rque rihoo chéé rihaan na, ne nigan' qui'yaj suun nij so', tzaj ne ā 'ó xcuaj ne quirí' nij so' ā ma'.

<sup>4</sup> Dan me se taxrej yo'ó güii me se nicun' Jesucristó tu'va na lacuaná yo' a. Tzaj ne ne quene'en nij síi tucu'yón se-nānā so' se vaa ma'an so' me yo' ā ma'.

<sup>5</sup> Dan me se cataj Jesucristó rihaan nij so' a:

—Vaa doj se chá rihaan soj na' —taj Jesucristó, xná'anj so' man nij so' a.

Taj ma' —taj nij so' a.

<sup>6</sup> Gaa ne cataj Jesucristó rihaan nij so' a:

—Tiguúj soj nanj rque na rej x'nuj rihoo rej nuva' rihoo, ne quirí' soj xcuaj ei —taj Jesucristó rihaan nij so' a.

Che'é dan tiguúj nij so' nanj ndāa vaa cataj Jesucristó, ne caraa nu' nanj, qui'yaj xcuaj, ne ne guun nucuaj nij so' cuxuun nij so' nanj ā ma'.

<sup>7</sup> Che'é dan ca'mii 'o síi tucu'yón se-nānā Jesucristó síi 'ee rá Jesucristó man rihaan Pedró, cataj so':

—Síi 'nij ra'a man ní' me yo' ei —taj so' a.

Dan me se cuno Simón Pedró nana se vaa síi 'nij ra'a man ní' me yo', gaa ne che'é se aj quirii so' se-co'toó so', che'é dan nanuū ra'yānj so' se-co'toó so', gaa ne tagüéj so' man so' rihaan na yo' a.

<sup>8</sup> Tzaj ne yo'ó nij so' ro', quináj rque rihoo yo', ne tiguúj nij so' chruun man rihoo yo', ne nicaj nij so' rihoo ca'anj nij so' ndāa tu'va na lacuaná yo', ne orún' cientó metró tiguúj ra'a nij so' man rihoo rque na, ne cuxuun nij so' nanj caraa xcuaj yo' rej tu'va na a.

<sup>9</sup> Ne nu' cuchí' nij so' rihaan yo'óó, ne quene'en nij so' 'o ya'an nachráj Jesucristó, ne táa nee xcuaj do', rachrúun do', ruvaj yo' a.

<sup>10</sup> Gaa ne cataj Jesucristó rihaan nij so' a:

—Nīcaj soj doj xcuaj quirii soj ca'nā' soj ei —taj Jesucristó rihaan nij so' a.

<sup>11</sup> Che'é dan cavii Simón Pedró, ne cuxuun so' nanj yo' rihaan yo'óó a. Ne caraa 'o cientó táa yavíj chihāā cha'nuj xcuaj rque nanj yo' a. Ne ndā' se 'ee ndo'o nij xcuaj, tzaj ne ne sīn' nanj ma'.

<sup>12</sup> Gaa ne cataj Jesucristó rihaan nij so' a:

—Cuvā' soj, chá ruvá soj ei —taj so' rihaan nij so' a.

Ne ā 'ó nij síi tucu'yón se-nānā Jesucristó ne quisíj rá xnā'anj man so' me síi me so' a. 'O se aj quene'en nij so' se vaa síi 'nij ra'a man ní' me yo' a.

<sup>13</sup> Gaa ne ca'na' Jesucristó, ne nicaj so' rachrúun do', nee xcuaj do', rque so' man nij so' a.

<sup>14</sup> Dan me se quisíj va'nuj nari' tuvi' Jesucristó gā nij síi tucu'yón se-nānā so' gaa cunuu i'nā' uún so' a.

<sup>15</sup> Dan me se gaa quisíj chá ruvá nij so', ne xnā'anj Jesucristó man Simón Pedró, cataj so':

—Cunó sq' ca'mij, Simón ta'níi Jonás. Doj ā 'ee rá so' manj rihaan nij síi nihánj na' —taj Jesucristó, xná'anj so' man Pedró a.

—Ne'en ma'án so' se vaa 'ee raj mán so', Señor —taj Pedró rihaan Jesucristó a.

—Ve'é rque so' chá daán 'unj matzinj á —taj Jesucristó ni'yaj Jesucristó nu' nij síi noco' man so' a.

16 Gaa ne xná'anj uún Jesucristó man Pedró, cataj so':

—Cunó so' ca'mij, Simón ta'níi Jonás. 'Ee rá so' manj na' —taj uún Jesucristó rihaan Pedró a.

—Ne'en ma'án so' se vaa 'ee raj mán so', Señor —taj uún Pedró rihaan Jesucristó a.

—Ve'é tumé so' man daán 'unj matzinj á —taj uún Jesucristó, ni'yaj so' nu' nij síi noco' man so' a.

17 Gaa ne cataj uún Jesucristó rihaan Pedró:

—Cunó so' ca'mij, Simón ta'níi Jonás. 'Ee rá so' manj na' —taj uún Jesucristó, ne veé danj quisij va'nuj xná'anj so' danj man Pedró a.

Dan me se quinanó rá Pedró che'é se quisij va'nuj xná'anj Jesucristó danj man so' a. Gaa ne cataj uún so' rihaan Jesucristó a:

—Ne'én so' cunudanj, Señor. Ma'án so' ne'en se vaa 'ee raj mán so' ei —taj Pedró rihaan Jesucristó a.

—Ve'é rque so' chá daán 'unj matzinj á.

18 Cuanō nihánj me se cataj yá yá 'unj rihaan so' se vaa gaa mé so' síi tachruu, ne numij ma'án so' yatzi j catuún so', ne chéé so' me rej me ma'an guun rá so', tzaj ne asa' guun chij so', ne ticún' so' ra'á so', ne yo'ó so' numij catuún so', ne nica j so' mán so' ca'anj so' me rej me ma'an rá so' ca'anj so', ne nda' se na'vej rá so' ca'anj so', tzaj ne vaj so' ei —taj Jesucristó rihaan Pedró a.

19 Ne nana cataj Jesucristó rihaan Pedró, tzaj ne nana yo' taj xna'anj se vaa ticavi' nii man so', ne ca'mij sa' yuvi che'é Dióse, qui'yaj so' a.

Gaa ne cataj uún Jesucristó rihaan Pedró a:

—Yo'ō canocó' so' manj ei —taj Jesucristó rihaan so' a.

20 Gaa ne canicaj Pedró, ne quene'en so' man yo'ó síi tucu'yón se-nana Jesucristó síi 'ee rá Jesucristó man a. So' ro', me síi cayáan rej x'nuj Jesucristó gaa chá xti'nō nij so' gaa rque, ne so' me síi xná'anj man Jesucristó me síi tačuachén man Jesucristó rihaan nij síi taj ri'yunj man Jesucristó gaa chá xti'nō nij so' gaa rque a.

21 Dan me se gaa quene'en Pedró man síi 'ee rá Jesucristó man yo', ne xná'anj so' man Jesucristó, cataj so':

—Daj quiran' síi nihánj ga, Señor' —taj so' rihaan Jesucristó a.

22 Gaa ne cataj Jesucristó rihaan so' a:

—Ne sese me rá 'unj yo'ō gaa i'na' so' rihaan chumij ndaa se ca'na' uún 'unj rihaan chumij nihánj, ne nuveé se-suun ma'án so' me yo' ma'. Yo'ō canoco' ma'án so' manj ei —taj Jesucristó rihaan Pedró a.

23 Che'é dan cha'nuu nana nihánj sca'nú j nij tinuj nij so', ne guun rá nij so' se vaa daj chihaa mij se cavi' síi tucu'yón se-nana Jesucristó yo' a. Tzaj ne ne cataj Jesucristó se vaa ya ya se cavi' so' ma'. Maan se cataj uun so' nana: “Sese me rá 'unj yo'ō gaa i'na' so' rihaan chumij ndaa se ca'na' uún 'unj rihaan chumij nihánj”, me nana ca'mii Jesucristó a.

24 Dan me se síi tucu'yón se-nana Jesucristó nihánj me se so' me síi cataj xna'anj che'é nu' rasuun nō rihaan yanj nihánj, ne so' me síi cachrón nana

rihaan yanj che'é rasuun nihánj, ne ne'en núj se vaa ya uxrá nu' vaa nana cataj xna'anj so' ei.

<sup>25</sup> Ne vaa que'eej doj rasuun qui'yaj uún Jesucristó, tzaj ne sese cachrón nii nu' nana che'é 'o 'o nij rasuun rihaan yanj nihánj, ne se quisíj chumiij nihánj cumañ cunudanj nij yanj libró yo' rihaan chumiij nihánj, rá 'unj a ma'.

## Yanj nihánj taj xna'anj daj qui'yaj nij apóstol cune' Jesucristó man nata' se nana so' rihaan yuviij a

*Nana nihánj taj xna'anj daj ca'mii Jesucristó rihaan nij apóstol cune' so' man nata' se nana so' rihaan yuviij gaa ataa quinan' Jesucristó xta' a*

<sup>1-2</sup> Dan me se yanj ca'néé 'unj rihaan so' asij rque me se rihaan yo' cachrón 'unj nana che'é nu' se vaa qui'yaj Jesucristó do', che'é nu' nana tucu'yón Jesucristó do', asij tacoo, ndaa se quinan' so' xta', qui'yaj Diose a. Dan me se asino ca'ne' so' suun rihaan nij apóstol cune' so' man nata' se nana so' rihaan yuviij, ndaa vaa cataj Nimán Diose rihaan so', gaa ne quinan' so' xta', ne dan me se nu' nana che'é yo' me cachronj rihaan yanj ca'néj rihaan so', Teófilo.

<sup>3</sup> Dan me se gaa quisíj cavi' Jesucristó rihaan rcutze, gaa ne guun que'ee tihaan so' man so' rihaan nij apóstol yo', che'é rej guun ya rá nij so' se vaa ya cunuu i'na' uún so' a. Dan me se vij chihaa ya güii quene'en nij apóstol man so', ne ca'mii ndo'o so' ga nij apóstol che'é rej guun chij Diose rihaan chumiij nihánj a.

<sup>4</sup> Ne gaa vaj so' ga nij apóstol, ne cataj xna'anj so' rihaan nij so' se vaa: —Yo'q cumañ soj chuman' Jerusalén nihánj, ne se cavii soj ca'anj soj ma'. Maan se na'vij soj ca'na' se vaa cata' tu'va Réj Diose se vaa rque so' man soj, ndaa vaa cataj xna'anj ma'anj rihaan soj a.

<sup>5</sup> Q se Juan ro', me síi cuta' ne man yuviij na uun, ne xa' soj, tzaj ne ma'an Nimán Diose catuu nimán soj rque doj güii adonj —taj Jesucristó rihaan nij apóstol cune' so' man nata' se nana so' rihaan yuviij a.

<sup>6</sup> Ne dan me se cunuu chre' nij apóstol rihaan Jesucristó, ne xná'anj nij so' man Jesucristó a:

—Ne yaj me se guun chij uún ní' sij israelitá rihaan chiháán ní', qui'yáá so' na'. Cataj so' rihaan núj, Señor —taj nij so' rihaan Jesucristó a.

<sup>7</sup> Tzaj ne cataj Jesucristó rihaan nij so' a:

—Diose ro', me síi no' xcúun cachron güii qui'yaj so' se vaa qui'yaj so' ei. Nuveé se suun soj me suun yo' ma'.

<sup>8</sup> Tzaj ne asa' catúj Nimán Diose nimán soj, ne quirí' ndo'o soj rej nucuj, gaa ne guun soj síi nata' se nanaj rihaan yuviij adonj. Dan me se nu' chuman' Jerusalén do', nu' estadó Judea do', ndaa chuman' Samaria do', ca'vee se ndaa chuman' gan' doj naj rihaan chumiij nihánj, tzaj ne ca'anj soj nata' soj se nanaj adonj —taj Jesucristó rihaan nij so' a.

<sup>9</sup> Dan me se quisíj ca'mii Jesucristó danj rihaan nij so', gaa ne ni'yaj nij so' man so', ne dan me se cavii so' xta', qui'yaj Diose, ne catúj so' rque ngaa, ne ne ca'vee quene'en nij so' man so' a ma'.

<sup>10</sup> Dan me se ni'yaj uxrá nij apóstol rej xta' rej vaj Jesucristó, tzaj ne ne ne'en nij so' daj guun, ne aj nicun' vij síi nuu yatzíj catziij x'núú nij so' nanj ei.

<sup>11</sup> Gaa ne cataj roj snó'o yo' a:

—Me che'é yo'q nicun' soj sij cavii estadó Galilea ni'yaj soj xta' ga. Jesucristó me se ne'en soj se vaa cavii so' quinan' so' xta', qui'yaj Diose, ne ase vaa cavii so' xta' ro', danj qui'yaj uún so' nanij so' ca'na' so' rihaan chumiij nihánj adonj —taj roj síi nuu yatzíj catziij rihaan nij apóstol yo' a.

*Nana nihánj taj xna'anj daj qui'yaj nii gaa narii nii 'o síi nayon rihaan síi cu'naj Judas a*

12 Dan me se tanáj nij apóstol quij cu'naj Quij man Chruun Olivó, ne ca'anj nij so', ne namán uún nij so' chuman' Jerusalén a. Dan me se 'o kilómetro ca'anj nij so',

13 ne gaa catúj nij so' chuman', ne cavii nij so' xta' ve' tucúa nij so' ve' nata' a. Ne nij so' ro', me Pedró do', Juan do', Jacobo do', Andrés do', Felipé do', Tomás do', Bartolomé do', Mateo do', Jacobo ta'níi Alfeo do', Simón síi guun tuvi' ga nij síi me rá cunú' ga gobiernó man Romá do', Judas tinúú Jacobo do' a.

14 Dan me se yo'q vaa rá taran' nij so', ne yo'q achíin ni'yaj nij so' rihaan Diose a. Danj qui'yaj nij so' ga nij chana do', ga Mariá nii Jesucristó do', ga nij tinúú Jesucristó do' a.

15 Ne güii dan me se canicun' Pedró tanuú nij tinuj nij so', ne ca'mii so' rihaan nij so' a. Dan me se cientó táa 'ó icó yuvií me nij yuvií cunuu chre' rej man nij so' a.

16 Dan me se cataj Pedró rihaan nij so' a:

—Aj quisíj ya nu' nana no rihaan danj Diose nana rqué Nimán Diose ca'mii síi cu'naj David nana a'mii che'é síi cu'naj Judas, tinuj, nocej. Ne dan me se ya ya guun so' síi racu'j man nij síi quita'aa man Jesucristó se vaa ca'vee nari' nij so' man Jesucristó, qui'yaj Judas a.

17 Ne yo'q tuvi' núj apóstol guun so', ne cata so' se suun núj a.

18 "Dan me se nicaj so' sa'anj cacun' qui'yaj canaán ma'an so', ne quiri' so' 'o yo'óo, qui'yaj yo' a. Gaa ne dan me se naxru' so' rihaan yo'óo, ne canuu rque so', ne cavii xri' so' cayuu yo' rihaan yo'óo a.

19 Ne nihánj me nana cachén nu' rque chuman' Jerusalén, ne che'é dan tucu'náj nij síi man Jerusalén Acéldama man yo'óo yo' a —taj Pedró rihaan nij so', ne nana Acéldama ro', me se xna'anj nij so', ne nana yo' taj Yo'óo Ton a. Dan me se cataj uún Pedró—

20 'Q se rihaan yanj chra' nó nana taj se vaa: "Cunuu taqaan rej cane so', ne se cayáan a doj yuvií rej yo' ma'", taj yanj chra' yo', ne taj uún yo': "Se suun so' ro', naca'j yo'óo so' á", taj uún yanj yo' a.

21-22 "Che'é dan vaa che'é cata yo'óo tinúú ní' suun ga núj se vaa nata' so' rihaan yuvií se vaa ya cunuu i'na' uún Jesucristó, ndaa vaa 'yaj núj a. Tzaj ne inanj síi chéé ga núj sij apóstol gaa vaj Jesucristó ga núj me síi no xcúun cata suun yo' a. Dan me se síi quene'en asij cuta' ne Juan man Jesucristó ndaa se cavii Jesucristó xta' qui'yaj Diose do', me síi no xcúun guun tuvi' núj sij apóstol adonj —taj Pedró rihaan cunudan' nij síi cunuu chre' a.

23 Gaa ne dan me se narii nij so' man vjj snó'o, ne yo'q so' ro', me síi cu'naj José, ne Barsabás cu'naj uún so', ne Justo tucu'náj nii man so' a. Ne yo'óo so' ro', me síi cu'naj Matías a.

24 Gaa ne cachíin ni'yaj taran' nij so' rihaan Diose, cataj nij so':

—Ne'én so' daj vaa nimán cunudan' yuvií, Señor. Che'é dan t̄haán so' me roj tuvi' síi nihánj narii so'

25 se vaa cata so' suun nihánj ne guun so' apóstol nata' se nana Jesucristó rihaan yuvií a. 'Q se ca'anj yanj síi cu'naj Judas, tanáj xco so' suun nihánj, ne ca'anj so' ndaa rej no xcúun so' ca'anj so' a —taj nij yuvií, cachíin ni'yaj nij yuvií rihaan Diose a.



<sup>26</sup> Gaa ne tico tixaj nij so' me roj so' qui'yaj canaán, ne síi cu'naj Matías me síi qui'yaj canaán, ne che'é dan guun tuvij' so' ga yo'ó xaan nij apóstol cune! Jesucristó man nata' se nana so' rihaan cunudanj nij yuvij man rihaan chumij a.

## 2

*Nana nihánj taj xna'anj se vaa ca'na' Nimán Diose rihaan nij síi noco' man Jesucristó a*

<sup>1</sup> Dan me se cachén cha'anj pascuá, ne cachén yavij chihaa chij' güii, ne quisij cha'anj Pentecostés a. Ne güii dan me se cunuu chre' cunudanj nij síi noco' man Jesucristó rá 'o ve',

<sup>2</sup> ne taj ni'yón cuno taran' nij síi ne rá ve' se vaa nayuu rá ve', ne daj se uun rá unó' nana yuvaá avij rej xta' ro', danj guun rá nij so' gaa nayuu rá ve' a.

<sup>3</sup> Gaa ne quene'en nij so' rasuun, ne ase vaa yaa ya'an cuxra' ta'aj vaa rasuun quene'en nij so', ne quitáa rasuun yo' raá 'o 'o nij so' a.

<sup>4</sup> Gaa ne dan me se caraa Nimán Diose nimán taran' nij so', gaa ne guun che'e nij so' nucuaj ca'mii nij so' xna'ánj ino vaa, ne ndaa vaa xna'ánj ca'vee ca'mii 'o 'o nij so' qui'yaj Nimán Diose, danj inanj ca'mii nij so' a.

<sup>5</sup> Dan me se güii dan cumán ndo'o yuvij israelitá chuman' Jerusalén, ne síi me ya rá canoco' man Diose me nij yuvij israelitá yo', ne síi cavii nu' chuman' naj rihaan chumij me uún nij so' a.

<sup>6</sup> Dan me se cuno nij yuvij israelitá yo' se vaa cuno nij síi noco' man Jesucristó ne rá ve' yo', ne che'é dan cunuu chre' nij yuvij israelitá rihaan ve' yo', ne ca'anj ndo'o rá nij so' se vaa guun a. 'O se 'o 'o nij yuvij israelitá yo' ro', cuno se vaa ca'mii nij síi noco' man Jesucristó xna'ánj a'mii 'o 'o nij yuvij israelitá yo' a.

<sup>7</sup> Dan me se caráya'anj uxrá nij yuvij, ne cataj nij yuvij yo':

—Ni'yaj soj ei. Xa' nij síi nicun' a'mii nihánj, tzaj ne sjj cavii estadó Galilea me cunudanj nij so' á.

<sup>8</sup> Ne asa' a'vee uno 'o 'o ní' se vaa a'mii nij so' xna'ánj a'mii ma'an nii ní' rihaan ní' ga.

<sup>9</sup> Dan me se ma'an ní' me síi cavii Partia do', Media do', Elam do', Mesopotamia do', Judea do', Capadocia do', Ponto do', Asia do',

<sup>10</sup> Frigia do', Panfilia do', Egiptó do', rej Libia naj nichrun' Cirene do', ne ta'aj ní' me síi ne chuman' Romá uún a. 'O se ta'aj ní' me yuvij israelitá, ne yo'ó ta'aj ní' me nij síi yanij guun tuvij' ga nij síi israelitá a.

<sup>11</sup> Ne vaa síi cavii Creta do', Arabia do', uún a. Ne nihánj me se ndaa uno 'o 'o ní' se xna'anj ní', 'yaj nij so' a'mii nij so', ne nata' ndo'o nij so' se vaa sa' uxrá vaa Diose á —taj cunudanj nij yuvij yo' a.

<sup>12</sup> Dan me se caráya'anj uxrá cunudanj nij yuvij israelitá yo', ne ne ca'vee xcax nij so' cuentá daj me che'é guun danj a. Ne ta'aj nij so' xna'anj man tuvij, cataj nij so':

—Me che'é guun nu' danj ga —taj ta'aj nij so' a.

<sup>13</sup> Ne yo'ó ta'aj nij so' ca'nga' nacoo, ne cataj nij so':

—Cachén ndo'o co'o nij síi nihánj na vinó naca nanj chuguanj —taj nij síi ca'nga' nacoo yo' a.

*Nihánj me nana nata' Pedró rihaan nij yuvij a*

14 Gaa ne dan me se canicun' sí cu'naj Pedró ga yo'ó xaan nij apóstol cune' Jesucristó man nata' se nana so' rihaan yuvij, ne nucuaj ndo'o ca'mii Pedró ne nata' so' nana nihánj a:

—Soj sij israelitá do', cunudanj soj sij ne chuman' Jerusalén nihánj do', nana xrej soj nana ca'mij rihaan soj, ne xcaj soj cuentá che'e rasuun nihánj ei.

15 Ne guun xno núj ndaa vaa guun rá ta'aj soj ma'. 'O se xcaj soj cuentá, ne tihaj aga' uun rej na'yaan me nihánj ei.

16 Tzaj ne nu' nihánj ro', me se vaa cataj sí cu'naj Joel sí nata' se nana Diose gaa naá qui'yaj Diose a. Dan me se cataj sí cu'naj Joel:

17 “Nihánj me a'mii ma'an Diose rihaan soj, ne taj Diose se vaa asa' nichrun' ca'anj ni'ya chumij nihánj, ne ca'nej ndo'o 'unj Nimán 'unj nimán yuvij man rihaan nu' chumij, ne ta'ní soj ro', nata' nana rque 'unj man ma'an nij so' a. Ne nij sí tachruu ro', naqui'ya ndo'o rasuun rihaan nij so', qui'yáj, ne nij chii nga ro', ca'mij ndo'o nej rihaan nij so', qui'yáj adonj.

18 Dan me se güii yo' caraj Nimanj nimán nij sí nuu rihanj do', nimán nij chana nuu rihanj do', ne nata' nij so' se nanaj adonj.

19 Dan me se gaa ndo'o rasuun nocoo quene'en soj rej xta', qui'yáj, ne gaa ndo'o rasuun nocoo quene'en soj rihaan yo'óo, qui'yáj, ne quene'en soj ton do', ya'an do', catze' do' a.

20 Ne guun rmi' rihaan güii, ne rihaan yavii ro', guun ton, asa' nichrun' quisij güii sa' güii ca'ne' 'unj sij 'nij ra'a man soj cacun' che'é yuvij a.

21 Ne me ma'an sí cachinj ni'yaj rihaan 'unj, ne quinanj so' rihaan sayuun adonj”. Nihánj me se nana Diose nana ca'mii sí cu'naj Joel gaa naá ei.

22 “Ne cuano nihánj me se cuno soj sij israelitá nana nihánj ei. Dan me se aj ne'en nij soj daj qui'yaj Jesucristó sí cavii chuman' Nazaret, se vaa guun nucuaj so' qui'yaj ndo'o so' suun sa' nocoo quene'en soj, qui'yaj Diose adonj. Ne dan me se xcaj soj cuentá daj sij me so', qui'yaj Diose á.

23 Dan me se tucuachén nii man so' rihaan nij sí taj ri'yunj man so', gaa ne dan me se cacrón nij sí ne noco' man Diose man so' rihaan rcutze, ne cavi' so', qui'yaj ma'an soj a. Ne nu' nihánj me se vaa 'o guun rá Diose quiran' so', ne aj quene'en Diose se vaa quiran' so' danj ei.

24 Tzaj ne qui'yaj Diose se vaa ne ca'vee yuun che'e cavi' so', ma'. Tzaj ne cunuu i'na' uún so', qui'yaj Diose, che'é se ne ca'vee yuun che'e cavi' so' daj chihaa mij a man adonj.

25 “'O se nihánj me nana ca'mii sí cu'naj David che'é Jesucristó a: “Quene'en 'unj daj quiranj rej rihanj, ne xcaj 'unj cuentá se vaa yo'ó canicun' sí 'nij ra'a manj rihanj nanj á. 'O se nicun' so' rej x'nuj, ne se ca'vee naxruj, qui'yaj so' ma'.

26 Che'é dan guun niha' ndo'o nimanj, ne ca'mij nana niha' cavii nimanj a. 'O se yo'ó guun ya raj se vaa ya cavii sa' 'unj nanj adonj.

27 'O se se tanáj so' nimanj rej man nij sí cavi' ma'. Ne se quiri'yuj nee man sí vaa sa' rihaan so', qui'yáa so' ma'.

28 Dan me se tiháan so' rihanj tucuaán canocoj ne ca'vee gaa i'na' 'unj a. Ne guun niha' ndo'o raj, qui'yáa so', asa' canicun' 'unj rihaan so' adonj”. Nihánj me se nana sí cu'naj David yo' a.

29 “Nuveé nana naca me nana nihánj nana cataj 'unj rihaan nij soj cuano, man tinuj. Dan me se xij ni' sí cu'naj David me se cavi' so', gaa ne cachin' nii man so', ne yaj me se ne'en ni' me rej cachin' nii man so' nanj á.

<sup>30</sup> Tzaj ne síi nata' se nana Diose me so' gaa cayáan so', ne quene'en so' se vaa cata' tu'va Diose rihaan so' se vaa guun chij yo'q ta'níi ta'nij si'no so', ndaa vaa guun chij ma'an so' a.

<sup>31</sup> Ne che'é dan cataj so' se vaa se quináj Jesucristó rej man nij síi cavi', ne se quixtun' nu' nee man so' ma'. Daj ca'mii so' ni'yaj so' güii cunuu i'na' uún Jesucristó a.

<sup>32</sup> "Gaa ne dan me se ya ya cunuu i'na' uún Jesucristó, qui'yaj Diose, ne taran' núj me síi quene'en se vaa cunuu i'na' uún so' adonj.

<sup>33</sup> Gaa ne cavii Jesucristó ndaa x'núú Diose rej nuva' Diose, ya gaa nacaj Jesucristó Nimán Diose gaa narqué Diose Nimán so' man Jesucristó, daj vaa cata' tu'va so' a. Ne qui'yaj Jesucristó ga núj sij apóstol ndaa vaa ne'en soj se vaa ran' núj, ne dan me se qui'yaj Jesucristó ca'mii núj sij apóstol nu' xna'ánj a'mii soj ndaa vaa cuno soj ca'mii núj ei.

<sup>34</sup> "Dan me se ne cavii ma'an síi cu'naj David rej xtá' ma'. Tzaj ne cataj so': "Ca'mii Diose síi 'nij ra'a man ní' rihaan síi 'nij ra'a manj, cataj so' se vaa cayáan síi 'nij ra'a manj x'núú Diose rej nuva' Diose

<sup>35</sup> ndaa se quisij qui'yaj canaán Diose rihaan taran' nij síi taj ri'yunj man síi 'nij ra'a manj ne quirii ta'nga' síi 'nij ra'a manj rihaan nij so' adonj", taj síi cu'naj David yo' a.

<sup>36</sup> Che'é dan vaa che'é ndo'o xcaj ya taran' soj sij israelitá cuentá se vaa xa' Jesucristó síi cachrón ma'an soj rihaan rcutze, tzaj ne síi 'nij ra'a man ní' me so', ne síi ca'neé Diose tinanii man ní' rihaan sayuun me uún so', qui'yaj Diose adonj —taj Pedró rihaan nij yuvií cunuu chre' yo' a.

<sup>37</sup> Dan me se gaa cuno nij yuvií nana yo', ne quinano ndo'o rá nij so', ne xná'anj nij so' man Pedró ga yo'ó nij apóstol cune' Jesucristó man nata' se nana so' rihaan yuvií, cataj nij so' a:

—Ne daj qui'yaj núj, ga tinu' —taj nij so', xná'anj nij so' man nij tuvi' Pedró a.

<sup>38</sup> Gaa ne cataj Pedró rihaan nij so' a:

—Canicaj nimán soj canoco' soj chrej sa', ne cata' ne cunudanj soj che'é yan quene'en yuvií se vaa noco' soj man Jesucristó, gaa ne tinavij Diose cacun' tumé soj, ne rque Diose Nimán Diose catuu yo' nimán soj ei.

<sup>39</sup> Dan me se cata' tu'va Diose se vaa qui'yaj so' daj che'é nij soj do', che'é ta'níi soj do', che'é nij síi ne gan' do' a. Dan me se me ma'an síi nacunj Diose síi 'nij ra'a man ní' canoco' man so' me se qui'yaj Diose daj che'é so' adonj —taj Pedró rihaan nij yuvií israelitá yo' a.

<sup>40</sup> Gaa ne nata' so' que'eej doj nana rihaan nij so', gaa ne nago' so' chrej nucuj man nij so', cataj so':

—Curihanj soj sca'núj tuvi' ní' síi noco' tucuáan chi'ii, gaa ne quinanii soj rihaan sayuun ei —taj Pedró rihaan nij yuvií israelitá a.

<sup>41</sup> Che'é dan me nij síi cuchumán rá se nana so' ro', cata' ne nij so', ne güii yo' me se canoco' naca va'núj mój yuvií man Jesucristó tá' asuun a.

*Nana nihánj taj xna'anj daj qui'yaj nij síi noco' man Jesucristó a*

<sup>42</sup> Dan me se yo'q canoco' raan nij síi noco' man Jesucristó nana tucu'yón nij apóstol rihaan nij so', ne yo'q guun tuvi' cunudanj nij so' a. Ne yo'q cuxra' ta'aj nij so' rachruún chá nij so', ne yo'q chre' cachíin ni'yaj nij so' rihaan Diose a.

<sup>43</sup> Ne cunudanj nij yuvií ro', chuchuvi' ndo'o nij so' ni'yaj nij so' nij suun sa' noco' qui'yaj nij apóstol yo' a.

<sup>44</sup> Tzaj ne nij síi cuchumán rá ni'yaj man Jesucristó me se 'o rej man chre' cunudanj nij so', ne naqui'yaj rcua'aan nij so' nu' si'yaj nij so', ne si'yaj taran' nij so' me cunudanj nij rasuun yo' a.

<sup>45</sup> Ne tu'vej nij so' to'óo nij so' do', si'yaj nij so' do', ne rque nij so' se sa'anj nij so' rihaan tuvi' nij so' síi achiin rasuun man a.

<sup>46</sup> Dan me se daj a güii 'anj nij so' nuvií nocoo cachinj ni'yaj nij so' rihaan Diose, ndaa vaa guun rá taran' nij so' a. Ne 'o nuu chre' nij so' 'o ve', ne uxra' ta'aj nij so' rachruún chá nij so' a. Ne dan me se ndaa niha' ndaa cochroj rá taran' nij so' chá nij so' chraa a.

<sup>47</sup> Ne cataj nij so' se vaa sa' uxrá qui'yaj Diose che'é nij so', ne ca'mii sa' cunudanj nij yuvií ne chuman' Jerusalén ni'yaj nij yuvií man nij so' gaa ve'é man chre' nij so' a. Ne daj a güii cunuu chre' doj síi vaj nanii rihaan sayuun ga nij so', qui'yaj Diose a.

### 3

*Nana nihánj taj xna'anj se vaa nahuun sa' 'o síi rengo, qui'yaj Pedró ga Juan a*

<sup>1</sup> Dan me se aga' va'nuj rej anoco' güii me se cuchi' síi cu'naj Pedró do', síi cu'naj Juan do', nuvií nocoo, che'é se orá achíin ni'yaj nii rihaan Diose me yo' a.

<sup>2</sup> Ne maan orá dan nicaj nii man 'o síi rengo cuchi' nii rihaan nuvií nocoo yo', ne síi rengo me so' asij ca'ngaa so' a. Ne dan me se daj a güii uchruj nii man so' rihaan yo'óo rej x'nuj ta'yaa cu'naj Ta'yaa Ve'é Ndo'o Vaa a. Ne yo' me rej achíin so' caridad man nij yuvií atúj nuvií yo' a.

<sup>3</sup> Dan me se quene'en so' man Pedró do', man Juan do', se vaa catuu roj so' rá nuvií nocoo, gaa ne cachíin so' caridad man roj so' a.

<sup>4</sup> Gaa ne ni'yaj uxrá Pedró do', Juan do', man so', ne cataj Pedró rihaan so' a:

—Ni'yaj so' man rój á —taj so' rihaan síi rengo yo' a.

<sup>5</sup> Gaa ne ni'yaj síi rengo man roj so', che'é se guun rá so' se vaa rque roj so' sa'anj man so' a.

<sup>6</sup> Gaa ne cataj Pedró rihaan so' a:

—Taj vaj a doj sa'anj rihaan 'unj ma'. Tzaj ne rque 'unj se vaa rihaan 'unj man so' ei. Dan me se che'é ma'an Jesucristó síi cavii chuman' Nazaret taj xna'anj 'unj rihaan so' se vaa naxumaan so' ne cachee so' á —taj Pedró rihaan so' a.

<sup>7</sup> Gaa ne quita'aa Pedró ra'a so' rej nuva' so', ne cacrón caya Pedró man so', ne nu' nari' nucua' tacóo so' do', xtucua' so' do' a.

<sup>8</sup> Gaa ne dan me se güéj so', ne canicun' caya so', ne cachée so', ne dan me se catúj so' rá nuvií nocoo ga roj so', ne cachée ndo'o so', ne güéj so', ne cataj so' se vaa sa' uxrá qui'yaj Diose che'é so' a.

<sup>9</sup> Gaa ne quene'en cunudanj nij yuvií se vaa cachée so' ne cataj so' se vaa sa' uxrá qui'yaj Diose a.

<sup>10</sup> Ne quene'en nij yuvií se vaa ma'an so' me síi yáan rihaan ta'yaa nuvií nocoo cu'naj Ta'yaa Ve'é Ndo'o Vaa ne achíin so' caridad, ne ca'anj ndo'o rá nij yuvií che'é se vaa nahuun sa' síi rengo yo' a.

*Nihánj me nana nata' Pedró rihaan nij yuvií a*

<sup>11</sup> Dan me se quita'aa síi nahuun sa' yo' man síi cu'naj Pedró do', man síi cu'naj Juan do', ne che'é se ca'anj ndo'o rá nij yuvií, che'é dan cunanj nij yuvií cunuu chre' nij yuvií rihaan roj so' rque chingá cu'naj Corredor Salomón a.

12 Ne gaa quene'en Pedró man nij yuvií, ne cataj so' rihaan nij yuvií a:

—Cuno soj sji israelitá ca'mij á. Me che'é ca'anj ndo'o rá soj se vaa chéé síí nihánj gá. Me che'é ni'yaj ndo'o soj man rój gá. Nuveé ma'an rój me síí guun nucuaj qui'yaj cachéé so' ma'. Nuveé che'e se sji noco' sa' ndo'o man Diose me rój, ne cachéé so' qui'yaj rój ma'.

13 Dan me se Diose síí noco' xii ní' síí cu'naj Abraham do', síí cu'naj Isaac do', síí cu'naj Jacob do', me síí qui'yaj cavii sa' ndo'o ta'níí ma'an so' Jesucristó nanj adonj. Tzaj ne nij soj me nij síí tucuachén man Jesucristó rihaan nij síí taj ri'yunj man Jesucristó, ne ndá' se guun ya rá síí cu'naj Pilato se vaa ca'anj uun Jesucristó, tzaj ne cataj soj rihaan síí cu'naj Pilato se vaa guun rá soj cavi' Jesucristó adonj.

14 "Dan me se cataj soj se vaa ne guun rá soj ni'yaj soj man síí sa' nimán yo' ma'. Maan se cachín ni'yaj soj rihaan síí cu'naj Pilato se vaa quiríi so' taga' man 'o síí ticavi' man yuvií a.

15 Ne ticavi' soj man Jesucristó síí guun nucuaj qui'yaj gaa i'na' nimán ní' a. Ne Diose ro', qui'yaj cunuu i'na' uún Jesucristó, ne ma'an núj me síí quene'en se vaa cunuu i'na' uún so' nanj adonj.

16 Ne che'é se cuchumán rá síí nihánj ni'yaj so' man Jesucristó ro', che'é dan nari' nucuaj so', qui'yaj Jesucristó adonj. Ne dan me se nahuun sa' nu' so', ne aj ne'en taran' soj daj quiran' so', ne aj cuno soj daj taj ma'an so' nanj á.

17 "Ne nihánj me se ne'éen 'unj se vaa che'é se ne quene'en soj daj sji me Jesucristó, ne che'é dan cavi' so' qui'yaj soj gá nij síí uun chij rihaan soj nanj ei.

18 Tzaj ne Diose ro', me síí cataj xna'anj asij naá ndo'o gaa rqué so' nana nata' nij síí nata' se nana so', ne dan me se cataj xna'anj Diose se vaa síí ca'nej so' tinanií man yuvií rihaan sayuun me se quiran' ndo'o so' sayuun a. Ne nihánj me se quisíj ya nu' ndaa vaa cataj Diose se vaa qui'yaj ma'an Diose nanj ei.

19 "Che'é dan canicaj nimán soj canoco' soj chrej sa', gaa ne ca'vee tinavij Diose cacun' tumé soj á.

20 Gaa ne ca'vee quisij güii cunuu cuij rá taran' ní' sji israelitá, qui'yaj síí 'nij ra'a man ní', ne dan me se Jesucristó síí cune' Diose man tinanií man ní' rihaan sayuun me se ca'nej Diose man so' ca'na' uún so' rihaan ní' a.

21 Cuanó nihánj me se me rá Diose cayáán so' rej xta' ndaa se quisij güii naqui'yaj sa' Diose nu' nij rasuun ndaa rá se vaa nij rasuun asij naá ndo'o ndaa vaa cataj xna'anj nij síí sa' síí nata' se nana Diose gaa naá a.

22 Dan me se síí cu'naj Moisés cataj rihaan xii ní': "Diose sji 'nij ra'a man ní' me se cavií yo'ó tinúú nij soj, qui'yaj Diose, ne guun so' síí nata' se nana Diose ndaa vaa 'yaj ma'anj a. Ne cuno soj nu' nana nata' so' rihaan soj á.

23 Ne dan me se a me ma'an síí na'vej rá cuno se nana síí nata' se nana Diose yo', ne nu' quiríi yaníj nii man so' sca'núj ní' sji israelitá, ne quiríi nu' so' nanj adonj", taj síí cu'naj Moisés gaa naá a.

24 Ne dan me se síí cu'naj Samuel do', cunudanj yo'ó nij síí nata' se nana Diose do', cataj xna'anj taran' uún nij so' uún che'é güii yaj ei.

25 "Ne rihaan ma'an nij soj ca'mii nij síí nata' se nana Diose, ne ma'an nij soj me nij síí cavií sa' qui'yaj Diose, ndaa vaa cata' tu'va Diose rihaan xii ní' gaa naá ei. Dan me se rihaan xii ní' síí cu'naj Abraham cataj Diose: "Dan me se cavií sa' nij yuvií man cunudanj nij chuman' naj rihaan chumií, qui'yaj ta'níí ta'nij si'no so' a", taj Diose rihaan Abraham a.

<sup>26</sup> Gaa ne aj ca'neé Diose man ta'níi Diose rihaan chumi, ne cuhi' ta'níi Diose asino yaan rihaan ma'an soj, qui'yaj Diose, che'é rej canicaj nimán 'o 'o nij soj, ne tanáj xco nij soj tucuaán chi'ii, ne ca'vee qui'yaj ndo'o Diose se luj che'é taran' nij soj ei —taj Pedró rihaan nij yuvi cunuu chre' rá nuvíi nocoo yo' a.

## 4

*Nana nihánj taj xna'anj daj ca'mii síi cu'naj Pedró ga Juan rihaan nij síi uun chij rihaan nij yuvi israelitá a*

<sup>1</sup> Dan me se gaa ca'mii síi cu'naj Pedró ga Juan rihaan nij yuvi, ne cuhi' nij xrej do', tanuu uun chij rihaan nij tanuu 'yaj suun rá nuvíi nocoo do', nij síi saduceo do', rihaan roj so' a.

<sup>2</sup> 'O se ne guun niha' rá nij so' gaa cuno nij so' nana tucu'yón Pedró ga Juan man nij yuvi nana se vaa Jesucristó me 'o síi cunuu i'na' uún gaa cavi' so' a.

<sup>3</sup> Ne dan me se quita'aa nij so' man roj so', ne caxríj nij so' taga' man roj so' 'o yan' a. 'O se aj ti'nuu me orá yo' a.

<sup>4</sup> Ne que'ee nij síi cuno se nana roj so' ro', cuchumán rá nana yo', ne veé danj quísíj 'un' míj snó'o canoco' man Jesucristó ta' asuun a.

<sup>5</sup> Ne yo'ó güii me se cunuu chre' nij síi nicaj suun do', nij síi uun chij do', nij síi naqui'yaj cuu se tucuanj Moisés rihaan nij yuvi do', chuman' Jerusalén ga

<sup>6</sup> síi cu'naj Anás síi guun xrej atá suun nocoo doj do', síi cu'naj Caifás do', síi cu'naj Juan do', síi cu'naj Alejandro do', taran' nij tuví' nij xrej atá suun nocoo doj do' a.

<sup>7</sup> Dan me se canicun' caya síi cu'naj Pedró ga Juan tanuu ve' man nij xrej, qui'yaj nij xrej, ne xná'anj nij xrej man roj so', cataj nij xrej a:

—Me rej quirí' roj soj rej nucuaj do', me síi ca'ne' suun rihaan roj soj do', ne qui'yaj roj soj danj ga —taj nij so', xná'anj nij so' man roj so' a.

<sup>8</sup> Gaa ne caraa ndo'o Nimán Diose nimán Pedró, ne cataj Pedró rihaan nij so' a:

—Cunó nij soj sji nicaj suun rii ta'nga' rihaan nij yuvi do', cunó soj sji uun chij cunó nana cataj xna'anj 'unj rihaan nij soj á.

<sup>9</sup> Nihánj me se naqui'yaj cuu nij soj man rój che'é se cunuu 'ee rá rój ni'yaj rój 'o síi rengo, ne me rá nij soj quene'en soj asa' ca'vee nahuun sa' síi rengo nihánj a.

<sup>10</sup> Che'é dan xcaj nij soj do', taran' nij yuvi israelitá do', cuentá se vaa Jesucristó síi cavi chuman' Nazaret me síi qui'yaj ca'vee naxcaj rój man síi rengo nihánj, ne 'o vaa nucuaj so' a. Ne nij soj ro', me nij síi qui'yaj cachrón nii man Jesucristó rihaan rcutze, tzaj ne cunuu i'na' uún so', qui'yaj Diose a.

<sup>11</sup> Ne xa' Jesús, tzaj ne so' me yujej quirí'ij nij soj sji cune' ve', ne yaj me se guun so' yujej sa' doj rihaan taran' nij yujej man tacóo ve' yaj nanj adonj.

<sup>12</sup> Ne taj vaj a doj yo'ó síi guun nucuaj qui'yaj cavi sa' ní' a ma'. Orún' so' me síi vaa rihaan chumi nihánj síi ca'neé Diose, ne orún' so' me síi ca'vee tinanii man ní' rihaan sayuun nanj adonj —taj Pedró rihaan nij síi uun chij yo' a.

<sup>13</sup> Dan me se quene'en nij so' se vaa ne cuhu'vi' Pedró ga Juan ne sca' uxrá ca'mii roj so', ne xcaj nij so' cuentá se vaa nuveé sji tucu'yón yanj me roj so', tzaj ne sa' uxrá nari' roj so' a. Che'é dan caráya'anj nij so' a. Ne quene'en nij so' se vaa roj so' me síi cachéé ga Jesucristó a.

14 Ne quene'en nij so' man sí nahuun sa' yo' nicun' ga roj so' a. Gaa ne ne quirí' nij so' nana ca'mii nij so' ma'.

15 Gaa ne ca'ne' nij sí uun chij suun rihaan Pedró ga Juan ga sí nahuun sa' yo' se vaa curihanj va'nuj nij so' xe', gaa ne ca'vee nuchruj raa nij tuví' nij sí uun chij daj qui'yaj nij so' ga sí cu'naj Pedró ga Juan yo', rá nij so' a.

16 Dan me se cataj nij so':

—Daj qui'yaj ní' ga roj sí nihánj ga. 'O se xcaj taran' nij sí ne chuman' Jerusalén nihánj cuentá se vaa ranga' qui'yaj suun roj so' suun sa' nocoo, ne se ca'vee cataj ní' se vaa ne qui'yaj roj so' danj ma'.

17 Tzaj ne tuchu'vi' ní' man roj so' ne ca'ne' ní' suun rihaan roj so' se vaa se ca'mii roj so' che'é Jesucristó rihaan a 'ó yuvií a. Gaa ne se cha'nuu doj nana nihánj sca'núj nij yuvií a —taj taran' nij so' a.

18 Gaa ne canacúun nij so' catuu uún Pedró ga Juan rej nuu nij so', gaa ne nago' nij so' chrej nucuaj man roj so' se vaa se ca'mii roj so' che'é Jesucristó ne se tucu'yón roj so' se nana Jesucristó a.

19 Gaa ne canicaj sí cu'naj Pedró ga Juan cataj roj so' rihaan nij so' a:

—Nuchruj raa nij soj sese guun rá Diose cuno núj rihaan soj ne tanáj xco núj se nana Diose ei.

20 Se ca'vee ca'ne' rá núj ga suun a'mii che'é rasuun quene'en núj do', che'é nana cuno núj do' a ma' —taj roj so' rihaan nij so' a.

21 Gaa ne doj a ca'mii yuvaa nij sí uun chij yo' rihaan roj so', tzaj ne ne quirí' nij sí uun chij yo' daj qui'yaj nij so' sayuun man roj so' a ma'. Che'é dan na'née nij so' chrej man roj so' a. 'O se nij yuvií me se cundanj nij so' cataj se vaa sa' uxrá qui'yaj Diose che'é sí nahuun sa' yo' a.

22 Ne sí nahuun sa' qui'yaj suun sa' nocoo yo' me se vaj so' vij chihaa yo' táa doj a.

*Nana nihánj taj xna'anj daj ca'mii nij sí noco' man Jesucristó gaa cachín ni'yaj nij so' rihaan Diose a*

23 Dan me se na'née nii man Pedró ga Juan, ne cuchi' roj so' rihaan tinúu roj so', gaa ne nata' roj so' nu' nana cataj nij xrej ata' suun nocoo doj do', nij sí uun chij do', se vaa cataj nij so' rihaan roj so' a.

24 Gaa ne dan me se gaa cuno nij so' se nana roj so', gaa ne nu' guun rá taran' nij so' cachinj ni'yaj nij so' rihaan Diose, ne che'é dan nucuaj ca'mii nij so', cataj nij so' a:

—Ma'an so' me sí qui'yaj nu' rej xta' nu' chumij nu' na ya'anj nu' rasuun nu' a.

25 Ne so' ro', ca'née Nimán so' rihaan xii núj sí cu'naj David sí qui'yaj suun che'é so', ne Nimán so' ro', rque nana rihaan so' ca'mii so', ne dan me se cataj so': “Me che'é ca'maan ndo'o rá nij sí yaníj, ne me che'é guun nij rma'an rá nij yuvií ga.

26 Dan me se cavii nij sí nicaj suun rey uun chij rihaan chumij nihánj, gaa ne cunuu chre' nij so', che'é rej qui'yaj nij so' sayuun man sí 'nij ra'a man ní' do', man sí ca'née so' tinanii man yuvií rihaan sayuun do' a”, taj sí cu'naj David yo' gaa naá a.

27 Dan me se ya ya cunuu chre' sí cu'naj Herodes do', sí cu'naj Poncio Pilato do', nij sí yaníj do', nij yuvií israelitá do', rque chuman' nihánj, che'é rej qui'yaj nij so' sayuun man ta'níj so' sí cu'naj Jesucristó sí cuné' so' man tinanii man núj rihaan sayuun a.

<sup>28</sup> Tzaj ne qui'yaj nij so' inanj se vaa guun rá ma'án so' asij naá se vaa qui'yaj nij so', ne ma'án so' me sí qui'yaj guun nu' nihánj a.

<sup>29</sup> Ne nihánj me se xcaj so' sij 'nij ra'a man núj cuentá se vaa ca'mii yuvaa ndo'o nij so' rihaan núj a. Ne racuj so' man núj sij 'yaj suun che'é so' se vaa guun nucuaj núj nata' sca' núj se nana so' rihaan yuvij a.

<sup>30</sup> Dan me se racuj so' man núj qui'yaj núj suun sa' nocoo, ne nahuun sa' yuvij, qui'yáa so', che'é rej xcaj yuvij cuentá se vaa sij nucuaj ndo'o mé so' che'é ta'núí so' Jesucristó sí gué á —taj taran' nij so', cachín ni'yaj nij so' rihaan Diose a.

<sup>31</sup> Dan me se quisij cachín ni'yaj nij so' rihaan Diose, gaa ne quinaan nu' rej man nij so', ne caraa ndo'o Nimán Diose nimán cunudanj nij so', gaa ne sca' ndo'o ca'mii nij so' se nana Diose a.

*Nana nihánj taj xna'anj che'é yan yo'o chre' mán nij sí nocoo man Jesucristó a*

<sup>32</sup> Dan me se yo'o cuyaan vaa rá cunudanj nij sí cuchumán rá ni'yaj man Jesucristó, ne a 'ó nij sí nocoo man Jesucristó ne taj se vaa se si'yaj orún' me rasuun ma'. Tananj nu' rasuun man rihaan 'o 'o nij so' ro', me si'yaj taran' nij so', taj nij so', ne 'o chre' mán nij so', ne 'o chre' a'mii nij so', ne orún' rasuun si'yaj cunudanj nij so' a.

<sup>33</sup> Ne nij apóstol cune' Jesucristó man nata' se nana so' rihaan yuvij me se nucuaj ndo'o nata' nij so' se vaa cunuu i'na' uún Jesucristó sij 'nij ra'a man ní a. Ne qui'yaj ndo'o Diose se luj che'é cunudanj nij so' a.

<sup>34</sup> Ne taj vaj a 'ó sí achiin rasuun man 'nij sca'núj nij so' ma'. 'O se cunudanj tinúu nij so' sí vaa to'óo do', sí vaa ve' tucua do', cutu'vej nij so' si'yaj nij so', ne nicaj nij so' sa'anj quiri' nij so',

<sup>35</sup> ne caxrj nij so' sa'anj yo' ston nij apóstol cune' Jesucristó man nata' se nana so' rihaan yuvij a. Ne sese cachín rasuun rihaan 'o tinúu nij so', ne nij apóstol me nij sí rque nu' se vaa cachiin rihaan so' a.

<sup>36</sup> Ne yo'o so' ro', me sí cu'naj José, ne tucunáj nij apóstol Bernabé man so' a. Ne nana Bernabé taj se vaa sí 'yaj nari' nucuaj ní me so' a. Ne 'o ta'núí ta'nij si'no sí cu'naj Leví sí cane gaa naá me so', ne cavii so' rej cu'naj Chipre a.

<sup>37</sup> Dan me se vaa 'o to'óo so', ne cutu'vej so' man yo', ne nicaj so' sa'anj quiri' so' che'é yo'óo yo', ne caxrj so' ston nij apóstol yo' a.

## 5

*Nana nihánj taj xna'anj che'é cacun' qui'yaj sí cu'naj Ananías do', nicá so' chana cu'naj Safira do' a*

<sup>1</sup> Dan me se vaa yo'o sí cu'naj Ananías, ne vaa nicá so' chana cu'naj Safira, ne cutu'vej roj nicá roj so' 'o yo'óo,

<sup>2</sup> ne quiri' roj so' sa'anj, gaa ne quita'aa sí cu'naj Ananías ta'aj sa'anj yo', ne ca'vej rá nicá so' quita'aa so' sa'anj yo' a. Gaa ne daj 'ó ta'aj sa'anj ca'anj nicaj so', caxrj so' ston nij apóstol cune' Jesucristó man a. Ne ca'mii ne so' rihaan nij apóstol se vaa nu' sa'anj quiri' so' che'é yo'óo cutu'vej so' me yo', cataj so' a.

<sup>3</sup> Gaa ne ca'mii Pedró rihaan sí cu'naj Ananías, cataj so', ne:

—Me che'é catúj sí chree nimán so', ne ca'mii ne so' ndaa rihaan Nimán Diose, ne quita'aa so' ta'aj sa'anj quiri' so' gaa cutu'vej so' yo'óo yo' ga.



4 Dan me se daj guun rá so', ne ca'mii ne so' ga. Nuveé to'oj ma'án so' cutu'vej so' ne gaa cutu'vej so' man yo' ne ne nó xcúún so' qui'yáá so' ndaa vaa me rá ma'án so' qui'yáá so' ga se sa'anj so' na'. Me che'é cavii raá so' qui'yáá so' se vaa qui'yáá so' nihánj ga. Nuveé rihaan yuviij uun ca'mii ne so' ma'. Ndaa rihaan ma'an ya Diose ca'mii ne so' nanj adonj —taj Pedró rihaan Ananías yo' a.

5 Gaa cuno Ananías nana ca'mii Pedró rihaan so', ne naxru' so', ne cavi' so' a. Gaa ne cuchu'vi' ndo'o cunudanj nij síi cuno ndaa vaa quiran' so' a.

6 Gaa ne canicun' nij síi tachruu, ne caráán nij so' yatzíj xráá síi cavi', gaa ne ca'anj nicaj nij so' man so' xe', gaa ne cachin' nij so' man so' a.

7 Dan me se cachén va'nuj orá ta' asuun, gaa ne catúj nica síi cavi' yo' rá ve', ne ne quene'en no' daj quiran' nica no' ma'.

8 Gaa ne cataj Pedró rihaan no' a:

—Cataj xna'anj so' rihanj sese nu' sa'anj quita'aa roj soj che'é yo'óo cutu'vej roj soj me nihánj á —taj Pedró rihaan no' a.

—Veé cunudanj ya sa'anj quita'aa rój che'é yo'óo me yo' ei —taj no' a.

9 Gaa ne cataj Pedró rihaan no' a:

—Me che'é cyaan guun rá roj soj tihá' yu'unj roj soj man Nimán síi 'nij ra'a man ní' ga. Nij'yaj so' ei. Nij síi cachin' man nica so' ro', nicun' ta'yaa, ne nihánj me se cataj nij so' mán so', ca'anj nicaj nij so' mán so' xe' cuano ei —taj Pedró rihaan no' a.

10 Gaa ne taj ni'yón naxru' no' rihaan yo'óo rej nicun' Pedró, ne nu' cavi' no' a. Gaa ne dan me se catúj uun nij síi tachruu rá ve', ne quene'en nij so' se vaa aj cavi' no', gaa ne ca'anj nicaj nij so' man no' xe', gaa ne cachin' nij so' man no' uún x'núú nica no' a.

11 Gaa ne cuchu'vi' ndo'o cunudanj nij síi cuchumán rá ni'yaj man Jesucristó do', cunudanj nij síi cuno nana daj quiran' roj nica roj so' a.

*Nana nihánj taj xna'anj che'é suun sa' nocjo qui'yaj nij apóstol cune' Jesucristó man nata' se nana so' a*

12 Gaa ne qui'yaj ndo'o nij apóstol cune' Jesucristó man suun sa' nocjo ni'yaj nij yuviij ne chuman' Jerusalén a. Ne yo'q vaa rá nij síi nocjo' man Jesucristó, ne cunuu chre' nij so' rá nuvíi nocjo' rá chingá cu'naj Corredor Salomón a.

13 Tzaj ne yo'óo nij yuviij ro', ne quisij rá nij so' cunuu chre' nij so' ga nij síi nocjo' man Jesucristó ma'. Tzaj ne cunudanj nij yuviij cataj se vaa sa' qui'yaj nij síi nocjo' man Jesucristó a.

14 Tzaj ne cuchumán rá que'ee nij snó'o do', nij chana do', ni'yaj nij so' man síi 'nij ra'a man ní', ne che'é dan guun rijj doj nij yuviij nocjo' man so' a.

15 Ne dan me se rihaan chruun do', rihaan yuvéé do', táá nij síi ran', rii nij yuviij man nij síi ran' yo' xe' a. Cuchruj nii man nij síi ran' rá callé rej cachén Pedró, che'é se sese se cachun' Pedró cano xráá nij síi ran' ne nahuun so', rá nij yuviij a.

16 Gaa ne ca'na' ndo'o yuviij cavii nij chuman' naj nichrun' chuman' Jerusalén, ne nuu chre' nij so' a. Dan me se ata' nij so' síi ran' do', síi nuu nana chree nimán do', ne nahuun sa' cunudanj nij so' a.

*Nana nihánj taj xna'anj che'é sayuun qui'yaj nii man nij apóstol cune' Jesucristó man nata' se nana so' rihaan yuviij a*

17 Dan me se guun xcoj ruvaa rá nij tuvî' xrej atâ suun nocoo doj ni'yaj nij so' man nij apóstol cune' Jesucristó man nata' se nana so' rihaan yuviî a. Dan me se nij tuvî' xrej me se síi saduceo me nij so' a.

18 Dan me se ca'née nij so' tanuu quita'aa man nij apóstol, gaa ne caxríj nij so' taga' man nij so' a.

19 Tzaj ne rej nij me se ca'na' yo'o se mozó síi 'nij ra'a man ní, ne ca'nú' so' ta'yaa taga' yo', ne ca'anj nica'j so' man nij apóstol xe' a. Gaa ne cataj se mozó Diose yo' rihaan nij apóstol:

20 —Cavîi soj, ne ca'anj soj canicun' soj rá nuvíi nocoo, ne nata' soj rihaan nij yuviî nu' nana nihánj nana taj xna'anj daj qui'yaj nij yuviî ne ca'vee gaa i'na' nimán nij yuviî rihaan Diose á —taj se mozó Diose yo' rihaan nij so' a.

21 Síj cuno nij so' nana vaa danj, gaa ne rej síj güiî catúj nij so' rá nuvíi nocoo, ne tucu'yón nij so' se nana Jesucristó rihaan nij yuviî a. Maan orá dan canacúun nij tuvî' xrej atâ suun nocoo doj, ne cunuu chre' cunudanj nij síi uun chij rihaan nij yuviî israelitá, qui'yaj nij so' juntá a. Gaa ne ca'née nij so' síi ca'anj taga', ne ca'na' nica'j nij so' man nij apóstol rihaan nij so', rá nij so' a.

22 Dan me se cuchi' nij mozó ca'née nij síi uun chij yo' taga', gaa ne ne narî' mozó man nij apóstol rque taga' a ma'. Che'é dan me canica'j nij mozó yo' rej man nij síi uun chij yo', ne nata' nij mozó yo' se vaa guun taga' a.

23 Dan me se cataj nij mozó yo' a:

—Dan me se gaa cuchi' núj taga', ne vaa raan taga', ne nicun' nij tanuu rihaan ta'yaa, tumé nij tanuu ta'yaa a. Tzaj ne gaa ca'nú' núj ta'yaa, ne ne nari' núj a 'ó yuviî rá taga' a ma' —taj nij mozó rihaan nij síi uun chij yo' a.

24 Dan me se gaa cuno tanuu uun chij rihaan nij tanuu tumé nuvíi nocoo do', gaa cuno nij xrej atâ suun nocoo doj do', nana vaa danj, gaa ne dan me se cucu'vi' nij so', ne ne quene'en nij so' daj guun rej rihaan nij so' qui'yaj nij síi nocoo' man Jesucristó a.

25 Gaa ne dan me se cuchi' yo'o so' rihaan nij síi uun chij, gaa ne nata' so' rihaan nij so', cataj so':

—Xa' nij síi caxríj nij soj taga' man, tzaj ne cuano nihánj me se nicun' nij so' rá nuvíi nocoo, tucu'yón uxrá nij so' rihaan nij yuviî nanj á —taj síi ca'na' rihaan nij so' a.

26 Gaa ne cavii tanuu uun chij rihaan nij tanuu tumé nuvíi nocoo cavii nij mozó cavii, ca'anj nij so' nuvíi nocoo, ne ca'anj nacaj nij so' man nij apóstol cune' Jesucristó man rihaan nij síi uun chij yo' a. Tzaj ne ne qui'yaj nij so' fuerzá man nij síi cune' Jesucristó man ma'. 'O se cucu'vi' tanuu do', nij mozó do', ni'yaj nij so' man nij yuviî se vaa go' nij yuviî yahij xráa ma'an nij so' a.

27 Dan me se ca'na' nica'j nij so' man nij apóstol rej cunuu chre' cunudanj nij síi uun chij rihaan nij yuviî israelitá a. Gaa ne xná'anj xrej atâ suun nocoo doj man nij so',

28 cataj so' a:

—Né se aj cataj xna'anj núj rihaan nij soj se vaa ca'ne' rá soj ga suun tucu'yón rihaan nij yuviî che'é síi nata' soj che'é a. Tzaj ne cuano nihánj me se aj cuchi' se nana soj rihaan cunudanj nij síi man chuman' Jerusalén nihánj, qui'yaj soj, ne me rá soj caraa soj cacun' xráa núj se vaa cavi' snó'o nocoo' soj qui'yaj núj á —taj so' rihaan nij apóstol a.

29 Gaa ne cataj Pedró do', yo'ó nij apóstol cune' Jesucristó man do' a:

—Tzaj ne 'o se no xcúun ní' cunō ní' asino yaan nana a'mii Diose rihaan nana a'mii yuvi a.

<sup>30</sup>'O se nij soj me sí' toco' man Jesucristó rihaan rcutze, ne cavi' so', qui'yaj soj, ne Diose noco' xii ní' asij naá ro', me sí' qui'yaj cunuu i'na' uún so' adonj.

<sup>31</sup>Gaa ne ma'an Diose qui'yaj cavi' Jesucristó xta', ne nicun' Jesucristó rej x'nuj Diose rej nuva' Diose, ne guun Jesucristó sí' uun chij ndo'o, ne sí' tinani man ní' rihaan sayuun guun so', che'é rej ca'vee canicaj nimán ní' s'ij israelitá gaa ne quinavij cacun' tumé ní' adonj.

<sup>32</sup>Ne núj me sí' nata' nana nihánj rihaan yuvi ei. Ne ne'en Nimán Diose uún se vaa ya ya vaa nana nihánj, ne rque Diose Nimán Diose rihaan núj s'ij uno rihaan Diose a —taj nij so' rihaan nij sí' uun chij rihaan nij yuvi israelitá a.

<sup>33</sup>Dan me se gaa cuno nij sí' uun chij nana nihánj, gaa ne ca'maan uxrá rá nij so', gaa ne guun rá nij so' ticavi' nij so' man nij apóstol yo' a.

<sup>34</sup>Tzaj ne canicun' caya yo'o tuvi' nij so' 'o sí' fariseo sí' cu'naj Gamaliel, ne sí' naqui'yaj cuu se tucuanj Moisés me so', ne caráj cochroj cunudanj nij yuvi ni'yaj nij yuvi man so' a. Gaa ne ca'ne' so' suun se vaa curihanj nij apóstol doj 'o orá nii xe' a.

<sup>35</sup>Gaa ne cataj Gamaliel rihaan yo'ó nij sí' uun chij yo' a:

—Cunō soj s'ij israelitá nana ca'mij rihaan nij soj cuano á. Dan me se tadó soj daj qui'yaj soj ga nij snó'o ca'na' rihaan ní' nihánj á.

<sup>36</sup>'O se asij rque doj me se nachumaan 'o sí' cu'naj Teudas, ne so' ro', me sí' cataj se vaa s'ij sa' uxrá me ma'an so', ne canoco' 'o ca'anj cientó yuvi xcó so' ta' asuun a. Gaa ne ticavi' nii man so', ne cha'nuu cunudanj nij sí' cuno se nana so', ne navij nu' se nana so' nanj adonj.

<sup>37</sup>Gaa ne dan me se cachén doj, gaa ne cavi' yo'ó sí' cu'naj Judas sí' cavi' estadó Galilea, ne nachumaan so' gaa güi cachrón gobiernó se chuvij cunudanj nij yuvi rihaan yanj a. Gaa ne tiha' yu'unj so' man yuvi, ne canoco' nij yuvi xcó so' a. Gaa ne cavi' so' uún, gaa ne cunudanj nij yuvi cuno se nana so' cha'nuu uún a.

<sup>38</sup>Ne cuano nihánj me se cataj xna'anj 'unj rihaan nij soj se vaa se qui'yaj nij soj a doj sayuun man nij sí' ca'na' rihaan ní' cuan' ma'. 'O se sese tucuaán cuchruj yuvi uun me se tucuanj nij so', ne sese 'yaj nij so' ndaa vaa avii raa ma'an nij so', ne quirj' nu' se vaa 'yaj nij so' nanj adonj.

<sup>39</sup>Tzaj ne sese Diose me sí' rque se nana nij so', ne sese 'yaj suun nij so' se suun Diose, ne daj chihaa muj se ca'anj ni'ya se nana nij so' qui'yaj soj ma'. Sese danj guun qui'yaj nij soj, ne sí' unu' ga ma'an Diose me nij soj adonj —taj sí' cu'naj Gamaliel cuno yo'ó nij sí' uun chij rihaan nij yuvi israelitá a.

Dan me se cuchumán rá nij so' se nana sí' cu'naj Gamaliel yo',

<sup>40</sup>gaa ne canacúun nij so' man nij apóstol, ne catúj nij so' rej mán nij so', gaa ne go' nii rutzi' xráa nij apóstol, qui'yaj nij sí' uun chij, ne ca'ne' nij so' suun rihaan nij apóstol se vaa se ca'mii nij so' a 'o nana che'é Jesucristó rihaan nij yuvi, gaa ne na'née nij sí' uun chij yo' chrej man nij apóstol a.

<sup>41</sup>Dan me se curihanj nij apóstol rej mán nij sí' uun chij rihaan nij yuvi israelitá, ne guun niha' rá nij apóstol che'é se s'ij vaa sa' me nij so' ni'yaj Diose ne che'é dan ca'vee quiran' nij so' sayuun che'é Jesucristó qui'yaj Diose a.

<sup>42</sup>Ne daj a güi me se cunuu chre' nij apóstol rá nuvi noco do', rá ve' tucua' nij so' do', ne yo'o tucu'yón nij so' man nij yuvi, ne nata' nij so' se nana Jesucristó nana sa' rihaan nij yuvi a.

## 6

*Nana nihánj taj xna'anj daj cune' nii man chij sí 'yaj suun che'é nij sí cuchumán rá ni'yaj man Jesucristó a*

<sup>1</sup> Ne güii dan me se guun rijj doj nij sí tucu'yón se nana Jesucristó, ne dan me se ta'aj nij so' me sí a'mii xna'ánj griego, ne yo'ó ta'aj nij so' me sí a'mii xna'ánj hebreo a. Ne dan me se nij ca'mii nij sí a'mii xna'ánj griego ni'yaj nij so' man nij sí a'mii xna'ánj hebreo, che'é se chá go' nij sí a'mii xna'ánj hebreo yo' rihaan nij chana nique cavi' nica daj a güii a. Ne rihaan nij chana nique cavi' nica ní a'mii xna'ánj griego me se ne cuyaan go' nij so' se chá cha nij no' a ma'. Ne che'é dan a'maan rá nij sí a'mii xna'ánj griego a.

<sup>2</sup> Che'é dan chuvijj nij apóstol cune' Jesucristó man ro', canacúun nij so' man nij sí tucu'yón se nana Jesucristó cunu chre' nij so', ne cataj chuvijj nij so' a: —Nij uxrá vaa sese tanáj xcó núj suun nata' se nana Diose rihaan yuvijj che'é rej qui'yaj chuvijj núj co'oo rihaan nij chana cavi' nica adonj.

<sup>3</sup> Che'é dan narij nij soj chij tinúu ní' sí ve'é a'mii nii ni'yaj nii man, tinuj. Dan me se nana' soj sí nuu ndo'o Nimán Diose nimán, ne sí çu raá nana' soj, ne cune' ní' man nij so' se vaa qui'yaj suun nij so' suun nihánj á.

<sup>4</sup> Ne xa' núj, tzaj ne inanj suun yo'ó cachinj ni'yaj rihaan Diose qui'yaj suun núj, ne nata' núj se nana Diose nanj á —taj chuvijj nij apóstol cune' Jesucristó man nata' se nana so' a.

<sup>5</sup> Dan me se guun niha' rá cunudanj nij yuvijj gaa cuno nij yuvijj nana yo', ne narij nij yuvijj man chij tinúu nij so', ne yo'ó so' me sí cu'naj Esteban, ne so' ro', me sí nucuj uxrá rá ni'yaj man Diose, ne nuu ndo'o Nimán Diose nimán so' a. Ne narij uún nij so' man sí cu'naj Felipé do', Prócoro do', Nicanor do', Timón do', Parmenas do', Nicolás do' a. Ne nuveé sij israelitá me Nicolás, maan ne sí guun rá canoco' se tucuanj nij sí israelitá guun so', ne sí cavii chuman' Antioquía me so' uún a.

<sup>6</sup> Ne dan me se nica'j nij yuvijj man chij nij so' ca'anj nij so' rihaan chuvijj nij apóstol cune' Jesucristó man, ne nij apóstol me se cachín ni'yaj nij so' rihaan Diose, gaa ne cuta' nij so' ra'a nij so' raá chij nij so' che'é yan go' nij so' se chá rihaan nij chana nique cavi' nica a.

<sup>7</sup> Dan me se cha'nuu uxrá se nana Diose, ne guun rijj ndo'o doj nij sí tucu'yón se nana Jesucristó chuman' Jerusalén yo', ne ndaa que'ee uxrá nij xrej israelitá cuchumán rá se nana Jesucristó ne cuno rihaan Jesucristó a.

*Nana nihánj taj xna'anj daj qui'yaj nii gaa quita'aa nii man sí cu'naj Esteban a*

<sup>8</sup> Dan me se sí cu'naj Esteban me se racujj ndo'o Diose man so', ne guun nucuj ndo'o so', ne dan me se qui'yaj ndo'o so' suun sa' nocoo ni'yaj nij sí man rej chuman' Jerusalén a.

<sup>9</sup> Tzaj ne canicun' que'ee yuvijj, ne ta'aj nij so' me sí 'anj ve' tucu'yón rej nuu chre' nij sí qui'yaj canaan curihanj rihaan se ru'vee nij so', ne yo'ó ta'aj nij so' me sí cavii chuman' Cirene, ne yo'ó ta'aj nij so' me sí cavii chuman' Alejandria, ne yo'ó ta'aj nij so' me sí cavii rej cu'naj Cilicia do', rej cu'naj Asia do' a. Dan me se canó tuvi' taran' nij so' ga sí cu'naj Esteban,

<sup>10</sup> tzaj ne ne ca'vee qui'yaj canaan se nana nij so' rihaan se nana Esteban a ma'. 'Q se racujj ndo'o Nimán Diose man sí cu'naj Esteban, ne cavii ndo'o nana çu raá so', qui'yaj Nimán Diose a.

<sup>11</sup> Gaa ne caxrijj nij so' chrej rque yo'ó ta'aj snó'o uún, ne snó'o yo' cataj:

—Cuno núj se vaa ca'mii sí cu'naj Esteban yo' nana nij che'é sí cu'naj Moisés ga ma'an Diose á —taj nij snó'o yo', ca'mii ne nij so' a.

<sup>12</sup> Gaa ne ca'maan rá nij yuvií do', nij sí uun chij rihaan nij yuvií israelitá do', nij sí naqui'yaj çu se tucuanj Moisés rihaan yuvií do', gaa cuno nij so' se nana nij sí ne yo' a. Gaa ne cavii nij so', quita'aa cunudanj nij so' man Esteban, ne ca'anj nicaj nij so' man so' rá ve' nuu chre' nij so', qui'yaj nij so' juntá a.

<sup>13</sup> Gaa ne canicun' doj sí ca'mii ne sí caraa cacun' xráá Esteban, ne cataj nij so' a:

—Sí nihánj ro', ne a'ne' rá so' ga suun a'mii quij che'é rej guee nihánj do', che'é tucuaán noco' ní do', a ma'.

<sup>14</sup> O se cuno núj se vaa cataj so' se vaa Jesucristó sí cavii chuman' Nazaret me sí tirí' nu' nuvíi noco'o nihánj, ne natuna so' tucuaán cuchruij sí cu'naj Moisés che'é ní adonj —taj nij so', ca'mii ne nij so' ni'yaj nij so' man Esteban yo' a.

<sup>15</sup> Gaa ne ni'yaj uxrá cunudanj nij sí yanj rá ve' yo' man Esteban yo', ne ase vaa rihaan se mozó Diose ro', danj vaa rihaan so', ni'yaj nij so' a.

## 7

<sup>1</sup> Gaa ne xná'anj xrej atá suun noco'o doj man sí cu'naj Esteban, cataj xrej: —Ya uxrá danj ca'mii so' dan tu'va nij so' danj che'é so' na' —taj so', xná'anj so' man Esteban a.

*Nana nihánj taj xna'anj daj ca'mii natáj sí cu'naj Esteban rihaan nij sí uun chij rihaan nij yuvií israelitá a*

<sup>2</sup> Gaa ne cataj sí cu'naj Esteban yo':

—Cuno soj ca'mij rihaan soj, tinuj, ta'nuj. Dan me se gaa ataa cayáán xij ní' sí cu'naj Abraham chuman' Harán, ne ni'ndaj ya ve'é vaa Diose curuvi' rihaan so' rej vaj so' rej cu'naj Mesopotamia,

<sup>3</sup> ne cataj Diose rihaan so': “Curihanj so' chiháán so' rej ne nij tuvi' so', ne cavií so' ca'anj so' 'o rej tiháán 'unj mán so' á”, taj Diose rihaan Abraham a.

<sup>4</sup> Gaa ne dan me se curihanj so' rej ne nij sí caldeo, ne ca'anj so' cayáán so' chuman' Harán a. Gaa ne quisíj cavi' rej so', ne cavii uún so', ca'anj so' cayáán so' yo'óo nihánj rej ne ma'an nij soj cuano a.

<sup>5</sup> Tzaj ne a doj yo'óo ne rque Diose rihaan sí cu'naj Abraham ma'. Ne a 'ó ta'níí Abraham ne ca'ngaa gaa cata' tu'va Diose rihaan so' se vaa guun si'yaj nij ta'níí ta'nij si'no Abraham man yo'óo nihánj nanj á.

<sup>6</sup> “Gaa ne cataj uún Diose rihaan so' se vaa ca'anj cayáán nij ta'níí ta'nij si'no so' to'óo yo'ó yuvií, ne guun nij so' mozó cunuú rihaan yo'óo nij yuvií yo', ne tucuxru' yo'óo nij yuvií man nij so' cunu' ca'anj cientó yo' a.

<sup>7</sup> Ne xa' nij yuvií guun nij so' mozó rihaan, tzaj ne ma'an Diose qui'yaj sayuun man nij yuvií yo', gaa ne curihanj nij ta'níí ta'nij si'no Abraham rej yo', ne naman nij so' cayáán nij so' rej nihánj, ne canoco' nij so' man Diose, ne qui'yaj suun nij so' che'é Diose, taj Diose rihaan Abraham gaa naá a.

<sup>8</sup> “Dan me se cata' tu'va Diose se vaa qui'yaj Diose danj che'é nij tuvi' Abraham, gaa ne ca'ne' Diose suun se vaa cuta' taran' nij tuvi' Abraham ta'nga' man nij so', che'é se yuvií 'nij ra'a Diose man me nij so' a. Ne dan me se ca'ngaa ta'níí Abraham sí cu'naj Isaac, ne cuta' Abraham ta'nga' man so' gaa vaj so' tunj güii a. Ne danj qui'yaj Isaac uún che'é ta'níí so' sí cu'naj Jacob,

ne danj qui'yaj uún Jacob che'é nij ta'núí so' chuvij nij xii ní' nij síí cayáán gaa naá a.

9 "Gaa ne dan me se guun xcoj ruvaá rá nij xii ní' ni'yaj nij so' man tinúú nij so' José, gaa ne cutu'vej nij so' man so' rihaan síí ca'anj nicaj man so' ndaa rej yo'óo cu'naj Egipto a. Ne Diose vaj ga so',

10 ne tinanii Diose man so' rihaan nu' sayuun quiran' so' a. Gaa ne guun rá síí nicaj suun rey síí cu'naj Faraón ni'yaj so' man José, ne síí sa' ndo'o avii raá guun José rihaan Faraón, qui'yaj Diose a. Gaa ne cune' Faraón man José se vaa guun chij José rihaan rej Egipto, ne ndaa rihaan nu' ve' tucua Faraón guun chij José a.

11 "Gaa ne cachén ndo'o x'naa nu' rej Egipto do', rej yo'óo cu'naj Canaán do', ne quiran' ndo'o nij yuvií sayuun, ne xii ní' ro', ne guun nucuaj nij so' quiri' nij so' se cha nij so' ma'.

12 Gaa ne cuno Jacob nana se vaa vaa 'núú trigó ane' rej Egipto, ne che'é dan tihaj yuun ca'née so' man nij ta'núí so' ca'anj nij so' nano' nij so' 'núú trigó a.

13 Dan me se quisíj vij ca'anj nij so' rej Egipto, gaa ne cataj xna'anj José rihaan nij so' se vaa tinúú nij so' me so', gaa ne dan me se xcax Faraón cuentá me rej cavii José a.

14 "Gaa ne ca'née José nana rihaan rej so' Jacob se vaa ca'anj nij tuvi' Jacob cayáán nij so' rej Egipto, ne dan me se va'nuj chihaa xnu' yuvií me nij tuvi' Jacob yo' a.

15 Gaa ne dan me se ca'anj Jacob rej Egipto a. Cachén doj, gaa ne cavi' so', ne cavi' nij ta'núí so' xii ní',

16 gaa ne ca'anj nicaj nii man cúú man nij so' ndaa chuman' cu'naj Siquem, ne dan me se cachin' nii man cúú man nij so' rque yu'uj yuvej aj quiránj Abraham rihaan nij ta'núí síí cu'naj Hamor rej chuman' Siquem yo' a.

17 "Dan me se gaa quinichrun' güii quisij ya nu' nana aj cata' tu'va Diose rihaan Abraham gaa naá, ne dan me se xna'anj nij yuvií israelitá yo' rej Egipto, ne guun rii ndo'o doj nij so' a.

18 Danj qui'yaj nij so' ndaa se catúj yo'óo síí nicaj suun rey yo'óo Egipto, ne ne ne'en so' a doj che'é síí cu'naj José a ma'.

19 Ne so' me síí tiha' yu'unj man tuvi' ní' nij yuvií israelitá, ne tucuxru' so' man xii ní' nij yuvií israelitá yo' a. Dan me se ca'ne' so' suun se vaa quiri'ij nii man ta'núí nij yuvií israelitá ne'ej leé no xe', che'é rej cavi' ta'núí nij so' a.

20 Ne maan tió dan me se ca'ngaa síí cu'naj Moisés, ne caran' rá Diose ni'yaj so' man Moisés, ne rque va'nuj yavii tucuachij rej so' ga nii so' man so' tucua rej so' a.

21 Gaa ne caxríj yuve roj so' man ne'ej cu'naj Moisés xe' yo'óo rej yaníj, gaa ne dan me se nacaj ma'an ta'nij chana Faraón man ne'ej cu'naj Moisés yo', ne tucuachij no' man so' ase 'yá' ga ta'núí ma'án' qui'yaj no' a.

22 Gaa ne tucu'yón nii nu' se nana nij síí man Egipto nana cuu man síí cu'naj Moisés, ne sca' a'mii so' ne sca' 'yaj suun so' a.

23 "Dan me se quisíj síí cu'naj Moisés vij chihaa yo', gaa ne guun rá so' ca'anj ni'yaj so' daj ran' nij tuvi' so' nij yuvií israelitá a.

24 Ne dan me se quene'en so' se vaa tucuxru' yo' o síí man yo'óo Egipto man 'o síí israelitá a. Che'é dan guun rá síí cu'naj Moisés yo' nayoñ cuentá che'é tuvi' so' síí israelitá, ne che'é dan go' so' man síí man yo'óo Egipto yo' a.

<sup>25</sup> Gaa ne guun rá síi cu'naj Moisés se vaa xcaj nij tuvi' so' síi israelitá cuentá se vaa Diose račuj man so' tñanaii so' man nij so' rihaan nij síi man Egiptó, tzaj ne ne xcaj nij so' cuentá ma'.

<sup>26</sup> "Dan me se yo'ó güii me se cuchi' so' rej man nij yuviij israelitá, ne dan me se vij tuvi' nij so' cunu', ne guun rá so' na'miij sa' uún roj so', ne che'é dan cataj so': "Tinuuj. Me che'é unu' roj tinuj roj soj ga", taj so' rihaan roj so' a.

<sup>27</sup> Ne síi tucuxru' man tuvi' ro', tiguuj ra'a so' man Moisés, ne cataj so': "Taj vaj síi cune' mán so' guun chij so' rihaan núj ne ca'ne' so' cacun' che'é núj ma'.

<sup>28</sup> Ne nihánj me se guun rá so' ticavi' so' manj, ndaa vaa ticavi' so' man síi man yo'ó Egiptó quii na'", taj síi tucuxru' man tuvi' rihaan síi cu'naj Moisés yo' a.

<sup>29</sup> Gaa ne che'é se xcaj síi cu'naj Moisés cuentá se vaa cha'nuu ndo'o nana se vaa ticavi' so' man 'o síi man yo'ó Egiptó, gaa ne che'é dan cunánj so', ne ca'anj so' cayáan so' rej cu'naj Madián a. Ne xcaj so' chana, ne ca'ngaa vij ta'nii so' snó'o cunii a.

<sup>30</sup> "Dan me se cachén vij chihaa yo', gaa ne rej tacaan nichrun' quij cu'naj Sinaí me se quene'en so' 'o coj aco' ya'an raq, ne curuvi' yo'o se mozó Diose rque ya'an yo' quene'en so' a.

<sup>31</sup> Ne ca'anj rá Moisés gaa quene'en so' rasuun ya'anj yo', ne guun rá so' quinichrun' so' rihaan coj yo' ni'yaj so' man yo', tzaj ne cuno so' ca'mii síi 'nij ra'a man ní,

<sup>32</sup> ne dan me se cataj síi 'nij ra'a man ní: "Unj ro', me Diose noco' nij xií so' gaa naá a. Dan me se Diose noco' síi cu'naj Abraham do', síi cu'naj Isaac do', síi cu'naj Jacob do', mé 'unj á", taj Diose síi 'nij ra'a man ní cuno Moisés a. Gaa ne cuchu'vi' Moisés ne quiri'lj man so', ne ne quisj rá so' ni'yaj so' coj aco' ya'an raq yo' a.

<sup>33</sup> Gaa ne cataj síi 'nij ra'a man ní rihaan so' a: "Quirij so' canj 'nij tacó so' á. 'O se yo'ó nicun' so' cuano ro', me yo'ó guee ndo'o adonj.

<sup>34</sup> Dan me se ni'yaj 'unj, ne quene'én 'unj sayuun ran' nij yuviij noco' manj rej Egiptó, ne cunoj daj rnúj nij so' che'é sayuun ran' nij so', ne nihánj me se nanij 'unj che'é se me raj tñanaii 'unj man nij so' rihaan sayuun ran' nij so' a. Che'é dan cuva' so', ne ca'nej 'unj mán so' rej Egiptó á", taj síi 'nij ra'a man ní rihaan Moisés a.

<sup>35</sup> "Dan me se xa' Moisés, tzaj ne so' me síi quiri'lj yanij nij yuviij israelitá man gaa cataj nij so' se vaa taj vaj síi cune' man so' guun chij so' rihaan nij so' ne ca'ne' so' cacun' che'é nij so' ma'. Tzaj ne so' me síi ca'née ma'an Diose se vaa guun chij so' rihaan nij yuviij israelitá ne quirij so' man nij yuviij israelitá rej guun nij so' mozó rihaan yo'ó yuviij a. Danj qui'yaj Diose ga Moisés gaa quene'en Moisés se mozó Diose yo' rque coj aco' ya'an raq yo' a.

<sup>36</sup> Dan me se curihañj nij yuviij israelitá rej cu'naj Egiptó, qui'yaj Moisés, ne qui'yaj ndo'o so' suun sa' noco Egiptó do', rej naj na ya'anj cu'naj Na Ya'anj Marq do', rej tacaan vaj nij so' vij chihaa yo' do' a.

<sup>37</sup> Ne ma'an Moisés yo' me síi cataj rihaan nij síi israelitá: "Vaa güii, ne yo'o tuvi' soj ro', guun síi nata' se nana Diose, qui'yaj Diose, ne ase vaa 'yáá 'unj ro', danj qui'yaj so' uún a", taj Moisés rihaan nij yuviij israelitá a.

<sup>38</sup> "Ne Moisés me síi vaj ga cunudanj nij yuviij israelitá rej tacaan, ne cachéé so' ga se mozó Diose síi ca'mii rihaan so' rej tacaan nichrun' quij cu'naj Sinaí, ne cachéé so' ga nij xií ní' uún, ne so' me síi nata' Diose se nana Diose nana nucuaj rihaan, che'é rej taquachén so' nana yo' ndaa rihaan ní' a.

39 Tzaj ne ne ca'vej rá nij xii ní' cunō nij so' rihaan Moisés ma'. 'Q se tanáj xcō nij so' se nana so', ne guun inanj rá nij so' qui'yaj nij so' ndaa vaa 'yaj nij so' rej Egipto a.

40 Dan me se cataj nij xii ní' rihaan síf cu'naj Aarón, ne: "Qui'yáa so' ya'anj canoco' ní', gaa ne quitaj yaan ya'anj yo' rihaan ní' cachee ní' á. 'Q se xa' Moisés síf qui'yaj curihañj ní' rej cu'naj Egipto, tzaj ne ne ne'en uxrá núj daj quíran' so' a ma'", taj nij yuvij rihaan Aarón a.

41 Ne güii dan me se qui'yaj nij yuvij israelitá 'o scúj le'ej, ne guun yo' ya'anj noco' nij so', ne rqué ndo'o nij so' rasuun rihaan ya'anj yo', gaa ne guun niha' rá nij so' ni'yaj nij so' ya'anj qui'yaj ma'an nij so' a.

42 "Che'é dan guun yanij Diose rihaan nij yuvij israelitá, ne ca'née ra'a Diose man nij so' na'vij nij so' rihaan nij rasuun vaa rej xta', ne dan me se na'vij nij so' rihaan güii do', rihaan yavii do', rihaan nij yati' do' a. Dan me se danj inanj taj nana nō rihaan yanj qui'yaj nij síf nata' se nana Diose gaa naá, ne nana yo' taj: "Taj vaj rasuun rqué nij soj sij israelitá rihanj gaa vaj soj rej tacaan vij chihaa yo' ma'. Taj vaj xcuu cacaa rihanj, qui'yaj soj ma'.

43 Tananj cataj soj ve' mantá nuu ya'anj cu'naj Moloc, ne cataj soj yati' chraan, ne guun yo' ya'anj cu'naj Renfán rihaan soj nanj adonj. Dan me se ya'anj qui'yaj ma'an soj na'vij soj rihaan me roj ya'anj yo', ne che'é dan nonaj rej canē soj, ne rej xcō chuman' Babilonia cayáan soj, qui'yáj adonj", taj Diose rihaan nij xii ní' a.

44 "Dan me se nicaj xii ní' nuví mantá, ne ve' nata' ma'an Diose nana rihaan nij xii ní' gaa vaj nij so' rej tacaan me ve' yo' a. Ne nuví mantá yo' ro', qui'yaj Moisés man yo' ndaa vaa cataj xna'anj Diose rihaan so' a. Dan me se ase vaa nuví mantá tihaan Diose rihaan Moisés, danj vaa qui'yaj so' a.

45 Ne ca'anj nicaj nij xii ní' ga síf cu'naj Josué man nuví mantá yo' ndaa to'óo yuvij yanij, ne dan me se quirii yanij Diose man nij yuvij yanij rihaan to'óo nij so', ne catúj nij xii ní', qui'yaj Diose a. Ne nuví mantá yo' me rej quina'vij nij xii ní' rihaan Diose ndaa se cayáan síf cu'naj David síf nicaj suun rey a.

46 "Ne David ro', guun niha' rá Diose ni'yaj Diose man so', ne cachíin ni'yaj so' rihaan Diose se vaa ca'vej rá Diose cune' so' nuví nocō rej na'vij nii rihaan ta'anj síf cu'naj Jacob a.

47 Ne síf cu'naj Salomón me síf cune' nuví yo' a.

48 Tzaj ne nuveé sij ne rá ve' une' yuvij me Diose síf 'nij ra'a nu' chumij ma'. 'Q se cataj xna'anj síf nata' se nana Diose se vaa ma'an Diose cataj:

49 "Rej xta' ro', me chruun xlá sa' táa 'unj, ne yo'óo ro', me rej taj tacó adonj. Che'é dan taj che'é cune' nij soj ve' cané 'unj ma', taj síf 'nij ra'a man ní', ne taj uún so': Taj rej qui'yaj soj naraan rá 'unj ma'.

50 'Q se ma'anj ra'aj qui'yáj nu' nij rasuun nihánj adonj", taj ma'an Diose a.

51 "Dan me se nichraj ndo'o rá soj, ne nuveé sij niha' rá xcaj cuentá che'é tucúaan sa' me soj ma'. Tananj niganj anó tuvi' soj ga Nimán Diose adonj. Ase vaa qui'yaj xii soj ro', danj 'yaj guee ma'an soj uún nanj á.

52 Dan me se canoco' xii soj man cunudanj nij síf nata' se nana Diose, ne guun rá nij so' qui'yaj nij so' sayuun man nij so', ne ndaa ticavi' nij so' man nij síf nata' che'é síf sa' ca'nej Diose rihaan chumij nihánj tñaniú man yuvij rihaan sayuun ei. Ne síf sa' yo' me se guun nij soj síf tacuachén man so' rihaan nij síf taj ri'yunj man ní', ne ndaa ticavi' nij soj man so' vaa ei.



<sup>53</sup> Dan me se soj me sí guun rá se vaa se tucuañj Diose ro', me nana cataj xna'anj nij se mozó Diose rihaan soj, tzaj ne ne uno soj nana yo' ma' —taj sí cu'naj Esteban rihaan nij sí uun chij rihaan nij yuviñ israelitá a.

*Nana nihánj taj xna'anj daj qui'yaj nii gaa ticavi' nii man sí cu'naj Esteban a*

<sup>54</sup> Dan me se gaa cuno nij sí uun chij rihaan nij yuviñ israelitá nana vaa danj, gaa ne cuyanj rá nij so', ne ndaa chá ruj ma'án nij so' tu'va nij so' ni'yaj nij so' man Esteban a.

<sup>55</sup> Tzaj ne Esteban ro', caraa ndo'o Nimán Diose nimán so', ne dan me se ni'yaj so' rej xta', ne quene'en so' rej ve'é ndo'o vaa rej nicun' Diose, ne quene'en so' se vaa nicun' Jesucristó rej x'núú Diose rej nuva' Diose a.

<sup>56</sup> Gaa ne cataj sí cu'naj Esteban a:

—Nihánj me se nax'núj rej xta' ni'yaj 'unj, ne ne'én 'unj man sí ca'neé Diose nıcaj yu'unj man yuviñ se vaa nicun' so' rej x'núú Diose rej nuva' Diose á —taj so' no nij sí uun chij a.

<sup>57</sup> Gaa ne nucuaj ndo'o caguáj nij so', ne caráan ra'a nij so' xréé nij so', che'é rej ne ca'vej daj chihaa mij rá nij so' cunó nij so' a doj se nana Esteban a ma'. Gaa ne cunanj cunudanj nij so' ndaa rej nicun' Esteban, ne quita'aa cunudanj nij so' man so',

<sup>58</sup> ne quirri nij so' man Esteban rque chuman' Jerusalén yo', ne guun che'e nij so' go' nij so' yahij man Esteban a. Dan me se nij sí caraa cacun' xráá Esteban me se cuchruj nij so' sagan' nij so' rihaan yo'óó rej nicun' 'o sí tachruu cu'naj Saulo a.

<sup>59</sup> Gaa ne go' ndo'o nij so' yahij man Esteban, ne cachín ni'yaj so' rihaan Jesucristó, ne cataj so':

—Nihánj me se nacaj so' nimanj, Jesucristó Sí Chij —taj so', cachín ni'yaj so' rihaan Jesucristó a.

<sup>60</sup> Gaa ne canicun' ruj so', ne nucuaj ndo'o caguáj so', cataj so':

—Se caraa so' cacun' nihánj xráá nij so', man Sí Chij —taj so', gaa ne cavi' so' a.

## 8

<sup>1</sup> Ne sí cu'naj Saulo yo' ro', cunaj quiran' Esteban rá so' a.

*Nana nihánj taj xna'anj che'é sayuun qui'yaj sí cu'naj Saulo man nij yuviñ cuchumán rá ni'yaj man Jesucristó a*

Ne güii dan me se guun che'e nii qui'yaj ndo'o nii sayuun man nij sí cuchumán rá ni'yaj man Jesucristó sí ne chuman' Jerusalén a. Dan me se cunanj nij so' chuman' Jerusalén, ne ca'anj nij so' ndaa nu' estadó Judea do', estadó cu'naj Samaria do' a. Tzaj ne orún' ma'án nij apóstol cune' Jesucristó man nata' se nana so' ro', me nij sí yo'ó quináj chuman' Jerusalén a.

<sup>2</sup> Ne dan me se ta'aj nij sí sa' nimán cachin' man Esteban, ne ta'vee uxrá nij so' che'é se vaa cavi' so' a.

<sup>3</sup> Tzaj ne sí cu'naj Saulo me se sí taj ri'yunj man nij sí cuchumán rá ni'yaj man Jesucristó me so', ne ticavi' so' man nij sí noco' man Jesucristó a. Dan me se cuchi' so' ve' ne 'o 'o nij sí noco' man Jesucristó, ne quita'aa so' man nij so', ne dan me se nu' snó'o nu' chana nu' quita'aa so', ne caxrj so' taga' man nij so' a.

*Nana nihánj taj xna'anj se vaa cuchi' se nana Diose chuman' cu'naj Samaria a*

4 Dan me se nij sí cunánj me se chéé ndo'o nij so' nata' nij so' se nana Diose nana sa' rihaan yuvií a.

5 Ne sí cu'naj Felipé ca'anj chuman' Samaria, ne ca'mii natáj so' se nana Jesucristó rihaan nij yuvií man chuman' yo' a.

6 Gaa ne cuno nij sí man chuman' Samaria se nana Felipé, ne quene'en nij so' nij suun sa' nocoó qui'yaj so', ne che'é dan guun niha' ndo'o rá cunudanj nij so' cuno nij so' se nana Felipé a.

7 Dan me se que'ee nij nana chree curihanj nimán yuvií, qui'yaj so', ne nucuaj caguáj nij nana chree yo' gaa curihanj nij yo' a. Ne quinahuun que'ee nij sí ran' do', que'ee nij sí rengo do',

8 ne che'é dan guun niha' uxrá rá nij sí ne chuman' Samaria yo' a.

9 Ne dan me se gaa ataa cuchí' Felipé chuman' Samaria, ne vaa 'o snó'o cu'naj Simón chuman' yo', ne Simón me se qui'yaj chruun ndo'o so', ne ca'anj rá nij sí ne Samaria, qui'yaj so' a. Ne cataj so' rihaan nij yuvií se vaa sí sa' uxrá me ma'an so',

10 ne cunudanj nij yuvií caráya'anj uxrá se vaa qui'yaj so', ne dan me se nu' nij sí noco' do', nu' nij sí uun chij do', cataj se vaa me so' sí atá ndo'o rej nucuaj, qui'yaj ma'an Diose, taj nij so', ni'yaj nij so' man Simón a.

11 Dan me se sa' ndo'o nanó xrej nij yuvií daj taj so', che'é se sa' ndo'o qui'yaj chruun so', ne ca'anj rá nij so', qui'yaj Simón a.

12 Dan me se gaa nata' Felipé se nana Diose nana sa' che'é suun uun chij Diose rihaan chumií nihánj do', nana che'é Jesucristó do', ne cuchumán rá nij yuvií nana yo', ne cata' ne snó'o do', chana do', che'é Jesucristó a.

13 Ne ndaa ma'an Simón cuchumán rá nana yo', ne cata' ne so', ne canoco' so' xcó Felipé, ne ca'anj rá ma'an so' uún gaa quene'en so' nij suun sa' nocoó qui'yaj suun Felipé a.

14 Dan me se cuchí' nana rihaan nij apóstol sí cune' Jesucristó man nata' se nana so' sí ne chuman' Jerusalén se vaa cuchumán rá nij sí man chuman' Samaria se nana Diose, ne che'é dan ca'néé nij so' man Pedró do', man Juan do', se vaa cuchí' roj so' rihaan nij sí ne chuman' Samaria,

15 ne dan me se cuchí' roj so', gaa ne cachíín ni'yaj roj so' rihaan Diose che'é nij sí cuchumán rá ni'yaj man Jesucristó yanj chuman' Samaria se vaa catuú Nimán Diose nimán nij so' qui'yaj Diose a.

16 'Q se ataa catuú Nimán Diose nimán nij so' a. Maan se tihaj cata' ne uun nij so' che'é Jesucristó sji 'nij ra'a man ní' a.

17 Dan me se cuta' ra'a Pedró ga Juan raaj nij sí cuchumán rá ni'yaj man Jesucristó yanj chuman' Samaria, gaa ne catúj Nimán Diose nimán nij so' a.

18 Dan me se quene'en sí chruun cu'naj Simón se vaa gaa cuta' ra'a Pedró ga Juan raaj yuvií, ne catúj Nimán Diose nimán nij yuvií yo', ne che'é dan rquee so' sa'anj rihaan roj so',

19 ne cataj so':

—Rque 'unj sa'anj man roj soj, ne rque roj soj rej nucuaj nica' roj soj mán 'unj, ne me ma'an 'o sí cuta' 'unj ra'aj raaj, ne ca'vee catuú Nimán Diose nimán nij so', qui'yaj roj soj á —taj so' rihaan roj so' a.

20 Gaa ne cataj Pedró rihaan so' a:

—Tadó so' se cacaa so' rihaan ya'an ga se sa'anj so' á. Me che'é guun rá so' se vaa ane' se rque uun Diose ga.

21 Daj chihaa míj se ca'vee qui'yáa so' danj ma'. Ne vaa nica' a doj nimán so' rihaan Diose a man adonj.

<sup>22</sup> Vaa che'é canicaj nimán so' tanáj so' tucuaán chi'ij nocó' so' nihánj, gaa ne cachinj ni'yáá so' rihaan Diose síi 'nij ra'a man ní' sese ca'vee caraa x'naa so' ndaa vaa guun rá so' á.

<sup>23</sup> 'Q se cuano nihánj me se xcax 'ujj cuentá se vaa vaa chi'ij nu' nimán so' ei —taj Pedró rihaan Simón yo' a.

<sup>24</sup> Gaa ne cataj Simón:

—Cachinj ni'yaj roj soj rihaan Diose síi 'nij ra'a man ní' che'é 'ujj se gaa nanj quirán' 'ujj a doj se vaa cataj roj soj ruguanj —taj so' rihaan roj so' a.

<sup>25</sup> Dan me se nata' ndo'o roj so' se nana Diose síi 'nij ra'a man ní', gaa ne quinán' roj so' chuman' Jerusalén, ne nata' roj so' se nana Diose nana sa'rqe que'ee chuman' naj estadó cu'naj Samaria a.

*Nana nihánj taj xna'anj se vaa cuchumán rá 'o síi eunuco cavii rej cu'naj Etiopía ni'yaj so' man Jesucristó a*

<sup>26</sup> Gaa ne ca'mii yo' o se mozó Diose rihaan síi cu'naj Felipé, cataj so':

—Cavii so', ca'anj so' rej sur ndaa chrej avii chuman' Jerusalén 'anj ndaa chuman' Gaza á —taj se mozó Diose rihaan Felipé a.

Dan me se chrej vaj rej tacaan inanj me chrej yo' a.

<sup>27</sup> Dan me se cavii Felipé, ca'anj so', ne gaa vaj so' chrej yo', ne quene'en so' 'o síi eunuco cavii yo'óo cu'naj Etiopía, ne síi nuu rihaan chana reiná cu'naj Candace uun chij rihaan nu' yo'óo Etiopía me síi eunuco yo' a. Ne síi tumé nu' se sa'anj chana reiná yo' me so' a. Dan me se aj ca'anj so' chuman' Jerusalén na'vij so' rihaan Diose,

<sup>28</sup> ne nihánj me se nan' so' chiháán so', ne táá so' cuchri' nucuaj cuayó, ne nayaa so' nana cachrón síi cu'naj Isaías síi nata' se nana Diose gaa naá rihaan yanj a.

<sup>29</sup> Gaa ne dan me se cataj Nimán Diose rihaan Felipé a:

—Cuchij' so' rihaan cuchri' nucuaj cuayó 'na' nihánj, ne cachee so' rej x'núú cuchri' yo' á —taj Nimán Diose rihaan Felipé a.

<sup>30</sup> Dan me se cunánj Felipé rej x'núú cuchri', gaa ne cuno so' se vaa nayaa síi taj cuchri' se nana síi cu'naj Isaías síi nata' se nana Diose gaa naá a. Ne xna'anj Felipé man so', cataj Felipé:

—Ne ya uxrá unó so' nana nayaa so' na' —taj Felipé, xna'anj so' man síi eunuco yo' a.

<sup>31</sup> —'Q se asa' ca'vee cunoj nana nihánj rá so', ne nuvi' síi tucu'yón nana nihánj manj ga —taj síi eunuco yo' rihaan Felipé, gaa ne canacúún síi eunuco man Felipé se vaa cavii Felipé cuchri' ne quitaj so' rej x'núú síi eunuco yo' a.

<sup>32</sup> Dan me se nana nayaa síi eunuco yo' ro', me nana nihánj a: “Ase vaa dínj tu'va matzinj gaa uchi' xo' rihaan síi ticavi' man xo' do', ase vaa dínj tu'va matzinj le'ej gaa uchi' xo' rihaan síi cacá cachij xráá xo' do', danj quiyaj so', ne a doj nana ne ca'mij so' ma'.

<sup>33</sup> Dan me se caxrj na'aj ndo'o nii man so', ne maan che'é se naqui'yaj nica' so' nimán so', ne taj ca'ne' sa' cacun' che'é so' ma'. Tzaj ne a doj yuvij se guun nucuaj cataj xna'anj che'é cunudanj nij síi nocó' xna'anj tuvij' ga so', che'é se ne xna'anj so' a ma'. 'Q se ne vaj so' rihaan chumij nihánj cuano ma'”, taj se nana síi cu'naj Isaías nana nayaa síi eunuco yo' a.

<sup>34</sup> Dan me se xna'anj síi eunuco yo' man Felipé, cataj so':

—Me síi me síi quirán' nu' ndaa vaa taj xna'anj síi nata' se nana Diose nihánj ga. Ma'an síi nata' se nana Diose quirán' danj na'. Yo'ó so' xa' —taj síi eunuco, xna'anj so' man Felipé a.

<sup>35</sup> Gaa ne guun che'e Felipé cataj xna'anj so' daj taj ma'an nana yo' nana nayaa sí eunuco yo', gaa ne nata' so' nu' se nana Jesucristó nana sa' rihaan sí eunuco yo' a.

<sup>36</sup> Dan me se gaa vaj roj so' chrej, ne cuchi' roj so' rej nuu doj na, gaa ne cataj sí eunuco:

—Ni'yaj so' ei. Nihánj me nuu na á. Ne ca'vee cata' ne 'unj na' —taj so', xna'anj so' man Felipé a.

<sup>37</sup> Gaa ne cataj Felipé rihaan so' a:

—Sese ya ya amán rá so' ni'yaj so' man Jesucristó, ne ca'vee a —taj Felipé rihaan so' a.

Gaa ne cataj sí eunuco rihaan Felipé a:

—Amán rá 'unj se vaa ta'niú Diosé me Jesucristó ei —taj so' rihaan Felipé a.

<sup>38</sup> Gaa ne ca'ne' sí eunuco suun se vaa canicun' cuchri', gaa ne nanij roj so' rihaan yo'óo, gaa ne ca'anj roj so' rej nuu na, gaa ne cuta' ne Felipé man sí eunuco yo' a.

<sup>39</sup> Dan me se gaa curihanj roj so' rá na, gaa ne naxcaj Nimán Diosé man Felipé, ne ne quene'en uún sí eunuco yo' man Felipé a ma'. 'O se cavii sí eunuco yo', quinan' so', ne guun niha' rá so' a.

<sup>40</sup> Ne Felipé me se aj nuú so' chuman' Azoto a. Gaa ne nu' nij chuman' naj rej vaj so' ro', nata' so' se nana Diosé nana sa' rihaan nij sí ne nu' nij chuman' yo', ne danj qui'yaj so' ndaa se cuchi' so' chuman' Cesarea a.

## 9

*Nana nihánj taj xna'anj daj quiran' sí cu'naj Saulo gaa canicaj nimán so' qui'yaj Jesucristó a*

<sup>1</sup> Dan me se sí cu'naj Saulo me se 'o guun rá so' qui'yaj so' sayuun man nij sí noco' se nana Diosé sij 'nij ra'a man ní' ne ndaa guun rá so' cavi' nij so', ne che'é dan canoco' uxrá so' man nij sí noco' man Jesucristó a. Ne ca'anj so' rej ne xrej ata' suun noco'o doj,

<sup>2</sup> ne naxcaj so' yanj actá rihaan xrej, ne yanj actá yo' ro', ca'anj chuman' Damasco rihaan nij sí 'nij ra'a ve' tucu'yón nij yuvi' israelitá se tucuanj Moisés a. Ne taj xna'anj yanj yo' rihaan nij so' se vaa sese narj' Saulo man nij sí noco' man Jesucristó, ne se snó'o se chana se no xcuún so' numj' so' man nij so' ne ca'anj nica' so' man nij so' ndaa chuman' Jerusalén caxri' so' man nij so' taga' a.

<sup>3</sup> Dan me se nica' Saulo yanj, ne vaj so' chrej, ne quinichrun' so' chuman' Damasco yo', ne taj ni'yón cuchuguun nu' xta' nu' anicaj rej nicun' so' a.

<sup>4</sup> Gaa ne quinj so' rihaan yo'óo, ne dan me se cuno Saulo se vaa cataj yo' o so' rihaan so':

—Cunó so' ca'mij, Saulo. Me che'é 'yáa so' sayuun manj ga —taj nana cuno Saulo a.

<sup>5</sup> Gaa ne xna'anj Saulo man sí ca'mii rihaan so', cataj so':

—Sí Chij, me sí mé so' ga —taj so', xna'anj so' a.

Gaa ne sí ca'mii rihaan so' cataj:

—'Unj ro', me Jesús, ne 'yaj ndo'o so' sayuun manj adonj.

<sup>6</sup> Tzaj ne naxagaa so' ca'anj so' ndaa chuman' Damasco, gaa ne cataj nii rihaan so' daj qui'yáa so' á —taj Jesucristó rihaan Saulo a.

<sup>7</sup> Ne nij snó'o vaj chrej ga Saulo me se canicun' nij so', ne a doj nana ne ca'mii nij so' a ma'. Ne cuno nij so' nana yo', tzaj ne taj a 'ó rasuun ne quene'en nij so' a ma'.

<sup>8</sup> Ne Saulo me se naxumaan so', ne nuxra' so' rihaan so', tzaj ne taj se qui'yá' quene'en so' ma'. Yuun che'e caráán rihaan so' nanj adonj. Gaa ne quita'aa yo'ó nij so' ra'a so', ne racuj nij so' man Saulo chéé Saulo, ne ca'anj nij so' chuman' Damasco a.

<sup>9</sup> Ne quisij va'nuj güii ne ca'vee quene'en so' ma'. Ne ne cha so' ne ne co'q so' na a ma'.

<sup>10</sup> Dan me se chuman' Damasco ro', yáán 'o síi tucu'yón se nana Jesucristó, ne Ananías cu'naj so' a. Ne naqui'yaa Diose sij 'nij ra'a man ní' rihaan so', ne cataj so' a:

—Cunó so' ca'mij, Ananías —taj Diose sij 'nij ra'a man ní' no so' a.

—Nihánj né 'unj unó 'unj a'mii so' á —taj Ananías rihaan Diose sij 'nij ra'a man ní' a.

<sup>11</sup> Gaa ne cataj Diose sij 'nij ra'a man ní' rihaan Ananías a:

—Canicun' cayá so' ca'anj so' callé cu'naj Callé Nica, ne cuchí' so' ve' tucua' síi cu'naj Judas, ne nano' so' 'o síi cu'naj Saulo síi cavii chuman' Tarso á. 'Q se cuano nihánj me se achíin ni'yaj so' rihanj,

<sup>12</sup> Ne dan me se gaa cachíin ni'yaj so' ne naqui'yaa 'o síi cu'naj Ananías rihaan so', qui'yáj adonj. Ne catúj Ananías yo' rihaan so', ne cuta' ra'a so' raá Saulo, che'é rej ca'vee curuvi' uún rihaan so' qui'yáj a —taj Diose sij 'nij ra'a man ní' rihaan Ananías a.

<sup>13</sup> Gaa ne cataj Ananías rihaan Diose sij 'nij ra'a man ní' a:

—Tzaj ne aj cataj xna'anj ndo'o nii rihanj che'é síi nihánj, Síi Chij. 'Q se aj qui'yaj chi'ii ndo'o so' man nij síi sa' noco' mán so' nij síi yanj chuman' Jerusalén,

<sup>14</sup> Ne nihánj me se veé danj nicaj so' yanj actá che'é rej numj so' man cunudanj núj sij achíin ni'yaj rihaan so', qui'yaj nij xrej atá suun nocoq doj adonj —taj Ananías a.

<sup>15</sup> Gaa ne cataj Diose sij 'nij ra'a man ní' rihaan so' a:

—Ca'anj so' cuaj ei. 'Q se aj narii 'unj man so' qui'yaj suun so' rihanj, ne xcax nij síi yanj do', nij síi nicaj suun rey do', ma'an nij síi israelitá do', cuentá che'é 'unj, qui'yaj so' adonj.

<sup>16</sup> 'Q se 'unj me síi cataj xna'anj rihaan so' che'é nu' sayuun no xcúun so' quiran' so', che'é yan nata' so' rihaan yuvi' che'ej adonj —taj Diose sij 'nij ra'a man ní' rihaan Ananías a.

<sup>17</sup> Dan me se ca'anj Ananías, ne catúj so' rá ve' yo', ne cuta' ra'a so' raá Saulo, ne cataj so':

—Diose sij 'nij ra'a man ní' ca'née manj ca'naj rihaan so' nihánj, tinuj. Ne so' ro', me Jesucristó síi quene'én so' gaa vaj so' chrej gaa ca'ná' so' nihánj ei. Ne me rá so' curuvi' uún rihaan so' ne catuu ndo'o Nimán Diose nimán so' ei —taj Ananías rihaan so' a.

<sup>18</sup> Nu' ca'mii so' danj, ne nu' cayuu 'o rasuun rihaan Saulo, ne ase vaa 'o nuj catun' ro', danj vaa se cayuu rihaan so', ne curuvi' rihaan Saulo, ne canicun' cayá so', ne cata' ne so' a.

<sup>19</sup> Ne chá so' chraa, ne nari' nucuaj rá so' a.

*Nana nihánj taj xna'anj se vaa ca'mii natáj Saulo se nana Jesucristó chuman' Damasco a*

Dan me se cayáan Saulo doj güii ga nij síi tucu'yón se nana Jesucristó yanj chuman' Damasco,

<sup>20</sup> ne nu' ca'anj so' nij ve' tucu'yón nij yuvi' israelitá se tucuanj Moisés, ne ca'mii natáj so' rihaan nij so' se vaa Jesucristó ro', ta'nii ya Diose me so' a.

21 Ne cunudañj nij síi cuno se nana Saulo ro', caraya'anj ndo'o nij so' se nana so', ne cataj nij so':

—Tzaj ne nuveé sij nihánj me síi taj ri'yunj man nij síi yanj chuman' Jerusalén achín ni'yaj rihaan Jesucristó, ne ca'na' so' ndaa nihánj che'é rej me rá so' numíj so' man nij so' ne ca'anj nıcaj so' man nij so' rihaan nij xrej ata suun nocoqo doj, rá so' na' —taj nij síi cuno se nana Saulo rihaan tuvi' nij so' a.

22 Tzaj ne doj a nucuaj nata' so' se nana Jesucristó rihaan nij yuviı israelitá yanj chuman' Damasco, ne ve'é tihaan so' rihaan nij so' se vaa Jesucristó me síi ca'néé Diose tinanii man yuviı rihaan sayuun, ne ndaa cunuu dınj tu'va nij so', qui'yaj so' a.

*Nana nihánj taj xna'anj se vaa quinanii Saulo rihaan nij yuviı israelitá guun rá ticavi' man so' a*

23 Dan me se cachén que'ee güii, gaa ne cavii raq nij yuviı israelitá daj qui'yaj nij so' ne ca'vee ticavi' nij so' man Saulo a.

24 Tzaj ne xcaj Saulo cuentá daj guun rá nij so' qui'yaj nij so' man so', ne dan me se nuviı nigan' tumé ndo'o nij yuviı israelitá ta'yaa chingá yahıj taj rej atıj yuviı chuman' yo', che'é rej me rá nij so' narı' nij so' man Saulo ne ticavi' nij so' man Saulo, rá nij so' a.

25 Che'é dan nij síi tucu'yón se nana Saulo ro', ca'néé nij so' man Saulo rá 'o scaa xıj, ne rej niı tacuachén nij so' man Saulo rque ta'yaa le'ej taj chingá yahıj aráan tu'va chuman', ne tananij nij so' man Saulo rihaan yo'óo xe', ne dan me se quinanii so' a.

*Nana nihánj taj xna'anj se vaa ve'é ca'mii nij síi tucu'yón se nana Jesucristó yanj chuman' Jerusalén ga Saulo a*

26 Dan me se cuchı' Saulo chuman' Jerusalén, ne guun rá so' cunuı chre' so' ga nij síi tucu'yón se nana Jesucristó, tzaj ne cucu'vi' cunudañj nij so' ni'yaj nij so' man Saulo a. 'O se ne cuchuman rá nij so' ni'yaj nij so' se nana Saulo se vaa sij tucu'yón se nana Jesucristó me so' a.

27 Che'é dan nicaj síi cu'naj Bernabé man so', ca'anj so' rihaan ma'an nij apóstol cune' Jesucristó man nata' se nana so', ne nata' Bernabé rihaan nij so' daj guun gaa quene'en Saulo man Jesucristó sij 'nij ra'a man ní' gaa vaj so' chrej ne ca'mii so' ga Jesucristó sij 'nij ra'a man ní', ne nata' uún Bernabé daj qui'yaj Saulo chuman' Damasco gaa ca'mii natáj so', ne ne cucu'vi' so' a doj ca'mii natáj so' rihaan nij yuviı che'é Jesucristó, taj Bernabé a.

28 Dan me se guun che'e nij so' ve'é ca'mii nij so' ga Saulo, ne 'o vaj so' ga nij so' a. Ne ca'mii natáj so' se nana Jesucristó síi 'nij ra'a man ní' rihaan nij síi man chuman' Jerusalén, ne a doj ne cucu'vi' so', ne nucuaj ca'mii natáj so' rihaan nij yuviı a.

29 Dan me se ca'mii so' ga nij síi israelitá a'mii xna'anj griego, ne canó tuvi' nij so' ga so' a. Tzaj ne nij so' ro', guun rá ticavi' man so' a.

30 Dan me se xcaj nij tinuj nij síi noco' man Jesucristó cuentá se vaa guun rá yo'óo nij síi israelitá ticavi' nij so' man Saulo, ne che'é dan ca'anj nicaj nij so' man Saulo ndaa chuman' Cesarea, gaa ne ca'néé nij so' man so' ndaa chuman' Tarso a.

31 Veé dan me se dınj yáan cunudañj nij síi cuchumán rá ni'yaj man Jesucristó yanj nu' estadó Judea do', Galilea do', Samaria do' a. Dan me se caráj cochroj ndo'o nij so' rihaan Diose sij 'nij ra'a man ní', ne che'é dan ve'é

doj nari' nij so' canoco' nij so' se tucuꝋanj so' a. Ne Nimán Diose tucu'yón man nij so' daj qui'yaj nij so', ne che'é dan guun riꝋ ndo'o nij so' doj a.

*Nana nihánj taj xna'anj se vaa quinahuun sa' sí cu'naj Eneas, qui'yaj Jesucristó, gaa ca'mii Pedró ga so' a*

<sup>32</sup> Dan me se chéé sí cu'naj Pedró nu' rej ne nij sí sa' noco' man Diose, ne dan me se cuchi' so' ndaa rihaan tinúú nij so' ne chuman' Lida,

<sup>33</sup> ne chuman' Lida ro', nari' so' 'o sí cu'naj Eneas, ne so' me se aj quisíj tunj ya yo' yo'o naj so' rihaan yuvéé, ne 'o sí taj se 'yá' cachee me so',

<sup>34</sup> ne dan me se cataj Pedró rihaan so':

—Cuanó nihánj me se nahuun sa' so', 'yaj Jesucristó, Eneas. Naxagaa so' cuaj, ne nacue so' tuvée so' cuaj ei —taj Pedró rihaan so', ne nu' ca'mii Pedró danj, ne nu' naxumaꝋan caya so' canicun' so' a.

<sup>35</sup> Gaa ne quene'en cunudanj nij sí yanj chuman' Lida do', nij sí yanj taa cu'naj Sarón do', ndaa vaa nahuun sa' sí cu'naj Eneas yo', gaa ne che'é dan canicaj nimán nij so' canoco' nij so' man Diose sij 'nij ra'a man ní' a.

*Nana nihánj taj xna'anj se vaa cunuu i'na' uún chana cu'naj Dorcas, qui'yaj Pedró a*

<sup>36</sup> Dan me se chuman' Jope yáán 'o chana tucu'yón se nana Jesucristó, ne Tabita cu'naj no' xna'ánj hebreo, ne Dorcas me se chuvii no' xna'ánj griego a. Ne chana qui'yaj inanj se sa' me no', ne rqué ndo'o no' rasuꝋun man nij sí nique,

<sup>37</sup> ne güii dan me se canó chi'ij man no', ne quiran' ndo'o no', ne cavi' no' a. Ne tucuanee nii man no', ne cuchruj nii man no' rque ve' nata',

<sup>38</sup> ne dan me se nichrun' naj chuman' Lida ga chuman' Jope, ne cuchi' nana rihaan nij sí tucu'yón se nana Jesucristó yanj chuman' Jope se vaa vaj Pedró chuman' Lida yo', ne che'é dan ca'néé nij so' man vij snó'o cuchi' roj so' rihaan Pedró a. Dan me se cuchi' roj so' rihaan Pedró, ne cataj roj so':

—Se guun raꝋan so' cuchi' so' rihaan núj sij yanj chuman' Jope ma' —taj roj so' rihaan Pedró a.

<sup>39</sup> Gaa ne naxumaꝋan Pedró, ne ca'anj so' cuaj ga roj so' a. Ne gaa cuchi' nij so' chuman' Jope, ne ca'anj nicaꝋ nij so' man Pedró rá ve' nata' naj chana cavi' cu'naj Dorcas, ne ca'na' cunudanj nij chana cavi' nica rihaan Pedró, ne ta'vee nij no', ne tihaꝋan nij chana rihaan Pedró cunudanj nij yatzíj qui'yaj Dorcas gaa vaa i'na' no' a.

<sup>40</sup> Dan me se quirii Pedró man cunudanj nij no' xe', gaa ne canicun' ruj so', ne cachúin ni'yaj ndo'o so' rihaan Diose a. Gaa ne canicaj so', cataj so' rihaan cúu man chana a:

—Naxagaa so', Tabita —taj so' rihaan no' a.

Gaa ne naxra' rihaan no', ne gaa quene'en no' man Pedró, ne ca'anj cane caya no',

<sup>41</sup> ne quita'aa Pedró ra'a no', ne naxumaꝋan no', qui'yaj so' a. Gaa ne canacúun so' ca'na' nij chana cavi' nica do', yo'ó nij sí sa' noco' man Diose do', ne tihaꝋan so' man ní cu'naj Dorcas rihaan nij so' se vaa cunuu i'na' uún no' a.

<sup>42</sup> Dan me se cuchi' nana che'é Dorcas rihaan cunudanj nij sí ne chuman' Jope, ne che'é dan que'ee nij sí man Jope cuchumán rá ni'yaj man Diose sij 'nij ra'a man ní' a.

<sup>43</sup> Dan me se guun raan Pedró que'ee güii chuman' Jope, ne dan me se tucua 'o síi cu'naj Simón caran' so' que'ee güii, ne síi naqui'yaj laruu nuj xcuu me Simón yo' a.

## 10

*Nana nihánj taj xna'anj se vaa cuchi' se nana Jesucristó rihaan nij tuvi' síi yaníj cu'naj Cornelio a*

<sup>1</sup> Dan me se yaán 'o síi cu'naj Cornelio chuman' Cesarea, ne síi 'nij ra'a 'o ta'aj x'ne' tanuu cu'naj italiano me so' a. Dan me se nuveé sij israelitá me so', maan se sij yaníj me so',

<sup>2</sup> ne sij ve'é ndo'o noco' man Diose me so', ne aráj cochroj ndo'o so' rihaan Diose, ne ase vaa 'yaj so' ro', danj 'yaj nij tucua so' uún a. Ne rqué ndo'o so' caridad rihaan nij yuvi, ne niganj cachúin ni'yaj so' rihaan Diose a.

<sup>3</sup> Dan me se aga' va'nuj rej ca'anj güii ta' asuun me se naqui'yaa ranga' yo' se mozó Diose rihaan so', ne catúj se mozó Diose yo' rej nicun' so', ne cataj se mozó Diose:

—Cornelio —taj se mozó Diose no so' a.

<sup>4</sup> Gaa ne ni'yaj uxrá Cornelio man se mozó Diose yo', ne cucu'vi' ndo'o so', ne cataj so':

—Me che'é nacúin so' manj, ga —taj so', xná'anj so' man se mozó Diose yo' a.

Gaa ne cataj se mozó Diose rihaan so' a:

—Aj xcaj Diose cuenta che'é nana achúin ni'yáa so' rihaan Diose, ne aj xcaj Diose cuenta che'é caridad 'yáa so' a. Che'é dan nuu rá Diose man so' a.

<sup>5</sup> Ne nihánj me se ca'nej so' snó'o ca'anj chuman' Jope, ne nacunj nij so' ca'na' 'o síi cu'naj Simón Pedró nihánj á.

<sup>6</sup> Ne so' me se aran' so' ve' tucua yo' síi cu'naj Simón síi naqui'yaj laruu nuj xcuu síi ne tu'va na ya'anj a —taj se mozó Diose rihaan Cornelio a.

<sup>7</sup> Dan me se ca'anj uún se mozó Diose yo', gaa ne canacúin Cornelio ca'na' vij se mozó ma'an so' do', yo' tanuu noco' man Diose ga so' do',

<sup>8</sup> ne ca'na' va'nuj nij so', ne cataj xna'anj so' rihaan nij so' se vaa cataj se mozó Diose rihaan so', gaa ne ca'neé so' man nij so' ca'anj nij so' chuman' Jope nano' nij so' man síi cu'naj Simón Pedró a.

<sup>9</sup> Ne yo' güii me se vaj va'nuj nij so' chrej, ne maan orá quinichrun' nij so' chuman' Jope me se cavii Pedró xráa ve' caran' so', cachinj ni'yaj so' rihaan Diose, ne caxuj me yo',

<sup>10</sup> ne dan me se quina'aan rque so', ne guun rá so' cha so' chraa a. Ne tihaj 'yaj chuvi nij síi man rá ve' cha so', ne maan orá dan naqui'yaa 'o rasuun rihaan Pedró a.

<sup>11</sup> Dan me se quene'en so' se vaa naxra' rej xtá, ne nanij yo' rasuun rihaan yo'óo, ne ase vaa 'o yatzíj mantá caxra' ndo'o vaa yo', ne vaa ca'anj scúj yatzíj mantá yo' a.

<sup>12</sup> Ne nuu cunudanj nij xcuu vaa ca'anj tacóo do', nij xcuu nucuaj rij man do', nij xtáj do', yo'óo nij xcuu vaa tachrij xráa do', nuu rque yatzíj mantá yo' a.

<sup>13</sup> Gaa ne cuno Pedró nana ca'mii yo' so' rihaan so' a:

—Naxumaan so', Pedró. Ticavi' so' man nij xcuu yo', ne cha so' nee á —taj nana yo' cuno Pedró a.

<sup>14</sup> Gaa ne cataj Pedró:



—Se guun ma'. Daj chihaa míj se guun quí'yáj danj, man Síí Chij. 'O se nuveé xcuu chá me yo' rihaan núj sij israelitá ma'. Maan se xcuu vaa chí'ij me nij xo' rihaan núj nanj á. 'O se nu' ca'na' a doj ne chá 'unj nee xcuu vaa danj a ma' —taj Pedró a.

<sup>15</sup> Gaa ne ca'mii uún síí ca'mii rihaan Pedró, cataj so':

—Ne sese Diosé me síí cataj se vaa cunuú sa' 'o rasuun, ne se guun cataj so' se vaa chí'ij vaa rasuun yo' rihaan so' ma' —taj uún so' rihaan Pedró a.

<sup>16</sup> Gaa ne dan me se quisíj va'núj cuno Pedró nana vaa danj nana ca'mii Diosé rihaan so', gaa ne nu' cavii uún nu' yatzíj mantá man xcuu yo' rej xta' a.

<sup>17</sup> Dan me se quinanó ndo'o rá Pedró che'é rasuun naqui'yaa rihaan so', ne maan orá dan nari' nij snó'o ca'neé síí cu'naj Cornelió ve' tucua Simón, ne dan me se canicun' nij so' ta'yaa rihaan ve' yo',

<sup>18</sup> ne canacúún nij so', xná'anj nij so' sese aran' 'o síí cu'naj Simón Pedró ve' yo' a.

<sup>19</sup> Dan me se Pedró ro', nuchruj raa che'é nij rasuun naqui'yaa rihaan so', ne dan me se cataj Nimán Diosé rihaan so':

—Nihánj me se ca'na' va'núj snó'o nano' mán so',

<sup>20</sup> ne cuaj naxumaan so', nanij so', ne ca'anj so' ga nij so' á. Ne se guun vij rá so', ne se cataj so' se vaa ne nó xcuún so' ca'anj so' ga nij so' ma'. 'O se 'unj nihánj me síí ca'neé man nij so' ca'na' nij so' adonj —taj Nimán Diosé rihaan Pedró a.

<sup>21</sup> Gaa ne nanij Pedró ndaa rej nicun' va'núj nij snó'o, ne cataj so' rihaan nij so':

—'Unj nihánj me síí nano' nij soj ei. Ne me che'é ca'na' soj nihánj ga —taj Pedró, xná'anj so' man nij so' a.

<sup>22</sup> Gaa ne cataj nij so':

—Ca'mii 'o se mozó Diosé mozó guee rihaan 'o síí cu'naj Cornelió, ne so' ro', me síí 'nij ra'a 'o ta'aj x'ne' tanuu, ne cunudanj nij yuvij israelitá taj se vaa síí vaa nica nimán me so' ne síí aráj cochroj ndo'o rihaan Diosé me uún so', ne dan me se cataj xna'anj se mozó Diosé rihaan so' se vaa nacunj so' mán so' cuchj' so' ve' tucua so' ne cunó so' nana nata' so' rihaan so' a —taj nij so' rihaan Pedró a.

<sup>23</sup> Che'é dan cataj Pedró se vaa catuú nij so' rá ve', ne ve'é ca'mii so' ga nij so' a. Ne ranga' yo'ó güii me se naxagaa nij so', ne ca'anj Pedró ga ya'núj nij so', ne ca'anj doj nij tinuj nij síí cuchumán rá ni'yaj man Jesucristó yanj chuman' Jope do', ga Pedró a.

<sup>24</sup> Ne yo'ó güii uún me se catúj nij so' chuman' Cesarea, ne síí cu'naj Cornelió me se na'vij ndo'o so' ca'na' nij so', ne aj canacúún so' man nij tuvi' so' do', man nij síí ca'mii sa' ga so' do', se vaa cunuú chre' nij so' rá ve' tucua so' a.

<sup>25</sup> Dan me se gaa guun rá Pedró catuú Pedró rá ve', ne nari' tuvi' Cornelió ga so', ne canicun' ruj Cornelió rihaan Pedró, ne caráj guee Cornelió rihaan so' a.

<sup>26</sup> Tzaj ne cataj Pedró rihaan Cornelió:

—Naxumaan so' ei. Taj che'é caraa guee so' rihanj ma'. 'O cuyaan yuvij uun me ní' nanj á —taj Pedró rihaan Cornelió a.

<sup>27</sup> Dan me se nanó Pedró cuentó ga Cornelió, ne catúj Pedró rá ve', gaa ne quene'en so' se vaa aj nuu chre' que'ee yuvij rá ve' yo' a.

<sup>28</sup> Gaa ne cataj Pedró rihaan nij yuvij:

—Aj ne'en nij soj se tucuꝋnj núj sij israelitá se vaa ne nó xcúún núj catuꝋ núj rej man soj sij yaníj, ne ne nó xcúún núj cunuꝋ chre' núj ga soj ma'. Tzaj ne Diose tíhaꝋn rihaan ma'anj se vaa se ca'vee cataj 'unj se vaa nij vaa ta'aj yuviꝋ rihaan so' ma'.

<sup>29</sup> Che'é dan gaa canacúún Cornelió nihánj manj, ne ne cataj 'unj se vaa se ca'anj 'unj ma'. Tananj ca'ná' 'unj cuaj nanj ei. Ne nihánj me se cataj xna'anj nij soj rihanj daj me che'é canacúún nij soj manj ca'naj ei —taj Pedró rihaan nij tuvi' Cornelió a.

<sup>30</sup> Gaa ne cataj Cornelió rihaan so':

—Cachén ca'anj güii ne maꝋn orá nihánj me ta' asuun, ne aga' va'nuj me yo', ne cachíin ni'yáá 'unj rihaan Diose rá ve' tucuaꝋ, ne taj ni'yón naqui'yaa 'o snó'o nicun' rihanj, ne yatzíj catziꝋ chuguꝋn ma'an nuú so',

<sup>31</sup> ne cataj so' rihanj a: "Cunó so' ca'mij, Cornelio. Aj cuno Diose nana achíin ni'yáá so' rihaan so', ne Diose me síi nuꝋ rá se vaa rqué ndo'o so' caridad rihaan nij síi nique,

<sup>32</sup> ne dan me se ca'nej so' nana ndaa chuman' Jope, ne canacunj so' ca'naj 'o síi cu'naj Simón Pedró nihánj á. Ne so' ro', aran' ve' tucua' 'o síi cu'naj Simón síi naqui'yaj laruu nuꝋ xcuu síi ne tu'va na ya'anj a", taj snó'o yo' rihanj adonj.

<sup>33</sup> Che'é dan me ra'yanj ca'née 'unj nana rihaan so', ne so' ro', qui'yaj ndo'o se luj che'é núj se vaa ca'ná' so' rihaan núj nihánj ne che'é dan me mán taran' núj rihaan Diose nihánj cuano, che'é rej me rá núj cunꝋ núj nu' nana cataj xna'anj Diose síi 'nij ra'a man ní' rihaan so' ei —taj Cornelió rihaan Pedró a.

<sup>34</sup> Gaa ne guun che'e Pedró ca'mii so' rihaan nij so' a:

—Ndaa yaj me se xcaꝋ 'unj cuentá se vaa ya 'o cuyaꝋn vaa cunudanj yuviꝋ rihaan Diose á.

<sup>35</sup> Ne síi yanj me ma'an chuman' síi aráj cochroj rihaan Diose ne noco' tucuaán sa' ro', ca'vee nacaj Diose man so' adonj.

<sup>36</sup> Aj ne'en nij soj nana sa' ca'née Diose rihaan núj sij israelitá se vaa ve'é nacaj Diose man núj che'é se vaa qui'yaj Jesucristó che'é núj, ne Jesucristó ro', me síi 'nij ra'a man cunudanj yuviꝋ adonj.

<sup>37</sup> Dan me se nana yo' ro', me nana cuchi' nu' chuman' chiháán núj sij israelitá, ne dan me se gaa quisij ca'mii natáj síi cu'naj Juan se vaa no xcúún yuviꝋ cata' ne yuviꝋ, ne guun che'e Jesucristó nata' so' se nana so' rihaan núj sij man estado Galilea,

<sup>38</sup> ne nana yo' ro', me se nana Jesucristó síi cavii chuman' Nazaret ei. Ne nana yo' taj se vaa cune' Diose man so' qui'yaj suun so' rihaan Diose, ne rqué ndo'o Diose Nimán Diose man so', ne rqué ndo'o Diose rej nucuaj man so', ne dan me se cachée Jesucristó, ne qui'yaj suun ndo'o so' suun sa', ne cunudanj nij síi ran' sayuun 'yaj síi chree che'é se quirii ta'nga' síi chree rihaan nij so' ro', quinahuun sa' nij so', qui'yaj Jesucristó a. 'Q se Diose ro', racuíj ndo'o man Jesucristó 'yaj so' danj adonj.

<sup>39</sup> Ne ma'an núj me síi quene'en nu' se vaa qui'yaj so' gaa vaj so' nu' rej ne núj sij israelitá do', ndaa ma'an chuman' Jerusalén do' ei. Ne dan me se cachrón nii man so' rihaan rcutze, ne cavi' so', qui'yaj nii ei.

<sup>40</sup> Gaa ne quisij va'nuj güii cavi' so', gaa ne cunuꝋ i'na' uún so', qui'yaj Diose, ne curuvi' so' rihaan núj, qui'yaj uún Diose adonj.

<sup>41</sup> Dan me se ne curuvi' so' rihaan cunudanj nij yuviꝋ ma'. Tananj curuvi' so' rihaan núj sij aj narii Diose nata' rihaan yuviꝋ daj vaa so', ne núj me síi chá chraa ne co'o na ga so' gaa cunuꝋ i'na' uún so' gaa cavi' so' adonj.

<sup>42</sup> Gaa ne ca'ne' so' suun rihaan núj ca'mii natáj núj rihaan nij yuvií ne nata' núj nana se vaa ma'an so' me sí cune' Diose ca'ne' cacun' che'é nij yuvií vaa i'na' do', che'é nij yuvií cavi' do' adonj.

<sup>43</sup> Ne cunudanj nij sí nata' se nana Diose gaa naá ro', cataj xna'anj nij so' che'é so', ne cataj nij so' se vaa caraá x'naa Diose ni'yaj Diose cunudanj nij sí amán rá ni'yaj man Jesucristó a —taj Pedró rihaan nij tuvi' Cornelió a.

<sup>44</sup> Dan me se ataa á doj quisij ca'mii Pedró nu' se nana so', gaa ne catúj ndo'o Nimán Diose nimán cunudanj nij sí cuno nana yo' a.

<sup>45</sup> Gaa ne nij sí israelitá cuchumán rá ni'yaj man Jesucristó ca'na' ga Pedró ro', caráya'anj nij so' se vaa qui'yaj Diose se luj che'é nij yuvií yaníj ne ndaa nimán nij yuvií yaníj catúj Nimán Diose, qui'yaj Diose a.

<sup>46</sup> 'O se cuno nij so' se vaa ca'mii nij tuvi' Cornelió xna'ánj naca, cataj nij so' se vaa sa' uxrá vaa Diose á. Gaa ne cataj Pedró rihaan tuvi' ma'an so':

<sup>47</sup> —Nihánj me se ve'é nacaj Nimán Diose man sí nihánj ndaa vaa nacaj so' man ma'an ní' adonj. Se ca'vee caráán ní' chrej rihaan nij so' cata' ne nij so' ma' —taj Pedró rihaan nij tuvi' so' a.

<sup>48</sup> Gaa ne ca'ne' Pedró suun rihaan nij so' se vaa cata' ne nij so', che'é se sij noco' man Jesucristó me nij so' a. Danj qui'yaj nij so', gaa ne cachín ni'yaj nij so' rihaan Pedró se vaa guun raan so' que'ee doj güii ga nij so' a.

## 11

*Nana nihánj taj xna'anj daj guun rá nij sí israelitá cuchumán rá ni'yaj man Jesucristó ga cuno nij so' nana se vaa cuchumán rá nij sí yaníj ni'yaj nij so' man Jesucristó a*

<sup>1</sup> Dan me se cuno nij sí cune' Jesucristó man nata' se nana so' cuno yo'ó nij tinuj nij sí cuchumán rá ni'yaj man Jesucristó yanj estadó Judea cuno nana se vaa ndaa nij sí yaníj canoco' se nana Diose a.

<sup>2</sup> Ne gaa cavii Pedró ca'anj so' chuman' Jerusalén, ne nij sí israelitá cuchumán rá ni'yaj man Jesucristó ro', cuta' cacun' xraá so',

<sup>3</sup> cataj nij so':

—Me che'é catúj so' rá ve' tucua' sí yaníj ga. Me che'é chá so' chraa ga nij so' ga —taj nij so' rihaan Pedró a.

<sup>4</sup> Gaa ne guun che'e Pedró cataj xna'anj nica so' rihaan nij so' daj me che'é qui'yaj so' danj a. Dan me se cataj so':

<sup>5</sup> —Chuman' Jope vaj 'unj, ne cachín ni'yáá 'unj rihaan Diose, ne dan me se naqui'yaa 'o rasuun rihanj, qui'yaj Diose a. Ne dan me se nanij 'o rasuun, ne ase vaa 'o yatzíj mantá caxrá' vaa rasuun yo', ne vaa ca'anj scúj yatzíj yo' a. Ne cavii yatzíj yo' rej xta', ne quinaniy yo' rej nicun' 'unj a.

<sup>6</sup> Dan me se ni'yaj uxraj yatzíj yo', ne quene'enj se vaa man cunudanj nij xcuu vaa ca'anj tacóo do', ndaa xcuu quij do', xcuu nucuaj rij man do', xtáj do', nu' xcuu vaa tachrii xraá do', man rque yatzíj yo' a.

<sup>7</sup> Gaa ne cunó 'unj se vaa ca'mii yo'ó so' rihanj, cataj so': “Naxumaan so', Pedró. Tijavi' so' man nij xcuu yo', chá so' á”, taj so' cunoj a.

<sup>8</sup> Gaa ne cataj 'unj: “Daj chihaa mij se guun qui'yáj danj, man Sí Chij. 'O se nuveé xcuu chá me nij xo' rihaan núj sij israelitá ma'. Maan xcuu vaa chi'ij me nij xo' rihaan núj nanj á. Nu' ca'na' me se ne catuu nee xcuu vaa danj tu'vaj ma'”, cataj 'unj rihaan sí ca'mii rihanj a.

<sup>9</sup> Gaa ne ca'mii uún so' rihanj, cataj so': "Ne sese Diose me sí cataj se vaa cunuú sa' 'o rasuún, ne se guun cataj so' se vaa chi'ii vaa rasuún yo' rihaan so' ma'", cataj so' rihanj a.

<sup>10</sup> Dan me se quisij va'nuj ca'mii so' nana vaa danj rihanj, gaa ne cavii uún nu' rasuún yo' rej xta', ca'anj yo' a.

<sup>11</sup> "Ne nu' cavii rasuún yo' rej xta', ne nu' cuchi' va'nuj snó'o rihaan ve' carán' 'unj, ne nij sí ca'néé 'o sí ne chuman' Cesarea me va'nuj nij so', nano' nij so' manj a.

<sup>12</sup> Gaa ne cataj xna'anj Nimán Diose rihanj se vaa ca'anj 'unj ga nij so', ne se guun rá 'unj se vaa yuvi'ij nij doj rihaan ní' sij israelitá me nij so', taj Nimán Diose rihanj a. Che'é dan ca'anj 'unj ga va'nuj nij so', ne vatan' tinúú ní' sí nihánj ro', me sí ca'anj ga 'unj a. Gaa ne catúj núj rá ve' tucua' sí canacúun manj,

<sup>13</sup> gaa ne nata' sí ne ve' yo' rihaan 'unj se vaa aj quene'en so' 'o se mozó Diose rá ve' tucua' so', ne dan me se curuvi' se mozó Diose yo' rihaan so', ne cataj se mozó Diose yo' rihaan so': "Ca'nej so' nana chuman' Jope rihaan 'o sí cu'naj Simón Pedró, ne nacunj so' man so' ca'na' so' nihánj rihaan so' á.

<sup>14</sup> Ne so' me sí nata' nana rihaan so', ne sese cunó nu' nij tucua' soj nana yo', ne ca'vee quinanj taran' soj rihaan sayuun adonj, taj se mozó Diose rihaan sí ne ve' yo', taj so' rihanj nanj á.

<sup>15</sup> "Dan me se guun che'ej nataj se nana Jesucristó rihaan nij so', gaa ne catúj Nimán Diose nimán nij so' ndaa vaa catúj Nimán Diose nimán ma'an ní' gaa asino yaan nanj ei.

<sup>16</sup> Gaa ne ninuj rá 'unj se nana Diose sij 'nij ra'a man ní' gaa cataj so': "Juan ro', na uún cata' ne so' man yuvi'ij, tzaj ne xa' soj, tzaj ne Diose cuta' ne nimán soj ga ma'an Nimán Diose nanj adonj", taj sí 'nij ra'a man ní' a.

<sup>17</sup> Dan me se cuyaán vaa se luj qui'yaj Diose che'é ma'an ní' sij amán rá ni'yaj man Jesucristó sij 'nij ra'a man ní' nanj adonj. Ne sese Diose me sí guun rá qui'yaj danj, ne asa' ca'vee caráán 'unj chrej rihaan Diose se vaa se qui'yaj so' se vaa me rá so' qui'yaj so', rá soj ga —taj Pedró rihaan nij sí israelitá cuchumán rá ni'yaj man Jesucristó a.

<sup>18</sup> Dan me se qui'yaj canaán se nana Pedró rihaan se nana yo'ó nij so', gaa ne cataj nij so' se vaa sa' uxrá qui'yaj Diose a. Ne cataj uún nij so':

—Che'é dan me ndaa nij sí yanj canicaj nimán canoco' chrej sa', qui'yaj Diose, ne che'é dan cayáán nij sí yanj rihaan Diose nu' cavii nu' ca'anj adonj —taj cunudanj nij sí israelitá a.

*Nana nihánj taj xna'anj che'é nij sí cuchumán rá ni'yaj man Jesucristó yanj chuman' Antioquia a*

<sup>19</sup> Dan me se che'é se nana sí cu'naj Esteban me se qui'yaj ndo'o nii sayuun man nij sí israelitá cuchumán rá ni'yaj man Jesucristó a. Che'é dan tanáj nij so' chuman' Jerusalén, ne cunanj nij so' ca'anj nij so' ndaa estadó cu'naj Fenicia do', ndaa yo'óo taj rihaan na ya'anj cu'naj Chipre do', ndaa chuman' Antioquia do' a. Tzaj ne inanj rihaan nij yuvi'ij israelitá nata' nij so' se nana Jesucristó, ne ne ca'mii nij so' ga nij sí yanj ma'.

<sup>20</sup> Tzaj ne doj tuvi'ij nij so' me sí cavii Chipre do', estadó Cirene do', ne nij so' ro', ca'anj chuman' Antioquia, ne ndaa rihaan nij sí yanj sí a'mii xna'ánj griego nata' nij so' nana sa' se nana Jesucristó sij 'nij ra'a man ní' a.

<sup>21</sup> Ne racuíj ndo'o Diose sij 'nij ra'a man ní' man nij síí nata' se nana so', ne que'ee nij síí yaníj yo' cuchumán rá cuno nana sa' yo', ne canoco' nij so' man Jesucristó sij 'nij ra'a man ní' a.

<sup>22</sup> Dan me se cuchi' nana rihaan nij síí cuchumán rá ni'yaj man Jesucristó yanj chuman' Jerusalén se vaa cuchumán rá nij síí yaníj yanj chuman' Antioquía ni'yaj nij so' man Jesucristó a. Che'é dan ca'née nij so' man síí cu'naj Bernabé cuchi' so' chuman' Antioquía a.

<sup>23</sup> Dan me se cuchi' so', gaa ne quene'en so' se vaa qui'yaj ndo'o Diose se luj ga nij síí yaníj yo', ne guun niha' uxrá rá so', ne narqué so' chrej sa' rihaan nij síí yaníj yo' se vaa ca'nej nimán nij so' yo' canoco' raan nij so' man Diose sij 'nij ra'a man ní' a.

<sup>24</sup> 'Q se síí vaa sa' nimán me síí cu'naj Bernabé yo', ne nuu ndo'o Nimán Diose nimán so', ne síí nucaj ndo'o rá man Diose me uún so' a. Gaa ne dan me se guun rijí doj yuvij canoco' man síí 'nij ra'a man ní',

<sup>25</sup> ne ca'anj Bernabé chuman' Tarso, nano' so' man síí cu'naj Saulo,

<sup>26</sup> ne nari' Bernabé man Saulo, gaa ne nicaj Bernabé man Saulo ca'na' so' chuman' Antioquía a. Ne dan me se 'o yo' ro', yáán roj so' ga nij síí cuchumán rá ni'yaj man Jesucristó yanj chuman' Antioquía, ne tucu'yón roj so' se nana Diose man que'ee ndo'o nij yuvij man yo' a. Ne nij síí man chuman' Antioquía me nij síí guun che'e tucu'náj "cristiano" man nij síí tucu'yón se nana Jesucristó a. 'Q se nana "cristiano" me rá cataj nij síí chéé stucuanj Cristo a.

<sup>27</sup> Ne güii yo' me se cavii doj síí nata' se nana Diose chuman' Jerusalén, ne ca'anj nij so' chuman' Antioquía a.

<sup>28</sup> Ne canicun' yo' o' tuvi' nij síí nata' se nana Diose yo', ne síí cu'naj Agabo me so' a. Ne nata' so' nana rque Nimán Diose rihaan so' se vaa vaa güii, ne cachén x'naa nu' chuman' naj rihaan chumij a. Ne gaa cayáán síí cu'naj Claudio síí nicaj suun emperador, ne cachén ya x'naa ndaa vaa cataj síí cu'naj Agabo a.

<sup>29</sup> Dan me se nij síí tucu'yón se nana Jesucristó ro', gaa cuno nij so' se nana síí cu'naj Agabo, ne nuchruj raa 'o 'o' nij so' se vaa me daj sa'anj rque so' man tinúú nij so' síí yanj estadó Judea ne racuíj man nij so' a. Ne síí ru'vee doj rque nocoo doj sa'anj, ne síí nique doj ro', rqué doj sa'anj a.

<sup>30</sup> Gaa ne go' nij so' sa'anj yo' man Bernabé ga Saulo, caxrij roj so' ston nij síí uun chij rihaan nij síí cuchumán rá ni'yaj man Jesucristó yanj chuman' Jerusalén a.

## 12

*Nana nihánj taj xna'anj daj guun gaa tinanii Diose man Pedró rihaan síí cu'naj Herodes a*

<sup>1</sup> Dan me se güii dan me se guun rá síí nicaj suun rey cu'naj Herodes qui'yaj chi'ij so' man nij síí cuchumán rá ni'yaj man Jesucristó a. Che'é dan ca'ne' so' suun rihaan tanuu quita'aa nij tanuu man ta'aj nij so' a.

<sup>2</sup> Ne raa neê espadá ticavi' tanuu man síí cu'naj Jacobo tinúú síí cu'naj Juan, qui'yaj Herodes a.

<sup>3</sup> Dan me se xcaj Herodes cuentá se vaa guun niha' rá nij yuvij israelitá se vaa cavi' Jacobo, ne che'é dan quita'aa nij tanuu man Pedró, qui'yaj uún so' a. Gaa canuu cha'anj nanuj rá nij síí israelitá güii nu' curihanj xii nij so' yo'óo Egipto gaa naá me qui'yaj Herodes danj a.

<sup>4</sup> Dan me se caxrj́ nij tanuu taga' man Pedró, ne ca'ne' Herodes suun rihaan xnu' yaan tanuu se vaa cutumé nij tanuu man Pedró, ne ca'anj ya x'ne' me nij tanuu yo' a. 'O se guun rá Herodes se vaa ndaa cachén cha'anj pascuá, gaa ne quirij́ so' man Pedró ne t̄ihaan so' man Pedró rihaan nij yuvij́ israelitá, rá so' a.

<sup>5</sup> Dan me se Pedró ro', 'nij so' taga' rej cutumé nij tanuu man so', tzaj ne nucuaj ndo'o cachín ni'yaj nij síi cuchumán rá ni'yaj man Jesucristó rihaan Diose che'é so' a.

<sup>6</sup> Dan me se rej nij me yo', ne a'uyj me güii quirij́ Herodes man Pedró taga' rihaan nij yuvij́ a. Dan me se otoj Pedró naj so' rá taga', ne naj so' sca'núj vjj tanuu, ne vjj aga' ne' numji so' naj so' a. Ne nicun' yavij́ tanuu tumé ta'yaa taga' a.

<sup>7</sup> Ne dan me se curuvi' yo'o se mozó Diose rá ve' naj Pedró, ne chuguun ndo'o rá ve' yo' a. Gaa ne go' se mozó Diose x'núú Pedró, ne cataj so':

—'O naxagaa so' cuaj, Pedró —taj so' rihaan Pedró a.

Dan me se naxagaa Pedró, ne aga' ne' numji ra'a so' ro', naxra' yo', ne quiniij yo' rihaan yo'óo a.

<sup>8</sup> Gaa ne cataj se mozó Diose rihaan Pedró a:

—Naqui'yaj raan so' catuún so', ne caxrij́ so' canj tacóo so' á —taj se mozó Diose rihaan so', ne qui'yaj Pedró ndaa vaa cataj se mozó Diose rihaan so' a.

Gaa ne cataj uún se mozó Diose a:

—Niquee so' roto so', ne canocó' so' manj á —taj uún se mozó Diose rihaan so' a.

<sup>9</sup> Dan me se canoco' Pedró man se mozó Diose, ne curihañj so' taga', tzaj ne ne quene'en so' sese ya curihañj so' taga' qui'yaj se mozó Diose yo' ma'. 'O se maan se qui'yaj ma'an rihaan so' qui'yaj Diose nu' se vaa qui'yaj se mozó Diose yo', rá so' a.

<sup>10</sup> Dan me se cachén roj so' vjj rej nicun' tanuu tumé ta'yaa, gaa ne cuchij roj so' ta'yaa aga' taga' yo', ne rej xco ta'yaa yo' ro', naj ma'an chuman' a. Gaa ne quix'núj ma'an ta'yaa yo', ne curihañj roj so', ne cachén roj so' 'o scúj callé, gaa ne ca'anj ni'ya se mozó Diose yo' rihaan Pedró a.

<sup>11</sup> Dan me se caxrj́ rá Pedró se vaa ya curihañj so' taga', gaa ne cataj so':

—Ndaa yaj guun ya raj se vaa Diose sij 'nij ra'a mán 'unj ro', ya ca'née so' man se mozó so', ne tinanii so' mán 'unj rihaan síi cu'naj Herodes, ne nihánj me se se quirán' 'unj ndaa vaa me rá nij yuvij́ israelitá quirán' 'unj yaj a ma' —taj Pedró a.

<sup>12</sup> Dan me se quisij guun ya ya rá so', gaa ne ca'anj so' ve' tucuá chana cu'naj Mariá nii síi cu'naj Juan Marcos a. Ne ve' yo' me rej aj nuu chre' que'ee nij síi cuchumán rá ni'yaj man Jesucristó, ne achín ni'yaj nij so' rihaan Diose a.

<sup>13</sup> Dan me se cuchij Pedró tica'mii so' ta'yaa chingá nuu rihaan ve', gaa ne ca'na' 'o mozó chana cu'naj Rode ta'yaa xcaj no' cuentá me síi ca'na' a.

<sup>14</sup> Gaa ne cunuú yaan Rode se nana Pedró a. Tzaj ne che'é se guun niha' ndo'o rá no', gaa ne che'é dan ne ca'nuu no' ta'yaa ma'. Maan se cunánj no' catúj no' rá ve', ne nata' no' rihaan yo'óo nij yuvij́ se vaa nicun' Pedró ta'yaa a.

<sup>15</sup> Tzaj ne nij síi man rá ve' taj rihaan no':

—Snúú so' á —taj ta'aj nij so' rihaan no' a.

Tzaj ne taj se qui'yá' ca'ne' rá no' a. 'O se yo'o cataj no' se vaa ya nicun' Pedró ta'yaa a. Gaa ne cataj yo'óo nij so' rihaan no':

—Nan̄j se moꝝó Dios̄e tumé man Pedró me sí nicun' rihaan ta'yaa nan̄j á —taj yo'ó nij so' rihaan no' a.

<sup>16</sup> Ne Pedró ro', yo'ó nicun' so' xe' tica'mii so' ta'yaa a. Gaa ne ca'na' nij so', ne ca'núj nij so', ne quene'en nij so' man Pedró, gaa ne ca'an̄j ndo'o rá nij so' ni'yaj nij so' man Pedró a.

<sup>17</sup> Gaa ne naxcaj Pedró ra'a Pedró, che'é se guun rá so' gaa dínj tu'va nij so' a. Gaa ne cataj xna'an̄j so' rihaan nij so' nu' se vaa qui'yaj Dios̄e sij 'nij ra'a man ní' gaa tinanii so' man Pedro taga' a. Gaa ne cataj so':

—Cataj xna'an̄j nij soj rihaan tinú' Jacobo gā yo'ó nij tinúú ní' daj quiran̄j á —taj so' a.

Gaa ne cavii so' ca'an̄j so' yo'ó rej yan̄j a.

<sup>18</sup> Dan me se gaa quis̄j güii, ne quinanó ndo'o rá nij tanuu nicun' taga', che'é se ne quene'en uxrá nij so' me rej vaj Pedró a ma'.

<sup>19</sup> Gaa ne ca'ne' Herodes suun rihaan tanuu ca'na' Pedró rihaan so' qui'yaj tanuu, tzaj ne ne ca'vee nari' nij tanuu man Pedró ma'. Che'é dan xna'an̄j Herodes man nij tanuu tumé man Pedró me rej ca'an̄j Pedró, tzaj ne ne quene'en nij so' a ma'. Che'é dan ca'ne' Herodes suun se vaa ticav̄i' nii man nij tanuu tumé man Pedró, gaa ne curihan̄j Herodes estadó Judea, ca'an̄j so' chuman' Cesarea, cayáán so' a.

*Nanā nihánj taj xna'an̄j se vaa cavi' Herodes, qui'yaj xluú chá nee man so' a*

<sup>20</sup> Dan me se ca'maan rá sí cu'naj Herodes ni'yaj so' man nij sí man chuman' Tiro do', chuman' Sidón do', ne che'é dan ca'na' cunudan̄j nij so' rej ne Herodes, ne ca'mii nij so' ga sí cu'naj Blasto sí tumé nu' ve' tucúa Herodes, ne dan me se ca'vej rá sí cu'naj Blasto raꝛuúj so' man nij so' cunuꝛu rcua'aan̄j nij so' gā Herodes, che'é se caxr̄j yuvē nij so' doj sa'an̄j ston Blasto a. 'Q se nucuaj rá nij so' man Herodes se vaa cuch̄i' se chá avii rej uun chij so' ndaa chiháán nij so' chá nij so' a.

<sup>21</sup> Ne güii cachrón Blasto ca'mii nij so' gā Herodes me se nanuú Herodes yatz̄j nuꝛú sí nicaj suun rey, ne táa so' chruun xlá sa', ne ca'mii natáj ndo'o so' rihaan nij sí man Tiro do', man Sidón do' a.

<sup>22</sup> Gaa ne caguáj cunudan̄j nij so', cataj nij so':

—Nuveé se nanā yuvī me nanā avii raā sí nihánj a ma'. 'Q se se nanā ya'an̄ avii tu'va so' nan̄j á —taj nij yuvī, ni'yaj nij yuvī man Herodes a.

<sup>23</sup> Gaa ne cuaj caxr̄j 'o se moꝝó Dios̄e chí'ij man Herodes, che'é se ne cataj so' se vaa orún' Dios̄e me sí 'yaj avii raā so' a. Maan̄ se ca'vej rá so' cataj nij yuvī se vaa ya'an̄j me ma'an̄ so' a. Gaa ne dan me se cunuꝛú nee man so' chá xluú, ne cavi' so', qui'yaj xluú a.

<sup>24</sup> Tzaj ne se nanā Dios̄e me se ra'yan̄j achij yo' ne naxna'an̄j yo' cuaj cuaj a. Ne uun r̄ij ndo'o doj nij yuvī canoco' nanā yo' a.

<sup>25</sup> Ne Bernabé gā Saulo me se quis̄j roj so', ne caxr̄j roj so' sa'an̄j ston nij sí uun chij rihaan nij sí cuchumán rá ni'yaj man Jesucristó yan̄j chuman' Jerusalén, ne canicaj roj so', ca'an̄j roj so' chuman' Antioquia, ne ca'an̄j sí cu'naj Juan Marcos gā roj so', qui'yaj roj so' a.

## 13

*Nanā nihánj taj xna'an̄j se vaa cune' nii man sí cu'naj Bernabé do', man sí cu'naj Saulo do', ca'an̄j nata' roj so' se nanā Dios̄e rihaan yuvī a*

<sup>1</sup> Dan me se chuman' Antioquía ro', ta'aj nij síi cuchumán rá ni'yaj man Jesucristó me síi nata' se nana Diose, ne yo'ó ta'aj nij so' me síi tucu'yón se nana Diose rihaan yuvii a. Ne síi cu'naj Bernabé do', síi cu'naj Simón Negro do', síi cu'naj Lucio síi cavii estadó Cirene do', síi cu'naj Manaén síi cachij tucúá síi cu'naj Herodes do', síi cu'naj Saulo do', me nij síi cataj roj suun sa' yo' a.

<sup>2</sup> Dan me se na'vii nij so' rihaan Diose sij 'nij ra'a man ní, ne toco' nij so' x'naa man ma'an nij so' che'é se aráj guée nij so' rihaan Diose, ne dan me se cataj Nimán Diose rihaan nij so' a:

—Cuné' nij soj man síi cu'naj Bernabé ga síi cu'naj Saulo se vaa qui'yaj suun roj so' rihanj ndaa vaa cataj xna'anj 'unj rihaan roj so' á —taj Nimán Diose rihaan nij so' a.

<sup>3</sup> Gaa ne toco' nij so' x'naa man ma'an nij so', ne cachíin ni'yaj ndo'o nij so' rihaan Diose, gaa ne cuta' nij so' ra'a nij so' raq roj so', gaa ne dan me se ca'née nij so' man roj so' ca'anj nata' roj so' se nana Jesucristó rihaan yuvii a.

*Nana nihánj taj xna'anj daj quiran' 'o síi guun rá caráán chrej rihaan se nana Diose estadó Chipre a*

<sup>4</sup> Dan me se gaa ca'née Nimán Diose man roj so' ca'anj roj so', ne ca'anj roj so' chuman' Seleucia, gaa ne cavii roj so' rihoo chée rihaan na ca'anj roj so' ndaa estadó cu'naj Chipre a.

<sup>5</sup> Gaa ne gaa cuchí' roj so' chuman' Salamina, ne nata' roj so' se nana Diose rá nij ve' nuu chre' nij yuvii israelitá tucu'yón nij so' se tucuanj Moisés, ne síi cu'naj Juan Marcos me síi vaj racuúj man roj so' a.

<sup>6</sup> Dan me se yo'óo taj rihaan na ya'anj me estadó Chipre yo', ne va'nuj nij so' chée nu' yo'óo yo' ndaa se cuchí' nij so' chuman' Pafos a. Ne chuman' Pafos nari' nij so' man 'o síi chruun síi tu'va rma'an se vaa sij nata' se nana Diose me so', ne síi israelitá me so', ne Barjesús cu'naj so' a.

<sup>7</sup> Ne so' me síi u'yón inanj chée ga síi nica'j suun gobernador cu'naj Sergio Paulo, ne síi cavii ndo'o raq me síi cu'naj Sergio Paulo yo' a. Ne síi cu'naj Sergio Paulo canacúun man roj síi cu'naj Bernabé ga Saulo se vaa ca'na' roj so' rihaan so', ne guun ndo'o rá so' cunq so' se nana Diose, ne danj qui'yaj roj so' a.

<sup>8</sup> Dan me se síi chruun cu'naj Barjesús, tzaj ne yo'ó se chuvii so' me Elimas, ne nana “Elimas” taj se vaa síi chruun me so' a. Dan me se caráán Elimas chrej rihaan se nana Bernabé ga Saulo a. 'Q se guun rá so' ca'anj yanij síi cu'naj Sergio Paulo ne se cuchumán rá so' nana ya yo' a.

<sup>9</sup> Ne xa' síi cu'naj Saulo, tzaj ne yo'ó se chuvii so' me Pabló, ne dan me se caraa ndo'o Nimán Diose nimán so', ne ni'yaj uxrá so' man síi cu'naj Elimas yo',

<sup>10</sup> ne cataj so':

—So' ro', me síi nuu nana tiha' yu'unj nimán, ne sij snúu rma'an mé so' nanj ei. Ta'nii ya síi chree mé so' á. Sij nachri' ni'yaj cunudanj se sa' mé so' a. Vaa güii tanáj tí'íin so' suun tanachej nana ya a'mii Diose sij 'nij ra'a man ní na'.

<sup>11</sup> Ne nihánj me se qui'yaj síi 'nij ra'a man ní sayuun mán so', ne caráán rihaan so' doj güii, qui'yaj so', ne ndaa naán güii se curuvi' rihaan so' ma' —taj Pabló rihaan Elimas yo' a.



Ne taj ni'yón caráán rihaan Elimas, ne adi' se ran' sí chéé rque ngaa rej rmi' ro', danj quiran' so', chéé so', vaj so', nano' so' man sí coro' ra'a so' racuj man so' cachee' so' a.

<sup>12</sup> Ne gaa quene'en sí nicaj suun gobernador yo' daj quiran' sí chruun cu'naj Elimas yo', gaa ne caráya'anj ndo'o so' se tucuanj sí 'nij ra'a man ní', ne cuchumán rá so' ni'yaj so' man Jesucristó a.

*Nana nihánj taj xna'anj se vaa cuchumán rá que'ee ndo'o yuvii yanj yanj chuman' Antioquia naj estadó Pisidia cuno nij so' nana ca'mii natáj Pabló rihaan nij so' a*

<sup>13</sup> Dan me se cavii nij tuvij' Pabló chuman' Pafos, ne cavii nij so' rque rihoo chéé rihaan na, ne ca'anj nij so' ndaa chuman' Perge chuman' naj estadó Panfilia a. Tzaj ne sí cu'naj Juan Marcos me se tanáj so' man yavij roj so', ne canicaj so' nan' so' chuman' Jerusalén a.

<sup>14</sup> Gaa ne yavij roj so' me se curihanj roj so' chuman' Perge, ne ca'anj roj so' chuman' Antioquia naj estadó Pisidia a. Ne güii naránj rá nij yuvii israelitá me güii yo', ne catúj roj so' rá ve' tucu'yón nij yuvii israelitá se tucuanj Moisés, ne ca'anj cayáán roj so',

<sup>15</sup> ne quisj nayaa nii se tucuanj Moisés do', se nana nij sí nata' se nana Diose gaa naá do', ne ca'neé nij sí 'nij ra'a ve' yo' nana rihaan roj so', ne nana ca'neé nij so' me nana nihánj a: “Sese vaa chrej nucuj me rá roj soj nago' roj soj rihaan nij yuvii nuu chre' nihánj, ne ca'mii roj soj, tinuj”, taj sí 'nij ra'a ve' yo' rihaan sí cu'naj Pabló ga sí cu'naj Bernabé a.

<sup>16</sup> Gaa ne canicun' caya Pabló, ne naxcáj so' ra'a so', ne cataj so' a:  
—Cuno soj sij israelitá do', soj sij aráj cochroj rihaan Diose do', ca'mij rihaan soj á.

<sup>17</sup> Dan me se Diose sí noco' ní' sij israelitá ro', me sí narii man xii ní', ne tinaxcáj Diose man nij xii ní' gaa cayáán nij so' rej cu'naj Egiptó, ne Diose me sí guun nucuj quirii uun man nij so' rej Egiptó a.

<sup>18</sup> Gaa ne nda' se tucuaá ndo'o nij so' rihaan Diose, tzaj ne yo'o racuj Diose man nij so' gaa vaj nij so' rej tacaan nacoó vij chihaa ya yo' a.

<sup>19</sup> Gaa ne tinavij Diose man chij x'ne' yuvii yanj rej cu'naj Canaán, gaa ne cuxra' ta'aj Diose nu' rej yo' guun yo' to'óo nij xii ní', qui'yaj Diose a.

<sup>20</sup> Ne rej yo' guun to'óo nij so' 'o ca'anj cientó táá vij chihaa chij' yo' a. Ne gaa quisj catúj nij so' rej cu'naj Canaán, gaa ne cune' Diose man ní' sí raa rii ta'nga' rihaan nij so', ne danj inanj cayáán nij so' ndaa se cayáán sí cu'naj Samuel sí nata' se nana Diose rihaan yuvii a.

<sup>21</sup> Ne güii cayáán Samuel me se guun che'e' nij xii ní' cachíin nij so' 'o sí nicaj suun rey guun chij rihaan nij so', gaa ne cune' Diose man sí cu'naj Saúl ta'nii sí cu'naj Cis se vaa guun chij so' rihaan nij so' ndaa vaa guun rá ma'an nij so' a. So' ro', me ta'nii ta'nij si'no' sí cu'naj Benjamín, ne vij chihaa ya yo' cayáán so' sí nicaj suun rey a.

<sup>22</sup> Gaa ne quirii yanj Diose man Saúl, gaa ne cune' Diose man sí cu'naj David se vaa guun David sí nicaj suun rey uun chij rihaan nij yuvii israelitá a. Ne ca'mii Diose che'é so', cataj Diose: “Nihánj me se nari' 'unj man David ta'nii Isaí, ne so' me sí qui'yaj nu' ndaa vaa me raj qui'yaj so' nanj á”, taj Diose ni'yaj Diose man David a.

<sup>23</sup> Ne sca'núj nij ta'nii ta'nij si'no' David ro', rqué Diose 'o sí tinanii man ní' sij israelitá rihaan sayuun, ndaa vaa cata' tu'va Diose asij naá, ne Jesucristó me so' a.

24 Dan me se asino ca'mii natáj síi cu'naj Juan rihaan cunudanj nij yuvií israelitá se vaa çanicaj nimán nij so' canoco' nij so' tucuáán sa', ne cata' ne nij so', gaa ne ca'na' Jesucristó a.

25 Dan me se gaa ataa doj tzín' quisij ca'mii natáj Juan nu' se vaa guun rá Diose cataj so', gaa ne cataj so': "Me síi mé 'unj, rá nij soj gá. 'O se nuveé sji nano' soj man mej ma'. Tzaj ne vaa síi noco' xcó 'unj, ne sji sa' uxrá doj me so' rihanj, ne ne nó xcúnj nahej canj 'nij tacóo so' ma'", taj síi cu'naj Juan rihaan nij yuvií ni'yaj so' man Jesucristó a.

26 "Cunó soj ta'nij ta'nij si'no Abraham do', soj sji aráj cochroj rihaan Diose do', ca'mij rihaan soj cuano, tinuj. Aj ca'na' nana nihánj rihaan ní', qui'yaj Diose, ne nana nihánj taj xna'anj daj qui'yaj ní' gaa ne ca'vee quinanií ní' rihaan sayuun ei.

27 'O se tuvi' ní' síi yanj chuman' Jerusalén do', nij síi uun chij rihaan nij so' do', ne xcaj nij so' cuentá che'é Jesucristó ma'. Ne cuta' nij so' cacun' xraá Jesucristó se vaa no xcúun so' ticavi' nii man so', ne dan me se quisij ya nu' se nana nij síi nata' se nana Diose gaa naá nana nayaa ní' daj a güii naránj rá ní', qui'yaj nij so' nanj á.

28 Dan me se taj vaj a doj cacun' tumé so', tzaj ne rquee nij so' rihaan Pilato se vaa cavi' so' qui'yaj Pilato a.

29 Dan me se gaa quisij qui'yaj nij so' nu' ndaa vaa nó rihaan danj Diose che'é Jesucristó, gaa ne tananií nii man so' rihaan rcutzé, ne cachin' nii man so' rque yu'uj yuvej a.

30 Tzaj ne Diose me síi qui'yaj cunuu i'na' uún so' adonj.

31 Gaa ne que'ee güii curuvi' so' rihaan nij síi cavii gá so' estadó Galilea ca'anj chuman' Jerusalén gá so' a. Ne yaj me se guun ma'an nij so' síi nata' che'é so' rihaan nij yuvií adonj.

32 "Ne nihánj me se nata' núj nana sa' rihaan nij soj se vaa aj qui'yaj Diose nu' ndaa vaa cata' tu'va so' rihaan xii ní' gaa naá a.

33 Dan me se cunuu i'na' uún Jesucristó, qui'yaj Diose che'é ní', ne dan me se quisij ya nu' nana cata' tu'va so' gaa naá, ne cavii sa' ní' ta'nij nij síi cane gaa naá, qui'yaj so' adonj. Ne ase vaa nana nihánj nana natá 'unj rihaan nij soj ro', danj vaa nana no rihaan chra' Salmo número vij, ne taj yo': "Ta'nij mé so' á. Cuanó nihánj me se quene'en yuvií se vaa ta'nij mé so', qui'yaj nanj á", taj se nana Diose no rihaan chra' Salmo yo' a.

34 Dan me se naxagaa so' ne cunuu i'na' uún so', ne se ri'yuj nee man so' daj chihaa mij ma'. Ne dan me se ma'an Diose ca'mii nana nihánj adonj: "Ase vaa rque 'unj nu' se luj rihaan David, ta'nga' danj gaa rque 'unj nu' se luj rihaan so', ne daj chihaa mij se navij se luj yo' rihaan so' ma'", taj uún Diose rihaan Jesucristó a.

35 Che'é se qui'yaj Diose danj che'é Jesucristó rá David ro', che'é dan cachrón David rihaan yo'ó salmo nana nihánj a: "Daj chihaa mij se ri'yuj nee man síi vaa sa' rihaan so', qui'yáa so' ma'", taj David rihaan Diose ni'yaj David man Jesucristó a.

36 Dan me se xa' ma'an David, tzaj ne gaa quisij qui'yaj so' nu' ndaa vaa guun rá Diose qui'yaj so' che'é nij tuvi' so', gaa ne cavi' so', gaa ne cachin' nii man so' rej naj nij xii so', gaa ne ri'yuj nee man so' a.

37 Ne xa' Jesucristó síi cunuu i'na' uún qui'yaj Diose, tzaj ne ne ri'yuj nee man so' ma'.

38 "Xcaj nij soj cuentá se vaa cuano nihánj me se nata' núj nana rihaan soj se vaa che'é se vaa qui'yaj Jesucristó ro', che'é dan ca'vee caraá x'naa Diose ni'yaj Diose cacun' tumé ní', tinuj. Dan me se daj chihaa mij se navij nu' cacun' tumé soj, qui'yaj se tucuanj Moisés ma'.

39 Tzaj ne cunudanj nij soj sij amán rá ni'yaj man Jesucristó me se x'néj uun cacun' yo' xraá soj, ne nuu sa' soj rihaan Diose adonj.

40 Che'é dan tadó nij soj se quiran' soj ndaa vaa taj se nana Diose nana no rihaan danj nij sí nata' se nana Diose nana nihánj á:

41 "Ne soj sij a'nga' nacoq ni'yaj manj, tzaj ne ni'yaj soj ei. Ca'anj rá soj, ne quirí' nu' soj nanj ei. 'O se gaa vaa i'na' soj nihánj, ne qui'yáj suun nocoo, ne ca'vee se cataj xna'anj yo'q so' rihaan soj che'é se vaa qui'yáj, tzaj ne se ca'vee chuman' rá soj se nana so' asuun ma'", taj Diose rihaan soj a —taj Pabló rihaan nij yuvij cunuun chre' rá ve' yo' a.

42 Dan me se gaa me rá roj so' ca'anj roj so', ne cachín ni'yaj nij yuvij rihaan roj so' se vaa cachén yo'q tunj güii, ne ca'na' uún roj so' ne ca'mii uún roj so' nana vaa danj rihaan nij so' a.

43 Gaa ne gaa quisíj tucu'yón nij so' ne curihanj nij yuvij xe', ne que'ee nij sí israelitá do', nij sí yanj noco' xraan se tucuanj nij sí israelitá do', canoco' man roj sí cu'naj Pabló ga Bernabé a. Gaa ne ca'mii ndo'o roj so' ga nij so', gaa ne guun ya rá nij so' se vaa yo'q nicaj nij so' tucuaán sa' ga se luj 'yaj Diose che'é nij so' a.

44 Dan me se cachén tunj güii ne nasíj yo'ó güii naránj rá nij yuvij israelitá, gaa ne cunuun chre' cunudanj nij yuvij yanj chuman' ta' asuun, che'é rej cunq nij so' se nana Diose sij 'nij ra'a man ní' a.

45 Tzaj ne quene'en nij yuvij israelitá se vaa cuchi' ndo'o yuvij rihaan Pabló, gaa ne che'é dan guun xcoj ruvaa rá nij yuvij israelitá, ne nij ca'mii nij so' che'é Pabló, cataj nij so' se vaa inanj nana ne ca'mii Pabló a.

46 Tzaj ne ne kuchu'vi' ya roj sí cu'naj Pabló ga Bernabé ni'yaj roj so' man nij yuvij israelitá a ma'. Ne cataj roj so':

—No xcúun núj nata' núj se nana Diose rihaan nij soj sij israelitá asino yaan adonj. Tzaj ne che'é se quirí'lj yanj soj nana yo', ne che'é se nuveé sij no xcúun cayáan ga Diose nu' cavii nu' ca'anj me soj rá soj, ne che'é dan nihánj me se canicaj núj, ne nata' núj nana yo' rihaan nij sí yanj ei.

47 'O se Diose sij 'nij ra'a man ní' me sí ca'ne' suun rihaan núj qui'yaj núj danj adonj. Dan me se cataj sí 'nij ra'a man ní': "Aj cuné' unj mán so' se vaa guún so' ya'an chuguun rihaan nij sí yanj ne ca'vee xcaj nij so' cuentá, qui'yáa so', gaa ne quinanii yuvij yanj chuman' naj nu' rihaan chumij rihaan sayuun, qui'yáa so' á". Nihánj me se nana Diose nana cataj Diose rihaan núj nanj á —taj roj so' rihaan nij yuvij israelitá yo' a.

48 Dan me se gaa cuno nij sí yanj se nana Pabló, ne guun niha' uxrá rá nij so', ne ve'é ca'mii nij so' che'é se nana Diose sij 'nij ra'a man ní' a. Ne cunudanj nij sí cuné' Diose cayáan rihaan Diose nu' cavii nu' ca'anj ro', cuchumán rá nij so' cuno nij so' nana yo' a.

49 Gaa ne cuchi' se nana Diose sij 'nij ra'a man ní' daj a nij chuman' naj rihaan yo'óo rej yo' a.

50 Tzaj ne caxrij nij sí israelitá chrej rque nij chana yanj noco' xraan man Diose chana xna'anj do', rque nij sí nicaj suun uun chij rihaan chuman' yo' do', ne táa ri'yunj nij so' man Pabló ga Bernabé a. Gaa ne tucunánj nij so' man roj so' rej yo' a.

<sup>51</sup> Gaa ne nacunan' roj so' tacóo roj so' tucuayuu roj so' yo'óo tachruu caviu chuman' yo' rihaan yo'óo, che'é rej xcaj nij síi man chuman' yo' cuentá se vaa ma'an nij so' tumé cacun' se vaa ne cunqo nij so' se nana Dioso a. Gaa ne ca'anj roj so' chuman' Iconio a.

<sup>52</sup> Ne nij síi cuchumán rá ni'yaj man Jesucristó yanj chuman' Antioquia yo' me se 'o guun niha' uxrá rá nij so', ne 'o cunuu Nimán Dioso nimán nij so' a.

## 14

*Nana nihánj taj xna'anj daj guun rá nij síi man chuman' Iconio gaa cuchi' se nana Dioso chiháán nij so' a*

<sup>1</sup> Dan me se gaa cuchi' síi cu'naj Pabló ga síi cu'naj Bernabé chuman' Iconio, ne catúj roj so' rá ve' tucu'yón nij yuvií israelitá se tucuanj Moisés, ne che'é se ve'é ndo'o nata' roj so' se nana Dioso, che'é dan cuchumán rá que'ee ndo'o yuvií israelitá do', yuvií yaníj a'mii xna'ánj griego do', ni'yaj nij so' man Jesucristó a.

<sup>2</sup> Tzaj ne nij yuvií israelitá na'vej rá cunqo se nana Jesucristó me se caxrj nij so' chrej rque nij yuvií yaníj yanj chuman' yo' che'é rej nachrj' nij so' ni'yaj nij so' man nij tinuj nij síi cuchumán rá ni'yaj man Jesucristó, ne danj guun a.

<sup>3</sup> Dan me se que'ee güii sca' nanj ca'mii natáj roj síi cu'naj Pabló ga Bernabé se nana Dioso sij 'nij ra'a man ní', ne síi 'nij ra'a man ní' ro', racuíj man roj so' se vaa guun nucuaj roj so' qui'yaj suun roj so' suun sa' nocoo ni'yaj nij yuvií, che'é rej cuchuman rá nij yuvií se vaa ya ya vaa se nana roj so' nana che'é se luj qui'yaj síi 'nij ra'a man ní' che'é ní' a.

<sup>4</sup> Gaa ne xra' ta'aj nij yuvií man chuman' yo', ne ta'aj nij so' ro', canoco' se nana nij síi israelitá síi na'vej rá cunqo se nana Dioso, ne yo'ó ta'aj nij so' ro', canoco' se nana roj síi cune' Jesucristó man nata' se nana so' a.

<sup>5</sup> Gaa ne guun rá nij yuvií yaníj do', nij yuvií israelitá do', nij síi uun chij rihaan nij so' do', qui'yaj chi'ii nij so' man roj síi cu'naj Pabló ga Bernabé ne ndaa guun rá nij so' go' nij so' yahij man roj so' ndaa se cavi' roj so' a.

<sup>6</sup> Tzaj ne xcaj roj so' cuentá, gaa ne che'é dan cunánj roj so', ca'anj roj so' chuman' Listra chuman' naj estadó Licaonia do', chuman' Derbe yo'ó chuman' naj estadó Licaonia do', yo'ó nij chuman' ra'a naj nichrun' ga roj chuman' yo' do',

<sup>7</sup> ne vaj roj so' nata' roj so' se nana Dioso nana sa' rihaan nij yuvií yanj nij chuman' yo' a.

*Nana nihánj taj xna'anj se vaa guun rá nij síi ne chuman' Listra se vaa ya'anj me síi cu'naj Pabló do', síi cu'naj Bernabé do' a*

<sup>8</sup> Dan me se chuman' Listra ro', ne 'o síi rengó ne síi rengó me so' asij ca'ngaa so', ne ve'é 'o danj vaa so', ne daj chihaa mój taj se qui'yá' cachee so' ma'.

<sup>9</sup> Ne yáán so' cuno so' se nana Pabló a. Dan me se ni'yaj uxrá Pabló man so', ne xcaj Pabló cuentá se vaa síi rengó yo' nucuaj ndo'o rá se vaa ca'vee nahun sa' so', qui'yaj Dioso a.

<sup>10</sup> Che'é dan nucuaj ca'mii Pabló, cataj Pabló rihaan so' a:

—Naxumaan so', canicun' cayá so' ei. —taj Pabló rihaan so' a.

Gaa ne güéj síi rengó yo', ne cachéé so' a.

<sup>11</sup> Dan me se quene'en nij yuvií se vaa qui'yaj Pabló, ne che'é dan caguáj nij yuvií se xna'anj ma'an nij so', cataj nij so':

—Nahuun nij ya'anj yuvii, ne nanij nij so' rihaan yo'óo chuguanj —taj nij yuvii ni'yaj nij yuvii man Pabló ga Bernabé a.

<sup>12</sup> Gaa ne cataj nij yuvii se vaa ya'anj cu'naj Júpiter me Bernabé, ne Pabló me se ya'anj cu'naj Mercurio me so', che'é se so' me sí ca'mii doj a.

<sup>13</sup> Ne dan me se rihaan tu'va chuman' yo' ne 'o nuvií rej na'víj nij yuvii rihaan ya'anj Júpiter, ne xrej ne nuvií yo' ro', ca'ne' suun se vaa ca'na' scúj toró ca'na' cachriin yáj ca'na' ta'yaa rej atúj yuvii chuman' yo', ne guun rá so' ga nij yuvii ticavi' nij so' scúj yo' rihaan Pabló ga Bernabé che'é se ya'anj me roj so' rá nij yuvii a.

<sup>14</sup> Dan me se xcaj Bernabé ga Pabló cuentá daj guun rá nij yuvii, ne che'é dan cutzin' roj so' sagan' roj so', che'é se chi'ii ndo'o qui'yaj nij yuvii rá roj so' a. Gaa ne cunanj roj so' sca'núj nij yuvii, ne caguáj roj so',

<sup>15</sup> cataj roj so':

—Se guun qui'yaj nij soj danj ma'. 'O se cuyaan yuvii me ní, ne nihánj me se xa' núj, tzaj ne 'na' núj nata' núj se nana Diosé nana sa' rihaan nij soj, che'é rej tanáj soj tucuáan ni'yon rma'an noco' soj cuano nihánj ne canicaj soj canoco' soj Diosé sí vaa i'na' ya ei. Ne so' ro', me sí qui'yaj nu' rej xta' do', nu' rihaan yo'óo do', nu' na ya'anj do', ne nu' rasuun qui'yaj so' adonj.

<sup>16</sup> Ne asij rque me se ca'née ra'a Diosé canoco' cunudanj nij x'ne' yuvii tucuáan cuchruj xji nij so' a.

<sup>17</sup> Tzaj ne se guun cataj soj se vaa a doj ne ca'vee xcaj soj cuentá che'é Diosé ma'. 'O se ve'é ndo'o qui'yaj Diosé che'é soj adonj. Dan me se aman' maan avii rej xta', qui'yaj Diosé che'é soj, ne síj dió avii naa, qui'yaj uún Diosé, ne dan me se araa rque soj, ne uun niha' rá soj, qui'yaj Diosé adonj —taj roj so' rihaan nij yuvii yo' a.

<sup>18</sup> Dan me se daj doj se ticavi' nij yuvii scúj rihaan roj so', tzaj ne ca'ne' rá nij yuvii ga suun yo', qui'yaj se nana roj so' a.

*Nana nihánj taj xna'anj che'é sayuun qui'yaj nij sí israelitá cavii chuman' Antioquia do', chuman' Iconio do', man sí cu'naj Pabló ga Bernabé a*

<sup>19</sup> Tzaj ne cavii sí israelitá chuman' Antioquia do', chuman' Iconio do', ca'na' nij so' chuman' Listra, ne caxrój nij so' chrej rque nij yuvii man chuman' Listra, ne che'é dan go' ndo'o nij yuvii yahij man Pabló, ne cuxuun nij yuvii man so' ndaa tu'va chuman', ne ri'íj nij yuvii man so' a. Ne guun rá nij yuvii se vaa cavi' so' a.

<sup>20</sup> Tzaj ne cunuun chre' nij sí cuchumán rá se nana Jesucristó ne chuman' yo', ne tucuachriin nij so' nu' anicaj rej naj Pabló rihaan yo'óo, ne naxagaa so', ne catúj uún so' chuman' ga nij so' a. Gaa ne yo'ó güii me se curihanj roj so' ga Bernabé ca'anj roj so' chuman' Derbe a.

*Nana nihánj taj xna'anj se vaa canicaj sí cu'naj Pabló ga Bernabé chuman' Antioquia naj estado Siria a*

<sup>21</sup> Dan me se nata' ndo'o sí cu'naj Pabló ga Bernabé se nana Diosé nana sa' rihaan nij yuvii man chuman' Derbe yo', ne cavii ndo'o sí tucu'yón se nana Jesucristó chuman' Derbe yo', qui'yaj roj so' a. Gaa ne canicaj roj so', ca'anj roj so' chuman' Listra do', chuman' Iconio do', chuman' Antioquia naj estado Písidia do' a.

<sup>22</sup> Ne nari' nucaj nimán cunudanj nij sí tucu'yón se nana Jesucristó, qui'yaj roj so' a. Ne narqué roj so' chrej man nij sí tucu'yón se nana Jesucristó se vaa daj chihaa mij se ca'ne' rá nij so' ga suun noco' se tucuanj

Jesucristó a. Ne cataj roj so' se vaa asino quiran' ndo'o ní sayuun, gaa ne ca'vee cayáán ní ga Diose asa' guun chij Diose rihaan chumij nihánj, taj roj so' a.

<sup>23</sup> Ne cune' roj so' man sí guun chij rihaan nij sí cuchumán rá ni'yaj man Jesucristó 'o 'o nij chuman' a. Gaa ne toco' roj so' x'naa man ma'an roj so', ne cachín ni'yaj roj so' rihaan Diose sij 'nij ra'a man ní che'é nij sí cuchumán rá ni'yaj man so' se vaa racuj so' man nij so' a.

<sup>24</sup> Dan me se cachén roj so' nu' estadó Pisidia, gaa ne cuchi' roj so' estadó Panfilia a.

<sup>25</sup> Gaa ne ca'mii natáj roj so' se nana Diose rihaan nij sí man chuman' Perge, gaa ne ca'anj roj so' chuman' Atalia a.

<sup>26</sup> Gaa ne chuman' Atalia ro', cavii roj so' rihoo chéé rihaan na, quinan' roj so' ndaa chuman' Antioquia naj estadó Siria a. Ne chuman' Antioquia ro', me rej cavii roj so' asino yaan gaa cachín ni'yaj nij sí cuchumán rá ni'yaj man Jesucristó rihaan Diose se vaa racuj Diose man roj so' qui'yaj suun roj so' ca'mii natáj roj so' se nana Diose rihaan yuvij a. Ne nihánj me se quisij suun yo', qui'yaj roj so' nanj adonj.

<sup>27</sup> Dan me se gaa nucui' roj so', ne canacúun roj so' man nij sí cuchumán rá ni'yaj man Jesucristó se vaa cunu chre' nij so', gaa ne cataj xna'anj roj so' nu' se vaa qui'yaj Diose ga roj so', ne cataj roj so' se vaa ya x'núj rihaan nij yuvij yanij cuchuman rá nij so' ni'yaj nij so' man Jesucristó, qui'yaj Diose, ne ca'vee cavij sa' nij yuvij yanij yo' a.

<sup>28</sup> Gaa ne guun ran ndo'o roj so' ga nij sí tucuyón se nana Jesucristó yanj chuman' Antioquia yo' a.

## 15

*Nana nihánj taj xna'anj che'é juntá qui'yaj nij sí cuchumán rá ni'yaj man Jesucristó man chuman' Jerusalén gaa ca'mii nij so' che'é se tucuanj Moisés a*

<sup>1</sup> Dan me se ta'aj nij sí cuchumán rá ni'yaj man Jesucristó cavii chuman' Jerusalén, ne ca'anj nij so' tucuyón nij so' rihaan yo'ó tinúu nij so' se vaa sese se cata' ta'nga' man yo'ó so' ndaa vaa taj se tucuanj Moisés, ne daj chihaa mij se ca'vee nanij so' rihaan sayuun qui'yaj Diose ma'.

<sup>2</sup> Gaa ne ca'mii canó tuvi' ndo'o sí cu'naj Pabló do', sí cu'naj Bernabé do', ga nij sí tucuyón nana yo', gaa ne che'é dan cune' nij sí cuchumán rá ni'yaj man Jesucristó yanj chuman' Antioquia man roj so' ga yo'ó doj tinúu nij so' se vaa ca'anj nij so' chuman' Jerusalén nanao nij so' cuentó ga nij apóstol cune' Jesucristó man nata' se nana so' do', ga yo'ó nij sí uun chij rihaan nij so' do', che'é nana a'mii nij yuvij yo' a.

<sup>3</sup> Dan me se cavii nij so', ca'anj nij so', ne cachén nij so' estadó Fenicia do', estadó Samaria do', ne cataj xna'anj nij so' rihaan nij tinúu nij so' che'é nij yuvij yanij se vaa cuchumán rá ta'aj nij so' ni'yaj nij so' man Jesucristó, gaa ne guun niha' uxrá rá cunudanj nij sí cuno nana yo' a.

<sup>4</sup> Dan me se cuchi' nij so' chuman' Jerusalén, gaa ne ve'é ca'mii nij sí cuchumán rá ni'yaj man Jesucristó do', nij apóstol cune' Jesucristó man nata' se nana so' do', yo'ó nij sí uun chij do', ga nij so' a. Gaa ne cataj xna'anj nij so' rihaan nij sí yanj chuman' Jerusalén yo' che'é nu' se vaa qui'yaj Diose ga nij tinuj nij so' a.

<sup>5</sup> Tzaj ne canicun' doj sí fariseo sí cuchumán rá ni'yaj man Jesucristó, ne cataj nij so' se vaa no xcúun nij tuvi' Pabló cuta' nij so' ta'nga' man nij sí

yaníj yo', ne cataj xna'anj nij so' rihaan nij síf yaníj yo' se vaa no xcuún nij so' qui'yaj nij so' nu' se tucuanj Moisés a.

<sup>6</sup> Dan me se cunuu chre' nij apóstol cune' Jesucristó man nata' se nana so' rihaan yuvií gá yo'ó nij síf uun chíj rihaan nij yuvií cuchumán rá ni'yaj man Jesucristó, qui'yaj nij so' juntá, ca'mií nij so' che'é se nana nij síf fariseo yo' a.

<sup>7</sup> Dan me se ca'mií ca'mií nij so', gaa ne canicun' síf cu'naj Pedró, ne cataj so':

—Cunoj soj ca'mij, tinuj. Aj ne'en soj se vaa asij naá ndo'o guun rá Diose cunoj nij síf yaníj se nana Diose nana sa', ne cuchuman rá nij síf yaníj ni'yaj nij so' man nana sa' yo' a. Gaa ne narií Diose man yo'ó tuvi' ní', ne 'unj me síf narií Diose nata' se nana Diose rihaan nij yuvií yaníj yo' chuguanj.

<sup>8</sup> Ne Diose ro', me síf ne'en daj vaa nimán yuvií, ne Diose me síf rqué Nimán Diose man nij síf yaníj yo' ndaa vaa qui'yaj so' che'é ma'an ní', che'é rej ca'vee guun ya' rá ní' se vaa tinúú ní' me nij síf yaníj nanj adonj.

<sup>9</sup> Dan me se cunuu sa' nimán nij síf yaníj rihaan Diose che'é se cuchumán rá nij so' ni'yaj nij so' man Jesucristó, ne cuano nihánj me se 'o' cuyaan vaa nij so' gá ní' rihaan Diose nanj adonj.

<sup>10</sup> "Ne tadó soj sese guun rá soj quene'en soj sese ca'vee ca'maan rá Diose qui'yaj soj ne qui'yaj Diose sayuun man soj á. 'O se xa' se tucuanj Moisés, tzaj ne ase vaa icón 'ee taj raq yuntá scúj ro', danj vaa se tucuanj Moisés rihaan xij ní' do', rihaan ma'an ní' do', ne ne ca'vee qui'yaj ní' nu' tucuaán yo' ma'. Ne nihánj me se me rá soj cuchruj soj tucuaán yo' rihaan yo'ó nij tinúú ní' síf tucu'yón se nana Jesucristó,

<sup>11</sup> tzaj ne amán rá ní' se vaa che'é inanj se luj qui'yaj Jesucristó sij 'nij ra'a man ní' ro', che'é dan nanii ní' rihaan sayuun ei. Nuveé se tucuanj Moisés me se vaa qui'yaj nanii ní' rihaan sayuun ma'. Ne ase vaa ní' ro', danj vaa nij tinúú ní' síf yaníj uún adonj —taj Pedró rihaan cunudanj nij so' a.

<sup>12</sup> Dan me se ca'ne' rá nij so', ne a doj ne ca'mií nij so' a ma'. Maan se sa' uxrá nanó xrej nij so' gaa cataj xna'anj Bernabé gá Pabló che'é nij suun sa' nocoo guun nucuj roj so' qui'yaj roj so' sca'núj nij síf yaníj qui'yaj Diose a.

<sup>13</sup> Dan me se gaa quisíj ca'mií roj so', gaa ne ca'mií síf cu'naj Santiagó, cataj so':

—Cunoj nij soj ca'mij, tinuj.

<sup>14</sup> Nihánj me se cataj xna'anj tinú' Simón rihaan ní' se vaa asino yaan narií Diose man ta'aj nij yuvií yaníj guun nij so' 'o se chuman' Diose a.

<sup>15</sup> Ne 'o cuyaan vaa se nana nij síf nata' se nana Diose gaa naá gá se nana tinú' Simón nihánj a. Dan me se vaa nana no rihaan danj Diose taj:

<sup>16</sup> "Asa' quisíj, gaa ne canicaj 'unj, ne naqui'yaj sa' 'unj rej ne síf cu'naj David a. Dan me se canee nu' ve' ne so', ne quiri' ndo'o ve', tzaj ne nacune' caya uún 'unj man nu' ve' yo', gaa ne cunuu sa' cunudanj yo' a.

<sup>17</sup> Danj qui'yaj che'é rej ca'vee nano' yo'ó nij yuvií yaníj man 'unj sij 'nij ra'a man nij so' a. Danj qui'yaj cunudanj nij yuvií yaníj nocó' manj, taj 'unj sij 'nij ra'a man soj,

<sup>18</sup> ne asij naá cataj 'unj se vaa qui'yaj danj adonj", taj se nana Diose nana cacrón síf nata' se nana Diose gaa naá rihaan yanj a.

<sup>19</sup> "Che'é dan 'unj me síf guun rá se vaa se qui'yaj ní' sayuun man nij síf yaníj canicaj nimán canoco' man Diose ma'. Se cataj ní' se vaa canoco' nij so' nu' se tucuanj Moisés ma'.

20 Maan se qui'yaj ní' yanj ca'nej ní' rihaan nij so', ne cataj xna'anj ní' rihaan nij so' se vaa se guun cha nij so' rasuun rque yuvi rihaan ya'anj cacó j yuvi ma'. Ne snó'o do', chana do', se cotoj nij so' ga yo'ó yuvi sese ne nica nij so' me yo' ma'. Ne se chá nij so' nee xcuu tuguáj nii gaán chihá ma'. Ne se chá nij so' ton ma'.

21 'O se daj a güii cuetan' naranj rá ní' me se man ndo'o tuvi' ní' sij israelitá nayaa se nana Moisés, ne a'mii natáj nii che'é se tucuanj so' rá ve' tucu'yón ní' tucuaán yo' daj a chuman' a. Ne danj 'yaj inanj ní' sij israelitá asij naá ndo'o a —taj síi cu'naj Santiagó rihaan yo'ó nij so' a.

*Nana nihánj taj xna'anj che'é yanj cartá qui'yaj nij síi man Jerusalén ca'néé nij so' rihaan nij yuvi yanj cuchumán rá ni'yaj man Jesucristó a*

22 Gaa ne guun rá nij apóstol cune' Jesucristó man nata' se nana so' do', yo'ó nij síi uun chij do', cunudanj nij yuvi cuchumán rá ni'yaj man Jesucristó yanj chuman' Jerusalén do', narij nij so' doj tuvi' ma'an nij so' ca'anj nij so' ndaa chuman' Antioquía ga roj síi cu'naj Pabló do', Bernabé do' a. Gaa ne narij nij so' man síi cu'naj Judas Barsabás do', man síi cu'naj Silas do', se vaa ca'anj roj so' a. 'O se síi sa' me roj so', rá nij tinúu roj so' a.

23 Gaa ne qui'yaj cunudanj nij so' yanj cartá ca'anj nica j nij síi ca'anj chuman' Antioquía, ne nihánj me se vaa taj yanj cartá yo' a: "Nihánj me yanj cartá 'yaj núj sij apóstol cune' Jesucristó man nata' se nana so' do', sij uun chij rihaan nij síi amán rá ni'yaj man Jesucristó do' a. Tinúu soj me núj, ne ca'nej núj yanj nihánj rihaan nij soj sij yanj amán rá ni'yaj man Jesucristó yanj chuman' Antioquía do', estadó Siria do', estadó Cilicia do' a.

24 Dan me se ca'na' nana rihaan núj se vaa doj tuvi' núj me síi ca'mii nana qui'yaj sayuun rihaan soj, ne quiri' rá soj, qui'yaj nij síi ca'mii nana yo' rihaan nij soj a. Tzaj ne nuveé núj ca'néé man nij so' ma'.

25 Tzaj ne che'é se qui'yaj nij so' danj ro', che'é dan cuyaan guun rá núj narij núj doj tinúu núj cuchí' rihaan soj ga roj tinúu ní' síi 'eé ndo'o rá núj síi cu'naj Bernabé ga Pabló adonj.

26 Ne xa' roj so', tzaj ne sij ca'néé nimán cunuú rihaan Jesucristó sij 'nij ra'a man ní' me roj so', ne ndaa ne chu'vi' roj so' cavi' roj so' ma'.

27 Dan me se ca'néé núj man síi cu'naj Judas do', man síi cu'naj Silas do', se vaa ca'anj roj so' ga síi cu'naj Bernabé ga Pabló, ne ma'an roj so' nata' rihaan soj ndaa vaa taj nana no rihaan yanj nihánj ei.

28 "Dan me se ne guun rá Nimán Diose do', ma'an núj do', cuchruj ndo'o núj tucuaán canoco' soj ma'. Tzaj ne vaa che'é cunó soj ca'anj guee nana nihánj, rá núj nanj adonj.

29 Dan me se se guun cha soj rasuun rque yuvi rihaan ya'anj cacó j yuvi ma'. Se guun cha soj ton ma'. Se guun cha soj nee xcuu tuguáj nii gaán chihá ma'. Ne snó'o do', chana do', se cotoj soj ga yo'ó yuvi sese ne nica soj me yo' ma'. Ne sese qui'yaj soj nu' ndaa vaa taj nana nihánj, ne ve'é rá soj, rá núj nanj adonj. Ne me rá núj se vaa ve'é cayáán soj adonj", taj yanj cartá qui'yaj nij síi man chuman' Jerusalén yo' a.

30 Dan me se ca'néé nij so' man ca'anj nij síi ca'anj chuman' Antioquía, gaa ne gaa cuchí' nij so', ne canacúun nij so' cunu chre' cunudanj nij síi cuchumán rá ni'yaj man Jesucristó, gaa ne caxrj nij so' yanj cartá yo' ston nij síi yanj chuman' Antioquía a.



<sup>31</sup> Gaa ne nayaa nij síi man Antioquía yanj cartá, gaa ne guun niha' uxrá rá nij so' che'é nana sa' cataj xna'anj nij síi man Jerusalén rihaan nij so' a.

<sup>32</sup> Ne síi cu'naj Judas do', síi cu'naj Silas do', síi nata' se nana Diose me roj so', ne a'mii a'mii roj so' nago' roj so' chrej man nij síi man Antioquía yo', ne nari' nucua j nimán nij so', qui'yaj roj so' a.

<sup>33</sup> Dan me se quisíj caran' roj so' chuman' Antioquía, gaa ne ve'é cataj nij tinuj nij síi man Antioquía rihaan roj so' se vaa dinj gaa nimán roj so' ca'anj roj so' a. Gaa ne dan me se quinan' roj so' rihaan nij síi ca'néé man roj so' ca'na' roj so' a.

<sup>34</sup> Tzaj ne guun rá síi cu'naj Silas quinaj so' chuman' Antioquía a.

<sup>35</sup> Ne guun raan síi cu'naj Pabló do', síi cu'naj Bernabé do', chuman' Antioquía, ne tucu'yón roj so' se nana Diose sij 'nij ra'a man ní' nana sa' rihaan yuvii a. Ne que'eé ndo'o yo'ó nij yuvii nata' nana sa' yo' ga roj so' a.

*Nana nihánj taj xna'anj se vaa ca'anj uún Pabló tucu'yón so' se nana Diose rihaan yuvii, ne ca'anj Bernabé yo'ó rej yanij a*

<sup>36</sup> Dan me se cachén doj güii, gaa ne cataj Pabló rihaan Bernabé a:

—Canicaj ní' ca'anj uún ní' cunudanj nij chuman' yanj nij tinúu ní' nij síi nata' ní' se nana Diose nana sa' rihaan, gaa ne quene'en ní' daj vaa man nij so' ei —taj Pabló rihaan Bernabé a.

<sup>37</sup> Tzaj ne Bernabé ro', guun rá so' se vaa ca'anj uún síi cu'naj Juan Marcos ga roj so' a.

<sup>38</sup> Tzaj ne ne ca'vej rá Pabló ca'anj uún Juan Marcos ga roj so', che'é se gaa rque me se tanáj Juan Marcos man roj so' estadó Panfilia, ne ne ca'anj so' qui'yaj suun nij so' che'é Diose ma'.

<sup>39</sup> Che'é dan guun vij nana ca'mii roj so' che'é Juan Marcos, ne che'é dan ca'anj yanij roj so', ne Bernabé ro', nicaj síi cu'naj Marcos, ne cavii roj so' rihoo chéé rihaan na, ne ca'anj roj so' estadó Chipre a.

<sup>40</sup> Ne Pabló ro', narii so' man síi cu'naj Silas se vaa ca'anj so' ga Pabló a. Ne cachún ni'yaj nij tinúu roj so' nij síi man chuman' Antioquía rihaan Diose se vaa qui'yaj Diose se luj ne racuíj so' man roj so' chrej ca'anj roj so', ne dan me se ca'anj roj so' a.

<sup>41</sup> Gaa ne cachén roj so' nu' estadó Siria do', nu' estadó Cilicia do', ne nari' nucua j nimán nij x'ne' nij síi cuchumán rá ni'yaj man Jesucristó man cunudanj nij chuman' naj roj estadó yo', qui'yaj roj so' a.

## 16

*Nana nihánj taj xna'anj se vaa cachéé síi cu'naj Timoteo ga síi cu'naj Pabló ga Silas a*

<sup>1</sup> Dan me se cuchi' síi cu'naj Pabló ga Silas chuman' Derbe do', chuman' Litra do' a. Ne chuman' Litra ro', yáan 'o' síi tucu'yón se nana Jesucristó, ne Timoteo cu'naj so' a. Ne nii Timoteo me chana israelitá cuchumán rá ni'yaj man Jesucristó, ne rej Timoteo me síi yanij a'mii xna'anj griego a.

<sup>2</sup> Ne síi sa' me Timoteo, taj nij tinúu so' síi ne chuman' Litra do', chuman' Iconio do' a.

<sup>3</sup> Dan me se guun rá Pabló se vaa ca'anj Timoteo ga so' a. Ne cuta' Pabló ta'nga' man so', che'é se ne'en cunudanj nij síi israelitá yanj rej yo' se vaa sij yanij me rej so' ne che'é dan nuvi' ta'nga' cata' man so' ma'.

<sup>4</sup> Dan me se gaa cachén nij so' nu' nij chuman', ne cataj xna'anj nij so' rihaan nij yuvií cuchumán rá ni'yaj man Jesucristó se vaa cunō nij yuvií se nana nij apóstol cune! Jesucristó man do', yo'ó nij síi uun chij yanj chuman' Jerusalén do', nana naqui'yaj cuu nij so' che'é nij síi yanj a.

<sup>5</sup> Ne xa' nij x'ne' nij síi cuchumán rá ni'yaj man Jesucristó, tzaj ne doj a canoco' nij so' se tucuañj Jesucristó, ne doj a cunuu rijj nij x'ne' da'j a güii a.

*Nana nihánj taj xna'anj se vaa naqui'yaa 'o síi ne estadó Macedonia rihaan Pabló, qui'yaj Diose a*

<sup>6</sup> Dan me se caráan Nimán Diose chrej rihaan nij so' nata' nij so' se nana Diose estadó cu'naj Asia, ne che'é dan cachén nij so' rej cu'naj Frigia do', rej cu'naj Galacia do' a.

<sup>7</sup> Gaa ne vaj nij so' chrej ndaa rej cu'naj Misia, gaa ne guun rá nij so' ca'anj nij so' estadó cu'naj Bitinia a. Tzaj ne ne ca'vee qui'yaj nij so' danj, qui'yaj Nimán Diose ma'.

<sup>8</sup> Che'é dan cachén nij so' rej cu'naj Misia, ne nanij nij so' ndaa chuman' Troas a.

<sup>9</sup> Ne dan me se rej nij naqui'yaa 'o rasuun rihaan Pabló, qui'yaj Diose a. Ne dan me se nicun' 'o síi ne estadó Macedonia ni'yaj Pabló, ne canacúun snó'o yo' man Pabló, cataj so':

—Ca'na' so' ndaa estadó Macedonia nihánj, ne racúij so' man núj á —taj so' rquee so' man Pabló a.

<sup>10</sup> Gaa ne nu' nanó rá ca'anj ran' núj da'j gaa qui'yaj núj ne ca'vee ca'anj núj ndaa estadó Macedonia a. 'O se cachrij rá ya núj se vaa Diose me síi ca'ne' suun rihaan núj nata' núj se nana Diose nana sa' rihaan nij síi ne estadó Macedonia yo' a.

*Nana nihánj taj xna'anj che'é chana cu'naj Lidia chana cuchumán rá ni'yaj man Jesucristó a*

<sup>11</sup> Dan me se chuman' Troas ro', cavii núj rihoo chée rihaan na, ne 'o chrej ca'anj núj cuchí' núj ndaa rej cu'naj Samotracia a. Ne yo'ó güii ca'anj núj rque rihoo ndaa chuman' cu'naj Neápolis a.

<sup>12</sup> Gaa ne cavii núj chuman' yo', ca'anj núj chuman' cu'naj Filipos a. Ne chuman' Filipos ro', me chuman' nocoo naj estadó Macedonia, ne chuman' cuchruj nij síi cavii Romá me yo' a. Dan me se guun raan núj doj güii chuman' Filipos yo',

<sup>13</sup> ne güii naránj rá nij yuvií israelitá curihanj núj ta'yaa xij rej atúj yuvií chuman' yo', ne ca'anj núj tu'va 'o chráa a. 'O se guun rá núj se vaa rej yo' me rej cunuu chre' nij yuvií israelitá cachinj ni'yaj nij so' rihaan Diose a. Dan me se cayáan núj rihaan yo'óo, ne ca'mii núj ga nij chana cunuu chre' rej yo',

<sup>14</sup> ne yaán 'o chana cu'naj Lidia, ne no' ro', me chana ránj natu'vej yatzij mantá tintá sa' inanj, ne chana cavii chuman' Tiatira me no', ne chana yanj aráj guce rihaan Diose me no' a. Dan me se cuno no' se nana Pabló, ne racúij ndo'o Diose sji 'nij ra'a man ní' man no' se vaa ca'vee cuchumán rá no' se nana Pabló yo' a.

<sup>15</sup> Gaa ne cata' ne nij tucua no' a. Gaa ne canacúun no' man núj, cataj no': —Sese 'unj me chana amán ya rá ni'yaj man Diose sji 'nij ra'a man ní', rá nij soj, ne caran' soj ve' tucua'j doj güii á —taj chana cu'naj Lidia rihaan núj a. Ne rquee ndo'o no' man núj, ne caran' núj ve' tucua' no' a.

*Nana nihánj taj xna'anj se vaa catúj roj síi cu'naj Pabló ga Silas taga' che'é se quirii roj so' nana chree nimán 'o chana yaan rii suerté, tzaj ne racuíj Diose man roj so' a*

<sup>16</sup> Dan me se yo'ó güii ca'anj uún núj rej cachinj ni'yaj núj rihaan Diose, ne nari' tuvi' 'o chana yaan ga núj, ne nuu 'o nana chree nimán no', ne qui'yaj canaán ndo'o nij síi uun chij rihaan no' sa'anj, qui'yaj no' gaa quirii no' suerté che'é yuvií a.

<sup>17</sup> Dan me se canoco' ndo'o no' man núj ga Pabló, ne caguáj no', cataj no':

—Nij síi nihánj ro', me síi nuu rihaan Diose síi nicun' xta', ne nata' nij so' rihaan soj me tucuáán canoco' soj ne ca'vee nanii soj rihaan sayuun ei —taj no', ni'yaj no' man núj a.

<sup>18</sup> Dan me se guun que'ee güii qui'yaj no' danj, gaa ne guun rmii Pabló, qui'yaj no', ne che'é dan canicaj so' ca'mii so' rihaan nana chree nuu nimán no', cataj so':

—Nihánj me se che'é suun nucuaj rqué Jesucristó manj a'né' 'unj suun rihaan so' se vaa curihanj so' nimán chana nihánj á —taj Pabló rihaan nana chree yo' a.

Gaa ne nu' curihanj nana chree nimán no' a.

<sup>19</sup> Dan me se nij síi uun chij rihaan chana yaan yo' me se xcaj nij so' cuentá se vaa che'é se curihanj nana chree nimán chana yo' ro', che'é dan se ca'vee qui'yaj canaán nij so' doj sa'anj qui'yaj chana yaan yo', rá nij so' a. Che'é dan quita'aa nij so' man Pabló ga Silas, ne nucuaj rii nii man roj so' ca'anj nij so' yu'vee ndaa rihaan nij síi nicaj suun uun chij rihaan chuman' yo' a.

<sup>20</sup> Gaa ne ca'anj nicaj nij so' man roj síi cu'naj Pabló ga Silas rihaan roj cuese uun chij rihaan chuman' yo', gaa ne cataj nij so' a:

—Roj síi nihánj me se nanj yuvií israelitá me roj so', ne uun rmii rá nu' nij síi man chiháán ní' 'yaj roj so' nanj á.

<sup>21</sup> 'O se nata' roj so' tucuáán naca rihaan núj, ne nuvee tucuaj no' xcuún ní' nicaj ní' me tucuáán yo' che'é se síi nocq' gobiernó ne Romá me ní' á —taj nij so' rihaan roj cuese uun chij rihaan chuman' yo' a.

<sup>22</sup> Gaa ne 'o cunihajan guun rá nij yuvií man chuman' yo', ne caxrij yuvaa ndo'o nij so' man Pabló ga Silas a. Gaa ne nucuaj cuxuun roj cuese sagan' Pabló ga Silas ndaa se quitzin' yatzéj, ne ca'ne' roj cuese suun rihaan nij tanuu se vaa go' ndo'o nij tanuu rutzii xráá roj so' a.

<sup>23</sup> Ne gaa quisij cayuun roj so', ne tagüej nij tanuu man roj so' rá taga', ne ca'ne' roj cuese yo' suun rihaan síi tumé taga' se vaa cutumé uxrá so' man roj so' a.

<sup>24</sup> Dan me se gaa cuno síi tumé taga' nana yo', ne canu' so' man roj so' rá 'o ve' rej rque taga' yo', ne caxrij so' tacóo roj so' rque yu'uj taj rque caj a.

<sup>25</sup> Dan me se rej nij yan' achíin ni'yaj ndo'o roj síi cu'naj Pabló ga Silas ne achráá roj so' chra' rihaan Diose, ne uno nij síi man taga' se vaa 'yaj roj so',

<sup>26</sup> ne dan me se cachén ndo'o yuún, ne ndaa nasqui' ndo'o tacóo ve' taga' yo', ne x'núj nu' nij ta'yaa taj rihaan taga' yo', ne nache nu' aga' ne' nuu chihá ra'a cunudanj nij síi 'nij taga' yo' a.

<sup>27</sup> Ne nanuú rá síi tumé taga', ne quene'en so' se vaa táa ya'núj uun nij ta'yaa, gaa ne guun rá so' se vaa aj cunanj nij síi man taga', ne che'é dan quirii so' taneé so' neé espadá, ne daj doj se ticavi' so' man ma'an so' a.

<sup>28</sup> Tzaj ne nucuaj ndo'o caguáj síi cu'naj Pabló rihaan so', cataj Pabló:

—Se guun qui'yaj chi'ij so' man ma'an so' ma'. 'O se man chre' cunudanj nuj nihanj nanj ei —taj Pabló, caguáj so' a.

<sup>29</sup> Gaa ne canacúun síi tumé taga' se vaa ca'na' nicaj nii ya'an chuguun rihaan so', ne yoo ndo'o catúj so' rá taga', ne ri'ij ndo'o man so' che'é se chu'vi' so', ne cayáan ruj so' ndaa canó tu'va so' rihaan yo'óo rihaan roj síi cu'naj Pabló ga Silas a.

<sup>30</sup> Dan me se ca'anj nicaj so' man roj so' xe', ne xná'anj so' man roj so', cataj so':

—Daj qui'yáj, gaa ne ca'vee nani' 'unj rihaan sayuun quirán' 'unj nihánj ga —taj so', xná'anj so' man roj so' a.

<sup>31</sup> Gaa ne cataj roj so':

—Cuchuman rá so' ni'yaj so' man Jesucristó sij 'nij ra'a man ní', gaa ne nani' so' rihaan sayuun nihánj do', rihaan chrej chi'ij uun chij nimán so' do' a. Ne danj inanj qui'yaj nij tuv'í soj, gaa ne cav'ij sa' cunudanj soj rihaan Diose á —taj roj so' rihaan síi tumé taga' yo' a.

<sup>32</sup> Gaa ne nata' roj so' se naná Diose sij 'nij ra'a man ní' rihaan nu' nij tucua so' a.

<sup>33</sup> Dan me se rej nij me yo', ne maan orá dan nicaj síi tumé taga' yo' man roj so', ne na'nu' so' xráa roj so' rej canó rutzij, ne nu' qui'yaj so' danj, ne nu' cata' ne nu' nij tucua so' a.

<sup>34</sup> Gaa ne ca'anj nicaj so' man roj so' rej xraj rej ne ma'an so', ne go' so' se chá cha roj so' a. Gaa ne dan me se guun niha' uxrá rá nij tucua so', che'é se cuchumán rá nij so' ni'yaj nij so' man Diose a.

<sup>35</sup> Gaa ne rej ranga' me se ca'neé roj cuese man misión taga', ne cataj nij misión rihaan síi tumé taga' a:

—Na'nej so' man roj snó'o yo' á —taj nij so' a.

<sup>36</sup> Gaa ne cuchi' síi tumé taga' yo' rihaan Pabló, ne nata' so' se naná nij misión rihaan Pabló, cataj so':

—Ca'neé roj cuese naná se vaa na'nej 'unj man roj soj nanj á. Che'é dan cuano nihánj me se ca'vee ca'anj roj soj, ne gaa xej nimán roj soj á —taj so' rihaan Pabló a.

<sup>37</sup> Gaa ne cataj Pabló rihaan nij misión a:

—Dan me se roj cuese yo' ro', ndá' se sij romanó me rój, tzaj ne ne naqui'yaj çu roj so' che'é rój, ne maan se go' rma'an nii rutzij xráa rój, qui'yaj roj so', ne quene'en cunudanj nij yuvi' man rój se vaa cayuun rój, gaa ne caxri' roj so' taga' man rój a. Ne nihánj me se uun rá roj so' quir'ij yuve roj so' man rój xe', tzaj ne se guun danj ma'. Tananj ca'na' ma'an roj so' nihánj, gaa ne ve'é quitaj yaan roj so' rihaan rój curihanj rój taga' nihánj á —taj Pabló rihaan nij misión ca'na' taga' a.

<sup>38</sup> Dan me se nata' nij misión se naná Pabló rihaan roj cuese yo', gaa ne cuhu'vi' ndo'o roj so' gaa cuno roj so' naná se vaa sij romanó me Pabló ga Silas a.

<sup>39</sup> Gaa ne cuchi' roj cuese taga', gaa ne ca'mii sa' roj so' ga roj síi cu'naj Pabló ga Silas a. Gaa ne quitáa yaan roj cuese rihaan roj so' curihanj roj so' taga', ne ve'é cachín ni'yaj roj cuese rihaan Pabló ga Silas se vaa qui'yaj roj so' se ndo'o, curihanj roj so' chuman' yo' a.

<sup>40</sup> Dan me se gaa quis'ij curihanj roj so' taga', gaa ne ca'anj roj so' tucua chana cu'naj Lidia a. Gaa ne gaa quene'en roj so' man nij tinúu nij so' síi nocó' man Jesucristó, ne ca'mii roj so' ga nij so', ne cunuu xej nimán nij so' qui'yaj se naná roj so', gaa ne curihanj roj so' chuman' yo', ne ca'anj roj so' a.

## 17

*Nana nihánj taj xna'anj se vaa ca'maan rá nij síi man chuman' Tesalónica ni'yaj nij so' man Pabló ga Silas a*

<sup>1</sup> Dan me se cachén roj so' chuman' Anfípolis do', chuman' Apolonia do', gaa ne catúj roj so' chuman' Tesalónica a. Ne chuman' Tesalónica ro', ne 'o ve' tucu'yón nij yuvií israelitá se tucuñanj Moisés a.

<sup>2</sup> Dan me se catúj Pabló rá ve' yo' rej nuu chre' nij yuvií israelitá yo', ndaa vaa u'yón inanj so' qui'yaj so' a. Ne va'nuj ya güii cuetan' naránj rá nij so' nanó Pabló cuentó ga nij so' che'é nana no rihaan danj Diose a.

<sup>3</sup> Dan me se cataj xna'anj Pabló rihaan nij so' se vaa síi ca'née Diose tinanii man yuvií rihaan sayuun me se no xcúun so' quiran' so' sayuun ne cavi' so' ne cunuu i'na' uún so', ne cataj Pabló se vaa ma'an Jesucristó síi nata' Pabló che'e rihaan nij so' ro', ma'an ya so' me síi ca'née Diose tinanii man yuvií rihaan sayuun a.

<sup>4</sup> Gaa ne ta'aj nij síi israelitá cuno se nana Pabló ro', cuchumán rá nij so' ni'yaj nij so' man Jesucristó, ne guun tuvi' nij so' ga Pabló ne ga Silas a. Ne cuchumán rá que'ee ndo'o nij síi yaní a'mii xna'anj griego aráj guce inanj rihaan Diose do', que'ee nij chana raa doj ne chuman' yo' do', cuchumán rá a.

<sup>5</sup> Tzaj ne guun xcoj ruvaa rá yo'ó nij yuvií israelitá ni'yaj nij so' man roj síi cu'naj Pabló ga Silas, ne che'é dan nano' nij so' doj síi chi'ii man yu'vee, ne cunuu chre' ndo'o yuvií, qui'yaj nij síi chi'ii yo', gaa ne naxumaan ndo'o sayuun chuman' yo', qui'yaj nij so' a. Gaa ne cuchi' nij yuvií yo' rihaan ve' tucua' síi cu'naj Jasón ve' caran' síi cu'naj Pabló ga Silas, ne guun rá nij yuvií quiríi nij so' man roj so' ndaa rihaan yuvií cunuu chre' a.

<sup>6</sup> Dan me se nuvi' roj so' ne rá ve' yo' gaa cuchi' nij yuvií nano' man roj so' ma'. Che'é dan quirii nij yuvií man ma'an síi cu'naj Jasón do', man yo'ó nij tinúú ní' síi noco' man Jesucristó do', ne nucuaj rií nij yuvií man nij so' ndaa rihaan nij síi uun chij rihaan chuman' yo' a. Gaa ne caguáj nij yuvií, cataj nij yuvií:

—Nij síi nihánj 'yaj natuná tucuaán naj rihaan yuvií man nu' caxra' rihaan chumií, tzaj ne nihánj me se ndaa chiháán ní' 'na' nij so' tirí' nij so' yaj nanj chuguanj.

<sup>7</sup> Ne síi cu'naj Jasón nihánj me se taj ya'anj so' man roj so' adonj. Ne cunudanj nij so' ro', inanj se vaa na'vej rá síi cu'naj César qui'yaj yuvií 'yaj nij so' nanj á. 'O se tucu'yón nij so' rihaan yuvií se vaa Jesucristó me yo'ó síi nicaj suun rey uun chij rihaan ní' nanj ei —taj nij yuvií israelitá, caguáj nij so', cuno nij síi uun chij rihaan chuman' Tesalónica yo' a.

<sup>8</sup> Dan me se cuyanj ndo'o rá nij síi uun chij do', yo'ó nij yuvií ne chuman' yo' do', gaa cuno nij so' nana yo',

<sup>9</sup> gaa ne cata' tu'va nij tuvi' síi cu'naj Jasón se vaa se guun qui'yaj nij so' doj sayuun, ne ndaa cuchruij nij so' sa'anj, ne na'née nij síi uun chij yo' chrej man nij so' a.

*Nana nihánj taj xna'anj se vaa ca'mii natáj síi cu'naj Pabló ga Silas se nana Diose rihaan nij síi man chuman' Berea a*

<sup>10</sup> Dan me se maan orá rej nií güii yo' ca'née nij tinúú ní' síi man chuman' Tesalónica man síi cu'naj Pabló ga Silas ca'anj roj so' ndaa chuman' Berea a. Gaa ne cuchi' roj so', ne catúj roj so' rá ve' tucu'yón nij yuvií israelitá se tucuñanj Moisés a.

11 Ne nij sí israelitá yanj chuman' Berea me se sa' doj vaa nimán nij so' rihaan nij sí israelitá yanj chuman' Tesalónica yo' a. 'O se aran' rá nij so' cuno nij so' se nana Diose, ne daj a nij güii yanj ndo'o nayaa nij so' danj Diose, che'é se guun rá nij so' xcaj nij so' cuentá sese ya ya cuyaan vaa se nana Pabló ga nana no rihaan danj Diose a.

12 Che'é dan que'ee ndo'o nij so' cuchumán rá ni'yaj man Jesucristó a. Ne nij sí yaníj a' mii xna'ánj griego me se que'ee tuvi' nij so' chana ni'yanj nimán do', snó'o do', cuchumán rá ni'yaj man Jesucristó a.

13 Dan me se xcaj nij sí israelitá yanj chuman' Tesalónica cuentá se vaa ndaa chuman' Berea nata' uún sí cu'naj Pabló se nana Diose rihaan nij yuvij a. Che'é dan ca'anj nij so' chuman' Berea yo', ne ca'mii ne nij so' che'é Pabló, ne cuyanj rá nij sí man Berea ni'yaj nij so' man sí cu'naj Pabló ga Silas, qui'yaj nij sí man Tesalónica yo' a.

14 Gaa ne nu' ca'née nij tinúú ní' man Pabló ca'anj so' ndaa tu'va na ya'anj, tzaj ne quináj sí cu'naj Silas do', sí cu'naj Timoteo do', chuman' Berea yo' a.

15 Ne ta'aj nij sí man Berea yo' me se ca'anj tacuachée man Pabló, ne ca'anj nicaj nij so' man so' ndaa chuman' Atenas a. Gaa ne rqué Pabló nana rihaan nij sí man Berea nata' nij so' rihaan sí cu'naj Silas ga Timoteo se vaa cuaj ca'na' roj so' rihaan Pabló a. Gaa ne canicaj nij sí man Berea yo' quinán' nij so' chiháan nij so' a.

*Nana nihánj taj xna'anj che'é nij nana ca'mii natáj Pabló rihaan nij sí man chuman' Atenas a*

16 Dan me se gaa na'vij Pabló ca'na' roj sí cu'naj Silas ga Timoteo chuman' Atenas, ne ve'ee ndo'o nimán Pabló gaa quene'en so' se vaa man ndo'o ya'anj qui'yaj ra'a nij sí man Atenas yo' rque chuman' yo',

17 ne che'é dan nanó ndo'o so' cuentó ga nij yuvij israelitá do', ga nij sí yaníj aráj guje rihaan Diose do', rá ve' tucu'yón nij so' se tucuanj Moisés a. Ne daj a güii ca'anj so' yu'vee, ne nanó so' cuentó ga me ma'an sí chée yu'vee yo' a.

18 Dan me se man ndo'o sí chruun yanj ne chuman' Atenas yo', ne ta'aj nij so' me sí tucu'yón se nana sí cu'naj Epicuro, ne yo'ó ta'aj nij so' cu'naj estoico a. Ne doj tuvi' nij so' nanó cuentó ga Pabló a. Dan me se ta'aj nij so' cataj:

—Me taj sí nihánj tu'va rma'an so' danj, rá soj ga —taj nij so', xna'anj nij so' man tuvi' nij so', ni'yaj nij so' man Pabló a.

Ne yo'ó ta'aj nij so' cataj:

—Sí nata' se nana ya'anj curuvi' naca me so' nanj á —taj yo'ó ta'aj nij yuvij, ese nata' Pabló se nana Jesucristó nana sa' rihaan nij so', ne nata' Pabló se vaa ca'vee cunu i'na' uún nij sí cavi' a.

19 Dan me se ca'anj nicaj nij so' man Pabló raq 'o quij le'ej cu'naj Areópago, ne cataj nij so' rihaan Pabló:

—Qui'yáa so' se ndo'o cataj xna'anj so' rihaan núj daj vaa nij nana naca nana tucu'yón so' rihaan yuvij á.

20 'O se caráya'anj ndo'o núj ta'aj nij nana ca'mii so' cuno núj, ne che'é dan me rá núj xcaj núj cuentá daj vaa tucuaán tucu'yón so' a —taj nij sí man Atenas rihaan sí cu'naj Pabló a.

21 'O se nij sí man chuman' Atenas do', nij sí 'na' aran' chuman' Atenas do', inanj uun rá nij so' nata' nij so' nana naca do', nari' nij so' nana naca do', nanj adonj.

22 Dan me se canicun' Pabló tanuú sca'núj nij so' raq̄ quij cu'naj Areópago, gaā nē cataj so' rihaan nij so':

—Cunō soj sij man̄ chuman' Atenas nihánj ca'mij á. Aj ne'enj se vaa sij aran' ndo'o rá na'vúj rihaan nij ya'anj me nij soj adonj.

23 'Q se gaā cachenj chuman' man̄ soj, nē quene'én 'unj nij rej na'vúj soj rihaan nij ya'anj noco' soj, nē quene'én 'unj yo'o chraan altar, nē nanā nō rihaan chraan altar yo' cataj, “Rej na'vúj ní' rihaan ya'anj ne ne'en ní' man a”, taj nanā nō rihaan chraan altar yo' a. Nē xa' 'unj, tzaj nē nihánj me se nata' 'unj rihaan nij soj che'é ma'an ya'anj yo' ya'anj na'vúj soj rihaan, ya'anj ne ne'en soj man nanj adonj.

24 “Dan me se Dioso ro', me ya'anj qui'yaj nu' chumij do', nu' rasuun man rihaan chumij do', nē se ca'vee guun tucuā so' ve' une' yuvij canē so' che'é se so' me sí' 'nij ra'a nu' rej xta' nu' yo'óo nu' a.

25 'Q se so' me sí' 'yaj vaa i'na' ní', nē so' me sí' 'yaj naránj ní' nanā, nē dan me se rque' so' nu' rasuun achiin man ní' adonj. Nē che'é dan taj vaj rasuun achiin man so', nē se ca'vee raçu'ij yuvij man so' ma'.

26 Nē orún' snó'o qui'yaj so' asij rque' ro', veé ton dan qui'yaj so' man daj a x'ne' nij yuvij, che'é rej cayáan̄ nij yuvij rihaan nu' cachra' chumij adonj. Nē aj ne'en Dioso me daj yo' cayáan̄ 'o 'o x'ne' nij yuvij rihaan chumij, nē aj ne'en Dioso me rej guun ran' to'óo 'o 'o x'ne' nij yuvij ei.

27 'Q se guun rá Dioso se vaa xcax̄ nij yuvij cuentá che'é Dioso nē narj' nij yuvij man Dioso chuguanj. 'Q se nuveé sij nē gan' ndo'o rihaan 'o 'o ní' me Dioso ma'.

28 'Q se vaa i'na' ní', 'yaj so', nē chéé ní', 'yaj so', nē vaa ní' rihaan chumij nihánj, 'yaj so' adonj. 'Q se ta'aj tuvi' nij soj sí' chruun yanj cachrón nanā nihánj rihaan yanj se vaa: “'Q se ndaa ta'nú' so' me ní' adonj”, taj ta'aj tuvi' ma'an soj nanj ei.

29 Nē che'é se ta'nij Dioso me ní' ro', che'é dan ne nó xcúun ní' guun rá ní' se vaa ase vaa Dioso ro', danj vaa nij aga' oró mí' titaa ní' do', nij aga' platá catzi' titaa ní' do', nij yahij acó'j ní' do' ma'. 'Q se inanj rasuun avii raq̄ ma'an ní' yuvij me nij rasuun vaa danj ei.

30 “Dan me se asij rque' me se ne qui'yaj Dioso sayuun man nij sí' na'vúj rihaan aga' do', rihaan yahij do' ma'. 'Q se ne ca'vee xcax̄ nij yuvij cuentá ma'. Tzaj nē yaj me se cataj xna'anj Dioso rihaan nij yuvij man̄ cunudanj nij chuman' naj rihaan chumij se vaa canicaj nimán̄ nij yuvij canoco' nij yuvij tucuaán̄ sa' adonj.

31 Nē dan me se cachrón Dioso 'o güii ca'ne' nicá so' cacun' che'é cunudanj nij yuvij man̄ rihaan chumij a. Nē aj cune' so' man 'o snó'o guun sí' ca'ne' cacun' che'é yuvij a. Nē che'é se cunuu i'na' uún snó'o yo', qui'yaj Dioso, gaa cavi' so', nē che'é dan nō xcúun cunudanj yuvij cuchuman̄ rá nij yuvij se vaa veé ya snó'o yo' me so' adonj —taj Pabló rihaan nij sí' man Atenas yo' a.

32 Dan me se gaā cunō nij sí' man Atenas nanā se vaa cunuu i'na' uún 'o sí' cavi', nē ta'aj nij so' ca'nga' nacoo, nē yo'ó ta'aj nij so' cataj:

—Ndaa yo'ó güii uún me se ca'na' núj cunō núj se nanā so' nanj ei —taj yo'ó ta'aj nij sí' man chuman' Atenas yo' a.

33 Veé dan, nē curihanj Pabló sca'núj nij so' a.

34 Tzaj nē doj nij yuvij guun tuvi' ga Pabló, nē cuchumán̄ rá nij so' ni'yaj nij so' man Jesucristó a. Nē yo'ó so' me 'o sí' uun chij cu'naj Dionisio, nē yo'ó no' me chanā cu'naj Dámaris, nē vaa doj yuvij gā nij so' uún a.

## 18

*Nana nihánj taj xna'anj che'é suun qui'yaj suun Pabló chuman' Corinto a*

<sup>1</sup> Cachén doj, gaa ne cavii Pabló chuman' Atenas, ca'anj so' ndaa chuman' Corinto a.

<sup>2</sup> Tihaj yuun nari' tuvi' so' ga 'o sí israelitá cu'naj Aquila, ne xa' so', tzaj ne sij cavii rej cu'naj Ponto me so', ne gaa cayáan so' chuman' Romá, ne ca'ne' sí nicaj suun emperador cu'naj Claudio suun se vaa cavii cunudanj nij yuvii israelitá chuman' Romá ca'anj yaníj nij so' a. Che'é dan cavii so' ga nica so' chana cu'naj Priscila yo'óo nocoo cu'naj Italia, ne che'é dan sij ca'na' naca chuman' Corinto me roj so' a. Dan me se cuchí' Pabló rihaan roj so',

<sup>3</sup> ne che'é se cuyaán vaa suun 'yaj suun Pabló ga suun 'yaj suun roj so' ro', che'é dan caran' Pabló ga roj so', ne qui'yaj suun so' ga roj so' a.

<sup>4</sup> Ne daj a nij güii cuetan' naránj rá nij yuvii israelitá me se ca'mii so' ga nij yuvii cunuu chre' rá ve' tucu'yón nij yuvii israelitá se tucuanj Moisés, ne cuchumán rá doj sí israelitá do', doj sí yaníj a'mii xna'ánj griego do', gaa cuno nij so' se nana so' a.

<sup>5</sup> Dan me se gaa cavii sí cu'naj Silas ga Timoteo estadó Macedonia ca'na' roj so' chuman' Corinto, ne yo' o ca'neé nimán Pabló nata' so' se nana Diose rihaan nij yuvii, ne inanj cataj xna'anj so' rihaan nij yuvii israelitá se vaa Jesucristó me sí ca'neé Diose tinanii man yuvii rihaan sayuun a.

<sup>6</sup> Tzaj ne ca'mii canó tuvi' nij yuvii israelitá ga Pabló, ne quij ca'mii nij so' che'é Pabló a. Che'é dan tucuyuu so' yo'óo tachruu no rihaan sagan' so', gaa ne cataj so' rihaan nij yuvii a:

—Ma'an inanj soj me rá ca'anj rihaan ya'an nanj á. Ne tumé 'unj cacun' se vaa quirán' soj sayuun qui'yaj Diose ma'. Ne yaj me se rej rihaan nihánj me se ca'anj 'unj nata' 'unj se nana Diose rihaan nij sí yaníj nanj á —taj Pabló rihaan nij so' a.

<sup>7</sup> Gaa ne cavii so' rej mán nij so', ne ca'anj so' ve' tucua 'o sí cu'naj Titó Justo, ne so' ro', me 'o sí yaníj ne 'o sí aráj guee rihaan Diose me so', ne ve' tucua so' ro', ne rej x'núj ve' tucu'yón nij yuvii israelitá se tucuanj Moisés a.

<sup>8</sup> Dan me se 'o sí cu'naj Crispo sí 'nij ra'a ve' tucu'yón nij yuvii israelitá se tucuanj Moisés ro', me 'o so', ne cuchumán rá nu' nij tucua so' ni'yaj nij so' man Diose sijn 'nij ra'a man ní' a. Gaa ne cuchí' nana rihaan nij sí man Corinto se vaa sí cu'naj Crispo me sí cuchumán rá ni'yaj man Diose sijn 'nij ra'a man ní', ne che'é dan cuchumán rá uún que'ee nij so' ni'yaj nij so' man Jesucristó, ne cata' ne cunudanj nij so' a.

<sup>9</sup> Ne rej nij me se naquiyaa Diose sijn 'nij ra'a man ní' rihaan Pabló, ne cataj so' a:

—Se cuchu'ví' so' ma'. Yo' o ca'mii so' se nanaj, ne se gaa dínj tu'vá so' ma'.

<sup>10</sup> 'Q se vaj 'unj ga so', ne taj vaj sí go' mán so' ne qui'yaj chi'ii mán so' ma'. 'Q se man uxrá yuvii man chuman' nihánj canoco' manj adonj —taj Diose sijn 'nij ra'a man ní' rihaan Pabló a.

<sup>11</sup> Gaa ne dan me se quináj Pabló 'o yo' táa yanéé, tucu'yón so' se nana Diose rihaan nij sí man chuman' Corinto yo' a.

<sup>12</sup> Dan me se yo' dan me se sí cu'naj Galión me sí nicaj suun gobernador uun chij rihaan chuman' Corinto yo' a. Ne naxumaan yuvii israelitá, ne yo' o me nimán nij so' ni'yaj nij so' man Pabló, ne ca'anj nicaj nij so' man Pabló rihaan sí nicaj suun cu'naj Galión yo', che'é rej naquiyaj cuu so' che'é Pabló a.



13 Gaa ne cataj nij so':

—Sii nihánj ro', 'yaj tanáj xco yuvij se tucuanj núj che'é suun na'v'ij nij yuvij rihaan Diose, ne ino doj na'v'ij nij yuvij rihaan Diose, 'yaj síi nihánj ei —taj nij yuvij israelitá yo', ni'yaj nij so' man Pabló a.

14 Daj doj tzín' se cavii nana tu'va Pabló, tzaj ne ma'an síi cu'naj Galión me síi ca'mii rihaan nij yuvij israelitá yo', ne cataj so':

—Cunoj soj sij israelitá ca'mij á. Sese vaa cacun' chi'ii qui'yaj síi nihánj, ne no xcúnj cunoj se vaa taj soj saj á.

15 Sese taj, gaa ne che'é inanj se nana soj do', che'é se tucuanj soj do', araa soj cacun' xráa so', gaa ne che'é dan ma'an soj no xcúun ca'ne' cacun' che'é so' nanj adonj. 'O se xa' unj nihánj, tzaj ne na'vej uxrá raj naqui'yaj cuú 'unj che'é rasuun vaa danj ma' —taj síi cu'naj Galión rihaan nij yuvij israelitá yo' a.

16 Gaa ne quirii so' man cunudanj nij so' tucua suun a.

17 Gaa ne quita'aa cunudanj nij yuvij man síi cu'naj Sóstenes síi 'nij ra'a man ve' tucu'yón nij so' se tucuanj Moisés, ne go' nij so' chruun xráa so' rihaan tucua suun a. Tzaj ne ne rihuun rá síi cu'naj Galión yo' gaa qui'yaj nij so' danj a ma'.

### *Nana nihánj taj xna'anj se vaa nanicaj Pabló nan' so' chuman' Antioquia a*

18 Dan me se guun que'ee doj güii guun raan Pabló ga nij tinúú ní' síi ne chuman' Corinto, gaa ne cataj so' se vaa ca'anj so', ne cavii so' rque rihoo chéé rihaan na, ne ca'anj so' ndaa estadó cu'naj Siria, ne ca'anj chana cu'naj Priscila do', síi cu'naj Aquila do', ga so' a. Tzaj ne asino yaan caca caan nii raá Pabló, qui'yaj Pabló, gaa vaj nij so' chuman' Cencrea, che'é se aj cata' tu'va so' 'o nana rihaan Diose a.

19 Dan me se cuchí' nij so' chuman' Efeso, ne tanáj Pabló man roj so' chuman' yo' a. Gaa ne catúj ma'an so' rá ve' tucu'yón nij yuvij israelitá se tucuanj Moisés, ne ca'mii so' ga nij yuvij che'é se nana Diose a.

20 Ne cachíin ni'yaj nij síi man chuman' Efeso se vaa guun raan so' doj chiháán nij so', tzaj ne ne ca'vej so' a.

21 Tzaj ne cataj so':

—Ca'anj 'unj nanj ei. Vaa che'é ndo'o canicún' 'unj 'o cha'anj canuú chuman' Jerusalén, tzaj ne sese Diose ca'vej, ne ndaa yuún xe ca'na' uún 'unj a —taj so', ne cavii so' rque rihoo chéé rihaan na, ne tanáj so' man chuman' Efeso yo' a.

22 Dan me se ca'anj so' ndaa chuman' Cesarea, ne cavii so' ca'anj ni'yaj so' man x'ne' nij síi amán rá ni'yaj man Jesucristó yanj chuman' Jerusalén a. Gaa ne nanij so' ndaa chuman' Antioquia a.

23 Ne guun raan so' doj chuman' Antioquia, gaa ne ca'anj so' ndaa vaa naj 'o 'o chuman' naj estadó Galacia do', estadó Frigia do', ne nari' nucaj rá cunudanj nij síi tucu'yón se nana Jesucristó yanj nij chuman' yo', qui'yaj so' a.

### *Nana nihánj taj xna'anj che'é síi cu'naj Apolos a*

24 Dan me se vaa 'o síi israelitá cu'naj Apolos, ne sij cavii chuman' Alejandría me so', ne sij ve'é ndo'o a'mii me so', ne sa' uxrá nari' so' danj Diose a. Dan me se ca'anj so' ndaa chuman' Efeso a.

25 Ne aj nari' so' se tucuanj Diose sij 'nij ra'a man ní', ne guun ndo'o rá nimán so', ne che'é dan nicá nata' so' ne tucu'yón so' se nana Jesucristó rihaan nij yuvij a. Tzaj ne ataa xcáj so' cuentá se vaa no xcúun yuvij cataj

ne yuvij che'é Jesucristó, ne inanj quene'en so' daj qui'yaj sí cu'naj Juan gaa cuta' ne Juan man yuvij a.

<sup>26</sup> Dan me se guun che'e so' ve'é ca'mii natáj so' rá ve' tucu'yón nij yuvij israelitá man chuman' Efeso se tucuanj Moisés a. Ne cuno chana cu'naj Priscila do', sí cu'naj Aquila do', gaa ne nicaj tuvi' roj so' ga so', ne nica doj ne sa' doj tucu'yón roj so' se tucuanj Diose man Apolos a.

<sup>27</sup> Dan me se guun rá sí cu'naj Apolos cachén so' ndaa estadó Acaya, gaa ne doj a nari' nucaj so' qui'yaj nij tinúú ní' sí man chuman' Efeso, ne qui'yaj nij so' yanj cartá nayaa nij sí tucu'yón se nana Jesucristó man estadó Acaya, ne cataj nij so' se vaa ve'é nicaj tuvi' nij sí man Acaya ga sí cu'naj Apolos yo' a. Gaa ne gaa cuchi' sí cu'naj Apolos ndaa estadó Acaya, ne racuíj ndo'o so' man nij tinúú ní' sí cuchumán rá ni'yaj man Jesucristó che'é se luj qui'yaj Diose a.

<sup>28</sup> 'O se cunaj uxrá tihaan so' rihaan nij yuvij israelitá ne amán rá ni'yaj man Jesucristó se vaa taj danj Diose se vaa Jesucristó me sí ca'née Diose tinanii man yuvij rihaan sayuun, ne ca'mii canó tuvi' so' ga nij so' rej man ndo'o nij yuvij, ne qui'yaj canaán se nana sí cu'naj Apolos rihaan se nana nij sí israelitá yo' a.

## 19

*Nana nihánj taj xna'anj se vaa ca'na' Nimán Diose rihaan nij sí tucu'yón se nana Jesucristó yanj chuman' Efeso a*

<sup>1</sup> Dan me se gaa cayáán sí cu'naj Apolos chuman' Corinto, ne cachén Pabló rej xraj doj cuchi' so' chuman' Efeso, ne nari' so' doj sí tucu'yón se nana Jesucristó a.

<sup>2</sup> Gaa ne xná'anj Pabló man nij so' a:

—Ne catúj Nimán Diose nimán nij soj gaa cuchumán rá soj ni'yaj soj man Jesucristó na' —taj Pabló, xná'anj so' man nij so' a.

Gaa ne cataj nij so':

—Taj ma'. 'O se a ne cuno núj nana se vaa vaa 'o Nimán Diose a ma' —taj nij so' rihaan Pabló a.

<sup>3</sup> Gaa ne xná'anj Pabló man nij so' a:

—Ne me sí che'e cata' ne nij soj ga —taj so', xná'anj so' man nij so' a.

Gaa ne cataj nij so':

—'O se cata' ne núj ndaa vaa cataj xna'anj sí cu'naj Juan nanj á —taj nij so' rihaan Pabló a.

<sup>4</sup> Gaa ne cataj Pabló rihaan nij so' a:

—Xa' Juan, tzaj ne cuta' ne so' man yuvij che'é yan canicaj nimán nij yuvij canoco' nij yuvij tucuaán sa' a. Ne cataj Juan rihaan nij yuvij se vaa sí ca'na' rej xco Juan ro', me sí no xcúún nij yuvij cuchuman rá nij so' ni'yaj nij so' man, ne sí ca'na' rej xco Juan ro', me Jesucristó a —taj Pabló rihaan nij sí ne chuman' Efeso a.

<sup>5</sup> Dan me se gaa cuno nij so' nana vaa danj, gaa ne cata' ne nij so' che'é Jesucristó sij 'nij ra'a man ní' a.

<sup>6</sup> Gaa ne cuta' Pabló ra'a so' raaj nij so', ne catúj Nimán Diose nimán nij so', ne ca'mii nij so' xna'ánj naca, ne nata' nij so' nana rqué Diose rihaan ma'an nij so' nata' nij so' a.

<sup>7</sup> Ne cunudanj nij snó'o me se quisij ya 'o chuvij nij so' ta' asuun a.

*Nana nihánj taj xna'anj se vaa ca'anj Pabló ca'mii so' ga yuvij man rá escuela' nij ra'a sí cu'naj Tiranno a*

<sup>8</sup> Gaa ne catúj Pabló rá ve' tucu'yón nij yuvij israelitá man chuman' Efeso se tucuanj Moisés, ne va'nuj yavii 'o rihaan inanj ca'mii so' ga nij so' che'é se me rá so' cuchuman rá nij so' nana che'é suun uun chij Diose nimán yuvij do', rihaan chumij nihánj vaa güii do' a.

<sup>9</sup> Tzaj ne nichraj ndo'o rá ta'aj nij so', ne ne ca'vej rá nij so' cuchuman rá nij so' nana sa' yo' ma'. Gaa ne quij ca'mii nij so' che'é tucuaán nocó' ní' cuno cunudanj nij yuvij man rá ve' yo', gaa ne che'é dan tanáj Pabló man nij sí nichraj rá yo', ne ca'anj yanj nij sí tucu'yón se nana Jesucristó rihaan nij so', qui'yaj Pabló, ne ca'anj so' ve' escuela' 'nij ra'a 'o sí cu'naj Tiranno, ne daj a güii ca'mii so' ga yuvij rá ve' escuela' yo' a.

<sup>10</sup> Ne quisj vij ya yo' qui'yaj so' danj, ne che'é dan cunudanj nij sí israelitá ga nij sí yanj a'mii xna'ánj griego yanj estadó Asia xcaj cuentá che'é se nana Jesucristó sijn 'nij ra'a man ní' a.

*Nana nihánj taj xna'anj se vaa quiran' nij ta'nii sí cu'naj Esceva sayuun, qui'yaj 'o nana chree a*

<sup>11</sup> Dan me se guun nucuaj Pabló qui'yaj so' suun sa' nocó, qui'yaj Diose,

<sup>12</sup> ne ndaa nicaj nii se vitó Pabló do', yatzij numij catuun Pabló do', ca'anj nii cuta' nii raá nij sí ran', ne nahuun sa' nij sí ran', ne curihanj nana chree nimán nij sí ran' yo', qui'yaj Diose a.

<sup>13</sup> Ne vaa doj sí israelitá chéé canó chuman', ne nij so' me sí uta' ra'a raá sí ran' ne urihanj nana chree nimán nij sí ran' yo', 'yaj nij so' a. Ne cata' tu'va nij so' se chuvij Jesucristó sijn 'nij ra'a man ní' se vaa guun rá nij so' raçuíj so' man nij so' qui'yaj nij so' ndaa vaa 'yaj Pabló a. Dan me se cataj nij so' rihaan nana chree a: "Nihánj me se a'né' 'unj suun rihaan nij so' nana chree se vaa curihanj soj nimán sí ran' nihánj che'é Jesucristó sí a'mii natáj sí cu'naj Pabló che'é á", taj nij so' a.

<sup>14</sup> Ne vaa chij ta'nii 'o sí israelitá cu'naj Esceva, ne xrej atá suun nocó doj me so', ne chij nij ta'nii so' ro', ca'mii danj rihaan 'o nana chree nuu nimán 'o so' a.

<sup>15</sup> Gaa ne nana chree yo' ro', ca'mii rihaan nij so', ne cataj yo':

—Ne 'unj me se ne'enj man Jesucristó, ne ne'enj daj sijn me Pabló a. Tzaj ne soj me se ne ne'en uxrá 'unj man soj a ma' —taj nana chree yo' rihaan chij nij so' a.

<sup>16</sup> Gaa ne sí nuu nana chree yo' nimán ro', güéj so', ne tuguáj tuvi' so' ga nij so', ne nucuaj so' doj rihaan nij so', ne qui'yaj canaán so' man cunu' chij nij so' a. Dan me se cunanj nij so', curihanj nij so' rá ve' yo', ne cánj uun vaa nij so', ne quiran' ndo'o nij so' sayuun, qui'yaj sí nuu nana chree nimán yo' a.

<sup>17</sup> Gaa ne xcaj cunudanj nij yuvij israelitá ga nij yuvij yanj a'mii xna'ánj griego yanj chuman' Efeso yo' cuentá se vaa quiran' chij nij so', ne che'é dan cuchu'vi' ndo'o cunudanj nij so', ne cataj nij so' se vaa sa' uxrá vaa Jesucristó sijn 'nij ra'a man ní' a.

<sup>18</sup> Ne que'ee nij sí cuchumán rá ni'yaj man Jesucristó me se naxra' tu'va nij so', ne nata' ya nij so' che'é cacun' qui'yaj nij so' a.

<sup>19</sup> Ne que'ee nij sí qui'yaj chree gaa rque'ee doj ro', naqui'yaj chre' nij so' danj nij so' yanj libró no' nana chree, ne caxrij ya'an nij so' man nij yanj yo', ni'yaj cunudanj nij yuvij a. Gaa ne narii nij so' cuentá me daj sa'anj nó nij yanj yo', ne quisj vij chihaa chi' mij sa'anj platá catzii nó nij yanj tucuaca' nij so' a.

<sup>20</sup> Veé dan me se cha'nuu uxrá se nana Jesucristó sij 'nij ra'a man ní, ne nari' nucaj doj se nana so' a.

*Nana nihánj taj xna'anj se vaa ca'maan rá nij sí 'yaj ya'anj aga' yanj chuman' Efeso ni'yaj nij so' man Pabló a*

<sup>21</sup> Veé dan gaa ne ca'née nimán Pabló cachén so' estadó cu'naj Macedonia ga Acaya ne ca'anj so' ndaa chuman' Jerusalén, ne cataj so' se vaa asa' quisij ca'anj so' ndaa chuman' Jerusalén, ne no xcúun so' ca'anj ni'yaj so' ndaa chuman' Romá, taj so' a.

<sup>22</sup> Gaa ne ca'née so' vij tuvi' nij sí 'yaj suun ga so' catuu roj so' rej Macedonia a. Dan me se sí cu'naj Timoteo do', sí cu'naj Erasto do', me roj sí ca'née so', ne ma'an so' guun raan doj güii estadó Asia a.

<sup>23</sup> Ne güii dan me se guun ndo'o sayuun che'é se tucuñj ní sij nocó' man Jesucristó a.

<sup>24</sup> Dan me se vaa 'o sí cu'naj Demetrio ne sí 'yaj suun aga' me so', ne nij tuví' nij so' nicaj aga' platá catzií ne 'yaj nij so' nuvíí le'ej ní, ne ase vaa ma'an nuvíí na'víj yuvií rihaan ya'anj chana cu'naj Diana vaa yo' a. Ne 'yaj canaán ndo'o nij so' sa'anj a.

<sup>25</sup> Dan me se canacúun sí cu'naj Demetrio man cunudanj nij sí 'yaj suun ase vaa suun 'yaj suun ma'an so' ne chuman' Efeso yo', ne ca'mii natáj so' rihaan nij so', cataj so':

—Cunó nij soj nana ca'mij rihaan soj, tinuj. Dan me se aj ne'en soj se vaa che'é suun 'yaj suun ní' ro', che'é dan 'yaj canaán ndo'o ní' sa'anj á.

<sup>26</sup> Ne nihánj me se aj ne'en ní' daj 'yaj sí cu'naj Pabló yo', ne ca'na' nana rihaan ní' se vaa vaj so' nata' so' se nana so' se vaa xa' ya'anj 'yaj yuvií, tzaj ne nuveé ya'anj ya me ya'anj vaa danj ma'. Ne nuveé inanj chuman' Efeso nihánj me rej tu'va so' danj ma'. Tananj vaj so' ndaa nu' estadó Asia nihánj ta' asuun, ne cuchumán rá que'ee ndo'o yuvií man estadó Asia nihánj cuno nij so' se nana Pabló, ne tanáj nij so' se tucuñj ní' qui'yaj Pabló adonj.

<sup>27</sup> Dan me se xraj ne vaa güii nachri' yuvií ni'yaj yuvií se suun ní', gaa ne dan me se guun rá uún nij yuvií se vaa taj se gún' nuvíí na'víj ní' rihaan ya'anj chana sa' ndo'o cu'naj Diana a ma'. Ne cataj nij yuvií se vaa nuveé ya'anj sa' me no' ma'. Ne xa' no', tzaj ne nu' ní' sij man estadó Asia nihánj do', ndaa yuvií man rihaan nu' chumií do', na'víj rihaan no' ei —taj sí cu'naj Demetrio cuno nij tuvi' so' a.

<sup>28</sup> Dan me se gaa cuno nij so' se nana Demetrio, ne cuyanj uxrá rá nij so', ne caguáj nij so', cataj nij so':

—Guee uxrá Diana ta'anj ní' sij man Efeso ei —taj nij so', caguáj nij so' a.

<sup>29</sup> Gaa ne yo'o nachej raá cunudanj nij yuvií man chuman' Efeso yo', ne quita'aa nij yuvií man sí cu'naj Gayo ga sí cu'naj Aristarco che'é se sij chéé ga Pabló me roj so', ne sij cavii estadó Macedonia me roj so' a. Dan me se nicaj cunudanj nij yuvií man roj so', ca'anj nij yuvií, ne cunánj nij so' catúj nij so' rej estadió nuu chre' que'ee ndo'o yuvií a.

<sup>30</sup> Ne guun rá Pabló catuu so' rej man nij yuvií, tzaj ne ne ca'vej rá yo'ó nij sí tucu'yón se nana Jesucristó ca'anj so', ne ne ca'vee catuu Pabló rej yo' qui'yaj tuvi' so' a ma'.

<sup>31</sup> Ne ta'aj nij sí uun chij rihaan nu' estadó Asia ro', me tuvi' Pabló, ne ca'née nij so' nana rihaan Pabló se vaa daj chihaa mój se guun catuu Pabló rej cunu chre' nij yuvií a.

<sup>32</sup> Dan me se ino doj vaa nana caguáj 'o 'o ta'aj nij yuvij, che'é se nachej se nana nij so' a. Ne me doj uxrá doj nij so' ne ne'en daj me che'é cunuu chre' nij so' ma'.

<sup>33</sup> Dan me se tiguíj ra'a nii man síj cu'naj Alejandro, ne canicun' so' rihaan nij yuvij, qui'yaj nij yuvij israelitá, ne guun rá ta'aj nij yuvij se vaa ca'mij Alejandro rihaan nij so' a. Gaa ne tucunó ra'a so' rihaan nij yuvij se vaa dínj gaa tu'va nij yuvij, gaa ne ca'vee ca'mij nacaj so' rihaan chuman' a.

<sup>34</sup> Tzaj ne xcaj nij yuvij cuentá se vaa sij israelitá me síj canicun' rihaan nij so', ne che'é dan yo'o caguáj cunudanj nij yuvij, cataj nij so':

—Guee uxrá Diana ta'anj ní' sij man Efeso ei —taj taran' nij yuvij, ne cunu' vij ya orá caguáj nij so' danj a.

<sup>35</sup> Ndaa síj, gaa ne ca'ne' rá nij yuvij caguáj nij so', qui'yaj síj uta' yanj tucua suun, ne cataj ma'an so' rihaan nij yuvij a:

—Cuno soj sij man chuman' Efeso ca'mij á. Ya ya cunudanj yuvij man rihaan chumij ne'en se vaa chuman' Efeso nihánj me chuman' na'vúj rihaan ya'anj guee cu'naj Diana ga yahij quinij rej xta' cuyaan vaa ga no' adonj.

<sup>36</sup> Che'é se ya vaa nu' nana nihánj ro', che'é dan no xcuún nij soj dínj cumanj soj, ne xcaj soj cuentá, ne se guun qui'yaj soj a doj se nij ma'.

<sup>37</sup> 'O se ca'na' roj snó'o nihánj, qui'yaj soj, ne nuveé sij qui'yaj se nij rque nuví me roj so', ne nuveé sij ca'mij nana nij che'é ya'anj na'vúj ní' rihaan me roj so' ma'.

<sup>38</sup> Dan me se xa' nij tuvij' síj cu'naj Demetrio, tzaj ne sese me rá nij tuvij' nij so' cutá' nij so' cacun' xráá 'o yuvij, ne vaa ya'núj rihaan nij so' ca'anj nij so' rihaan cuese, ne ca'vee cutá' nij so' cacun' xráá tuvi' nij so' nanj á.

<sup>39</sup> Ne sese me rá soj naqui'yaj cuu soj doj che'é yo'o rasuun, ne güii nuu chre' ní' ndaa vaa tucuaán noco' ní' ro', güii dan me ca'vee qui'yaj soj danj ei.

<sup>40</sup> 'O se nihánj me se ca'vee cutá' nii cacun' xráá ní' se vaa qui'yaj rma'an ní' sayuun cuan', ne se guun nucuaj ní' cataj xna'anj ní' me che'é me ca'na' ní' ne caguáj ndo'o ní' nihánj ma' —taj síj uta' yanj tucua suun rihaan nij yuvij,

<sup>41</sup> gaa ne na'née so' chrej man taran' nij so' a.

## 20

*Nana nihánj taj xna'anj se vaa ca'anj Pabló estadó cu'naj Macedonia ga Grecia a*

<sup>1</sup> Dan me se gaa cha'nuu nij yuvij yo', gaa ne canacúún Pabló man nij síj tucu'yón se nana Jesucristó se vaa cunuu chre' nij so' ga so', ne nago' so' chrej nucuaj man nij so' a. Gaa ne quita'aa so' ra'a cunudanj nij so', ne cataj so' se vaa ca'anj so', ne veé dan cavii so' ne ca'anj so' ndaa estadó Macedonia a.

<sup>2</sup> Dan me se cachén so' nu' estadó Macedonia yo', ne nago' ndo'o so' chrej nucuaj man nij síj noco' man Jesucristó ne chuman' yo', gaa ne ca'anj so' ndaa estadó cu'naj Grecia a.

<sup>3</sup> Dan me se quisíj va'núj yavii guun raan so' estadó Grecia yo', gaa ne guun rá so' cavij so' rque rihoo chée rihaan na ne ca'anj so' estadó cu'naj Siria, tzaj ne xcaj so' cuentá se vaa guun rá nij yuvij israelitá qui'yaj nij so' sayuun man so', ne che'é dan ca'née nimán so' asino yaan catehe' tajoj so' cachén so' sca'núj estadó Macedonia gaa ne canicaj so' ndaa estadó Siria a.

<sup>4</sup> Ne yo'o tuvi' nij síj cachée ga Pabló ro', me síj cu'naj Sópater, ne ta'núí síj cu'naj Piro me so', ne síj cavii chuman' Berea me so' a. Ne yavij tuvi' nij so' me síj cavii chuman' Tesalónica, ne Aristarco do', Segundo do', cu'naj roj so'

a. Ne yo'ó so' me sí cu'naj Gayo, ne sí cavii chuman' Derbe me so' a. Ne vaa sí cu'naj Timoteo, ne yavij tuvi' nij so' me sí cavii estadó Asia, ne Tíquico do', Trófimo do', cu'naj roj so' a.

<sup>5</sup> Dan me se guun yaan nij so' rihaan núj, ca'anj nij so' chuman' Troas, gaa ne na'vuj nij so' man núj rej yo' a.

<sup>6</sup> Gaa ne gaa cachén cha'anj chá nij yuvij israelitá chraa yo'óo trigó, ne cavii núj 'o rihoo chéé rihaan na, ne cavii núj chuman' Filipos, ca'anj núj, ne cachén 'un' güii, gaa ne cuchi' núj rihaan nij so' chuman' Troas yo' a. Gaa ne guun raan núj yo'ó hij güii chuman' yo' a.

*Nana nihánj taj xna'anj se vaa cunuu i'na' uún 'o sí cavi', qui'yaj Pabló a*

<sup>7</sup> Dan me se güii cotungó me se gaa cunuu chre' taran' núj cuxra' ta'aj núj rachruún, ne ca'mii natáj Pabló nana rihaan yo'óo nij tinúú ní' a. 'O se guun rá so' cavij so' rangá' yo'óo güii ca'anj so' níchrej, ne che'é dan yo'ó ca'mii so' ndaa guun ta'aj yan' a.

<sup>8</sup> Ne ve' nata' rej nuu chre' nij so' me se man ndo'o aga' ya'an chuguun rá ve' yo' a.

<sup>9</sup> Dan me se táá 'o sí tachruu cu'naj Eutico 'o ta'yaa le'ej, ne che'é se xcaan ndo'o ca'mii Pabló, gaa ne che'é dan ca'na' ndo'o nej rihaan Eutico, ne yuun che'e cotoj so', ne quini' so' ca'anj so' rej taj xe' a. Dan me se ndaa rej nata' va'núj raá ve' táá so' gaa quini' so' a. Gaa ne nanij yo'óo nij so' rihaan yo'óo, ne naxcaj nij so' man so', tzaj ne aj cavi' un' so' nanj á.

<sup>10</sup> Gaa ne nanij Pabló, ne ca'anj quina'j Pabló rihaan nee man sí cu'naj Eutico yo', ne na'yaan Pabló man so', ne cataj Pabló rihaan yo'óo nij so' a:

—Se cucu'vi' soj ma'. 'O se vaa i'na' so' ei —taj Pabló rihaan nij so' a.

<sup>11</sup> Gaa ne cavii uún Pabló ga yo'óo nij so' rá ve' nata' yo', ne cuxra' ta'aj so' rachruún chá nij so', ne dan me se gaa quisij chá nij so', gaa ne ca'mii natáj so' doj rihaan nij so' ndaa se quisij güii a. Gaa ne curiha'nj Pabló, ca'anj so' a.

<sup>12</sup> Dan me se cunuu i'na' uún xnii quini'j, ne ca'anj nicaj nii man so', ne guun xej ndo'o nimán taran' nij so' a.

*Nana nihánj taj xna'anj se vaa cavii nij tuvi' Pabló chuman' Troas, ne ca'anj nij so' ndaa chuman' Mileto a*

<sup>13</sup> Dan me se cavii núj rque rihoo chéé rihaan na, ne táá yaan núj rihaan Pabló, ca'anj núj chuman' cu'naj Asón a. 'O se guun rá Pabló cachee tacoj so' ca'anj so' chuman' Asón, ne che'é dan guun ya ca'mii Pabló ga núj se vaa narj' tuvi' núj ga so' chuman' Asón ne ca'anj taran' núj a.

<sup>14</sup> Dan me se gaa nari' tuvi' núj ga Pabló chuman' Asón, ne cavii so' rque rihoo ga núj, ne ca'anj taran' núj ndaa chuman' Mitilene a.

<sup>15</sup> Gaa ne cavii rihoo chuman' Mitilene, qui'yaj núj, ne yo'óo güii me se cachén núj nichrun' rej naj chuman' cu'naj Quío a. Ne yo'óo güii uún me se cuchi' núj ndaa rej cu'naj Samos, ne yo'óo güii uún me se ca'anj núj ndaa chuman' cu'naj Mileto a.

<sup>16</sup> 'O se guun ya rá Pabló se vaa se cachén so' chuman' Efeso, che'é se na'vej rá so' guun raan so' estadó Asia ma'. Tananj guun rá so' cuchi' ra'yanj so' chuman' Jerusalén che'é cha'anj Pentecostés canuú a.

*Nana nihánj taj xna'anj daj ca'mii Pabló ga nij sí hij nicaj yu'unj man x'ne' nij sí cuchumán rá ni'yaj man Jesucristó yanj chuman' Efeso a*

17 Dan me se gaa caran' Pabló chuman' Mileto, ne ca'née so' nana rihaan nij sí chij nicaj yu'unj man x'ne' nij yuvií cuchumán rá ni'yaj man Jesucristó yanj chuman' Efeso se vaa ca'na' nij so' rihaan so' a.

18 Dan me se gaa ca'na' nij so' rihaan Pabló, ne cataj Pabló rihaan nij so' a: —Aj ne'en nij soj daj vaa 'unj daj a güii canej ga soj asij naca ca'ná' 'unj estadó Asia nihánj ndaa cuano a.

19 'O vaa nica' nimán 'unj nuu 'unj rihaan Diose sji 'nij ra'a man ní', ne ne'en soj daj vaa ta'vee 'unj, ne daj vaa quirán' 'unj sayuun che'é se nuchruj raá nij sí israelitá qui'yaj nij so' sayuun manj a.

20 Dan me se ne a'ne' rá 'unj ga suun natá' 'unj rihaan soj nu' nana qui'yaj cavii sa' soj doj, ne tucu'yón 'unj nana yo' rihaan soj rej cuno que'ee yuvií ca'mij do', ndaa rá ve' tucúa ma'an soj do', tucu'yonj man soj a.

21 Ne 'o xraan inanj cataj xna'anj 'unj rihaan nij yuvií israelitá do', rihaan nij yuvií yanij a'mii xna'anj griego do', se vaa no xcúun nij so' canicaj nimán nij so' canoco' nij so' man Diose ne cuchuman rá nij so' ni'yaj nij so' man Jesucristó sji 'nij ra'a man ní' a.

22 "Ne nihánj me se guun ya raj se vaa no xcúnj ca'anj 'unj chuman' Jerusalén, qui'yaj Nimán Diose, tzaj ne ne ne'enj daj quiranj sese cuchij yo' ma'.

23 Tzaj ne ne'én 'unj se vaa me ma'an chuman' vaj 'unj, ne Nimán Diose 'o xraan inanj taj xna'anj rihaan 'unj se vaa vaa güii, ne caxrií nii taga' manj ne qui'yaj nii sayuun manj nanj adonj.

24 Tzaj ne a doj ne chu'ví' 'unj sese ndaa ticavi' nii mán 'unj rihaan chumií nihánj a ma'. Tzaj ne ve'é inanj me raj tísij suun ca'ne' Jesucristó sji 'nij ra'a man ní' rihanj, ne che'é dan 'o xraan inanj taj xna'anj 'unj nana sa' rihaan yuvií che'é se luj qui'yaj Diose che'é taran' ní' a.

25 Ne nihánj me se ne'én 'unj se vaa nij soj sji cuno nana ca'mii natáj 'unj che'é suun uun chij Diose nimán yuvií do', rihaan chumií nihánj vaa güii do', a 'o soj se quene'en uún manj daj chihaa mij a ma'.

26 Che'é dan me cuano yaj me se cataj ya 'unj rihaan soj se vaa nuvee 'unj me síi tumé cacun' sese ca'anj ni'ya 'o tuvi' soj rihaan Diose ma'.

27 'O se ne a'ne' rá 'unj ga suun taj xna'anj 'unj rihaan cunudanj soj nu' se vaa me rá Diose cunq soj ma'.

28 "Dan me se ase vaa tumé yuvií man daán yuvií matzinj ro', danj qui'yaj soj, tumé soj man ma'an soj do', man x'ne' nij sí amán rá ni'yaj man Jesucristó do' á. Dan me se Nimán Diose me síi cune' man soj nicaj yu'unj soj man x'ne' nij sí amán rá ni'yaj man Jesucristó a. Ne dan me se quiránj Jesucristó man cunudanj nij síi noco' x'ne' yo' che'é ton cavii man ma'an so' adonj.

29 Dan me se ne'enj se vaa asa' ca'anj 'unj, ne catuu síi chi'ii sca'núj soj, ne ase vaa xca'yanj ca'nu' yuvaá ro', danj gaa nij síi chi'ii yo', ne se caráj x'naa nij so' man nij tinúu ní' nij síi noco' man Jesucristó, ne qui'yaj ndo'o nij síi chi'ii yo' sayuun man nij so' a.

30 Ne ndaa tuvi' ma'an ya soj me síi guun che'e tuguáj nij so' nana ya, che'é se guun rá nij so' canoco' nij síi tucu'yón se nana Jesucristó man ma'an nij so' a.

31 Che'é dan yo'o ni'yaj soj, ne xcaj soj cuentá á. 'O inanj nanuj rá soj se vaa rque va'nuj ya yo' me se ne ca'ne' raj ga suun narqué chrej nucuaj man 'o 'o nij soj nuvíi nigan' ma'. Ne ndaa ta'vee 'unj che'é soj adonj.

<sup>32</sup> "Ñe cuano nihánj me se nucuaj rá 'un̄j man ma'an̄ Diose se vaa tumé Diose man soj, ñe nucuaj rá 'un̄j man se nanā Diose se vaa cun̄o soj nanā yo' ñe ca'vee qui'yaj ndo'o Diose se luj che'é soj a. Dan me se sa' doj canoco' soj man Diose, qui'yaj se nanā Diose yo', ñe guun tuvi' soj ga cunudanj yo'ó nij síi cunuu sa' rihaan Diose, ñe ca'vee quirí' soj xna'an̄j ni'yaj cata' tu'va Diose gaa rque adon̄j.

<sup>33</sup> "Dan me se ñe sij uun ñe rá guun si'yaj si'yaj yo'ó yuvii, se aga' plata catziji do', se aga' oró mii do', se yatzij sa' do', mé 'un̄j ma'.

<sup>34</sup> Ñe aj ne'en ma'an̄j nij soj se vaa ma'an̄j ra'aj nihánj qui'yaj suun che'é rej ca'vee quirí' 'un̄j nij rasuun achiin manj do', achiin man nij síi chéé gaj do' a.

<sup>35</sup> Cunudanj qui'yaj suun 'un̄j, che'é se guun raj xcaj soj cuentá se vaa ño xcuún soj qui'yaj suun ma'an̄j soj, che'é rej ca'vee racuíj soj man tinúu ni' síi achiin rasuun man a. Ñe yo'ó cunuú rá soj nanā nihánj nanā ca'mii ma'an̄ Jesucristó sij 'nij ra'a man ní' a: "Síi rque rasuun rihaan tuvi' ro', uun niha' rá so' doj rihaan síi ri' rasuun yo' ra'a tuvi' a", taj síi 'nij ra'a man ní' a —taj Pabló rihaan nij síi chij nicaj yu'un̄j man x'ne' nij síi cuchumán rá ni'yaj man Jesucristó yan̄j chuman' Efeso a.

<sup>36</sup> Dan me se gaa quisij ca'mii Pabló nu' nanā yo', gaa ñe canicun' ruj so' ga nij so', ñe cachíin ni'yaj Pabló rihaan Diose ga taran' nij so' a.

<sup>37</sup> Gaa ñe ta'vee uxra cunudanj nij so', ñe na'yaan̄j nij so' man Pabló, ñe cachrón tu'va nij so' xruu Pabló a.

<sup>38</sup> 'Q se quinanó doj rá nij so' che'é se nanā Pabló nanā se vaa daj chihaa nij se quene'en uún nij so' man Pabló ma'. Gaa ñe ca'an̄j tanáj nij so' man Pabló ndaa rej cavii so' rque rihoo chéé rihaan na a.

## 21

*Nanā nihánj taj xna'an̄j daj guun gaa ca'an̄j Pabló ndaa chuman' Jerusalén a*

<sup>1</sup> Dan me se gaa tanáj xco núj man nij síi man chuman' Efeso, ñe ca'an̄j núj vaj núj rque rihoo, ñe yo'ó chrej ca'an̄j núj, cuchi' núj rej cu'naj Cos, ñe yo'ó güii me se cuchi' núj ndaa rej cu'naj Rodas, ñe ca'an̄j uún núj, cuchi' núj ndaa chuman' cu'naj Pátara a.

<sup>2</sup> Gaa ñe nari' núj yo'ó rihoo ca'an̄j ndaa rej cu'naj Fenicia a. Gaa ñe cavii núj rque rihoo, ñe ca'an̄j núj a.

<sup>3</sup> Gaa ñe quene'en núj yo'óó taj rihaan na ya'an̄j cu'naj Chipre, ñe tanáj xco núj Chipre rej nichruun núj, ñe cachén núj ca'an̄j núj ndaa estadó Siria a. Dan me se cuchi' núj chuman' Tiro, ñe 'o se yo' me rej guun rá nij síi tumé rihoo tucuyuu nij so' cargá man rque rihoo rihaan yo'óó yo' a.

<sup>4</sup> Dan me se nano' núj man nij síi tucu'yón se nanā Jesucristó yan̄j chuman' Tiro yo', ñe nari' núj man nij so', ñe chij güii caran' núj chuman' yo' a. Dan me se gaa nari' tuvi' núj, ñe dan me se nata' nij so' nanā rque Nimán Diose rihaan nij so' rihaan Pabló se vaa se guun ca'an̄j Pabló chuman' Jerusalén a.

<sup>5</sup> Dan me se gaa quisij chij güii yo', ñe curihan̄j núj ca'an̄j núj rej taj rihoo rihaan na, ñe cachéé cunudanj nij tucuā nij síi tucu'yón se nanā Jesucristó ga nij ndaa se cuchi' núj tu'va chuman' a. Gaa ñe canicun' ruj núj rihaan yo'óó chruu naj tu'va na ya'an̄j rej yo', ñe cachíin ni'yaj núj rihaan Diose,

<sup>6</sup> ñe cataj núj rihaan tuvi' núj se vaa ca'an̄j núj, ñe dan me se cavii núj rque rihoo, ñe canicaj nij so' quinan' nij so' tucuā nij so' a.



7 Dan me se tanáj núj chuman' Tiro yo', ne ca'anj uún núj rque rihoo, ne cuchi' núj ndaa chuman' cu'naj Tolemaida, ne nanó núj cuentó ga nij tinúú ní' síi yanj chuman' yo', ne quináj núj orún' güii ga nij so' a.

8 Ne yo'ó güii me se cavii uún núj rque rihoo ga Pabló, ca'anj núj, ne cuchi' núj chuman' Cesarea, gaa ne catúj núj ndaa chuman' Cesarea, ne ca'anj núj ve' tucuá síi cu'naj Felipé síi nata' se nana Diose nana sa' rihaan yuvi a. Ne so' ro', me 'o tuvi' chij nij síi rque se chá rihaan nij chana cavi' nicá yanj chuman' Jerusalén gaa rque doj a. Ne caran' núj tucuá so' a.

9 Ne vaa ca'anj ta'núí so' chana yaan, ne ca'anj nij no' me níi nata' nana rque Diose rihaan a.

10 Dan me se gaa guun raan núj que'ee güii tucuá síi cu'naj Felipé, ne nani' 'o síi cavii estadó Judea, ne síi nata' nana rque Diose rihaan me so', ne Agabo cu'naj so' a.

11 Dan me se ca'na' so' rihaan núj, ne nicaj so' marque 'nij catuun Pabló, numij so' tacóo Pabló do', ra'a Pabló do' a. Gaa ne cataj so':

—Síi si'yaj yatzij nihánj me se ase vaa qui'yáa 'unj cuano nihánj ro', danj gaa qui'yaj nij síi israelitá man chuman' Jerusalén, numij nij so' man so', ne tacuachén nij so' man so' ra'a nij síi yanj adonj —taj síi cu'naj Agabo yo' a.

12 Dan me se gaa cuno núj nana yo', ne rquee uxrá núj ga nij síi yanj chuman' Cesarea yo' rihaan Pabló se vaa se cavii so' ca'anj so' ndaa chuman' Jerusalén ma'.

13 Gaa ne cataj Pabló:

—Taj che'é ta'vee soj ne quinano rá 'unj qui'yaj soj ma'. 'O se 'unj nihánj me se a'vej raj numij nii manj ne ndaa ticavi' nii manj rej Jerusalén che'é se síi nata' che'é Jesucristó sij 'nij ra'a man ní' mej chuguanj —taj Pabló rihaan nij so' a.

14 Ne taj se qui'yá' cuno so' se nana núj a ma'. Che'é dan ca'ne' rá núj, ne cataj núj:

—Qui'yaj Diose sij 'nij ra'a man ní' ndaa vaa me rá ma'an so' qui'yaj so' a —taj núj a.

15 Dan me se quisij caran' núj chuman' Cesarea yo', gaa ne qui'yaj chuvij núj, ne cavii núj ca'anj núj ndaa chuman' Jerusalén a.

16 Ne chée ta'aj nij síi tucu'yón se nana Jesucristó yanj chuman' Cesarea ga núj, ne táa yaan nij so' rihaan núj ca'anj núj ve' tucuá 'o síi cu'naj Mnasón, caran' núj a. Ne síi cu'naj Mnasón me se sij cavii yo'óo taj rihaan na ya'anj cu'naj Chipre me so', ne aj quisij que'ee yo' tucu'yón so' se nana Jesucristó a.

*Nana nihánj taj xna'anj se vaa cuchi' Pabló chuman' Jesusalén a.*

17 Dan me se gaa cuchi' núj chuman' Jerusalén, ne guun niha' ndo'o rá nij tinúú ní' síi man Jerusalén nana nij so' cuentó ga núj a.

18 Ne yo'ó güii me se ca'anj ni'yaj núj ga Pabló man síi cu'naj Santiagó ne catúj núj rque 'o ve' ne so', ne nari' chre' núj man nu' nij síi chij nicaj yu'unj man nij yuvi' cuchuman' rá ni'yaj man Jesucristó ga Santiagó a.

19 Dan me se ve'é ca'mii sa' taran' núj, gaa ne cataj xna'anj Pabló rihaan nij síi chij nuu chre' ga Santiagó ndaa 'o 'o se vaa qui'yaj Diose ga nij síi yanj gaa nata' Pabló se nana Diose rihaan nij síi yanj yo' a.

20 Ne gaa cuno nij síi chij se nana Pabló, ne cataj nij so' se vaa sa' uxrá qui'yaj Diose ga nij síi yanj a. Gaa ne cataj nij tuvi' Santiagó rihaan Pabló a:

—Aj ne'en so' se vaa que'ee mĭj tuvi' nĭ' sĭj israelitá amán rá ni'yaj man Jesucristó, tinuj. Ne nij so' ro', me síi yanj uxrá qui'yaj nu' ndaa vaa taj se tucuanj Moisés a.

21 Ne cuchi' nana ne rihaan nij so' se vaa tucu'yón so' man cunudanj nij yuviĭ israelitá yanj chiháan nij síi yanĭj se vaa tanáj xco nij so' se nana Moisés, ne cataj so' se vaa ca'ne' rá nij so' ga suun uta' ta'nga' man ta'núí do', ga suun noco' se tucuanj Moisés do' a.

22 Me se no xcuún nĭ' qui'yaj nĭ', rá so' ga. 'O se ya cunu chre' yuviĭ gaa xcay cunudanj nij so' cuentá se vaa ca'ná' so' nihánj adonj.

23 "Che'é dan me rá nuj qui'yáá so' ndaa vaa cataj nuj rihaan so' á. Dan me se vaa ca'anj tinúú nĭ', ne aj cata' tu'va ma'an nij so' rihaan Diose che'é 'o rasuun qui'yaj nij so' rihaan Diose a.

24 Ne me rá nuj nĭcay tuví' so' ga nij so', ne cunu guee so' rihaan Diose ga nij so', gaa ne naru'vee so' che'é xcuu nago' nij so' rihaan Diose, gaa ne ca'vee cacá caan nii raá nij so' ne quisĭj nu' se vaa cata' tu'va nij so' rihaan Diose á. Gaa ne xcay nij tinúú nĭ' cuentá se vaa xa' nana cuno nij so' che'é so', tzaj ne ne ya vaa nana yo' ma'. Ne ma'an so' me síi noco' raan man se tucuanj Moisés a.

25 "Ne xa' nij síi yanĭj amán rá ni'yaj man Jesucristó, tzaj ne aj ca'neé nuj yanj cartá rihaan nij so', ne cataj xna'anj nuj rihaan nij so' se vaa taj che'é canoco' ma'an nij so' se tucuanj Moisés ma'. Maan se xcay nij so' cuentá, ne se chá nij so' rasuun rque yuviĭ rihaan ya'anj cacóĭ yuviĭ ma'. Ne se chá nij so' ton ma'. Ne se chá nij so' nee xcuu tuguáj nii gaán chihá ma'. Ne snó'o do', chana do', se cotoj nij so' ga yo'ó yuviĭ sese ne nĭcá nij so' me yo' ma'. Danj taj yanj ca'neé nuj rihaan nij so' adonj —taj nij síi chĭj yo' rihaan Pabló a.

26 Gaa ne nĭcay tuví' Pabló ga ca'anj nij snó'o yo', ne yo'ó güii me se cunu guee so' ga nij so' rihaan Diose, ne catúĭ so' rá nuvíi nocoo, ne nata' so' rihaan xreĭ me güii quisĭj cunu guee nij so' rihaan Diose ne ca'na' nĭcay nij so' nij rasuun guee nago' 'o 'o nij so' rihaan Diose a.

*Nana nihánj taj xna'anj daj guun gaa quita'aa nii man Pabló rá nuvíi nocoo a*

27 Dan me se gaa nichrun' quisĭj chĭj nij güii nuu guee 'un' nij so' rihaan Diose, ne nij síi israelitá cavii estadó Asia ro', quene'en nij so' man Pabló rá nuvíi nocoo, ne naxumaan cunudanj nij yuviĭ man rej yo', qui'yaj nij so', ne quita'aa nij so' man Pabló a.

28 Ne caguáj nij síi cavii estadó Asia, cataj nij so':

—Cuno soj sĭj israelitá ca'mĭi nuj, ne racuĭj soj man nuj á. 'O se síi nihánj ro', me síi tucu'yón man nij yuviĭ yanj cunudanj chuman' se vaa nij vaa nĭ' sĭj israelitá do', se vaa nij vaa tucuaán noco' nĭ' do', se vaa nij vaa nuvíi nocoo nihánj do', taj so' a. Ne ndaa yuviĭ yanĭj catúĭ nuvíi nocoo nihánj, ne quiri' rej guee nihánj, qui'yaj so' nanj á —taj nij so', ni'yaj nij so' man Pabló a.

29 'O se aj quene'en nij so' man síi cu'naj Trófimo síi yanĭj cavii chuman' Efeso se vaa vaj so' ga Pabló rque chuman' Jerusalén, ne guun rá nij so' se vaa catúĭ síi cu'naj Trófimo yo' rá nuvíi nocoo, qui'yaj Pabló a.

30 Dan me se naxumaan cunudanj nij yuviĭ man chuman' Jerusalén yo', ne cunanj nij so' ndaa nuvíi nocoo, gaa ne quita'aa nij yuviĭ man Pabló, ne nucuaj riĭ nij so' man so' xe', ne nu' naráan nii niĭ ta'yaa rihaan nuvíi nocoo yo' a.

<sup>31</sup> Dan me se guun rá nij yuviꞑ ticavꞑ! nij yuviꞑ man Pabló, ne cuchi' naná rihaan síi 'nij ra'a man cunudanj nij tanuu romanó man chuman' Jerusalén se vaa ca'maan ndo'o rá nij síi man chuman' Jerusalén ne naxumaꞑan ndo'o sayuun a.

<sup>32</sup> Ne nicaj so' tanuu nicaj so' síi 'nij ra'a 'o cientó tanuu, ne cunánj so' ndaa rej man nij yuviꞑ yo' a. Ne gaa quene'en nij yuviꞑ se vaa ca'na' síi uun chij rihaan cunudanj nij tanuu do', se vaa ca'na' nij tanuu do', gaa ne ca'ne' rá nij so' ga suun o' man Pabló a.

<sup>33</sup> Gaa ne cuchi' síi 'nij ra'a man nij tanuu yo' rihaan Pabló, ne quita'aa so' man Pabló, ne ca'ne' so' suun se vaa numíj nij tanuu vij aga' ne' man Pabló, ne xná'anj so' man nij yuviꞑ me síi me Pabló ne daj qui'yaj so' a.

<sup>34</sup> Ne ino vaa naná caguáj 'o 'o nij yuviꞑ a. Dan me se ne ca'vee xcaj so' cuentá daj me che'é me ca'maan rá nij yuviꞑ ma'. 'Q se caguáj ndo'o nij yuviꞑ, ne ne ca'vee cunó so' se naná nij yuviꞑ ma'. Che'é dan ca'ne' so' suun rihaan nij tanuu se vaa ca'anj nicaj nij tanuu man Pabló rá cuarteé man nij tanuu a.

<sup>35</sup> Ne gaa cuchi' nij tanuu cuarteé, gaa ne che'é se man ndo'o nij yuviꞑ a'maan rá ni'yaj man Pabló, gaa ne ndaa atá xta' ma'an nij tanuu man Pabló, che'é se guun ndo'o rá nij yuviꞑ quiríj nij so' man Pabló go' nij so' man so' a.

<sup>36</sup> 'Q se canoco' raan nij yuviꞑ man nij tanuu, ne caguáj nij yuviꞑ, cataj nij yuviꞑ:

—Ticavꞑ! soj man so' cuaj ei —taj nij yuviꞑ, caguáj nij yuviꞑ, ni'yaj nij yuviꞑ man Pabló a.

*Naná nihánj taj xna'anj se vaa guun che'e Pabló nacaj so' man so' rihaan nij síi israelitá a*

<sup>37</sup> Dan me se daj doj catuu Pabló cuarteé man nij tanuu, qui'yaj nij tanuu, gaa ne cataj Pabló rihaan síi 'nij ra'a man cunudanj nij tanuu a:

—Ne ca'vee ca'mij 'o naná rihaan so' na' —taj so', xná'anj so' man síi 'nij ra'a man nij tanuu a.

Ne so' cataj:

—Ne'én so' ca'mij so' xna'ánj griego na'.

<sup>38</sup> Ne nuveé so' me síi cavii rej cu'naj Egipto síi me rá cunú' ga gobiernó ne ca'anj nicaj ca'anj míj nij síi me rá ticavꞑ! man yuviꞑ ndaa rej tacaan asij rquee doj na' —taj síi 'nij ra'a man nij tanuu, xná'anj so' man Pabló a.

<sup>39</sup> Gaa ne cataj Pabló rihaan so' a:

—'Unj ro', me 'o síi israelitá cavii chuman' Tarso chuman' naj estadó Cilicia, ne chuman' vaa suun ndo'o me chihánj á. Rqueé 'unj rihaan so', ne ca'vej rá so' ca'mij doj ga nij yuviꞑ á —taj Pabló rihaan síi 'nij ra'a man nij tanuu a.

<sup>40</sup> Dan me se ca'vej rá so', ne che'é dan canicun' Pabló rej xta' rej atúj nii cuarteé, ne tucunó ra'a so', che'é rej cunuu dínj tu'va nij yuviꞑ a.

Dan me se cunuu dínj tu'va nij yuviꞑ, gaa ne guun che'e Pabló ca'mii so' xna'ánj hebreo rihaan nij yuviꞑ, ne cataj so':

## 22

<sup>1</sup> —Cunó soj ca'mij, tinuj, ta'nuj. Ne nanó xrej soj se vaa ca'mii nacaj 'unj manj —taj Pabló rihaan nij síi israelitá a.

<sup>2</sup> Dan me se xcaj nij yuviꞑ israelitá cuentá se vaa ca'mii Pabló xna'ánj hebreo, ne che'é dan ndaa dínj ma'an mán nij so' a. Gaa ne cataj uún Pabló a:

3 —Dan me se ya sí israelitá mé 'un̄j, ne ca'ngaa 'un̄j chuman' Tarso chuman' naj estadó Cilicia a. Tzaj ne cachij 'un̄j chuman' Jerusalén nihánj, ne nari' 'un̄j noco' 'un̄j nu' se tucuanj xii ní', qui'yaj maestró Gamaliel a. Ne cuano nihánj me se sij yanj qui'yaj nu' ndaa vaa me rá Diose mé 'un̄j ase vaa 'yaj ma'an soj güii cuan' adonj.

4 Ne qui'yaj ndo'oj sayuun man nij yuvij noco' se tucuanj Jesucristó yo', ne guun ndo'o raj cavi' nij so' a. Dan me se snó'o do', chana do', numíj, ne canú' 'un̄j man nij so' taga',

5 ne xrej ata suun nocgo doj do', nij sí uun chij rihaan ní' do', me sí cataj se vaa ya vaa nana nihánj nana natá' 'un̄j rihaan soj adonj. 'O se ma'an nij so' rque yanj cartá rihaan 'un̄j nayaa tuvi' ní' sí man chuman' Damasco, gaa ne ca'an̄j 'un̄j chuman' Damasco, ne guun rá 'un̄j cunumíj 'un̄j man nij yuvij noco' man Jesucristó yanj chuman' Damasco, che'é rej ca'n̄a' nij so' chuman' Jerusalén nihánj ne quiran' nij so' sayuun, qui'yaj adonj.

6 "Dan me se vaj 'un̄j chrej, ne caxuj me ta' asuun, ne nichrún' 'un̄j chuman' Damasco, gaa ne taj ni'yón cuchuguun nu' xta' nu' anicaj rej nicun' 'un̄j a.

7 Gaa ne quini' 'un̄j rihaan yo'óo, ne cunó 'un̄j se vaa ca'mii 'o so' rihanj, ne cataj so': "Saulo, Saulo, me che'é 'yáa so' sayuun manj, ga", taj sí ca'mii rihanj, xná'an̄j so' manj a.

8 Gaa ne: "Me sí mé so', Señor", cataj 'un̄j rihaan so', xná'an̄j 'un̄j man so' a. Gaa ne cataj so': "'Un̄j ro', me Jesús sí cavi' chuman' Nazaret, ne sí 'yaj ndo'o so' sayuun man mej adonj", taj so' rihanj a.

9 Gaa ne dan me se nij sí vaj ga 'un̄j ro', ya quene'en nij so' ya'an chuguun rej nicun' 'un̄j, tzaj ne ne cunó nij so' nana ca'mii Jesús rihanj a ma'.

10 Gaa ne cataj 'un̄j rihaan so' a: "Daj qui'yáa 'un̄j, rá so' ga", taj 'un̄j, xná'an̄j 'un̄j man so' a. Gaa ne sí 'nij ra'a man ní' ro', cataj: "Naxumaan so', ne ca'an̄j so' chuman' Damasco, gaa ne asa' cuchí' so' yo', ne cataj xná'an̄j ni' rihaan so' che'é nu' se vaa no xcuún so' qui'yáa so' á", taj sí 'nij ra'a man ní' rihanj a.

11 Dan me se che'é se nucuaj ndo'o chuguun ya'an yo' ro', che'é dan ne ca'vee curuvij' rlij rihanj, ne che'é dan nij sí chéé gaj ro', quita'aa nij so' ra'aj, racuj nij so' manj, ne ca'an̄j 'un̄j catúj 'un̄j chuman' Damasco a.

12 "Dan me se chuman' Damasco ro', yáan 'o sí cu'naj Ananías, ne sí ve'é noco' man Diose me so', ne sí qui'yaj nu' se tucuanj Moisés me so', ne cunudan̄j nij yuvij israelitá yanj chuman' Damasco taj se vaa sij sa' me so' a.

13 Dan me se ca'na' so' rihanj ne canicun' so' x'núj, ne cataj so': "Nachuguun rihaan so', gaa ne ni'yaj so', tinuj Saulo", taj so' rihanj a. Ne maan ora dan nachuguun rihanj, ne quene'enj man so' a.

14 Gaa ne cataj sí cu'naj Ananías: "Diose sí noco' xii ní' gaa naá ro', narii so' mán so' che'é rej xcaj so' cuentá daj me rá so' qui'yaj so' che'é yuvij, ne guun rá so' quene'én so' man Jesucristó sí sa' inanj ne cunó so' nana ca'mii so' rihaan so' á.

15 Gaa ne guún so' sí ne'en che'é so', ne dan me se ca'an̄j so', ne nata' so' rihaan nu' nij yuvij che'é se vaa quene'én so' do', che'é nij nana cunó so' do' a.

16 Ne nihánj me se se guun raan so' doj a ma'. Maan se naxumaan so', ne cata' ne so', ne cachinj ni'yáa so' rihaan Jesucristó che'é rej tinaruvii Diose nu' cacun' xráa so' á", taj sí cu'naj Ananías yo' rihanj a.

17 "Dan me se nanicaj 'ujj ca'ná' 'ujj chuman' Jerusalén nihánj, ne gaa cachín nì'yáá 'ujj rihaan Diose, ne naqui'yaa 'o rasuun rihaan 'ujj,

18 ne dan me se quene'én 'ujj man Jesucristó, ne cataj so' rihanj a: "Yoó so' cuaj, curihañj so' rque chuman' Jerusalén nihánj á. 'O se se cuno nij sí man chuman' Jerusalén nana nata' so' rihaan nij so' che'é 'ujj ma'", taj so' rihanj a.

19 Gaa ne cataj 'ujj rihaan so' a: "Tzaj ne aj ne'en nij so' se vaa 'ujj me sí catúj daj a nij ve' tucu'yón nij so' se tucuañj Moisés, ne quita'aa 'ujj nij sí cuchumán rá ni'yaj mán so', ne canú' 'ujj man nij so' taga' ne gó' 'ujj cuartá xráá nij so', Señor.

20 Ne aj ne'en nij so' se vaa gaa cavi' sí cu'naj Esteban sí nata' rihaan yuviñ che'é so', ne 'ujj me sí 'o vaa rá ga nij sí ticavi' man so', ne dan me se cutumej sagan' nij so' gaa go' nij so' yahij man Esteban adonj. Che'é dan cuno nij so' se nanaj nanj á", taj 'ujj rihaan Jesucristó a.

21 Gaa ne cataj so': "Ca'anj so' á. 'O se 'ujj ca'nej mán so' ca'anj so' gan' rihaan nij sí yaníj a", taj so' rihanj a —taj Pabló rihaan nij sí israelitá yo' se xna'anj nij so' a.

22 Dan me se ndaa dan ca'mii Pabló nana yo', ne nanó xrej nij sí israelitá se nana so' a. Tzaj ne gaa canicaj so' ca'mii so' che'é nij sí yaníj, gaa ne canicaj uún nij so', nucuaj caguáj nij so', cataj nij so':

—Caví' sí nihánj á. Ne nó xcúun sí nihánj gaa i'na' so' rihaan chumiñ nihánj a ma' —taj nij so', caguáj nij so' a.

23 Dan me se caguáj ndo'o nij so', ne quirii nij so' roto nij so', ne taman' ndo'o nij so' yo'óo tachruu xtá' che'é se ca'maan ndo'o rá nij so' a.

24 Gaa ne ca'ne' sí uun chij suun rihaan nij tanuu se vaa ca'anj nicaj nij so' man Pabló rá cuarteé ne nij so', gaa ne go' nij so' cuartá xráá Pabló, che'é rej cataj xna'anj so' me che'é caguáj nij yuviñ danj ni'yaj nij so' man Pabló a.

25 Dan me se nicaj nij tanuu nuj xcaan, numíj nij tanuu man Pabló, ne gaa qui'yaj nij so' danj, gaa ne ca'mii Pabló rihaan 'o sí nicun' rej nicun' so', ne tanuu uun chij rihaan 'o cientó tanuu me so', ne dan me se cataj Pabló rihaan so' a:

—Nó xcúun soj go' soj cuartá xráá 'o sí guun chihanj Romá gaa ataa ca'ne' nii cacun' che'é so' axe —taj so' rihaan tanuu yo' a. '

26 Gaa cuno tanuu yo' nana ca'mii Pabló rihaan so', ne ca'anj so' cataj xna'anj so' rihaan sí uun chij rihaan cunudanj nij tanuu, ne cataj so':

—Ya me rá so' go' ní' cuartá xráá so' na'. 'O se sij romanó me snó'o nihánj ei —taj so' rihaan tuvi' tanuu so' tanuu uun chij rihaan cunudanj nij tanuu a.

27 Gaa ne cuchì' tanuu uun chij yo' rihaan Pabló, ne xna'anj so' man Pabló, cataj so':

—Cataj so' 'o nana rihanj á. Ya ya sij romanó mé so' na' —taj so', xna'anj so' man Pabló a.

—Vej adonj —taj Pabló rihaan so' a.

28 Gaa ne cataj tanuu uun chij yo' rihaan Pabló a:

—'Uñj nihánj, tzaj ne nocoo ndo'o sa'anj gó' 'ujj che'é rej ca'vee guún 'ujj 'o sí romanó nanj á —taj so' rihaan Pabló a.

Gaa ne cataj Pabló:

—Tzaj ne 'ujj ro', me sí romanó asij ca'ngaa 'ujj adonj —taj so' rihaan tanuu uun chij yo' a.

<sup>29</sup> Nu' ca'mii so' danj, ne nu' ca'anj yanij nij tanuu guun rá go' cuartá xráa Pabló a. Ne ma'an tanuu uun chij rihaan nij so' cuchu'vi', che'é se xcaj so' cuentá se vaa sij romanó me Pabló ne aj numij so' man Pabló a.

*Nana nihánj taj xna'anj daj ca'mii Pabló gaa canicun' so' rihaan junta qui'yaj nij sí uun chij rihaan nij yuvij israelitá a*

<sup>30</sup> Ne ranga' yo'ó güii me se tanuu uun chij rihaan cunudanj nij tanuu ro', guun ya rá so' xcaj so' cuentá me che'é guun rá nij sí israelitá cuta' nij so' cacun' xráa Pabló a. Che'é dan ca'ne' so' suun se vaa nache nij tanuu man Pabló, ne ca'ne' so' suun se vaa cunu chre' nij xrej atá suun nocgo doj do', nu' nij sí uun chij rihaan nij yuvij israelitá do', qui'yaj nij so' junta a. Gaa ne catúj Pabló rej man nij so', qui'yaj so', ne canicun' Pabló tanuu rihaan nij so' a.

## 23

<sup>1</sup> Dan me se ni'yaj uxrá Pabló man taran' nij sí uun chij yo', ne cataj so':

—Cunq nij soj ca'mij, tinuj. Nu' cavii nu' ca'na' ro', inanj sa' uxrá 'yáá 'unj rihaan Diose, raj a. Taj cacun' tumej ma' —taj Pabló rihaan nij so' a.

<sup>2</sup> Gaa ne xrej atá suun nocgo doj sí cu'naj Ananías ro', ca'ne' so' suun rihaan nij sí nicun' rej x'núu Pabló se vaa coxrq nij so' tu'va Pabló, gaa ne danj qui'yaj nij so' a.

<sup>3</sup> Gaa ne cataj Pabló rihaan sí cu'naj Ananías yo' a:

—Vaa güii coxrq Diose tu'vá so' á. 'O se sí nucui' rá mé so' á. 'O se táa so' naqui'yaj cuú so' che'ej sese qui'yáá 'unj cacun' rihaan se tucuanj Moisés, rá so' a. Tzaj ne nihánj me se tananj ca'ne' so' suun se vaa coxrq nii tu'vaj, ne se tucuanj Moisés taj se vaa ne nó xcúun so' a 'ó xco' qui'yáá so' danj ma' —taj Pabló rihaan sí cu'naj Ananías a.

<sup>4</sup> Gaa ne nij sí nicun' rej x'núu Pabló ro', cataj nij so' rihaan Pabló a:

—Ne nó xcúun so' caxrij yuvaa so' man sí cune' Diose guun xrej atá suun nocgo doj ma' —taj nij so' rihaan Pabló a.

<sup>5</sup> Gaa ne cataj Pabló:

—Ne quene'én 'unj se vaa xrej atá suun nocgo doj me sí tu'va danj, man tinuj. 'O se danj Diose taj se vaa se ca'mii chi'ij ní ni'yaj ní sí uun chij rihaan nij tuvi' ní a ma' —taj Pabló rihaan nij so' a.

<sup>6</sup> Dan me se xcaj Pabló cuentá se vaa ta'aj nij sí uun chij yo' me sí saduceo ne yo'ó ta'aj nij so' me sí fariseo, ne che'é dan caguáj so', cataj so' rihaan cunudanj nij so' a:

—Sí fariseo mej, ne ta'núí sí fariseo mej, tinuj. Ne nihánj me se cuta' nii cacun' xráj che'é se 'unj me sí amán rá se vaa cunu i'na' uún nij sí cavi' vaa güii, tinuj —taj Pabló rihaan cunudanj nij so' a.

<sup>7</sup> Dan me se gaa ca'mii Pabló danj, ne ca'maan rá nij sí fariseo do', nij sí saduceo do', ni'yaj nij so' tuvi' nij so', ne xra' ta'aj nij so' a.

<sup>8</sup> 'O se nij sí saduceo ro', taj se vaa se ca'vee cunu i'na' uún nij sí cavi' ma'. Ne se mozó Diose do', nimán yuvij do', taj vaj ma', taj nij sí saduceo yo' a. Tzaj ne nij sí fariseo ro', taj se vaa ya ya cunu i'na' uún nij sí cavi' vaa güii, ne vaa se mozó Diose, ne vaa nimán yuvij, taj nij so' a.

<sup>9</sup> Dan me se caguáj ndo'o cunudanj nij sí uun chij yo', ne canicun' ta'aj nij sí fariseo atá suun naqui'yaj cuu se tucuanj Moisés rihaan yuvij, ne ca'mii canó tuvi' nij so' gá nij sí saduceo, cataj nij so':

—Nuvi' cacun' tumé síi nihánj, rá núj ma'. 'O se ca'vee se aj ca'mii 'o nimán rihaan so' ca'vee se aj ca'mii 'o se mozó Diose rihaan so' ca'vee nanj á —taj nij so', ca'mii nacaj nij so' man Pabló a.

<sup>10</sup> Gaa ne ca'maan uxrá rá cunudanj nij so', ne che'é dan cuchu'vi' tanuu uun chij doj se vaa cutun' nij so' man Pabló, ne che'é dan ca'ne' so' suun rihaan nij tanuu se vaa ca'anj nij tanuu quita'aa nij tanuu man Pabló ne quirij nij tanuu man Pabló sca'núj nij síi uun chij rihaan nij yuvi' israelitá yo' ne ca'anj nicaj nij tanuu man Pabló rá cuarteé man nij tanuu a.

<sup>11</sup> Ti'nuu yo'ó güii me se curuvi' ma'an Jesucristó sji 'nij ra'a man ní' rihaan Pabló, ne cataj so' rihaan Pabló a:

—Gaa nucuaj nimán so' á. 'O se ase vaa 'o xraan taj xna'anj so' rihaan nij síi man chuman' Jerusalén nihánj che'é 'unj ro', danj gaa cataj xna'anj so' rihaan nij síi man chuman' Romá uún che'é 'unj adonj —taj síi 'nij ra'a man ní' rihaan Pabló a.

*Nana nihánj taj xna'anj se vaa guun rá nij síi israelitá ticavi' nij so' man Pabló a*

<sup>12</sup> Dan me se yo'ó güii cunuu chre' nij síi israelitá che'é rej qui'yaj nij so' sayuun man Pabló, ne cataj nij so' rihaan Diose a:

—Sese chá núj do', sese co'q núj na do', gaa ataa cavi' Pabló qui'yaj núj, ne ca'vee qui'yáa so' sayuun man núj á —taj nij so' rihaan Diose a.

<sup>13</sup> Ne vij chihaa táa doj nij so' me nij síi guun 'o rá qui'yaj danj man Pabló a.

<sup>14</sup> Gaa ne nij síi me rá ticavi' man Pabló ro', cuchi' nij so' rihaan nij xrej atá suun nocqo doj do', rihaan nij síi uun chij do', ne cataj nij so' a:

—Aj cata' tu'va núj rihaan Diose se vaa ca'vej rá núj qui'yaj Diose sayuun man núj sese chá núj me ma'an rasuun gaa ataa cavi' Pabló qui'yaj núj a.

<sup>15</sup> Che'é dan soj ga yo'ó nij síi uun chij ro', cataj xna'anj soj rihaan tanuu uun chij doj se vaa me rá soj ca'na' uún Pabló rihaan soj che'é se me rá soj xcax sa' soj doj cuentá che'é Pabló, cataj soj rihaan tanuu yo' a. Tzaj ne cumán núj rá chrej, caráán núj chrej man Pabló, ne se gaa i'na' Pabló cuchi' Pabló rihaan soj, qui'yaj núj a man adonj —taj nij so' rihaan xrej atá suun nocqo doj do', rihaan tuvi' nij so' síi uun chij do' a.

<sup>16</sup> Tzaj ne cuno xticun' Pabló se vaa ca'mii nij so' che'é rej caráán nij so' chrej man Pabló, ne che'é dan ca'anj so' catúj so' rá cuarteé, gaa ne nu' tacuachén so' nana rihaan Pabló a.

<sup>17</sup> Gaa ne canacúún Pabló ca'na' yo'qo nij tanuu uun chij rihaan 'o cientó tanuu rihaan so', ne cataj so' rihaan tanuu yo' a:

—Catuu síi tachruu nihánj nata' so' rihaan tanuu uun chij doj, qui'yáa so' á. 'O se vaa nana me rá so' nata' so' rihaan tanuu uun chij doj a —taj Pabló rihaan tanuu yo' a.

<sup>18</sup> Che'é dan nicaj tanuu yo' man xticun' Pabló, ca'anj so' rihaan tanuu uun chij rihaan cunudanj nij tanuu, ne cataj so' rihaan tanuu a:

—Síi cu'naj Pabló síi 'nij taga' ro', canacúún so' manj cuchij rihaan so', ne cachín ni'yaj so' rihanj se vaa ca'na' síi tachruu nihánj rihaan so' qui'yáa a. 'O se vaa nana me rá síi tachruu nihánj nata' so' rihaan so', taj Pabló a —taj tanuu yo' rihaan tanuu uun chij doj a.

<sup>19</sup> Dan me se corq' tanuu uun chij yo' ra'a xticun' Pabló, gaa ne ca'anj yaníj roj so', gaa ne xna'anj tanuu yo' man so', cataj so' a:

—Me nana nata' so' rihanj, rá so' ga —taj so' rihaan síi tachruu yo' a.

<sup>20</sup> Gaa ne so' cataj:

—Nij sí israelitá ro', cyaan guun rá nij so' se vaa cachinj ni'yaj nij so' rihaan so' se vaa a'yuj ca'anj nicaj so' man Pabló rej cunu chre' nij sí uun chij rihaan nij so' a. 'O se cataj nij so' se vaa me rá nij so' xcaj nij so' cuentá sa' doj che'é Pabló a.

<sup>21</sup> Tzaj ne se cuchumán rá so' se nana nij so' ma'. 'O se vaa vij chihaa tuvi' nij so' táá doj caráán chrej man Pabló, ne aj cata' tu'va nij so' rihaan Diose se vaa se chá nij so' do', se co'o nij so' na do', gaa ataa cavi' Pabló qui'yaj nij so', ne sese se cavi' Pabló qui'yaj nij so', ne ca'vee qui'yaj Diose sayuun man nij so', taj nij so' nanj á. Ne cuano nihánj me se me ndo'o rá nij so' se vaa cata' tu'vá so' se vaa ya ca'anj nicaj so' man Pabló rihaan nij sí uun chij yo' adonj —taj xticun' Pabló rihaan tanuu uun chij doj a.

<sup>22</sup> Ne tanuu yo' ro', na'née so' chrej man sí tachruu yo', ne ca'ne' so' suun rihaan sí tachruu se vaa se cataj xna'anj so' rihaan á 'o yuvi se vaa aj nata' so' nana vaa danj rihaan tanuu yo' ma'.

*Nana nihánj taj xna'anj se vaa ca'née tanuu uun chij doj man Pabló rihaan sí nicaj suun gobernador cu'naj Félix a*

<sup>23</sup> Dan me se canacúun tanuu uun chij yo' man vij nij tanuu uun chij rihaan 'o cientó tanuu, ne cataj so' rihaan roj so' a:

—Nijaj roj soj vij cientó tanuu chée tacoj do', va'nuj chihaa chi' tanuu taj xráa cuayó do', vij cientó tanuu nicaj chruun lanzá do', ne cumán chruun soj cavii soj aga' uun ni corá, ca'anj soj chuman' Cesarea á.

<sup>24</sup> Ne quirii soj 'o cuayó quitaj sí cu'naj Pabló, gaa ne cuch'i' Pabló rihaan sí nicaj suun gobernador cu'naj Félix, qui'yaj soj, ne dan me se quinanii so' rihaan nij sí israelitá a —taj tanuu uun chij doj cuno roj so' a.

<sup>25</sup> Gaa ne qui'yaj so' 'o yanj cartá, ne ase vaa nana nihánj ro', danj vaa nana cachrón so' rihaan yanj cartá yo' a:

<sup>26</sup> “'Unj sij cu'naj Claudio Lisias ro', 'yáá 'unj yanj cartá nihánj ca'nej 'unj rihaan so' sij nicaj suun gobernador cu'naj Félix sij sa' ndo'o a. Ve'é cayáan so' á.

<sup>27</sup> Xa' sí ca'nej 'unj rihaan so' nihánj, tzaj ne quita'aa nij sí israelitá man so', ne guun rá nij so' ticavi' nij so' man so' a. Gaa xcaj 'unj cuentá, ne nacaj núj ga nij tanuu man so', che'é se xcaj 'unj cuentá se vaa sij romanó me so' a.

<sup>28</sup> Dan me se guun rá 'unj xcaj 'unj cuentá me che'é me guun rá nij sí israelitá cuta' nij so' cacun' xráa so', ne che'é dan ca'anj nicaj 'unj man so' rihaan nij sí uun chij rihaan nij so' a.

<sup>29</sup> Ne xcaj 'unj cuentá se vaa inanj che'é tucuáan noco' ma'an nij so' me cuta' nij so' cacun' xráa so' a. Tzaj ne taj vaj cacun' chi'ii tumé so' ma'. Taj che'é cavi' so' do', taj che'é qui'nij so' taga' do' ma'.

<sup>30</sup> Tzaj ne cataj xna'anj ni rihanj se vaa guun rá ta'aj nij sí israelitá ticavi' nij so' man so', ne che'é dan ca'nej 'unj man so' rihaan so', ne cataj 'unj rihaan nij sí me rá cuta' cacun' xráa so' se vaa cuch'i' nij so' rihaan so' ne ca'mii nij so' ga so' a”, taj nana cachrón tanuu uun chij doj rihaan yanj cartá ca'née so' rihaan sí nicaj suun gobernador cu'naj Félix a.

<sup>31</sup> Dan me se qui'yaj nij tanuu ndaa vaa cataj xna'anj so' rihaan nij so', ne rej ni ca'anj nicaj nij so' man Pabló ndaa chuman' cu'naj Antípatris a.

<sup>32</sup> Gaa ne yo'ó güii me se cavii nij tanuu taj xráa cuayó, ca'anj nij so' ga Pabló, ne yo'ó nij tanuu ro', canicaj nij so' chuman' Jerusalén ndaa cuarteé a.



<sup>33</sup> Dan me se gaa catúj nij tanuu taj xráá cuayó ga Pabló chuman' Cesarea, ne nago' nij so' yanj cartá yo' ra'a síi nicaj suun gobernador, ne tacuachén nij so' man Pabló rihaan so' uún a.

<sup>34</sup> Gaa quisij nayaa so' yanj cartá, ne xná'anj so' me estadó cavii Pabló, ne cataj xna'anj nii rihaan so' se vaa cavii Pabló estadó Cilicia a.

<sup>35</sup> Gaa ne cataj so' rihaan Pabló a:

—Naqui'yaj cuú 'unj che'é so' asa' ca'na' nij síi cuta' cacun' xráá so' á —taj so' rihaan Pabló a.

Gaa ne ca'ne' so' suun rihaan nij tanuu se vaa ca'anj nicaj nij tanuu man Pabló rá tucua' suun nocço cune' síi cu'naj Herodes ne tumé nij tanuu man so' a.

## 24

### *Nana nihánj taj xna'anj che'é cacun' cuta' nii xráá Pabló a*

<sup>1</sup> Dan me se cachén 'un' güüi, gaa ne nanij xrej atá suun nocço doj cu'naj Ananías ndaa chuman' Cesarea, ne ca'anj ta'aj nij síi uun chij rihaan nij yuviñ israelitá do', 'o síi a'mii natáj cu'naj Tértulo do', ga so', ne cuta' nij so' cacun' xráá Pabló rihaan síi nicaj suun gobernador a.

<sup>2</sup> Dan me se gaa canacúún nii ca'na' síi cu'naj Pabló, ne ca'na' Pabló, ne guun che'e síi cu'naj Tértulo cuta' so' cacun' xráá Pabló rihaan síi cu'naj Félix, cataj so':

—Che'é se so' me síi acaj ndo'o cuentá ro', che'é dan dínj mán núj sij israelitá, ne naxcaj ndo'o chíháán núj,

<sup>3</sup> ne cunudanj núj me síi taj se vaa inanj sa' uxrá qui'yáa so', Félix sij sa' ndo'o a. Ne: "O guun ni'yaj ndo'o ní", taj taran' núj rihaan so' me rej ma'an vaj núj a.

<sup>4</sup> Tzaj ne taj che'é guun rmii so' doj qui'yáj ma'. Ne che'é dan rquee 'unj rihaan so' se vaa veé danj gaa inaj nimán so', ne cunó so' doj tzin' se nana núj nanj adonj.

<sup>5</sup> "Dan me se xcaj núj cuentá se vaa xa' síi nihánj, tzaj ne ase vaa yuvee xij man naa vaa so', ne so' me síi 'yaj se vaa ino' vaa rá cunudanj nij síi israelitá yanj rihaan chumiñ nihánj ne xra' ta'aj nij so', ne so' me síi uun chij rihaan nij síi noco' 'o tucuaán ne se tucuanj síi cavii chuman' Nazaret a.

<sup>6</sup> Ne ndaa guun rá so' qui'yaj chí'ij so' man nuviñ nocço, ne che'é dan quita'aa núj man so', ne guun rá núj ca'ne' núj cacun' che'é so' ndaa vaa a'mii tucuaán noco' ma'an núj a.

<sup>7</sup> Tzaj ne síi cu'naj Lisias tanuu uun chij rihaan taran' nij tanuu man chuman' Jerusalén ro', ca'néj yuvaá so' man síi nihánj ra'a núj,

<sup>8</sup> ne cataj xna'anj so' rihaan nij síi me rá cuta' cacun' xráá Pabló se vaa ca'na' nij so' rihaan so' nihánj a. Ne dan me se ma'an so' me síi guun nucuaj naqui'yaj cuu che'é nu' rasuñ nihánj, ne xcaj ma'an so' cuentá che'é cacun' cuta' núj xráá Pabló nanj adonj —taj síi cu'naj Tértulo cuno síi cu'naj Félix a.

<sup>9</sup> Gaa ne yo'ó nij yuviñ israelitá ro', caraa ndo'o nij so' cacun' xráá Pabló, ne cataj nij so' se vaa ya vaa se nana síi cu'naj Tértulo yo' a.

### *Nana nihánj taj xna'anj che'é nana ca'mii ma'an Pabló rihaan síi nicaj suun gobernador cu'naj Félix yo' a*

<sup>10</sup> Gaa ne guun ra'a síi nicaj suun gobernador cataj so' se vaa ca'vee ca'mii Pabló, ne che'é dan cataj Pabló a:

—Ne'én 'un̄j se vaa quisij que'ee yo' guún so' síí a'ne' cacun' che'é nij síí man chiháán n̄j, ne che'é dan uun nih̄a' raj ca'mii nacaj 'un̄j che'é ma'an̄j rihaan so' á.

11 Ne guun nucuaj ma'án so' xc̄aj so' cuentá se vaa ataa quisij chuvij güii asij cavii 'un̄j chuman' Jerusalén carāa guee 'un̄j rihaan Diose a.

12 Ne rá nuvíi nocoo do', rá nij ve' tucu'yón n̄j sij israelitá se tucuñj Moisés do', rque chuman' do', ne canō tuví 'un̄j ga yuvij ma'. Ne ā doj ne ca'maan rá nij yuvij qui'yáá 'un̄j ma'.

13 Ne se ca'vee tijaan̄ nij síí nihánj se vaa vaa che'é cuta' nij so' cacun' xráj ma'.

14 "Tzaj ne cataj yá 'un̄j rihaan so' se vaa xa' tucuáán tucu'náj nij síí nihánj tucuáán ne ro', danj 'yáá 'un̄j aráj guee 'un̄j rihaan Diose sij nocoo' nij xii 'un̄j a. 'O se amán raj nu' nanā nō rihaan yanj nō se tucuñj Moisés do', se nanā nij síí nata' se nanā Diose gaa naá do' a.

15 Ne nucuaj rá 'un̄j man Diose ndaa vaa 'yaj ma'an̄ nij síí nihánj se vaa vaa güii cunuu i'na' uún nij síí sa' cavi' do', nij síí chi'ii cavi' do' a.

16 Che'é dan nu' se vaa 'yá, tzaj ne ve'é inañ 'yá che'é rej se guun quitaj cacun' xráj rihaan Diose do', rihaan yuvij do' ma'.

17 "Dan me se cachén que'ee yo', gaa ne guun rá 'un̄j rque 'un̄j caridad rihaan tuví 'un̄j síí nique ne rque 'un̄j rasuun guee rihaan Diose, ne che'é dan ca'an̄j 'un̄j ndaa chuman' Jerusalén a.

18 Ne gaa qui'yáá 'un̄j danj, ne nari' doj síí israelitá cavii estadó Asia mán 'un̄j rá nuvíi nocoo, ne aj cunuu sa' 'un̄j rihaan Diose daj vaa taj se tucuñj nari' a. Tzaj ne taj vaj yuvij vaj ga 'un̄j, ne taj vaj sayuun chi'ii qui'yáá 'un̄j gaa nari' nij so' manj ma'.

19 Ne xa' nij so', tzaj ne sese vaa cacun' tumé 'un̄j rá nij so', ne nō xcúún nij so' ca'na' ma'an̄ nij so' canicun' nij so' nihánj rihaan so' á.

20 Ne sese taj, ne nō xcúún ma'an̄ nij síí nihánj cataj xna'an̄j nij so' rihaan so' me cacun' tumé 'un̄j nari' nij so' gaa canicún' 'un̄j rihaan juntá qui'yaj nij síí atá suun rihaan n̄j á.

21 'O se vaa orún' nanā caguáj 'un̄j gaa canicún' 'un̄j rihaan nij síí uun chij rihaan nij yuvij israelitá yo', ne dan me se cataj 'un̄j danj: "Maan̄ che'é se 'un̄j me síí amán rá se vaa vaa güii cunuu i'na' uún nij síí cavi' qui'yaj Diose ro', che'é dan naqui'yaj cuu nij soj che'ej cuan' a", cataj 'un̄j rihaan nij so' a —taj Pabló rihaan síí nicaj suun gobernador cu'naj Félix a.

22 Ese síí cu'naj Félix ro', me síí quene'en sa' daj vaa se tucuñj ní' sij nocoo' man Jesucristó, gaa ne cataj so' se vaa guun raan̄ doj, gaa ne ca'ne' so' cacun' che'é Pabló a. Che'é dan cataj so':

—Asa' ca'na' tanuu uun chij cu'naj Lisias nihánj, ne naqui'yaj cuú 'un̄j che'é nij soj á —taj síí cu'naj Félix a.

23 Ne ca'ne' síí cu'naj Félix suun rihaan tanuu uun chij rihaan 'o cientó tanuu se vaa cutumé tanuu man Pabló, tzaj ne ca'vee cachee uun Pabló doj, ne ca'vee ca'na' nij tuví Pabló raçuúj nij so' doj man Pabló, qui'yaj tanuu, taj síí cu'naj Félix yo' a.

*Nanā nihánj taj xna'an̄j se vaa yo' o' nij Pabló taga', qui'yaj síí cu'naj Félix a*

24 Dan me se cachén doj güii, gaa ne ca'na' síí cu'naj Félix ga nicá so' chanā israelitá cu'naj Drusila, ne canacúún so' se vaa ca'na' Pabló rihaan so', ne cuno so' nanā ca'mii Pabló rihaan so' che'é tucuáán nocoo' ní' sij amán rá ni'yaj man Jesucristó a.

<sup>25</sup> Dan me se cataj xna'anj Pabló rihaan síi cu'naj Félix se vaa nõ xcúún ní' cunũ sa' ní' rihaan Diose nõ nõ xcúún ní' cutumé ní' man ma'an ní' se vaa ve'é inanj qui'yaj ní' a. Ne ca'mii so' che'é güii ca'ne' Diose cacun' che'é yuvi a. Gaa nõ cuchu'vi' ndo'o síi cu'naj Félix, nõ cataj so':

—Cuanõ nihánj me se ca'anj so' yaj, tzaj nõ asa' vaa i'núj rihanj, nõ canacunj uún 'unj mán so' á —taj so' rihaan Pabló a.

<sup>26</sup> Danj cataj Félix che'é se me rá so' caráán Pabló sa'anj rihaan ma'an so' che'é rej quirij so' taga' man Pabló, rá so' a. Che'é dan que'ee güii canacúún so' man Pabló ca'na' Pabló rihaan so', nõ ca'mii so' ga Pabló a.

<sup>27</sup> Dan me se quisij vij ya yo' 'nij Pabló taga', gaa nõ x'néj suun ra'a síi cu'naj Félix, nõ catúj síi cu'naj Porcio Festo a. Ne guun rá síi cu'naj Félix qui'yaj so' se luj che'é nij yuvi israelitá, nõ che'é dan tanáj so' man Pabló taga' a.

## 25

*Nanã nihánj taj xna'anj se vaa cataj Pabló se vaa guun rá so' naqui'yaj cõu síi nicaj suun emperador che'é so' a*

<sup>1</sup> Quisij va'núj güii yáán síi cu'naj Festo síi nicaj suun gobernador, gaa nõ curihanj so' chuman' Cesarea cavii so' ndaa chuman' Jerusalén a.

<sup>2</sup> Gaa nõ nij xrej atã suun nocõo doj dõ', nij síi rãã doj rihaan nij yuvi israelitá dõ', cuta' nij so' cacun' xráá Pabló rihaan síi cu'naj Festo a. Gaa nõ nucuaj

<sup>3</sup> cachíin ni'yaj nij síi israelitá rihaan síi cu'naj Festo se vaa ca'ne' so' suun se vaa ca'na' Pabló ndaa chuman' Jerusalén a. 'O se guun rá nij so' caráán nij so' chrej nõ ticavi' nij so' man Pabló a.

<sup>4</sup> Che'é dan cataj síi cu'naj Festo se vaa tumé nij tanuu man Pabló chuman' Cesarea a. 'O se rque doj güii nucu' so' chuman' Cesarea, taj so' a.

<sup>5</sup> Gaa nõ cataj uún síi cu'naj Festo rihaan nij síi israelitá a:

—Che'é dan sese nij tuvi' soj síi guun nucuaj ca'anj ndaa chuman' Cesarea ga 'unj ro', ca'anj nij so', nõ sese vaa se chí'ij qui'yaj síi cu'naj Pabló, nõ cuta' nij so' cacun' xráá Pabló á —taj síi cu'naj Festo rihaan nij so' a.

<sup>6</sup> Dan me se guun rãã síi cu'naj Festo 'õ tũnj güii chuman' Jerusalén ta' asuun, gaa nõ nanii so' ndaa chuman' Cesarea, gaa nõ yo'ó güii me se ca'anj quitaj so' chruun xlã sa' rej naqui'yaj cõu so' che'é yuvi, gaa nõ ca'ne' so' suun rihaan nij tanuu se vaa ca'na' Pabló rihaan so' qui'yaj nij tanuu a.

<sup>7</sup> Gaa nõ gaa ca'na' Pabló rihaan so', nõ mán nij síi israelitá nanij ndaa chuman' Jerusalén, nõ canicun' nij so' nu' anicaj rej x'núj Pabló, nõ caraa ndo'o nij so' cacun' nocõo xráá Pabló, tzaj nõ ne ca'vee tihanj nij so' se vaa ya ya qui'yaj so' cacun' yo' ma'.

<sup>8</sup> Gaa nõ canicaj Pabló, ca'mii nacaj so' che'é ma'an so', cataj so':

—Taj cacun' qui'yáá 'unj rihaan se tucuanj nij síi israelitá dõ', rihaan nuvi nõ nocõo dõ', rihaan síi nicaj suun emperador cu'naj César dõ' a ma' —taj Pabló rihaan síi cu'naj Festo yo' a.

<sup>9</sup> Dan me se guun rá síi cu'naj Festo qui'yaj so' se luj che'é nij yuvi israelitá, nõ che'é dan cataj so' rihaan Pabló a:

—Nõ me rá so' ca'anj so' ndaa chuman' Jerusalén nõ ndaa ti'yaj ca'ne' 'unj cacun' che'é so' che'é nij rasuun nihánj na' —taj so', xná'anj so' man Pabló a.

<sup>10</sup> Gaa nõ cataj Pabló rihaan so' a:

—Nihánj me nicún' 'unj rihaan so', sijn cune' síi nicaj suun emperador cu'naj César se vaa ca'ne' so' cacun' che'é yuvi á. Nõ che'é dan nõ xcúún so' ca'ne'

so' cacun' che'é 'un̄j nan̄j adon̄j. Ne qui'yáá 'un̄j cacun' rihaan a 'ó nij síí israelitá ma'. Ne aj ne'én so' se vaa ya vaa nana nihánj nana a'mii 'un̄j rihaan so' chuguan̄j.

<sup>11</sup> Dan me se sese vaa cacun' qui'yáá 'un̄j ne sese vaa che'é ticavi' nii mán 'un̄j, ne a'vej 'un̄j cavi' 'un̄j á. Tzaj ne sese cacun' rmi' inan̄j me se nana nij síí nihánj, ne taj a 'ó síí nó xcúün tacuachén mán 'un̄j rihaan nij so' ma'. Cuan̄o nihánj me se achíín ni'yáá 'un̄j rihaan síí nicaj suun emperador cu'naj César se vaa ma'an so' ca'ne' cacun' che'é 'un̄j adon̄j —taj Pabló rihaan síí cu'naj Festo a.

<sup>12</sup> Dan me se nuchruj raá síí cu'naj Festo ga nij síí narqué chrej man so' daj qui'yaj nij so', ga ne cataj so' rihaan Pabló a:

—Aj cachíín ni'yáá so' rihaan síí cu'naj César se vaa ma'an so' ca'ne' cacun' che'é so' á. Che'é dan ca'an̄j so' rihaan so' adon̄j —taj so' rihaan Pabló a.

*Nana nihánj taj xna'an̄j daj guun ga ca'na' Pabló rihaan síí nicaj suun rey cu'naj Agripa do', rihaan ra'vij so' chana cu'naj Berenice do' a*

<sup>13</sup> Dan me se cachén doj güii, ga ne síí nicaj suun rey cu'naj Agripa do', chana cu'naj Berenice do', ca'na' chuman' Cesarea, ca'na' ni'yaj roj so' síí nicaj suun gobernador cu'naj Festo a.

<sup>14</sup> Ne guun raan roj so' que'ee güii chuman' Cesarea a. Che'é dan cataj xna'an̄j síí cu'naj Festo rihaan síí nicaj suun rey yo' che'é Pabló a. Dan me se cataj so':

—Dan me se síí quináj taga' nihánj qui'yaj síí cu'naj Félix me yo'o so',

<sup>15</sup> ne ga nuu 'un̄j chuman' Jerusalén, ne nij xrej ata suun noc̄o doj do', nij síí uun chij rihaan nij yuvīj israelitá do', cataj xna'an̄j nij so' rihaan 'un̄j che'é so', ne guun rá nij so' se vaa nar̄j 'un̄j cacun' xráá so' ne qui'yáá 'un̄j sayuun man so' a.

<sup>16</sup> Ga ne cataj xna'an̄j 'un̄j rihaan nij so' se vaa nuveé se tucuan̄j núj s̄ij romanó me tacuachén uun ní' man 'o so' ticavi' nii man so' ma'. Tanan̄j asino yaan̄ quene'en síí ata' cacun' man nij síí cuta' cacun' xráá so', ga ne ca'mii nacaj so' che'é ma'an so', cataj 'un̄j rihaan nij so' a.

<sup>17</sup> Dan me se ca'na' nij so' chuman' Cesarea nihánj, ne ne guun raan 'un̄j ma'. Tzaj ne yo'ó güii me se quitáá 'un̄j chruun xlá sa' rej a'né' 'un̄j cacun' che'é yuvīj, ga ne ca'ne' 'un̄j suun rihaan nij tanuu se vaa ca'na' síí 'nij taga' yo' rihaan 'un̄j qui'yaj nij so' a.

<sup>18</sup> Ne ga ca'na' so', ne nij síí guun rá cuta' cacun' xráá so' ro', canicun' nij so' ne cuta' ndo'o nij so' cacun' xráá so', tzaj ne nuveé cacun' chi'ij me cacun' cuta' nij so' xráá so', rá 'un̄j ma'.

<sup>19</sup> O se ino doj vaa rá nij so' ga síí 'nij taga' yo', ni'yaj nij so' tucuaán noc̄o' ma'an̄ nij so' do', 'o síí cavi' cu'naj Jesús do' a. 'O se vaa i'na' síí cu'naj Jesús, cataj síí 'nij taga' cu'naj Pabló yo' a.

<sup>20</sup> Dan me se ne quene'en 'un̄j daj naqui'yaj cuj che'é rasuun vaa dan̄j ma'. Che'é dan xna'an̄j 'un̄j man síí cu'naj Pabló yo' sese guun rá so' ca'an̄j so' chuman' Jerusalén, ne ca'vee ca'ne' 'un̄j cacun' che'é so' che'é nij rasuun yo', taj 'un̄j rihaan so' a.

<sup>21</sup> Tzaj ne cachíín ni'yaj Pabló se vaa yo'o qui'nij so' taga' nihánj ndaa se ca'vee naqui'yaj cuu síí nicaj suun emperador che'é so' a. Che'é dan ca'ne' 'un̄j suun rihaan nij tanuu se vaa yo'o cutumé nij so' man Pabló taga' ndaa se ca'nej 'un̄j man so' rihaan síí cu'naj César yo' a —taj síí cu'naj Festo rihaan síí cu'naj Agripa a.

<sup>22</sup> Gaa ne cataj sí cu'naj Agripa rihaan sí cu'naj Festo a:

—Me rá 'unj cunō mā'án 'unj ca'mii snó'o yo' á —taj so' rihaan sí cu'naj Festo a.

—A'yuj me se cunō so' ca'mii so' adonj —taj sí cu'naj Festo rihaan sí cu'naj Agripa a.

<sup>23</sup> Ne yo'ó güii me se ve'é ndo'o qui'yaj nij yuviij gaa ca'na' sí nicaj suun rey cu'naj Agripa do', chana cu'naj Berenice do', ne catúj roj so' rá ve' 'yaj nii juntá a. Ne ca'na' tanuu uun chij rihaan 'o mǐj tanuu ca'na' nij sí raa man chuman' Cesarea yo' ca'na' ga roj so' a. Gaa ne ca'ne' sí cu'naj Festo suun rihaan nij tanuu se vaa ca'na' Pabló rihaan nij so' qui'yaj nij tanuu a.

<sup>24</sup> Ne gaa catúj Pabló, ne cataj sí cu'naj Festo rihaan sí cu'naj Agripa a:

—Cunō so', sij nicaj suun rey Agripa. Cunō soj sij cunuu chre' ga núj nihánj á. Nihánj me se ni'yaj nij soj man sí nihánj á. 'Q se rque chuman' Jerusalén do', ndaa ma'an chuman' nihánj do', ca'na' ndo'o nij yuviij israelitá rihanj ne caguáj nij so' cataj nij so' se vaa ne nó xcúún so' gaa i'na' so' doj a ma'.

<sup>25</sup> Tzaj ne xcaj 'unj cuentá se vaa taj se chi'ii qui'yaj so', ne taj che'é ticavi' nii man so' qui'yáá 'unj ma'. Tzaj ne ma'an so' cachín ni'yaj rihaan sí nicaj suun emperador se vaa ca'ne' ma'an emperador cacun' che'é so', ne che'é dan guun raj se vaa ca'nej 'unj man so' rihaan sí nicaj suun emperador adonj.

<sup>26</sup> Tzaj ne ne cavii raá 'unj me nana cachron 'unj rihaan yanj ca'nej 'unj rihaan sí nicaj suun emperador yo' che'é cacun' tumé sí nihánj ma'. Che'é dan ca'na' so' rihaan so' sij nicaj suun rey Agripa do', rihaan yo'ó nij soj do', che'é rej naqui'yaj cuu nij soj che'é so' ne cataj xna'anj nij soj rihaan 'unj me nana cachron 'unj rihaan yanj che'é so' á.

<sup>27</sup> 'Q se snúu rma'án 'unj, sese ca'nej 'unj man 'o sí 'nij taga' rihaan sí nicaj suun emperador, sese nuvi' nana cataj xna'anj 'unj rihaan so' che'é cacun' tumé sí 'nij taga' yo', rá 'unj a —taj sí cu'naj Festo rihaan yo'ó nij so' a.

## 26

*Nana nihánj taj xna'anj daj ca'mii Pabló rihaan sí nicaj suun rey cu'naj Agripa a*

<sup>1</sup> Gaa ne cataj sí cu'naj Agripa rihaan Pabló a:

—Ca'vee ca'mii so' che'é so' á —taj so' rihaan Pabló a.

Gaa ne ticun' ra'a Pabló, ne ca'mii nacaj so' che'é ma'an so', cataj so':

<sup>2</sup> —Aj cavii sa' uxrá 'unj nihánj, che'é se vaa i'núj rihanj ca'mii nacaj 'unj manj rihaan so' cuan', sij nicaj suun rey cu'naj Agripa. Ne nihánj me se ca'mij che'é nu' cacun' cuta' yo'ó nij sí israelitá xráj a.

<sup>3</sup> 'Q se ne'én 'unj se vaa so' me sí nicaj cuentá che'é nu' se tucuñj ní' sij israelitá, ne ne'én so' daj vaa nu' nana noco' ní' a. Che'é dan achín ni'yáá 'unj rihaan so' se vaa qui'yáá so' se ndo'o, ne gaa inaj nimán so', ne cunō so' nana a'mij á.

<sup>4</sup> Dan me se gaa sí tachruu mé 'unj, ne cayáán 'unj chuman' Jerusalén ga yo'ó nij sí israelitá, ne aj ne'en cunudanj nij sí israelitá se vaa qui'yáj gaa mej sí tachruu a.

<sup>5</sup> Ne sese guun rá nij so', ne guun nucuaj nij so' cataj xna'anj ma'an nij so' se vaa sij fariseo mé 'unj asino yaan, ne qui'yáá 'unj nu' ndaa vaa 'yaj nij sí fariseo, ne nij sí fariseo ro', me sí nicaj doj noco' se tucuñj ní' nanj á.

6 Ne nihánj me se cuta' nij sí israelitá cacun' xráj, ne nicún' 'unj nihánj rihaan so', che'é se guun ya raj se vaa qui'yaj Diose nu' ndaa vaa cata' tu'va so' rihaan xii ní' gaa naá a.

7 Ne nuví nigan' yo'q na'vij cunú' chuvij nij x'ne' nij sí israelitá rihaan Diose, che'é se guun ya rá ma'an nij so' se vaa qui'yaj Diose nu' danj che'é nij so' a. Ne che'é rasuun yo' rasuun qui'yaj Diose che'é ní' ro', che'é dan cuta' nij so' cacun' xráj, nanj rey Agripa.

8 Ne me che'é ne amán rá soj se vaa ca'vee cunuú i'na' uún nij sí cavi' qui'yaj Diose ga.

9 "Dan me se 'unj nihánj me se gaa rque me se guun ya ya rá 'unj qui'yaj ndo'o 'unj sayuun man nij sí noco' man Jesucristó sí cavi chuman' Nazaret a.

10 Ne danj qui'yáá 'unj rque chuman' Jerusalén nanj á. 'O se 'unj me sí canu' man que'ee nij sí sa' noco' man Diose taga', ne rque nij xrej atá suun nocoq doj se nucuaj rihanj se vaa qui'yaj danj a. Ne gaa ca'ne' núj cacun' che'é nij so' se vaa cavi' nij so', ne ndaa 'unj me sí cataj se vaa nq xcúun nij so' cavi' nij so' adonj.

11 Ne guun que'ee ndo'o ca'anj 'unj cunudanj nij ve' tucu'yón ní' sijn israelitá se tucuanj Moisés, ne qui'yáá 'unj sayuun man nij sí noco' man Jesús, ne ndaa rqueé 'unj man nij so' ca'mii chí'ii nij so' che'é Jesucristó, ne che'é se ca'maan ndo'o rá 'unj ni'yaj 'unj man nij so', ne ndaa canocó' 'unj man nij so' ndaa yo'ó chuman' naj gan' che'é rej qui'yáá 'unj doj sayuun man nij so' adonj.

12 "Dan me se gaa qui'yaj danj, ne 'o güii me se ca'anj 'unj chuman' Damasco, ne aj rqueé nij xrej atá suun nocoq doj rej nucuaj, ne ca'neé nij so' mán 'unj ca'anj 'unj qui'yáá 'unj sayuun man nij sí noco' man Jesucristó yanj chuman' Damasco yo' a.

13 Cunó so' nana ca'mij rihaan so' nihánj, nanj rey. 'O se caxuj me yo', ne vaj 'unj chrej, ne rej xtá' ro', cuchuguun 'o ya'an nu' anicaj rej nicún' 'unj ga nij sí vaj chrej ga 'unj, ne nucuaj doj ya'an yo' rihaan naán güii á.

14 Dan me se quini taran' núj rihaan yo'óó, ne cunó 'unj ca'mii yo'q so' rihaan 'unj, ne xna'ánj hebreo ca'mii so', cataj so': "Me che'é 'yáá so' sayuun manj, ga Saulo'. 'O se me rá so' qui'yáá so' sayuun manj, tzaj ne man ma'an so' 'yáá so' sayuun ase 'yaj scúj o' tacanj rihaan chruun sihaa nicaj sí 'yaj suun ga yuntá nanj á", taj sí ca'mii rihanj a.

15 Gaa ne taj 'unj: "Me sí mé so', Señor!", taj 'unj, xna'anj 'unj man so' a.

"Gaa ne cataj sí 'nj ra'a man ní': "Unj ro', me Jesús, ne sijn 'yáá so' sayuun man mej adonj.

16 Tzaj ne naxagaa so', canicun' cayá so' á. 'O se nihánj me se curuvi' 'unj rihaan so' che'é se narii 'unj mán so' qui'yaj suun so' rihanj ne nata' so' rihaan yuvi che'é nij rasuun nari' so' cuanoq do', che'é rej quene'én so' manj do', che'é nij rasuun nari' so' asa' curuvi' uún 'unj rihaan so' rej rihaaq doj do' a.

17 Dan me se tinanii 'unj mán so' rihaan nij sí man chiháán so' yuvi israelitá do', rihaan nij sí yanj do', ne yaj ca'nej 'unj mán so' rihaan nij so',

18 che'é rej naxra' rihaan nij so' ne xcaj nij so' cuentá qui'yáá so', gaa ne tanáj xcoq nij so' rej rmi' rej uun chij sí chree rihaan nij so', ne canicaj nij so' rihaan Diose rej ranga' rej guun nucuaj nij so' xcaj nij so' cuentá a. Gaa ne ca'vee quinavij nu' cacun' tumé nij so', ne ca'vee cavi sa' nij so' ga nij sí

cunuu sa' nimán rihaan Diose, sese cuchuman rá nij so' ni'yaj nij so' mán 'unj, qui'yáá so' á", taj síi 'nij ra'a man ní' rihanj a.

19 "Ne xcaj so' cuentá, sij nicaj suun rey Agripa. 'O se ne guun nichraj nimanj ma'. Tananj qui'yáá 'unj nu' ndaa vaa cataj Jesucristó rihanj gaa curuvi' so' rihanj rej xtá' a.

20 Asino yaan natá 'unj chuman' Damasco do', chuman' Jerusalén do', nu' estadó Judea do', gaa ne natá 'unj ndaa rej man nij síi yanij uún a. Natá 'unj rihaan cunudanj nij yuvií se vaa canicaj nimán nij yuvií canoco' nij so' Diose, ne ve'é qui'yaj nij so' ndaa vaa 'yaj síi canicaj ya nimán nanj adonj.

21 Che'é dan quita'aa nij yuvií israelitá mán 'unj rá nuvií nocoo, ne guun rá nij so' ticavi' nij so' manj a.

22 "Che'é dan nicun' 'unj rihaan nij soj cuano, ne ta'aj soj me síi yanj uun ne ta'aj soj me síi raa ata suun, tzaj ne Diose me síi racufj manj ndaa cuano nihánj, ne che'é dan natá 'unj se nana Diose rihaan nij soj a. Tzaj ne ne ino vaa nana natá 'unj rihaan nij soj cuano ga se nana nij síi nata' se nana Diose gaa naá do', se nana ma'an síi cu'naj Moisés do', gaa cataj xna'anj nij so' daj guun rej rihaan nij so' ma'.

23 Dan me se ma'an nij so' cataj se vaa síi ca'nej Diose tinanii man yuvií rihaan sayuun me se quiran' so' sayuun, ne guun so' síi cunuu i'na' uún asino yaan rihaan yo'ó nij síi cavi', ne nata' so' nana ya rihaan nij yuvií israelitá do', rihaan nij yuvií yanj do' a —taj Pabló rihaan síi cu'naj Agripa yo' a.

24 Dan me se gaa ca'mii so' danj rihaan síi cu'naj Agripa, ne caguáj síi cu'naj Festo, cataj so':

—Snúu so', Pablo. Che'é se tucu'yón ndo'o so' yanj ro', che'é dan guun snuj raá so' nanj á —taj so' rihaan Pabló a.

25 Gaa ne cataj Pabló rihaan síi cu'naj Festo yo' a:

—Ne snuj 'unj, man Festo sij uun chij. Tananj ya vaa nana natá 'unj, ne nana ve'é vaa no xcúun ni' cuno ni' me nij nana yo' a.

26 'O se sij nicaj suun rey me síi nihánj, ne so' me síi ne'en daj vaa nu' rasuun natá 'unj rihaan nij soj cuano á. Ne ne chu'ví' 'unj nata' 'unj nu' nana nihánj rihaan so' ma'. 'O se aj xcaj síi cu'naj Agripa nihánj cuentá che'é nu' rasuun nihánj, rá 'unj á. 'O se nuveé rasuun 'nij yuve me rasuun nihánj a man adonj —taj Pabló rihaan síi cu'naj Festo a.

27 Ne cataj so' rihaan síi cu'naj Agripa a:

—Ne cataj so' 'o nana rihanj, Agripa. Amán rá so' daj taj se nana nij síi nata' se nana Diose gaa naá na'. Aj ne'én 'unj se vaa amán rá so' nanj adonj —taj Pabló rihaan síi cu'naj Agripa yo' a.

28 Gaa ne cataj Agripa rihaan so' a:

—Ca'mij so' doj rihanj, gaa ne cuaj guún 'unj síi nocoo' man Jesucristó, rá so' na' —taj Agripa rihaan Pabló a.

29 Gaa ne cataj Pabló rihaan so' a:

—Achúin ni'yáá 'unj rihaan Diose se vaa, ca'vee se doj nana ca'mij, ca'vee se nocoo ndo'o ca'mij, tzaj ne nuveé curuún so' cuchuman rá se nanaj ma'. Tananj me rá 'unj cuchuman rá cunudanj soj sij uno nana a'mij cuano, ne ase vaa 'unj ro', danj gaa soj uún nanj adonj. Tzaj ne se cunumij soj ga aga' ne' nihánj, rá 'unj ma' —taj Pabló rihaan nij so' a.

30 Gaa ne canicun' caya síi nicaj suun rey do', síi nicaj suun gobernador do', chana cu'naj Berenice do', yo'ó nij síi yanj ga nij so' do',

<sup>31</sup> ne curihanj nij so', ne cataj nij so' rihaan tuvi' nij so' se vaa taj vaj cacun' qui'yaj Pabló, ne ne nó xcúun so' cavi' so' do', qui'nij so' taga' do' ma'.

<sup>32</sup> Gaa ne cataj sí cu'naj Agripa rihaan sí cu'naj Festo a:

—Sese ne cachinj ni'yaj sí nihánj se vaa ca'ne' César cacun' che'é so', ne ca'vee curihanj so' taga' asuun saj á —taj sí cu'naj Agripa rihaan sí cu'naj Festo a.

## 27

*Nana nihánj taj xna'anj se vaa ca'néé sí cu'naj Festo man Pabló ca'anj Pabló chuman' Romá a*

<sup>1</sup> Dan me se guun ya rá sí cu'naj Festo se vaa ca'anj núj ndaa yo'óo nocoo Italia rej ne sí nicaj suun emperador cu'naj César a. Gaa ne tacuachén so' man Pabló do', man yo'ó doj sí 'nij taga' do', rihaan 'o tanuu uun chij rihaan 'o cientó tanuu, ne Julio cu'naj tanuu yo', ne sí nuu rihaan ma'an sí nicaj suun emperador me so' a.

<sup>2</sup> Dan me se cavii núj ga tinú' Aristarco sí cavii chuman' Tesalónica chuman' naj estadó Macedonia rque 'o rihoo chéé rihaan na a. Ne xa' rihoo yo', tzaj ne rihoo cavii chuman' Adramitio me yo', ne ca'anj yo' ndaa nij chuman' naj tu'va na ya'anj estadó Asia a.

<sup>3</sup> Ne yo'ó güii me se cuchí' núj chuman' cu'naj Sidón, ne ve'é inanj qui'yaj sí cu'naj Julio ga Pabló, ne ca'vej rá so' ca'anj Pabló rihaan nij tuvi' Pabló sí yanj chuman' Sidón yo', che'é rej taj ya'anj nij so' man Pabló a.

<sup>4</sup> Gaa ne cavii uún núj rque rihoo, ne ca'anj uún rihoo, ne cachén núj rej sur rej nichrun' yo'óo taj rihaan na ya'anj cu'naj Chipre a. 'O se go' ndo'o nana rej rihaan rihoo yo' a.

<sup>5</sup> Gaa ne cachén uún núj rihaan na ya'anj, ne cachén núj tu'va estadó Cilicia do', estadó Panfilia do', ne cuchí' núj ndaa chuman' Mira chuman' naj estadó Lisia a.

<sup>6</sup> Ne chuman' yo' ro', nari' tanuu yo' 'o rihoo cavii chuman' Alejandría, ne rihoo ca'anj ndaa Italia me yo' a. Che'é dan cavii núj rque rihoo yo' qui'yaj tanuu yo' a.

<sup>7</sup> Dan me se nanaj ndo'o cachéé rihoo yo' rque que'ee güii, ne che'é dan sayuun ndo'o vaa cuchí' núj rihaan chuman' Gnidó a. Ne ne ca'vee ca'anj núj á doj, qui'yaj nana ma'. Che'é dan cachén núj nichrun' yo'óo taj rihaan na ya'anj cu'naj Creta, ne nichrun' rej cu'naj Salmón rej naj yo'óo Creta cachén núj a.

<sup>8</sup> Ne sayuun uxrá vaa cachén núj rej yo', ne cuchí' núj ndaa 'o rej cu'naj Buenos Puertos, ne nichrun' naj chuman' yo' ga chuman' cu'naj Lasea a.

<sup>9</sup> Dan me se aj cachén ndo'o güii, qui'yaj rihoo yo', ne aj cachén güii toco' nij yuvi' israelitá x'naa man ma'an nij so' che'é se aráj guee nij so' rihaan Diose, ne nichrun' quisij dió avii nana yuvaá rihaan na ya'anj a. Che'é dan cuhu'vi' núj se vaa quirán' núj sij man rque rihoo yo' sayuun a. Che'é dan narqué Pabló chrej rihaan nij sí man rque rihoo yo',

<sup>10</sup> ne cataj so' rihaan nij so' a:

—Ne'én 'unj se vaa xa' rihoo nihánj, tzaj ne sese yo' o ca'anj rihoo nihánj, ne quirán' ndo'o nij rasuun man rque rihoo nihánj do', ma'an rihoo nihánj do', sayuun, ne quirí' ndo'o nij yo', qui'yaj nana yuvaá, ne ndaa cavi' ma'an ní adonj —taj Pabló rihaan nij so' a.



11 Tzaj ne tanuu uun chij rihaan 'o cientó tanuu yo' ro', ne cuchumán rá so' se nana Pabló ma'. Tananj cuchumán rá so' se nana sí tuguáj rihoo do', sí si'yaj rihoo do' a.

12 Dan me se rej cu'naj Buenos Puertos yo' ro', nuveé rej sa' quinaj rihoo nu' dió avii nana yuvaá me rej yo' a. Che'é dan nocoo doj ta'aj nij sí man rque rihoo cataj se vaa guun rá nij so' curihanj rihoo rej yo', ne guun rá nij so' se vaa cuchí' rihoo chuman' Fenice ne guun raan rihoo chuman' yo' nu' dió avii nana yuvaá a. Ne chuman' Fenice ro', me chuman' naj yo'óo cu'naj Creta, ne caráan quij rihaan nana yuvaá rej chuman' Fenice, rá nij so' a.

*Nana nihánj taj xna'anj che'é sayuun quiran' nij so' rihaan na ya'anj, qui'yaj nana yuvaá a*

13 Dan me se cavii 'o nana catun' rej rque tu'va na ya'anj, ne guun rá nij so' se vaa guun nucuaj nij so' qui'yaj nij so' ndaa vaa guun rá nij so' a. Che'é dan guun che'e rihoo ca'anj rihoo, ne nichrun' yo'óo cu'naj Creta vaj nij so' qui'yaj nana a.

14 Dan me se doj orá vaj rihoo, gaa ne taj ni'yón cavii 'o nana yuvaá rej xraj rihaan na ya'anj, ne go' uxrá nana yuvaá rihaan rihoo, ne nana cu'naj Euroclidón me yo' xna'anj griego a.

15 Ne ne guun nucuaj rihoo ca'anj rihoo rej rihaan rihoo ne qui'yaj canaán rihoo rihaan nana yuvaá ma'. Che'é dan ca'ne' rá núj, ne canicaj rihoo ne vaj rma'an rihoo, qui'yaj nana yo' a.

16 Ne cachén núj nichrun' yo'o yo'óo nii taj rihaan na ya'anj, ne yo'óo cu'naj Clauda me yo' a. Ne sayuun uxrá guun nucuaj núj naxcaj núj rihoo cunii nocoo rej xcó rihoo xij ne naqui'yaj raan núj man rihoo cunii yo' rque rihoo xij yo' a.

17 Ne gaa quisj naxcaj núj man rihoo cunii yo', ne numj nij so' ne naqui'yaj raan nij so' man rihoo xij yo' a. Dan me se chucu'vi' ndo'o nij so' se vaa cano rihoo rihaan yo'óo chruu naj rque na ya'anj rej cu'naj Sirte ne quirí' nu' rihoo yo' a. Che'é dan nacué nij so' mantá o' nana rihaan, che'é rej se ca'anj yoo rihoo ma'. Ne me rej ma'an go' nana ro', ca'anj rihoo uún adonj.

18 Ne yo'óo güii me se che'é se go' uxrá nana rihaan núj, ne che'é dan quirí'íj nij so' nij rasuun man rque rihoo rque na ya'anj,

19 ne güii va'núj me se ma'an nij so' ra'a nij so' ri'íj nij so' nij rasuun rasuun ma'an yuvi tuguáj rihoo rque na ya'anj, che'é rej cunu yoo rihoo ne nij so' a.

20 Ne güii do', yati' do', ne curuvi' ni'yaj núj que'ee güii a ma'. Ne yo'o go' nana yuvaá rihaan núj, ne che'é dan guun ya rá núj se vaa daj chihaa mjí se ca'vee quinanií núj rihaan sayuun yo' a ma'.

21 Dan me se a 'o nij sí man rque rihoo ne cha nij so', ne che'é dan canicun' Pabló sca'núj nij so', ne cataj so':

—Ve'é doj sese cuno nij soj se nana, tinuj. 'O se sese ne cavii ní' yo'óo cu'naj Creta, ne ne quiran' ní' sayuun nihánj, ne ne ca'anj ni'ya cunudanj nij rasuun asuun saj ma'.

22 Ne nihánj me se cuno soj chrej nago' 'unj man soj, ne naqui'yaj niha' soj nimán soj á. 'O se a 'o tuvi' nij soj se cavi' ma'. Maan orún' rihoo nihánj ca'anj ni'ya a.

23 'O se 'unj me sí nocoo' man Diose, ne 'yaj suun 'unj che'é so', ne nií cua'aa ro', canicun' yo'o se mozó Diose rihanj,

<sup>24</sup> ne cataj so': "Se cuhu'ví so', man Pablo. 'O se no xcuún so' canicún so' rihaan síi cu'naj César, ne nihánj me se cataj xna'anj 'unj rihaan so' se vaa aj guun rá Diose se vaa caráán Diose rihaan sayuun che'é so' ga cunudanj nij síi nuu rque rihoo nihánj adonj", taj se mozó Diose rihanj a.

<sup>25</sup> Che'é dan naquiyaj niha' soj nimán soj, tinuj. 'O se 'unj me síi amán ya rá ni'yaj Diose se vaa quiyaj Diose nu' ndaa vaa cataj xna'anj se mozó Diose rihanj adonj.

<sup>26</sup> Tzaj ne 'o se cataj se mozó Diose rihanj se vaa ya quiri' rihoo nihánj tu'va 'o yo'óo taj rihaan na ya'anj adonj —taj Pabló rihaan yo'óo nij so' a.

<sup>27</sup> Dan me se quisij xca'anj güii vaj núj rihaan na ya'anj cu'naj Adria, quiyaj nana a. Ne rej yan' ro', guun rá nij síi tuguáj rihoo se vaa daj doj cuhi' núj rihaan 'o yo'óo a.

<sup>28</sup> Che'é dan xcaj ta'nga' nij so' me daj metró cunuú nuú na, ne xcaj nij so' cuentá se vaa icó xnu' yaan metró nuú na rej yo' a. Gaa ne na'vij nij so' 'o orá nii, ne xcaj ta'nga' uún nij so', ne xcaj nij so' cuentá se vaa icó chij guee metró cunuú nuú na a.

<sup>29</sup> Che'é dan cuhu'vi' nij so' se vaa cano rihoo yo' rihaan yuvej naj rque na ya'anj ne cachran' rihoo a. Che'é dan ca'anj nij so' rej xco rihoo, ne tananij nij so' ca'anj aga' ganchó rque na ya'anj, che'é rej nucu'lu' aga' yo' rque nij yuvej naj rque na ya'anj, ne canicún' rihoo yo' a. Ne guun ndo'o rá nij so' se vaa cuaj cuaj quisij güii ne guun nucuj nij so' quene'en nij so' me rej vaj nij so' a.

<sup>30</sup> Gaa ne nij síi tuguáj rihoo ro', guun rá nij so' cunanj ma'an inanj nij so', ne quinaniij nij so' rihaan sayuun quiran' tuvi' nij so' quiyaj rihoo yo', rá nij so' a. Che'é dan tu'va rma'an nij so' cataj nij so' se vaa ca'anj nij so' tananij nij so' doj aga' ganchó rque na ya'anj rej tacúún rihoo, ne ca'anj tananij nij so' rihoo cunii yo' rihaan na ya'anj catuú nij so' a.

<sup>31</sup> Tzaj ne ca'mii Pabló rihaan tanuu unun chij rihaan 'o cientó tanuu do', rihaan yo'óo nij tanuu do', cataj so':

—Sese se quináj nij síi nihánj rque rihoo nihánj, ne se ca'vee quinaniij ma'an soj rihaan sayuun a ma' —taj Pabló rihaan nij so' a.

<sup>32</sup> Gaa ne ca'anj nij tanuu, ca'ne' nij tanuu ne' numii rihoo cunii yo', ne quinij ma'an rihoo cunii yo' rihaan na ya'anj, ca'anj ni'ya ma'an yo' a.

<sup>33</sup> Ne nichrun' rá ranga', ne nago' Pabló chrej man yo'óo nij so' se vaa cha nij so' doj se chá a. Ne cataj so':

—Cuan' me síj 'o xnu' güii quinano' ndo'o rá nij soj, ne a doj ne cha soj se chá ma'.

<sup>34</sup> Che'é dan narque 'unj chrej man nij soj cuano se vaa cha soj á. Gaa ne guun nucuj soj quinaniij soj rihaan sayuun nanj á. 'O se a 'o yuvé raa a 'o nij soj se ca'anj ni'ya a ma' —taj so' rihaan yo'óo nij so' a.

<sup>35</sup> Síj ca'mii so' danj, gaa ne nicaj so' rachruún, ne nago' so' graciá rihaan Diose che'é rachruún ni'yaj cunudanj nij so', gaa ne cuxra' ta'aj so' rachruún, ne guun che'e so' chá so' a.

<sup>36</sup> Gaa ne guun niha' rá cunudanj nij so', ne ndaa ma'an nij so' chá uún a.

<sup>37</sup> Ne cunudanj núj sij vaj rque rihoo yo' ro', me vij cientó táa va'nuj chihaa xnu' yaan ya yuvi' a.

<sup>38</sup> Ne gaa quisij caraa rque nij so', ne quiri'fj nij so' nu' núú trigó rihaan na ya'anj, che'é rej gaa yoo doj rihoo a.

<sup>39</sup> Dan me se quisij güii, ne quene'en núj yo'óo, tzaj ne ne cunuú yaan núj yo'óo yo' a ma'. Tzaj ne quene'en nij so' 'o rej atúj yanij doj tzin' na ya'anj, ne

naj yo'óo chruu tu'va na ya'anj rej yo' a. Ne guun rá nij so' ca'anj rihoo rej yo' sese ca'vee ca'anj rihoo a.

<sup>40</sup> Che'é dan ca'ne' nij so' ne' noco' nij aga' ganchó, ne quináj nij aga' ganchó rque na ya'anj, qui'yaj nij so' a. Ne nache nij so' ne' numii chruun tuguáj rihoo, ne naxumaan mantá rej tacúun rihoo, qui'yaj nij so', ne guun rá nij so' go' nana rihaan mantá ne ca'anj rihoo rej naj yo'óo chruu yo', rá nij so' a.

<sup>41</sup> Tzaj ne ca'anj rihoo canó rihoo xráá 'o tacaan yo'óo chruu naj rque na, ne raan canó tacúun rihoo yo'óo chruu, ne ne ca'vee curihañj yo' a ma'. Ne nucuaj ndo'o go' na rej xco rihoo, ne ñaj doj quiri' rej xco rihoo, qui'yaj na yo' a.

<sup>42</sup> Ne guun rá nij tanuu ticavi' nij so' man nij síi 'nij taga' tumé nij so', che'é rej se ca'vee go' nij so' xtáj rihaan na ne cunanj nij so' rihaan nij tanuu a.

<sup>43</sup> Tzaj ne tanuu uun chij rihaan 'o cientó tanuu ro', ne ca'vej rá so' cavi' Pabló ma'. Che'é dan caráan so' chrej se qui'yaj yo'óo nij tanuu ñanj ma'. Ne ca'ne' so' suun se vaa nij síi ne'en go' xtáj rihaan na ro', güej asino nij so' rihaan na go' nij so' xtáj rihaan na ca'anj nij so' rihaan yo'óo a.

<sup>44</sup> Ne yo'óo nij so' ro', cano' nij so' rcuchra' do', chruun cavii rihoo yo' gaa cachran' rihoo do', ne ca'anj nij so' rihaan yo'óo yo', taj so' a. Ne ñanj qui'yaj nij so', ne cuchi' cunudanj nij so' rihaan yo'óo, ne quinanii cunudanj nij so' a.

## 28

### *Nana nihánj taj xna'anj daj qui'yaj Pabló yo'óo cu'ñaj Malta a*

<sup>1</sup> Dan me se gaa cuchi' sa' núj yo'óo taj rihaan na ya'anj yo', ne xcaj núj cuentá se vaa yo'óo cu'ñaj Malta me yo' a.

<sup>2</sup> Ne nij síi chihanj yo'óo yo' ro', ve'é uxrá qui'yaj nij so' ga núj a. 'O se nicaj tuvi' ndo'o nij so' ga núj, ne che'é se caman' maan ne acoj tiha', ne che'é dan naran' nij so' ya'an cunu guun núj a.

<sup>3</sup> Gaa ne naran' Pabló 'o nánj rca', ne cuta' so' rihaan ya'an a. Ne che'é se ya'aan ndo'o ya'an, ne che'é dan curihañj 'o xcuáá yuva rque rca' yo', ne canó xo' ra'a Pabló a.

<sup>4</sup> Ne gaa quene'en nij síi man rej yo' se vaa noco' xcuáá ra'a Pabló, ne cataj nij so' rihaan tuvi' nij so' a:

—Ya ya sij ticavi' yuvii me síi nihánj ñanj á. 'O se nda' se quinanii so' rihaan na ya'anj, tzaj ne che'é se tumé so' cacun', ne che'é dan ne no xcúun so' gaa i'na' so' ma' —taj nij so' rihaan tuvi' nij so' a.

<sup>5</sup> Tzaj ne nacunan' Pabló ra'a so', ne quinij xcuáá rihaan ya'an, ne ne qui'yaj chi'ii xcuáá a doj man Pabló a ma'.

<sup>6</sup> Tzaj ne nij síi man yo'óo yo' ro', guun rá nij so' se vaa caraa cu'maan ra'a so', ase taj ni'yón cavi' so' ne naxru' so' rihaan yo'óo, tzaj ne gaa guun raan na'vij nij so' quiran' so' ñanj, ne gaa quene'en nij so' se vaa ne quiran' so' a doj se chi'ii, ne noná nij so' se nana' nij so', ne cataj nij so' se vaa 'o ya'anj me Pabló a.

<sup>7</sup> Dan me se nichrun' rej yo' me se naj to'óo síi uun chij doj rihaan yo'óo taj rihaan na ya'anj yo', ne Publio cu'ñaj so' a. Ne nicaj tuvi' so' ga núj, ne va'núj güii ve'é taj ya'anj so' man núj a.

<sup>8</sup> Dan me se nacaa ndo'o rej Publio yo', ne naj so' rihaan yuvéé, ne ran' ndo'o so' chi'ii ton a. Gaa ne catúj Pabló rej naj so', ne cachúin ni'yaj Pabló rihaan Diosé che'é so', gaa ne cuta' Pabló ra'a Pabló xráá so', ne dan me se nahuun sa' so', qui'yaj Pabló a.

<sup>9</sup> Gaa quisij qui'yaj Pabló danj, ne yo'ó nij sí anó chi'iij yanj yo'óo yo' ro', ca'na' nij so' uún rihaan Pabló, ne nahuun sa' nij so', qui'yaj Pabló a.

<sup>10</sup> Gaa ne caráj cochroj uxrá nij so' rihaan núj, ne gaa curihanj núj yo'óo yo', ne rque' nij so' rihaan núj cunudanj nij rasuun cachiin man núj a.

*Nana nihánj taj xna'anj se vaa cuchí' Pabló chuman' Romá a*

<sup>11</sup> Dan me se cachén va'núj yavii, gaa ne cavii núj rque yo'ó rihoo chéé rihaan na ca'anj núj a. Ne xa' rihoo yo', tzaj ne rihoo quínáj sa' tu'va yo'óo taj rihaan na ya'anj yo' nú' nij yavii avii nana yuvaa me yo', ne rihoo cavii chuman' Alejandría me yo', ne no se tinanga' roj ya'anj cuaté cu'naj Cástor ga Pólux rihaan rihoo yo' a.

<sup>12</sup> Dan me se cuchí' núj chuman' cu'naj Siracusa, ne va'núj güii caran' núj chuman' yo' a.

<sup>13</sup> Gaa ne cavii uún rihoo chuman' Siracusa, ne cachén rihoo nichrun' tu'va na ya'anj, ne cuchí' rihoo ndaa chuman' Regio a. Gaa ne cachén 'o güii, gaa ne cavii 'o nana rej rque rihaan na ya'anj, ne ca'anj rihoo, ne rque vj güii cuchí' núj ndaa chuman' cu'naj Puteoli a.

<sup>14</sup> Ne chuman' Puteoli ro', nari' núj doj tinúú ní', ne cachíin ni'yaj nij so' rihaan núj se vaa caran' núj chij güii ga' nij so' a. Ne gaa quisij chij güii, ne nayón núj chrej, ne ca'anj núj chrej vaj ndaa chuman' Romá a.

<sup>15</sup> Ne cuchí' nana che'é núj rihaan nij tinúú ní' sí yanj chuman' Romá, ne ca'na' nij so' nari' tuvi' nij so' ga' núj chuman' cu'naj Foro de Apio do', chuman' cu'naj Tres Tabernas do' a. Ne gaa quene'en Pabló man nij so', ne nago' so' graciá rihaan Diose, ne nari' nucuj nimán so' a.

<sup>16</sup> Ne gaa quisij catúj núj chuman' Romá, ne tacuachén tanuu uun chij rihaan 'o cientó tanuu man nij sí 'nij taga' rihaan yo'ó tanuu uun chij doj, ne ca'vej rá nij sí nicaj suun caran' Pabló rá 'o ve' ne cayáán orún' so' ga' tanuu tumé man so' a.

*Nana nihánj taj xna'anj daj ca'mii Pabló ga' nij sí uun chij rihaan nij yuvii israelitá yanj chuman' Romá a*

<sup>17</sup> Dan me se cachén va'núj güii, gaa ne canacúun Pabló man nij sí uun chij rihaan nij yuvii israelitá yanj chuman' Romá se vaa cunu chre' nij so' ga' so' a. Ne gaa quisij cunu chre' nij so', ne cataj so' rihaan nij so' a:

—Xa' 'unj nihánj, tzaj ne taj vaj cacun' qui'yáa 'unj rihaan tuvi' ní' sji israelitá do', rihaan se tucuanj xii ní' do' man tinuj. Tzaj ne tuvi' ní' sí yanj chuman' Jerusalén ro', numíj nij so' manj ne tacuachén nij so' manj rihaan nij sí romanó adonj.

<sup>18</sup> Ne nij sí romanó ro', taj se vaa taj che'é cavj' 'unj rá nij so' gaa naqui'yaj cuu' nij so' che'ej ma'. Ne guun rá nij so' quirij' nij so' taga' manj a.

<sup>19</sup> Tzaj ne cuta' ndo'o nij sí israelitá yo' cacun' xráj, ne che'é dan nó xcúnj cachinj ni'yáj rihaan sí cu'naj César se vaa ca'ne' so' cacun' che'ej a. Tzaj ne taj a 'ó cacun' cuta' 'unj xráá soj sji man chiháan 'unj ma'.

<sup>20</sup> Che'é dan canacúun 'unj man nij soj ca'na' soj, che'é se guun rá 'unj quene'én 'unj man soj do', ca'mii 'unj ga' soj do' a. 'Q se che'é sí ca'vee qui'yaj cavii sa' ní' sji israelitá me se numí 'unj 'yaj aga' ne' nihánj adonj —taj Pabló rihaan yo'óo nij sí israelitá yo' a.

<sup>21</sup> Gaa ne cataj nij so' rihaan Pabló a:

—Xa' nij tuvi' ní' sí' yanj estadó Judea, tzaj ne taj yanj cartá ca'néé nij so' rihaan núj nayaa núj ma'. Ne a 'ó tinúú ní' ne ca'na' rihaan núj nata' nana chí'ij che'é so' rihaan núj ma'.

<sup>22</sup> Ne vaa che'é cataj ma'an so' rihaan núj daj uun rá so', rá núj a. 'Q se tucuaán ino noco' nij tuví' nij soj me se ne'en núj se vaa me rej ma'an a'mii chí'ij yuvij che'é tucuaán yo' nanj á —taj nij so' rihaan Pabló a.

<sup>23</sup> Dan me se cachrón nij so' güii ca'na' uún nij so' ve' yanj Pabló, ne güii yo' me se ca'na' que'ee tuvi' nij so' a. Gaa ne nata' Pabló rihaan nij so' che'é suun uun chij Diose nimán yuvij do', rihaan chumij nihánj vaa güii do' a. Ne nayaa so' se tucuanj sí' cu'naj Moisés do', nana cachrón nij sí' nata' se nana Diose rihaan yanj gaa naá do', ne cataj xna'anj so' me che'é no xcuún nij so' cuchuman rá nij so' cunó nij so' se nana Jesucristó a. Dan me se asij na'yaan guun che'ë so' ca'mii so' rihaan nij so', ne ndaa ca'anj güii navij ca'mii so' a.

<sup>24</sup> Ne ta'aj nij so' ro', cuchumán rá se nana so', ne yo'ó ta'aj nij so' ne cuchuman rá nana yo' ma'.

<sup>25</sup> Ne ne guun cayaan rá cunudanj nij so' a ma'. Ne guun che'ë nij so' ca'anj nij so' a. Tzaj ne gaa ataa ca'anj nij so', ne ca'mii Pabló orún' nana rihaan nij so', cataj so'.

—Cunaj uxrá vaa nana nihánj nana rqué Nimán Diose rihaan xii ní' gaa ca'mii sí' cu'naj Isaías sí' nata' se nana Diose gaa naá rihaan nij so' a.

<sup>26</sup> Nana ca'mii Isaías rihaan nij so' me nana ca'mii ma'an Diose rihaan so' a: “Cuchí' so' rihaan nij so' ne cataj xna'anj so' rihaan nij so' se vaa catuu uxrá nana xréé nij so', tzaj ne se xcaj nij so' cuentá ma'. Ne ni'yaj uxrá nij so', tzaj ne se quene'en nij so' ma'.

<sup>27</sup> 'Q se caráan ma'an nij yuvij nihánj rihaan nij so' che'é rej na'vej rá nij so' quene'en ma'an nij so', ne caráan nij so' xréé nij so', che'é rej na'vej rá nij so' cunó nij so' uún a. Ne ne atúj nana nimán nij so', 'yaj nij so', che'é yan na'vej rá nij so' xcaj nij so' cuentá ne canicaj nimán nij so' ma'. 'Q se na'vej rá nij so' nahuun sa' nimán nij so' qui'yáa 'unj a man adonj”, me se nana Diose ca'mii sí' cu'naj Isaías gaa naá a.

<sup>28</sup> Che'é dan xcaj soj cuentá se vaa aj ca'anj nana nihánj rihaan nij sí' yanj, ne nij so' me sí' cuchuman rá se vaa tinaniú Diose man nij so' rihaan chrej chí'ij uun chij nimán nij so' a. 'Q se nij so' me sí' cunó ya nana nihánj nanj á —taj Pabló rihaan nij sí' uun chij rihaan nij yuvij israelitá yanj chuman' Romá yo' a.

<sup>29</sup> Síj ca'mii so' danj, gaa ne cavii nij yuvij israelitá yo' ca'anj nij so', ne ca'mii canó tuvi' ma'an nij so' ga tuvi' nij so' a.

<sup>30</sup> Dan me se vij ya yo' cayáan Pabló chuman' Romá yo', ne ma'an so' go' tu'vee ve' ne so' a. Ne ve'é ca'mii so' ga cunudanj nij sí' ca'na' ni'yaj man so' a.

<sup>31</sup> Ne ca'mii natáj so' che'é suun uun chij Diose nimán yuvij do', rihaan chumij nihánj vaa güii do', ne tucuyón so' se nana Jesucristó sjj 'nij ra'a man ní', ne a doj ne kuchu'vi' so', ne ne caráan nii chrej rihaan so' qui'yaj so' danj a ma'.

## Nihánj me 'o yanj cartá qui'yaj síi cu'naj Pablo ca'néé so' rihaan nij yuvií noco' man Diose yanj chuman' cu'naj Romá a

<sup>1</sup> 'Uñj me síi cu'naj Pablo, ne 'yaj sunj rihaan Jesucristó a. Dan me se canacúun Jesucristó mán 'uñj guún 'uñj apóstol che'é rej nata' 'uñj se-nānā Diose nana sa' rihaan yuvií,

<sup>2</sup> ne dan me se gaa naá cataj Diose rihaan nij síi nata' se-nānā Diose gaa naá, ne vaa güii tñanii ya Diose man yuvií rihaan sayuun, ne cuno nij síi nata' se-nānā Diose, ne cachrón nij so' nana ca'mii Diose rihaan yanj cu'naj danj Diose nanj adonj.

<sup>3-4</sup> Dan me se cataj xna'anj Diose che'é Jesucristó sji 'njj ra'a man ní', ne dan me se ta'níi Diose me Jesucristó, ne sji noco' xna'anj tuvi' gā síi cu'naj David síi cane gaa naá me so', ne dan me se ase vaa nee man síi cu'naj David ro', danj vaa nee man so' uún, tzaj ne cavi' so', gaa ne cunuu i'na' uún so', ne che'é dan me ne'en ní' se vaa ya ta'nij Diose me so' ne síi sa' nimán me uún so' a.

<sup>5</sup> Inañj che'é Jesucristó me qui'yaj Diose se luj che'ej se vaa cune' Diose manj ca'anj 'uñj rihaan nij yuvií yaníj a. Dan me se ne ca'anj 'uñj rihaan nij yuvií israelitá ma'. Tzaj ne ca'anj 'uñj rihaan nij yuvií yaníj, ne dan me se me rá Diose cataj xna'anj 'uñj se-nānā Diose rihaan nij yuvií yaníj yo', che'é rej cuchuman rá nij so' nana sa' yo', gaa ne cuno nij so' rihaan Diose adonj.

<sup>6</sup> Ne yuvií yaníj me ta'aj nij soj uún, ne canacúun Jesucristó man ma'an soj sji yaníj canoco' soj man so' adonj.

<sup>7</sup> Dan me se 'yáa 'uñj yanj nihánj ca'nej 'uñj rihaan nij soj sji yanj chuman' Romá sji 'ee ndo'o rá Diose man, ne dan me se canacúun Diose man soj guun soj síi gaa sa' nimán, ne me raj qui'yaj Rej ní' Diose qui'yaj Jesucristó sji 'njj ra'a man ní' qui'yaj se luj che'é soj, ne me raj gaa xej nimán soj, qui'yaj uún roj so' adonj.

*Nana nihánj taj xna'anj se vaa me ndo'o rá síi cu'naj Pablo cuchí' so' chuman' Romá a*

<sup>8</sup> Cuno yuvií man nu' cachra' rihaan chumii se vaa amán rá nij soj ni'yaj soj Diose, ne che'é dan me nagó' 'uñj graciá rihaan Diose, ne racuíj Jesucristó mán 'uñj nago' 'uñj graciá rihaan Diose che'é cunudanj soj ei.

<sup>9</sup> Dan me se 'yaj suun 'uñj rihaan Diose, ne nata' 'uñj nana sa' se-nānā ta'níi Diose síi cu'naj Jesucristó, ne che'é dan ne'en Diose se vaa ya ya niganj achíin ni'yáj rihaan Diose che'é soj ei.

<sup>10</sup> Ne gaa achíin ni'yáj rihaan Diose, ne achíin ni'yáj che'é soj, ne dan me se achíin ni'yáj rihaan Diose se vaa ca'vej so' cuchij chiháan soj vaa güii,

<sup>11</sup> ne me raj quene'enj man soj, ne me raj narquej chrej nucuj man soj, che'é rej quinaríj nucuj nimán soj a.

<sup>12</sup> Dan me se nucuj ndo'o rá cunudanj ní' man tuvi' ní', ne che'é dan me asa' nari' tuvi' ní', ne narque ní' chrej nucuj man tuvi' ní' á.

<sup>13</sup> Ne me raj quene'enj soj se vaa guun que'ee güii cachronj cuchij chiháan soj, tinuj, nocoj. Tzaj ne ne ca'vee cuchij, che'é se vaa ndo'o suun rihanj, tzaj

ne ase vaa natá' 'un̄j rihaan yo'ó nij yuvij yan̄j ro', dan̄j gaā gueē nata' 'un̄j rihaan soj a. Ndāa síj, gaā nē cunūu rij̄i doj tuvi' ní', qui'yaj ní' adon̄j.

<sup>14</sup> Dan me se che'é se nō xcúun 'un̄j nata' 'un̄j rihaan cunudan̄j nij yuvij yan̄j ro', che'é dan nata' 'un̄j rihaan soj, nē dan me se rihaan nij síi man̄ chuman' nocoō do', rihaan nij síi yan̄j quij do', rihaan nij síi avii rāa do', rihaan nij síi ne nicaj cuentá do', rihaan cunudan̄j nij so' natá' 'un̄j a.

<sup>15</sup> Che'é dan niha' ndo'o raj cuchij chuman' Romá ca'mii natáj 'un̄j se-nanā Diose nanā sa' rihaan soj uún adon̄j.

*Nanā nihánj taj xna'an̄j se vaa vaa ndo'o yu'vee nó se-nanā Diose nanā sa' a*

<sup>16</sup> Taj ā doj chrej na'aj nó rihan̄j ca'mij se-nanā Diose nanā sa' ma'. 'O se nanā nucuaj uxrá me se-nanā Diose, nē dan me se ca'mii Diose se-nanā Diose cun̄o yuvij, nē cuchuman̄ rá nij yuvij cun̄o nij yuvij nanā, nē tinanii Diose man̄ nij yuvij rihaan sayuun, nē dan me se asino yāan me rá Diose tinanii Diose man̄ nij yuvij israelitá rihaan sayuun, nē me rá uún Diose tinanii Diose man̄ nij yuvij yan̄j rihaan sayuun uún adon̄j.

<sup>17</sup> Dan me se cataj se-nanā Diose rihaan ní' se vaa ca'vee cunūu sa' nimán ní' rihaan Diose, qui'yaj Diose, gaā nē amán rá ní' ni'yaj ní' Diose, nē che'é dan cunūu sa' nimán ní' rihaan Diose a. Ndāa síj, gaā nē cuchuman̄ doj rá ní' ni'yaj ní' man Diose a. Veé 'ō cuyaān vaa nanā nihánj gā nanā nō rihaan dan̄j Diose, taj yo' se vaa: "Māan che'é se amán rá ní' ni'yaj ní' man Diose, che'é dan cunūu sa' nimán ní', nē gaā i'na' ní' rihaan Diose nu' cavii nu' ca'an̄j adon̄j", taj dan̄j Diose a.

*Nanā nihánj taj xna'an̄j che'é cacun' qui'yaj yuvij a*

<sup>18-19</sup> Aj cataj xna'an̄j Diose síi nicun' xtá' rihaan ní' se vaa a'maan rá Diose ni'yaj Diose cunudan̄j se chi'ii 'yaj nij yuvij, nē me rá Diose xcaj nij yuvij cuentá se vaa síi uun chij sa' me so', nē che'é dan qui'yaj Diose daj a rasuun man̄ rihaan chumij nihánj ni'yaj yuvij a. Aj ne'en yuvij rasuun, nē xcaj nij yuvij cuentá se vaa síi uun chij sa' ndo'o me Diose, tzaj nē in̄anj cacun' 'yaj nij yuvij, nē che'é dan taj se 'yá' cun̄o nij yuvij nanā yā a ma'. Che'é dan me a'maan rá Diose ni'yaj Diose man̄ nij yuvij a.

<sup>20</sup> Dan me se gaā qui'yaj Diose chumij, nē curuvi' nu' rasuun qui'yaj Diose ni'yaj yuvij, nē nuvi' ma'an̄ Diose ni'yaj yuvij, tzaj nē ne'en yuvij nij rasuun qui'yaj Diose, nē xcaj nij yuvij cuentá se vaa síi uun chij ndo'o me Diose, nē dan me se xcaj nij yuvij cuentá se vaa yā orún' so' me Diose, nē xcaj nij yuvij cuentá se vaa gaā nucuaj ndo'o Diose nu' cavii nu' ca'an̄j, rá Diose a. Che'é dan sese cataj nij yuvij se vaa ne ne'en nij yuvij daj vaa Diose, nē síi nē me nij yuvij nan̄j adon̄j. 'O se aj quene'en nij yuvij nu' rasuun qui'yaj Diose adon̄j.

<sup>21</sup> Dan me se aj quene'en nij yuvij daj vaa Diose, tzaj nē nē cataj nij yuvij se vaa sa' vaa Diose ma'. Ne nago' nij yuvij graciā rihaan Diose ma'. Me rá nij yuvij cavii rāa ma'an̄ nij so' daj vaa Diose, tzaj nē se guun nucuaj nij so' qui'yaj nij so' dan̄j ma'. Che'é dan in̄anj rāa ma'an̄ nij so' vaj nij so', nē ne ca'vee xcaj nij so' cuentá a ma'.

<sup>22</sup> Síi cuu rāa me nij so', taj ma'an̄ nij so', tzaj nē ca'mii nē nij so', nē tan̄anj nahuun nij so' síi ni'yon̄ doj a.

<sup>23</sup> Diose me síi ve'é ndo'o vaa, nē daj chihaā m̄j ne avi' so', nē che'é dan nō xcúun yuvij canoco' yuvij man so' adon̄j. Tzaj nē na'vej rá nij yuvij canoco' nij yuvij Diose yā ma'. Māan se yuvij do', xtáj do', xcuu do', xcuáá do',

tinanga' nij yuvij, ne yo'ó rasuun 'anj ni'ya uun rihaan yo'óó nihánj tinanga' nij so', ne taj nij so' se vaa ya'anj me tinanga' nij so', taj nij so' nanj adonj.

<sup>24</sup> Che'é dan ca'ne' rá Diose ga nij so' qui'yaj nij so' me se nij me rá ma'an nij so' qui'yaj nij so', ne inanj se nij ndo'o qui'yaj nij so' nanj adonj. Dan me se qui'yaj ndo'o nij so' cacun' man ma'an nij so', ne inanj se nij qui'yaj nij so' ga tuvi' nij so',

<sup>25</sup> ne se-nana Diose nana ya ne ca'vej nij so' cuno nij so' a ma'. Maan se nana ne cuno nij so' nanj adonj. Ne na'vij nij so' rihaan nij rasuun qui'yaj Diose, tzaj ne rihaan ma'an Diose ne na'vij nij so' ma'. Ne Diose me sí guun chij uxrá rihaan cunudanj rasuun nu' cavii nu' ca'anj adonj. Veé danj gaa ya ei.

<sup>26</sup> Che'é dan ca'ne' rá Diose ga nij yuvij qui'yaj ma'an nij yuvij se nij, ne nij chana me se ne ca'vej rá nij chana cotoj nij no' ga nica nij no' a ma'. 'Q se naqui'yaj nij ta'aj nij chana chii man nij chana, ne otoj nij no' ga tuvi' chana ma'an nij no' nanj adonj.

<sup>27</sup> Ne adj' se 'yaj nij chana ga tuvi' chana nij no' ro', danj qui'yaj guee nij snó'o uún ga tuvi' snó'o so' uún nanj adonj. Dan me se síj cotoj nij snó'o ga nica nij so', ne guun rá nij so' cotoj nij so' ga tuvi' snó'o nij so', ne nij ndo'o qui'yaj nij snó'o, ne quiran' nij so' sayuun che'é se nij qui'yaj nij so' adonj.

<sup>28</sup> Ne ca'vej rá nij yuvij quene'en nij yuvij daj vaa Diose a ma'. Che'é dan ca'ne' rá Diose ga nij yuvij, ne navij raa nij yuvij snúu nanj á. Ndaa síj, gaa ne inanj se nij 'yaj nij yuvij, ne dan me se 'yaj nij so' inanj se na'vej rá Diose qui'yaj nij so' nanj adonj.

<sup>29</sup> Quij vaa nimán nij yuvij a. Inanj me rá nij yuvij guun nij yuvij sí ru'vee doj, ne uun xcoj ruvaa rá nij yuvij ni'yaj nij so' tuvi' nij so' a. Ticavi' nij yuvij tuvi' nij yuvij, gaa ne anicaj nij yuvij unu' nij so' a. Nano' ndo'o nij yuvij daj qui'yaj nij yuvij, qui'yaj chi'ii nij yuvij man tuvi' nij yuvij a. Nanó nij so' cuentó ne che'é tuvi' nij so',

<sup>30</sup> ne nij a'mii nij so' che'é tuvi' nij so' a. Na'vej uxrá rá nij so' ne'en nij so' Diose a ma'. Inanj nana xcoj ruvaa a'mii nij so' ga tuvi' nij so' a. Síj sa' uxrá me nij so', rá nij so', ne che'é dan guun chij nij so', rá nij so' a. Niganj yaj a'yuj nuchruj raa nij so' daj gaa qui'yaj nij so', qui'yaj chi'ii nij so' man tuvi' nij so' a. Ne uno nij so' a'mii rej nij so' a'mii nii nij so' a'mii a ma'.

<sup>31</sup> Síj ni'yon me nij so', ne a 'ó tuvi' nij so' ne nucuaj rá ni'yaj man nij so' a ma'. Ne 'ee rá nij so' tuvi' nij so' ma'.

<sup>32</sup> Ne'en nij so' se vaa quiran' nij so' sayuun, qui'yaj Diose, tzaj ne ne acaj nij so' cuentá ni'yaj nij so' nana a'mii Diose a ma'. Maan se inanj cacun' 'yaj nij so', ne ndaa niha' rá nij so' ni'yaj nij so' man yo'ó yuvij 'yaj cacun' adonj.

## 2

*Nana nihánj taj xna'anj daj qui'yaj Diose asq' ca'ne' Diose cacun' che'é 'o 'o yuvij a*

<sup>1</sup> Me che'é taj so' se vaa orún' tuvi' so' tumé cacun' ga. 'Q se 'o cuyaan vaa cacun' 'yaj ma'an so' ga cacun' 'yaj tuvi' so', ne sese cutá' so' cacun' xráa tuvi' so', ne cutá' uún nii cacun' xráa ma'an so' adonj.

<sup>2</sup> Ya uxrá Diose me sí ca'ne' cacun' che'é cunudanj sí 'yaj danj adonj. Dan me se inanj nana ya ca'mii Diose güii ca'ne' so' cacun' che'é yuvij, ne nu' sí chi'ii ro', quiran' ndo'o nij so' sayuun, qui'yaj Diose ei.



<sup>3</sup> Dan me se utá' so' cacun' xráá tuví' so', ne 'o' cuyaán vaa cacun' 'yaj ma'án so' uún a. Asa' ca'vee quinanij so' rihaan sayuun asa' ca'ne' Diose cacun' che'é cunudanj yuvij, rá so' ga.

<sup>4</sup> Me che'é ne guun ya rá so' se vaa me rá Diose qui'yaj sa' Diose che'é so' ga. Ne me rá uún Diose caraa x'naa Diose che'é so' adonj. Na'vej rá Diose qui'yaj Diose sayuun mán so' ma'. Ne ne'en so' ase Diose me sí' 'ee rá ní'yaj mán so' a. Ne me rá Diose canicaj nimán so' canocó' so' man so' adonj.

<sup>5</sup> Tzaj ne veé dan me se na'vej uxrá rá so' tanáj so' chrej noco' so', ne na'vej rá so' canicaj nimán so' canocó' so' man Diose ma'. Ne vaa güii ca'ne' Diose cacun' che'é yuvij, ne ca'mij ya Diose, ne caxrij yuvaa Diose man cunudanj nij sí' tumé cacun', ne dan me se caxrij yuvaa Diose man ma'án so' uún adonj. Ma'án so' qui'yaj caxrij yuvaa Diose mán so' nanj á.

<sup>6</sup> Dan me se ca'ne' Diose cacun' che'é 'o' 'o' yuvij, ne sese sa' qui'yaj yo'o so', ne sa' qui'yaj Diose ga so', ne sese yo'o so' qui'yaj cacun', ne ca'anj so' rihaan ya'an, qui'yaj Diose a. Danj gaa qui'yaj Diose adonj.

<sup>7</sup> Dan me se ta'aj yuvij racúj man tuvi' nij so', ne inanj 'yaj nij so' se sa' che'é tuvi' nij so', che'é rej cataj Diose se vaa sa' qui'yaj nij so' a. Me rá nij so' cayáán nij so' ga Diose nu' cavii nu' ca'anj, ne ya uxrá danj gaa qui'yaj Diose á. Cayáán nij so' ga Diose nu' cavii nu' ca'anj, qui'yaj Diose adonj.

<sup>8</sup> Xcoj ruvaa ndo'o rá yo'ó ta'aj yuvij, ne ne uno nij so' nana ya ma'. Maan se tucuáán chí'ij inanj noco' nij so', ne che'é dan caxrij yuvaa Diose man nij so' a.

<sup>9</sup> Qui'yaj Diose sayuun man cunudanj nij sí' qui'yaj se nij, ne quiran' ndo'o nij so' sayuun, qui'yaj Diose, ne asino ca'ne' Diose cacun' che'é nij sí' israelitá, gaa ne guun che'e so' ca'ne' so' cacun' che'é nij yuvij yanj a.

<sup>10</sup> Tzaj ne sa' uxrá qui'yaj Diose ga nij yuvij qui'yaj se sa', ne Diose me sí' cataj se vaa sa' qui'yaj nij so', ne gaa xej nimán nij so', ne se chuhu'vi' nij so', qui'yaj Diose ma'. Danj qui'yaj uún Diose che'é nij yuvij israelitá qui'yaj se sa', gaa ne danj qui'yaj uún so' che'é nij yuvij yanj a.

<sup>11</sup> Veé 'o' cuyaán vaa cunudanj ní' rihaan Diose, ne 'o' cuyaán qui'yaj Diose che'é 'o' 'o' ní', ne dan me se ase vaa qui'yaj ní' gaa cayáán ní' rihaan chumij nihánj ro', danj gaa guee qui'yaj Diose ga ní' adonj.

<sup>12</sup> Yuvij noco' se-tucuanj Moisés me nij yuvij israelitá, ne che'é dan, sese ne 'yaj nij yuvij israelitá nu' se-tucuanj Moisés, ne qui'yaj Diose sayuun man nij so' a. Ne noco' nij yuvij yanj se-tucuanj Moisés, tzaj ne ne'en ma'an nij so' daj me rá Diose qui'yaj nij so', ne che'é dan quiran' nij so' sayuun sese se ca'vej rá nij so' qui'yaj nij so' ndaa vaa taj Diose adonj.

<sup>13</sup> Ca'vee se ne'en uxrá ní' daj vaa se-tucuanj Moisés, tzaj ne sese se qui'yaj ní' ndaa vaa taj tucuáán yo', ne se cunuu sa' nimán ní' rihaan Diose ma'. Tzaj ne sese qui'yaj ní' ndaa vaa taj tucuáán yo', ne ya cunuu sa' nimán ní' rihaan Diose adonj.

<sup>14</sup> Ndá' se ne ne'en nij yuvij yanj se-tucuanj Moisés, tzaj ne avii inanj raa ma'an nij so' qui'yaj ma'an nij so' ndaa vaa me rá Diose qui'yaj yuvij adonj. Ne'en ní' se vaa 'yaj ma'an nij so' se vaa me rá Diose qui'yaj nij so', ne xcaj ní' cuentá se vaa nicaj nij so' tucuáán me rá Diose canocó' yuvij,

<sup>15</sup> ne che'é se vaa 'yaj nij so' ro', che'é dan ne'en ní' se vaa ne'en ma'an nij so' daj me rá Diose qui'yaj yuvij, ne dan me se sese 'yaj nij so' se nij, ne ne'en ma'an nij so' se vaa na'vej Diose qui'yaj nij so' danj a. Ne nuchruij raa nij tuvi'

nij so' me tucuaán sa' qui'yaj nij so', ne che'é dan ne'en ní se vaa ya ne'en nij so' daj me rá Diose qui'yaj nij so' adonj.

16 Ne danj gaa ca'ne' Diose cacun' che'é nij so' güii ca'ne' Diose cacun' che'é nimán yuvii á. Danj a'mii se-nana Jesucristó nana sa' a'mij rihaan yuvii ei.

*Nana nihánj taj xna'anj se vaa ne noco' sa' nij yuvii israelitá se-tucuanj Moisés ma'*

17 Tzaj ne ya yuvii israelitá mé so', rá so' á. Nucuaaj rá so' se vaa cavii sa' so', qui'yaj se-tucuanj Moisés, ne ne'én so' Diose, rá so' á.

18 Ne'én so' daj me rá Diose qui'yáa so', ne tucu'yón so' se-tucuanj Moisés, ne inanj sa' 'yáa so', rá ma'án so' á.

19 Ne'en ma'án so' tijaán so' chrej man nij yuvii aráán rihaan, rá so' á.

20 Ne'én so' tucu'yón so' man nij yuvii ni'yon do', man nij xnii do', rá so' á. Che'é se tucu'yón so' se-tucuanj Moisés, ne che'é dan ne'én so' nu' nana ya, rá so' á.

21 Sese ne'én so' tucu'yón so' man yo'ó yuvii ro', me che'é na'vej rá so' tucu'yón so' man ma'án so' ga. A'mii natáj so' rihaan yuvii se vaa se qui'yaj ituu yuvii ma'. Tzaj ne ma'án so' me síi ituu, ne me che'é 'yaj ituu so' ga.

22 Se cotoj yuvii ga nica tuvi' yuvii, taj so', tzaj ne me che'é otoj so' ga nica tuvi' so' ga. Nij ndo'lo vaa ya'anj acóy yuvii, rá so', tzaj ne me che'é 'yaj ituu so' sa'anj nuu tacóo nij ya'anj yo' ga.

23 Sa' uxrá 'yáa so' unó so' nu' se-tucuanj Moisés, taj so', tzaj ne veé dan me se 'yaj ndo'lo so' cacun' na'vej rá Diose qui'yáa so', ne che'é dan a'nga' nacoó yuvii ni'yaj nij yuvii Diose, 'yáa so' adonj.

24 'Q se aj qui'yaj soj ndaa vaa taj nana no rihaan danj Diose adonj. Nanj taj danj Diose, ne: "Ma'an soj sji israelitá 'yaj a'mii yuvii yanj nana nij che'é Diose á". Nihánj me nana ca'mii Diose che'é ma'an soj adonj.

*Nana nihánj taj xna'anj se vaa me rá Diose canoco' nimán yuvii man Diose a*

25 Cuta' nii ta'nga' man nee mán so' asanj. Cunaaj vaa yo', sese ya unó so' nana ca'mii Diose, tzaj ne sese ne unó so' se-nana Diose, ne taj se gún' man ta'nga' yo' ma'.

26 Ne xa' síi yanj, tzaj ne sese 'yaj so' se vaa me rá Diose qui'yaj yuvii, ne ase vaa síi taj ta'nga' man ro', danj vaa guee so' rihaan Diose adonj.

27 Dan me se ne'én so' sji israelitá nu' se-tucuanj Moisés, ne cuta' nii ta'nga' mán so', tzaj ne sese se cunó so' rihaan Diose, ne cuta' nii cacun' xráa so', cataj nii se vaa sa' doj 'yaj síi yanj ase 'yáa so' á. Nda' se taj ta'nga' táa man síi yanj, tzaj ne 'yaj so' ndaa vaa me rá Diose qui'yaj so' a, cataj nii a.

28 Tzaj ne ca'vee se qui'yaj yo'ó so' nu' se-tucuanj nij yuvii israelitá, tzaj ne nuveé sji israelitá ve'é noco' man Diose me so', qui'yaj tucuaán yo', ni'yaj Diose ma'. Ca'vee se cuta' nii ta'nga' nee man yo'ó so', tzaj ne se ca'vee guun so' síi sa' uno rihaan Diose, qui'yaj ta'nga' yo' ma'.

29 Ca'vee se nu' nana no rihaan yanj noco' yo'ó so', tzaj ne nuveé sji israelitá ve'é noco' man Diose me so', qui'yaj yanj yo', ni'yaj Diose ma'. Tzaj ne me ma'an síi noco' ya man Diose ne nahuun sa' nimán, ne ase vaa yo'ó yuvii israelitá ro', danj gaa so' rihaan Diose, ne ca'vee se ca'mii yuvii nana chi'ii che'é so', tzaj ne ne rihuun rá so' ma'. 'Q se ma'an Diose cataj se vaa sa' uxrá qui'yaj so' adonj.

## 3

*Nana nihánj taj xna'anj se vaa sa' uxrá qui'yaj Diose che'é nij yuvij israelitá a*

<sup>1</sup> A me se ca'vee doj qui'yaj canaán ní' sji israelitá, rá so' ga. Ne a me rasuun quiri' ní' qui'yaj yan ata' ní' ta'nga' ga.

<sup>2</sup> O se vaa se uun ya ní' sji israelitá ei. Dan me se asino cataj xna'anj Diose nu' se-nana Diose rihaan xii ní' gaa naá, ne nucuaj rá Diose man ní' se vaa cutumé sa' ní' se-nana so', ne se quini'yón ní' man yo', rá Diose a.

<sup>3-4</sup> Ta'aj tuvi' ní' ne cuchuman rá ni'yaj se-nana Diose ma'. Tzaj ne taj se 'yaj ma'. A ó gúii se quini'yón Diose nana ca'mii so' rihaan ní' sji israelitá ma'. Nucuaj rá ní' man so' se vaa qui'yaj so' cunudanj se vaa cata' tu'va so', ne dan me se ca'vee se nana ne a'mii nu' yuvij, tzaj ne ya vaa cunudanj nana ca'mii Diose adonj. Danj Diose taj se vaa sese cunó yuvij nana a'mii Diose, ne xcax yuvij cuentá se vaa ya a'mii so', ne sese nana' nij yuvij cacun' xráá Diose, ne a' ó cacun' se nari' yuvij xráá Diose ma'. Danj a'mii danj Diose che'é ma'an Diose nanj adonj.

*Nana nihánj taj xna'anj se vaa sa' uxrá 'yaj Diose axríj yuvaa Diose man yuvij tumé cacun' a*

<sup>5</sup> Vaa ta'aj nij yuvij cataj: “Me che'é yuvaa Diose man ní' gaa 'yaj ní' cacun' ga. Nese tanañj sa' 'yaj ní', gaa ne ca'vee xcax nii cuentá, gaa ne quene'en nii se vaa ní' ro', me sí' chi'ii ne orún' raa Diose ro', me sí' sa', cataj nii a”. Danj cataj ta'aj nij yuvij,

<sup>6</sup> tzaj ne ne chihan' uxrá tu'va nij so' danj a ma'. 'O se sa' uxrá vaa 'yaj Diose axríj yuvaa Diose man yuvij tumé cacun', ne dan me se no xcuún Diose ca'ne' Diose cacun' che'é cunudanj yuvij, ne che'é dan no xcuún so' qui'yaj so' sayuun man yuvij qui'yaj cacun' adonj.

<sup>7</sup> Ne vaa ta'aj nij yuvij cataj uún a: “Sese a'mii ne 'unj, ne sa' 'yáj, gaa ne doj xcax nii cuentá se vaa Diose me sí' a'mii nana ya a. Sa' uxrá vaa Diose, cataj nii a. Yuvij ro', me sí' a'mii ne, ne orún' Diose me sí' a'mii nana ya, cataj nii a. Che'é dan me taj che'é cuta' Diose cacun' xráj ma'”. Danj a'mii uún ta'aj nij yuvij,

<sup>8</sup> ne taj uún nij so', ne: “Sa' doj qui'yaj ndo'o ní' cacun', gaa ne cavij sa' Diose doj, qui'yaj ní' á”, taj uún nij yuvij a. Ne a'mii nij so' nana nij che'é núj, ne taj nij so' se vaa 'o cuyaán vaa nana a'mii núj ga nana a'mii nij so', taj nij so', a'mii ne nij so' a. Ve'é uxrá qui'yaj Diose, sese qui'yaj Diose sayuun man nij sí' ne yo' nanj adonj.

*Nana nihánj taj xna'anj se vaa cunudanj yuvij tumé cacun' a*

<sup>9</sup> Me nana ca'mii ní' che'é ní' sji israelitá ga. Sa' doj vaa ní' rihaan nij yuvij yanij na'. Taj ma'. Maan se aj cataj 'unj se vaa 'o cuyaán vaa se quij qui'yaj ní' sji israelitá ga se quij qui'yaj nij yuvij yanij, ne cunudanj ní' tumé cacun' a.

<sup>10</sup> Ase vaa nana taj 'unj ro', danj vaa nana no rihaan danj Diose a. Taj yo': “Taj yan vaj a yo'ó yuvij sa' ma'.

<sup>11</sup> A ó yuvij ne ne'en daj vaa Diose ma'. A ó yuvij ne tucu'yón daj vaa Diose ma'.

<sup>12</sup> Tanañj cunudanj yuvij se-tucuanj Diose, ne taj se gún' man nij yuvij a ma'. A ó yuvij ne 'yaj se sa' ma'.

<sup>13</sup> Ase vaa ri'yuj nee man xnganá naj rihaan santó ro', danj vaa ri'yuj nana a'mii nij sí' tumé cacun' yo' adonj. 'O se nana tiha' yu'unj a'mii nij so', ne dan

me se ase vaa na xnaj man tu'va xcuáa ro', danj vaa nana tu'va nij so', ne 'yaj chi'ij nij so' man nimán yuvij adonj.

<sup>14</sup> Dan me se inanj a'mii chree nij so' che'é tuvi' nij so' a.

<sup>15</sup> Chéé ndaa unánj nij so' ga tacóo nij so', che'é rej ticaví' nij so' tuvi' nij so' a.

<sup>16</sup> Doj a rá' vaj nij so' 'yaj nij so' sayuun a.

<sup>17</sup> Doj a rá' vaj nij so', ne unu' nij so' ga tuvi' nij so' a. Ne a 'ó tucuáan sa' ne ne'en nij so' nicaj nij so' ma'.

<sup>18</sup> Ne chu'vi' nij so' qui'yaj Diose sayuun man nij so' ma'". Danj vaa taj danj Diose che'é cunudanj yuvij nanj adonj.

<sup>19</sup> Dan me se yuvij noco' se-tucuanj Moisés me ní' sijn israelitá, ne dan me se ne'en ní' se vaa nu' nana yo' nana no rihaan danj Diose ro', taj xna'anj rihaan ní' daj vaa ma'an ní' a. Ndaa síj, gaa ne guun na'aj ní' ga yo'ó nij yuvij man rihaan chumij nihánj, ne quene'en cunudanj ní' se vaa vaa che'é qui'yaj Diose sayuun man ní' nanj adonj.

<sup>20</sup> 'Q se taj a yo'ó yuvij ne quisij qui'yaj nu' ndaa vaa taj se-tucuanj Moisés, ne che'é dan taj se 'yá' cunuu sa' a doj yuvij rihaan Diose qui'yaj tucuáan yo' a ma'. Maan se nari' yuvij se-tucuanj Moisés, ne xcaj yuvij cuentá se vaa ya ja sijn tumé cacun' me ma'anj se nij yuvij rihaan Diose ei.

*Nana nihánj taj xna'anj se vaa cunudanj yuvij cuchumán rá ni'yaj man Jesucristó ro', cunuu sa' nij so' rihaan Diose a*

<sup>21</sup> Ne yaj me se tihaan Diose rihaan yuvij daj qui'yaj so' ne tinavij so' cacun' che'é yuvij a. Dan me se se cunuu sa' yuvij qui'yaj inanj nana ca'mii Diose rihaan síi cu'naj Moisés ma'. 'Q se cataj danj Diose cataj nij síi nata' se-nana Diose gaa naá cataj se vaa

<sup>22</sup> cuchuman rá yuvij ni'yaj yuvij Jesucristó, gaa ne tinavij Diose cacun' che'é nij yuvij, ne cunuu sa' nij yuvij rihaan Diose a. Taj a 'ó yuvij ino' vaa rihaan Diose ma'.

<sup>23</sup> 'Q se cunudanj yuvij tumé cacun' nanj adonj. Ne quisij uxrá nij yuvij cunuu sa' inanj nij yuvij ndaa vaa Diose a ma'.

<sup>24</sup> 'Q se maan che'é rej cunuu 'ee rá Diose man cunudanj yuvij ne qui'yaj ma'an Diose se luj che'é nij yuvij me ca'vee tinavij Diose cacun' che'é nij yuvij adonj. Dan me se ca'née Diose man Jesucristó rihaan chumij, che'é rej ca'nee so' cacun' xráa nij síi amán rá ni'yaj man so',

<sup>25</sup> ne dan me se ca'née Diose man Jesucristó nayon Jesucristó rihaan yuvij tumé cacun', ne cuchuman rá nij síi tumé cacun' se vaa cavi' Jesucristó che'é nij so', ne quinaniij nij so' rihaan sayuun nanj adonj. Dan me se ne'en ní' se vaa tinavij Diose cacun' che'é yuvij, ne xcaj ní' cuentá se vaa vaa nica rá Diose gaa tinavij Diose cacun' che'é nij yuvij cane gaa naá a. Yuvij cane gaa naá ro', ne quiran' nij so' sayuun che'é cacun' tumé nij so' ma'.

<sup>26</sup> Maan se caráj x'naa Diose, ne na'vij Diose ndaa se cavi' Jesucristó, gaa ne quinavij cacun' che'é nij síi cane gaa naá síi amán rá ni'yaj man Diose a. Ne xcaj uún ní' cuentá se vaa vaa nica rá Diose gaa a'ne' so' cacun' che'é yuvij yanj rihaan chumij cuano a. Dan me se nica vaa rá Diose, ne uun nucaj Diose tinavij so' cacun' tumé cunudanj ní' sijn amán rá ni'yaj man Jesucristó, gaa ne guun ní' síi sa' rihaan Diose adonj.

<sup>27</sup> Se-tucuanj Moisés me se taj se 'yaj tucuáan yo' che'é cacun' tumé yuvij ma'. Dan me se nuveé che'e suun sa' qui'yaj suun ní' me navij cacun' xráa ní' ma'. Maan se che'é se amán rá ní' ne'en ní' Jesucristó, che'é dan navij cacun'

tumé ní' adonj. Che'é dan se guun cataj ní' maan che'é se cuno ní' nu' nana cataj xna'anj Diose rihaan Moisés, che'é dan guun ní' síi sa' ma'. Se ca'mii ní' danj ma'. Maan se inanj che'é Jesucristó me quinanii ní' rihaan sayuun nanj adonj.

<sup>28</sup> Dan me se cuchuman rá yuvii ni'yaj yuvii man Jesucristó, ne quinavij cacun' xraá yuvii yo' a. Taj se 'yaj ase ca'vee daj a se luj qui'yaj nij yuvii ma'. Maan se inanj che'é Jesucristó navij cacun' xraá yuvii nanj adonj. Dan me nana guun ya rá ní' cuno ní' adonj.

<sup>29</sup> Ne nuveé se-Diose inanj ní' sij israelitá me Diose ma'. 'O se se-Diose taran' nij yuvii man rihaan chumii me Diose nanj adonj.

<sup>30</sup> Orún' Diose nicun', ne sese cuchuman rá nij yuvii israelitá ni'yaj nij yuvii Diose, ne cataj Diose se vaa sa' qui'yaj nij so', ne sese cuchuman rá yuvii yanij ni'yaj nij so' Diose, ne cataj uún Diose se vaa sa' qui'yaj nij so' uún nanj adonj.

<sup>31</sup> Dan me se aj cataj núj se vaa taj se gún' man nana cataj xna'anj Diose gaa naá, rá soj na'. Daj chihaa mij se guun danj rá soj ma'. Vaa se gún' man yo' ei. Vaa che'é ndo'o cuchruj Moisés tucuáan ca'mii Diose che'é ní' ei. Inanj danj a'mii núj nanj adonj.

## 4

*Nana nihánj taj xna'anj daj qui'yaj síi cu'naj Abraham, ne cunuu sa' so' rihaan Diose a*

<sup>1</sup> Síi cu'naj Abraham me se xii ní' sij israelitá me so' gaa naá, ne ne'en ní' se vaa nuveé che'é se vaa qui'yaj ma'an so' me cavii sa' so' ma'.

<sup>2</sup> 'O se ne nó xcúun Abraham cataj Abraham se vaa maan che'é se sa' qui'yaj so', che'é dan guun niha' rá Diose ni'yaj Diose man so' ma'. Taj che'é ca'mii so' danj ma'. Ne'en Diose se vaa ne ya vaa nana yo' ma'.

<sup>3</sup> Maan se ma'an danj Diose taj: "Cuchumán rá síi cu'naj Abraham ni'yaj so' Diose, ne che'é dan cataj Diose se vaa sij sa' me Abraham a. Danj ca'mii Diose che'é so' a". Inanj danj a'mii danj Diose nanj adonj.

<sup>4</sup> Dan me se sese yo'o mozó 'yaj suun rihaan 'o ru'vee, ne naru'vee ru'vee rihaan mozó yo', ne nō xcúun mozó yo' qui'yaj canaán so' tu'vee so' a.

<sup>5</sup> Tzaj ne ino qui'yaj Diose ga Abraham, ne dan me se ne qui'yaj suun Abraham rihaan Diose ma'. Ne nó xcúun Diose naru'vee Diose rihaan Abraham ma'. Maan che'é se xcaj Abraham cuentá se vaa ca'vee tinavij Diose cacun' tumé yuvii ro', che'é dan cuchumán rá Abraham ni'yaj so' Diose, ne che'é dan cataj Diose se vaa sij sa' me so', ne danj qui'yaj uun Diose se luj che'é so' nanj adonj.

<sup>6</sup> 'O cuyañ vaa nana a'mij nihánj ga nana ca'mii síi cu'naj David gaa naá gaa cataj xna'anj David se vaa niha' rá yuvii tinavij ma'an Diose cacun' xraá, yuvii ne nó xcúun qui'yaj suun rihaan Diose a. Cataj síi cu'naj David a:

<sup>7</sup> "Cavii sa' síi x'néj cacun' xraá qui'yaj Diose á. Nu' se nij qui'yaj so' ro', navij cuano á.

<sup>8</sup> Cavii sa' so', ne ne'en so' se vaa a doj cacun' se cuta' uún Diose xraá so' daj chihaa mij ma'".

<sup>9</sup> Ne orún' nij yuvii israelitá yuvii ata' ta'nga' man me avii sa' rihaan Diose, rá soj na'. Ndañ nij yuvii yanij yuvii nuvi' ta'nga' ata' man avii sa' uún rihaan Diose, rá soj xa'. Cunudanj yuvii me ca'vee cavii sa' rihaan Diose ei. 'O se aj ne'en ní' se vaa taj danj Diose: "Cuchumán rá síi cu'naj Abraham ni'yaj so' Diose, ne che'é dan cataj Diose se vaa sij sa' me so' a". Danj taj danj Diose a.

<sup>10</sup> Dan me se cataj Diose se vaa navij cacun' tumé sí cu'naj Abraham yo', che'é se cuchumán rá so' ni'yaj so' Diose, ne daj sij me Abraham gaa ca'mii Diose danj, rá soj gá. Sij cata' ta'nga' man me so', rá soj na'. Taj ma'. 'Q se danj ca'mii Diose gaa ataa cata' ta'nga' man so' nanj adonj.

<sup>11</sup> Cachén xca'anj yo' ca'mii Diose danj che'é so', gaa ne cuta' ma'an so' ta'nga' man so', ne tihaan so' rihaan nij yuvij man rihaan chumij se vaa aj tinavij ya Diose cacun' xráá so', ne dan me se guun so' xii cunudanj nij yuvij nuu sa' rihaan Diose yuvij ne ata' ta'nga' man, ne ase vaa qui'yaj sí cu'naj Abraham ro', danj 'yaj uún nij so' a. Dan me se cuchumán rá sí cu'naj Abraham ni'yaj so' Diose gaa ataa cata' ta'nga' man so', ne danj 'yaj uún nij sí yaní a.

<sup>12</sup> Ne xii nij yuvij ata' ta'nga' man me uún so', sese ya nocó' nij so' tucuaán nocó' ma'an so', ne dan me se cuchumán rá nij so' ni'yaj nij so' Diose, ne tuvi' sí cu'naj Abraham guun nij so' a. Dan me se xii ní' me sí cu'naj Abraham, sese qui'yaj ní' ndaa vaa qui'yaj so' adonj.

*Nana nihánj taj xna'anj se vaa cuchumán rá sí cu'naj Abraham cuno so' nana ca'mii Diose rihaan so' a*

<sup>13</sup> Dan me se ne'en ní' se vaa cata' tu'va Diose rihaan sí cu'naj Abraham se vaa vaa güii, ne nıcaj yu'unj ma'an Abraham do', nıcaj yu'unj nij ta'nı ta'nij si'no Abraham do', man cunudanj chumij, ne dan me se ya ya guun yo' to'óo nij so', cataj Diose rihaan sí cu'naj Abraham, ne nuveé che'e se canoco' Abraham nu' se-tucuanj Moisés me ca'mii Diose danj rihaan Abraham ma'. 'Q se aj cuchumán rá so' cuno so' nana ca'mii Diose rihaan so', ne che'é dan cunu sa' so' rihaan Diose, ne che'é dan me cataj xna'anj Diose rihaan so' se vaa ya ya nıcaj yu'unj so' man cunudanj chumij yo' adonj.

<sup>14</sup> 'Q se sese inanj nij sí guun nucuaj qui'yaj nu' se-tucuanj Moisés me nij sí nıcaj yu'unj chumij, ne taj che'é cuchumán rá ní' nana cata' tu'va Diose rihaan Abraham a ma'.

<sup>15</sup> 'Q se xa' se-tucuanj Moisés, tzaj ne taj a yo'ó sí uun nucuaj qui'yaj nu' tucuaán yo', ne che'é dan axrij yuvaá uun Diose rihaan yuvij, 'yaj tucuaán yo' adonj. (Tzaj ne sese nuvi' tucuaán vaa danj nocó' yuvij, ne taj cacun' tumé nij yuvij che'é tucuaán yo' ma'.)

<sup>16</sup> Che'é dan cunudanj ní' sij amán rá ni'yaj man Diose ro', me nij sí nıcaj yu'unj man chumij, ne veé dan me se luj qui'yaj Diose che'é ní' me yo', gaa ne ca'vee quisij ya nu' nana cata' tu'va Diose che'é taran' ní' a. Dan me se nuveé inanj nij sí guun nucuaj qui'yaj nu' se-tucuanj Moisés me nij sí cavij sa' danj ma'. Tananj cavij sa' taran' ní' sij amán rá ni'yaj man Diose, ndaa vaa qui'yaj Abraham adonj. 'Q se xii taran' ní' me so' adonj.

<sup>17</sup> 'Q se danj Diose taj se vaa cune' Diose man so' guun so' xii yuvij man que'ee ndo'o chuman' a. Danj taj danj Diose che'é so', ne dan me se xii ní' me so' rihaan Diose á. 'Q se cuchumán rá so' ni'yaj so' Diose, ne Diose ro', me sí 'yaj nuu i'na' uún nij sí cavi', ne Diose me sí a'mii che'é rasuun ataa curuvij' rihaan chumij nihánj, ne taj so' se vaa aj nicun' nij rasuun nanj adonj.

<sup>18</sup> Ne nucuaj rá sí cu'naj Abraham man Diose se vaa gaa ta'nı so', qui'yaj Diose, tzaj ne ne quene'en so' daj me qui'yaj Diose ne gaa ta'nı so' ma'. Maan se cuchumán rá so' cuno so' nana ca'mii Diose rihaan so', gaa ne guun so' xii yuvij man que'ee ndo'o chuman' adonj. 'Q se aj cataj Diose rihaan so' se vaa gaa ndo'o ta'nı ta'nij si'no so', ne veé danj qui'yaj guce Diose ga so' adonj.

<sup>19</sup> Dan me se quisíj so' 'o cientó yo', ne taj vaj ta'ní so', tzej ne ne quirí' rá so' che'é rej chii nga me so' ne chana itũun me nica so' chana cu'naj Sara ma'. 'Q se yo'ó cuchumán rá so' ne'en so' Diose nanj adonj.

<sup>20</sup> Ne ca'vej rá so' cataj so' se vaa se ca'vee qui'yaj Diose ndaa vaa cataj Diose rihaan so' ma'. Tananj cuchumán ndo'o doj rá so' ni'yaj so' Diose, gaa ne nari' nucaj doj man so' a. Cataj so' se vaa sa' uxrá vaa Diose,

<sup>21</sup> ne guun ya rá so' se vaa guun nucaj Diose qui'yaj Diose cunudanj se vaa cataj Diose a.

<sup>22</sup> Che'é dan me cataj Diose: "Sij sa' me Abraham a". Danj ca'mii Diose che'é so',

<sup>23</sup> tzej ne nuveé che'e orún' sí cu'naj Abraham a'mii nana yo' nana no rihaan danj Diose ma'.

<sup>24</sup> 'Q se che'é ma'an ní no nana yo' rihaan danj Diose uún, che'é rej sijn amán rá ni'yaj man Diose me ní' uún, ne dan me se aj cataj Diose se vaa sijn sa' me ma'an ní' uún adonj. Veé dan me se amán rá ní' se vaa cunuu i'na' uún Jesucristó sijn 'nij ra'a man ní' qui'yaj Diose á.

<sup>25</sup> Dan me se ca'vej rá Diose cavi' Jesucristó che'é cacun' qui'yaj ní', ne cunuu i'na' uún so', qui'yaj Diose, che'é yan me rá Diose cunuu sa' ní' rihaan ma'an Diose adonj.

## 5

*Nana nihánj taj xna'anj se vaa cavii sa' uxrá ní' che'é se cunuu sa' nimán ní' rihaan Diose a*

<sup>1</sup> Dan me se amán rá ní' quene'en ní' Diose, ne che'é dan navij cacun' tumé ní', ne cunuu sa' nimán ní' rihaan Diose, ne che'é dan me ne chu'vi' ní' yaj, ne vaa dínj nimán ní' che'é Jesucristó sijn 'nij ra'a man ní' adonj. Ne yuvaá Diose man ní' ma'.

<sup>2</sup> Dan me se amán rá ní' ni'yaj ní' man Jesucristó, ne che'é dan cavii sa' uxrá ní', qui'yaj Diose, ne yaj ro', vaa che'é guun niha' ndo'o rá ní' cataj xna'anj ní' rihaan yo'ó yuvi' se vaa vaa güii ca'anj ní' cayáán ní' rej sa' ndo'o rej yanj ma'an Diose adonj.

<sup>3</sup> Ne vaa che'é guun niha' rá ní' che'é sayuun ran' ní', ne dan me se ne'en ní' se vaa che'é sayuun ran' ní' me se nari' nucaj doj nimán ní',

<sup>4</sup> ne che'é dan uun niha' rá Diose ni'yaj Diose man ní', ne che'é dan uun ya rá ní' se vaa vaa güii cayáán ní' ga so' a.

<sup>5</sup> Che'é dan se guun na'aj ní' ma'. 'Q se rqué Diose Nimán Diose man ní', ne Nimán Diose taj xna'anj rihaan ní' se vaa 'ee rá Diose man ní' adonj.

<sup>6</sup> 'Q se Jesucristó me se gaa ne guun nucaj ma'an ní' sijn man rihaan chumij nihánj qui'yaj sa' ní' do', gaa nuveé sijn noco' man Diose me ní' do', ne cavi' Jesucristó che'é ma'an ní', gaa güii cachrón ma'an Diose cavi' so' ei.

<sup>7</sup> Dan me se taj vaj yuvi' ca'vej rá nayon rihaan tuvi' cavi' ma'. Ca'vee se sí' ne tumé cacun' me tuvi' yuvi', tzej ne se ca'vej rá yuvi' cavi' yuvi' che'é so' ma'. Ca'vee se ndaa sí' sa' uxrá nimán me tuvi' yuvi', tzej ne doj yuvi' quisij rá cavi' che'é tuvi' nanj adonj.

<sup>8</sup> Tzej ne ino vaa Diose ga yuvi' ei. Dan me se nda' se tumé ní' cacun', tzej ne cavi' Jesucristó che'é ní', ne nayón so' rihaan ní', qui'yaj Diose, ne veé dan me se tihaan Diose rihaan ní' se vaa 'ee ndo'o rá Diose man ní' adonj.

<sup>9</sup> Dan me se aj cunuu sa' ní' rihaan Diose cuano, che'é se cavi' Jesucristó, ne che'é dan ne'en ní' se vaa a' ó güii se caxríj yuvaá Diose man ní' che'é cacun'

tumé ní' ma'. 'Q se tinanii Jesucristó man ní' rihaan sayuun qui'yaj Diose man ní' a.

<sup>10</sup> Dan me se asino yaan yuvaa Diose man cunudañj yuviñ che'é cacun' tumé nij yuviñ, tzaj ne ca'née Diose ta'núí Diose cavi' so' che'é yuviñ, ne guun tuví' ní' ga Diose, qui'yaj so' a. Ne cunuu i'na' uún Jesucristó, ne che'é dan ne'en ní' se vaa ya quinaniñ ní' rihaan sayuun asa' ca'ne' Diose cacun' che'é cunudañj yuviñ man rihaan chumiñ nihánj ei.

<sup>11</sup> Ne uun niha' rá ní' cataj xna'anj ní' rihaan tuvi' ní' che'é se vaa qui'yaj Diose che'é ní', ne ñañj 'yaj ní' che'é Jesucristó sñj 'ññj ra'a man ní' ei. 'Q se so' me síí qui'yaj guun tuví' ní' ga Diose adonj.

*Nanañ nihánj taj xna'anj se vaa qui'yaj canaán Jesucristó rihaan cacun' xna'anj rihaan chumiñ nihánj a*

<sup>12</sup> Dan me se orún' snó'o cu'naj Adán me síí guun yaan qui'yaj cacun' asino yaan, ne dan me se xñi cunudañj nij yuviñ man rihaan chumiñ me so', ne qui'yaj so' cacun', ne tanáj so' cacun' rihaan cunudañj nij yuviñ man rihaan chumiñ, ne che'é dan ase vaa tumé Adán cacun' ro', ñañj vaa tumé cunudañj nij yuviñ cacun' rihaan Diose a. 'Q se che'é cacun' qui'yaj Adán me se ya guun che'e yuviñ qui'yaj yuviñ cacun', gaa ne guun che'e nij yuviñ cavi' nimán nij yuviñ, ne che'é dan nu' 'na' avi' nimán cunudañj nij yuviñ man rihaan chumiñ nihánj cuano adonj.

<sup>13</sup> Dan me se asñj ataa ca'miñ Diose tucuaán cuchruj Moisés ro', asñj ñañj me qui'yaj yuviñ cacun', tzaj ne taj vaj se-tucuañj Moisés cunñ nij yuviñ ma'. Che'é dan ne qui'yaj nij yuviñ cacun' rihaan se-tucuañj Moisés ma'.

<sup>14</sup> 'Q se cavi' nimán síí cu'naj Adán cavi' nimán cunudañj tuvi' so' cavi' nimán, ne ndaa yuviñ ne qui'yaj cacun' ndaa vaa qui'yaj síí cu'naj Adán ro', ndaa nimán nij so' cavi' gaa ataa quinañj se-tucuañj Moisés ne gaa cuchruj Diose se-tucuañj Moisés uún a.

Dan me se ase vaa quiran' cunudañj nij yuviñ man rihaan chumiñ sayuun, qui'yaj orún' síí cu'naj Adán ro', ñañj vaa caviñ sa' que'eeñj nij yuviñ man rihaan chumiñ, qui'yaj orún' Jesucristó uún a.

<sup>15</sup> Dan me se ne'en ní' se vaa orún' síí cu'naj Adán qui'yaj cacun' rihaan Diose, ne quisñj cacun' yo' tiri' yo' man nimán cunudañj nij yuviñ man rihaan chumiñ cuano, ne che'é dan nu' 'na' avi' nimán nij yuviñ ñañj adonj. Tzaj ne doj a nucuaj Diose rihaan Adán ei. Che'é dan guun ya rá ní' se vaa doj a guun nucuaj Diose racuñj Diose man me ma'an yuviñ, ne doj a ca'vee caviñ sa' nij yuviñ che'é se luj qui'yaj Jesucristó che'é nij so' ñañj adonj.

<sup>16</sup> Dan me se gaa qui'yaj orún' síí cu'naj Adán cacun', ne quitáa cacun' xráa nij yuviñ, tzaj ne inñ uxrá vaa se luj qui'yaj Jesucristó che'é ní', ne dan me se gaa quisñj qui'yaj ndo'o ní' cacun' ne cavi' so' che'é ní', ne dan me se güeñj cacun' xráa ní', qui'yaj so' adonj.

<sup>17</sup> 'Q se ne'en ní' se vaa gaa qui'yaj orún' síí cu'naj Adán cacun' yo', ne quiran' cunudañj nij yuviñ man rihaan chumiñ sayuun se vaa nu' 'na' avi' nimán cunudañj nij yuviñ a. Che'é dan ní' sñj cunuu sa' rihaan Diose che'é se luj qui'yaj orún' Jesucristó che'é ní' me se doj a ne'en ní' se vaa gaa i'na' nimán ní' ne guun chñj ní' rihaan chumiñ nihánj che'é so' adonj.

<sup>18</sup> Dan me se che'é orún' cacun' qui'yaj Adán me táa cacun' xráa cunudañj nij yuviñ man rihaan chumiñ, tzaj ne orún' suun sa' ndo'o qui'yaj suun Jesucristó, ne che'é dan ca'vee güeñj cacun' xráa cunudañj nij yuviñ, qui'yaj so', ne ca'vee yo'o gaa i'na' nimán nij yuviñ a.



<sup>19</sup> Dan me se síi cu'naj Adán ro', orún' so' ne ca'vej rá cuno rihaan Diose, ne che'é dan que'ee ndo'o yuvii tumé cacun', tzaj ne cuno orún' síi cu'naj Jesucristó rihaan Diose, ne che'é dan cunu sa' que'ee yuvii rihaan Diose adonj.

<sup>20</sup> Dan me se cataj xna'anj Diose daj gaa se-tucuanj Moisés rihaan Moisés gaa naá, tzaj ne quene'en Diose se vaa síi se cuno rihaan Diose me yuvii ne tananj guun que'ee doj cacun' qui'yaj yuvii che'é se-tucuanj Moisés a. Dan me se quisij cataj xna'anj Diose daj gaa se-tucuanj Moisés rihaan so', gaa ne doj a guun rá yuvii qui'yaj yuvii se chi'ii á. Tzaj ne gaa xna'anj doj cacun' tumé yuvii, ne Diose me síi quirii nimán qui'yaj doj se luj che'é nij yuvii, ne dan me se tinavij Diose cacun' tumé nij yuvii, gaa ne qui'yaj canaán se luj yo' rihaan cacun' yo' a.

<sup>21</sup> Dan me se asino guun chij ndo'o cacun' rihaan nimán yuvii, gaa ne guun che'e yuvii cavi' nimán yuvii che'é cacun', ne quiran' nij yuvii sayuun nu' cavii nu' ca'anj a. Tzaj ne qui'yaj ndo'o Diose se luj che'é nij yuvii, che'é rej qui'yaj canaán se luj yo' rihaan cacun', ne guun chij ndo'o se luj yo' rihaan nimán nij yuvii, ne che'é dan nuu sa' nimán nij yuvii rihaan Diose, ne cayáán nij yuvii ga Diose nu' cavii nu' ca'anj a. Danj qui'yaj Diose che'é ní' gaa cavi' Jesucristó sij 'nij ra'a man ní' rihaan rcutze adonj.

## 6

*Nana nihánj taj xna'anj se vaa ní' sij amán rá ni'yaj man Jesucristó me se se ca'vee canoco' ní' chrej chi'ii yaj ma'*

<sup>1</sup> Daj qui'yaj ní', rá soj ga. 'Q qui'yaj ní' cacun', ne qui'yaj Diose doj se luj che'é ní', rá soj na'.

<sup>2</sup> Taj ma'. Se guun qui'yaj ní' danj ma'. 'Q se aj tanáj ní' chrej chi'ii á. Asa' ca'vee canoco' uún ní' chrej chi'ii, rá soj ga.

<sup>3</sup> 'Q se aj ne'en ya soj se vaa gaa cata' ne ní' che'é Jesucristó, ne ase vaa cavi' so' rihaan chumii nihánj ro', danj cavi' ní' rihaan tucuaán chi'ii, ne se ca'vee canoco' ní' tucuaán chi'ii cuano a ma'.

<sup>4</sup> Dan me se ase vaa quiran' Jesucristó gaa cachin' nii man so' rque yo'óo ro', danj quiran' ní' gaa cata' ne ní', ne dan me se gaa cachin' nii man so' rque yo'óo, ne va'nuj güii ne cachee so' rihaan yo'óo ma'. Ne ase vaa ne cachee so' rihaan yo'óo ro', danj gaa ní' cuano che'é se cata' ne ní', ne se cachee ní' chrej chi'ii cuano ma'. Gaa ne ase vaa cunuu i'na' uún Jesucristó gaa cavi' so', qui'yaj Diose ro', danj gaa cunu naca nimán ní', ne ve'é uxrá qui'yaj ní' cayáán ní' ga tuvi' ní', qui'yaj Diose ei. 'Q se síi sa' nucuaj me Diose ei.

<sup>5</sup> Dan me se sese ya ya tanáj ní' chrej chi'ii che'é so' ro', ne ya ya cunu sa' nimán ní' che'é so' adonj.

<sup>6</sup> Ne'en ní' se vaa vaa chi'ii nimán ní' gaa ataa cavi' Jesucristó che'é ní', tzaj ne cavi' so' rihaan rcutze che'é ní', ne veé dan me se navij se chi'ii man nimán ní', qui'yaj so' gaa cavi' so', ne taj che'é qui'yaj ní' se chi'ii ne guun ní' se-mozó cacun' yaj a ma'.

<sup>7</sup> 'Q se ase vaa na'vee qui'yaj xngá cacun' ro', danj vaa ní', ne se ca'vee canoco' ní' chrej chi'ii yaj a ma'.

<sup>8</sup> Dan me se cavi' Jesucristó, ne canoco' ní' man so', ne dan me se cavi' se chi'ii man nimán ní' ei. Ne cunuu i'na' uún so', ne che'é dan amán rá ní' se vaa ca'vee cayáán sa' nimán ní' ga so' nanj adonj.

<sup>9</sup> Dan me se ne'en ní' se vaa cunuu i'na' uún Jesucristó, ne daj chihaa míj se ca'vee cavi' uún so' a man adonj.

<sup>10</sup> 'O se síi cavi' ro', daj chihaa míj se ca'vee qui'yaj so' cacun', ne síi cunuu i'na' uún me se che'é orún' Diose ne so' ei.

<sup>11</sup> Ne che'é dan cataj ma'an soj se vaa aj cavi' se chi'ii man nimán nij soj, ne se qui'yaj uún nij soj cacun' a ma'. 'O se canoco' nij soj man Jesucristó, ne daj se 'yaj guee so', yanj so' che'é rej qui'yaj suun so' rihaan Diose ro', danj qui'yaj ní' uún a.

<sup>12-13</sup> Che'é dan se ca'vej rá soj guun chij cacun' rihaan nee man soj ma'. Ne'en soj se vaa vaa güii cavi' nee man soj, ne che'é dan se guun ca'vej rá soj qui'yaj nee man soj náa guun se nij ma'. Dan me se ase vaa síi cavi' vaa soj gaa rque, tzaj ne racuíj Diose man soj, ne che'é dan ase vaa síi cunuu i'na' uún vaa soj, ne che'é dan nu' nee man soj qui'yaj suun che'é Diose, qui'yaj soj, ne inanj suun sa' qui'yaj suun soj che'é Diose á.

<sup>14</sup> Se guun chij cacun' rihaan soj yaj a ma'. 'O se ne'en soj se vaa se cuta' Diose cacun' xráa soj sese se canoco' soj nu' se-tucuanj Moisés ma'. Tzaj ne me rá Diose qui'yaj Diose se luj che'é soj, ne quinavij cacun' tumé soj, ne cavií sa' soj, qui'yaj ma'an Diose, ne che'é dan taj che'é guun chij cacun' rihaan soj a man adonj.

### *Nana nihánj taj xna'anj se vaa qui'yaj suun ní' rihaan inanj Diose a*

<sup>15</sup> Ta'aj yuvij cataj: "Sese danj vaa, ne sese se cuta' Diose cacun' xráa ní' che'é se-tucuanj Moisés, ne sese qui'yaj Diose se luj che'é ní', ne ca'vee qui'yaj ndo'o ní' cacun' nanj á". Danj cataj ta'aj yuvij, tzaj ne quij ndo'o vaa nana yo' nana tu'va nij yuvij ei.

<sup>16</sup> Ne acay soj cuentá se vaa sese chrej chi'ii canoco' soj, ne guun soj se-mozó cacun' a. Danj inanj guun chij cacun' rihaan soj, ne inanj uun cacun' qui'yaj soj, qui'yaj cacun', gaa ne quirí' nimán soj, qui'yaj cacun' tumé soj a. Tzaj ne sese cunó soj rihaan Diose, ne cunuú soj rihaan Diose, ne cunuú sa' nimán soj rihaan Diose nanj ei.

<sup>17</sup> Gaa rque me se se-mozó cacun' me soj, tzaj ne guun rá ma'an soj cunó soj nana tucu'yón núj rihaan soj che'é Diose, ne che'é dan nagó' 'unj gracia rihaan Diose adonj.

<sup>18</sup> Dan me se quinanii soj rihaan cacun', ne inanj se sa' uun rá Diose 'yaj soj a.

<sup>19</sup> (Dan me se nana nica achrón 'unj rihaan yanj nihánj nayaá soj a. Ne'éen 'unj se vaa se guun nucuj soj cunó soj nana nachran' ma'.) Dan me se gaa rque me se ca'vej rá soj qui'yaj nee man soj se chi'ii, ne qui'yaj soj inanj cacun' rihaan Diose, gaa ne guun niha' rá soj qui'yaj soj doj cacun' uún a. Tzaj ne cuano nihánj me se ca'vej soj qui'yaj soj inanj se sa' ndaa vaa uun rá Diose, gaa ne guun soj síi sa' nimán rihaan Diose á.

<sup>20</sup> Dan me se gaa se-mozó cacun' me soj, ne guun rá soj se vaa ne nó xcúun soj qui'yaj soj se sa' ma'.

<sup>21</sup> Che'é dan me cavii sa' soj gaa canoco' soj chrej chi'ii, rá soj na'. Taj ma'. Maan se uun na'aj soj cuano che'é cacun' aj qui'yaj soj gaa rque, ne che'é cacun' yo' me se quirí' nimán soj, ne ca'anj soj rihaan ya'an nu' cavii nu' ca'anj adonj.

<sup>22</sup> Tzaj ne yaj ro', aj quinanii soj rihaan cacun', ne nuveé se-mozó cacun' me soj, tananj rihaan Diose nuú soj, ne che'é suun sa' 'yaj suun soj rihaan

Diose ro', che'é dan cunu sa' nimán soj, gaa ne cayáán soj ga Diöse nu' cavii nu' ca'anj ei.

<sup>23</sup> Dan me se che'é cacun' 'yaj yuvij me se yo'o guun yanij nimán nij yuvij rihaan Diöse nu' cavii nu' ca'anj, tzaj ne qui'yaj ma'an Diöse se luj che'é ní' sij 'nij ra'a Jesucristó man se vaa ca'vee cayáán ní' ga so' nu' cavii nu' ca'anj adonj.

## 7

*Nana nihánj taj xna'anj se vaa quisij canoco' ní' se-tucuanj Moisés, ne cuano nihánj ca'nej nimán ní' qui'yaj suun ní' che'é Diöse a*

<sup>1</sup> Dan me se aj ne'en nij soj daj vaa se-tucuanj Moisés, tinuj, nocoj. Che'é dan ne'en soj se vaa ne nó xcúún nij síi cavi' canoco' ní' so' tucuáán yo' ma'.

<sup>2</sup> Ne dan me se sese vaa nica chana, ne cano no' ga nica no', taj nana cataj xna'anj Diöse rihaan Moisés gaa naá yo' a. Tzaj ne sese cavi' nica chana, ne ca'vee ca'anj no' xcaj no' yo'ó snó'o a.

<sup>3</sup> Tzaj ne sese yanij nica chana ne xcaj chana yo'ó snó'o, ne tumé ndo'o no' cacun', tzaj ne sese cavi' nica chana, ne ca'vee xcaj chana yo'ó snó'o, ne nuveé cacun' me yo' gaa ma'.

<sup>4</sup> Ne ase vaa chana cavi' nica ro', danj vaa ma'an ní', tinuj, nocoj. 'Q se che'é se cavi' Jesucristó ro', che'é dan quisij canoco' ní' se-tucuanj Moisés nanj á. Ne cunu u'ina' uún Jesucristó, ne canoco' ní' man so', ne che'é dan guun nucuaj ní' qui'yaj suun ní' suun sa' che'é Diöse a.

<sup>5</sup> Asij rque me se qui'yaj suun ndo'o ní' che'é se-tucuanj Moisés, ne guun ndo'o rá ní' cunó ní' rihaan Diöse, tzaj ne ne guun nucuaj ní' cunó ní' ma'. Maan se tananj a guun doj rá ní' qui'yaj ní' cacun', gaa ne doj a vaa cacun' qui'yaj nee man ní', ne che'é dan vaa güii cavi' nu' nimán ní' ei.

<sup>6</sup> Dan me se gaa naá canoco' uxrá ní' tucuáán yo' tucuáán no' rihaan yanj, ne no xcúún ní' canoco' ní' tucuáán yo', rá ní' gaa rque, tzaj ne yaj nihánj me se taj che'é canoco' ní' tucuáán yo' a ma'. 'Q se aj cunu sa' nimán ní', ne a'néé nimán ma'an ní' qui'yaj suun ní' che'é Diöse cuano adonj.

*Nana nihánj taj xna'anj se vaa che'é se-tucuanj Moisés xcaj ní' cuentá se vaa tumé ní' cacun', tzaj ne taj se 'yá' cunu sa' nimán ní' rihaan Diöse qui'yaj tucuáán yo' ma'*

<sup>7</sup> Guun rá ní' se vaa tucuanj chi'ii me se-tucuanj Moisés na'. Taj a doj ma'. 'Q se se-tucuanj Moisés yo' qui'yaj don ca'vee xcaj 'unj cuentá me se uun cacun' a. Dan me se gaa naá cataj Diöse se vaa na'vej rá Diöse guun rá ní' si'yaj tuvi' ní', ne veé dan me se xcaj 'unj cuentá se vaa tananj a guun ndo'o raj si'yaj tuvij gaa quene'én 'unj tucuáán yo', ne danj inanj vaa nimanj nanj á.

<sup>8</sup> Veé dan me se xcaj 'unj cuentá daj vaa se-tucuanj Moisés, gaa ne guun che'ej guun ndo'o raj qui'yaj cacun' uún a. Sese nuvi' tucuáán canoco' ní' ne ne uun rá ní' qui'yaj ní' cacun' asuun saj ma'.

<sup>9</sup> Ne asij ataa nari' 'unj se-tucuanj Moisés, ne guun raj se vaa sa' qui'yaj, tzaj ne narij se-tucuanj Moisés, gaa ne guun che'ej guun raj qui'yaj cacun' se vaa na'vej rá Diöse,

<sup>10</sup> ndaa síj, gaa ne quiri' nu' nimanj nanj adonj. Sese cunó yuvij nu' se-tucuanj Moisés, ne ve'é uxrá cayáán nij yuvij, ne che'é dan vaa tucuáán yo', tzaj ne 'unj nihánj me se daj doj se quiri' nu' nimanj, qui'yaj tucuáán yo' adonj.

11 Dan me se gaa narij se-tucuñj Moisés, ne guun raj canocoj nu' tucuáán yo', ne cavij sa' 'unj, qui'yaj tucuáán yo', raj a. Tzaj ne tananj a guun chi'ij ndo'o raj doj, qui'yaj cacun' 'nij nimanj, ne tiha' yu'unj cacun' yo' manj, ne che'é dan doj a qui'yaj cacun', ne quiri' nu' nimanj a adonj.

*Nana nihánj taj xna'anj se vaa na'vee canoco' ní se-tucuñj Moisés, che'é se uun chij cacun' rihaan nee man ní a*

12 Dan me se guce uxrá se-tucuñj Moisés nanj á. 'O gaa nica nimán ní', sese cunq ní man yo' ei. Ne cunaj uxrá vaa yo' ei.

13 'Unj me se quiri' nimanj qui'yaj se-tucuñj Moisés tucuáán sa', rá nij soj na'. Taj ma'. Maan se che'é cacun' qui'yáá 'unj me quiri' nimanj nanj á. Gaa cunoj se-tucuñj Moisés, ne guun che'ej qui'yáj cacun', ne que'ee ndo'o cacun' qui'yáj, gaa ne xcaj 'unj cuentá se vaa man ndo'o cacun' nimanj a.

14 Ne'en ní' se vaa nana ca'mii Nimán Diose me se-tucuñj Moisés, tzaj ne yuvij un mej, ne inanj cacun' ne'enj qui'yáj a.

15 Ne'enj daj me che'é me 'yáá 'unj danj ma'. Dan me se me raj qui'yáj se sa', tzaj ne inanj cacun' 'yáj, ne se chi'ij na'vej raj qui'yáj, tzaj ne inanj se chi'ij 'yáj nanj adonj.

16 Chi'ij vaa cacun' qui'yáj, raj, ne dan me se ne'én 'unj se vaa sa' vaa se-tucuñj Moisés a.

17 Dan me se ne qui'yaj ma'anj cacun' ma'. Tzaj ne uun chij ndo'o cacun' rque nee manj, ne che'é dan nee manj qui'yaj cacun' a.

18-19 Ne'enj se vaa taj se 'yá' qui'yaj nee manj se sa' ma'. Dan me se me raj qui'yáj se sa', tzaj ne na'vee qui'yaj nee manj se sa' ma'. Ne se chi'ij na'vej raj qui'yáj, tzaj ne dan me se inanj se chi'ij 'yáj, 'yaj nee manj adonj.

20 Che'é dan me taj 'unj se vaa ne 'yaj ma'anj se chi'ij ma'. 'O se uun chij ndo'o cacun' rque nee manj, ne che'é dan inanj nee manj 'yaj se chi'ij yo' a.

21 Me raj qui'yáj se sa' uun rá Diose, tzaj ne na'vee qui'yáj danj ma'. 'O se tananj inanj 'na' cacun' rihanj a.

22 Ne'enj se vaa sa' vaa se-tucuñj Moisés,

23 tzaj ne me ndo'o rá nee manj qui'yaj yo' cacun', ne na'vej nee manj cunq yo' rihaan Diose ma'. Inanj tucuáán chi'ij me rá nee manj canoco' yo' adonj. Dan me se na'vej raj qui'yáj cacun', tzaj ne nee manj inanj me rá se vaa qui'yáj cacun' a.

24 Dan me se niquej, raj nanj ei. Inanj cacun' 'yaj nee manj, ne che'é dan quiri' nu' nimanj, ne vaa güii ca'anj 'unj rihaan ya'an, qui'yaj nee manj asuun nanj adonj.

25 Ne me sí tinanii manj rihaan nee manj, rá soj ga. 'O se guun ni'yaj ndo'o ní' rihaan Diose se vaa tinanii Jesucristó sji 'nij ra'a man ní' manj rihaan sayuun yo' adonj.

Dan me se xa' ma'anj, tzaj ne noco' uxrá ma'anj se-tucuñj Diose, tzaj ne xa' nee manj, tzaj ne inanj se chi'ij 'yaj nee manj a.

## 8

*Nana nihánj taj xna'anj se vaa xcaj ní' cuentá che'é inanj Nimán Diose, ne cavij sa' nimán ní' a*

1 'Yaj me se daj chihaa míj se cuta' Diose cacun' xráá ní' sji noco' man Jesucristó ma'.

2 'O se 'unj nihánj me se che'é se canoco' 'unj man Jesucristó, ne che'é dan Nimán Diose me sí guun chij rihaan nimanj, gaa ne dan me se cunuu sa'

nimanj, ne che'é dan quinanii 'unj rihaan cacun', ne se cavi' nu' nimanj qui'yaj cacun' a man adonj.

<sup>3</sup> Ne guun nucuaj nee man ní' canoco' nee man ní' nu' se-tucuaj Moisés, ne che'é dan se guun nucuaj ní' quinanii ma'an ní' rihaan cacun' tumé ní' ma'. Tzaj nee Diosé me síi tinanii man ní' rihaan cacun' yo', ne ca'née Diosé ma'an ta'nú Diosé rihaan chumi, ne ase vaa nee man ní' ro', danj vaa nee man so' uún a. Xa' nee man ní', tzaj ne tumé ní' cacun', qui'yaj nee man ní', ne che'é dan ca'na' so', ne cayáan so' ga ní', ne cavi' so' che'é ní' a. Tzaj ne taj cacun' tumé ma'an so', ne che'é dan taj che'é qui'yaj ní' cacun' yaj ma'.

<sup>4</sup> Cuanō yaj me se taj che'é qui'yaj ní' inanj se vaa me rá nee man ní' qui'yaj ní' ma'. Inanj rihaan orún' Nimán Diosé cunō ní', ne qui'yaj ma'an ní' ndaa vaa me rá Diosé qui'yaj ní' a. Dan me se Nimán Diosé 'yaj uno ma'an ní' se-tucuaj Moisés adonj.

<sup>5</sup> Dan me se ta'aj yuvií xcaj cuentá inanj che'é nee man nij so', tzaj ne inō doj vaa yuvií noco' man Nimán Diosé, ne dan me se che'é inanj se vaa me rá Nimán Diosé xcaj nij so' cuentá adonj.

<sup>6</sup> Sese inanj che'é nee man ní' xcaj ní' cuentá, ne cavi' nu' nimán ní' a. Tzaj ne sese che'é Nimán Diosé xcaj ní' cuentá, ne cavií sa' ní', ne ca'vee cayáan ní' ga Diosé nu' cavií nu' ca'anj, ne gaa xej nimán ní', qui'yaj Nimán Diosé adonj.

<sup>7</sup> Sese inanj che'é nee man ma'an ní' xcaj ní' cuentá, ne taj ri'yunj ní' man Diosé vaa gaa adonj. Se guun nucuaj ma'an ní' cunō ní' se-tucuaj Diosé vaa gaa ma'.

<sup>8</sup> Ne aran' rá Diosé ni'yaj Diosé man nij yuvií acaj cuentá che'é nee man ma'an nij yuvií a man adonj.

*Nana nihánj taj xna'anj se vaa sese yanj Nimán Diosé ga ní', ne sa' doj gaa ní' a*

<sup>9</sup> Tzaj ne inō doj vaa nij soj sese ya yanj Nimán Diosé ga soj á. Che'é dan ne 'yaj soj ndaa vaa me rá nee man soj qui'yaj soj ma'. Tzaj ne inanj rihaan Nimán Diosé uno soj, ne dan me se sese nuvi' Nimán Jesucristó yáan ga yo'ō so', ne nuveé sij 'nij ra'a Jesucristó man me so' ma'.

<sup>10</sup> Ne'en soj se vaa cavi' nee man ní' che'é cacun' qui'yaj nee man ní', tzaj ne sese yanj Jesucristó ga ní', ne 'ō vaa sa' ní' rihaan Diosé, ne che'é dan 'ō vaa i'na' nimán ní' adonj.

<sup>11</sup> Ne ne'en soj se vaa cunuu i'na' uún Jesucristó gaa cavi' so', qui'yaj Diosé, ne ma'an Nimán Diosé nuú nimán soj, ne che'é dan cunuu naca nee man soj asa' cavi' soj, qui'yaj uún Diosé a.

*Nana nihánj taj xna'anj se vaa yuvií uno a'mii Nimán Diosé me ta'nú Diosé a*

<sup>12</sup> Che'é dan ne nó xcúún ní' qui'yaj ní' ndaa vaa me rá nee man ní' ma'. Se racuíj ní' man nee man ní', man tinuj, man nocoj.

<sup>13</sup> 'Q se sese aráya'anj ndo'ō soj man nee man soj, ne ca'anj yanj soj rihaan Diosé, qui'yaj ma'an soj adonj. Tzaj ne sese cunō soj nana a'mii Nimán Diosé, ne se ca'vej rá soj qui'yaj nee man soj cacun', gaa ne yo'ō gaa i'na' nimán soj adonj.

<sup>14</sup> 'Q se yuvií uno a'mii Nimán Diosé me ta'nú Diosé ei.

<sup>15</sup> Ne'en soj se vaa chu'vi' mozó ne'en so' se-ru'vee so', tzaj ne na'vej rá Diosé qui'yaj soj danj rihaan Diosé ma'. Se chuchu'vi' nimán soj ne'en soj Diosé ma'. 'Q se nicaj yu'unj Diosé man soj, ne guun ta'nij Diosé man soj, ne che'é dan me gaa niha' rá soj cataj soj: "Ataj" rihaan Diosé á.

16 Dan me se yo'ŋ a'mii Nimán Dioŋe ga nimán ní, ne taj Nimán Dioŋe se vaa ta'núí Dioŋe me ní a.

17 Che'é dan vaa güii rque ndo'o Dioŋe se sa' rihaan ní' ga Jesucristó, ne 'o cuyaan gaa se sa' rihaan Jesucristó ga ní' a. Veé dan me che'é se ran' ní' sayuun ndaa vaa quiran' Jesucristó ro', che'é dan cavii sa' ní' ga so', ne guun chij ní' ga so' vaa güii adonj.

*Nana nihánj taj xna'anj se vaa vaa güii, ne ve'é ndo'o gaa cunudanj chumij, qui'yaj Dioŋe che'é ní' a*

18 Veé dan me se ran' xa' ní' sayuun cuano, tzaj ne vaa güii, ne doj a cavii sa' ní' rihaan sayuun ran' ní' cuano adonj. 'O se ataa cataj xna'anj Dioŋe rihaan ní' che'é nu' se sa' nıcaj ní', tzaj ne asa' rque Dioŋe nu' se sa' rihaan ní', ne quini'yon ní' nu' sayuun quiran' ní' ei. Daj vaa raj nanj adonj.

19 Na'vıj uxrá cunudanj nij rasuun man rihaan chumij nihánj quisij güii tıhaan Dioŋe man nij ta'núí Dioŋe rihaan chumij, gaa ne quene'en chumij daj gaa nij so' a.

20 Cuano ro', taj yu'vee nó nij rasuun man rihaan chumij ma'. Gaa qui'yaj Dioŋe chumij, ne vaa sa' cunudanj nij rasuun yo', tzaj ne quiri' nij rasuun che'é cacun' qui'yaj yuvıj, ne ca'vej rá Dioŋe quiri' nu' nij rasuun yo', tzaj ne ne'en Dioŋe

21 se vaa vaa güii cunuu sa' cunudanj nij rasuun yo' rihaan chumij, ne asa' quisij güii yo', ne taj rasuun quiri' taj rasuun cuchruı ma'. 'O se ve'é ndo'o gaa nu' nij rasuun yo' ei. Dan me se ase vaa ma'an nij ta'núí Dioŋe ro', danj gaa uun nij rasuun uun, ne ve'é ndo'o gaa nij yo' adonj.

22 Dan me se ne'en ní' se vaa ran' uxrá nu' rasuun man rihaan chumij sayuun cuano, ne me uxrá rá yo' cunuu naca uun yo', ne na'vıj yo' quisij güii cunuu sa' yo' adonj.

23 Vaj a doj, ne ráchej ma'an ní' uun, ne na'vıj ní' cunuu naca ma'an ní' uun a. Dan me se yanj Nimán Dioŋe ga ní', ne sa' uxrá vaa Nimán Dioŋe, ne che'é dan ne'en ní' se vaa rque Dioŋe se sa' doj rihaan ní', ne ne'en ní' se vaa vaa güii, ne quene'en yuvıj se vaa guun ta'nıj Dioŋe man ma'an ní', ne cunuu sa' nu' nee man ní' a.

24 Dan me se tinanii Dioŋe man ní' rihaan chrej chi'ıj uun chij nimán ní', ne che'é dan guun ya rá ní' se vaa cavii sa' ní', tzaj ne ataa quene'en ní' nu' se vaa qui'yaj Dioŋe che'é ní', ne che'é dan nucaj ndo'o rá ní' man Dioŋe se vaa ya ya qui'yaj so' che'é ní' a.

25 Ne ne'en ní' daj qui'yaj Dioŋe che'é ní' ma'. Maan se nucaj rá ní' man Dioŋe, ne che'é dan se gaa ra'yanj nimán ní' ma'. Maan se gaa nanaj nimán ní', ne na'vıj ní' ndaa se cavii sa' ní' qui'yaj Dioŋe adonj.

*Nana nihánj taj xna'anj se vaa racuıj ndo'o Dioŋe man ní' a*

26 Sese ne ne'en ní' qui'yaj ní' nu' se vaa no xcúun ní' qui'yaj ní', ne Nimán Dioŋe racuıj man ní', ne guun nucaj ní' a. Ne ne'en ní' daj ca'mıj ní' gaa achıın ni'yaj ní' rihaan Dioŋe ma'. Che'é dan achıın ni'yaj Nimán Dioŋe che'é ní', ne taj xna'anj Nimán Dioŋe rihaan Dioŋe naná me rá ma'an ní' ca'mıj ní' a.

27 Dan me se Nimán Dioŋe ne'en daj me rá ní' cataj xna'anj ní' rihaan Dioŋe, ne uno Dioŋe a'mii Nimán Dioŋe che'é ní' ei. Ne'en Nimán Dioŋe me se achıın man ní', ne achıın ni'yaj Nimán Dioŋe rihaan Dioŋe se vaa rque Dioŋe se vaa achıın man ní' a. Dan me se ne'en Dioŋe se vaa inanj se vaa a'vej rá Dioŋe

nɨcaj ní' achíin ni'yaj Nimán Diose, ne danj 'yaj Nimán Diose che'é cunudanj ní' sɨj cunuu sa' nimán rihaan Diose adonj.

28 Dan me se ne'en ní' se vaa racuɨj ndo'o Diose man ní' sɨj aráj cochroj rihaan Diose ei. 'O se canacúún Diose man ní' cayáán ní' ga Diose nu' cavii nu' ca'anj, ne che'é dan me avii sa' nu' suun 'yaj suun ní' ga Diose adonj.

29 Gaa naá me se quene'en Diose se vaa canoco' ní' man so' vaa güii, gaa ne yo'o guun rá Diose se vaa naquí'yaj sa' Diose nimán ní', ne ase vaa ta'núú Diose síí cu'naj Jesucristó ro', danj gaa ní' uún, ne vaa güii cumán ndo'o tinúú Jesucristó do', ra'vij Jesucristó do', ne so' guun síí chava' rihaan cunudanj ní' a.

30 Gaa ne canacúún Diose man ní', gaa ne cunuu sa' ní' rihaan Diose, qui'yaj Diose, gaa ne ya guun chij ní' ga Diose, qui'yaj ma'an Diose adonj.

*Nana nihánj taj xna'anj se vaa daj chihaa mɨj se guun tanáj Diose man ní' ma'*

31 Dan me se Diose me tuvi' ní', ne che'é dan taj síí quisɨj qui'yaj sayuun man ní' ma'.

32 'O se ne cuchu'vi' Diose rque Diose ma'an ta'núú Diose cavi' che'é ní', ne che'é dan guun ya rá ní' se vaa rque Diose nu' se sa' rihaan ní', ne cavii sa' ní' adonj.

33 Ní' sɨj narii Diose man me se se guun cuta' yuvij cacun' xráá ní' rihaan Diose ma'. 'O se ma'an Diose cataj se vaa cunuu sa' ní' rihaan so' a.

34 Taj yuvii cuta' cacun' xráá ní' sɨj narii Diose man ma'. 'O se cavi' Jesucristó che'é ní', ne cunuu i'na' uún Jesucristó, ne cuano nicun' so' x'núú Diose, ne ma'an so' me síí achíin ni'yaj rihaan Diose che'é ní' adonj.

35 A' ó güii se guun yanj Jesucristó rihaan ní', qui'yaj nij yuvii ma'. Yo'o 'ee rá Jesucristó man ní' ei. Ca'vee se quiran' ní' sayuun do', ca'vee se quinano ndo'o rá ní' do', ca'vee se quitaj ri'yunj yuvii man ní' do', ca'vee se quina'aan rque ní' do', ca'vee se quinavij sa'anj rihaan ní' do', ca'vee se cavi' ní' do', tzaj ne daj chihaa mɨj se guun yanj Jesucristó rihaan ní' ma'.

36 No nana rihaan danj Diose se vaa che'é se noco' ní' man Diose, che'é dan me rá yuvii ticavi' yuvii man ní' daj a orá, ne ase vaa ticavi' nii man matzinj ro', danj me rá nii ticavi' nii man ní', taj danj Diose a.

37 Tzaj ne ca'vee se daj a sayuun ran' ní', tzaj ne taj se 'yaj ma'. 'O se Jesucristó me síí 'ee rá man ní', ne che'é dan qui'yaj canaán uxrá ní' rihaan sayuun adonj.

38-39 'O se guun ya raj se vaa a' ó rasuun se ca'vee qui'yaj guun yanj Diose rihaan ní' ma'. Ca'vee se gaa i'na' ní' do', ca'vee se cavi' ní' do', tzaj ne yo'o 'ee rá Diose man ní' a. Ca'vee se ma'an nij se-mozó Diose me rá qui'yaj guun yanj Diose rihaan ní', tzaj ne se ca'vee qui'yaj canaán nij so' ma'. Ca'vee se daj a sayuun quiran' ní', tzaj ne se tanáj Diose man ní' ma'. Se guun yanj Diose rihaan ní' qui'yaj yuvii do', qui'yaj síí chree do', qui'yaj nana chree do', qui'yaj naj guun rasuun do' ma'. Se guun nucujaj nij so' qui'yaj nij so' danj ma'. Taj a' ó rasuun man xta' taj a' ó rasuun man rej rque yo'ó qui'yaj ca'vee guun yanj Diose rihaan ní' ma'. A' ó rasuun qui'yaj Diose se ca'vee qui'yaj danj ma'. Yo'o 'ee rá Diose man ní', ne che'é dan ca'née so' man Jesucristó rihaan ní', ne 'nij ra'a Jesucristó man ní', ne 'ee rá so' man ní' adonj.

## 9

*Nana nihánj taj xna'anj se vaa nanó ndo'o rá sí cu'naj Pablo che'é tuvi' so' nij yuvií israelitá a*

<sup>1</sup> Noco' nu' ní' man Jesucristó, ne se ca'mii ne 'unj rihaan nij soj ma'. 'O se yanj Nimán Diose ga 'unj, ne ma'an Nimán Diose cataj rihanj se vaa nana ya ca'mij á.

<sup>2-3</sup> Dan me se inanj nanó ndo'o raj che'é nij tuvij nij yuvií israelitá, ne me raj nayonj rihaan nij so', ne ndaa ca'née nimanj quinaj ma'anj rihaan sayuun, qui'yaj Diose, ne yo'o nacaj Diose man nij so' rihaan sayuun quiran' nij so', ne ca'née nimanj tanáj Jesucristó manj, ne nacaj Jesucristó man nij so' a.

<sup>4</sup> Dan me se yuvií israelitá me nij so', ne guun ta'nij Diose man nij so', rá Diose á. Quene'en nij so' se vaa chuguun ndo'o Diose gaa canicun' ma'an Diose ga nij so' gaa naá, ne cataj xna'anj Diose rihaan nij so' daj qui'yaj Diose che'é nij so', ne cataj xna'anj Diose rihaan nij so' daj qui'yaj ma'an nij so' a. Tucu'yón Diose man nij so' daj qui'yaj nij so' gaa na'víj nij so' rihaan Diose, ne cataj Diose rihaan nij so' se vaa ya ca'nej Diose 'o sí tinanii man nij so' rihaan sayuun a.

<sup>5</sup> Xii nij yuvií israelitá me nij sí man gaa naá sí cu'naj Abraham do', sí cu'naj Isaac do', sí cu'naj Jacob do' a. Yo'o tuvi' nij so' me Jesucristó sí ca'née Diose tinanii man yuvií rihaan sayuun, ne Jesucristó me se Diose me so', ne uun chij so' rihaan cunudanj a. Ve'é ca'mii ní' che'é so' nu' cavii nu' ca'anj ei. Veé danj gaa ya ei.

*Nana nihánj taj xna'anj se vaa inanj nij yuvií israelitá narii Diose me ya ya yuvií israelitá rihaan Diose a*

<sup>6</sup> Dan me se gaa naá cataj Diose se vaa ya canoco' nij yuvií israelitá man so' nu' cavii nu' ca'anj, ne me che'é ne noco' nij yuvií israelitá man Diose cuano, rá soj ga. 'O se quisij ya ndaa vaa ca'mii Diose, tzaj ne ne narii ya Diose man cunudanj nij yuvií israelitá ma'. Nuveé ya ya yuvií israelitá me cunudanj nij so' rihaan Diose ma'.

<sup>7</sup> Abraham sí cayáan gaa naá ro', doj ta'níi ta'nij si'no so' guun ta'níi Diose, ne dan me se cataj danj Diose se vaa orún' nij ta'níi ta'nij si'no sí cu'naj Isaac me ya ya ta'níi ta'nij si'no sí cu'naj Abraham rihaan Diose á. Danj ca'mii Diose rihaan sí cu'naj Abraham gaa naá a.

<sup>8</sup> Dan me se cataj Diose se vaa se guun ta'nij Diose man cunudanj nij ta'níi ta'nij si'no sí cu'naj Abraham ma'. Maan se ta'aj nij so' narii Diose, ne inanj che'é nij sí narii Diose ca'mii Diose, gaa cata' tu'va Diose se vaa ya canoco' nij so' man so' a.

<sup>9</sup> Dan me se gaa ataa ca'ngaa sí cu'naj Isaac sí narii Diose man, ne ca'mii Diose che'é so', cataj Diose se vaa nasij 'o yo', gaa ne ca'na' uún Diose rihaan Abraham, ne ya gaa 'o ta'nij sno'o chana cu'naj Sara a. Ne sno'o cunii yo' ro', me Isaac a. Danj cataj Diose rihaan Abraham a.

<sup>10</sup> Ne vaa chana cu'naj Rebeca uún, ne cotoj no' ga orún' nica no' sí cu'naj Isaac, ne nari' no' ndaa ne'ej cuaté nuu rque no' a.

<sup>11-12</sup> Gaa ataa ca'ngaa ne'ej, ne cataj xna'anj Diose rihaan no' se vaa qui'yaj suun ne'ej taj yaan ca'ngaa rihaan ne'ej noco' xco, cataj Diose a. 'O se ataa ca'ngaa ne'ej, ne taj a 'ó roj so' qui'yaj sa' do', qui'yaj chí'ii do' ma'. Taj se sa' qui'yaj sí guun chij rihaan tinúu, ne taj cacun' tumé sí qui'yaj suun che'é tinúu ma'. Maan se inanj danj qui'yaj Diose narii Diose man yo'o so' guun



chij so' rihaan tinúú so', che'é rej aj guun rá Diose daj gaa suun cata 'o 'o so' rihaan Diose nanj ei.

<sup>13</sup> Dan me se taj danj Diose se vaa cunuú 'eē rá Diose ne'en Diose man nij tuví' síf cu'naj Jacob síf noco' xco, tzaj ne quiri' nij tuví' síf cu'naj Esau rihaan Diose, taj danj Diose adonj.

*Nana nihánj taj xna'anj se vaa ca'vee naríj Diose naj guun yuvíj a*

<sup>14</sup> Dan me se nij qui'yaj Diose rihaan síf cu'naj Esau, rá soj na'. Taj a doj ma'.

<sup>15</sup> 'O se gaa naá ca'mii Diose rihaan síf cu'naj Moisés, cataj Diose a:

—No xcúún 'unj gaa 'eē rá 'unj ne'én 'unj naj guun yuvíj a. —Danj ca'mii Diose rihaan Moisés gaa naá a.

<sup>16</sup> Dan me se ca'vee se daj a me rá yuvíj, ca'vee se daj a qui'yaj yuvíj, tzaj ne se ca'vee qui'yaj nij yuvíj se vaa me rá ma'an nij yuvíj ma'. Orún' Diose me síf cataj me síf cunuú 'eē rá so' man adonj.

<sup>17</sup> Ne rihaan danj Diose nó nana ca'mii Diose rihaan síf cu'naj Faraón gaa cataj Diose:

—Guún so' síf nicaj suun, qui'yáj, gaa ne quene'en yuvíj daj quirán' so', qui'yáj, ne xcaj nij yuvíj cuentá se vaa Diose síf nucuaj mej a. —Nanj cataj Diose rihaan síf cu'naj Faraón gaa naá a.

<sup>18</sup> Dan me se ne'en ní' se vaa sese me rá Diose cunuú 'eē rá Diose man 'o so', ne cunuú 'eē rá Diose man so', ne sese me rá Diose guun nichraj rá 'o so', ne guun nichraj rá so', qui'yaj uún Diose a.

<sup>19</sup> Vaa yuvíj cataj: “Che'é dan, me che'é uta' Diose cacun' xráá yuvíj ga. 'O se inanj se me rá Diose qui'yaj ní' 'yaj ní' á”. Danj cataj ta'aj yuvíj a.

<sup>20</sup> Tzaj ne ne nó xcúún ní' cataj ní' se vaa ne nó xcúún Diose qui'yaj so' ndaa vaa 'yaj so' ma'. 'O se Diose me síf qui'yaj man ní', ne ne nó xcúún ní' cachínj na'anj ní' man Diose me che'é cavíj nij ta'aj ní' ma'.

<sup>21</sup> Dan me se síf 'yaj xruj me se doj yo'óo níqui gaa rihaan so', gaa ne ca'vee qui'yaj so' xruj a. Doj yo'óo níqui nicaj so' qui'yaj so' xruj ve'é ndo'o vaa, gaa ne doj yo'óo níqui nicaj so' qui'yaj so' xruj nij doj a. Ca'vee qui'yaj so' daj me rá ma'an so' á.

<sup>22</sup> Ne ase vaa 'yaj síf 'yaj xruj ro', danj vaa 'yaj Diose, ne dan me se quiri' ndo'o ta'aj yuvíj qui'yaj Diose, ne vaa güi ca'anj nij so' rihaan ya'an a. Uun yuváa Diose man nij so' che'é cacun' 'yaj nij so', ne me rá Diose caxríj yuváa Diose man nij so', ne me rá Diose tíhaan Diose se vaa nucuaj ndo'o Diose, tzaj ne aráj x'naa uxrá Diose ni'yaj Diose man nij yuvíj,

<sup>23</sup> che'é rej guun rá Diose tíhaan Diose rihaan nij yuvíj nu' ndaa vaa qui'yaj so' che'é yo'óo nij yuvíj, ne yo'óo nij so' me se aj guun rá Diose se vaa guun chij nij so' ga so', ne che'é dan cunuú 'eē rá so' man nij so', gaa ne xcaj cunudanj nij yuvíj cuentá se vaa síf uun chij sa' ndo'o me Diose ei.

<sup>24</sup> Ma'an ní' me nij yuvíj guun chij ga Diose, ne dan me se ta'aj ní' me yuvíj israelítá, ne yo'óo ta'aj ní' me yuvíj yanj, tzaj ne canacúún Diose man 'o 'o ní' guun chij ní' ga so' adonj.

<sup>25</sup> Ase vaa nana a'mij nihánj ro', danj vaa nana ca'mii Diose gaa naá nana cacrón síf cu'naj Oseas rihaan yanj a. Dan me se cataj Diose a:

—Yuvíj ne noco' manj me se ne 'eē raj man nij so' ma'. Tzaj ne vaa güi guun nij so' tuvíj, ne vaa güi cunuú 'eē raj man nij so' adonj.

<sup>26</sup> Dan me se maan rej nicun' 'unĵ gaa cataĵ 'unĵ se vaa nuveé tuvi' 'unĵ me nij yuviĵ ro', maan dan canicún' 'unĵ cataĵ 'unĵ se vaa ta'nij ma'anĵ me nij so' a. 'Q se Diose vaa i'na' mej adonĵ. —Danĵ ca'mii Diose gaa naá a.

<sup>27</sup> Ne nucuaj ca'mii sí cu'naj Isaías gaa naá che'é nij yuviĵ israelitá a. Cataĵ so':

—Ca'vee se guun que'ee uxrá nij sí israelitá, ne ndaa ase uun rá' ne'én' yo'óo chruu naj tu'va na ya'anĵ guun rá' quene'én' man nij tuvi' nij so', tzaj ne taj que'ee nij so' caviĵ sa' ma'. 'Q se doĵ tuvi' nij so' caviĵ sa' nanĵ adonĵ.

<sup>28</sup> Orá le'ej nii qui'yaj suun Diose nu' suun vaa rihaan so' ca'ne' so' cacun' che'é nu' yuviĵ man rihaan chumii adonĵ. —Danĵ ca'mii sí cu'naj Isaías a.

<sup>29</sup> Veé dan ca'mii uún sí cu'naj Isaías che'é nij yuviĵ israelitá, ne cataĵ uún so'— Guun nucuaj ndo'o Diose guun chij Diose á. Ne ní' me se avi' ní' che'é cacun' tumé ní', tzaj ne tinanii Diose man doĵ tuvi' ní' sij israelitá rihaan sayuun a. Sese taj tuvi' ní' quinanii rihaan sayuun, ne cavi' cunudanj nij yuviĵ man chiháán ní', ne quinavij chiháán ní', ne ase vaa navij chuman' Sodoma do', ase vaa navij chuman' Gomorra do', danĵ gaa quinavij chiháán ní' nanĵ adonĵ. —Veé danĵ ca'mii sí cu'naj Isaías che'é nij yuviĵ israelitá gaa naá a.

*Nana nihánĵ taj xna'anĵ se vaa ne cunuĵ sa' nij yuviĵ israelitá rihaan Diose, che'é se ne cuchuman rá nij so' ni'yaj nij so' man Jesucristó a*

<sup>30</sup> Xcaĵ ní' cuentá daj qui'yaj nij yuviĵ israelitá do', daj qui'yaj nij yuviĵ yanĵ do', rihaan Diose á. Dan me se nuveé yuviĵ israelitá me nij yuviĵ yanĵ, ne ne guun rá nij so' qui'yaj suun nij so' yan cunuĵ sa' ma'an nij so' rihaan Diose, tzaj ne ta'aj nij so' me sí amán rá ni'yaj man Diose, ne che'é dan 'o cunuĵ sa' nij so' rihaan Diose ei.

<sup>31</sup> Ino qui'yaj que'ee nij yuviĵ israelitá a. Dan me se qui'yaj suun uxrá nij so' nano' nij so' chrej cunuĵ sa' ma'an nij so' rihaan Diose, tzaj ne ne nari' nij so' chrej sa' ma'.

<sup>32</sup> Dan me se ne nari' nij so', che'é se ne cuchuman rá nij so' ni'yaj nij so' man Jesucristó ma'. Ne guun ya rá nij so' se vaa racuíĵ Diose man nij so' cunuĵ sa' nij so' rihaan Diose ma'. Maan se cunuĵ sa' ma'an nij so', rá nij so', ne qui'yaj suun uxrá nij so' che'é rej ca'vee cunuĵ sa' ma'an nij so', rá nij so' a. Ne ca'vej rá nij so' cuchuman rá nij so' ni'yaj nij so' man Jesucristó, ne dan me se ase vaa 'o yuvej aráán chrej ro', danĵ vaa Jesucristó rihaan nij so', ne ase vaa uun na'aj yuviĵ naxru' rihaan yuvej ro', danĵ vaa guun na'aj nij yuviĵ israelitá che'é se ne ca'vej rá nij so' cuchuman rá nij so' ni'yaj nij so' man Jesucristó adonĵ.

<sup>33</sup> 'Q cuyaan vaa nana a'mij ga nana a'mii danĵ Diose che'é Jesucristó, ne dan me se gaa naá cataĵ Diose a:

—Ni'yaj so' ei. Aj cuné' 'unĵ yo'o yuviĵ chuman' cu'naj Jerusalén, ne ase vaa 'o yuvej vaa so', nucuaj ndo'o so' a. Naxru' yuviĵ, qui'yaj yuvej yo', ne guun na'aj nij yuviĵ quene'en nij yuviĵ man so', tzaj ne sese cuchuman rá yo'o so' quene'en so' man sí cuné' 'unĵ, ne se guun na'aj so' ma'. Tananj caviĵ sa' so' adonĵ. —Dan me nana ca'mii Diose che'é Jesucristó a.

## 10

<sup>1</sup> Dan me se achín ni'yaj ndo'oj rihaan Diose che'é nij tuvi' 'unĵ nij yuviĵ israelitá, tinuj, nocoĵ. 'Ee rá 'unĵ man nij so', ne che'é dan me ndo'o raj quinanii nij so' rihaan sayuun a.

<sup>2</sup> Dan me se sa' qui'yaj nij so' gaa guun ndo'o rá nij so' cunuü sa' nij so' rihaan Dioso, tzaj ne ne ne'en nij so' ðaj qui'yaj nij so' ne ca'vee cunuü sa' nij so' rihaan Dioso ma'.

<sup>3</sup> Ne xcaj nij so' cuentá che'é se vaa aj qui'yaj Dioso che'é nij so', ne ne xcaj nij so' cuentá se vaa ca'vee cunuü sa' nij so' rihaan Dioso, qui'yaj ma'an Dioso ma'. Maan se nano' ma'an nij so' chrej cunuü sa' ma'an nij so' rihaan Dioso, ne che'é dan ataa qui'yaj nij so' ndaa vaa me rá Dioso qui'yaj nij so', ne che'é dan ataa cunuü sa' nij so' adonj.

<sup>4</sup> Gaa naá, ne canoco' yuvij se-tucuanj Moisés, ne veé dan me se cunuü sa' nij so' rihaan Dioso, rá nij so', tzaj ne yaj nihánj me se aj quisj se-tucuanj Moisés, qui'yaj Jesucristó, ne 'o se yo'o aman rá ní' ni'yaj ní' man Jesucristó, gaa ne cunuü sa' ní' rihaan Dioso nanj adonj.

*Nana nihánj taj xna'anj se vaa quinanj cunudanj nij yuvij cuchumán rá ni'yaj man Jesucristó rihaan sayuun a*

<sup>5</sup> Gaa naá cachrón síi cu'naj Moisés nana rihaan yanj, ca'mii so' che'é se-tucuanj ma'an so', ne cataj so' se vaa sese guun nucuaj yuvij cunq yuvij nu' tucúaan cuchruj ma'an so', ne cayáan nij yuvij rihaan Dioso nu' cavii nu' ca'anj a. Danj ca'mii Moisés gaa naá a.

<sup>6</sup> Tzaj ne cuano nihánj me se aj xcaj ní' cuentá se vaa nuu sa' ní' rihaan Dioso che'é yan cuchumán rá ní' cuno ní' nana ca'mii so', ne che'é dan yo'o a'mii ní' ga síi cu'naj Moisés gaa naá, taj ní' se vaa taj che'é cavii yuvij rej xta' do', nano' nij yuvij man síi tinanii man nij so' rihaan sayuun,

<sup>7</sup> ne taj che'é ca'anj yuvij rej rque yo'óo do', nano' nij yuvij man so' rej man nimán ma'. Danj taj ní' ga síi cu'naj Moisés a.

<sup>8</sup> Ne cataj uún síi cu'naj Moisés se vaa nana achiin mán so' ro', nuveé nana ca'na' rej gan' me nana yo' ma'. Tananj ndaa tu'va ma'an so' do', ndaa nimán ma'an so' do', nuú nana yo' nanj adonj, taj Moisés, ne nana yo' me nana a'mii yuvij taj yuvij se vaa amán rá yuvij ni'yaj yuvij man Jesucristó, ndaa vaa a'mii natáj núj rihaan yuvij ei.

<sup>9</sup> 'O se sese ca'mii yá so' cataj so' rihaan tuví' so' se vaa Jesucristó 'nij ra'a mán so', ne sese guun ya rá so' se vaa cunuü i'na' uún Jesucristó, qui'yaj Dioso, gaa cavi' so', ne quinanj so' rihaan sayuun a.

<sup>10</sup> 'O se nimán ní' me se yo' me cuchuman rá ní' ne'en ní' Jesucristó, ne ca'vee cunuü sa' ní' rihaan Dioso, ne tu'va ní' me se yo' me ca'mii ya ní' cataj ní' se vaa noco' ní' man Jesucristó, ne ca'vee quinanj ní' rihaan sayuun adonj.

<sup>11</sup> Dan me se taj uún danj Dioso se vaa xa' síi amán rá ni'yaj man Jesucristó, tzaj ne se guun na'aj so' ma'. Ya cavii sa' so' adonj. Danj taj danj Dioso a.

<sup>12</sup> 'O se 'o cuyaán vaa cunudanj yuvij rihaan Jesucristó, ne dan me se yuvij israelitá do', yuvij yanj do', 'o cuyaán vaa nij so' rihaan Jesucristó, tzaj ne 'nij ra'a Jesucristó man cunudanj nij so', ne uun nucuaj uxrá Jesucristó raçuíj so' man cunudanj yuvij achiin ni'yaj rihaan so' a.

<sup>13</sup> Dan me se taj uún danj Dioso a: "Yuvij achiin ni'yaj rihaan síi 'nij ra'a man ní' ro', quinanj cunudanj nij so' rihaan sayuun, ne cavii sa' nij so' adonj". Danj taj danj Dioso a.

*Nana nihánj taj xna'anj se vaa achiin ca'mii natáj nii che'é Jesucristó rihaan yuvij ataa cunq nana che'é so' a*

<sup>14</sup> Tzaj ne taj che'é cachinj ni'yaj yuvij rihaan Jesucristó, sese ataa cuchuman rá nij yuvij ni'yaj nij yuvij man Jesucristó ma'. Ne se ca'vee

cuchuman rá nij yuvij ni'yaj nij yuvij man so', sese ataa cunō nij yuvij se-nana so' ma'. Ne se ca'vee cunō nij yuvij, sese taj sí a'mii natáj rihaan nij yuvij ma'.

<sup>15</sup> Ne se cuchi' sí a'mii natáj rihaan yuvij, sese se ca'neé nii man so' ma'. Dan me se a'mii uún danj Diose, taj yo': "Ve'é ndo'o 'yaj sí ca'anj ca'mii natáj nana sa' ei". Danj taj danj Diose a.

<sup>16</sup> Tzaj ne vaa yuvij na'vej rá cunō nana sa' ma'. Inanj danj ca'mii sí cu'naj Isaías gaa cachín ni'yaj so' rihaan Diose, ne cataj so':

—Ataj sí chij. Doj yuvij amán rá cunō nana ca'mii núj a —taj so' rihaan Diose a.

<sup>17</sup> Tzaj ne veé dan me se asino a'mii natáj nii rihaan yuvij che'é Jesucristó, gaa ne uno nij yuvij, ne xcaj nij yuvij cuentá che'é se vaa taj xna'anj Diose rihaan nij yuvij, gaa ne chumán rá nij yuvij ni'yaj nij yuvij man Diose nanj adonj.

*Nana nihánj taj xna'anj se vaa na'vej rá nij yuvij israelitá cunō nij so' se-nana Jesucristó nana sa' ma'*

<sup>18</sup> Tzaj ne cataj ta'aj yuvij se vaa ataa cuchi' nana sa' rihaan nij yuvij israelitá a. Danj ca'mii ta'aj nij so', tzaj ne aj cuchi' nana sa' rihaan nij yuvij israelitá ei. Dan me se taj danj Diose se vaa aj quene'en cunudanj nij yuvij man rihaan chumij se-nana Diose nana sa' a. Danj a'mii danj Diose á.

<sup>19</sup> Tzaj ne yo'ó ta'aj yuvij cataj se vaa ne ne'en ya nij yuvij israelitá se vaa tinanii Diose man cunudanj nij yuvij man rihaan chumij rihaan sayuun ma'. Danj cataj uún nij yuvij yo', tzaj ne taj ma'. Maan se aj ne'en nij yuvij israelitá ei. 'Q se gaa naá cachrón sí cu'naj Moisés nana ca'mii Diose rihaan nij yuvij israelitá rihaan yanj, gaa cataj Diose se vaa vaa güii xcaj nij yuvij israelitá cuentá se vaa cavii sa' nij yuvij yanj, qui'yaj Diose, ne che'é dan guun xcoj ruvaa rá nij yuvij israelitá quene'en nij so' nij yuvij yanj yo' a. 'Q se nuveé yuvij acaj cuentá me yuvij yanj, ne che'é dan guun xcoj ruvaa rá nij yuvij israelitá che'é se vaa cavii sa' nij yuvij yanj qui'yaj Diose ei. Danj ca'mii Diose gaa naá a.

<sup>20</sup> Ne 'o cuyaan vaa nana nihánj ga nana cachrón uún sí cu'naj Isaías rihaan yanj gaa naá, ne dan me se quisij rá so' cataj so' se vaa nij yuvij yanj me se ne nano' nij so' man Diose, tzaj ne nari' nij yuvij yanj man Diose, ne nda' se ne guun rá nij so' quene'en nij so' me rej vaj Diose, tzaj ne curuvi' Diose rihaan nij so' a. Danj taj sí cu'naj Isaías gaa naá a.

<sup>21</sup> Tzaj ne ino vaa nana ca'mii Diose rihaan nij yuvij israelitá gaa naá, taj sí cu'naj Isaías a. Dan me se cataj Diose rihaan nij yuvij israelitá se vaa 'o me rá Diose nacaj Diose man nij yuvij israelitá, tzaj ne ne ca'vej rá nij so' cunō nij so' rihaan Diose ma'. Inanj tucuáá nij so' rihaan Diose nanj á. Danj taj Diose, ne cachrón sí cu'naj Isaías rihaan yanj a.

## 11

*Nana nihánj taj xna'anj se vaa cunuu 'ee rá Diose ni'yaj Diose ta'aj nij yuvij israelitá a*

<sup>1</sup> Che'é se tucuáá nij yuvij israelitá rihaan Diose, che'é dan quiri'ij yanj Diose man nij so', rá soj na'. Taj ma'. 'Q se ma'anj me sí israelitá uún ei. Ne dan me se xii 'unj me sí cu'naj Abraham gaa naá, ne xii 'unj me sí cu'naj Benjamín uún ei.

<sup>2</sup> Ne quiri'ij yanj Diose man nij yuvij israelitá ma'. 'Q se gaa ataa qui'yaj Diose chumij, ne 'o quene'en Diose se vaa canoco' nij so' man Diose a.

Ne'en nij soj daj taj danj Diose che'é sí cu'naj Elías gaa naá a. Dan me se cuta' Elías cacun' xráá nij yuvij israelitá,

<sup>3</sup> ne cataj so':

—Ataj sí chij. Ticavi' nij yuvij israelitá man nij sí nata' se-nana so' rihaan yuvij che'é so' á. Tiri' nij so' rej quina'v'j yuvij rihaan so' á. Taj orunj quináj nanj á. Ne me rá nij so' ticavi' nij so' mán 'unj uún adonj. —Danj ca'mii sí cu'naj Elías rihaan Diose a.

<sup>4</sup> Gaa ne ca'mii uún Diose rihaan so', cataj Diose:

—Taj ma'. Ne taj oruún so' ma'. Tzaj ne vaa 'o cunú' chij m'j yuvij israelitá noco' manj, ne a 'ó nij so' ne na'v'j rihaan ya'anj cu'naj Baal ya'anj ne vaa i'na' ma'. —Danj ca'mii Diose rihaan sí cu'naj Elías a.

<sup>5</sup> Ne veé danj vaa uún nij yuvij israelitá sí man cuano, ne cunuu 'ee rá Diose man nij yuvij israelitá, ne narii Diose man doj tuvi' nij so' ei.

<sup>6</sup> Inanj danj qui'yaj ma'an Diose che'é ta'aj nij yuvij israelitá, tzaj ne nuveé che'é se sa' qui'yaj ma'an nij so' me narii Diose man nij so' ma'. Sese che'é se sa' qui'yaj nij so' narii Diose man nij so', ne taj che'é cataj ni' se vaa cunuu 'ee rá uún Diose man nij so' ma'.

*Nana nihánj taj xna'anj se vaa vaa güi cunú sa' uún nij yuvij israelitá rihaan Diose a*

<sup>7</sup> Cuanó ro', cunudanj nij yuvij israelitá me rá cunú sa' rihaan Diose, tzaj ne ne guun nucuaj cunudanj nij so' cunú sa' ma'an nij so' ma'. Tzaj ne narii Diose man ta'aj nij so', ne cunuu sa' ta'aj nij so' rihaan Diose, ne quináj uun yo'ó ta'aj nij yuvij israelitá yo' a. Ne xa' nij sí quináj me se ne guun nucuaj nij so' daj chihaa m'j xcaj nij so' cuentá che'é Diose ma'.

<sup>8</sup> Dan me se nanj taj uún danj Diose, taj yo': "Ne ca'vee xcaj nij so' cuentá, qui'yaj Diose ma'. 'Q se ase vaa sí tuchr'ij do', ase vaa sí so' do', danj vaa nij so', ne danj vaa nij so' ndaa cuano nanj adonj". Danj ca'mii danj Diose che'é nij yuvij israelitá a.

<sup>9</sup> 'Q cuyaan vaa nana nihánj ga nana ca'mii sí cu'naj David gaa naá uún, ne cataj so' se vaa ase ran' xcuu ata' ra'nga' ro', danj quiran' nij yuvij israelitá a. Dan me se cavii sa' uxrá nij so' rihaan chumij nihánj, tzaj ne taj ni'yón quiran' nij so' sayuun, ne quiran' nij so' sayuun che'é nu' sayuun qui'yaj nij so' a.

<sup>10</sup> Se guun nucuaj nij so' xcaj nij so' cuentá, maan se quinano ndo'o rá nij so' che'é sayuun quiran' nij so' a. Danj ca'mii sí cu'naj David che'é se vaa quiran' nij yuvij israelitá, ne ya danj quiran' guee nij so' nanj adonj.

<sup>11</sup> Dan me se ne cuchuman rá nij yuvij israelitá nana ca'mii Diose, gaa ne quiri' nij so' rihaan Diose, ne veé danj gaa nij so' nu' cavii nu' ca'anj, rá nij soj na'. Taj ma'. 'Q se che'é se vaa qui'yaj nij yuvij israelitá, che'é dan vaa ya'nú rihaan nij yuvij yanj quinani' nij so' rihaan sayuun, gaa ne guun xcoj ruvaá rá nij yuvij israelitá quene'en nij so' nij yuvij yanj a.

<sup>12</sup> Gaa ne canicaj rá nij yuvij israelitá, ne canoco' nij so' Diose adonj. Dan me se che'é se quiri' nij so' rihaan Diose, ne che'é dan cavii sa' cunudanj nij yuvij man rihaan chumij, ne ndaa nij yuvij yanj cavii sa', tzaj ne asa' nuu sa' nij yuvij israelitá rihaan Diose, ne doj a cavij sa' uún cunudanj nij yuvij man rihaan chumij adonj.

*Nana nihánj taj xna'anj se vaa se guun ca'mii xta'! nij yuvij yanj rihaan nij yuvij israelitá ma'*

13 Cuanō ro', ca'mij rihaan nij soj sij yanj, ne aj cune! Jesucristó mán 'unj guún 'unj apóstol nata' se-nana so' rihaan nij soj sij yanj adonj. Ne aj guun que'ee ndo'o ca'mij rihaan nij yuvij israelitá che'é suun ca'ne' Jesucristó rihanj, ne dan me se aj guun que'ee ndo'o cataj xna'anj 'unj rihaan nij so' se vaa a'mii natáj 'unj se-nana Diose rihaan nij soj sij yanj a.

14 'O se me raj guun xcoj rá nij so' ni'yaj nij so' man soj sij yanj, gaa ne canoco! ta'aj nij so' nana noco' soj, gaa ne quinaniij nij so' rihaan sayuun, raj a.

15 Gaa quiri'ij yanj Diose man nij yuvij israelitá, ne cunuu rcua'aan yo'ó nij yuvij man rihaan chumij ga Diose, ne che'é dan asa' nacaj uún Diose man nij yuvij israelitá, ne cavij sa' uxrá ma'an nij yuvij israelitá uún a. Dan me se ase vaa sí cavij vaa nij so' cuano ei. Na'vee quinaniij nij so' rihaan sayuun, tzaj ne asa' nacaj uún Diose man nij so', ne ase vaa sí na'núj ro', danj gaa nij so', cavij sa' uxrá nij so' ei.

16 Ya nacaj uún Diose man nij yuvij israelitá nanj á. 'O se ne'en ní' se vaa sese go' nii ta'aj tan' rihaan Diose, ne cunuu guee ya stan' nii rihaan Diose, ne sese sa' vaa yáa chruun rihaan Diose, ne sa' vaa cunuj chruun yo' rihaan Diose ei. Che'é dan ne'en ní' se vaa sese cunuu sa' ta'aj nij yuvij israelitá rihaan Diose, ne gaa sa' cunudanj nij yuvij israelitá rihaan Diose adonj.

17 Ne'en soj se vaa ne cuchuman rá ta'aj nij yuvij israelitá ni'yaj nij so' Diose ma'. Che'é dan, ase vaa 'yaj nii man ta'aj nij ra'a chruun olivó ne rii chruj ro', danj vaa qui'yaj Diose man nij so', ne quiri'ij yanj Diose man nij sí ne cuchuman rá yo', gaa ne nacaj Diose man soj sij yanj, ne dan me se ase vaa ra'a chruun olivó nicun' rco' quij vaa soj, tzaj ne nacaj Diose man soj, caxrij Diose man soj tacóo chruun olivó sa', ne guun soj 'o chruun sa' vaa, ne vaa i'na' soj, 'yaj yáa chruun yo' nanj ei.

18 Tzaj ne se guun cataj soj se vaa sa' doj vaa soj rihaan ra'a chruun ca'anj yanj qui'yaj Diose ma'. Dan me se sese vaa se uun uxrá ma'an soj rá soj, ne me ma'an rá soj nanj ei. Dan me se xcaj soj cuentá se vaa taj se uun soj rihaan yáa chruun yo' mei. 'O se ma'an yáa chruun yo' 'yaj don 'vee vaa i'na' soj sij uun ra'a chruun chuguanj. Xa' soj, tzaj ne maan chruun le'ej nata' nayón uun me soj nanj ei.

19 Xraj, ne cataj yo'o tuvi' soj: "Tzaj ne quiri'ij yanj Diose man yo'ó nij ra'a chruun yo' che'é rej ca'vee caxrij so' mán 'unj tacóo chruun yo' ei", rá yo'o tuvi' soj a.

20 Tzaj ne maan che'é se nuveé sij amán rá ni'yaj Diose me ta'aj nij yuvij israelitá yo' me quiri'ij yanj Diose man nij so', ne maan che'é se amán rá soj ni'yaj soj Diose me nicun' soj rihaan Diose cuano chuguanj. Tzaj ne se guun cataj soj se vaa vaa se uun ndo'o soj ma'. 'O se chucu'vi' nimán soj ei.

21 Dan me se nda' se chruun cavii man raá chruun ya me nij sí israelitá, tzaj ne ne caraá x'naa Diose man nij so', ne quiri'ij yanj Diose man ma'an ya nij so', ne che'é dan táa a soj, ne se chucu'vi' Diose quiri'ij yanj Diose man soj sij ra'a chruun cavii quij a mei.

22 Dan me se xcaj soj cuentá, ne nda' se yuvaa ya Diose ne ne'en Diose qui'yaj Diose sayuun man nij yuvij 'yaj se nij rihaan Diose, tzaj ne cunuu 'ee rá Diose man soj, ne ve'é ndo'o qui'yaj Diose rihaan soj ei. Ne ve'é qui'yaj Diose rihaan soj nu' cavii nu' ca'anj, sese se ca'anj yanj soj rihaan Diose ei. Sese ca'anj yanj soj, ne quiri'ij yanj Diose man soj nanj adonj.

<sup>23</sup> Ne 'o rasuun uún me se nij yuvií quiri'íj yaníj Diose me se sese ca'ne' rá nij so' gá suun ne amán rá ni'yaj man Diose, ne ca'vee caxrii uún Diose man nij so' tacóo chruun sa' yo' uún ei. 'O se guun nucaj Diose qui'yaj Diose danj ei.

<sup>24</sup> Tanañj soj, ne chruun le'ej cavii raá chruun olivó man rco' me soj, tzaj ne ca'vee ca'na' soj naxíj soj tacóo chruun sa', ne táa a nij síí israelitá, ne maan ra'a chruun sa' me nij so', ne taj sayuun ca'vee ca'na' uún nij so' nano uún so' tacóo chruun sa' cavii nij so' a ma'.

*Nana nihánj taj xna'anj se vaa me rá Diose gaa 'ee rá Diose man cunudanj yuvií a*

<sup>25</sup> Dan me se me raj xcaj soj cuentá che'é nana cataj xna'anj Diose rihaan ní, tinuj, nocoj. Síj cuno soj nana nihánj, gaa ne se guun ca'mii xtá' soj ma'. Cuaño nihánj me se na'vee xcaj nij yuvií israelitá cuentá che'é se vaa qui'yaj Diose che'é nij so' ma'. Che'é dan vaa ya'núj catuu soj sij yaníj canoco' soj man Diose adonj. Ne xa' nij síí yaníj narii Diose, tzaj ne vaa güii canoco' cunudanj nij so' man Diose, gaa ne cuchuman rá nij yuvií israelitá ni'yaj nij so' man Diose,

<sup>26</sup> gaa ne tinanii Diose man cunudanj nij yuvií israelitá rihaan sayuun ei. Danj a'mii danj Diose ei. Dan me se taj yo': "Chuman' Jerusalén cavii 'o síí tinanii man yuvií, ne tinavij so' se chi'ii man nimán nij yuvií israelitá a.

<sup>27</sup> Danj qui'yaj yá 'unj che'é nij so' güii tinavíi 'unj cacun' che'é nij so' adonj". Dan me nana ca'mii Diose, nana no rihaan danj Diose a.

<sup>28</sup> Dan me se ne guun ya rá nij yuvií israelitá se-nana Diose nana sa' ma'. Che'é dan guun yaníj nij so' rihaan Diose, ne vaa ya'núj rihaan Diose catuu soj sij yaníj a. Tzaj ne asij naá narii Diose man xii nij yuvií israelitá, ne che'é dan yo' 'ee rá Diose man nij so' ndaa cuaño adonj.

<sup>29</sup> Daj chihaa míj se natuná Diose se-nana Diose ma'. Se ca'vee ca'nee uún Diose se vaa go' Diose rihaan yuvií ma'. 'O se gaa naá narii Diose man nij yuvií israelitá canoco' nij so' man so', ne se ca'vee cataj uún Diose se vaa se ca'vej rá so' nacaj so' man nij so' ma'.

<sup>30</sup> Dan me se asino yaan ne cuno nij soj sij yaníj rihaan Diose ma'. Tzaj ne ne cuchuman rá que'ee nij yuvií israelitá ni'yaj nij so' man Diose, ne che'é dan cunuu 'ee rá Diose man soj a.

<sup>31</sup> Veé dan me se cunuu 'ee rá Diose man soj cuaño, tzaj ne ne uno nij yuvií israelitá rihaan Diose ma'. Inanj danj vaa nij so' cuaño, qui'yaj Diose, gaa ne vaa güii cunuu 'ee rá uún Diose man nij so' adonj.

<sup>32</sup> Dan me se 'o cuyaan vaa nij yuvií israelitá ga nij yuvií yaníj, qui'yaj Diose, ne cunudanj nij yuvií na'vej rá cuno rihaan Diose, ne che'é dan vaa ya'núj rihaan Diose cunuu 'ee rá Diose man cunudanj nij yuvií, ne raçuuj uun Diose man cunudanj nij yuvií yo' adonj.

*Nana nihánj taj xna'anj se vaa sa' uxrá vaa Diose adonj*

<sup>33</sup> Inanj sa' uxrá avii raá Diose nanj á. Sa' uxrá ne'en so', ne se guun nucaj yuvií naqui'yaj cuu yuvií nu' se vaa 'yaj Diose ma'. Veé danj ca'mii 'o síí nata' se-nana Diose gaa naá, cataj so':

<sup>34</sup> "Taj vaj yuvií quisij nari' nana avii raá Diose ma'. Me yuvií ca'vee nago' nana cuu man Diose, rá soj ga.

<sup>35</sup> Me rasuun ca'vee rque yuvij man Diose, rá soj ga. 'O se ne achiin si'yaj yuvij man Diose ma'. Ne 'yaj xcuún Diose rihaan yuvij ma'. Danj taj síí nata' se-nana Diose gaa naá yo' a.

<sup>36</sup> Dan me se ma'an Diose qui'yaj cunudanj rasuun, ne che'é ma'an Diose mán rasuun rihaan chumij, ne se rásuun Diose me cunudanj rasuun a. Ve'é uxrá ca'mij ní' che'é Diose nu' cavii nu' ca'anj adonj. Veé danj gaa ya ei.

## 12

### *Nana nihánj taj xna'anj se vaa ve'é qui'yaj suun ní' rihaan Diose a*

<sup>1</sup> Nuu 'ee ndo'o rá Diose man ní', tinuj, nocoj. Che'é dan cataj xna'anj 'unj rihaan soj nihánj cuano se vaa qui'yaj suun soj rihaan Diose yaj gaa vaa i'na' soj á. Inanj suun sa' che'é Diose qui'yaj suun soj, gaa ne guun niha' rá Diose, qui'yaj soj ei. Ne'en soj se vaa no xcuún soj qui'yaj soj danj ei.

<sup>2</sup> Se cataj soj se vaa sa' ndo'o vaa tucuáán nocoj' cunudanj nij yuvij man chiháán soj ma'. Tzaj ne ca'vej rá soj cunu sa' nimán soj qui'yaj Diose, ne xcaj naca soj cuentá daj qui'yaj soj gaa yáán soj rihaan chumij nihánj, gaa ne nari' soj daj me rá Diose qui'yaj soj, ne xcaj soj cuentá me se me se sa' ni'yaj Diose á. Dan me se xcaj soj cuentá daj qui'yaj soj ne guun niha' rá Diose, ne xcaj soj cuentá me suun sa' qui'yaj suun soj ne cavij sa' soj doj nu' cavii nu' ca'anj adonj.

<sup>3</sup> Dan me se qui'yaj Diose se luj rihanj, ca'ne' Diose suun rihanj tucu'yonj man nij soj, ne che'é dan cataj xna'anj 'unj rihaan 'o 'o soj daj qui'yaj soj qui'yaj suun soj rihaan Diose á. Dan me se ino gaa suun qui'yaj suun 'o 'o soj rihaan Diose, ne che'é dan xcaj 'o 'o soj cuentá me suun qui'yaj suun 'o 'o soj, ne racuj Diose man soj se vaa guun ya rá 'o 'o soj, ne a me suun guun nucuaj 'o 'o soj qui'yaj suun soj suun rque Diose man soj a. Tzaj ne se nanó rá soj, ne se guun rá soj cata soj suun nocoj doj ma'. Maan se xcaj soj cuentá, ne cataj soj se vaa sa' vaa suun vaa rihaan soj ei.

<sup>4</sup> 'O se aj ne'en ní' se vaa vaa ndo'o nee man ní', ne dan me se vaa ra'a ní' vaa tacóo ní' vaa, ne vaa que'ee doj nee man ní', ne ino vaa suun 'yaj suun ra'a ní' do', tacóo ní' do', xréé ní' do', tu'va ní' do', ne ino doj vaa suun 'yaj suun yo'yo yo'e nee man ní' a.

<sup>5</sup> Dan me se aj canoco' cunudanj ní' man Jesucristó, ne che'é dan ase vaa nu' nee man 'o yuvij ro', danj vaa nu' ní', ne ino vaa suun vaa rihaan 'o 'o ní', tzaj ne racuj tuvi' ní',

<sup>6</sup> gaa ne guun nucuaj 'o 'o ní' qui'yaj suun 'o 'o ní' suun vaa rihaan 'o 'o ní' a. Danj 'yaj Diose che'é 'o 'o ní', tzaj ne ino vaa suun ne'en 'o 'o ní' qui'yaj suun ní', qui'yaj Diose a. Che'é dan sese vaa suun rihaan yo'ó ní' ca'mij natáj ní' rihaan yuvij che'é Diose, ne sese uun ya rá ní' se vaa ya vaa nana nari' ní', ne ca'mij natáj ní' á.

<sup>7</sup> Sese ca'ne' Diose suun rihaan yo'ó ní' suun racuj ní' man yuvij, ne danj qui'yaj ní' qui'yaj suun ní' che'é tuvi' ní' uún á. Sese vaa suun rihaan yo'ó ní' suun tucu'yón ní' se-nana Diose, ne danj qui'yaj uún ní', tucu'yón ní' se-nana Diose á.

<sup>8</sup> Sese vaa suun rihaan yo'ó ní' nago' ní' chrej nucuaj, ne danj qui'yaj ní' á. Sese vaa suun rihaan yo'ó ní' go' ní' rasuun rihaan nij síí nique, ne guun niha' rá ní' qui'yaj ní' danj á. Sese vaa suun rihaan yo'ó ní' guun chij ní' rihaan tuvi' ní', ne qui'yaj suun uxrá ní' nıcaj yu'unj ní' man tuvi' ní' á. Sese vaa suun



rihaan ní' cunuu 'ee rá ní' tuvi' ní' do', račuj ní' tuvi' ní' do', ne gaa niha' rá ní' qui'yaj ní' danj á.

*Nana nihánj taj xna'anj daj qui'yaj ní' rihaan tuvi' ní' a*

<sup>9</sup> Se cataj soj se vaa 'ee rá soj man tinúú soj, sese ne ya 'ee rá soj tinúú soj ma'. Se tu'va rma'an soj danj ma'. Tzaj ne ya gaa 'ee rá soj tinúú soj, ne se ca'vej rá soj qui'yaj soj se chi'ij ma'. Tzaj ne inanj se sa' qui'yaj soj á.

<sup>10</sup> Gaa 'ee ndo'o rá soj man tinúú soj sí' noco' man Jesucristó, ne guun niha' rá soj caraā cochroj soj rihaan tinúú soj á.

<sup>11</sup> Se gaa rmij soj ma'. Tzaj ne gaa niha' rá soj qui'yaj suun soj che'é sí' 'nij ra'a man ní' ei.

<sup>12</sup> Ne'en soj se vaa vaa güii cavij sa' ndo'o soj, qui'yaj Diose, ne che'é dan gaa niha' rá soj á. Ca'nej nucuj soj nimán soj quirán' soj sayuun me rá yuvij qui'yaj yuvij man soj, ne se ca'ne' rá soj ga suun achún ni'yaj rihaan Diose ma'.

<sup>13</sup> Sese vaa se achiin rihaan tinúú soj sí' sa' noco' man Diose ro', ne račuj soj si'yaj soj rihaan nij so' a. Ne ve'é qui'yaj soj ca'vej soj carán' yuvij tucua soj do', cha yuvij chraa ga soj do' á.

<sup>14</sup> Xa' sí' 'yaj sayuun man soj, tzaj ne ve'é qui'yaj soj rihaan nij so', ne se ca'mii chree soj che'é nij so' ma'. Tzaj ne cachinj ni'yaj soj rihaan Diose se vaa cavij sa' nij so' qui'yaj Diose a.

<sup>15</sup> Guun niha' rá soj ga nij yuvij niha' rá, ne ta'vee soj ga sí' ta'vee,

<sup>16</sup> ne ve'é qui'yaj soj rihaan tinúú soj nij sí' amán rá ni'yaj man Jesucristó a. Se guun rá soj cata ma'an soj suun sa' doj ma'. Maan se nano' soj man nij yuvij un taj suun ata, ne canicun' soj ga nij so' a. Se cataj soj se vaa sij avii ndo'o raa me soj ma'.

<sup>17</sup> Sese qui'yaj yuvij se chi'ij man soj, ne se guun rá soj qui'yaj soj se chi'ij man nij yuvij ma'. Tananj ve'é qui'yaj soj rihaan cunudanj yuvij, ne inanj se sa' qui'yaj soj ni'yaj cunudanj yuvij á.

<sup>18</sup> Ve'é cumán soj ga cunudanj yuvij, sese ca'vej rá nij yuvij, ne se cunu' ma'an soj ga yuvij ma'.

<sup>19</sup> Se qui'yaj soj sayuun man yuvij 'yaj sayuun man soj ma'. Maan se ca'ne' rá soj, ne Diose me sí' naru'vee rihaan nij yuvij qui'yaj sayuun, ne vaa güii caxrij yuvaā Diose man nij so' a. Danj me raj qui'yaj nij soj, tinuj, nocoj. 'Q se danj Diose taj se vaa nō xcúún Diose naru'vee ma'an Diose, ne vaa güii naru'vee Diose che'é sayuun nanj á. Danj taj danj Diose a.

<sup>20</sup> Tzaj ne ino qui'yaj soj rihaan yuvij taj ri'yunj man ní' cuano, taj danj Diose a. Nihánj me nana a'mii danj Diose a: "Sese na'aan rque sí' taj ri'yunj man soj, ne go' soj chraa cha so' á. Sese naco' so' na, ne go' soj na co'o so' á. Danj qui'yaj soj, ne guun na'aj sí' taj ri'yunj man soj, ne quinano rá so' che'é sayuun qui'yaj so' ei". Danj taj danj Diose a.

<sup>21</sup> Se guun qui'yaj canaán chi'ij rihaan soj ma'. Se guun guun ma'an soj sí' noco' chrej chi'ij ma'. Maan se inanj se sa' qui'yaj soj rihaan sí' chi'ij, gaa ne qui'yaj canaán soj rihaan sí' chi'ij, ne canoco' so' chrej sa' nicaj soj adonj.

## 13

*Nana nihánj taj xna'anj se vaa cuno ní' rihaan nij sí' nicaj suun a*

<sup>1</sup> Cuno cunudanj nij soj rihaan nij sí' nicaj suun man tucua suun chiháan soj ei. 'Q se sese nuveé Diose rá, ne se guun nucuj nij so' quirij ta'nga' nij so' ma'. Diose me sí' cune' man nij sí' nicaj suun adonj.

<sup>2</sup> Che'é dan cunḡ soj rihaan nij sí nicaj suun, ese danj me rá Dioṣe qui'yaj soj, ne sese tucuáá soj rihaan nij sí nicaj suun, ne cutá' Dioṣe cacun' xráá soj adḡnj.

<sup>3</sup> Yuvij ne 'yaj sayuun ro', taj che'é cucu'vi' nij so' rihaan nij sí nicaj suun ma'. Maṅ se inañj sí 'yaj sayuun cucu'vi' rihaan nij so', ne che'é dan sese na'vej rá soj cucu'vi' soj rihaan nij sí nicaj suun, ne ve'é qui'yaj soj, ne ve'é ca'mij nij sí nicaj suun che'é soj adḡnj.

<sup>4</sup> Dan me se 'yaj suun nij sí nicaj suun rihaan ma'an Dioṣe, ne vaa suun rihaan nij sí nicaj suun racuj nij so' man soj, ne cavij sa' soj ei. Tzaj ne sese qui'yaj soj cacun', ne cucu'vi' soj rihaan nij so' á. 'O se ne atá rma'an nij so' suun ma'. 'Yaj suun nij so' che'é Dioṣe, ne racuj nij so' man Dioṣe axrij yuvaa Dioṣe man nij sí 'yaj cacun' adḡnj.

<sup>5</sup> Che'é dan cunḡ soj rihaan nij sí nicaj suun, ne cucu'vi' soj qui'yaj nij so' sayuun man soj sese qui'yaj soj cacun', ne xcaj soj cuentá se vaa me rá Dioṣe qui'yaj soj á.

<sup>6</sup> 'O se o' soj sa'anj ata' rihaan nij sí nicaj suun, ne ne'en soj se vaa 'yaj suun nij so' rihaan Dioṣe,

<sup>7</sup> ne dan me se nḡ xcúún soj naru'vee soj sa'anj ata' ei. Caraṅ cochroj soj rihaan nij sí nicaj suun, ne ve'é ca'mij soj rihaan nij so' ei.

*Nana nihánj taj xna'anj se vaa gaa 'ee rá ní' tuvi' ní' a*

<sup>8</sup> Se gaa xcúún rihaan nij soj ga tuvi' soj ma'. Tzaj ne vaa 'o xcúún rihaan soj ga tuvi' soj adḡnj. Nihánj ro', me xcúún vaa rihaan soj ga tuvi' soj adḡnj. Nḡ xcúún soj gaa 'ee rá soj tuvi' soj, ne sese ya 'ee rá soj tuvi' soj, ne ase vaa sí qui'yaj nu' ndaa vaa taj se-tucuṅj Moisés ro', danj gaa soj uún adḡnj.

<sup>9</sup> Dan me se aj ne'en soj nu' nana cataj xna'anj Dioṣe rihaan Moisés gaa naá, ne dan me se na'vej rá Dioṣe cotoj yuvij ga nica tuvi' yuvij, ne na'vej rá Dioṣe ticavi' yuvij man tuvi' yuvij, ne na'vej rá Dioṣe qui'yaj ituu yuvij, ne na'vej rá Dioṣe guun rá yuvij ni'yaj yuvij si'yaj tuvi' yuvij man adḡnj. Nihánj me nana cataj xna'anj Dioṣe gaa naá, ne vaa uxrá doj nana cataj xna'anj uún Dioṣe, tzaj ne vaa orún' nana achiin uxrá qui'yaj ní' cuano, ne nana yo' taj: "A se 'ee rá so' man ma'an so' ro', danj gaa 'ee rá so' man tuvi' so' á". Nihánj me nana achiin uxrá cunḡ ní', ne sese cunḡ ní' ne qui'yaj ní' ndaa vaa taj nana nihánj, ne sij 'yaj nu' nana cataj xna'anj Dioṣe rihaan Moisés gaa naá me ní' ei.

<sup>10</sup> Sese 'ee rá soj tuvi' soj, ne se qui'yaj chi'ij soj man tuvi' soj, ne che'é dan sese 'ee rá soj tuvi' soj, ne sij uno nu' nana cataj xna'anj Dioṣe rihaan Moisés gaa naá me ma'an soj adḡnj.

*Nana nihánj taj xna'anj se vaa ase vaa qui'yaj Jesucristó ro', danj gaa qui'yaj ní' uún a*

<sup>11</sup> Danj qui'yaj nij soj, gaa 'ee rá nij soj tuvi' soj ei. 'O se ne'en soj daj vaa chumij nihánj cuano nanj á. Xcaj soj cuentá á. Dan me se asij naca cuchumán rá ní' ni'yaj ní' man Jesucristó, ne nichrun' güii cavij sa' ní' cayáán ní' ga Dioṣe, rá ní', tzaj ne cuano nihánj me se ya nichrun' güii cavij sa' ní' cayáán ní' ga Dioṣe ei.

<sup>12</sup> Dan me se ase vaa chumij gaa vaa rmi' ro', danj vaa cunudanj nij yuvij man rihaan chumij nihánj cuano, ne vaa rmi' rihaan nij so', ne ne ne'en nij so' a doj ma'. Tzaj ne daj doj quisij güii ca'na' Jesucristó, ne che'é dan ca'ne' rá ní' ga cacun', ne se qui'yaj ní' ndaa vaa 'yaj yuvij chéé rej nij ma'. 'O se adj'

se chuguun rej ranga' ro', danj gaa cuchuguun nimán ní', qui'yaj ní', ne yo'q gaa nucuaj ní' qui'yaj suun ní' che'é Diose á.

<sup>13</sup> Che'é se cuchuguun nimán ní', che'é dan inanj ve'é qui'yaj ní', ne se cachéé ní' cha'anj snúú rma'an, se guun xno ní', ne se qui'yaj ní' cacun' ga chana, ne se cunu' ní', ne se guun xcoj ruvaa rá ní' ne'en ní' tuvi' ní' a.

<sup>14</sup> Se guun rá ní' qui'yaj ní' ndaa vaa me rá nee man ní' ma'. Se ca'vej rá ní' qui'yaj ní' cacun' ma'. Tzaj ne tucu'yón ní' ndaa vaa qui'yaj Jesucristó, ne ase vaa qui'yaj so' ro', danj gaa qui'yaj uún ní' nanj adonj.

## 14

*Nana nihánj taj xna'anj se vaa se cuta' ní' cacun' xráá tinúú ní' síí chá naj guun rasuun, ne se nachri' ní' ni'yaj ní' man tinúú ní' síí na'vej rá chá rasuun a*

<sup>1-2</sup> Ta'aj yuvií guun ya rá se vaa a'vej rá Diose chá yuvií naj guun rasuun, tzaj ne yo'ó ta'aj yuvií ro', chu'vi' nij so' chá nij so' nee a. Na'vej rá Diose chá nij so' nee, rá nij so', ne che'é dan inanj cuéj chá nij so' a. Dan me se se nachri' nij soj ni'yaj nij soj man nij yuvií na'vej rá chá naj guun rasuun ma'. Sese danj vaa rá nij so', ne se ca'mii cunu' nij soj ga nij so' ma'.

<sup>3</sup> Se guun nachri' síí chá naj guun rasuun ni'yaj so' man síí chá inanj cuéj ma'. Se cuta' síí chá inanj cuéj cacun' xráá síí chá naj guun rasuun ma'. 'Q se quene'en so' se vaa 'nij ra'a Diose man síí chá naj guun rasuun do' nanj adonj.

<sup>4</sup> Xa' síí chá naj guun rasuun, tzaj ne ne 'yaj suun so' rihaan síí chá inanj cuéj ma'. 'Q se rihaan Jesucristó 'yaj suun so', ne che'é dan ne nó xcúún síí chá inanj cuéj cuta' so' cacun' xráá so' ma'. Tzaj ne ma'an Jesucristó ca'ne' cacun' che'é so', ase cavii sa' so' ni', ase quiran' so' sayuun ni', ne dan me se ne ne'en ní' ma'. Dan me se nucuaj Jesucristó sij 'nij ra'a man ní' tucu'yón so' man síí chá naj guun rasuun daj qui'yaj so', ne cavii sa' so', qui'yaj Jesucristó adonj.

<sup>5</sup> Dan me se ta'aj yuvií taj se vaa guee ta'aj güii, ne yo'ó ta'aj yuvií taj se vaa 'o cyaan vaa nij güii, ne taj güii guee rihaan yo'ó ta'aj nij so' a. Ino vaa rá 'o 'o ta'aj nij yuvií, ne che'é dan me xcaj yo'q yo'q nij soj cuentá daj vaa rá yo'q yo'q soj, ne guun ya rá yo'q yo'q soj daj vaa rá soj ei.

<sup>6</sup> Xa' síí taj se vaa vaa güii guee, tzaj ne danj vaa rá so' che'é síí 'nij ra'a man ní', ne danj nanj síí chá naj guun rasuun, ne danj 'yaj so' che'é síí 'nij ra'a man ní' uún a. Danj 'yaj yo'q yo'q nij so', ne nago' nij so' graciá rihaan Diose a. Ne xa' síí na'vej rá chá naj guun rasuun, tzaj ne veé danj vaa rá so' che'é síí 'nij ra'a man ní' uún, ne dan me se nago' so' graciá rihaan Diose uún a.

<sup>7</sup> 'Q se nuveé che'e orún' ní' vaa i'na' 'o 'o ní' ma'. Nuveé che'e orún' ní' cavi' 'o 'o ní' ma'.

<sup>8</sup> 'Q se sese vaa i'na' ní', ne vaa i'na' ní' qui'yaj suun ní' rihaan síí 'nij ra'a man ní', ne ca'vee se cavi' ní', tzaj ne yo'q qui'nij ra'a so' man ní' nanj adonj.

<sup>9</sup> Dan me se me rá Jesucristó nica'j yu'unj so' man yuvií vaa i'na' do', man yuvií cavi' do', ne che'é dan cavi' so', ne che'é dan cunu' i'na' uún so' a.

<sup>10</sup> Dan me se taj che'é cuta' ní' cacun' xráá tinúú ní', ne taj che'é nachri' ní' ni'yaj ní' man tinúú ní' ma'. 'Q se canicun' cunudanj ní' rihaan Diose vaa güii, ne ca'ne' ma'an Diose cacun' che'é ní' nanj adonj.

<sup>11</sup> Dan me se danj Diose taj se vaa ya ya canicun' ruj cunudanj yuvií rihaan Diose vaa güii, ne ve'é ndo'o ca'mii cunudanj yuvií che'é Diose a. Danj a'mii danj Diose a.

12 Dan me se vaa güii nata' 'o 'o ní' rihaan Diose che'é se vaa qui'yaj ní' gaa cayáan ní' rihaan chumij nihánj nanj adonj.

*Nana nihánj taj xna'anj se vaa se ca'vej rá ní' quirán' tinúú ní' cacun' che'é se vaa 'yaj ní' a*

13 Che'é dan quisij cataj ní' se vaa tumé tinúú ní' cacun' á. Tzaj ne cataj ya nij soj se vaa se qui'yaj tinúú soj cacun', qui'yaj ma'an soj a.

14 Gaa canocó' 'unj Jesucristó sij 'nj ra'a man ní', ne guun ya raj se vaa a 'o rasuun ne yu'va' quita'a' ma'. Tzaj ne sese vaa yo'o so' uun rá se vaa cacun' cha' 'o rasuun, ne ya uxrá cacun' cha so' a.

15 Sese yu'va' cha' yo'o rasuun rá tinúú so', ne sese cha so' maan, ne guun rá so' cha so' uún, ne dan me se cha so' maan, gaa ne quirán' so' cacun', qui'yáa so' á. Sese danj qui'yáa so', ne nuveé sij 'eje rá man tinúú mé so' gaa a ma'. Se ca'vej rá so' quirán' tinúú so' cacun' che'é se chá so' ma'. 'O se ne'én so' se vaa cavi' Jesucristó che'é ma'an tinúú so' adonj.

16 Ne se guun qui'yaj soj ca'mii yuvij nana nij che'é tucuaán sa' noco' soj ma'.

17 'O se nicaj yu'unj Diose man ní', ne che'é dan se nanó rá ní' che'é se cha ní' do', che'é se co'o ní' do' ma'. Tzaj ne xcaj ní' cuentá che'é tinúú ní' á. 'O se che'é rej uun chij Diose, tzaj ne nuveé che'e se chá ní' do', nuveé che'e se co'o ní' do', me yo' ma'. Mañ se che'é rej cunuu sa' nimán ní' ne che'é rej guun niha' rá ní' ne che'é rej gaa xej nimán ní' qui'yaj Nimán Diose me yo' a.

18 Dan me se sese xcaj ní' cuentá che'é tinúú ní', ne ya sij noco' man Jesucristó me ní', ne guun niha' rá Diose ne'en Diose man ní', ne cataj yuvij ne amán rá ni'yaj man Jesucristó se vaa ve'é 'yaj ní' a.

19 Che'é dan danj inan'j qui'yaj ní', gaa ne gaa dínj cumán ní', ne racuíj ní' tinúú ní', gaa ne sa' doj cumán ní', ne sa' doj canoco' ní' man Jesucristó adonj.

20 Dan me se qui'yaj suun Diose nimán tinúú so', ne che'é dan se ca'vej rá so' quirij' rá tinúú so' che'é se chá ma'. Ne'en ní' se vaa sa' vaa daj a rasuun qui'yaj Diose cha yuvij do', co'o yuvij do', tzaj ne sese yu'va' cha' 'o rasuun rá yo'o so', ne cacun' cha so' man yo' adonj.

21 Sese yu'va' cha' 'o rasuun rá tinúú so', ne se chá so' maan, ne cunaj qui'yáa so' á. Sese yu'va' co'o' 'o na rá tinúú so', ne se co'o so' maan, ne cunaj qui'yáa so' á. Tadó so' se quirán' tinúú so' cacun' che'é se vaa qui'yáa so' á.

22 Sese guun rá so' se vaa a'vej rá Diose cha so' naj guun rasuun, ne inan'j danj gaa rá ma'an so' rihaan Diose á. Se natá' so' danj rihaan yuvij ma'. Guun niha' rá so' rihaan Diose sese ne'én so' se vaa sa' vaa rá so', ne'én so' me se a'vej rá Diose qui'yáa so' nanj á.

23 Tzaj ne sese ne ne'en yo'o so' sese ca'vej Diose cha so' 'o rasuun ní', sese se ca'vej Diose cha so' ní', ne se chá so' ma'. Sese cha so', ne tumé so' cacun' rihaan Diose che'é se ne guun ya rá so' se vaa a'vej Diose cha so', mañ se chá ma'an so', ne che'é dan tumé so' cacun' adonj. Veé danj inan'j vaa nu' se vaa qui'yaj ní' ei. Sese ne guun ya rá ní' se vaa a'vej rá Diose qui'yaj ní' 'o rasuun, ne se qui'yaj ní' danj ma'. Sese qui'yaj ní' danj, ne tumé ní' cacun' rihaan Diose nanj adonj.

## 15

*Nana nihánj taj xna'anj se vaa no xcúun ní' racuíj ní' tinúú ní' a*

1 Xa' ní' sij amán rá se vaa a'vej rá Diose cha ní' naj guun rasuun, tzaj ne no xcúun ní' racuíj ní' man nij yuvij na'vee cuchuman rá se vaa a'vej rá Diose

chā nij so' naj guun rasuun a. Ne raçuɨj ní' man yuviɨj na'vee cuchuman rá se vaa 'o cyaan vaa nu' güii rihaan Diose á. Se qui'yaj ní' se inanj me rá ní' qui'yaj ní' ma'.

<sup>2</sup> Tzaj ne raçuɨj 'o 'o ní' tinúú ní', ne guun niha' rá tinúú ní', ne sa' doj gaa tinúú ní', ne sa' doj quene'en tinúú ní' canoco' tinúú ní' Diose a.

<sup>3</sup> 'O se ne qui'yaj Jesucristó se me rá ma'an Jesucristó qui'yaj so' ma'. 'O se danj Diose taj se vaa nana nij ca'mii yuviɨj che'é Diose ro', ca'mii uún yuviɨj che'é Jesucristó, ne ca'vej rá Jesucristó ca'mii nij yuviɨj nana nij che'é ma'an so' a. Danj a'mii danj Diose che'é ma'an Jesucristó a.

<sup>4</sup> Gaa naá me se cachrón nii nana rihaan danj Diose yan quinari' ma'an ní' daj qui'yaj ní' gaa ne guun nucuaj ní' qui'yaj canaán ní' rihaan sayuun ne quinari' nucuaj nimán ní' gaa ne ca'vee guun ya rá ní' se vaa vaa güii cavii sa' ní' a.

<sup>5</sup> Dan me se Diose me sí' 'yaj uun nucuaj nimán ní', ne sí' nocó' man Jesucristó me nij soj, ne che'é dan me raj yo'o cyaan gaa rá taran' nij soj, qui'yaj Diose a.

<sup>6</sup> Gaa ne 'o cyaan ca'mii nij soj che'é Diose, ne ve'é ca'mii nij soj che'é Diose Rej Jesucristó sji 'nij ra'a man ní' adonj.

*Nana nihánj taj xna'anj che'é se vaa qui'yaj Jesucristó che'é nij yuviɨj israelitá do', che'é nij yuviɨj yaníj do' a*

<sup>7</sup> Che'é dan ve'é ca'mii soj gaa tinúú soj gaa 'na' tinúú soj rihaan soj á. Danj qui'yaj Jesucristó, ve'é ca'mii so' ga ní' ei. Che'é dan danj qui'yaj guee ní', ve'é ca'mii ní' ga tinúú ní', ne ve'é ca'mii tinúú ní' che'é Diose á.

<sup>8</sup> Dan me se cataj xna'anj 'unj rihaan nij soj che'é suun qui'yaj suun Jesucristó che'é nij yuviɨj israelitá, ne gaa naá me se cataj xna'anj Diose rihaan xii nij yuviɨj israelitá daj qui'yaj Diose che'é nij so', ne quisíj ya nu' nana yo', qui'yaj Jesucristó a.

<sup>9</sup> Ne gaa ca'na' Jesucristó, ne ve'é ca'mii nij yuviɨj yaníj che'é Diose, qui'yaj so' a. 'O se che'é se vaa qui'yaj Jesucristó, che'é dan xcaj nij yuviɨj yaníj cuentá se vaa cunuu 'ee rá Diose ne'en Diose man nij so' ga nij yuviɨj israelitá, ne che'é dan ve'é ca'mii nij yuviɨj yaníj che'é Diose a. Danj a'mii danj Diose a.

Taj xna'anj danj Diose nana ca'mii sí' cu'naj David rihaan Diose gaa naá, gaa cataj so':

—Che'é dan ve'é ca'mij rihaan nij yuviɨj yaníj che'é so', ne cachraj chra' rihaan so' a. —Danj ca'mii sí' cu'naj David gaa naá a.

<sup>10</sup> Ne taj uún danj Diose se vaa guun niha' rá nij yuviɨj yaníj ga nij yuviɨj israelitá a.

<sup>11</sup> Ne taj uún danj Diose se vaa ve'é ca'mii cunudanj nij yuviɨj yaníj che'é Diose a.

<sup>12</sup> Ne cataj uún sí' cu'naj Isaías gaa naá se vaa cumán yo'o ta'nii ta'nij si'no sí' cu'naj Isai rej sí' cu'naj David gaa naá, ne ca'na' so', ne guun chij so' rihaan nij yuviɨj yaníj a. Gaa ne gaa nucuaj rá nij yuviɨj yaníj man so' se vaa tjanii so' man nij so' rihaan sayuun a. Danj taj sí' cu'naj Isaías che'é Jesucristó a.

<sup>13</sup> Dan me se nucuaj rá ní' ne'en ní' Diose, ne ne'en ní' se vaa vaa güii cavii sa' ní', qui'yaj Diose á. Dan me se amán rá nij soj ni'yaj soj Diose, ne che'é dan me raj guun niha' ndo'o rá soj, ne gaa xej nimán soj, qui'yaj Diose, gaa ne guun ya doj rá soj se vaa cavii sa' soj vaa güii, qui'yaj Nimán Diose adonj.

*Nana nihánj taj xna'anj che'é suun qui'yaj suun Pablo rihaan Diose a*

14 Veé dan me se guun ya raj se vaa síi sa' me ma'an soj, tinuj, nocoj. Xcaj ndo'o soj cuentá, ne ne'en soj nago' soj chrej sa' man tinúú soj ei.

15-16 Tzaj ne ca'ne' ndo'oj suun rihaan soj gaa qui'yáj yanj cartá nihánj nanj á. 'Q se ne'en soj se vaa sa' uxrá qui'yaj Diose che'ej, ne ase vaa 'yaj suun xrej rihaan Diose ro', danj vaa 'yaj suun ma'anj rihaan Jesucristó, ne dan me se 'yaj sunj tucu'yonj se-nana Diose nana sa' man soj sij yaníj, ne vaa güii nacaj Diose man soj, ne che'é dan tucu'yonj man soj, ne me raj ca'vej Diose nacaj Diose man soj, ne me raj cunu sa' nimán soj rihaan Diose ei. Dan me se gaa sa' soj, qui'yaj Nimán Diose, ne che'é dan ca'ne' ndo'oj suun rihaan soj, ne nu' nana nihánj cachronj rihaan yanj cartá nihánj a.

17 Dan me se racuíj ndo'o Jesucristó manj, ne che'é dan niha' raj che'é nu' se vaa 'yáj rihaan Diose ei.

18 Dan me se se ca'mij che'é se vaa aj qui'yaj yo'ó yuvií ma'. 'Q se ne nó xcúnj qui'yáj danj ma'. Maan se cataj xna'anj 'unj che'é inanj se vaa qui'yaj Jesucristó gaa racuíj so' manj se vaa guun nucuáj cataj xna'anj 'unj rihaan soj sij yaníj che'é ma'an so', ne che'é dan cuno soj sij yaníj se-nana Diose, ne dan me se Jesucristó me síi racuíj manj narij nu' nana nihánj ca'mij rihaan soj, ne veé so' racuíj manj 'yaj sunj nu' suun 'yaj sunj nanj adonj.

19 Dan me se suun sa' nocco 'yáj, 'yaj Jesucristó, ne Nimán Diose racuíj manj ca'mij se-nana Diose, 'yaj uún Jesucristó, gaa ne xcaj yuvií yanj nu' anicaj chuman' Jerusalén cuentá che'é se-nana Jesucristó nana sa', ne ndaa yuvií yanj yo'ó chuman' gan' doj ndaa estadó cu'naj Ilírico do', xcaj cuentá che'é se-nana Jesucristó nana sa', ne dan me se cuno nij so' nana, qui'yáj a.

20 'Q se inanj me raj cataj xna'anj 'unj che'é Jesucristó rihaan yuvií ataa quene'en nana che'é so', ne se tucu'yonj man yuvií aj nari' nana che'é so' ma'.

21 Veé danj a'mii uún danj Diose, taj yo': "Yuvií ataa quene'en se-nana so' ro', xcaj nij so' cuentá a". Danj taj danj Diose nanj adonj.

*Nana nihánj taj xna'anj se vaa ca'anj Pablo chuman' Jerusalén, ne ca'anj uún so' chuman' Romá a*

22 Che'é dan ne ca'vee cuchij rihaan nij soj a. Quisíj que'ee güii cachronj se vaa cuchij rihaan nij soj, tzaj ne ne ca'vee cuchij rihaan soj ma'.

23 Tzaj ne cuano nihánj me se navij suun rihanj chuman' nihánj, ne guun que'ee guun raj cuchij rihaan nij soj,

24 ne che'é dan me quene'en 'unj man soj gaa ca'anj 'unj rej cu'naj España, raj a. Me rá 'unj carán' 'unj chiháán soj doj güii, ne niha' raj cayánj ga soj, ne nana ní' cuentó, gaa ne ca'anj ta'aj soj gaj rej cu'naj España, raj a.

25 Dan me se ca'anj 'unj chuman' Jerusalén cuano, ne qui'yaj sunj rihaan nij síi amán rá ni'yaj man Jesucristó yanj chuman' yo' adonj.

26 'Q se nij síi amán rá ni'yaj man Jesucristó yanj estadó cu'naj Macedonia do', estadó cu'naj Acaya do', me se me ndo'o rá nij so' rque nij so' doj sa'anj rihaan nij síi nique amán rá ni'yaj man Jesucristó yanj chuman' Jerusalén ei.

27 Danj me rá ma'an nij so' qui'yaj nij so', ne cataj xna'anj ma'an nij so' rihanj se vaa me ndo'o rá nij so' racuíj nij so' man nij síi nique yanj chuman' Jerusalén yo' adonj. 'Q se yuvií israelitá me nij síi man Jerusalén, ne nij yuvií israelitá qui'yaj nari' yuvií yaníj se-nana Diose, ne che'é dan cunu sa' nimán nij yuvií yaníj, taj nij síi yaníj man roj estadó yo' adonj. Che'é dan no xcúún nij yuvií yaníj racuíj nij so' man nij yuvií amán rá ni'yaj man Jesucristó man

Jerusalén, rá nij so' a. 'Q se sa'anj achiin man nij so', ne che'é dan rque nij yuviij yanij doj sa'anj man nij so' adonj.

<sup>28</sup> Che'é dan vaa suun rihanj taçuachenj sa'anj rihaan nij sí amán rá ni'yaj man Jesucristó yanj chuman' Jerusalén, ne dan me se nagoj sa'anj rihaan nij so', ne x'nuu rihanj, ne asa' ca'anj 'unj yo'óo nocoo cu'naj España ne vaj 'unj chrej, ne carán' 'unj chiháán soj a.

<sup>29</sup> 'Q se ne'enj se vaa me rá Jesucristó cuchij rihaan soj, ne racuíj so' manj cuchij chiháán soj ei.

<sup>30</sup> Dan me se che'é se canoco' nu' ní' man sí cu'naj Jesucristó sij 'nij ra'a man ní', che'é dan 'ee rá ní' tinúú ní', 'yaj Nimán Diose, ne che'é dan cataj xna'anj 'unj rihaan nij soj se vaa racuíj soj manj cachinj ni'yaj ní' rihaan Diose che'ej á.

<sup>31</sup> Cachinj ni'yaj soj se vaa quinanj rihaan nij sí israelitá yanj estadó Judea sí ne amán rá ni'yaj man Jesucristó a. Cachinj ni'yaj nij soj se vaa ve'é nacaj nij sí man chuman' Jerusalén sa'anj ra'aj nagoj man nij so' a. Dan me se me raj gaa nicá' nimán nij so', ne ca'vej rá nij so' nacaj nij so' sa'anj rque nij yuviij yanij a.

<sup>32</sup> Gaa ne guun niha' uxrá raj asa' cuchij chiháán soj, ne cuchij' yá 'unj chiháán soj, sese ca'vej Diose, gaa ne cunuu cuij rá taran' ní' ei.

<sup>33</sup> 'Q se me raj gaa xej nimán soj, qui'yaj Diose adonj. Veé danj gaa ya ei.

## 16

*Nana nihánj taj xna'anj se vaa ve'é cumán nij sí amán rá ni'yaj man Jesucristó nij sí yanj chuman' Romá, rá Pablo a*

<sup>1</sup> Cuchi' chana cu'naj Febe rihaan nij soj, ne dan me se ra'vij ní' ní' nocoo man Jesucristó me no', ne 'yaj suun ndo'o no' rihaan nij yuviij amán rá ni'yaj man Jesucristó nij sí yanj chuman' cu'naj Cencrea a.

<sup>2</sup> Sij nocoo man Diose me soj, ne che'é dan ve'é ca'mij soj ga no' á. 'Q se racuíj no' man que'ee yuviij, ne racuíj no' man ma'anj, ne che'é dan sese vaa se cachijn man no', ne racuíj soj man no' ei.

<sup>3</sup> Cataj soj rihaan chana cu'naj Priscila do', rihaan sí cu'naj Aquila do', se vaa ve'é cayáán roj so', raj á. 'Q se qui'yaj suun roj so' gaj che'é Jesucristó a.

<sup>4</sup> Dan me se ca'née nimán roj so' cavi' roj so' che'ej, ne che'é dan nago' 'unj graciá rihaan roj so', ne nago' núj ga nij sí yanij graciá rihaan roj so' a.

<sup>5</sup> Cataj uún soj rihaan nij yuviij nocoo man Jesucristó yuviij nuu chre' tucúa roj so' se vaa ve'é cumán nij so', raj á. Ne danj cataj uún soj rihaan sí cu'naj Epeneto á. 'Q se 'ee raj man so', ne so' me sí cuchumán rá ni'yaj man Jesucristó asino yaan rihaan cunudanj nij yuviij man estadó cu'naj Asia a.

<sup>6</sup> Ne cataj soj rihaan chana cu'naj Mariá se vaa ve'é cayáán no' á. 'Q se que'ee ndo'o qui'yaj suun no' che'é soj a.

<sup>7</sup> Ne cataj soj rihaan sí cu'naj Andrónico do', rihaan sí cu'naj Junias do', se vaa ve'é cayáán roj so', raj á. 'Q se yuviij israelitá me roj so' gaj, ne qui'nij roj so' taga' gaj uún a. Nij apóstol cune' Jesucristó man nata' se-nana so' rihaan yuviij ro', ne'en man roj so', ne gaa asij ataa cuchuman raj ni'yaj 'unj man Jesucristó, ne cuchumán rá roj so' ni'yaj roj so' man Jesucristó a.

<sup>8</sup> Ne cataj soj rihaan sí cu'naj Amplias se vaa ve'é cayáán so', raj á. 'Q se nocoo' núj man Jesucristó, ne che'é dan 'ee raj man so' a.

<sup>9</sup> Ne cataj soj rihaan sí cu'naj Urbano se vaa ve'é cayáán so' á. 'Yaj suun so' gaj che'é Jesucristó a. Ne cataj uún soj rihaan sí cu'naj Estaquis se vaa ve'é cayáán so', raj, che'é rej 'ee raj man so' a.

<sup>10</sup> Ne cataj soj rihaan sí cu'naj Apeles se vaa ve'é cayáán so', raj á. Ne'en ní' se vaa sí noco' raan man Jesucristó me so' a. Cataj soj rihaan nij tuvi' sí cu'naj Aristóbulo se vaa ve'é cumān nij so', raj á.

<sup>11</sup> Ne cataj soj rihaan sí cu'naj Herodión se vaa ve'é cayáán so' á. 'Q se sí israelitá me so' gaj a. Ne cataj soj rihaan nij sí noco' man Jesucristó nij tuvi' sí cu'naj Narciso se vaa ve'é cumān nij so', raj á.

<sup>12</sup> Ne cataj soj rihaan chana cu'naj Trifena do', rihaan chana cu'naj Trifosa do', se vaa ve'é cayáán roj no', raj á. 'Q se 'yaj suun ndo'o roj chana yo' che'é sí 'nij ra'a man ní' a. Ne cataj soj rihaan chana cu'naj Pérsida se vaa ve'é cayáán no', raj á. 'Ee rá ní' man no', ne que'ee ndo'o qui'yaj suun no' che'é sí 'nij ra'a man ní' a.

<sup>13</sup> Ne cataj soj rihaan sí cu'naj Rufo se vaa ve'é cayáán so', raj, che'é se sa' uxrá noco' so' man sí 'nij ra'a man ní' a. Cataj uún soj rihaan ní' so' se vaa ve'é cayáán no', raj á. 'Q se ase vaa ve'é 'yaj chana rihaan ta'ní chana ro', danj 'yaj no' rihanj a.

<sup>14</sup> Ne cataj soj rihaan sí cu'naj Asíncrito do', rihaan sí cu'naj Flegonte do', rihaan sí cu'naj Hermas do', rihaan sí cu'naj Patrobas do', rihaan sí cu'naj Hermes do', rihaan cunudanj yo'ó nij tinúú ní' sí yanj ga nij so' do', se vaa ve'é cumān nij so' á.

<sup>15</sup> Cataj soj rihaan sí cu'naj Filólogo do', rihaan chana cu'naj Julia do', rihaan sí cu'naj Nereo do', rihaan ra'vij so' do', rihaan sí cu'naj Olimpás do', rihaan cunudanj yo'ó nij sí sa' noco' man Diose yanj ga nij so' do', se vaa ve'é cumān cunudanj nij so', raj á.

<sup>16</sup> Gaa nari' tuvi' nij soj, ne ve'é ndo'o ca'mii soj ga tinúú soj á. Danj qui'yaj nij soj, tijaan nij soj se vaa 'ee rá nij soj tinúú soj ei. Ne cunudanj nij sí amán rá ni'yaj man Jesucristó yanj nu' rihaan chumii me se ve'é cumān nij soj, rá nij so' nanj adonj.

*Nana nihánj taj xna'anj se vaa guun yanj ní' rihaan nij sí qui'yaj quixraq' ta'aj ní' ga tinúú ní' a*

<sup>17</sup> Chrej nucaj me narquej rihaan soj nihánj, tinuj, nocoj. Dan me se vaa yuvi me rá cunu' soj ga tinúú soj che'é nana aj nari' soj, ne guun na'aj soj che'é se-nana Diose, qui'yaj nij so', ne che'é dan guun yanj soj rihaan yuvi 'yaj danj á.

<sup>18</sup> Ne 'yaj suun nij so' rihaan Jesucristó sijn 'nij ra'a man ní' ma'. Maan se 'yaj suun nij so' che'é ma'an nij so' adonj. 'Q se ve'é ndo'o vaa nana a'mii nij so' che'é yuvi, ne danj 'yaj nij so', tihá' yu'unj nij so' man yuvi, ne ndaa yuvi ne tumé cacun' tihá' yu'unj nij so' man ei.

<sup>19</sup> Dan me se aj cuno cunudanj yuvi se vaa sa' uxrá cuno soj se-nana Diose, ne che'é dan guun niha' raj che'é soj, ne me raj xcaj soj cuentá, ne qui'yaj soj se sa' ni'yaj Diose a. Tzaj ne na'vej raj nari' soj qui'yaj soj tucuaán chi'ii mei.

<sup>20</sup> Dan me se vaa xej nimán ní', 'yaj Diose á. Ra'yanj qui'yaj canaán soj rihaan sí cu'naj Satanás, qui'yaj Diose, ne me raj qui'yaj Jesucristó sijn 'nij ra'a man ní' se luj che'é soj nanj adonj.

*Nana nihánj taj xna'anj se vaa ve'é cumān nij sí cuchumán rá ni'yaj man Jesucristó yanj chuman' Romá, rá nij tuvi' Pabló a*



<sup>21</sup> Dan me se ve'é cumañ nij soj, rá síí cu'naj Timoteo síí 'yaj suun gaj a. Ne síí cu'naj Lucio do', síí cu'naj Jasón do', síí cu'naj Sosípater do', nu' nij so' me síí taj se vaa ve'é cumañ soj, rá nij so' a. Yuvii israelitá me nij so' gaj a.

<sup>22</sup> Síí cu'naj Tercio mej, ne 'unj me síí achrón se-nānā síí cu'naj Pabló rihaan yanj nihánj, ne ve'é cumañ nij soj, raj a.

<sup>23</sup> Ne me rá síí cu'naj Gayo se vaa ve'é cumañ nij soj, ne ve' tucúa so' yáán 'unj, ne nuu chre' cunudanj nij síí amán rá ni'yaj man Jesucristó ve' tucúa so' a. Ne ve'é cumañ soj, taj síí cu'naj Erasto, ne síí atā sa'anj rihaan chuman' nihánj me so' a. Ne ve'é cumañ soj, rá tinúú ní' síí cu'naj Cuarto a.

<sup>24</sup> Dan me se me raj qui'yaj Jesucristó sij 'nij ra'a man ní' se luj che'é cunudanj nij soj a. Veé danj gāā yā ei.

*Nanā nihánj taj xna'anj se vaa sa' uxrá vaa Diose a*

<sup>25</sup> Guun nucuaj Diose račuíj Diose man soj narí' soj nu' nanā sa' ca'mij rihaan soj a. Nanā sa' che'é Jesucristó me nanā yo' a. Dan me se gāā naá me se ne ca'vee xcaj yuvii cuentá che'é se-nānā Diose ma'. Tzaj ne yaj ro', ne tihaan Diose se-nānā Diose rihaan ní' a.

<sup>26</sup> Dan me se ca'ne' Diose suun rihaan nij síí nata' se-nānā Diose gāā naá, cachrón nij so' se-nānā Diose rihaan yanj, ne danj qui'yaj nij so', ne xcaj cunudanj nij yuvii cuentá che'é se-nānā Diose, ne me rá Diose cuchuman' rá nij yuvii se-nānā Diose, ne canoco' nij yuvii man Diose, ne Diose me se daj chihāā mīj se cavi' so' ma'.

<sup>27</sup> Ne Diose me se oruun Diose, ne raā orún' so' avii cunudanj nanā cuu sa' a. Sa' uxrá qui'yaj ta'níí so' Jesucristó che'é ní', ne che'é dan ve'é ca'mii ní' che'é Diose nu' cavii nu' ca'anj a. Sa' uxrá qui'yaj so' adonj. Yā yā danj guun adonj.

## Nihánj me 'o yanj cartá qui'yaj síí cu'naj Pabló ca'néé so' rihaan nij yuvií noco' man Diose yanj chuman' cu'naj Corinto a

<sup>1</sup> 'Unj ro', me síí cu'naj Pabló, ne me rá Diose cataj xna'anj 'unj rihaan yuvií che'é Jesucristó, ne che'é dan cune' Jesucristó mán 'unj guún 'unj apóstol nata' se-nana so' rihaan yuvií a. Ne vaa tinúú ní' síí cu'naj Sóstenes, ne ne so' gaj nihánj,

<sup>2</sup> ne 'yaj núj yanj nihánj ca'nej núj rihaan nij soj sij amán rá ni'yaj man Diose yanj chuman' Corinto sij naqui'yaj guee nimán che'é Jesucristó a. Dan me se canacúún Diose man soj guun soj síí naqui'yaj guee nimán, ne veé ca'nej yanj nihánj cachee rihaan cunudanj yo'ó nij síí yanj me rej ma'an síí táá tu'va se-chuvií Jesucristó sij 'nij ra'a man ní' a. Dan me se síí 'nij ra'a man nij so' ne síí 'nij ra'a man ma'an ya ní' me ya so' a.

<sup>3</sup> Me rá núj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é soj, ne me rá núj gaa xej nimán soj, qui'yaj roj so' adonj.

*Nana nihánj taj xna'anj se vaa nago' síí cu'naj Pabló graciá rihaan Diose che'é nij síí cuchumán rá ni'yaj man Jesucristó yanj chuman' cu'naj Corinto a*

<sup>4</sup> Niganj nagó' 'unj graciá rihaan Diose che'é nij soj che'é se luj qui'yaj Diose che'é soj che'é se noco' soj man Jesucristó adonj.

<sup>5</sup> 'Q se che'é Jesucristó ro', cavii sa' uxrá soj, qui'yaj Diose á. Dan me se uxrá xcaj soj cuentá, ne uxrá nari' soj nana sa', qui'yaj Diose,

<sup>6</sup> ne danj qui'yaj soj che'é se sa' uxrá nari' soj se-nana Jesucristó nana tucu'yón 'unj man soj a.

<sup>7</sup> Ne a 'ó se sa' rqué Nimán Diose rihaan ní' ne achiin man soj a ma'. 'Q se aj vaa nu' yo' rihaan soj, ne na'vij ndo'o soj ca'na' uún Jesucristó sij 'nij ra'a man ní' rihaan chumií nihánj nanj adonj.

<sup>8</sup> Ne so' me síí racuíj ndo'o man soj, ne guun nucaj soj canoco' raan soj man so' ndaa guii ca'ne' so' cacun' che'é yuvií, ne se tumé soj cacun', qui'yaj so' a ma'.

<sup>9</sup> Vaa che'é gaa nucaj rá ní' man Diose, ne Diose me síí canacúún man soj guun tuví' soj ga ta'níí so' Jesucristó sij 'nij ra'a man ní' adonj.

*Nana nihánj taj xna'anj se vaa nij qui'yaj nij síí cuchumán rá ni'yaj man Jesucristó yanj chuman' Corinto, naqui'yaj nij so' que'ee x'ne' man nij so' a*

<sup>10</sup> Dan me se cunó soj ca'mij, tinuj, nocoj. Ne che'é se-chuvií ya Jesucristó sij 'nij ra'a man ní' ro', me achiín ni'yaj yaj rihaan nij soj se vaa yo'ó cuyaaj gaa rá taran' soj do', yo'ó cuyaaj ca'mii soj do', yo'ó rcua'aañ gaa soj do', raj chuguanj.

<sup>11</sup> Dan me se cataj xna'anj nij tuvi' síí cu'naj Cloé rihanj se vaa unu' soj ga tinúú soj ne uun vij ndo'o soj, nanj tinuj, nocoj.

<sup>12</sup> Dan me se ta'aj nij soj taj: "Unj me síí noco' se-nana síí cu'naj Pabló a". Yo'ó ta'aj nij soj taj: "Unj me síí noco' se-nana síí cu'naj Apolos a". Yo'ó ta'aj nij soj taj: "Unj me síí noco' se-nana síí cu'naj Pedró a". Yo'ó ta'aj nij soj taj: "Unj me síí noco' se-nana Jesucristó a". Dan me se danj vaa 'o 'o ta'aj soj a.

<sup>13</sup> Ne me che'é 'yaj soj danj ga. 'Q se nuvi' que'ee Jesucristó vaa ma'. Taj che'é gaa que'ee x'ne' soj ma'. Cavi' ma'an 'unj rihaan rcutze che'é soj na'.

Cata' ne soj che'é ma'án 'unj na'. Taj ma'. Che'é dan, me che'é taj ta'aj soj se vaa sij nocó' manj me ta'aj soj ga.

14-15 Dan me se ne cuta' ne 'unj man soj ma'. Maan se orún' síi cu'naj Crispo do', síi cu'naj Gayo do', cata' ne qui'yáj, ne che'é dan se ca'vee cataj soj se vaa che'ej cata' ne soj ma'. Danj gaa, ne guun niha' raj á. 'O se cata' ne soj che'é Jesucristó, cataj soj, ne ca'mii ya soj á.

16 Cuta' ne uún 'unj man nij tucua' síi cu'naj Estéfanos, tzaj ne ne nuú sa' raj sese cuta' ne 'unj man yo'ó ta'aj yuvií a ma'.

17 'O se nuvi' suun cuta' ne yuvií ataj ma'. 'O se ca'née xa' Jesucristó manj nataj se-nana Diose nana sa' rihaan yuvií, tzaj ne na'vej rá so' cavií raá 'unj nana cuu nachran' ca'mii 'unj ma'. Maan se nana nica inanj ca'mii 'unj, gaa ne ca'vee xcaj yuvií cuentá se vaa nuveé nana avii raaj yuvií me nana yo', maan ne se-nana Jesucristó ya me yo' adonj. Dan me se ya xcaj nij yuvií cuentá se vaa ya cavi' Jesucristó rihaan rcutze che'é nij so', ne ca'vee cuchuman rá nij yuvií cunó nij yuvií nana nica ca'mii 'unj adonj.

*Nana nihánj taj xna'anj se vaa che'é se ca'née Diose man Jesucristó rihaan chumii nihánj, che'é dan ne'en ní se vaa avii ndo'o raaj Diose a*

18 Dan me se vaa yuvií cacaa nu' cavií nu' ca'anj, ne nata' nii nana se vaa cavi' Jesucristó rihaan rcutze uno nij yuvií yo', tzaj ne taj se 'yá' cuchuman rá nij yuvií ma'. Nana snúu rma'an me nana yo' rihaan nij so' nanj adonj. Tzaj ne ino vaa rá ní' sij cavií sa', ne ne'en ní' se vaa che'é nana yo' ro', guun nucuaj Diose tinanii Diose man ní' rihaan sayuun adonj.

19 Ne danj Diose taj: "Nij síi avii ndo'o raaj ro', guun nij so' síi ni'yon, qui'yáj, ne se guun nucuaj nij so' xcaj nij so' cuentá che'é nana sa', qui'yáj ma'", taj nana no rihaan danj Diose á.

20 Ne daj ran' nu' nij síi avii ndo'o raaj man rihaan chumii nihánj cuano, rá soj ga. Yaj nihánj me se nana snúu rma'an avii raaj nij so', qui'yaj Diose nanj adonj.

21 'O se nij síi man rihaan chumii nihánj ro', ne cavií raaj nij so' daj vaa Diose ma'. Tzaj ne síi cuu raaj me Diose, ne ma'an Diose caráan chrej rihaan nij so', gaa ne se gaa nanj xcaj nij so' cuentá che'é so' adonj. 'O se me rá Diose cunó nij yuvií nana a'mii natáj núj, ne sese cunó nij yuvií, ne tinanii Diose man nij yuvií rihaan sayuun, ne dan me se nda' se nana snúu rma'an me nana a'mii núj, rá ta'aj nij yuvií ro', tzaj ne orún' nana yo' me nana tinanii man yuvií rihaan sayuun nanj adonj.

22 Ne xa' nij yuvií israelitá, tzaj ne me uxrá rá nij so' qui'yaj Diose suun sa' nocóo quene'en nij so', ne xa' nij yuvií yaníj, tzaj ne me rá nij so' cunó nij so' nana cuu á.

23 Tzaj ne a'mii natáj núj nana se vaa cavi' Jesucristó rihaan rcutze che'é yuvií, ne na'aj nij yuvií israelitá cunó nij so' nana yo', ne nij yuvií yaníj taj se vaa nana snúu rma'an me nana yo' uún adonj.

24 Tzaj ne aj canacúun Diose man ta'aj nij yuvií israelitá do', man ta'aj nij yuvií yaníj do', se vaa canocó' nij so' man so', ne gaa uno nij so' nana a'mii natáj núj, ne uun ya rá nij so' se vaa síi ca'née Diose tinanii man yuvií rihaan sayuun me Jesucristó, ne xcaj nij so' cuentá se vaa ya nucuaj ndo'o Diose ne ya avii ndo'o raaj Diose, che'é se ca'née Diose man Jesucristó rihaan chumii nihánj adonj.

25 Dan me se nda' se nana snúu rma'an me nana rqué Diose, rá ta'aj nij yuvií, tzaj ne nuveé nana snúu rma'an me nana yo' ma'. 'O se avii doj raaj

Diose rihaan nij yuviñ nanj ei. Ne nda' se ninaj ndo'o Diose, rá ta'aj nij yuviñ, tzaj ne ne ninaj Diose ma'. 'O se Diose ro', me sí nucauj ndo'o doj rihaan nij yuviñ nucauj ndo'o adonj.

*Nana nihánj taj xna'anj se vaa che'é se sí ni'yon me ní', che'é dan ne'en ní' se vaa inanj che'é Jesucristó me cavii sa' ní' a*

<sup>26</sup> Dan me se xcaj nij soj cuentá daj qui'yaj Diose gaa canacúun Diose man ma'an soj, tinuj, nocoj. Doj vaa nij sí avii ndo'o raá 'nij sca'núj soj á. Doj vaa nij sí nucauj 'nij sca'núj soj á. Doj vaa nij sí xna'anj 'nij sca'núj soj á. Nuveé yuviñ sa' doj rihaan yo'ó yuviñ me ma'an soj ma'.

<sup>27</sup> Maan se inanj sí ni'yon narii Diose, ne dan me se nacaj Diose man nij sí ni'yon, che'é rej me rá Diose guun na'aj nij sí avii ndo'o raá nanj á. Ne sí uun narii Diose, ne dan me se nacaj Diose man nij so', che'é rej me rá Diose guun na'aj nij sí vaa suun nanj adonj.

<sup>28</sup> Ne taj yu'vee nó nij sí narii Diose man ma', taj nij yuviñ man rihaan chumiñ nihánj, tzaj ne nacaj Diose man nij so', ne qui'yaj canaán nij so' rihaan nij sí guun chij doj man rihaan chumiñ nihánj adonj.

<sup>29</sup> Dan me se asa' quisij, gaa ne a 'ó yuviñ se quisij rá ca'mii sa' che'é ma'an rihaan Diose se vaa sij sa' uxrá me ma'an a.

<sup>30</sup> Dan me se Diose me sí 'yaj 'nij ra'a Jesucristó man soj, ne che'é orún' Jesucristó avii raá ní', qui'yaj Diose á. Che'é orún' Jesucristó cunuu sa' nimán ní' rihaan Diose á. Che'é Jesucristó me ní' sí sa' rihaan Diose, qui'yaj Diose á. Che'é Jesucristó quinanii ní' rihaan sayuun, qui'yaj Diose á.

<sup>31</sup> Che'é dan no xcúun ní' qui'yaj ní' ndaa vaa taj danj Diose á. Dan me se taj danj Diose: "Se ca'mii sa' ní' che'é ma'an ní' ma'. Inanj che'é ma'an Diose guun rá ní' ca'mii sa' ní' á". Danj taj danj Diose adonj.

## 2

*Nana nihánj taj xna'anj se vaa ne ca'mii Pabló nana nachran' rihaan nij sí man Corinto ma'. Maan se inanj cataj xna'anj so' se vaa cavi' Jesucristó rihaan rcutzé che'é ní' a*

<sup>1</sup> Ne'en nij soj se vaa gaa cuchí 'unj chiháan soj, ne natá' 'unj se-nana Diose rihaan soj, ne ne guun rá 'unj ca'mii 'unj nana nachran' ndo'o rihaan soj, man tinuj, man nocoj. 'O se ne guun rá 'unj cataj soj se vaa avii ndo'o raá 'unj ma'.

<sup>2</sup> Tananj yo'ó guun rá 'unj cataj xna'anj 'unj che'é orún' Jesucristó se vaa cavi' so' rihaan rcutzé che'é soj a.

<sup>3</sup> Dan me se gaa cuchí 'unj rihaan soj, ne guun na'aj 'unj ca'mii 'unj, ne cuchu'vi' nimanj, ne quiri'ij ndo'o manj nanj á.

<sup>4</sup> Ne xa' nana natá' 'unj rihaan nij soj, tzaj ne nuveé nana cavii raá yuviñ me nana yo' ma'. Tzaj ne cuno nij soj nana, ne guun ya rá soj se vaa Nimán Diose rqué nana yo' manj, ne guun ya rá soj se vaa ma'an Diose rqué se nucauj manj ca'mij nana yo' rihaan soj adonj.

<sup>5</sup> Che'é dan nuveé che'e se cavii ndo'o raá 'unj me cuchumán rá soj cuno soj nana yo' ma'. Tananj che'é se vaa rqué Diose se nucauj man ní' me cuchumán rá soj adonj.

*Nana nihánj taj xna'anj se vaa ino uxrá vaa nana avii raá nij sí man rihaan chumiñ nihánj ga se-nana Diose nana sa' a*

<sup>6</sup> Dan me se nanā çūu a'mii núj rihaan nij yuvij̄ vaa chij rá, tzaj nē nuveé nanā avii rāa yuvij̄ man̄ rihaan chumij̄ nihánj̄ cuanō me nanā a'mii núj ma'. Ne a'mii núj nanā avii rāa nij sí̄ uun chij rihaan chumij̄ nihánj̄ ma'. 'O se ne'en núj se vaa nichrun' ca'nēe Diosē suun uun chij atā nij so' nanj̄ adonj̄.

<sup>7</sup> Tzaj nē a'mii núj se-nanā Diosē nanā çūu adonj̄. Dan me se gaā ataā qui'yaj̄ Diosē chumij̄, nē yo'ò guun rá Diosē se vaa cunò yuvij̄ nanā çūu yo', nē cavij̄ sa' yuvij̄, nē ve'é ndo'ò gaā yuvij̄, tzaj nē nij sí̄ man̄ gaā naá ro', nē quene'en̄ nijsò' nanā yo' ma'. Ndaā yaj̄ me tihaan̄ nacā Diosē nanā yo' rihaan yuvij̄ nanj̄ adonj̄.

<sup>8</sup> Nē quene'en̄ nij sí̄ uun chij man̄ rihaan chumij̄ nihánj̄ se-nanā Diosē nanā çūu ma'. Dan me se Jesucristó me sí̄ guun chij ndo'ò rej̄ xta', nē sese quene'en̄ nij sí̄ uun chij man̄ rihaan chumij̄ nihánj̄ se-nanā Diosē, nē nē cachron̄ nij so' man̄ Jesucristó rihaan rcutzē asuun saj̄ ma'.

<sup>9</sup> Tzaj nē danj̄ Diosē taj̄ se vaa a' 'ó yuvij̄ nē guun nucuaj̄ xcaj̄ cuentá che'é se vaa qui'yaj̄ Diosē che'é ní' sij̄ aráj̄ cochroj̄ rihaan Diosē a. Danj̄ taj̄ danj̄ Diosē á.

<sup>10</sup> Tzaj nē tihaan̄ Nimán Diosē man̄ núj che'é nij rasuun̄ qui'yaj̄ Diosē che'é ní' sij̄ aráj̄ cochroj̄ rihaan Diosē, nē dan me se tihaan̄ Nimán Diosē rasuun̄ yo' man̄ núj, qui'yaj̄ ma'an̄ Diosē á. Dan me se nuchruj̄ rāā Nimán Diosē cunudan̄j̄ rasuun̄, nē sa' uxrá nuchruj̄ rāā Nimán Diosē daj̄ vaa ma'an̄ Diosē adonj̄.

<sup>11</sup> 'O se a' 'ó yuvij̄ nē ne'en̄ daj̄ vaa rasuun̄ 'nij̄ yuvē nimán yo'ó yuvij̄ ma'. 'O se orún' nimán yuvij̄ ne'en̄ daj̄ vaa nimán ma'an̄ yuvij̄ nanj̄ adonj̄. Nē danj̄ vaa Diosē uún a. A' 'ó ní' sē ca'veē xcaj̄ cuentá daj̄ vaa Diosē ma'. Maan̄ se orún' Nimán Diosē me sí̄ ne'en̄ daj̄ vaa Diosē nanj̄ adonj̄.

<sup>12</sup> Nē inō uxrá vaa nimán núj̄ gā nimán nij̄ yuvij̄ man̄ rihaan chumij̄ nihánj̄, nē xa' núj̄, tzaj̄ nē nuū Nimán Diosē nimán núj̄, nē che'é dan me xcaj̄ núj̄ cuentá daj̄ vaa nij̄ se sa' rqué Diosē rihaan ní' adonj̄.

<sup>13</sup> Dan me se gaā nata' núj̄ rihaan yuvij̄ che'é nij̄ se sa' rqué Diosē rihaan ní', nē nē a'mii núj̄ nanā avii rāā yuvij̄ ma'. Maan̄ se a'mii núj̄ nanā tucu'yón̄ Nimán Diosē man̄ núj̄, nē tucu'yón̄ núj̄ nanā yo' rihaan yuvij̄ nuū Nimán Diosē nimán adonj̄.

<sup>14</sup> 'O se na'vej̄ rá yuvij̄ man̄ rihaan chumij̄ nihánj̄ cunò nij̄ so' nanā a'mii Nimán Diosē ma'. 'O se snúú rma'an̄ nanā a'mii Nimán Diosē, rá nij̄ so', nē nē racuúj̄ Nimán Diosē man̄ nij̄ so' naqui'yaj̄ çūu nij̄ so' nanā yo' a man̄ adonj̄. Che'é dan taj̄ se 'yá' cunò nij̄ so' ma'.

<sup>15</sup> Xa' sí̄ racuúj̄ Nimán Diosē man, tzaj̄ nē ne'en̄ so' naqui'yaj̄ çūu so' cunudan̄j̄ rasuun̄, tzaj̄ nē se ca'veē naqui'yaj̄ çūu yo'ó yuvij̄ man so' ma'. Sē guun nucuaj̄ nij̄ yuvij̄ xcaj̄ nij̄ yuvij̄ cuentá daj̄ vaa rá so' ma'.

<sup>16</sup> Dan me se danj̄ Diosē taj̄: "A' 'ó yuvij̄ nē ne'en̄ daj̄ vaa rá sí̄ 'nij̄ ra'a man ní' ma'. Sē guun nucuaj̄ yuvij̄ nago' yuvij̄ chrej̄ man sí̄ 'nij̄ ra'a man ní' ma'". Danj̄ taj̄ danj̄ Diosē á. Nē ase vaa rá Jesucristó ro', danj̄ vaa rá ma'an̄ núj̄, nē che'é dan sē guun nucuaj̄ yuvij̄ naqui'yaj̄ çūu yuvij̄ man núj̄ a man̄ adonj̄.

### 3

*Nanā nihánj̄ taj̄ xna'an̄j̄ che'é suun̄ qui'yaj̄ suun̄ Pabló rihaan Diosē se vaa tucu'yón̄ so' se-nanā Diosē rihaan̄ nij̄ sí̄ man̄ Corinto a*

<sup>1</sup> Dan me se ase vaa yuvij̄ tihaj̄ guun che'ē canoco' man̄ Jesucristó ro', danj̄ vaa nij̄ soj̄ gaā cuchí' 'un̄j̄ rihaan soj̄, tinuj̄, nocoj̄. 'O se vaa ni'yón̄ doj̄ rá soj̄,

ne ataa doj nari! soj cunō soj rihaan Nimán Diose, ne qui'yaj ndo'o soj se vaa me rá nee man soj qui'yaj soj, ne che'é dan ne ca'vee ca'mij nana chij rihaan soj a ma'.

<sup>2</sup> Ne guun nucuaj soj cunō soj nana chij a'mii Nimán Diose a ma'. Maan se inanjan nana tucu'yón nii man xnii ca'mii 'unjan rihaan soj, ne veé danj vaa soj nda'a se cuano nihánj, ne ne guun nucuaj soj cunō soj nana chij a man adonj.

<sup>3</sup> Dan me se 'yaj ndo'o soj se vaa me rá inanjan nee man soj qui'yaj soj, ne dan me se uun xcoj ruvaa ndo'o rá soj ni'yaj soj tinúú soj, ne che'é dan unu' soj ga tinúú soj, ne che'é dan me ne'en núj se vaa ne uno soj a'mii Nimán Diose a man chuguanj. Maan se ase vaa naj guun yuvij man rihaan chumij nihánj ro', danj vaa soj adonj.

<sup>4</sup> Dan me se taj yo'ó tuvi' soj: "Sij noco' man sí cu'naj Pabló mej á". Ne yo'ó so' ro', taj: "Sij noco' man sí cu'naj Apolos mej á". Danj a'mii 'o 'o ta'aj soj, ne che'é dan ase vaa naj guun yuvij man rihaan chumij nihánj vaa soj, rá 'unjanjan á.

<sup>5</sup> Daj sij me sí cu'naj Apolos, ne daj sij mej, rá soj ga. Maan se sí 'yaj suun unjan rihaan sí 'nij ra'a man ní' me núj, ne ino vaa suun ata 'o 'o núj, qui'yaj so', ne che'é suun qui'yaj suun núj ro', che'é dan amán rá soj ni'yaj soj man sí 'nij ra'a man ní' a.

<sup>6</sup> Dan me se asino yaan cataj xna'anjan 'unjan se-nana Diose rihaan soj, gaa ne cuchí' sí cu'naj Apolos uún rihaan soj, gaa ne sa' doj tucu'yón so' nu' se-nana Diose rihaan soj, tzaj ne ma'an Diose me sí qui'yaj canoco' sa' nimán soj man so'.

<sup>7</sup> Ne che'é dan taj che'é canoco' soj manj do', man sí cu'naj Apolos do' ma'. Maan se no xcúún soj canoco' soj man orún' Diose adonj.

<sup>8</sup> Ne 'o cyaan vaa 'unjan ga sí cu'naj Apolos, ne vaa güii naruvee Diose rihaan núj che'é suun 'yaj suun núj,

<sup>9</sup> ne dan me se 'yaj suun núj che'é Diose, ne ca'ne' Diose suun rihaan núj tucu'yón núj se-nana Diose rihaan soj nanjan adonj.

*Nana nihánjan taj xna'anjan se vaa no xcúún 'o 'o sí me rá tucu'yón se-nana Diose tumé so' man ma'an so', gaa ne sa' tucu'yón so' a*

<sup>10</sup> Dan me se ase vaa sí ve'é uchruj ta'nga' chihón cayáán ve' ro', vaa 'unjan, ne ve'é cuchruj 'unjan tucuáán canoco' soj, che'é yan ca'ne' Diose suun yo' rihaan, ne cuano ro', tucu'yón yo'ó so' nana rihaan soj a. Dan me se no xcúún 'o 'o sí tucu'yón nana rihaan soj tumé so' man ma'an so', ne sa' gaa nana tucu'yón so' rihaan soj á.

<sup>11</sup> Se guun cuchruj nii yo'ó tucuáán rihaan soj ma'. 'O se se-tucuanjan Jesucristó me tucuáán cuchruj 'unjan rihaan soj, ne ne nó xcúún nii cuchruj nii yo'ó tucuáán rihaan soj man adonj.

<sup>12</sup> Ne ve'é ndo'o tucu'yón ta'aj nij yuvij se-tucuanjan Jesucristó rihaan soj, ne nana nij doj tucu'yón yo'ó ta'aj nij yuvij rihaan soj,

<sup>13</sup> tzaj ne vaa güii quene'en ní' daj vaa nana tucu'yón 'o 'o so' rihaan soj, ne dan me se ca'na' uún Jesucristó rihaan chumij nihánjan, ne xa' suun qui'yaj suun 'o 'o núj sij tucu'yón se-nana Diose, tzaj ne cachén suun yo' rque ya'an, qui'yaj Jesucristó, ne quene'en núj daj vaa nana tucu'yón 'o 'o núj nanjan adonj.

<sup>14</sup> Dan me se sese se cacaa nana tucu'yón yo'ó so', ne quene'en ní' se vaa ve'é tucu'yón so' se-nana Diose, ne naruvee Diose rihaan so',

<sup>15</sup> tzaj ne sese cacaa nu' nana tucu'yón so', ne quene'en ní' se vaa taj yu'vee nó nana tucu'yón so' rihaan yuvij, ne a 'o xco' se naruvee Diose rihaan so'

nu' che'é suun qui'yaj suun so' a ma'. Dan me se quinanií ma'an so' rihaan sayuun, tzaj ne nana tucu'yón so' cacaa, ne orún' so' quinanií rihaan sayuun nanj adonj.

<sup>16-17</sup> Ne ne'en soj se vaa sese tirí' yo'ó so' man ve' na'víj yuvií rihaan Diose ro', ne tirí' Diose man so' uún, ne ase vaa ve' na'víj yuvií rihaan Diose ro', ta'nga' danj vaa ma'an soj rihaan Diose, ne yanj Nimán Diose ga soj, ne che'é dan ne nó xcúún yuvií tucunu' yuvií man soj ma'. 'Q se sese cunu' soj ga tinúú soj, ne quirí' soj, ne tirí' Diose man síí qui'yaj danj man soj, ne cacaa so' adonj.

<sup>18</sup> Sese vaa yo'ó tuví' soj avii ndo'o raá nana çu chij nana uno yuvií man rihaan chumií nihánj cuano, ne dan me se ca'ne' rá so' ga rej a'mii danj nanj ei. Se guun tiha' yu'unj so' man ma'an so' ma'. Maan se xcaj so' cuentá ne naqui'yaj so' síí snúú rma'an man so', ga ne ca'vee quisij so' guun so' síí avii ndo'o raá doj chuguanj. Dan me se tanañj a nari' so' nana ya, ne yá nu' cavií sa' so' doj nanj adonj.

<sup>19</sup> Nana avii raá yuvií man rihaan chumií nihánj cuano ro', daj chihaa míj taj se uun nana yo' rihaan Diose ma'. 'Q se danj Diose taj se vaa yuvií avii raá ro', me rá nij so' tiha' yu'unj nij so' tuví' nij so', tzaj ne nicaj Diose nana avii raá nij so', ne tiha' yu'unj Diose man ma'an nij so' nanj adonj. Danj taj danj Diose ei.

<sup>20</sup> Ne taj uún danj Diose se vaa ne'en Diose se vaa taj yu'vee nó nana avii raá yuvií man rihaan chumií nihánj a ma'. Danj taj danj Diose a.

<sup>21</sup> Che'é dan ne nó xcúún ní' ca'mii xta' ní' che'é nana avii raá yo'ó yuvií ma'. Se guun cataj ní' se vaa sa' doj avii raá yo'ó so', ne yo'ó so' nij 'yaj, cataj ní' ma'. Tzaj ne xcaj ní' cuentá daj a'mii 'o 'o nij so' á. 'Q se nana a'mii yuvií do', nu' rasuun man rihaan chumií nihánj do', ca'vee cavií sa' doj ma'an soj qui'yaj me ma'an rasuun yo', ne vaa se uun nana a'mii nij snó'o do', rasuun man rihaan chumií nihánj do', rihaan soj ei.

<sup>22</sup> Dan me se nana a'mij do', nana a'mii síí cu'naj Apolos do', nana a'mii síí cu'naj Pedró do', vaa se uun nana yo' rihaan soj, ne rasuun man rihaan chumií nihánj ro', vaa se uun yo' rihaan soj á. Ne sese vaa i'na' soj, ne cavií sa' soj, che'é se vaa i'na' soj a. Sese cavií soj, ne ca'vee cavií sa' soj uún a. Ne sese ran' soj cuano nihánj do', sese quiran' soj rej rihaan ní' do', ne nu' nij rasuun yo' me vaa se uun rihaan soj á.

<sup>23</sup> 'Q se síí noco' man Jesucristó me soj, ne ta'nij Diose me Jesucristó uún a.

## 4

*Nana nihánj taj xna'anj se vaa síí 'nij ra'a man ní' me síí naqui'yaj çu man ní' vaa güii a*

<sup>1</sup> Dan me se me rá núj xcaj cunudanj yuvií cuentá se vaa sij 'yaj suun rihaan Jesucristó me núj, ne nó xcúún núj nata' núj nana me rá Diose tijaan naca Diose man yuvií nanj á.

<sup>2</sup> Dan me se nó xcúún núj qui'yaj suun núj nu' suun ca'ne' Diose rihaan núj, ne se ca'vee ca'ne' rá núj ga suun yo' a ma'.

<sup>3</sup> Tzaj ne ca'vee se naqui'yaj çu soj manj do', ca'vee se naj guun cuese naqui'yaj çu che'ej do', tzaj ne taj se 'yaj ma'. 'Q se a ma'an 'unj ne naqui'yaj cu' 'unj daj 'yaj ma'.

<sup>4</sup> 'A 'ó cacun' ne tumé 'unj cuano, rá 'unj, tzaj ne dan me se ne ne'en 'unj daj vaa man ma'anj ma'. 'Q se orún' síí 'nij ra'a man ní' me síí nó xcúún naqui'yaj çu che'ej nanj adonj.

<sup>5</sup> Che'é dan se guun naqui'yaj çu soj cacun' che'é yuvií ma'. Maan se na'vji soj ca'na' uún sí 'njj ra'a man ní' rihaan chumií nihánj ei. Cuanõ nihánj me se ne ne'en sa' ní' ðaj vaa 'yaj 'o 'o yuvií, tzaj ne asa' ca'na' sí' 'njj ra'a man ní', ne tijaan so' rihaan ní' ðaj vaa 'yaj 'o 'o yuvií man rihaan chumií nihánj, ne sese sa' qui'yaj yo'o so', ne ma'an Diose cataj se vaa sa' qui'yaj so' adonj.

*Nana nihánj taj xna'anj se vaa ne noco' sa' nij sí man Corinto nana tucu'yón Pabló man nij so' a*

<sup>6</sup> Dan me se aj cataj xna'anj 'unj rihaan soj se vaa ma'an Jesucristó naqui'yaj çu che'é núj ga sí cu'naj Apolos, ne me raj quene'en soj man núj, ne xcaj soj cuentá se vaa nõ xcúun soj cunõ soj nana aj cataj xna'anj Diose rihaan ní' nana nõ rihaan yanj á. Dan me se se cataj soj se vaa sa' doj vaa yo'o tuvi' núj rihaan yo'ó tuvi' núj ma'.

<sup>7</sup> Sa' doj vaa so' rihaan yo'ó yuvií, rá so' na'. Me sí cataj rihaan so' se vaa sa' doj vaa so' ga, man tinuj, man nocoj. Si'yáá so' ro', me se me sí rqué yo' rihaan so' ga. Ma'án so' qui'yaj na'. Ase Diose qui'yaj xa'. Sese rqué Diose nu' si'yáá so' rihaan so', ne taj che'é ca'mii xtá' so' a doj ma'.

<sup>8</sup> Ne xa' soj, tzaj ne a 'ó rasuun ne achiin man soj, rá soj, ne ru'vee me soj, rá soj, ne rii ta'nga' ndo'o soj, rá soj a. Ne xa' núj, tzaj ne a doj ne rii ta'nga' núj, rá soj a. Sese ya' rii ta'nga' soj, ne guun niha' uxrá raj, ne ndaa a núj quirii ta'nga' ga soj ei.

<sup>9</sup> Ne xa' núj apóstol cune' Jesucristó man nata' se-nana so' rihaan cunudanj nij yuvií man rihaan chumií nihánj, tzaj ne ase vaa sí naj rma'an ro', ðanj vaa núj rihaan chumií nihánj, ne sij ðaj doj cavi' me núj, qui'yaj Diose, raj a. Che'é dan ni'yaj ndo'o nij sí man rihaan chumií nihánj ni'yaj ma'an nij se-mozó Diose ni'yaj ndo'o man núj, che'é se vaa sí yanj rma'an me núj a.

<sup>10</sup> Dan me se ase vaa sí ni'yón vaa núj rihaan chumií nihánj, che'é Jesucristó, tzaj ne sí çu raá me soj che'é Jesucristó, rá soj a. Ne sí nucuaj ndo'o me soj, rá soj, tzaj ne núj me se sí inaj me núj a. Ne ve'é ndo'o aráj cochroj yuvií rihaan soj, tzaj ne xa' ma'an núj, tzaj ne tananj a nachri' yuvií ni'yaj yuvií man núj a.

<sup>11</sup> Nu' ca'na' me se achiin se chá rihaan núj do', achiin se co'o núj do', achiin yatzj quitaj xraá núj do' á. Tucuxru' ndo'o nii man núj, ne ne'en nii se vaa taj vaj to'óo núj a.

<sup>12</sup> Dan me se 'yaj suun ndo'o núj, ga ne a'vee ri' núj se achiin man núj a. Nachri' nii ni'yaj nii man núj, tzaj ne a'mii núj nana luj rihaan nij sí nachri' ni'yaj man núj, ne 'yaj nii sayuun man núj, tzaj ne ne a'ne' rá núj ga suun vaa rihaan núj a man adonj.

<sup>13</sup> Nana nij a'mii nii rihaan núj, tzaj ne nana sa' a'mii núj ga nij sí a'mii nij che'é núj a. Ase vaa nacaj na'nu' nii rihaan cunudanj rasuun man rihaan chumií ro', ðanj vaa núj rihaan chumií nihánj nu' ca'na', ne veé ðanj vaa núj ndaa cuanõ nihánj nanj adonj.

<sup>14</sup> Dan me se quisij cachron' 'unj nana nihánj nayaa soj, ne nuveé che'e se me raj guun na'aj soj me cachronj nana nihánj ma'. 'O se ase vaa ta'núj vaa soj rihanj, tinuj, nocoj, ne che'é se 'ee raj man soj, che'é dan me raj narquej chrej sa' man soj ei.

<sup>15</sup> Ca'vee se cuchi' chi' mjí sí tucu'yón che'é Jesucristó rihaan soj, tzaj ne asinoj me sí cataj xna'anj se-nana Diose nana sa' rihaan soj á. Canoco' soj man Jesucristó ga 'unj, ne che'é dan ase vaa rej soj vaa 'unj, tinuj, nocoj.



16 Che'é dan me cataj xna'anj 'unj rihaan soj se vaa ase vaa 'yáa 'unj ro', danj gaa qui'yaj guëë soj uún a.

17 Che'é dan ca'nej 'unj man síi cu'naj Timoteo cuchí' so' rihaan soj, ne síi noco' man síi 'nij ra'a man ní' me so' ga 'unj, ne che'é dan ase vaa ta'níj vaa so' a. 'Eë raj man so', ne nucuaj raj man so' nanj adonj. Cataj xna'anj uún so' rihaan soj nu' tucuáan noco' 'unj che'é Jesucristó, ne 'o cuyaan vaa nana tucu'yón so' ga nana tucu'yón 'unj rihaan nij síi amán rá ni'yaj man Jesucristó man cunudanj nij chuman' rej vaj 'unj a.

18 Guun che'e ta'aj nij soj ca'mii xta' ta'aj nij soj, ne xa' nij síi a'mii xta', tzaj ne se cuchí' ma'anj rihaan soj, rá nij so' a.

19 Tzaj ne ra'yanj ya cuchí' ma'anj rihaan soj, sese ca'vej síi 'nij ra'a man ní', gaa ne nuveé inanj che'é nana a'mii xta' nij so' xcaj 'unj cuentá ma'. 'O se xcaj 'unj cuentá sese ya quisij nij so' qui'yaj nij so' ndaa vaa taj nij so' adonj.

20 'O se se guun chij ní' ga Diose qui'yaj nana tu'va uun ní' ma'. 'O se guun chij ní' ga Diose, qui'yaj suun guun nucuaj ní' qui'yaj suun ní' che'é Diose adonj.

21 Me se me rá soj qui'yaj ga soj asa' cuchí' 'unj rihaan soj ga. Me rá soj qui'yáa 'unj sayuun man soj na'. Ase me rá soj gaa 'eë rá 'unj man soj ne ve'é ca'mij ga soj xa'.

## 5

*Nana nihánj taj xna'anj se vaa a'ne' Pabló suun rihaan nij síi man Corinto se vaa quiríi yaníj nij so' man 'o síi tumé cacun' 'nij sca'núj nij so' a*

1 Dan me se nata' nii rihanj se vaa 'nij 'o síi tumé ndo'o cacun' sca'núj nij soj, ne cacun' chí'íj ndo'o me yo', ne a nij síi ne noco' man Diose ne 'yaj danj ma'. Dan me se vaa yo' 'o síi otoj ga nica rej 'nij sca'núj soj, taj nii ei.

2 Me che'é a'mii xta' soj ga. Me che'é ne nanó rá soj ga. Me che'é ne quiríi yaníj soj man síi tumé cacun' 'nij sca'núj soj ga.

3-4 Nuvi' ya xa' 'unj ne ga soj cuano, tzaj ne nuchruij raa ndo'oj che'é soj, ne nana nihánj ro', a'mii 'unj, ne ase uun rá soj gaa nej ga soj ro', danj guun rá soj cunó soj nana nihánj á. Che'é dan asa' cunuu chre' soj, ne xcaj soj cuentá che'é rej ya nicun' nimán 'unj sca'núj soj, qui'yaj Jesucristó sijn 'nij ra'a man ní', ne che'é Jesucristó sijn 'nij ra'a man ní' taj xna'anj 'unj rihaan soj se vaa ya tumé ndo'o snó'o yo' cacun',

5 ne taj xna'anj 'unj rihaan soj se vaa taquachén soj man síi tumé cacun' yo' rihaan síi chree cu'naj Satanás, gaa ne quirán' ndo'o neë man so' sayuun, qui'yaj síi chree, gaa ne sese xcaj sa' so' cuentá, ne gaa asa' ca'na' síi 'nij ra'a man ní' ca'ne' so' cacun' che'é yuvií, gaa ne quinaníi nimán so', qui'yaj síi 'nij ra'a man ní' a.

6 Ne chihan' uxrá vaa gaa a'mii xta' soj, man tinuj, man nocoj. Ne'en soj se vaa yo'óo cu'naj levadura 'yaj naraa nana rque rachruún a. Doj tzin' yo'óo cu'naj levadura 'yaj naraa nana rque nocoo ndo'o cunj adonj. Ne ase vaa levadura rihaan cunj yo' ro', danj vaa orún' síi 'yaj cacun' rihaan soj, ne dan me se quirí' que'eë soj, qui'yaj orún' síi tumé cacun' 'nij sca'núj soj ei.

7 Che'é dan me, ne quiríi yaníj soj nu' se nij 'nij sca'núj soj, gaa ne ase vaa cunj naca sa' ro', danj gaa soj, ne se guun qui'nij se nij sca'núj soj a ma'. Xa' soj, tzaj ne ya vaa sa' soj, qui'yaj Jesucristó, ne dan me se aj cavi' so' che'é ní', ne ase vaa caráan matzínj rihaan sayuun che'é nij yuvií israelitá gaa naá

ro', danj vaa caráán Jesucristó rihaan nu' sayuun che'é ní', ne se quiran' ní' sayuun che'é cacun' tumé ní' a ma'.

<sup>8</sup> Che'é dan, ase vaa navij rá nij yuvij israelitá cha'anj pascuá cha'anj avi' matzinj che'é nij so' ro', danj gaa ve'é ndo'o qui'yaj ma'an ní' rihaan Diose cuano, che'é rej cavi' Jesucristó che'é ní' á. Dan me se yuvij israelitá ro', ri'ij nij so' nu' se cu'naj levadura man tucuá nij so' gaa navij rá nij so' cha'anj pascuá, ne 'o cuyaán qui'yaj ní' ga nij so', quiri'ij ní' nu' se chi'ij man nimán ní', gaa ne se gaa chi'ij nimán ní' ei. Se qui'yaj ní' se nij qui'yaj ní' gaa rque ma'. Tananj ca'mij chij ní', ne inanj tucuáán ya qui'yaj ní' á.

*Nana nihánj taj xna'anj se vaa sese vaa 'o sí taj se vaa tinúú ní' me so', tzaj ne sese 'yaj ndo'o so' cacun', ne se chá ní' chraa ga so' a*

<sup>9</sup> Aj ca'neé 'unj nana rihaan soj rihaan yo'ó yanj se vaa se cunuu chre' soj ga nij sí 'yaj cacun' ga chana adonj.

<sup>10</sup> Tzaj ne ne ca'mij 'unj che'é sí man rihaan chumij nihánj sí ne noco' man Jesucristó ma'. Dan me se nij so' me sí 'yaj ndo'o cacun' ga chana, ne uun xcoj ruvaa rá nij so' ne'en nij so' tuvi' nij so', ne 'yaj ituu nij so' si'yaj tuvi' nij so', ne na'v'ij nij so' rihaan ya'anj ne vaa i'na' uún a. Tzaj ne sese me rá soj guun yanj soj ga nij sí 'yaj cacun' man rihaan chumij nihánj, ne me rej ca'anj soj ga. 'Q se man nij so' rihaan nu' cachra' chumij nihánj, ne se ca'vee curihanj soj rihaan nij so' rihaan chumij nihánj ma'.

<sup>11</sup> Maan se che'é soj cachron 'unj nana nihánj se vaa se guun cunuu chre' soj ga yo'ó sí taj uun tinúú man soj, ne ne ya noco' so' man Jesucristó, ne 'nij so' sca'núj soj ei. Dan me se sese tinúú soj me so', taj yo'ó so', tzaj ne sese 'yaj so' cacun' ga chana do', sese uun xcoj ruvaa rá so' do', sese na'v'ij so' rihaan ya'anj ne vaa i'na' do', sese nachri' so' ni'yaj so' tuvi' so' do', sese sí xno me so' do', sese sí ituu me so' do', ne se cunuu chre' soj ga so' do', a ne nó xcúún so' cataj tinuj soj man so' a mei. Ne a 'ó chraa se chá soj ga so' a ma'.

<sup>12-13</sup> Dan me se ne nó xcúún 'unj ca'ne' 'unj cacun' che'é nij sí ne noco' man Diose ma'. Ma'an Diose nó xcúún ca'ne' cacun' che'é nij so' adonj. Tzaj ne no xcúún soj ca'ne' soj cacun' che'é nij tinúú soj sí nuu chre' ga soj, ne danj Diose taj: "Quirij yanij soj man sí chi'ij 'nij sca'núj ma'an soj á". Danj taj danj Diose adonj.

## 6

*Nana nihánj taj xna'anj se vaa ne nó xcúún ní' ca'mij ní' che'é pleitó man sca'núj ní' rihaan nij cuese man chiháán ní' a. Ne se guun qui'yaj ní' cacun' man tinúú ní' ma'*

<sup>1</sup> Gaa unu' soj ga tinúú soj, ne 'anj soj uchruj soj cacun' rihaan cuese sí ne amán rá ni'yaj man Jesucristó ne ne 'anj soj rihaan yo'ó tuvi' nij sí sa' noco' man Diose man chuguanj. Nij uxrá vaa 'yaj soj danj ei.

<sup>2</sup> Ne ne ne'en soj se vaa vaa güii, ne ca'ne' ní' sij sa' noco' man Diose cunudanj cacun' che'é cunudanj nij yuvij man rihaan chumij nihánj a. Sese ca'ne' soj cacun' che'é cunudanj chumij vaa güii, gaa ne me che'é se guun nucuaj soj ca'ne' soj cacun' che'é cacun' le'ej nii cuano ga.

<sup>3</sup> Ne ne'en soj se vaa vaa güii, ne ndaa che'é ya se-mozó Diose ca'ne' ní' cacun' vaa güii a. Che'é dan me ya guun nucuaj ya soj ca'ne' soj cacun' che'é daj a nij sí man rihaan chumij nihánj cuano ei.

4 Che'é dan, sese vaa cacun' sca'núj soj rihaan chumiij nihánj, ne ca'anj cuchruj soj cacun' rihaan naj guun sí amán rá ni'yaj man Jesucristó ei. Me ma'an sí nica' doj rihaan cunudañj soj ro', guun nucuaj so' ca'ne' so' cacun' che'é tinúu soj ei.

5 Dan me se vaa che'é guun na'aj ya soj che'é se vaa 'yaj soj danj ei. Ne nuvi' a' ó tinúu soj sí guun nucuaj naqui'yaj cuu man pleitó che'é tinúu soj sí man sca'núj soj a.

6 Tzaj ne nuveé, maan se inañj unu' soj ga tinúu soj, maan ne ndaa 'anj soj uchruj soj cacun' 'yaj soj rihaan nij sí ne amán rá ni'yaj man Jesucristó, ne nij uxrá vaa 'yaj soj adonj.

7 Che'é yan unu' soj ga tinúu soj me se aj tumé uxrá soj cacun' vaa nanj adonj. Aj quiri' nu' soj, ne sa' doj sese ca'ne' cachrij rá soj qui'yaj chi'ii tinúu soj man soj do', ca'ne' rá soj qui'yaj ituu cachrij tinúu soj man si'yaj soj do', nanj ei.

8 Tzaj ne na'vej rá soj qui'yaj soj danj, maan ne tananj a ma'an soj 'yaj chi'ii man tinúu soj do', 'yaj ituu soj si'yaj tinúu soj do', nanj chihá'.

9 Ne ne'en soj se vaa se cayáan nij sí chi'ii ga Diose asa' guun chij Diose rihaan chumiij nihánj a'. Se guun tihá' yu'unj soj man ma'an soj ma'. 'Q se sí chi'ii do', sí na'váj rihaan ya'anj ne vaa i'na' do', sí otoj ga nica' tuvi' do', chii chana do', sí otoj ga chii chana do',

10 sí ituu do', sí uun xcoj ruvaa rá do', sí xno do', sí nachri' ni'yaj tuvi' do', sí tiha' yu'unj man tuvi' do', se cayáan nij so' ga Diose asa' guun chij Diose rihaan chumiij nihánj a ma'.

11 Dan me se danj inañj qui'yaj ta'aj soj gaa rque, tzaj ne yaj me se x'néj cacun' taj xráa soj, ne cunuu sa' nimán soj, ne cunuu sa' soj rihaan Diose, qui'yaj Jesucristó sij 'nij ra'a man ní' do', qui'yaj Nimán Diose sí noco' ní' man do', cuano ei.

*Nana nihánj taj xna'anj se vaa ne nó xcúún ní' qui'yaj ní' cacun' ga chana ma'*

12 Dan me se taj ya uún nii, ne: "Sí vaa ya'núj rihaan mej a. Ca'vee qui'yáa 'unj naj guun rasuun me raj qui'yáj á". Tzaj ne se cavií sa' 'unj, qui'yaj naj guun rasuun me raj qui'yáj a ma'. Dan me se ya uxrá sí vaa ya'núj rihaan mej, tzaj ne se ca'vej raj guun chij a doj rasuun rihanj ma'.

13 Dan me se taj ya uún nii, ne: "Vaa rque ní' a. Che'é dan cha ní' a. Inañj che'é rque ní' ro', vaa se chá yo' a. Ne che'é se chá yo' vaa rque ní' uún", taj uún nii a. Dan me se ya uxrá ei. Danj vaa roj yo' ei. Tzaj ne Diose qui'yaj navij roj yo' nanj chuguanj. Dan me se xa' nee man ní', tzaj ne nuveé se qui'yaj naj guun rasuun chi'ii ga chana me yo' ma'. Se cayáan ga sí 'nij ra'a man ní' me yo', ne rej ne so' me uún yo' chuguanj.

14 Dan me se nda' rá se vaa naqui'yaj i'na' Diose man sí 'nij ra'a man ní' gaa cavi' so' ro', danj guun nucuaj Diose cunuu i'na' uún ma'an ní' qui'yaj uún so' nanj adonj.

15 Ne ne ne'en soj se vaa nee man nij soj me se ase vaa nee man Jesucristó ro', vaa nee man soj a. Dan me se ca'vee nica' ní' nee man Jesucristó, ne cunuu rcaa'aañ yo' ga chana niha' rá ga chii, qui'yaj ní' na'. Se ca'vee gaa danj qui'yaj ní' a ma'.

16 Dan me se ne ne'en soj se vaa sí otoj ga chana niha' rá ro', nuu 'o nee man so' ga chana yo' a. Dan me se ase vaa orún' yuvií vaa so' ga chana yo'

nanj chuguanj. Danj Diose taj: “Ase vaa q̄rún' yuvij ro', danj vaa roj so' a”. Danj a'mii danj Diose ei.

<sup>17</sup> Tzaj ne sese guun tuvij ní' ga sí' nij ra'a man ní', ne 'o vaa nimán ní' ga so' adonj.

<sup>18</sup> Tumé uxrá soj man soj, ne naxuun soj man soj rihaan nij chana niha' chana me rá cotoj ga soj ei. Se ca'vej uxrá rá soj qui'yaj soj danj ma'. Naj guun cacun' qui'yaj ma'an snó'o ro', nuveé cacun' qui'yaj so' man ma'an nee man so' me cacun' yo' ma'. Tzaj ne sese qui'yaj snó'o cacun' ga chana niha' rá, ne yo' me cacun' qui'yaj so' man ma'an nee man so' adonj.

<sup>19</sup> Ne ne ne'en soj se vaa ase vaa nuví sa' ndo'o vaa nee man soj, ne rej yanj Nimán Diose me yo' a. Dan me se Diose me sí' rque nee man soj rihaan soj, ne nuveé si'yaj ma'an soj me nee man soj a man adonj.

<sup>20</sup> Dan me se vaa ndo'o yu'vee nó soj rihaan Diose, ne noco ndo'o naru'vee so' gaa quiránj so' man soj, ne che'é dan no xcuún soj qui'yaj suun nee man soj che'é Diose, ne ve'é ndo'o ca'mij yuvij che'é Diose, qui'yaj soj ei.

## 7

*Nana nihánj taj xna'anj daj qui'yaj ní' sese vaa nica ní' do', sese taj vaj nica ní' do' a*

<sup>1</sup> Ne cuano nihánj me cataj xna'anj 'unj rihaan soj che'é rasuun xná'anj soj manj a. Dan me se sa' vaa sese se xcaj tuvi' snó'o ga chana saj adonj. Sa' vaa sese quinaj uun so', cayáan ma'an so' adonj.

<sup>2</sup> Tzaj ne cuano nihánj me se 'yaj ndo'o yuvij cacun' ga chana, ne che'é dan ca'vee a doj xcaj snó'o man nica so' nanj á. Dan me se no xcuún snó'o xcaj so' man chana, ne no xcuún chana xcaj no' man snó'o,

<sup>3</sup> ne ve'é qui'yaj snó'o cotoj so' ga chana nica so', ne ve'é qui'yaj chana cotoj no' ga snó'o nica no' uún a. No xcuún roj so' cotoj roj so' ga tuvi' roj so' ei.

<sup>4</sup> Dan me se chana ro', se quirii ta'nga' no' rihaan nee man ma'an no' ma'. 'O se nica no' quirii ta'nga' rihaan nee man no', ne vaa snó'o uún, ne se quirii ta'nga' so' rihaan nee man ma'an so' uún ma'. 'O se nica so' quirii ta'nga' rihaan nee man so' uún adonj.

<sup>5</sup> Se guun cataj yo'o so' se vaa na'vej rá so' cotoj so' ga nica so' ma'. Tzaj ne sese 'o cyaan guun rá roj nica roj so' se vaa me rá roj so' guun yanj roj so' rihaan tuvi' roj so' che'é yan yo'o cachinj ni'yaj roj so' rihaan Diose doj güii, ne ca'vee qui'yaj roj so' danj ei. Dan me se ndaa quisij cachín ni'yaj roj so' rihaan Diose, gaa ne cunuu rcua'aan uún roj nica roj so', cotoj rcua'aan uún roj so' ei. Sese se cuno soj nana nihánj, ne caxrii sí' chree chrej chí'ij rque soj, che'é se se guun nucaj soj guun yanj soj rihaan nica soj que'ee güii ma'.

<sup>6</sup> Ne a'ne' 'unj suun rihaan soj se vaa xcaj tuvi' soj, man tinuj, man nocoj. Maan se ataj 'unj se vaa sese me rá soj xcaj tuvi' soj, ne ca'vee qui'yaj soj danj ei.

<sup>7</sup> Dan me se sa' doj sese 'o cyaan gaa cunudanj yuvij ga 'unj, ne guun nucaj cunudanj nij yuvij cayáan ma'an nij yuvij, rá 'unj, tzaj ne se guun nucaj cunudanj yuvij qui'yaj nij so' danj a ma'. Dan me se ndaa ino vaa se nucaj 'o 'o ní' 'yaj ní', 'yaj Diose, ne dan me se ino vaa se nucaj yo'o tinú ní' qui'yaj so', ne ino doj vaa se nucaj yo'ó tinú ní' qui'yaj so' uún a.

<sup>8</sup> Dan me se cataj xna'anj 'unj rihaan nij soj sij yaan do', rihaan soj chana yaan do', rihaan soj chana cavi' nica do', se vaa sa' vaa sese guun nucaj soj

ca'yáán ma'an soj, ne ase vaa uun ma'anj ro', danj gaa cane ma'an soj tzaj adonj.

<sup>9</sup> Tzaj ne sese se guun nucuaj nij soj ca'yáán ma'an soj, ne táa a se xcaj tuvi' cachrij soj nanj ei. Che'é se acaa tiha' gaa me uun rá soj cotoj soj ga 'o chana, táa a se xcaj tuvi' cachrij soj nanj adonj.

<sup>10</sup> Nihánj me cataj xna'anj 'unj rihaan soj sij vaa nica daj qui'yaj soj ga nica soj ei. Dan me se nuveé nana cavii raá ma'anj me nana nihánj ma'. 'Q se nana cataj xna'anj síi 'nij ra'a man ní' rihaan ní' me nana nihánj adonj. Dan me se se cunánj chana rihaan nica no' ma'.

<sup>11</sup> Sese cunánj chana rihaan nica no', ne quinaj uun no', ne se xcaj no' yo'o snó'o ma'. Maan se ca'vee canicaj uun no' nan' no' rihaan nica no', ne guun tuvi' uun no' ga nica no' ei. Ne snó'o uun me se se tanáj so' man nica so' ma'.

<sup>12</sup> Vaa doj nana cataj xna'anj uun 'unj rihaan soj sij vaa nica, tzaj ne nuveé nana cataj xna'anj síi 'nij ra'a man ní' me nana nihánj, tzaj ne nana ya me nana nihánj, raj adonj. Dan me se sese vaa nica yo'o tinúu ní', ne nuveé chana amán rá ni'yaj man Jesucristó me no', tzaj ne taj che'é quirij tinúu ní' man no', sese a'vej rá no' cane no' ga so' a.

<sup>13</sup> Ne sese vaa chana ra'vij ní' chana amán rá ni'yaj man Jesucristó, ne nica no' ne amán rá ni'yaj man Jesucristó, tzaj ne cane no' ga so', ne taj che'é cunánj no' rihaan so', sese a'vej rá so' cane no' ga so' ma'.

<sup>14</sup> Snó'o ne amán rá ni'yaj man Jesucristó ro', me rá Diose qui'yaj suun Diose nimán so' che'é nica so' chana ra'vij ní', ne chana ne amán rá ni'yaj man Jesucristó ro', me rá Diose qui'yaj suun Diose nimán no' che'é nica no' tinúu ní', ne che'é dan me cunu sa' ta'núí roj so' rihaan Diose, qui'yaj Diose vaa güii adonj. Sese se qui'yaj Diose danj, ne sij yo'o tumé cacun' me ta'núí soj rihaan Diose asuun tzaj adonj. Nihánj me se che'é se sij amán rá ni'yaj man Diose me ma'an soj, ne ya uxrá cunu sa' ta'núí soj rihaan Diose vaa nanj adonj.

<sup>15</sup> Sese nica ní' ne amán rá ni'yaj man Jesucristó, ne me rá nica ní' ca'anj yanij yo' rihaan ní', ne ca'ne cachrij rá ní' ca'anj nica ní' nanj ei. Gaa ya'núj rihaan ní' gaa nanj adonj. Sese ne amán rá nica ní' ni'yaj nica ní' man Jesucristó, ne taj che'é qui'yaj ní' fuerzá man nica ní' cane nica ní' ga ní' a ma'. 'Q se canacúun Diose man ní' che'é rej dínj cumán ní' adonj.

<sup>16</sup> Asa' ne'én so' chana gaa xraj, ne ca'vee quinanií snó'o nica so' rihaan sayuun qui'yáa so' ga. Ne asa' ne'én so' snó'o quinanií chana nica so' rihaan sayuun qui'yaj uun so' ga.

<sup>17</sup> Veé ndaa se vaa 'o 'o ní' gaa canacúun Diose man ní' ca'na' ní' xrej so' ro', veé danj gaa ní' nanj á. 'Q se nihánj me chrej narqué 'unj man daj a nij síi noco' man Jesucristó man daj a chuman' a.

<sup>18</sup> Sese Diose me síi canacúun man síi aj taj ta'nga' man canoco' so' man so', gaa ne taj se 'yaj mei. Veé danj gaa quitaj ta'nga' man nij so' nanj ei. Ne veé danj vaa nij síi nuvi' ta'nga' táa man uun gaa canacúun Diose man nij so' canoco' nij so' man Diose uun, ne taj che'é guun rá nij so' cano ta'nga' man nij so' ma'. Veé danj gaa cachrij nij so' nanj ei.

<sup>19</sup> Dan me se ca'vee se taj ta'nga' man ní', ca'vee se nuvi' ta'nga' táa man ní', ca'vee se, tzaj ne taj se 'yaj ma'. Maan se inánj no' xcúun ní' cunó ní' nu' nana cataj xna'anj Diose rihaan ní' nanj adonj.

<sup>20</sup> Veé ase vaa ní' gaa canacúun Diose man ní' canoco' ní' man Diose ro', veé danj gaa ca'yáán ní' rej rihaan ní' nanj ei.

11-22 Dan me se sese mozó mé so' gaa canacúún Diose mán so' canocó' so' man Diose, ne se nanó rá so' ma'. 'O se mozó sij canacúún Diose man canoco' man Diose ro', nuveé mozó uun me so', ni'yaj Diose ma'. 'O se vaa ya'núj rihaan so' canoco' so' man síi 'nij ra'a man ní' nanj adonj. Ne síi ne uun mozó gaa canacúún Diose man so' me se ne xcúún so' guun so' mozó nuu rihaan Jesucristó yaj adonj. Tzaj ne sese gaa ya'núj rihaan mozó guun yanij so' rihaan ru'vee rii ta'nga' rihaan so', ne vaa che'é guun yanij so' chuguanj.

23 Sayuun ndo'o quiran' Diose gaa quiránj Diose man soj, ne che'é dan se ca'vej rá soj quirij ta'nga' rma'an yuvij rihaan soj a ma'.

24 Dan me se ase vaa cayáán ní' gaa canacúún Diose man ní' canoco' ní' man Diose ro', veé danj gaa cayáán ní' rej rihaan ní' che'é Diose, tinuj, nocoj.

25 Cataj xna'anj 'unj rihaan nij soj che'é rej xcax tuvi' ní', tinuj, nocoj. Nuveé nana cataj xna'anj síi 'nij ra'a man ní' rihaan ní' me nana nihánj, tzaj ne cunuu 'eeg rá síi 'nij ra'a man ní' manj, ne che'é dan me ca'ne' so' suun rihanj, ne che'é dan cataj xna'anj 'unj rihaan soj daj me raj, ne ca'vee guun nucuaj rá soj man nana nihánj nana cataj xna'anj 'unj rihaan soj a.

26 Dan me se vaj ní' quiran' ndo'o ní' sayuun rihaan chumij nihánj, ne che'é dan me sa' a doj sese cayáán ma'an snó'o ndaa vaa ne so' cuano, raj a.

27 Dan me se sese vaa nica so', ne se nanó rá so' rej quirij so' man nica so' ma'. Ne sese nuvi' nica so', ne se xcax so' chana ma'.

28 Tzaj ne sese xcax so' 'o chana, ne nuveé cacun' me yo' mei. Ne sese xcax chana yaan man 'o snó'o, ne nuveé cacun' me yo' uún mei. Tzaj ne nij síi vaa nica ro', me se quiran' nij so' sayuun rihaan chumij nihánj, ne me raj quinanj soj rihaan sayuun yo' ei.

29 Dan me se me raj quene'en soj se vaa nichrun' quisij güii ca'na' uún Jesucristó rihaan chumij nihánj, ne che'é dan me se nicaj raan ní' man rasuun man rihaan chumij nihánj ma'. 'O se ra'yanj navij nu' rasuun man rihaan chumij nihánj nanj ei. Dan me se síi vaa nica ro', ase vaa síi yaan ro', danj gaa so' cayáán so' á.

30 Ne síi nanó ndo'o rá ro', se ta'vee so' ma'. Ne síi niha' ndo'o rá ro', se ca'nga' so' ma'. Ne síi naránj natu'vej ro', ase vaa síi nuvi' rasuun rihaan danj gaa so', ne inanj quiyaj suun so' che'é Jesucristó á.

31 Ne síi 'yaj suun ga chumij nihánj ro', ase vaa síi ne achiin chumij nihánj rihaan ro', danj gaa so' á. 'O se vaj navij chumij nihánj, ne ino uxra gaa chumij nihánj vaa güii nanj ei.

32 Ne na'vej raj nano ndo'o rá nij soj ma'. Dan me se síi nuvi' nica vaa ro', inanj acax so' cuentá daj quiyaj so', ne guun niha' rá síi 'nij ra'a man ní' ni'yaj síi 'nij ra'a man ní' man so' a.

33 Tzaj ne síi vaa nica ro', me se acax ndo'o so' cuentá che'é chumij nihánj daj quiyaj so', gaa ne guun niha' rá nica so' ni'yaj no' man so',

34 ne uun vij rá so' a. Ne ase vaa snó'o ro', danj vaa chana uún, ne chana yaan do', chana ne vaa nica do', inanj che'é síi 'nij ra'a man ní' acax no' cuentá, ne acax ndo'o no' cuentá daj quiyaj no' che'é rej inanj sa' uxra gaa nee man no' do', nimán no' do', rihaan Diose a. Tzaj ne chana vaa nica ro', me se acax ndo'o no' cuentá che'é chumij nihánj daj quiyaj no', gaa ne guun niha' rá nica no' ni'yaj so' man no' a.

35 Maan che'é se inanj me raj cavij sa' soj me a'mij nana nihánj rihaan soj ei. Nuveé che'e se me raj caránj chrej rihaan soj daj quiyaj soj me a'mij nana nihánj rihaan soj ma'. Maan che'é se me raj ve'é inanj quiyaj soj ne yo'o

canoco' sa' soj man síi 'nij ra'a man ní' ro', che'é dan ca'mij danj, ne na'vej raj guun vij rá soj a man adonj.

<sup>36</sup> Dan me se vaa ta'níi ta'aj soj chana yaan, ne sa' doj cane ma'an no' tucua soj, rá soj, tzaj ne sese chana yaan cachij me no' ne me ndo'o rá no' xcaj no' man snó'o, ne sese aj xcaj rej no' cuenta se vaa nanó rá no' 'yaj ma'an so', gaa ne ca'vee go' so' man no' rihaan snó'o, ne xcaj tuvi' roj so' ei. Dan me se sese se ca'vee quinaj uun no', rá rej no', ne no xcuún rej no' rque so' man no' adonj. Nuveé cacun' me yo' ma'. Ca'vee xcaj tuvi' chana yaan ga 'o snó'o ei.

<sup>37</sup> Tzaj ne sese me ndo'o rá rej chana se vaa cane no' tucua so', ne cane no', ne sese taj che'é xcaj chana man snó'o, ne guun nucuaj rej no' qui'yaj so' ndaa vaa me rá ma'an so' qui'yaj so' a. Cane ta'nij chana so' tucua so', qui'yaj so', ne sa' uxrá vaa 'yaj so' sese danj 'yaj so' ei.

<sup>38</sup> Che'é dan me, síi o' ta'nij chana rihaan snó'o ro', sa' 'yaj so', ne síi na'vej rá go' ta'nij chana rihaan snó'o ro', me se sa' doj 'yaj so' adonj.

<sup>39</sup> No xcuún chana cayáan chana ga nica chana ndaa se cavi' so', tzaj ne sese cavi' nica chana, ne ca'vee xcaj chana man naj guun snó'o me rá ma'an no' xcaj no', tzaj ne no xcuún no' xcaj no' man síi noco' man síi 'nij ra'a man ní' a.

<sup>40</sup> Tzaj ne sese quinaj uun no', ne ve'é doj gaa cane ma'an no' ei. Dan inanj vaa rá 'unj, ne ase vaa yaán Nimán Diose ga soj ro', danj vaa ne Nimán Diose ga 'unj uún nanj ei.

## 8

*Nana nihánj taj xna'anj se vaa se guun quiran' tinúú ní' sayuun, qui'yaj ní' ma'*

<sup>1</sup> Ne cataj xna'anj 'unj rihaan soj che'é nee aj cuta' nii rihaan ya'anj cacój yuvij a. Ne'en ní' se vaa síi acaj cuenta me cunudanj ní', ne nuveé se ya'anj tíha' me ne'en ní', ne ca'mij xta' ní' ma'. 'O se nij ndo'o vaa sese danj qui'yaj ní' adonj. Tzaj ne sese 'ee rá ní' man tinúú ní', ne racuj ní' man tinúú ní', gaa ne cavi' sa' tinúú ní' doj á.

<sup>2</sup> Dan me se síi taj se vaa sa' uxrá ne'en ma'an so' ro', ataa doj narj' so' nana achiin man so' ei.

<sup>3</sup> Tzaj ne sese ya aráj cochroj yo'o so' rihaan Diose, ne ya ne'en Diose man so' uún adonj.

<sup>4</sup> Dan me se cataj xna'anj 'unj rihaan soj se vaa ne nó xcuún ní' cha ní' nee cuta' nii rihaan ya'anj cacój yuvij a. Ne ya ne'en ní' se vaa taj se guun ya'anj cacój yuvij rihaan chumij nihánj ma'. Ne xa' Diose, tzaj ne oruun ya so' adonj.

<sup>5</sup> Dan me se man ndo'o ya'anj noco' nij yuvij man rihaan chumij nihánj, ne tumé ya'anj yo' man nij yuvij, rá nij yuvij, ne ya'anj me yo', rá nij so', ne ta'aj ya'anj yo' rii ta'nga' rej xta', ne yo'ó ta'aj ya'anj yo' rii ta'nga' rihaan yo'óo, rá nij so' a.

<sup>6</sup> Ne xa' ní', tzaj ne ne'en ní' se vaa oruun ya Diose á. Rej ní' Diose me so', ne orún' so' me síi qui'yaj cunudanj rasuun man rihaan chumij nihánj, ne inanj che'é ma'an so' vaa i'na' ní' a. Ne vaa orún' síi 'nij ra'a man ní', ne Jesucristó cu'naj so', ne che'é so' curuvi' nu' rasuun man rihaan chumij nihánj, ne che'é so' cunuu i'na' cunudanj ní' ya adonj.

<sup>7</sup> Tzaj ne nuveé cunudanj tinúú ní' ne'en nana nihánj ma'. Tzaj ne 'o se vaa ta'aj nij so' canoco' man ya'anj cacój yuvij gaa rque, ne ta'aj nij tinúú ní' me se ne nucuaj nimán nij so', ne gaa chá nij so' nee cuta' nii rihaan ya'anj me se

uun vĳj rá nij so' ni'yaj nij so' man neĕ yo', che'é se neĕ cuta' nii rihaan ya'anj me yo', rá nij so' a. Cacun' me cha' man neĕ cuta' nii rihaan yo', rá nij so', ne che'é dan me sese cha' nij tinúú ní' síi vaa danj rá man neĕ yo', ne quirĳi' rá nij so' nanj adonj. Dan me se qui'yaj nij so' cacun' rihaan Diose, rá nij so', ne che'é dan me no xcúún ní' raĕuj ní' man tinúú ní', ne se chá ní' neĕ yo', sese cacun' me yo' rihaan tinúú ní' mei.

<sup>8</sup> Nuveé che'ĕ se chá ní' me cavĳi sa' ní' doj rihaan Diose ma'. Dan me se ca'vee se se chá ní' man neĕ yo' do', tzaj ne se quina'aan tiha' rque ní' do' a ma'. Ne ca'vee se cha' ní' man neĕ yo', tzaj ne se nari' nucuaĳ tiha' ní' do', qui'yaj neĕ yo' nanj ma'. Nuveé neĕ yo' me 'yaj vaa i'na' ní' a man adonj.

<sup>9</sup> Nda' se ca'vee cha' soj me ma'an rasuun, tzaj ne tadó soj se vaa maan che'é se chá quiran' tinúú soj cacun', qui'yaj soj á.

<sup>10</sup> 'O se sese aj ne'en so' nu' rasuun nihánj, tzaj ne 'anj so' rej na'vĳj nii rihaan ya'anj cacóĳ yuviĳ, ne ca'anĳ cayaán so' chá neĕ yo' ga' nij síi na'vĳj rihaan ya'anĳ yo', gaa ne ne'en tinúú so' síi ne nucuaĳ nimán, gaa ne dan me se ndaa a so' ndaa a ca'anĳ cayaán chá, gaa ne uun vĳj rá so' che'é se chá yo', gaa ne 'yaj so' cacun' rihaan síi 'nij ra'a man nij ma'an soj nanj adonj.

<sup>11</sup> Dan me se quirĳi' rá so' che'é se vaa qui'yaj soj nanj adonj. Dan me se ma'an soj me se guun ya' rá xa' soj cha' soj, tzaj ne tinúú soj síi ne guun ya' rá ro', me se quirĳi' so' gaa nanj adonj. Dan me se cavi' Jesucristó che'é tinúú soj, tzaj ne quirĳi' tinúú soj, qui'yaj ma'an soj, sese danj qui'yaj soj chuguaĳ.

<sup>12</sup> Dan me se qui'yaj soj cacun' rihaan tinúú soj, ne quirĳi' rá so', qui'yaj soj, ne yo' me cacun' cutumé soj rihaan Jesucristó sese danj qui'yaj soj adonj.

<sup>13</sup> Che'é dan me sese quiran' tinúú 'unj sayuun che'é neĕ chá 'unj, ne daj chihaa' mĳ se chá 'unj nee, gaa ne se gaa nanj quiran' tinúú 'unj sayuun, qui'yáá 'unj a ma'.

## 9

*Nana nihánj taj xna'anĳ se vaa nda' se no xcúún Pabló ca'neĕ so' rasuun rihaan nij síi uno nana' a'mii natáĳ so', tzaj ne ne 'yaj so' danj ma'. Maan se inanj me rá so' cavĳi sa' nij so' rihaan Diose a*

<sup>1</sup> Ne'en soj se vaa nuveé mozó uun mé 'unj ma'. Apóstol cune' Jesucristó man nata' se-nana' so' rihaan cunudanĳ yuviĳ man rihaan chumiĳ mej, ne quene'en yá 'unj man Jesucristó sĳ 'nij ra'a man ní', ne che'é suun qui'yaj suun 'unj canoco' ma'an nij soj man síi 'nij ra'a man ní' adonj.

<sup>2</sup> Dan me se vaa yuviĳ taj se vaa nuveé ya' apóstol cune' Jesucristó man mé 'unj, tzaj ne ya' ne'en soj se vaa cune' Jesucristó man 'unj nata' 'unj se-nana' so' rihaan soj, ne dan me se che'é se canoco' soj man síi 'nij ra'a man ní', che'é dan xcaĳ yuviĳ cuentá se vaa ya' cune' Diose man 'unj nata' 'unj rihaan yuviĳ che'é so' adonj.

<sup>3</sup> Ne' gaa achúin na'anĳ nij yuviĳ manj sese ya' ya' cune' Diose manj, ne dan me se taj xna'anĳ 'unj rihaan nij yuviĳ se vaa ya' ya' canoco' nij soj man Jesucristó che'é nana' natá' 'unj rihaan soj a.

<sup>4</sup> Che'é dan no xcúún núj cha' núj chraa á. No xcúún núj co' o' núj á.

<sup>5</sup> No xcúún núj xcaĳ núj man ra'vĳj núj níi noco' man Jesucristó, ca'anĳ no' me rej ma'an ca'anĳ núj á. Ne'en soj se vaa nij tinúú síi 'nij ra'a man ní' do', síi cu'naj Pedró do', yo'ó nij apóstol cune' Jesucristó man nata' se-nana' so' rihaan yuviĳ do', vaa nica' 'o' o' nij so' a.



6 Nə xcuún núj nıcaj núj sa'anj rque yuviı a. Me che'é vij ran' guęę núj ga sí cu'naj Bernabé me sí 'yaj suun che'é rej quirı' núj sa'anj çá núj gaa chéé núj ga soj ga. Me che'é ne 'yaj núj ndaa vaa 'yaj yo'ó nij apóstol cune' Jesucristó man nata' rihaan yuviı che'é so', rá soj ga.

7 Tanuı ro', o' so' sa'anj che'é se vaa achiin rihaan ma'an so' na'. Taj, man tinuj, man nocoj. Maan se gobiernó rque nu' se vaa achiin rihaan tanuu yo' ei. Ne sí 'yaj suun naa ro', me se inanj 'yaj suun rma'an so' náa. Taj, man tinuj, man nocoj. Maan se me rá so' çá so' se achij man raą naa yo' ei. Ne sí tumé matzinj ro', cataj so' se vaa ne nó xcuún so' co'o so' stoo matzinj na'. Taj, man tinuj, man nocoj. 'Q se anuu so' too, ne co'o so' ei. Ne danj vaa guęę núj, raj, tinuj, nocoj. Vaa núj, ne nọ xcuún núj nıcaj núj se vaa me rá soj rque soj rihaan núj nanj adonj.

8 Nuveé nana avii raą yuviı me nana nihánj ma'. 'Q cuyaan a'mii se-tucuanj Moisés ga nana nihánj, ne:

9 "Se numıj so' tu'va scúj gaa 'yaj suun xo' gaa tuguáj che'é xo' 'núú trigó cunuu sa' 'núú trigó ma'", taj se-tucuanj Moisés yo' a. Inanj che'é scúj nanó rá Diose, rá soj na'.

10 Ase che'é ma'an ya ní' a'mii nana nihánj xa'. Che'é ma'an ya ní' a'mii nana nihánj ei. Sí uxra' yo'óo ro', me se nọ xcuún so' gaa nucuağ rá so' se vaa ya quirı' so' ta'aj se achij rihaan yo'óo yo', vaa güii ei. Ne sí rii tan' ro', nọ xcuún so' gaą nucuağ rá so' se vaa quirı' ma'an so' ta'aj tan' rii so' man rque naa yo' chuguañ.

11 Ne ase vaa sí 'yaj suun yo'óo ro', danj vaa núj che'é soj, ne dan me se caxrıj núj se-nana Diose nimán soj, ne caviı sa' nij soj nu' caviı nu' ca'anj, ne che'é dan, sese rque soj doj se chá man rihaan chumiı nihánj rihaan núj, ne nuveé se ya'anj tiha' me yo' rihaan núj ma'.

12 Sese nọ xcuún yo'óo yuviı çá nij so' se vaa rque soj rihaan nij so', ne táa a núj, ne doj a nọ xcuún núj çá núj se vaa rque soj rihaan núj, raj a. Tzaj ne ne achiin núj se chá rihaan soj ma'. 'Q se chu'vi' núj se vaa guun rá yuviı se vaa a'mii natáj núj se-nana Diose che'é sa'anj do', che'é se chá do', ne se cuchumán rá nij yuviı cunọ nij yuviı se-nana Diose nana sa', rá núj, ne che'é dan na'vej rá núj nıcaj núj sa'anj che'é nana a'mii natáj núj ma'. 'Q se a'vej rá núj quiran' núj me ma'an sayuun che'é se-nana Diose nanj adonj.

13 Ne'en soj se vaa nij sí 'yaj suun rihaan Diose rque nuviı ro', chá nij so' ta'aj rasuun 'anj nıcaj yuviı rque nuviı yo', ne nij sí racuıj man yuviı rque rasuun rihaan Diose ro', chá ma'an nij so' ta'aj rasuun yo', ne dan me se nọ xcuún nij so' çá nij so' rasuun yo' adonj.

14 Ne xa' núj sıj nata' se-nana Diose nana sa' rihaan yuviı, tzaj ne cataj xna'anj sí 'nij ra'a man ní' rihaan ní' se vaa nọ xcuún núj qui'yaj núj se vaa 'yaj nij sí 'yaj suun rá nuviı yo', ne nọ xcuún núj çá núj se vaa rque yuviı rihaan núj che'é se-suun núj suun nata' se-nana Diose rihaan yuviı a. Danj taj sí 'nij ra'a man ní' adonj.

15 Tzaj ne a' ó güii ne qui'yáj danj ma'. Nuveé che'e se me raj rque soj rasuun rihanj me cachronj nana nihánj ma'. 'Q se nda' se cavij, tzaj ne se guun raj daj chihaa mij rque soj sa'anj manj ma'. 'Q se sí nucuağ nimán mej adonj. Sese cata'aa 'unj sa'anj, ne cataj yuviı se vaa tu'va rma'an 'unj taj 'unj se vaa se cata'aa 'unj sa'anj che'é se-suun 'unj suun a'mii natáj se-nana Diose nana sa', ne che'é dan daj chihaa mij se qui'yáj danj ma'.

16 Dan me se a'mii natáj 'unj se-nana Diose, tzaj ne se ca'mii xtá' 'unj che'é suun yo' mei. Maan se suun ca'ne' Diose rihaan 'unj me suun yo', ne sese se ca'mii natáj 'unj se-nana Diose nana sa', gaa ne quirán' 'unj cacun' nocoo ndo'o gaa nanj adonj.

17 Sese guun niha' raj qui'yaj sunj suun ca'ne' Diose rihanj, ne naru'vee Diose rihanj, tzaj ne ca'vee se ne gaa niha' raj qui'yaj sunj che'é Diose, tzaj ne daj chihaa mij se ca'ne' raj ga suun a'mii natáj se-nana Diose ma'. Maan se yo'o qui'yaj sunj nanj ei.

18 Ne me se naru'vee Diose rihanj, rá soj ga. 'O se inanj ca'vej rá Diose rque uun 'unj se-nana Diose rihaan yuvii, ne cunoo uun yuvii se-nana Diose nana sa' ca'mii natáj 'unj, ne se rque yuvii sa'anj rihanj ma'. No xcúnj cachinj sa'anj rihaan yuvii cuno nana sa', tzaj ne na'vej rá Diose qui'yáj danj ma'. Maan se cunoo uun nij yuvii, ne se luj rque Diose manj me nana yo' a. Se naru'vee yuvii rihanj ma'.

19 Nuveé mozó mej rihaan yuvii ma'. A 'ó yuvii se guun nucaj quirii ta'nga' rihanj, tzaj ne naqui'yaj yá 'unj mozó manj rihaan cunudanj yuvii, che'é se me raj cunuu rii ndo'o yuvii, ne cumañ doj nij so' canoco' man Jesucristó adonj.

20 Dan me se gaa vaa 'unj sca'núj nij yuvii israelitá, gaa ne naqui'yaj manj ndaa vaa 'yaj ma'an nij so', gaa ne ca'vee canoco' nij so' se-tucuanj Jesucristó, che'é se me raj cunoo nij so' se-nana Jesucristó ei. Ase vaa nij síi noco' uxrá se-tucuanj Moisés ro', danj vaa ma'anj gaa taj xna'anj 'unj rihaan nij so' che'é Jesucristó ei. Taj che'é canoco' ma'anj se-tucuanj Moisés, tzaj ne maan che'é rej me raj cunoo nij so' se-nana Jesucristó me 'yáj danj nanj adonj.

21 Ase vaa nij síi ne noco' se-tucuanj Moisés ro', danj vaa 'unj gaa taj xna'anj 'unj rihaan nij so' che'é Jesucristó, che'é rej me raj cunoo nij so' se-nana Jesucristó, ne dan me se ne 'yáá 'unj naj guun se vaa me raj qui'yáj ma'. 'O se unó 'unj rihaan Diose, ne unó 'unj cunudanj nana cataj xna'anj Jesucristó rihaan ní' adonj.

22 Ase vaa nij síi ne guun ya rá se vaa a'vej rá Diose cha nij so' naj guun rasuun ro', danj vaa ma'anj gaa tucu'yonj se-nana Diose rihaan nij so', che'é rej me raj raan doj canoco' nij so' man Jesucristó ei. Dan me se ase vaa 'o 'o nij yuvii ro', danj vaa naqui'yáj man ma'anj gaa taj xna'anj 'unj rihaan 'o 'o nij so' che'é Jesucristó, gaa ne canoco' ta'aj 'o 'o nij yuvii man Jesucristó, qui'yáj adonj.

23 Inanj danj 'yáá 'unj ga se-nana Diose nana sa', gaa ne cavii sa' ma'anj, qui'yaj se-nana Diose, raj a.

24 Ne'en soj se vaa nij síi unánj tico tuvi' ro', nucaj unánj cunudanj nij so', tzaj ne orún' tuvi' nij so' 'yaj canaán, ne dan me se ase vaa 'yaj suun ndo'o síi 'yaj canaán ro', danj gaa soj qui'yaj suun soj che'é Jesucristó, gaa ne qui'yaj canaán soj, ne cavii sa' soj ei.

25 Dan me se síi me rá qui'yaj canaán gaa tico nii ro', tumé uxrá so' man ma'an so' daj qui'yaj so', ne se náj qui'yaj rma'an so' ma'. 'O se me rá so' guun nucaj so' qui'yaj canaán nu' 'o cachriin coj cunuú raá so', tzaj ne nuveé 'o cachriin coj gaa nu' cavii nu' ca'anj me yo' ma'. Maan se vaa güii canocoo yo' nanj adonj. Tzaj ne ino vaa se rque Diose man ní' sese qui'yaj canaán ní', ne dan me se se rque Diose man ní' ro', yo'o gaa yo' nu' cavii nu' ca'anj, ne che'é dan cutumé uxrá ní' man ma'an ní' ei.

<sup>26</sup> Xa' sí unánj tico tuvi', tzaj ne ne'en so' me rej cuchj' so', ne ne 'anj so' naj guun chrej ma'. Ne danj 'yaj guęę 'unj nanj á. Dan me se ne'en yaj me rej cuchj' 'unj, ne che'é dan inanj 'yaj sunj adonj. Ne sí tico tuvi' cuxru', tzaj ne ne o' so' rihaan nana uun ma'. 'O se ne'en so' daj qui'yaj so', ne qui'yaj canaan so', ne ase 'yaj so' ro', danj 'yá adonj. Ne'enj daj qui'yáj, ne qui'yaj cananj ni'yaj Diose, ne danj 'yaj guęę 'unj nanj á.

<sup>27</sup> Dan me se sí tico tuvi' cuxru' ro', me se o' so' man ma'an so', che'é se me rá so' gaa sca' nee man so', gaa ne qui'yaj canaan so' man tuvi' so' a. Uxrá tumé so' man nee man ma'an so', ne ase vaa tumé so' man ma'an so' ro', danj vaa tumej man ma'anj a. Dan me se ca'mii natáj 'unj rihaan yo'ó yuvij se vaa canoco' nij so' man Jesucristó, ne na'vej raj cataj Jesucristó se vaa ne canoco' ya ma'anj man so' ma'.

## 10

*Nana nihánj taj xna'anj se vaa tadó uxrá ní se vaa se qui'yaj ní cacun' rihaan Diose, ne se na'vúj ní rihaan ya'anj cacóy yuvij a*

<sup>1</sup> Me raj xcaj nij soj cuentá che'é xji núj sij israelitá nij sí cumán gaa naá, gaa ne quene'en soj me che'é canoco' raan ní' man sí 'nij ra'a man ní', tinuj, nocoj. Xji núj sij israelitá nij sí cumán gaa naá ro', me se caráán ngaa rihaan güii xráá cunudanj nij so', qui'yaj Diose, ne cachén sa' nij so' tanuü na ya'anj, ne canó nij so' ndaa rej xcó na ya'anj, qui'yaj Diose,

<sup>2</sup> ne gaa cachén nij yuvij israelitá rej caráán ngaa rihaan güii xráá nij so' do', gaa cachén sa' nij so' ndaa rej xcó na ya'anj do', ne yo' me cata' ne nij so' vaa, ne cunuu rcua'aan nij so' ga sí cu'naj Moisés, ne canoco' cunudanj nij so' man Diose ga sí cu'naj Moisés ei.

<sup>3</sup> Ne vaa se rqué Jesucristó rihaan nij so' chá cunudanj nij so',

<sup>4</sup> ne vaa na rqué Jesucristó rihaan nij so' co'o cunudanj nij so', ne rqué Jesucristó cunudanj rasuun cachiin man nee man nij so' do', man nimán nij so' do', nanj adonj. Dan me se cachéé Jesucristó ga nij so' me rej ma'an vaj nij so', ne ase vaa yuvej quixra' cavi na co'o nij yuvij israelitá ro', danj vaa Jesucristó rihaan nimán nij so', rqué Jesucristó nu' se vaa cachiin man nimán nij so' adonj.

<sup>5</sup> Tzaj ne ne guun niha' uxrá rá Diose ni'yaj Diose man que'ęę nij so' ma'. Doj tzin' tuvi' nij so' me sí sa' rihaan Diose, ne che'é dan cavi' nu' yo'ó ta'aj nij so' rej tacaan, qui'yaj Diose ei.

<sup>6</sup> Xcaj raa ní' daj qui'yaj nij yuvij israelitá gaa naá, ne xcaj ní' cuentá daj qui'yaj ní' yo' yaj á. Dan me se guun ndo'o rá nij yuvij israelitá qui'yaj nij so' se nij, gaa ne quiran' nij so' sayuun, ne che'é dan xcaj ní' cuentá se vaa ne nó xcúun ní' guun rá ní' qui'yaj ní' se nij ma'.

<sup>7</sup> Dan me se quina'vúj ta'aj nij so' rihaan ya'anj cacóy yuvij, ne dan me se cayáán nij yuvij israelitá rej rihaan nij ya'anj yo', gaa ne chá nij so' chraa, gaa ne co'o nij so' na, gaa ne canicun' nij so', gaa ne quij tico tuvi' nij so' ga tuvi' nij so' rihaan ya'anj yo', taj danj Diose a. Gaa ne quiran' ndo'o nij so' sayuun, che'é yan qui'yaj nij so' danj a. Dan me se xcaj ní' cuentá se vaa se quina'vúj ní' rihaan ya'anj cacóy yuvij ma'.

<sup>8</sup> 'O se qui'yaj yo'ó ta'aj nij yuvij israelitá cacun' ga chana, ne dan me se cavi' icó va'nuj mój tuvi' nij so' rque 'o güii yo', qui'yaj cacun' yo' a. Che'é dan xcaj ní' cuentá se vaa se qui'yaj ní' danj ma'.

9 Ne ne cuchu'vji' nij yuvij israelitá qui'yaj nij so' cacun' ma'. Maan se guun rá nij so' quene'en nij so' sese ya ya qui'yaj Diose sayuun man nij so' che'é cacun' tumé nij so' a. Doj a qui'yaj nij so' cacun', tzaj ne cavi' que'ee nij so', qui'yaj xcuáá, ne che'é dan xcaj ní' cuentá se vaa se qui'yaj ní' danj ma'.

10 Ne ca'mii ta'aj nij so' nana nij rihaan Diose, se vaa ne ve'é qui'yaj Diose rihaan nij so' a. Ne che'é dan cavi' yo'ó ta'aj nij so', qui'yaj se-mozó Diose sí ca'néé Diose rihaan nij so', ne che'é dan xcaj ní' cuentá se vaa se qui'yaj ní' danj ma'.

11 Inanj danj quiran' nij yuvij israelitá nij sí cumán gaa naá, gaa ne cachrón nii nana nihánj che'é nij so' rihaan yanj, che'é yan xcaj ní' cuentá daj qui'yaj ní' yo' yaj a. Nichrun' quinavij chumij nihánj, ne che'é dan no' xcuún ní' xcaj ní' cuentá daj qui'yaj ní' a.

12 Sese sa' uxrá noco' ní' man Jesucristó rá ní', ne tumé uxrá ní' man ní' se gaa nanj ca'anj yanij ní' ne quirí' ní' a.

13 Xa' soj, tzaj ne ne cachén soj rihaan sayuun nocoo ndo'o ne guun nucuaj soj quiran' soj ma'. Maan se inanj sayuun le'ej nii 'vee guun nucuaj soj 'na' rihaan soj nanj adonj. Tzaj ne vaa che'é gaa nucuaj rá soj man Diose, gaa ne se gaa nanj ca'na' sayuun nocoo ndo'o rihaan soj ei. Tzaj ne asa' ca'na' sayuun nocoo ndo'o rihaan soj, ne gaa nucuaj rá soj man Diose, ne racuíj so' man soj daj gaa qui'yaj soj, gaa ne quinanií soj rihaan chrej chi'ii yo', gaa ne se gaa nanj qui'yaj soj cacun' chuguanj. Dan me se daj chihaa mij se guun nucuaj sayuun nocoo yo' qui'yaj canaan yo' rihaan soj ma'. 'Q se Diose racuíj nanj adonj.

14 Che'é dan tumé uxrá soj man soj ei. Se quina'vúj soj rihaan ya'anj cacój yuvij, man tinuj, man nocoj.

15 Síí aj acaj cuentá me soj, raj, ne che'é dan me nuchruj raa soj nana a'mij á.

16 Dan me se gaa nuu chre' ní', ne vaa yo'o tazá na vinó rihaan ní', ne nago' ní' graciá rihaan Diose che'é tazá se vaa che'é inanj orún' Diose gaa na vinó yo', ne ase vaa ton man Jesucristó ro', danj vaa na vinó yo' rihaan ní' a. Ne ne'en ní' se vaa cavi' Jesucristó che'é nu' nij tinuj ní' a. Gaa ne uxra' ta'aj ní' rachrúún, gaa ne chá taran' ní' doj rachrúún yo', ne ase vaa nee man Jesucristó ro', danj vaa rachrúún yo' rihaan ní' a. Ne ne'en ní' se vaa cavi' Jesucristó che'é nu' nij tinuj ní' a.

17 Dan me se orún' rachrúún vaa rihaan ní' chá cunudanj ní' a. Che'é dan me ase vaa orún' yuvij ro', danj vaa cunudanj nij tinuj ní' a.

18 Ne xcaj soj cuentá se vaa ase vaa 'yaj ní' cuango ro', danj qui'yaj nij yuvij israelitá nij síí man gaa naá, chá cunudanj nij so' nee rqué nij so' rihaan Diose, ne che'é dan ase vaa orún' yuvij ro', danj vaa cunudanj nij so' rihaan Diose a.

19 Xcaj nij soj cuentá ni'yaj soj nana a'mij á. Yu'va' chá' nee uta' nii rihaan ya'anj cacój yuvij na'. Taj ma'. Ya ya'anj me nij ya'anj cacój yuvij na'. Taj ma'.

20 Inanj me rá 'unj cataj 'unj se vaa nee uta' nii rihaan ya'anj cacój yuvij ro', nuveé Diose me síí rqué nii nee yo' rihaan ma'. Maan se rihaan nana chree rqué nii nee yo' nanj adonj. Ne na'vej raj guun tuví' soj gaa nij nana chree ma'.

21 Sese co'o soj na vinó che'é ní' nij ra'a man ní', ne se ca'vee canicaj soj co'o soj na vinó che'é ní' nana chree ma'. Se guun co'o soj vij na yo' ma'. Sese chá soj chraa rihaan síí 'nij ra'a man ní', ne se ca'vee canicaj soj chá soj chraa rihaan nij nana chree ma'.

<sup>22</sup> Sese danj qui'yaj ní', ne caxrii yuvaa síi 'nii ra'a man ní' man ní' nanj adonj. Che'é se sa' Diose, ne nano' ní' daj qui'yaj ní', gaa ne ca'maan rá Diose ni'yaj Diose man ní' na'. Taj ma'. Sese danj qui'yaj ní', ne se guun nucuaj ní' quinanii ní' rihaan so' a ma'.

<sup>23</sup> "Ca'vee qui'yaj naj guun se me raj á", taj ta'aj yuvii, ne ya vaa nana a'mii nij so', tzaj ne se cavii sa' ní' a doj, qui'yaj naj guun se 'yaj ní' ma'. Se cunuu sa' ní', qui'yaj naj guun se 'yaj ní' man chuguanj.

<sup>24</sup> Se guun nano' ní' se sa' gaa rihaan ma'an inanj ní' ma'. 'O se no xcúun ní' nano' ní' se sa' gaa rihaan yo'ó yuvii adonj. Danj qui'yaj ní', gaa ne cavii sa' doj ní' ei.

<sup>25</sup> Ca'vee cha soj naj guun nee ane' rihaan yu'vee, ne se nano' rá soj sese nee cuta' nii rihaan ya'anj cacój yuvii me nee yo' mei. Maan se cha uun soj ei.

<sup>26</sup> Danj Diose taj se vaa nu' cachra' chumii do', cunudanj rasuun man rihaan chumii do', me si'yaj síi 'nii ra'a man ní' a. Danj taj danj Diose, ne taj che'é cuchu'vi' ní' cha ní' man si'yaj síi 'nii ra'a man ní' ma'.

<sup>27</sup> Sese nacúun yo'ó síi ne amán rá ni'yaj man Jesucristó man soj cha soj chraa ga so', ne ca'vee ca'anj soj cha soj ga so', sese danj me rá soj, ne ca'vee cha soj naj guun rasuun rque so' cha soj ei. Se xcaj soj cuentá sese nee cuta' nii rihaan ya'anj cacój yuvii me nee yo' ma'. Cha soj cuaj ei.

<sup>28</sup> Tzaj ne sese cataj xna'anj yo'ó so' rihaan soj se vaa nee uta' nii rihaan ya'anj cacój yuvii me nee cha soj, ne se cha soj man nee yo' a mei. 'O se síi cataj xna'anj rihaan soj ro', ne guun ya' rá so' se vaa ca'vee cha soj nee yo', ne che'é dan me se guun cha soj a ma'.

<sup>29-30</sup> Dan me se ne'en ma'an soj se vaa nuveé cacun' me cha soj nee yo' ma'. Tzaj ne tinúu soj síi cataj xna'anj rihaan soj ro', cacun' me cha' nee yo', rá so', ne che'é dan me se taá a se cha soj nee yo' a man adonj. Ca'vee cha 'unj nee yo', raj, tzaj ne sese cha 'unj nee yo', gaa ne cuta' tinúu 'unj cacun' xráj, ne nda' se nago' 'unj graciá rihaan Diose che'é nee yo', tzaj ne cataj tinúj se vaa chi'ii vaa nimanj, ne na'vej uxrá raj ca'mii tinúj danj a ma'. Che'é dan me taj che'é chaj nee yo' ma'.

<sup>31</sup> 'O se veé danj qui'yaj soj uún ei. Dan me se nu' se cha soj do', nu' se co'ó soj do', naj guun se qui'yaj soj do', inanj che'é Diose qui'yaj soj cunudanj nij rasuun yo', gaa ne ve'é doj ca'mii yuvii che'é Diose, qui'yaj soj chuguanj.

<sup>32</sup> Tananj uún, ne se quinanó rá nij yuvii israelitá do', nij yuvii yaníj do', cunudanj nij síi noco' man Jesucristó do', qui'yaj soj ma'.

<sup>33</sup> Inanj danj 'yaj ma'anj, ne nu' se vaa me rá 'o 'o ta'aj yuvii qui'yáa 'unj ro', yáa 'unj, ne ne yáa 'unj inanj se me raj qui'yaj ma'. 'O se yáa 'unj ndaa vaa me rá nij yuvii nanj adonj. 'O se nanó' 'unj chrej cavii sa' cunudanj nij yuvii doj, gaa ne quinanii nij so' rihaan sayuun che'é se sa' yo' adonj. Inanj danj qui'yaj soj uún ei.

## 11

<sup>1</sup> Dan me se xcaj 'unj cuentá daj qui'yaj Jesucristó, ne inanj danj yáa 'unj, ne xcaj soj cuentá daj yáa 'unj, ne inanj danj qui'yaj soj uún ei.

*Nana nihánj taj xna'anj daj qui'yaj ní' gaa na'v'j ní' rihaan Diose a*

<sup>2</sup> A'ó güii ne quini'yon nij soj manj, ne ve'é 'yaj soj nu' tucuáan tucu'yonj rihaan soj, ne che'é dan sa' uxrá qui'yaj soj á.

<sup>3</sup> Me raj xcaj soj cuentá se vaa uun chij Jesucristó rihaan nu' snó'o, ne snó'o uun chij rihaan chana nica so', ne uun chij Diose rihaan Jesucristó a.

<sup>4</sup> Dan me se gaa achíin ni'yaj snó'o rihaan Diose do', gaa nata' so' se-nana Diose cunō cunudanj nij sí amán rá ni'yaj man Jesucristó do', ne sese caráán so' raá so', ne nij ndo'o 'yaj so' rihaan ma'an so' do', rihaan Jesucristó do', vaa ei.

<sup>5</sup> Ne chana me se gaa achíin ni'yaj no' rihaan Diose do', gaa nata' no' se-nana Diose cunō cunudanj nij sí cuchumán rá ni'yaj man Jesucristó do', ne sese se caráán no' raá no', ne nij 'yaj no' rihaan ma'an no' do', rihaan nica no' do', vaa ei. Ase vaa chana raá caan ro', vaa no',

<sup>6</sup> sese se ca'vej rá no' caráán raá no' ei. Táa a se ca'vej cachrij rá no' caca caan nii raá no', sese ne na'aj no' gaa danj raá no' ei. Sese na'aj no', ne caráán no' raá no' adonj.

<sup>7</sup> Ne nó xcúún núj snō'o caráán núj raá núj ma'. 'O se ase vaa Diose ro', danj vaa ma'an núj snō'o, ne che'é dan ni'yaj yuvij man snó'o ne xcaj yuvij cuentá se vaa ve'é ndo'o vaa Diose sí qui'yaj man snó'o adonj. Ne ni'yaj yuvij man chana ne xcaj yuvij cuentá se vaa ve'é ndo'o vaa snó'o, che'é se cúu man snó'o ro', guun chana a.

<sup>8</sup> Ne'en soj se vaa cúu man ma'an snó'o ro', cavii chana, ne nuveé cuj man chana cavii snó'o ma'.

<sup>9</sup> Ne nuveé che'e chana me qui'yaj Diose man snó'o ma'. Che'e snó'o ro', me qui'yaj Diose man chana adonj.

<sup>10</sup> Che'é dan no xcúún chana tihaa chana se vaa uun chij snó'o rihaan no', ne che'é dan caráán no' raá no', ne quene'en nij se-mozó Diose se vaa ve'é 'yaj no' ei.

<sup>11</sup> Tzaj ne ní' sij noco' man síi 'nij ra'a man ní' ro', se guun cataj ní' se vaa taj se uun snó'o rihaan chana, ne se guun cataj ní' se vaa taj se uun chana rihaan snó'o ma'.

<sup>12</sup> 'O se che'e snó'o guun chana rihaan chumij nihánj, tzaj ne che'é chana me a'ngaa snó'o, ne Diose me sí qui'yaj man cunudanj ní' adonj.

<sup>13</sup> Nuchruj raá ma'an soj daj qui'yaj soj á. Cunaj vaa cachinj ni'yaj chana rihaan Diose sese se caráán raá no', rá soj na'. Taj ma'.

<sup>14</sup> Ne'en cunudanj yuvij se vaa sese gaa xcaan ndo'o yuvé raá snó'o, ne guun na'aj so',

<sup>15</sup> tzaj ne sese xcaan yuvé raá chana, ne ve'é vaa no', rá yuvij a. Me rá Diose gaa xcaan yuvé raá chana, ne che'é dan me rqué Diose yuvé raá no', me rá Diose caráán yo' raá no' ei.

<sup>16</sup> Sese vaa 'o sí na'vej rá cunō nana nihánj, ne taj se qui'yaj ní' a ma'. 'O se nuvi' yo'ó tucuáán canoco' ní' a ma'. 'O se veé nihánj me tucuáán noco' ní' do', tucuáán noco' taran' nij sí amán rá ni'yaj man Jesucristó man cunudanj chuman' do', nanj adonj.

<sup>17</sup> Vaa yo'ó nana cataj xna'anj uún 'unj rihaan soj, tzaj ne se cataj 'unj se vaa ve'é 'yaj soj ma'. Maan se nij 'yaj soj gaa nuu chre' soj, ne se cavii sa' soj, qui'yaj se vaa 'yaj soj ma'. Maan se nij doj cavij soj adonj.

<sup>18</sup> Asino yaan cataj xna'anj 'unj rihaan soj che'é se vaa ne cuyaan vaa rá taran' soj a man chuguanj. Dan me se ca'na' nana rihanj, ne cunoj se vaa gaa nuu chre' soj, ne uun yanj ta'aj soj rihaan tuvi' soj, ne inō vaa rá ta'aj 'o' o' soj, ne xa' nana yo', tzaj ne nana ya ya me nana yo', raj nanj á.

<sup>19</sup> 'O se cunaj uxrá vaa cuxra' ta'aj soj man ma'an soj axee. Ne yaj me se xcaj ní' cuentá ni'yaj ní' me tuvi' soj me sí noco' ya man Jesucristó raá adonj.

20 Dan me se gaa nuu chre' soj, navij rá soj chá xti'nò soj che'é sí 'nij ra'a man ní', rá soj, tzaj ne inò uxrá 'yaj soj, ne nuveé che'e ya sí 'nij ra'a man ní' chá xti'nò soj ga tinúú soj a ma'.

21 Maan se che'é ma'an soj chá xti'nò 'o 'o soj, ne dan me se ta'aa 'o 'o soj chá ma'an soj, ne na'vej rá soj go' soj chraa chá tinúú soj ma'. Che'é dan na'aan rque yo'o ta'aj tinúú soj, 'yaj soj ei. Ne yo'ó na'aj soj me se uun xno soj ei.

22 Sese inanj me rá soj chá soj do', co'o soj do', ne me che'é ne quinan' soj tucúa soj chá soj do', co'o soj do' ga. Taj vaj tucúa soj vaa, don 'yaj soj danj na'. Nachri' soj ni'yaj soj man tinúú soj sí noco' man Jesucristó, don 'yaj soj danj na'. Me che'é me rá soj guun na'aj nij tinúú soj nij sí niqwe ga. Daj cataj 'unj rihaan soj, rá soj ga. Ca'vee cataj 'unj se vaa sa' uxrá 'yaj soj axee.

23 Dan me se cataj xna'anj sí 'nij ra'a man ní' rihanj daj qui'yaj ní' gaa chá xti'nò ní' che'é so', ne aj cataj xna'anj 'unj nana yo' rihaan soj á. Dan me se gaa quisij güii tacuachén sí cu'naj Judas man Jesucristó sñ 'nij ra'a man ní' rihaan nij sí taj ri'yunj man Jesucristó, gaa ne maan ti'nuu dan ro', nicaj sí 'nij ra'a man ní' rachrúún,

24 ne nago' so' graciá rihaan Diose che'é rachrúún yo', ne guun che'e so' cuxra' ta'aj so' man rachrúún yo', gaa ne dan me se cataj so':

—Nihánj me nee manj, ne inanj che'é soj vaa nihánj adonj. Cha soj man nihánj, gaa ne yo'o cunuú rá soj manj á —taj Jesucristó rihaan nij sí noco' man so' a.

25 Gaa ne quisij chá xti'nò nij so', gaa ne nicaj Jesucristó 'o copá nuu na vinó, gaa ne cataj uún so':

—Na vinó nihánj ro', me ton manj, ne che'é ton manj ro', rqué naca Diose 'o nana rihaan soj daj qui'yaj Diose ga soj, ne me ma'an güii co'o soj na nihánj, ne na'nuj rá soj manj á —taj Jesucristó rihaan nij sí noco' man so' a.

26 Dan me se me ma'an güii chá soj rachrúún yo' do', me ma'an güii co'o nij soj na vinó yo' do', ne tihaa soj rihaan taran' nij yuvij man rihaan chumij se vaa cavi' Jesucristó che'é soj, ne inanj danj qui'yaj soj ndaa se quisij güii ca'na' uún Jesucristó rihaan chumij nihánj a.

27 Che'é dan me sese nij 'yaj yo'o tinúú ní' gaa chá so' rachrúún do', gaa 'o so' na vinó do', che'é sí 'nij ra'a man ní', ne tumé so' cacun', che'é yan 'yaj so' danj adonj. Tumé so' cacun' rihaan nee man sí 'nij ra'a man ní' do', rihaan ton man sí 'nij ra'a man ní' do', nanj adonj.

28 Che'é dan xcaj 'o 'o nij soj cuentá daj qui'yaj 'o 'o soj, gaa ne ve'é chá soj rachrúún do', ve'é co'o soj na vinó do' á.

29 Sese ne acaj soj cuentá sese nee man sí 'nij ra'a man ní' me se chá soj, ne quiran' soj sayuun, ne sese ne acaj soj cuentá sese ton man sí 'nij ra'a man ní' me se 'o soj, ne quiran' soj sayuun ei.

30 Dan me se maan che'é se nij 'yaj soj rihaan sí 'nij ra'a man ní' ro', che'é dan aj ran' que'ee soj sayuun chuguanj. Dan me se ta'aj soj anó chí'ij man, ne yo'ó ta'aj soj yo'o inaj, ne yo'ó ta'aj soj aj cavi' nanj ei.

31 Sese naqui'yaj cuu ní' che'é ma'an ní' daj vaa ní', gaa ne se qui'yaj sí 'nij ra'a man ní' sayuun ma'.

32 Tzaj maan che'é se nij 'yaj ní', rá sí 'nij ra'a man ní', ne che'é dan 'yaj so' sayuun man ní', che'é rej quinari' ní' daj qui'yaj ní' cavij sa' ní' adonj. Sese narj' sa' ní' chrej sa', gaa ne se quiran' ní' sayuun qui'yaj Diose, asa' qui'yaj so' sayuun man cunudanj yuvij man rihaan chumij nihánj, gaa güii qui'yaj Diose sayuun man nij so' ma'.

<sup>33</sup> Che'é dan, gaa nuu chre' soj cha soj, gaa ne na'vij soj ca'na' cunudanj tinúú soj, tinuj, nocoj.

<sup>34</sup> Sese na'aan ndo'o rque yo' o tuvi' soj ta' asuun, ne cha so' chraa tucua' so', gaa ne se quiran' soj sayuun che'é se vaa 'yaj soj gaa nuu chre' soj ei. Ne yo'ó nana xna'anj soj manj ro', cataj xna'anj 'unj nana yo' rihaan soj asa' cuchij chiháan soj ei.

## 12

### *Nana nihánj taj xna'anj che'é suun sa' nicaj ní' 'yaj Nimán Diose a*

<sup>1</sup> Me raj xcaj soj cuentá che'é suun sa' nicaj ní' 'yaj Nimán Diose, tinuj, nocoj.

<sup>2</sup> Ne'en soj se vaa gaa ataa canoco' soj man Diose, ne 'anj yanj soj rihaan Diose, ne chéé soj rihaan ya'anj acóy yuvij, qui'yaj nii, ne naá qui'yaj rma'an nii man soj, tiha' yu'unj nii man soj ei. Ne nij ya'anj yo' me se ne uno nij yo' nana a'mii soj a man adonj.

<sup>3</sup> Che'é dan xa' ní' sij noco' man Jesucristó nihánj me se ino 'yaj ní', ne che'é dan cataj xna'anj 'unj rihaan soj se vaa nda' se cataj yo' o so' se vaa quij ndo'o vaa Jesucristó, tzaj ne nuveé nana rqué Nimán Diose rihaan so' me nana a'mii so' a ma'. Tzaj ne sese cataj yo' o so' se vaa 'njij ra'a Jesucristó man ní', ne nana yo' me nana rqué Nimán Diose rihaan so', don a'vee a'mii so' danj adonj. Che'é se racuj Nimán Diose man ní', che'é dan guun nucuaj ní' ca'mii ní' danj ei.

<sup>4</sup> Dan me se ino vaa 'o 'o suun sa' rqué Nimán Diose man ní' nicaj 'o 'o ní' chuguanj. Tzaj ne orún' Nimán Diose me sí rqué man 'o 'o suun sa' yo' ei.

<sup>5</sup> Ne ino vaa 'o 'o suun 'yaj suun 'o 'o ní' rihaan tinúú ní' ei. Tzaj ne veé orún' sí 'njij ra'a man ní' me 'yaj nu' rasuun yo' ei.

<sup>6</sup> Ne ino vaa suun 'yaj suun Diose nimán 'o 'o ní', tzaj ne veé orún' Diose 'yaj nu' daj a rasuun sa' yo' ei. Ne Diose me sí 'yaj suun nimán 'o 'o ní', ne inanj ma'an so' 'yaj don a'vee qui'yaj suun ní' ei.

<sup>7</sup> Dan me se vaa suun sa' nicaj 'o 'o ní', 'yaj Nimán Diose, ne che'é dan ne'en ní' se vaa yanj Nimán Diose ga ní', ne che'é suun sa' nicaj ní' ro', cavij sa' doj nu' nij tinuj ní', qui'yaj ní' adonj.

<sup>8</sup> Dan me se yo' o tinúú ní' a'mii nana cuu, 'yaj Nimán Diose, ne avii ndo'o raq yo'ó tinúú ní', 'yaj uún ma'an Nimán Diose,

<sup>9</sup> ne yo'ó tinúú ní' me sí nucuaj ndo'o rá man Diose se vaa racuj ndo'o Diose man ní', ne inanj danj vaa rá so', 'yaj uún ma'an Nimán Diose, ne uun nucuaj yo'ó tinúú ní' tinahuun so' man sí ran', 'yaj uún ma'an Nimán Diose, tzaj ne veé orún' Nimán Diose 'yaj nanj adonj.

<sup>10</sup> Yo'ó tinúú ní' me sí uun nucuaj 'yaj suun sa' noco, ne yo'ó tinúú ní' uun nucuaj nata' nana rqué Diose rihaan, ne yo'ó tinúú ní' me sí uun nucuaj xcaj cuentá daj vaa nana a'mii 'o 'o ní', ne so' ro', me sí ne'en sese se-nana Nimán Diose a'mii ní' ní', ase se-nana sí chree a'mii ní' a. Dan me se ne'en so' nu' nana a. Ne vaa yo'ó tinúú ní' a'mii xna'anj naca xna'anj ne ne'en a ma'an nij so' ma'. Ne yo'ó tinúú ní' ro', me sí nata' daj ca'mii tinúú ní' sí a'mii xna'anj naca yo' a.

<sup>11</sup> Ne ma'an Nimán Diose me sí 'yaj uun nucuaj 'o 'o tinúú ní' qui'yaj suun tinúú ní' suun sa' nicaj so', ne orún' Nimán Diose me sí 'yaj suun nimán 'o 'o ní' nanj adonj. Ne'en Nimán Diose daj vaa 'o 'o ní', ne rqué so' rihaan 'o 'o



ní' se vaa me rá so' rque so' man ní', ne dan me se ndaa ino vaa se rque so' rihaan 'o 'o ní' a.

<sup>12</sup> Ne'en nij soj se vaa vaa orún' nee man ní', tzaj ne man que'ee rej 'yaj suun man ní' adonj. Man ra'a ní' do', man tacóo ní' do', man xrée ní' do', man rlij rihaan ní' do' a. Dan me se que'ee nee 'yaj suun man ní', tzaj ne orún' ní', ne ase vaa nee man orún' yuvij ro', danj vaa taran' ní' sij noco' man Jesucristó adonj. Dan me se 'o yuvij me ní' nanj ei.

<sup>13</sup> Dan me se canoco' cunudanj ní' man Jesucristó, ne cayáan Nimán Diose ga 'o 'o ní', ne che'é dan cata' ne ní', gaa ne cunuu rcua'aan taran' ní', ne che'é dan ase vaa nee man orún' yuvij ro', vaa taran' ní' cuano nanj chuguanj. Ino vaa ta'aj 'o 'o ní', ne veé dan me se ta'aj ní' me yuvij israelitá do', ta'aj ní' me yuvij yanij do', ta'aj ní' me mozó do', ta'aj ní' ne uun mozó me do', tzaj ne ase vaa nee man orún' yuvij ro', vaa taran' ní' cuano, ne yanj ndo'o Nimán Diose ga cunudanj ní' cuano ei.

<sup>14</sup> Ne'en soj se vaa ne 'o cyaan vaa cunudanj nee man yo'o yuvij ma'. Maan se ino vaa 'o 'o rej 'yaj suun man yuvij adonj.

<sup>15</sup> Dan me se ca'vee se guun rá tacóo ní' se vaa, che'é se na'vee qui'yaj suun yo' se-suun ra'a ní' ro', che'é dan naxuun yo' man ma'an yo' rihaan ní' cataj yo', tzaj ne se guun nucuaj yo' qui'yaj yo' danj ma'. 'O se nee man ma'an ní' me tacóo ní' nanj adonj.

<sup>16</sup> Ne ca'vee se guun rá xrée ní' se vaa, che'é se na'vee qui'yaj suun yo' se-suun rlij rihaan ní', ne che'é dan naxuun yo' man ma'an yo' rihaan ní', tzaj ne se guun nucuaj yo' qui'yaj yo' danj ma'. 'O se nee man ma'an ní' me xrée ní' nanj adonj.

<sup>17</sup> Ne vaa se uun nu' nee man ní' rihaan ní', ne sese inanj rlij rihaan ní' me nu' nee man ní', ne asa' ca'vee cunó ní', rá soj ga. Ne sese inanj xrée ní' me nu' nee man ní', ne asa' ca'vee naxuun ní' nana, rá soj ga.

<sup>18</sup> Diose me síi qui'yaj nu' nee man ní', ne Diose ro', me síi rque suun rihaan 'o 'o nee man ní' daj qui'yaj nij yo' ei.

<sup>19</sup> Sese cyaan gaa cunudanj nee man ní', ne nuveé yuvij me ní' ma'.

<sup>20</sup> Dan me se nda' se ino vaa 'o 'o nee man ní', tzaj ne ve'é vaa nu' nee man ní' ei.

<sup>21</sup> Ne nó xcúun rlij rihaan ní' cataj yo' rihaan ra'a ní': "Taj se uún so' rihanj ma'". Se guun tu'va yo' danj ma'. Ne ne nó xcúun ra'a ní' cataj yo' rihaan tacóo ní': "Taj se uún so' rihanj ma'". Se guun tu'va yo' danj ma'.

<sup>22</sup> 'O se nee man ní' nee ninaj doj ro', doj a achiin nee yo' man ní',

<sup>23</sup> ne nee man ní' nee nij doj ro', ve'é a doj niquee sa' yo', 'yaj ní', ne na'vej rá ní' quene'en yuvij man nee yo', ne che'é dan aráan ní' yatzij man nee yo' a.

<sup>24</sup> Tzaj ne nee man ní' nee ve'é doj ro', taj se qui'yá' caráan ní' yatzij man nee yo' ma'. Ne ve'é ndo'o vaa rcua'aan nu' nee man ní', qui'yaj Diose, ne ve'é doj qui'yaj so' che'é nee man ní' nee cunii doj,

<sup>25</sup> che'é rej na'vej rá so' gaa yanij nee yo' man ní' a. Maan se ve'é cutumé 'o nee man ní' man tuvi' nee man ní', rá Diose,

<sup>26</sup> ne sese quiran' chí'ij doj nee man ní', ne nana rá nu' nee man ní', ne danj inanj uún, ne sese ve'é cavij sa' doj nee man ní', ne guun niha' rá nu' nee man ní' uún a.

27 Yaj me se aj canoco' taran' soj man Jesucristó, ne che'é dan ase vaa nee man Jesucristó vaa cunudanj soj, ne ase vaa doj nee man Jesucristó vaa 'o 'o nij soj á.

28 Ne Diose ro', me sí cune' man 'o 'o soj qui'yaj suun soj che'é cunudanj nij sí noco' man Jesucristó, ne ino vaa suun ca'ne' Diose rihaan 'o 'o soj, ne dan me se asino cune' Diose man nuj sij apóstol nata' se-nana so' rihaan cunudanj nij yuvij man rihaan chumij, gaa ne cune' uún Diose man nij sí nata' nana rqué Diose rihaan nij so' a. Gaa ne cune' uún Diose man nij sí tucu'yón se-nana Diose rihaan yuvij, gaa ne cune' uún Diose man nij sí 'yaj suun sa' noco a. Gaa ne cune' uún Diose man nij sí uun nucuaj tinahuun man yuvij ran', ne cune' uún Diose man nij sí racuj man yuvij quiran' sayuun a. Ne cune' Diose man nij sí uun chij rihaan nij sí noco' man Jesucristó, ne cune' Diose man nij sí ne'en ca'mij xna'anj naca a.

29 Tzaj ne nuveé apóstol nata' se-nana Jesucristó rihaan cunudanj yuvij man rihaan chumij me taran' soj ma'. Nuveé sij nata' nana rqué Diose rihaan nij so' me cunudanj soj ma'. Nuveé sij tucu'yón se-nana Diose rihaan tinúú ní' me cunudanj soj ma'. Ne uun nucuaj cunudanj ní' qui'yaj suun ní' suun sa' noco ma'.

30 Ne uun nucuaj taran' soj tinahuun taran' soj man yuvij ran' ma'. Ne a'mii cunudanj soj xna'anj naca ma'. Ne uun nucuaj taran' soj cataj xna'anj soj me taj nana a'mii tinúú ní' gaa a'mii tinúú ní' xna'anj naca ma'.

31 'O se nano' soj daj qui'yaj soj, gaa ne ca'ne' Diose suun rihaan soj qui'yaj suun soj nij suun sa' doj á. Sese danj qui'yaj soj, ne cavij sa' taran' soj chuguanj. Tzaj ne me rá 'unj cataj 'unj yo'ó nana rihaan soj, ne me ya raj nari' soj yo'ó tucuáan sa' inanj ei.

## 13

### *Nana nihánj taj xna'anj se vaa no xcúun ní' cunu'u 'ee rá ní' man yuvij a*

1 Dan me se ca'vee se ca'mij xna'anj a'mii yuvij do', ca'vee se ca'mij xna'anj a'mii se-mozó Diose do', tzaj ne sese ne 'ee raj tuvij, ne se guun niha' rá yuvij cunó yuvij nana ca'mij ma'. Maan se tu'va rma'anj, cataj nij yuvij, ne ase uun gaa agüiin aga' do', ase uun gaa anó aga' do', ta'nga' danj vaa se-nanaj, cataj yuvij nanj á.

2 Ca'vee se ve'é ndo'o natá' 'unj nana rqué Diose manj do', ca'vee se ne'enj nu' nana tihaan Diose rihaan yuvij do', ca'vee se sa' uxrá avij raj do', ca'vee se amán uxrá raj ni'yaj 'unj man Diose do', ca'vee se guun nucuaj natunaj rej nicun' 'o quij xcaan che'é se amán uxrá raj ni'yaj 'unj man Diose do', tzaj ne sese ne 'ee raj tuvij, ne taj se uún 'unj gaa a ma'.

3 Ca'vee se rque uun 'unj cunudanj si'yaj rihaan nij sí nique do', ca'vee se rque 'unj ndaa nee man ma'anj do', tzaj ne sese ne 'ee raj man nij sí nique, ne se cavij sa' 'unj daj chihaa mij ma'.

4 Ne ra'yanj rá sí 'ee rá man tuvi' qui'yaj so' sayuun man tuvi' so' ma'. Tzaj ne vaa inaj nimán so', ne 'ee rá so' man tuvi' so', ne inanj ve'é 'yaj so' rihaan tuvi' so' á. Ne uun xcoj ruvaa rá sí 'ee rá man tuvi' ni'yaj so' tuvi' so' ma'. Ne a'mii xta' so' ma'. 'O se nica' vaa nimán so' a.

5 Sí 'ee rá man tuvi' ro', inanj ve'é 'yaj so' rihaan tuvi' so', ne ne aráya'anj so' inanj ma'an so' ma'. 'O se aráya'anj so' tuvi' so' a. Ne ra'yanj rá so' caxrij yuvaa so' ma'. Ne nuú rá so' sayuun qui'yaj yuvij man so' gaa rque ma'.

<sup>6</sup> Nuveé sji niha' rá ne'en man yuvij 'yaj cacun' me so' ma'. Tzaj ne niha' rá so' ne'en so' se vaa uno yuvij nana ya a.

<sup>7</sup> Uun nucuaj so' ran' so' naj guun sayuun, ne ne tanáj ma'an so' man tinúú so' ma'. 'Q se yo'q amán rá so' uno so' cunudanj nana sa', ne yo'q ne'en so' se vaa inanj sa' uxrá cavij ní' vaa güii, ne inanj danj vaa rá síí 'ee rá man tuvi' adonj.

<sup>8</sup> Xa' suun 'ee rá tuvi', tzaj ne yo'q gaa yo' nu' cavii nu' ca'anj ei. Cuanó nihánj me se man síí nata' nana rqué Diose rihaan nij so', tzaj ne vaa güii ca'ne' rá nij so' ga suun yo' ei. Ne cuanó nihánj me se man yuvij a'mii xna'ánj naca xna'ánj ne ne'en ma'an yuvij, tzaj ne vaa güii ca'ne' rá nij so' ga suun a'mii xna'ánj yo' a. Ne cuanó nihánj me se man síí avii ndo'o raa, 'yaj Nimán Diose, tzaj ne vaa güii se go' nij so' doj nana rihaan yuvij a ma'.

<sup>9</sup> Dan me se nu' nana sa' a'mii ní' do', nu' nana cuu avii raa ní' 'yaj Diose do', me se ta'aj guee nana me yo' nanj adonj. Tzaj ne vaa güii quinavj yo' nanj adonj.

<sup>10</sup> 'Q se güii quinanj ní' rihaan Diose me se Diose me síí qui'yaj yo'q quene'en ní' cunudanj nana, ne se cachiin a doj nana ca'mii ní' a ma'.

<sup>11</sup> Gaa mej xnii me se a'mii xnii 'unj, ne daj se uun rá xnii, danj uun raj, ne daj se nuchruj raa xnii, danj nuchruj raa 'unj a. Tzaj ne yaj cachij 'unj, guún 'unj snó'o nocoo, ne tanáj xco 'unj nu' se vaa qui'yáj gaa mej xnii a. Dan me se ase vaa se 'yaj inanj xnii ro', danj vaa 'yaj ní' cuanó, tzaj ne vaa güii tanáj xco ní' man nu' se vaa 'yaj ní' cuanó á.

<sup>12</sup> Vaa se ne'en ní' cuanó, rá ní', tzaj ne ne ne'en sa' ní' man yo' ma'. Dan me se ase vaa yuvij ni'yaj rihaan 'o se ni'yaj rihaan ro', danj vaa ní', ne sese ne naruvij rihaan se ni'yaj rihaan, ne se quene'en sa' yuvij rihaan yuvij ma'. Ne danj vaa ní' uún, ne man ndo'o rasuun ne ne'en sa' ní' ei. Tzaj ne vaa güii canicun' ní' rihaan ma'an Diose, ne sa' uxrá quene'en ní' man ma'an so' a. Cuanó nihánj me se ne ne'enj cunudanj, tzaj ne vaa güii, ne ase vaa ne'en Diose manj ro', danj gaa quene'enj man cunudanj adonj.

<sup>13</sup> Tzaj ne vaa va'nuj suun sa' nq xcúún ní' qui'yaj ní' cuanó, ne dan me se guun nucuaj rá ní' man Diose, ne guun ya rá ní' se vaa ya cavij sa' ní', ne gaa 'ee rá ní' tuvi' ní' a. Yo' me va'nuj se nq xcúún ní' qui'yaj ní', tzaj ne orún' suun gaa 'ee rá man tuvi' ro', yo' me suun nocoo doj rihaan cunudanj yo'ó suun ei.

## 14

### *Nana nihánj taj xna'anj che'é xna'ánj naca xna'ánj ne ne'en ma'an yuvij a*

<sup>1</sup> Che'é dan yo'q gaa suun 'ee rá man tuvi' nimán soj ei. Tzaj ne nana' soj daj qui'yaj soj, ne nicaj soj suun sa', qui'yaj Nimán Diose ei. Tzaj ne doj a guun rá soj nata' soj nana rqué Diose rihaan soj ei. 'Q se sa' doj vaa suun yo' chuguanj.

<sup>2</sup> Dan me se xa' síí a'mii xna'ánj naca, tzaj ne ne a'mii so' rihaan yuvij ma'. Rihaan Diose a'mii so', ne taj síí uno nana a'mii so' ma'. 'Q se racuj Nimán Diose man so' a'mii so' nana tihaan Diose rihaan ma'an so' adonj.

<sup>3</sup> Tzaj ne síí nata' nana rqué Diose rihaan, tzaj ne rihaan yuvij a'mii so', ne sa' doj xcaj nij yuvij cuentá daj qui'yaj nij yuvij canoco' nij yuvij man Diose, ne narj' nucuaj nimán nij yuvij, qui'yaj so', ne se nanó rá nij yuvij ma'. 'Q se guun niha' doj rá nij so' adonj.

4 Dan me se sí a'mii xna'ánj naca ro', orún' ma'an so' noco' sa' doj man Diose, 'yaj so', tzaj ne sí nata' nana rqué Diose rihaan me se sa' doj noco' cunudanj nij sí amán rá ni'yaj man Jesucristó man Diose, 'yaj so' adonj.

5 Me raj ca'mij taran' soj xna'ánj naca, tzaj ne sa' doj nata' soj nana rqué Diose rihaan soj ei. Dan me se sa' doj 'yaj sí nata' se-nana Diose rihaan sí a'mii xna'ánj naca, tzaj ne sese guun nucuaj sí a'mii xna'ánj naca cataj xna'anj so' rihaan nij yuvij me taj nana a'mii so' gaa uun che'e so' a'mii so' xna'ánj naca, ne sa' doj qui'yaj so', ne cavij sa' doj nij sí amán rá ni'yaj man Jesucristó, qui'yaj so', sese danj qui'yaj so' adonj.

6 Cuno soj ca'mij, tinuj, nocoj, ne dan me se sese cuchij 'unj rihaan soj, ne cuno soj sese inanj xna'ánj naca ca'mij rihaan soj, rá soj na'. Taj ma'. Me nana nari' soj, sese danj qui'yaj ga. Tzaj ne sese tiháan 'unj yo'o nana naca nana ca'mii Diose rihanj rihaan soj, ne cuno soj doj, ne sese cavij ndo'o raá 'unj do', sese nata' 'unj nana rqué Diose manj do', sese tucu'yonj rihaan soj do', ne cuno sa' soj doj ei.

7 Dan me se ne'en soj daj vaa ya'ánj, ne ne vaa i'na' ya'ánj, tzaj ne vaa che'é agüin sca' yo', ne sese ne tica'mii sca' nii man ya'aá nuu rihaan ya'ánj yo' gaa anicaj 'o 'o chra', gaa ne asa' ca'vee xcaj yuvij cuentá me chra' me achraá nii rihaan ya'ánj yo' ga.

8 Sese ne tunacaj nii se-nana chruun a'yánj yo' gaa a'yánj nii, gaa ne asa' ca'vee xcaj nij tanuu cuentá se vaa ca'anj nij so' cunu' nij so' ga.

9 Ne ase vaa ya'ánj do', chruun a'yánj do', ta'nga' danj vaa nij soj uún, ne sese ca'mij soj xna'ánj naca, ne sese se gaa nica nana ca'mij soj, ne asa' ca'vee cuno yuvij me taj soj ga. 'Q se se ca'mii soj rihaan yuvij a ma'. Maan rihaan nana uun ca'mij soj, raj a.

10 Dan me se man uxrá xna'ánj a'mii yuvij rihaan chumij nihánj, raj, ne vaa yuvij uno cunudanj nij xna'ánj yo',

11 tzaj ne sese ca'mii yo'o so' xna'ánj a'mii ma'an so' rihanj, ne sese se cunoj nana ca'mii so', gaa ne sij 'na' yo'ó chuman' guun so' rihanj, ne tananj 'unj, ne guún 'unj sij 'na' yo'ó chuman' rihaan so' a.

12 Che'é dan me xcaj soj cuentá daj qui'yaj ma'an soj uún, ne dan me se guun rá soj nicaj soj suun sa', qui'yaj Nimán Diose, tzaj ne nano' soj daj qui'yaj soj, ne ca'vee nicaj soj suun sa' doj suun racuj man cunudanj yo'ó nij sí amán rá ni'yaj man Jesucristó, qui'yaj Nimán Diose a. 'Q se cavij sa' soj doj, sese danj qui'yaj soj adonj.

13 Che'é dan me sese vaa yo'o tinúú soj sí a'mii xna'ánj naca, ne no xcúún so' cachinj ni'yaj so' rihaan Diose se vaa guun nucuaj so' cataj xna'anj so' me taj nana ca'mii so' rihaan nij yuvij cuno nana yo' adonj.

14 Tzaj ne sese ca'mij 'unj xna'ánj naca cachinj ni'yáa 'unj rihaan Diose, ne inanj maan nimán 'unj me cachinj ni'yaj rihaan Diose, ne cúú yavej, tzaj ne se cachín ni'yaj yo' rihaan Diose a ma'.

15 'Q se me se no xcúún 'unj qui'yaj ga. 'Q se no xcúún 'unj asino yaan cachinj ni'yaj rihaan Diose ga nimanj, gaa ne cachinj ni'yaj cúú yavej uún rihaan Diose, ne asino yaan cachraa 'unj chra' rihaan Diose ga nimanj, gaa ne nu' cúú yavej cachraa chra' uún rihaan Diose adonj.

16 Danj qui'yaj soj che'é se asa' nuu chre' soj cachinj ni'yaj soj rihaan Diose, ne 'na' nij sí ataa nari' sa' se-nana Diose a. Ne sese inanj nimán so' cachinj ni'yáa so' rihaan Diose do', sese inanj nimán so' nago' so' graciá rihaan Diose do', sese inanj nimán so' cataj se vaa sa' vaa Diose do', ne asa' ca'vee cuno

sí 'na' naca nana ca'mii so' ga. Asa' ca'vee cataj so' se vaa ya uxrá vaa nana ca'mii so' ga.

<sup>17</sup> Ca'vee se ve'é uxrá gaa nana cachinj ni'yáá so' rihaan Diose, tzaj ne yo'ó so' ro', se ca'vee guun niha' rá so', qui'yáá so' ma'.

<sup>18</sup> Nagó' 'unj gracia rihaan Diose che'é se xcaan vaa xna'ánj naca a'mij rihaan taran' nij soj, che'é se 'unj me sí ne'en doj xna'ánj naca rihaan taran' soj a.

<sup>19</sup> Tzaj ne gaa nuu chre' 'unj ga nij tinúú ní' nij sí amán rá ni'yaj man Jesucristó, ne no xcúnj ca'mij nana avii cúu yavej rihaan nij so', ne dan me se ca'vee se chi' mij nana xna'ánj naca ca'mij, tzaj ne se cavii sa' doj tinúj, qui'yaj nana yo' a ma'. Tzaj ne sese ca'mij nuj se 'un' guee nana cavii cúu yavej rihaan tinúú ní', tzaj ne cavii sa' nij so' doj, qui'yaj nana yo', che'é se nana uno nij so' me yo' ei.

<sup>20</sup> Gaa sca' raá nij soj, tinuj, nocoj. Se gaa raá soj ase vaa raá 'o xnii ma'. Dan me se ase vaa ne'ej ataa nari' qui'yaj cacun' ro', danj gaa soj, tzaj ne gaa sca' raá soj ei.

<sup>21</sup> Dan me se vaa nana no rihaan danj Diose taj se vaa: "Ca'nej 'unj yuvii man gan' cuchí' rihaan nij yuvii israelitá, ne yo'ó xna'ánj quinata' nij so' rihaan nij yuvii israelitá, tzaj ne se cuno nij yuvii israelitá nana ca'mij rihaan nij so' ma'." Danj cataj Diose rihaan nij yuvii israelitá gaa naá a.

<sup>22</sup> Dan me se xcaj ní' cuentá se vaa nuveé che'e ma'an ní' sij amán rá ni'yaj man Jesucristó vaa xna'ánj naca xna'ánj ne ne'en a 'ó yuvii yo' ma'. 'O se che'é nij sí ne amán rá ni'yaj man Jesucristó vaa xna'ánj naca yo', ne dan me se cuno nij so' xna'ánj naca, gaa ne xcaj nij so' cuentá se vaa nuveé sij noco' man Diose me ma'an nij so' a. Ne se-nana Diose nana nata' nii ro', nuveé che'e nij sí ne amán rá ni'yaj man Jesucristó vaa nana yo' ma'. 'O se che'é ní' sij amán rá ni'yaj man Jesucristó vaa nana yo' adonj.

<sup>23</sup> Dan me se sese inanj xna'ánj naca ca'mii taran' soj gaa nuu chre' soj, ne catuu nij sí ataa nari' sa' tucuaán noco' ní' catuu sí ne amán rá ni'yaj man Jesucristó catuu rá ve' ga nij soj, ne daj cataj nij so', rá soj ga. Se cuno nij so' xna'ánj ca'mii soj a ma'. Che'é dan: "Snúú rma'an nij soj", cataj nij so' nanj adonj.

<sup>24</sup> Tzaj ne sese nata' taran' soj nana rque Diose rihaan soj, ne catuu nij sí ataa nari' tucuaán noco' ní' catuu nij sí ne amán rá ni'yaj man Jesucristó catuu rá ve', gaa ne xcaj nij so' cuentá che'é cacun' tumé nij so', qui'yaj taran' soj, ne quinano rá nij so' che'é cacun' tumé nij so', qui'yaj taran' soj chuguanj.

<sup>25</sup> Cuno nij so' nana ca'mii taran' soj, gaa ne xcaj nij so' cuentá che'é nu' se chi'ij man nimán nij so', ne ca'anj canicun' ruj nij so', gaa ne na'vjj nij so' rihaan Diose, ne cataj ya nij so' se vaa ya Diose ne ga soj ei.

<sup>26</sup> Che'é dan nihánj me cataj xna'anj 'unj rihaan soj daj qui'yaj soj, tinuj, nocoj. Gaa nuu chre' soj, ne ino gaa se qui'yaj 'o 'o soj ei. Yo'ó tinúú soj cachraá 'o chra', ne tucu'yón yo'ó tinúú soj se-nana Diose rihaan soj, ne nata' yo'ó tinúú soj nana rque Diose rihaan so', ne ca'mii yo'ó tinúú soj xna'ánj naca, ne cataj xna'anj yo'ó tinúú soj me taj nana ca'mii tinúú soj sí ca'mii xna'ánj naca, ne inanj danj qui'yaj soj, racuj taran' soj man tinúú soj, gaa ne ve'é doj canoco' sa' soj man Jesucristó a.

<sup>27</sup> Sese vaa vjj va'nuj soj me rá ca'mii xna'ánj naca, ne ca'vee ca'mii nij so', tzaj ne sese que'ee soj doj me rá ca'mii, gaa ne se ca'vee ma'. 'O se djnj

tu'va ta'aj soj, gaa ne canicun' yo'ó tuvi' soj nata' so' me nana me ca'mii nij sí ca'mii xna'ánj naca yo' á.

28 Tzaj ne sese taj vaj a 'ó soj guun nucuaj nata' che'é nana ca'mii nij sí ca'mii xna'ánj naca, ne táa a se se ca'mii nij so' xna'ánj naca rihaan yuvi' a ma'. Maan se díj gaa tu'va nij so' gaa nuu chre' soj á. Inanj rihaan ma'an nij so' do', rihaan Diose do', ca'mii nij so' xna'ánj naca yo' á.

29 Dan me se veé danj qui'yaj guee soj asa' nata' soj se-nana Diose uún a. Nata' vij va'nuj tinúú soj, sí rqué Diose se-nana so' rihaan, ne nuchruj raa yo'ó tinúú soj nana nata' nij so', sese ya ya se-nana Nimán Diose me nana nata' nij so' a.

30 Sese nata' yo'ó so', ne sese guun rá yo'ó so' nata' so' yo'ó nana rqué Diose rihaan ma'an so', ne ca'ne' rá sí nicun' a'mii yo' ca'mii yo'ó tinúú so' á.

31 Veé dan me se gaa ya'núj rihaan taran' soj, ne ndaa yo'ó yo'ó soj nata' nana rqué Diose rihaan soj, ne nari' cunudanj soj nana achiin man soj, gaa ne nari' nucuaj nimán taran' soj a.

32 Sese uun nucuaj nij sí nata' nana rqué Diose rihaan nij so' quirij ta'nga' nij so' rihaan nimán ma'an nij so', ne uun nucuaj nij so' ca'ne' rá nij so' ga nana a'mii nij so' adonj.

33-34 Dan me se xa' Diose, tzaj ne nuveé sij tinachej rasuun me Diose ma'. 'Q se Diose ro', me sí 'yaj nica vaa nu' rasuun adonj.

Díj gaa tu'va chana gaa nuu chre' nij soj sij amán rá ni'yaj man Jesucristó á. Ne nó xcúun chana ca'mii chana ma'. Maan se danj nano xrej no' á. Inanj danj taj se-tucuanj Moisés, ne inanj danj vaa tucuaán nocó' cunudanj ni' sij sa' nocó' man Diose man daj a chuman' a.

35 Sese vaa 'o nana me rá chana nari' no', ne xna'anj no' man snó'o nica no' ve' tucua no', ne cataj xna'anj so' rihaan no' a. Tzaj ne nij vaa sese canicun' chana ca'mii no' rihaan cunudanj nij sí amán rá ni'yaj man Jesucristó gaa nuu chre' nij so' adonj.

36 Nuveé nana cavii raa nij soj me se-nana Diose ma'. Nuveé inanj soj me sí cuchi' se-nana Diose rihaan ma'. Che'é dan me xcaj soj cuentá daj vaa tucuaán nocó' núj sij amán rá ni'yaj man Jesucristó á.

37 Sese guun rá yo'ó so' se vaa ne'en so' nata' so' nana rqué Diose rihaan so' do', sese guun rá so' se vaa yanj Nimán Diose ga ma'an so' do', ne xcaj so' cuentá se vaa nana nihánj nana cachrón 'unj che'é soj ro', nana cataj xna'anj ma'an sí 'nij ra'a man ní' rihaan ní' me nana nihánj a.

38 Sese vaa yo'ó sí taj se vaa nuveé nana cataj xna'anj sí 'nij ra'a man ní' me nana nihánj, ne se cuchumán rá ní' se vaa sij nata' se-nana Diose me ma'an so' ma'.

39 Che'é dan me nano' uxrá soj daj qui'yaj soj, ne guun nucuaj soj nata' soj nana rqué Diose rihaan soj, tinuj. Ne se cataj soj se vaa se ca'vee ca'mii yuvi' xna'ánj naca mei.

40 Tzaj ne ve'é inanj qui'yaj soj nu' se vaa 'yaj soj, ne chij inanj qui'yaj soj nu' se-suun Diose ei.

## 15

*Nana nihánj taj xna'anj se vaa cunuu i'na' ya uún Jesucristó gaa cavi' so', ne danj gaa cunuu i'na' ya ma'an ní' uún a*

<sup>1</sup> Yaj me se me raj na'nuj rá soj nana cataj xna'anj 'unj rihaan soj, tinuj, nocoj. Dan me se nana sa' aj natá' 'unj rihaan soj asij rque me nana nihánj, ne cuno soj nana nihánj, ne raan noco' soj man nana nihánj a.

<sup>2</sup> Dan me se che'e nana nihánj nana natá' 'unj rihaan soj me quinaniij soj rihaan sayuun, sese yo'q raan canoco' soj nana nihánj ei. Tzaj ne sese tu'va rma'an soj do', sese ne ya noco' soj nana sa' nihánj do', ne se caviij sa' soj ma'. Maan se quiran' soj sayuun nanj adonj.

<sup>3</sup> 'Q se asino yaan nataj nana sa' narí' 'unj rihaan soj, ne nana cataj xna'anj nii rihanj me nana nihánj, se vaa cavi' Jesucristó che'é cacun' tumé ní', ndaa vaa taj danj Diose a.

<sup>4</sup> Dan me se cachin' nii man so' rque yo'óó, gaa ne dan me se cachén va'nuj güii, ne cunuu i'na' uún so', ne dan me se ase vaa tu'va guee danj Diose vaa quiran' so' a.

<sup>5</sup> Dan me se curuvi' so' ni'yaj síi cu'naj Pedró, ne gaa doj, gaa ne curuvi' uún so' ni'yaj nu' chuvij nij apóstol cune' so' man nata' se-nana so' a.

<sup>6</sup> Cachén doj güii, gaa ne curuvi' uún so' rihaan 'un' cientó táá doj tinúú ní' síi noco' man so' a. Dan me se ta'aj nij so' cavi', tzaj ne yo'ó ta'aj nij so' vaa i'na' cuano ga ní' a.

<sup>7</sup> Gaa ne cachén doj, gaa ne curuvi' uún Jesucristó ni'yaj síi cu'naj Santiagó, ne veé dan, gaa ne curuvi' uún so' ni'yaj cunudanj nij apóstol cune' so' man nata' se-nana so' a.

<sup>8</sup> Veé dan, gaa ne curuvi' uún so' ni'yaj ma'anj a. Síi noco' xcó taran' nij síi quene'en man so' mej, ne ase vaa 'q ne'ej ni'ya' vaa 'unj rihaan nij so' nanj ei. 'Q se ne nó xcúún 'unj guún 'unj apóstol rihaan nij so' a ma'.

<sup>9</sup> 'Q se gaa ataa canocoj man Jesucristó, ne qui'yaj ndo'oj sayuun man nij síi cuchumán rá ni'yaj man Jesucristó, ne che'é dan yaj mej síi noco' rihaan cunudanj nij apóstol cune' Jesucristó man nata' se-nana so' a. Che'é dan nuveé sij nq xcúún nata' rihaan yuvij che'é so' mej, raj a ma'.

<sup>10</sup> Tzaj ne sa' uxrá qui'yaj Diose che'ej, ne racuíj ma'an Diose manj, ne che'é dan mej apóstol cuano adonj. Nuveé se qui'yaj rma'an Diose danj manj ma'. 'Q se 'unj nihánj ro', me síi 'yaj suun doj rihaan cunudanj nij apóstol cune' Jesucristó man, tzaj ne nuveé ma'anj 'yaj suun ma'. 'Q se che'é se racuíj Diose manj ro', che'é dan 'yáj danj, ne ma'an Diose 'yaj danj adonj.

<sup>11</sup> Ne a'mii natáj 'unj a'mii natáj yo'ó nij apóstol cune' Jesucristó man a'mii natáj se-nana Diose nana sa', ne che'é se ca'mii natáj cunudanj núj rihaan soj, che'é dan cuchumán rá soj cuno soj nana sa' yo' ei.

<sup>12</sup> Dan me se ne'en soj se vaa a'mii natáj núj se vaa cunuu i'na' uún Jesucristó gaa cavi' so', ne che'é dan me che'é taj ta'aj yuvij 'nij sca'núj soj se vaa se ca'vee cunuu i'na' uún nij síi cavi' ga.

<sup>13</sup> Sese ya se ca'vee cunuu i'na' uún nij síi cavi', gaa ne me che'é cunuu i'na' uún Jesucristó, rá soj ga.

<sup>14</sup> Sese ya ne cunuu i'na' uún Jesucristó, gaa ne tu'va rma'an núj gaa a'mii natáj núj aj na'. Amán rma'an rá soj ni'yaj soj nana ne a'mii núj gaa aj na'.

<sup>15</sup> Aj cataj xna'anj núj rihaan soj se vaa cunuu i'na' uún Jesucristó, qui'yaj Diose, tzaj ne sese se ca'vee cunuu i'na' uún nij síi cavi', gaa ne ne cunuu i'na' uún Jesucristó vaa gaa na'. Síi ne me núj, ne ca'mii ne núj che'é ma'an Diose vaa gaa aj na'.

<sup>16</sup> 'Q se sese se ca'vee cunuu i'na' uún nij síi cavi', gaa ne ne cunuu i'na' uún Jesucristó vaa gaa a ma'.

17 Ne sese ya ne cunu'u i'na' uún Jesucristó, ne nana amán rá soj yo' ro', nana tiha' yu'unj me yo' vaa gaa asanj. Ne quiran' ma'an soj sayuun che'é nu' cacun' tumé soj,

18 ne nij sí cavi' sí cuchumán rá ni'yaj man Jesucristó me se cuchumán rma'an rá nij so', ne ca'anj nij so' rihaan ya'an vaa gaa nanj asanj.

19 Ne ní sij guun ya rá se vaa cavi' sa' ní qui'yaj Jesucristó me se doj a quij quiran' ní rihaan daj a nij yuvi' man rihaan chumi' nihánj vaa gaa asanj. Dan me se che'é se nana tiha' yu'unj noco' ní', gaa ne doj a quij quiran' ní' vaa gaa ei.

20 Tzaj ne, taj ma'. 'O se ya uxrá cunu'u i'na' uún Jesucristó gaa cavi' so' adonj. Che'é se cunu'u i'na' uún so' ro', che'é dan ne'en ya ní' se vaa cunu'u i'na' uún nij sí cavi' cuchumán rá ni'yaj man so' adonj.

21 Dan me se che'é se orún' snó'o me qui'yaj cavi' cunudanj yuvi' man rihaan chumi' ro', che'é dan orún' snó'o me qui'yaj cunu'u i'na' uún yuvi' adonj.

22 Dan me se che'é se vaa qui'yaj orún' sí cu'naj Adán ne cavi' taran' yuvi' ro', veé danj qui'yaj Jesucristó, ne che'é orún' so' ro', me cunu'u i'na' uún cunudanj yuvi' noco' man so' adonj.

23 Tzaj ne ndaa 'o 'o orá quisij 'o 'o rasuun adonj. Dan me se Jesucristó me sí cunu'u i'na' asino yaan rihaan cunudanj yuvi', gaa ne güii ca'na' uún so' rihaan chumi' nihánj ro', me se asino nij sí cuchumán rá ni'yaj man so' cunu'u i'na' uún ei. Dan me se quisij cunu'u i'na' taran' nij sí noco' man so',

24 gaa ne quinavij nu' chumi' nihánj a. Dan me se asino yaan ca'nee Jesucristó nu' suun ata' taran' nij yuvi' do', taran' nij ya'anj uun chij rihaan chumi' nihánj do', gaa ne nago' Jesucristó nu' chumi' nihánj rihaan Rej ní' Diose, gaa ne ma'an Diose guun chij rihaan chumi' nihánj adonj.

25 'O se no xcúun Jesucristó guun chij Jesucristó rihaan chumi' nihánj ndaa se qui'yaj canaán ya ya so' rihaan taran' nij sí taj ri'yunj man so' adonj.

26 'O se sí taj ri'yunj man Jesucristó me se 'yaj avi' yuvi', ne dan me se yo'o qui'yaj canaán Jesucristó rihaan se 'yaj avi' yuvi', gaa ne quisij quinavij cunudanj nij sí taj ri'yunj man Jesucristó ei.

27 Danj Diose taj se vaa qui'yaj canaán Jesucristó rihaan cunudanj rasuun, qui'yaj Diose a. Danj a'mü danj Diose, tzaj ne se guun chij Jesucristó rihaan ma'an Diose ma'. 'O se Diose me sí qui'yaj guun chij so' rihaan cunudanj yo'ó nij rasuun adonj.

28 Asa' guun chij Jesucristó rihaan nu' rasuun qui'yaj Diose, ne guun chij Diose rihaan ma'an Jesucristó, ne dan me se qui'yaj canaán Jesucristó rihaan cunudanj rasuun, qui'yaj Diose, gaa ne guun chij Diose rihaan ma'an so', gaa ne Diose me sí guun chij ndo'o rihaan cunudanj rasuun adonj.

29 Sese se cunu'u i'na' sí cavi', gaa ne me che'é ata' ne nii che'é 'o xngá, rá soj ga. Sese se cunu'u i'na' ya uún nij sí cavi', gaa ne ata' ne rma'an nii che'é sí cavi' a. Tzaj ne 'o se ya uxrá cunu'u i'na' uún nij sí cavi', rá nii ei.

30 Me che'é niganj vaj núj rihaan sayuun che'é se-nana Diose, rá soj ga.

31 Ya inanj danj vaj núj rihaan sayuun, tinuj, nocoj. Ne'en soj se vaa niha' ndo'o rá núj che'é suun 'yaj suun núj sca'núj soj che'é sí 'nij ra'a man ní', ne dan me se ya taj xna'anj 'unj rihaan soj se vaa maan na'vij núj 'o 'o güii cavi' núj che'é se-nana Diose ei.

32 Quiran' ndo'oj sayuun chuman' Efeso, ne dan me se ase vaa sayuun ran' sí unu' ga xcuu yuvaá ro', ta'nga' danj vaa sayuun quiranj, ne me che'é



qui'yáj danj, rá soj, sese yuun che'e cavij ga. 'O se qui'yaj suun uun 'unj vaa gaa nanj ei. Sese ya uxrá se cunuu i'na' uún nij sí cavi', gaa ne doj a ve'é sese canoco' ní' nana a'mii yuvij man rihaan chumij nihánj chuguanj. Dan me se yuvij man rihaan chumij nihánj taj: "Daj doj quisij güii cavi' ní' á. Che'e dan cha ní' chraa do', co'lo ní' tzi' do', yaj gaa vaa i'na' ní' á", taj nij yuvij man rihaan chumij nihánj yuvij ne guun ya rá se vaa cunuu i'na' uún ní' a. Tzaj ne ne 'yaj núj danj ma'. 'O se ne'en ya núj se vaa cunuu i'na' ya uún nij sí cavi' adonj.

<sup>33</sup> Ca'ne' rá soj ga suun tiha' yu'unj man ma'an ei. Nda' se sa' vaa nimán soj, tzaj ne sese cachee soj ga sí chi'ii, ne nuu chi'ii nimán soj, qui'yaj nij so' ei.

<sup>34</sup> No xcúún soj xcaj naca soj cuentá, ne ca'ne' rá soj ga suun 'yaj cacun' ei. 'O se ta'aj soj me sí ne ne'en uxrá daj vaa Diose, raj a ma'. 'O se vaa che'e guun na'aj soj chuguanj.

*Nana nihánj taj xna'anj daj quiran' ní' güii cunuu i'na' uún ní' a*

<sup>35</sup> Tzaj ne vaa yuvij cataj: "Asa' ca'vee cunuu i'na' uún nij sí cavi' ga. Daj gaa nee man nij so' asa' cunuu i'na' uún nij so' ga", taj nij yuvij, xná'anj nij yuvij a.

<sup>36</sup> Tzaj ne sí ni'yon mé so', sese danj a'mii so' chuguanj. Ne'éen so' daj ran' 'núu unó so' ei. Asino yaan uchruu 'núu yo' rque yo'óo, gaa ne xtun' ma'an 'núu yo', gaa ne xra' naa le'ej man 'núu yo' a. Sese se cuchruu 'núu yo' rque yo'óo, ne daj chihaa mij se xra' naa ma'. 'O se ase vaa ran' 'núu gaa unó nii man yo' rque yo'óo ro', danj gaa quiran' ní' adonj.

<sup>37</sup> Ne sese cunó so' yo'lo caân 'núu trigó do', naj guun caân do', rque yo'óo, ne nuveé ma'an coj me se caxrj so' rque yo'óo ma'. Maan se caân me yo', tzaj ne síj xra' yo', gaa ne nahuun yo' coj adonj.

<sup>38</sup> Tzaj ne ino vaa coj xra' man 'o 'o caân, ne ase vaa me rá Diose gaa 'o 'o coj ro', ta'nga' danj vaa 'o 'o coj xra', 'yaj Diose adonj.

<sup>39</sup> Ne ne 'o cuyaan vaa nu' nee ma'. 'O se ca'vee se nee man yuvij do', ca'vee se nee man xcuu do', ca'vee se nee man xtâj do', ca'vee se nee man xcuj do', tzaj ne ino vaa a'ngaa 'o 'o nij nee yo' adonj.

<sup>40</sup> Ne man rasuun rej xta', ne man rasuun rihaan yo'óo, ne ino doj vaa rasuun man rej xta' ga rasuun man rihaan yo'óo nihánj, tzaj ne ve'é uxrá vaa cunudanj nij rasuun yo' ei.

<sup>41</sup> Dan me se ve'é vaa güii do', ve'é vaa yavii do', ve'é vaa yati' do', tzaj ne ino vaa ruvi' 'o 'o nij rasuun yo' gaa ni'ya' man nij yo', ne veé danj ino vaa 'o 'o nij yati' uún chuguanj.

<sup>42</sup> Dan me se ase vaa ino vaa 'o 'o nij rasuun yo' ro', vaa 'o 'o ní' uún chuguanj. Ne nee man ní' asa' quisij cunuu i'na' uún ní' me se ino gaa nee yo' ga nee man ní' cuano chuguanj. Ne nee man ní' cuano, tzaj ne daj doj cavi' yo', ne vaa güii cavi' ní', gaa ne cachin' nii man nee man ní' rque yo'óo, gaa ne cunuu ino yo' ei. Tzaj ne asa' cunuu i'na' uún ní', gaa ne daj chihaa mij se cavi' uún nee man ní' a ma'.

<sup>43</sup> Xa' nee man ní' cuano, tzaj ne nij vaa yo', tzaj ne asa' cunuu i'na' uún ní', ne inanj ve'é ndo'o gaa nee man ní' asa' cunuu i'na' uún ní' ei. Tzaj ne cuano se taj se 'ya' guun nucuaj yo' ma'. Tzaj ne asa' cunuu i'na' uún ní', ne gaa nucuaj ndo'o nee man ní' adonj.

<sup>44</sup> Nee man uun rihaan chumij nihánj cuano me ní', tzaj ne asa' cunuu i'na' uún ní', ne nee yo'lo canoco' sa' man Diose guun nee man ní' adonj. Dan me se

sese ne'en ní' se vaa yá vaa nee man ní' cuano, ne veé danj ya uxrá gaa yo'ó nee sa' man ní', qui'yaj Diose ei. Ne nee yo' me yo'ó canoco' sa' man Diose chuguanj.

45 Ne danj Diose taj se vaa snó'o qui'yaj Diose asino yaan me síí cu'naj Adán, ne gaa tihaj qui'yaj Diose man so' me se ca'née Diose nana vaa i'na' rque nee man so' a, taj danj Diose a. Dan me se ase vaa síí cu'naj Adán ro', danj vaa síí cu'naj Jesucristó, tzaj ne ino doj vaa Jesucristó, ne dan me se gaa cunuu i'na' uún Jesucristó, ne cunuu ino un' nee man so', ne dan me se 'vee vaa i'na' ndaa ma'an ní', 'yaj so' a. Ne che'é dan cunuu i'na' uún taran' ní' chuguanj.

46 Tzaj ne asino yaan vaa nee man ní' gaa mán ní' rihaan chumií nihánj, gaa ne vaa güii, gaa ne ma'an ní' nicaj nee sa' doj yo' a.

47 Xa' snó'o qui'yaj Diose asino yaan, tzaj ne yo'óo un guun so' a. Dan me se nicaj Diose yo'óo man rihaan chumií nihánj, qui'yaj Diose man so', tzaj ne xa' yo'ó snó'o, tzaj ne Jesucristó me so', ne so' me síí cavii rej xta' ca'na' rihaan ní' adonj.

48 Ne ase vaa síí cu'naj Adán síí guun yo'óo ro', ta'nga' danj vaa cunudanj yuvij man rihaan chumií nihánj, tzaj ne ase vaa Jesucristó síí cavii rej xta' ro', ta'nga' danj vaa cunudanj yuvij yanj rej xta' nanj á.

49 Gaa mán ní' rihaan chumií nihánj me se ase vaa Adán síí guun yo'óo ro', danj vaa ma'an ní', tzaj ne vaa güii, ne ase vaa Jesucristó síí cavii rej xta' ro', ta'nga' danj gaa ní' adonj.

50 Cuanó nihánj me se cataj xna'anj 'unj rihaan nij soj se vaa se guun nucaj nee man ní' do', ton man ní' do', cúu man ní' do', cayáan yo' ga Diose asa' guun chij Diose rihaan chumií nihánj, man tinuj, man nocoj. 'Q se se guun cuman rasuun cuchruu ga rasuun ne uchruu mei.

51 Tzaj ne cataj xna'anj 'unj rihaan nij soj yo'ó nana yuve tihaan naca Diose rihanj, se vaa se cavi' taran' ní' ma'. 'Q se vaa güii, ne rque orún' orá le'ej nii yuun che'e cunuu ino taran' ní',

52 ne dan me se daj se uun rá' gaa nanij doj yuvé scu'lu' rihan' ro', danj guun un doj rá' asa' quisij orá cunuu ino ní' nanj adonj. Dan me se güii quinaavij chumií nihánj me se nu' ca'yanj se-mozó Diose chruun a'yánj, ne cunuu ino taran' ní' nanj adonj. 'Q se asa' ca'yánj so' chruun a'yánj, ne cunuu i'na' nu' nij síí cavi', tzaj ne ino gaa nij so', ne se cavi' uún nij so' daj chihaa mij gaa a ma'. Dan me se quisij cunuu i'na' nij síí cavi', gaa ne cunuu ino taran' ní' sij gaa i'na' rihaan chumií nihánj adonj.

53 Sese ase vaa ní' cuano nihánj ro', danj gaa ní' ca'anj ní' rihaan Diose, rá ní', gaa ne se ca'vee daj chihaa mij ma'. 'Q se vaa che'é asino cunuu sa' nee man ní', gaa ne ca'vee quinán' ní' rihaan Diose adonj. Dan me se che'é se nichrun' cavi' nee man ní', che'é dan vaa che'é cunuu sa' yo', ne daj chihaa mij se cavi' yo' gaa a ma'.

54 Dan me se asa' nanó nee se cavi' uún xráá ní', gaa ne daj chihaa mij se cavi' nee man ní' a ma'. 'Q se güii dan ro', quisij ya nu' nana nihánj nana no rihaan danj Diose nana taj: "Sa' uxrá qui'yaj canaán ní', ne daj chihaa mij se cavi' ní' a ma'. 'Q se quisij ní' qui'yaj canaán ní' rihaan ta'naj 'yaj avi' yuvij adonj.

55 Me rej vaj ta'naj 'yaj avi' yuvij ga. Me rej vaj se nucaj so' ga. Yaj me se se nanó rá ní' se vaa quirán' uún ní' sayuun ma'. 'Q se daj chihaa mij se cavi' ní' ma'. 'Q qui'yaj canaán ya ní' adonj", taj danj Diose, ne quisij ya nu' nana yo' adonj.

<sup>56</sup> Se nucuaj ta'naj 'yaj avi' ní' ro', me cacun' tumé ní' adonj. Ne che'é se-tucuaj Moisés qui'yaj ní' cacun',

<sup>57</sup> tzaj ne tinavij Jesucristó sij 'nij ra'a man ní' cacun' tumé ní', ne dan me se ya qui'yaj canaán ní', qui'yaj Diose, ne che'é dan no xcúun ní' nago' ní' graciá rihaan Diose ei.

<sup>58</sup> Ne'en soj se vaa 'ee raj man soj, tinuj, nojoj. Che'é se vaa cataj 'unj rihaan soj ro', che'é dan raan canocq' soj man Jesucristó á. Se ca'ne' rá soj ma'. 'Q se niganj qui'yaj suun ndo'o soj che'é sí 'nij ra'a man ní' á. Ne'en soj se vaa suun 'yaj suun soj che'é sí 'nij ra'a man ní' ro', nuveé suun snúu rma'an me yo' ma'. 'Q se cavii sa' soj che'é se nocq' sa' soj man so' adonj.

## 16

*Nana nihánj taj xna'anj che'é sa'anj naqui'yaj chre' nij sí man chuman' cu'naj Corinto rque nij so' man nij sí nique man chuman' cu'naj Jerusalén a*

<sup>1</sup> Cataj xna'anj 'unj rihaan nij soj che'é sa'anj naqui'yaj chre' soj rque soj man nij sí nique sí sa' nocq' man Diose á. Dan me se qui'yaj soj ndaa se vaa cataj xna'anj 'unj rihaan nij sí amán rá ni'yaj man Jesucristó yanj estadó Galacia,

<sup>2</sup> ne rque 'o 'o cotungó ro', ca'nej sa' soj doj sa'anj tucua' soj che'é nij sí nique á. Sese nocqo doj qui'yaj canaán yo'o soj, ne nocqo doj ca'nej sa' soj, ne sese doj doj qui'yaj canaán yo'ó soj, ne doj doj ca'nej sa' soj á. Ve'é cütumé soj sa'anj yo' ndaa se cuchí' 'unj chiháán soj á. 'Q se na'vej raj naqui'yaj chre' soj sa'anj ndaa güii cuchí' 'unj ma'. 'Q se güii yo' aj naqui'yaj chre' soj sa'anj, raj ei.

<sup>3</sup> Asa' cuchí' 'unj rihaan soj, ne go' soj sa'anj naqui'yaj chre' soj man tinúu soj sí me rá soj nıcaj sa'anj yo' a. Ne tinúu soj sí nıcaj sa'anj yo' ro', ca'anj nıcaj nij so' sa'anj yo' ndaa chuman' Jerusalén a. Ne me raj nıcaj nij so' yanj cartá ca'anj nij so', ne yanj cartá yo' ro', cataj xna'anj yo' rihaan nij sí man Jerusalén se vaa vaj sa'anj yo' rihaan nij so', 'yaj nij tinúu ní' a.

<sup>4</sup> Sese vaa che'é ca'anj ma'anj chuman' Jerusalén, ne nıcaj tuvi' núj ca'anj nıj a.

*Nana nihánj taj xna'anj me güii cuchí' Pabló chuman' cu'naj Corinto a*

<sup>5</sup> Cachen 'unj estadó Macedonia, gaa ne cuchí' 'unj chiháán soj a. Se guun raan 'unj estadó Macedonia ma'.

<sup>6</sup> 'Q se xraj, ne carán' 'unj chiháán soj que'ee güii, tzaj ne ne ne'enj sese canej ga soj nu' yavii ayuu yu've' man adonj. 'Q se veé maan chiháán soj me raj cavii 'unj ca'anj 'unj adonj.

<sup>7</sup> Na'vej raj cachen ra'yanj uún 'unj chiháán soj ma'. 'Q se me raj guun raan 'unj que'ee güii, sese ca'vej sí 'nij ra'a man ní' danj gaa adonj.

<sup>8</sup> Tzaj ne me raj cunuú 'unj chuman' Efeso nihánj ndaa se cachen ya cha'anj Pentecostés adonj.

<sup>9</sup> 'Q se vaa ndo'o rej rihanj qui'yaj sunj se-suun Diose, tzaj ne 'o se man ndo'o sí taj ri'yunj man ní' chuman' yo' ei.

*Nana nihánj taj xna'anj che'é nij tinúu Pabló sí canoco' man Jesucristó a*

<sup>10</sup> Tzaj ne sese cuchí' sí cu'naj Timoteo rihaan soj, ne ve'é ca'mii soj ga so', gaa ne guun niha' rá so' ga soj ei. 'Q se 'yaj suun so' che'é sí 'nij ra'a man ní', ne ase vaa 'yaj sunj ro', ta'nga' danj vaa 'yaj suun ma'an so' che'é sí 'nij ra'a man ní' adonj.

11 Se nachri' soj ni'yaj soj man so' ma'. Maan se dinj cuman soj ga so', ne ve'e racuj soj man so' yan ca'na' uun so' rihanj nihanj a. Na'vuj uxraj ca'na' uun so' ga yo'o nij tinuu ni' adonj.

12 Ne tinuu ni' sii cu'naj Apolos me se cataj xna'anj ndo'oj rihaan so' se vaa cuch'i' so' ga yo'o nij tinuu ni' rihaan soj, tzaj ne ne ca'vej so' cuch'i' so' cuano mei. Tzaj ne ndaa guii quix'nuj rihaan so' asuun, gaa ne cuch'i' so' rihaan soj a.

13 Tume soj man soj a. Raan canoco' soj man Jesucristo a. Gaa nucuaj niman soj, ne 'o ca'nej niman soj qui'yaj suun soj a.

14 Ne gaa 'yaj suun soj nu' suun vaa rihaan soj, ne uxra gaa 'ee ra soj man tinuu soj a.

15-16 Ne'en nij soj man nij tucua tinuu ni' sii cu'naj Estefanas se vaa nij so' me sii cuchuman ra ni'yaj man Jesucristo asino yaan rihaan cunudanj nij yuvij man estadó Acaya a. Ne ca'neé niman ma'an nij so' qui'yaj suun nij so' racuj nij so' man nij sii sa' noco' man Diose a. Cuano nihanj me se cataj xna'anj 'unj rihaan soj se vaa ve'e cunq soj rihaan cunudanj yuvij 'yaj suun ndaa vaa 'yaj suun nij so', tinuj, nocoj. Ne cunq uun soj rihaan cunudanj nij sii a'neé ndo'o niman qui'yaj suun ga nij so' ei.

17 Guun niha' ndo'o raj se vaa ca'na' ma'an sii cu'naj Estefanas do', sii cu'naj Fortunato do', sii cu'naj Acaico do', ei. Dan me se guun niha' uxra raj gaa ca'na' va'nuj nij sii nihanj rej nej, ne gaa quene'enj man nij so', ne ndaa ma'an ya soj quene'enj nda' ra se 'yaa raj nanj ei. 'O se nayon nij so' rihaan soj ei.

18 Dan me se nuu cujj nimanj, qui'yaj nij so', ne dan me se nuu cujj niman ma'an soj, qui'yaj uun nij so' a. 'O se nij yuvij vaa danj me se no xcuun ya soj caraa cochroj soj rihaan nij so' nanj adonj.

*Nana nihanj taj xna'anj che'e saludó a'neé nij sii aman ra ni'yaj man Jesucristo a'neé ma'an Pablo a'neé a*

19 Cunudanj nij sii aman ra ni'yaj man Jesucristo man estadó Asia a'neé saludó rihaan soj, ga sii cu'naj Aquila do', chana cu'naj Priscila do', taran' nij sii aman ra nuu chre' tucua roj so' do', a'neé ndo'o saludó rihaan soj a.

20 Dan me se cunudanj nij tinuu ni' a'neé saludó rihaan nij soj ei. Gaa nari' tuvi' soj, ne ve'e ndo'o ca'mij soj ga tinuu soj, ne go' soj 'o xto guee rihaan tinuu soj asa' nari' tuvi' soj ei.

21 A'neé ma'anj saludó do' rihaan soj uun ei. Nihanj me nana cachron ma'anj ra'aj ya rihaan yanj nihanj adonj.

22 Sese vaa yo'o tuvi' soj ne aman ra ni'yaj man sii 'nij ra'a man ni', ne quene'en soj se vaa ya quiran' sii vaa danj sayuun nanj chuguanj. Ya ca'na' uun sii 'nij ra'a man ni' ei.

23 Me ra 'unj qui'yaj ndo'o Jesucristo sij 'nij ra'a man ni' se luj che'e soj ei.

24 Ne se sa' 'ee ra yuvij nuu nimanj 'yaj Jesucristo me se a'nej rihaan soj cunuú niman soj ei.

## Nihánj me síj vij yanj cartá qui'yaj síi cu'naj Pabló ca'néé so' rihaan nij yuvij nocó' man Diose yanj chuman' cu'naj Corinto a

<sup>1</sup> 'Uñj me síi cu'naj Pabló sij apóstol cune' Jesucristó man nata' se-nānā so' rihaan yuvij, ndaa vaa me rá ma'an Diöse qui'yáj a. Yanj tinú' Timoteo gaj, ne 'yaj núj yanj nihánj ca'nej núj rihaan soj sij nocó' man Diöse yanj chuman' cu'naj Corinto, ne ca'nej núj yanj nihánj rihaan cunudanj yo'ó nij soj sij sa' nocó' man Diöse yanj nu' estadó cu'naj Acaya uún a.

<sup>2</sup> Dan me se me rá núj qui'yaj ndo'o Rej ní' Diöse do', Jesucristó sij 'nij ra'a man ní' do', se luǵ che'é nij soj, ne me rá núj gaa xej nimán soj qui'yaj roj so' a.

*Nanā nihánj taj xna'anj se vaa quiran' ndo'o nij tuvi' Pabló sayuun, tzaj ne tinanii Diöse man nij so' rihaan sayuun yo' a*

<sup>3</sup> Ve'é ndo'o vaa Diöse ei. Se-Diose Jesucristó sij 'nij ra'a man ní' me Diöse, ne Rej Jesucristó me uún Diöse chuguanj. Ne so' me síi 'ee ndo'o rá man yuvij, ne so' me síi racuǵ ndo'o nanā sa' nimán yuvij chuguanj.

<sup>4</sup> Ca'vee se me ma'an sayuun ran' núj, tzaj ne Diöse ro', me síi narqué ndo'o chrej nucuaj man núj, ne che'é dan guun nucuaj núj nago' núj chrej nucuaj man tinúú núj güii quiran' tinúú núj sayuun uún chuguanj. Che'é dan asa' ran' tinúú núj sayuun, ne ca'vee nago' núj chrej nucuaj man tinúú núj chrej narqué ma'an Diöse man núj nago' núj man tinúú núj chuguanj.

<sup>5</sup> Dan me se nda' rá se vaa quiran' uxrá Jesucristó sayuun ro', danj vaa 'na' uxrá sayuun xráá núj, ne che'é dan cunuu 'ee uxrá rá Jesucristó man núj che'é sayuun ran' núj ei. Che'é dan nari' nucuaj rá núj che'é Jesucristó, 'yaj Diöse a.

<sup>6</sup> 'Q se sese ran' núj sayuun, ne che'é yan nari' nucuaj nimán soj do', che'é yan nanij soj rihaan cacun' tumé soj do', me ran' núj sayuun adonj. Dan me se sese Diöse rqué se nucuaj nuu nimán núj, ne veé danj gaa guee cunuú se nucuaj nimán soj asa' quiran' soj sayuun se vaa ran' núj adonj.

<sup>7</sup> Dan me se yo'ó guun ya rá núj ni'yaj núj man soj che'é se vaa ran' soj ei. 'Q se nda' rá se vaa 'na' sayuun xráá soj ro', veé danj vaa a'néé Diöse se nucuaj nimán soj uún chuguanj. Ase vaa ran' núj sayuun ro', danj vaa ran' guee soj sayuun, ne ase vaa nari' nucuaj rá núj 'yaj Diöse ro', danj vaa nari' nucuaj rá soj 'yaj uún Diöse a.

<sup>8</sup> Me rá núj na'nuj rá soj se vaa quiran' núj sayuun estadó Asia, tinuj, nocoj. Ne me rá núj quene'en soj se vaa uxrá quiran' ya núj sayuun, ne daj doj se cavi' ya núj ei.

<sup>9</sup> Dan me se 'o sayuun nocóo ya ya me yo', ne nuveé sayuun guun nucuaj yá' me sayuun yo' a ma'. 'Q se ne gaa ya ya rá núj gaa i'na' núj a ma'. 'Q se ca'néé nimán núj quinaj nimán núj rej yo' nanj adonj. Nda' rá se vaa síi nata' se-cacun' cavi' ro', danj vaa guun rá núj nanj adonj. Tzaj ne 'o se cunaj uxrá quiran' núj danj, gaa ne yuun che'e, gaa ne se gaa nucuaj rá núj man ma'an núj ma'. 'Q se vaa che'é gaa nucuaj ya rá núj man Diöse síi naquiyaj i'na' man yuvij cavi' nanj adonj.

10 Dan me se daj doj se cavi' núj, tzaj ne Diose me sí tinanii man núj rihaan sayuun yo', ne so' me sí tinanii man núj rihaan sayuun quiran' núj rej rihaan, ne nucuaj rá núj man so', ne ya ya tinanii so' man núj rihaan sayuun,

11 che'é se racuíj ndo'o soj man núj achíin ni'yaj soj rihaan Diose che'é núj ei. Dan me se cuno Diose se vaa achíin ni'yaj que'ee yuvii rihaan so' che'é núj, ne qui'yaj so' se luj che'é núj tinanii so' man núj rihaan sayuun ei. Ne nago' que'ee ni' graciá rihaan Diose che'é se vaa tinanii so' man núj rihaan sayuun ei.

*Nana nihánj taj xna'anj me che'é ne cuchí' Pabló chuman' cu'naj Corinto a*

12 Ne'en núj se vaa quinanii núj rihaan sayuun, ne niha' ndo'o rá núj, che'é se ne'en núj se vaa nuvi' cacun' tumé núj a. 'O se ve'é qui'yaj núj ga soj gaa chéé núj rihaan chumii nihánj, ne ne tiha' yu'unj núj man soj ma'. Maan se cuno núj rihaan Diose, ne ca'mii chij núj rihaan soj, ne ne qui'yaj núj inanj se vaa cavii raá ma'an núj ma'. 'O se ma'an Diose racuíj man núj, ne qui'yaj núj inanj se vaa me rá Diose qui'yaj núj nanj adonj.

13-14 Dan me se taj vaj nana nachran' cachrón núj nayaa soj ma'. Inanj nana guun nucuaj soj nayaa soj do', inanj nana guun nucuaj soj cuno soj do', me nana cachrón núj nayaa soj nanj adonj. Cuanó ro', aj nari' soj ta'aj nana cataj xna'anj núj rihaan soj, ne me rá núj nari' guée soj nu' nana yo' ei. Danj me rá núj, che'é yan guun niha' rá núj che'é soj güii ca'na' uún Jesucristó sij 'njj ra'a man ni' rihaan chumii nihánj, ne veé danj guun niha' rá soj che'é núj uún ei.

15 Che'é se guun ya raj se vaa cavii sa' taran' ní' vaa güii, che'é dan guun raj ca'anj 'unj chiháán soj, gaa ne quisij vij ca'anj ni'yaj 'unj man soj, che'é se me raj guun niha' rá soj doj, raj a.

16 Dan me se gaa vaj 'unj ca'anj 'unj estadó Macedonia, ne guun raj caranj chiháán soj gaa cachén 'unj chrej ca'anj 'unj estadó yo' ei. Dan me se guun raj caranj chiháán soj rej ca'anj 'unj ne rej 'na' niquej uún ei. Danj guun raj qui'yaj che'é se guun raj racuíj soj manj ca'anj 'unj estadó Judea ei. Tzaj ne ne caranj chiháán soj gaa ca'naj nihánj a mei.

17 Me che'é me ne carán' 'unj chiháán soj, rá soj ga. Guun vij rá 'unj gaa cataj 'unj se vaa guun rá 'unj carán' 'unj chiháán soj, rá soj na'. Gaa nuchruj raá 'unj daj qui'yaj, ne naj guun nana avii raá 'unj ca'mii 'unj, rá soj na'. 'O cuyaán vaa nana ya ga nana ne rihanj, rá soj na'.

18 Taj ma'. 'O se Diose me testigó se vaa ya uxrá vaa nu' nana a'mii núj rihaan soj ei. Xa' núj, tzaj ne ne a'mii rma'an núj nana rihaan soj ma'.

19 'O se a'mii natáj ma'anj ga sí cu'naj Silvano do', sí cu'naj Timoteo do', rihaan soj che'é ta'nii Diose sí cu'naj Jesucristó, ne ne tinachej núj nana ne ga nana ya gaa a'mii natáj núj rihaan soj ma'. Tananj inanj nana ya me nana a'mii núj rihaan soj, che'é se quene'en núj se vaa ya uxrá vaa nu' se-nana Jesucristó nana sa' chuguanj.

20 Cunudanj nij nana cata' tu'va Diose che'é ní' ro', ni'yaj ní' man Jesucristó ne xcaj ní' cuentá se vaa ya vaa nu' nana yo' chuguanj. Ne che'é se sij noco' man Jesucristó me ní', che'é dan taj ní' "Veé danj gaa ya ei", taj ní' rihaan Diose, ne sa' doj xcaj yuvii cuentá se vaa ve'é ndo'o 'yaj Diose á.

21 Diose me sí racuíj man núj noco' sa' núj man Jesucristó ga soj, ne so' me sí cune' man núj qui'yaj suun núj rihaan so' a.

22 Ne so' me sí cataj se vaa ya ya ta'nij so' me ní', ne ca'néé so' Nimán so' cayáán nimán ní', ne che'é dan guun ya rá ní' se vaa ya rque so' se sa' man ní', vaa güii adonj.

23 Tzaj ne sese ne cuchij rej man soj, ne me raj quene'en Diose nimanj, se vaa ya vaa nana a'mij rihaan soj cuano nihánj, ne che'é se ne ca'vej ya raj qui'yáj sayuun man soj, che'é dan ne cuchij chuman' Corinto adonj.

24 'Q se ne me rá nú quiri ta'nga' nú rihaan soj daj qui'yáj soj canoco' soj man Jesucristó ma'. 'Q se sí 'yaj suun ga soj yan cavii sa' soj ne guun niha' rá soj me núj, ne aj nari' sa' soj canoco' ma'an soj man Jesucristó nanj adonj.

## 2

1 Maan che'é se guun raj yo'o gaa niha' nimán soj ro', che'é dan ne cuchij rej man soj nanj adonj.

2 Sese nanao rá soj qui'yáj, gaa ne me sí qui'yaj guun niha' raj ga. 'Q se soj me sí naqui'yaj niha' nimanj adonj. Tzaj ne sese nuvi' soj, gaa ne a me sí qui'yaj danj ga.

3 'Q se che'é dan qui'yáj yanj cartá yo', ndaa vaa me rá ma'anj, che'é se ne ca'vej raj cuchij ne quinano raj qui'yaj soj ei. Tzaj ne 'o se no xcúun soj guun niha' raj qui'yaj soj, ne ndaa ma'an soj do', guun niha' rá gaa chuguanj.

4 Tzaj ne gaa qui'yáj yanj cartá yo' me se nuu quitzii ndo'o raj, ne nanó ndo'o raj, ne ndaa ta'vee ma'anj, qui'yaj suun nanó rá chuguanj. Tzaj ne nuveé che'é se me raj quinano rá soj me qui'yáj yanj cartá yo' ma'. 'Q se me raj quene'en soj se vaa 'ee uxrá raj man soj nanj adonj.

*Nana nihanj taj xna'anj se vaa ve'é na'mii sa' uún nij sí man Corinto ga tinúú nij so' sí tanaj cacun' tumé so' a*

5 Tzaj ne sese vaa yo'o sí 'yaj nanó raj doj, ne nuveé inanj ma'anj nanó rá 'yaj so', cataj ní' vaa ma'. 'Q se ndaa ma'an soj do', nanó rá, cataj ní' vaa, che'é se na'vej rá ní' cuta' ní' doj vaa nanj adonj.

6 Ne sayuun cuta' soj xráá sí qui'yaj cacun' yo' me se veé dan ca'vee, ne ca'neé soj sayuun xráá so' nanj ei. Taj che'é qui'yaj soj doj sayuun man so' a ma'.

7 Maan se caraa x'naa soj rihaan so', ne veé dan quisij qui'yaj soj sayuun man so', tadó soj se nanó ndo'o rá so', qui'yaj soj, ne quiri' nimán so', qui'yaj soj ei.

8 Che'é dan cataj xna'anj 'unj rihaan soj se vaa me raj ve'é qui'yaj soj, gaa ne guun ya rá so' se vaa ya ya 'ee rá soj man so' ei.

9 Gaa qui'yáj yanj cartá ca'néj rihaan soj gaa rque, ne ca'né' 'unj suun rihaan soj se vaa qui'yaj soj sayuun man sí qui'yaj cacun' yo', che'é rej me rá 'unj xcaj 'unj cuentá daj sij me soj, ne me raj quene'enj sese sij uno nu' nana a'mij rihaan me soj a.

10 Sese ca'vej rá soj caraa x'naa soj che'é so', ne veé danj qui'yáj, ne caraa x'naj che'é so', che'é rej me raj cavii sa' doj soj, ne ne'enj se vaa tumé Jesucristó man ní' ei.

11 Danj qui'yaj ní', gaa ne se gaa nanj qui'yaj canaan sí cu'naj Satanás man ní' ei. 'Q se aj ne'en ní' daj me rá so' qui'yaj so' ga ní' ei.

*Nana nihanj taj xna'anj se vaa cavii Pabló chuman' cu'naj Troas, ne ca'anj so' estadó cu'naj Macedonia a*

<sup>12</sup> Dan me se ca'anj 'unj chuman' cu'naj Troas ca'mii natáj 'unj se-nana Jesucristó nana sa', ne dan me se vaa ndo'o rej ca'mii natáj 'unj nana sa', qui'yaj sí 'nij ra'a man ní',

<sup>13</sup> tzaj ne ne nari' 'unj man tinúú ní' sí cu'naj Titó, ne nanó ndo'o raj, ne che'é dan tanáj 'unj man nij tinúú ní' sí ne chuman' Troas yo', ne cavii 'unj ca'ná' 'unj estadó Macedonia nihánj nanj adonj.

*Nana nihánj taj xna'anj che'é nana a'mii natáj nij tuví' Pabló rihaan nij yuvií a*

<sup>14</sup> Tzaj ne nago' ní' graciá rihaan Diose, che'é se Diose me sí 'yaj se vaa 'yaj canaán uxrá nún rihaan sí chree che'é Jesucristó a. Ne Diose me sí 'yaj uno yuvií man rihaan nún cachra' chumii nana sa' a'mii nún che'é Jesucristó, ne yo'ó cha'nuu nana sa' yo' rihaan nún cachra' chumii, nda' rá se vaa avii se gun' daj man yáj gaa naxra' yo' ro', danj vaa cha'nuu se-nana Diose chuguanj.

<sup>15</sup> Dan me se nda' rá se vaa yachruu squii gun' daj, ne achén yo' sca'nún nij sí quinanií rihaan sayuun, ne achén yo' sca'nún nij sí ca'anj rihaan ya'an, danj vaa nún gaa nata' nún se-nana Jesucristó rihaan yuvií che'é Diose ei.

<sup>16</sup> Ne xa' nij sí ca'anj rihaan ya'an, tzaj ne nda' rá se vaa gun' squii rihaan nij yuvií cavi' ro', danj vaa se-nana Diose rihaan nij so' ei. Tzaj ne xa' nij sí quinanií rihaan sayuun me se nda' rá se uun rá' gaa sa' uxrá gun' squii ro', danj uun rá nij so' gaa uno nij so' se-nana Diose ei. Tzaj ne a me sí uun nucuaj 'yaj danj, rá soj ga.

<sup>17</sup> 'Q se nún me se ne 'yaj nún ndaa vaa 'yaj ta'aj nij sí a'mii natáj se-nana Diose a ma'. 'Q se ta'aj nij so' me se me inanj nij sí me rá qui'yaj canaán sa'anj che'é se-nana Diose, ne xa' nún, tzaj ne inanj nana ya me rá nún ca'mii nún, ne na'vej rá nún ca'neé nún sa'anj che'é se-nana Diose rihaan yuvií ma'. 'Q se Diose me sí ca'ne' suun rihaan nún ca'mii natáj nún, ne tumé Diose man nún daj ca'mii nún, ne sí noco' man Jesucristó me nún adonj.

### 3

*Nana nihánj taj xna'anj se vaa ase vaa 'o yanj cartá qui'yaj Jesucristó vaa nij sí amán rá ni'yaj man Jesucristó yanj chuman' Corinto ga nún ní' a*

<sup>1</sup> Dan me se gaa a'mii nún nana nihánj me se uun che'e uún nún a'mii nún che'é ma'an nún, rá soj na'. Taj mei. Dan me se ase vaa yanj cartá vaa nún ní' sji amán rá ni'yaj man Jesucristó ei. Dan me se nuveé che'e nucui' rá nún a'mii nún danj ma'. 'Q se veé danj vaa ya ei. Nda' se me rá soj tahaan nún yanj cartá a'mii sa' che'é nún chihá'. Nda' se me rá soj cachinj nún yanj cartá a'mii sa' che'é nún rihaan soj chihá'. 'Q se taj ma'. Ne vaa danj mei. 'Q se aj ne'en soj man nún á. Ne taj che'é qui'yaj soj yanj cartá cataj xna'anj rihaan yo'ó yuvií daj sji me nún ma'.

<sup>2</sup> 'Q se ase vaa yanj cartá a'mii che'é nún vaa ma'an soj adonj. Dan me se aj ne'en cunudanj yuvií daj vaa nimán nún se vaa 'ee rá nún man soj, ne che'é dan xcaj nij yuvií cuentá se vaa sji sa' me nún ei.

<sup>3</sup> Dan me se ne'en ya ya ní' adi' se vaa yanj cartá qui'yaj ma'an Jesucristó vaa soj chuguanj. Tzaj ne nuveé yanj cartá qui'yaj ni ga tintá me yo' ma'. Nuveé letrá cachrón nii rihaan yahij me yo' ma'. 'Q se letrá cachrón ya ma'an Jesucristó ndaa nimán soj me nana yo' adonj. Ne yo' me qui'yaj Nimán Diose, ne che'é Nimán Diose me nuú nana yo' ndaa rque nimán soj ei.



*Nana nihánj taj xna'anj se vaa guun nucuaj nij tuvì' Pabló ca'mii natáj nij so', qui'yaj ma'an Dioso a*

<sup>4</sup> Yo'ò nucuaj rá núj man Dioso che'é Jesucristó se vaa ya racuj Dioso man núj ei.

<sup>5</sup> Dan me se ne nó xcúún núj cataj núj se vaa guun nucuaj núj qui'yaj suun núj che'é Dioso ma'. 'O se ma'an Dioso me síí 'yaj uun nucuaj núj qui'yaj suun núj adonj.

<sup>6</sup> Ne Dioso me síí qui'yaj guun nucuaj núj cataj xna'anj núj che'é tucuáán naca cuchruj Dioso che'é yuvij adonj. Ne xa' tucuáán naca yo', tzaj ne nuveé inanj tucuáán nò rihaan yanj daj vaa nò xcúún ní' canoco' ní' me tucuáán naca yo' ma'. 'O se se guun nucuaj ní' canoco' ní' tucuáán nò rihaan yanj ma'. Xa' tucuáán nò rihaan yanj, tzaj ne cavì' nimán ní', qui'yaj tucuáán vaa danj ei. Dan me se xa' tucuáán naca cuchruj Dioso che'é ní', tzaj ne tananj a cunuu i'na' nimán ní' qui'yaj Nimán Dioso che'é tucuáán naca yo' nanj adonj.

*Nana nihánj taj xna'anj se vaa ve'é ndo'o vaa nana a'mii natáj nij tuvì' Pabló nana a'mii che'é Nimán Dioso a*

<sup>7</sup> Nana cataj xna'anj Dioso rihaan Moisés gaa naá ro', cachrón Dioso nana yo' rihaan yahij caxra', ne cataj so' se vaa síí se cuno nu' nana yo' ro', yuun che'é cavì' so', taj so' a. Dan me se gaa tucuachén Moisés tucuáán yo' rihaan nij yuvij, ne cuchuguun uxrá rihaan so', ne ndaa do' do' quina'áj ya'an rihaan Moisés, tzaj ne ne guun nucuaj nij yuvij israelitá ni'yaj nij so' rihaan Moisés ma'.

<sup>8</sup> Táá a suun vaa rihaan núj suun nata' se-tucuanj Nimán Dioso chuguanj.

<sup>9</sup> 'O se nanj se-tucuanj Moisés, tzaj ne sa' uxrá ca'mii nii ni'yaj nii se-suun Moisés suun nata' che'é tucuáán 'yaj 'na' cacun' xráá yuvij, ne táá a se-suun núj, ne sa' doj 'yaj núj nata' núj tucuáán 'yaj nuu sa' yuvij rihaan Dioso ei.

<sup>10</sup> Dan me se gaa naá ro', ve'é ndo'o chuguun rihaan Moisés, rá nij yuvij israelitá, tzaj ne yaj ro', me se ne ve'é vaa nana nga yo' rihaan ní' a ma'. Ne tucuáán naca cuchruj Dioso che'é ní' ro', yo' ve'é vaa rihaan ní' yaj adonj. 'O se ve'é doj vaa tucuáán cuchruj Dioso cuano rihaan nana ca'mii Dioso gaa naá nanj adonj.

<sup>11</sup> 'O se doj orá cuchuguun rihaan Moisés, qui'yaj nana ca'mii Dioso rihaan so' gaa naá, tzaj ne sa' doj vaa nana ca'mii Dioso cuno ní' yaj, ne ve'é uxrá doj cumán ní' nu' cavii nu' ca'anj, qui'yaj nana naca yo' adonj.

<sup>12</sup> Che'é se guun ya rá núj se vaa gaa i'na' núj nu' cavii nu' ca'anj, che'é dan niha' rá núj, ne ne na'aj núj a ma'.

<sup>13</sup> Ne 'yaj núj ndaa vaa qui'yaj Moisés gaa naá ma'. Dan me se caráán so' yatzij rihaan so', che'é yan ne ca'vej rá so' ni'yaj nij yuvij israelitá rihaan so' daj guun quitì'inj chuguun rihaan so' a.

<sup>14</sup> Dan me se ne quene'en nij so' daj vaa canicun' se chuguun rihaan Moisés ma'. 'O se ne guun nucuaj nij so' xcaj nij so' cuentá a man adonj. Ne inanj danj vaa uún nij yuvij israelitá ndaa cuano nihánj, ne aráán rihaan nij so' gaa nayaa nij so' nana ca'mii Dioso gaa naá, ne taj se 'yá' xcaj nij so' cuentá che'é nana yo' a man adonj. Inanj nij síí noco' man Jesucristó me síí uun nucuaj xcaj cuentá che'é nana yo' nanj ei.

<sup>15</sup> Tzaj ne veé danj vaa ndaa cuano, ne ne guun nucuaj nij yuvij israelitá xcaj sa' nij so' cuentá gaa nayaa nij so' se-tucuanj Moisés ma'. Veé danj aráán rihaan nij so' nanj á.

16 Ne gaa canicaj ní' noco' ní' man sí' 'nij ra'a man ní', gaa ne x'néj yatzíj aráán rihaan ní', ne a'vee ruvi' sa' rihaan ní' ni'yaj ní' ei.

17 (Dan me se daj vaa ese Nimán Diose me sí' 'nij ra'a man ní', ne dan me se rej yanj Nimán Diose me se vaa ya'núj rej yo' ei.)

18 Ne taj se aráán rihaan taran' ní' ma'. 'O se uun nucuaj ní' ne'en ní' man sí' 'nij ra'a man ní', se vaa ve'é uxrá vaa so', ne ase vaa so' ro', danj gaa uún ma'an ní', che'é se ni'yaj ní' man so' ei. Dan me se dq' do' naqui'yaj sa' sí' 'nij ra'a man ní' nimán ní', ne dan me se ne so' nimán ní', ne ase vaa ma'an so' ro', danj gaa taran' ní' uún adonj.

## 4

*Nana nihánj taj xna'anj se vaa ndq' se ran' ndo'o nij tuvi' Pabló sayuun, tzaj ne uun nucuaj nij so' a'mii natáj nij so' se-nana Diose, qui'yaj Diose a*

1 Dan me se cunuu 'ee rá Diose man núj, ne ca'ne' so' suun rihaan núj ca'mii natáj núj, ne che'é dan ne ri' rá núj ca'mii natáj núj se-nana Diose ma'.

2 Tananj a 'o tanáj xco núj nu' nij rasuun na'aj chi'ii 'yaj yuve nii ei. Se cuhu'vi' núj quene'en yuvi me 'yaj núj ma'. Se ca'mii núj nana tihá' yu'unj ma'. Se ca'mii ne núj che'é se-nana Diose ma'. Inanj nana ya ca'mii núj cunodanj yuvi, ne xcaj ma'an nij yuvi cuentá se vaa ya vaa nana a'mii núj, ne Diose me sí' cunod nu' nana ca'mii núj nanj ei.

3 Tzaj ne sese nana yuve me nu' nana a'mii natáj núj, rá ta'aj nij yuvi, ne inanj nij sí' chi'ii ca'anj rihaan sayuun me nij sí' uun danj rá nanj ei.

4 Ne xa' nij so', tzaj ne ne amán rá nij so' ni'yaj nij so' man Jesucristó ma'. 'O se caráán xréé nij so', qui'yaj sí' chree sí' noco' nij so' man, ne ne guun nucuaj nij so' xcaj nij so' cuentá che'é se-nana Jesucristó ma'. Ne ne'en nij so' se vaa sa' ndo'o vaa Jesucristó ma'. Ne xa' Jesucristó, tzaj ne ase vaa ma'an Diose vaa so' ni'yaj ní' man so' adonj.

5 Xa' núj, tzaj ne ne a'mii natáj núj che'é ma'an núj ma'. Inanj che'é Jesucristó sjj 'nij ra'a man ní' a'mii natáj núj, ne taj núj se vaa che'é se noco' ní' man so', che'é dan sjj 'yaj suun rihaan soj me núj ei.

6 'O se Diose me sí' cataj se vaa chuguun rihaan chumij, ne danj ca'mii Diose gaa naá uxrá gaa vaa rmi' rihaan chumij nihánj, gaa ne chuguun rihaan chumij nihánj, ne yaj me se chuguun nimán núj, qui'yaj uún Diose á. Che'é dan me guun nucuaj núj cataj xna'anj núj rihaan yuvi se vaa sa' uxrá vaa Diose, ne sese cunod nij yuvi se-nana Jesucristó, ne xcaj nij so' cuentá se vaa sa' uxrá qui'yaj Diose adonj.

7 Dan me se nuu nu' rasuun sa' yo' nimán núj, tzaj ne ase vaa 'o xruj yo'óo niqiii uun vaa núj, ne che'é dan ne'en ya ní' se vaa nu' se sa' nucuaj yo' 'na' 'yaj Diose ei. Ne nuveé ma'an núj 'yaj veé 'na' se sa' yo' ma'. Diose me sí' rqué se nucuaj man núj che'é rej ca'vee nata' núj se-nana so' adonj.

8 Dan me se me rej ma'an vaj núj me se 'yaj nii sayuun man núj, tzaj ne rqué Diose rej quinani núj rihaan sayuun yo' a. Chu'vi' nimán núj, tzaj ne ne ri' nimán núj ma'.

9 Noco' uxrá yuvi man núj che'é yan me rá nij so' go' nij so' man núj, tzaj ne ne tanáj Diose man núj ma'. 'Yaj ya nii sayuun man núj, tzaj ne ne avi' núj a ma'.

10 Niganj ne'en ya núj se vaa ase guun rá nii gaa ticavi' nii man Jesucristó ro', cunodanj me rá nii ticavi' nii man núj adonj. Che'é se ne cavi' núj, gaa ne

caráya'anj uxrá nij yuviꝝ adonj. Ne xcaj nij yuviꝝ cuentá se vaa vaa i'na' núj che'é se 'nij Jesucristó nimán núj ne tumé so' man núj adonj.

<sup>11</sup> Dan me se vaa i'na' núj rihaan chumiꝝ nihánj, tzaj ne niganj ne'en núj se vaa ca'vee cavi' núj che'é se noco' núj man Jesucristó, ne ne'en yuviꝝ se vaa ca'vee cavi' núj, tzaj ne xcaj nij yuviꝝ cuentá se vaa vaa i'na' núj che'é se 'nij Jesucristó nimán núj ne racuꝝ ndo'o so' man núj adonj.

<sup>12</sup> Dan me se núj me se sij daj doj cavi' me núj, tzaj ne soj ro', tananj a yo'o gaa i'na' nimán nij soj á.

<sup>13</sup> No naná ca'mii 'o síí cane gaa naá rihaan danj Diose se vaa cataj so':

—Cuchumán raj ni'yaj 'unj man Diose, ne che'é dan ca'mij che'é so' a —taj yo'o síí cane gaa naá yo' a.

Ne ase vaa cuchumán rá síí cane gaa naá yo' ro', danj vaa amán rá núj, ne che'é dan a'mii núj che'é Diose,

<sup>14</sup> che'é se ne'en núj se vaa Diose me síí qui'yaj cunuꝝ i'na' uún Jesucristó sij 'nij ra'a man ní', ne che'é dan cunuꝝ i'na' uún ma'an núj ga Jesucristó, qui'yaj uún Diose, gaa ne canicun' núj rihaan Jesucristó, qui'yaj uún Diose, ne danj qui'yaj uún Diose che'é soj uún adonj.

<sup>15</sup> 'Q se inanj che'é soj ran' núj nu' se vaa ran' núj, tzaj ne che'é se me rá núj nıcaj que'ee soj se luj qui'yaj Diose, gaa ne guun rııı doj ní' sij nago' graciá rihaan Diose, ne guun rııı doj ní' sij ve'é a'mii che'é Diose adonj.

*Nana nihánj taj xna'anj se vaa nata' ndo'o nij tuvi' Pabló se-nana Diose, che'é se ne'en nij so' se vaa naru'vee Jesucristó rihaan nij so' a*

<sup>16</sup> Che'é dan se ca'ne' rá núj ma'. Dan me se núj me se daj doj cavi' nee man núj, tzaj ne daj á güii tananj a nahuun sca' doj nimán núj nanj ei.

<sup>17</sup> Cuanó yaj me se vaa doj sayuun ran' núj, tzaj ne ra'yanj cachén nu' sayuun yo', ne che'é sayuun ro', ve'é uxrá caviꝝ núj nu' caviꝝ nu' ca'anj ei.

<sup>18</sup> Che'é dan ne xcaj núj cuentá che'é nij rasuun ruvi' ni'yaj yuviꝝ ma'. 'Q se rasuun ruvi' ni'yaj yuviꝝ ro', vaa güii quinavij nu' rasuun yo', ne che'é dan inanj che'é nij rasuun ne ruvi' ni'yaj yuviꝝ cuano xcaj núj cuentá, che'é se rasuun cumán nu' caviꝝ nu' ca'anj me rasuun yo' adonj.

## 5

<sup>1</sup> Dan me se ne'en núj se vaa ase vaa 'o ve' mantá uta' uun nii 'o orá le'ej nii ne doj orá a'néj nii mantá ro', vaa nee man núj, ne yanj nee man núj gaa vaa i'na' núj rihaan chumiꝝ nihánj, tzaj ne ne'en núj se vaa ca'vee navij nee man núj vaa güii, ne asa' navij yo', gaa ne rque Diose yo'ó nee naca cunuú núj, ne daj chihaa mıj se quinavij nee naca yo' a ma'. Tananj a cayáán núj rej xtá' nu' caviꝝ nu' ca'anj adonj.

<sup>2</sup> 'Q se aráj chej núj, che'é se me uxrá rá núj cunuú núj nee naca yo', nee qui'yaj Diose rej xtá' che'é núj a.

<sup>3</sup> Ne nee naca yo' me caráán xráá núj, gaa ne se gaa nanj gaa canj núj ei.

<sup>4</sup> Dan me se nuú núj nee nga nihánj cuano, ne che'é dan nanó rá núj, ne aráj chej núj, che'é se na'vej rá núj cavi' núj a man adonj. Dan me se na'vej rá núj tanáj núj nee nuú núj cuano, tzaj ne me ndo'o rá núj cunuú núj nee naca yo', ne veé dan me se nee man núj nee daj doj cavi' nihánj ro', cunuú naca uún yo', ne gaa i'na' yo' nu' caviꝝ nu' ca'anj ei.

<sup>5</sup> Ne Diose me sí 'yaj suun nimán núj yan ca'vee cunu naca nee man núj vaa güii, ne rque so' Nimán so' man núj, ne che'é dan guun ya rá núj se vaa cunu naca ya núj adonj.

<sup>6</sup> Che'é dan niganj vaa nucuaj nimán núj, ne dan me se ne'en núj se vaa gaa vaa nee man núj nihánj cuano ro', ne taj vaj núj ne rej xta' ga sí 'nij ra'a man ní' ma'.

<sup>7</sup> 'O se ataa quita'aa núj se vaa rque Diose rihaan núj, tzaj ne amán rá núj ni'yaj núj man Diose se vaa ya vaa nana cataj xna'anj so' rihaan núj, ne che'é dan uno núj rihaan so' nanj adonj.

<sup>8</sup> Dan me se nari' nucuaj nimán núj, ne uun rá núj se vaa cunaj uxrá gaa tanáj núj nee man núj, ne ca'anj núj cayáan núj ga sí 'nij ra'a man ní', ne sa' doj cavij núj asa' qui'yaj núj danj adonj.

<sup>9</sup> Che'é dan me ndo'lo rá núj guun niha' rá sí 'nij ra'a man ní' ni'yaj so' man núj á. Ca'vee se cayáan núj rihaan chumij nihánj, ca'vee se cayáan núj rej xta', tzaj ne me rá núj guun niha' rá sí 'nij ra'a man ní' ni'yaj so' man núj nanj adonj.

<sup>10</sup> Ne'en núj se vaa vaa güii no xcuún taran' ní' canicun' taran' ní' rihaan Jesucristó, ne naqui'yaj cuu so' che'é ní' a. Gaa ne naru'vee Jesucristó rihaan ní' che'é se vaa qui'yaj ní' gaa vaa i'na' ní' rihaan chumij nihánj, ne sese sa' qui'yaj ní', ne se sa' naru'vee Jesucristó rihaan ní', ne sese nij qui'yaj ní', ne se nij quinicaj ní' nanj adonj.

<sup>11</sup> Chu'vi' núj che'é se ne'en núj se vaa qui'yaj sí 'nij ra'a man ní' sayuun man nij sí tumé cacun', ne che'é dan nago' núj chrej nucuaj man yuvij canoco' nij yuvij man so', ne aj ne'en Diose daj vaa nimán núj a. Ne guun ya rá 'unj se vaa xcaj ma'an nij soj cuentá daj vaa nimán núj nanj adonj.

<sup>12</sup> Nuveé che'e se me rá núj ca'mij núj nana sa' che'é ma'an núj me a'mii 'unj danj ma'. Maan se me rá núj guun nucuaj soj ca'mij nacaj soj ni'yaj soj man núj nanj adonj. 'O se nij sí taj ri'yunj man núj me se inanj xcaj nij so' cuentá daj ruvi' yuvij ni'yaj nij so', tzaj ne ne acaj nij so' cuentá daj vaa nimán yuvij ma'.

<sup>13</sup> Ca'vee se snúu rma'an núj rá nij so', tzaj ne inanj che'é se noco' núj Diose me 'yaj núj ndaa vaa 'yaj núj, ne ca'vee se nuvi' nana niha' nimán núj rá nij so', tzaj ne inanj che'é se me rá núj racuj núj man soj me 'yaj núj ndaa vaa 'yaj núj adonj.

<sup>14</sup> 'O se ne'en núj se vaa 'ee rá Jesucristó man cunudanj yuvij, ne che'é dan 'o me rá núj cataj xna'anj núj rihaan yuvij che'é so' a. 'O se guun ya rá núj se vaa orún' Jesucristó me sí cavi' che'é cunudanj yuvij, ne che'é dan ase vaa sí cavi' ro', danj vaa cunudanj nij yuvij noco' man so' ni'yaj nij so' chrej chi'ii a.

<sup>15</sup> Ne che'é se cunu sa' nimán nij yuvij ro', che'é dan se guun rá nij yuvij se vaa vaa i'na' nij yuvij rihaan chumij nihánj che'é yan qui'yaj suun nij yuvij che'é ma'an nij yuvij ma'. 'O se gaa i'na' nij so' che'é yan canoco' nij so' man Jesucristó, ne Jesucristó me se so' me sí cavi' che'é nij so', ne cunu i'na' uún so' che'é yan cavij sa' nij yuvij doj nanj adonj.

*Nana nihánj taj xna'anj se vaa a'mii natáj nij tuvi' Pabló se vaa ca'vej rá yuvij tinanii Diose man nij yuvij rihaan sayuun a*

<sup>16</sup> Che'é dan me ca'ne' rá núj ga suun acaj cuentá ndaa vaa ruvi' yuvij ni'yaj tuvi' yuvij á. Asij rque me se nanj yuvij me Jesucristó rá núj, ne inanj xcaj núj cuentá ndaa vaa ruvi' so', tzaj ne yaj me se ne 'yaj núj danj a ma'.

17 Ne che'é se cunuu sa' nimán núj, che'é dan ne'en núj se vaa me ma'an yuvií amán rá ni'yaj man Jesucristó ro', cunuú sa' nimán so', qui'yaj Diose á. Ne síí amán rá ro', se guun rá uún so' qui'yaj so' ndaa vaa qui'yaj so' gaa rque ma'. 'Q se síí acaj naca cuentá me so' adonj.

18 Ne xa' nu' nihánj, tzaj ne Diose me síí 'yaj nu' nihánj che'é yuvií, ne so' me síí qui'yaj cunuú rcua'aan ní' ga ma'an so' che'é se vaa qui'yaj Jesucristó, ne ca'ne' ma'an Diose suun rihaan núj cataj xna'anj núj rihaan yuvií se vaa ca'vee cunuú rcua'aan nij yuvií ga Diose adonj.

19 Dan me se ma'an Diose ca'neé man Jesucristó rihaan chumii nihánj, ne che'é se vaa qui'yaj Jesucristó ro', che'é dan ca'vee cunuú rcua'aan yuvií ga Diose, qui'yaj Diose, ne tirí' Diose cuentá cacun' vaa rihaan nij yuvií a. Ne Jesucristó me síí rque nana nihánj man núj cataj xna'anj núj nana nihánj rihaan yuvií, qui'yaj uún Diose ei.

20 Dan me se a'mii núj se-nana Jesucristó rihaan yuvií, ne ma'an Diose rque se-nana Diose rihaan núj ca'mii núj che'é ma'an Diose, ne che'é dan achíin ni'yaj ndo'o núj rihaan nij yuvií, ne a'mii núj nana nihánj rihaan nij yuvií a: "Cunuú rcua'aan nij soj ga Diose ei."

21 A 'ó cacun' ne tumé Jesucristó ma'. Tzaj ne naraa Diose nu' cacun' tumé ní' xráa ma'an Jesucristó, ne quiran' Jesucristó sayuun che'é cacun' yo', ne che'é dan ca'vee cunuú sa' ya ní' rihaan Diose che'é se sij nocó' man Jesucristó me ní' adonj." Yo' me nana a'mii natáj núj rihaan yuvií nanj adonj.

## 6

1 Dan me se 'yaj suun núj suun ca'ne' Diose rihaan núj, ne che'é dan taj xna'anj núj rihaan soj se vaa se quirí'íj yaníj soj se luj qui'yaj Diose che'é soj ma'.

2 'Q se nana nihánj me nana ca'mii Diose á:

—Maan güii cunó 'unj cachíin ni'yaj soj rihanj, ne güii dan me racuíj 'unj man soj cavíi sa' soj a —cataj Diose gaa naá a.

Ne xcaj soj cuentá se vaa cuano nihánj me güii cunuú 'ee rá Diose man soj, ne cuano nihánj me güii ca'vee cavíi sa' soj chuguanj.

*Nana nihánj taj xna'anj se vaa tumé ndo'o nij tuvi' Pabló man ma'an nij so' daj 'yaj nij so' che'é yan cunó yuvií nana a'mii nij so' a*

3 Ne tumé uxrá núj man núj che'é chrej sa', che'é se na'vej rá núj guun yaníj soj rihaan chrej sa' a. Ne na'vej rá núj cataj soj se vaa nij vaa suun 'yaj suun núj rihaan Diose uún a.

4-5 'Q se me rá núj ni'yaj soj man núj ne cataj soj se vaa ya ya sij 'yaj suun rihaan Diose me núj, ne che'é dan a'vee se daj a ran' núj sayuun, tzaj ne vaa inaj nimán núj nanj adonj. Dan me se ran' núj sayuun, ne achíin rasuun man núj, ne chu'vi' nimán núj, ne o' nii cuxru' xráa núj, ne axríj nii taga' man núj, ne nuu chre' nii caxrii yuvaá nii man núj, ne 'yaj suun ndo'o núj che'é se qui'yaj canaán núj chá núj, ne vaa güii narii ndo'o núj nej, ne vaa güii, ne ne vaa ya'núj rihaan núj chá núj, tzaj ne vaa inaj nimán núj, ne ne a'ne' rá núj a ma'.

6 Ne a'neé nimán núj qui'yaj suun núj rihaan Diose, ne núj ro', ne uun yuvaá núj man tuvi' núj ma'. Tananj ve'é 'yaj núj rihaan tuvi' núj, ne nocó' núj Nimán Diose, ne ya ya 'ee rá núj man tuvi' núj adonj.

7 Nanaŋ ya a'mii núj, ne rque Diose se nucuaj man núj, ne cunuu sa' nimán núj rihaan Diose, ne che'é dan a'vee unu' núj ga síi chree, ne tumé núj man núj se vaa se qui'yaj síi chree chi'ii man núj a.

8 Vaa yuviŋ a'mii sa' che'é núj, ne vaa yuviŋ a'mii nij che'é núj, ne vaa yuviŋ taj se vaa síi ne me núj, tzaj ne nanaŋ ya a'mii núj ei.

9 Ne nuvi' se uun núj, taj uún nii, tzaj ne sij ne'en uxrá yuviŋ man me núj a. Ne taj uún nii se vaa daj doj cavi' núj, tzaj ne ne'en soj se vaa vaa nucuaj núj a. Ne ma'an Diose 'yaj sayuun man núj che'é rej nari' núj cunō núj doj rihaan Diose, tzaj ne ne avi' núj, 'yaj Diose ma'.

10 Ne nanó rá núj che'é sayuun, tzaj ne niha' rá núj rihaan Diose uún a. Ne síi nique me núj, tzaj ne avii sa' doj que'ee yuviŋ, 'yaj núj a. Ne taj si'yaj núj, tzaj ne cunudanŋ chumiŋ nihánŋ me si'yaj núj a.

*Nanaŋ nihánŋ taj xna'anŋ se vaa me rá Pabló cunuu 'ee rá nij síi man Corinto ni'yaj nij so' man nij tuvi' Pabló a*

11 Dan me se nihánŋ me cataŋ xna'anŋ 'unŋ rihaan soj sij man chuman' Corinto daj vaa nimán núj a. Dan me se ne'en soj se vaa 'ee ndo'o rá núj man soj á.

12 Nuveé che'e se vaa qui'yaj núj me nanó rá soj ma'. Maan che'é se ne nucuaj rá soj man núj ro', che'é dan nanó rá soj adonŋ.

13 Daj se uun rá nii ne'en nii ta'níi nii ro', danŋ vaa uun raj ne'enŋ man soj, ne che'é dan cataŋ xna'anŋ 'unŋ rihaan soj se vaa, ase vaa qui'yaj núj che'é soj ro', danŋ qui'yaj uún soj che'é núj, ne gaa nucuaj rá soj man núj á.

*Nanaŋ nihánŋ taj xna'anŋ se vaa nō xcúun ní' tanáŋ ní' chrej chi'ii, ne cunuu sa' nimán ní' rihaan Diose a*

14 Se guun guun tuvi' soj ga nij síi ne amán rá ni'yaj man Jesucristó ma'. Se guun qui'yaj soj ndaa vaa 'yaj nij so' ma'. Asa' ca'vee cuyaŋ gaa rej rangá' ga rej rmi', rá soj ga. Che'é dan, asa' ca'vee guun tuvi' síi me rá qui'yaj sa' ga síi me rá qui'yaj cacun', rá soj ga.

15 Asa' ca'vee cuyaŋ gaa rá Jesucristó ga síi chree, rá soj ga. Ne ca'vee cuyaŋ gaa rá síi amán rá ni'yaj man Diose ga síi na'vej rá cuchuman rá, rá soj na'. Taj ma'.

16 Ne xa' ní' sij noco' man Diose, tzaj ne asa' ca'vee cunuu chre' ní' ga ya'anŋ cacóŋ yuviŋ, rá soj ga. Xa' ya'anŋ cacóŋ yuviŋ, tzaj ne ne vaa i'na' yo' ma'. Ne xa' Diose, tzaj ne síi vaa i'na' me so', ne ne so' nimán ní' ei. 'Q cuyaŋ vaa nanaŋ nihánŋ ga nana ca'mii Diose gaa naá gaa cataŋ Diose:

—Cayáan 'unŋ ga nij so', ne cachee 'unŋ ga nij so', ne guún 'unŋ Diose noco' nij so', ne guun nij so' yuviŋ tumé 'unŋ man a —taj Diose gaa naá che'é ní' sij noco' man so' a.

17 Ne cataŋ uún Diose rihaan ní' sij noco' man so':

—Che'é dan guun yanŋ soj rihaan nij síi chi'ii yo', ne a 'ó se chi'ii se qui'yaj soj, gaa ne nacaj 'unŋ man soj,

18 ne guun Rej soj manŋ, ne guun soj ta'níj a. Veé danŋ síj nanaŋ cataŋ xna'anŋ 'unŋ sij 'nij ra'a man soj rihaan soj, ne sij guun nucuaj qui'yaj nu' nanaŋ nihánŋ mej adonŋ —taj uún Diose rihaan ní' a.

## 7

1 Dan me se nu' nanaŋ nihánŋ nana ca'mii ya Diose gaa naá ro', ca'mii Diose nanaŋ yo' rihaan ní', tinuŋ, nocoŋ. Che'é dan quirii yanŋ ní' man cunudanŋ se chi'ii qui'yaj ní' asij rque do', man cunudanŋ se chi'ii man nimán ní' do', ne

gaa kuj nimán ní' á. Ne naqui'yaj sa' inanj ní' nimán ní', che'é se uxrá aráj cochroj ní' rihaan Diose á.

*Nana nihánj taj xna'anj se vaa guun niha' rá Pabló cuno so' nana se vaa cuno nij síi man Corinto se-nana Pabló a*

<sup>2</sup> Me rá núj ve'é ca'mij soj ga núj á. 'Q se a 'ó soj ne qui'yaj chi'ij núj man ma'. A 'ó soj ne tiha' yu'unj núj man ma'.

<sup>3</sup> Dan me se nuveé che'e se me rá 'unj cuta' 'unj cacun' xráá soj me a'mij danj ma'. 'Q se aj cataj xna'anj 'unj rihaan soj se vaa 'ee uxrá rá núj man soj, ne ca'vee se gaa i'na' ní' do', ca'vee se cavi' ní' do', tzaj ne yo'o gaa 'ee rá núj man soj nanj adonj.

<sup>4</sup> Inanj nucuaj ndo'o rá 'unj ni'yaj 'unj man soj se vaa ve'é qui'yaj soj, ne niha' ndo'o rá 'unj ni'yaj 'unj man soj, ne nda' se sayuun ran' núj, tzaj ne uun niha' ndo'o raj adonj.

<sup>5</sup> Dan me se ca'anj núj estadó Macedonia, tzaj ne taj se 'yá' cané sa' núj a ma'. 'Q se qui'yaj ndo'o nii sayuun man núj, ne vaa yuvij ca'mii cunu' ga núj, ne cuchu'vi' ndo'o núj a.

<sup>6</sup> Tzaj ne Diose me síi racuj ndo'o man nij síi ni'yanj nimán, ne dan me se racuj ndo'o Diose man núj se vaa ca'na' tinú' Titó rihaan núj, qui'yaj Diose, ne cunuu kuj rá núj, qui'yaj so' a.

<sup>7</sup> Ne veé uún so' me síi cataj xna'anj rihaan núj se vaa guun niha' rá so' quene'en so' man soj, ne cataj xna'anj so' se vaa me ndo'o rá soj quene'en soj man núj do', se vaa nanó rá soj che'é síi qui'yaj cacun' 'nij sca'núj soj do', se vaa niha' rá soj ca'mij sa' soj che'é núj do', ne che'é dan doj a guun niha' raj adonj.

<sup>8</sup> Dan me se nda' se quinanó rá soj, qui'yaj yanj cartá ca'néj, tzaj ne cunaj qui'yáj, raj ei. 'Q se quinanó rá soj che'é se cataj xna'anj 'unj che'é cacun' tumé soj, tzaj ne ne'én 'unj cuano se vaa ya quinanó rá soj doj güii, qui'yaj yanj cartá yo' chuguanj. Dan me se ne guun niha' raj gaa cachronj nana nucuaj yo' rihaan soj ma'.

<sup>9</sup> Tzaj ne yaj me se guun niha' raj, ne nuveé che'e inanj se quinanó rá soj me guun niha' raj ma'. Che'é se tanáj soj cacun' tumé soj, ne canicaj nimán soj ro', che'é dan guun niha' raj adonj. 'Q se quinanó rá soj, ne canicaj nimán soj ndaa vaa me rá Diose qui'yaj soj, ne che'é dan ne quiran' soj sayuun, qui'yaj núj a ma'. Tananj a cavii sa' soj doj, qui'yaj núj adonj.

<sup>10</sup> 'Q se sese quinanó rá ní' ndaa vaa me rá Diose qui'yaj ní', ne canicaj nimán ní', ne cavi' sa' ní', ne guun rá ní' se vaa sa' qui'yaj Diose che'é ní' adonj. Tzaj ne sese quinanó rá ní' ndaa vaa nanó rá nij síi man rihaan chumij nihánj, ne quirí' nu' nimán ní' nu' cavii nu' ca'anj nanj adonj.

<sup>11</sup> 'Q se xcax soj cuentá se vaa ve'é ndo'o qui'yaj soj, che'é se quinanó rá soj che'é cacun' qui'yaj soj, qui'yaj Diose á. 'Q se cunaj ca'mii soj che'é nana ca'mii núj do', ne niha' rá soj ni'yaj soj cacun' tumé yuvij 'nij sca'núj soj do', caráj cochroj ndo'o soj ni'yaj soj Diose do', guun rá soj quene'en soj man núj do', guun niha' rá soj qui'yaj soj sayuun man síi qui'yaj cacun' do' a. Nu' nihánj qui'yaj soj, tihaan soj se vaa nuveé sjj tumé cacun' me ma'an soj ma'. 'Q se síi sa' me soj nanj ei.

<sup>12</sup> Nuveé che'e síi tumé cacun' me qui'yáá 'unj yanj cartá yo' ma'. Nuveé che'e síi qui'yaj so' cacun' rihaan me qui'yáá 'unj yanj cartá yo' ma'. 'Q se qui'yáá 'unj yanj cartá yo' che'é se guun rá 'unj xcax ma'an soj cuentá se vaa

niha' rá ma'an soj cunq soj nana ca'mii núj rihaan soj, che'é se noco' nu' ní' man Diose adonj.

<sup>13</sup> Ne che'é se vaa qui'yaj soj ro', che'é dan guun niha' rá núj nanj adonj.

Ne dan me se guun niha' rá núj che'é se cunuu cuuj rá síí cu'naj Titó ne guun niha' rá so', qui'yaj soj a.

<sup>14</sup> Dan me se ca'mii 'unj nana sa' rihaan síí cu'naj Titó che'é soj, ne quisij ya nu' nana ca'mii 'unj rihaan so' che'é soj vaa ei. Dan me se ya vaa nu' nana a'mii núj rihaan soj, ne ya vaa nana ca'mii núj rihaan Titó, ne che'é dan taj a yo'ó chrej na'aj nó rihaan 'unj ma'.

<sup>15</sup> Ne nuu rá síí cu'naj Titó se vaa uxrá ve'é cuno soj nana cataj xna'anj so' rihaan soj, ne uxrá caráj cochroj soj rihaan so' asj cuchí' so' rihaan soj, ne cuchu'vi' soj caxrii yuvaá so' man soj a. Che'é dan uxrá doj 'ee rá so' man soj chuganj.

<sup>16</sup> Guun niha' rá 'unj, che'é se ca'vee gaá nucuaj yá yá 'unj man soj adonj.

## 8

*Nana nihánj taj xna'anj daj qui'yaj nij síí man Corinto, ne quirii nij so' sa'anj rihaan nij síí man Jerusalén a*

<sup>1</sup> Ne cataj xna'anj núj rihaan soj che'é se luj qui'yaj Diose che'é nij síí sa' noco' man Diose man estadó Macedonia, tinuj, nocoj.

<sup>2</sup> Dan me se quiran' uxrá nij so' sayuun, tzaj ne guun niha' uxrá rá nij so', ne nda' se síí niqwe ndo'o me nij so', tzaj ne guun niha' rá nij so' quirii nij so' sa'anj rihaan tinúú nij so' síí niqwe a. Nda' rá se 'yaj síí ru'vee 'yaj nij so' nanj adonj.

<sup>3</sup> Dan me se cavii raá ma'an nij so' rque nij so' nu' se vaa guun nucuaj nij so' rque nij so' ei. Nuveé sij quirii sa'anj me nij so' vaa, tzaj ne quirii nij so' noco' sa'anj adonj.

<sup>4</sup> Ne cachín ni'yaj uxrá nij so' rihaan núj se vaa qui'yaj núj se ndo'o ca'vee núj qui'yaj nij so' ndaa vaa qui'yaj yo'ó tinúú ní' síí quirii sa'anj rihaan yo'ó nij síí sa' noco' man Diose,

<sup>5</sup> ne doj a qui'yaj nij so' rihaan se vaa me rá núj qui'yaj nij so' nanj chuganj. Dan me se asino yaan guun rá nij so' qui'yaj nij so' nu' se vaa me rá síí 'nij ra'a man ní' qui'yaj nij so', gaá ne guun rá uún nij so' qui'yaj nij so' nu' se vaa me rá núj qui'yaj nij so', ne dan me se sa' uxrá cuno nij so' rihaan Diose nanj adonj.

<sup>6</sup> Che'é dan cataj xna'anj núj rihaan síí cu'naj Titó se vaa cuchí' so' rihaan soj sij ne chuman' Corinto, ne cataj so' se vaa ase vaa qui'yaj nij síí man estadó Macedonia ro', danj gaá ca'vee qui'yaj ma'an nij soj uún, gaá ne quisij quirii taran' soj sa'anj rihaan nij síí niqwe yo' ei.

<sup>7</sup> Dan me se 'yaj suun ndo'o nij soj nu' suun sa' adonj. Tzaj ne soj me se veé danj síí nucuaj ndo'o rá man Jesucristó me soj do', síí a'mii sa' me soj do', síí avii raá me soj do', síí niha' rá qui'yaj suun me soj do', síí 'ee rá man núj me soj do' ei. Che'é dan guun soj síí rii ndo'o sa'anj rihaan tinúú á.

<sup>8</sup> Se ca'né' 'unj suun rihaan soj daj qui'yaj soj ma'. Maan se me rá 'unj xcaj 'unj cuentá sese ya ya 'ee rá soj tinúú soj ndaa vaa 'ee rá nij síí man Macedonia tinúú nij so' a.

<sup>9</sup> O se aj ne'en soj se vaa qui'yaj ndo'o Jesucristó sij 'nij ra'a man ní' se luj che'é ní' á. Dan me se ru'vee ndo'o so' gaá cayáan so' rej xa', tzaj ne naquiyaj



niq̄e so' man so' ne ca'na' so' rihaan chumij nihánj che'é ní', gaa ne che'é se danj qui'yaj so' ro', che'é dan cavij sa' doj ní' nanj adonj.

<sup>10</sup> Maan se cataj xna'anj 'un̄j se vaa me raj qui'yaj soj á. Ne'en soj se vaa yo' cachén qui'yaj suun ndo'o soj, ne guun che'e soj racuáj soj man nij sí' niq̄e, ne che'é dan cavij sa' soj doj, sese

<sup>11</sup> tinavj soj suun guun che'e soj ei. Dan me se ase vaa ya ya guun niha' rá soj racuáj soj asij tacóo gaa guun che'e soj ro', veé danj guun rá soj tinavj soj nu' suun yo', ne racuáj soj sa'anj guun nucaj soj man nij sí' niq̄e ei.

<sup>12</sup> Sese ya ya rii nimán soj rque soj sa'anj yo', ne guun niha' rá Diose nacaj Diose sa'anj guun nucaj soj rque soj a. Se cataj Diose rque soj doj sa'anj, sese se guun nucaj soj qui'yaj soj danj ma'.

<sup>13</sup> Nuveé che'e se me rá núj cun̄u niq̄e soj ne cun̄u ru'vee yo'ó yuvij me a'mii núj danj ma'. 'O se me rá núj cuyaan gaa nu' nij tinuj ní' adonj.

<sup>14</sup> Maan se cuano nihánj ro', vaa ndo'o sa'anj rihaan soj, ne niq̄e ndo'o yo'ó tinúú ní', ne che'é dan n̄o xcúún soj racuáj soj man nij so' ei. Ne xraj, ne cachjin sa'anj rihaan soj, ne sese vaa sa'anj rihaan yo'ó tinúú ní', ne racuáj nij so' man soj, gaa ne cuyaan gaa nij tinuj ní' a.

<sup>15</sup> Ne ase vaa nana nihánj ro', danj vaa nana n̄o rihaan danj Diose che'é nij yuvij israelitá, taj yo': "Ne quinaj se chá rihaan sí' vaa ndo'o se chá rihaan ma'. Tanañ uún, ne ne cachjin se chá rihaan sí' vaa doj se chá rihaan ma'", taj nana yo' a.

<sup>16</sup> Nago' uxrá núj graciá rihaan Diose, che'é se ase vaa me ndo'o rá núj racuáj núj man soj ro', danj vaa guun ndo'o rá sí' cu'naj Titó racuáj so' man soj, qui'yaj Diose chuguanj.

<sup>17</sup> Dan me se cuno so' nana cataj xna'anj núj rihaan so' se vaa ca'anj so' chiháán soj, tzaj ne guun niha' rá ma'an so' racuáj so' man soj, ne che'é dan quirii nimán so' ca'anj so', ne dan me se ca'anj so' chiháán soj a.

<sup>18</sup> Ne cuchí' yo'ó tinúú ní' gá sí' cu'naj Titó, ne yo'ó so' ro', me sí' a'mii natáj ndo'o se-nana Diose nana sa', ne che'é dan ve'é a'mii taran' nij sí' amán rá ni'yaj man Jesucristó ni'yaj nij so' man so' ei.

<sup>19</sup> Ne ca'ne' taran' nij sí' amán rá ni'yaj man Jesucristó suun rihaan so' ca'anj so' gá núj racuáj so' man núj taçuachén núj sa'anj yo' rihaan nij sí' niq̄e yo', gaa ne uxrá ve'é ca'mij yuvij che'é sí' 'nij ra'a man ní', ne guun niha' doj rá ma'an núj qui'yaj suun núj suun yo' chuguanj.

<sup>20</sup> Tzaj ne na'vej rá núj cataj yuvij se vaa caxrj yuve núj ta'aj sa'anj ma'.

<sup>21</sup> 'O se nuchruj raa núj daj qui'yaj núj ne guun niha' rá sí' 'nij ra'a man ní' ni'yaj so' man núj, ne guun niha' rá yuvij uún ni'yaj nij yuvij man núj adonj.

<sup>22</sup> Ne ca'nej uún núj man yo'ó tinúú ní' gá roj so' á. Guun que'ee uxrá quene'en núj se vaa sij ya ya me rá qui'yaj suun me so', ne yaj ro', guun ya rá so' se vaa ya ya racuáj soj man nij sí' niq̄e, ne che'é dan niha' doj rá so' qui'yaj suun so' che'é soj nanj adonj.

<sup>23</sup> Dan me se xa' tinú' Titó, tzaj ne sí' 'yaj suun gá 'un̄j me so', 'yaj suun so' che'é ma'an soj, ne yavíj roj tinúú ní' ro', sí' cune' nij sí' amán rá ni'yaj man Jesucristó cutumé sa'anj yo' me roj so', ne ve'é ca'mij yuvij che'é Jesucristó, qui'yaj roj so' nanj adonj.

<sup>24</sup> Che'é dan gaa 'ee rá soj man nij so', ne ve'é ndo'o qui'yaj soj gá nij so', gaa ne quisij ya 'un̄j nana ve'é ca'mii núj che'é soj rihaan nij so', ne quene'en taran' nij sí' amán rá ni'yaj man Jesucristó daj qui'yaj soj ei.

## 9

<sup>1</sup> Taj che'é cataj xna'anj 'unj rihaan soj che'é sa'anj quirij soj rihaan nij sí sa' noco' man Diosé ma'.

<sup>2</sup> 'Q se aj ne'en 'unj se vaa guun niha' rá soj quirij soj sa'anj rihaan nij so', ne ve'é ca'mii 'unj rihaan nij tinúú ní' sí man estadó Macedonia che'é soj, cataj 'unj: "Yo' cachén ro', guun che'e nij sí man estadó Acaya quirij nij so' sa'anj rihaan nij sí sa' noco' man Diosé adonj", taj 'unj che'é soj, gaa ne guun niha' doj rá que'ee nij so' quirij ma'an nij so' sa'anj a.

<sup>3</sup> Tzaj ne ca'nej 'unj nij tinúú ní' cuchí' nij so' rihaan soj, ne racuíj nij so' man soj qui'yaj soj nu' se vaa cataj xna'anj 'unj che'é soj rihaan nij sí man estadó Macedonia a. Me rá 'unj racuíj nij so' man soj naqui'yaj chre' soj sa'anj yo', gaa ne quisij ya nu' nana ca'mii núj che'é soj, raj a.

<sup>4</sup> 'Q se sese cuchí' ta'aj nij sí man estadó Macedonia chiháan soj ga núj, ne sese xcáj nij so' cuentá se vaa taj vaj sa'anj nuu chre' qui'yaj soj, ne guun na'aj uxrá núj ei. Ne guun na'aj doj ma'an soj che'é nana ca'mii núj se vaa guun ya rá núj se vaa quirij soj sa'anj adonj.

<sup>5</sup> Che'é dan guun rá núj se vaa ca'nej núj man nij tinúú ní' cuchí' nij so' rihaan soj chuguanj. Dan me se asino yaan cuchí' nij tinúú ní' rihaan soj, ne racuíj nij so' man soj naqui'yaj chre' soj sa'anj yo', ne asa' cuchí' núj, gaa ne aj cunuu chre' sa'anj yo' a. 'Q se danj qui'yaj soj, gaa ne se gaa nanj guun rá nij sí man Macedonia se vaa na'vej rá soj qui'yaj soj se vaa cataj soj a. 'Q se quene'en nij so' se vaa ya me rá soj qui'yaj suun soj nu' suun yo' ei.

<sup>6</sup> Dan me se ne'en soj se vaa sí unô doj tzin' 'núú ro', doj tan' quirij so', ne sí unô nocoo uxrá 'núú ro', nocoo uxrá tan' quirij so', ne ase vaa ran' sí unô 'núú ro', danj quiran' soj che'é sa'anj rque soj vaa adonj.

<sup>7</sup> Xcáj yo'o yo'o soj cuentá me daj sa'anj rque yo'o soj, ne se quinanó rá soj che'é sa'anj rque soj mei. Se cataj soj se vaa maan che'é se no xcúún soj rque soj sa'anj, che'é dan rque soj ma'. 'Q se sí niha' rá quirij sa'anj rihaan tinúú ro', 'ee rá Diosé man so' adonj. Che'é dan inanj sa'anj rii nimán soj ro', go' soj á.

<sup>8</sup> Ne guun nucuj Diosé rque ndo'o Diosé nu' se sa' man soj, ne ca'vee se me ma'an sayuun quiran' soj, tzaj ne niganj nica' soj nu' se cachin man soj, ne guun nucuj soj qui'yaj soj nu' suun sa' ca'ne' Diosé rihaan soj chuguanj.

<sup>9</sup> Ase vaa nana nihánj vaa nana no rihaan danj Diosé, taj yo': "Sí niha' rá racuíj man nij sí niqee ro', daj chihaa mij se quini'yón Diosé se sa' qui'yaj so' a ma'", taj danj Diosé a.

<sup>10</sup> Dan me se Diosé me sí rque 'núú rihaan sí unô naa, ne Diosé me sí rque se chá rihaan sí na'aan rque, ne cavij sa' uxrá nij tinúú ní' che'é se sa' qui'yaj soj, qui'yaj uún Diosé ei.

<sup>11</sup> Ne me a' se sa' nica' soj, gaa ne guun niha' doj rá soj racuíj soj man tinúú ní', ne nago' tinúú ní' graciá rihaan Diosé che'é se vaa rque soj sa'anj man núj tacuachén núj rihaan nij so' ei.

<sup>12</sup> Ne xa' suun qui'yaj suun ní' che'é tinúú ní', tzaj ne nuveé inanj suun qui'yaj suun ní' yan caraa rque nij sí sa' noco' man Diosé me yo' ma'. 'Q se suun qui'yaj suun ní' yan nago' ndo'o yuvij graciá rihaan Diosé me suun yo' adonj.

<sup>13</sup> Ne quene'en nij yuvij se vaa ya uno soj se-nana Jesucristó nana sa' noco' ní', ne quene'en nij yuvij se vaa niha' rá soj rque soj si'yaj soj man nij sí sa' yanj chuman' Jerusalén do', man taran' nij tinúú ní' do', ne che'é dan guun

ya rá nij so' se vaa ya ya sij nocõ' man Dioso me soj, ne ve'é uxrá ca'mii nij so' che'é Dioso a.

<sup>14</sup> Ne cunu'u 'ee rá ma'an nij tinúú ní' man chuman' Jerusalén man soj, ne cachinj ni'yaj nij so' rihaan Dioso che'é soj, che'é yan uxrá racuúj Dioso man soj qui'yaj suun soj che'é nij so' nanj ei.

<sup>15</sup> Nago' uxrá ní' graciá rihaan Dioso che'é se ve'é uxrá qui'yaj Dioso che'é ní', ne daj chihaa mij se guun nucuaj ní' cataj ní' nu' se vaa qui'yaj Dioso che'é ní' a ma'.

## 10

*Nana nihánj taj xna'anj se vaa nõ xcúún nij síi man Corinto cunõ nij so' rihaan Pabló, ne se cuno nij so' rihaan nij síi tiha' yu'unj a*

<sup>1</sup> Xa' 'unj sij cu'naj Pabló, tzaj ne me rá 'unj gaa 'unj ndaa rá se vaa ma'an Jesucristó adõnj. Dan me se na'vej rá 'unj caxrii yuvaa 'unj man soj ma'. Maan se ve'é inanj ca'mij ga soj, raj a. Ne'en soj se vaa vaa yuvii 'unj sca'núj soj taj se vaa ve'é uxrá a'mii 'unj rihaan soj gaa nicún' 'unj rihaan soj, tzaj ne axrij yuvaa 'unj man soj gaa nicun' yanij 'unj a. Danj tu'va nij yuvii yo', tzaj ne cuano nihánj me cataj xna'anj 'unj rihaan soj

<sup>2</sup> se vaa qui'yaj soj se ndo'o, ne se qui'yaj tuchi' soj cumán soj, ne asa' cuchí' 'unj, gaa ne se caxrij yuvaa 'unj man soj man ruguanj. Ya quisij rá 'unj caxrii yuvaa 'unj man nij síi taj se vaa inanj 'yaj núj se vaa me rá nee man núj qui'yaj núj nanj á. Tzaj ne taj che'é caxrii yuvaa 'unj man ma'an soj, sese ve'é qui'yaj soj ma'.

<sup>3</sup> Dan me se vaa i'na' nee man núj cuano, tzaj ne ne unu' ma'an nee man núj ga síi chree ma'.

<sup>4</sup> Xa' se nucuaj núj, tzaj ne nuveé se nucuaj man rihaan chumii nihánj me yo' ma'. 'O se se nucuaj rqué ma'an ya Dioso man núj me yo' adõnj. Che'é dan guun nucuaj núj qui'yaj canaán núj rihaan cunudanj nij síi me rá cunu' ga Dioso, ne dan me se tirj' núj nana tiha' yu'unj nana avii raá yuvii,

<sup>5</sup> ne tirj' núj nu' nana aráan chrej rihaan yuvii cunõ nij yuvii se-nana Dioso, gaa ne guun rá nij yuvii cunõ nij yuvii rihaan Jesucristó, qui'yaj núj a.

<sup>6</sup> Ne asa' cuno ma'an soj rihaan Dioso, ne guun nucuaj núj qui'yaj núj sayuun man cunudanj nij tuvi' soj síi na'vej rá cunõ rihaan Dioso ei.

<sup>7</sup> Dan me se ni'yaj sa' soj man núj, ne xcaj soj cuentá daj vaa núj, ne sese vaa yo'o tuvi' soj me rá se vaa ya ya noco' so' man Jesucristó, ne xcaj so' cuentá se vaa ase vaa noco' so' man Jesucristó ro', ta'nga' danj vaa noco' ma'an núj uún man Jesucristó nanj adõnj.

<sup>8</sup> Dan me se ne'en soj se vaa ca'ne' síi 'nij ra'a man ní' suun rihanj, ne veé dan me se na'vej rá so' tirj' 'unj man soj ma'. 'O se me rá so' cavii sa' soj doj qui'yaj nanj adõnj. Ne ca'vee se ve'é ca'mij che'é suun atá 'unj, tzaj ne se guun na'aj 'unj daj chihaa mij ma'. 'O se ma'an ya síi 'nij ra'a man ní' ca'ne' suun rihanj se vaa ya nõ xcúnj ca'nej suun rihaan soj se vaa naquiyaj sa' soj doj nimán soj adõnj.

<sup>9</sup> Dan me se na'vej uxrá rá 'unj guun rá soj se vaa maan che'é se me rá 'unj tuchu'ví' 'unj man soj me a'neé 'unj nij yanj cartá rihaan soj a mei.

<sup>10</sup> 'O se ne'en soj se vaa cataj ta'aj nij síi 'nij sca'núj soj se vaa nda' se nana nucuaj achrón 'unj rihaan yanj cartá, tzaj ne gaa nicún' 'unj rihaan soj, ne ne guun nucuáa 'unj ca'mii sca' 'unj rihaan soj, taj nij so' a. Maan se taj yu'vee nó nana a'mii 'unj rihaan soj gaa nicún' 'unj rihaan soj, taj nij so' a.

11 Tzaj ne xcaj nij sí a'mii danj cuentá se vaa ase vaa nana achrón núj rihaan yanj cartá gaa nuvi' núj yáán ga soj ro', ta'nga' danj gaa suun qui'yaj suun núj asa' cuchí' núj rihaan soj adonj.

12 Dan me se xa' nij sí a'mii danj, tzaj ne taj nij so' se vaa sa' uxrá vaa ma'an nij so', ne che'é dan se quisij rá núj cataj núj se vaa 'yaj nij so' ndaa vaa 'yaj ma'an núj a. 'Q se ne'en núj se vaa nuveé sij acaj cuentá me nij so' ma'. 'Q se ma'an nij so' taj se vaa cunudanj yuvii 'yaj tucuaán noco' nij so' ro', me sí sa', ne taj uún nij so' se vaa ma'an nij so' me sí sa' doj rihaan yo'ó nij yuvii noco' tucuaán noco' ma'an nij so', ne inanj danj tu'va nij so',

13 tzaj ne daj chihaa mij se ca'mii xtá' núj ndaa vaa tu'va nij so' danj ma'. Maan se inanj che'é suun ca'ne' ma'an Diose rihaan ma'an núj me ca'mii núj a. Ne Diose me sí ca'ne' suun rihaan núj nata' núj se-nana Diose ndaa rihaan ma'an soj nanj adonj.

14 Dan me se ne 'anj núj qui'yaj suun núj rej na'vej rá Diose ca'anj núj ma'. 'Q se me rá Diose cuchí' núj rihaan soj cataj xna'anj núj se-nana Jesucristó nana sa' rihaan soj, ne danj qui'yaj núj, ne asino núj me sí cataj xna'anj se-nana Jesucristó rihaan soj nanj adonj.

15 Dan me se se ca'mii xtá' núj che'é se vaa qui'yaj yo'ó yuvii ma'. Se cataj núj se vaa ma'an núj me sí qui'yaj se vaa qui'yaj suun yo'ó yuvii ma'. Ne nó xcúún núj qui'yaj núj danj ma'. Maan se na'vij ndo'o núj se vaa cuchuman doj rá soj ni'yaj soj man Diose, gaa ne uxrá doj qui'yaj suun núj sca'núj soj, ndaa vaa me rá Diose qui'yaj núj,

16 gaa ne ndaa guun nucaj núj cataj xna'anj núj se-nana Diose nana sa' rihaan nij yuvii man yo'ó chuman' gan' doj uún a. Tzaj ne taj che'é cataj núj se vaa ma'an núj me sí qui'yaj se vaa qui'yaj suun yo'ó so' a ma'.

17 'Q se sí me rá ca'mii sa' che'é ma'an ro', no xcúún so' cataj so' se vaa sa' qui'yaj so' canoco' so' man sí 'nij ra'a man ní' ei.

18 'Q se sese cataj yo'ó so' se vaa ma'an so' qui'yaj sa', ne taj se 'yaj ma'. Tzaj ne sese cataj sí 'nij ra'a man ní' se vaa sa' qui'yaj so', ne ya ya sa' qui'yaj so' chuguanj.

## 11

1 Me rá 'unj ca'vej rá soj ca'mii snuj 'unj doj rihaan soj ei. 'Q se danj vaa ma'an, tzaj ne 'o se caraa x'naa soj doj chuguanj. Dan me se yo'ó danj qui'yaj soj nanj á.

2 Dan me se ase vaa me ndo'o rá Diose cutumé Diose man soj ro', danj vaa me rá 'unj cutumé 'unj man soj ei. 'Q se ase vaa yo'ó chana yaan taj cacun' tumé ro', danj vaa cunudanj nij soj rihaan 'unj, ne cataj 'unj rihaan Jesucristó se vaa ya nacaj so' man soj canoco' soj man orún' so', taj 'unj rihaan so' ei.

3 Tzaj ne chu'ví' 'unj se vaa ase vaa tiha' yu'unj xcuáá man chana cu'naj Eva gaa naá ro', danj gaa tiha' yu'unj sí chree man soj, ne se guun nucaj soj xcaj sa' soj cuentá, gaa ne tanaj xco' soj man nana sa' nari' soj gaa canoco' soj man Jesucristó, raj nanj adonj.

4 'Q se ca'vee se ca'na' me ma'an yo'ó so' rihaan soj, ne ca'vee se nata' so' yo'ó nana rihaan soj che'é Jesucristó, ne ca'vee se ino' doj gaa se-nana so' ga se-nana núj, tzaj ne nuveé sij rihuun rá me soj a ma'. Ase ra'yanj tanaj xco' soj Nimán Diose canoco' soj yo'ó nana xee.

<sup>5</sup> Taj che'é tiha' yu'unj nij sí ca'na' man soj ma'. 'O se sji sa' ndo'o me nij so', rá soj, ne apóstol cune' Jesucristó man me nij so', rá soj, tzaj ne nuveé sji sa' doj me nij so' rihaan 'unj, rá 'unj a ma'.

<sup>6</sup> Nda' se ataa nari' sa' 'unj ca'mii natáj 'unj rihaan soj, tzaj ne aj ne'en soj se vaa sji avii raá mej, ne nu' se vaa qui'yaj núj ve'é qui'yaj núj, quene'en cunudanj soj nanj adonj.

<sup>7</sup> Ne'en soj se vaa ne ca'nee 'unj sa'anj man soj gaa ca'mii natáj 'unj se-nana Diose nana sa' rihaan soj ma'. Ne dan me se nuu niqué 'unj doj, tzaj ne cavii sa' soj doj adonj. Che'é dan nij qui'yáa 'unj, rá soj na'. Cacun' me se vaa qui'yáj, rá soj na'.

<sup>8</sup> Ne nicaj 'unj sa'anj rque nij sí amán rá ni'yaj man Jesucristó sí man yo'ó chuman', ne cutún' 'unj sa'anj yo' yan guun nucuáa 'unj qui'yaj suun 'unj che'é soj nanj adonj.

<sup>9</sup> Ne gaa cayaán 'unj ga soj, ne gaa cachiin rasuun mán 'unj, ne a 'ó rasuun ne cachin 'unj man soj a ma'. Maan se nij tinúu ní' nij sí ca'na' estadó Macedonia ro', rque nij so' nu' se vaa cachiin manj, ne dan me se ne caraá chruú 'unj a doj rihaan soj a ma'. Dan me se veé danj qui'yáj rej rihaan, ne se caráj chruj rihaan soj, raj man adonj.

<sup>10</sup> Che'é se yanj Jesucristó ga 'unj, che'é dan ne'en soj se vaa ya vaa nana a'mii 'unj rihaan soj, ne cataj xna'anj 'unj rihaan soj cuano se vaa se guun daj chihaa míj cataj yuvij man estadó man soj se vaa quita'aj se-sa'anj soj ma'.

<sup>11</sup> Me che'é tu'vaj danj, rá soj ga. Danj tu'vaj che'é se ne 'ee raj man soj, rá soj na'. Taj ma'. 'O se Diose me sí ne'en se vaa ya ya 'ee rá 'unj man soj ei.

<sup>12</sup> Tzaj ne ne'en soj se vaa me rá yo'ó nij so' cataj nij so' se vaa 'o cuyaan vaa se 'yaj núj ga se 'yaj nij so', ne che'é dan ase vaa 'yáa 'unj cuano ro', ta'nga' danj qui'yáa 'unj xraj, ne se ca'nej 'unj sa'anj man soj ma'. Ne se ca'vee cataj nij so' se vaa 'o cuyaan 'yaj nij so' ga núj a ma'.

<sup>13</sup> Dan me se taj nij so' se vaa me nij so' apóstol cune' Jesucristó man nata' se-nana so', tzaj ne a'mii ne nij so', ne dan me se 'yaj suun nij so' rihaan soj, tzaj ne tiha' yu'unj nij so' man soj nanj adonj. Ne ase vaa apóstol cune' Jesucristó man ro', danj vaa nij so' rihaan soj a.

<sup>14</sup> Tzaj ne taj se 'yaj sese cuchumán rá soj ni'yaj soj man nij so' ma'. 'O se ma'an sí chree cu'naj Satanás naqui'yaj ino man, ne naqui'yaj sí chree yo' man yo' yo' se-mozó Diose chuguun ndo'o, ne tiha' yu'unj so' man soj nanj adonj.

<sup>15</sup> Ne ase vaa 'yaj sí chree ro', danj 'yaj uún nij so' a. Che'é dan, nuveé se ya'anj tiha' me yo', sese ne'en nij sí 'yaj suun che'é sí cu'naj Satanás qui'yaj nij so' danj a ma'. Ca'vee natuna nij so' man ma'an nij so' guun nij so' sí 'yaj suun che'é rej cunu sa' nimán yuvij ei. Tzaj ne che'é se 'yaj ndo'o nij so' sayuun ro', che'é dan uxrá quiran' nij so' sayuun nu' cavii nu' ca'anj adonj.

<sup>16</sup> Dan me se cataj xna'anj uún 'unj rihaan soj se vaa se guun cataj soj se vaa sji snúu mé 'unj ma'. Ca'vee se sji snúu ya ya mé 'unj rá soj, tzaj ne ve'é nacaj soj manj, ne ve'é cuno soj nana ca'mij, ne ca'mii xtá' 'unj doj che'é ma'anj ndaa ase vaa 'yaj yo'ó nij so' ei.

<sup>17</sup> (Nuveé nana rque sí 'nij ra'a man ní' rihaan 'unj me nana nihánj nana ca'mii 'unj rihaan soj cuano ma'. Tananj che'é se snúu rma'anj, don ca'mii 'unj nana nihánj rihaan soj nanj ei.)

<sup>18</sup> Dan me se che'é se que'ee yuvij a'mii xtá' che'é se vaa qui'yaj ma'an nij so' ro', che'é dan ca'mii xtá' ma'an 'unj doj rihaan soj gaa ei.

19 'Q se ne'én 'un̄j se vaa síi avii ndo'o raq̄ me soj, rá ma'an̄ soj, ne che'é dan ne ne'en soj se vaa sij snúú me nij síi ca'na' rihaan soj, ne che'é dan niha' rá soj ve'é cun̄o soj rihaan nij so' a.

20 Ne nda' se rii ta'nga' ndo'o nij so' rihaan soj do', nda' se a'néj nij so' nu' si'yaj soj do', nda' se tiha' yu'un̄j nij so' man soj do', nda' se sa' doj vaa nij so' rihaan soj rá nij so' do', nda' se ase vaa síi oxro xruu soj vaa nij so' do', tzaj ne ve'é uno soj rihaan nij so' á.

21 Che'é dan guun na'aj núj doj tzin' rihaan soj, che'é se ne guun nucaj núj qui'yaj núj se nij yo' rihaan soj a meí. 'Q se che'é se ne quisij rá núj qui'yaj quij núj ro', che'é dan sa' doj vaa yo'ó nij so', rá soj asanj.

Ne nda' se nana snuj me nana nihánj, tzaj ne ase vaa quisij rá nij so' ca'mii xta' nij so' ro', danj gaa quisij rá ma'an̄j ca'mii xta' ma'an̄j rihaan soj ei.

22 Dan me se yuvi israelitá me nij so', taj nij so' na'. 'Q se veé danj sij israelitá me ma'an̄j uún nan̄j á. Noco' xna'an̄j tuv̄i' nij so' ga síi cu'naj Abraham síi cane gaa naá, taj nij so' na'. 'Q se veé danj sij noco' xna'an̄j tuv̄i' ga so' mej uún nan̄j ei.

23 'Yaj suun nij so' che'é Jesucristó, taj nij so' na'. 'Q se veé danj qui'yaj suun gaa 'un̄j do', nan̄j á. 'Q se nihánj me nana snuj cataj 'un̄j rihaan soj se vaa 'un̄j me síi 'yaj suun doj che'é Jesucristó rihaan nij so' nan̄j ei. Dan me se 'un̄j nihánj ro', me síi qui'nij doj taga' che'é Jesucristó rihaan nij so' do', uxrá go' nii cuartá xráá 'un̄j che'é Jesucristó do', que'ee güii daj doj se cavi' 'un̄j che'é Jesucristó do',

24 quisij 'un' ya quita'aa nij síi uun chij rihaan nij yuvi israelitá manj, ne ic̄o xnu' ca'an̄j ya go' nij so' cuartá xrá a.

25 Va'nuj go' nii chruun xrá a. Ne yuun go' nii yahij manj a. Quisij va'nuj quiri' rihoo vaj 'un̄j rihaan na ya'an̄j, ne ca'an̄j cunuú rihoo yo' rque na ya'an̄j, ne 'o güii 'o yan' quitáá 'un̄j rihaan na ya'an̄j cunuú ndo'o ya a.

26 Dan me se aj cachée ndo'oj nu' nij chrej, ne vaa ndo'o sayuun quirán' 'un̄j rihaan chráá do', che'é síi ituu do', che'é nij síi israelitá ne noco' man Jesucristó do', che'é nij síi yan̄j do', che'é yuvi yan̄j chuman' do', che'é nij yuvi yan̄j quij do', che'é na ya'an̄j do', che'é síi tiha' yu'un̄j manj se vaa tinúj me nij so' do' á.

27 Dan me se aj suun ndo'o quirán' 'un̄j rihaan nij sayuun, ne que'ee yan' ne ca'vee cotoj, ne ta'aj güii me se quina'aa ndo'o rquej, ne yo'ó ta'aj güii canaco' ndo'oj na, ne quisij que'ee ndo'o ne quirij chraa chaj, ne ta'aj güii me se go' ndo'o ya nuvij xrá, ne yo'ó ta'aj güii me se ne quir̄i' yá 'un̄j yatzij caráan xráá 'un̄j uún, ne dan me se vaa can̄j yá 'un̄j nda' rasuun nan̄j á.

28 Tzaj ne se ca'mii 'un̄j che'é yo'ó sayuun quirán' 'un̄j a ma'. Maan se nihánj nanó rá 'un̄j che'é cunudan̄j nij síi amán rá ni'yaj man Jesucristó man 'o 'o chuman' a.

29 Sese ne nucaj nimán yo'ó tinúú ní, ne ase vaa ran' nimán so' ro', danj ran' nimanj, ne sese qui'yaj yo'ó tinúú ní cacun', ne uun na'aj uxrá ma'an̄j adonj.

30 Dan me se, sese me rá soj ca'mii xta' 'un̄j, tzaj ne inanj cataj xna'an̄j yaj se vaa ne guun nucaj ma'an̄j qui'yaj suun ma'an̄j a ma'.

31 Diose Rej Jesucristó sij 'nij ra'a man ní' ro', ne'en se vaa a'mii yá 'un̄j, ne ve'é uxrá ca'mii ní' che'é so' nu' cavii nu' ca'an̄j nan̄j ei.

<sup>32</sup> Gaa ca'anj 'unj chuman' cu'naj Damasco ro', ne sí nicaj suun 'yaj suun che'é rey cu'naj Aretas ro', caráán so' rej atúj yuvij chuman', che'é yan guun rá so' quita'aa so' manj,

<sup>33</sup> tzaj ne na'núj nij tuví' 'unj yo'ó ta'yaa nii taj chraan nicun' nu' anicaj tu'va chuman' yo', ne ca'née nij so' rá 'o scaa manj, ne tinanij nij so' rej xe' manj, ne dan me se curihanj 'unj chuman' yo', ne quinanii 'unj rihaan sí nicaj suun yo' ei.

## 12

<sup>1</sup> Dan me se taj a doj se quirí' ní' che'é yan ca'mij sa' ní' che'é ma'an ní', tzaj ne nihánj me ca'mij 'unj che'é doj rasuun curuvi' rihanj ei. Ne cataj xna'anj 'unj che'é se vaa tihaan sí 'nij ra'a man ní' rihanj a.

<sup>2</sup> Dan me se ne'enj man 'o sí amán ndo'o rá ni'yaj man sí 'nij ra'a man ní' ei. Ne quisij xca'anj yo' nicaj Diose man so', ca'anj so' rej xta', qui'yaj Diose, ne ndaa va'núj xta' cavii so' ca'anj so' ei. Dan me se ma'anj me yo' ei. Tzaj ne ne ne'enj sese inanj nimanj cavii ni', ase nu' nee manj cavii ca'anj ni', ne ne'en uxraj ma'. Orún' Diose me sí ne'en daj vaa 'unj gaa cavii 'unj ca'anj 'unj a.

<sup>3-4</sup> Ne ne'én 'unj se vaa cavii 'unj ndaa rej sa' ndo'o yanj ma'an Diose, qui'yaj Diose, ne cunó 'unj nana sa' ndo'o nana ne nó xcúún yuvij ca'mij yuvij a. Tzaj ne ne ne'enj sese inanj nimanj cavii ca'anj ni', ase nu' nee manj cavii ca'anj ni', ne ne'en yaj a mei. Orún' Diose me sí ne'en daj vaa 'unj gaa cavii 'unj ca'anj 'unj ei.

<sup>5</sup> Dan me se ve'é ca'mij che'é se vaa quiranj nda' rasuun, tzaj ne se ca'mij che'é se vaa qui'yáj danj ma'. Maan se inanj cataj xna'anj 'unj se vaa nuveé 'o sí sca' mej ma'.

<sup>6</sup> Dan me se ca'vee se ve'é ca'mij che'é ma'anj, tzaj ne se ca'mii snuj 'unj ma'. 'O se nana ya ca'mij á. Dan me se me rá 'unj xcaj yuvij cuentá che'é inanj daj vaa 'yáá 'unj ni'yaj nij so' do', che'é inanj nana a'mii 'unj uno nij so' do', gaa ne ca'vee xcaj sa' nij yuvij cuentá daj sij mé 'unj á. Tzaj ne taj che'é cataj xna'anj 'unj yo'ó nana rihaan nij yuvij a mei. Che'é dan se cataj xna'anj 'unj

<sup>7</sup> che'é cunudanj nij nana tihaan naca Diose rihanj a mei.

Dan me se ne ca'vej rá Diose ca'mij xta' 'unj ma'. Che'é dan ca'vej Diose qui'yaj sí chree cu'naj Satanás sayuun man nee manj, che'é rej se guun rá 'unj se vaa sij sa' ndo'o mej a.

<sup>8</sup> Ne quisij va'núj ya cachín n'yáá 'unj rihaan sí 'nij ra'a man ní' se vaa ca'nee so' sayuun yo' rihanj a.

<sup>9</sup> Tzaj ne 'o se cataj so' rihanj a:

—Ma'anj raçuíj mán so', ne cavij sa' so' á. Che'é dan se ca'néj 'unj sayuun yo' rihaan so' ma'. 'O se che'é se vaa ninaj nee mán so' ro', che'é dan guun nuçuáá 'unj raçuíj 'unj mán so' qui'yaj suun so' adonj —taj sí 'nij ra'a man ní' rihanj a.

Che'é dan guun niha' rá 'unj cataj xna'anj 'unj se vaa ninaj 'unj, ne guun nucuj Jesucristó raçuíj so' manj qui'yaj sunj a.

<sup>10</sup> Dan me se che'é se ninaj 'unj do', che'é se uun na'aj 'unj do', che'é se rán' 'unj sayuun do', che'é se 'yaj ndo'o nii sayuun manj do', che'é nu' se rán' 'unj che'é Jesucristó do', che'é dan guun niha' ndo'o raj chuguanj. 'O se che'é se sí ninaj mej ro', che'é dan guun nuçuáj qui'yaj sunj nanj adonj.

11 Dan me se nda' rá se tu'va 'o sí snúu tu'vaj, tzej ne ma'an soj qui'yaj don tu'vaj danj ca'mii snuj 'unj doj ei. 'Q se ma'an soj me sí nō xcúun cataj se vaa sa' 'yá ei. Nda' se taj yu'vee nó 'unj, tzej ne nuveé sij sa' doj me yo'ó nij so' rihanj ma'. Dan me se sij sa' uxrá me nij so', ne ma'an nij apóstol cune' ya ma'an Jesucristó me nij so', rá soj, tzej ne nuveé sij sa' doj me nij so' rihanj ma'.

12 'Q se 'unj me se suun sa' nocoo ya qui'yáj ni'yaj soj, ne suun sa' nocoo 'yaj nij apóstol cune' Jesucristó man me suun sa' qui'yáj ni'yaj soj, ne dan me se naqui'yaj naj ndo'o 'unj nimanj, ne ne ca'ne' raj ga suun 'yaj suun sa' nocoo yo' ma'.

13 'Q se caraa x'naa soj doj rihanj sese nij ca'mij rá soj ei. Xa' 'unj, tzej ne a doj ne naqui'yaj yanj 'unj man soj ma'. 'Q se orún' rasuun me naqui'yaj yanj 'unj adonj. Ne ca'vej ya raj naqui'yaj chrúj rihaan soj ma'. Tzej ne sese nij qui'yáj ne cachinj 'unj sa'anj rihaan soj, rá soj, ne caraa x'naa soj ei.

14 Dan me se aj qui'yaj chuvii uún 'unj cuchí' 'unj rihaan soj, ga ne quisij va'nuj cuchí' 'unj rihaan soj, ne asa' cuchí' 'unj rej man soj, ne se ca'néj 'unj rasuun man soj ma'. Maan se me raj cunō sa' ma'an soj rihanj ei. Dan me se ase vaa ta'nij vaa soj rihanj, ne ne nó xcúun xnii caraa sa' xnii rasuun che'é rej xnii ma'. 'Q se maan rej xnii nō xcúun caraa sa' rasuun che'é ta'núí so' adonj.

15 Guun niha' rá 'unj cutun' 'unj sa'anj che'é nimán soj, ne ndaa nimán ya 'unj me raj qui'yaj sunj che'é nimán soj chuguanj. Dan me se che'é se 'ee raj man soj, ne doj a rá soj chihá'. Me che'é 'yaj soj danj ga.

16 Dan me se ne ca'ne' 'unj rasuun man soj ma'. Tzej ne vaa yuvii cataj se vaa tiha' yu'unj uxrá 'unj man soj,

17 ne cataj nij yuvii se vaa ca'néé 'unj yo'ó so' cuchí' so' rihaan soj, ne racuíj yo'ó so' manj tiha' yu'unj núj man soj, ne ca'néj núj rasuun rihaan soj, cataj nij yuvii adonj.

18 Dan me se ya cataj xna'anj 'unj rihaan sí cu'naj Titó se vaa cuchí' so' rihaan soj, ne ca'néé 'unj yo'ó tinúú ní' ca'anj ga so' á. Tiha' yu'unj sí cu'naj Titó man soj na'. Taj ma'. 'Q se veé orún' Nimán Diose noco' núj ga sí cu'naj Titó, ne cuyaan qui'yaj sí cu'naj Titó ga 'unj nanj adonj.

*Nana nihánj taj xna'anj se vaa me rá Pabló tanáj nij sí man Corinto chrej chí'í, ne se canó xcúun Pabló qui'yaj so' sayuun man nij sí tumé cacun' a*

19 Dan me se che'é se chu'vi' ndo'o núj se vaa cuta' soj cacun' xráá núj me se ca'mii ndo'o núj nu' nana nihánj, rá soj na'. Taj ma'. 'Q se ne'en Diose daj a'mii núj, ne che'é se sij nocō' man Jesucristó me núj, ne ca'mii núj nu' nana nihánj che'é se 'ee rá núj man soj, ne me rá núj narí' sa' soj canocō' soj man Diose, tinuj, nocoj.

20 'Q se chu'vi' 'unj doj tzin' se vaa cuchí' 'unj chiháán soj ne quene'enj se vaa ne 'yaj soj ndaa vaa nō xcúun soj qui'yaj soj, ne cataj soj se vaa ne 'yáá 'unj ndaa vaa me rá soj qui'yáá 'unj a. Chu'vi' 'unj se vaa quene'én 'unj se vaa guun yuvaá soj rihaan tinúú soj dō', se vaa guun xcoj ruvaá rá soj ni'yaj soj tinúú soj dō', se vaa caxrii yuvaá soj man tinúú soj dō', se vaa cuxra' ta'aj soj man ma'an soj ne guun rá soj cunú' soj dō', se vaa nana soj cuentó ne che'é tinúú soj dō', se vaa ca'mii xta' soj dō', se vaa gaá sayuun sca'núj soj dō' chuguanj.

21 Dan me se chu'vi' uún 'unj se vaa asa' cuchí' 'unj rihaan soj, ne guun na'aj ndo'o 'unj qui'yaj Diose che'é soj, ne quinanō ndo'o rá 'unj che'é que'ee nij



tinúú ní' nij sí' tumé cacun', che'é se na'vej rá' nij so' tǎnáj nij so' cacun' ne cunuu sa' nimán' nij so' a. 'O se yo'q cǔtumé nij so' cacun' se vaa nij ndo'o 'yaj nij so' dǒ', se vaa 'yaj nij so' cacun' ga' yo'ó chana' dǒ', ñanj ei.

## 13

<sup>1</sup> Dan me se cuchí' uún' 'unj, ne quisij va'nuj cuchí' 'unj rihaan soj, ne sese vaa yo'q tinúú soj sí' tumé cacun', ne sese canicun' vj'j sí' quene'en dǒ', sese canicun' va'nuj sí' quene'en dǒ', ne quirí' so' sayuun ñanj á.

<sup>2</sup> Gaa quisij vj'j cuchí' 'unj rihaan soj, ne cataj xna'anj 'unj rihaan soj se vaa sese cuchí' uún' 'unj rihaan soj, ne se caráj x'naj quene'enj man sí' qui'yaj cacun' ma'. Ne cuano nihánj me se nuví' 'unj ne rej man soj, tzaj ne cataj xna'anj uún' 'unj rihaan soj se vaa ya' ya' qui'yáá' 'unj sayuun man cunudanj nij sí' tumé cacun' yo' ei.

<sup>3</sup> 'O se ca'vee don ma'an soj me rá' quene'en sese ya' ya' Jesucristó me sí' rqué nana' a'mii' 'unj rihaan soj ei. Xa' Jesucristó, tzaj ne nuveé s'j ninaj me so' rihaan soj ma'. 'O se s'j guun nucuaj ndo'o tumé man soj me Jesucristó ei.

<sup>4</sup> Dan me se ca'vej rá' Jesucristó guun nucuaj doj yuvi' rihaan so', ne cachrón' nii' man so' rihaan rcutze, tzaj ne guun nucuaj so' cunuu i'na' uún' so', qui'yaj Diose, ne che'é se noco' núj man Jesucristó ro', che'é dan ase vaa sí' ninaj vaa ma'an' núj rihaan chumi' nihánj, tzaj ne Diose ro', me sí' rqué se nucuaj man núj, gaa ne guun nucuaj núj ga' Jesucristó qui'yaj suun núj ga' nij soj ñanj adǒnj.

<sup>5</sup> Xcaj ma'an soj cuentá sese ya' ya' noco' soj se-tucuanj Jesucristó ei. Ne'en soj se vaa yanj Jesucristó ga' soj na'. Ase ne ne'en soj xa'. Ya' ne Jesucristó ga' soj, sese nuveé s'j tiha' yu'unj me soj chuguanj.

<sup>6</sup> 'O se amán' ya' raj, ne me raj quene'en soj se vaa nuveé s'j tiha' yu'unj me núj man chuguanj.

<sup>7</sup> 'O se achíin' ni'yaj núj rihaan Diose se vaa a' ó' se chí'ij se qui'yaj soj mei. Nuveé che'e se me rá' núj cataj yuvi' se vaa sa' qui'yaj núj me achíin' ni'yaj núj danj ma'. 'O se che'é se me rá' núj qui'yaj sa' inanj soj, che'é dan achíin' ni'yaj núj danj rihaan Diose ei. Ca'vee se cataj yuvi' se vaa sí' tiha' yu'unj me ma'an' núj, tzaj ne yo'q qui'yaj sa' soj ei.

<sup>8</sup> 'O se se guun nucuaj núj tiha' yu'unj núj man Diose daj vaa nimán' 'o' 'o' ní' ma'. Maan se inanj a' tana'j rquée núj ca'mii' núj nana' ya' che'é 'o' 'o' ní' a.

<sup>9</sup> Ne ca'vee se nuveé s'j nucuaj me núj, tzaj ne uun niha' rá' núj che'é se s'j nucuaj me soj, ne achíin' ni'yaj núj rihaan Diose se vaa rqué Diose nu' se vaa achíin' man soj, gaa ne qui'yaj suun soj che'é so' a.

<sup>10</sup> Che'é dan cuano nihánj me se cachrón' 'unj nana' nihánj rihaan yanj cartá nayaá' soj a. Dan me se nda' se nuví' 'unj yáán' ga' soj cuano, tzaj ne cachrón' 'unj nana' nihánj, gaa ne güii' cuchí' 'unj rihaan soj me se se gaa suun rihanj qui'yaj ndo'oj sayuun man soj a. Dan me se ca'ne' sí' 'nij' ra'a man ní' suun rihanj cǔtumej man soj, ne dan me se na'vej rá' so' quirí' soj qui'yáj ma'. 'O se me rá' so' racuíj 'unj man soj yan canoco' sa' soj man so' adǒnj.

*Nana' nihánj taj xna'anj se vaa a'né' nij tuvi' Pabló saludó rihaan nij sí' man Corinto a*

<sup>11</sup> Ne vaa doj nana' me raj cataj xna'anj 'unj rihaan soj, tinuj, nocoj. Dan me se gaa niha' nimán' soj ei. Racuíj soj nana' sa' man tinúú soj yan guun nucuaj soj canoco' soj man Diose á. Se guun cano' tuvi' soj ga' tuvi' soj ma'. 'O

se cyaan gaa nimán soj ga tuvi' soj ei. Ne cayaán Diose ga soj ei. 'Q se Diose me sí 'yaj nuu 'ee rá ní' tinúú ní', ne vaa xej nimán ní', 'yaj Diose a.

<sup>12</sup> Ne gaa nari' tuvi' soj ga tinúú soj, ne uxrá ve'é ca'mii soj ga tinúú soj ei. Danj me rá Diose qui'yaj soj chuguanj.

<sup>13</sup> Ve'é cayaán nij soj, rá cunudanj nij sí sa' rihaan Diose ei.

<sup>14</sup> Dan me se me rá núj qui'yaj ndo'o Jesucristó sji 'nij ra'a man ní' se luj che'é cunudanj soj, ne me rá núj gaa 'ee rá Diose ni'yaj Diose man cunudanj soj, ne me rá núj ve'é ca'mii cunudanj soj ga tinúú soj qui'yaj Nimán Diose nanj adonj.

## Nihánj me 'o yanj cartá qui'yaj sí cu'naj Pabló ca'néé so' rihaan nij yuvij nocó' man Diose yanj estadó cu'naj Galacia a

<sup>1</sup> Sí cu'naj Pabló mej, ne dan me se gaa cavi' Jesucristó, ne cunuu i'na' uún so', qui'yaj Diose, ne Jesucristó do', Rej ní' Diose do', me roj sí cune' mán 'unj guún 'unj apóstol nata' se-nana Jesucristó rihaan cunudanj nij yuvij man rihaan chumij a. Nuveé inanj yuvij me sí cune' mán 'unj ma'. Ma'an ya Diose cune' mán 'unj adonj.

<sup>2</sup> Dan me se taran' nij tinúú ní' sí ne ga 'unj ro', 'yaj yanj cartá nihánj ga 'unj, ne ca'nej núj yanj nihánj rihaan nij soj sij amán rá ni'yaj man Jesucristó sij yanj nij chuman' naj rihaan estadó Galacia a.

<sup>3</sup> Dan me se me rá núj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é nij soj, ne me rá núj gaa xej nimán soj qui'yaj roj so' adonj.

<sup>4</sup> Dan me se chi'ij vaa nimán yuvij man rihaan chumij nihánj cuano, ne me rá Rej ní' Diose quinani' ní' rihaan sayuun quiran' nij yuvij man rihaan chumij nihánj, ne che'é dan ca'vej Jesucristó sij 'nij ra'a man ní' cavi' ya ma'an so' che'é cacun' tumé ní' adonj.

<sup>5</sup> Sa' uxrá vaa 'yaj Diose, cataj ní' nu' cavii nu' ca'anj a. Veé danj gaa ya ei.

*Nana nihánj taj xna'anj se vaa se canoco' ní' yo'ó nana ma'. Maan se inanj se-nana Jesucristó canoco' ní' a*

<sup>6</sup> Ne ne'en uxraj me che'é me rá nij soj tanáj ra'yanj soj man Diose ne canoco' soj yo'ó nana ma'. Ne'en soj se vaa qui'yaj ndo'o Jesucristó se luj che'é soj, ne che'é dan canacúún ma'an Diose man soj canoco' soj man so', ne me che'é me rá soj tanáj soj man Diose ga.

<sup>7</sup> Nuveé se vaa yo'ó se-tucañj Diose ma'. Maan se vaa nij sí me rá naqui'yaj ino se-tucañj Jesucristó chuguanj. Tzaj ne inanj se-nana Diose nana cataj xna'anj núj rihaan soj che'é Jesucristó me nana sa' adonj.

<sup>8</sup> Che'é dan se ca'vej rá soj nata' yuvij yo'ó nana naca rihaan soj mei. 'O se inanj nana nata' núj rihaan soj asij rque ro', cuchuman rá soj ei. Dan me se ca'vee se ndaa ma'an núj do', ca'vee se ndaa 'o se-mozó Diose nanij rej xta' do', nata' yo'ó nana naca rihaan soj, tzaj ne yo'ó guun ya rá soj se vaa quiran' ndo'o sí a'mii yo'ó nana yo' sayuun qui'yaj Diose á. 'O se taj sí no xcúún natuna se-nana Diose ma'.

<sup>9</sup> Dan me se aj cataj xna'anj núj rihaan soj, ne cuano nihánj me cataj xna'anj uún 'unj rihaan soj, se vaa sese ino gaa nana nata' yo'ó so' rihaan soj ga nana canoco' soj asij rque, ne guun ya rá soj se vaa quiran' uxrá sí nata' yo'ó nana yo' sayuun, qui'yaj Diose ei.

*Nana nihánj taj xna'anj se vaa inanj me rá sí cu'naj Pabló gaa niha' rá Diose ni'yaj Diose man so' a*

<sup>10</sup> Me rá 'unj gaa niha' rá yuvij ni'yaj yuvij mán 'unj, rá soj na'. Taj mei. 'O se inanj me rá 'unj gaa niha' rá Diose ni'yaj Diose manj ei. Dan me se gaa rque me se inanj me rá 'unj gaa niha' rá yuvij ni'yaj yuvij manj, tzaj ne yaj ro', me taj ma'. Sese inanj guun rá 'unj gaa niha' rá yuvij ni'yaj yuvij mán 'unj, ne nuveé sij 'yaj suun che'é Jesucristó mé 'unj a man chuguanj.

*Nana nihánj taj xna'anj se vaa nana a'mii natáj Pabló ro', orún' Jesucristó me sí tucu'yón nana yo' man so' a*

11 Me rá 'unj xcaj nij soj cuentá se vaa se-nana Diose nana sa' a'mii natáj 'unj ro', nuveé nana cavii raq yuvij me nana yo' ma'.

12 Ne nuveé yuvij nata' nana yo' rihanj ma'. Ne taj sí tucu'yón nana yo' manj ma'. Tzaj ne ma'an ya Jesucristó me sí qui'yaj xcaj 'unj cuentá che'é nana sa' yo' adonj.

13 Aj ne'en soj daj vaa raj asij rque doj adonj. Dan me se gaa canocó' 'unj tucuáan noco' nij yuvij israelitá, ne dan me se qui'yaj ndo'o 'unj sayuun man taran' nij sí cuchumán rá ni'yaj man Diose, ne qui'yaj suun uxrá 'unj che'é se me rá 'unj tiri' 'unj man nij so' a.

14 Ne tucuáan noco' nij yuvij israelitá ro', 'unj me sí noco' sa' doj tucuáan yo' rihaan que'ej nij tuvi' 'unj sí israelitá vaa cuyaan ga 'unj ei. Ne 'unj ro', me sí a'née sa' doj nu' se-tucuanj xi' 'unj sij israelitá adonj.

15 Tzaj ne asij ataa ca'ngaa 'unj, ne guun rá Diose se vaa qui'yaj sunj che'é so' ei. Dan me se qui'yaj ndo'o Diose se luj che'ej se vaa canacúun so' manj qui'yaj sunj che'é so',

16 ne tihaan so' ta'ní so' Jesucristó rihanj, che'é se me rá so' ca'anj 'unj nata' 'unj se-nana so' nana sa' rihaan nij yuvij yanij nanj adonj. Tzaj ne 'unj me se a doj ne ca'anj 'unj xna'anj 'unj man yuvij daj qui'yaj canocoj man Diose ma'.

17 Dan me se vaa nij sí yanj chuman' Jerusalén, ne apóstol cune' Jesucristó nata' se-nana so' rihaan yuvij me nij so', ne dan me se asij ataa cune' Jesucristó mán 'unj ro', cune' Jesucristó man nij so', tzaj ne ne cuchí' 'unj rihaan nij so' xna'anj 'unj man nij so' daj qui'yaj ma'. Maan se ra'yanj ca'anj 'unj cuaj estadó Arabia, ne canicaj 'unj ca'naj chuman' Damasco adonj.

18 Quisij va'nuj ya yo' nocoj man Jesucristó ta' asuun, gaa ne ca'anj 'unj chuman' Jerusalén, gaa ne cunuun yaan 'unj man sí cu'naj Pedró a. Dan me se nanó 'unj cuentó ga so', ne cayáan 'unj tucuá so' rque xnu' güii a.

19 Ne dan me se gaa canej ga so' me se quene'enj man sí cu'naj Santiagó tinúú sí 'njj ra'a man ní' uún a. Tzaj ne orún' so' quene'enj nanj á. Ne ne quene'en 'unj man yo'ó nij apóstol ma'.

20 Ne'en ya Diose se vaa ya vaa nana nihánj nana cachrón 'unj rihaan yanj nihánj adonj. Nuveé nana ne me nana nihánj ma'.

21 Dan me se curihanj 'unj chuman' Jerusalén, ne cachéé 'unj nu' chuman' naj estadó Siria do', nu' chuman' naj estadó Cilicia do',

22 tzaj ne nij sí man estadó Judea sí cuchumán rá ni'yaj man Jesucristó ro', me se ne quene'en nij so' mán 'unj ma'.

23 Maan se cuno nij so' cuentó cataj xna'anj tuvi' nij so' che'é 'unj se vaa sí chí'ii ndo'o mé 'unj, tzaj ne yaj nihánj cuano me se sij a'mii natáj se-nana Diose mé 'unj cuano, taj nij so', caráya'anj nij so' a. "Sí qui'yaj ndo'o sayuun man ní' gaa rque me se cuano nihánj nata' ma'an so' nana sa' nana noco' ní' nana me rá so' tiri' so' gaa rque chuguanj", taj tuvi' nij so' a.

24 Dan me se caráya'anj ndo'o nij so', ne cataj nij so' se vaa sa' uxrá qui'yaj Diose se vaa quene'en nij so' manj a.

## 2

1 Dan me se cachén xca'anj yo' gaa curihanj 'unj chuman' Jerusalén, gaa ne canicaj uún 'unj ca'anj 'unj chuman' Jerusalén ga sí cu'naj Bernabé, ne dan me se nicaj núj man sí cu'naj Titó ca'anj núj rej yo' a.

<sup>2</sup> Dan me se ca'anj 'unj chuman' Jerusalén, che'é se cataj xna'anj Diose rihaan 'unj se vaa me rá Diose ca'anj 'unj chuman' Jerusalén, ne cataj xna'anj 'unj rihaan nij tinúú ní' síí israelitá daj vaa nana sa' nana ca'mii natáj 'unj rihaan nij soj sij yaníj a. Tzaj ne quiríi yaníj 'unj man nij síí uun chij doj rihaan nij so', ne nata' 'unj rihaan ma'an inanj nij so' che'é nana a'mii natáj 'unj rihaan nij soj a. Dan me se me rá 'unj xcaj sa' nij síí uun chij yo' cuentá daj vaa se-nanaj, gaa ne se gaa nanj tirí' nij so' nu' suun qui'yaj suun 'unj che'é Jesucristó a.

<sup>3</sup> Ne nicun' síí cu'naj Titó ga 'unj, ne nda' se nuveé sij israelitá me so', tzaj ne ne qui'yaj nij síí man Jerusalén fuerzá man so' cata' ta'nga' man so' ma'.

<sup>4</sup> Tzaj ne doj nij síí tiha' yu'unj, ne dan me se taj nij so' se vaa tinúú ní' me nij so', tzaj ne nuveé tinúú ní' me nij so' ma'. 'O se tu'va rma'an nij so' nanj adonj. Dan me se ase vatú yuve nij so' rej nuu chre' núj, ne me rá nij so' quene'en yuve nij so' daj qui'yaj núj a. Tzaj ne xa' ní' sij canoco' man Jesucristó, tzaj ne daj chihaa míj ne nó xcúún ní' canoco' ní' nu' se-tucuñj Moisés a ma'. Che'é dan guun rá nij so' xcaj nij so' cuentá daj 'yaj ní', gaa ne tihaañ uún nij so' man ní' canoco' ní' nana nocó' nij so', rá a nij so' a.

<sup>5</sup> Tzaj ne núj me se a 'ó xco' nii ne cunó núj rihaan nij so' a ma'. 'O se guun rá núj se vaa ve'é ya quinañ nu' se-nana Diose nana ya rihaan soj, rá núj adonj.

<sup>6</sup> Dan me se ase vaa síí uun chij vaa ta'aj nij síí man Jerusalén, rá nii, tzaj ne taj vaj síí sa' doj rihaan tuvi', rá 'unj a ma'. Mañ se 'o cuyañ vaa cunudañ yuvií rihaan Diose nanj adonj. Dan me se nij síí uun chij yo' ro', ne cataj xna'anj nij so' a doj nana rihaan 'unj ma'. Mañ se cunaj vaa nana ca'mii natáj 'unj, taj nij so' a.

<sup>7-8</sup> Dan me se Diose me síí qui'yaj guun nucuaj síí cu'naj Pedró nata' so' se-nana Diose nana sa' rihaan nij yuvií israelitá, ne danj qui'yaj guee Diose ga 'unj uún, ne dan me se guun nu'cuáá 'unj nata' 'unj se-nana Diose nana sa' rihaan nij yuvií yaníj, qui'yaj Diose, ne che'é dan me xcaj nij síí uun chij man Jerusalén cuentá se vaa ne cachíin doj nana man 'unj a. Mañ se ase vaa ata' síí cu'naj Pedró suun nata' rihaan nij yuvií israelitá, qui'yaj Diose ro', danj vaa ata' 'unj suun nata' rihaan nij yuvií yaníj, qui'yaj uún Diose a.

<sup>9</sup> Ne quene'en síí cu'naj Santiagó do', síí cu'naj Pedró do', síí cu'naj Juan do', se vaa qui'yaj ndo'o Diose se luj che'é 'unj do', che'é síí cu'naj Bernabé do', se vaa guun nu'cuáá 'unj nata' 'unj se-nana Diose nana sa' rihaan yuvií, qui'yaj Diose, ne guun ya nu' rá nij so' se vaa Diose me síí ca'ne' suun rihaan núj ei. Dan me se síí uun chij rihaan nij síí cuchumán rá ni'yaj man Jesucristó man Jerusalén me nij so', tzaj ne guun ya rá nij so' se vaa tuvi' ma'an nij so' me núj, ne 'o cuyañ vaa suun vaa rihaan núj ga suun vaa rihaan nij so', rá nij so' a. Dan me se ne nata' nij so' se-nana Diose nana sa' rihaan nij yuvií israelitá, ne tanañ núj uún, ne nata' núj rihaan nij síí yaníj, cataj nij so' uún a.

<sup>10</sup> Tzaj ne orún' ya rasuun me cachíin ni'yaj ndo'o nij so' rihaan núj se vaa asino' nij síí ni'que me racuíj núj, taj nij so' a. Tzaj ne tumé ndo'o núj man nij síí ni'que, ne asino' yo' me 'yaj núj chéé núj ei.

*Nana nihánj taj xna'anj che'é nana cataj xna'anj Pabló rihaan síí cu'naj Pedró, se vaa inanj che'é Jesucristó cunuu sa' ní' rihaan Diose a*

<sup>11</sup> Cachén doj güii, gaa ne cuchí' síí cu'naj Pedró chuman' cu'naj Antioquía a. Tzaj ne qui'yaj so' doj se nij, ne tumé so' cacun' che'é se nij qui'yaj so', rá

'un̄j, n̄ che'é dan ca'mii rihaan yaj ga so' rihaan cunudan̄j yuvii, n̄ cataj 'un̄j se vaa tumé so' cacun' che'é se vaa qui'yaj so' a.

12 Dan me se gaa ca'na' so' chuman' Antioquia, n̄ xcaj so' cuentá se vaa ca'vee cha so' chraa ga nij yuvii yan̄j, n̄ dan̄j qui'yaj so', n̄ chá so' chraa ga nij so' chuguan̄j. Tzaj n̄ gaa namán nij síi ca'na' suun qui'yaj síi cu'naj Santiagó chuman' nihánj, gaa n̄ cucu'vi' Pedró ca'mii nij síi man Jerusalén síi taj se vaa n̄ xcúun cunudan̄j nij sn̄o' noco' man Diose cata' ta'nga' man nij so' a. Dan me se chu'vi' Pedró se vaa xcaj nij so' cuentá se vaa chá so' chraa ga nij yuvii yan̄j, n̄ cataj nij so' se vaa ne nó xcúun so' qui'yaj so' dan̄j, rá so', n̄ che'é dan me ca'ne' rá so' ga rej chá chraa ga nij yuvii yan̄j, n̄ naxuun yan̄j so' man so' rihaan nij yuvii yan̄j nan̄j adon̄j.

13 Quene'en ma'an so' se vaa ca'vee cha so' chraa ga nij yuvii yan̄j, tzaj n̄ nuvé s̄j 'o vaa rá ga nana a'mii me so' a ma'. N̄ ase vaa qui'yaj so' ro', ta'nga' dan̄j qui'yaj uún taran' nij yuvii israelitá, n̄ ndaa síi cu'naj Bernabé qui'yaj cacun' ga nij so' se vaa ca'ne' rá so' ga rej chá chraa ga nij yuvii yan̄j nan̄j adon̄j.

14 Dan me se xcaj 'un̄j cuentá se vaa ne raan noco' nij so' se-nana Diose nana ya ma'. Dan me se ca'mii yá 'un̄j rihaan Pedró, n̄ cuno taran' nij so', n̄ cataj 'un̄j:

—Síi israelitá mé so', tzaj n̄ ne noco' so' tucuaán noco' nij yuvii israelitá ma'. Maan se ase vaa 'yaj nij yuvii yan̄j ro', dan̄j vaa 'yáá so' chuguan̄j. Me che'é qui'yáá so' fuerzá man nij yuvii yan̄j canoco' nij yuvii yan̄j tucuaán noco' nij yuvii israelitá ga.

15 Dan me se yuvii israelitá me ní' á. Nuvéé yuvii yan̄j yuvii 'yaj ndo'o cacun' me ní' ma'.

16 Tzaj n̄ ne'en ní' se vaa nda' se ve'é noco' yo'o so' se-tucuan̄j Moisés, tzaj n̄ se cunuu sa' ma'an so' rihaan Diose ma'. 'O se cunuu sa' ya so' rihaan Diose sese cuchuman rá so' ni'yaj so' man Jesucristó adon̄j. Dan me se cuchumán rá ma'an ní' ni'yaj ní' Jesucristó, yan cunuu sa' ní' rihaan Diose, tzaj n̄ se cunuu sa' ní', qui'yaj se-tucuan̄j Moisés ma'. Inan̄j dan̄j taj dan̄j Diose á. A 'o yuvii se cunuu sa' rihaan Diose qui'yaj se-tucuan̄j Moisés ma', taj uún dan̄j Diose adon̄j.

17 'O se ní' me se canoco' ní' man Jesucristó, gaa n̄ ca'vee x'neé cacun' xráá ní' qui'yaj so', rá ní', tzaj n̄ 'o se veé dan̄j 'yaj ní' cacun' ta' rasuun chihá'. Me che'é 'yaj ní' dan̄j ga. 'O se Cristó me síi ca'ne' suun qui'yaj ní' cacun', rá so' na'. Taj ma'. —Nu' nana nihánj me nana ca'mii 'un̄j rihaan síi cu'naj Pedró adon̄j.

18 Dan me se ma'an 'un̄j me síi tiri' chrej canoco' se-tucuan̄j Moisés, n̄ veé dan, gaa n̄ sese guun che'e uún 'un̄j naqui'yaj sa' uún 'un̄j man chrej yo', n̄ dan me se ma'an inan̄j yá 'un̄j me síi tumé cacun' gaa nan̄j adon̄j.

19 Asij rque me se canoco' 'un̄j tucuaán yo', tzaj n̄ quiri' rá 'un̄j, qui'yaj tucuaán yo', n̄ yaj me se ase vaa cavi' Jesucristó rihaan rcutze ro', dan̄j vaa cavi' 'un̄j rihaan tucuaán yo' chuguan̄j. N̄ yaj me se inan̄j che'é Diose gaa i'na' 'un̄j ei.

20 Che'é se amán rá 'un̄j ni'yaj 'un̄j Jesucristó ro', maan che'é dan vaa i'na' 'un̄j ei. Yaj me se nuvé 'un̄j me síi yan̄j cuano ma'. 'O se Jesucristó me síi yan̄j niman̄j, n̄ che'é dan vaa i'na' 'un̄j cuano ei. Che'é se amán rá 'un̄j ni'yaj 'un̄j man ta'nii Diose ro', che'é dan inan̄j noco' 'un̄j man so' gaa chéé 'un̄j rihaan chumii nihánj adon̄j. N̄ dan me se maan che'é se cunuu 'eé uxrá rá so' mán

'unj ro', che'é dan ca'ne' guęę rá so' cavi' so' rihaan rcutze che'é 'unj nanj adonj.

<sup>21</sup> Ne na'vej rá 'unj tanáj yanj 'unj se luj qui'yaj Diose che'é 'unj ma'. 'Q se vaa che'é ya qui'yaj Diose se luj adonj. Dan me se sese ca'vee ya navij cacun' che'é qui'yaj se-tucuanj Moisés, gaa ne cavi' uun ma'an Jesucristó vaa gaa aj na'. Taj ma'. 'Q se ne cavi' uun so' mei.

### 3

*Nana nihánj taj xna'anj se vaa inanj che'é se amán rá ní ni'yaj ní man Jesucristó, che'é dan yanj Nimán Diose ga ní a*

<sup>1</sup> Síi nij snúu rma'an ya me soj sij man estadó Galicia nanj chuguanj. Me che'é guun rá soj tanáj soj tucuaán sa' ga. Vaa síi qui'yaj chree man soj na'. Nuvee se sa' uxrá nata' nii rihaan soj se vaa cavi' Jesucristó rihaan rcutze che'é soj á.

<sup>2</sup> 'Q se me rá 'unj xna'anj 'unj 'o nana man soj chuguanj. Che'é se canoco' nij soj se-tucuanj Moisés me yáan Nimán Diose ga soj na'. Ase che'é se amán rá soj cuno soj se-nana Jesucristó me yáan Nimán Diose ga soj xa'.

<sup>3</sup> 'Q se síi nij snúu rma'an ya me soj nanj chuguanj. Gaa guun che'e soj canoco' soj man Jesucristó, ne guun nucuaj rá soj man Nimán Diose se vaa raçuuj Nimán Diose man soj, tzaј ne yaj me se nucuaj rá soj man ma'an soj se vaa cunuu sa' soj qui'yaj ma'an soj nanj ason.

<sup>4</sup> Nu' se sa' qui'yaj Diose che'é soj gaa canoco' naca soj man Jesucristó ro', taj yu'vee nó yo', qui'yaj soj a a' man ason. Ya ya aj na'. Ne cuchuman ya raj se vaa qui'yaj soj a mei.

<sup>5</sup> Gaa rque Diose Nimán so' rihaan soj qui'yaj ndo'o soj rasuun sa', gaa ne me che'é qui'yaj Diose danj, rá soj ga. Che'e se canoco' soj se-tucuanj Moisés me qui'yaj Diose danj na'. Taj mei. Dan me se che'é se amán rá soj ni'yaj soj man Jesucristó me qui'yaj Diose danj chuguanj.

<sup>6</sup> Dan me se ase vaa qui'yaj síi cu'naj Abraham síi cayáan gaa naá ro', inanj danj qui'yaj soj ei. Dan me se síi cu'naj Abraham ro', me se cuchumán rá so' ni'yaj so' Diose, ne che'é dan cataj Diose se vaa sij sa' me Abraham, ne cunuu sa' so' rihaan Diose á. Inanj danj a'mii danj Diose adonj.

<sup>7</sup> Che'é dan xcaј soj cuentá se vaa ní' sij amán rá ni'yaj man Diose me se ase vaa síi cu'naj Abraham ro', ta'nga' danj vaa ma'an ní' chuguanj.

<sup>8</sup> Dan me se gaa naá ne'en Diose se vaa cuchuman rá nij yuvij yanj ni'yaj nij so' man Diose, ne ne'en Diose se vaa cunuu sa' nij so' rihaan Diose, qui'yaj ma'an Diose, ne che'é dan me nata' Diose se-nana Diose nana sa' rihaan Abraham, cataj Diose:

—Che'é se vaa qui'yáa so' ro', che'é dan me qui'yáa 'unj se luj che'é taran' nij yuvij yanj adonj —taj Diose rihaan síi cu'naj Abraham asij taj vaj a 'ó yuvij ne'en se-nana Diose nana sa', ne nu' nana yo' nana ca'mii Diose rihaan síi cu'naj Abraham ro', canó nana yo' rihaan danj Diose a.

<sup>9</sup> Dan me se cuchumán rá Abraham ni'yaj so' Diose, ne qui'yaj Diose se luj che'é so', ne ase vaa qui'yaj Diose che'é síi cu'naj Abraham ro', danj qui'yaj uún Diose che'é taran' nij síi cuchuman rá ni'yaj man so', ne qui'yaj uún Diose se luj che'é nij so' adonj.

*Nana nihánj taj xna'anj se vaa se ca'vee cunuu sa' ní' rihaan Diose, qui'yaj se-tucuanj Moisés a ma'*

10 Tzaj ne a'mii uún danj Diose che'é yuvií nucuaj rá man se-tucuajñ Moisés, taj yo': "Sese se qui'yaj yo'ó so' cunudanj nij nana no rihaan danj Diose nana cataj xna'anj Moisés ro', ne so' me sí cachran' xna'anj ni'yaj rihaan Diose á", taj danj Diose, ne a 'ó yuvií se guun nucuaj qui'yaj nu' se-tucuajñ Moisés a ma'. Che'é dan me taran' nij yuvií nucuaj rá man se-tucuajñ Moisés ro', quiran' nij so' sayuun, qui'yaj Diose adonj.

11 Tzaj ne: "Sí amán rá ni'yaj man Diose ro', me se cunu sa' so' rihaan Diose, ne cayáan so' ga Diose nu' cavii nu' ca'anj a", taj uún danj Diose, ne che'é dan me ne'en ní se vaa inanj nij yuvií amán rá ni'yaj man Diose me yuvií cunu sa' rihaan Diose á. Se cunu sa' nij yuvií nucuaj rá man se-tucuajñ Moisés ma'.

12 Dan me se xa' se-tucuajñ Moisés, tzaj ne ne che'e yan cuchuman rá' me nani' rihaan sayuun ma'. Maan che'é yan qui'ya' nu' rasuun taj tucuáan yo' me nani' rihaan sayuun, taj se-tucuajñ Moisés nanj adonj.

13 Dan me se gaa naá me se ne guun nucuaj ní' qui'yaj ní' nu' se-tucuajñ Moisés ma'. Che'é dan me sij cachran' xna'anj ni'yaj me ya ní' gaa rque, tzaj ne cavi' Jesucristó rihaan rcutze che'é ní', ne guun so' sí cachran' xna'anj ni'yaj che'é ní', ne che'é dan se quiran' ma'an ní' sayuun daj chihaa mǐj a man chuguanj. "Sí aj noco' rihaan rcutze me sí cachran' xna'anj ni'yaj rihaan Diose", taj danj Diose á. Dan me se guun Jesucristó 'o sí cata se-cacun' cunudanj ní' nago' so' nu' nij cacun' yo' rihaan rcutze, ne cuano nihánj me se sí vaa uun xráa me ní' cuano ei.

14 Ndaa sj, gaa ne se luj cata' tu'va Diose rihaan sí cu'naj Abraham ro', ca'na' se luj yo' ndaa rihaan nij yuvií yanǐj, che'é se vaa qui'yaj Jesucristó a. Dan me se gaa naá, ne cata' tu'va Diose se vaa catuu Nimán Diose nimán ní', ne cuchumán rá ní' ni'yaj ní' man Diose, ne che'é dan catúj ya Nimán Diose nimán taran' ní' cuano ei.

*Nana nihánj taj xna'anj se vaa cata' tu'va Diose rihaan sí cu'naj Abraham cataj Diose se vaa rque ndo'o Diose se sa' rihaan nij ta'nú ta'nij si'no Abraham a*

15 Ne ca'mii 'unj che'é ndaa vaa 'yaj nij sí man rihaan yo'ó nihánj, tinuj, nocoj. Sese vaa vǐj roj so' numǐj nana, ne asa' quisǐj numǐj roj so' nana, gaa ne naxcaj roj so' 'o yanj a'mii che'é ndaa vaa qui'yaj roj so', gaa ne dan me se ndaa vaa taj yanj naxcaj roj so' ro', 'yaj roj so' a. Se guun ca'ne' rá roj so' ma'.

16 Ne dan me se ta'nga' danj qui'yaj guee Diose ga sí cu'naj Abraham, ne dan me se cunumǐj roj so' nana ndaa vaa qui'yaj Diose ga sí cu'naj Abraham a. Dan me se cataj Diose se vaa cavii sa' so' do', cavii sa' ta'nú ta'nij si'no so' do' a. (Dan me se danj a'mii danj Diose, tzaj ne ne cataj Diose se vaa cavii sa' que'ee ta'nú ta'nij si'no sí cu'naj Abraham ma'. 'O se che'é orún' ta'nú ta'nij si'no sí cu'naj Abraham ca'mii danj Diose adonj. Ne sí cu'naj Jesucristó me sí cavii sa' nanj adonj.)

17 Ne inanj nihánj me nana me rá 'unj cataj xna'anj 'unj rihaan soj ei. Dan me se Diose cataj rihaan sí cu'naj Abraham daj qui'yaj Diose che'é Abraham do', che'é ta'nú ta'nij si'no Abraham do', ne cachén yo'ó ca'anj cientó táa yo'ó icó chí' yo', gaa ne rque Diose se-tucuajñ Moisés, tzaj ne ne quirǐ' nana cata' tu'va Diose qui'yaj Diose che'é sí cu'naj Abraham qui'yaj se-tucuajñ Moisés ma'. 'O se ya qui'yaj so' ndaa vaa cataj so' adonj.

18 Dan me se sese che'e se-tucuajñ Moisés me rque Diose rasuun sa', gaa ne nuveé che'e yan cata' tu'va so' rque so' rasuun sa' asij naá me yo' gaa a



ma'. Maan se ca'mii uun so' vaa gaa nanj adonj. Tzaj ne sese inanj nij sí noco' se-tucuanj Moisés me sí nıcaj nij rasuun sa' yo', gaa ne taj yu'vee nó nana cata' tu'va Diose rihaan Abraham gaa naá vaa gaa a ma'. Tzaj ne ne vaa danj a ma'. 'O se che'é nana ca'mii Diose rihaan Abraham me nıcaj ní' nij rasuun sa' ei. Dan me se quiri' uun ní' nu' nij rasuun sa' yo', qui'yaj Abraham chuguanj. Ne a doj sa'anj ne curu'vee ní' che'é nu' rasuun sa' yo' a ma'.

*Nana nihánj taj xna'anj se vaa rqué Diose se-tucuanj Moisés che'é yan xcax yuvii cuentá se vaa sí tumé ndo'o cacun' me yuvii a*

<sup>19</sup> Dan me se sese danj vaa, gaa ne me che'é rqué Diose se-tucuanj Moisés, rá soj ga. Rqué Diose tucuáán yo' rihaan Moisés che'é cacun' tumé yuvii, ne me rá Diose canoco' yuvii tucuáán yo' ndaa se ca'na' ta'nı́ ta'nıj si'no Abraham sí cu'naj Jesucristó rihaan chumii nihánj, gaa ne so' ro', me sí rqué nu' nij rasuun sa' rihaan yuvii, ndaa vaa cataj Diose rihaan sí cu'naj Abraham gaa naá ei. Dan me se guun rá Diose se vaa gaa ca'na' Jesucristó, ne ca'ne' rá yuvii ga se-tucuanj Moisés yo' adonj. Tzaj ne se-mozó Diose me nij sí cataj xna'anj tucuáán yo' rihaan sí cu'naj Moisés, gaa ne cataj xna'anj so' tucuáán yo' rihaan nij yuvii a. Dan me se cataj xna'anj Moisés rihaan nij yuvii,

<sup>20</sup> tzaj ne gaa ca'mii Diose rihaan sí cu'naj Abraham, ne ma'an ya so' ca'mii adonj. Taj vaj sí ca'mii che'é Diose ma'. Taj vaj sí cataj xna'anj rihaan Diose daj me rá sí cu'naj Abraham ma'. Maan se ma'an ya so' me sí ca'mii ga sí cu'naj Abraham, ese orún' ya so' me Diose nanj adonj.

<sup>21</sup> Tzaj ne taj ri'yunj se-tucuanj Moisés man nana cata' tu'va Diose rihaan Abraham gaa naá, rá soj na'. Daj chihaa mįj ne vaa danj ma'. Tzaj ne sese guun nucuaj yuvii qui'yaj yuvii 'o tucuáán rqué Diose, ne ya cunu sa' yuvii rihaan Diose, qui'yaj tucuáán yo' ei. Tzaj ne se guun nucuaj yuvii qui'yaj yuvii tucuáán vaa danj ma'.

<sup>22</sup> Che'é dan me taj danj Diose se vaa cunudanj yuvii tumé ndo'o cacun' nanj adonj. Inanj danj vaa tumé taran' yuvii cacun', taj danj Diose, ne che'é dan me nana cata' tu'va Diose rihaan sí cu'naj Abraham ro', quisij ya nu' nana yo' che'é taran' ní' sįj amán rá ni'yaj man Jesucristó adonj.

*Nana nihánj taj xna'anj se vaa gaa ca'na' Jesucristó, ne taj che'é canoco' ní' se-tucuanj Moisés a man adonj*

<sup>23</sup> Tzaj ne gaa ataa doj quisij güii cuchuman rá ní' ni'yaj ní' man Jesucristó, ne inanj se-tucuanj Moisés canoco' ní', ne ase vaa 'o sí tumé man ní' ro', danj vaa se-tucuanj Moisés rihaan ní' gaa rqué ei. Inanj se-tucuanj Moisés vaa rihaan ní' canoco' ní' ndaa se ca'na' güii tihaan Diose rihaan ní' se vaa cuchuman rá ní' ni'yaj ní' man Jesucristó a.

<sup>24</sup> Dan me se ase vaa sí tumé man xniı daj qui'yaj xniı ro', ta'nga' danj vaa se-tucuanj Moisés rihaan ní' gaa rqué, cutumé yo' man ní' ndaa se ca'na' Jesucristó ei. Ndaa sįj, gaa ne no xcúún ní' cuchuman rá ní' ni'yaj ní' man so', ne ca'vee cunu sa' ní' rihaan Diose adonj.

<sup>25</sup> Cuanó ro', nihánj me se aj cuchumán rá ní' ni'yaj ní' man Jesucristó, ne che'é dan me taj che'é tumé se-tucuanj Moisés man ní' a ma'.

<sup>26</sup> Che'é se amán rá nij soj ni'yaj soj man Jesucristó ro', che'é dan ta'nı́ Diose me taran' soj cuano nanj adonj.

<sup>27</sup> Dan me se che'é se cata' ne soj che'é Jesucristó ro', che'é dan me ase vaa Jesucristó ro', ta'nga' danj vaa soj cuano nanj ei.

<sup>28</sup> Nē sē cataj soj se vaa ta'aj soj me yuviḡ israelitá nē yo'ó ta'aj soj me yuviḡ yanḡ ma'. Nē sē cataj soj se vaa ta'aj soj me mozó nē yo'ó ta'aj soj, nuveé sḡ uun mozó me yo'ó ta'aj soj, cataj soj ma'. Nē sē cataj soj se vaa ta'aj soj me snó'o nē yo'ó ta'aj soj me chana ma'. 'O se tanaḡ ase vaa orún' yuviḡ vaa taran' soj, nē 'o cyaḡan vaa taran' soj che'é se noco' soj man Jesucristó naḡ ei.

<sup>29</sup> Che'é se sḡ noco' man Jesucristó me soj ro', che'é dan ma'an ya ta'nú ta'nij si'no síí cu'naj Abraham me soj rihaan Diose, ndaḡ vaa cataj Diose rihaan síí cu'naj Abraham se vaa rque so' rasuḡ sa' rihaan taran' nij ta'nú ta'nij si'no síí cu'naj Abraham adonj.

## 4

<sup>1</sup> Nē ne'en soj daj vaa xnii, se vaa vaa güii, nē guun si'yaj xnii nu' rasuḡ man tucua rej xnii ei. Tzaj nē gaa xnii me so', nē ase vaa mozó ro', danj vaa so' tucua rej so' gaa yaán rej so' ei.

<sup>2</sup> Dan me se vaa yuviḡ tumé man xnii daj qui'yaj xnii, nē inanj danj vaa tumé nii man xnii ndaḡ se cachij ya xnii, gaa nē vaa güii ca'vej rá rej xnii quita'aa xnii rasuḡ man tucua xnii ei.

<sup>3</sup> Nē ase vaa xnii ataa cachij ro', ta'nga' danj vaa ma'an ní' gaa rque, nē inanj ne'en ní' canoco' ní' man nij ya'anj uun chij rihaan chumiḡ nihánj a.

<sup>4</sup> Tzaj nē quisij güii me rá Diose rque Diose nu' se sa' rihaan ní', nē che'é dan ca'née Diose ta'nú so' ca'na' ta'nú so' rihaan chumiḡ nihánj, nē cuchruj 'o chana man ta'nú Diose, nē síí noco' se-tucuaḡ Moisés me nu' nij tui' so' gaa cayaán so' rihaan chumiḡ nihánj adonj.

<sup>5</sup> Dan me se me rá Jesucristó raçuḡ so' man taran' ní' sḡ noco' tucuaán noco' yuviḡ man rihaan chumiḡ nihánj, se vaa ca'vee tanáj ní' tucuaán noco' yuviḡ man rihaan chumiḡ, nē ncaj ní' nu' se sa' me rá Diose rque Diose rihaan ta'nú Diose ei. Nē danj me rá Jesucristó qui'yaj so' che'é ní' chugaḡanj.

<sup>6</sup> Cuaḡo nihánj me se ta'nú Diose me nij soj ei. Che'é dan ca'née Diose man Nimán ta'nú so' nimán ní', nē che'é dan me: "Ataj chij. Rej núj mé so' á", taj ní', aguáj ní', 'yaj Nimán ta'nú so' ei.

<sup>7</sup> Che'é dan me nuveé mozó me soj rihaan Diose cuaḡo nihánj ma'. Ase vaa mozó vaa soj gaa rque, tzaj nē xa' yaj, nahuun soj ta'nú Diose, nē vaa güii nacaḡ soj nu' se sa' rque Diose rihaan nij ta'nú so' adonj.

*Nana nihánj taj xna'anj se vaa ne nó xcúun ní' qui'yaj ní' tucuaán noco' yuviḡ man rihaan chumiḡ nihánj cuaḡo mei*

<sup>8</sup> Gaa rque me se ne ne'en ya soj daj vaa Diose ma'. Che'é dan me qui'yaj suun soj rihaan ya'anj uun chij rihaan rasuḡ man rihaan chumiḡ nihánj, tzaj nē nuveé ya'anj ya me nij ya'anj qui'yaj suun soj rihaan ma'.

<sup>9</sup> Tzaj nē cuaḡo nihánj me se ne'en nij soj man ma'an ya Diose ei. Tzaj nē sa' doj cataj 'unj se vaa ne'en Diose man nij soj chugaḡanj. Sese aj ne'en soj man ma'an ya Diose, gaa nē me che'é cancaj uun soj canoco' soj man nij ya'anj uun chij rihaan rasuḡ man rihaan chumiḡ nihánj ga. Ne'en soj se vaa se guun nucuaj nij so' raçuḡ nij so' man soj ma'. Taj yu'vee a 'o xco' nó ma'an nij so' ma'. Me che'é me rá uun soj qui'yaj suun soj rihaan nij so' ga.

<sup>10</sup> Nē navij rá soj güii gueḡ do', navij rá soj cha'anj che'é 'o 'o yavii do', vaa dió gueḡ rihaan soj do', vaa yo' gueḡ rihaan soj do' ga. Me che'é 'yaj soj danj ga.

11 Nanó ndo'o rá 'unj se vaa 'yaj soj, ne nanó rá 'unj se vaa quirí' rma'an nu' suun qui'yaj suun 'unj tucu'yón 'unj se-nana Diose nana sa' man nij soj nanj chuguanj.

*Nana nihánj taj xna'anj se vaa nanó rá Pabló che'é se tanáj nij síi man Galacia nana tucu'yón so' man nij so' a*

12 Ase vaa 'unj ro', danj gaa guee soj, ése ndaa adi' se vaa soj ro', danj vaa guee 'unj, tinuj, nocoj. Che'é dan me daj se 'yaj guej cuano ro', danj qui'yaj guee soj ei. Nuveé che'e se qui'yaj chí'ij soj manj ma'. Tananj a, ne inanj ve'é qui'yaj soj gaa cayáan 'unj ga soj ei.

13 Aj ne'en soj se vaa che'é se canó chí'ij manj, che'é dan natá' 'unj se-nana Diose nana sa' rihaan soj gaa asino yaan ei.

14 Ne gaa quirán' 'unj rihaan soj me se ne nachri' soj ni'yaj soj manj ma'. Tananj a, ne caráya'anj ndo'o soj ni'yaj soj manj, ne ndaa adi' ve'é 'yaj nii ga 'o se-mozó Diose ro', danj qui'yaj soj, gaa ne ve'é ndo'o ca'mii soj gaj ei. Ne ase vaa ma'an ya Jesucristó ro', ta'nga' danj vaa 'unj, rá soj,

15 ne che'é dan me guun niha' uxrá rá nij soj ne ve'é uxrá cuno soj nana ca'mij, ne cunuu 'ee uxrá rá soj manj nanj adonj. Dan me se cataj yá' ta' asuun, ne sese guun nucuaj nij soj quiríj soj rlii rihaan soj cunuú yo' rihanj, ne ca'vej rá soj qui'yaj soj danj, nda' rasuun nanj chuguanj. Tzaj ne yaj me se me che'é ne niha' rá soj gaa uno soj nana a'mij cuano ga.

16 Maan che'é se ca'mij nana ya ya rihaan soj, che'é dan mej síi taj ri'yunj man soj, rá soj nanj na'. Taj ma'.

17 Dan me se aráya'anj uxrá yo'ó nij so' man soj, tzaj ne ne cunaj daj chihaa mij 'yaj nij so' ma'. Maan se me rá nij so' tanáj xcó soj nana noco' ní' sij amán rá ni'yaj man Jesucristó, ne inanj ma'an nij so' canoco' soj, rá nij so' nanj adonj.

18 Sese ve'é 'yaj yuvij ga soj, ne cunaj uxrá sese caráya'anj nij yuvij man soj, rá 'unj á. Tzaj ne yo'ó danj qui'yaj nij so', sese ya me sa' rá nij so' ni'yaj nij so' man nij soj ei. Tzaj ne taj ma'. Me che'é gaa yaán 'unj ga soj, gaa ne uun che'e nij so' 'yaj nij so' se sa' ga soj ga. Nuveé se sa' 'yaj nij so' ga soj man chuguanj.

19 Dan me se ase vaa ta'níi 'unj ne'ej ro', danj vaa nij soj, tinuj, nocoj. Cuano nihánj me se uun che'e uún 'unj nanó ndo'o raj che'é soj ndaa vaa nanó raj gaa rque, ne me rá 'unj se vaa nari' sa' ya soj se-nana Diose nana sa' ya ei. Dan me se ase vaa nanó rá chana nichrun' cuchruj ne'ej che'é se ne ne'en no' sese ca'ngaa sa' ta'níi no' ro', danj vaa nanó rá 'unj che'é soj cuano chuguanj. Ne veé inanj danj nanó ndo'o rá uún 'unj che'é nij soj ndaa nari' ya ya soj ndaa vaa qui'yaj ma'an ya Jesucristó nanj ei.

20 'Q se 'vee, ne ndaa cuano cayáan yá 'unj ga soj, gaa ne ca'mii ma'an yá 'unj ga soj, raj ei. Tzaj ne ne ne'en yaj daj nano raj che'é soj a mei.

*Nana nihánj taj xna'anj se vaa sese noco' ní' se-tucuanj Moisés, ne mozó me ní', ne ne nó xcúún ní' qui'yaj ní' danj a ma'*

21 Me rá 'unj cataj ya soj 'o nana rihanj ei. Me rá nij soj canoco' soj se-tucuanj Moisés, tzaj ne ne'en soj daj taj nana cachrón Moisés rihaan yanj yo' na'.

22 Dan me se cachrón Moisés nana nihánj rihaan yanj, se vaa vaa vj ta'níi síi cu'naj Abraham sno'o cunii, ne yo'ó ta'níi so' me ne'ej cuchruj mozó chana

nuu rihaan so', ne yo'ó ta'níi so' me ne'ej cuchruj ma'an nica so' a. Xa' nica so', tzaj ne nuveé mozó me chana nica so' ma'. Nica ya so' me yo' adonj.

<sup>23</sup> Dan me se ne'ej cuchruj mozó chana ro', me se ase vaa a'ngaa naj guun ne'ej ro', danj vaa ca'ngaa so' a. Tzaj ne xa' ne'ej cuchruj ma'an nica Abraham, tzaj ne aj cata' tu'va Diose daj qui'yaj Diose che'é so' asij gaa ataa ca'ngaa so' a.

<sup>24-25</sup> Ne ase vaa cuentó che'é roj chana cuchruj ne'ej ro', danj vaa yo'ó nana tucu'yón ní', rá 'unj, ne ase vaa roj chana ro', danj vaa vij nana cataj xna'anj Diose rihaan yuvij a. Dan me se yo'ó chana me se-mozó Abraham, ne Agar cu'naj se-chuvij no', ne ase vaa mozó chana cu'naj Agar ro', ta'nga' danj vaa nana cataj xna'anj Diose rihaan síi cu'naj Moisés gaa ca'mii Diose ga Moisés xraá quij xcaan cu'naj Sinaí a. Se-tucuanj Moisés me nana yo', ne ase vaa mozó ro', danj vaa yuvij noco' nana yo' a. Nicun' quij xcaan cu'naj Sinaí rej cu'naj Arabia, tzaj ne ase vaa chana cu'naj Agar ro', ta'nga' danj vaa nij yuvij man chuman' Jerusalén cuano a. Dan me se taran' nij yuvij man chuman' Jerusalén me yuvij israelitá yuvij noco' se-tucuanj Moisés, ne ase vaa mozó ro', danj vaa taran' nij so' nanj ei.

<sup>26</sup> Tzaj ne síi man yo'ó chuman' Jerusalén chuman' naj rej xta' me ní', ne nuveé mozó me ní' ma'. 'O se aj guun nij ní' man chuman' Jerusalén naj rej xta' adonj.

<sup>27</sup> Nihánj me nana no rihaan danj Diose a: "Gaa niha' nimán so', chana itun á. Ataa cuchruj so' ne'ej, tzaj ne gaa niha' uxrá nimán so' á. 'O ruún so' cuano, tzaj ne vaa güii, ne doj a gaa ta'níi so' rihaan ta'níi chana otoj ga snó'o adonj". Inanj danj a'mii danj Diose che'é nica Abraham chana cuchruj man síi cu'naj Isaac a.

<sup>28</sup> Ne ase vaa ta'níi no' síi cu'naj Isaac ro', ta'nga' danj vaa nij soj, tinuj, nocoj. Soj me ne'ej se vaa cataj ya Diose ca'ngaa ya ei. Ne ase vaa cavii sa' síi cu'naj Isaac ro', danj cavii sa' soj uún ei.

<sup>29</sup> Ne'en nij soj se vaa xnii ca'ngaa ma'an ta'níi yo'ó chana ro', me se taj ri'yunj ndo'o so' man ne'ej tucua ya ve' chuguanj. Dan me se ta'nga' danj ran' guee ní' cuano nihánj, ne dan me se 'yaj ndo'o nij yuvij noco' ma'an se-tucuanj Moisés sayuun man ní' sij cunuu sa' nimán che'é Nimán Diose chuguanj.

<sup>30</sup> Tzaj ne xcaj ní' cuentá me taj danj Diose ei. Dan me se taj yo' se vaa: "Quirij so' man roj ta'nij mozó chana ca'anj yanij roj ta'nij no' á. 'O se orún' ta'níi nica so' níi ne uun mozó me síi guun síi si'yaj nu' si'yáa so' vaa güii ei. Ne xa' ta'níi chana uun mozó, tzaj ne daj chihaa muj ne nó xcúun ta'níi mozó chana yo' quirij yo' ta'aj si'yáa so' ma'". Dan me se danj vaa nana ca'mii Diose rihaan Abraham nana no rihaan danj Diose a.

<sup>31</sup> Dan me se nuveé ta'nij mozó chana me ní', man tinuj, man nocoj. Nuveé yuvij 'yaj suun ndo'o canoco' se-tucuanj Moisés me ní' ma'. Maan se ase vaa ta'níi chana ne uun mozó ro', danj vaa ní', ne a 'ó tucuaán ne nó xcúun ní' canoco' ní' a ma'.

## 5

<sup>1</sup> Maan se aj ca'néj Jesucristó nu' suun taj xraá ní', ne che'é dan vaa ya'núj rihaan ní' canoco' ní' man Diose cuano ei. Che'é dan me ca'nej nucaj soj nimán soj, ne se ca'vej uún soj qui'yaj suun soj suun uun mozó a ma'. Se guun rá soj canoco' soj nu' se-tucuanj Moisés a ma'.

*Nana nihánj taj xna'anj se vaa taj che'é cuta' nii ta'nga' man nee man ní' ma'*

<sup>2</sup> Xcaj nij soj cuentá se vaa nihánj me nana taj xna'anj ma'an 'unj sij cu'naj Pabló rihaan soj ei. Dan me se sese cuta' nii ta'nga' man soj, ne taj yu'vee nó Jesucristó rihaan soj vaa gaa a ma'.

<sup>3</sup> Nihánj me cataj xna'anj uún 'unj rihaan soj se vaa taran' nij snó'o a'vej rá cuta' nii ta'nga' man ro', no xcúun nij so' canoco' nij so' nu' se-tucuañj Moisés adonj.

<sup>4</sup> Ta'aj nij soj me rá canoco' se-tucuañj Moisés, ne cunuu sa' nij so' rihaan Diose, rá nij so', tzaj ne nuveé sij noco' man Jesucristó me síi 'yaj danj ma'. 'O se síi tanáj xco se luj qui'yaj Diose che'é ní' me nij so' adonj.

<sup>5</sup> Xa' ní', tzaj ne nuu Nimán Diose nimán ní', ne amán rá ní' ni'yaj ní' man Jesucristó, ne che'é dan me guun ya rá ní' se vaa vaa güii cunuu sa' ní' rihaan Diose, ne yo'o na'vij ní' ndaa se quíisj ya güii yo' adonj.

<sup>6</sup> Xa' ní' sij noco' man Jesucristó me se taj se 'yaj sese quitaj ta'nga' man ní', taj se 'yaj sese se quitáa ta'nga' man ní', taj se 'yaj ma'. 'O se amán rá ní' ni'yaj ní' man Jesucristó, ne che'é dan cunuu 'ee rá ní' ni'yaj ní' man tinúu ní', ne che'é roj yo' me cavii sa' ní' adonj.

<sup>7</sup> Gaa rque me se aj sa' uxrá noco' soj man Diose tzaj niha'. Me síi caráan chrej rihaan soj se cuchumán rá soj cunó soj nana ya yaj ga.

<sup>8</sup> Xa' nana uno soj cuano, tzaj ne nuveé Diose me síi ca'mii nana yo' rihaan soj ma'. Dan me se xa' Diose, tzaj ne yo'o canacúun so' man soj canoco' soj man orún' ya so' adonj.

<sup>9</sup> Ne'en nij soj se vaa yo'óo cu'naj levadura se 'yaj namij rque rachrúun, me se doj tzin' yo' araa nii rque cunj, tzaj ne namij rque cunudanj cunj, 'yaj yo', ne ase vaa yo'óo cu'naj levadura ro', ta'nga' danj vaa nana ne uno soj adonj. Dan me se doj tzin' nana ne uno soj, tzaj ne ca'anj ni'ya que'ee nij soj, qui'yaj nana ne yo' ei.

<sup>10</sup> Dan me se 'unj me se yo'o amán raj ni'yaj 'unj man síi 'nij ra'a man ní' se vaa yo'o cuyañ gaa rá soj ga 'unj chuguañ. Ne síi a'mii yo'ó nana ro', tzaj ne 'yaj chruj so' rihaan soj se vaa se canoco' sa' soj man Diose chuguañ. Che'é yan 'yaj so' danj ro', che'é dan quiran' so' sayuun, qui'yaj Diose nanj adonj. Me ma'an sij me so', tzaj ne ya quiran' so' sayuun, qui'yaj Diose ei.

<sup>11</sup> A'mii natáj ma'an 'unj rihaan yuvij se vaa cuta' nii ta'nga' man yuvij, rá soj na'. Taj, man tinuj, man nocoj. Sese danj vaa nana a'mii natáj 'unj, ne ne guun na'aj yuvij cunó yuvij nana se vaa cavi' Jesucristó rihaan rcutze asuun saj ma'. Tzaj ne guun na'aj nij yuvij ei. Ne mañ che'é dan 'yaj ndo'o nij yuvij sayuun manj adonj.

<sup>12</sup> Dan me se vaa che'é cataj ní' se vaa nij síi 'yaj sayuun man soj ro', 'o se veé, ne vaa che'é ca'ne' nij so' nu' nee man ma'an nij so' vaa tzaj adonj.

*Nana nihánj taj xna'anj se vaa ve'é qui'yaj ní' nu' se vaa me rá Nimán Diose qui'yaj ní' á*

<sup>13</sup> Dan me se canacúun Diose man nij soj guun niha' nimán soj canoco' soj man so', tinuj, nocoj. Tzaj ne se guun rá soj se vaa ca'vee qui'yaj soj náa guun se me rá nee man ma'an soj qui'yaj soj ma'. Tananj cunuu 'ee rá soj tinúu soj, ne yo'o qui'yaj suun soj che'é tinúu soj ei.

<sup>14</sup> Dan me se 'o cuyañ ya vaa nu' se-tucuañj Moisés ga orún' nana nihánj chuguañ: "Adi' se 'ee rá so' man ma'an so' ro', ta'nga' danj gaa 'ee rá so' man yo'ó yuvij á". Ne nihánj me nana no xcúun ní' cunó ní', ne sese danj qui'yaj ní', ne síi 'yaj nu' se-tucuañj Moisés me ya ní' adonj. A'ó nana se cachiin cunó uún ní', sese danj qui'yaj ní' a ma'.

15 Tzaj ne sese cunu' soj do', sese guun xcoj ruvaa rá soj ni'yaj soj tuvi' soj do', sese qui'yaj soj sayuun man tuvi' soj do', ne dan me se tadó uxrá soj ei. 'O se sese danj uun rá soj, ne quirí' cunudanj tuvi' soj, qui'yaj soj nanj chuguanj.

16 Ne cataj xna'anj 'unj rihaan soj se vaa yo'q cunq soj a'mii Nimán Diose gaa cheé soj rihaan chumií nihánj, ne sese inanj danj qui'yaj soj, ne daj chihaa mij se guun qui'yaj soj se vaa me rá nee man ma'an soj qui'yaj soj ma'.

17 Dan me se inq uxrá vaa se me rá nee man ní' qui'yaj yo' gá se me rá Nimán Diose qui'yaj yo' ei. Dan me se inq me rá 'o 'o roj yo' ei. Sese me rá ní' cunq ní' rihaan Nimán Diose, ne aráan nee man ní' chrej rihaan ní' cunq ní' rihaan Diose chuguanj. Ne sese me rá ní' qui'yaj ní' se nij me rá nee man ní' qui'yaj yo', ne aráan Nimán Diose chrej rihaan ní' se qui'yaj ní' danj ma'. Ne unu' Nimán Diose gá nee man ní', ne ca'vee se me rá ní' qui'yaj ní' ndaa vaa me rá ma'an ní' qui'yaj ní', tzaj ne se guun nucuaj ní' qui'yaj ní' danj a man adonj.

18 Tzaj ne sese noco' soj man Nimán Diose, ne taj che'é canoco' soj se-tucuanj Moisés a mei.

19 Dan me se aj ne'en soj daj vaa rasuun me rá nee man ma'an soj qui'yaj yo' ei. Me rá yo' qui'yaj yo' cacun' gá yo'ó chana do', me rá yo' qui'yaj yo' se nij ndo'o do', me rá yo' qui'yaj yo' se na'aj ndo'o do',

20 quina'vji soj rihaan ya'anj acóy yuvií do', me rá uún yo' ca'mii soj gá sí chruun nano' so' chrej che'é soj do', uun xcoj ruvaa rá soj ni'yaj soj tinúú soj do', unu' soj gá tinúú soj do', axrítj yuvaa soj man tinúú soj do', inanj me rá 'o 'o soj cavii sa' uún soj do', uxrá' ta'aj nij soj man nij soj do',

21 uun xcoj ruvaa rá soj ni'yaj soj tinúú soj do', achráá ndo'o soj chra' xno gá tuvi' soj do', ne dan me se que'ee doj tuvi' cacun' nihánj 'yaj uún soj, 'yaj nee man ma'an soj nanj adonj. Aj cataj xna'anj 'unj rihaan soj, ne cuano nihánj me se cataj xna'anj uún 'unj rihaan soj se vaa yuvií 'yaj danj ro', daj chihaa mij se cayáan nij so' gá Diose asa' guun chij Diose rihaan chumií nihánj a ma'.

22 Tzaj ne sese inanj rihaan Nimán Diose cunq ní', ne cunu 'ee rá ní' tuvi' ní' do', guun niha' rá ní' do', gaa xej nimán ní' do', gaa inaj nimán ní' do', ve'é qui'yaj ní' rihaan yuvií do', yo'ó cuchuman rá ní' do',

23 síí ni'yanj a'mii guun ní' do', ve'é cutumé ní' man ní' daj qui'yaj ma'an ní' do', qui'yaj Nimán Diose ei. Inanj danj gaa ní' sese ve'é cunq ní' rihaan Nimán Diose nanj adonj. Yo' me sese qui'yaj ní' ndaa vaa taj nana nihánj, ne taj cacun' quitaj xráá ní' qui'yaj nana nihánj a ma'.

24 Dan me se ní' sij aj canoco' man Jesucristó ro', me se aj ticavi' Jesucristó man nu' se chi'ii man nimán ní', gaa cavi' so' rihaan rcutze, ne dan me se quisij qui'yaj nee man ní' cacun', ne daj chihaa mij se qui'yaj uún ní' se chi'ii me rá nee man ní' qui'yaj yo' a ma'.

25 Dan me se che'é se cunu sa' nimán ní', qui'yaj Nimán Diose, che'é dan yo'q cunq ní' nu' se vaa cataj xna'anj Nimán Diose rihaan ní' ei.

26 Se ca'mii xtá' ní' a 'ó xco' a ma'. Se ca'mii ra'yunj ní' rihaan tinúú ní' a ma'. Se guun xcoj ruvaa rá ní' ni'yaj ní' tinúú ní' a ma'.

## 6

### *Nana nihánj taj xna'anj se vaa ve'é racuj ní' man tinúú ní' a*

1 Sese ya xcaj nij soj cuentá se vaa qui'yaj 'o tinúú soj cacun', ne soj sij ve'é noco' Nimán Diose ro', nago' soj chrej man síí tumé cacun' daj qui'yaj so' rej rihaan so', tinuj, nocoj. Tzaj ne nica' gaa nimán soj, ne ve'é ca'mii soj nana

sa' ga síí tumé cacun' ei. Dan me se tadó soj ga ma'an soj gaa nago' soj chrej ei. Sese se tadó soj, ne ma'an soj do' ca'anj chrej chi'ij nanj chuguanj.

<sup>2</sup> Dan me se ca'vee se me ma'an sayuun ran' tinúú soj, tzaj ne racuj soj man so' ei. Sese danj qui'yaj soj, ne síí qui'yaj nu' tucuáán cuchruj Jesucristó che'é ní' me soj gaa nanj chuguanj.

<sup>3</sup> Ne sese vaa síí guun rá se vaa síí sa' me ma'an so', ne síí ne ne'en uxrá me so', ne síí tiha' yu'unj man ma'an me so' nanj ei.

<sup>4</sup> Tzaj ne naqui'yaj cuu 'o 'o ní' daj 'yaj ma'an ní', ne sese ve'é 'yaj ní', ne guun niha' rá ní' che'é se vaa ve'é 'yaj ma'an ní' ei. Tzaj ne ne nó xcúún ní' naqui'yaj cuu ní' daj 'yaj tinúú ní' ma'. Se cataj ní' se vaa sa' doj 'yaj ní' rihaan tinúú ní' ma'.

<sup>5</sup> Maan se ino vaa suun ata 'o 'o ní', ne no xcúún 'o 'o ní' cata ní' suun vaa rihaan ma'an ní' nanj adonj.

<sup>6</sup> Dan me se síí tucu'yón se-nana Diose ro', me se no xcúún so' cuxra' ta'aj so' nu' se sa' rihaan síí tihaan se-nana Diose nana sa' rihaan so' a.

<sup>7</sup> Tzaj ne se tiha' yu'unj soj man ma'an soj ma'. Se ca'vee tiha' soj man Diose ma'. Dan me se sese 'yaj yo'o so' sayuun rihaan chumij nihánj, ne gaa ndo'o sayuun quitaj xráa so',

<sup>8</sup> ne sese qui'yaj yo'o so' inanj se vaa me rá nee man ma'an so' qui'yaj so', ne nee man so' qui'yaj quirí' nu' so' nanj adonj. Sese qui'yaj yo'o so' inanj se vaa me rá Nimán Diose qui'yaj so', ne Nimán Diose qui'yaj gaa i'na' so' cayáán so' ga Diose nu' cavii nu' ca'anj adonj.

<sup>9</sup> Se guun rmij ní' qui'yaj sa' ní' ma'. Sese se quiri' rá ní', ne quisj güii cachrón Diose, ne sa' uxrá doj cavii ní', qui'yaj Diose ei.

<sup>10</sup> Dan me se yaj vaa ya'núj rihaan ní' ro', qui'yaj suun ndo'o ní' che'é se sa' cuano ei. Che'é dan ve'é uxrá qui'yaj suun ní', racuj ní' man cunudanj yuvij ei. Tzaj ne doj a guun rá ní' racuj ní' man nij tinúú ní' nij síí amán rá ni'yaj man Jesucristó adonj.

*Nana nihánj taj xna'anj se vaa guun niha' rá Pabló inanj che'é se cavi' Jesucristó rihaan rcutze che'é ní' a*

<sup>11</sup> Ni'yaj soj ei. Xij ndo'o vaa letrá cachrón ra'aj ma'anj che'é nij soj chuguanj.

<sup>12</sup> Nij síí me rá ve'é ca'mij yuvij che'é ro', ma'an nij so' me síí me rá cata' ta'nga' man soj nanj adonj. Danj 'yaj nij so' che'é se na'vej rá nij so' qui'yaj yuvij sayuun man nij so' che'é se noco' nij so' man Jesucristó síí cavi' rihaan rcutze nanj chuguanj. Maan che'é dan a'mii nij so' danj rihaan soj nanj adonj.

<sup>13</sup> Dan me se ata' ta'nga' man nij so', tzaj ne ne noco' sa' ma'an nij so' se-tucuanj Moisés ma'. Tzaj ne inanj me rá nij so' cata' ta'nga' man soj, gaa ne ca'mij xta' nij so' cataj nij so' se vaa cata' ta'nga' man soj qui'yaj ma'an ya' nij so', che'é se qui'yaj nij so' fuerzá man soj, cataj nij so' a.

<sup>14</sup> Ne xa' 'unj, tzaj ne daj chihaa mij se ca'mii xta' 'unj ma'. 'O se guun niha' rá 'unj inanj che'é se cavi' Jesucristó sijn 'nij ra'a man ní' rihaan rcutze che'é ní', ne xa' chumij nihánj, tzaj ne ase vaa se cavi' ro', danj vaa chumij nihánj rihaan 'unj, ne taj yu'vee nó chumij nihánj rihaan 'unj, ne yo'o tanáj 'unj man se vaa 'yaj nij yuvij man rihaan chumij nihánj nanj adonj.

<sup>15</sup> Taj se 'yaj sese taj ta'nga' man ní' do', taj se 'yaj sese nuvi' ta'nga' táá man ní' do' ma'. Núj naqui'yaj naca Diose man ní', ne cavij sa' ya' ní' nanj adonj.

<sup>16</sup> Me rá 'un̄j gaā xej nimán taran' soj sij noc̄o' tucuaán nihánj, nē gaā 'eē rá Diosē man soj ei. Yā yuvīi israelitá me soj rihaan Diosē nan̄j chuguan̄j.

<sup>17</sup> Dan me se aj quiran' ndo'o neē mán 'un̄j sayuun che'é se 'yaj suun 'un̄j che'é Jesucristó natá' 'un̄j rihaan yuvīi che'é so', nē che'é dan na'vej rá 'un̄j qui'yaj soj doj sayuun mán 'un̄j a ma'.

*Nanā nihánj taj xna'an̄j se vaa me rá Pabló qui'yaj Jesucristó se luj che'é nij sít̄i man̄ Galacia a*

<sup>18</sup> Me rá 'un̄j qui'yaj ndo'o Jesucristó sij 'nij ra'a man ní' se luj che'é nimán nij soj, tinuj, noc̄oj. Yā uxrá ei. Veé dan̄j gaā yā ei.



## Nihánj me 'o yanj cartá qui'yaj síi cu'naj Pabló ca'néé so' rihaan nij yuvii noco' man Diose yanj chuman' cu'naj Efeso a

<sup>1</sup> Síi cu'naj Pabló mej, ne cune! Jesucristó mán 'unj guún 'unj apóstol nata' se-nana so' rihaan nij yuvii, che'é se danj me rá Diose qui'yáj a. 'Yáá 'unj yanj cartá nihánj ca'nej 'unj rihaan nij soj sij sa' rihaan Diose yanj chuman' cu'naj Efeso sij amán rá ni'yaj man Jesucristó a.

<sup>2</sup> Me rá 'unj qui'yaj ndo'o Rej ní' Diose do', qui'yaj Jesucristó sij 'nij ra'a man ní' do', se luj che'é nij soj, ne me rá 'unj gaa xej nimán nij soj, qui'yaj roj so' a.

*Nana nihánj taj xna'anj che'é nu' se luj qui'yaj ndo'o Diose che'é nij yuvii israelitá do', che'é ní' sij yanj do' a*

<sup>3</sup> Inanj sa' uxrá vaa Diose Rej Jesucristó sij 'nij ra'a man ní', ne ve'é ndo'o qui'yaj so' che'é ní', ne rqué ndo'o so' se sa' man ní', ne se sa' cavii rej xtá' cavii ma'an ya Nimán Diose me rqué Diose man ní', che'é se síi noco' man Jesucristó me ní' a.

<sup>4</sup> Ne dan me se che'é se sij noco' man Jesucristó me ní', che'é dan me asij ataa qui'yaj Diose chumii nihánj me narii so' man ní' guun ní' síi sa' rihaan ma'an so', ne se tumé ní' cacun', rá so' a ma'. Ne dan me se cunuu 'ee rá so' man ní',

<sup>5</sup> ne cune' so' man ní' canoco' ní' man Jesucristó ne guun ta'nij ma'an so' man ní', ndaa vaa quirii nimán ma'an so' qui'yaj so' che'é ní',

<sup>6</sup> gaa ne che'é dan ve'é ca'mii ní' ni'yaj ní' man Diose, ne cataj ní' se vaa ve'é ndo'o qui'yaj so' se luj che'é ní', che'é se noco' ní' man Jesucristó síi 'ee rá so' man adonj.

<sup>7</sup> Ne che'é se cavi! Jesucristó che'é ní' ro', che'é dan navij cacun' xráá ní', che'é se sa' uxrá vaa rá Diose ni'yaj Diose man ní',

<sup>8</sup> ne Diose ro', me síi qui'yaj ndo'o se luj che'é ní' se vaa rqué ndo'o so' nana cuu man ní', ne xcaj ndo'o ní' cuentá, qui'yaj so' adonj.

<sup>9</sup> 'Q se so' me síi qui'yaj xcaj ní' cuentá che'é nana naca nana a'mii che'é daj me rá ma'an so' qui'yaj so' che'é ní' sij noco' man Jesucristó,

<sup>10</sup> asa' quisj güii ca'na' uún Jesucristó rihaan chumii nihánj a. Dan me se güii yo' me se guun chij Jesucristó rihaan cunudanj rasuun, qui'yaj Diose, ne guun chij Jesucristó rihaan taran' nij rasuun man rej xtá' do', rihaan cunudanj nij rasuun man rihaan chumii nihánj do' a.

<sup>11-12</sup> Ne che'é Jesucristó me se narii Diose man núj sij israelitá sij amán rá ni'yaj man Jesucristó, ne dan me se narii so' man núj che'é se aj cune' so' man núj guun núj nij síi gaa nucaj rá gaa asino yaan man Jesucristó, che'é rej ve'é nata' núj se vaa sa' uxrá vaa Diose a. Dan me se inanj danj guun rá Diose qui'yaj so', ne so' me síi avii ndo'o raá daj qui'yaj, ne so' me síi 'yaj nu' ndaa vaa avii raá so' qui'yaj so' adonj.

<sup>13</sup> Ne vaa nij soj sij yanj uún, ne cuno soj nana ya se vaa ca'vee cavii sa' uxrá ní' qui'yaj Jesucristó, ne cuchumán rá soj ni'yaj soj man Jesucristó, ne che'é Jesucristó me se ca'na' Nimán Diose catúj Nimán Diose nimán soj, ne Nimán Diose me se ca'na' rihaan ní' sij noco' man Diose, ndaa vaa cata' tu'va

Diose gaa naá, ne che'é se nuu Nimán Diöse nimán ní' ro', che'é dan ne'en ya ní' se vaa me ní' ta'níí Diöse

<sup>14</sup> ne ya rque ndo'o Diöse se sa' man ní' vaa güii nanj adonj. Dan me se rque Diöse Nimán Diöse rihaan ní', cataj Diöse se vaa ya nacaj Diöse man ní' vaa güii, ne quinanií ní' rihaan sayuun, che'é rej ve'é nata' taran' ní' se vaa sa' uxrá vaa Diöse a.

*Nana nihánj taj xna'anj se vaa achíin ni'yaj Pabló rihaan Diöse se vaa xcqj sa' doj nij síi man Efeso cuentá che'é Jesucristó qui'yaj Diöse a*

<sup>15</sup> Dan me se cunó 'unj nana se vaa amán rá nij soj ni'yaj nij soj man Jesucristó sji 'nij ra'a man ní', ne cunó 'unj nana se vaa 'ee rá soj man taran' nij síi sa' noco' man Diöse, ne che'é se vaa qui'yaj Diöse che'é ní' sji noco' man Jesucristó ro', che'é dan

<sup>16</sup> yo'o nagó' 'unj graciá rihaan Diöse che'é soj gaa achíin ni'yáá 'unj che'é soj rihaan Diöse adonj.

<sup>17</sup> Dan me se Diöse me síi ca'neé man Jesucristó sji 'nij ra'a man ní' ca'na' so' rihaan chumií, ne Rej ní' nicun' xta' me uún Diöse, ne síi uun chij sa' uxrá me so', ne che'é dan achíin ni'yáá 'unj rihaan Diöse se vaa rque ndo'o so' nana cuu sa' nimán soj, ne achíin ni'yáá 'unj se vaa guun nucuaj soj narí' soj nu' nana naca tihaan so' man ní', gaa ne sa' doj xcqj ma'an soj cuentá che'é so' ei.

<sup>18</sup> Dan me se xcqj soj cuentá sa' doj, ne quene'en soj me che'é nacúin Diöse man soj, ne quene'en soj nu' se vaa qui'yaj Diöse che'é soj, ne guun rá soj se vaa vaa che'é ndo'o canoco' soj man Jesucristó adonj. Quene'en soj se vaa sa' uxrá vaa se qui'yaj Diöse che'é taran' ní' sji sa' noco' man so'.

<sup>19</sup> ne quene'en soj se vaa guun nucuaj ndo'o Diöse racúij Diöse man ní' sji amán rá ni'yaj man so' a. Nucuaj ndo'o Diöse adonj.

<sup>20</sup> Che'é se nucuaj Diöse ro', che'é dan cunuu i'na' ya uún Jesucristó, qui'yaj Diöse gaa cavi' Jesucristó, ne guun chij uxrá Jesucristó rej xta' rej x'nuij Diöse, qui'yaj uún Diöse adonj.

<sup>21</sup> Veé dan, ne uun chij ya Jesucristó rihaan taran' nij yuvií do', rihaan taran' nij ya'anj rii ta'nga' rihaan chumií nihánj do', tzej ne ne doj cuano me uun chij so' ma'. 'Q se guun chij so' nu' cavií nu' ca'anj nanj adonj.

<sup>22</sup> Ne uun chij Jesucristó rihaan cunudanj rasuun qui'yaj Diöse, ne dan me se Diöse me síi qui'yaj rii ta'nga' Jesucristó rihaan cunudanj rasuun che'é ní' sji amán rá ni'yaj man so' adonj.

<sup>23</sup> Ne ase vaa nee man Jesucristó ro', danj vaa ní', uno ní' rihaan so', ne dan me se so' me síi 'nij ra'a man cunudanj rasuun man rihaan nu' cachra' chumií, ne so' me síi rque nu' se vaa achíin man nu' nij rasuun man rihaan chumií nihánj adonj.

## 2

*Nana nihánj taj xna'anj daj vaa cavii sa' ní' sji yaníj, qui'yaj Diöse, ne síi cunuu sa' nimán rihaan Diöse me ní' cuano, che'é se luj qui'yaj uun Diöse che'é ní' a*

<sup>1</sup> Gaa rque me se ma'an nij soj me síi tumé ndo'o cacun', ne che'é dan quiri' nu' nimán nij soj, ne taj se qui'yá' ca'vee quinanií soj rihaan sayuun a ma'.

<sup>2</sup> Dan me se qui'yaj soj ndaa vaa 'yaj yuvií man rihaan chumií nihánj, ne qui'yaj soj nu' rasuun chí'ij rasuun niha' rá síi chree síi rii ta'nga' rihaan

chumiꝯ nihánꝯ cuano sꝯí chéé uun chij rque nana, ne so' me sꝯí rii ta'nga' rihaan nimán nij yuvii na'vej rá cuño rihaan Diose a.

<sup>3</sup> Ne ase vaa 'yaj nij yuvii vaa danꝯ ro', danꝯ qui'yaj guee taran' ní' gaa rque, ne qui'yaj ní' cacun' ga' nij so', ne qui'yaj ní' inanj se me rá nee man ní' qui'yaj ní' a. Inanj se cavii raꝯ ma'an ní' qui'yaj ní', ne yuvii ca'maan rá Diose ni'yaj Diose man me ní' gaa rque, ne ase vaa nij yuvii chéé rihaan chumiꝯ nihánꝯ cuano ro', ta'nga' danꝯ vaa ní' gaa rque ei.

<sup>4</sup> Tzaj ne cunuu 'ee ndo'o rá Diose man ní',

<sup>5</sup> ne quene'en Diose se vaa aj quiri' nu' nimán ní' che'é cacun' tumé ní', ne che'é dan, ase vaa cunuu i'na' uún Jesucristó, qui'yaj Diose ro', ta'nga' danꝯ vaa uún ní' cunuu sa' nimán ní', qui'yaj Diose, ne che'é dan ca'vee cayáán ní' ga' Diose nu' cavii nu' ca'anꝯ nanꝯ adonꝯ. (Dan me se maꝯan che'é se luj qui'yaj Diose che'é soꝯ me se ca'vee quinanii soꝯ rihaan chrej chi'ii uun chij nimán soꝯ ne cavii sa' soꝯ ei.)

<sup>6</sup> Ne ase vaa cavii Jesucristó cayáán so' rej xta', qui'yaj Diose ro', danꝯ qui'yaj uún Diose che'é ní', che'é se sij noco' man Jesucristó me ní', ne vaa güii cavii ní' cayáán ní' ga' so' rej xta' ei.

<sup>7</sup> Ndaꝯ sꝯí, gaa ne nu' cavii nu' ca'anꝯ quene'en nij yuvii se vaa qui'yaj ndo'o Diose se luj che'é ní', ne dan me se quene'en nij yuvii se vaa cunuu 'ee ndo'o rá Diose man ní' che'é se sꝯí noco' man Jesucristó me ní' nanꝯ adonꝯ.

<sup>8</sup> Dan me se xcaꝯ nij soꝯ cuentá se vaa inanj che'é se luj qui'yaj Diose che'é soꝯ me quinanii soꝯ rihaan chrej chi'ii uun chij nimán soꝯ ne cavii sa' soꝯ á. Dan me se maꝯan che'é se amán rá soꝯ ni'yaj soꝯ man so' me cavii sa' soꝯ ei. Nuveé ma'an soꝯ me sꝯí 'yaj a'vee avii sa' soꝯ ma'. Maꝯan se Diose racuꝯ man soꝯ don a'vee avii sa' soꝯ nanꝯ adonꝯ.

<sup>9</sup> Nuveé che'e rasuun sa' qui'yaj soꝯ me cavii sa' soꝯ ma'. 'O se na'vej Diose ca'mii xta' yuvii cataꝯ yuvii se vaa ma'an nij yuvii me sꝯí qui'yaj cavii sa' nij yuvii ma'.

<sup>10</sup> 'O se Diose me sꝯí qui'yaj man ní', ne qui'yaj Diose man ní' che'é rej canoco' ní' man Jesucristó ne ve'é qui'yaj suun ní' suun sa', rá Diose, ne che'é ma'an Diose me a'vee qui'yaj suun ní' suun sa' yo' nanꝯ adonꝯ.

<sup>11</sup> Dan me se ne'en soꝯ se vaa nuveé yuvii israelitá me soꝯ ma'. 'O se yuvii yaní me soꝯ, ne dan me se cataꝯ núꝯ sij israelitá se vaa nij vaa nee man soꝯ adonꝯ. Tzaj ne cuta' núꝯ ta'nga' man nee man ma'an núꝯ, ne che'é dan me sꝯí ata' ta'nga' me núꝯ, taj yuvii ni'yaj yuvii man núꝯ adonꝯ. Yo'o xcaꝯ soꝯ cuentá

<sup>12</sup> se vaa gaa rque ro', nuveé sij noco' man Jesucristó me nij soꝯ ma'. 'O se sij yaní rihaan núꝯ sij israelitá me soꝯ gaa naá nanꝯ adonꝯ. Dan me se nuveé sij nõ xcuún a' ó xco' canoco' man Diose me soꝯ gaa rque ma'. Maꝯan se sij 'yaj rma'an rihaan chumiꝯ me soꝯ nanꝯ adonꝯ. Dan me se ya' cata' tu'va Diose che'é núꝯ sij israelitá se vaa cavii sa' núꝯ, tzaj ne taj nana' cata' tu'va Diose che'é nij soꝯ gaa rque ma'. Dan me se aj quene'en nij soꝯ se vaa se cavii sa' nij soꝯ do', se racuꝯ Diose man nij soꝯ do', gaꝯ man adonꝯ. Maꝯan se chéé uun nij soꝯ rihaan chumiꝯ gaa rque nanꝯ adonꝯ.

<sup>13</sup> Tzaj ne yaj me se ndá' se ne quene'en uxra' soꝯ man Diose, tzaj ne ca'na' Jesucristó cavi' Jesucristó che'é soꝯ, ne guun che'e soꝯ canoco' soꝯ man Diose, qui'yaj Jesucristó, ne guun che'e Jesucristó naqui'yaj chre' so' man nij soꝯ che'é ton cayanꝯ man so' rihaan rcutꝯ nanꝯ adonꝯ.

<sup>14</sup> Ne Jesucristó ro', me sí naqui'yaj dínj man núj sij israelitá gá soj sij yaníj, gaa ne orún' ya chuman' me taran' ní' cuano, qui'yaj so' a. 'O se tiri' so' chingá ca'ne' tanu man ní' gá tuvi' ní', gaa cavi' ma'an so' rihaan rcutze,

<sup>15</sup> ne dan me se chingá yo' ro', me se-tucuanj Moisés, ne yo'o tinavij Jesucristó tucuáan yo' nanj adonj. Che'é dan me 'o cuyaan vaa taran' ní' cuano, ne cunuu 'eé rá ní' man tuvi' ní', qui'yaj Jesucristó, ne yo'o cunuu naca nimán ní', qui'yaj Jesucristó, ne dínj vaa nimán taran' ní', qui'yaj ya so' adonj.

<sup>16</sup> Che'é se cavi' Jesucristó rihaan rcutze ro', che'é dan orún' ya chuman' me ní' cuano, ne yo'o qui'yaj canaán Jesucristó man nu' se a'maan rá man nimán taran' ní', ne dan me se cunuu rcua'aan taran' ní' gá Diose, qui'yaj Jesucristó a.

<sup>17</sup> Dan me se ca'na' Jesucristó, ne nata' so' rihaan nu' soj sij yaníj do', rihaan núj sij israelitá sij nicaj se-tucuanj Diose do', se vaa dínj cumán taran' ní' rihaan Diose á.

<sup>18</sup> 'O se che'é Jesucristó me se nuu Nimán Diose nimán taran' ní', ne che'é dan vaa ya'núj rihaan taran' ní' cachinj ni'yaj ma'an ní' rihaan Rej ní' Diose adonj.

<sup>19</sup> Che'é dan nuveé sij man yo'ó chuman' me soj a ma'. 'O se sij ne'en man Diose me nij soj cuano nanj adonj. Nuveé sij noco' yo'ó tucuáan me soj ma'. Maan se ma'an soj me sí cunuu sa' nimán, ne noco' nu' taran' ní' man Diose yaj adonj.

<sup>20</sup> Xa' tucuáan noco' taran' ní' cuano ro', ase vaa 'o ve' sa' 'yaj nii xráá yuvej sa' inan' ro', danj vaa ní', ne nij yuvej sa' yo' ro', me núj sij apóstol cune' Jesucristó do', nij sí nata' se-nana Diose gaa naá do', ne yuvej sa' doj rihaan taran' nij yuvej naj tacóo ve' yo', tzaj ne ma'an ya Jesucristó me yo' vaa nanj chuguanj.

<sup>21</sup> Dan me se yo'o chre' gaa ní' sij noco' man Jesucristó, gaa ne yo'o cuyaan naxcaj nuvíi ei. Ne nuvíi yo' ro', me nu' ní' sij noco' man sí 'nij ra'a man ní' nanj adonj.

<sup>22</sup> Ne ma'an nij soj ro', me se che'é se noco' soj man sí 'nij ra'a man ní', che'é dan cunuu rcua'aan soj gá yo'ó nij sí guun nuvíi, ne nihánj me se ma'an ya Nimán Diose yáan sca'núj taran' ní' ei.

### 3

*Nana nihánj taj xna'anj se vaa ca'ne' Diose suun rihaan Pabló nata' so' se-nana Diose nana sa' rihaan ní' sij yaníj a*

<sup>1</sup> Ne'en nij soj se vaa 'nij 'unj taga' che'é se noco' 'unj man Jesucristó, ne 'yaj suun 'unj a'mii natáj 'unj rihaan nij soj sij yaníj che'é so',

<sup>2</sup> ne aj ne'en soj se vaa atá 'unj suun qui'yaj Diose che'é soj sij yaníj nanj adonj. Dan me se qui'yaj ndo'o Diose se luj che'é 'unj, ne ca'ne' so' suun rihanj qui'yaj sunj che'é soj ei.

<sup>3</sup> Dan me se tihaan naca Diose rihanj daj me rá Diose qui'yaj Diose che'é nij yuvií man rihaan chumií nihánj, ne aj cachrón 'unj doj nana che'é se vaa tihaan Diose manj rihaan yanj cartá ca'née 'unj rihaan soj gaa rque adonj.

<sup>4</sup> Nayaá soj yanj cartá yo', ne xcaj soj cuentá che'é nu' nana nari' 'unj nana che'é nu' se vaa qui'yaj Jesucristó che'é yuvií ei.

<sup>5</sup> Gaa rque ro', ne cataj xna'anj Diose nana yo' rihaan yuvií ma'. Tzaj ne ndaa yaj ro', me tihaan Nimán Diose nana yo' rihaan núj sij apóstol sij sa'

cune! Jesucristó man nata' se-nānā so' rihaan yuvij, ne tihaan so' nana yo' rihaan yo'ó nij síi nata' se-nānā Diose rihaan yuvij a.

<sup>6</sup> Dan me se tihaan so' nana se vaa cunō nij soj sij yanij se-nānā Diose nana sa', ne cunu sa' soj ga núj sij israelitá adonj. Ne nana cata' tu'va Diose che'é nij síi canoco' man Jesucristó ro', quisij ya nu' nana yo' che'é nij soj sij yanij ga núj sij israelitá nanj chuguanj.

<sup>7</sup> Ne vaa ndo'o suun rihanj nata' 'unj nana sa' yo', ne yo' me se luj qui'yaj Diose che'ej adonj. Nda' se ne nó xcúun 'unj quirj' 'unj se luj nihánj, tzaj ne ma'an ya Diose me síi rque se luj nihánj manj nanj ei. So' me síi nucuaj ndo'o, ne guun nucuaj qui'yaj sunj, qui'yaj Diose nanj chuguanj.

<sup>8</sup> Nda' se síi nica' doj rihaan taran' nij síi sa' noco' man Diose mej, tzaj ne qui'yaj Diose se luj yo' rihanj, ne ca'ne' so' suun rihanj nataj nana sa' rihaan nij soj sij yanij se vaa sa' uxrá vaa se qui'yaj Jesucristó che'é ní' adonj.

<sup>9</sup> Ne me rá Diose cataj xna'anj 'unj rihaan yuvij nu' se vaa qui'yaj so' che'é nij yuvij a. Dan me se Diose me síi qui'yaj nu' rasuun, ne aj ne'en so' daj qui'yaj so' che'é yuvij, tzaj ne ne cataj xna'anj so' rihaan yuvij nu' cavii nu' ca'na' ma'.

<sup>10</sup> Tzaj ne nij ya'anj man rej xta' ro', me rá Diose xcaj nij so' cuentá cuano se vaa inanj nana cūu sa' ndo'o avii raá Diose, ne quene'en nij so' man taran' ní' sij noco' man Jesucristó, ne xcaj nij so' cuentá se vaa avii ndo'o raá Diose adonj.

<sup>11</sup> Dan me se guun rá Diose nu' cavii nu' ca'na' se vaa qui'yaj so' danj tió man ní', ne guun rá so' se vaa ca'nej so' man Jesucristó sij 'nij ra'a man ní' rihaan chumij nihánj a.

<sup>12</sup> Ne che'é se amán rá ní' ni'yaj ní' Jesucristó ro', che'é dan ca'vee cachinj ni'yaj ma'an ní' rihaan Diose, ne taj che'é cuchu'vi' ní' ca'mij ní' ga Diose ma'.

<sup>13</sup> Che'é dan cataj xna'anj 'unj rihaan soj se vaa se cuchu'vi' nimán soj quene'en soj sayuun quirán' 'unj che'é soj ma'. Maan se tananj a cavii sa' soj doj che'é sayuun rán' 'unj nihánj nanj adonj.

*Nana nihánj taj xna'anj se vaa achín ni'yaj Pabló rihaan Diose se vaa sa' doj xcaj nij síi man Efeso cuentá se vaa 'ee ndo'o rá Jesucristó man ní' a*

<sup>14</sup> Che'é se cavii sa' ndo'o nij soj ga núj, che'é dan canicun' ruj 'unj, ne achín ni'yáá 'unj rihaan Rej ní' Diose che'é soj adonj.

<sup>15</sup> Dan me se Diose me Rej nu' taran' nij x'ne' nij síi man rej xta' do', Rej nu' taran' nij x'ne' ní' sij man rihaan chumij nihánj do',

<sup>16</sup> ne achín ni'yáj rihaan so' che'é soj se vaa narj' nucuaj nimán soj qui'yaj Nimán Diose adonj.

<sup>17</sup> Ne achín ni'yáj se vaa cuchuman doj rá soj quene'en soj man Jesucristó, ne yo'o natuú Jesucristó nimán soj qui'yaj Diose, ga ne yo'o cunu 'ee rá soj man taran' tinúu soj adonj.

<sup>18-19</sup> Ndaa sj, ga ne narj' nucuaj ndo'o nimán soj, ne guun nucuaj soj xcaj sa' soj cuentá se vaa 'ee uxrá rá Jesucristó man ní', ne quene'en taran' ní' sij cunu sa' nimán rihaan Diose se vaa 'ee uxrá rá Jesucristó man ní' adonj. Taj a 'ó síi guun nucuaj ma'an quene'en se vaa 'ee uxrá rá Jesucristó man ní' ma'. Tzaj ne guun nucuaj ní' xcaj ní' cuentá se vaa 'ee uxrá rá Jesucristó man ní', qui'yaj Diose, ne qui'yaj ndo'o Diose se luj che'é ní', ne dan me se cunu sa' inanj ní', ndaa vaa ma'an Diose adonj.

<sup>20</sup> Dan me se yaj me se síi sa' uxrá me Diose, ne uun nucuaj so' rque so' nu' rasuun achín ní' ga rihaan ní' a. Tzaj ne ne rque so' maan inanj nij rasuun

achiín ni'yaj ní' gaa rihaan ní' ma'. 'O se rqué so' nu' rasuun achiín ní' rihaan so', ne rqué so' yo'ó doj a rasuun rihaan ní' ei.

<sup>21</sup> Che'é dan cataj ní' sij noco' man Jesucristó se vaa inanj sa' uxrá vaa Diose, ne yo'ó danj ca'mii ní' ga ta'nii ní' nu' cavii nu' ca'anj che'é Jesucristó a. Veé danj gaa ya ei.

## 4

*Nana nihánj taj xna'anj se vaa ve'é qui'yaj ní' rihaan tinúú ní', che'é se ase vaa nee man yo'ó yuvii ro', danj vaa taran' nij tinuj ní' a*

<sup>1</sup> Ne'en nij soj se vaa 'nij 'unj taga' che'é se noco' 'unj man síi 'nij ra'a man ní', ne cataj xna'anj 'unj rihaan nij soj se vaa ve'é qui'yaj ma'an soj rihaan Diose á. Diose me síi canacúun man soj canoco' soj man so', ne che'é dan ve'é canoco' soj man so' gaa chéé soj rihaan chumii nihánj á.

<sup>2</sup> Ne guun nij soj síi ni'yánj a'mii, ne ve'é qui'yaj soj ga tinúú soj, ne se guun yuvaá soj man tinúú soj ma'. Maan se inanj cunu 'ee rá soj man tinúú soj, ne gaa inaj nimán soj ga tinúú soj á.

<sup>3</sup> Ne se cunu' soj ga tuvi' soj, ne se quitáa ri'yunj soj tuvi' soj ma'. Maan se dínj cumán soj ga tinúú soj á. Ve'é cunó taran' soj rihaan Nimán Diose, ne ase vaa nimán orún' yuvii ro', danj gaa nimán soj ga tinúú soj á.

<sup>4</sup> Dan me se orún' ya yuvii me ní' vaa, ne orún' ya nimán ní' vaa, ne dan me se orún' ya Nimán Diose me nuú nimán ya ní', ne guun ya rá taran' ní' se vaa canacúun Diose man taran' ní', ne 'o cuyaan cavii sa' taran' ní', qui'yaj Diose adonj.

<sup>5</sup> Oruun síi 'nij ra'a man ní', ne oruun nana sa' amán rá ní', ne sij cata' ne che'é Jesucristó me taran' ní',

<sup>6</sup> ne orún' Rej taran' ní' Diose uún a. Nicaj yu'unj so' man taran' ní', ne 'yaj suun so' nimán taran' ní', ne yanj so' ga taran' ní' nanj adonj.

<sup>7</sup> Tzaj ne ndaa 'o 'o ní' rqué Jesucristó 'o 'o suun sa' rihaan a. Dan me se yo' me rsuun sa' rqué Jesucristó, ndaa vaa me rá so' rque so' man ní' ei. Ne qui'yaj ndo'o Diose se luj rihaan 'o 'o ní' se vaa guun nucuaj 'o 'o ní' qui'yaj suun ní' suun ca'ne' Jesucristó rihaan ní' a.

<sup>8</sup> 'O cuyaan vaa nana nihánj ga nana no rihaan danj Diose, ne dan me se nana no rihaan danj Diose taj se vaa qui'yaj canaán Jesucristó rihaan nij síi taj ri'yunj man so', gaa ne ca'anj nicaj so' man nij so' rej xta', gaa ne rqué so' se sa' rihaan nij yuvii a. Danj taj danj Diose a.

<sup>9</sup> (Ne nana yo' taj se vaa cavii so' xta', ne ne'en ní' se vaa asino yaan nanij so' rej man nij síi cavii rque yo'ó a.

<sup>10</sup> Ne orún' so' me síi nanij rej man nij síi cavii, ne orún' so' me síi cavii rej xta' uún adonj. Dan me se xta' doj cavii so' rihaan daj a rasuun, gaa ne guun so' síi nicaj yu'unj man daj a rasuun adonj.)

<sup>11</sup> Ne ma'an so' me síi cune' man ta'aj ní' guun ta'aj ní' apóstol nata' se-nana so' rihaan cunudanj nij yuvii man rihaan chumii, ne yo'ó ta'aj ní' me síi cune' so' nata' nana tihaan naca Diose rihaan so', ne yo'ó ta'aj ní' me síi cune' so' nata' se-nana Diose nana sa' rihaan nij síi ataa cuchuman rá ni'yaj man so', ne yo'ó ta'aj ní' me síi nicaj yu'unj man nij síi amán rá ni'yaj man so', qui'yaj so', ne yo'ó ta'aj ní' me síi ticha'nuu se-nana Diose rihaan nu' tinúú ní', qui'yaj so', ne dan me se ndaa ino vaa 'o 'o suun sa' nicaj 'o 'o ní', qui'yaj Jesucristó a.

12 Dan me se danj qui'yaj Jesucristó, che'é se me rá Jesucristó guun nucuaj ní' sij cunuu sa' rihaan Diose qui'yaj suun ní' raçuíj ní' man tinúú ní', gaa ne ve'é doj cumañ taran' ní' sij noco' man Jesucristó, ne sa' doj qui'yaj suun ní' rihaan so' nanj adonj.

13 Ne sa' doj cuchuman rá ní' quene'en ní' ta'níi Diose, ne sa' doj quene'en ní' daj vaa so', ne ve'é cunuu rcua'aan taran' ní' adonj. Chij inañj gaa rá ní', gaa ne daj se sa' ndo'o vaa Jesucristó ro', danj gaa sa' taran' ní' nanj adonj.

14 Tzaj ne cuano ro', me se ase vaa xnii vaa ní', ne vaa yuvii tiha' yu'unj ndo'o man ní', ne dan me se nuchruj raá ndo'o nij yuvii daj qui'yaj nij so', ne tiha' yu'unj nij so' man ní', ne tucuyón ndo'o nij sí tiha' yu'unj nana naca man ní', ne amán rá ní' uno ní' náa guun nana tiha' yu'unj yo', 'yaj nij so' a. Tzaj ne asa' quisij cunuu chij rá ní', ne se cuno ní' nana tiha' yu'unj yo' a ma'.

15 Mañ inañj nana ya ca'mii ní' rihaan tinúú ní', che'é se 'ee rá ní' man tinúú ní', gaa ne sa' doj quene'en ní' canoco' ní' man Jesucristó, nu' se vaa qui'yaj ní' adonj. Dan me se ase vaa rii ta'nga' cúu yave yuvii rihaan nu' nee man yuvii ro', danj vaa rii ta'nga' Jesucristó rihaan ní' adonj.

16 Ne mañ che'é so' ro', me ase vaa oro' tuvi' nu' cúu man yo'o yuvii ro', danj vaa noco' tuvi' ní' ga tinúú ní', ne narqué Jesucristó se nucuaj achiin rihaan nu' nij tinuj ní', ne che'é dan ve'é doj cumañ taran' ní', ne ve'é doj cunuu 'ee rá ní' tinúú ní' adonj.

*Nana nihánj taj xna'anj se vaa ca'ne' rá ní' ga suun 'yaj ndaa vaa 'yaj nij sí ne amán rá ni'yaj man Jesucristó, ne ve'é qui'yaj ní' ga tinúú ní' do', ga sí 'nij ra'a man ní' do' ei*

17 Che'é dan me cataj xna'anj yá 'unj 'o nana rihaan soj, che'é se noco' ní' man síi 'nij ra'a man ní' ei. Dan me se quisij qui'yaj soj se vaa 'yaj yo'ó nij síi yanij nij síi ne amán rá ni'yaj man Jesucristó nanj ei. Nij síi yanij yo' me se noco' nij so' nana snúú rma'an nana avii raá ma'an nij so',

18 ne ne uun nucuaj nij so' xcaj sa' nij so' cuentá a ma'. Se cavii sa' nimán nij so', qui'yaj Diose ma'. Mañ se quirañ' nij so' sayuun che'é se síi ni'yon me nij so' ne nichraj ndo'o rá nij so' adonj.

19 Ne rihuun rá nij so' che'é cacun' 'yaj nij so' ma'. Tananj yo'o noco' nij so' tucuaán chi'ii, ne 'yaj ndo'o nij so' cacun' se vaa me rá nee man nij so' qui'yaj nij so', ne niha' ndo'o rá nij so' qui'yaj nij so' cacun' yo' a. Ne a'ne' rá nij so' ga suun 'yaj cacun' a ma'.

20 Tzaj ne ino uxrá vaa nana nari' soj asij guun che'e soj canoco' soj man Jesucristó ei.

21 Ya uxrá cuno nij soj se-nana Jesucristó, ne nari' nij soj nana ya adonj.

22 Nana nari' nij soj taj se vaa no xcúun soj tanáj soj chrej chi'ii chrej canoco' soj asino yaan a. Dan me se inañj se me rá nee man soj qui'yaj soj asino yaan, ne che'é dan tiha' yu'unj síi chree man soj, ne ve'e danj vaj soj, ne ca'anj soj rihaan ya'an nanj á.

23 Tzaj ne cuano nihánj no xcúun soj ca'vej soj cunuu sa' nimán soj, ne xcaj naca soj cuentá ei.

24 Ne ca'vej soj guun soj yuvii naca qui'yaj Diose á. Dan me se Diose me síi qui'yaj cunuu nica ya nimán soj, ne cunuu sa' ya nimán soj, qui'yaj so' adonj.

25 Che'é dan ca'ne' rá soj ga nana ne, ne inañj nana ya ca'mii soj rihaan tinúú soj, che'é se ase vaa nee man ma'an soj ro', vaa nee man taran' nij tinuj ní' a.

<sup>26</sup> Nda' se a'maan ndo'o rá soj, tzaj ne se qui'yaj soj cacun' ma'. Ne ra'yanj na'maan rá uún soj cuaj ei. Se ca'vej rá soj yo'o gaa yuvaa nimán soj cunuj' güii ma'.

<sup>27</sup> Se gaa ya'núj rihaan síi chree caxrii síi chree chrej chi'ii rque soj, qui'yaj soj mei.

<sup>28</sup> Sese vaa síi ituu 'nij sca'núj soj, ne ca'ne' rá nij so' ga suun 'yaj ituu rasuun ei. Maan se ve'é qui'yaj suun ma'an nij so' suun sa', gaa ne sese achiin rasuun rihaan tinúú so', ne guun nucuaj so' rque ma'an so' rasuun rihaan tinúú so' ei.

<sup>29</sup> Se ca'vej soj ca'mii soj nana quij ma'. Maan se inanj guun rá soj ve'é ca'mii soj, ne nana sa' nana achiin man tinúú soj ro', yo' me nago' soj rihaan tinúú soj á. Ne cavii sa' doj taran' nij síi cunú nana ca'mii soj, sese sa' ca'mii soj ei.

<sup>30</sup> Ne se guun quinano rá Nimán Diose, qui'yaj soj ma'. Che'é se yanj Nimán Diose ga soj ro', che'é dan ne'en ya soj se vaa cavii sa' soj asa' quisij güii tinanii Diose man ní' rihaan sayuun adonj. Che'é se Nimán Diose yáan nimán soj ro', che'é dan me ne'en Diose se vaa ta'nij ya Diose me soj adonj.

<sup>31</sup> Ca'ne' rá soj ga suun nachri' ni'yaj tinúú á. Ca'ne' rá soj ga suun axrij yuvaa man tinúú á. Ca'ne' rá soj ga suun a'maan rá á. Se caguáj soj doj rihaan tinúú soj ma'. Se ca'mii soj doj nana nij che'é tinúú soj ma'. Quiri'ij soj cunudanj chrej chi'ii yo' á.

<sup>32</sup> Dan me se ve'é qui'yaj soj rihaan tinúú soj á. Gaa 'ee rá soj ni'yaj soj tinúú soj á. Ne'en soj se vaa caráj x'naa Diose che'é cacun' tumé ní', che'é se cavi' Jesucristó che'é ní' a. Che'é dan no xcuún ya soj caraa x'naa soj ni'yaj soj tinúú soj adonj.

## 5

<sup>1</sup> Ne'en nij soj se vaa ta'nij Diose me soj cuano, ne 'ee uxrá rá Diose man soj, ne che'é dan ase vaa 'yaj ma'an Diose ro', danj gaa qui'yaj uún ma'an soj ei.

<sup>2</sup> Gaa 'ee rá soj man tinúú soj gaa chéé soj rihaan chumii nihánj á. Inanj danj qui'yaj Jesucristó, cunuu 'ee rá so' man ní', ne ca'vej so' cavi' so' che'é ní', ne ase vaa se luj nago' yuvii rihaan Diose ro', ta'nga' danj vaa Jesucristó che'é ní' nanj chuguanj.

<sup>3</sup> Se qui'yaj soj cacun' ga chana ma'. A 'ó se chi'ii se qui'yaj soj ma'. Ne se guun niha' rá soj quirí' ndo'o soj rasuun ma'. Síi sa' nocq' man Diose me soj, ne daj chihaa mij se qui'yaj soj a doj cacun' vaa danj mei.

<sup>4</sup> Ne se ca'mii soj nana chi'ii do', nana nij do' ma'. Se ca'mii soj nana snúú rma'an ma'. 'Q se taj che'é ca'mii soj nana vaa danj mei. Maan se no xcuún soj nago' inanj soj gracia rihaan Diose ei.

<sup>5</sup> Dan me se síi 'yaj cacun' ga chana ro', quiran' so' sayuun, ne síi niha' rá quirí' ndo'o rasuun ro', quiran' so' sayuun adonj. 'Q se ase vaa síi na'vúj rihaan ya'anj cacój yuvii ro', danj vaa uún síi niha' rá quirí' ndo'o rasuun ei. Xcaj ya soj cuentá se vaa a 'ó síi 'yaj cacun' yo' se cayáan ga Diose asa' quisij güii guun chij Jesucristó do', guun chij Diose do', rihaan chumii nihánj a ma'.

<sup>6</sup> Se ca'vej rá soj ca'mii yuvii nana ne rihaan soj ne tiha' yu'unj nij yuvii man soj ma'. Se qui'yaj soj se chi'ii me rá nij yuvii qui'yaj soj ma'. Maan se yo' me se 'yaj nij síi na'vej rá cunú rihaan Diose, ne che'é dan axrij yuvaa Diose man nij so' adonj.

<sup>7</sup> Che'é dan naxuun yanij soj man soj rihaan nij síi 'yaj danj ei.



<sup>8</sup> Asij rque ro', ase vaa nij sí chéé rej rmj' ro', danj vaa ma'an soj, ne nuvi' cuentá nicaj soj ma'. Tzaj ne yaj ro', canoco' soj man sí 'nij ra'a man ní', ne che'é dan ase vaa sí chéé rej ranga' ro', danj vaa soj, nicaj ndo'o soj cuentá, ne che'é dan ve'é qui'yaj soj gaa chéé soj rihaan chumij nihánj ei.

<sup>9</sup> Sí chéé rej ranga' ro', sa' 'yaj so', ne nicá vaa rá so', ne nana ya inanj a'mii so' adonj.

<sup>10</sup> Dan me se nuchruj raa soj daj qui'yaj soj, ne guun niha' rá sí 'nij ra'a man ní' quene'en so' man soj adonj.

<sup>11</sup> Tzaj ne se guun guun tuví' soj ga nij sí chi'ij ne acaj cuentá ne qui'yaj soj se chi'ij ga nij so' ma'. 'O se xa' se vaa 'yaj nij so', tzaj ne taj se guun yo' rihaan nij so' a ma'. 'O se tananj a guun rá soj tijaan soj man nij sí 'yaj danj se vaa ne sa' vaa se 'yaj nij so' a.

<sup>12</sup> 'O se xa' se vaa 'yaj yuve nij so', tzaj ne ndaa uun na'aj yá' ca'mi' che'é se vaa 'yaj yuve nij so' chuguanj.

<sup>13</sup> Tzaj ne sese tijaan ní' rihaan nij yuvij daj vaa nu' rasuun 'yaj yuve nij so', gaa ne quene'en nij so' daj vaa yo', ne xcaj ya nij so' cuentá se vaa nij vaa qui'yaj nij so' ei.

<sup>14</sup> 'O se ya'an chuguun me se ya ruvi' nu' nij rasuun, 'yaj ya'an adonj. Che'é dan taj nana nihánj: "Narij soj nej, sij otoj sca'núj nij xngá, ne naxagaa soj, canicun' caya soj, ne Cristó me sí quichuguun rihaan soj a", taj nana yo' a.

<sup>15</sup> Che'é dan tumé uxrá nij soj daj vaa 'yaj soj gaa chéé soj rihaan chumij nihánj ei. Se qui'yaj soj se vaa 'yaj nij sí ne ne'en ma'. Tananj qui'yaj soj ndaa vaa 'yaj sí cuu ra' á.

<sup>16</sup> Ne se ca'ne' uun rá soj cachén ndo'o orá rihaan soj ma'. 'O se uun ndo'o cacun' cuano nihánj, ne che'é dan no xcuún soj qui'yaj suun ndo'o soj yaj gaa vaa ya'núj rihaan soj chuguanj.

<sup>17</sup> Ne se guun soj sí ni'yon ma'. Tananj xcaj soj cuentá daj me rá sí 'nij ra'a man ní' qui'yaj soj ei.

<sup>18</sup> Ne se guun xno soj ma'. Che'é se uun xno yuvij ro', che'é dan 'yaj ndo'o nij yuvij cacun' chi'ij ndo'o adonj. Tzaj ne yo'o cunuú Nimán Diose nimán soj ei.

<sup>19</sup> Ase vaa nana achraá soj rihaan Diose ro', danj gaa nana ca'mij soj rihaan tinúú soj á. Ne cachraa nimán soj chra' rihaan sí 'nij ra'a man ní' á.

<sup>20</sup> Ne niganj nago' soj gracia rihaan Diose che'é cunudanj rasuun, che'é se sí noco' man ta'nú Diose Jesucristó sij 'nij ra'a man ní' me soj á.

<sup>21</sup> Ne ve'é qui'yaj cunudanj soj ndaa vaa me rá tuví' soj, ne yo'o cunuú rá soj se vaa Jesucristó me sí ca'ne' cacun' che'é ní' vaa guii a.

### *Nana nihánj taj xna'anj daj qui'yaj 'o 'o ní' rihaan tuvi' ní' a*

<sup>22</sup> Dan me se ve'é qui'yaj nij chana ndaa vaa me rá nicá no' á. Dan me se daj se uun rá ní' ni'yaj ní' man sí 'nij ra'a man ní' ro', danj guun rá chana ni'yaj chana nicá no' á.

<sup>23</sup> Dan me se Jesucristó me sí qui'yaj cavii sa' ní' sij noco' man so' rihaan sayuun, ne guun hij so' rihaan ní', ne che'é dan daj se uun rá ní' ni'yaj ní' man so' ro', danj inanj guun rá chana ni'yaj no' man nicá no' a.

<sup>24</sup> Ne ase vaa uno taran' ní' sij noco' man Jesucristó rihaan Jesucristó ro', ta'nga' danj qui'yaj nij chana cunó no' nu' nana sa' a'mii nicá no' rihaan no' á.

<sup>25</sup> Ne nij snó'o ro', me se gaa 'ee uxrá rá nij so' man nicá nij so' uún á. Dan me se ase vaa 'ee rá Jesucristó man taran' ní' sij noco' man so' ro', danj gaa

'ee rá nij snó'o man nica nij so' uún adonj. Ne'en soj se vaa ca'née nimán Jesucristó cavj' so' che'é ní' sij noco' man so',

<sup>26</sup> che'é se me rá so' cata' ne ní' ne naruvij nimán ní' ne x'nee cacun' taj xráá ní' ne cunó ní' se-nana Diose ne cunú sa' ní' rihaan Diose, rá Jesucristó a. Danj me rá Jesucristó qui'yaj so' che'é taran' ní' sij noco' man so' adonj.

<sup>27</sup> Ndaa síj, gaa ne vaa güii, ne cachron so' man ní' sij noco' man so' rihaan ma'an so', ne ve'é uxrá gaa taran' ní' ni'yaj so', ne a 'ó cacun' do', a 'ó se nij do', se quitáá xráá ní' a ma'. Maan se ase vaa vaa sa' Diose ro', danj gaa sa' taran' ní' adonj.

<sup>28</sup> Dan me se ase vaa 'yaj Jesucristó che'é ní' sij noco' man so' ro', danj qui'yaj uún nij snó'o che'é nica snó'o, ne ase vaa aráya'anj snó'o man nee man ma'an so' ro', danj gaa caraya'anj so' man nica so' uún á. Dan me se ase vaa nee man ma'an ní' ro', danj vaa chana nica ní' rihaan ní', ne che'é dan me se sese aráya'anj snó'o man nica snó'o, ne síi aráya'anj man ma'an me uún so' nanj chuguanj.

<sup>29</sup> Ne a 'ó yuvij se qui'yaj chi'ij man nee man ma'an ma'. Tananj sese na'aaan rque ní', ne ri' ní' se cha ní', ne aráya'anj uxrá ní' man nee man ní' nanj adonj. Dan me se ase vaa 'yaj Jesucristó aráya'anj Jesucristó man taran' ní' sij noco' man so' ro', danj inanj 'yaj uún ní' aráya'anj uxrá ní' man nee man ní' ei.

<sup>30</sup> Dan me se ase vaa nee man ma'an Jesucristó ro', danj vaa taran' ní' sij noco' man so' rihaan so' uún adonj.

<sup>31</sup> Ne nihánj me nana no rihaan danj Diose a: "Che'é dan tanáj snó'o man rej so' do', man nii so' do', ne ve'é nacaj snó'o man chana nica so', ne ase vaa orún' yuvij ro', danj gaa roj so' a", taj danj Diose a.

<sup>32</sup> Nana noco ndo'o me nana nihánj nana tihaan naca Diose rihaan ní', ne a'mii nana nihánj che'é Jesucristó do', che'é taran' ní' sij noco' man so' do', nanj adonj.

<sup>33</sup> Dan me se sese snó'o me soj, ne no xcúun 'o 'o soj gaa 'ee rá soj man nica soj, ne ase vaa aráya'anj soj man ma'an soj ro', danj gaa caraya'anj soj man nica soj ei. Ne chana ro', no xcúun chana cara cochroj chana rihaan nica chana uún ei.

## 6

<sup>1</sup> Ne nij xnii noco' man síi 'nij ra'a man ní' ro', no xcúun nij xnii ve'é cunó nij xnii rihaan rej xnii do', rihaan nii xnii do' ei.

<sup>2</sup> Nihánj me 'o nana noco taj xna'anj danj Diose rihaan ní' a: "Ve'é cara cochróo so' rihaan rée so' do', rihaan níi so' do' á", taj danj Diose rihaan ní', ne cata' tu'va Diose se vaa sese cunó ní' nana nihánj, ne sa' uxrá qui'yaj Diose che'é ní', ne orún' nana nihánj me nana ca'mii Diose asino yaan rihaan nu' yo'ó nij tuvi' nana nihánj adonj.

<sup>3</sup> Dan me se cataj Diose se vaa sese danj qui'yaj ní' ndaa nihánj, gaa ne cavij sa' ní', ne guun que'ee doj güii cané ní' rihaan chumij nihánj a. Danj qui'yaj Diose che'é ní', sese cunó ní' rihaan rej ní' do', rihaan nii ní' do' adonj.

<sup>4</sup> Ne sese rej xnii me soj, ne se ca'maan rá ta'nii soj qui'yaj soj ma'. Tananj ve'é tacuachij soj man ta'nii soj, ne dan me se tucu'yón soj suun man ta'nii soj, ne tucu'yón soj se-nana síi 'nij ra'a man ní' man ta'nii soj á.

<sup>5</sup> Ne mozó ro', me se ve'é cunó so' rihaan se-ru'vee so', ne gaa ni'yanj nimán mozó, ne cara cochroj uxrá mozó rihaan se-ru'vee mozó á. Ase vaa 'yaj

mozó rihaan ma'an Jesucristó ro', danj qui'yaj uún mozó rihaan se-ru'vee mozó á.

<sup>6</sup> Ne se qui'yaj mozó yo' se vaa 'yaj nij síí vaa quij nimán ma'. Dan me se nij síí vaa quij nimán ro', me rá nij so' gaa niha' rá se-ru'vee nij so' ni'yaj so' man nij so', tzaj ne inanj gaa ni'yaj ru'vee man nij so' 'yaj suun nij so', ne se guun qui'yaj soj danj ma'. Tananj 'o ca'nej nimán soj qui'yaj suun soj, ne guun rá soj se vaa se-mozó Jesucristó me soj, ne qui'yaj soj nu' se vaa me rá Diose qui'yaj soj á.

<sup>7</sup> Guun niha' rá soj qui'yaj suun soj á. Se guun rá soj se vaa rihaan yuvi 'yaj suun soj mei. Tananj guun rá soj se vaa mozó 'yaj suun rihaan ma'an síí 'nij ra'a man ní' me soj á.

<sup>8</sup> Xcaj soj cuentá se vaa sese qui'yaj suun sa' ní', ne taj se 'yaj sese ca'vee se mozó me ní' do', ca'vee se nuveé mozó me ní' do', taj se 'yaj mei. Dan me se ya naru'vee síí 'nij ra'a man ní' che'é suun 'yaj suun sa' ní' nanj adonj.

<sup>9</sup> Ne soj sji ru'vee ro', me se ve'é qui'yaj uún soj ga se-mozó soj ei. Ca'ne' rá soj ga suun axrij yuvaá man mozó, ne ca'ne' rá soj ga suun tuchu'vi' man mozó uún á. 'O se ne'en soj se vaa nicun' síí 'nij ra'a man soj do', man se-mozó soj do', rej xta', ne 'o cuyaán vaa taran' ní' rihaan so' adonj.

*Nana nihánj taj xna'anj daj qui'yaj ní', ne ca'vee qui'yaj canaán ní' rihaan síí chree a*

<sup>10</sup> Taj vaj yo'ó nana cataj xna'anj 'unj rihaan soj, man tinuj, man nocoj. Yo'o gaa chre' soj ga síí 'nij ra'a man ní' ei. Ca'vej soj ca'nej síí 'nij ra'a man ní' se nucuaj nimán soj, ne daj se vaa se nucuaj nicaj ma'an so' ro', danj gaa se nucuaj nicaj ma'an soj, qui'yaj so' chuguanj.

<sup>11</sup> Dan me se nu' se nucuaj rqué Diose man soj ro', ca'nej soj se nucuaj yo' nimán soj, ne guun nucuaj soj qui'yaj canaán soj rihaan síí chree gaa me rá síí chree tihá' yu'unj síí chree man soj ei.

<sup>12</sup> 'O se nuveé inanj yuvi man rihaan chumi nihánj me nij síí unu' ga soj mei. 'O se nij ya'anj rii ta'nga' rihaan chumi nihánj me nij síí unu' ga soj, ne ase vaa nimán vaa nij so', ne vaj nij so' rque nana vaj xta' ndo'o, ne chi'ii ndo'o vaa nij so', ne yuvi man rihaan chumi nihánj cuano, tzaj ne vaj ndo'o nij so' rej rmj', ne che'é dan rii ta'nga' ndo'o nij ya'anj yo' rihaan nij so' adonj.

<sup>13</sup> Che'é dan ca'nej soj nu' se nucuaj rqué Diose man soj nimán soj, ne güi qui'yaj ndo'o síí chree sayuun rihaan chumi nihánj ro', ne guun nucuaj soj qui'yaj canaán soj rihaan síí chree ei. Ne asa' cunu' soj ga síí chree yo', ne síí gaa nucuaj doj rihaan síí chree guun soj adonj.

<sup>14</sup> Dan me se nano' soj daj qui'yaj soj cunu' soj ga síí chree yo' á. Uxrá canoco' soj nana ya, ne ase vaa nuj 'nij catuun tanuu ro', danj gaa nana yo' rihaan soj, ne guun nucuaj soj cunu' soj ga síí chree yo' ei. Ne ca'vej soj cunu sa' nimán soj rihaan Diose, ne ase vaa aga' aráan nu' rucuaá tanuu ro', danj gaa se caráan nimán soj, qui'yaj Diose, gaa ne se guun nucuaj síí chree qui'yaj chi'ii síí chree yo' nimán soj a mei.

<sup>15</sup> Ne gaa listó soj, ne cavi soj ca'anj soj, nata' soj se-nana Diose nana sa' rihaan yuvi, ne cunó nij yuvi nana sa' yo', ne cavi sa' nij yuvi, ne ve'é cayáan nij yuvi ga Diose, qui'yaj nana sa' yo' ei. Ne ase vaa canuj 'nij tacóo tanuu ro', danj gaa nana sa' yo' rihaan soj a. Qui'yaj canaán soj rihaan síí chree qui'yaj nana sa' yo' adonj.

<sup>16</sup> Ne niganj gaa nucuaj uxrá rá soj man Jesucristó, gaa ne ase vaa tanuu noco' rcuchra' manj ra'a ro', danj gaa ma'an soj uún, ne sese go' síí chree

chruun taj tanj raꝥ aco' ya'an man soj, ne guun nucuaj soj tina'áj soj ya'an yo' chuguanj.

<sup>17</sup> Ne guun ya rá soj se vaa quinani soj rihaan sayuun, qui'yaj Diose, ne ase vaa nave aga' nuꝥ raꝥ tanuu ro', danj gaa nana sa' cunuú raꝥ soj, ne se guun nucuaj sí chree qui'yaj sí chree se chi'ij man soj, che'é se guun ya rá soj se vaa quinani soj rihaan sayuun adonj. Ne canoco' uxrá soj se-nana Diose nana sa' nana rque Nimán Diose rihaan ní', ne ase vaa neé espadá noco' ra'a tanuu ro', danj gaa se-nana Diose rihaan soj, ne guun nucuaj soj go' soj man sí chree, qui'yaj se-nana Diose yo' adonj.

<sup>18</sup> Ne niganj cachinj ni'yaj uxrá soj rihaan Diose, ne raꝥuáj Nimán Diose man soj cachinj ni'yaj soj ei. Se ca'ne' rá soj ma'. Tananj a yo'o cachinj ni'yaj uxrá soj che'é taran' ní' sij sa' noco' man Diose ei.

<sup>19</sup> Ne cachinj ni'yaj soj che'é ma'án 'unj se vaa rque Diose nana cuu ca'mij 'unj rihaan yuvij, ne sca' tiháan 'unj nu' se-nana Diose nana sa' rihaan nij yuvij á. Dan me se nana tiháan naca Diose man ní' me nana sa' yo',

<sup>20</sup> ne nda' se numiú 'unj aga' ne', tzaj ne 'unj me sí quiri' suun nata' nana sa' yo' rihaan yuvij, ne cachinj ni'yaj soj rihaan Diose se vaa se cuchu'vi' 'unj ca'mij 'unj nana sa' yo' rihaan yuvij, che'é se no xcúún yá 'unj ca'mij sca' yá 'unj nana sa' yo' rihaan yuvij adonj.

*Nana nihánj taj xna'anj se vaa ca'neé Pabló man sí cu'naj Tíquico cuchí' so' rihaan nij sí man Efeso a*

<sup>21</sup> Cataj xna'anj tinúú ní' sí cu'naj Tíquico rihaan soj nu' se vaa quirán' 'unj a. 'Ee ndo'o rá 'unj man so', ne ve'é ndo'o 'yaj suun so' rihaan 'unj, che'é se sí noco' man sí 'nij ra'a man ní' me núj chuguanj. Ne a'ne' rá so' ga suun 'yaj suun ma'. Tananj 'o 'yaj suun so' che'é se-nana Diose nanj adonj.

<sup>22</sup> Ne me rá 'unj quene'en soj nu' se vaa quiran' núj, ne me rá 'unj quinarj' nucuaj nimán soj, ne che'é dan ca'nej 'unj man so' cuchí' so' rihaan soj ei.

*Nana nihánj taj xna'anj se vaa me rá Pabló qui'yaj ndo'o Diose se luj che'é nij sí cuchumán rá ni'yaj man Jesucristó yanj chuman' Efeso a*

<sup>23</sup> Me rá 'unj gaa xej nimán nij tinuj nij soj, ne gaa 'ee rá soj tinúú soj, ne gaa nucuaj rá soj man Diose, qui'yaj Rej ní' Diose do', qui'yaj Jesucristó sij 'nij ra'a man ní' do' adonj.

<sup>24</sup> Ne me rá 'unj qui'yaj ndo'o Diose se luj che'é taran' nij soj sij yo'o aráj cochroj rihaan Jesucristó sij 'nij ra'a man ní' nu' cavii nu' ca'anj a.

## Nihánj me 'o yanj cartá qui'yaj sí cu'naj Pabló ca'néé so' rihaan nij yuvii noco' man Diose yanj chuman' cu'naj Filipos a

<sup>1</sup> Sí cu'naj Pabló ga sí cu'naj Timoteo me rój, ne sí 'yaj suun rihaan Jesucristó me rój, ne nihánj me se 'yaj rój yanj cartá nihánj ca'nej rój rihaan cunudanj nij soj sij sa' rihaan Diose noco' man Jesucristó sij yanj chuman' cu'naj Filipos a. Me rá rój nayaá nij soj nayaá nij sí uun chij rihaan soj nayaá nij sí 'yaj suun che'é soj nayaá yanj cartá nihánj a.

<sup>2</sup> Dan me se me rá rój qui'yaj Rej ní' Diose qui'yaj Jesucristó sij 'nj ra'a man ní' qui'yaj se luj che'é nij soj, ne me rá rój gaa xej nimán nij soj qui'yaj roj so' a.

*Nana nihánj taj xna'anj se vaa achín ni'yaj ndo'o Pabló rihaan Diose che'é nij sí cuchumán rá ni'yaj man Jesucristó yanj chuman' cu'naj Filipos a*

<sup>3</sup> Gaa na'nuj rá 'unj man nij soj, ne nagó' 'unj gracia rihaan Diose che'é soj a.

<sup>4</sup> Ne gaa achín ni'yáj rihaan Diose, ne uun niha' ndo'o raj gaa achín ni'yáj che'é taran' soj rihaan Diose chuguanj.

<sup>5</sup> Dan me se nagó' 'unj gracia rihaan Diose che'é se vaa gaa cuno soj se-nana Diose, ne yuun che'e racuíj soj manj cataj xna'anj cunudanj ní' se-nana Diose rihaan yuvii, ne veé danj 'yaj soj ndaa cuano ei.

<sup>6</sup> Veé danj nagó' 'unj gracia rihaan Diose che'é soj che'é se guun ya raj se vaa ya uxrá guun che'e ya Diose qui'yaj suun ma'an Diose nimán soj, ne guun ya raj se vaa guun nucuaj soj tinavij soj nu' suun ca'ne' Diose rihaan soj, qui'yaj uún Diose, ne asa' quisij güii ca'na' uún Jesucristó rihaan chumii nihánj ro', ne quisij guée nu' suun vaa rihaan soj adonj.

<sup>7</sup> Ne vaa che'é ya ca'mij danj che'é taran' nij soj, ese ya no xcuún soj chuguanj. Dan me se ya caráya'anj uxrá soj manj, ne gaa 'nij 'unj taga' do', gaa ca'mii 'unj rihaan nij sí na'vej rá cuno se-nana Diose do', gaa vaj 'unj rihaan nij sí nicaj suun che'é yan a'ne' nij so' cacun' che'ej do', gaa tucu'yón 'unj se-nana Diose man yuvii do', ne racuíj ndo'o cunudanj nij soj manj, ne che'é dan me se soj sij 'yaj suun gaj me se me ndo'o ya raj quene'enj man soj ei.

<sup>8</sup> Ne Diose me sí ne'en ya se vaa ase vaa 'ee rá Jesucristó man nij soj ro', veé danj 'ee guée rá ma'anj man cunudanj nij soj chuguanj.

<sup>9</sup> Ne achín ni'yáj rihaan Diose se vaa cunu 'ee doj rá soj tuvi' soj 'o 'o güii, ne sa' doj xcaj soj cuentá daj vaa 'o 'o rasuun,

<sup>10</sup> gaa ne inanj chrej sa' doj narij soj canoco' soj nanj adonj. Ndaa síj, gaa ne asa' ca'na' uún Jesucristó rihaan chumii nihánj, ne sa' inanj gaa nimán soj, ne taj cacun' cutumé soj a ma'.

<sup>11</sup> Dan me se ya guun soj yuvii cunu sa' nimán, ese ya qui'yaj canaán soj nacaj ndo'o soj rihaan cacun', ne dan me se gaa güii ca'na' uún Jesucristó me se cataj nii se vaa sa' uxrá vaa Diose sí naqui'yaj sa' nimán soj adonj.

*Nana nihánj taj xna'anj se vaa cuno ndo'o yuvii se-nana Diose nana sa' a*

<sup>12</sup> Me rá 'unj xcaj nij soj cuentá se vaa cavii sa' doj se-nana Diose nana sa' che'é nu' sayuun quirán' 'unj, tinuj, nocoj.

13 Dan me se nij tanuu man tucua suun do', cunudanj nij yuvi man nihanj do', ne'en nij so' se vaa 'nij 'unj taga' che'é se canoco' 'unj man Jesucristó,

14 ne yo'ó nij tinúú ní' síi noco' man síi 'nij ra'a man ní' ro', nari' nucuaq nimán que'ee ndo'o nij so', che'é se ne'en nij so' se vaa 'nij 'unj taga', ne ne chu'vi' nij so' ca'mij nij so' se-nana Diose rihaan yuvi cuano ma'.

15 Dan me se, ta'aj nij so' a'mii natáj se-nana Jesucristó che'é se uun xcoj ruvaa rá nij so' ni'yaj nij so' manj, tzaj ne yo'ó ta'aj nij so' a'mii natáj che'é se me inanj rá nij so' qui'yaj sa' nij so' adonj.

16 Nij síi sa' yo' ro', 'ee rá nij so' manj, ne ne'en nij so' se vaa cune' Diose manj ca'mij rihaan nij yuvi na'vej rá cunō nana sa' yo' a.

17 Tzaj ne yo'ó nij so' ro', me se che'é se guun xcoj ruvaa rá nij so' ni'yaj nij so' manj, che'é dan a'mii natáj nij so' se-nana Jesucristó, tzaj ne ne a'mii chij nij so' ma'. Maan se danj 'yaj nij so' che'é se me rá nij so' nana doj rá 'unj che'é se 'nij 'unj taga' adonj.

18 Tzaj ne ca'vee se vaa nica nimán ta'aj nij so' do', ca'vee se ne vaa nica nimán ta'aj nij so' do', tzaj ne taj se 'yaj ma'. Maan se nata' cunudanj nij so' se-nana Jesucristó rihaan yuvi, ne che'é dan guun niha' raj adonj. Tzaj ne vaa güii, ne guun niha' doj rá yá 'unj nanj ei.

19 O se ne'en 'unj se vaa cavi sa' 'unj doj vaa güii, che'é nu' se vaa rán' 'unj nihanj adonj. Dan me se guun ni'yaj ní' che'é se achii ni'yaj soj rihaan Diose che'é 'unj, ne guun ni'yaj ní' che'é se racuj ya Nimán Diose manj, ne che'é dan cavi sa' yá 'unj doj ei.

### *Nana nihanj taj xna'anj se vaa vaa i'na' Pabló che'é Jesucristó a*

20 Dan me se daj chihaa mij se cano chrej na'aj rihanj, raj ma'. Ca'vee quitaj xta' rihanj ca'mij nana ya rihaan nij yuvi, ne dan me se guun ya raj se vaa se guun na'aj 'unj ma'. Dan me se asj rque ro', xcaj ndo'o yuvi cuentá se vaa sa' uxrá vaa Jesucristó, qui'yaj, ne ca'vee se ga' i'na' 'unj do', ca'vee se cavi' 'unj do', tzaj ne danj inanj qui'yaj cuano nihanj, rá 'unj, ne se cuchu'vi' 'unj daj chihaa mij, rá 'unj ma'.

21 Vaa i'na' 'unj che'é Jesucristó, ne sese cavi' 'unj che'é Jesucristó, ne cavi sa' 'unj doj, qui'yaj so' adonj.

22 Dan me se sese yo'ō ga' i'na' 'unj rihaan chumij nihanj, ne ga' ya'núj rihanj qui'yaj sunj che'é Jesucristó, ne che'é dan ne ne'enj ase sa' doj cavi' 'unj ni', ase sa' doj canej ni', ne ne'enj daj qui'yaj a mei.

23 O se sa' cyaan vaa roj chrej chuguanj. Dan me se sese cavi' 'unj, ne quinán' 'unj rihaan Jesucristó, ne ve'é uxrá doj ga' uún nanj ei.

24 Tzaj ne achii doj cayánj quitihanj se-nana Diose rihaan soj,

25 ne che'é dan ne'en 'unj se vaa se guun cavi' 'unj cuano ma'. Maan se quinaj 'unj ga soj doj, ne racuj 'unj man soj, ne sa' doj canoco' soj Diose, qui'yaj adonj. Ndaa sij, ga' ne guun niha' doj rá soj rihaan Diose adonj.

26 Dan me se asa' curihanj 'unj taga', ne quene'en uún soj manj, ne che'é dan ve'é uxrá doj ca'mij soj che'é Jesucristó ei.

### *Nana nihanj taj xna'anj se vaa ve'é qui'yaj suun ní' che'é Jesucristó a*

27 Síi noco' se-nana Jesucristó nana sa' me nij soj, ne che'é dan cunō soj tucuaán yo', ne ve'é qui'yaj soj cane soj ga tinúú soj á. Ne sese cuchi' 'unj chiháan soj, ne quene'en 'unj se vaa cyaan vaa rá cunudanj soj a. Dan me se nda' se se cuchi' 'unj, tzaj ne nda' se nana uun cunōj se vaa cyaan vaa rá

cunudañj soj á. Dan me se cuyaān gaa rá soj, ne raçuíj soj tinúú soj, ne yo'ó qui'yaj suun soj che'é nana sa' noco' ní' á.

<sup>28</sup> Ne daj chihaa míj se cuchu'vi' soj ni'yaj soj man nij síi taj ri'yunj man ní' ma'. Ne yo' me quene'en nij so' daj 'yaj soj, ne xcaj nij so' cuentá se vaa xa' ma'an nij so', tzaj ne cacaā nij so' vaa güii, ne xa' soj, tzaj ne cavii sa' soj a. Veé ñanj xcaj ya nij so' cuentá, qui'yaj Diose ñanj adonj.

<sup>29</sup> Maan che'é Jesucristó qui'yaj ndo'o Diose se luj rihaan soj se vaa cuchumán rá soj ni'yaj soj man Jesucristó qui'yaj ma'an Diose adonj. Tzaj ne yo'ó se luj qui'yaj Diose me se ca'vej rá Diose quiran' soj sayuun che'é Jesucristó, ne doj a ve'é gaa sese quiran' soj sayuun che'é so' adonj. Ne yo' me yo'ó se luj qui'yaj uún Diose rihaan soj a.

<sup>30</sup> Dan me se cuyaān vaa sayuun ran' soj ga sayuun rán' 'unj ñanj ei. Tzaj ne aj ne'en soj daj vaa canó tuví' 'unj ga sayuun yo' adonj. Ne cuano nihánj me se aj cuchi' uún nana nihánj rihaan soj se vaa anó tuvi' uún 'unj ga sayuun ñanj adonj.

## 2

*Nana nihánj taj xna'anj se vaa ase vaa rá Jesucristó ro', ñanj gaa rá ma'an ní' uún a*

<sup>1</sup> Ya ya nari' nucuj nimán ní', 'yaj Jesucristó, rá soj na'. Ya ya uun niha' nimán ní', 'yaj tinúú ní' síi 'ee rá man ní', rá soj na'. Ya ya ve'é mán nu' nij tinuj ní', 'yaj Nimán Diose, rá soj na'. Ya ya nuu 'ee rá ní' sij noco' man Jesucristó man tinúú ní' síi quiran' sayuun, rá soj na'. Dan me se nana nihánj ro', me ya uxrá vaa ñanj adonj.

<sup>2</sup> Che'é dan qui'yaj soj ndaa vaa taj nana nihánj, gaa ne guun niha' uxrá raj, ne dan me se cuyaān gaa nimán soj ga tinúú soj, ne cunuu 'ee rá soj man tinúú soj, ne guun niha' uxrá raj adonj.

<sup>3</sup> Se guun xcoj ruvaa rá soj ni'yaj soj tinúú soj ma'. Se guun rá soj se vaa cataj tinúú soj se vaa sa' uxrá vaa ma'an soj ma'. Tzaj ne gaa nica' nimán soj, cataj soj se vaa sa' doj vaa tinúú soj rihaan ma'an soj á.

<sup>4</sup> Se caraya'anj soj man inañj ma'an soj ma'. Tzaj ne caraya'anj 'o' o' soj man tinúú soj á.

<sup>5</sup> Ase vaa rá ma'an Jesucristó ro', ñanj gaa rá ma'an soj uún á.

<sup>6</sup> Ne Jesucristó me se Diose ya me so', ne so' me síi no xcúun guun chij ndo'o, tzaj ne ne guun niha' ndo'o rá so' guun chij so' ma'.

<sup>7</sup> Tanañj a tanáj so' nu' suun uun chij yo', ne guun so' yuvii guun so' se-mozó yuvii guun so', ne ase vaa yuvii ro', ñanj vaa so' gaa ca'na' so' rihaan chumii nihánj adonj.

<sup>8</sup> Dan me se cunuu nica' nimán so', ne cuno so' ca'mii Diose, ne ndaa ca'vej rá so' cachron nii man so' rihaan rcutze ya, ne veé ñanj me nó so' gaa cavi' so' ñanj adonj.

<sup>9</sup> Che'é dan guun chij ndo'o so' rej xtá', qui'yaj Diose, ne guun so' síi guee doj rihaan cunudañj yuvii, qui'yaj uún Diose ñanj adonj.

<sup>10</sup> Che'é dan vaa güii, ne canicun' ruj cunudañj nij síi man xtá' do', nij síi man rihaan chumii do', nij síi man rej rque yo'ó do', asa' cuno nij so' se-chuvii Jesucristó,

<sup>11</sup> ne cataj ya nij so' se vaa ma'an Jesucristó me síi 'nij ra'a man ní', ne quene'en nij so' se vaa sa' uxrá qui'yaj Rej ní' Diose adonj.

*Nana nihánj taj xna'anj se vaa qui'yaj suun ní'yan cunūu sa' nimán ní' a*

12 Che'é dan cunō soj ca'mij, tinuj, nocoj. Gaa cayáan 'unj gā soj, ne cuno soj nu' nana ca'mij, ne qui'yaj suun uxrá soj che'é rej quinavij nu' chrej chi'ij uun chij nimán soj, ne cunūu sa' nimán soj a. Cuanō nihánj me se nda' se nuvi' 'unj yáan gā soj, tzaj ne me rá 'unj doj cunō soj a. Ase 'yaj xnii gaa chu'vi' xnii ni'yaj xnii rej xnii ro', danj gaa qui'yaj soj cuchu'vi' soj ni'yaj soj Diose, ne doj a qui'yaj suun soj che'é rej quinavij nu' chrej chi'ij uun chij nimán soj, ne cunūu sa' nimán soj rihaan Diose á.

13 Diose me síi 'yaj suun nimán soj yan guun rá soj cunō soj se-nana so', ne so' me síi qui'yaj guun nucuaj soj qui'yaj soj nu' se vaa me rá so' qui'yaj soj adonj.

14 A 'ó güii se ca'mii tu'va yuve soj che'é tinúú soj ma'. Inanj ve'é qui'yaj suun soj gā tinúú soj á.

15 Ne guun soj síi sa', ne taj cacun' cūtumé soj rihaan Diose mei. Ne nda' se cheé soj gā yuvi' vaa quij nimán man rihaan chumij nihánj cuano, tzaj ne ve'é cunō soj rihaan Diose, ne yo'ō yā guun ta'nij Diose man soj chuguanj. Dan me se ase vaa ve'é ndo'o vaa chuguun yati' rej xta' ro', danj ve'é uxrá quene'en yuvi' man soj vaj soj rihaan chumij nihánj, ne

16 raan canoco' soj se-nana Diose nana 'yaj vaa i'na' nimán ní', gaa ne guun niha' raj ni'yaj 'unj man soj gaa güii ca'na' uún Jesucristó rihaan chumij nihánj, che'é se quene'en so' se vaa qui'yaj suun uxraj tucu'yonj man soj ne cavii sa' nu' suun qui'yaj sunj a.

17 Ne nda' se ndaa ayanj ma'an ton manj che'é sayuun rán' 'unj che'é se me ndo'o raj yo'ō cuchuman rá soj ni'yaj soj Diose, tzaj ne guun niha' ndo'o raj, ne tucuachenj doj se niha' nuu nimanj nimán soj ei.

18 Ne guun niha' rá soj uún, ne guun niha' rá 'unj che'é soj a.

*Nana nihánj taj xna'anj se vaa cuchí' síi cu'naj Timoteo do', síi cu'naj Epafrodito do', chuman' cu'naj Filipos a*

19 Me rá 'unj ca'nej 'unj man síi cu'naj Timoteo cuchí' so' rihaan soj, sese ca'vej rá Jesucristó sij 'nij ra'a man ní' cuchí' so' a. Ne canicaj so' ca'na' so' rihanj, ne cataj xna'anj so' rihanj daj quiran' soj, gaa ne guun niha' raj a.

20 Qrún' so' me síi nanó ndo'o rá che'é soj daj ran' soj, ne taj vaj yo'ó síi sa' ase sa' grún' so' ma'.

21 Tzaj ne yo'ó nij so' ro', inanj che'é ma'an nij so' aráya'anj nij so', tzaj ne ne aráya'anj nij so' che'é Jesucristó ma'.

22 Tzaj ne aj ne'en soj se vaa síi sa' uxrá me síi cu'naj Timoteo, ne daj se 'yaj xnii 'yaj suun xnii gā rej xnii ro', danj vaa 'yaj Timoteo 'yaj suun so' che'é se-nana Diose gaj ei.

23 Che'é dan xcaj 'unj cuentá daj quirán' 'unj rej rihaan, gaa ne nu' ca'nej 'unj man so' cuchí' so' rej yanj soj a.

24 Ne nucuaj rá 'unj man síi 'nij ra'a man ní' se vaa ra'yanj cuchí' ma'anj rihaan soj adonj.

25 Vaa che'é ndo'o ca'nej 'unj man tinúú ní' síi cu'naj Epafrodito cuchí' so' rihaan soj vaa nanj ei. So' me síi qui'yaj suun ndo'o gaj rej man síi taj ri'yunj man ní', ne ma'an nij soj me síi ca'néé man so' ca'na' so' rque so' se vaa achiin manj,

26 ne me ndo'o rá so' quene'en uún so' man nij soj nanj adonj. Dan me se nanó rá so' se vaa cuno soj nana che'é so' se vaa canó chi'ij man so' adonj.



<sup>27</sup> Ya daj doj se cavi' so', tzaj ne cunuu 'ee rá Diose man so', ne cunuu 'ee rá Diose mán 'unj do', ne ne cavi' so' ma'. 'O se sese cavi' sí cu'naj Epafrodito, ne nanó ndo'o raj nanj ei.

<sup>28</sup> Che'é dan ra'yanj ca'nej 'unj man so' cuchí' so' rihaan soj, ne guun niha' rá soj quene'en soj man so', ne che'é dan se nanó rá 'unj che'é soj ma'.

<sup>29</sup> Che'é dan asa' cuchí' so', ne gaa niha' ndo'o rá soj ca'mij soj ga so' ei. Dan me se ya tinúú ní' sji noco' man sí' nij ra'a man ní' me so' ei. Caraa cochroj soj rihaan cunudanj nij yuvij 'yaj ndaa vaa 'yaj sí' cu'naj Epafrodito yo' ei.

<sup>30</sup> 'O se daj doj se cavi' so' che'é suun qui'yaj suun so' che'é Jesucristó nanj adonj. Dan me se ca'neé nimán so' cavi' so' che'é se nayón so' rihaan soj racuíj so' manj nanj chuguanj.

### 3

#### *Nana nihánj taj xna'anj se vaa sa' doj vaa Jesucristó rihaan cunudanj a*

<sup>1</sup> Dan me se gaa niha' rá soj ni'yaj soj sí' nij ra'a man ní', tinuj, nocoj. Ne sayuun vaa cachrón uún 'unj nana nihánj nayaa soj ma'. Ne cavij sa' doj soj, sese cunó soj nana nihánj chuguanj.

<sup>2</sup> Dan me se tumé soj man soj sese cuchí' nij sí' chí'ij, nij sí' niha' rá ca'ne' nee man yuvij rej man soj á. 'O se ase vaa chuvee ro', danj vaa nij so' adonj.

<sup>3</sup> Ne xa' ní', tzaj ne ino 'yaj ní' ei. 'O se sí' ya cunuu sa' rihaan Diose me ní', ne inanj Nimán Diose noco' ní' gaa 'yaj suun ní' rihaan Diose adonj. Ne nucuaj rá ní' man ma'an ní' se vaa cavij sa' ní' che'é se vaa 'yaj ma'an ní' ma'. Tananj niha' rá ní' nata' ní' se vaa Jesucristó me sí' 'yaj ca'vee cavij sa' ní' adonj.

<sup>4</sup> Dan me se nij sí' chí'ij ro', sa' uxrá 'yaj ma'an nij so', rá nij so', ne che'é dan cavij sa' nij so' qui'yaj ma'an nij so', rá nij so', tzaj ne 'unj nihánj me se sa' doj qui'yaj ma'anj rihaan nij so' ei.

<sup>5</sup> Dan me se ya sí' israelitá mej, ne gaa cachén tunj güii ca'ngaa 'unj, ne cuta' nii ta'nga' man nee manj a. Yo' o ta'núú ta'nij si'no sí' cu'naj Benjamín gaa naá mej, ne xii 'unj do', réj do', ma'anj do', me sí' a'mii xna'anj hebreo, ne sí' fariseo mej, ne canocó' 'unj se-tucuanj Moisés ga nij so' a.

<sup>6</sup> Gaa rque doj, ne sí' nichraj nimán mej, ne qui'yaj uxraj sayuun man nij sí' noco' man Jesucristó, che'é se me raj guun niha' rá Diose ni'yaj Diose manj, ne ve'é uxrá canocó' 'unj nu' se-tucuanj Moisés, ne a 'ó nana yo' ne quinaj, qui'yaj ma'.

<sup>7</sup> Ne sa' uxrá qui'yaj, raj gaa rque, tzaj ne yaj ro', quene'enj se-nana Jesucristó, ne nu' rasuun qui'yaj gaa naá ro', ase vaa sigui' ri'yuj vaa nu' rasuun qui'yaj gaa naá, raj nanj ei.

<sup>8</sup> Dan me se che'é se me ndo'o raj xcax sa' 'unj cuentá che'é Jesucristó sji 'nij ra'a manj ro', che'é dan nu' se vaa qui'yaj gaa rque ro', daj se me raj ne'enj sigui' ri'yuj ro', danj me raj ne'enj man yo' cuano, ne che'é se ni'ya uun me yo' rihanj ro', che'é dan ca'vee canocó' 'unj man Jesucristó adonj.

<sup>9</sup> Gaa ne vaa güii, ne cunuu sa' 'unj rihaan Diose, tzaj ne nuveé se-tucuanj Moisés me se qui'yaj cunuu sa' 'unj rihaan Diose ma'. Maan se che'é se amán rá 'unj ni'yaj 'unj Jesucristó ro', che'é dan me cunuu sa' 'unj qui'yaj ma'an Diose adonj.

<sup>10</sup> Inanj me rá 'unj sa' doj xcax 'unj cuentá che'é Jesucristó á. Dan me se nucuaj Diose, ne cunuu i'na' uún Jesucristó gaa cavi' so', qui'yaj Diose, ne che'é dan me ndo'o raj quene'enj daj qui'yaj Diose che'é 'unj a. Ne ase vaa

quiran' Jesucristó sayuun ro', danj gaa quiran' ma'an 'unj sayuun ga so', raj, ne ase vaa ca'vej rá Jesucristó cavi' so' che'é ní' ro', danj gaa 'unj, raj, ne yo'o qui'yaj sunj che'é tinúú 'unj rihaan Diose adonj.

<sup>11</sup> Ndaa síj, gaa ne sese yo'o canocó' 'unj man so', ne ca'vee cunuu i'na' uún 'unj asa' cavi' 'unj, qui'yaj so' nanj adonj.

*Nana nihánj taj xna'anj se vaa qui'yaj suun uxrá ní', ne ca'anj ní' rej xtá', qui'yaj Diose a*

<sup>12</sup> Nuveé se aj quisij 'unj cunuu sa' 'unj, taj 'unj ma'. Maan se ataa quisij 'unj se vaa me rá Diose gunj, ne che'é dan me yo'o raan nocó' 'unj man Jesucristó, che'é rej me raj cunuu sa' 'unj, vaa güii a. Jesucristó me sí qui'yaj canocó' 'unj man so', che'é se me rá ma'an so' cunuu sa' 'unj adonj.

<sup>13</sup> 'Unj me sí ne'en se vaa ataa quisij 'unj se me raj gunj, tinuj, nocoj. Che'é dan orún' suun vaa rihanj cuano nihánj me 'yaj tanáj xco 'unj nu' se vaa qui'yaj asij rque, ne guun niha' uxrá raj qui'yaj nu' se vaa qui'yaj rej rihanj,

<sup>14</sup> ne 'yaj suun uxraj, ne ca'na' güii qui'yaj cananj qui'yaj Diose, ne cavi' sa' 'unj, qui'yaj Diose, ne nacunj Diose manj cavi' 'unj rej xtá', che'é se 'unj me sí nocó' man Jesucristó adonj.

<sup>15</sup> Ne sese aj cuchumán sa' rá ní', ne inanj danj gaa rá taran' ní' á. Tzaj ne sese ino vaa rá nij soj, ne Diose me sí tihaa rihaan soj me ma'an nana cachiin rihaan soj a.

<sup>16</sup> Tzaj ne tucuaán aj nari' ní' ro', raan canocó' ní' tucuaán yo' á.

<sup>17</sup> Xcaj nij soj cuentá daj 'yaj ma'anj do', daj 'yaj nij sí nocó' manj do', ne cyaan danj qui'yaj soj ga núj á.

<sup>18</sup> Ino vaa rá que'ee yuvi, ne aj cataj xna'anj uxraj rihaan soj che'é nij so', ne nihánj me cataj xna'anj uún 'unj rihaan soj daj vaa nij so', tzaj ne 'o se ta'veé 'unj che'é nij so' nanj adonj. Dan me se cavi' Jesucristó che'é ní' rihaan rcutze, tzaj ne me rá nij so' tirj' nij so' se vaa qui'yaj Jesucristó che'é ní' adonj.

<sup>19</sup> Vaa güii cacaa ndo'o nij so' ei. Inanj nee man nij so' aráya'anj nij so', tzaj ne Diose ne nocó' nij so' ma'. Nij 'yaj nij so', tzaj ne ne na'aj nij so' ma'. Tzaj ne sa' uxrá 'yaj nij so', rá ma'an nij so' chuguanj. Inanj che'é rasuun ruvi' rihaan chumi' nihánj xcaj nij so' cuentá nanj adonj.

<sup>20</sup> Xa' ní', tzaj ne ino vaa ní', ne chiháán ní' me rej xtá', ne na'vij uxrá ní' cavi' Jesucristó s'ij 'nij ra'a man ní' rej xtá' ca'na' so' tinanii so' man ní' rihaan sayuun,

<sup>21</sup> ne njaj so' nee man ní', ne nda' se ninaj uxrá nee man ní' cuano, tzaj ne natuna so' man yo', ne ase vaa nee man so' nee sa' ndo'o ro', danj inanj gaa nee man ní', qui'yaj so' adonj. Dan me se che'é se me so' sí guun nucuj qui'yaj canaan rihaan cunudanj rasuun, ne che'é se quirij ta'nga' so' rihaan cunudanj rasuun ro', che'é dan ne'en ní' se vaa guun nucuj so' natuna so' man nee man ní' ei.

## 4

<sup>1</sup> Dan me se 'ee ndo'o raj man soj, ne me uxrá raj ni'yaj 'unj man soj, tinuj, nocoj. Niha' ndo'o raj, qui'yaj soj, ne vaa güii cataj Diose se vaa sa' uxrá qui'yaj, tucuyón 'unj man soj, ne che'é dan vaa che'é cunó soj nu' nana nihánj, ne raan canocó' soj man sí 'nij ra'a man ní', tinuj, nocoj.

*Nana nihánj taj xna'anj se vaa nago' Pabló chrej sa' man nij sí cuchumán rá ni'yaj man Jesucristó yanj chuman' cu'naj Filipos a*

<sup>2</sup> Achíin nì'yáá 'un̄j rihaan chanā cu'naj Evodia do', rihaan chanā cu'naj Síntique do', se vaa yo'ò cuyaan̄ gaā rá roj no', che'é se chanā noco' man síi 'n̄ij ra'a man ní' me roj no' á.

<sup>3</sup> Vaa so', ne tuvéi 'un̄j síi sa' noco' raan man Diose mé so', ne síi 'yaj suun ga 'un̄j me uún so', ne dan me se achíin nì'yáj rihaan so' racuíj so' man roj chanā yo', tinuj. Roj chanā nihánj ga yo'ó síi cu'naj Clemente do', yo'ó nij tinúú 'un̄j do', qui'yaj suun ndo'o nij so' racuíj nij so' mán 'un̄j ca'mii núj se-nanā Diose nanā sa' rihaan yuvii, ne no se-chuvii nij so' rihaan yanj taj rihaan Diose se vaa gaā i'na' nij so' rihaan Diose nu' cavii nu' ca'anj ei.

<sup>4</sup> Gaā niha' niganj rá soj nì'yaj soj man síi 'n̄ij ra'a man ní' á. Dan me se cataj xna'anj uún 'un̄j rihaan soj se vaa nō xcúún soj gaā niha' niganj rá soj ei.

<sup>5</sup> Inan̄j ni'yanj ca'mii soj rihaan cunudan̄j yuvii man̄ rihaan chumii nihánj, ne xcaj nij yuvii cuentá se vaa síi sa' me soj á. Nichrun' ca'na' uún síi 'n̄ij ra'a man ní' nanj adonj.

<sup>6</sup> Se nanó rá soj mei. Tzaj ne cachinj ni'yaj soj rihaan Diose, ne me ma'an rasuun̄ achiin man soj, ne cachinj soj rihaan Diose, ne nago' soj graciā rihaan Diose ei.

<sup>7</sup> Danj qui'yaj soj, gaā ne yo'ò gaā dínj nimán soj, qui'yaj Diose, che'é se sij noco' man Jesucristó me soj, ne dan me se guun nucuaj Diose qui'yaj canaán Diose rihaan cunudan̄j nanā cavii raá yuvii nanj adonj.

<sup>8</sup> Dan me se inan̄j che'é se ya do', che'é se sa' do', che'é tucuaán sa' do', che'é se luj do', che'é se nica vaa nimán do', che'é se ni'yanj do', nuchruj raá soj, tinuj, nocoj. Dan me se sese ve'é vaa se 'yaj yo'ò so' rá soj, ne xcaj soj cuentá, ne nuchruj raá soj mej yaj so' ei.

<sup>9</sup> Nu' nanā tucu'yón 'un̄j man soj do', nu' rasuun̄ qui'yáá 'un̄j quene'en soj do', nu' nanā ca'mii 'un̄j cuno soj do', danj qui'yaj uún soj á. Gaā ne cayáán ma'an̄ Diose gā soj, ne Diose me síi naquiyaj dínj nimán yuvii ei.

*Nanā nihánj taj xna'anj se vaa sa' uxrá qui'yaj nij síi cuchumán rá ni'yaj man Jesucristó yanj chuman' Filipos racuíj nij so' man Pabló a*

<sup>10</sup> Guun niha' ndo'o raj rihaan síi 'n̄ij ra'a man ní', che'é se yo'ó uun che'e soj caráya'an̄j soj manj ne rqué soj nu' se vaa cachiin manj ei. 'O se ne taj 'un̄j rihaan soj se vaa ne racuíj soj manj ma'. Maan̄ se gaā rque me se ne gaā ya'núj rihaan soj racuíj soj manj man adonj.

<sup>11</sup> Nuveé che'e se vaa doj rasuun̄ achiin manj me tu'vaj danj rihaan soj cuano ma'. Nda' se doj rasuun̄ man̄ rihanj, tzaj ne ne nanó rá 'un̄j ma'. 'O se aj narí 'un̄j naquiyaj inaj 'un̄j nimanj, ne niha' inan̄j raj nanj adonj.

<sup>12</sup> Dan me se vaa güii achiin ndo'o rasuun̄ manj, ne vaa güii vaa ndo'o rasuun̄ rihanj, tzaj ne ca'vee se vaa raan rquej do', ca'vee se na'aan rquej do', ca'vee se vaa se achiin manj do', ca'vee se man̄ ndo'o rasuun̄ rihanj do', tzaj ne taj se 'yaj ma'. Maan̄ se daj a güii vaa inaj nimanj, ne vaa niha' raj, ne ne nanó raj ma'.

<sup>13</sup> Che'é se rqué ndo'o Jesucristó se nucuaj manj ro', che'é dan uun nucuáj 'yaj sunj nu' suun vaa rihanj adonj.

<sup>14</sup> Tzaj ne cunaj uxrá qui'yaj soj racuíj soj manj gaā quirán' 'un̄j sayuun gaā rque chuguanj.

<sup>15</sup> Ne'en ma'an̄ soj se vaa gaā curihan̄j 'un̄j estadó Macedonia ne guun che'ej tucu'yonj se-nanā Diose, ne nu' rqué soj sa'anj manj cuaj nanj niha'.

Taj vaj yo'ó yuvij cuchumán rá ni'yaj man Jesucristó racuǵ manj ma'. Maan se orún' soj me sí racuǵ manj nanj niha'.

<sup>16</sup> Ne gaa cayánj qui'yaj sunj chuman' Tesalónica, ne yavij nu' rqué uún soj sa'anj cachiin manj rihanj a'.

<sup>17</sup> Nuveé che'e se me raj rqué uun soj doj sa'anj manj me tu'va uún 'unj danj nihánj cuano ma'. Maan se che'é se me raj naru'vee Diose doj se sa' rihaan soj, che'é dan tu'vaj danj adonj.

<sup>18</sup> Dan me se nacaj 'unj cunudanj se vaa ca'née soj rihanj, ne a 'ó rasuun ne achiin manj a ma'. Ne sa'anj ca'née soj rihanj ga sí cu'naj Epafrodito me se narqué so' nu' sa'anj yo' rihanj, ne guun niha' rá Diose ne'en Diose se vaa rqué soj sa'anj yo' manj, ne ase vaa xcuu sa' acaa rihaan chraan altar, ne daj ndo'o gun' yo' ro', danj vaa sa'anj yo' ni'yaj Diose adonj.

<sup>19</sup> Dan me se 'unj me sí nocǵ man Diose, ne sese vaa se achiin man soj, ne rqué Diose nu' rasuun yo' rihaan soj che'é se me soj sí nocǵ man Jesucristó, ne xa' Diose, tzaj ne taj vaj rasuun achiin rihaan Diose ma'. 'O se so' me sí uun chij rihaan cunudanj rasuun,

<sup>20</sup> ne ve'é uxrá uun chij Rej ní' Diose, cataj ní' nu' cavii nu' ca'anj adonj. Veé danj gaa ya ei.

*Nana nihánj taj xna'anj se vaa ve'é cumán nij sí cuchumán rá ni'yaj man Jesucristó yanj chuman' cu'naj Filipos, rá nij tuvi' Pabló a*

<sup>21</sup> Me raj cataj nij soj rihaan cunudanj nij sí sa' rihaan Diose sí nocǵ man Jesucristó se vaa ve'é cayáán nij so' raj, ne vaa nij tinúú ní' sí man gaj, ne ve'é cumán nij soj, rá nij so',

<sup>22</sup> ne vaa nij sí sa' nocǵ man Diose man chuman' nihánj, ne ve'é cumán soj, rá daj a nij so' uún, ne vaa nij sí 'yaj suun tucúa sí nicaj suun emperador cu'naj César, ne ve'é cumán soj, rá nij so' uún adonj.

<sup>23</sup> Me raj qui'yaj ndo'o Jesucristó sij 'nij ra'a man ní' se luj che'e soj ei.

## Nihánj me 'o yanj cartá qui'yaj sí cu'naj Pabló ca'néé so' rihaan nij yuvií noco' man Diose yanj chuman' cu'naj Colosas a

<sup>1</sup> 'Uñj ro', me sí cu'naj Pabló, ne sij apóstol cune' Jesucristó man nata' se-nana so' rihaan yuvií mej ndaa vaa guun rá Diose, ne yanj tinú' Timoteo ga 'uñj cuano a.

<sup>2</sup> 'Yaj rój yanj nihánj ca'nej rój rihaan nij soj sij sa' noco' man Diose yanj chuman' cu'naj Colosas a. Che'é se amán rá soj ni'yaj soj man Jesucristó ro', che'é dan nuu tinuj ní', ne nucuaj rá rój ne'en rój man soj cuano, tinuj, nocoj.

Me rá rój qui'yaj Rej ní' Diose se luj che'é soj, ne me rá rój gaa xej nimán soj, qui'yaj Diose uún ei.

*Nana nihánj taj xna'anj che'é se vaa achín ni'yaj Pabló rihaan Diose che'é nij sí cuchumán rá ni'yaj man Diose yanj chuman' Colosas a*

<sup>3</sup> Niganj achín ni'yaj rój rihaan Diose Rej Jesucristó sij 'nij ra'a man ní' che'é soj, ne nago' rój graciá rihaan Diose che'é soj,

<sup>4</sup> che'é se ca'na' nana rihaan rój se vaa amán rá soj ni'yaj soj man Jesucristó ne 'ee rá soj ne'en soj cunudanj yo'ó nij sí sa' noco' man Diose a.

<sup>5</sup> Danj vaa rá soj cuano, che'é se cuno soj se-nana Jesucristó nana ya, ne guun ya rá soj se vaa man ndo'o se sa' rej xta' nacaj soj vaa güii ei.

<sup>6</sup> Dan me se aj cuchí' nana sa' nihánj rihaan cunudanj nij yuvií man rihaan chumií, ne cuchumán rá que'ee nij yuvií cuno nij yuvií nana sa' yo', ne 'o cuyaán qui'yaj nij soj ga yo'ó nij sí cuno nana yo', ne dan me se gaa cuchí' nana nihánj rihaan soj, ne cuno soj, ne xcaj soj cuentá che'é se luj qui'yaj Diose che'é ní', ne cuchumán rá soj adonj.

<sup>7</sup> Ne sí cu'naj Epafra me sí tucu'yón nana yo' man soj, ne dan me se sí 'yaj suun ga núj me so', ne 'ee rá núj man so', ne yo'o 'yaj suun so' rihaan Jesucristó che'é soj adonj.

<sup>8</sup> Ne cataj xna'anj so' rihaan núj se vaa 'ee uxrá rá soj man tinúú soj, qui'yaj Nimán Diose adonj.

<sup>9</sup> Che'é dan gaa cuno núj nana cataj so' rihaan núj, ne niganj achín ni'yaj núj rihaan Diose che'é soj se vaa rque Nimán Diose nana sa' cuu nimán soj, ne xcaj soj cuentá daj me rá Diose qui'yaj soj,

<sup>10</sup> che'é rej qui'yaj soj nu' se vaa no xcúún ní' sij noco' man sí 'nij ra'a man ní' qui'yaj ní', ne guun niha' rá Diose ni'yaj Diose man soj ei. Ne cunudanj suun sa' qui'yaj suun ndo'o soj, gaa ne sa' doj xcaj soj cuentá daj vaa ma'an Diose ei.

<sup>11</sup> Diose me sí uun chij ndo'o, ne achín ni'yaj núj se vaa ca'nej ndo'o Diose se nucuaj nimán soj, gaa ne ca'vee gaa raan rá soj rihaan sayuun qui'yaj yuvií man soj, ne gaa inaj nimán soj, ne gaa niha' rá soj,

<sup>12</sup> ne nago' soj graciá rihaan Diose Rej Jesucristó ei. Nu' dan me se vaa achín ni'yáá 'uñj rihaan Diose che'é soj, ne ne'en soj se vaa aj cunuu sa' ní' qui'yaj Diose, ne che'é dan me vaa güii quirí' ní' se sa' rque Diose man taran' nij sí sa' noco' man so', che'é se yuvií xcaj cuentá chéé rej ranga' me ní' chuguanj.

13 Asino yaan me se guun chij sí chree rihaan ní, ne inanj cacun' qui'yaj ní, ne ase vaa sí chéé rej rmi' ro', danj vaa ní, ne taj se qui'yá' xcaj ní' cuentá che'é Diose tzaj ma'. Tzaj ne yaj me se tinanii Diose man ní' rihaan sí chree, ne guun chij Jesucristó ta'níi Diose rihaan ní', qui'yaj Diose yaj ei. Dan me se 'ee ndo'o rá Diose man ta'níi so',

14 ne che'é ta'níi so' navij cacun' tumé ní', ne che'é dan se qui'yaj Diose sayuun man ní' a man adonj. Tananj tinanii Jesucristó man ní' rihaan sayuun adonj.

*Nana nihánj taj xna'anj me síi me Jesucristó a*

15 Ne ruvi' Diose ni'yaj yuvii ma'. Maan se quene'en ní' man Jesucristó, ne xcaj ní' cuentá daj vaa ma'an Diose adonj. Asij ataa qui'yaj Diose chumii, ne aj nicun' Jesucristó ga so' ei.

16 Dan me se nicun' Jesucristó ga Diose gaa qui'yaj Diose se man xta' do', se man rihaan chumii do', nu' rasuun ruvi' ni'yaj yuvii do', nu' rasuun ne ruvi' ni'yaj yuvii do', nij ya'anj uun chij rihaan chumii nihánj do', cunudanj rasuun yo' me se qui'yaj Diose á. Dan me se ca'ne' Diose suun rihaan Jesucristó qui'yaj Jesucristó nu' rasuun, ne che'é dan qui'yaj Jesucristó nu' rasuun yo', ne inanj che'é Jesucristó vaa nu' rasuun yo', ne dan me se me rá Diose nicaj yu'unj Jesucristó man chumii nanj adonj.

17 Asij ataa curuvi' rasuun man rihaan chumii nihánj, ne nicun' Jesucristó, ne che'é qrun' Jesucristó vaa cunudanj rasuun yo' cuano ei.

18 Ne so' me síi uun chij ndo'o rihaan ní' ei. Dan me se ase vaa rii ta'nga' cúu yave yuvii rihaan ma'an yuvii ro', danj vaa rii ta'nga' Jesucristó rihaan cunudanj ní' sji nocó' man so' chuguanj. Asino so' me síi cunuu i'na' uún gaa cavi' so', ne danj inanj gaa cunuu i'na' uún ní', qui'yaj so', gaa ne guun so' síi sa' doj rihaan cunudanj ní' ei.

19 Ase vaa ma'an Diose ro', danj vaa Jesucristó, qui'yaj Diose, ne so' me síi nicaj cunudanj se sa' ei.

20 Asino quiri' nu' chumii rihaan Diose che'é cacun' qui'yaj yuvii, tzaj ne cavi' Jesucristó rihaan rcutzé che'é yuvii, qui'yaj Diose, ne ca'vee cunuu sa' yuvii do', nu' chumii do', rihaan Diose, ne guun niha' rá Diose ni'yaj Diose nu' se man rihaan chumii do', nu' se man xta' do', nanj adonj. Yo' me se vaa qui'yaj Diose gaa ca'neé Diose man Jesucristó rihaan chumii nihánj nanj adonj.

*Nana nihánj taj xna'anj se vaa cunuu rcua'aan ní' ga Diose, qui'yaj Jesucristó a*

21 Gaa naá me se yuvii yanj me soj, ne yuvii taj ri'yunj man Diose me soj gaa naá ei. 'Q se quij vaa rá soj, ne inanj se chi'ii qui'yaj soj, ne síi taj ri'yunj man Diose guun soj gaa rque che'é se ne guun soj tuvi' Diose gaa rque ma'.

22 Tzaj ne guun Jesucristó yuvii, ne cavi' so', ne che'é dan cunuu rcua'aan soj ga Diose, qui'yaj so', ne vaa güii canicun' soj rihaan Diose, qui'yaj Jesucristó, ne sji sa' guun soj rihaan Diose, ne taj cacun' cutumé soj a ma'.

23 Dan me se cavii sa' soj, sese yo'o canocó' soj se-tucuanj Jesucristó nanj adonj. Raan canocó' soj man so' ei. Aj cuno soj se-nana Diose nana sa', ne che'é dan guun ya' rá soj se vaa cavii sa' soj, ne se guun cataj soj se vaa ne ya' vaa nana sa' cuno soj ma'. 'Q se nana ca'mii natáj nii rihaan cunudanj nij yuvii man rihaan chumii me nana sa' yo', ne 'unj nihánj me síi a'mii natáj se-nana Diose nana sa' yo' rihaan yuvii nanj adonj.

*Nana nihánj taj xna'anj che'é suun 'yaj suun Pabló che'é nij síi cuchumán rá ni'yaj man Jesucristó a*

<sup>24</sup> Aj quirán' 'unj sayuun che'é nij soj, ne nihánj me guun niha' raj che'é sayuun rán' 'unj á. Dan me se ase vaa sayuun quiran' Jesucristó che'é nij síi noco' man so' ro', danj vaa sayuun ran' ma'an 'unj che'é nij soj sij noco' man so' a.

<sup>25</sup> Síi 'yaj suun che'é nij soj sij noco' man Jesucristó mej, ne Diose me síi cune' mán 'unj nata' 'unj cunudanj se-nana Diose rihaan nij soj a.

<sup>26</sup> O vaa yuve se-nana Diose nana sa' gaa naá, tzaj ne ndaa yaj me tinaruvi' sa' Diose nu' se-nana Diose nana sa' rihaan ní' sij sa' noco' man so' yaj ei.

<sup>27</sup> Dan me se guun rá Diose xcaj cunudanj ní' sij sa' noco' man so' cuenta che'é nana naca nihánj se vaa sa' uxrá qui'yaj Diose che'é soj sij yanj nanj adonj. Dan me se nuveé yuvii israelitá me nij soj ma'. Yuvii yanj me soj, tzaj ne yanj Jesucristó nimán soj, ne che'é dan guun ya rá ní' se vaa vaa güii cavii sa' uxrá soj ga Diose nanj adonj.

<sup>28</sup> Ne ma'an núj me síi nata' rihaan cunudanj yuvii che'é Jesucristó, ne nago' núj chrej nucuaj man nij yuvii se vaa canoco' nij yuvii man Jesucristó, ne tucu'yón núj nana sa' cuu rihaan cunudanj yuvii, che'é rej gaa asa' cachrón núj man nij so' rihaan Diose, ne sa' inanj gaa nij so', che'é se sa' uxrá noco' nij so' man Jesucristó a.

<sup>29</sup> Che'é dan 'yaj suun uxraj tucu'yonj se-nana Jesucristó a. Ne danj 'yá che'é se nucuaj do', nana sca' nuu nimanj qui'yaj Jesucristó do' ei.

## 2

<sup>1</sup> Me rá 'unj quene'en nij soj se vaa 'yaj suun ndo'oj che'é soj do', che'é nij síi amán rá ni'yaj man Jesucristó yanj chuman' Laodicea do', che'é yo'ó nij yuvii amán rá yuvii ataa quene'en manj do' a.

<sup>2</sup> O se rquee ndo'oj nari' nucuaj nimán soj ne yo'o cunuú se sa' nimán soj cumán soj ga tuvi' soj, ne yo'o nari' ndo'o soj ndaa guun ya ya rá soj nana naca se vaa Jesucristó me se veé ma'an so' me nana naca yo' ei.

<sup>3</sup> Dan me se veé rihaan Jesucristó me mán sa' cunudanj rasuun cuu do', rasuun sa' do', nu' yo'ó rasuun achiin quene'en yuvii do' ei.

*Nana nihánj taj xna'anj se vaa se cuno ní' nana tiha' yu'unj a. 'O se inanj Jesucristó canoco' ní' a*

<sup>4</sup> Nana nihánj me taj xna'anj 'unj rihaan nij soj che'é se na'vej rá 'unj tiha' yu'unj yuvii man soj a. Dan me se vaa yuvii me rá caxrii nana chi'ii rque soj, tzaj ne me rá 'unj caráán 'unj chrej rihaan nij yuvii se vaa se qui'yaj nij so' danj ga soj ma'.

<sup>5</sup> Nda' se nuvi' 'unj nicun' ni'yaj soj, tzaj ne nicun' nimán 'unj ga soj chuguanj. 'O se guun niha' uxrá ya raj se vaa 'o sa' mán soj, ne yo'o Jesucristó nucuaj rá soj, mán soj ei.

<sup>6</sup> Dan me se nda' rá se guun rá soj gaa guun che'e soj canoco' soj man Jesucristó ro', danj guun rá soj yo'o canoco' chre' soj man so' ei.

<sup>7</sup> Dan me se yo'o guun xej soj rihaan so', ne yo'o canicun' raan soj rihaan so', ne yo'o cunq soj rihaan so', ne tucu'yón uxrá soj tucuáán tucu'yón núj man soj, ne yo'o so' cuchumán rá soj ni'yaj soj, ne nago' uxrá soj graciá rihaan Diose á.

<sup>8</sup> Tumé soj man soj se gaa nanj tiha' yu'unj yuvii man soj á. Me rá nij yuvii canoco' soj se-tucuanj nij so', tzaj ne nuvi' yu'vee nó se-tucuanj nij so' rihaan

tucuáán sa' noco' ní' mei. Maan se nana tiha' yu'unj me nana a'mii nij so', ne se quinanii soj rihaan cacun' tumé soj, qui'yaj nana yo' a man adonj. Maan se nana yo' ro', nana tucu'yón nanj tuvi' nij yuvi rihaan nij yuvi me nana yo', ne se-nana nij ya'anj man rihaan chumi nihánj me nana yo', tzaj ne nuvee se-nana Jesucristó me nana yo' ma'.

<sup>9</sup> 'Q se ase vaa ma'an Diose ro', danj vaa Jesucristó, tzaj ne vaa nee man Jesucristó, ne che'é dan ruvi' Jesucristó rihaan ní', ne ne'en ní' Jesucristó, ne xcaj ní' cuentá daj vaa ma'an Diose uún chuguanj.

<sup>10</sup> Ne Jesucristó me sí guun chij rihaan nij ya'anj man rihaan chumi nihánj, ne yanj Jesucristó ga soj, ne che'é dan taj se achiin man soj cuano mei.

<sup>11</sup> Tananj uún, ne maan che'é se nuu rcua'aan soj ga Jesucristó ro', maan che'é dan aj táa ta'nga' sa' inanj man soj vaa ei. Nuvee ta'nga' taj nee man yuvi me ta'nga' yo' ma'. Ta'nga' 'yaj ca'vee tanáj soj nu' rasuun chi'ii me yo' adonj. 'Q se che'é yan tanáj soj nu' rasuun chi'ii ro', che'é dan ase vaa táa ta'nga' man soj vaa ya ei.

<sup>12</sup> 'Q se gaa cata' ne soj, ne ase vaa cachin' nii man Jesucristó rque yo'óo rque va'nuj güii ne na'núj uún so' ro', danj vaa soj, che'é se cuchumán rá soj se vaa veé ya Diose sij nucuaj ndo'o qui'yaj ya cunuu i'na' ya uún Jesucristó ei.

<sup>13</sup> Gaa naá gaa ataa quene'en soj sij yaníj man Jesucristó, ne qui'yaj ndo'o soj cacun', ne taj ta'nga' cuta' nii man nee man soj ma'. Tzaj ne ca'néj uun Diose nu' cacun' taj xráa ní', ne ase vaa cunuu i'na' uún Jesucristó gaa cavi' so' ro', danj vaa soj, ne yo'q cunuu sa' nimán soj, qui'yaj Diose ei.

<sup>14</sup> Ne dan me se tinavij so' nu' suun vaa rihaan ní' suun cunó ní' nu' se-tucuanj Moisés, ne xa' se-tucuanj Moisés yo', tzaj ne que'ee ndo'o nana ne guun nucuaj ní' qui'yaj ní' ndaa vaa taj tucuáán yo' a ma'. 'Q se che'é se ne guun nucuaj ní' cunó ní' nu' tucuáán yo' ro', che'é dan cutumé ndo'o ní' cacun', qui'yaj yo' adonj. Tzaj ne gaa go' nii caquí ra'a Jesucristó ne cachrón nii man so' rihaan rcutze, gaa ne Diose me sí tinavij man nu' suun vaa rihaan ní' cunó ní' nu' se-tucuanj Moisés yo' adonj.

<sup>15</sup> Maan che'é rasuun sa' qui'yaj Jesucristó ro', maan che'é dan qui'yaj canaán Diose rihaan taran' nij ya'anj man rihaan chumi nihánj, ne tihaan so' man nij so' se vaa daj chihaa míj se guun nucuaj nij ya'anj yo' guun chij nij yo' rihaan ní' ma'. Dan me se che'é se cavi' Jesucristó rihaan rcutze ro', che'é dan qui'yaj canaán Diose man cunudanj nij ya'anj man rihaan chumi nihánj, ne yo'q caxríj yuve Diose man nij ya'anj man nihánj vaa, ne guun na'aj ndo'o taran' nij ya'anj yo', qui'yaj Diose chuguanj.

<sup>16</sup> Che'é dan se ca'vej rá soj cataj xna'anj yuvi rihaan soj daj qui'yaj soj ma'. Se guun cataj yuvi me rasuun se ca'vee cha soj do', me rasuun se ca'vee co'q soj do', me güii quinavij rá soj cha'anj do', daj qui'yaj soj güii naránj rá soj do' ma'. Se ca'vej soj cataj xna'anj yuvi daj qui'yaj soj mei.

<sup>17</sup> Tucuáán tucu'yón nij yuvi rihaan soj ro', tucuáán yo' me se canoco' nij yuvi israelitá gaa naá, ne xcaj nij so' cuentá daj gaa qui'yaj ní' gaa cayáán ní' ga Diose nu' cavii nu' ca'anj, qui'yaj tucuáán yo', tzaj ne yaj ro', che'é Jesucristó me se xcaj ní' cuentá sa' doj, se vaa ma'an so' canoco' ní' nu' cavii nu' ca'anj, ne taj che'é canoco' ní' yo'óo tucuáán cuano ma'. Tananj orún' so' canoco' ní' nanj adonj.



<sup>18</sup> Se ca'vej soj quirí' soj qui'yaj nij síf taj se vaa nica' ndo'o a'mii nij so' mei. Ca'vee se cataj nij so' se vaa na'víj nij so' rihaan se-mozó Diose do', ca'vee se nucui' ndo'o rá nij so' se vaa ne'en nij so' rasuun tihaan Diose rihaan nij so' taj nij so' do', tzaj ne tu'va rma'an nij so', ne maan rasuun avii raq ma'an nij so' me tu'va rma'an nij so' danj ei.

<sup>19</sup> Dan me se taj cúu yave nij so' táa gaán chihá nij so' vaa, ese taj Jesucristó rihaan nij so' mei. Ne uno nij so' se-nana Jesucristó ma'. Ne Jesucristó me se ase vaa rii ta'nga' cúu yave ní' rihaan nee man ní' ro', danj vaa rii ta'nga' Jesucristó rihaan taran' ní' s'ij noco' man so', ne sa' doj noco' ní' man Diose, 'yaj Jesucristó, ne inanj danj me rá Diose qui'yaj ní' nanj adonj. Ne ase vaa vaa sca' nee man ní' 'yaj ya'aá man ní' ro', danj vaa cuyaan rá taran' ní' s'ij noco' man Diose 'yaj Jesucristó adonj.

<sup>20</sup> Che'é se cavi' Jesucristó che'é nij soj ro', che'é dan ne nó xcúun soj daj chihaa míj cunq soj se-nana nij ya'anj man rihaan chumii nihánj a mei. Che'é dan, me che'é 'yaj ndo'o soj se vaa 'yaj nij yuvii man uun rihaan chumii nihánj ga. Dan me se me che'é niha' rá soj cunq soj nana se vaa

<sup>21</sup> vaa rasuun se guun cha soj do', vaa rasuun se guun xcaj tu'va soj daj chá yo' do', vaa rasuun se guun cano' ra'a soj do' ga.

<sup>22</sup> Me che'é uno rma'an soj nana vaa danj ga. 'O se rasuun yo' me se cha yuvii man rasuun yo', ne quina'vij nu' rasuun yo' vaa güii adonj. Ne xa' nana vaa danj, tzaj ne nana avii raq uun yuvii me nana yo', ne niha' rá nij yuvii cataj nij yuvii nana vaa danj rihaan tuvi' nij yuvii nanj adonj.

<sup>23</sup> Ne avii raq yuvii uno nana yo', taj nii, ne sa' uxrá nari' nij so' chrej canoco' nij so' Diose, taj nii, ne sí' ní'yanj a'mii me nij so', taj nii, tzaj ne ne ya ya s'ij noco' man Diose me nij so' ma'. Maan se che'é nana noco' nij so' ro', 'yaj ndo'o nij so' naj guun cacun' me rá nee man nij so' qui'yaj nij so' nanj adonj.

### 3

<sup>1</sup> Dan me se ase vaa cunuu i'na' uún Jesucristó ro', danj vaa cunuu sa' nimán soj, ne canoco' soj chrej sa', qui'yaj Jesucristó a. Che'é dan che'é inanj rasuun man rej xta' xcaj soj cuentá, ne cuano nihánj me se x'núu Diose rej nuva' Diose nicun' Jesucristó cuano ei.

<sup>2</sup> Dan me se xcaj soj cuentá che'é rasuun man rej xta', ne se nanó rá soj che'é rasuun man rihaan chumii nihánj mei.

<sup>3</sup> Dan me se aj cavi' nee man soj rihaan chumii nihánj vaa, ne cuano nihánj me se táa nimán soj rej xta' rej yanj Diose, 'yaj Jesucristó ei.

<sup>4</sup> Ne che'é dan ca'vee cayáan soj ga Diose nu' cavi' nu' ca'anj, ne vaa güii ca'na' uún Jesucristó rihaan chumii nihánj, ne curuvi' soj ga so', ne ve'é ndo'o gaa cumán soj ga so' nanj adonj.

*Nana nihánj taj xna'anj che'é tucuáan nga ne che'é tucuáan cuchruj Pablo che'é ní' a*

<sup>5</sup> Yaj me se se qui'yaj uún nij soj cacun' qui'yaj soj asij naá mei. Se qui'yaj soj se vaa 'yaj yuvii man rihaan chumii nihánj a ma'. 'O se sa' xcaj soj cuentá, ne orún' nica' soj cotoj ga soj, ne se guun rá soj qui'yaj soj se nij a ma'. Se guun rá soj qui'yaj ituu soj si'yaj tuvi' soj ma'. Ase vaa yuvii na'víj rihaan naj guun ya'anj ro', danj vaa yuvii 'yaj ituu si'yaj tuvi' adonj. Nij vaa Diose, ne sa' doj vaa rasuun yo', rá nij so', ne

<sup>6</sup> che'é cacun' yo' guun yuvaa uxrá Diose, ne qui'yaj ndo'o Diose sayuun man nij sí' 'yaj cacun' yo' adonj.

7 'O cyaan vaa cacun' yo' ga cacun' qui'yaj ma'an soj asij naá, gaa canoco' soj tucuaán chi'ij ei.

8 Tzaj ne cuano nihánj me se se qui'yaj nij soj danj ma'. Se guun yuvaa soj ma'. Se guun rá soj qui'yaj soj chi'ij man yo'ó yuvií ma'. Se ca'mii soj nana nij che'é tuvi' soj ma'. Se nachri' soj nı'yaj soj tuvi' soj ma'.

9 Se ca'mii ne soj che'é tuvi' soj ma'. Yo' me se qui'yaj soj gaa ataa canoco' soj man Jesucristó, tzaj ne yaj me se cunuú sa' soj, ne se qui'yaj soj a doj danj a mei.

10 Cunuú sa' nimán soj, qui'yaj Diose, ne che'é dan sa' doj namán nana sa' cıu raá soj 'o 'o güii adonj. Ne'en soj se vaa Diose me síf qui'yaj man soj, ne ase vaa ma'an Diose ro', danj gaa uún soj ei.

11 Yaj me se taj se 'yaj sese naj guun yuvií me soj mei. Ca'vee se sij israelitá do', ca'vee se sij yanıj do', ca'vee se sij taj ta'nga' man do', ca'vee se nuveé sij taj ta'nga' do', ca'vee se sij man yo'ó chuman' do', ca'vee se sij ru'vee do', ca'vee se sij niqıe do', ca'vee se sij chéé ma'an do', taj se 'yaj a doj mei. Qrún' ya ya rasuun sa' me Jesucristó, ne qrún' so' me nicun' rihaan daj a rasuun nanj ei.

12 Dan me se narii Diose man soj canoco' soj man so', ne guun soj síf sa' noco' man Diose, ne 'ee rá Diose man soj, ne che'é dan cunuú 'ee rá soj tuvi' soj chuguanj. Dan me se gaa sa' nimán soj, ne ca'mii sa' soj, ne se guun yuvaa soj man tuvi' soj ma'. Maan se gaa inaj nimán soj ei.

13 Sese qui'yaj chi'ij tuvi' soj rihaan soj, ne caraá x'naa yo'o yo'o soj rihaan tuvi' soj ei. Danj qui'yaj síf 'nij ra'a man ní' che'é soj, caráj x'naa so' rihaan soj, ne che'é dan danj qui'yaj soj rihaan tuvi' soj ei.

14 Nu' yo' qui'yaj soj, ne vaa yo'ó se sa' doj qui'yaj uún soj, ne yo' me se gaa 'ee ya ya rá soj tuvi' soj, ne yo' me qui'yaj guun raan cumán soj ei.

15 Ne ca'vej soj gaa dınj nimán soj qui'yaj Jesucristó a. Che'é se me rá ma'an Diose gaa dınj nimán soj, che'é dan narii Diose man soj, ne naqui'yaj rcua'aaan so' man nu' nij tinuj soj, ne che'é dan nago' soj graciá rihaan Diose ei.

16 Cuno uxrá soj se-nana Jesucristó, ne cavii nana sa' cıu raá soj, ne tıcu'yón soj nana sa' rihaan tuvi' soj, ne nago' soj chrej sa' man tuvi' soj ei. Cachraá soj chra' rihaan Diose, ne nago' soj graciá rihaan Diose ei.

17 Yuvií noco' man Jesucristó me soj, ne che'é dan xcaj soj cuentá daj me rá Jesucristó qui'yaj soj do', daj me rá Jesucristó ca'mii soj do', daj qui'yaj soj canoco' soj man Jesucristó síf 'nij ra'a man ní' do', ne maan che'é Jesucristó sij 'nij ra'a man ní' nago' soj graciá rihaan Rej ní' Diose ei.

*Nana nihánj taj xna'anj daj qui'yaj 'o 'o ní' rihaan tuvi' ní' a*

18 Cataj xna'anj 'unj rihaan nij chana vaa nica, se vaa ve'é cunoj nij no' rihaan nica nij no' á. Danj vaa no xcúún nij no' qui'yaj nij no', ese chana noco' man síf 'nij ra'a man ní' me nij no' a.

19 Ne ve'é gaa 'ee rá nij snó'o man nica nij so' uún á. Se caxrıj yuvaa nij snó'o man nica nij so' ma'. Se qui'yaj quij snó'o man no' ma'.

20 Ve'é cunoj nij xnii nu' nana a'mii rej xnii nu' nana a'mii nii xnii uún á. Danj qui'yaj nij xnii noco' man síf 'nij ra'a man ní', ne guun niha' rá Diose ni'yaj Diose man xnii ve'é uno a.

21 Se ca'mii rej xnii nana chi'ij rihaan xnii, gaa ne se quirı' nimán xnii, qui'yaj rej xnii a.

22 Cuno sa' mozó rihaan se-ru'vee mozó á. Se naqui'yaj rmii mozó man mozó rihaan se-ru'vee mozó ma'. Nda' se nuvi' se-ru'vee mozó, tzaj ne yo'o

qui'yaj suun mozó á. Síi 'nij ra'a man ní' ro', tumé so' man mozó yo', ne che'é dan cuhu'vi' mozó ne ve'é qui'yaj suun so' a.

<sup>23</sup> Ne rihaan yuvi uun 'yaj suun mozó ma'. Tanañ rihaan síi 'nij ra'a man ní' 'yaj suun so', ne che'é dan 'o ca'nej nimán so' qui'yaj suun uxrá so' nu' suun vaa rihaan so', ne se naqui'yaj rmi so' nimán so' ma'.

<sup>24</sup> Aj ne'en soj se vaa ma'an síi 'nij ra'a man ní' me síi qui'yaj cayáan soj rej sa' ga Diose nu' cavii nu' ca'anj, ne che'é dan ve'é qui'yaj suun soj rihaan Jesucristó sji 'nij ra'a man ní' á.

<sup>25</sup> Ne síi qui'yaj cacun' ro', inañ sayuun quiran' so', ne 'o cuyaan qui'yaj Diose ca'ne' Diose cacun' che'é mozó do', che'é ru'vee do', che'é taran' yuvi do', nanj adonj. Xa' Diose, tzaj ne taj vaj síi cunii do', taj vaj síi le'ej do', taj vaj síi uun chij do', rihaan Diose man adonj.

## 4

<sup>1</sup> Dan me se ve'é qui'yaj soj sji ru'vee rihaan se-mozó soj uún á. Se tiha' yu'unj soj sji ru'vee man se-mozó soj ma'. Xcaj soj sji ru'vee cuentá se vaa ase vaa mozó rihaan soj ro', danj vaa ma'an soj rihaan Diose uún ei.

*Nana nihánj taj xna'anj se vaa cachinj ni'yaj nij síi cuchumán rá ni'yaj man Jesucristó rihaan Diose che'é Pabló a*

<sup>2</sup> Dan me se yo'o cachinj ni'yaj uxrá soj rihaan Diose daj a güii ei. Se ca'ne' rá soj ga suun achún ni'yaj rihaan Diose mei. Ne tadó soj cumañ soj, ne niganj nago' soj graciá rihaan Diose á.

<sup>3</sup> Dan me se cachinj ni'yaj uún soj rihaan Diose che'é núj se vaa gaa ya'núj rihaan núj ca'mij núj se-nana Jesucristó nana tihaan naca Diose rihaan ní' á. Che'é nana yo' me 'nij 'unj taga' nihánj cuano ei.

<sup>4</sup> Vaa suun rihaan 'unj tihaan 'unj se-nana Jesucristó rihaan yuvi, ne che'é dan cachinj ni'yaj soj rihaan Diose se vaa ca'vee ca'mij natáj sca' 'unj rihaan nij so' ei.

*Nana nihánj taj xna'anj se vaa nuchruj raa ní' daj ca'mii ní' rihaan nij síi ataa cuchumán rá ni'yaj man Jesucristó a*

<sup>5</sup> Asa' chéé soj ga nij síi ataa cuchumán rá ni'yaj man Jesucristó, ne sa' nuchruj raa soj daj ca'mij soj ga nij so', ne se quiri' uun tiempó qui'yaj soj ga nij so' mei.

<sup>6</sup> Nu' cuentó nanó soj ga nij so' me se inañ cuentó ve'é do', inañ cuentó sa' aran' rá nij so' do', inañ cuentó a'mii danj Diose do', ca'mij soj, ne quene'en soj me nana ca'mij soj rihaan 'o 'o síi xná'anj man soj che'é tucúaán noco' soj adonj.

*Nana nihánj taj xna'anj se vaa ve'é cumañ nij síi cuchumán rá ni'yaj man Jesucristó yanj chuman' Colosas, rá nij tuvi' Pabló a*

<sup>7</sup> Tinúú ní' síi 'ee ndo'o rá ní' man síi sa' ndo'o 'yaj suun gaj che'é síi 'nij ra'a man ní' síi cu'naj Tiquico me síi ca'nej 'unj cuchí' njcaj nana che'é núj rihaan soj ei.

<sup>8</sup> Ne me rá 'unj cataj xna'anj so' rihaan soj daj quiran' núj, gaa ne guun ya' rá soj, ne nari' nucaj nimán soj ei.

<sup>9</sup> Ne ca'nej 'unj man tinú' Onésimo cuchí' so' ga tinú' Tiquico yo', ne síi man chiháan soj me tinú' Onésimo, ne 'ee rá ní' man so', ne nucaj rá 'unj man so', ne cataj xna'anj roj so' rihaan soj nu' se vaa quiran' núj rej nihánj ei.

<sup>10</sup> Aj ne'en soj man sí cu'naj Aristarco uún a. Cuaṇo nihánj me se 'nij so' taga' ga 'ujj, ne me rá so' se vaa ve'é cumañ soj a. Ne vaa sí cu'naj Marcos tinúú tachruu sí cu'naj Bernabé a. Veé ðanj ve'é cumañ soj, rá so' uún a. Aj cuchi' nana rihaan soj che'é sí cu'naj Marcos, se vaa sese cuchi' so' chiháán soj, ne ve'é ca'mij soj ga so' á.

<sup>11</sup> Ne ne'en soj man sí cu'naj Jesús Justo uún a. So' ro', me rá se vaa ve'é cumañ soj a. Sí cu'naj Aristarco do', sí cu'naj Marcos do', sí cu'naj Jesús do' a. 'O se orún' va'nuj nij so' me yuvij israelitá 'yaj suun ga núj che'é yan guun chij Diose rihaan chumij nihánj, ne nari' nucuaj doj rá 'ujj, qui'yaj nij so' ei.

<sup>12</sup> Ne ve'é cumañ soj, rá sí cu'naj Epafra uún a. Sí cavij chiháán soj me so', ne 'yaj suun uxrá so' che'é Jesucristó, ne nu' güii achíin ni'yaj uxrá so' rihaan Diose che'é soj, ne me rá so' gaá chij rá soj, ne guun ya rá soj se vaa ne'en soj ðaj me rá Diose qui'yaj soj,

<sup>13</sup> ne 'ujj me sí ne'en ya se vaa qui'yaj suun uxrá so' che'é soj do', che'é nij yuvij amán rá ni'yaj man Jesucristó yanj chuman' Laodicea do', che'é nij yuvij amán rá ni'yaj man Jesucristó yanj chuman' Hierápolis do' a.

<sup>14</sup> Doctor sí cu'naj Lucas sí 'eē ndo'o rá ní' me se me rá uún so' se vaa ve'é cumañ soj a. Ne tananj sí cu'naj Demas uún, ne me rá so' se vaa ve'é cumañ soj a.

<sup>15</sup> Cataj soj rihaan nij yuvij amán rá ni'yaj man Jesucristó yanj chuman' Laodicea do', rihaan chana cu'naj Ninfas do', rihaan nij yuvij amán rá na'víj rihaan Diose tucúa no' do', se vaa ve'é cumañ nij so', rá 'ujj ei.

<sup>16</sup> Asa' navij nayaa soj yanj cartá nihánj, ne ca'nej soj yanj nihánj ca'anj yo' rihaan nij yuvij amán rá ni'yaj man Jesucristó yanj chuman' Laodicea, ne nayaa nij so' uún á. Ne ca'nej nij so' yanj ca'neé 'ujj rihaan nij so', nayaa soj uún a.

<sup>17</sup> Ne cataj soj rihaan sí cu'naj Arquipo se vaa 'o ca'nej nimán so' qui'yaj suun so' nu' suun ca'ne' sí 'nij ra'a man ní' rihaan so' á.

<sup>18</sup> Ma'anj ra'aj sij cu'naj Pabló cachrón nana nihánj adonj. Se quini'yón soj se vaa 'nij 'ujj taga' ma'. Me rá 'ujj qui'yaj ndo'o Diose se luj che'é nij soj ei.

## Nihánj me 'o yanj cartá qui'yaj síi cu'naj Pabló ca'néé so' rihaan nij yuvij noco' man Diose yanj chuman' cu'naj Tesalónica a

<sup>1</sup> Síi cu'naj Pabló do', síi cu'naj Silvano do', síi cu'naj Timoteo do', me núj, ne tu'va taran' núj avii 'yaj núj yanj nihánj ca'nej núj rihaan nij soj sij yanj chuman' cu'naj Tesalónica sij noco' man Rej ní' Diose do', man Jesucristó sij 'nij ra'a man ní' do' a. Me rá núj qui'yaj ndo'o Diose se luj che'é soj, ne me rá núj gaa xej nimán soj, qui'yaj Diose a.

*Nana nihánj taj xna'anj se vaa nij síi cuchumán rá ni'yaj man Jesucristó yanj chuman' cu'naj Tesalónica ro', sa' uxrá noco' nij so' man Diose a*

<sup>2</sup> Niganj nago' núj gracia rihaan Diose che'é cunudanj soj, ne gaa achíin ni'yaj núj rihaan Rej ní' Diose, ne achíin ni'yaj ndo'o núj che'é taran' nij soj ei. Dan me se yo'o

<sup>3</sup> nuú rá núj se vaa qui'yaj suun ndo'o soj che'é se amán rá soj ni'yaj soj man Jesucristó, ne caran' rá soj ni'yaj soj man so', ne nuú rá núj se vaa ne'en soj se vaa cavii sa' soj qui'yaj Jesucristó sij 'nij ra'a man ní' vaa güii, ne che'é dan yo'o a'néé nimán soj qui'yaj suun soj che'é so' adonj.

<sup>4</sup> Dan me se 'eé rá Diose man soj, tinuj, nocoj. Ne ne'en núj se vaa narii Diose man soj canoco' soj man so' adonj.

<sup>5</sup> 'O se cuno soj nana sa' nana nata' núj rihaan soj, ne ne cuno rma'an soj nana yo' ma'. Dan me se gaa cuno soj nana yo', ne yuun che'e guun ya rá soj se vaa nana ya me yo', ne guun nucuaj ndo'o soj canoco' soj nu' nana yo' ei. 'O se Nimán Diose ne ga soj ei. 'O se gaa cane núj ga soj, ne quene'en soj daj qui'yaj núj che'é se me rá núj cavii sa' soj a.

<sup>6</sup> Ne ase qui'yaj guee núj do', ase 'yaj guee síi 'nij ra'a man ní' do', danj qui'yaj guee soj chuguanj. Dan me se nda' se quiran' soj sayuun qui'yaj nij yuvij ne amán rá ni'yaj man Jesucristó, tzej ne yo'o canoco' soj se-nana Diose, ne guun niha' rá soj, qui'yaj Nimán Diose adonj.

<sup>7</sup> Ne cunudanj nij yuvij noco' man Diose man estadó Macedonia do', man estadó Acaya do', xcaj nij so' cuentá che'é se vaa qui'yaj soj, ne danj qui'yaj guee nij so' uún ei.

<sup>8</sup> Dan me se aj cuno ndo'o yuvij se-nana síi 'nij ra'a man ní', qui'yaj soj, ne dan me se nuveé inanj nij yuvij man estadó Macedonia do', nij yuvij man estadó Acaya do', me yuvij cuno nana se vaa amán rá soj ni'yaj soj man Diose ma'. 'O se yuvij man rihaan nu' cachra' chumij me yuvij cuno nana yo' nanj adonj. Che'é dan me taj che'é cataj xna'anj núj rihaan nij yuvij che'é se vaa qui'yaj soj ma'.

<sup>9</sup> Ma'an nij yuvij taj xna'anj rihaan tuvi' nij so' se vaa ve'é uxrá ca'mii soj ga núj gaa cayaán núj ga soj, ne taj xna'anj nij so' se vaa tanáj soj ya'anj canoco' soj gaa rque, ne dan me se chruun cacó' soj do', yahij cacó' soj do', me nij ya'anj yo', ne yaj me se canicaj soj canoco' soj man Diose síi vaa i'na' ya ya,

<sup>10</sup> ne na'vij soj ca'na' uún ma'an Jesucristó ta'níi Diose rej xta' a. Ne Jesucristó ro', me síi cunuun i'na' ya uún qui'yaj Diose gaa cavi' so', ne tinanii Jesucristó man ní' rihaan sayuun asa' quisij güii caxrii yuvaá Diose man nij síi tumé cacun' ne qui'yaj Diose sayuun man nij so' ei.

## 2

*Nana nihánj taj xna'anj se vaa ve'é tucu'yón sí cu'naj Pabló se-nana Diose nana sa' rihaan nij sí cuchumán rá ni'yaj man Jesucristó yanj chuman' cu'naj Tesalónica a*

<sup>1</sup> Ne'en ma'an soj se vaa cavii sa' suun qui'yaj suun núj gaa cayáán núj ga soj, tinuj, nocoj.

<sup>2</sup> Dan me se asino yaan quiran' núj sayuun chuman' Filipos, ne nachri' ndo'o nij sí man chuman' yo' ni'yaj nij so' man núj, tzaj ne che'é se sij noco' man Diose me núj, che'é dan nda' se sayuun ndo'o vaa nata' núj se-nana Diose nana sa' rihaan soj qui'yaj nij sí man chiháán soj, tzaj ne ne cuchu'vi' núj ma'. Tananj ca'néé nimán núj nata' núj doj nana sa' rihaan soj a.

<sup>3</sup> Vaa che'é a'mii natáj núj se-nana Diose rihaan soj, ne dan me se nuveé sij noco' tucuáán ne me núj ma'. Ne quij vaa nimán núj ma'. Nuveé sij tiha' yu'unj man yuvi me núj ma'.

<sup>4</sup> O se guun nucuaj rá Diose man núj, ne ca'ne' so' suun rihaan núj nata' núj se-nana so' nana sa', ne danj 'yaj guéé núj adonj. Ne uun rá núj se vaa cataj yuvi se vaa ve'é 'yaj núj ma'. Maan se me rá núj guun niha' rá Diose ni'yaj Diose man núj, ne che'é dan 'yaj suun núj che'é Diose, ne Diose me sí acaj cuentá che'é núj daj vaa nimán núj adonj.

<sup>5</sup> Ne'en soj do', ne'en ma'an Diose do', se vaa ne ca'mii ya'anj ndo'o núj ga soj che'é rej ca'vee ca'neé núj sa'anj man soj ma'.

<sup>6</sup> Ne guun rá núj cataj soj do', cataj yo'ó yuvi do', se vaa ve'é 'yaj núj ma'. Nda' se Jesucristó me sí cune' man núj guun núj apóstol nata' se-nana so', tzaj ne ne cachinj núj rasuun rihaan soj ma'.

<sup>7</sup> Tananj ase 'yaj nij chana gá ta'núí chana ro', danj qui'yaj núj ga soj gaa cayáán núj ga soj, ne ve'é inanj qui'yaj núj ga soj adonj.

<sup>8</sup> Dan me se cunuu 'eé rá núj man soj, ne che'é dan nuveé inanj se-nana Diose me se vaa rqué núj man soj ma'. Rqué núj se-nana Diose man soj, ne yo'ó ca'néé nimán núj qui'yaj suun núj che'é soj uún adonj.

<sup>9</sup> Dan me se ne'en soj se vaa nuvi nigan' 'yaj suun núj, gaa ne ri' núj sa'anj, ne ránj ma'an núj se chá núj, ne ne ca'vej rá núj ca'neé núj se chá man soj, man tinuj, man nocoj. Danj inanj qui'yaj núj gaa ca'mii natáj núj se-nana Diose nana sa' rihaan soj adonj.

<sup>10</sup> Quene'en ma'an soj do', quene'en Diose do', se vaa sij nica nimán me núj rihaan soj sij amán rá ni'yaj man Diose, ne dan me se qui'yaj núj inanj se me rá Diose qui'yaj núj, ne ne qui'yaj núj cacun' a ma'.

<sup>11</sup> Ne'en soj se vaa ase vaa 'yaj snó'o gá ta'núí snó'o ro', danj vaa qui'yaj núj ga 'o 'o nij soj, ne dan me se guun nucuaj nimán soj, qui'yaj núj, ne narqué núj chrej nucuaj man soj

<sup>12</sup> se vaa qui'yaj soj se vaa no xcúún soj qui'yaj soj che'é se narii Diose man soj cané soj ga Diose güi guun chij Diose rihaan chumij nihánj, ne ve'é ndo'o cumañ soj ga Diose a.

*Nana nihánj taj xna'anj se vaa nij sí cuchumán rá ni'yaj man Jesucristó man chuman' Tesalónica ro', quiran' nij so' sayuun, qui'yaj nij sí ne amán rá ni'yaj man Jesucristó man chiháán nij so' a*

<sup>13</sup> Niganj nago' núj gracia rihaan Diose che'é soj ei. Dan me se gaa cuno soj se-nana Diose nana ca'mii natáj núj rihaan soj, ne ne cataj soj se vaa se-nana yuvi uun me nana yo' ma'. Ya cataj soj se vaa se-nana Diose me nana nata'

núj, ne veé ya se-nanā Dioṣe me yo' adonj. Ne nuu sa' nimán soj, 'yaj nanā yo', che'é se cuchumán rá soj cuno soj nanā yo' ei.

<sup>14</sup>Q se ase vaa quiran' nij sí nocō' man Dioṣe sí mān estadó Judea ro', danj quiran' uún soj, che'é se sij nocō' man Jesucristó me taran' soj, tinuj, nocoj. Dan me se quiran' nij sí mān estadó Judea sayuun, qui'yaj nij yuvií israelitá sí mān chiháán nij so', ne quiran' uún soj sayuun, qui'yaj nij sí mān chiháán soj ei.

<sup>15</sup>Ne xa' nij sí israelitá yo', tzaj ne nij so' me sí ticavi' man Jesucristó sij 'nij ra'a man ní' dō', man nij sí nata' se-nanā Dioṣe gāa naá dō', ne veé uún nij so' canoco' ndo'o man núj, guun rá nij so' gō' nij so' man núj uún nanj adonj. Nij ndo'o 'yaj nij so' ni'yaj Dioṣe, ne taj ri'yunj nij so' man cunudanj yuvií uún adonj.

<sup>16</sup>Dan me se me rá núj nata' núj se-nanā Dioṣe rihaan soj sij yaníj che'é yan quinanií soj rihaan sayuun, tzaj ne aráán ndo'o nij sí israelitá yo' chrej rihaan núj, ne guun nocōo uxrá cacun' quitaj xráá nij so' nu' cavii nu' ca'anj, ne che'é dan yo'ō ca'maan rá Dioṣe ni'yaj Dioṣe man nij so', ne yuun che'e quiran' nij so' sayuun, qui'yaj Dioṣe ei.

*Nanā nihánj taj xna'anj se vaa me ndo'o rá sí cu'naj Pabló quene'en so' man nij sí cuchumán rá ni'yaj man Jesucristó mān chuman' cu'naj Tesalónica a*

<sup>17</sup>Xa' yaj me se guun gan' ya núj doj rihaan chiháán soj doj güii nihánj, tzaj ne 'o nuú rá núj man soj, ne che'é dan me ndo'o rá núj quene'en yucuān' núj man soj,

<sup>18</sup>ne che'é dan guun rá núj cuchí' núj rihaan soj, ne xa' 'unj sij cu'naj Pabló me se guun que'eē ndo'o me raj cuchíj rej mān soj, tzaj ne caráán Satanás chrej rihaan núj cuchí' núj rihaan soj ei.

<sup>19</sup>Dan me se asa' ca'na' uún Jesucristó rihaan chumií nihánj ne guun niha' uxrá rá núj che'é soj, ne nata' núj rihaan Jesucristó se vaa ve'é canoco' soj man so' qui'yaj núj, ne cavii sa' núj rihaan so' che'é soj ei. Taj vaj yo'ó yuvií 'yaj danj ā ma'. 'Q se orún' ya soj me sí 'yaj danj ei.

<sup>20</sup>Q se soj me sí qui'yaj cavii sa' núj, ne soj me sí qui'yaj guun niha' rá núj adonj.

### 3

*Nanā nihánj taj xna'anj se vaa cataj xna'anj sí cu'naj Timoteo rihaan Pabló se vaa sa' uxrá cuchumán rá nij sí mān chuman' Tesalónica ni'yaj nij so' man Jesucristó a*

<sup>1</sup>Che'é dan ne ca'vej uxrá rá núj canē raan taran' núj chuman' nihánj ā ma'. Che'é dan cavii raā núj se vaa vij ran' gueē rój me sí quinaj chuman' Atenas nihánj,

<sup>2</sup>ne dan me se ca'néé núj man tinú' Timoteo cuchí' so' rej mān soj a. Dan me se so' me sí 'yaj suun ndo'o rihaan Dioṣe gā núj suun nata' se-nanā Jesucristó nanā sa', ne me rá núj raacúj so' man soj, narque so' chrej nucuaj man soj, ne raan doj canocō' soj man Jesucristó, qui'yaj so',

<sup>3</sup>ne ā 'ó tuvi' soj se quirí'lj tucuáán nocō' soj che'é sayuun qui'yaj yuvií man soj, rá núj ā ma'. 'Q se ne'en soj se vaa nō xcúún ní' quiran' ní' sayuun rihaan chumií nihánj,

<sup>4</sup>ne gāa cayáán núj gā soj, ne cataj ya núj rihaan soj se vaa xraj, ne quiran' ní' sayuun, ne ne'en soj se vaa ya quiran' ní' sayuun niha'.

<sup>5</sup> Che'é se me uxrá rá 'un̄j quene'én 'un̄j daj quiran' soj, ne che'é dan ca'neé 'un̄j man Timoteo cuchí' so' rej man soj, ne cataj xna'an̄j so' rihan̄j daj 'yaj soj noco' soj man Diose, raj a. Dan me se quinan̄o rá 'un̄j sese aj caxríj síi chree chrej chí'ii rque soj do', sese quiriri' nu' suun qui'yaj suun núj che'é soj do', raj a.

<sup>6</sup> Dan me se canicaj uún Timoteo namán so' rihaan núj, ne cataj xna'an̄j so' se vaa ve'é uxrá amán rá soj ni'yaj soj man Jesucristó, ne 'ee rá soj tinúú soj, taj so', ne nigan̄j ve'é nuú rá soj man núj, taj so', ne ase vaa me rá núj quene'én núj man soj ro', danj vaa rá soj me rá soj quene'én soj man núj, taj so', ne guun niha' ndo'o rá núj gaa cuno núj se-nan̄a so' adon̄j.

<sup>7</sup> Dan me se quiran' ndo'o núj sayuun gaa rque gaa qui'yaj suun núj yan cuchuman rá soj ni'yaj soj Diose, tzaj ne cuano nihánj me guun niha' uxrá rá núj che'é rej nata' Timoteo che'é soj rihaan núj, tinuj, nocoj.

<sup>8</sup> Dan me se che'é se raan noco' soj man síi 'nij ra'a man ní', che'é dan vaa che'é gaa niha' rá núj qui'yaj suun núj rihaan chumií nihánj adon̄j.

<sup>9</sup> Dan me se guun niha' uxrá rá núj rihaan Diose che'é soj, ne che'é dan no xcúún núj nago' ndo'o núj graciá rihaan Diose che'é soj,

<sup>10</sup> ne nuvíi nigan' cachin̄j ni'yaj núj rihaan Diose se vaa ca'vej Diose quene'én núj man soj, ne sese ataa nari' soj nu' tucuaán noco' ní', ne me rá núj narque núj doj chrej sa' man soj, ne sa' doj canoco' soj Diose nan̄j adon̄j.

#### *Nana nihánj taj xna'an̄j se vaa cunuú 'ee rá ní' man cunudan̄j yuvií a*

<sup>11</sup> Me rá núj raquíj ma'an̄ Rej ní' Diose raquíj Jesucristó sij 'nij ra'a man ní' raquíj man núj cuchí' núj rihaan soj,

<sup>12</sup> ne ase vaa 'ee rá núj man soj ro', danj gaa cunuú 'ee ndo'o rá soj ni'yaj soj tinúú soj do', cunudan̄j yuvií do', qui'yaj síi 'nij ra'a man ní', rá núj a.

<sup>13</sup> Ndaa sij, gaa ne yo'o cunuú sa' nimán soj rihaan Rej ní' Diose gaa güii ca'na' uún Jesucristó sij 'nij ra'a man ní' rihaan chumií nihánj gaa cunudan̄j nij se-mozó so' síi guee, ne a 'ó cacun' se tumé soj vaa gaa man adon̄j.

## 4

#### *Nana nihánj taj xna'an̄j daj qui'yaj ní', ne ve'é cumán ní' ga nij tinúú ní' a*

<sup>1</sup> Yaj me se che'é se sij aj noco' man síi 'nij ra'a man ní' me nu' ní' ro', che'é dan cuano nihánj me cataj xna'an̄j núj rihaan soj se vaa doj a canoco' soj nu' tucuaán noco' soj tucuaán cuchruj núj rihaan soj gaa cataj núj daj qui'yaj soj gaa mán soj rihaan chumií nihánj gaa ne gaa niha' rá Diose ni'yaj Diose man soj, tinuj, nocoj.

<sup>2</sup> 'O se aj ne'en soj se vaa vaa doj nana cataj xna'an̄j núj rihaan soj che'é Jesucristó sij 'nij ra'a man ní' nan̄j á.

<sup>3</sup> 'O se nihánj me se vaa me rá Diose qui'yaj soj, ne dan me se me rá Diose guun soj síi sa' rihaan so', ne na'vej rá Diose cotoj nij snó'o ga náá guun chana ma'.

<sup>4</sup> Maan se ve'é qui'yaj 'o 'o snó'o, nan̄o' so' orún' chana xcaj so', ne ve'é qui'yaj snó'o rihaan Diose, ne ve'é qui'yaj so' rihaan chana uún a.

<sup>5</sup> Dan me se se guun canoco' soj tucuaán noco' nij yuvií ne ne'en man Diose ma'. Maan che'é se ve'é vaa chana rihaan nij so', ne uun rá nij so' xcaj nij so' man chana, tzaj ne ne acaj nij so' cuentá daj qui'yaj nij so' taj ya'an̄j nij so' man chana ma'.



<sup>6</sup> Sese cunō soj nanā nihánj, ne se guun soj síi tiha' yu'unj man tinúú ní' che'é chana' ma'. 'O se aj cataj ya núj rihaan soj se vaa qui'yaj síi 'nij ra'a man ní' sayuun man yuvií tiha' yu'unj man tinúú nanj adonj.

<sup>7</sup> Nuveé che'e se me rá Diose qui'yaj ní' cacun' me canacúún Diose man ní' ma'. Canacúún Diose man ní', tzaj ne che'é rej cunuū sa' nimán ní' rihaan Diose me canacúún Diose man ní' adonj.

<sup>8</sup> Che'é dan xcāj soj cuentá se vaa síi ri'íj yanj man nanā nihánj ro', nuveé se-nānā yuvií me ri'íj yanj so' ma'. Se-nānā Diose síi rquē Nimán cunuū nimán ní' me nanā ri'íj so' nanj adonj.

<sup>9</sup> Dan me se taj che'é cachron 'unj nanā rihaan yanj cartá nihánj cataj xna'anj 'unj rihaan soj se vaa nō xcúún soj gaa 'ee rá soj man tinúú soj ma'. 'O se ma'an Diose me síi tucuyón man soj se vaa qui'yaj soj danj adonj.

<sup>10</sup> 'O se danj inanj 'yaj ya soj nuu 'ee rá soj man nu' nij tinúú ní' síi man estadó Macedonia, tzaj ne inanj me rá núj narquē núj chrej man soj se vaa doj a cunuū 'ee rá soj man tinúú ní', tinuj, nocoj.

<sup>11</sup> Ne guun rá soj gaa dínj cumān soj, ne se tiguíj soj man soj rihaan se-suun tinúú soj ma'. Maan se ndāa se-suun 'o 'o soj qui'yaj suun soj á. Danj inanj vaa chrej narquē núj rihaan soj asij rquē á.

<sup>12</sup> Sese danj qui'yaj soj, ne nij síi ne amán rá ni'yaj man Jesucristó ro', cataj nij so' se vaa ve'é 'yaj soj ei. Ne se cachiin a doj rasuun man soj ma'. 'O se ma'an soj nano' rej cavii rasuun achiin man soj adonj.

### *Nanā nihánj taj xna'anj daj quirān' ní' asa' quisíj güii ca'na' uún Jesucristó rihaan chumií nihánj a*

<sup>13</sup> Me rá núj quene'en soj daj quirān' nij tinúú ní' nij síi noco' man Jesucristó nij síi cavi', tinuj, nocoj. Ne se quinanó rá soj che'é tinúú ní' síi cavi' ma'. Dan me se nij síi ne amán rá ni'yaj man Diose ro', nanó ndo'o rá nij so' che'é tuvi' nij so' síi cavi' che'é se taj se qui'yá' cavii sa' tuvi' nij so', rá nij so' a.

<sup>14</sup> Tzaj ne cuchumán ya rá ní' se vaa cavi' Jesucristó, ne cunuū i'na' uún so', qui'yaj Diose, ne che'é dan ne'en ní' se vaa xa' nij tinúú ní' síi cavi', tzaj ne che'é se cavi' Jesucristó che'é nij so' ro', che'é dan cunuū i'na' uún nij so', ne ca'na' uún nij so' ga so', qui'yaj Diose adonj.

<sup>15</sup> Nihánj me nanā cataj xna'anj ma'an síi 'nij ra'a man ní' rihaan núj, ne dan me se asa' quisíj güii ca'na' uún síi 'nij ra'a man ní' rihaan chumií nihánj, ne ní' sji gaa i'na' rihaan chumií nihánj ro', se quitáa yaan ní' rihaan nij síi cavi' ma'.

<sup>16</sup> 'O se caguaj ma'an síi 'nij ra'a man ní' gaa cavii so' rej xtā' nanij so' rihaan chumií nihánj, ne caguaj nij se-mozó Diose nij síi uun chij doj, ne ca'yanj se-mozó Diose xruún Diose chruun a'yánj, gaa ne nij tinúú ní' nij síi canoco' man Jesucristó nij síi cavi' me se asino nij so' cunuū i'na' a.

<sup>17</sup> Ne sese gaa i'na' ní' cayáán ní' rihaan chumií nihánj, ne nacaj nij se-mozó Diose man ní', ne cavii ní' rej xtā' raā ngaa ga nij síi cunuū i'na' uún, ne nari' tuvi' ní' ga síi 'nij ra'a man ní' rej xtā', gaa ne cayáán ní' ga síi 'nij ra'a man ní' nu' cavii nu' ca'anj nanj adonj.

<sup>18</sup> Nihánj me nanā cataj xna'anj soj rihaan tinúú soj, ne nari' nucuañ nimán 'o 'o soj, qui'yaj nanā nihánj ei.

## 5

*Nana nihánj taj xna'anj se vaa xcaj ní' cuentá daj qui'yaj ní' ndaa se quisij güii ca'na' uún Jesucristó a*

1 Taj che'é cachron núj nana rihaan yanj cartá nihánj cataj xna'anj núj rihaan soj me güii ca'na' uún Jesucristó, man tinuj, man nocoj.

2 'Q se aj ne'en ya soj se vaa ase vaa ne ne'en ní' me güii catuú sít ituu qui'yaj ituu so' ro', danj vaa ne ne'en ní' me güii ca'na' uún sít 'nij ra'a man ní' rihaan chumij nihánj a ma'.

3 Dan me se vaa güii cataj yuvij: "Yaj me se dínj vaa rihaan chumij, ne taj che'é kuchu'vi' ní' ma'", cataj nij yuvij a. 'Q se güii yo' me taj ni'yón ase vaa ran' chana' cuchruj ne'ej ro', danj gaa quiran' ndo'o nij yuvij sayuun, ne se quinanij nij so' ma'. 'Q se yuun che'e cutuna' nij so' nanj adonj.

4 Xa' soj, tzaj ne nuveé sij chéé rej rmi' ne acaj cuentá me soj, man tinuj, man nocoj. 'Q se güii ca'na' uún Jesucristó me se taj che'é kuchu'vi' soj ndaa vaa chu'vi' nij sít ne'en man sít ituu ma'.

5 Ino vaa soj rihaan nij sít ne amán rá ni'yaj man Jesucristó ei. Dan me se xa' soj, tzaj ne sij chéé ranga' man naán güii me soj, ne sij acaj sa' cuentá me soj uún, ne nuveé sij chéé rej rmi' do', rej nij do', me soj ma'. 'Q se sij chéé rej ranga' me soj ei.

6 Che'é dan se guun guun ní' sít otoj nda' rá se vaa 'yaj ta'aj nii ma'. 'Q se vaa che'é ni'yaj ranga' rlij rihaan ní' ei. Se canoco' ní' tucuáán noco' yo'ó nij yuvij mei. Tananj yo'o gaa ya'v'e ní', ne se gaa xno ní' mei.

7 Dan me se nij sít man rihaan chumij nihánj ro', sít vaj rej rmi' me nij so', ne taj se 'yá' xcaj nij so' cuentá ma'. Che'é dan ase vaa 'o sít otoj nu' do', ase vaa sít xno do', vaa nij so', ne ne ne'en nij so' daj 'yaj nij so' a ma'.

8 Xa' ní', tzaj ne sij vaj rej ranga' me ní', ne acaj ní' cuentá daj qui'yaj ní' nanj á. Dan me se yo'o gaa nucuaj rá ní' man sít 'nij ra'a man ní', ne gaa 'ee rá ní' man tinúú ní', ne ase vaa aráán rihaan nimán tanuu 'yaj aga' no rucuaa tanuu ro', danj gaa caráán rihaan nimán ní' a. Ne guun ya' rá ní' se vaa ya' cavi' sa' ní', ne ase vaa avii sa' tanuu 'yaj aga' nuu raa tanuu ro', danj gaa cavi' sa' ní' che'é se guun ya' rá ní' se vaa cavi' sa' ní' a.

9 Nuveé che'e se me rá Diose caxrij yuvaa Diose man ní' me cataj Diose se vaa canoco' ní' man so' ma'. 'Q se cataj Diose danj che'é se me rá Diose quinanij ní' rihaan sayuun ne cavi' sa' ní' che'é Jesucristó sij 'nij ra'a man ní' adonj.

10 Ne Jesucristó me sít cavi' che'é ní', ne che'é dan ca'vee se cavi' ní', ca'vee se gaa i'na' ní', tzaj ne cayáán rcua'aan cunudanj ní' ga' so' adonj.

11 Che'é dan ase vaa 'yaj soj cuano ro', danj inanj qui'yaj soj, raj a. Dan me se nago' soj nana sa' man tinúú soj, nari' nucuaj nimán tinúú soj, ne racuj soj man tinúú soj yan sa' doj canoco' nij tinuj nij soj man Diose á.

*Nana nihánj taj xna'anj se vaa nago' Pablo chrej man nu' nij sít noco' Diose a*

12 Cuano nihánj me cataj xna'anj núj rihaan soj se vaa caraa cochroj soj rihaan nij sít uun chij rihaan soj, tinuj, nocoj. Dan me se nij so' ro', me sít nicaj yu'unj man soj rihaan sít 'nij ra'a man ní', ne narqué nij so' chrej sa' man soj,

13 ne 'yaj suun ndo'o nij so' che'é soj, ne che'é dan gaa 'ee rá soj man nij so', ne caraa cochroj soj rihaan nij so' á. Ne ve'é cumán soj ga' tinúú soj á.

14 Ne cuano nihánj me cataj xna'anj núj rihaan soj se vaa nago' soj chrej nucuj man nij síi rmij se vaa qui'yaj suun nij so', tinuj, nocoj. Sese vaa 'o síi chu'vi' nimán, ne ca'mij soj nana sa' rihaan so', ne nari' nucuj nimán so', qui'yaj soj á. Raçuj soj man nij yuvij ninaj, ne gaa inaj nimán soj ni'yaj soj man cunudanj yuvij á. Se guun ca'maan ra'yanj rá soj ma'.

15 Tumé soj man soj se guun qui'yaj chi'ij yo'o tuvi' soj man síi 'yaj chi'ij man soj ma'. Maan se inanj suun sa' qui'yaj suun soj che'é tuvi' soj do', che'é cunudanj yuvij do' á.

16 Niganj gaa niha' rá soj,

17 ne se ca'ne' rá soj ga suun achín ni'yaj rihaan Diose mei.

18 Ne ca'vee se me ma'an sayuun quiran' soj, tzaj ne yo'o nago' soj gracia rihaan Diose á. Danj me rá Diose qui'yaj soj che'é se sij noco' man Jesucristó me soj adonj.

19 Se guun çaráan soj chrej rihaan Nimán Diose tucu'yón Nimán Diose nana sa' man soj ma'.

20 Se quiri'ij yanij soj man nana cataj xna'anj naca Nimán Diose rihaan soj ma'.

21 Tzaj ne xcaj soj cuentá daj vaa 'o 'o nana cunó soj, gaa ne quene'en soj sese ya nana ca'mii Nimán Diose me yo', ne sa' cunuú rá soj nu' nana sa' yo' á.

22 Ne a 'ó se nij se ca'vej rá soj qui'yaj soj ma'.

23 Diose ro', me síi naqui'yaj xej nimán ní', ne me rá núj cunuú sa' inanj nimán soj rihaan so', qui'yaj ma'an so', ne me rá núj tumé Diose man ma'an soj ndaa se quisij güii ca'na' uún Jesucristó sij 'nij ra'a man ní' rihaan chumij nihánj, ne dan me se me rá núj tumé Diose man nimán soj do', man nee man soj do', ne a 'ó cacun' se tumé soj a mei.

24 Dan me se Diose me síi nacúún man soj canoco' soj man so', ne vaa che'é gaa nucuj rá soj man so' se vaa tumé so' man soj adonj.

25 Ne cachinj ni'yaj soj rihaan Diose che'é núj, tinuj, nocoj.

26 Asa' nari' tuvi' soj ga tinúú ní' síi noco' man Diose, ne ve'é ca'mij soj ga nij so', ne go' soj 'o xto man nij so' rihaan Diose ei.

27 Maan che'é se sí'nij ra'a man ní' rqué suun manj, che'é dan me no xcúnj cataj xna'anj 'unj rihaan soj se vaa nayaá soj yanj cartá nihánj rihaan cunudanj nij tinúú ní' síi noco' man Diose ei.

28 Ne me rá núj qui'yaj ndo'o Jesucristó sij 'nij ra'a man ní' se luj che'é soj adonj.

## **Nihánj me síj vij yanj cartá qui'yaj síi cu'naj Pabló ca'néé so' rihaan nij yuvij noco' man Diose yanj chuman' cu'naj Tesalónica a**

<sup>1</sup> Síi cu'naj Pabló do', síi cu'naj Silvano do', síi cu'naj Timoteo do', me núj, ne 'yaj núj yanj cartá nihánj ca'nej núj rihaan nij soj síj yanj chuman' cu'naj Tesalónica sij noco' man Rej ní' Diose do', man Jesucristó sij 'nij ra'a man ní' do' a.

<sup>2</sup> Me rá núj qui'yaj Rej ní' Diose do', qui'yaj Jesucristó sij 'nij ra'a man ní' do', se luj che'é soj, ne me rá núj gaa xej nimán soj, qui'yaj roj so' a.

*Nana nihánj taj xna'anj se vaa ve'é noco' nij síi cuchumán rá ni'yaj man Jesucristó yanj chuman' Tesalónica man Diose a*

<sup>3</sup> Sa' uxrá doj canoco' nij soj man Diose, ne cunuu 'ee doj rá 'o 'o soj tinúú soj daj a güii, ne che'é dan no xcuún núj niganj nago' núj gracia rihaan Diose che'é soj, tinuj, nocoj.

<sup>4</sup> Ne ma'an núj nata' rihaan nij yuvij noco' man Diose yanj que'ee chuman' se vaa ve'é 'yaj soj, ne dan me se taj núj se vaa 'yaj ndo'o nii sayuun man soj, tzaj ne yo'o amán rá soj ni'yaj soj man Diose, ne 'o vaa sca' rá soj rihaan sayuun, ne yo'o noco' raan soj man Diose ei. Dan me se yo'o a'mii sca' ya ma'an núj che'é soj rihaan daj a nij síi noco' Diose yanj daj a chuman' se vaa uxrá táa ri'yunj nii man soj ne uxrá ran' soj sayuun, taj núj rihaan nij so' ei.

*Nana nihánj taj xna'anj che'é güii qui'yaj Diose sayuun man nij yuvij 'yaj sayuun man nij síi cuchumán rá ni'yaj man Jesucristó a*

<sup>5</sup> Che'é se vaa 'yaj soj, che'é dan ne'en ní' se vaa nica vaa nana cataj xna'anj Diose che'é soj a. Dan me se nuchruj raa Diose che'é soj, ne cataj xna'anj Diose se vaa ca'vee cayáan soj ga Diose asa' guun chij Diose rihaan chumij nihánj, ne che'é ma'an güii dan ran' soj sayuun nanj á.

<sup>6</sup> Dan me se ne'en ní' se vaa nica vaa rá Diose qui'yaj Diose sayuun man nij yuvij qui'yaj sayuun man soj,

<sup>7</sup> ne nica vaa rá Diose cataj xna'anj Diose se vaa navij güii ran' soj sayuun, ne naraan rá soj ga núj, ne veé danj naraan rá taran' ní' güii curuvj' uún Jesucristó sij 'nij ra'a man ní' do', curuvj' nij se-mozó so' síi nucuaj ndo'o do', curuvj' rej xta' rque 'o ya'an chuguun a.

<sup>8</sup> Ne qui'yaj Jesucristó sayuun man nij yuvij ne ne'en man Diose do', man nij yuvij na'vej rá cunó se-nana Jesucristó sij 'nij ra'a man ní' nana sa' do' a.

<sup>9</sup> Dan me se quiran' nij so' sayuun che'é cacun' qui'yaj nij so', ne dan me se rej yanj cumán nij so', cacaa nij so' nu' cavij nu' ca'anj a. Se quene'en nij so' man síi 'nij ra'a man ní' do', se quene'en nij so' se vaa ve'é ndo'o vaa so' do', yan nucuaj ndo'o so' do' ma'.

<sup>10</sup> 'Q se güii ca'na' uún síi 'nij ra'a man ní' rihaan chumij nihánj me se cataj nij síi sa' noco' man so' se vaa ve'é ndo'o vaa so', ne sa' uxrá vaa nu' se vaa qui'yaj so' a. 'Q se cuchumán ya rá soj cunó soj nana nata' núj rihaan soj ei.

*Nana nihánj taj xna'anj se vaa achín ni'yaj Pabló rihaan Diose se vaa racúj Diose man nij síi cuchumán rá ni'yaj man Jesucristó a*

<sup>1</sup> Che'é dan niganj achíin ni'yaj núj rihaan Diose che'é soj se vaa ca'vee quisij soj guun soj nu' ndaa vaa me rá Diose guun soj gaa canacúun Diose man soj canoco' soj man so' a. Ne achíin ni'yaj núj se vaa racují ndo'o Diose man soj qui'yaj suun soj nu' suun sa' me rá soj qui'yaj suun soj, che'é se sij amán rá ni'yaj man Jesucristó me soj a.

<sup>2</sup> Dan me se ndaa sij, gaa ne ca'vee cavii sa' doj Jesucristó sij 'nij ra'a man ní' ni'yaj yuvii che'é se vaa qui'yaj ma'an soj, ne cavii sa' ma'an soj ni'yaj yuvii che'é se sij noco' man Jesucristó me soj a. Danj inanj me se luj me rá Diose síi noco' ní' man do', Jesucristó sij 'nij ra'a man ní' do', qui'yaj roj so' che'é soj adonj.

## 2

### *Nana nihánj taj xna'anj che'é síi chi'ii ca'na' rihaan chumii a*

<sup>1</sup> Dan me se aj ne'en soj se vaa ca'na' uún Jesucristó sij 'nij ra'a man ní', ne cunu chre' ní' ga so', tinuj, nocoj. Che'é dan cataj xna'anj núj rihaan soj cuano

<sup>2</sup> se vaa se guun vij ra'yanj rá soj ma'. Se caráya'anj soj nana cuno soj se vaa aj quisij güii ca'na' uún Jesucristó rihaan chumii ma'. Nuveé nana ya me nana yo' ma'. Ca'vee se nana ca'mii Nimán Diose me yo' taj nii, ca'vee se danj a'mii 'o síi a'mii natáj taj nii, ca'vee se nana cachrón núj rihaan 'o yanj cartá me yo' taj nii, tzaj ne taj se 'yaj ma'. 'Q se ataa quisij güii ca'na' uún Jesucristó adonj.

<sup>3</sup> Dan me se na'vej uxrá raj tiha' yu'unj nii a doj man soj a mei. Dan me se asino tucua j yuvii rihaan Diose, ne ca'na' yo'o síi chi'ii rihaan chumii, ne síi se ca'vej rá cuno rihaan Diose guun so' a. Dan me se xa' so', tzaj ne sij aj cacaa guun so' vaa güii ei.

<sup>4</sup> Dan me se quinachrí' so' man cunudanj ya'anj, ne a 'ó rasuun se ca'vej rá so' na'vij yuvii rihaan ma'. Dan me se catuu ma'an so' nuvíi noco çayáan so' rej na'vij yuvii rihaan Diose, gaa ne ca'mii ne so' cataj so' se vaa ma'an so' me Diose á.

<sup>5</sup> Sese na'núj rá soj, ne nu' nana nihánj me nana cataj xna'anj 'unj rihaan soj asij rque doj gaa cayáan 'unj ga soj ei.

<sup>6</sup> Ne aj ne'en soj me rasuun aráan chrej rihaan síi chi'ii yo', se vaa se ca'vee ca'na' so' cuano ma'. Dan me se caráan chrej rihaan so' ndaa se quisij güii cachrón Diose ca'na' so', gaa ne ca'na' so' adonj.

<sup>7</sup> Cuanó nihánj me se uun ndo'o cacun', tzaj ne ataa quene'en ní' daj gaa nu' cacun' qui'yaj síi chi'ii yo' ei. Ne xa' síi aráan chrej ca'na' síi chi'ii, tzaj ne vaa güii naxuun so' man ma'an so',

<sup>8</sup> gaa ne ca'na' síi chi'ii yo' síi na'vej rá cuno rihaan Diose, gaa ne quene'en ní' daj guun ei. Tzaj ne asa' ca'na' Jesucristó sij 'nij ra'a man ní', ne ca'yanj uun so' man síi chi'ii yo', ne quirj' nu' so' adonj.

<sup>9</sup> Síi chree síi cu'naj Satanás me síi qui'yaj ca'na' síi chi'ii yo', ne ma'an síi chree qui'yaj guun nucaj síi chi'ii yo' qui'yaj ndo'o so' suun noco ni'yaj yuvii, che'é yan tiha' yu'unj so' man nij yuvii a.

<sup>10</sup> Ne nu' se chi'ii ndo'o qui'yaj so', tiha' yu'unj so' man nij yuvii ca'anj cacaa nu' cavii nu' ca'anj a. Ne nij yuvii yo' me se nuveé yuvii aran' rá cuno nana ya nana qui'yaj quinanjij nij so' rihaan sayuun me nij so' ma'.

<sup>11</sup> Che'é dan ma'an Diose qui'yaj cuchuman rá nij so' nana ne, ne canoco' nij so' chrej tiha' yu'unj, qui'yaj Diose adonj.

<sup>12</sup> Dənj inənj qui'yaj Diose gə cunudənj nij yuvi ne cuchuman rá nana ya, ne inənj chrej chi'ij niha' rá nij so' canoco' nij so' adonj.

*Nana nihánj taj xna'anj se vaa narij Diose man ní' canoco' ní' man so' a*

<sup>13</sup> Tzaj ne no xcúun núj niganj nago' núj graciá rihaan Diose che'é soj sij 'ee rá sí' 'nij ra'a man ní' man, tinuj, nocoj. 'O se narij Diose man soj cunu sa' soj qui'yaj Nimán Diose, ne cuchuman rá soj cunə soj nana ya, ne quitaj yaan soj rihaan yo'ó nij sí cavij sa' nu' cavij nu' ca'anj adonj.

<sup>14</sup> Dan me se gaa nata' núj se-nana Diose nana sa' rihaan soj, ne canacúun Diose man soj se vaa cavij sa' soj ga so', ne che'é dan daj se ve'é ndo'o vaa Jesucristó sij 'nij ra'a man ní' ro', danj gaa soj uún adonj.

<sup>15</sup> Che'é dan canoco' raan soj tucuáan cuchruj núj rihaan soj gaa ca'mii núj ga soj do', gaa qui'yaj núj yanj cartá ca'née núj rihaan soj do' ei.

<sup>16-17</sup> Ne me rá núj quinarij' nucuaj nimán soj, qui'yaj ma'an Jesucristó sij 'nij ra'a man ní' do', Rej ní' Diose do' a. Ne Diose ro', me sí' 'ee rá man ní', ne qui'yaj ndo'o so' se luj ga ní' se vaa naquiyaj nucuaj so' nimán ní' nu' cavij nu' ca'anj, ne guun ya rá ní' se vaa cavij sa' ní', qui'yaj uún so' ei. Ne me rá núj guun nucuaj soj qui'yaj suun soj nu' suun sa', ne ca'mii soj nu' nana sa', qui'yaj Diose adonj.

### 3

*Nana nihánj taj xna'anj se vaa cachinj ni'yaj nij sí' cuchumán rá ni'yaj man Jesucristó rihaan Diose che'é sí' cu'naj Pabló a*

<sup>1</sup> Dan me se vaa yo'ó nana me rá núj ca'ne'j núj rihaan soj, tinuj, nocoj. Ne me rá núj cachinj ni'yaj soj rihaan Diose se vaa xna'anj uxrá se-nana sí' 'nij ra'a man ní', ne cavij sa' nana yo' rej cunə yo'ó yuvi nana yo', nda vaa cavij sa' nana yo' gaa cuno ma'an soj nana yo' a.

<sup>2</sup> Ne cachinj ni'yaj soj che'é núj se vaa quinani'j núj rihaan nij sí' chi'ij uún á. 'O se vaa yuvi ne amán rá ni'yaj man Jesucristó a man adonj.

*Nana nihánj taj xna'anj se vaa vaa che'é gaa nucuaj rá ní' man sí' 'nij ra'a man ní' a*

<sup>3</sup> 'O se sí' sa' ndo'o me sí' 'nij ra'a man ní', ne vaa che'é ndo'o gaa nucuaj rá ní' man so', ne so' me sí' qui'yaj narij' nucuaj rá soj, ne tumé so' man soj se vaa se qui'yaj canaán sí' chrej rihaan soj adonj.

<sup>4</sup> Ne nucuaj rá núj man sí' 'nij ra'a man ní' se vaa yo'o 'yaj ya soj nu' se vaa cataj núj rihaan soj, ne dan me se ve'é 'o danj ya qui'yaj soj ei.

<sup>5</sup> Ne me rá núj se vaa ra'cu'j sí' 'nij ra'a man ní' man ma'an soj daj qui'yaj soj, caraə cochroj soj rihaan Diose, ne yo'o canoco' soj man Diose nda vaa qui'yaj ma'an Jesucristó, ne se ca'ne' rá soj ga suun 'yaj danj ma'.

*Nana nihánj taj xna'anj se vaa se gaa rmij ní' ma'*

<sup>6</sup> Ne che'é se sij noco' man sí' 'nij ra'a man ní' me nu' ní', ne che'é dan cataj xna'anj 'unj yo'ó nana rihaan soj, tinuj, nocoj. Dan me se guun yanj soj rihaan nu' nij tinúú ní' nij sí' noco' chrej rmij na'vej rá qui'yaj suun ei. 'O se sij ne noco' tucuáan narqué núj rihaan me nij so' nanj adonj.

<sup>7</sup> 'O se aj ne'en soj se vaa no xcúun soj qui'yaj soj nda vaa qui'yaj núj gaa cayáan núj ga soj, ne dan me se ne vaa rmij núj gaa cane núj ga soj ma'.

<sup>8</sup> Ne ne cha uun núj chraa rihaan soj ma'. 'O se nu' se chá núj naru'vee núj sa'anj rihaan soj adonj. Tzaj ne 'o se nu'ij nigan' qui'yaj suun uxrá núj quirj' núj chá núj, ne ne qui'yaj suun soj che'é núj, qui'yaj núj ma'.

<sup>9</sup> Dan me se sese guun rá núj cachinj núj se chá rihaan soj, ne cunó xcúún núj qui'yaj núj danj, tzaj ne ne ca'vej rá núj qui'yaj núj danj ma'. Maan se guun rá núj cuchruj núj tucuáán rihaan soj đaj qui'yaj ma'an soj adonj.

<sup>10</sup> 'O se gaa cayáán núj ga soj, ne tananj nata' núj nana nihánj rihaan soj ca'mij soj a: "sese vaa 'o síi na'vej rá qui'yaj suun, ne se chá so' chraa ma'", taj núj rihaan soj adonj.

<sup>11</sup> Aj cuchi' nana rihaan núj se vaa ta'aj síi rmij 'nij sca'núj soj, ne nij so' me se na'vej rá nij so' qui'yaj suun nij so', tzaj ne na'néé rma'an nij so' nana rihaan tuvi' nij so' a.

<sup>12</sup> Che'é Jesucristó sji 'nij ra'a man ní' a'ne' núj suun cuano rihaan yuvij 'yaj danj, se vaa dínj gaa tu'va nij so', ne qui'yaj suun nij so', ne inanj se chá qui'yaj canaán ma'an nij so' chá nij so' á.

<sup>13</sup> Ne xa' ma'an soj, tzaj ne se ca'ne' rá soj qui'yaj suun soj suun sa', man tinuj, man nocoj.

<sup>14</sup> Sese yo'o tuvi' soj na'vej rá cunó nana cachron núj rihaan yanj nihánj, ne xcax soj cuentá me síi na'vej rá cunó nana, ne se cayáán rcua'aan soj ga so' ma'. Ndaa síj, gaa ne guun na'aj so' a.

<sup>15</sup> Tzaj ne se nachri' soj ni'yaj soj man síi rmij yo' ma'. Tananj ve'é qui'yaj soj, nago' soj chrej nucaj man so' á. 'O se tinúú soj me so' adonj.

*Nana nihánj taj xna'anj se vaa ve'é cumán nij síi cuchumán rá ni'yaj man Jesucristó yo', rá síi cu'naj Pabló a*

<sup>16</sup> Orún' síi 'nij ra'a man ní' ne'en qui'yaj gaa xej nimán ní', ne me rá núj qui'yaj so' danj che'é soj nu' güii a. Ne ca'vee se me ma'an sayuun quiran' soj, tzaj ne dínj gaa nimán soj, qui'yaj so' á. Ne me rá núj cayáán síi 'nij ra'a man ní' ga taran' soj adonj.

<sup>17</sup> Ma'anj sji cu'naj Pabló ra'aj achronj nana nihánj se vaa ve'é cumán soj raj a. Danj inanj 'yaá 'unj doj nana rihaan cunudanj nij yanj cartá a'néé 'unj, ne nanj vaa letrá achronj a.

<sup>18</sup> Me rá núj qui'yaj ndo'o Jesucristó sji 'nij ra'a man ní' se luj che'é cunudanj soj adonj.

## Nihánj me 'o yanj cartá qui'yaj síi cu'naj Pabló ca'néé so' rihaan síi cu'naj Timoteo a

<sup>1</sup>'Unj nihánj me síi cu'naj Pabló síi uun apóstol síi nata' se-nanā Jesucristó rihaan yuvij a. Yo' me suun ca'ne' Diose dō', Jesucristó dō', rihanj, ne Diose me síi tinanii man ní' rihaan sayuun, ne guun ya rá ní' se vaa cavii sa' ní' qui'yaj Jesucristó adonj.

<sup>2</sup>'Yáa 'unj yanj cartá nihánj ca'nej 'unj rihaan so' sij cu'naj Timoteo a. Dan me se tihaán 'unj se-nanā Diose rihaan so', ne cuchumán rá so' nanā yo', ne che'é dan ase vaa 'o ta'nij ro', danj vaa yá so' rihanj ei.

Me rá 'unj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é so', ne gaa 'ee rá roj so' mán so', ne gaa xej nimán so', qui'yaj roj so', raj a.

### *Nanā nihánj taj xna'anj che'é nij síi tucu'yón tucuáán ne a*

<sup>3</sup>Dan me se aj ne'én so' se vaa gaa ataa ca'anj 'unj estadó Macedonia, ne cataj xna'anj 'unj rihaan so' se vaa cané so' chuman' Efeso á. Dan me se me rá 'unj cataj xna'anj so' rihaan ta'aj nij síi man Efeso se vaa se tucu'yón nij so' tucuáán ne rihaan nij tinúú ní' mei.

<sup>4</sup>Dan me se cataj so' rihaan nij tinúú ní', ne a se cuta' xrej nij so' cuentó yo' ma'. 'O se cuentó man gaa naá dō', cuentó che'é daj vaa daj a xii nij so' man gaa naá dō', me yo' ei. 'O se a'mii unu' uxrá yuvij che'é nanā yo', tzaj ne ne racuij nanā yo' man ní' canoco' ní' man Diose ma'. 'O se me rá Diose gaa nucuaj rá ní' man ma'an Diose ei.

<sup>5</sup>'O se che'é suun a'né' 'unj rihaan so' me se a'né' 'unj suun yo' rihaan so' che'é rej gaa 'ee rá ní' tuvi' ní' ndaa nimán ya ya ní' ndaa vaa cuchumán ya rá ní' ni'yaj ní' man Jesucristó ei.

<sup>6</sup>Dan me se vaa ta'aj nij yuvij, ne ta'aa nij so' yo'ó chrej a'mii nij so', ne dan me se ri' rma'an tiempó, 'yaj nij so', a'mii nij so' che'é yo'ó tucuáán ei.

<sup>7</sup>'O se me rá nij so' guun nij so' maestró tucu'yón se-tucuanj Moisés, tzaj ne na'vee ran' nij so' a ma'. A ma'an nij so' ne ne'en nanā tucu'yón nij so' a mei.

### *Nanā nihánj taj xna'anj se vaa inanj che'é nij síi 'yaj cacun' vaa se-tucuanj Moisés a*

<sup>8</sup>Ne'en ní' se vaa sa' vaa se-tucuanj Moisés, ne cataj Diose rihaan Moisés daj qui'yaj nij yuvij israelitá canoco' nij so' man Diose, tzaj ne xcaj ní' cuentá me che'é me ca'mii Diose danj á.

<sup>9</sup>Ne'en ní' se vaa xa' yuvij nicā nimán, tzaj ne taj tucuáán achiin man yuvij nicā nimán canoco' nij so' Diose ma'. 'O se ma'an Diose uun chij nimán nij so' daj gaa qui'yaj nij so' nanj á. Maan se che'é nij yuvij 'yaj cacun' dō', yuvij na'vej rá canoco' Diose dō', yuvij a'mii nanā nij che'é Diose dō', yuvij ticavi' rej dō', yuvij ticavi' nii dō',

<sup>10</sup>síi 'yaj cacun' ga yo'ó chana dō', chii chana dō', síi otoj ga chii chana dō', yuvij tu'vej man tuvi' dō', yuvij a'mii nanā ne dō', yuvij na'vej rá cunō nanā ya dō', me cuchruj Diose se-tucuanj Moisés adonj.

<sup>11</sup>Inanj danj a'mii se-nanā Diose nanā sa' che'é se-tucuanj Moisés, ne 'unj me síi cune' Diose nata' nanā yo' rihaan yuvij se vaa ve'é uxrá yáán Diose, ne guun chij so' nu' cavii nu' ca'anj ei.



*Nana nihánj taj xna'anj se vaa cunuu 'ee ndo'o rá Jesucristó man síi cu'naj Pabló, ne 'ee ndo'o rá Jesucristó man cunudanj ní' sij noco' man so' uún a*

<sup>12</sup> Nagó' 'unj graciá rihaan Jesucristó sij 'nij ra'a man ní' che'é se guun nucuáá 'unj qui'yaj suun 'unj, qui'yaj so' a. Dan me se nucuaj rá so' mán 'unj, ne cune' so' mán 'unj qui'yaj suun 'unj rihaan so' adonj.

<sup>13</sup> Asino yaan me se nij uxrá ca'mii 'unj che'é Jesucristó, ne qui'yaj ndo'o 'unj sayuun man so', ne ca'mii xta' 'unj ni'yaj 'unj man so', tzaj ne quene'en Jesucristó se vaa che'é se ne quene'en yá 'unj daj vaa so' ro', che'é dan ne cuchuman rá 'unj ni'yaj 'unj man so' a. Tzaj ne cunuu 'ee rá Jesucristó manj, ne ne qui'yaj so' sayuun manj ma'.

<sup>14</sup> Tananj sa' uxrá qui'yaj uun Jesucristó sij 'nij ra'a man ní' manj, se vaa cuchuman rá 'unj ni'yaj 'unj man so', ne cunuu 'ee raj tuvij, qui'yaj so' adonj.

<sup>15</sup> Dan me se ya uxrá vaa nana nihánj, ne taran' ní' nq xcuún cunq nana nihánj se vaa me rá Jesucristó tinanii so' man nij yuvij rihaan chrej chi'ii uun chij nimán nij so', ne na'vej rá so' quiran' nij so' sayuun ma'. Che'é dan ca'na' so' rihaan chumij nihánj ei. Dan me se noco'oj doj cacun' qui'yáá 'unj rihaan cacun' qui'yaj taran' yo'ó nij yuvij,

<sup>16</sup> tzaj ne cunuu 'ee rá Jesucristó ni'yaj so' manj, che'é se guun rá Jesucristó se vaa xcaj yo'ó nij síi cuchuman rá ni'yaj man so' cuentá se vaa canoco' nij so' man Jesucristó, ne x'nee cacun' xráá nij so', ne ca'vee cayáán nij so' ga' so' nu' cavii nu' ca'anj ei.

<sup>17</sup> Nu' cavii nu' ca'anj cataj ní' se vaa sa' uxrá vaa Diose, ne so' me síi guun chij nu' cavii nu' ca'anj, ne daj chihaa mij se cavi' so' ma'. Ne ruvi' so' ni'yaj yuvij ma'. Taj vaj 'ó Diose ma'. Orún' so' me Diose ya adonj. Veé danj gaa ya ei.

<sup>18-19</sup> Timoteo. Ase vaa ta'nii ya ma'anj vaa yá so' ei. Dan me se a'ne' yá 'unj suun rihaan so' yo'ó ca'mii cunu' sa' yá so' che'é chrej sa' ya nihánj ei. Daj chihaa mij se ca'ne' rá so' ma'. Tzaj ne yo'ó gaa nica' nimán so', ne yo'ó gaa nucuaj rá so' cuchuman rá so', gaa ne quisij ya ndaa vaa ya ca'mii nij síi naruvi' Diose rihaan che'é so' ei. Dan me se vaa ta'aj nij síi quiri' rá, ne ne cuchuman ya rá nij so' ma'.

<sup>20</sup> Dan me se vij tuvi' nij so' me roj síi cu'naj Himeneo ga' Alejandro síi ca'mii nij che'é Diose a. Dan me se nago' yá 'unj man roj so' ra'a Satanás, gaa ne ri' rá roj so', gaa ne xcaj roj so' cuentá, ne yuún che'e me se se ca'mii nij roj so' che'é Diose ma'.

## 2

*Nana nihánj taj xna'anj se vaa cachinj ni'yaj ní' rihaan Diose che'é cunudanj yuvij a*

<sup>1</sup> Nihánj me se asino yaan a'ne' 'unj suun rihaan nij soj se vaa cachinj ni'yaj soj rihaan Diose che'é cunudanj yuvij, ne nago' soj graciá rihaan Diose che'é cunudanj nij yuvij,

<sup>2</sup> ne cachinj ni'yaj soj che'é cunudanj nij síi nica' suun, gaa ne gaa dínj cayáán ní' rihaan chumij nihánj, ne ve'é qui'yaj ní', canoco' ní' man Diose á.

<sup>3</sup> Sa' uxrá vaa sese danj qui'yaj ní' ni'yaj Diose, ne aj ne'en soj se vaa Diose me síi 'yaj avii sa' ní' ei.

<sup>4</sup> Me rá Diose racuj Diose man cunudanj yuvij, che'é rej cavii sa' cunudanj yuvij, ne me rá Diose nari' cunudanj yuvij nana ya ei.

<sup>5</sup>Q se ɔruun Diose, ne ɔruun 'o snó'o cataj xna'anj rihaan ní' daj vaa Diose, ne so' me sí racuǐj man yuvij cunu sa' yuvij rihaan Diose, ne yo'ɔ snó'o cu'naj Jesucristó me sí qui'yaj danj ei.

<sup>6</sup>Ne Jesucristó me se ca'ne' rá so' cavi' so' che'é cunudanj yuvij, ne nanij nij yuvij rihaan sayuun a. Dan me se cachrón Diose güii cavi' Jesucristó, ne güii dan cavi' Jesucristó, ne tihaan Jesucristó se vaa me uxrá rá Diose cavi' sa' cunudanj yuvij a.

<sup>7</sup>Ne cune' Diose mán 'unj guún 'unj apóstol nata' rihaan yuvij se vaa me rá Diose cavi' sa' nij yuvij, tzaj ne ne tucu'yón 'unj man nij yuvij israelitá ma'. Maan se inañj nij yuvij yanij tucu'yón 'unj daj qui'yaj nij so', se vaa cuchuman rá nij so' ni'yaj nij so' man Diose, ne cunɔ nij so' nana ya ca'mii Diose, taj 'unj rihaan nij so' adonj. Xa' nana nihánj, tzaj ne nana ya uxrá me nana nihánj, ne ne a'mii ne 'unj ma'.

<sup>8</sup>Dan me se gaa nuu chre' soj sij amán rá ni'yaj man Jesucristó, ne me rá 'unj cachinj ni'yaj nij snó'o rihaan Diose, ne naxcaj ra'a nij so' rej xta' cachinj ni'yaj nij so' rihaan Diose, ne yo'ɔ guun rá nij so' se vaa ve'é canoco' nij so' man Diose, ne se ca'maan rá nij so' do', se canó tuvi' nij so' do', se ca'mii cunu' nij so' do', 'o se sa' inañj cachinj ni'yaj nij so' nanj adonj.

*Nana nihánj taj xna'anj daj qui'yaj chana cuchumán rá ni'yaj man Jesucristó a*

<sup>9</sup>Ne xa' chana, tzaj ne se guun rá chana cunuú chana yatzíj sa' ndo'o vaa ma'. Maan se ve'é qui'yaj chana caráán chana nee man chana, gaa ne cataj nii se vaa chana sa' me no' ei. Tzaj ne se caxrij chana que'ee quitzi' yuvé raa chana do', se toco' chana que'ee caquí xréé chana do', se ca'née chana ticuu gaán chihá no' do' ma'.

<sup>10</sup>Tzaj ne qui'yaj suun chana racuǐj chana man yuvij, ne quene'en nii se vaa ya vaa nana a'mii chana yo', se vaa noco' no' man Diose adonj.

<sup>11</sup>Ve'é cunɔ chana gaa tucu'yón nii nana sa' man no' á.

<sup>12</sup>Se ca'vee tucu'yón chana man snó'o ma'. Se guun guun chij chana rihaan snó'o ma'. Maan se dínj gaa tu'va chana adonj.

<sup>13</sup>Dan me se gaa guun che'e chumij, ne asino qui'yaj Diose man snó'o cu'naj Adán, gaa ne qui'yaj Diose man chana cu'naj Eva adonj.

<sup>14</sup>Ne tiha' yu'unj sí chree man sí cu'naj Adán ma'. Tzaj ne chana tiha' yu'unj so', ne qui'yaj no' cacun' rihaan Diose, qui'yaj sí chree adonj. Che'é dan se guun chij chana rihaan snó'o ma'.

<sup>15</sup>Tzaj ne cavi' sa' nij chana che'é se cunu se uun nij chana se vaa cuchruj chana ne'ej adonj. Danj gaa cavi' sa' chana, sese cuchuman rá chana ni'yaj chana man Diose do', sese cunu 'ee rá chana tuvi' chana do', sese cunɔ chana se-nana Diose do', sese tumé chana man ma'an chana daj qui'yaj no' do' adonj.

### 3

*Nana nihánj taj xna'anj daj gaa nij snó'o guun sí chij nicaj yu'unj man nij yuvij noco' man Diose a*

<sup>1</sup>Ya vaa nana nihánj ei. Sese me rá yo'ɔ so' guun so' sí chij nicaj yu'unj man nij yuvij noco' man Diose, ne sa' vaa suun me rá so' caṭa so' ei.

<sup>2-3</sup>Che'é dan inañj snó'o ne a'mii chree nii che'é guun sí chij nicaj yu'unj man nij yuvij noco' man Diose á. Qrún' nica so' nica so', ne sí chij vaa rá guun so', ne sí a'mii nica inañj guun so', ne sí aráj cochroj do', sí aráj x'naa

do', sí 'yaj se luj rihaan taran' yuvij do', sí yo'o a'néé nimán raču'j man yuvij do', sí aran' rá caran' yuvij tucua do', sí ne'en t̄haan sa' man yuvij do', sí ne aran' rá gaa xno do', sí ne aran' rá cunu' ga yuvij do', sí se guun rá gaa que'eē uxrá si'yaj do', guun so' ei.

<sup>4</sup>Maan se yan gaa so' me se inanj sí tumé sa' uxrá tucua guun chij do', yan ve'é uxrá cunō ta'níi so' rihaan so' do', se tucuaá nij xnii rihaan so' do' adonj.

<sup>5</sup>Q se sese ne ne'en so' guun chij so' rihaan tucua so', ne asa' ca'vee cutumé so' man cunudanj nij yuvij noco' man Diose ga.

<sup>6</sup>Sese sí noco' naca se-tucuanj Diose me yo'o so', ne se gaa nanj ca'mii so' ne quiran' so' sayuun ga sí chree se vaa cacaa so', qui'yaj Diose ei.

<sup>7</sup>Tananj uún, ne chij gaa rá so' ga nij yuvij ne noco' man Jesucristó, gaa ne xcaj nij so' cuentá se vaa ya chij a'mii sí nicaj yu'unj man nij sí noco' man Jesucristó, gaa ya rá nij so' a. 'Q se danj qui'yaj sí me rá quinicaj yu'unj man nij sí noco' man Jesucristó, gaa ne se gaa nanj tihá' yu'unj sí chree man so' ei.

*Nana nihánj taj xna'anj daj gaa nij snó'o do', nij chana do', guun diácono a*

<sup>8</sup>Ne veé danj gaa guee nij sí guun diácono uún, ne sí ni'yanj guun nij so' á. Se ca'mii nij so' nana tihá' yu'unj mei. Se gaa niha' rá nij so' co'o ndo'o nij so' na vinó mei. Se tihá' yu'unj nij so' man yuvij ca'neē uun nij so' sa'anj mei.

<sup>9</sup>Canoco' raan nij so' nana tucu'yón Diose man ní' á. Se guun vj rá nij so' ma'.

<sup>10</sup>'Q se asino xcaj nii cuentá ni'yaj nii man nij so' sese taj cacun' tumé nij so', gaa ne ca'vee guun nij so' diácono ei.

<sup>11</sup>Veé danj gaa guee nij chana me rá guun diácono, ne chij gaa rá nij no' do', chij ca'mii nij no' rihaan nij yuvij do', se gaa ne nij no' do', se guun xno nij no' do', yo'o ve'é qui'yaj nij no' daj a rasuun do' ei.

<sup>12</sup>Xa' nij sí guun diácono, tzaj ne orún' nica' nij so' nicaj nij so' do', sa' cutumé nij so' man ta'níi nij so' do', sa' cutumé nij so' man nu' nij tucua' nij so' do' ei.

<sup>13</sup>Ne sese sa' 'yaj nij so' nu' suun vaa rihaan nij so', ne sí sa' me nij so', cataj nij yuvij noco' man Diose, ne se cuchu'vi' nij so' cataj xna'anj nij so' daj qui'yaj ní' canoco' ní' man Jesucristó ma'.

*Nana nihánj taj xna'anj se vaa sa' uxrá vaa nana cataj xna'anj Diose rihaan ní' nana canoco' ní' a*

<sup>14</sup>Dan me se cachrón 'unj nana nihánj rihaan yanj nihánj, ne ca'nej 'unj rihaan so' á. Tzaj ne me ndo'o rá 'unj cuchí' 'unj rihaan so' rque doj güii ei.

<sup>15</sup>Tzaj ne asa' ne cuchí' ra'yanj 'unj, ne taj se 'yaj mei. Aj ne'én so' daj qui'yaj soj sij noco' man Diose gaa yáan soj ga tinuu soj ei. 'Q se tucua' Diose me ma'an cunudanj soj sij noco' man Diose sí vaa i'na' ya ei. Che'é ma'an soj me se acaj yuvij cuentá se vaa ya vaa se-nana Diose ne ma'an soj me sí nicaj nana ya ei.

<sup>16</sup>Ne'en cunudanj ní' sij amán rá ni'yaj man Jesucristó se vaa sa' uxrá vaa nana cataj xna'anj Diose rihaan ní' nana canoco' ní', ne nihánj me nana yo' a: "Ca'na' Jesucristó a. Curuvi' so' ni'yaj yuvij a. Guun so' yuvij a. Ve'é ndo'o qui'yaj so', cataj Nimán Diose, ne quene'en rihaan nij se-mozó Diose daj qui'yaj so' a. Dan me se nata' nii che'é so' rihaan nij yuvij yanj yuvij ne noco' se-nana Diose, ne cuchumán rá ta'aj nij so' quene'en nij so' man so' a. Ne quinan' so' xta', qui'yaj Diose, ne ve'é ndo'o yáan so' rej xta' cuano adonj". Dan me nana noco' ní' a.

## 4

*Nana nihánj taj xna'anj se vaa cunq ta'aj yuvij se-nana nij sí ne, gaa ne quiri'ij nij yuvij se-tucuanj Diose a*

<sup>1</sup> Tzaj ne taj xna'anj Nimán Diose se vaa vaa güii, ne quiri'ij ta'aj yuvij se-tucuanj Diose, ne canocó' nij so' yo'ó tucuaán, ne cunq nij so' nana tiha' yu'unj nana tucu'yón nij nana chree adonj.

<sup>2</sup> Dan me se cuchuman rá nij so' nana ca'mij sí taj a'mii sa' tu'va rma'an ei. Ne sí ne ndo'o me nij so' ei. Ne xa' nij sí ne yo', tzaj ne a'mii rma'an nij so', ne nimán nij so' me se nda' rá se vaa táa yaan cavi' i'na' ro', vaa táa yaan chi'ij nimán nij so' a.

<sup>3</sup> Ne tucu'yón nij sí ne rihaan yuvij se vaa se ca'vee xcaj yuvij chana, ne cacun' me yo', taj nij so' a. Ne tucu'yón nij so' se vaa se ca'vee cha yuvij náa guun rasuun uún a. Tzaj ne 'o se nu' nij rasuun man rihaan yo'ó me se rasuun chá nago' gracia rihaan Diose me yo', rá Diose, don araa so' rasuun yo' rihaan yo'ó che'é nij sí man raá nana ya ei.

<sup>4</sup> Dan me se nu' rasuun qui'yaj Diose me se sa', ne ne nó xcúun ní' nachri' ní' ni'yaj ní' man se vaa qui'yaj Diose che'é ní' ma'. Maan se nijaj ní' man yo', ne nago' ní' gracia rihaan Diose che'é rasuun yo' cha ní' ei.

<sup>5</sup> Ne'en ní' daj taj se-nana Diose, ne che'é dan ne'en ní' se vaa sese cachinj ni'yaj ní' asino yaan rihaan Diose, ne Diose me sí naqui'yaj sa' yo' cha ní' ei.

*Nana nihánj taj xna'anj se vaa ve'é qui'yaj suun Timoteo suun ca'ne' Diose rihaan so' a*

<sup>6</sup> Sese tucu'yón so' nana nihánj rihaan yo'ó nij tinúu ní' sí nocó' man Jesucristó, ne sí ve'é 'yaj suun rihaan Jesucristó mé so', ne sí ve'é nari' nu' nana nocó' ní' mé so' chuguanj. 'Q se tucu'yón nii nana sa' yo' rihaan so', ne cuchuman rá so', ne canocó' so' nana yo', ne che'é dan guun nucaá so' tucu'yón so' nana yo' rihaan tinúu ní' a.

<sup>7</sup> Se cunó so' cuentó nata' yuvij cuentó ne ya a'mii che'é Diose ma'. 'Q se nana snúu rma'an me nana yo' nanj á. Tzaj ne tucu'yón so' daj qui'yáa so', ne ve'é doj canocó' so' se-tucuanj Diose á.

<sup>8</sup> Nda' se vaa yu'vee nó suun 'yaj suun nee man ní', tzaj ne vaa doj yu'vee nó nimán ní', canocó' nimán ní' man Diose ei. Che'é suun 'yaj suun nimán ní' me se cavij sa' ní' gaa yáan ní' rihaan chumij nihánj, ne ne'en ní' se vaa cavij sa' ní' cayáan ní' ga Diose nu' cavij nu' ca'anj ei.

<sup>9</sup> Ya vaa nana yo', ne vaa che'é cunq ní' man yo' chuguanj.

<sup>10</sup> Dan me se nucuj rá ní' man Diose sí vaa i'na' se vaa cavij sa' ní' qui'yaj Diose, ne che'é dan 'yaj suun uxrá ní', ne ne chu'vi' ní' ca'mij yuvij nana nij che'é ní' a mei. Orún' Diose ca'vee cavij sa' cunudanj yuvij ei. Ne ya cavij sa' cunudanj nij yuvij amán rá ni'yaj man Diose adonj.

<sup>11</sup> Tucu'yón so' nana yo' rihaan yuvij, ne ca'ne' so' suun rihaan nij yuvij se vaa canocó' nij yuvij nana yo' á.

<sup>12</sup> 'Q se xnii mé so', ne ataa cachij so', tzaj ne taj se 'yaj yo' mei. Se guun cataj yuvij se vaa taj se uún so' mei. Maan se ve'é qui'yáa so' nu' tucuaán nocó' ní', se vaa ve'é ca'mij so' do', ve'é qui'yáa so' do', gaa 'ee rá so' man tinúu so' do', gaa nucuj rá so' man Diose do', cutumé so' man so' se qui'yáa so' cacun' do', gaa ne xcaj nij sí nocó' man Diose cuentá daj 'yáa so', ne danj qui'yaj nij so' uún adonj.

<sup>13</sup> Asa' guun raan 'o xco' le'ej nii cuchij, ne nayaá so' se-nana Diose cunō nij so', tucu'yón sa' so' man nij so', ne inanj danj gaa suun qui'yaj suun so' ndaa güii cuchí 'unj rihaan so' ei.

<sup>14</sup> Se quini'yón so' suun sa' ca'ne' Diose rihaan so' mei. 'O se che'é suun sa' yo' me tihaan Diose 'o nana che'é so' rihaan nij síi chij nicaj yu'unj man nij yuvij noco' man Diose, ne cuta' nij so' ra'a nij so' raá so' ei.

<sup>15</sup> Dan me se yo'o ca'nej so' raá so' man nij rasuun yo', gaa ne quene'en cunudanj nij yuvij se vaa vaj nari' so' qui'yaj suun so' se-suun Diose, ni'yaj nij yuvij ei.

<sup>16</sup> Xcaj so' cuentá se vaa 'yáa so' do', se vaa tucu'yón so' do' á. Canocó so' nu' nana nihánj, gaa ne cavij sa' ma'an so' cavij sa' nij yuvij uno nana a'mii so' cavij sa', qui'yáa so' a.

## 5

### *Nana nihánj taj xna'anj daj ca'mii ní' rihaan 'o 'o yuvij noco' man Diose a*

<sup>1</sup> Se caxrij yuvaa so' man nij chii nga ma'. Maan se ve'é ca'mii so' rihaan nij so' nago' so' chrej sa' man nij so' á. Daj se a'mii so' rihaan rée so' ro', danj ca'mii so' rihaan nij chii nga á. Ase a'mii so' rihaan tinúu so' ro', danj ca'mii so' rihaan nij síi tachruu uún a.

<sup>2</sup> Ase a'mii so' rihaan níi so' ro', danj ca'mii so' rihaan nij vichij uún a. Ase a'mii so' rihaan ra'vij so' ro', danj ca'mii so' rihaan nij chana tachruu á. Se ca'mii so' a doj nana chí'ii ga nij no' ma'.

### *Nana nihánj taj xna'anj che'é nij chana cavi' nicá a*

<sup>3</sup> Caraa cochróo so' rihaan nij chana cavi' nicá á. Go' so' rasuun achiin man nij no', sese nuvi' tuvi' chana racuíj man chana a.

<sup>4</sup> Tzaj ne sese vaa ta'nii chana do', ta'nij si'no chana do', ne taj ya'anj nij so' man chana yo' á. Danj qui'yaj nij so', gaa ne quinari' nij so' suun ca'ne' Diose rihaan nij so' se vaa taj ya'anj nij so' man tuvi' nij so' á. 'O se danj gaa ya, gaa ne cunuú rá nij so' se vaa asij xnií me nij so', ne taj ya'anj níi nij so' do', xcua'anj nij so' do', man ma'an nij so', ne ase vaa qui'yaj níi nij so' do', ase vaa qui'yaj xcua'anj nij so' do', man nij so' ro', danj qui'yaj ma'an nij so' man níi nij so' do', man xcua'anj nij so' do' ei. Yo' me, gaa ne guun niha' rá Diose ni'yaj Diose man nij so' a.

<sup>5</sup> Sese ya chana niqne me yo'o no', ne gaa nucuaj rá no' ni'yaj no' Diose á. Se-suun no' guun suun achíin ni'yaj rihaan Diose nuvij nigan' a.

<sup>6</sup> Tzaj ne sese me inanj rá no' guun niha' rá no' rihaan chumii nihánj, ne nda' se vaa i'na' nee man no', tzaj ne nimán no' me se aj cavi' a.

<sup>7</sup> Nago' so' nana nihánj rihaan nij síi amán rá ni'yaj man Diose, ne se cuta' yuvij a doj cacun' xráa nij so' mei.

<sup>8</sup> Sese vaa yuvij na'vej rá taj ya'anj man tuvi' yuvij do', man nij tucua yuvij do', ne nuveé yuvij noco' se-tucuanj ní' sjj noco' man Diose me nij so' ma'. Nij doj 'yaj yuvij yo' rihaan nij yuvij ne amán rá ni'yaj man Diose adonj.

<sup>9</sup> Inanj se-chuvij nij chana vaj va'núj chihaa yo' taj doj cachron so' rihaan yanj no' se-chuvij nij chana cavi' nicá á. Ne inanj se-chuvij chana nicaj raan man orún' nicá cachron so' uún á.

<sup>10</sup> Ne quene'en cunudanj níi man nij no' se vaa ve'é 'yaj suun nij no' che'é tuvi' nij no' do', se vaa ve'é tucua'chij nij no' ta'nii nij no' do', se vaa rqué nij no' chraa chá yuvij ca'na' rej man gan' do', se vaa na'nu' nij no' tacóo nij yuvij noco' man Diose do', se vaa racuíj nij no' man nij síi quiran' sayuun do', ne nij

no' me ca'vee cachron so' se-chuvii rihaan yanj no se-chuvii nij chana cavi' nica a.

<sup>11</sup> Tzaj ne se cachron so' se-chuvii chana ta'aj rihaan yanj ma'. 'O se vaa guii guun niha' ra nij chana ta'aj yo' canoco' nij no' yo'ó chii, ne quiri'ij nij no' suun ata' nij no' che'é Jesucristó nanj adonj.

<sup>12</sup> Sese danj qui'yaj nij chana ta'aj, gaa ne cutumé nij no' cacun' che'é se tanáj nij no' suun 'yaj suun che'é Jesucristó a.

<sup>13</sup> Tananj uún, ne ne yaán xej nij no' ve', ne chéé rma'an nij no' daj a ve', ne uun rmii nij no', ne achén uun tiempo, 'yaj nij no', ne nanó nij no' cuentó ne uún, ne tiguíj nij no' se-cuento nij no' rihaan se-cuento nij yo'ó yuvi, ne a'mii nij no' náá guun rasuun ne nó xcúún nij no' ca'mii nij no' a.

<sup>14</sup> Maan che'é dan me ra 'unj xcáj nij chana ta'aj yo' yo'ó chii, ne cuchruj nij no' ne'ej, ne cutumé nij no' ve' tucua' nij no', ne danj gaa, gaa ne se ca'vee ca'mii nij sí taj ri'yunj man ní' nana chi'ii che'é ní' adonj.

<sup>15</sup> 'O se vaa ta'aj nij chana cavi' nica, ne aj quiri'ij ta'aj nij no' tucuaán noco' ní', ne canoco' nij no' man sí cu'naj Satanás nanj adonj.

<sup>16</sup> Tzaj ne sese vaa chana noco' man Diose, ne sese vaa tuvi' nij no' chana cavi' nica 'nij sca'núj nij no', ne racuj chana noco' man Diose man tuvi' no' chana cavi' nica á. Gaa ne se cachiin taj ya'anj cunudanj nij sí noco' man Diose man chana cavi' nica yo' a. Maan se taj ya'anj nij so' man nij chana quináj uun inanj ei.

*Nana nihánj taj xna'anj daj qui'yaj ní' man nij sí uun chij nicaj yu'unj man nij yuvi noco' man Diose a*

<sup>17</sup> Vij ya nuu che'e soj go' soj tu'vee nij sí uun chij nicaj yu'unj man nij sí noco' man Diose ei. Danj qui'yaj soj, ne caraá cochroj soj rihaan nij so' sese ya sji 'yaj suun uxrá a'mii natáj se-nana Diose me nij so' do', sese ya tucu'yón nij so' nana rihaan yuvi do' ei.

<sup>18</sup> Danj Diose taj, ne: "Se numíj so' tacúún scúj gaa 'yaj suun scúj utun' scúj 'núú trigó cunu sa' 'núú trigó ma'", taj yo' a. Ne taj uún yo': "Nacaj mozó sa'anj tu'vee so' sese 'yaj suun so' á". Danj taj danj Diose a. Ne che'é dan xcáj ní' cuentá se vaa no xcúún ní' naru'vee ní' rihaan nij sí 'yaj suun tucu'yón man ní' á.

<sup>19</sup> Sese cutá' nii cacun' xráá 'o sí uun chij nicaj yu'unj man nij sí noco' man Diose, ne se cuchumán rá so' ma'. Tzaj ne sese vaa vij va'núj sí quene'en se vaa tumé so' cacun', ne cunó so' nana ca'mii nij so' á.

<sup>20</sup> Sese vaa 'o sí uun chij qui'yaj ndo'o cacun', ne ca'ne' so' cacun' che'é so' quene'en cunudanj yo'ó nij sí uun chij, gaa ne cuchu'vi' nij so' qui'yaj ma'an nij so' cacun' uún a.

<sup>21</sup> Nihánj me suun ca'ne' 'unj rihaan so' ni'yaj Diose do', ni'yaj Jesucristó do', ni'yaj nij se-mozó Diose narii Diose man do' a. Dan me se ca'ne' so' cacun' che'é yuvi, ne 'o cuyaán qui'yáá so' ga 'o 'o nij so' a. Taj se 'yaj sese sji sa' doj me yo'ó so' rihaan so' ma'. Maan se ca'ne' yá so' cacun' me ma'an cacun' tumé 'o 'o nij so' a.

<sup>22</sup> Se gaa ra'yanj rá so' cutá' ra'á so' raá me ma'an 'o so' che'é yan guun so' sí catá suun che'é Diose mei. 'O se sese sji tumé cacun' me so', ne taj che'é racuj so' man so' guun chij so' ma'. Danj inanj qui'yáá so', gaa ne se gaa nanj cutumé so' se-cacun' so' a. Dan me se yo'ó inanj se ca'vee catuu a yo'ó se chi'ii mei.

*Nana nihánj taj xna'anj se vaa co'ó sí cu'naj Timoteo doj tzin' na vinó a*

<sup>23</sup> Che'é se ran' ndo'o so', ne ve'ee rqué so', ne se co'o so' inanj na uun ma'. Maan se co'o so' doj tzin' na vinó a.

*Nana nihánj taj xna'anj se vaa vaa güii, ne ya quene'en ní' me yuvij tumé cacun' do', me yuvij qui'yaj suun sa' do' a*

<sup>24</sup> Vaa yuvij tumé cacun', ne nda' se ataa quiran' nij so' sayuun, tzaj ne aj ne'en cunudanj yuvij man rihaan chumij se vaa tumé nij so' cacun' ei. Tzaj ne ino vaa yo'ó ta'aj nij yuvij tumé cacun' uún ei. Nda' se ne ne'en nii se vaa cacun' qui'yaj nij so', tzaj ne vaa güii quiran' nij so' sayuun che'é cacun' tumé nij so', ne quene'en nii man nij so', ne xcaj nii cuentá se vaa ya tumé nij so' cacun' adonj.

<sup>25</sup> Veé danj vaa uún nij suun sa' 'yaj suun yo'ó ta'aj nij yuvij, ne canó yuvij ni'yaj man nij suun sa' adonj. Tzaj ne sese vaa suun sa' ne ruvi' do', ne acaj yuvij cuentá do', ne taj se 'yaj mei. Maan se vaa güii, ne xcaj cunudanj yuvij man rihaan chumij cuentá se vaa sa' qui'yaj suun nij so' ei.

## 6

*Nana nihánj taj xna'anj se vaa ve'é qui'yaj suun mozó rihaan se-ru'vee mozó a*

<sup>1</sup> Ne nij mozó me se ve'é caraá cochroj nij mozó rihaan se-ru'vee nij so' a. 'Q se yo' me qui'yaj nij so', gaa ne se gaa nanj ca'mii chi'ii yuvij che'é Diose do', che'é nana tucuyón ní' do' a.

<sup>2</sup> Ne sese síi noco' man Diose me ru'vee, ne se guun cataj mozó: "Tinúu 'unj me se-ru'vee 'unj, ne taj che'é qui'yaj suun nucuáa 'unj rihaan so' ma'". Se guun ca'mii mozó danj ma'. Maan se ve'é qui'yaj suun so' rihaan se-ru'vee so', ne gaa 'ee rá so' se-ru'vee so' á. 'Q se ne'en mozó se vaa sij noco' man Diose me se-ru'vee mozó, ne guun niha' rá mozó se vaa cavi' sa' 'o tinúu so' che'é suun 'yaj suun so' adonj.

*Nana nihánj taj xna'anj se vaa nij síi tucuyón yo'ó tucuáan ro', nij 'yaj nij so', ne inanj me rá nij so' qui'yaj canaán nij so' sa'anj a*

Nana nihánj me chrej nucuaj nago' so' man nij yuvij a.

<sup>3</sup> Ino vaa ta'aj nij síi tucuyón yo'ó tucuáan, ne ino vaa nana a'mii nij so' ga nana ya ca'mii Jesucristó sij 'nij ra'a man ní' adonj. Nuveé se-tucuanj Diose me tucuáan tucuyón nij so' ma'.

<sup>4</sup> Síi sa' uxrá me nij so', rá nij so', tzaj ne síi tuchrii me nij so', ne ne ne'en uxrá nij so' a ma'. Niha' uxrá rá nij so' ca'mii cunu' nij so' che'é nana a'mii nij so', ne che'é dan uun xcoj ruvaá rá nij so' ni'yaj nij so' tuvi' so', ne unu' ndo'o nij so', ne a'mii nacoj nij so' che'é Diose, ne nij 'yaj nij so', uta' nij so' cacun' rmi' xráa tuvi' nij so' adonj.

<sup>5</sup> Síi ni'yón me nij so', ne na'vee xcaj nij so' cuentá a ma'. Nana ya na'vee cunó nij so' mei. Maan se sese ve'é canoco' nij so' man Diose, ne qui'yaj canaán ndo'o nij so' sa'anj, rá nij so' adonj.

<sup>6</sup> Dan me se ya uxrá danj vaa, ne sij quirí' uxrá ya se sa' me ní', tzaj ne yo'ó gaa xej nimán ní' canoco' ní' Diose, gaa ne ca'vee guun ní' síi ru'vee rej xta' ei.

<sup>7</sup> Dan me se xcaj ní' cuentá, ne gaa ca'ngaa ní' rihaan chumij nihánj, ne taj se nicaj ní' ca'na' ní' ma'. Ne taj rasuun nica' ní' ca'anj ní' asa' cavi' ní' uún mei.

<sup>8</sup> Che'é dan me sese vaa se chá ní' do', sese vaa yatzíj taj xráa ní' do', ne taj che'é guun rá ní' nica' ní' doj rasuun ma'.

<sup>9</sup> Tzaj ne xa' nij yuvij me rá guun ru'vee me se achiin que'ee rasuun man nij so', rá nij so', ne ne uun nucuaj nij so' canoco' nij so' man Diose a mei. Ne ndaa uun rá nij so' qui'yaj nij so' cacun' che'é rej qui'yaj canaan nij so' rasuun gaa rihaan nij so', ne dan me se ran' ndo'o nij so' sayuun, ne sij, gaa ne yuun che'e quirij' nij so' nanj ei.

<sup>10</sup> Maan che'é se uun ndo'o rá yuvij ni'yaj yuvij sa'anj ro', che'é dan 'na' daj a sayuun ei. Maan yuvij aran' rá sa'anj, ne che'é dan quiri'ij nij so' se-tucuanj Diose tucuaán canoco' nij so' asij rque doj, gaa ne quiran' ndo'o nij so' sayuun, ne quinanó ndo'o rá nij so' adonj.

*Nana nihánj taj xna'anj se vaa ve'é cunq ní nu' se-nana Diose a*

<sup>11</sup> Tzaj ne so' sij noco' man Diose me se se guun rá so' qui'yaj canaan so' noco'o sa'anj ma'. Tananj gaa niha' rá so' qui'yáa so' se vaa me rá Diose qui'yáa so' á. Gaa nucuaj rá so' man Diose, ne cunqu 'ee doj rá so' tuví' so', ne caraa x'naa so', ne se caxrij yuvaa so' man tuví' so' ma'. Ve'é inanj qui'yáa so' che'é nij so' á.

<sup>12</sup> Qui'yaj suun uxrá so' suun sca' sa' ca'ne' Diose rihaan ní' sij noco' man so', gaa ne cayáan so' ga Diose nu' cavii nu' ca'anj a. Che'é dan cune' Diose man so' qui'yaj suun so', ne cataj yá so' se vaa ya qui'yaj suun so' che'é Diose gaa canocó' so' man so' ei. Dan me se danj ca'mii so' cuno que'ee tinúú ní', ne se ca'ne' rá so' ca'anj yanij so' rihaan chrej sa' rque Diose mei.

<sup>13</sup> Ne'én so' se vaa Diose me sí qui'yaj vaa i'na' ní', ne ne'én so' daj qui'yaj sí cu'naj Jesucristó gaa canicun' so' rihaan sí nicaj suun sí cu'naj Poncio Pilato, se vaa nata' ya so' che'é suun cata so' a. Ne cunq Diose cunq Jesucristó cunq chrej narqué 'unj nihánj man so' á.

<sup>14</sup> Dan me se cunq so' se-nana Diose, ne qui'yáa so' cunudanj yo' á. Se qui'yáa so' cacun' ma'. Danj qui'yáa so' ndaa güii ca'na' uún Jesucristó sij 'nij ra'a man ní' rihaan chumij nihánj á.

<sup>15</sup> O se Diose me sí qui'yaj ca'na' so' güii cacrón ma'an Diose, ne xa' Diose, tzaj ne sa' uxrá vaa so', ne orún' so' uun nucuaj guun chij rihaan chumij nihánj, ne uun chij so' rihaan cunudanj nij sí nicaj suun vaa rihaan chumij nihánj adonj.

<sup>16</sup> Qrún' so' me sí uun nucuaj qui'yaj gaa i'na' ní' nu' cavii nu' ca'anj, ne yanj so' rej aco' ya'an chuguun rej na'vee quinichrun' yuvij ei. A 'ó yuvij ne quene'en man so', ne daj chihaa mij se ca'vee quene'en yuvij man so' ma'. Che'é dan caraa cochroj ní' rihaan so', ne so' me sí nucuaj ndo'o nu' cavii nu' ca'anj adonj. Veé danj gaa ya ei.

*Nana nihánj taj xna'anj daj qui'yaj nij ru'vee a*

<sup>17</sup> Nago' so' chrej nucuaj man nij sí ru'vee yanj rihaan chumij nihánj cuano se vaa se guun cataj nij so' se vaa sij sa' uxrá me nij so' che'é se vaa sa'anj rihaan nij so' mei. Se gaa nucuaj rá nij so' man si'yaj nij so' mei. 'O se sese quiran' nij so' sayuun, ne se racuj si'yaj nij so' man nij so' ma'. Che'é dan yo' o gaa nucuaj rá nij ru'vee man Diose, ne Diose me sí rque cunudanj se sa' rihaan ní', che'é rej guun niha' rá ní' qui'yaj rasuun yo' a.

<sup>18</sup> Maan se cataj xna'anj so' rihaan nij sí ru'vee se vaa suun sa' qui'yaj suun nij so', che'é rej guun ru'vee nij so' rihaan Diose, ne ve'é rque nij so' rasuun achiin man tinúú nij so' sí nique á.

<sup>19</sup> Danj qui'yaj nij ru'vee che'é rej cataj Diose vaa güii se vaa ya cuno ru'vee yo' rihaan Diose, gaa ne cayáan ru'vee yo' ga Diose nu' cavii nu' ca'anj, ne



doj a gaa i'na' nij sí cayáán ga Diose rihaan nij sí man rihaan chumij nihánj cuano adonj.

*Nana nihánj taj xna'anj se vaa se cuno ní yo'ó nana ma'*

<sup>20</sup> Yo'ó tumé so' se-suun Diose suun ca'ne' Diose rihaan so', tinuj. Se cunó so' yo'ó nana cuu tucu'yón nii, nana a'mii yuvij uun ma'. Nuveé se-nana Diose me yo' a ma'. 'Q se avii ndo'o raaj nij sí noco' yo'ó nana, rá nij so', tzaj ne ne ne'en uxrá nij so' a ma'.

<sup>21</sup> Vaa yuvij noco' yo'ó nana yo', tzaj ne veé danj aj tanáj nij so' se-tucuanj Diose nanj adonj.

Me rá 'unj qui'yaj ndo'o Diose se luj che'é taran' soj adonj.

## Nihánj me síj vij yanj cartá qui'yaj síi cu'naj Pabló ca'néé so' rihaan síi cu'naj Timoteo a

1 'Uñj nihánj me síi cu'naj Pabló, ne cune' Jesucristó mán 'uñj guún 'uñj apóstol natá' rihaan yuvij se vaa gaa i'na' ní' nu' cavii nu' ca'anj qui'yaj Jesucristó, ne yo' me suun me rá Diose qui'yaj sunj adonj.

2 'Yáá 'uñj yanj nihánj ca'nej 'uñj rihaan so' sij cu'naj Timoteo a. 'Ee rá 'uñj mán so', tinuj. Ase vaa 'o ta'níi 'uñj, danj vaa so' rihanj á. Me rá 'uñj qui'yaj ndo'o Diose Rej ní' dō', Jesucristó sij 'nij ra'a man ní' dō', se luj che'é so', ne me rá 'uñj gaa 'ee rá roj so' mán so', ne gaa xej nimán so', qui'yaj roj so' a.

*Nana nihánj taj xna'anj se vaa guun niha' doj rá ní' qui'yaj suun ní' rihaan Diose a*

3 Dan me se 'uñj nihánj me síi 'yaj suun rihaan Diose ndaa vaa qui'yaj nij xii 'uñj gaa naá, ne nuvi' cacun' tumej mei. Ne dan me se tananj nagó' 'uñj graciá rihaan Diose che'é so', ne yo'o nuú raj mán so', ne 'o achíin nì'yáj che'é so' rihaan Diose nuvji nigan' ei.

4 Ne na'nuj rá 'uñj se vaa ta'veé so' gaa tanáj 'uñj mán so', ne che'é dan me ndo'o rá 'uñj quene'en uún 'uñj mán so', gaa ne cunyu cuij nimanj qui'yáá so', raj a.

5 Dan me se achíin nì'yáá 'uñj che'é so' che'é se nuú rá 'uñj se vaa ne tiha' yu'uñj so' mei. Yá nocó' so' man Diose, ne dan me se tucuaán nicaj níi so' chana cu'naj Eunice ga Xcua'áan so' chana cu'naj Loida ro', nicaj ma'án so' uún, raj a.

6 Che'é dan cataj xna'anj 'uñj rihaan so' se vaa yuun che'e ca'nej so' nimán so' qui'yaj suun so', ndaa vaa rqué Diose se nucuaj mán so' qui'yaj suun so', gaa cutaj ra'aj raá so' á.

7 'O se nuveé sij chu'vi' nimán me ní', qui'yaj Diose ma'. Tananj nari' nucuaj nimán ní', ne nuu 'ee rá ní' tuvi' ní', ne tumé ní' man ní' me daj 'yaj ní', qui'yaj Diose adonj.

8 Che'é dan se guun na'aj so' natá' so' rihaan yuvij che'é síi 'nij ra'a man ní' mei. Ne se guun na'aj so' che'é se 'nij 'uñj taga' ma'. Se cuhu'vi' so' qui'rán' so' sayuun ma'. Rauij so' manj ca'mij natáj ní' se-nana Diose nana sa', ne Diose me síi qui'yaj guun nucuaj ní' adonj.

9 Ne Diose me síi tinanii man ní' rihaan sayuun, ne canacúun so' man ní' canoco' ní' man so' ei. Nuveé che'e suun qui'yaj suun ma'an ní' me qui'yaj Diose danj ma'. Maan se danj guun rá ma'an so' qui'yaj so', ne guun rá so' qui'yaj uun so' se luj che'é ní' ei. Sij ataa qui'yaj so' chumij, ne qui'yaj so' se luj che'é ní' che'é se sij nocó' man Jesucristó me ní' a.

10 Ne yaj me se tihaan Diose rihaan ní' nu' se sa' nuu nimán so', se vaa ca'na' Jesucristó síi tinanii man ní' rihaan sayuun, qui'yaj Diose a. Yaj me se se ca'vee caví' ní', qui'yaj Jesucristó yaj a mei. Tzaj ne yo'o gaa i'na' nimán ní' ga Diose nu' cavii nu' ca'anj, qui'yaj so', ne danj taj se-nana Jesucristó nana sa' adonj.

11 Ne 'uñj nihánj me síi cune' Diose se vaa guún 'uñj apóstol natá' nana yo' rihaan yuvij, ne tucu'yonj nana yo' man yuvij adonj.

12 Maan che'é dan rán' 'uñj sayuun nihánj cuano, tzaj ne ne na'aj 'uñj a doj se vaa rán' 'uñj mei. 'O se ne'en 'uñj se vaa Diose me síi cuchumán raj nì'yaj

'un̄j man, ne guun ya raj se vaa uun nucuaj so' tumé so' manj qui'yaj sunj nu' suun ca'ne' so' rihanj, ne danj inanj qui'yaj so', racuj so' manj ndaa guii ca'na' uun Jesucristó adonj.

<sup>13</sup> Dan me se aj cunó so' nij nana ya ca'mii 'un̄j rihaan so' á. Ne ase cunó so' ro', danj qui'yáá so', ne yo'ó gaa nucuaj rá so' man Diose, ne gaa 'ee rá so' man tuvi' so' che'é se sij noco' man Jesucristó mé so' á.

<sup>14</sup> Ne Nimán Diose nuu nimán so' ro', racuj mán so' se vaa yo'ó qui'yaj suun so' suun sa' suun ca'ne' Diose rihaan so' qui'yáá so' á. Ne ve'é n̄icaj so' tucuáán sa' nari' so' á.

<sup>15</sup> Aj ne'én so' se vaa cunudan̄j nij síi cuchumán rá ni'yaj man Jesucristó yan̄j estadó Asia ro', tanáj nij so' manj, ne canoco' nij so' yo'ó tucuáán a. Vij tuvi' nij so' me síi cu'naj Figelo do', síi cu'naj Hermógenes do' a.

<sup>16</sup> Me rá 'un̄j gaa 'ee rá Diose man nij tucua' síi cu'naj Onesíforo a. 'O se aj guun que'ee ndo'o racuj so' manj, ne ndaa nuu cuj nimán 'un̄j qui'yaj so', ne ne guun na'aj so' se vaa 'nij 'un̄j taga' ma'.

<sup>17</sup> Tzaj ne gaa ca'na' so' chuman' Romá, ne cuaj nano' so' manj, ne nari' so' manj ei.

<sup>18</sup> Me ndo'o raj gaa 'ee rá síi 'nij ra'a man ní' man so' se vaa se quiran' so' sayuun gaa guii ca'na' uun síi 'nij ra'a man ní' rihaan chumiij nihánj a. Ne so' me síi ne'en doj rihanj se vaa qui'yaj suun ndo'o síi cu'naj Onesíforo che'é ní' sij noco' man Jesucristó gaa cane so' chuman' Efeso a.

## 2

### *Nana nihánj taj xna'an̄j se vaa se cunánj ní' rihaan sayuun a*

<sup>1</sup> Ase vaa 'o ta'nij, danj vaa so' rihanj, tinuj. Ne me rá 'un̄j ca'vej rá so' nari' nucuaj nimán so', qui'yaj Jesucristó síi 'yaj ndo'o se luj che'é ní' a.

<sup>2</sup> Dan me se man ndo'o síi cuno nana cataj xna'an̄j 'un̄j rihaan so', ne me rá 'un̄j tucu'yón so' nana yo' man doj nij snó'o luj n̄icaj tuvi' ga so' guun nij so' síi gaa nucuaj nimán nata' rihaan yuviij guun nij so' uún a.

<sup>3</sup> Seuchu'vi' so' quirán' so' sayuun che'é se sij noco' man Jesucristó mé so' mei. Maan se ase vaa uno tanuu nana a'mii tanuu uun chij ro', danj gaa cunó ma'án so' se-nana Jesucristó á.

<sup>4</sup> Dan me se vaa nij tanuu 'nij cuarteé, ne ne avii yanij nij so' 'yaj suun nij so' ma'. Maan se ve'é 'yaj suun nij so' inanj suun a'ne' nii rihaan nij so', che'é se me rá nij so' guun niha' rá tanuu uun chij ni'yaj so' man nij so' a. Ne ase 'yaj guej tanuu, danj qui'yáá so', ve'é qui'yaj suun so' rihaan orún' Jesucristó á.

<sup>5</sup> Dan me se ve'é danj 'yaj nij síi tico canaán uún, ne no xcúún nij so' cunó sa' nij so' nu' suun a'ne' nii rihaan nij so' qui'yaj nij so' adonj. Tzaj ne sese se cuno sa' nij so' suun a'ne' nii rihaan nij so' qui'yaj nij so', ne daj chíhaa m̄ij se qui'yaj canaán nij so' cachriin yâj cunuû raá nij so' ma'. Che'é dan sese me rá so' qui'yaj canaán so' ni'yaj Jesucristó, ne ve'é cunó so' rihaan so' ei.

<sup>6</sup> Ne ve'é danj vaa síi 'yaj suun ndo'o naa uún, ne gaa rii nii naa, ne so' me síi quirí' tan' asino yan̄j gaa cuxra' ta'aj nii tan' uún adonj. Ne ase vaa ran' síi 'yaj suun naa ro', danj quiran' ma'án so', ne caviij sa' uxrá so' sese yo'ó qui'yaj suun so' che'é Diose ei.

<sup>7</sup> Cunó so' nana nihánj, ne racuj Diose mán so' nari' so' cunudan̄j yo'ó nij nana chuguan̄j.

<sup>8</sup> Se quini'yón so' man sí cu'naj Jesucristó a doj mei. Se quini'yón so' se vaa cunuu i'na' uún so' gaa cavi' so', ne se quini'yón so' se vaa noco' xna'anj tuvj' so' gaa sí cu'naj David sí cayáán gaa naá mei. Nihánj me nana sa' a'mii natáj 'unj á.

<sup>9</sup> Che'é nana nihánj quirán' 'unj sayuun, ne ndaa 'nij 'unj taga', ne nda' rá se vaa ran' sí tumé cacun' chuguanj. 'O se taj se 'yaj mei. Xa' se-nana Diose, tzaj ne se ca'vee numj nii man yo' do', se ca'vee caxrii nii taga' man nana yo' do' mei.

<sup>10</sup> Che'é dan ne chu'ví' 'unj quirán' 'unj me ma'an sayuun che'é nij sí narií Diose man ma'. 'O se danj gaa quirán' 'unj, gaa ne ca'vee cavii sa' nij so' ga 'unj che'é se vaa qui'yaj Jesucristó che'é ní', ne ve'é ndo'o gaa ní' ga Diose nu' cavii nu' ca'anj a.

<sup>11</sup> Ya vaa nana nihánj ei. “Ne sese aj cavi' ní' ga so', ne gaa i'na' ní' ga so' uún a.

<sup>12</sup> Sese se cunánj ní' rihaan sayuun, ne guun chij ní' ga so' uún a. Sese cataj ní' se vaa nuveé sij noco' man so' me ní', ne cataj so' se vaa nuveé tuvj' so' me ní' uún a.

<sup>13</sup> Nda' se ne sa' rá ní' ga so', tzaj ne so' me se sa' inanj so' ga ní' uún a. 'O se ne ne'en so' naqui'yaj ino' so' nana ca'mii so' rihaan ní' a man adonj”. Nana ya cunó ní' me nu' nana nihánj ei.

*Nana nihánj taj xna'anj se vaa se cunó ní' nana a'mii rma'an yuvij ma'*

<sup>14</sup> Dan me se cataj xna'anj so' rihaan nij sí noco' man Diose se vaa se quini'yón nij so' nana nihánj mei. Ne nago' so' chrej nucuaj man nij so' se vaa se canó tuvj' nij so' che'é nana tucu'yón nij so' ma'. 'O se taj che'é qui'yaj nij so' danj man adonj. Maan se sí quene'en che'é yan unu' nij so' ro', quirí' rá nij so' adonj.

<sup>15</sup> Ca'nej nucuaj nimán so', gaa ne ca'vee cataj Diose se vaa sí ve'é qui'yaj suun rihaan so' mé so', ne se cunó rej na'aj rihaan so' che'é suun 'yaj suun so' mei. Tananj nata' nicá so' se-nana Diose nana ya ei.

<sup>16</sup> Se nanó xrej so' nana a'mii rma'an ta'aj yuvij ma'. A'mii a'mii uun nij so', tzaj ne che'é nana a'mii nij so' ro', me se doj a 'yaj nij so' se vaa na'vej rá Diose qui'yaj nij so' adonj.

<sup>17</sup> Ase vaa ran' yuvij nó luj yuvaa ro', danj quirán' nij sí cunó nana a'mii nij so', ne nij doj quirán' nij yuvij uno nana avii tu'va nij so' adonj. Vjij tuvj' nij so' me sí cu'naj Himeneo do', sí cu'naj Fileto do' chuguanj.

<sup>18</sup> Dan me se cataj roj so' se vaa aj quisij cunuu i'na' uún nij sí cavi', ne se cunuu i'na' uún doj yuvij, taj roj so' a. Danj tu'va roj so', tzaj ne ne ne'en uxrá roj so' a doj a ma'. Tzaj ne vaa ta'aj yuvij cuchumán rá nana ca'mii roj so', ne che'é dan ca'ne' rá nij yuvij ga suun nucuaj rá man Diose, qui'yaj roj so',

<sup>19</sup> tzaj ne aj cuchruj sca' Diose tucuaán noco' ní', ne aj naj se-sello' so', qui'yaj so' a. Ne nihánj me nana no' rihaan se-sello' so' a: “Ne'en sí 'nij ra'a man ní' man nij sí noco' man so' a”. Ne yo'ó nana no' rihaan se-sello' so' taj: “Nu' nij sí nata' se vaa sij noco' man sí 'nij ra'a man ní' me nij so' ro', no' xcúún nij so' tanáj nij so' nu' chrej chi'ii á”. Dan me roj nana noco' ní' adonj.

<sup>20</sup> Dan me se ve' tucua' 'o ru'vee me se mán xruj tu'vee ndo'o do', man xruj aga' oró mí do', man xruj aga' platá catzii do' a. Tananj uún, ne vaa xruj nij doj do' uún a. Vaa se rii nii man chruun do', vaa se rii nii man yo'óo niquii do' a. Dan me se vaa se sa' doj, ne vaa uún se nij doj uún a.

<sup>21</sup> Dan me se sese guun yaníj so' gá nij yuvií tu'va rma'an yo', ne ase vaa xruj sa' doj ro', danj gaa ma'an so' rihaan nij so' a. Dan me se inanj suun sa' doj qui'yaj suun so' che'é Diose, ne guun nucaáa so' qui'yaj suun so' nu' suun sa' che'é Diose á.

<sup>22</sup> Tzaj ne se ca'vej rá so' qui'yáa so' ndaa vaa me rá nij sí tachruu qui'yaj nij so' mei. Maan se guun rá so' qui'yáa so' se sa' ni'yaj Diose á. Gaa nucaaj rá so' man so' á. Gaa 'ee rá so' tuvi' so' á. Dínj cayáan so' gá yo'ó nij sí sa' nimán nij sí achíin ni'yaj rihaan sí 'nij ra'a man ní' á.

<sup>23</sup> Se ca'vej rá so' cano tuvi' so' gá yuvií che'é nana mei. Ne acaj nij sí 'yaj danj cuentá ma'. Sij ataa nari' sa' me nij so' nanj adonj. Ne che'é se vaa 'yaj nij so', che'é dan unu' ndo'o nij so' gá tuvi' nij so' ei.

<sup>24</sup> Ne nó xcúun sí 'yaj suun che'é sí 'nij ra'a man ní' cunu' so' danj ma'. Maan se ve'é qui'yaj so' che'é cunudanj yuvií, ne ve'é tucu'yón so',

<sup>25</sup> ne tijaan so' chrej sa' man nij sí me rá cunu' gá so' uún a. 'Q se xcaj so' cuentá se vaa ca'vee racuj Diose man nij so', ne quinanó rá nij so' che'é cacun' tumé nij so', ne quinarí' nij so' nana ya a.

<sup>26</sup> Gaa ne ca'vee xcaj nij so' cuentá, gaa ne quinaníj nij so' rihaan sí chree a. Ne sí chree me se so' me sí tiha' yu'unj man nij yuvií, ne quita'aa so' man nij so', ne cuano nihánj me se 'yaj so' ndaa vaa me rá ma'an so' qui'yaj so' man nij so' adonj.

### 3

*Nana nihánj taj xna'anj daj qui'yaj nij sí chí'ii asa' nichrun' ca'na' uún Jesucristó a*

<sup>1</sup> Ne'én so' se vaa asa' nichrun' ca'na' uún Jesucristó, ne guun ndo'o sayuun a.

<sup>2</sup> 'Q se gaa 'ee uxrá rá nij yuvií man ma'an yuvií, ne guun ndo'o rá nij yuvií qui'yaj canaán nij so' sa'anj, ne cataj uxrá nij so' se vaa sij sa' ndo'o me ma'an nij so', ne nij ndo'o ca'mii nij so' che'é Diose uún a. Se cuno nij so' ca'mii rej nij so' do', níj so' do', uún ma'. Ca'mii nij so', ne se nago' nij so' gracia che'é rasuun, ne se guun rá nij so' canoco' nij so' man Diose mei.

<sup>3</sup> Se gaa 'ee rá nij so' man tuvi' nij so', ne o ra'yunj tuvi' nij so', ne nana ndo'o nij so' cuentó ne che'é tuvi' nij so', ne se guun na'aj nij so' ni'yaj nij so' man nij so' mei. Ne se guun nucaaj nij so' ca'ne' rá nij so' gá suun chí'ii nicaj nij so' mei. Inanj quij gaa nij so' ei. Ne inanj quinchri' níj so' ni'yaj nij so' rasuun sa' ei.

<sup>4</sup> Ne inanj sí tiha' yu'unj tuvi' guun uún nij so' ei. Ne inanj ca'nej nimán nij so' qui'yaj nij so' chrej chí'ii ei. Ne yo'ó ndaa raan rma'an cumán se nucuí' rá nimán nij so', ne inanj nana' níj so' rasuun me rá ma'an nij so' a. Se nana' níj so' a doj man Diose a ma'.

<sup>5</sup> Ase vaa yuvií noco' Diose ro', danj gaa nij so', tzaj ne daj chihaa míj se ca'vej rá nij so' naqui'yaj sa' Diose nimán nij so' ma'. Naxuun yaníj so' mán so' rihaan nij sí vaa danj ei.

<sup>6</sup> Atúj nij so' rá ve' tucua chana ne nicaj cuentá, ne tiha' yu'unj nij so' man nij chana atá daj a cacun' quij avii raá ma'an no' a.

<sup>7</sup> Niganj tucu'yón nij chana yo' nu' nana sa', tzaj ne daj chihaa míj ne guun nucaaj nij no' xcaj nij no' cuentá che'é nana ya yo' a mei.

<sup>8</sup> Ne xa' níj sí chí'ii yo', tzaj ne nda' rá se vaa quiran' 'o sí chruun cu'naj Janes gá sí chruun cu'naj Jambres gaa quitaá ri'yunj roj so' man sí cu'naj

Moisés gaa naá ro', danj quirán' guee nij síí taj ri'yunj man inanj nana sa' ei. 'Q se síí man inanj nana chí'ii raá me nij so' dō', síí aj tanáj xcō man Diose dō', me nij so' ei.

<sup>9</sup> Tzaj ne se quisíj nij so' xna'anj nana chí'ii yo' ndaa gan' ndo'o qui'yaj nij so' mei. 'Q se cunudanj nij yuvií man rihaan chumií xcaj cuentá se vaa sij nij snúú rma'an me nij so', ne se cuchumán rá nij yuvií a doj ca'mií nij so' mei. 'Q se ndá' rá se vaa quirán' roj síí cu'naj Janes ga síí cu'naj Jambres gaa ne cuchuman rá yuvií ca'mii roj so' ro', danj quirán' nij síí chí'ii yo' ei.

*Nana nihánj taj xna'anj se vaa ndá' se quirán' ní' sayuun, tzaj ne yo' o canoco' ní' se-nana Diose a*

<sup>10</sup> Ne xa' ma'án so', tzaj ne xcaj ndo'o so' cuentá che'é nana tucu'yón 'unj man yuvií dō', che'é tucuaán noco' 'unj dō', che'é se vaa guun raj qui'yáj rej rihaan ní' dō' a. Ne'én so' se vaa nucuaj ndo'o raj man Diose dō', se vaa nanaj rá 'unj caxrií yuvaa 'unj man yuvií dō', se vaa 'ee raj man tinúj dō', se vaa yo' nucuaj rá 'unj rihaan sayuun dō' ei.

<sup>11</sup> Ne aj ne'én so' daj vaa sayuun qui'yaj nii manj, ne aj ne'én so' nu' se vaa quirán' 'unj chuman' Antioquia dō', chuman' Iconio dō', chuman' Listra dō', uún chuguanj. Tzaj ne síí 'nij ra'a man ní' me síí tinanii manj rihaan nu' sayuun quirán' 'unj ei.

<sup>12</sup> Dan me se cunudanj uún nij yuvií me rá canoco' man Diose yuvií amán rá ni'yaj man Jesucristó ro', quirán' sayuun uún che'é Jesucristó ei.

<sup>13</sup> Tzaj ne xa' nij síí tihá' yu'unj, tzaj ne tanaanj a doj a doj a ca'anj nij so' tihá' yu'unj nij so' man nij yuvií dō', tihá' yu'unj nij yuvií man nij ma'an nij so' dō' ei.

<sup>14</sup> Ne ma'án so', tzaj ne yo' o canoco' so' nana cuchumán rá so' nana narí' so' á. 'Q se aj ne'én so' me níí me roj chana tucu'yón nana yo' mán so' ei.

<sup>15</sup> Ne aj ne'én so' se vaa asij ne'ej mé so', ne quene'én so' daj taj nij yanj guee, ne yanj yo' me se qui'yaj ca'vee xcaj ní' cuentá, ne che'é dan cuchumán rá so' ni'yaj so' man Jesucristó, ne cavii sa' so' nu' cavii nu' ca'anj yaj adonj.

<sup>16</sup> 'Q se ma'an Diose qui'yaj cachrón nii nu' nana man rihaan yanj yo' adonj. Ne che'é dan vaa se guun ndo'o man nana yo' rihaan ní' adonj. 'Q se vaa ndo'o rasuun nari' ní' uno ní' nana man rihaan yanj yo', ne taj xna'anj yo' rihaan ní' che'é cacun' tumé ní', ne axríj yuvaa yo' man ní' che'é cacun' 'yaj ní', ne tucu'yón yo' man ní' daj qui'yaj ní' ve'é qui'yaj ní' canoco' ní' man Diose, ne taj xna'anj yo' rihaan ní' daj gaa sa' nimán ní' uún a.

<sup>17</sup> 'Q se ní' sji noco' man Diose me se danj gaa ya, gaa ne yo' o ca'vee cunuú nana sa' nimán ní', ne yo' o qui'yaj ní' daj a rasuun sa' ei.

## 4

*Nana nihánj taj xna'anj se vaa se ca'ne' rá ní' ga suun a'mii natáj se-nana Diose rihaan yuvií ma'*

<sup>1</sup> Cuano nihánj me se me rá 'unj cunō Diose cunō Jesucristó síí ca'na' uún guun chij rihaan chumií nihánj síí ca'ne' cacun' che'é síí vaa i'na' dō', che'é síí cavi' dō', se vaa ca'ne' yá 'unj suun rihaan so'

<sup>2</sup> ca'anj so' natá' so' nana sa' á. Taj se 'yaj sese vaa ya'núj rihaan so' dō', se ne vaa ya'núj rihaan so' dō', taj se 'yaj ma'. Maan se ca'mií natáj yá so' ei. Cataj xna'anj so' rihaan yuvií che'é cacun' tumé nij yuvií, ne cataj so' se vaa nij ndo'o 'yaj nij so', ne nago' so' chrej nucuaj man nij so' qui'yaj nij so'

inanj se sa' ei. Tzaj ne se gaa ra'yanj rá so' caxrij yuvaá so' man nij yuvij mei. Tananj yo'o gaa inaj nimán so', ne ve'é tucuyón so' man nij so' ei.

<sup>3</sup>Q se vaa güii, ne se ca'vej rá nij yuvij cunō nij yuvij nana 'yaj ca'vee cunu sa' nimán nij so' man chuguanj. Maan se guun rá nij so' cunō nij so' yo'ó nana naca, ne che'é dan nana' nij so' que'ee sí tucuyón yo'ó nana me rá ma'an nij so' man nij so' a.

<sup>4</sup>Ne ca'anj nij so' rej nuvi' nana ya cunō nij so', ne nanj cuentó ne cunō nij so' a.

<sup>5</sup>Tzaj ne so' me se ca'nej sa' inanj so' tucuaán sa', ne gaa inaj nimán so' gaa rán' so' sayuun, ne yo'o nata' so' se-nana Diose rihaan nij sí ataa xcaj cuentá á. Dan me se qui'yaj suun so' nu' suun ca'ne' Diose rihaan so' á.

<sup>6</sup>Xa' 'unj, tzaj ne nichrun' cavj' 'unj che'é Diose, ne quinaj chumij nihánj nanj ei.

<sup>7</sup>'Unj me se quisij qui'yaj suun uxrá yaj suun ca'ne' Diose rihanj, ne yo'o canocó' 'unj se-tucuanj Jesucristó,

<sup>8</sup>ne cuano nihánj me se maan se na'vij uún 'unj quisij güii ca'na' uún sí 'nij ra'a man ní' rihaan chumij nihánj, ne rque so' 'o cachriin yâj cunuú raá 'unj, ne cataj so' se vaa nuvi' cacun' taj xrá a. Dan me se cuese nica' nimán ya me Jesucristó, ne nuveé che'e orún' 'unj me qui'yaj so' danj ma'. Ne veé danj qui'yaj so' che'é cunudanj nij yuvij me ndo'o rá ca'na' uún so' rihaan chumij nihánj nanj adonj.

### *Nana nihánj taj xna'anj se vaa cuchí' Timoteo rihaan Pabló a*

<sup>9</sup>Ra'yanj ca'na' so' rej nuu 'unj nihánj ca'na' so' ni'yaj so' manj ei.

<sup>10</sup>Q se tanáj sí cu'naj Demas manj, che'é se caran' doj rá so' ni'yaj so' rasuun man rihaan chumij nihánj, ne ca'anj so' chuman' Tesalónica nanj ei. Sí cu'naj Crescente ca'anj estadó Galacia, ne sí cu'naj Titó ca'anj estadó Dalmacia ei.

<sup>11</sup>Daj orún' sí cu'naj Lucas nicun' ga 'unj nihánj cuano nanj ei. Nica' so' man sí cu'naj Marcos ca'na' so' ei. Q se vaa ndo'o suun qui'yaj suun 'unj, ne racuj' so' manj, raj a.

<sup>12</sup>Ne sí cu'naj Tíquico me se ca'néj 'unj man so' ca'anj so' chuman' Efeso ei.

<sup>13</sup>Taná' 'unj se-rotó 'unj tucua' sí cu'naj Carpo sí ne chuman' Troas, ne nica' so' man yo' ca'na' so' doj ei. Dan me se nica' so' nij daán 'unj do', nij yanj nuj xcuu do', ca'na' so', che'é se ra'yanj ndo'o achiin yo' manj nihánj ei.

### *Nana nihánj taj xna'anj se vaa qui'yaj ndo'o sí cu'naj Alejandro sayuun man Pabló a*

<sup>14</sup>Dan me se xa' sí cu'naj Alejandro sí 'yaj suun aga', tzaj ne qui'yaj ndo'o so' sayuun manj, ne narque sí 'nij ra'a man ní' sayuun man so' che'é sayuun qui'yaj so' manj, raj a.

<sup>15</sup>Q se tadó so' ga so' se gaa nanj qui'yaj so' sayuun man so' á. Q se na'vej uxrá rá so' cunō yuvij se-nana ní' a ma'.

### *Nana nihánj taj xna'anj se vaa racuj' Jesucristó man Pabló gaa canicun' Pabló rihaan cuese a*

<sup>16</sup>Gaa ca'anj 'unj rihaan nij sí nica' suun qui'yaj nii, ne nuvi' a 'ó tinúú ní' racuj' manj a ma'. Maan se tanáj cunudanj nij so' man orún' 'unj rihaan nij sí nica' suun, tzaj ne na'vej raj cara Diose cacun' xráa nij so' a mei.

<sup>17</sup> 'Q se canicun' sí 'nj ra'a man ní' gá 'unj, ne so' me sí qui'yaj guun nūcuáá 'unj natá' 'unj nū' se-nānā Diose cuno cunudanj nij yuvii yaníj, ne tinanii so' manj rihaan sayuun nocoo,

<sup>18</sup> ne so' me sí tinanii manj rihaan daj a se nij me rá nii qui'yaj nii manj, ne so' me sí qui'yaj cavii sa' 'unj cayáán 'unj gá so' asa' nanij so' rej xta' ne guun chij so' rihaan chumii nihánj a. Ve'é inanj ca'mii ní' che'é so' nū' cavii nū' ca'anj á. Veé danj gaa ya ei.

*Nanā nihánj taj xna'anj se vaa ve'é cumān nij tuvī' Timoteo, rá nij tuvī' Pabló a*

<sup>19</sup> Me rá 'unj se vaa ve'é cumān chana cu'naj Prisca do', nicā no' sí cu'naj Aquila do', nij tucua sí cu'naj Onesíforo do' ei.

<sup>20</sup> Quináj sí cu'naj Erasto chuman' Corinto, ne sí cu'naj Trófimo me se ran' so' a. Che'é dan tanáj 'unj man so' chuman' Mileto nanj ei.

<sup>21</sup> Ra'yānj ca'na' so' nihánj yaj gaa ataa ca'na' yavii acoj ndo'o a. Ve'é cayáán so', rá sí cu'naj Eubulo do', sí cu'naj Pudente do', sí cu'naj Lino do', chana cu'naj Claudia do', taran' nij tinúú ní' do' ei.

<sup>22</sup> Me rá 'unj cayáán sí 'nj ra'a man ní' gá nimán so', ne qui'yaj ndo'o Diose se luj che'é nij soj a.



## Nihánj me 'o yanj cartá qui'yaj sí cu'naj Pabló ca'néé so' rihaan sí cu'naj Titó a

<sup>1</sup> 'Unj ro', me sí cu'naj Pabló, sí 'yaj suun che'é Diose, ne cune' Jesucristó mán 'unj guún 'unj apóstol ca'anj rihaan nij yuvij narii Diose man che'é rej narj' nij so' se-tucuanj Jesucristó, ne narj' nij so' se-nana Diose nana ya, ne ve'é uxrá canoco' nij so' man Diose, qui'yaj nana ya yo' a.

<sup>2</sup> Gaa ne guun ya rá nij yuvij se vaa cayáan nij yuvij ga Diose nu' cavii nu' ca'anj, ndaa vaa cata' tu'va Diose asij naá ndo'o, ne xa' Diose, tzaj ne ne a'mii ne Diose ma'.

<sup>3</sup> Gaa ne gaa quisij güii cachrón Diose, ne tihaan Diose rihaan ní' se vaa ca'vee cayáan ní' ga Diose nu' cavii nu' ca'anj a. Danj qui'yaj so' gaa ca'ne' so' suun rihanj se vaa ca'mii natáj 'unj se-nana so', ne xa' so', tzaj ne so' me sí tinanii man ní' rihaan sayuun adonj.

<sup>4</sup> Dan me se qui'yáa 'unj yanj nihánj ca'nej 'unj rihaan so' sij cu'naj Titó a. Amán rá so' se-nana Jesucristó nana cataj xna'anj 'unj rihaan so', ne cuyaan vaa nana amán rá ní', ne che'é dan ase vaa 'o ta'nij ro', danj vaa so' rihanj, tinuj. Me rá 'unj qui'yaj Rej ní' Diose do', qui'yaj Jesucristó sí tinanii man ní' rihaan sayuun do', se luj che'é so', ne gaa xej nimán so', qui'yaj roj so' a.

*Nana nihánj taj xna'anj se vaa cune' sí cu'naj Titó doj sí guun chij nicaj yu'unj man nij sí amán rá ni'yaj man Jesucristó yanj estadó cu'naj Creta a*

<sup>5</sup> Tanáj 'unj mán so' estadó Creta, che'é se vaa doj suun ataa tinavii 'unj rej yo', ne me rá 'unj tinavii so' suun yo' a. Dan me se me rá 'unj cune' so' doj sí guun chij nicaj yu'unj man nij sí amán rá ni'yaj man Jesucristó yanj 'o 'o chuman' yo' a.

<sup>6</sup> Dan me se aj cataj xna'anj 'unj rihaan so' daj gaa nij sí uun chij cune' so' á. Inanj sí nuvi' cacun' tumé do', sí nicaj raan nica do', sí amán rá ta'nii ni'yaj man Jesucristó do', cune' so' á. Tzaj ne sese sij 'yaj cacun' ga chana do', sij tucuaá rihaan rej do', me ta'nii yo'o so', ne se cune' so' man so' ma'.

<sup>7</sup> Dan me se inanj sí nuvi' cacun' tumé guun sí uun chij, che'é se sij nicaj yu'unj man nij yuvij noco' man Diose me sí uun chij yo' adonj. 'O se se ca'mii xta' nij sí uun chij ma'. Se gaa ya'aan rá nij so' ma'. Se guun xnó nij so' ma'. Se go' nij so' tuvi' nij so' ma'. Se tiha' yu'unj nij so' tuvi' nij so' che'é yan ca'nee nij so' sa'anj man tuvi' nij so' ma'.

<sup>8</sup> Maan se ve'é qui'yaj nij so' ca'vej nij so' cotoj yuvij 'na' yo'ó chuman' tucuaá nij so', ne rque nij so' chraa cha nij yuvij á. Gaa niha' rá nij so' ni'yaj nij so' man yuvij 'yaj se sa', ne xcaj nij so' cuentá daj 'yaj ma'an nij so' uún á. Inanj ve'é qui'yaj nij so' rihaan tuvi' nij so' do', rihaan Diose do' a. Se guun nij so' sí 'yaj canaán se chi'ii rihaan ma'.

<sup>9</sup> Raan canoco' nij so' se-nana Diose nana tucu'yón núj rihaan nij sí noco' man Diose a. Danj qui'yaj nij so', gaa ne guun nucuaj nij so' nago' nij so' se-tucuanj Diose tucuaán sa' man yo'ó nij yuvij, ne guun nucuaj nij so' tihaan nij so' rihaan nij sí tucu'yón yo'ó tucuaán ei.

*Nana nihánj taj xna'anj se vaa qaráan sí cu'naj Titó chrej rihaan nij sí cuchumán rá ni'yaj man Jesucristó se vaa se canoco' nij so' yo'ó tucuaán a*

10 Dan me se man ndo'o sí tucuaá do', sí tu'va rma'an do', sí tiha' yu'unj do', estadó Creta, ne sí chí'ii doj rihaan yo'ó nij so' me nij sí taj se vaa no xcúun nij sn'ó noco' man Jesucristó cata' ta'nga' man nij so', taj nij sí chí'ii yo' a.

11 Vaa che'é ndo'o ca'ne' rá nij so' ga nana vaa danj qui'yáá so' ei. 'O se ri' ndo'o rá que'ee nij tucua yuvi, 'yaj nij so' gaa tucuyón nij so' nana vaa danj nana ne nó xcúun nij so' tucuyón nij so' nanj adonj. Ne inanj sa'anj quir' uun nij so', rá nij so', don 'yaj chí'ii nij so' adonj.

12 Dan me se yo'ó tuvi' ma'an nij so' sí nata' se-nana ya'anj noco' nij so' ro', cataj so' se vaa xa' nij sí man Creta, tzaj ne sí ne me nij so', ne xcuu chí'ii me nij so', ne inanj sí rmi me rá caraa rque uun me nij so', taj ma'an tuvi' nij so' ni'yaj so' man nij so' a.

13 Ne dan me se ya uxrá cataj so' che'é nij tuvi' so' ei. Che'é dan sca' inanj cataj xna'anj so' che'é se-cacun' nij so' rihaan nij so', gaa ne ca'vee canicaj nij so' canoco' nij so' se-tucuanj ní' s'j amán rá ni'yaj man Jesucristó, ne gaa sa' nij so' ei.

14 Dan me se danj qui'yáá so', gaa ne se gaa nanj xcaj nij so' cuentá che'é nij cuentó uun nanó nij yuvi israelitá ei. Ne se cuno nij so' se vaa taj nij yuvi na'vej rá canoco' man Diose man rihaan chumi nihánj rihaan nij so' ma'. Sese xcaj nij so' cuentá a'mii yuvi uun, ne tanáj nij so' tucuaán ya nanj adonj.

15 Dan me se yuvi vaa sa' nimán, tzaj ne sa' vaa cunudanj rasuun rihaan nij so', ne xa' yuvi vaa chí'ii nimán, tzaj ne daj a rasuun ruvi' ni'yaj nij sí chí'ii sí na'vej rá cuchuman rá ni'yaj man Jesucristó ro', chí'ii vaa taran' rasuun rihaan nij so' nanj adonj.

16 Ne ne'en nij so' man Diose, taj ma'an nij so', tzaj ne ni'yaj ní' se vaa 'yaj nij so', ne xcaj ní' cuentá se vaa ne ne'en uxrá nij so' man Diose a ma'. Tananj sí chí'ii me nij so', ne sí ne uno me nij so', ne taj vaj a doj suun sa' ne ne'en nij so' qui'yaj suun nij so' man adonj.

## 2

*Nana nihánj taj xna'anj che'é tucuaán cuchruj sí cu'naj Titó che'é nij sí cuchumán rá ni'yaj man Jesucristó a*

1 Ne ma'an so' me se tucuyón so' nu' nana sca' achiin man nij so' á.

2 Cataj xna'anj so' rihaan nij chí'ii nga se vaa se guun xno' nij so' ma'. Gaa ni'yanj nij so' á. Xcaj nij so' cuentá daj qui'yaj nij so' á. Yo'ó cuchuman rá nij so' ni'yaj nij so' man Diose, ne gaa 'ee rá nij so' tuvi' nij so', ne daj chihaa míj se ca'ne' rá nij so' ga se-tucuanj Jesucristó che'é sayuun ma'.

3 Dan me se ve'e danj ve'é ndo'o qui'yaj nij chana' hij uun, gaa ne ca'vee xcaj yuvi' cuentá se vaa chana' sa' noco' uxrá man Diose me nij no', guun rá nij yuvi' a. Se quinano' nij chana' hij cuentó ne che'é tuvi' nij no' ma'. Se gaa niha' rá nij no' co'q ndo'o nij no' na vinó ma'. Tananj guun nij no' chana' ve'é tucuyón man tuvi'.

4 Gaa ne ca'vee nago' no' chre' sa' man nij chana' ta'aj se vaa gaa 'ee rá nij chana' ta'aj nica' no' do', ta'ní' no' do' a.

5 Ne ve'é cutumé nij chana' ta'aj daj qui'yaj ma'an nij no' do', inanj nica' no' cotoj ga' no' do', ve'é cutumé nij no' ve' tucua' nij no' do' á. Ne chana' sa' guun nij no', ne ve'é cuno' nij no' rihaan nica' nij no' á. Danj qui'yaj nij no', cataj

chanā chij rihaan nij no', gaa ne se gaa nanj ca'mii yuvij ne amán rá ni'yaj man Jesucristó nanā nij che'é se-nanā Diose a.

<sup>6</sup> Ne nago' so' chrej nucuaj man nij sí tachruu uún se vaa xcaj nij so' cuentá daj gaa qui'yaj nij so' á.

<sup>7</sup> Ne ma'án so' ro', ve'é qui'yaj suun so' nu' suun sa', ne quene'en nij tinúú ní' daj 'yáá so', gaa ne cuyaán qui'yaj nij so' ga so' á. Inanj tucuaán sca' tucu'yón so' á. Ne guún so' 'o sí ní'yanj a'mii a.

<sup>8</sup> Inanj nanā sa' ca'mii so' á. Gaa ne guun na'aj nij sí taj ri'yunj man ní' che'é se se ca'vee ca'mii nij so' nanā nij che'é ní' a.

<sup>9</sup> Ne cataj xna'anj so' rihaan nij mozó se vaa ve'é cunō nij mozó rihaan se-ru'vee mozó, ne qui'yaj suun nij mozó nu' suun ca'ne' ní' ru'vee rihaan nij so' á. Ne qui'yaj mozó guun niha' rá se-ru'vee mozó ni'yaj so' man mozó yo' á. Se ca'mii cunu' mozó ga se-ru'vee mozó ma'.

<sup>10</sup> Se qui'yaj ituu mozó si'yaj se-ru'vee mozó ma'. Tananj ve'é qui'yaj mozó, ne xcaj se-ru'vee mozó cuentá se vaa ca'vee gaa nucuaj rá ru'vee man mozó se vaa me ma'an rasuun qui'yaj mozó, gaa ne ve'é inanj ca'mii yuvij che'é tucuaán tucu'yón ní' tucuaán che'é Diose sí tinanii man ní' rihaan sayuun adonj.

<sup>11</sup> Dan me se aj xcaj ní' cuentá se vaa qui'yaj ndo'o Diose se luj che'é cunudan̄j yuvij, se vaa ca'vee quinanii cunudan̄j nij yuvij rihaan chrej chi'ij uun chij nimán nij yuvij,

<sup>12</sup> ne che'é dan xcaj ní' cuentá se vaa nō xcúún ní' ca'ne' rá ní' ga rasuun na'vej rá Diose qui'yaj ní' a. Ne se qui'yaj ní' inanj se vaa me rá nee man ní' qui'yaj yo' ma'. 'O se xcaj ní' cuentá daj qui'yaj ní', ne tucuaán nicā qui'yaj ní', ne qui'yaj ní' inanj se vaa me rá Diose qui'yaj ní' gaa yaj ne ní' rihaan chumij nihánj cuanō á.

<sup>13</sup> Ne na'vij ndo'o ní' ca'na' uún Jesucristó sí tinanii man ní' rihaan sayuun, ne dan me se guun niha' uxrá rá ní' che'é se guun ya' rá ní' se vaa ca'na' uún so' a. Ne xa' so', tzaj ne quene'en ní' se vaa ve'é uxrá vaa so', ne Diose uun chij ndo'o me ya' so' adonj.

<sup>14</sup> Ne so' me sí ca'néé nimán cavi' che'é ní', che'é rej ca'vee ca'ne' rá ní' ga me ma'an tucuaán chi'ij canoco' ní' gaa rque, ne ca'vee cunū sa' ní', ne guun ní' yuvij noco' man orún' so', ne guun niha' ndo'o rá ní' qui'yaj suun ní' suun sa' adonj.

<sup>15</sup> Nanā nihánj me chrej sa' ya' nago' so' rihaan nij tinúú ní', ne sca' ndo'o ca'mii so', ca'ne' so' suun rihaan nij so', gaa ne ca'ne' rá nij so' ga se chi'ij á. Ne dan̄j qui'yáá so' do', dan̄j ca'mii so' do', gaa ne daj chihaā mij se guun cataj yuvij se vaa taj yu'vee nó so' do', nanā a'mii so' do' a.

### 3

*Nanā nihánj taj xna'anj se vaa ve'é qui'yaj ní' rihaan yuvij che'é se tinanii Diose man ní' rihaan sayuun a*

<sup>1</sup> Cataj uún so' rihaan nij yuvij se vaa caraā cochroj nij yuvij rihaan nij sí nicāj suun, ne cunō nij yuvij rihaan nij so' á. Ca'vej nij yuvij qui'yaj suun nij yuvij suun a'ne' nij sí nicāj suun rihaan nij so', ne me ma'an suun sa' qui'yaj suun nij so' á.

<sup>2</sup> Se ca'mii chi'ij nij so' ni'yaj nij so' tuvi' nij so' ma'. Se cunu' nij so' ga tuvi' nij so' ma'. Maan se ve'é inanj qui'yaj nij so', ne nica' ndo'o ca'mii nij so' rihaan cunudan̄j yuvij a.

<sup>3</sup> Dan me se asij rquē, ne sít ni'yōn rma'ān me ma'ān ní, ne ne cunō ní rihaan tuvi' ní, ne canoco' ní tucuáán tiha' yu'unj, ne qui'yaj ní náá guun se vaa guun rá ní' qui'yaj ní' a. Dan me se quij me rá ní' ni'yaj ní' tuvi' ní, ne guun xcoj ruvāá rá ní' ni'yaj ní' tuvi' ní, ne quitáá ri'yunj tuvi' ní' ni'yaj nij so' man ní, ne nachri' ní' man tuvi' ní' a.

<sup>4</sup> Tzaj ne gaa xcaj ní' cuentá che'é Diose sít tinanii man ní' rihaan sayuun, se vaa so' me sít me rá raćuíj man ní', gaa ne dan me se quene'en ní' se vaa cunuu 'eē rá so' man ní' a.

<sup>5</sup> Dan me se tinanii Diose man ní' rihaan chrej chi'ij uun chij nimán ní' ei. Nuvéé che'e se sa' qui'yaj ma'ān ní' me tinanii Diose man ní' rihaan sayuun ma'. Maan se cunuu 'eē rá ma'ān Diose quene'en so' man ní, ne rquē Diose Nimán Diose rihaan ní', don cunuu naçá nimán ní' ne cunuu sa' nimán ní' adonj.

<sup>6</sup> Dan me se maan che'é Jesucristó sít tinanii man ní' rihaan sayuun me qui'yaj ndo'o Diose se luj rihaan ní, ne ndaa ayuu rma'ān se luj, qui'yaj so' ei.

<sup>7</sup> Se luj qui'yaj so' me se tinavij so' cacun' xráá ní, ne cunuu sa' ní, qui'yaj so', ne maan che'é dan ca'anj ní' cayáán ní' ga so' nu' cavii nu' ca'anj ndaa vaa me rá ya ní' ei.

<sup>8</sup> Ya uxrá vaa nu' nana nihánj adonj.

*Nana nihánj taj xna'anj che'é nij yuvij 'yaj unu' nij sít cuchumán rá ni'yaj man Diose a*

Ne me rá 'unj sca' ca'mii so' nu' nana nihánj rihaan nij yuvij amán rá ni'yaj man Diose, che'é rej xcaj nij so' cuentá se vaa nō xcúún nij so' qui'yaj suun nij so' suun sa' inanj á. Sese danj qui'yaj nij so', ne sij vaa sa' me nij so', ne cavii sa' doj yuvij, qui'yaj nij so' adonj.

<sup>9</sup> Tzaj ne se canó tuví so' ga yuvij mei. Sít ni'yōn me sít 'yaj danj chuguanj. Se nanó rá so' che'é xii so' gaa naá daj sij me nij so' ma'. Se canó tuví so' che'é se-tucuanj Moisés mei. 'Q se qui'yaj rma'ān danj nanj ei. Taj cuentá ní' 'yá danj ma'.

<sup>10</sup> Sese vaa 'o sít 'yaj unu' ndo'o yuvij, ne cataj xna'anj so' rihaan so' se vaa ca'ne' rá so' ga suun 'yaj unu' yuvij a. Ndaa vij ca'mii so' rihaan so', ne sese se ca'vej rá so' cunō so', ne ca'anj yanj so' rihaan so' ei.

<sup>11</sup> 'Q se xa' sít 'yaj unu' yuvij, tzaj ne aj tanáj so' tucuáán ya, ne tumé so' cacun' ei. Ne maan che'é cacun' ata so' 'yaj tananj yuun che'e ri' so' nanj ei.

*Nana nihánj taj xna'anj che'é suun a'ne' sít cu'naj Pabló rihaan sít cu'naj Titó a*

<sup>12</sup> Ca'nej 'unj man sít cu'naj Artemas cuchí' so' rihaan so', ne sese se ca'vee cuchí' so', ne ca'nej 'unj man sít cu'naj Tíquico a. Asa' cuchí' so' rihaan so', ne ra'yanj cuchí' so' chuman' Nicópolis, gaa ne nari' tuvi' ní' ei. 'Q se guun rá 'unj cayáán 'unj chuman' yo' yavii acoj ndo'o adonj.

<sup>13</sup> Raćuíj so' man sít cu'naj Zenas licenciado sít a'mii che'é yuvij rihaan cuesē do', man sít cu'naj Apolos do', qui'yaj chuvij roj so' ca'anj roj so' ei. Taj se cachijn man roj so', qui'yáa so' ma'. 'Q se me ma'ān rasuun achiin man roj so', ne gō' so' ei.

<sup>14</sup> Ne me rá 'unj nari' yo'ó nij tinúú ní' qui'yaj suun ndo'o nij so' suun sa' che'é tuvi' nij so' sít achiin ya rasuun man uún chuguanj. Se taj, ne taj se gún' man nij so' ma'.

*Nanq nihánj taj xna'anj se vaa ve'é cumān nij tuvī' Titó, rá nij tuvī' síí cu'naj Pabló a*

<sup>15</sup> Me rá cunudanj nij yuvij yanj ga 'unj cuano se vaa ve'é cayáán so' ei. Ne cataj so' rihaan nij síí 'ee rá man ní' nij síí noco' man Diose se vaa ve'é cumān cunudanj nij so' ei. Me rá 'unj qui'yaj ndo'o Diose se luj che'é cunudanj nij soj ndaa cayuu rma'an se luj qui'yaj Diose ei.

## Nihánj me 'o yanj cartá qui'yaj síi cu'naj Pabló ca'néé so' rihaan síi cu'naj Filemoó a

<sup>1</sup> 'Uñj ro', me síi cu'naj Pabló síi 'nij taga' cuano che'é se nocó' 'uñj man Jesucristó, ne nicun' tinúú ní' Timoteo ga 'uñj cuano, ne dan me se 'yáá 'uñj yanj nihánj ca'nej 'uñj rihaan so' sij cu'naj Filemoó a. 'Ee rá 'uñj mán so', ne tuvi' ní' síi 'yaj suun ga 'uñj mé so',

<sup>2</sup> ne veé danj vaa uún nu' nij síi nocó' man Diose nuu chre' tucua so' do', ra'vij ní' chana cu'naj Apia do', síi cu'naj Arquipo síi yo'o rquee che'é suun 'yaj suun ní' do', nu' rihaan nij so' 'yáá 'uñj yanj nihánj ca'nej 'uñj rihaan nij soj ei.

<sup>3</sup> Me rá 'uñj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é nij soj, ne gaa xej nimán nij soj, qui'yaj roj so', raj ei.

*Nana nihánj taj xna'anj se vaa nago' Pabló graciá rihaan Diose che'é síi cu'naj Filemoó che'é se canoco' sa' síi cu'naj Filemoó man Diose a*

<sup>4</sup> Daj a güii gaa tanañ nanj achín nì'yáá 'uñj rihaan Diose, achín nì'yáá 'uñj che'é so', ne nagó' 'uñj graciá rihaan Diose che'é so' ei.

<sup>5</sup> Danj 'yáá 'uñj, che'é se ca'na nana rihanj se vaa amán ndo'o rá so' nì'yaj so' man Jesucristó sij 'nij ra'a man ní', ne 'ee ndo'o rá so' man cunudanj nij síi sa' nocó' man so' vaa cunó 'uñj ei.

<sup>6</sup> Dan me se che'é se aj canocó' so' se-tucuanj Jesucristó ga yo'ó nij tinúú ní', ne che'é dan achín nì'yáá 'uñj se vaa ca'vee xcay yo'ó nij so' cuentá che'é nu' se sa' nicaj nij tinuj nij soj qui'yáá so', gaa ne ca'vee cavii sa' doj Jesucristó qui'yaj taran' nij soj a.

<sup>7</sup> 'Q se guun niha' uxrá rá 'uñj, ne nari' nucaj nimán 'uñj, che'é se 'ee rá so' man tinúú so' ne nuu cujj rá nij síi sa' nocó' man Diose 'yáá so', tinuj.

*Nana nihánj taj xna'anj se vaa me rá Pabló ve'é nacaj uún síi cu'naj Filemoó man síi cu'naj Onésimo a*

<sup>8</sup> Nda' se uun chij ndo'o 'uñj ne ca'vee ca'ne' 'uñj suun rihaan so' qui'yáá so' ndaa vaa suun qui'yáá so', tzaj ne taj ma'.

<sup>9</sup> Maan se ve'é rquee 'uñj mán so' qui'yáá so' ndaa vaa no xcúún so' qui'yáá so' ei. 'Uñj sij cu'naj Pabló nihánj me se aj chii nga mej ne 'nij 'uñj taga' cuano che'é se nocó' 'uñj man Jesucristó ei. 'Q se ne'én 'uñj se vaa 'o 'ee rá so' tinúú so', ne che'é dan cachinj nì'yáá 'uñj doj rihaan so'

<sup>10</sup> che'é síi cu'naj Onésimo a. Dan me se ase vaa 'o ta'níj ro', danj vaa so' rihanj cuano, che'é se gaa 'nij 'uñj taga', ne cataj xna'anj 'uñj rihaan so' che'é Jesucristó, ne guun che'e so' canoco' so' man Jesucristó nanj adonj.

<sup>11</sup> Dan me se asij rque doj me se taj se gún' a doj man so' rihaan so' ma'. Tzaj ne cuano nihánj me se cunuu sa' so', ne vaa se guun so' rihaan ní' cuano ei.

<sup>12</sup> Dan me se aj ca'néé 'uñj man so' cuchí' uún so' rihaan so', ne ne'én so' se vaa 'ee uxrá raj man so' adonj.

<sup>13</sup> Ne guun rá 'uñj nayon so' rihaan so' quinaj so' nihánj rej 'nij 'uñj taga' nihánj che'é se-nana Jesucristó nana sa', ne qui'yaj suun so' rihaan 'uñj nihánj che'é so', raj ei.

<sup>14</sup> Tzaj ne ne ca'vej rá 'unj quinaj so' rej nihánj, che'é se ndaa tu'va ma'an yá so' cavii, gaa ne quinaj so', raj ei. 'Q se ne guun raj qui'yáj fuerzá mán so' qui'yáá so' se ndo'o che'ej ma'. Maan se inanj se rii nimán ma'an so' qui'yáá so' se ndo'o yo' che'ej, raj ei.

<sup>15</sup> Dan me se maan che'é rej ca'vee cayáán so' ga so' nu' cavii nu' ca'anj ro', che'é dan ca'anj yaníj so' doj rihaan so' doj güii ei.

<sup>16</sup> Tzaj ne yaj me se se guun so' mozó uun rihaan so' nu' cavii nu' ca'anj yaj a ma'. Tanañ a sa' doj gaa so' rihaan yo'o nij mozó rihaan so', ne 'o tinúú ní' sí 'ee rá ní' man guun so' ei. 'Q se 'ee uxrá raj man so', ne táá a so', ne doj a gaa 'ee rá ma'an so' man so' a ei. 'Q se sij 'yaj suun rihaan so' me so' rihaan chumii nihánj, ne sij noco' man sí 'nij ra'a man ní' me uún so', ne doj a gaa ya rá so' man so' ei.

<sup>17</sup> Dan me se sese tinuj ya ní', ne ve'é na'mii sa' so' ga so', ne daj se uun rá so' ne'én so' manj ro', danj guun rá so' quene'én so' man so' ei.

<sup>18</sup> Ne sese qui'yaj chi'ii so' mán so' do', sese vaa xcúún qui'yaj so' rihaan so' do', ne ma'an 'unj naru'vee rihaan so' se vaa qui'yaj xcúún so' ei.

<sup>19</sup> Ma'anj ra'aj sij cu'naj Pabló cachronj nana nihánj se vaa naru'vee 'unj cunudanj se vaa qui'yaj xcúún so' rihaan so' ei. Veé danj vaa xcúún rihaan so' do', tzaj ne taj che'é cataj xna'anj 'unj rihaan so' se vaa xcúún rihaan ma'an so' se vaa quinanii so' rihaan sayuun nu' cavii nu' ca'anj, qui'yaj ma'anj gaa natá 'unj se-nana Jesucristó rihaan so' ma'.

<sup>20</sup> Dan me se me inanj rá 'unj qui'yáá so' se ndo'o che'ej, che'é se sij noco' man sí 'nij ra'a man ní' me ní', tinuj. 'Q se ndaa cunuj rá 'unj, qui'yáá so' che'é Jesucristó ei.

<sup>21</sup> Dan me se gaa cachrón 'unj nana nihánj, ne nucuaj rá 'unj mán so' se vaa qui'yáá so' nu' nihánj, ne ndaa doj a qui'yáá so' rihaan se vaa cataj xna'anj 'unj rihaan so' chuguanj.

<sup>22</sup> Ne me rá 'unj naquiyaj chuvii so' ve' cané 'unj doj ga so' á. 'Q se guun ya raj se vaa che'é se cachín ni'yaj soj rihaan Diose che'ej ro', che'é dan raquíj Diose manj cuchij rihaan soj, raj adonj.

*Nana nihánj taj xna'anj se vaa me rá nij tuvi' Pabló se vaa ve'é cayáán sí cu'naj Filemó a*

<sup>23</sup> Me rá sí cu'naj Epafras se vaa ve'é cayáán so' á. 'Nij so' taga' ga 'unj, che'é se sij noco' man Jesucristó me so' a.

<sup>24</sup> Ne sí cu'naj Marcos do', sí cu'naj Aristarco do', sí cu'naj Demas do', sí cu'naj Lucas do', me rá uún se vaa ve'é cayáán so' a. Taran' nij so' me sí 'yaj suun ga 'unj adonj.

<sup>25</sup> Me rá 'unj qui'yaj ndo'o Jesucristó sij 'nij ra'a man ní' se luj che'é nimán nij soj adonj.

## Nihánj me 'o yanj cartá qui'yaj yo'o so' ca'néé so' rihaan nij yuvii israelitá noco' man Diose a

*Nana nihánj taj xna'anj se vaa sa' uxrá vaa ta'níi Diose síi cu'naj Jesucristó a*

<sup>1</sup> Nata' uxrá Diose se-nana Diose rihaan nij síi nata' se-nana Diose gaa naá, ne nata' nij so' nana yo' rihaan xii ní' nij síi cumán gaa naá a. Dan me se do' do' cataj xna'anj Diose se-nana so' rihaan nij síi nata' yo', ne ino vaa qui'yaj Diose ga 'o 'o nij so', gaa cataj xna'anj Diose se-nana Diose rihaan 'o 'o nij so' a.

<sup>2</sup> Tzaj ne yaj gaa nichrun' ca'anj ni'ya chumii nihánj me se cataj xna'anj ma'an ya ta'níi Diose se-nana Diose rihaan ní', qui'yaj Diose, ne ta'níi Diose me se so' me síi cune' Diose man se vaa guun chij so' rihaan cunudanj rasuun vaa güii, ne so' me síi qui'yaj cunudanj chumii, qui'yaj Diose ei.

<sup>3</sup> Ne ase vaa ma'an Diose ro', danj vaa so' chuguanj. Dan me se ni'yaj ní' man so', ne xcaj ní' cuentá se vaa ve'é ndo'o vaa Diose, ne xcaj ya ní' cuentá daj vaa ma'an Diose ei. Ne che'é se sji nucuj ndo'o me so' ro', che'é dan maan nana avii uun tu'va so', ne 'o mán chre' nu' rasuun, ne se quiri' a 'ó rasuun qui'yaj so' ma'. Che'é dan tinavij so' cacun' tumé ní', gaa ne ca'anj cayáan so' rej xta' ndo'o rej x'nuj Diose, ne rej nuva' Diose yáan so' cuano ei.

<sup>4</sup> Dan me se guun so' síi sa' doj rihaan nij se-mozó Diose, ne noco uxrá doj vaa suun ata' so' rihaan suun ata' taran' nij se-mozó Diose nanj chuguanj.

<sup>5</sup> 'O se aj ne'en soj nana nihánj nana ca'mii Diose che'é ta'níi so' a:

—Ta'níj mé so' á. Cuanó nihánj me se quene'en yuvii se vaa ta'níj mé so', qui'yáj a. —Danj ca'mii Diose che'é ta'níi Diose, tzaj ne nuveé rihaan se-mozó Diose ca'mii Diose nana vaa danj ma'.

Ne nihánj me nana ca'mii Diose che'é ta'níi Diose, cataj Diose:

—Guún 'unj rej so', ne guun so' ta'níj a —cataj uún Diose che'é ta'níi Diose a. Tzaj ne ne ca'mii so' nana vaa danj che'é se-mozó so' ma'. Maan che'é ta'níi so' ca'mii so' nana yo' adonj.

<sup>6</sup> Dan me se so' me síi guun síi chava' rihaan taran' ní' sji noco' man Diose a. Ne danj Diose taj se vaa asa' ca'na' uún so' rej cumán taran' nij yuvii gaa i'na' rihaan chumii nihánj qui'yaj Diose, ne quina' vij taran' nij se-mozó Diose rihaan so', taj danj Diose a.

<sup>7</sup> Ne a'mii uún danj Diose che'é nij se-mozó Diose, taj yo' se vaa nana uun do', nda' rá se vaa daa ya'an do', vaa se-mozó Diose, qui'yaj Diose a.

<sup>8</sup> Tzaj ne vaa doj nana nó rihaan danj Diose nana a'mii rihaan ma'an ta'níi Diose, ne nana yo' taj: “Diose mé so', ne quiri' ta'ngá' so' nu' cavii nu' ca'anj, ne nica gaa rá so' nica yu'unj so' man yuvii nu' cavii nu' ca'anj a.

<sup>9</sup> Niha' inanj rá so' canocó' so' chrej sa', tzaj ne nachri' uxrá so' chrej chi'ii ei. Che'é dan Diose síi uun chij rihaan so' ro', cune' so' mán so', se vaa cavii sa' so' doj rihaan nij tuví' so' a”, taj danj Diose a.

<sup>10</sup> Ne taj uún danj Diose: “Asij guun che'e chumii nihánj, ne so' me síi cune' man chumii nihánj, Señor. Ne ma'án so' ra'a yá so' qui'yáa so' nu' se man rej xta' adonj.



<sup>11</sup> Ne vaa güii, ne quínávij nu' nihánj, tzaj ne daj chihaa míj se quínávíj so' ma'. Dan me se ase vaa yatzíj nga ro', danj gaa nu' chumíj nihánj do', nu' rej xta' do' ei.

<sup>12</sup> Ne ase vaa yatzíj ro', danj gaa narumíj so' man roj yo', ne guun ino roj yo', quí'yáa so' ei. Tzaj ne se cunuu ino ma'án so' ma'. 'O veé danj gaa so', ne daj chihaa míj se cavi' so' man chuguanj", taj uún danj Diose che'é ma'an ta'níi Diose a.

<sup>13</sup> Ne ca'míi uún Diose rihaan ta'níi Diose, cataj so':

—Cayáán so' rej x'núú 'unj rej nuva' 'unj, ne qui'yaj canaán 'unj rihaan nij síi taj ri'yunj mán so', ne quiríj ta'ngá' so' rihaan nij so' a —cataj Diose rihaan ta'níi Diose a. Tzaj ne a 'ó rihaan se-mozó so' ne ca'míi so' danj ma'.

<sup>14</sup> Dan me se xa' nij se-mozó Diose, tzaj ne nana un me nij so' a. 'Yaj suun nij so' rihaan Diose, ne ca'néé Diose man nij so' qui'yaj suun nij so' rihaan ní' sij cavíj sa' ga Diose nu' cavíj nu' ca'anj ei. Ne sa' doj vaa ta'níi Diose rihaan nij se-mozó Diose nanj chuguanj.

## 2

*Nana nihánj taj xna'anj se vaa no xcuún uxrá ní' cunó ní' se-nana Jesucristó a*

<sup>1</sup> Che'é dan doj a nó xcuún ní' cunó sa' ní' nana aj nari' ní' ei. Sese se qui'yaj ní' danj, ne do' do' tanáj ní' chrej sa' yo', ne quíníj ní' xrej Diose, ne ca'anj ní'ya ní' gaa nanj chuguanj.

<sup>2</sup> 'O se ya uxrá vaa se-nana Diose nana cataj xna'anj nij se-mozó Diose rihaan síi cu'naj Moisés gaa naá ei. Tzaj ne nij yuvíj me se ne cunó nij so' nana yo' ma'. Tzaj ne nica ya qui'yaj Diose sayuun man 'o 'o nij yuvíj ne cunó nana yo' chuguanj.

<sup>3</sup> Che'é dan, asa' ca'vee quínaníj ma'an ní' rihaan sayuun, sese se xcaj sa' ní' cuentá che'é chrej sa' chrej qui'yaj naca Diose quínaníj ní' rihaan sayuun, rá soj ga. Dan me se asino ma'an síi 'nij ra'a man ní' me síi cuchruj chrej sa' yo', gaa ne nij síi cunó nana ca'míi so' ro', cataj xna'anj nij so' se-nana so' nana sa' yo' rihaan ní', ne nari' sa' ní' nana yo', qui'yaj nij so' ei.

<sup>4</sup> Ne qui'yaj ndo'o ma'an Diose suun sa' noco ní'yaj yuvíj, ne rqué ndo'o so' Nimán so' cunuú nimán yuvíj adonj. Danj inanj guun rá Diose qui'yaj Diose, che'é se guun rá so' cunó ní' se-nana síi 'nij ra'a man ní' yo' ei.

*Nana nihánj taj xna'anj che'é nu' se vaa quíran' Jesucristó che'é ní' a*

<sup>5</sup> Dan me se cataj xna'anj 'unj rihaan soj che'é güii guun chij Diose rihaan chumíj nihánj a. Ne ne cune' Diose man nij se-mozó Diose se vaa quiríj ta'nga' nij so' rihaan chumíj nihánj ma'.

<sup>6</sup> Maan se vaa nana no rihaan danj Diose nana ca'míi yo' o so' rihaan Diose, ne cataj so' se vaa: "Taj yu'vee nó a doj yuvíj ma'. Me che'é nuú uxrá rá so' man yuvíj ga. Taj yu'vee nó a 'ó ta'níi yuvíj ma'. Me che'é nuu 'eé rá so' man nij so' ga.

<sup>7</sup> Tzaj ne sij noco' doj tzin' me nij yuvíj rihaan nij se-mozó so', qui'yáa so' chuguanj. Gaa ne ve'é uxrá cavíj sa' nij yuvíj, ne ve'é uxrá ca'míi níi che'é nij yuvíj, quí'yáa so' asanj.

<sup>8</sup> Ne quiríj ta'nga' nij yuvíj rihaan cunudanj rasuun, quí'yáa so' uún asanj", taj nana no rihaan danj Diose yo' a. Ne dan me se ya quiríj ta'nga' nij yuvíj rihaan cunudanj rasuun adonj. Tzaj ne ne'en ní' se vaa yaj me se ataa quiríj ta'nga' nij yuvíj rihaan cunudanj rasuun a.

<sup>9</sup> Tzaj ne ni'yaj ní' man Jesucristó, ne nda' se ya ya sij noco' doj guun so' rihaan nij se-mozó Diose rque doj yo', tzaj ne yaj me se aj guun chij ndo'o so', ne ve'é ndo'o a'mii nii che'é so', qui'yaj Diose a. Ne danj cavii sa' so', che'é se cavi' so' a. 'Q se sese ne cavi' so', ne ne ca'vee nayon so' rihaan cunudanj ní' a ma'. Tzaj ne yaj me se qui'yaj ndo'o Diose se luj che'é ní' se vaa nayón Jesucristó rihaan ní' nanj adonj.

<sup>10</sup> Dan me se Diose me síi qui'yaj nu' rasuun che'é ma'an inanj so' chuguanj. Dan me se vaa güii, ne nucu'i' ndo'o nij ta'níi Diose rihaan Diose rej xta', qui'yaj Diose, ne Jesucristó me síi narqué chrej sa' canoco' nij ta'níi Diose, ne quinaníi nij so' rihaan sayuun, ne cavii sa' nij so' chuguanj. Che'é dan vaa che'é quiran' Jesucristó sayuun rihaan yo'óo nihánj qui'yaj Diose, ne maan che'é se quiran' Jesucristó sayuun ro', ne che'é dan me guun chij ndo'o so' ne ne achiin cavii sa' nu' so', qui'yaj Diose nanj ei.

<sup>11</sup> Dan me se ta'nij Diose me Jesucristó, ne ta'nij Diose me ní' yuvii cunuu sa' rihaan Diose che'é Jesucristó, ne che'é dan ne guun na'aj Jesucristó cataj so' se vaa tinúu so' do', ra'vij so' do', me ní' ma'.

<sup>12</sup> Dan me se cataj so': "Nata' 'unj rihaan nij tinúj che'é so', ne ve'é cachraj chra' che'é so' asa' cunuu chre' núj rihaan so' a", cataj so', ca'mii so' nana no rihaan danj Diose a.

<sup>13</sup> Ne ca'mii uún so', cataj so': "Gaa nucuaj raj ni'yaj 'unj man Diose adonj", taj so' a. Ne guun che'e uún so', cataj so': "Ni'yaj soj manj ga' nij ta'níi Diose síi rqué Diose manj vij", taj uún Jesucristó a. Dan me se nu' nana nihánj me nana ca'mii Jesucristó che'é ní' sij tinúu Jesucristó do', ra'vij Jesucristó do', nana no rihaan danj Diose adonj.

<sup>14</sup> Dan me se che'é se vaa nee vaa cúu vaa ton vaa man ní' sij ta'níi Diose ro', che'é dan ase vaa ma'an ní' ro', danj gaa guje Jesucristó, ne ca'na' so', ne cavi' so' a. Ne gaa cavi' so' me se qui'yaj canaan so' rihaan síi 'yaj avi' ní' a. Dan me se síi chree me síi 'yaj avi' ní', ne Jesucristó me síi ca'vee qui'yaj canaan che'é yan cavi' so' ei.

<sup>15</sup> Ne guun nucuaj so' nacaj so' man ní' sij chéé rihaan cacun', ne gaa rque me se ndaa chéé chu'vi' cavi' rma'an ní' che'é se inanj cacun' qui'yaj ní' chuguanj. Tzaj ne che'é se vaa cavi' Jesucristó che'é ní', che'é dan güéj sayuun yo' xráa ní' ne síi chéé ma'an me ní' ei.

<sup>16</sup> 'Q se ne ca'na' Jesucristó tinanii so' man nij se-mozó Diose rihaan sayuun ma'. Maan se ca'na' so' tinanii so' man ní' ta'nij ta'nij si'nq síi cu'naj Abraham síi cane gaa naa rihaan sayuun adonj.

<sup>17</sup> Che'é dan me naqui'yaj so' man so', ne nda' rá se vaa guje nij tinúu ya so' ro', vaa so' adonj. Danj qui'yaj so' che'é rej ca'vee cunuu 'ee rá so' man ní', ne guun so' xrej atá suun noco' doj rihaan Diose che'é ní', ne guun nucuaj rá ní' ni'yaj ní' man so', ne tinavij so' cacun' tumé ní' sij noco' man Diose adonj.

<sup>18</sup> 'Q se che'é se quiran' ma'an ya so' sayuun se vaa guun rá síi chree caxrii síi chree chrej chi'ii rque so' ro', che'é dan guun nucuaj so' racuíj so' man ní' asa' guun rá síi chree caxrii síi chree chrej chi'ii rque ma'an ní' adonj.

### 3

*Nana nihánj taj xna'anj se vaa sa' doj vaa Jesucristó rihaan síi cu'naj Moisés síi cane gaa naa a*

<sup>1</sup> Dan me se sij sa' me soj rihaan Diose, tinuj, nocoj. Ne nacúun Diose síi nicun' xta' man soj se vaa cavii sa' soj ga' so' adonj. Che'é dan xcaj soj cuentá

che'é Jesucristó, ne sij ca'neé Diose rihaan ní' me so', ne cataj xna'anj so' rihaan ní' nana ya che'é Diose, ne ase vaa xrej ata suun nocqo doj vaa uún so', tinavij ya so' cacun' tumé ní' rihaan Diose ei. Inanj danj vaa nana nocq' ní' nanj ei.

<sup>2</sup> Ne ve'é 'yaj suun Jesucristó nu' suun ca'ne' Diose rihaan so', nda' rá se vaa ve'é qui'yaj suun sí' cu'naj Moisés nu' suun ca'ne' Diose rihaan so' qui'yaj suun so' che'é nij yuvij nocq' man Diose adonj.

<sup>3</sup> Dan me se xcaj sa' ní' cuentá che'é Jesucristó ei. 'Q se sa' uxrá doj vaa so' rihaan sí' cu'naj Moisés yo' nanj chuguanj. Dan me se ne'en soj se vaa doj yu'vee nó sí' cune' ve' rihaan ma'an ve' yo' ei. Ne ase vaa sí' cune' ve' vaa Jesucristó, ne cavii sa' taran' ní' ga Diose, qui'yaj so', ne ase vaa ve' yo' vaa ní' do', vaa sí' cu'naj Moisés do', nanj ei.

<sup>4</sup> Dan me se vaa 'o ya mjí sí' 'yaj daj a nij ve' ei. Tzaj ne orún' Diose me sí' qui'yaj daj a rasuun nanj ei.

<sup>5</sup> Ne sí' cu'naj Moisés me se ve'é ya qui'yaj suun so' nu' suun ca'ne' Diose rihaan so' adonj. Tzaj ne nanj mozó me so' rihaan nij yuvij narii Diose, ne cataj xna'anj so' rihaan nij yuvij che'é nij nana nata' Diose rihaan nij yuvij rej rihaan nij yuvij adonj.

<sup>6</sup> Tzaj ne Jesucristó me se nuveé mozó me so' ma'. Tananj ta'níi sí' tucua ya ve' me so' ei. Ne veé danj 'yaj suun so' nu' suun vaa rihaan so' rá ve', ne dan me se ma'an ya ní' me ve' yo', sese yo'o guun ya rá ní' se vaa cavii sa' ní', qui'yaj Diose, ne sese guun niha' rá ní' cataj xna'anj ní' rihaan tuvi' ní', ne sese se cuchu'vi' ní' canocq' ní' man Diose ei.

*Nana nihánj taj xna'anj se vaa se gaa nichraj nimán ní' ni'yaj ní' Diose a*

<sup>7</sup> Che'é dan cunq' ní' nana nihánj nana ca'mii Nimán Diose á: "Cuan' ro', sese ya cuno soj nana ca'mii Diose,

<sup>8</sup> ne se naqui'yaj nichraj soj nimán soj ndaa rá se vaa qui'yaj nij sí' cumán gaa naá gaa cachéé nij so' rej tacaan a. Dan me se cunu' nij so' ga Diose, ne guun rá nij so' xcaj nij so' cuentá sese ya qui'yaj Diose sayuun man nij so' a.

<sup>9</sup> Veé danj qui'yaj xii soj nij sí' cumán gaa naá rihaan Diose, ne quene'en nij so' nu' nij suun sa' nocqo qui'yaj suun 'unj che'é nij so'

<sup>10</sup> vj chihaa ya yo' a. Che'é dan ca'maan raj ni'yaj 'unj man nij so', ne cataj 'unj se vaa ne ne'en uxrá nij so' a ma'. 'Q se ne quene'en uxrá nij so' daj qui'yaj nij so' canocq' nij so' manj a ma'.

<sup>11</sup> Dan me se ca'maan raj, ne guun ya raj daj quirán' nij so', ne yo'o cataj 'unj se vaa daj chihaa mjí se quinaránj ya rá nij so' ga 'unj a man chuguanj", taj nana ca'mii Nimán Diose a.

<sup>12</sup> Dan me se cütumé uxrá soj man soj se gaa nanj gaa qui' nimán yo'o tuvi' soj cataj so' se vaa taj vaj Diose, man tinuj, man nocqo. Dan me se se gaa nanj tanáj xcq' yo'o tuvi' soj man Diose sí' vaa i'na' ya ma'.

<sup>13</sup> Cuanq' nihánj me se nagó' soj chrej nucuaj man tinúu soj daj a güii gaa vaa ya'núj rihaan soj ei. Danj qui'yaj soj, se gaa nanj guun nichraj rá tinúu soj qui'yaj nana ne chi'ii a.

<sup>14</sup> 'Q se yaj me se guun ní' sí' cavii sa' ga Jesucristó, ne cavii sa' ya ní' ga so' sese yo'o cuchuman rá ní' cunq' ní' nana ya, ndaa vaa qui'yaj ní' gaa guun che'é ní' canocq' ní' man Jesucristó chuguanj.

<sup>15</sup> Dan me se danj Diose taj: "Cuan' ro', sese ya cuno soj nana ca'mii Diose, ne se naqui'yaj nichraj soj nimán soj nda' rá se vaa qui'yaj nij sí' cumán gaa naá a. Dan me se cunu' nij so' ga Diose a", taj danj Diose a.

<sup>16</sup> Ne me síí ne ca'vej rá cunō se-nānā Diose, ne cunu' nij so' ga Diose, rá soj ga. Ne taran' nij síí cavií Egiptó ga síí cu'naj Moisés me nij so' chuguanj. Veé yā nij so' ei.

<sup>17</sup> Ne me síí me ca'maan rá Diose ni'yaj Diose rque vij chihāa yā yo', rá soj ga. Ne sij ca'maan rá Diose ni'yaj Diose me nij síí qui'yaj cacun', ne cavi' nij so' rihaan yo'óo taqaan a.

<sup>18</sup> Ne me rihaan nij síí cataj Diose se vaa daj chihāa mǐj se cachén nij so' naraan rá nij so' ga Diose, rá soj ga. Rihaan nij síí ne ca'vej rá cunō rihaan so' me yo' na'. Veé yā nij so' ei.

<sup>19</sup> Ne ne'en ní' se vaa che'é se ne cuchuman rá nij so' ni'yaj nij so' man Diose ro', che'é dan ne guun nucuaj nij so' quinarāan rá nij so' ga Diose chuguanj.

## 4

<sup>1</sup> Che'é dan cutumé uxrá ní' man ní' ei. Tadó ní' se gaa nanj caráán ní' xrée ní' rihaan nanā cataj xna'anj Diose rihaan ní' se vaa catuu ní' chrej ca'anj ní' naraan rá ní' ga Diose á. 'O se adǐ' se vaa síí ne ruvi' rihaan ro', gāa ní', sese se cutumé ní' man ní' adonj.

<sup>2</sup> Ne ase vaa catúj se-nānā Diose xrée nij síí cumán gaa naá ro', danj vaa guēē catúj se-nānā Diose xrée ma'an ní' cuano ei. Gaa cuno nij so' se-nānā Diose me se cuno uun nij so' nanā yo', ne taj se gún' nanā yo' rihaan nij so' a ma'. Dan me se nata' nii nanā yo' rihaan nij so', tzaj ne ne cuchuman rá nij so' daj chihāa mǐj nanā yo' a man chuguanj.

<sup>3</sup> 'O se orún' ní' sij amán rá ni'yaj man Diose me nij síí ca'anj quinarāan rá ga Diose nanj ei. Inanj danj ca'mui Diose, cataj Diose: “Dan me se ca'maan raj, ne guun yā raj daj quirān' nij so', ne yo'ō cataj 'unj se vaa daj chihāa mǐj se quinaránj rá nij so' ga 'unj a mei”, taj Diose a. Ne dan me se gaa naá gaa quisíj qui'yaj Diose chumií nihánj, ne navij suun rihaan Diose, ne ca'ne' rá Diose a.

<sup>4</sup> Ne vaa nanā nō rihaan danj Diose nanā taj xna'anj che'é güii chij, ne taj nanā yo': “Ne güii chij quinaránj rá Diose che'é yan quisíj qui'yaj suun Diose nu' suun qui'yaj suun so' a”, taj nanā yo' a.

<sup>5</sup> Ne vaa nanā taj uún, ne: “Daj chihāa mǐj se quinaránj yā rá nij so' ga 'unj a man chuguanj”, taj uún Diose a.

<sup>6</sup> Dan me se ataa ta'aj nij yuvií catuu quinarāan rá ga Diose adonj. Tzaj ne xa' nij síí aj cuno se-nānā Diose gaa naá ne ne ca'vej rá nij so' cunō nij so' me se daj chihāa mǐj se quinaránj rá nij so' ga Diose ma'. Dan me se yo' me quirān' nij so' che'é se ne ca'vej rá nij so' cunō nij so' nanā sa' adonj.

<sup>7</sup> Che'é dan cachrón uún Diose yo'ó güii canocō' yuvií man so', ne cuano nihánj me güii cachrón Diose canocō' yuvií man so' ei. Ne ma'an síí cu'naj David ca'mui se-nānā Diose nanā yo' nanā aj cachrón 'unj rihaan yanj nihánj, cataj so': “Yaj ro', sese yā catúj se-nānā Diose xrée soj, ne se naqui'yaj nichraj soj nimán soj ma'”, taj síí cu'naj David yo' a.

<sup>8</sup> Ne che'é se ne quinarāan rá nij síí cumán gaa naá, qui'yaj síí cu'naj Josué ro', che'é dan me cachén ndo'ó güii, gaa ne ca'mui síí cu'naj David che'é yo'ó güii canocō' yuvií man Diose, ne quinarāan rá nij yuvií ga Diose adonj.

<sup>9</sup> Dan me se ne'en ní' se vaa yā uxrá vaa güii quinarāan rá ní' sij nocō' man Diose adonj.

<sup>10</sup> 'Q se nij síi naránj rá ga Diose me se aj quisij qui'yaj suun nij so', ne navij suun rihaan nij so' ei. Ase vaa qui'yaj Diose gaa navij se-suun Diose rihaan Diose ro', danj 'yaj nij so' chuguanj.

<sup>11</sup> Che'é se nano' ní' daj qui'yaj ní' quinaraan rá ní' ga Diose, gaa ne se guun tumé a 'ó tuvi' ní' cacun' tumé nij síi cumán gaa naá ma'. Dan me se ve'é cunq taran' ní' rihaan Diose adonj.

<sup>12</sup> 'Q se vaa i'na' yá se-nana Diose adonj. Ne nucuaj uxrá yo', ne ase vaa yo'o neê espadá sihaa nu' niha rihaan ro', vaa yo', tzaj ne nuveé inanj cúu dō', nee dō', me se a'ne' yo' ma'. 'Q se a'ne' yo' ndaa nimán yá ní', ne che'é se-nana Diose yo' ro', uun nucuaj Diose xcaj Diose cuentá daj vaa nimán yá ní' chuguanj.

<sup>13</sup> Ne nu' nij rasuun vaa yuve ro', ruvi' nu' nij yo' rihaan Diose chuguanj. 'Q se ranga' uxrá rihaan Diose ei. Ne ruvi' nu' rasuun ni'yaj so', ne yá ruvi' sa' nu' rasuun ni'yaj Diose ei. Ne veé rihaan ma'an yá Diose ro', me ca'anj ní' nago' ní' cuentá adonj.

*Nana nihánj taj xna'anj se vaa ase vaa xrej atá suun nocqo doj ro', danj vaa Jesucristó rihaan ní' a*

<sup>14</sup> Tzaj ne vaa 'o xrej sa' xrej atá suun nocqo doj nicaj yu'unj man ní' adonj. Ne sij cavii xta' doj rihaan rej xta' me so', ne Jesucristó ta'níi Diose yá me uún so' nanj chuguanj. Che'é dan nicaj raan ní' tucuáán nocqo' ní' ei.

<sup>15</sup> 'Q se nuveé xrej ne ne'en daj vaa sayuun ran' ní' me so' ma'. 'Q se aj ne'en so' daj vaa chrej chí'ii 'na' rihaan ní' adonj. Che'é dan cunuu 'ee rá so' man ní' gaa ninaj ní' rihaan sayuun adonj. Dan me se ase vaa ma'an ní' ro', vaa so', ne ase vaa sayuun 'na' rihaan ní' ro', danj vaa sayuun ca'na' rihaan so', tzaj ne ne qui'yaj so' a 'ó xco' cacun' ma'.

<sup>16</sup> Che'é se xrej me so' che'é ní' ro', che'é dan se cuchu'vi' ní' a doj mei. Tananj quinichrun' ní' rihaan chrej sa', gaa ne ca'vee cunuu 'ee rá Diose man ní', ne asa' 'na' sayuun rihaan ní', ne ca'vee cata' tu'va ní' man so', ne nacaj so' man ní' rihaan sayuun chuguanj. Dan me se yá cunuu 'ee rá Diose man ní', ne sese vaa güii quiran' ní' sayuun, ne qui'yaj so' se luj che'é ní' adonj.

## 5

<sup>1</sup> 'Q se xa' nij xrej atá suun nocqo doj xrej une' yuvií, tzaj ne atá nij so' suun se vaa racujíj nij so' man yuvií me rá cunuu sa' rihaan Diose ei. Dan me se racujíj nij so' man nij yuvií rque yuvií xcuu cacaa rihaan Diose che'é cacun' tumé nij yuvií a.

<sup>2</sup> Danj 'yaj nij so', che'é se nanj yuvií me nij so', ne che'é dan ne uun nucuaj nij so' qui'yaj nij so' inanj se sa' a man adonj. Che'é dan ca'vee guun 'ee rá nij so' ni'yaj nij so' man nij síi ne ne'en dō', man nij síi vaj chrej chí'ii dō' a. Ne che'é cacun' tumé ma'an nij so' ro',

<sup>3</sup> che'é dan ase vaa uta' nij so' xcuu cacaa rihaan Diose che'é cacun' tumé yuvií ro', inanj danj no xcuún nij so' cutá' nij so' xcuu cacaa rihaan Diose che'é cacun' tumé ma'an nij so' uún adonj.

<sup>4</sup> Ne taj síi une' man ma'an cata suun nocqo yo' ma'. 'Q se inanj síi nacúún Diose me síi cata suun nocqo adonj. Danj quiran' síi cu'naj Aaron' síi cane gaa naa, ne nacúún Diose man so' cata so' suun nocqo yo' gaa naá ei.

<sup>5</sup> Ne ase vaa quiran' síi cu'naj Aaron' ro', danj quiran' Jesucristó chuguanj. Ne cuné' so' man ma'an so' se vaa cavii sa' so' guun so' xrej atá suun nocqo doj ma'. 'Q se Diose cune' man so', cataj Diose: "Ta'níj mé so' á. Cuanq nihánj

me se quene'en yuvij se vaa ta'nij mé so', qui'yáj nanj á", taj naná nō rihaan danj Diose naná ca'mii Diose rihaan Jesucristó a.

6 Ne vaa yo'ó naná uún naná ca'mii Diose rihaan Jesucristó, ne naná yo' taj se vaa: "Xrej mé so' nu' cavii nu' ca'anj a. Dan me se ase vaa xrej cu'naj Melquisedec xrej cane gaa naá ro', danj vaa ma'án so' nanj á", taj doj naná nō rihaan danj Diose naná ca'mii Diose rihaan Jesucristó a.

7 Dan me se gaa chéé Jesucristó rihaan chumiñ nihánj, ne cachúin ni'yaj uxrá so' rihaan Diose se vaa tinanii Diose man so' se cavi' so', ne che'é dan ndaa ta'vee ma'an so', ne che'é se sij aráj cochroj ya rihaan Diose me so', che'é dan cuno ya Diose ca'mii so',

8 ne ta'nij ya Diose me so', tzaj ne taj se qui'yá' quinanii so' rihaan sayuun a ma'. Che'é sayuun quiran' so' ro', che'é dan tananj a nari' sa' so' cuno so' adonj.

9 Dan me se guun so' síi uno nu' se-nana rej, ne che'é dan guun so' síi tinanii man taran' ní' sij uno rihaan so' rihaan sayuun, ne dan me se cavii sa' ní' nu' cavii nu' ca'anj, qui'yaj so' ei.

10 Ne guun uún so' xrej ata suun nocoo doj, qui'yaj Diose, ne ase vaa xrej cu'naj Melquisedec vaa uún so' nanj adonj.

*Naná nihánj taj xna'anj se vaa nō xcúin ní' xcaj ní' cuentá sa' doj che'é se-nana Jesucristó a*

11 Vaa uxrá yo'ó naná me rá 'unj cataj xna'anj 'unj rihaan soj che'é síi cu'naj Melquisedec yo', ne sayuun uxrá vaa cataj xna'anj 'unj naná yo' rihaan soj, che'é se nuveé sij niha' rá cuno ra'yanj me soj mei.

12 Dan me se guun que'ee yo' noco' soj man Jesucristó, ne nō xcúin soj tucu'yón soj se-nana Jesucristó rihaan tuvi' soj, tzaj ne ne guun nucuaj soj qui'yaj soj danj man asan. 'O se achiin 'o síi tucu'yón asij tacóo se-nana Diose man soj, rá soj, ne che'é dan ase vaa ne'ej vaa soj, ne ne'ej me se ne ne'en ne'ej cha ne'ej se chá ma'. Tihaj utzii ne'ej nanj adonj. Ne ta'nga' danj vaa soj, ne tihaj ndaa tacóo se-nana Diose guun nucuaj soj cuno soj, rá soj nanj adonj.

13 Dan me se síi utzii too ro', ase vaa ne'ej uun vaa so', ne ataa nari' so' daj qui'yaj so' ne cuno sa' so' rihaan Diose ei.

14 Ne ase vaa síi nocoo síi chá nu' rasuun sca' ro', danj vaa síi acaj ndo'o cuentá, ne tucu'yón niganj so' nuchruj raá so' che'é rasuun, ne che'é dan ne'en so' nuchruj raá so' me se me se sa' do', me se me se nij do', ne xcaj so' cuentá che'é nu' rasuun yo' chuguanj.

## 6

1 Che'é dan se guun rá ní' tucu'yón uún ní' naná aj nari' ní' gaa guun che'e ní' canoco' ní' man Jesucristó mei. Tzaj ne yo'ó tananj guun rá ní' nari' ní' naná chij doj naná cachiiñ rihaan ní' canoco' sa' ní' man Jesucristó ei. Dan me se aj nari' ní' naná se vaa canicaj nimán ní' tanáj ní' tucuáán chí'ij canoco' ní' asij rque á. Ne aj nari' ní' naná se vaa cuchuman rá ní' ni'yaj ní' man Diose ei.

2 Ne aj nari' ní' naná se vaa cata' ne ní' á. Ne aj nari' ní' naná se vaa cutá' ní' ra'a ní' raá tinúu ní' gaa nago' ní' suun man tinúu ní' á. Ne aj nari' ní' naná se vaa cuno i'na' uún nij síi cavi' á. Ne aj nari' ní' naná se vaa ca'ne' Diose cacun' che'é yuvij daj quiran' yuvij nu' cavii nu' ca'anj á.

3 Dan me se quisij tucu'yón ní' naná nihánj, ne cachén ní' tucu'yón ní' naná nocoo doj, sese ca'vej rá Diose qui'yaj ní' danj á.

4 'Q se sese aj xcaj ní' cuentá che'é se-nanā Dioso dō', sese aj nicaj ní' nu' nij se sa' rque Dioso rihaan ní' dō', sese aj cayáan Nimán Dioso gā ní' dō',

5 sese aj nari' ní' se vaa taj se-nanā Dioso che'é ní' dō', sese aj ne'en ní' suun sa' qui'yaj suun Dioso naqui'yaj sa' Dioso chumij nihánj dō',

6 gaa ne sese cunuū inō nimán ní' ne tanáj rma'an ní' se-tucuanj Jesucristó, gaa ne daj chihāa mǐj se guun nucuaj ní' canicaj uún nimán ní' canoco' uún ní' chrej sa' a man chuguanj. Maan se sí' 'yaj danj ro', me rá so' cavi' uún ta'núí Dioso rihaan rcutze che'é so', ne me rá so' ca'nga' nacoō yuvij ni'yaj yuvij man Jesucristó che'é so', rá so' adonj. Dan me se nu' yo' me rá ní' quiran' uún Jesucristó, sese guun rá ní' canicaj uún nimán ní' canoco' uún ní' man so' adonj.

7 'Q se ase vaa yo'óo vaa ní' rihaan Dioso, ne sese aman' uxrá maan rihaan yo'óo, ne sese sa' uxrá avii naā dō', cuēj dō', rihaan yo'óo yo' chá nij sí' qui'yaj suun yo'óo yo', ne cavi' sa' uxrá yo'óo yo', qui'yaj Dioso ei.

8 Tzaj ne sese quixra' uxrá coj tanj uun dō', tanj ya'aa uun dō', rihaan yo'óo yo', ne quiran' uxrá yo'óo yo' sayuun, qui'yaj Dioso, ne cacaa nu' yo'óo yo', qui'yaj Dioso nanj ei.

9 Ee rá 'unj man soj, tinuj, nocoj. Ne nda' se nanā nucuaj ca'mii 'unj rihaan soj nihánj, tzaj ne guun ya' rá 'unj se vaa sa' uxrá qui'yaj soj, ne ya' cavi' sa' soj, qui'yaj Dioso ei.

10 'Q se nuveé sǐj chi'ij me Dioso ma'. Sǐj vaa nica' rá me Dioso, ne yo'o cunuū rá Dioso taran' nij suun sa' qui'yaj suun soj gaa canoco' soj man so' ei. Ne yo'o cunuū rá Dioso se vaa aran' uxrá rá soj cunō soj nanā a'mii Dioso nanj chuguanj. Dan me se qui'yaj suun uxrá soj racu'j soj man nij sí' sa' noco' man Dioso gaa rque, ne 'o danj qui'yaj ya' soj ei.

11 Tzaj ne me uxrá rá 'unj se vaa 'o yaan guun ya' rá taran' nij tinuj soj se vaa cavi' sa' ya' uxrá soj qui'yaj Jesucristó, ne guun niha' rá soj canoco' raan soj man so' ndaa se quisǐj güii ca'na' uún so' ei.

12 Ne se gaa rmij soj ma'. Maan se ve'é xcaj soj cuentá daj 'yaj nij sí' chumán sa' rá ni'yaj man Dioso, ne ase vaa 'yaj nij so' ro', danj qui'yaj uún soj, gaa ne ca'vee chuguanj. Dan me se nij sí' chumán sa' rá me se ne a'ne' rá nij so' ma'. 'Q se yo'o noco' nij so' man Jesucristó, gaa ne vaa güii nacaj nij so' nu' se sa' cataj xna'anj Dioso se vaa rque Dioso man ní' sǐj noco' man Dioso adonj.

*Nanā nihánj taj xna'anj daj qui'yaj Dioso gaa cataj xna'anj Dioso rihaan sí' cu'naj Abraham daj qui'yaj Dioso che'é so' a*

13 Dan me se quisǐj cataj xna'anj Dioso rihaan sí' cu'naj Abraham daj qui'yaj Dioso che'é so', gaa ne guun rá Dioso cuta' Dioso raā yo'o sí' sa' ndo'o, ne cuchuman' rá sí' cu'naj Abraham se vaa ya' vaa nanā cataj xna'anj Dioso rihaan so' a. Tzaj ne ne nanao' Dioso yo'óo so' ma'. Maan se ma'an Dioso cataj se vaa ya' danj qui'yaj Dioso adonj.

14 Dan me se cataj Dioso rihaan sí' cu'naj Abraham a:

—Ya uxrá cavi' sa' so', qui'yaj, ne ya uxrá xna'anj ndo'o nij ta'núí ta'nij si'no so', qui'yaj nanj á —taj Dioso rihaan sí' cu'naj Abraham a.

15 Ne ya danj quiran' sí' cu'naj Abraham, gaa inaj nimán so', yo'o noco' so' man Dioso, ne cavi' sa' uxrá ya' so', ndaa vaa cataj xna'anj Dioso rihaan so' nanj ei.

16 Dan me se tananj nij yuvij, ne sese guun rá yo'o so' canō tuvi' so' che'é 'o nanā, ne cuta' so' raā 'o rasuun ca'mij so', gaa ne cuchuman' rá tuvi' so',

qui'yaj so' chuguñj. Tzaj ne inañj raá yo'o rasuun sa' doj rihaan ma'an yuvií uta' yuvií adonj.

17 Ne gaa ca'mii Diose ga nij sí nacaj nu' se sa' rque so', ne guun rá so' cuchuman sa' doj rá nij so' che'é nana ca'mii so', ne che'é dan cuta' ma'an ya Diose raá yo'o rasuun, ca'mii Diose a.

18 Dan me se asino ca'mii ya Diose, gaa ne cuta' Diose raá ma'an so' a. Dan me se quisíj vij nana ca'mii so', ne daj chihaa míj se natuná Diose se-nana so' ma'. 'O se ne uun nucuaj Diose a'mii Diose nana ne ma'. Che'é dan me ndo'o rá ní' racuj Diose man ní', ne che'é dan vaa che'é ndo'o cuchuman rá ní', ne guun ya rá ní' se vaa ya cavii sa' ní', ndaa vaa cataj xna'anj Diose rihaan ní' nanj adonj.

19 Ne sese yo'o guun ya rá ní', ne gaa sca' nimán ní', ne se kuchu'vi' nimán ní' ma'. 'O se ya uxrá vaa nana amán rá ní', ne che'é nana yo' ca'vee quinan' ní' rihaan ma'an Diose adonj.

20 Dan me se aj taj yaan Jesucristó rihaan ní' quinan' so' rihaan Diose qui'yaj suun so' che'é ní', ne so' me sí guun xrej atá suun nocoo doj, ne ase vaa sí cu'naj Melquisedec gaa naá ro', danj gaa guee so' nu' cavii nu' ca'anj adonj.

## 7

*Nana nihánj taj xna'anj se vaa ase vaa xrej cu'naj Melquisedec vaa Jesucristó, ne xrej sa' uxrá me Jesucristó che'é ní' a*

1 Dan me se xa' xrej cu'naj Melquisedec, tzaj ne sí nicaj suun rey guun chij rihaan chuman' cu'naj Salem me so', ne xrej me uún so' rihaan Diose sí nicun' xta' adonj. Gaa nanicaj sí cu'naj Abraham 'na' nique so' gaa quisíj qui'yaj canaán so' man yo'ó nij sí nicaj suun rey sí cunu' ga so', ne dan me se ca'anj caran' sí cu'naj Melquisedec man so' chrej 'na' nique so', ne ve'é cataj sí cu'naj Melquisedec se vaa me rá so' qui'yaj Diose se luj che'é sí cu'naj Abraham yo' a.

2 Gaa ne xa' nij rasuun qui'yaj canaán Abraham ro', rque so' 'o rasuun rihaan daj a chi' rasuun rihaan Melquisedec, ne diezmo cu'naj yo' a. Ne se-chuvií sí cu'naj Melquisedec taj se vaa sí nicaj suun rey sí 'yaj inañj se sa' me ma'an so' a. Ne sí nicaj suun rey ne chuman' Salem me uún so', ne nana Salem taj se vaa sí nicaj suun rey qui'yaj cumañ dínj yuvií me so', taj nana yo' a.

3 Ne xa' so', tzaj ne taj rej so' taj nii so' taj tuvi' so' taj ma'. Ne taj güii ca'ngaa so', ne taj güii cavi' so' do' a ma'. Dan me se ase vaa ma'an ta'níí Diose vaa so', gaa guun so', ne xrej guun so' nu' cavii nu' ca'anj nanj adonj.

4 Dan me se xa' sí cu'naj Abraham, tzaj ne xii taran' ní' sij israelitá me so', ne rque so' diezmo rihaan sí cu'naj Melquisedec che'é nij rasuun qui'yaj canaán ma'an so' adonj. Che'é dan me xcáj soj cuentá daj sij me sí cu'naj Melquisedec yo', se vaa sij sa' uxrá me so' nanj ei.

5 Dan me se xa' nij ta'níí ta'nij si'no sí cu'naj Leví, tzaj ne cune' Diose man nij so' guun nij so' xrej che'é nij yuvií israelitá ei. Ne a'néj nij so' diezmo man nij sí israelitá, ndaa vaa taj se-tucuanj Moisés yo' adonj. Ne ase vaa tinúú nij yuvií israelitá vaa nij so', che'é se ta'níí ta'nij si'no sí cu'naj Abraham me nij so' ga yo'ó nij yuvií israelitá adonj.

6 Tzaj ne nuveé tuvi' nij so' me sí cu'naj Melquisedec ma'. Tzaj ne so' me sí ca'néj diezmo man sí cu'naj Abraham chuguñj. Ne nda' se sij cavii sa'



qui'yaj ma'an Dioso me sí cu'naj Abraham, tzaj ne cuno so' se-nana sí cu'naj Melquisedec se vaa qui'yaj Dioso se luj che'é so' adonj.

<sup>7</sup> Dan me se ne'en taran' ní se vaa sí a'mii nana sa' se vaa qui'yaj Dioso se luj che'é tuvi' ro', so' me sí atá suun nocqo doj rihaan tuvi' so' sí uno nana sa' yo' adonj. Che'é dan me sij atá suun nocqo doj me sí cu'naj Melquisedec rihaan sí cu'naj Abraham adonj.

<sup>8</sup> Ne xa' nij ta'nú ta'nij si'no sí cu'naj Leví, tzaj ne a'néj nij so' diezmo man yuvij, tzaj ne nanj yuvij me nij so', ne vaa güii cavi' nij so' ei. Ne xa' sí cu'naj Melquisedec, tzaj ne danj Dioso taj se vaa yo'q vaa i'na' so' nanj adonj.

<sup>9</sup> Ne nda' se a'néj nij ta'nú ta'nij si'no Leví diezmo man yuvij, tzaj ne vaa che'é cataj ní se vaa gaa rqué Abraham diezmo rihaan sí cu'naj Melquisedec, gaa ne rqué ma'an nij so' diezmo uún rihaan sí cu'naj Melquisedec adonj.

<sup>10</sup> Q se nicaj Abraham semilla guun nij ta'nú ta'nij si'no Leví gaa nari' tuvi' so' ga sí cu'naj Melquisedec adonj.

<sup>11</sup> Dan me se nij ta'nú ta'nij si'no sí cu'naj Leví ro', ta'nú ta'nij si'no sí cu'naj Aarón me nij so', ne tucu'yón nij so' se-tucuanj Moisés rihaan nij yuvij israelitá, tzaj ne ne quisij guun sa' inanj nij yuvij israelitá, qui'yaj nij so' ma'. 'Q se danj Dioso taj se vaa ase vaa sí cu'naj Melquisedec ro', danj gaa yo'ó xrej cune' Dioso, tzaj ne nuveé tuvi' sí cu'naj Aarón me xrej naca yo' a.

<sup>12</sup> Ne che'é se nuu inq doj xrej, che'é dan nuu inq tucuaán tucu'yón xrej yo' rihaan nij yuvij, ne canoc' nij yuvij yo' yo'ó tucuaán yo' adonj.

<sup>13</sup> Ne danj Dioso taj se vaa xrej naca yo' ro', me tuvi' yo'ó x'ne' nij yuvij israelitá, ne taj tuvi' nij so' guun xrej rihaan Dioso gaa rqué ma'.

<sup>14</sup> Q se sí 'nij ra'a man ní ro', so' me yo'q ta'nú ta'nij si'no sí cu'naj Judá, ne ne cataj Moisés se vaa guun ta'nú ta'nij si'no sí cu'naj Judá yo' 'q xrej canicun' rihaan Dioso gaa rqué ma'.

<sup>15</sup> Dan me se ase vaa sí cu'naj Melquisedec vaa yo'ó xrej naca yo' adonj. Ne che'é dan ya uxrá inq doj vaa tucuaán nocq' ní, qui'yaj so' adonj.

<sup>16</sup> Ne yo'ó xrej naca yo', tzaj ne nuveé che'é se-tucuanj yuvij uun me guun so' xrej ma'. 'Q se ase vaa ma'an yuvij vaa tucuaán nocq' ma'an yuvij, ne che'é dan vaa güii quinavij tucuaán nocq' nij yuvij nanj chuguanj. Tzaj ne xa' xrej naca yo', tzaj ne guun nucuj so' gaa i'na' so' nu' cavi' nu' ca'anj, ne daj chihaa mij se navij xrej yo' man adonj.

<sup>17</sup> Q se danj Dioso taj: "Xrej mé sq' nu' cavi' nu' ca'anj a. Dan me se ase vaa xrej cu'naj Melquisedec xrej cane gaa naá ro', danj vaa ma'an sq' á", taj danj Dioso a.

<sup>18</sup> Dan me se taj se uun tucuaán nga yo' a ma'. Ne ne guun nucuj yo' racuíj yo' man yuvij a man chuguanj. Che'é dan quinavij tucuaán nga yo', qui'yaj Dioso nanj adonj.

<sup>19</sup> 'Q se taj vaj a doj rasuun cunuu sa' qui'yaj se-tucuanj Moisés ma'. Dan me se navij tucuaán nga, ne yo'ó tucuaán sa' naca nocq' ní cuano, ne guun ya rá ní se vaa cavi' sa' ní, qui'yaj tucuaán naca yo' adonj. 'Q se che'é tucuaán naca yo' qui'yaj ca'vee cuchí' ma'an ní rihaan Dioso adonj.

<sup>20-21</sup> Ne xa' nij ta'nú ta'nij si'no sí cu'naj Leví, tzaj ne taj ra' a 'ó rasuun cuta' Dioso gaa cune' Dioso man nij so' a ma'. Tzaj ne xa' Jesucristó me se vaa se cuta' Dioso ra' gaa cune' Dioso man so' adonj. Dan me se danj Dioso taj: "Cuta' sí 'nij ra'a man ní ra' ma'an so', ne daj chihaa mij se nanicaj se-nana so', qui'yaj so' ma'. Dan me se cataj so' se vaa xrej guún so' nu' cavi' nu' ca'anj a", taj danj Dioso a. Ne che'é se cuta' Dioso ra' ma'an so' ro',

<sup>22</sup> che'é dan ne'en ya ní se vaa sa' doj vaa tucuáán noco' ní sese sij noco' man Jesucristó me ní, ne sa' doj qui'yaj Diose che'é ní adonj.

<sup>23</sup> Ne nij ta'níí ta'nij si'no síí cu'naj Leví ro', yuvií cavi' vaa güüi me nij so', ne che'é dan a 'o nij so' se cayáán guun xrej nu' cavii nu' ca'anj ma'. Che'é dan aj cayáán que'ee nij so' a.

<sup>24</sup> Tzaj ne Jesucristó me se daj chihaa míj se cavi' so' ma'. Che'é dan orún' so' me xrej qui'yaj suun rihaan Diose che'é ní nu' cavii nu' ca'anj adonj. Se gaa yo'ó xrej rihaan so' ma'.

<sup>25</sup> Dan me se yo'ó vaa i'na' so', ne cachinj ni'yaj so' rihaan Diose che'é ní nu' cavii nu' ca'anj ei. Che'é dan nu' ní' sij cuchi' rihaan Diose che'é so' me se guun nucuaj so' tinanii so' man ní' rihaan sayuun nu' cavii nu' ca'anj adonj.

<sup>26</sup> Dan me se vaa che'é ndo'o guun so' xrej ata' suun noco' doj che'é ní' adonj. 'O se síí guee ya me so', ne taj vaj a doj cacun' tumé so' ma'. 'O se síí sa' inanj nimán me so', ne gan' uxrá yáán so' ga ní' sij tumé cacun' nanj adonj. Dan me se xtá' doj yáán so' rihaan nu' rej xtá' ei.

<sup>27</sup> Ne nij xrej ata' suun noco' doj man rihaan chumií nihánj ro', 'o 'o güüi nó xcúún nij so' caxrií ya'an nij so' xcuu rihaan Diose che'é cacun' tumé ma'an nij so' asino yaan, gaa ne caxrií ya'an uún nij so' xcuu rihaan Diose che'é cacun' tumé nij yuvií nanj chuguanj. Tzaj ne Jesucristó me se ne nó xcúún so' qui'yaj so' danj ma'. 'O se xa' so', tzaj ne ca'néé nimán ma'an so' cavi' so' che'é cacun' tumé ní' nanj adonj. Taj che'é cavi' uún so' che'é ní' ma'.

<sup>28</sup> Ne se-tucuanj Moisés taj se vaa cune' yuvií man nanj yuvií cayáán nij yuvií xrej, ne che'é dan nanj síí tumé cacun' me nij xrej yo' nanj adonj. Tzaj ne quinavij tucuáán nga yo', gaa ne cuta' Diose raá ma'an Diose, ne cune' Diose man ta'níí Diose, ne síí sa' inanj me so' nu' cavii nu' ca'anj nanj adonj.

## 8

*Nana nihánj taj xna'anj se vaa sa' doj vaa se-tucuanj Jesucristó rihaan se-tucuanj Moisés a*

<sup>1</sup> Dan me se nihánj me nana noco' doj rihaan taran' nij nana cataj xna'anj 'unj rihaan soj nihánj, ne nana nihánj taj se vaa sa' inanj vaa Jesucristó síí guun xrej ata' suun noco' doj xrej 'yaj suun rihaan Diose che'é ní' ei. Ne rej xtá' yáán so' rej nuva' Diose,

<sup>2</sup> ne 'yaj suun so' rihaan Diose rá ve' ne rej xtá', ne nuveé 'o ve' cune' yuvií uún me ve' yo' ma'. 'O se ve' cune' ma'an síí 'nj ra'a man ní' me ve' yo' adonj.

<sup>3</sup> 'O se nij xrej ata' suun noco' doj man rihaan chumií nihánj ro', no xcúún nij so' rque nij so' rasuun do', xcuu cacaa do', rihaan Diose adonj. Che'é dan me nij so' xrej ei. Che'é dan no xcúún Jesucristó rque uún so' yo'ó rasuun rihaan Diose ei.

<sup>4</sup> Dan me se nuveé xrej man rihaan chumií nihánj me Jesucristó ma'. 'O se sese sij man rihaan chumií nihánj me Jesucristó, ne taj che'é guun so' xrej ma'. Maan se rihaan chumií nihánj man xrej rque rasuun rihaan Diose ndaa vaa taj Moisés nanj ei.

<sup>5</sup> Ne nij xrej man rihaan chumií nihánj ro', ne 'yaj suun nij so' ga ma'an nij rasuun man rej xtá' ma'. Maan se ase vaa se tinanga' uun do', ase vaa se-cachun' nij rasuun man rej xtá' do', vaa suun 'yaj suun ní' so' nanj adonj. Che'é dan me asj ca'ne' Diose suun rihaan síí cu'naj Moisés cune' so' ve' mantá xij ve' na'vjj nij yuvií israelitá rihaan Diose, ne nago' so' chrej rihaan Moisés daj qui'yaj so', cataj so':

—Xcaj so' cuentá se vaa ase vaa ve' tihaán 'un̄j rihaan so' raá quij ro', dan̄j gaa guee ve' cune' so' á —taj Diose rihaan Moisés a.

<sup>6</sup> Tzaj ne cuano ro', sa' doj vaa tucuáán noco' ní' gaa 'yaj suun ní' rihaan Diose a. 'Q se sa' uxrá doj vaa síi tucu'yón rihaan ní' daj qui'yaj ní' ne cavii sa' ní' rihaan Diose, ne gaa cune' Diose man so', ne cataj xna'an̄j Diose rihaan ní' se vaa sa' doj qui'yaj Diose ga ní' rihaan nij síi cumán gaa naá a.

<sup>7</sup> 'Q se sese in̄anj sa' uxrá vaa nana cataj xna'an̄j Diose rihaan Moisés, ne taj che'é cataj xna'an̄j Diose yo'ó nana che'é ní' ma'. Tzaj ne cataj Diose se vaa ca'mii Diose yo'ó nana ei.

<sup>8</sup> Dan me se cuta' Diose cacun' xráá nij síi man̄ gaa naá, cataj Diose se vaa vaa yo'ó nana cachiin uún rihaan nij so', cataj Diose:

—Ní'yaj so' 'na' güii, —taj síi 'nij ra'a man ní'— ne cataj xna'an̄j naca 'un̄j rihaan nij ta'nii ta'nij si'no síi cu'naj Israel do', rihaan nij ta'nii ta'nij si'no síi cu'naj Judá do', daj qui'yaj nij so', ne cavii sa' nij so' rihan̄j á.

<sup>9</sup> Ne ino doj gaa nana naca yo' ga nana cataj xna'an̄j 'un̄j rihaan xii nij so' sij cumán gaa naá, gaa quita'aa 'un̄j ra'a nij so', ne quirii 'un̄j man nij so' Egipto a. Tzaj ne tanáj xco nij so' nana yo', gaa ne na'néj ra'a nij so' nan̄j adon̄j —taj síi 'nij ra'a man ní' a—.

<sup>10</sup> Dan me se ino doj gaa nana naca yo' nana tucu'yon̄j rihaan nij ta'nii ta'nij si'no síi cu'naj Israel asa' quisij güii yo' adon̄j —taj síi 'nij ra'a man ní' a—. 'Q se ca'nej 'un̄j se-nan̄aj nimán nij so', ne quene'en ma'an̄ nij so' daj me rá 'un̄j qui'yaj nij so' adon̄j. Ne guún 'un̄j Diose canoco' nij so', ne guun̄ nij so' yuvīi cutumé 'un̄j adon̄j.

<sup>11</sup> Ne se tucu'yón nij so' rihaan tuvi' nij so' do', rihaan tinúú nij so' do', daj qui'yaj nij so' canoco' nij so' man̄j a ma'. Se cataj nij so': “Xcaj so' cuentá che'é Diose vij”, se cataj nij so' ma'. 'Q se quene'en cunudan̄j nij so' man̄j nan̄j adon̄j. Dan me se quene'en síi cunij doj', quene'en síi chij doj do', man̄j nan̄j adon̄j. Quene'en cunudan̄j nij so' man̄j,

<sup>12</sup> che'é se cunuu 'ee raj man nij so', ne se qui'yáj sayuun man nij so' che'é cacun' tumé nij so' a ma'. Quinavij cacun' taj xráá nij so', qui'yáj nan̄j adon̄j —taj Diose a.

<sup>13</sup> Veé dan̄j ca'mii Diose che'é nana naca yo', ne che'é dan ne'en ní' se vaa guun nga nana cataj xna'an̄j so' rihaan síi cu'naj Moisés, ne che'é dan taj se uun se-nana Moisés yo' a ma'. Nichrun' navij nana nga yo' nan̄j adon̄j.

## 9

*Nana nihánj taj xna'an̄j se vaa ase vaa cunuu sa' nee man nij yuvīi israelitá rihaan Diose qui'yaj ton man̄ xcuu ro', dan̄j vaa cunuu sa' nimán ní' rihaan Diose, qui'yaj ton man̄ Jesucristó a*

<sup>1</sup> Dan me se gaa ca'mii Diose rihaan Moisés asino yaan, ne cataj xna'an̄j Diose daj qui'yaj nij yuvīi israelitá gaa na'víj nij so' rihaan Diose, ne cataj xna'an̄j Diose daj gaa ve' guee cune' nij yuvīi israelitá rihaan chumii nihánj a.

<sup>2</sup> Dan me se cune' nij yuvīi israelitá ve' ne rihaan tuvi' ve', ne rá ve' yo' ro', nuú aga' taj aga' ya'an do', chruun mesá cuta' nii rachrúún rihaan Diose do', ne ve' cu'naj rej guee me ve' yo' a.

<sup>3</sup> Ne vaa yo'q yatzij cortiná canoco' rej xco rej guee yo', ne rej xco yatzij cortiná yo' ne yo'ó ve' cu'naj rej guee doj a.

<sup>4</sup> Ne rá ve' rej guee doj yo' nicun' aga' oró míi, ne aga' cacaa squíi rihaan Diose me aga' oró míi tu'vee ndo'o yo' a. Ne vaa se-chrunj Diose chrúun guee, ne chrúun qui'yaj síi cu'naj Moisés gaa ca'mii Diose se-nana Diose rihaan so' me yo' a. Ne nu' xráa chrúun yo' nó aga' oró míi a. Ne rque chrúun yo' ro', nuú xruj oró, ne rque xruj oró cunuú se chá cu'naj maná a. Ne x'núú xruj oró yo' ro', naj xrúun síi cu'naj Aarón chruun vará, ne chruun xra' ma'an coj rihaan me yo', ne x'núú chruun vará yo' ro', naj yahij no se-nana Diose nana guun rá Diose cunq nij síi israelitá a.

<sup>5</sup> Ne xráa chrúun guee yo' ro', táa vij aga', ne ase vaa se-mozó Diose ro', danj vaa curuvi' roj aga' yo', ne querubines cu'naj roj aga' yo' a. Dan me se táa roj aga' yo' che'é Diose, ne caráan xcóo roj yo' man chrúun guee yo', ne rej xráa chrúun guee yo' ro', me rej tinavij Diose cacun' che'é yuvii a. Tzaj ne se nataj doj che'é rasuun yo' cuano a mei.

<sup>6</sup> Dan me se nu' nij rasuun yo' mán rque roj ve' yo' a. Ne daj a güii atúj nij xrej rá ve' rej guee yo', 'yaj suun nij xrej rihaan Diose che'é nij yuvii a.

<sup>7</sup> Tzaj ne rque 'ó ve' rej guee doj yo' ro', orún' güii rque 'o yo' atúj xrej ata suun nocoo doj rá ve' yo' nanj adonj. Ne dan me se rej guee doj yo' me se inanj ton nicaj xrej atúj xrej rej yo' adonj. Ne ton yo' me se yo' me ton che'é cacun' tumé ma'an xrej do', che'é cacun' qui'yaj nij yuvii gaa ne xcax nij yuvii cuentá se vaa cacun' me se vaa qui'yaj nij so' do' adonj.

<sup>8</sup> Inanj danj vaa tucuáan tihaan Nimán Diose a. Dan me se yo' o ne ve' cu'naj rej guee yo', ne che'é dan ne nó xcúun yuvii catuu yuvii rej guee doj yo' ma'.

<sup>9</sup> Ne ase vaa rej guee ro', vaa yo' yaj adonj. Dan me se se cunuu sa' inanj yuvii rihaan Diose qui'yaj rej guee yo' ma'. Ne yo' yaj me se rque yuvii rasuun do', xcuu cacaa do', rihaan Diose, tzaj ne taj se qui'yá' cunuu sa' inanj nimán yuvii rihaan Diose qui'yaj rasuun yo' a ma'.

<sup>10</sup> Maan se ase vaa tucuáan nocoo' yuvii che'é se chá yuvii do', che'é se 'o yuvii do', che'é daj 'yaj yuvii na'ya' yuvii do', vaa tucuáan che'é rasuun rque yuvii rihaan Diose nanj á. Dan me se tucuáan nocoo' yuvii man yaj me tucuáan yo', ne taj xna'anj nana yo' rihaan yuvii daj qui'yaj yuvii ne cunuu sa' nee man yuvii rihaan Diose adonj. Tzaj ne asa' quisij nari' yuvii tucuáan naca cuchruj Diose, gaa ne ino uxrá qui'yaj nij yuvii canoco' nij yuvii Diose ei.

<sup>11</sup> Dan me se guun Jesucristó xrej ata suun nocoo doj, ne cavii sa' uxrá ní', qui'yaj so', ne 'yaj suun so' yo'ó rej guee, tzaj ne nuveé ve' cune' yuvii rihaan chumii nihánj me yo'ó rej guee yo' ma'.

<sup>12</sup> Ne orún' uun catúj so' rá rej guee yo', ne yuun che'e navij cacun' tumé ní' nu' cavii nu' ca'anj, qui'yaj so' nanj adonj. Tzaj ne nuveé nanj ton man tana do', ton man scúj le'ej do', me nicaj so' ma'. Maan se ton man ma'an ya so' nicaj so' gaa catúj so' rihaan Diose, ne qui'yaj canaán ya so' nanj adonj.

<sup>13</sup> Dan me se sese ton man tana do', ton man scúj toró do', yaj man nij scúj vacá cacaa do', taman' xrej man nij yuvii, ne cunuu sa' nee man nij yuvii yo' rihaan Diose,

<sup>14</sup> gaa ne táa a ton man Jesucristó, ne sa' doj vaa yo' rihaan nu' nij rasuun yo' nanj chuguanj. Dan me se taj a doj cacun' tumé Jesucristó ma'. 'Q se cayáan Nimán Diose ga so', ne che'é dan rque so' man ma'an so' rihaan Diose chuguanj. Che'é dan me doj a cunuu sa' nimán ní', qui'yaj ton man Jesucristó, ne quinavij cacun' tumé ní' che'é se chí'ii qui'yaj ní' asij rque doj a. 'Q se daj chíhaa mój se cavii sa' ní', qui'yaj ma'an ní' ma'. Maan se cavi' uun ní', qui'yaj ma'an ní' nanj ei. Tananj uún, ne taj che'é qui'yaj ní' se vaa 'yaj ní' nu' 'na'

mei. Maan se yaj ro', qui'yaj ní' nu' rasuun rej rihaan ní', ne canoco' inanj ní' man Diose sí' vaa i'na' yaj ei.

15 Dan me se Jesucristó me se cavi' so' che'é rej quene'en so' se vaa ne guun nucuaj yuvij canoco' nij yuvij nu' tucuáan cataj xna'anj Diose asino yaan rihaan sí' cu'naj Moisés chuguanj. Che'é dan Jesucristó me sí' narqué tucuáan naca che'é ní', cataj xna'anj so' nana naca rihaan ní' daj qui'yaj ní', cavi' sa' ní' rihaan Diose a. Che'é dan ní' sji canacúun Diose man ro', nacaj ní' nu' se sa' cataj xna'anj Diose se vaa rque so' rihaan ní' nu' cavi' nu' ca'anj ei.

16 Dan me se sese vaa si'yaj yo'o so' rasuun guun si'yaj yo'ó yuvij, ne asa' cavi' so', ne asino yaan cavi' so', gaa ne guun ya rá yuvij se vaa cavi' so', gaa ne ca'vee guun rasuun yo' si'yaj yo'ó yuvij yo' adonj.

17 'O se asa' quisij cavi' yo'o so', gaa ne quisij ya nu' se-nana so' che'é si'yaj so' ei. Tzaj ne se guun quita'aa yuvij si'yaj yo'ó sese ataa cavi' so' mei.

18 Che'é dan gaa cataj xna'anj Diose asino yaan rihaan sí' cu'naj Moisés daj qui'yaj nij yuvij israelitá cavi' sa' nij so' rihaan Diose, ne vaa xcuu cavi' che'é nana yo' nana cataj xna'anj Diose, ne dan me se che'é ton cayanj man xcuu yo' ro', che'é dan quisij ya nu' se-nana Diose che'é nij yuvij yo' adonj.

19 Dan me se gaa quisij cataj xna'anj sí' cu'naj Moisés rihaan nij yuvij nu' nana me rá Diose cunó nij yuvij, gaa ne nicaj so' ton man scúj le'ej nicaj so' na nicaj so' cachij matzinj cachij maree nicaj so' coj cu'naj hisopo nicaj so', gaa ne taman' so' ton yo' rihaan yanj no se-nana Diose do', rihaan taran' nij yuvij do' adonj.

20 Ne cataj xna'anj so' rihaan nij yuvij a:

—Che'é ton nihánj quisij ya nu' nij nana cataj xna'anj Diose rihaan ní' daj qui'yaj ní' cavi' sa' ní' rihaan Diose adonj —taj Moisés rihaan nij yuvij a.

21 Gaa ne taman' uún so' ton yo' rihaan ve' mantá guee do', rihaan nu' nij rasuun rasuun nij xrej gaa na'vúj nij xrej rihaan Diose do' a.

22 Dan me se inanj ton me se vaa achiin che'é rej nahuun sa' que'ee uxrá rasuun rihaan Diose, taj se-tucuanj Moisés a. Ne sese nuvi' ton, ne se caráj x'naa Diose ní'yaj Diose cacun' tumé yuvij ma'.

23 Dan me se xa' nij rasuun taman' Moisés ton rihaan, tzaj ne ase vaa nij rasuun man rej xta' rej nicun' Diose vaa nij rasuun yo', ne achiin ton che'é rej cunuu sa' nij rasuun yo' rihaan Diose, ne che'é dan avi' xcuu, 'yaj Moisés chuguanj. Tzaj ne sa' uxrá doj vaa ma'an nij rasuun man rej xta' rihaan nij rasuun man rihaan chumij nihánj, ne che'é dan achiin se sa' doj rihaan ton man xcuu yan cunuu sa' nij rasuun man rej xta' rej catuu ní' rihaan Diose ei.

24 Dan me se ma'an Jesucristó me sí' rqué ton man ma'an so', che'é rej cunuu sa' nij rasuun man rej xta' che'é ní' ei. 'O se nuveé rej guee nuu rá ve' cune' ma'an yuvij me rej catúj Jesucristó ma'. 'O se rej guee man rihaan chumij nihánj ro', ase vaa rej nicun' ma'an Diose rej xta' vaa yo', tzaj ne nuveé ya ya rej nicun' Diose me yo' ma'. Tzaj ne yaj me se catúj ma'an Jesucristó rej xta' yo', ne cuano nicun' so' rihaan ma'an Diose, ne achún ni'yaj so' rihaan Diose che'é ní' adonj.

25 Tzaj ne se qui'yaj so' ndaa vaa 'yaj nij xrej atá suun nocoo doj man rihaan chumij nihánj ma'. Nij xrej me se nicaj nij xrej ton man xcuu atúj nij xrej rá rej guee doj yo' daj a yo' adonj. Tzaj ne ne cachijn niganj rque Jesucristó ton man ma'an so' rihaan Diose man adonj.

<sup>26</sup> 'Q se sese vaa che'é qui'yaj so' danj, ne no xcuún so' que'ee ndo'o quiran' so' sayuun asij gaa qui'yaj Diose chumij nihánj ndaa cuano adonj. Tzaj ne yaj ro', nichrun' quinavij chumij nihánj, ne ndaa yaj ca'na' Jesucristó rihaan chumij nihánj, ne orún' uun cavi' so' che'é ní', ne navij nu' cacun' tumé ní' nanj adonj.

<sup>27</sup> Dan me se ne'en ní' daj quiran' 'o 'o ní' sij man rihaan chumij nihánj, ne dan me se ne'en ní' se vaa orún' uun cavi' 'o 'o ní', gaa ne canicun' ní' rihaan Diose, ne ca'ne' so' cacun' che'é ní' nanj adonj.

<sup>28</sup> Ne dan me se che'é se orún' uun cavi' Jesucristó, ne tinavij so' cacun' tumé que'ee yuvij ro', vaa güii ca'na' uún so' rihaan chumij nihánj ei. Tzaj ne nuveé che'e rej cavi' uún so' che'é cacun' tumé yuvij me ca'na' so' ma'. 'Q se ca'na' so', ne ní' sij na'vij ndo'o man so' ro', cavi' sa' ní' rihaan Diose, qui'yaj so' adonj.

## 10

<sup>1</sup> 'Q se ase vaa nij se sa' quene'en ní' rej xraj vaa se-tucuanj Moisés, tzaj ne nuveé ma'an nij se sa' yo' me tucuáan yo' ma'. 'Q se ticavi' nii man xcuu, ne rqué nii xcuu yo' rihaan Diose, ne inanj danj 'yaj nii 'o yo' 'o yo' nanj adonj. Dan me se taj güii yo'o cunu sa' ya nij síi rqué rasuun yo' rihaan Diose ma'.

<sup>2</sup> Dan me se x'néj cacun' xraá nij síi rqué xcuu rihaan Diose, tzaj ne quene'en uún nij so' se vaa vaa doj cacun' tumé uún nij so', ne che'é dan se ca'ne' rá nij so' ga suun rqué xcuu cavi' rihaan Diose a ma'.

<sup>3</sup> Dan me se che'é xcuu cavi' rqué nij so' rihaan Diose ro', che'é dan 'o yo' 'o yo' me se ne quini'yon nij so' se vaa sij tumé ya cacun' me nij so' a man adonj.

<sup>4</sup> 'Q se taj se qui'yá' quinavij cacun' tumé yuvij qui'yaj ton man scúj toró do', ton man tana do' a ma'.

<sup>5</sup> Che'é dan ca'na' Jesucristó rihaan chumij nihánj, ne ca'mii so' rihaan Diose, cataj so':

—Taj se uun xcuu rque nij yuvij cavi' rihaan so' a ma'. Taj se uun nu' nij rasuun rque yuvij rihaan so' a ma'. Tzaj ne nee manj ro', vaa se uun rihaan so', ne che'é dan qui'yáa so' nee manj adonj.

<sup>6</sup> Dan me se ne niha' rá so' ni'yaj so' xcuu acaa che'é cacun' ma'.

<sup>7</sup> Dan me se cataj 'unj: "Veé 'unj nicun' rihaan so' 'na'. Rihaan daán so' yanj libró nó nana a'mii che'é 'unj, se vaa qui'yáa 'unj nu' se vaa me rá so' qui'yáj, Ataj", taj 'unj rihaan so' a —taj nana ca'mii Jesucristó rihaan Diose nana no rihaan danj Diose a.

<sup>8</sup> Dan me se cataj so' se vaa xcuu rqué yuvij rihaan Diose do', 'núu rqué yuvij rihaan Diose do', xcuu acaa do', xcuu avi' che'é cacun' do', ne achiin rihaan Diose ma'. Ne ne niha' rá Diose ni'yaj Diose rasuun yo' a man adonj. Ne nanj rasuun yo' me se rqué nij síi noco' se-tucuanj Moisés rihaan Diose nanj adonj.

<sup>9</sup> Gaa ne cataj uún so' a:

—Veé 'unj nicun' rihaan so', 'na' qui'yáa 'unj nu' se vaa me rá so' qui'yáj á —taj uún so' a.

Veé dan me tinavij so' tucuáan nga yo', ne vaa tucuáan naca cuchruj so' canoco' ní' a.

<sup>10</sup> Ne che'é se yuun che'e nago' Jesucristó man ma'an so' rihaan Diose ndaa vaa guun rá Diose qui'yaj so' ro', che'é dan aj cunu sa' ní' rihaan Diose adonj.

11 Ne xā' taran' nij xrej, tzaj ne yo'o nicun' nij so' 'yaj suun nij so' rihaan Diose daj a güii, ne nanj xcuu do', 'núú do', rqué nij so' rihaan Diose, tzaj ne taj se qui'yá' x'neē cacun' xráá yuvij qui'yaj rasuun yo' ma'.

12 Tzaj ne Jesucristó me se orún' uun ca'vej so' cavi' so' che'é nij yuvij, ne yuun cavi' so' che'é nu' cacun' atá nij yuvij nanj adonj. Dan me se rqué ma'an so' man so' rihaan Diose che'é nu' cacun' tumé yuvij, gaa ne ca'anj cayáán so' x'núú Diose rej nuva' Diose ei.

13 Ne cuano nihánj me se na'vjj uun Jesucristó ndaa se qui'yaj canaán Diose rihaan taran' nij síí taj ri'yunj man Jesucristó, gaa ne quirij ta'nga' Jesucristó rihaan taran' nij so' adonj.

14 'O se orún' uun nago' so' man ma'an so' rihaan Diose, ne che'é dan yo'o cunu sa' nij síí sa' noco' man Diose nu' cavi' nu' ca'anj ei.

15 Ne ma'an Nimán Diose taj xna'anj uún rihaan ní' daj quiran' ní' ei. Asino yaan cataj so':

16 —Dan me se ino doj gaa nana naca yo' nana tucu'yón 'unj rihaan nij so' asa' quisij güii yo' adonj. 'O se ca'nej 'unj xrej 'unj nimán nij so', ne cachron 'unj letrá nana yo' cúú raá nij so' daj qui'yaj nij so', ne quene'en ma'an nij so' qui'yaj nij so' rasuun sa' adonj —taj síí 'nij ra'a man ní' a.

17 Gaa ne cataj uún so':

—Ne güej nu' cacun' tumé nij so' xráá nij so', qui'yá' á —taj uún Nimán Diose a.

18 Ne che'é se aj caráj x'naa Diose che'é cacun' tumé ní' ro', che'é dan ca'ne' rá ní' ga suun rqué rasuun rihaan Diose che'é cacun' nanj adonj.

### *Nana nihánj taj xna'anj se vaa no xcúún ní' canoco' raan ní' man Diose a*

19 Dan me se che'é se cayanj ton man Jesucristó ro', che'é dan taj che'é cuchu'vi' ní' catuú ní' rá rej guēē xta' a ma'. Dan me se taj che'é cuchu'vi' ní' canicun' ní' rihaan ma'an Diose, man tinuj, man nocoj.

20 'O se cavi' neē man Jesucristó, ne inanj danj ca'núj so' chrej naca rihaan ní' catuú ní' rihaan Diose, ne gaa i'na' ní' rihaan Diose nanj adonj.

21 Ne xrej sa' uxrá me uún Jesucristó che'é ní' sji nocó' man Diose nanj ei.

22 Che'é dan no xcúún ní' cuchí' ní' rihaan Diose, ne che'é se amán rá ní' ni'yaj ní' man Jesucristó, che'é dan guun ya uxrá rá ní' se vaa ca'vee canoco' sa' ní' man Diose, ne 'o cuyaān gaa rá taran' ní' ei. Dan me se 'o cuyaān gaa rá taran' ní', che'é yan quisij nanó rá ní' che'é cacun' tumé ní', ne cunu sa' ya nimán ní', qui'yaj ní', gaa canoco' ní' man Jesucristó nanj chuguanj. Ne cata' ne ní' rque na sa', ne cunu sa' ya neē man ní' nanj adonj.

23 Ne yo'o cuchuman rá ní' se vaa ya cavij sa' ní', ne se guun vij rá ní' daj chihāā mǐj mei. 'O se vaa che'é gaa nucaj rá ní' man síí cataj se vaa sa' qui'yaj so' che'é ní' á.

24 Ne xcaj ní' cuentá che'é tinúú ní' daj qui'yaj ní' ne sa' doj cunu 'ee rá nij tinúú ní' man tuvi' so', ne doj a qui'yaj suun nij tinúú ní' suun sa' che'é Diose a.

25 Ne se tanáj ní' tucuaán nuu chre' ní' ga tinúú ní' ma'. 'O se vaa yuvij ne noco' tucuaán yo', tzaj ne no xcúún soj nago' soj chrej nucaj man tinúú soj gaa nuu chre' soj ei. Ne yaj ro', me se doj a cunu chre' soj, che'é yan ne'en soj se vaa nichrun' quisij güii ca'na' uún Jesucristó rihaan chumij nihánj nanj adonj.

<sup>26</sup> 'Q se sese aj canoco' ní' nanā ya nanā nari' ní', gaa ne sese quiriī nimán ní' qui'yaj ní' cacun', ne taj vaj yo'ó se vaa qui'yaj ní' gaa ne carāa x'naa Diose uún che'é cacun' tumé ní' a ma'.

<sup>27</sup> Dan me se niq̄e ní', ne vaa güiī ca'ne' Diose cacun' che'é ní', ne gaa yo'o ya'an, ne guun nihā' uxrá rá ya'an yo' chā ya'an yo' man nij síī taj ri'yunj man Diose nanj adonj.

<sup>28</sup> Xa' nij síī noco' se-tucuañj Moisés, tzaj ne sese 'yaj 'o tuvi' nij so' cacun', ne sese vaa vij va'ñuj síī quene'en se vaa 'yaj so' cacun', ne se cunuu 'eē rá niī man so' a ma'. Maan se avi' so' cuaj, 'yaj niī nanj á.

<sup>29</sup> Ne nij uxrá doj gaa sayuun quirañ' síī taj ri'yunj man ma'an ta'níī Diose adonj. 'Q se ton man Jesucristó ro', qui'yaj cunuu sa' ní' rihaan Diose ne yo'o canoco' ní' chrej sa' cuchruj Diose che'é ní' ei. Tzaj ne taj yu'vee nó ton yo', rá nij síī tanáj xcō se-nanā Jesucristó a ma'. Ne quij a'miī nij so' rihaan Nimán Diose síī qui'yaj ndo'o se luj che'é ní' ei.

<sup>30</sup> 'Q se aj ne'en ní' daj ca'miī Diose, cataj Diose:

—'Unj me síī nō xcúún qui'yaj sayuun man yuvīī tumé cacun' a. Ya naru'vee 'unj nu' che'é se vaa qui'yaj nij so' rihaan chumīī nanj á —taj Diose a.

Ne taj uún Diose:

—'Unj sij 'niī ra'a man soj ro', ca'nej cacun' che'é soj sij noco' manj adonj —taj uún Diose a.

<sup>31</sup> Dan me se cucu'vi' ndo'o vaa me se vaa quirañ' nij síī tanáj ra'a Diose vaa i'nā' ya adonj.

<sup>32</sup> Dan me se cunuú rá soj daj qui'yaj soj gaa guun che'e soj canoco' soj man Jesucristó ei. Dan me se gaa guun che'e soj canoco' soj man Jesucristó, ne síī xcaj cuentá me soj, ne guun nucuaj soj quirañ' soj sayuun, ne yo'o raan canoco' soj man Jesucristó chuguañj.

<sup>33</sup> Ne quene'en yuvīī daj sij me soj, ne nachri' nij yuvīī ni'yaj nij yuvīī man soj, ne qui'yaj nij yuvīī sayuun man soj, ne guun tuvi' soj ga yo'ó nij síī ran' sayuun yo' a.

<sup>34</sup> 'Q se cunuu 'eē rá soj man tinúú soj nij síī 'niī taga', ne guun nihā' rá soj ni'yaj soj se vaa ca'néj yuvīī si'yaj soj che'é se sij noco' man Jesucristó me soj a. 'Q se ne'en soj se vaa sa' doj vaa si'yaj soj rasuun nicaj soj rej xta', ne rasuun yo' me se daj chihaā m̄j se quinavij rasuun yo' a man adonj.

<sup>35</sup> Dan me se se gaa cucu'vi' soj canoco' soj man Jesucristó, ne se ca'ne' rá soj ma'. Ne 'o veé danj gaa rá soj nu' caviī nu' ca'anj ei. Che'é yan a'néé nucuaj nimán soj ro', vaa güiī, ne nocō ya vaa rasuun quirí' soj ei.

<sup>36</sup> 'Q se vaa che'é gaa inaj nimán soj, ne yo'o qui'yaj soj se vaa me rá Diose qui'yaj soj, ne vaa güiī nacaj soj nu' se vaa cataj Diose nacaj soj chuguañj.

<sup>37</sup> Dan me se danj Diose taj se vaa nichrun' ca'na' síī ca'na', ne se guun raan so' ma'.

<sup>38</sup> Ne síī sa' rihaan Diose ro', maan che'é se amán rá so' ro', che'é dan yo'o cayáan so' ga Diose adonj. Tzaj ne sese canicaj so' rej xcō so', ne se gaa nihā' rá Diose quene'en Diose man so' a ma', taj danj Diose a.

<sup>39</sup> Tzaj ne nuveé sij anicaj rma'an rej xcō me ní' ma'. Che'é dan se quiri' ní' ma'. 'Q se sij nucuaj rá man Diose me ní', ne che'é dan quinanīī nimán ní' rihaan sayuun adonj.

## 11

*Nanā nihañj taj xna'anj daj 'yaj síī amán rá ni'yaj man Diose a*



<sup>1</sup> Vaa se ne ruvi' ni'yaj yuvij, tzaj ne guun ya rá ní' se vaa ya vaa nu' nij rasuun yo' ei. Tzaj ne orún' ní' sij amán rá ni'yaj man Diose me nij síi amán rá se vaa ya vaa nu' nij rasuun yo' chuguanj.

<sup>2</sup> Ne nij síi man gaa naá ro', amán rá nij so' ni'yaj nij so' Diose, ne che'é dan gaa naá cataj Diose se vaa síi sa' me nij so' ei.

<sup>3</sup> Xa' ma'an ní', tzaj ne che'é se amán rá ní' ni'yaj ní' Diose ro', che'é dan xcax ní' cuentá se vaa ca'mii Diose, gaa ne guun nu' nij chumii, qui'yaj so' adonj. Dan me se nicaj Diose rasuun ne ruvi', ne qui'yaj Diose nu' rasuun ruvi' ni'yaj ní' adonj.

<sup>4</sup> Xa' síi cu'naj Abel, tzaj ne che'é se cuchumán rá so' ni'yaj so' Diose ro', che'é dan sa' doj vaa se rque' so' rihaan Diose, ne tinúu' so' Caín me se nij doj vaa rasuun rque' so' man Diose adonj. Che'é dan cataj Diose se vaa sa' vaa nimán síi cu'naj Abel, ni'yaj Diose che'é nij rasuun rque' síi cu'naj Abel rihaan Diose a. Dan me se che'é se cuchumán rá so' ni'yaj so' Diose ro', che'é dan yaj taj xna'anj yuvij che'é so' daj qui'yaj so' gaa naá nanj adonj.

<sup>5</sup> Xa' síi cu'naj Enoc, tzaj ne che'é se cuchumán ndo'o rá so' ni'yaj so' Diose ro', che'é dan vaa i'na' so' cavii so' ca'anj so' rej xta' rej yanj Diose, ne ne ca'vej rá Diose caví' so' ma'. Dan me se nano' ndo'o nii man so', tzaj ne ne narj' nii man so' a ma'. Maan se naxcaj nu' Diose man so' ca'anj so' rej xta' nanj adonj. 'O se gaa ataa cavij so' rej xta', ne cataj xna'anj Diose che'é so' se vaa guun niha' uxrá rá Diose ni'yaj Diose man so', che'é se síi sa' guun so' rihaan Diose ei.

<sup>6</sup> Tzaj ne síi ne amán rá ni'yaj man Diose ro', daj chihaa mij se guun niha' rá Diose ni'yaj Diose man so' a ma'. 'O se síi me rá cuchí' rihaan Diose ro', no xcúun so' cuchuman rá so' se vaa ya vaa Diose, ne vaa che'é cuchuman rá so' se vaa naru'vee ma'an Diose rihaan nij síi nanó' ya man Diose ei.

<sup>7</sup> Dan me se síi cu'naj Noé, tzaj ne che'é se cuchumán ndo'o rá so' ni'yaj so' Diose ro', che'é dan, nda' se ataa quene'en so' daj gaa sayuun qui'yaj Diose man chumij nihánj, tzaj ne maan che'é se ve'é cuno so' nana' cataj xna'anj Diose rihaan so', ne che'é dan qui'yaj so' rihoo xij cheé rihaan na, ne che'é dan me quinanii nij tuví' nij so' rihaan sayuun yo' adonj. Ne maan che'é se cuchumán ya rá so' ni'yaj so' Diose, che'é dan cuta' so' cacun' ya xraá nij yuvij man rihaan chumij se vaa ne ca'vej rá nij yuvij cuno nij yuvij se-nana Diose, ne guun ma'an so' síi sa' ni'yaj Diose adonj.

<sup>8</sup> Dan me se síi cu'naj Abraham uún me se che'é se cuchumán ndo'o rá so' ni'yaj so' Diose ro', che'é dan cuno so' rihaan Diose gaa canacúun Diose man so', ne cavii so' ca'anj so' rej rque' Diose yo'óo guun to'oj so' vaa güii a. Dan me se a doj ne quene'en so' me rej cuchí' so', tzaj ne ne guun vij rá so' ma'. Maan se cavii so' ca'anj so' adonj.

<sup>9</sup> Dan me se maan che'é se cuchumán rá so' ni'yaj so' Diose ro', che'é dan cavii so' chiháan so' ca'anj so' rej cataj xna'anj Diose se vaa guun to'oj so' ei. Ne gaa cuchí' so' yo'óo yo', ne to'oj yo'óo yuvij me yo'óo yo', tzaj ne veé danj quináj síi cu'naj Abraham yo', ne cuta' so' ve' mantá, ne yáan so' ga ta'nii so' síi cu'naj Isaac do', ta'nij si'no' so' síi cu'naj Jacob do' a. Taran' nij so' me síi guun to'oj yo', cataj Diose rihaan síi cu'naj Abraham a.

<sup>10</sup> Danj qui'yaj síi cu'naj Abraham, cuno so' rihaan Diose, che'é se sij na'vij ndo'o cayáan yo'óo chuman' nocojo chuman' naj rej xta' me so' a. Ne nuveé ve' mantá uun me chuman' yo' ma'. 'O se raan ndo'o vaa tacóo nu' ve' naj chuman' yo' ei. 'O se ma'an Diose cuchruij chuman' yo', ne ma'an Diose qui'yaj nu' chuman' yo' adonj.

11 Dan me se che'é se cuchumán rá síí cu'naj Abraham ni'yaj so' Diose ro', che'é dan nda' se chana itupun me nica so' chana cu'naj Sara, ne nda' se chii nga me ma'an so', tzaj ne guun nucuaj rá so' man Diose se vaa ca'ngaa ta'níí so', che'é se cuchumán rá so' se vaa Diose me síí qui'yaj nu' se vaa cataj xna'anj ma'an Diose rihaan so' adonj.

12 Dan me se nda' se daj doj cavi' síí chii nga yo', tzaj ne xna'anj ndo'o nij so', ne ase vaa que'ee ndo'o nij yati' man rej xta' ro', danj vaa guun que'ee uxrá nij tuví' nij so' nij síí israelitá yo', ne dan me se ase vaa naj yo'óo chruu tu'va na ya'anj ro', cunudanj vaa xna'anj nij so' nanj adonj.

13 Dan me se yo'o cuchumán rá taran' nij síí man gaa naá ni'yaj nij so' Diose ndaa se cavi' taran' nij so' ei. Ne ne quirí' ma'an nij so' se vaa cataj xna'anj Diose se vaa rque Diose rihaan nij tuví' nij so' ma'. Tzaj ne quene'en nij so' se vaa vaa güii qui'yaj Diose cunudanj yo', ne che'é dan guun niha' rá nij so' nanj adonj. Ne cataj xna'anj nij so' se vaa nuveé chihanj nij so' me chumií nihánj ma'. Maan se vaj un nij so' doj rihaan chumií nihánj, ne síí man yo'óo chumií me nij so', cataj ma'an nij so' nanj adonj.

14 Ne síí a'mií danj me se nata' nij so' se vaa nano' uxrá nij so' yo'óo chumií guun chihanj nij so' ei.

15 Ne sese guun rá nij so' se vaa sij chihanj chumií nihánj me nij so', ne gaa ya'núj rihaan nij so' nanicaj nij so' chiháán nij so' chuman' naj rihaan chumií nihánj, tzaj ne ne guun rá nij so' danj ma'.

16 'O se guun ndo'o rá nij so' cané nij so' chuman' sa' doj chuman' naj rej xta' ei. Ne sese taj vaj chuman' sa' cayáán nij so' vaa güii, ne guun na'aj Diose gaa nanj ei. Tzaj ne taj che'é guun na'aj Diose ma'. 'O ya vaa chuman' nocoo cayáán nij so', qui'yaj Diose ei.

17 Ne che'é se cuchumán rá síí cu'naj Abraham ni'yaj so' Diose ro', che'é dan gaa guun rá Diose quene'en Diose sese raan ya noco' so' man Diose, ne ca'vej rá síí cu'naj Abraham ticaví' so' rihaan Diose man orún' ta'níí so' Isaac síí rque ma'an Diose man so' a. Dan me se danj qui'yaj síí cu'naj Abraham yo', che'é se me ndo'o rá so' ni'yaj so' Diose a. Ne Isaac me síí rque Diose guun ta'nij síí cu'naj Abraham, ndaa vaa cataj xna'anj Diose rihaan so' se vaa gaa ta'níí so' a.

18 Dan me se cataj xna'anj Diose rihaan síí cu'naj Abraham se vaa cumán ndo'o ta'níí ta'nij si'no síí cu'naj Abraham qui'yaj síí cu'naj Isaac yo' a.

19 Ne nda' se guun ndo'o rá síí cu'naj Abraham ca'ngaa ta'níí ta'nij si'no so', tzaj ne ca'vej rá so' ticaví' so' man síí cu'naj Isaac rihaan Diose nanj chuguanj. 'O se guun rá so' se vaa guun nucuaj Diose cunuu i'na' uún yuvií qui'yaj Diose asa' cavi' yuvií, rá so' a. Dan me se ya uxrá, ne daj doj se cavi' síí cu'naj Isaac, qui'yaj Abraham, tzaj ne caráán Diose rihaan so', ne tanáj uún Diose man síí cu'naj Isaac rihaan síí cu'naj Abraham a.

20 Dan me se síí cu'naj Isaac me se che'é se cuchumán rá so' ni'yaj so' Diose ro', che'é dan cataj so' se vaa qui'yaj Diose se luj che'é roj ta'níí so' síí cu'naj Jacob ga síí cu'naj Esaú a. Ne cataj xna'anj so' daj gaa quiran' roj ta'níí so' rej rihaan roj so' a.

21 Dan me se síí cu'naj Jacob me se che'é se cuchumán rá so' ni'yaj so' Diose ro', che'é dan gaa nichrun' caví' so', ne cataj so' se vaa qui'yaj Diose se luj che'é roj ta'níí síí cu'naj José, ne dan me se ru'maan so' se-garroté so' rihaan yo'óo, ne quina'víj ndo'o so' rihaan Diose a.

22 Ne dan me se síí cu'naj José me se che'é se cuchumán rá so' ni'yaj so' Diose, che'é dan gaa nichrun' caví' so', ne nuchruij raa so' daj qui'yaj nij yuvií

israelitá gā cúu man so' asá' curihanj nij so' Egiptó vaa güii, ne che'é dan cataj xna'anj so' se vaa asá' cavii nij síi israelitá rej Egiptó, ne quirii nij so' cúu man ma'an so' nicaj nij so' ca'anj nij so', cataj so' rihaan nij so' a.

23 Dan me se Moisés me se che'é se cuchumán rá nij tuvi' síi cu'naj Moisés ni'yaj nij so' Diose ro', che'é dan va'núj ya yavii caxrij yuve nij so' man Moisés gaa ca'ngaa so' a. Danj qui'yaj nij so' che'é se quene'en nij so' se vaa ve'é ndo'o vaa ne'ej yo' a. Ne ne cuchu'vi' nij so' rihaan síi nicaj suun rey síi cataj xna'anj se vaa cavi' nu' ta'núí nij so' ne'ej sno'o cunii a ma'.

24 Che'é se cuchumán rá ma'an síi cu'naj Moisés ni'yaj so' Diose ro', che'é dan gaa cachij so', ne ne ca'vej rá so' cataj yuvij se vaa ta'nij si'no síi nicaj suun rey cu'naj Faraón me so' ma'.

25 'O se ca'née nimán so' quiran' so' sayuun gā nij yuvij noco' man Diose nanj adonj. 'O se sa' a doj vaa canocó' man Diose, rá so', ne nij vaa guun ni'á' rá' qui'ya' cacun' rihaan Diose yaj vaa i'na' rihaan chumii nihánj, rá so' a.

26 Dan me se vaa yu'vee ndo'o nó sayuun quiran' so' che'é síi ca'nej Diose tinanii man yuvij man rihaan chumii nihánj rihaan sayuun, ne taj yu'vee nó taran' nij rasuun sa' man rej cu'naj Egiptó, rá so', ne ve'é a doj canocó' man Diose, rá Moisés a. 'O se aj navij nu' nuchruj raá so' che'é nu' rasuun sa' rque Diose man so' ei.

27 Che'é se cuchumán rá so', che'é dan tanáj so' Egiptó ca'anj so', ne ne cuchu'vi' so' daj qui'yaj síi nicaj suun rey man so' ma'. Nda' se ne ruvi' Diose ni'yaj yuvij, tzaj ne ase 'yaj síi ruvi' nicun' Diose rihaan ro', danj qui'yaj síi cu'naj Moisés, yo'ó canoco' so' man Diose adonj.

28 Che'é se cuchumán rá so' ni'yaj so' Diose, che'é dan cuchruj so' cha'anj cu'naj pascuá navij rá nij yuvij israelitá, ne cataj xna'anj so' rihaan nij yuvij israelitá se vaa caxrii nij so' ton matzinj tu'va ta'yaa rihaan tucuá nij so', gaa ne se gaa nanj cavi' ta'núí nij so' síi chava' qui'yaj se-mozó Diose síi 'yaj avi' ndo'o yuvij, taj Moisés rihaan nij so' a.

29 Dan me se nij yuvij israelitá me se che'é se cuchumán rá nij so' ni'yaj nij so' Diose ro', che'é dan guun nucuaj nij so' cachén nij so' tanuu na ya'anj cu'naj Na Ya'anj Ve'ej a. Ne ca'ne' na ya'anj yo' man yo', ne quináj yo'ó nacoq inanj cachén nij so', qui'yaj Diose a. Tzaj ne gaa guun rá nij síi man Egiptó cachén nij so' rihaan yo'óo nacoq yo' me se caráan na xráá nij so', ne canó xráá nij so', qui'yaj na yo' a.

30 Ne che'é se cuchumán rá nij yuvij israelitá ni'yaj nij so' Diose ro', che'é dan cachén chij ya güii gaa aman tucuachriin nij so' nu' anicaj chuman' cu'naj Jericó, ne canee nu' chingá nicun' nu' anicaj tu'va chuman' yo', qui'yaj Diose, che'é yan cuchumán rá nij so' ni'yaj nij so' Diose a.

31 Dan me se che'é se cuchumán rá chana ni'á' rá ga chii chana cu'naj Rahab ni'yaj no' Diose ro', che'é dan ne cavi' no' ga yo'ó nij síi man chiháan no' síi ne ca'vej rá cuno rihaan Diose a. Maan se ve'é nacaj no' man roj síi israelitá síi me rá quene'en daj vaa nu' chiháan no', ne ne qui'yaj no' sayuun man roj so' a.

32 Ne me yo'ó nana cataj xna'anj 'unj rihaan nij soj, rá soj ga. 'O se achén ndo'o orá, 'yaá 'unj, ne ataa cataj xna'anj 'unj che'é síi cu'naj Gedeón do', che'é síi cu'naj Barac do', che'é síi cu'naj Sansón do', che'é síi cu'naj Jefe do', che'é síi cu'naj David do', che'é síi cu'naj Samuel do', che'é yo'ó taran' nij síi nata' se-nana Diose gaa naá do', nanj chuguanj.

<sup>33</sup> Dan me se che'é se cuchumán rá nij so' ni'yaj nij so' Diose ro', che'é dan qui'yaj canaán nij so' rihaan sí nicaj suun rey do', ca'ne' sa' nij so' cacun' che'é yuvií do', quirí' nij so' se vaa cataj xna'anj Diose quirí' ya nij so' do', guun nucuaj nij so' caráán nij so' tu'va chuvaá do',

<sup>34</sup> tina'áj nij so' ya'an yuvaá se gaa nanj cacaa nij so' qui'yaj ya'an do', quinanií nij so' rihaan yuvií nicaj neé espadá me rá ticavi' man nij so' do', nari' nucuaj nij so' qui'yaj Diose gaa ninaj nij so' do', guun nucuaj nij so' qui'yaj canaán nij so' rihaan sí man yo'ó chuman' sí cunu' ga nij so' do' ei.

<sup>35</sup> Ne vaa nij chana cuchumán rá ni'yaj man Diose se vaa ya cunu i'na' uún tuvi' nij chana sí cavi', ne ya uxrá cunu i'na' uún tuvi' nij chana yo' ei.

Ne yo'ó ta'aj nij sí cuchumán rá ni'yaj man Diose ro', quita'aa nii numj nii man nij so', ne go' uxrá nii man nij so' ndaa se cavi' nij so' ei. Dan me se cavi' nij so' che'é se ne ca'vej rá nij so' cataj nij so' se vaa nij vaa Diose a. 'Q se sa' doj cavi' nij so' che'é Diose, ne ve'é doj cunu i'na' uún nij so' vaa güii qui'yaj Diose, rá nij so' a.

<sup>36</sup> Ne yo'ó ta'aj nij so' me se ca'nga' nacoó yuvií ni'yaj yuvií man yo'ó ta'aj nij so', ne go' yuvií cuartá xráá nij so', ne yo'ó ta'aj nij so' me se numj nii aga' ne' ra'a nij so', ne caxríj nii taga' man nij so' chuguanj.

<sup>37</sup> Yo'ó ta'aj nij so' cavi', qui'yaj yuvií gaa go' nij yuvií yahij man nij so' a. Ne ta'aj nij so' ro', ca'ne' aga' seraa a'ne' chruun man nij so' a. Go' yuvií neé espadá man ta'aj nij so' a. Ne dan me se taran' nij sí sa' yo' me se cachéé un nij so' rej xraj rej rque rihaan chumií nihánj, ne taj vaj ve' sa' cayáán nij so' ma'. Ne inanj nuj matzinj do', nuj tana do', cunuú nij so' ei. Ne sí níque uxrá me nij so', ne sí cachiin ndo'o rasuun rihaan guun uún nij so', ne sí ní uxrá quiran' guun uún nij so', qui'yaj yuvií ei.

<sup>38</sup> Dan me se sij sa' uxrá me nij so', ne ne nó xcúun nij yuvií man rihaan chumií nihánj cayáán nij so' ga nij yuvií nihánj a man adonj. Dan me se táa ri'yunj yuvií man nij so' rihaan chumií nihánj, ne dan me se unánj nij so' tucua' nij so', ne vaj nij so' rej tacaan do', rej quij do', atúj nij so' rque yu'uj taj yuvej do', rque yu'uj taj rque yo'ó do', 'yaj nij yuvií yo' nanj adonj.

<sup>39</sup> Ne dan me se nda' se guun niha' rá Diose ni'yaj Diose man cunudanj nij so' che'é se cuchumán rá nij so' ni'yaj nij so' Diose, tzaj ne ne quirí' nij so' nu' se vaa cataj xna'anj Diose se vaa qui'yaj Diose che'é nij sí noco' man so' ma'.

<sup>40</sup> 'Q se aj ne'en Diose se vaa sa' doj gaa suun qui'yaj suun ní' che'é so', ne che'é dan ne ca'vej rá Diose cunu sa' inanj nij sí cumán gaa naá yo' rihaan Diose, gaa ataa cunu sa' ma'an ní' rihaan so' ma'. 'Q se che'é ní' me guun raan qui'yaj Diose nu' se sa' che'é nij sí cumán gaa naá yo' adonj.

## 12

### *Nana nihánj taj xna'anj se vaa se ca'ne' rá ní' ga suun noco' man Diose á*

<sup>1</sup> Dan me se sa' uxrá vaa nij sí man gaa naá, ne cuano nihánj me se man nij so' nu' anicaj rej x'nuj ní' ni'yaj nij so' man ní' daj 'yaj ma'an ní' adonj. Che'é dan ne daj qui'yaj ní', rá soj ga. Maan se tanáj xcó ní' nu' se vaa caráán chrej rihaan ní' qui'yaj suun ní', ne tanáj xcó ní' nu' chrej chi'íi ei. 'Q se sayuun ndo'o vaa tanáj xcó ní' chrej chi'íi yo' adonj. Ne dan me se yo'ó qui'yaj suun ní' nu' suun vaa rihaan ní' ei. Dan me se se vaa sí unánj tico tuvi' ro', danj gaa ní', ne se ca'ne' rá ní' ca'anj ní' rej rihaan ní' ma'.

<sup>2</sup> Tzaj ne yo'ó ni'yaj ní' rej nicun' Jesucristó, ne veé so' me sí cuchruj tucuaán amán rá ni'yaj man Diose ei. Dan me se cuchumán rá ma'an so'

ni'yaj so' Diose, ne so' me sí quisij qui'yaj ya nu' suun vaa rihaan so' che'é rej canoco' ní man so' adonj. Dan me se guun rá Jesucristó se vaa cavii sa' yuvii qui'yaj so', ne quene'en so' se vaa guun niha' rá so' sese cavii sa' nij yuvii, ne che'é dan guun nucuaj so' cavi' so' rihaan rcutzé, ne ne xcaj so' cuentá che'é rej ca'nga' nacoq yuvii ni'yaj yuvii man so' ma'. Ne xcaj ní cuentá se vaa x'núú Diose rej nuva' Diose ro', ne so' cuano, uun chij so' ga' Diose chuguanj.

<sup>3</sup> Che'é dan me nuchruj raa soj se vaa ase vaa taj ri'yunj yuvii tumé cacun' man soj ro', danj táa ri'yunj yuvii tumé cacun' man uún so' chuguanj. Tzaj ne ne ca'ne' rá so' ma'. Tananj soj uún, ne nuchruj raa soj, ne se ninaj nimán soj mei.

<sup>4</sup> Dan me se 'yaj ndo'o nij sí tumé cacun' sayuun man soj, tzaj ne aj ne'enj se vaa na'vej uxrá rá soj qui'yaj soj cacun' ga' nij so' ma'. Ne nda' se sayuun 'yaj ní so' man nij soj, tzaj ne ne cavi' nij soj, qui'yaj nij so' mei.

<sup>5</sup> Ne aj ni'yón soj chrej nucuaj no' rihaan danj Diose, nanj raj a. Dan me se ase vaa ta'nii Diose vaa soj, taj nana yo' chuguanj. Ne nihánj me se taj nana yo' ei: "Cunó so' ca'mij, ta'nij ne'ej. Se guun nachri' so' chrej sa' rqué sí 'nij ra'a man ní mán so' ma'. Ne se quiri' rá so' asa' caxrij yuvaa sí 'nij ra'a man ní mán so' che'é cacun' 'yáa so' mei.

<sup>6</sup> 'O se sí 'nij ra'a man ní me se tucu'yón so' man taran' ní sij 'ee rá so', ne uun yuvaa so' man taran' nij sí nacaj so' guun ta'nij so', sese qui'yaj nij so' cacun' adonj." Dan me se nu' nana yo' me a'mii danj Diose ei.

<sup>7</sup> Dan me se sese guun nucuaj soj gaa axrij yuvaa Diose man soj, ne cunaj ndo'o vaa yo' ei. Dan me se ase 'yaj nij sí man nihánj ga' ta'nii so' ro', danj 'yaj Diose ga' soj chuguanj. Ne me sij ta'nij me yo' so' sese ne yuvaa rej so' man so' ne ne narqué rej so' chrej rihaan so' ga'. Daj chihaa mij se cavii sa' sí vaa danj ma'.

<sup>8</sup> 'O se cunudanj yuvii yuvaa rej man sese qui'yaj nij so' cacun' ei. Tzaj ne sese ne yuvaa rej ní Diose man soj, ne nuveé ta'nij Diose me soj gaa a ma'. Dan me se taj vaj rej soj gaa mei.

<sup>9</sup> Dan me se vaa rej ní sí ne rihaan chumij nihánj, ne caráj cochroj ní rihaan nij so' gaa narqué nij so' chrej rihaan ní daj qui'yaj ní adonj. Che'é dan táa a doj sese cunó sa' ní rihaan Diose chuguanj. 'O se rej nimán ya ní me Diose chuguanj. Dan me se yo' gaa i'na' nimán ní, qui'yaj so' ei.

<sup>10</sup> Dan me se gaa me ní xnii ro', doj güii me yo', ne güii yo' me se tucu'yón rej ní rihaan ní daj qui'yaj ní cavii sa' ní, ne narqué so' chrej man ní adonj. Dan me se qui'yaj rej ní ndaa vaa me rá ma'an so' ga' ní ei. Dan me se Diose me se sa' uxrá doj cavii sa' ní, qui'yaj xrej so' chrej sa' chuguanj. Dan me se ase vaa Diose, sa' inanj vaa so' ro', danj gaa sa' inanj ma'an ní, qui'yaj Diose ei.

<sup>11</sup> Tzaj ne ya uxrá, ne gaa tihaj narqué nii chrej man ní, ne sayuun uxrá vaa nari' ní daj qui'yaj ní, ne ne niha' uxrá rá ní ma'. 'O se nanó rá ní, gaa sayuun vaa yo' adonj. Tzaj ne achén doj, ne nuu sa' nimán ní 'yaj chrej sa' yo', ne nuu xej nimán ní, 'yaj yo' ei.

<sup>12</sup> Che'é dan ase 'yaj sí naqui'yaj nica' ra'a do', tacó do', danj qui'yaj soj, naqui'yaj nica' soj nimán soj sese vaa vij nimán soj ei.

<sup>13</sup> Ne ase 'yaj sí naqui'yaj sa' chrej cacheé yuvii ro', danj qui'yaj soj, nuchruj raa soj daj qui'yaj nimán soj ei. Asa' quisij qui'yaj soj danj, gaa ne ca'vee se nuveé sij noco' sa' chrej sa' me soj, tzaj ne se tanáj nu' soj chrej sa' ma'. 'O se cunuu sa' soj adonj.

14 Dan me se tırqueej soj gaa dınj cayáan soj ga cunudanj yuvii ei. Ne tırqueej soj cunu sa' soj ndaa vaa ma'an Dıose ei. 'O se sese taj vaj se sa' yo', ne daj chihaa mıj se quene'en ní' man síi 'nij ra'a man ní' ma'.

15 Ne tumé soj man soj, gaa ne se gaa nanj tanáj yo'o tinúú soj se luj qui'yaj Dıose che'é ní' ei. Dan me se se guun nachri' yo'o tinúú soj ni'yaj so' tinúú so' ma'. Tadó uxrá soj che'é se 'o síi nachri' ni'yaj tinúú ro', qui'yaj quirı' rá que'ee tinúú soj ei.

16 Ne se guun cataj yo'o tinúú soj se vaa taj se uun se-nana Dıose mei. 'O se ase vaa síi cu'naj Esaú síi cane gaa naá vaa síi a'mii danj chuguanj. Dan me se síi chava' me síi cu'naj Esaú, tazaj ne nu' rasuun sa' tanáj rej so' rihaan so' me se cutu'vej so' nu' rasuun sa' yo' rihaan tinúú so', che'é se guun rá so' rque tinúú so' doj se chá chá so' chuguanj.

17 Ne aj ne'en soj se vaa cachén doj, gaa ne guun rá uún síi cu'naj Esaú cataj rej so' se vaa nacaj uún so' se sa' yo', tazaj ne quináj uun so' nanj ei. 'O se taj se qui'yá' tucua'anj ni'ya so' nana ca'mii so' a ma'. Nda' se ndaa ta'vee ma'an so' che'é yan guun rá so' quirı' so' se sa' yo', tazaj ne ne quirı' so' daj chihaa mıj a ma'.

18 Dan me se tumé uxrá soj man soj ei. 'O se cavii sa' soj doj rihaan nij síi israelitá vaa nanj chuguanj. Nij so' me se cuchı' nij so' tacóo quij xcaan rej rque Dıose se-nana Dıose rihaan síi cu'naj Moisés, ne quene'en nij so' caco' ya'an raá quij quene'en nij so' rej rmi' ndo'o quene'en nij so' nana yuvaa quene'en nij so' do' ei.

19 Tananj uún, ne cuno nij so' chruun a'yánj cuno nij so' nana ca'mii ma'an Dıose rihaan nij so' do' ei. Dan me se kuchu'vi' uxrá nij so', ne cachıın ni'yaj nij so' rihaan Dıose se vaa ne ca'vej rá nij so' ca'mii ma'an Dıose se-nana Dıose rihaan nij so' a.

20 'O se nana sayuun ndo'o me nana cataj xna'anj Dıose rihaan nij so', rá nij so', ne dan me se cataj Dıose rihaan nij so' se vaa sese ndaa xcuu cachee xráa quij yo', ne go' nij so' yahij man xcuu yo' ndaa se cavi' xcuu cuaj, taj Dıose rihaan nij so' a.

21 Dan me se kuchu'vi' ndo'o nij yuvii ni'yaj nij yuvii quij yo', ne ndaa ma'an síi cu'naj Moisés cataj se vaa kuchu'vi' uxrá so' ne ndaa quirı'ıj ma'an man so', taj so' a.

22 Tazaj ne ino uxrá quiran' nij soj ga nij so' nanj ei. Dan me se xa' soj, tazaj ne ca'vee cuchı' ma'an soj chuman' Jerusalén chuman' naj rej xta' nanj chuguanj. Ne chuman' Jerusalén naj rej xta' me se ase vaa chuman' Jerusalén naj raá quij cu'naj Sion rihaan chumi' nihán ro', vaa chuman' yo' ei. Ne ma'an Dıose síi vaa i'na' yáan chuman' Jerusalén naj rej xta' yo', ne yo' me rej man mıj mıj se-mozó Dıose me rej yo', ne navij ndo'o rá nij se-mozó Dıose cha'anj che'é Dıose rej yo' adonj.

23 Ne dan me se cunu chre' soj ga taran' nij ta'nıı Dıose, ne ase vaa síi chava' vaa cunudanj nij ta'nıı Dıose yo', ne ne nij so' ga ma'an ya Dıose rej xta' yo', ne no se-chuvii nij so' rihaan yanj taj rej xta' yo' ei. Ne ca'vee cuchı' soj rihaan ma'an ya Dıose síi a'ne' cacun' che'é cunudanj yuvii adonj. Ne ca'vee cuchı' soj rej ne nıman nij síi aj cunu sa' inanj rihaan Dıose ei.

24 Ne ca'vee guun tuvi' soj ga Jesucristó, ne so' ro', me síi kuchruj tucuaán naca che'é ní' daj qui'yaj ní' canoco' ní' man Dıose ei. Dan me se sa' a doj a'mii ton cayanj man Jesucristó vaa ton cayanj man síi cu'naj Abel qui'yaj tinúú so' síi cu'naj Caın nanj adonj.

<sup>25</sup> Sa' uxrá nî'yaj soj sese sê nachri' soj nî'yaj soj man síí narqué chrej sa' man soj ei. Dan me se ma'an ya Diose me so', ne tadó uxrá soj ei. Dan me se tananj nij síí ne ca'vej rá cuño rihaan síí cataj xna'anj se-nana Diose rihaan nij so' rihaan yo'óo nihánj gaa naá me se ne quinanií nij so' mei. Táá a ní' sij man cuano, ne a'mii síí nicun' rej xta' rihaan ní', ne sese nachri' ní' nî'yaj ní' xrej so' chrej sa', ne daj chihaa mîj sê quinanií ní' a ma'.

<sup>26</sup> Dan me se gaa ca'mii Diose gaa naá, ne quinaañ ya yo'óo, ne cuano nihánj me se taj xna'anj so' se vaa quinaañ uún yo'óo, qui'yaj so' chuguanj. Tzaj ne nuveé inanj yo'óo me se quinaañ ma'. 'O se yo'óo do', rej xta' do', quinaañ, qui'yaj so' adonj.

<sup>27</sup> Ne che'é se quinaañ nu' yo', che'é dan ne'en ní' se vaa quinavij nu' nij rasuun, qui'yaj Diose ei. Ne rasuun qui'yaj Diose ruvi' ni'yaj ní' cuano me se quinaañ adonj. Ne nij rasuun ne ruvi' rihaan ní' me se se quinaañ rasuun yo' ma'. 'O se gaa rasuun yo' nu' cavii nu' ca'anj adonj.

<sup>28</sup> Dan me se guun ní' sij chihanj rej sa' ndo'o rej guun chij ní' ga Diose, ne daj chihaa mîj sê quinaañ chuman' yo' a ma'. Che'é dan guun ni'yaj uxrá ní' rihaan Diose, ne che'é dan yo'o qui'yaj suun ní' rihaan Diose, ne guun niha' rá Diose, qui'yaj ní' ei. Ne caraá cochroj uxrá ní' rihaan Diose nanj á.

<sup>29</sup> 'O se ase vaa 'o ya'an vaa Diose síí noco' ní', ne cacaa nu' se chi'ii, qui'yaj so' adonj.

## 13

### *Nana nihánj taj xna'anj daj qui'yaj ní', ne ve'é canoco' ní' man Diose a*

<sup>1</sup> Yo'o gaa 'ee rá soj man tinúú soj ei.

<sup>2</sup> Sê tanáj xcó soj suun a'mii sa' ga yuvij 'na' yo'óo chuman' ma'. 'O se cunuú rá soj ndaa vaa qui'yaj síí ca'mii sa' ga yuvij 'na' yo'óo chuman' asij rque ei. Ne ne quene'en nij so' se vaa se-mozó Diose me síí ca'mii ga nij so' ma'. 'O se ndaa síj, gaa ne quene'en nij so' adonj.

<sup>3</sup> Sê ni'yón soj tinúú soj síí 'nij taga' ma'. Dan me se guun rá soj ndaa adi' se ma'an soj 'nij taga' ga tinúú soj a. Ne se ni'yón soj tinúú soj síí ran' sayuun 'yaj yuvij ma'. Dan me se guun rá soj ndaa adi' se ma'an soj 'yaj yuvij sayuun man a.

<sup>4</sup> Ne ve'é uxrá sese xcaj soj 'o chana adonj. Nuveé se na'aj me yo' ma'. Ne nuveé cacun' me sese otoj soj ga nica ma'an soj ma'. Tzaj ne síí otoj ga yo'óo chana do', síí otoj ga nica tuvi' do', me se qui'yaj Diose sayuun man so' adonj.

<sup>5</sup> Se guun soj síí 'ee rá ni'yaj sa'anj ma'. Maan se gaa xej nimán soj che'é doj rasuun man rihaan soj ei. 'O se ma'an Diose cataj xna'anj rihaan ní', ne:

—Daj chihaa mîj sê tanáj 'unj man soj ma' —taj Diose rihaan ní' a.

<sup>6</sup> Che'é dan vaa che'é ca'mii ní' nana nihánj nana no rihaan danj Diose a: “Che'é se racuj síí 'nij ra'a man ní' manj, che'é dan sê cuchu'vi' 'unj ma'. 'O se nuveé se ya'anj tihá' me sayuun qui'yaj yuvij manj ma'”, cataj ní' a.

<sup>7</sup> Nuchruj raa soj daj 'yaj nij síí uun chij rihaan soj, nij síí cataj xna'anj se-nana Diose rihaan soj á. Xcaj uxrá soj cuentá daj 'yaj nij so' gaa yanj nij so' rihaan chumij nihánj, ne xcaj uxrá soj cuentá daj gaa quiran' nij so' vaa güii a. Ne ase vaa nucuaj uxrá rá nij so' ni'yaj nij so' Diose ro', danj gaa qui'yaj soj uún, ne gaa nucuaj rá soj ni'yaj soj Diose ei.

<sup>8</sup> Dan me se orún' Jesucristó me síí nicun' asij rque, ne veé so' me síí nicun' cuano, ne veé so' me síí canicun' nu' cavii nu' ca'anj nanj adonj.

<sup>9</sup> Se ca'vej soj tihá' yu'unj nii man soj gá yo'ó tucuáán nacá mei. 'Q se aj sa' uxrá vaa sese nari' nucaj nimán soj che'é se luj qui'yaj Jesucristó che'é ní' ei. Tzaj ne se nari' nucaj nimán soj qui'yaj se chá mei. 'Q se se cavii sa' nij síí noco' tucuáán yo' tucuáán che'é se chá ma'.

<sup>10</sup> Dan me se ase vaa síí nicun' mesá altar rihaan, ne man rasuun sa' rihaan 'yaj Diose ro', danj vaa ní' chuguanj. Ne orún' ní' me síí no xcúún chá rasuun taj rihaan mesá altar yo' ei. Ne nij síí 'yaj suun che'é tucuáán nga tucuáán noco' nii rá nuvíí noco ro', ne nó xcúún nij so' chá nij so' nij rasuun sa' taj rihaan se-mesá ní' a ma'.

<sup>11</sup> Dan me se 'anj nicaj xrej atá suun noco doj ton man xcuu rá rej guee doj che'é nij yuvií, ne ton che'é cacun' tumé yuvií me ton yo' a. Ne nu' nee man scúj yo' me se rii nii man nee yo' rej tu'va chuman', ne axrij ya'an nii nu' nee yo' nanj adonj.

<sup>12</sup> Che'é dan danj qui'yaj guee Jesucristó cavi' so' tu'va chuman' rej atúj yuvií chuman', gaa ne cunuu sa' nij yuvií rihaan Diose che'é ton cayanj man ma'an so' nanj adonj.

<sup>13</sup> Che'é dan me cuano nihánj me se no xcúún ní' curihanj ní' ne cuchí' ní' rihaan so' tu'va chuman' a. Dan me se ase qui'yaj so' ca'vej rá so' nachri' yuvií ní'yaj yuvií man so' ro', danj qui'yaj ní' ca'vej rá ní' nachri' yuvií ní'yaj yuvií man ma'an ní' á.

<sup>14</sup> 'Q se rihaan chumií nihánj ro', taj vaj chiháán ní' chuman' quinaj nu' cavii nu' ca'anj mei. 'Q se nano' ní' yo'ó chuman' cane ní' vaa güii ei.

<sup>15</sup> Che'é se vaa qui'yaj Jesucristó ro', che'é dan yo'ó cataj ní' rihaan Diose se vaa ve'é uxrá vaa qui'yaj Diose nanj adonj. Ne dan me se nuveé inanj rasuun man rihaan chumií nihánj me se vaa nago' ní' man Diose ma'. 'Q se nana sa' tu'va ní' me se vaa nago' ní' man so' ei.

<sup>16</sup> Ne se tanáj soj suun sa' 'yaj soj, suun racuj soj man tinúú soj síí niqúe mei. 'Q se yo'ó se sa' nago' ní' man Diose me uún yo', ne uun niha' rá Diose ní'yaj Diose man síí 'yaj danj adonj.

<sup>17</sup> Ve'é cunó soj rihaan nij síí uun chij rihaan soj á. 'Q se síí tumé man nimán soj me nij so', ne vaa güii xna'anj Diose man nij so' daj qui'yaj nij so' che'é soj adonj. Ne ve'é cunó soj, ne guun niha' rá nij so' cataj xna'anj nij so' che'é soj chuguanj. Ne se rnúj soj rihaan nij síí guun chij mei. 'Q se sese rnuj soj rihaan nij so', ne rnuj nij so' rihaan Diose che'é soj, ne se cavii sa' soj mei.

<sup>18</sup> Cachinj ni'yaj soj rihaan Diose che'é núj á. 'Q se guun ya' rá núj se vaa taj vaj cacun' tumé núj ma'. 'Q se inanj me rá núj qui'yaj sa' núj gaa yáán núj rihaan chumií nihánj ei.

<sup>19</sup> Ne cuano nihánj me se uxrá doj cataj xna'anj 'unj rihaan soj se vaa cachinj ni'yaj soj se vaa ca'vej rá Diose ra'yanj cuchí' uún 'unj rihaan soj ei.

*Nihánj me taj síí 'yaj yanj nihánj se vaa ve'é cayáán nij síí nayaa yanj nihánj rá so' a*

<sup>20</sup> Dan me se Diose me síí 'yaj vaa xej nimán ní', ne so' me síí qui'yaj cunuu i'na' uún Jesucristó sijn 'nij ra'a man ní' gaa cavi' so' a. Ne Jesucristó me se ase vaa síí tumé matzinj vaa so', ne ase vaa daán so' matzinj vaa ní', ne tumé so' man ní' sijn noco' man so', ne síí sa' uxrá me so', ne che'é ton man so' me nicaj ní' yo'ó tucuáán cuchruj so' che'é ní' se vaa canoco' ní' man Diose a. Ne me rá 'unj

<sup>21</sup> guun nucaj soj qui'yaj suun soj nu' suun sa', ne qui'yaj soj nu' se vaa me rá Diose qui'yaj soj, qui'yaj ma'an Diose chuguanj. Ne dan me se guun ní'



se niha' rihaan Dioso, qui'yaj ma'an Dioso che'é Jesucristó ei. Ne ve'é ndo'o cayáán so' nu' cavii nu' ca'anj adonj. Veé danj gaa ya ei.

<sup>22</sup> Cuanō niháñj me se cataj xna'anj 'unj rihaan soj se vaa ve'é cunō soj nana niháñj, tinuj, nocej. 'O se chrej nucuañ narqué 'unj man soj me nana niháñj, ne doj vaa nana niháñj nana cachrón 'unj rihaan yanj cartá niháñj nayaa soj ei.

<sup>23</sup> Xcaj soj cuentá se vaa curihanj tinú' Timoteo taga', ne sese ra'yanj ca'na' so' rihanj, ne cuchj' núj rihaan soj ra'yanj ei.

<sup>24</sup> Cataj soj rihaan taran' nij síí uun chij rihaan soj do', rihaan taran' nij síí sa' rihaan Dioso do', se vaa ve'é cayáán nij so' raj ei. Nij tinúú ní' nij síí man rej cu'naj Italia ro', ve'é cayáán nij soj, rá nij so' chuguanj.

<sup>25</sup> Me rá 'unj qui'yaj ndo'o Dioso se luj che'é taran' nij soj nanj adonj. Amén.

## **Nihánj me 'o yanj cartá qui'yaj síi cu'naj Santiago ca'néé so' rihaan nij yuvii noco' man Diose a**

1 'Unj ro', me síi cu'naj Santiago síi 'yaj suun rihaan Diosé do', rihaan Jesucristó sji 'nij ra'a man ní do', ne 'yáá 'unj yanj nihánj ca'nej 'unj rihaan taran' soj sji noco' man Diosé sji ca'anj cayáán que'ee chuman' naj rihaan chumij a. Dan me se ase vaa chuvij nij x'ne' yuvii israelitá yuvii noco' man Diosé gaa naá ro', danj vaa guéé soj rihaan Diosé nanj ei.

*Nana nihánj taj xna'anj se vaa rque Diosé nana cuu sa' rihaan ní a*

2 Dan me se asa' ca'na' me ma'an sayuun rihaan soj, ne guun niha' rá soj, tinuj, nocoj.

3 'O se ne'en soj se vaa asa' ca'na' sayuun rihaan soj che'é se me soj síi amán rá ni'yaj man Diosé, ne tananj cunuu nucuaj doj nimán soj ei.

4 Maan se gaa nanaj uxrá nimán soj rihaan sayuun, gaa ne ca'vee cavii sa' nu' se-suun soj, ne síi cachij nu' nimán ya guun soj, ne se cachiin a doj se sa' man nimán soj a man adonj.

5 Sese yo'o tuvi' soj me rá nari' nana cuu sa', ne cachinj ni'yaj so' rihaan Diosé, ne rque Diosé nana cuu sa' yo' man so' chuguanj. 'O se nuveé sji nachri' man síi achíin ni'yaj me Diosé ma'. Tananj niha' rá so' gaa achíin ní rasuun man so', ne rque so' nu' se sa' man cunudanj yuvii ei.

6 Tzaj ne yo'o cuchuman ya rá síi achíin ni'yaj rihaan Diosé ni'yaj so' man Diosé, gaa ne ca'vee, ne se guun vij rá so' mei. Tzaj ne sese guun vij nimán 'o so', ne ase chéé nuú na ya'anj gaa o' nana rihaan na ya'anj ro', danj vaa nimán síi uun vij nimán, chéé nuú uxrá nimán so' uún,

7 ne taj che'é guun rá so' sese rque Diosé rasuun man so' a ma'.

8 'O se síi vij vaa nimán me se daj chihaa mij se ca'vee yo'o qui'yaj suun so' a doj suun sa' a ma'.

*Nana nihánj taj xna'anj che'é ru'vee do', che'é síi nique do' a*

9 Ne soj sji nique, tzaj ne gaa niha' rá soj che'é se sji cavii sa' rihaan Diosé me soj ei.

10 Ne vaa nij soj sji ru'vee uún, ne gaa niha' rá soj che'é se nuu nica' nimán soj rihaan Diosé á. 'O se ase vaa navij yucuan' yâj man tacaan ro', danj gaa quinavij nij ru'vee nucuaj rá ni'yaj sa'anj, vaa güii, nanj adonj.

11 Dan me se gaa uun xtá' güii, ne uun ya'aan naán, gaa ne nacoj coj, ne uun che'e yâj yo' ayuu yo' raaj coj a. Núj ayuu yo', ne taj se gún' man yo' gaa ma'. Ne veé danj vaa guéé nij ru'vee uún, ne yo'o nuú rá nij so' rej qui'yaj canaán nij so' sa'anj, ne dan me se vaj cavii' nij so' ei.

*Nana nihánj taj xna'anj se vaa nuveé sji 'yaj uun rá ní qui'yaj ní cacun' me Diosé ma'*

12 Síi nucuaj nimán rihaan sayuun ro', so' me síi cavii sa', ne cataj Diosé se vaa:

—Che'é se raan nocó' so' manj ro', che'é dan ca'vee cayáán so' gaj nu' cavii nu' ca'anj —cataj Diosé, ndaa vaa cataj Diosé se vaa ya qui'yaj Diosé che'é nij síi aráj cochroj rihaan so' a.

13 Sese me rá ní' qui'yaj ní' cacun', ne se guun cataj ní' se vaa Diose me sí qui'yaj guun rá ní' qui'yaj ní' cacun' ma'. A 'o xco' na'vej rá Diose qui'yaj Diose cacun' mei. Ne nuveé Diose me sí axríj chrej chí'ij rque a 'ó yuvii a ma'.

14 'Q se ma'an inañj ní' me rá qui'yaj se chí'ij che'é se ve'é vaa se chí'ij yo' rihaan ní' ñañj adonj.

15 Tzaj ne sese qui'yaj ní' ndaa vaa me rá ma'an ní' qui'yaj ní', ne qui'yaj ní' cacun', ne asa' quisíj qui'yaj ndo'o ní' cacun', gaa ne yuun che'e quirí' nu' nimán ní' vaa gaa ñañj ei.

16 Se cuchumán rá soj nana ne, man tinuj, man nocoj.

17 Xcaj soj cuentá se vaa daj a se sa' vaa rihaan ní' ro', Diose me se rque nij yo', ne dan me se maan rej yanj ma'an ya síi 'yaj avii ya'an chuguun ro', maan dan 'na' nu' se sa' do', se luj do', se ni'yanj do' ei. Dan me se se ca'vee natuna se-ñana so' nana sa' nana nica ya ya mei. Dan me se 'o vaa rá so', ne na'vee cunuu ino Diose a ma'. Yo'o sa' 'yaj so' ga ní' ñañj adonj.

18 Guun rá so' guun ta'nij so' man ní', gaa ne cuno ní' se-ñana so' nana ya, qui'yaj so', ne che'é dan asino ní', guun ta'nij so' man ní' gaa asino yaan, gaa ne vaa güii naqui'yaj sa' so' man cunudanj nij rasuun qui'yaj so' rihaan chumij nihánj a.

### *Nana nihánj taj xna'anj me síi noco' ya man Diose a*

19 Se quini'yón soj nana nihánj, man tinuj, man nocoj. Gaa niha' rá taran' ní' nano xrej ní' se-ñana Diose ei. Tzaj ne se gaa niha' rá ní' ca'mii ní' do', ca'maan rá ní' do' mei.

20 'Q se sese a'maan ndo'o rá ní', ne se ca'vee qui'yaj sa' ní' ndaa vaa me rá Diose qui'yaj ní' ma'.

21 Yuun che'e ca'ne' rá soj ga suun 'yaj se nij, ne gaa nica' nimán soj, ne cunó soj nana ca'neé Diose nimán soj, ne ca'vee quinanii nimán soj rihaan sayuun ei.

22 Se guun catuu rma'an se-ñana Diose xréé ní' ma'. Tzaj ne qui'yaj ní' ndaa vaa taj Diose ei. Sese se qui'yaj ní' ñañj, ne tiha' yu'unj ní' man ma'an ní' gaa ñañj á.

23 'Q se síi atúj rma'an se-ñana Diose xréé ro', ase vaa síi ni'yaj rihaan espejo ro', ñañj vaa so',

24 ne síi ni'yaj rihaan espejo me se xcaj so' cuentá se vaa canó nacaj rihaan so', tzaj ne 'anj so', gaa ne yuun che'e ni'yón so' nacaj no rihaan so' a.

25 Ne ase vaa espejo ro', ñañj vaa tucuaán sa' cuchruj Diose rihaan ní', ne xcaj ní' cuentá daj me rá Diose qui'yaj ní', 'yaj tucuaán sa' yo', ne ne sayuun vaa uno ní' rihaan Diose, 'yaj tucuaán yo' ma'. Se guun ní' síi tucu'yón rma'an nana yo' ne ni'yón nana yo' ma'. Tzaj ne cavii ní' qui'yaj ní' ndaa vaa taj nana yo' ei. Ne sese se ca'ne' rá ní' ga nana yo', ne Diose me síi qui'yaj cavii sa' ní' adonj.

26 Sij ve'é noco' man Diose me soj, rá soj na'. Sese nanó soj cuentó che'é tuvi' soj, ne nuveé sij noco' ya man Diose me soj ma'. Sij tiha' yu'unj man ma'an me soj ñañj chuguanj.

27 Cataj xna'anj 'unj rihaan soj me síi me síi noco' ya man Rej ní' Diose a. Síi racuj man xnii nique do', síi racuj man chana nique do', síi ne noco' man síi chí'ij man rihaan chumij nihánj do', so' me síi noco' ya man Diose adonj.

## 2

*Nana nihánj taj xna'anj se vaa no xcúún ní qui'yaj ní se luj rihaan daj ayuvii a*

<sup>1</sup> Amán rá soj ni'yaj soj man Jesucristó síi uun chij ndo'o rihaan ní, tinuj, nocoj. Che'é dan se guun cataj soj se vaa sa' doj vaa síi ru'vee rihaan síi nique ma'.

<sup>2-3</sup> Xcaj soj cuentá, ne gaa nuu chre' soj cachraa soj rihaan Diose, ne sese atúj 'o síi ru'vee nuu yatzíj sa' rej man soj, ne 'nij ra'a so' se'ej tu'vee ndo'o, ne aráya'anj ndo'o soj man so', ne taj soj se vaa quitaj so' chruun xlá sa' a. Ne sese atúj 'o síi nique nuu yatzíj tachrinj rej man soj, ne ne a'mii nocoj soj ga so' ma'. Ca'vee canicun' caya so' do', ca'vee cane so' rihaan yo'óó rej tacoj soj do', nanj ei.

<sup>4</sup> Tzaj ne sese danj qui'yaj soj, ne sa' doj vaa ru'vee rihaan síi nique, rá soj, ne ase vaa cuese chi'ii nimán na'vej rá xcaj sa' cuentá che'é yuvii vaa soj nanj chuguanj.

<sup>5</sup> Nana xrej soj nana ca'mij, tinuj, nocoj. Narii Diose man nij síi nique guun nij so' síi amán uxrá rá ni'yaj man so' ei. Nique nij so' rihaan yo'óó nihánj, tzaj ne aráj cochroj nij so' rihaan Diose, ne che'é dan cata' tu'va Diose se vaa ya cayáán nij so' ga Diose asa' guun chij Diose rihaan chumii nihánj adonj.

<sup>6</sup> Tzaj ne nij soj me se nij ndo'o 'yaj soj rihaan nij síi nique chuguanj. Xcaj soj cuentá se vaa ru'vee me síi 'yaj sayuun man soj, ne 'anj soj rihaan cuese, 'yaj nij ru'vee a.

<sup>7</sup> Ne nana nij a'mii nij ru'vee che'é Jesucristó síi cata' ne soj che'é a.

<sup>8</sup> Dan me se vaa che'é qui'yaj ní nana ca'mii síi cu'naj Moisés nana no rihaan danj Diose nana ya, ne dan me se taj nana yo': "Gaa 'ee rá ní man tuvi' ní ndaa rá se vaa 'ee rá ní man ma'an ní", taj nana yo', ne sese qui'yaj soj nana yo', ne cunaj 'yaj soj ei.

<sup>9</sup> Tzaj ne sese narii soj yuvii ru'vee inanj, gaa ne tumé ndo'o soj cacun' che'é se ne 'yaj ya soj se-tucuanj Diose adonj.

<sup>10</sup> Sese vaa 'o síi 'yaj nu' se-tucuanj Diose, ne sese vaa orún' nana na'vej so' qui'yaj so', ne ase vaa síi ne uno daj chihaa m'j rihaan Diose ro', vaa so' ei.

<sup>11</sup> 'Q se cataj Diose se vaa se cotoj ní ga nica tuvi' ní, ne ve'e cataj uún Diose se vaa se ticavi' ní tuvi' ní a. Vaa síi ne otoj ga nica tuvi', tzaj ne ticavi' so' tuvi' so', gaa ne síi 'yaj danj ro', me se yuun che'e tiri' so' se-tucuanj Diose tucuaán nocoj so' gaa nanj adonj.

<sup>12</sup> Che'é dan ve'é ca'mij soj, ne ve'é qui'yaj soj, ne cunuú rá soj se vaa vaa güii ca'ne' Diose cacun' che'é ní, ni'yaj Diose se-tucuanj Diose chuguanj. 'Q se ne sayuun vaa cunoj ní nana yo' ma'.

<sup>13</sup> 'Q se asa' ca'ne' Diose cacun' che'é yuvii, ne se gaa 'ee rá Diose ni'yaj Diose man síi ne 'ee rá man tuvi' ma'. Tzaj ne se ni'yanj rá me se yo' me qui'yaj canaán rihaan sayuun adonj.

*Nana nihánj taj xna'anj se vaa cuchuman rá ní ni'yaj ní Diose, ne qui'yaj ní se luj uún a*

<sup>14</sup> Cunoj soj ca'mij, tinuj, nocoj. Sese taj ní se vaa amán rá ní ni'yaj ní Diose, ne sese ne 'yaj ní a doj se luj rihaan tuvi' ní, ne ca'vee quinanií ní rihaan sayuun, rá soj na'. Taj ma'. Se ca'vee a doj man adonj.

<sup>15</sup> Xcaj soj cuentá ei. Sese vaa tinúú ní do', ra'vij ní do', ne achiin se chá achiin yatzíj cunuú so' do',

16 ne sese cataj ní' rihaan sí' achiin rasuun man, ne: "Ca'anj sa' so', ne dínj gaa nimán so' ei. Rque Diose yatzíj quitaj xráa so' do', rque Diose se chá chá so' do' ei", cataj ní' rihaan sí' achiin man, gaa ne sese se quirii ní' se vaa achiin man tuvi' ní', ne taj se guun se-nana ní' gaa a ma'.

17 Veé danj vaa ya, ne sese taj ní' se vaa sí' amán rá ni'yaj man Diose me ní', ne sese taj se luj 'yaj ní', gaa ne nuveé sij amán ya rá me ní' gaa a mei.

18 Tzaj ne ta'aj nii cataj rihaan tuvi' se vaa so' me se sí' amán rá ni'yaj man Diose mé so', ne 'unj nihánj me se sí' 'yaj se sa' rihaan Diose mé 'unj, cataj nii chuguanj. Tzaj ne xcaj so' cuentá, ne asa' ca'vee xcaj yuvií cuentá se vaa sí' amán rá ni'yaj man Diose mé so', sese nuvi' a 'o se sa' 'yáa so' ga. Tzaj ne 'unj nihánj me se che'é se sa' 'yáa 'unj ro', che'é dan ne'en yuvií se vaa sí' amán rá ni'yaj man Diose mé 'unj chuguanj.

19 Dan me se cunaj 'yáa so' se vaa amán rá so' se vaa oruun Diose, tzaj ne danj 'yaj guce nij nana chree uún, ne che'é dan chu'vi' nij so' ndaa ri'íj ma'an man nij so' che'é sayuun qui'yaj Diose man nij so' vaa güii a.

20 Sí' ni'yon mé so', sese uun rá so' se vaa taj che'é qui'yáa so' se luj, ne nihánj me se t̄haán 'unj rihaan so' se vaa sese taj se luj 'yaj ní', ne amán rma'an rá ní' ni'yaj ní' Diose nanj chuguanj.

21 Dan me se xii ní' sí' cu'naj Abraham me se ne'én so' se vaa ca'vej so' ticavi' so' ta'níi so' sí' cu'naj Isaac rihaan mesá altar go' so' man ta'níi so' rihaan Diose a. Ne che'é se vaa qui'yaj so' danj ro', che'é dan cunuu sa' so' rihaan Diose ei.

22 Xcaj so' cuentá se vaa che'é se cuchumán rá Abraham ni'yaj so' man Diose ro', che'é dan me guun rá so' qui'yaj so' se luj che'é Diose, ne che'é se qui'yaj so' danj ro', che'é dan ne'en ní' se vaa cuchumán nu' rá so' ni'yaj so' man Diose chuguanj.

23 Ne quisíj ya nu' se-nana Diose nana nihánj a: "Cuchumán rá Abraham ni'yaj so' man Diose, ne che'é dan cataj Diose se vaa sij sa' me Abraham a". Ne sí' chéé ga Diose me uún Abraham, taj nii uún a.

24 Xcaj soj cuentá se vaa che'é se luj 'yaj ní' ro', che'é dan nuu sa' ní' rihaan Diose, ne nuveé che'é se taj ní' se vaa amán rá ní' ni'yaj ní' man Diose doj me nuu sa' ní' rihaan Diose ma'.

25 Dan me se Rahab chana niha' rá me se cunuu sa' no' rihaan Diose gaa qui'yaj no' se luj rihaan roj sí' ca'née Diose man ca'mii nana sa' rihaan no' a. Cunuu sa' no' rihaan Diose che'é se luj qui'yaj no', ne dan me se ve'é racuíj no' man roj sí' israelitá ca'anj suun chiháan no' caxríj yuve no' man roj so' rihaan nij sí' guun rá ticavi' man roj so', gaa ne ca'née no' man roj so' yo'ó chrej vaa dínj nan' roj so' tucua' roj so' a.

26 Dan me se sese nuvi' nimán 'o so', ne nuveé sij vaa i'na' me so' ma'. Maan cúu cavi' uun me so', ne ase vaa xngá nuvi' nimán rque ro', danj vaa sí' taj se vaa amán rá ni'yaj man Diose, ne nuvi' a doj se luj 'yaj so', ne taj se gún' man nana tu'va uun so' a man adonj.

### 3

*Nana nihánj taj xna'anj se vaa 'yaj chi'íj ní' man tuvi' ní', sese ne tumé ní' nana avii tu'va ní' a*

1 Tinuj. Nocoj. Se guun gaa que'ee sí' narqué chrej man soj ma'. 'O se núj sij narqué chrej ro', ne'en soj se vaa doj a caraa Diose cacun' xráa núj sese se cuno núj rihaan Diose ei.

<sup>2</sup> 'O taran' ní' avii nana chi'ii tu'va nanj adonj. Tzaj ne sese vaa 'o sí' ne a'mii nana chi'ii, ne so' me sí' ca'vee guun nucuaj guun chij rihaan nu' nee man so' chuguanj.

<sup>3</sup> Xcaj soj cuentá ni'yaj soj man cuayó á. Nda' se xij vaa cuayó, tzaj ne anu' ní' aga' le'ej nii tu'va xo', gaa ne cunó xo' rihaan ní' ca'anj xo' me rej ma'an me rá ní' chuguanj.

<sup>4</sup> Ne xcaj soj cuentá ni'yaj soj man rihoo chéé rihaan na uún á. Xij vaa rihoo, ne nucuaj ndo'o o' nana rihaan rihoo, ne rcuchra' le'ej nii vaa rásuun nii tuguáj nii rihoo, tzaj ne ca'anj yo' me rej ma'an me rá nii ca'anj yo' uún ei.

<sup>5</sup> Ne ta'nga' danj vaa guee daa ní' uún, ne tzin' vaa daa ní', tzaj ne nucuaj uxrá daa ní' nanj adonj. Dan me se ne'en soj se vaa orún' ya'an le'ej nii ro', ca'vee qui'yaj yo' cacaa cunu' quij ei.

<sup>6</sup> Ne ase vaa ya'an vaa nana a'mii daa ní', ne ase vaa nu' chi'ii man rihaan chumii nihánj ro', danj vaa nana a'mii daa ní', ne ndaa ri' nu' nee man ní', 'yaj daa ní' nanj adonj. Unu' ní' ga tuvi' ní', 'yaj daa ní', che'é se sí' chree me sí' 'yaj a'mii daa ní' nana chi'ii nanj á.

<sup>7</sup> A'vee uun chij yuvii rihaan me ma'an xcuu, ne dan me se rihaan xcuu man quij do', rihaan xtâj do', rihaan xcuáá do', rihaan xcuaj do', uun chij yuvii.

<sup>8</sup> Tzaj ne taj se 'yá' guun chij a doj yuvii rihaan daa ma'an yuvii ma'. Avii ndo'o nana chi'ii tu'va ní', ne taj se 'yá' guun dínj tu'va ní', 'yaj daa ní' ía ma'. Ase vaa na xnaj taj tu'va xcuáá yuvaa ro', danj vaa nana chi'ii avii tu'va ní', 'yaj daa ní', ne 'yaj chi'ii yo' man tuvi' ní' chuguanj.

<sup>9</sup> Dan me se tu'va ní' me avii nana luj a'mii ní' che'é Rej ní' Diose sí' 'nij ra'a man ní', ne veé daa ní' a'mii nana chree che'é tuvi' ní' uún a. Ne dan me se ase vaa Diose ro', danj vaa nij tuvi' ní' gaa qui'yaj Diose man taran' ní' a.

<sup>10</sup> Veé tu'va ní' avii nana luj ne veé tu'va ní' avii nana chree, 'yaj daa ní', ne nij uxrá vaa 'yaj ní' danj, nanj tinuj, nocoj.

<sup>11</sup> Se ca'vee cavii na chihánj ga na 'ne' rque orún' curuj na ma'.

<sup>12</sup> Taj rutzí' avii raaj chruun rcoo ma'. Ne rcoo ne avii raaj chruun rcue'é ma'. Ne danj nanj na uún, ne se ca'vee curihánj na chihánj rej nuu na 'ne', ne taj che'é cavii nana chi'ii tu'va ní', sese rej nuu nana sa' me nimán ní' a man adonj.

*Nana nihánj taj xna'anj me sí' me sí' nicaj tucuáán sa' cavii rihaan Diose a*

<sup>13</sup> Sese vaa ta'aj soj sí' acaj cuentá ne avii ndo'o raaj soj, rá soj, ne ve'é inanj qui'yaj soj sij vaa danj rá rihaan tuvi' soj, ne xcaj tuvi' soj cuentá se vaa che'é se avii raaj soj ro', che'é dan sí' ni'yanj nimán me soj, ne che'é dan me ve'é inanj 'yaj soj a.

<sup>14</sup> Tzaj ne sese xcoj ruvaa rá soj, ne sese me inanj rá soj quirii ta'nga' soj rihaan tuvi' soj, gaa ne se guun ca'mii xta' soj cataj soj se vaa sí' acaj cuentá avii raaj me soj a ma'. 'O se nuveé sij acaj cuentá me sí' 'yaj danj meí.

<sup>15</sup> Sese sij xcoj ruvaa rá me soj, ne nuveé sij nicaj tucuáán sa' cavii rihaan Diose me soj a ma'. Inanj tucuáán cavii raaj nij sí' man rihaan yo'óo nihánj uun me tucuáán nicaj soj, ne danj inanj 'yaj yuvii che'é se nana chree uno nij yuvii nanj adonj.

<sup>16</sup> Rej yanj sí' xcoj ruvaa rá me se taj se qui'yá' gaa dínj ma'. Me a' se chi'ii 'yaj nij so' nanj á.

<sup>17</sup> Tzaj ne sí' nicaj tucuáán sa' cavii rihaan Diose me se yo'o vaa sa' nimán so', ne che'é dan 'o chij yáán so', ne ne unu' so' ga yuvii ma'. Yo'o luj a'mii

so' gā tuvi' so', ne ne naqui'yaj so' o so' xréé so' gaa a'mii tuvi' so' gā so' ma'. 'Ee rá so' ni'yaj so' tuvi' so', ne inanj se sa' 'yaj so', ne yo' o cyaan ve'é 'yaj so' rihaan nu' nij yuvi, ne 'yaj so' nu' ndaa vaa taj so' a. Ne nij sí 'yaj danj ro', me sí nicaj ya tucuáan sa' cavii rihaan Diose chuguanj.

<sup>18</sup> Dan me se sí 'yaj dínj ne yuvi gā tuvi' yuvi ro', ma'an so' me sí ne dínj gā tuvi', ne che'é dan cunū sa' nij tuví' so' rihaan Diose, qui'yaj so' nanj adonj.

## 4

*Nana nihánj taj xna'anj se vaa se guun rá ní' cavii sa' ní' rihaan chumii nihánj a*

<sup>1</sup> Me che'é unu' ndo'o nij soj gā tuvi' soj, rá soj gā. Nuveé che'e se me ndo'o rá soj cavii sa' soj rihaan chumii nihánj, ne che'é dan na'vee gaa xej nimán soj a a. Ne nuveé che'e dan unu' soj gā tuvi' soj a a.

<sup>2</sup> Me ndo'o rá soj gaa rasuun sa' rihaan soj, tzaj ne ne ca'vee quirj' soj rasuun yo' cumān yo' rihaan soj a a. Dan me se che'é dan uun xcoj ruvaa ndo'o rá soj ni'yaj soj man sí vaa rasuun rihaan adonj. Tzaj ne soj me se taj se 'yá' quirj' soj, ne che'é dan unu' soj gā tuvi' soj ei. Tzaj ne nuvi' rasuun sa' rihaan soj, che'é se ne achíin ni'yaj soj rihaan Diose adonj.

<sup>3</sup> Ne nda' se achíin ni'yaj soj rihaan Diose, tzaj ne ne rqué Diose nij rasuun yo' rihaan soj, che'é se chí'ii ndo'o vaa nimán soj gaa achíin ni'yaj soj rihaan Diose ei. Dan me se me inanj rá soj cavii sa' ma'an inanj soj rihaan chumii nihánj qui'yaj nij rasuun yo' ei.

<sup>4</sup> Ne ase vaa chana otoj ga yo'ó chii ro', danj vaa soj, ne ne noco' ya soj man Diose a ma'. Xcaj soj cuentá se vaa sí me rá cavii sa' rihaan chumii nihánj ro', so' me sí taj ri'yunj man Diose adonj. Ya uxrá ei.

<sup>5</sup> Ne xcaj soj cuentá se vaa ne tu'va rma'an nana nihánj nana a'mii danj Diose a: "Diose qui'yaj nimán ní', ne me uxrá rá Diose canoco' nimán ní' man orún' so'", taj danj Diose a.

<sup>6</sup> Ne uxrá doj 'yaj Diose se luj che'é ní', ne che'é dan no nana nihánj rihaan danj Diose a: "Aráan Diose chrej rihaan nij sí xtá' nimán se cavii sa' nij so', tzaj ne 'yaj Diose se luj che'é nij sí vaa nicá' nimán", taj danj Diose a.

<sup>7</sup> Che'é dan cunō soj rihaan Diose á. Naqui'yaj so' o soj xréé soj rihaan sí chree, ne cunanj sí chree rihaan soj á.

<sup>8</sup> Quinichrun' soj rihaan Diose, gaa ne quinichrun' Diose rihaan soj á. Nij sí tumé cacun' ro', tanáj nij so' se-tucuanj nij so' tucuáan chí'ii, ne nij sí uun vij rá canoco' man Diose ro', naqui'yaj nicá' nij so' nimán nij so' á.

<sup>9</sup> Se gaa niha' rá soj ca'nga' soj mei. Vaa che'é quinano rá soj ta'vee soj che'é cacun' tumé soj ei.

<sup>10</sup> Naqui'yaj nicá' soj nimán soj rihaan sí 'nj ra'a man ní', gaa ne cavii sa' soj, qui'yaj so' chuguanj.

*Nana nihánj taj xna'anj se vaa se ca'mii ní' nana nij che'é tuvi' ní' ma'*

<sup>11</sup> Se guun nano soj cuentó ne che'é tuvi' soj, man tinuj, man nocoj. Sí nanó cuentó ne do', sí araa cacun' xráá tuvi' do', so' me sí taj se vaa taj che'é cunō ní' cunudanj se-tucuanj Diose chuguanj. Ne sí a'mii danj ro', nuveé sji uno se-tucuanj Diose me so' ma'. Maan se sí naqui'yaj cuu se-tucuanj Diose me uun so' nanj ei.

<sup>12</sup> Dan me se orún' Diose ya me sí cuchruj se-tucuanj Diose, ne veé orún' Diose me sí ca'ne' cacun' che'é ní' vaa güii, ne so' me sí guun nucuaj tinanii

man ní' rihaan sayuun, ne veé so' me síí guun nucuaj ca'nej man ní' rihaan ya'an ei. Tzaj ne ní' me se yuvií uun me ní', ne taj che'é caraa ní' cacun' xráá tuvi' ní' ma'.

*Nana nihánj taj xna'anj se vaa ne ne'en ní' daj quirán' ní' a'yuj a*

<sup>13</sup> Ne vaa soj sji a'mii nana nihánj uún a: “Cuan' se, a'yuj se, ca'anj núj 'o chuman' cayaán núj 'o yo', ne quiraan núj rasuun natu'vee núj, ne qui'yaj canaán ndo'o núj sa'anj”, taj soj, ne nihánj me se cunō soj ca'mij á.

<sup>14</sup> Nij soj me se ne ne'en uxrá soj daj quirán' soj a'yuj a ma'. 'O se ase vaa ngaa ya'aan ro', danj vaa soj rihaan chumií nihánj, ne nanij ngaa ya'aan 'o orá le'ej nii, ne ra'yanj naxtun' uún ngaa ya'aan yo' nanj adonj.

<sup>15</sup> Che'é dan nō xcúún soj cataj soj: “Sese me rá síí 'nij ra'a man ní', ne ca'vee gaa i'na' ní', ne ca'vee qui'yaj suun ní' á”, cataj soj á.

<sup>16</sup> Tzaj ne soj me se a'mii xtá' ndo'o soj rihaan Diose, ne chi'ii ndo'o vaa nu' nana xtá' a'mii soj adonj.

<sup>17</sup> Tzaj ne sese ne'en ní' daj me rá Diose qui'yaj ní', ne ne 'yaj ní' ndaa vaa me rá Diose qui'yaj ní', gaa ne guun ní' síí tumé ndo'o cacun' nanj adonj.

## 5

*Nana nihánj taj xna'anj se vaa quirán' ndo'o nij ru'vee sayuun a*

<sup>1</sup> Ne soj sji ru'vee me se yaj me se quene'en soj ei. Ta'vee uxrá soj che'é sayuun quirán' soj vaa güii chuguanj.

<sup>2</sup> Ne rihaan Diose me se ase vaa se cuchruu vaa nu' si'yaj soj, ne ase vaa yatzj navij chá xcuu vaa nu' sagan' soj,

<sup>3</sup> ne ase vaa aga' navij qui'yaj tucunj yoo ro', danj vaa nu' se-sa'anj soj, ne tucunj yoo yo' ro', ni'yaj Diose, ne xcaj Diose cuentá se vaa síí yanu' me soj rihaan síí nique, ne che'é dan caçaa ma'an soj, qui'yaj tucunj yoo yo' adonj. Dan me se uxrá caraa sa' soj sa'anj rihaan chumií nihánj, tzaj ne nichrun' ca'anj ni'ya chumií nihánj nanj adonj.

<sup>4</sup> Dan me se acaj ndo'o Diose cuentá se vaa ne naru'vee sa' soj tu'vee se-mozó soj síí rii xnaa soj a. Ne aguáj ndo'o nij mozó yo' rihaan Diose che'é se-sa'anj nij so' chuguanj. Ne catúj se-nana nij so' xréé Diose sji uun chij ndo'o rej xtá' nanj ei.

<sup>5</sup> Ne dan me se uun niha' uxrá rá soj rihaan chumií nihánj, ne inanj rasuun sa' uxrá mán rihaan soj, ne ase vaa xcáá namij ro', danj vaa soj, ne ne acaj soj cuentá se vaa nichrun' ca'na' sayuun rihaan soj a ma'.

<sup>6</sup> Tzaj ne dan me se cuta' ndo'o soj cacun' xráá nij síí sa', ne ndaa ticavi' soj man ta'aj tuvi' nij so', ne ca'ne' sa' guee rá nij so' cavi' tuvi' nij so', qui'yaj soj a.

*Nana nihánj taj xna'anj se vaa gaa inaj nimán ní' cachinj ni'yaj ní' rihaan Diose a*

<sup>7</sup> Che'é dan gaa inaj nimán soj na'vij soj ndaa se quisij güii ca'na' uún síí 'nij ra'a man ní', tinuj, nocoj. Xcaj soj cuentá daj 'yaj síí unō naa ei. Naj vaa nimán so' na'vij so' maan che'é rej cachij sa' ve'é xnaa so', gaa ne quirii so' tan' adonj.

<sup>8</sup> Danj qui'yaj guee soj, ne gaa inaj nimán soj, ne ca'nej nucuaj soj nimán soj, che'é se nichrun' ca'na' síí 'nij ra'a man ní' ei.



<sup>9</sup> Se ca'mii soj nana nij che'é tuvi' soj, ne se gaa nanj quitaj cacun' xraá ma'an soj, man tinuj, man nocoj. 'O se aj nicun' chruun sí ca'ne' cacun' che'é ní' rej ta'yaa ei.

<sup>10</sup> Xcaj soj cuentá, ni'yaj soj nij sí nata' se-nana Diose gaa naá se vaa nucaj nimán nij so' rihaan sayuun, ne ase vaa qui'yaj nij so' ro', danj gaa qui'yaj soj ei.

<sup>11</sup> Ne uxrá cavii sa' nij sí nucaj nimán rihaan sayuun, rá ní', ni'yaj ní' man nij so', ne aj cuno soj se vaa nucaj nimán sí cu'naj Job rihaan sayuun gaa naá, ne aj ne'en soj se vaa avii sa' nu' nij sí vaa danj, 'yaj sí 'nij ra'a man ní', che'é se 'ee uxrá rá so' ni'yaj so' man ní' chuguanj.

<sup>12</sup> Dan me se nana nihánj me nana nocoj doj rihaan nu' nij nana, tinuj, nocoj. Se cuta' soj raá Diose ca'mii soj mei. Se cataj soj chumanj yo'óo man soj, sese se ca'mii ya soj mei. Ne me ma'an yo'ó rasuun, ne se ca'mii soj danj che'é ma'. Sese ca'vee qui'yaj soj, rá soj, ne: "Ca'vee ei", cataj uun soj, ne sese se ca'vee qui'yaj soj, rá soj, ne: "Se ca'vee ma'", cataj uun soj, gaa ne se cuta' Diose cacun' xraá soj man chuguanj.

<sup>13</sup> Sese vaa 'o tuvi' soj ran' sayuun, ne cachinj ni'yaj so' rihaan Diose á. Sese vaa 'o tuvi' soj niha' rá, ne cachraa so' chra' rihaan Diose á.

<sup>14</sup> Sese vaa 'o tuvi' soj ran', ne nacunj so' man nij sí chij nicaj yu'unj man nij sí noco' man Jesucristó ca'na' nij so', ne cata' tu'va nij so' se-chuvji sí 'nij ra'a man ní', ne cutaa nij so' casté raá sí ran', ne cachinj ni'yaj nij sí chij yo' rihaan Diose che'é sí ran' a.

<sup>15</sup> Sese ya amán rá nij sí achín ni'yaj rihaan Diose se vaa racuíj Diose man sí ran', ne nahuun sí ran' yo', qui'yaj sí 'nij ra'a man ní', ne sese tumé sí ran' yo' cacun', ne quinavij cacun' xraá so' a.

<sup>16</sup> Che'é dan ndaa 'o 'o ní' nata' ya rihaan tinúu ní' che'é cacun' tumé ní', ne ndaa 'o 'o ní' cachinj ni'yaj rihaan Diose che'é tuvi' ní', gaa ne nahuun ní', qui'yaj Diose a. Sese vaa 'o sí vaa nica ya nimán achín ni'yaj uxrá rihaan Diose, ne cuno ya Diose, ne qui'yaj Diose ndaa vaa cachín ni'yaj so' ei.

<sup>17</sup> Nanj yuvij me sí cu'naj Elías sí cayáan gaa naá, ne ase vaa ma'an ní' vaa so', tzaj ne cachín ni'yaj so' rihaan Diose se vaa se caman', ne quisij ndaa va'nuj ya yo' táa yanée ne caman' qui'yaj so', qui'yaj Diose gaa cachín ni'yaj so' rihaan Diose ei.

<sup>18</sup> Ndaa síj, gaa ne cachín ni'yaj uún so' maan rihaan Diose, gaa ne caman' uún, qui'yaj Diose, gaa ne cavii sa' naa a.

<sup>19</sup> Cuno soj ca'mij, tinuj, nocoj. Sese tanáj xco 'o tuvi' soj se-tucuanj Diose tucuaán ya, ne sese guun nucaj yo'ó tuvi' soj qui'yaj canaán so' canicaj uún sí ca'anj yanij yo' canoco' so' tucuaán sa',

<sup>20</sup> ne dan me se sí qui'yaj canaán yo' me se so' me sí tinanii man tuvi' rihaan sayuun adonj. Ne guun nucaj so' tinanii so' man nimán tuvi' so' rihaan sayuun ei. Dan me se ca'néj nocoj ndo'o so' cacun' xraá tuvi' so' adonj.

## Nihánj me 'o yanj cartá qui'yaj síi cu'naj Pedró ca'néé so' rihaan nij yuvii noco' man Dioşe a

<sup>1</sup> 'Unj ro', me síi cu'naj Pedró, ne apóstol cune' Jesucristó ca'anj nata' rihaan yuvii che'é so' mej a. Ne qui'yáá 'unj yanj nihánj ca'nej 'unj rihaan soj sij narii Dioşe man canoco' man so' sij cha'nuu ca'anj estadó Ponto do', estadó Galacia do', estadó Capadocia do', estadó Asia do', estadó Bitinia do', che'é sayuun quiran' soj a.

<sup>2</sup> Asij naá quene'en Rej ní' Dioşe se vaa canoco' soj man so', ne che'é dan quinarií so' man soj, gaa ne guun che'e soj canoco' soj man orún' Dioşe, qui'yaj Nimán Dioşe, che'é se me rá so' cunó soj rihaan so', ne me rá so' cunuú sa' nimán soj qui'yaj ton man Jesucristó ton cayanj man so' gaa cavi' so' che'é ní' a.

Me rá 'unj qui'yaj ndo'o Dioşe se luj che'é soj, ne gaa xej ndo'o nimán soj qui'yaj Dioşe a.

### *Nana nihánj taj xna'anj se vaa na'vij ní' güii cayáán ní' rihaan Dioşe a*

<sup>3</sup> Cunaj uxrá vaa Dioşe Rej Jesucristó sij 'njij ra'a man ní', cataj ní' á. Dan me se cunuú 'ee uxrá rá so' ni'yaj so' man ní', ne che'é dan naqui'yaj i'na' so' man Jesucristó, ne che'é se cunuú i'na' uún Jesucristó ro', che'é dan guun ta'nij Dioşe man ní', ne che'é se ta'nij Dioşe me ní', che'é dan guun niha' rá ní' ne na'vij ní' quisij güii cayáán ní' rihaan Dioşe nu' cavii nu' ca'anj ei.

<sup>4</sup> Ne dan me se vaa se sa' nicaş Dioşe rque Dioşe man soj asa' nucui' soj rihaan so', ne daj chihaa mij se quiri' se sa' yo', ne yo'o gaa sa' yo' nu' cavii nu' ca'anj nanj adonj.

<sup>5</sup> Nucuj ndo'o Dioşe, ne che'é se amán rá soj ni'yaj soj man Jesucristó, che'é dan tumé Dioşe man soj, che'é rej ca'vee cavii sa' soj asa' quisij güii ca'anj ni'ya chumii nihánj ne quene'en ní' nu' se vaa qui'yaj so' che'é ní' ei.

<sup>6</sup> Che'é dan guun niha' uxrá rá soj nanj á. Dan me se nda' se cuano nanó rá soj che'é sayuun 'na' rihaan soj doş güii nanj rihaan chumii nihánj cuano, tzaj ne aj guun niha' ndo'o rá soj, che'é se ne'en soj se vaa cavii sa' soj vaa güii, qui'yaj Dioşe chuguanj.

<sup>7</sup> Dan me se ne'en soj se vaa aga' oró míi me se se man uun rihaan chumii nihánj me yo', ne vaa güii ca'anj ni'ya yo' ga chumii nihánj, tzaj ne axriş ya'an nii man aga' oró míi yo', che'é rej me rá nii xcaş nii cuentá sese aga' sa' me yo' ní', ase aga' nij me yo' a. Ne ase vaa ya'an rihaan aga' oró míi yo' ro', danj vaa sayuun rihaan soj, ne che'é sayuun ran' soj ro', che'é dan acaj ní' cuentá sese ya ya amán rá soj ni'yaj soj man Dioşe ní', ase 'yaj ma'an soj a. Tzaj ne sa' doş vaa soj rihaan aga' oró míi yo', ne daj chihaa mij se ca'anj ni'ya soj, sese amán ya rá soj ni'yaj soj man Dioşe meí. Dan me se uxrá cavii sa' Dioşe, qui'yaj soj, ne uxrá ca'mii sa' yuvii che'é Dioşe, asa' ca'na' uún Jesucristó rihaan chumii nihánj chuguanj.

<sup>8</sup> Ne Jesucristó me se nda' se ne quene'en rihaan soj man so', tzaj ne amán rá soj ni'yaj soj man so', ne ne ne'en xa' rihaan soj man so' ní' nihánj cuano, tzaj ne che'é se cuchumán ya rá soj ni'yaj soj man so' ro', che'é dan guun niha' uxrá rá soj che'é se aj ne'en soj se vaa cavii sa' uxrá soj adonj.

<sup>9</sup> Ne che'é se amán rá soj ni'yaj soj man Dioşe ro', che'é dan cavii sa' nimán soj rihaan so' ei.

10 Dan me se nij síí nata' se-nanā Diose gaa naá ro', nata' nij so' che'é se luj qui'yaj Diose che'é soj, ne guun ndo'o rá nij so' xcaj nij so' cuentá daj gaa cavii sa' yuvii qui'yaj Diose, ne naqui'yaj cūu nij so' cúu yave nij so' che'é nu' nij rasuun sa' chuguanj.

11 Dan me se naqui'yaj cūu uxrá ya nij so' aman ca'na' síí ca'nej Diose rihaan chumij a. 'O se nicaj yu'unj Nimán Jesucristó man nij so', ne ma'an Nimán Jesucristó cataj xna'anj rihaan nij so' daj quiran' ma'an Jesucristó asa' ca'na' so' do', che'é suun sa' cata so' asa' quisij quiran' so' sayuun do' a.

12 Dan me se cataj xna'anj Diose rihaan nij so' se vaa nuveé ma'an nij so' me nij síí quene'en ca'na' síí ca'nej Diose ma'. Tananj nu' nij soj me nij síí quene'en man síí ca'nej Diose, asa' ca'na' so', taj Diose rihaan nij síí nata' se-nanā Diose gaa naá yo' a. Ne nihánj me se nij síí nata' se-nanā Diose nana sa' yo' yaj ro', ca'née Diose Nimán Diose rihaan nij so', ne aj nata' nij so' nu' se vaa qui'yaj Jesucristó síí ca'née Diose rihaan chumij nihánj cuno soj a. Ne ndaa nij se-mozó Diose síí yanj xta' me rá quene'en daj gaa cavii sa' ní' qui'yaj Jesucristó ei.

*Nanā nihánj taj xna'anj se vaa nacúún Diose man ní' guun ní' síí sa' inanj rihaan so' a*

13 Che'é dan 'o ca'nej nimán soj qui'yaj soj ndaa vaa me rá Diose ei. Gaa chij rá soj gā tuvi' soj, ne yo'o gaa nucauj rá soj man Diose se vaa qui'yaj ndo'o so' se luj che'é soj asa' ca'na' uún Jesucristó rihaan chumij nihánj ei.

14 Dan me se guun soj síí uno sa' rihaan Diose ei. Gaa naá me se ne quene'en soj daj vaa Diose, ne inanj guun rá soj qui'yaj soj se nij, tzaj ne yaj me se se guun qui'yaj uún soj danj mei.

15 Tananj che'é se síí sa' inanj me Diose síí nacúún man soj canoco' soj, che'é dan ma'an soj ro', nō xcúún guun síí sa' ei.

16 Che'é dan nō nanā nihánj rihaan danj Diose a: “Síí sa' inanj mé 'unj, ne che'é dan guun soj síí sa' inanj uún á”, taj Diose rihaan nij síí canoco' man so' gaa naá a.

17 Diose ro', me síí nica inanj a'ne' cacun' che'é 'o 'o ní' ndaa vaa 'yaj 'o 'o ní', ne che'é se: “Ataj chíj”, taj soj rihaan Diose gaa achúún ni'yaj soj rihaan so' ro', che'é dan 'o caraā cochroj soj rihaan so' doj nij güii cayáán soj rihaan yo'óo nihánj á.

18 Aj ne'en soj daj qui'yaj Diose gaa tinanii so' man soj rihaan tucúáán nij rma'an canoco' nij xii soj síí cumán gaa naá, ne nuveé sa'anj me se go' Diose gaa tinanii so' man soj ma'. Sa'anj me se se navij uun me yo' ei.

19 Tzaj ne ca'née Diose man Jesucristó cavii ya so' cayanj ton man so' che'é ní', ne ase vaa avi' matzinj le'ej sa' inanj 'yaj nij síí israelitá che'é cacun' tumé nij so' ro', danj vaa cavii Jesucristó che'é ní', ne so' me se vaa yu'vee ndo'o nó so' che'é se taj cacun' tumé so' man chuguanj.

20 Dan me se asij ataa qui'yaj Diose chumij, ne aj ne'en Diose se vaa cavii Jesucristó che'é ní', ne cuano gaa nichrun' quinavij chumij nihánj me se curuvi' Jesucristó rihaan chumij nihánj che'é ma'an nij soj ei.

21 Ne che'é se vaa qui'yaj Jesucristó che'é soj ro', che'é dan amán rá soj ni'yaj soj man Diose síí naqui'yaj i'na' man Jesucristó, ne cune' Diose man so' se vaa guun chij so' a. Ne che'é se danj qui'yaj Diose ro', che'é dan amán rá soj ni'yaj soj man Diose, ne na'vij soj quisij güii cavii sa' ndo'o soj qui'yaj so' a.

<sup>22</sup> Dan me se uno soj se-nanã Dioso nanã ya, ne che'é dan cunuu sa' nimán soj, ne che'é dan nõ xcúún soj gaa 'ee rá soj man tuvi' soj adonj. Se cataj rma'an soj se vaa 'ee rá soj man tuvi' soj ma'. Ya gaa 'ee ndo'o rá soj man tuvi' soj ei.

<sup>23</sup> 'O se cunuu i'na' nimán soj, qui'yaj se-nanã Dioso, ne nuveé se cavi' me se-nanã Dioso ma'. Tananj ase vaa 'o rasuun vaa i'na' vaa se-nanã Dioso, ne daj chihãã mǐj se ca'anj ni'ya yo' mei.

<sup>24</sup> Che'é dan nó nanã nihánj rihaan danj Dioso a: “Ase vaa coj chrin' man tacaan ro', danj vaa taran' ní', ne ase vaa yãj taj raã coj ro', danj vaa suun sa' 'yaj ní' a. Daj se vaa nacoõ coj ne navij yãj ayuu ro', danj vaa ní' navij ní' a.

<sup>25</sup> Tzaj ne daj chihãã mǐj se navij se-nanã sí' 'nij ra'a man ní' ma'”. Danj taj nanã nõ rihaan danj Dioso, ne se-nanã Dioso yo' me nanã sa' nata' núj rihaan soj adonj.

## 2

<sup>1</sup> Che'é dan ca'ne' rá soj ga suun noco' tucuaán chi'ii ei. Se nachri' soj ni'yaj soj nu' tuvi' soj mei. Se tiha' yu'unj soj man tuvi' soj mei. 'O ndaa taj soj ro', veé danj qui'yaj guee soj ei. Se guun xcoj ruvaa rá soj ni'yaj soj tuvi' soj mei. Se nanó soj cuentó ne che'é tuvi' soj ma'.

<sup>2</sup> Ase vaa me ndo'o rá leé nõ cutzii leé nõ too ro', danj guun ndo'o rá soj tucuyón soj se-nanã Dioso nanã ya, ne ase vaa racuǐj too man leé nõ achij leé nõ ro', danj gaa racuǐj se-nanã Dioso man soj cunuu sca' nimán soj chuguanj. Dan, gaa ne cavii sa' ndo'o soj, qui'yaj Dioso ei.

<sup>3</sup> 'O se aj ne'en soj se vaa ve'é ndo'o 'yaj sí' 'nij ra'a man ní' che'é ní' adonj.

### *Nanã nihánj taj xna'anj se vaa ase vaa yuvej sa' vaa Jesucristó a*

<sup>4</sup> Ca'na' soj rihaan Jesucristó ei. Ase vaa 'o yuvej xij sa' uchruj nii asino yaan tacóo ve' gaa nachráj nii ve' ro', danj vaa so', tzaj ne nij sí' man rihaan chumii nihánj me se nachri' nij so' ni'yaj nij so' yuvej yo', tzaj ne sí' sa' ndo'o narii Dioso me so' nanj adonj.

<sup>5</sup> Ne ase vaa nij yuvej le'ej nii nata' xráa yuvej xij ro', danj vaa taran' soj, sese canoco' raan soj man Jesucristó, ne ve'é cumãan rcua'aan soj, qui'yaj Jesucristó, gaa ne cunuu sa' nimán soj, gaa ne ase vaa xrej ro', danj gaa soj rihaan Dioso, ne ase vaa se sa' nago' nij xrej rihaan Dioso ro', danj gaa se sa' qui'yaj soj che'é se me soj sí' noco' man Jesucristó, gaa ne carãn' rá Dioso se vaa 'yaj soj ei.

<sup>6</sup> Che'é dan nó nanã nihánj rihaan danj Dioso a: “Ni'yaj so' ei. Aj cuné' 'unj yo'o yuvii chuman' Jerusalén naj rej cu'naj Sion, ne ase vaa 'o yuvej vaa so', nucuj ndo'o so' chuguanj. Sij sa' ndo'o me so', ne quinari' 'unj man so', ne ase vaa yuvej xij une' yuvii tacóo ve' ro', danj gaa so', ne sese cuchuman rá yo'o so' quene'en so' man sí' cuné' 'unj, ne se guun na'aj so' ma'. Tananj cavii sa' ndo'o so' adonj”. Danj cataj Dioso, ca'mui so' che'é Jesucristó gaa naá a.

<sup>7</sup> Vaa yu'vee ndo'o nó Jesucristó rihaan soj sji amán rá ni'yaj man so', tzaj ne xa' nij sí' ne amán rá ni'yaj man Jesucristó me se quisij ya ndaa vaa taj nanã nihánj nanã nõ rihaan danj Dioso adonj: “Yuvej quirri'ij nij sí' cune' ve' ro', guun yuvej sa' doj rihaan taran' nij yuvej naj tacóo ve' yo' nanj adonj”, taj danj Dioso a.

<sup>8</sup> Ne: “Naxru' yuvii, qui'yaj yuvej yo', ne guun na'aj nij yuvii gaa quene'en nij yuvii man so'”, taj yo'ó nanã nõ rihaan danj Dioso a. Ne nij sí' ne amán rá ni'yaj man Jesucristó me se che'é se ne cunõ nij so' se-nanã Dioso ro', che'é

dan naxru'! nij so' ne quir'i! nij so' a. Dan me se ca'neé ra'a Diose man nij so' quiran' nij so' danj nanj ei.

*Nana nihánj taj xna'anj se vaa narii Diose man ní' sij noco' man Jesucristó a*

<sup>9</sup> Xa' soj, tzaj ne sij narii Diose me soj, ne xrej uun chij ya nuu rihaan Diose me soj, ne sij cunuu sa' nimán me soj, ne yuvij man chuman' noco sa' ndo'o ya uun chij Diose rihaan me soj, ne che'é se me rá Diose nata' soj che'é se sa' qui'yaj so' ro', che'é dan narii so' man soj ei. Dan me se sij noco' tucuáan rmi' me soj gaa naá, tzaj ne canacúun Diose man soj xcaj soj cuentá, ne cunaj uxrá vaa se-tucuanj Diose tucuáan noco' soj cuano ei.

<sup>10</sup> Dan me se gaa naá me se nuveé yuvij 'nij ra'a Diose me soj, ne ne gaa 'ee rá Diose ni'yaj Diose man soj ma'. Tzaj ne yaj me se cunuu 'ee rá so' ni'yaj so' man soj, ne guun soj sí cheé ga ma'an Diose, ne 'nij ra'a Diose man soj ei.

*Nana nihánj taj xna'anj se vaa qui'yaj suun ní' rihaan Diose á*

<sup>11</sup> Dan me se 'ee ndo'o raj man soj, ne qui'yaj soj se ndo'o uxrá, ne cunaj soj ei. Nuveé chihánj ní' me chumij man ní' cuano, man tinuj, man nocoj. Ase vaa 'o síi aran' me ma'an rej ro', danj vaa ní' rihaan chumij nihánj cuano ei. Che'é dan se guun qui'yaj soj rasuun chi'ij me rá nee man soj qui'yaj soj ma'. 'Q se unu' se chi'ij yo' ga nimán ní' adonj.

<sup>12</sup> Ne ve'é inanj qui'yaj soj rej ne soj sca'núj nij síi chi'ij man rihaan chumij nihánj, gaa ne sese guun rá nij so' cuta' nij so' cacun' rmi' xráá soj se vaa nij 'yaj soj, gaa ne xcaj nij so' cuentá se vaa ve'é inanj 'yaj soj ei. Gaa ne güii cuchí' Diose rihaan nij so' me se cataj nij so' se vaa sa' uxrá vaa Diose chuguanj.

<sup>13</sup> Che'é se sij noco' man síi 'nij ra'a man ní' me soj ro', che'é dan cunaj soj rihaan taran' nij síi nicaj suun ei. Dan me se cunaj soj rihaan síi nicaj suun nocoj emperador, che'é se sij uun chij doj me so' ei.

<sup>14</sup> Ne dan me se cunaj soj rihaan yo'ó nij síi nicaj suun gobernador noco' do' nij uún, che'é se sij a'ne' suun síi nicaj suun emperador rihaan me nij so', ne no xcúun nij so' qui'yaj nij so' sayuun man nij síi chi'ij do', ca'mij sa' nij so' che'é nij síi sa' do' chuguanj.

<sup>15</sup> Ne me rá Diose qui'yaj ní' se sa', gaa ne cunuu dínj tu'va nij síi ne acaj cuentá síi tu'va rma'an nana nij che'é Jesucristó chuguanj.

<sup>16</sup> Ne'en ní' se vaa sij cheé uun me ní', tzaj ne se guun cataj ní' se vaa che'é dan me ca'vee qui'yaj ní' me ma'an se chi'ij ma'. Tananj guun ní' síi 'yaj suun rihaan Diose ei.

<sup>17</sup> Dan me se ve'é ca'mij soj ga daj a yuvij, ne gaa 'ee rá soj man nu' nij síi amán rá ni'yaj man Jesucristó, ne cunaj soj rihaan Diose, ne ve'é caraá cochroj soj rihaan síi nicaj suun emperador ei.

*Nana nihánj taj xna'anj se vaa ase vaa ca'ne' sa' guee rá Jesucristó gaa quiran' so' sayuun ro', danj gaa qui'yaj ní' a*

<sup>18</sup> Ve'é cunaj soj rihaan se-ru'vee soj sij uun mozó á. Nuveé inanj rihaan nij ru'vee sa' ru'vee ni'yanj a'mii cunaj soj ma'. Veé danj cunaj uún soj rihaan nij ru'vee nij 'yaj do' uún nanj ei.

<sup>19</sup> Ne sese quiran' ta'aj soj sayuun qui'yaj se-ru'vee ta'aj soj ru'vee chi'ij, che'é se maan se sij noco' man Diose me síi ran' sayuun yo', ne sese a'ne' sa' guee rá síi ran' sayuun yo' ga suun tucuáa rihaan ru'vee, gaa ne cunaj uxrá 'yaj so' ni'yaj Diose adonj.

<sup>20</sup> Dan me se síí tumé ya cacun' ro', vaa che'ê cayuun so', ne nda' se ca'vee ca'ne' guee rá so' ayuun so' do', ran' so' sayuun do', tzaj ne se cataj ní se vaa cunaj 'yaj so' ran' so' sayuun a ma'. Maan che'ê cacun' tumé so' me ayuun so' nanj á. Tzaj ne síí inanj se sa' 'yaj me se sese ca'ne' sa' guee rá so' quiran' cachrij so' sayuun che'ê Diose, ne cunaj uxrá qui'yaj so' nanj á. 'O se Diose ro', me síí naru'vee nu' sayuun quiran' so' che'ê so' nanj adonj.

<sup>21</sup> 'O se canacúun Diose man ní' canoco' ní' man so' ne quiran' ní' sayuun adonj. Tananj Jesucristó, tzaj ne quiran' so' sayuun che'ê ní', ne ca'ne' sa' guee rá so' gaa quiran' so' danj adonj. Dan me se ndaa rá se vaa ca'ne' rá Jesucristó gaa quiran' so' sayuun che'ê ní' ro', danj gaa guee ca'ne' rá ní' quiran' ní' sayuun, rá so' ei.

<sup>22</sup> Ne Jesucristó me se a 'ó nana ne do', a 'ó cacun' do', ne nari' ní' tu'va so' mei.

<sup>23</sup> Ca'mii chree yuvij che'ê so', tzaj ne ne ca'mii chree so' che'ê nij yuvij ma'. Quiran' so' sayuun, tzaj ne ne ca'mii so' nana quij ma'. Tananj guun rá so' se vaa Diose síí a'ne' nica cacun' che'ê ní' ro', so' me síí ca'ne' cacun' che'ê so' vaa güii a.

<sup>24</sup> Cacun' tumé ní' ro', nata' xráá Jesucristó gaa cavi' so' rihaan rcutze, che'ê rej ca'ne' rá ní' ga suun 'yaj cacun' ne inanj tucuáán sa' canoco' ní' a. Ne che'ê se go' nii xráá so' ro', che'ê dan nahuun sa' nimán soj a.

<sup>25</sup> Dan me se ase vaa matzinj cha'nuu rco' ro', vaa soj gaa naá, ne ne canoco' soj man Diose gaa naá, tzaj ne yaj ro', canicaj nimán soj, ne guun che'ê soj canoco' soj man Jesucristó, ne ase vaa síí ve'ê ndo'o tumé daán matzinj ro', danj vaa so' ga soj cuano, ne ve'ê nica yu'unj so' man soj cuano ei. Dan me se so' me síí uun hij rihaan nimán soj cuano chuguanj.

### 3

#### *Nana nihánj taj xna'anj daj qui'yaj yuvij ga nica yuvij a*

<sup>1</sup> Ase vaa no xcúun mozó cunó mozó rihaan se-ru'vee mozó ro', danj vaa no xcúun soj chana cunó soj rihaan nica soj á. Gaa ne ca'vee se na'vej rá nica ta'aj soj cunó nij so' se-nana Diose, tzaj ne che'ê se ve'ê ndo'o 'yaj soj rihaan nica soj ro', che'ê dan guun rá nica soj canoco' nij so' man Diose ga soj chuguanj. Dan me se ca'vee se se guun rá nica soj ca'mii natáj soj rihaan nij so', tzaj ne che'ê se ve'ê ndo'o 'yaj ma'an soj, che'ê dan guun rá nica soj canoco' nij so' man Diose ei.

<sup>2</sup> Dan me se xcaj nij so' cuentá se vaa chana aráj cochroj rihaan nica me soj, ne nuveé chana niha' rá me soj a.

<sup>3</sup> Se caráya'anj ndo'o soj chana che'ê rej niquee sa' soj ma'. Se nanó rá soj che'ê rej daj gaa yuvé raá soj do', che'ê caquí canoco' xreé soj do', che'ê ticuu cunuú chihá soj do', che'ê yatzíj tu'vee cunuú soj do' ma'. Se guun rá soj se vaa ve'ê gaa soj qui'yaj rasuun danj ma'.

<sup>4</sup> Dan me se xcaj soj cuentá che'ê nimán ma'an soj che'ê rej gaa sa' nimán soj á. 'O se ve'ê gaa nimán soj, ne dínj gaa nimán soj, ne nimán soj me se daj chihaa mįj se quiri'yo' ma'. Ne ve'ê gaa soj, gaa ne caran' rá Diose ni'yaj Diose man soj adonj.

<sup>5</sup> Danj qui'yaj nij chana canoco' man Diose cumán gaa naá, ne nucaj rá nij no' man Diose, ne ve'ê cuno nij no' rihaan nica nij no', che'ê rej ve'ê gaa nij no' a.

<sup>6</sup> Ne danj qui'yaj chana cu'naj Sará, ne ve'é cuno no' rihaan nica no' síi cu'naj Abraham, ne: "Síi chij", cataj no' ni'yaj no' man so' a. Dan me se sese sa' inanj qui'yaj soj, ne sese a 'ó xco' se cuchu'vi' soj, gaa ne guun soj ta'nij si'nó níi cu'naj Sará uún chuguanj.

<sup>7</sup> Ne tananj soj sno'o uún, ne xcaj soj cuentá me se achiin man nica soj, ne ve'é cayáan soj ga no' ei. Xcax soj cuentá se vaa nucuaj soj doj rihaan no', ne che'é dan ve'é qui'yaj soj ga no' á. Ne xcax soj cuentá se vaa 'o cuyaán cayáan chana rihaan Diose nu' cavii nu' ca'anj a. Sese ve'é qui'yaj soj, ne se guun vij rá soj gaa achíin ni'yaj soj rihaan Diose ma'.

*Nana nihánj taj xna'anj se vaa nda' se quiran' nij síi 'yaj se sa' sayuun cuano, tzaj ne vaa güii cavii sa' uxrá nij so' a*

<sup>8</sup> Daj yo'ó nana cataj xna'anj 'unj rihaan soj, ne dan me se cuyaán gaa nimán taran' soj ga tuvi' soj, ne dan me se ase 'ee rá soj tinúú a'ngaa soj ro', danj gaa 'ee rá soj man tuvi' soj yo'ó nij síi amán rá ni'yaj man Jesucristó á. Racuj soj man nij síi ran' sayuun, ne gaa nica' nimán soj ei.

<sup>9</sup> Ca'vee se qui'yaj chi'ii yuvij man soj, tzaj ne se qui'yaj chi'ii soj man nij yuvij ma'. Ca'vee se ca'mii chree yuvij che'é soj, tzaj ne se ca'mii chree soj che'é nij yuvij ma'. Tananj ve'é ca'mii soj ga nij yuvij ei. 'O se canacúún Diose man soj, che'é rej qui'yaj soj danj, gaa ne ca'vee ca'mii luj Diose che'é ma'an soj chuguanj.

<sup>10</sup> 'O se nana nihánj nó rihaan danj Diose, taj yo' se vaa: "Sese me rá yo'ó so' guun niha' rá so' cayáan so', ne sese me rá so' cavii sa' so', ne se ca'mii so' nana nij se ca'mii so' nana ne se ca'mii so' nana chree do' ma'.

<sup>11</sup> Naxuun so' man so' rihaan suun chi'ii, ne inanj se sa' qui'yaj so' á. Dan me se nanó' ndo'o so' rej ca'vee cayáan dínj so' ga tuvi' so', ne yo'ó canoco' so' man chrej dínj yo' a.

<sup>12</sup> 'O se ni'yaj ndo'o Diose daj ran' nij síi vaa sa', ne nanó xrej Diose nu' nana achíin ni'yaj nij so' rihaan so', tzaj ne taj ri'yunj Diose ni'yaj Diose man nij síi 'yaj chi'ii a', taj nana nó rihaan danj Diose a.

<sup>13</sup> Ne se guun rá yuvij qui'yaj chi'ii yuvij man soj, sese sij niha' rá qui'yaj sa' me soj ma'.

<sup>14</sup> Tzaj ne ca'vee se quiran' soj sayuun che'é se sij vaa sa' inanj me soj, tzaj ne vaa che'é guun niha' rá soj chuguanj. 'O se vaa güii cavii sa' soj adonj. Che'é dan se nanó rá soj, ne se cuchu'vi' soj che'é se vaa qui'yaj yuvij man soj ma'.

<sup>15</sup> Caraa cochroj soj ni'yaj soj man Jesucristó sij 'nij ra'a man ní' ei. Xcax soj cuentá daj gaa ca'mii soj ga me ma'an síi xná'anj man soj me che'é me guun rá soj se vaa cavii sa' soj qui'yaj Diose vaa güii a.

<sup>16</sup> Ve'é nata' soj rihaan nij síi xná'anj man soj, ne se naqui'yaj xta' soj nimán soj asa' nata' soj se-nana Diose ma'. A 'ó xco' se qui'yaj soj cacun' ma'. Gaa ne nij síi nachri' ni'yaj man soj sij noco' man Jesucristó che'é se ve'é inanj 'yaj soj me se guun na'aj nij so' che'é nana quij tu'va ma'an nij so' adonj.

<sup>17</sup> Ne sese ca'vej rá Diose ne sese quiran' ní' sayuun che'é se qui'yaj sa' ní', ne cunaj quiran' ní' sayuun ei. Tzaj ne sese maan che'é se qui'yaj ní' cacun' ne quiran' ní' sayuun, ne nij uxrá vaa quiran' ní' sayuun gaa ei.

<sup>18</sup> Tzaj ne Jesucristó me se nda' se taj cacun' tumé so', tzaj ne gaa cachéé so' rihaan chumii nihánj, ne quiran' ndo'o so' sayuun che'é cacun' tumé ní' sij tumé cacun', che'é rej ca'vee nucu' ní' rihaan Diose chuguanj. Dan me se cavi' maan nee man Jesucristó, tzaj ne cunuu i'na' nimán so' adonj.

<sup>19</sup> Gaa ne ca'anj so' ca'mii natáj so' rihaan nij nana chree 'nij taga' rmi' a.

<sup>20</sup> Ne nij nana chree me se ne ca'vej rá nij so' cunq nij so' rihaan Diose gaa naá gaa cayáan síi cu'naj Noé adonj. Dan me se Noé me se 'yaj so' rihoo ne a'mii natáj so' se-nana Diose se vaa caman' uxrá, tzaj ne ne cuchuman rá nij yuvií ma'. Tzaj ne caráj x'naa Diose che'é nij yuvií, ne na'vjií ndo'o Diose canicaj nimán nij so', tzaj ne ne canicaj nimán nij so', ne canó xráá nij so' gaa ca'na' na ya'anj a. Ne daj yo'ó tunj guce yuvií catúj rque rihoo, ne quinanii nij so' rihaan na ya'anj, qui'yaj na yo' nanej adonj.

<sup>21</sup> Ne veé na me se 'yaj nanií ní' rihaan sayuun yo' yaj ei. Na ata' ne ní' me yo' chuguanj. Nuveé che'e rej guun rá ní' güej nacaj xráá ní' cata' ne ní' ma'. Che'é rej cataj ní' rihaan Diose se vaa guun rá ní' se vaa navij chrej chi'ii uun chij nimán ní' ne inanj se sa' guun rá ní' qui'yaj ní' rej rihaan ní' me se che'é dan cata' ne ní' adonj. Ne inanj che'é se cunuu i'na' uún Jesucristó gaa cavi' so' ro', che'é dan ca'vee quinanií ní' sij cata' ne rihaan sayuun chuguanj.

<sup>22</sup> Dan me se quisíj cunuu i'na' uún Jesucristó, gaa ne quinán' so' rej xta', ne x'núú Diose rej nuva' Diose yáan so' cuano, ne uun chij so' rihaan cunudanj nij se-mozó Diose do', rihaan nu' nij nana uun chij rihaan nij rasuun man rihaan chumií nihánj do', rihaan yo'ó nij síi man rej xta' adonj.

## 4

*Nana nihánj taj xna'anj daj qui'yaj ní' yaj che'é se nichrun' ca'na' uún Jesucristó rihaan chumií nihánj a*

<sup>1</sup> Dan me se che'é se quiran' ndo'o Jesucristó sayuun gaa me so' yuvií ro', che'é dan no xcúún soj ca'nej nucuj soj nimán soj, gaa ne ca'vee guun nucuj soj rihaan sayuun quiran' soj ei. Ne'en soj se vaa síi quiran' nee sayuun che'é Diose me se daj chihaá míj se qui'yaj canaán cacun' rihaan so' ma'.

<sup>2</sup> Dan me se doj güii quinaj cayáan so' rihaan chumií nihánj me se se qui'yaj uún so' me ma'an se nij me rá nee man so' qui'yaj so' ma'. Tananj qui'yaj so' ndaa vaa me rá Diose qui'yaj so' ei.

<sup>3</sup> Dan me se gaa naá me se ya qui'yaj ndo'o soj nu' nij rasuun nij ndaa vaa me rá nij síi yaníj chuguanj. Dan me se cachée soj chrej chi'ii do', chrej a'mii ga chana' niha' rá do', chrej uun xno do', chrej a'mii chree do', yo'ó nij chrej chi'ii do', 'yaj soj chuguanj. Ne na'vjií soj rihaan ya'anj cacój yuvií ndaa vaa na'vej rá Diose qui'yaj soj ei.

<sup>4</sup> Tzaj ne yaj me se ca'ne' rá soj ga suun chée ga nij síi chi'ii ne 'yaj ndo'o se nij ga nij so' chuguanj. Che'é dan yaj me se ma'anj rá nij so' ni'yaj nij so' man soj, ne a'mii chree nij so' che'é soj cuano ei.

<sup>5</sup> Tzaj ne aj nicun' chruun Jesucristó ca'ne' so' cacun' che'é nij síi vaa i'na' do', che'é níj síi cavi' do', ne nij síi chi'ii yo' ro', no xcúún nij so' nata' nij so' rihaan Jesucristó che'é nu' nij se chi'ii qui'yaj nij so' ei.

<sup>6</sup> Maan che'é dan me ca'mii natáj Jesucristó se-nana Diose nana sa' ndaa rihaan nij síi cavi', che'é rej nda' se quiran' nij so' sayuun ga yo'ó nij yuvií che'é cacun' qui'yaj nij so' rihaan chumií nihánj, tzaj ne ca'vee cayáan nimán nij so' rihaan Diose nu' cavii nu' ca'anj a.

<sup>7</sup> Nichrun' un' ca'anj ni'ya chumií nanj ei. Che'é dan gaa chij inanj rá soj, ne yo'ó xcaj soj cuentá, gaa ne ca'vee cachinj ni'yaj soj rihaan Diose chuguanj.

<sup>8</sup> Ne suun sa' nocoo doj qui'yaj soj me nihánj, ne gaa 'ee rá soj man tuvi' soj nij síi amán rá ni'yaj man Jesucristó, ne sese 'ee rá ní' tuvi' ní', gaa ne quinavjií ndo'o nij cacun' tumé tuvi' ní', qui'yaj ní' adonj.



<sup>9</sup> Ca'vej soj caran' tuvi' soj sí amán rá ni'yaj man Jesucristó ve' tucua soj, ne go' soj se chá chá nij so', ne se guun cataj soj se vaa sayuun uxrá vaa 'yaj soj danj ma'.

<sup>10</sup> Dan me se qui'yaj Diose se luj che'é 'o 'o ní, rqué Diose suun rihaan 'o 'o ní qui'yaj suun ní che'é tinúú ní, ne ino doj vaa suun 'yaj suun 'o 'o ní che'é tinúú ní, ne che'é dan no xcuún soj racuj soj man tinúú soj, ndaa vaa uun nucuaj soj chuguanj.

<sup>11</sup> Sese ca'mii natáj yo'o tuvi' soj, ne yo'o cunuú rá so' se vaa se-nana Diose me nij nana a'mii natáj so' á. Sese qui'yaj suun yo'o tuvi' soj che'é soj, ne qui'yaj so' nu' ndaa vaa guun nucuaj so' qui'yaj so' qui'yaj Diose á. Gaa ne ca'vee ca'mii sa' yuvii che'é Diose ni'yaj nij yuvii man soj sij noco' man Jesucristó ei. Ne Diose me se nu' cavii nu' ca'anj ca'mii sa' ní che'é so', ne guun chij ndo'o so' adonj. Veé danj gaa ya ei.

*Nana nihánj taj xna'anj se vaa se nanó rá ní che'é sayuun ran' ní a*

<sup>12</sup> Se ca'anj rá soj che'é sayuun quiran' soj, man tinuj, man nocoj. Ya quiran' ndo'o soj sayuun, che'é rej ca'vee xcaj soj cuentá sese sij amán ya rá ni'yaj man Diose me soj chuguanj. Ne se guun rá soj se vaa orun' soj me sí ran' sayuun ma'.

<sup>13</sup> Maan se guun niha' rá soj che'é se ase quiran' Jesucristó sayuun ro', danj vaa ran' guee soj ga so', gaa ne güii ca'na' uún so' guun chij so' rihaan chumii nihánj me se ca'vee guun niha' doj rá soj ei.

<sup>14</sup> Sese nachri' yuvii ni'yaj yuvii man soj che'é se sij noco' man Jesucristó me soj, ne vaa che'é guun niha' rá soj adonj. 'O se yanj Nimán Diose ga soj, ne uun chij ndo'o Nimán Diose ei.

<sup>15</sup> A 'o soj se guun sí ticavi' yuvii do', sí ituu do', sí chi'ii do', sí tiguuj man do' ma'. Tadó soj ei. Vaa che'é quiran' sí vaa danj sayuun ei.

<sup>16</sup> Tzaj ne sese quiran' yo'o tuvi' soj sayuun che'é se sij noco' man Jesucristó me so', ne taj che'é guun na'aj so' ma'. Tananj che'é se sij noco' man Jesucristó me so' ro', che'é dan cataj so' se vaa sa' vaa Diose a.

<sup>17</sup> 'O se yaj me se aj guun che'e Diose ca'ne' Diose cacun' che'é ní' sij tucua Diose a. Che'é dan ne'en ní' se vaa nij doj quiran' nij sí na'vej rá cunq se-nana Diose nana sa' asa' ca'ne' Diose cacun' che'é nij so' chuguanj.

<sup>18</sup> 'O se danj Diose taj: "Nanj sí noco' ndo'o man Diose, tzaj ne sayuun ndo'o quinani' nij so' rihaan sayuun, ne táa a nij sí ne noco' man Diose do', táa a nij sí chi'ii do', ne ca'anj ya nij so' rihaan ya'an ei". Danj taj nana no rihaan danj Diose a.

<sup>19</sup> Che'é dan xa' soj sij ran' sayuun ndaa vaa me rá Diose quiran' soj, tzaj ne yo'o inanj qui'yaj sa' soj, ne dan me se ca'vej rá soj nicaj yu'unj Diose man nimán soj á. 'O se Diose me sí qui'yaj man soj, ne vaa che'é gaa nucuaj rá soj man so' ei.

## 5

*Nana nihánj taj xna'anj che'é chrej narqué Pedró rihaan nij sí cuchumán rá ni'yaj man Jesucristó a*

<sup>1</sup> Rihaan soj sij chij nicaj yu'unj man nij sí noco' man Jesucristó man daj a chuman' ca'mij cuano a. 'O se sí chij mé 'unj ga soj, ne sí quene'en sayuun se vaa quiran' Jesucristó mé 'unj, ne dan me se ve'é guun chij 'unj ga Jesucristó asa' ca'na' uún so' rihaan chumii nihánj, raj a.

<sup>2</sup> Ase vaa nicaj yu'unj yuvi man matzinj ro', danj gaa ve'é nicaj yu'unj soj man nij sí noco' man Diose ndaa vaa ca'ne' Diose suun rihaan soj á. Se naqui'yaj 'ee soj man soj rihaan suun yo' ma'. Maan se ve'é qui'yaj suun soj che'é Diose ei. Ne se guun inanj rá soj qui'yaj canaan soj che'é suun 'yaj soj ma'. Tanañj gaa niha' rá soj che'é ma'an suun yo' ei.

<sup>3</sup> Ne se guun niha' rá soj quirij ta'nga' soj rihaan nij sí noco' man Jesucristó ma'. Inanj ve'é qui'yaj suun soj ga nij so', ne quene'en nij so' daj qui'yaj soj, gaa ne xcaj nij so' cuentá daj qui'yaj ma'an nij so' uún a.

<sup>4</sup> Gaa ne asa' curuvi' Jesucristó sí nicaj yu'unj man taran' ní' sij nicaj yu'unj man nij sí noco' man Jesucristó me se ca'na' 'o cachriin corona sa' inanj cunuú raá ní', qui'yaj so', ne dan me se nu' cavii nu' ca'anj ve'é ndo'o gaa ní', qui'yaj Jesucristó chuguanj.

<sup>5</sup> Tanañj soj sij tachruu, ne cunó soj rihaan nij sí chij, ne veé dan me taran' soj me se naqui'yaj nica' soj nimán soj rihaan tuvi' soj á. 'O se nana nihañj nó rihaan danj Diose, taj yo' se vaa: "Aráan Diose chrej rihaan nij sí xta' nimán se cavii sa' nij so', tzañ ne 'yaj Diose se luj che'é nij sí nica' nimán a", taj nana yo' a.

<sup>6</sup> Che'é dan me yo'o naqui'yaj nica' soj nimán soj rihaan Diose sí nucuaj ndo'o, ne cunó soj rihaan so', gaa ne vaa güi, ne cavii sa' soj, qui'yaj so' adonj.

<sup>7</sup> A 'ó xco' se nanó rá soj ma'. Diose ro', me sí nanó ndo'o rá daj ran' soj, ne che'é dan me 'o gaa nucuaj rá soj man so' ei.

<sup>8</sup> Gaa sca' rá soj, ne tumé soj man soj daj qui'yaj soj ei. 'O se vaa sí taj ri'yunj ni'yaj man soj, ne sí chree me so', ne ase 'yaj chuvaá aguáj chéé nano' xcuu cha' ro', danj 'yaj sí chree, chéé so' nano' so' man sí ca'vee tirí' so' man chuguanj.

<sup>9</sup> 'O raan canoco' soj man Diose, ne daj chihaa mij se cunó soj rihaan sí chree mei. Xcaj soj cuentá se vaa ase vaa sayuun ran' soj ro', danj vaa guce sayuun ran' taran' nij sí noco' man Jesucristó man rihaan chumij nihañj chuguanj.

<sup>10</sup> Dan me se Diose ro', me sí 'yaj daj a se luj che'é soj, ne so' me sí canacúun man soj cavii sa' uxrá soj ga so' nu' cavii nu' ca'anj che'é Jesucristó, ne asa' quisij quiran' soj sayuun doj güi rihaan chumij nihañj, gaa ne cune' sa' Diose man soj, ne naqui'yaj sca' so' man soj, ne gaa nucuaj inanj rá soj, qui'yaj so' adonj.

<sup>11</sup> Ne guun chij ndo'o Diose nu' cavii nu' ca'anj, ne daj a güi ve'é cayáan so' nanj adonj. Amén.

*Nana nihañj taj xna'anj se vaa ve'é cayáan nij sí ca'anj yanj cartá nihañj rihaan, rá nij tuvi' Pedró a*

<sup>12</sup> Veé danj sij natá 'unj doj nij nana no rihaan yanj nihañj, ne tinú' Silvano me sí cachrón se-nanañj rihaan yanj nihañj, ne dan me se tinúú ní' sí nucuaj rá ní' man me so', ne dan me se nana nihañj me se narquej chrej nucuaj rihaan soj, ne cataj xna'anj 'unj rihaan soj se vaa tucuaán noco' ní' ro', ma'an ya tucuaán yo' me rej 'yaj Diose se luj che'é ní' chuguanj. Raan canoco' soj tucuaán yo' ei.

<sup>13</sup> Dan me se nij tinúú ní' sí man chuman' nihañj chuman' cu'nañ Babilonia ro', me rá nij so' se vaa ve'é cumañ soj a. Narii Diose man nij so' ga soj canoco' taran' nij soj man Diose, ne vaa tinú' Marcos, ne ase vaa 'o ta'nij ro', vaa so' rihanj, ne ve'é cayáan soj, rá so' uún a.

<sup>14</sup>Ve'é uxrá ca'mijj soj naná luj ga tinúú soj sí amán rá ni'yaj man Jesucristó gaa nari' tuvi' soj á.

Ne me ndo'o rá 'unj gaa xej nimán cunudanj soj sij noco' man Jesucristó qui'yaj Diose nanj chuguanj.

## Nihánj me síj vij yanj cartá qui'yaj síi cu'naj Pedró ca'néé so' rihaan nij yuvii noco' man Diose a

<sup>1</sup> 'Uñj ro', me síi cu'naj Simón Pedró síi 'yaj suun rihaan Jesucristó, ne apóstol cune' so' nata' rihaan yuvii che'é so' mej, ne qui'yáá 'unj yanj nihánj ca'nej 'unj rihaan soj sij noco' man Jesucristó, ne dan me se cuyaán yu'vee nó soj gá núj rihaan Diöse ei. Dan me se síi nica nimán me Jesucristó, ne amán rá soj gá núj ni'yaj soj man Diöse, qui'yaj Jesucristó, ne so' ro', me Diöse síi noco' ní', ne so' me síi tinanii man ní' rihaan sayuun adonj.

<sup>2</sup> Me rá 'unj xcaj ndo'o soj cuentá che'é Diöse do', che'é Jesucristó sij 'nij ra'a man ní' do', gaa ne ca'vee quirí' ndo'o soj se luj ne gaa xej nimán soj, qui'yaj roj so' ei.

*Nana nihánj taj xna'anj daj qui'yaj ní' ne canoco' raan ní' man Jesucristó a*

<sup>3</sup> Dan me se canacúun Diöse man ní' cavii sa' uxrá ní' ne guun chij ní' gá ma'an so', ne Jesucristó me se ya'anj ndo'o rá so', ne so' me síi qui'yaj xcaj ní' cuentá che'é Diöse, ne che'é dan ca'vee cayáán sa' ní' gá Diöse, ne ve'é canoco' ní' man Diöse, ne taj a doj rasuun cachiiin man ní', qui'yaj so' ma'.

<sup>4</sup> Ne che'é dan cata' tu'va so' che'é nij se luj qui'yaj ndo'o so' che'é ní', che'é rej ca'vee quinanii soj rihaan se chi'ii nuu nimán nij síi man rihaan chumii nihánj, ne ase vaa ma'an Diöse ro', danj gaa soj ei.

<sup>5</sup> Ne che'é dan soj sij amán rá ni'yaj man Jesucristó me se yo'o naqui'yaj cuu soj che'é se-tucuanj Diöse, ne naqui'yaj sca' ndo'o soj nimán soj, ne asa' guun sca' nimán soj, gaa ne terquee soj xcaj soj cuentá sa' doj che'é se-nana Diöse,

<sup>6</sup> ne asa' quene'en sa' soj se-nana Diöse, gaa ne terquee soj guun soj síi tumé sa' man ma'an daj qui'yaj ma'an, ne asa' quisíj tumé sa' soj man ma'an soj, gaa ne terquee soj guun nucuaj nimán soj rihaan sayuun, ne asa' quisíj guun nucuaj nimán soj rihaan sayuun, gaa ne terquee soj qui'yaj soj ndaa vaa me rá Diöse qui'yaj soj,

<sup>7</sup> ne asa' quisíj nari' soj qui'yaj soj ndaa vaa me rá Diöse, gaa ne terquee soj cunu ni'yanj nimán soj, ne asa' quisíj cunu ni'yanj nimán soj, gaa ne terquee soj cunu 'ee rá soj ni'yaj soj tuvi' soj ei.

<sup>8</sup> Dan me se sese doj a nari' soj qui'yaj soj nu' danj daj a güii, gaa ne se ca'vee guun soj síi ni'yon síi ne ne'en qui'yaj suun che'é Diöse a ma'. Tananj sa' uxrá doj quene'en man Jesucristó sij 'nij ra'a man ní' adonj.

<sup>9</sup> Tzaj ne síi ataa nari' qui'yaj nu' ndaa vaa taj 'unj nihánj me se ase vaa síi ne ruvi' gan' ni'yaj vaa so', se vaa síi tuchrii vaa so', ne nichrun' yá tacúun so' ruvi' ni'yaj so', ne taj se 'yá' xcaj so' cuentá che'é nij rasuun noco' doj a man adonj. Ne dan me se quini'yón so' nu' cacun' naruvii xráá so' gaa rque nanj adonj.

<sup>10</sup> Che'é dan me doj a tananj terquee ndo'o soj canoco' raan soj man Diöse, tinuj, nocoj. Dan, gaa ne quene'en ya soj se vaa nacúun Diöse man soj ne narii Diöse man soj cavii sa' soj gá so', ne daj chihaa míj se quirí' soj rihaan Diöse ma'.

<sup>11</sup> Gaa ne Jesucristó sijn 'nij ra'a man ní' síí tinanii man ní' rihaan sayuun ro', ve'é uxrá nucuí' sa' soj rej guun chij so' nu' cavii nu' ca'anj, qui'yaj so' chuguanj.

<sup>12</sup> Che'é dan nda' se aj ne'en soj nana nihánj, ne nda' se aj guun che'e soj canoco' soj se-nana Diose nana ya vaa rihaan soj, tzaj ne nana niganj 'unj nana nihánj rihaan soj se gaa nanj quini'yon soj ei.

<sup>13</sup> Vaa che'é ndo'o nanon nana nihánj rihaan soj yaj gaa vaa i'na' 'unj rihaan chumij nihánj, raj chuguanj.

<sup>14</sup> 'O se aj ne'enj se vaa nichrun' cavi' 'unj, ndaa vaa cataj Jesucristó sijn 'nij ra'a man ní' rihanj,

<sup>15</sup> ne che'é dan yo'o qui'yaj ndaa daj a ca'vee ma'an, gaa ne nda' se cavij, tzaj ne yo'o cunuú rá soj nana sa' nihánj ei.

*Nana nihánj taj xna'anj se vaa quene'en nij tuví' Pedró se vaa síí uun chij me Jesucristó a*

<sup>16</sup> 'O se gaa cataj xna'anj núj rihaan soj se vaa ca'na' uún Jesucristó sijn 'nij ra'a man ní' rihaan chumij nihánj ne gaa nucuaj ndo'o so' asa' ca'na' so', ne nuveé cuentó avii raá ma'an núj me yo' ma'. Rihaan ma'an núj quene'en núj se vaa síí sa' uxrá me so' adonj.

<sup>17</sup> Ya sijn uun chij me so', cataj Diose, gaa ca'mii Diose nana nihánj rihaan so' a: "Ta'níí 'unj síí 'ee ndo'o raj man mé so', ne niha' ndo'o raj ni'yaj man so' adonj", taj Diose rihaan so' adonj.

<sup>18</sup> Xrée ma'an núj cuno núj nana nihánj nana cavii rej xta' gaa cumán núj xráá quij guee ga so' ei.

<sup>19</sup> Che'é se quene'en núj ndaa vaa guun chij Jesucristó qui'yaj Diose, che'é dan doj a cuchumán rá núj nana cachrón nij síí nata' se-nana Diose gaa naá chuguanj. Ne sa' qui'yaj soj, sese xcaj ma'an soj cuentá che'é nana ca'mii nij so' ei. 'O se ase vaa ya'an chuguun racuj man nij síí yanj rej rmí' ro', danj vaa se-nana nij so', racuj yo' man ní' gaa yáán ní' chumij nihánj adonj. Tzaj ne vaa güii quene'en soj man ma'an Jesucristó, ne se cachiin uún se-nana nij síí man gaa naá rihaan soj ma'. 'O se ase vaa yati' xta'ngaa chuguun gaa rej nichrun' rá ranga' ro', danj gaa so', quene'en nimán soj rej sa', qui'yaj so' a.

<sup>20</sup> Maan se asino yaan xcaj soj cuentá che'é se-nana nij síí nata' se-nana Diose gaa naá, ne nuveé raá ma'an nij so' cavii nana cachrón nij so' rihaan yanj ma'.

<sup>21</sup> 'O se a 'ó yuvij qui'yaj ca'na' se-nana Diose rihaan chumij nihánj cunó yo'ó nij yuvij ma'. Maan se Nimán Diose me síí qui'yaj ca'mii nij yuvij nana cavii rihaan ma'an ya Diose adonj.

## 2

*Nana nihánj taj xna'anj che'é nij síí nago' tucuáán ne a*

<sup>1</sup> Tzaj ne cumán uxrá nij síí ne nata' se-nana Diose gaa naá rihaan nij síí israelitá, ne ndaa rá se vaa nij síí ne gaa naá ro', ta'nga' danj vaa nij síí ne cuchí' rihaan soj narque tucuáán ne rihaan soj adonj. Ne sese cuchuman rá soj, ne ca'anj soj rihaan ya'an ga nij so' a. Dan me se Jesucristó sijn 'nij ra'a man ní' ro', cavi' so' che'é rej ca'vee quinani' nij so' rihaan sayuun, tzaj ne ma'an nij so' me se inanj nana ne a'mii nij so' che'é Jesucristó, ne che'é dan quiran' ra'yanj ya nij so' sayuun, qui'yaj Diose a.

<sup>2</sup> Tzaj ne canoco' que'ee nij síí amán rá ni'yaj man Jesucristó man nij síí ne yo', ne qui'yaj ndo'o nij so' nu' tucuáán chí'ii, ne che'é tucuáán chí'ii 'yaj

nij so' ro', che'é dan ca'mii nij sí ne amán rá ni'yaj man Diose nana nij che'é se-tucuanj Diose tucuáan ya ei.

<sup>3</sup> Guun rá nij sí narque tucuáan ne yo' qui'yaj canaán ndo'o nij so' sa'anj, ne che'é dan nano' nij so' nana ne ca'mii nij so' rihaan nij soj, tzaj ne asij naá cataj Diose se vaa quiran' ndo'o nij so' sayuun vaa güii, ne ya uxrá quiran' nij so' sayuun ei.

<sup>4</sup> Dan me se aj ne'en soj se vaa ne caraá x'naa Diose a rihaan ma'an nij se-mozó so' gaa qui'yaj nij so' cacun' a ma'. Ya ca'neé Diose man nij so' rej quiran' nij so' sayuun, ne numj Diose aga' ne' man nij so', nago' Diose man nij so' rej rmi' quiran' nij so' sayuun, ne dan me se danj gaa cumán nij so' ndaa güii ca'ne' Diose cacun' che'é nij so' adonj.

<sup>5</sup> Ne aj ne'en soj se vaa ne caraá x'naa Diose a rihaan nij sí cumán gaa naá ma'. Maan tunj guee nij tuvi' sí cu'naj Noé sí ca'mii natáj nana sa' rihaan yuvi se vaa ca'vee cunuu sa' nij yuvi rihaan Diose ro', inanj nij so' me nij sí quinanii rihaan sayuun qui'yaj Diose, gaa ca'ne' rá Diose ca'na' na ya'anj, ne canó xráá nij sí chi'ii man rihaan chumii nihánj, che'é se ne cunó nij so' rihaan Diose adonj.

<sup>6</sup> Tananj uún, ne ne'en soj se vaa yuun che'e cacaa nu' roj chuman' cu'naj Sodoma ga Gomorra, qui'yaj Diose uún, ne dan me se cataj Diose se vaa daj chihaa mij se cumán uún yuvi roj chuman' yo', ne danj qui'yaj Diose che'é se guun rá Diose xcax ni' cuentá daj quiran' nu' nij sí na'vej rá cunó rihaan Diose a.

<sup>7</sup> Tzaj ne tinanii Diose man sí cu'naj Lot rihaan sayuun yo', che'é se sí nica nimán me sí cu'naj Lot yo', ne quiri' rá sí cu'naj Lot che'é se chi'ii qui'yaj nij sí tucuáa rihaan Diose nij sí cumán roj chuman' yo' a.

<sup>8</sup> Dan me se gaa cayáan sí nica nimán yo' chiháan nij so', ne daj a güii quene'en so' se chi'ii qui'yaj nij sí chi'ii yo', ne cunó so' nu' nana chi'ii ca'mii nij so' a. Veé dan, ne quiri' ndo'o rá so' a.

<sup>9</sup> Tzaj ne sí 'nij ra'a man ní' me se nacaj so' man nij sí noco' man so', ne tinanii so' man nij so' rihaan sayuun, ne veé danj guun nucuaj so' tumé so' man nij sí chi'ii, ne yo'o quiran' nij sí chi'ii yo' sayuun ndaa se quisij güii ca'ne' so' cacun' che'é nij so' adonj.

<sup>10</sup> Dan me se táa a qui'yaj so' man nij sí chéé se-tucuanj ma'an, ne 'yaj nij so' ndaa vaa me rá nee man ma'an nij so', ne nachri' nij so' ni'yaj nij so' man Jesucristó sij 'nij ra'a man ní', ne sí a'mii xta' ndo'o me nij so', ne a 'o xco' ne na'aj nij so' a ma'. Ne ne chu'vi' nij so' ca'mii nij so' nana nij che'é nij ya'anj uun chj rihaan nij rasuun man rihaan chumii nihánj a ma'.

<sup>11</sup> Ne nanj sij nucuaj doj me nij se-mozó Diose nij sí noco' sa' man so', tzaj ne ne quisij rá nij so' cuchí' nij so' rihaan sí 'nij ra'a man ní' ne cuta' nij so' cacun' xráá nij ya'anj yo' ma'.

<sup>12</sup> Tzaj ne ase vaa xcuu ne acax cuentá, ne ta'aa nii, ne ticavi' nii man ro', danj vaa nij sí narqué tucuáan ne yo' ei. Ne acax nij so' cuentá daj vaa nij ya'anj, tzaj ne a'mii nij so' nana nij che'é nij ya'anj yo', ne che'é dan quiran' nij so' sayuun ndaa vaa quiran' ma'an nij ya'anj yo' vaa güii, qui'yaj Diose,

<sup>13</sup> ne dan me se naru'vee Diose sayuun rihaan nij so' che'é sayuun qui'yaj nij so' man tuvi' nij so' adonj. Niha' rá nij so' qui'yaj nij so' se nij rej ranga', ne veé danj niha' ndo'o rá nij so' gaa chá nij so' chraa ga soj, ne che'é dan tiri' nij so' man soj gaa nuu chre' soj cha soj chraa adonj.

14 Inañj me rá nij síí narqué tucuáán ne ni'yaj nij so' man chana niha' rá, ne ne a'ne' rá nij so' ga suun 'yaj cacun' a ma'. Tiha' yu'unj nij so' man nij síí ne nicaj raan se-tucuanj Diose, ne yo'o vaa nimán nij so' me rá nij so' quirj' ndo'o nij so' sa'anj ei. Ase vaa xnií maña' ndo'o ro', danj vaa nij so', ne ya quiran' ndo'o nij so' sayuun vaa güii chuguanj.

15 Tanáj nij so' se-tucuanj Diose tucuáán nica, ne canoco' nij so' tucuáán ne, ne ase vaa qui'yaj síí cu'naj Balaam ta'nú Beor gaa naá ro', danj qui'yaj nij so' ei. Ne síí cu'naj Balaam me se che'é se guun rá so' ni'yaj so' sa'anj, ne qui'yaj so' cacun',

16 tzaj ne ase vaa a'mii yuvij ro', danj ca'mii daán so' burró rihaan so', ne cuta' daán so' burró cacun' xráá so', ne dan me se caráán daán so' burró chrej rihaan so' qui'yaj chi'ij rma'an so' rihaan Diose, qui'yaj Diose adonj.

17 Ne ase vaa curuj na utun' ro', danj vaa nij so', ne ase vaa ngaa achén rma'an 'yaj nana ne ne aman' maan 'yaj ro', danj vaa nij síí narqué tucuáán ne yo', ne guun na'aj ndo'o nij yuvij nucuaj rá man nij so' ei. Aj cataj Diose se vaa cuné' Diose man nij so' rej rmi' ndo'o nu' cavii nu' ca'anj adonj.

18 Dan me se a'mii xta' ndo'o nij so' nana nij rma'an, ne uno nij síí cuchumán naca rá ni'yaj man Jesucristó, ne nda' se tihaj guun yanj nij so' rihaan nij síí ne acaj cuentá man rihaan chumií nihánj, tzaj ne nanicaj nij so', ne tanáj nij so' chrej sa', ne 'yaj uún nij so' se chi'ij ndaa vaa me rá ma'an nij so' qui'yaj nij so',

19 ne taj nij síí narqué tucuáán ne rihaan yuvij, ne: "Ca'vee qui'yaj soj me ma'an se me rá soj ei", taj nij síí narqué tucuáán ne rihaan nij síí cuchumán naca rá yo', tzaj ne ma'an nij so' ro', me mozó 'yaj suun che'é rej quirj' nu' nimán yuvij adonj. 'Q se me ma'an rasuun 'yaj canaán rihaan ní' ro', yo' me rasuun 'yaj suun ní' rihaan, ne mozó me ní' rihaan yo' adonj.

20 'Q se gaa rque me se xcaj nij so' cuentá che'é Jesucristó sij 'nj ra'a man ní' síí tinanii man ní' rihaan chrej chi'ij uun chij nimán ní' do', rihaan cunudanj chrej chi'ij man rihaan chumií nihánj do', tzaj ne yaj me se nanicaj nij so' qui'yaj uún nij so' chi'ij, ne ndaa qui'yaj canaán chrej chi'ij yo' rihaan nij so', ne dan me se asino yaan me se maan ta'nga' nij vaa nij so', tzaj ne yaj me se chi'ij doj vaa nij so' adonj.

21 Cavij sa' nij so' doj sese ne quene'en nij so' se-tucuanj Diose tucuáán nica se vaa yaj quene'en nij so' se-tucuanj Diose, gaa ne nanicaj uún nij so' tanáj nij so' tucuáán sa' nago' Diose man nij so' saj adonj.

22 Ase vaa 'yaj nij so' vaa nana ya nihánj a: "Uchráán chuvee, gaa ne anicaj uún xo' chá xo' se-cuchranj xo' a", ne vaa se-nana xcáá uún taj: "Quisj cane xcáá na sa', gaa ne anicaj uún xo' natuj xo' rá sigui' a", vaa yo'ó nana taj xna'anj daj 'yaj nij síí narqué tucuáán ne yo' a.

### 3

*Nana nihánj taj xna'anj se vaa taj ni'yón ca'na' uún Jesucristó rihaan chumií nihánj a*

1 Nihánj me yanj vij ca'nej 'unj rihaan soj, tinuj, nocoj. Rihaan roj yanj nihánj nanój se-nana Diose rihaan soj che'é se me raj xcaj soj cuentá che'é rej sa' ei. 'Q se sij me ya rá canoco' man Diose me soj,

2 ne me raj ninuj rá soj nana ca'mii nij síí vaa sa' rihaan Diose síí nata' se-nana Diose gaa naá, ne me raj ninuj rá soj se-nana Jesucristó sij 'nj ra'a

man ní' síí tinanii man ní' rihaan sayuun nana narqué núj sij apóstol cune' so' man rihaan soj a.

<sup>3</sup> Tzaj ne vaa che'é ndo'o xcaj nij soj cuentá, ne ca'na' síí a'nga' nacoó ni'yaj man soj asa' nichrun' ca'na' uún Jesucristó rihaan chumiñ nihánj, ne náa guun se nij guun rá nij so' qui'yaj nij so' a.

<sup>4</sup> Gaa ne cataj nij so' nana nihánj rihaan soj a: “Cataj nij síí nata' se-nana Diose ga naá rihaan xii ní' se vaa ca'na' uún Jesucristó rihaan chumiñ nihánj, tzaj ne ne ca'na' uún so' chiha'. Veé danj vaa cavi' xii ní', ne taj vaj so' ca'na' man asanj. Veé ase vaa chumiñ ga asino curuvi' chumiñ ro', veé danj vaa guee chumiñ ndaa cuano nanj asanj”, cataj nij so' ca'nga' nacoó nij so' rihaan soj a.

<sup>5</sup> Dan me se danj cataj nij so' che'é se na'vej rá nij so' xcaj nij so' cuentá ndaa vaa curuvi' chumiñ gaa naá qui'yaj Diose ei. Tzaj ne ca'mii Diose, ne guun rej xta', ne curihanj yo'óo nacoó rque na ya'anj chuguanj.

<sup>6</sup> Gaa ne gaa naá me se ca'anj ni'ya nij yuviñ man rihaan chumiñ, qui'yaj maan do', na ya'anj do' ei.

<sup>7</sup> Tzaj ne xta' ga yo'óo man ní' cuano me se ma'an Diose ca'mii, ne cataj Diose se vaa quinaj roj yo' ndaa se quisij güii ca'ne' Diose cacun' che'é nij síí chi'ii, gaa ne nu' che'e cacaa nij so' chuguanj. Ne güii yo' me se ca'nej Diose ya'an, ne cacaa nu' xta' ga yo'óo man ní' cuano, ne ca'anj ni'ya uún yo' adonj.

<sup>8</sup> Se quini'yón soj nana nihánj, man tinuj, man nocoj. Ase vaa 'o mij yo' vaa orún' güii rihaan síí 'nij ra'a man ní', ne ase vaa orún' güii vaa 'o mij yo' rihaan so' ei.

<sup>9</sup> Ta'aj nij yuviñ me se guun raan ndo'o Diose qui'yaj Diose ndaa vaa cataj so' gaa naá, rá nij so', tzaj ne se guun raan Diose mei. Maan se inaj nimán Diose ni'yaj Diose man soj, ne na'vej rá Diose cavi' nimán a doj tuvi' soj mei. Tananj me rá so' canicaj nimán taran' soj ne tanáj xco soj tucuaán chi'ii chuguanj.

<sup>10</sup> Tzaj ne taj ni'yón quisij güii ca'ne' Diose cacun' che'é yuviñ ei. Dan me se carün ndo'o ca'anj ni'ya xta', ne quinañ nu' nij se man rej xta' cacaa, ne ca'anj ni'ya yo'óo ga nu' se man rihaan yo'óo adonj.

<sup>11</sup> Che'é se ca'anj ni'ya chumiñ, che'é dan se guun nano rá soj che'é rasuun man rihaan chumiñ nihánj ma'. Tananj xcaj soj cuentá che'é rej daj qui'yaj soj canoco' raan soj man Diose ei.

<sup>12</sup> Na'vij soj quisij güii yo', ne ve'é canoco' soj man Diose che'é rej ra'yanj doj quisij güii yo' chuguanj. Ne güii yo' me se quinañ nu' xta' cacaa, ne nacune nu' nij rasuun man rej xta' yo' ei.

<sup>13</sup> Tzaj ne aj cataj Diose se vaa ya gaa yo'óo yo'óo naca, ne gaa yo'óo rej xta' naca, ne inanj se sa' qui'yaj nij síí cumañ rej yo' asa' quisij ei. Dan me se na'vij ndo'o ní' quisij güii yo' cuaj ei.

<sup>14</sup> Che'é se na'vij ní' güii yo' ro', che'é dan terquee soj doj qui'yaj soj se sa' inanj rihaan Diose, ne se gaa nanj cutumé soj cacun' asa' ca'na' uún Jesucristó ei. Ne dínj gaa nimán soj, tinuj, nocoj.

<sup>15</sup> Xcaj soj cuentá se vaa na'vij Diose nanj che'é se me rá so' quinañij nij yuviñ rihaan sayuun chuguanj. Veé danj taj uún nij nana cachrón tinú' Pablo rihaan yanj ca'née so' rihaan soj, ndaa vaa chrej cuu narqué Diose rihaan so' a.

<sup>16</sup> Dan me se daj a nij yanj cartá qui'yaj Pablo ro', ca'mii so' che'é rasuun nihánj, ne vaa doj nana cuu sayuun cunó' nó rihaan yanj qui'yaj so', ne dan me se nij síí ne ne'en do', nij síí uun vij rá me se tinicaj nij so' se-nana Pablo,



ne a'mii ne nij so' che'é Pabló, taj nij so' se vaa ino vaa tucuáán tucu'yón so' a. Ne danj 'yaj nij so' ga yo'ó nij nana no rihaan danj Diose uún, ne che'é dan quiran' ndo'o nij so' sayuun vaa güii adonj.

<sup>17</sup> Aj cataj xna'anj 'uj rihaan soj che'é nij sí narqué tucuáán ne ca'na' rihaan soj vaa güii, tinuj, nocoj. Che'é dan tadó uxrá soj se gaa nanj canoco' soj tucuáán ne narque nij sí na'vej rá cunq rihaan Diose yo' ei. Sese canoco' soj se-nana nij so', ne guun vij rá soj, qui'yaj nij so' ei.

<sup>18</sup> Che'é dan yo'o guun rá soj ni'yaj soj se luj rqué Diose rihaan soj, ne yo'o guun rá soj xcaj soj cuentá sa' doj che'é Jesucristó sij 'nij ra'a man ní' sí tinanii man ní' rihaan sayuun adonj. Vaa che'é ndo'o cataj ní' se vaa sij sa' ndo'o me so' ne sij sa' ndo'o guun so' nu' cavii nu' ca'anj adonj. Veé danj gaa ya ei.

## Nihánj me 'o yanj cartá qui'yaj síi cu'naj Juan ca'néé so' rihaan nij yuvii noco' man Diose a

*Nana nihánj taj xna'anj se vaa cataj xna'anj síi cu'naj Juan che'é se vaa quene'en rihaan ma'an so' a*

<sup>1</sup> Dan me se núj me se cataj xna'anj núj rihaan nij soj che'é 'o síi cane gaa naá asij guun che'e Diose qui'yaj Diose chumij, ne inanj se vaa cuno ma'an núj do', se vaa quene'en rihaan ma'an núj do', se vaa cuta' núj ra'a núj xráá do', che'é inanj rasuun vaa danj cataj xna'anj núj rihaan soj a. Dan me se cataj xna'anj núj che'é se-nana Diose, ne so' me síi qui'yaj cayáán ní' ga Diose nu' cavii nu' ca'anj adonj.

<sup>2</sup> Dan me se so' me síi qui'yaj cayáán ní' ga Diose nu' cavii nu' ca'anj, ne ca'na' so', ne quene'en núj man so', ne nihánj me se nata' núj rihaan nij soj che'é so' se vaa asino canicun' so' ga Diose rej yanj Diose gaa naá, gaa ne yaj me se ca'na' so' rej ne ní' a.

<sup>3</sup> Dan me se nata' núj rihaan ma'an nij soj che'é se vaa quene'en núj do', che'é se vaa cuno núj do', che'é rej ca'vee cunu ruca'aan soj ga núj, ne dan me se cunu ruca'aan ní' ga Rej ní' Diose, ga ta'nii so' Jesucristó a.

<sup>4</sup> Ne achrón núj nana nihánj rihaan yanj nayaá soj, che'é rej ca'vee guun niha' uxrá rá taran' ní' adonj.

*Nana nihánj taj xna'anj se vaa ase vaa ya'an chuguun ro', danj vaa Diose, ne ca'vee cunu sa' nimán ní' qui'yaj so' a*

<sup>5</sup> Ne nihánj ro', me nana cataj xna'anj Jesucristó cuno núj, ne nata' núj nana nihánj rihaan soj, ne dan me se ase vaa 'o ya'an chuguun vaa Diose, ne rej vaj Diose me se nuvi' rej rmi' rej vaj so' ma'.

<sup>6</sup> Che'é dan sese cataj ní' se vaa sij chéé ga Diose me ní', ne sese chéé ní' rej rmi', gaa ne tu'va rma'an ní' vaa gaa nanj ei. Ne ne noco' ní' tucuáán ya yo' gaa a ma'.

<sup>7</sup> Tzaj ne sese chéé ní' rej chuguun sa' rej vaj ma'an Diose, ne ve'é sa' mán taran' ní', ne quínávij nu' cacun' tumé ní', qui'yaj Jesucristó síi cavi' che'é ní', ne yo'o cunu sa' nimán ní' ei.

<sup>8</sup> Dan me se sese cataj ní' se vaa a doj cacun' ne tumé ní', ne dan me se tiha' yu'unj ní' vaa gaa nanj adonj. Ne nuveé sij a'mii nana ya me ní' gaa a ma'.

<sup>9</sup> Tzaj ne sese nata' ya ní' rihaan Diose che'é cacun' tumé ní', ne Diose me se vaa che'é gaa nucaj rá ní' se vaa nica qui'yaj so' che'é ní', ne dan me se cataj so' se vaa navij cacun' tumé ní', ne tinávij so' nu' se chi'ii man nimán ní' adonj.

<sup>10</sup> Dan me se sese cataj ní' se vaa a doj ne qui'yaj ní' cacun', ne sij tu'va rma'an me ní', ne 'yaj ní' síi ne man ndaa ma'an Diose vaa gaa nanj chuguanj. Dan me se aj cataj ya Diose se vaa tumé ní' cacun' nanj ei. Ne sese ca'mii ní' danj, ne nuveé sij uno se-nana Diose me ní' gaa mei.

## 2

*Nana nihánj taj xna'anj che'é nana no' xcúun ní' cunq ní' a*

<sup>1</sup> Ase vaa ta'nii 'unj ro', danj vaa soj, tinuj, nocoj. Ne achrón 'unj nu' nana nihánj rihaan yanj nihánj, che'é rej se qui'yaj soj cacun' mei.

Dan me se sese qui'yaj ní' cacun', ne vaa 'o sí nica nimán a'mii yu'unj che'é ní' rihaan Rej ní' Diose, ne Jesucristó me sí a'mii yu'unj che'é ní' ei.

<sup>2</sup> Ne so' me sí cavi' che'é rej ca'vee quinavij cacun' tumé ní' adonj. Tzaj ne nuveé che'e doj se-cacun' ní' me cavi' so' ma'. Cavi' so' che'é cacun' tumé cunudanj nij yuviñ man rihaan chumiñ adonj.

<sup>3</sup> Dan me se nihánj me rej ne'en ní' se vaa sij noco' man Jesucristó me ní' a. Dan me se sese 'yaj ní' ndaa vaa cataj xna'anj Jesucristó rihaan ní', ne sij noco' ya man so' me ní' adonj.

<sup>4</sup> Tzaj ne sese taj yo'o so' se vaa sij noco' man Jesucristó me so' ne ne 'yaj so' ndaa vaa cataj xna'anj Jesucristó rihaan ní', ne sí ne me so', ne nuveé sij a'mii nana ya me so' mei.

<sup>5</sup> Tzaj ne sí uno se-nana Jesucristó ro', so' me sí ya ya aráj cochroj rihaan Diose chuguanj. Che'é dan, sese qui'yaj ní' danj, ne ca'vee guun ya rá ní' se vaa sij noco' man Jesucristó me ní' ei.

<sup>6</sup> Ne sí taj se vaa yo'o noco' man Jesucristó ro', ase vaa qui'yaj Jesucristó ro', danj inanj nó xcúun so' qui'yaj ma'an so' uun adonj.

<sup>7</sup> Dan me se 'ee raj man soj, tinuj, nocoj. Ne nihánj me se cachron 'unj 'o nana naca rihaan yanj nihánj cunō soj chuguanj. Tzaj ne nuveé nana naca me nana nihánj ma'. Veé nana cuno soj asij guun che'e soj canoco' soj man Jesucristó me nana nihánj nanj adonj.

<sup>8</sup> Dan me se cachron uun 'unj nana naca nihánj cunō soj, ne ya ya nana naca tucu'yón Jesucristó me nana nihánj, ne cuno soj nana naca nihánj adonj. 'O se vaj navij rej rmi' rihaan chumiñ nihánj, ne Jesucristó ro', me ya'an chuguun, ne dan me se guun che'e se-nana so' cuchuguun se-nana so' rihaan chumiñ nihánj ei.

<sup>9</sup> Ne xa' sí taj se vaa vaj so' rej chuguun ga se-nana Jesucristó ne nachri' so' ni'yaj so' man tinúú so', ne sij vaj guee rej rmi' me ya so' nanj chuguanj.

<sup>10</sup> Ne sí 'ee rá man tinúú me se so' me sí chéé rej chuguun ga se-nana Jesucristó, ne se ca'vee qui'rj' so' ma'.

<sup>11</sup> Ne xa' sí nachri' man tinúú, tzaj ne so' me sí vaj rej rmi', ne 'o chéé guee so' rej rmi' nanj á. Ne ne'en so' me rej vaj so' a ma'. 'O se caráan rihaan so', qui'yaj rej rmi' vaj so' nanj adonj. Na'vee a doj xcáj so' cuentá a ma'.

<sup>12</sup> Dan me se achrón 'unj nu' nana nihánj nayaá soj xñi, ne 'o se che'é se noco' soj man Jesucristó ro', che'é dan quinavij cacun' tumé soj rihaan Diose ei.

<sup>13</sup> Achrón 'unj nu' nana nihánj nayaá soj sij vaa ta'núí, ne 'o se aj ne'en soj man sí cayáan ga Diose ga guun che'e Diose qui'yaj Diose chumiñ nihánj a. Achrón 'unj nu' nana nihánj nayaá soj sij tachruu, ne 'o se aj qui'yaj canaán soj rihaan sí chree ei.

<sup>14</sup> Achrón 'unj nu' nana nihánj nayaá soj xñi, ne 'o se aj ne'en soj man Rej ní' Diose adonj.

Achrón 'unj nu' nana nihánj nayaá soj sij vaa ta'núí, ne 'o se aj ne'en soj man sí cayáan ga Diose ga guun che'e Diose qui'yaj Diose chumiñ nihánj ei.

Achrón 'unj nu' nana nihánj nayaá soj sij tachruu, ne 'o nucuaj ndo'o nimán soj rihaan sayuun, ne yo'o uno soj se-nana Diose, ne aj qui'yaj canaán soj rihaan sí chree ei.

<sup>15</sup> Se guun rá soj ni'yaj soj chumiñ nihánj do', nij rasuun man rihaan chumiñ nihánj do' mei. 'O se xa' sí me rá ni'yaj chumiñ nihánj, tzaj ne nuveé sij aráj cochroj rihaan Rej ní' Diose me so' man chuguanj.

16 'Q se rihaan chumiij nihánj vaa ndo'o se me rá yuvii qui'yaj yuvii do', vaa ndo'o se me rá yuvii ni'yaj yuvii do', vaa ndo'o rasuun 'yaj uun xtá' nimán yuvii do', tzaj ne nuveé rasuun cavii rihaan Rej ní' Diose me nu' nij rasuun vaa danj ma'. 'Q se nanj rasuun man rihaan chumiij nihánj me nij rasuun yo' nanj adonj.

17 Ne vaj navij chumiij nihánj ei. Ne vaj navij nu' se vaa me rá nij yuvii man rihaan chumiij nihánj qui'yaj nij so' ei. Tzaj ne sí' 'yaj ndaa vaa me rá Diose me se cayáan so' nu' cavii nu' ca'anj ga Diose chuguanj.

*Nana nihánj taj xna'anj che'é sí' tu'va rma'an se vaa sij tinanii man yuvii rihaan sayuun me so' a*

18 Dan me se ase vaa ta'nij vaa soj, ne me raj cunō soj nana nihánj ei. 'Q se nichrun' quinavij chumiij nihánj, ne aj cunō soj nana se vaa ca'na' 'Q sí' quitaj yu'unj, ne cataj so' se vaa sij ca'née Diose tinanii man yuvii rihaan sayuun me so', ne nihánj me se aj ca'na' que'ee sí' tu'va danj, ne che'é dan ne'en ya ní' se vaa ya nichrun' quinavij chumiij nihánj ei.

19 Dan me se ase vaa tinúu ní' vaa nij so' asij rque, tzaj ne ca'anj yanij nij so' rihaan ní', ne nuveé ya ya tinuj ní' me nij so' a ma'. 'Q se ca'anj yanij nij so' rihaan ní' che'é rej ca'vee xcax ní' cuentá se vaa nuveé tinuj ní' me taran' nij so' a man adonj.

20 Ne xa' soj, tzaj ne cune' Diose man soj, ne guun nucuaj soj xcax soj cuentá, qui'yaj Diose, ne ne'en soj cunudanj rasuun ei.

21 Nuveé che'e se ne ne'en soj nana ya me cachrón 'unj nana nihánj nayaá soj ma'. Tzaj ne achrón 'unj nana nihánj nayaá soj che'é se sij ne'en nij nana ya me soj, ne aj ne'en soj se vaa inō doj vaa nana ne ga nana ya nana noco' ní' adonj.

22 Ne sí' ne me se so' me sí' taj se vaa nuveé sij ca'née Diose tinanii man yuvii rihaan sayuun me Jesucristó chuguanj. Dan me se taj so' se vaa ma'an so' me Cristó ca'née Diose, taj so' chuguanj. Ne dan me se ne aráj cochroj so' rihaan Rej ní' Diose do', rihaan ta'núí Diose do' ma'.

23 Dan me se xa' sí' ne aráj cochroj rihaan ta'núí Diose, tzaj ne sij ne noco' man Rej ní' Diose me so' ei. Tzaj ne sí' nata' ya se vaa ve'é noco' so' man ta'núí Diose ro', so' me sí' noco' ya man Rej ní' Diose uún adonj.

24 Ne xa' soj, tzaj ne yo'o cunō soj nana cunō soj gaa guun che'e soj canoco' soj man Jesucristó ei. Sese qui'yaj soj danj, ne sij noco' man ta'núí Diose do', man ma'an ya Rej ní' Diose do', me soj chuguanj.

25 Ne nihánj me nana cata' tu'va ma'an Jesucristó rihaan ní', se vaa ca'vee cayáan ní' ga Diose nu' cavii nu' ca'anj ya ei.

26 Dan me se cachrón 'unj nu' nana nihánj nayaá soj che'é rej xcax soj cuentá che'é nij sí' me rá tihá' yu'unj man soj adonj.

27 Ne xa' soj, tzaj ne che'é se cune' Diose man soj ro', che'é dan yo'o noco' soj man Diose, ne taj che'é tucu'yón nii doj nana man soj a ma'. Tananj che'é se cune' Diose man soj, che'é dan aj nari' soj nana che'é nu' rasuun, ne inanj nana ya nari' soj ei. Nuveé nana ne me nana nari' soj, qui'yaj Diose ma'. Dan me se yo'o noco' soj man Diose, ndaa vaa tucu'yón ya so' man soj adonj.

*Nana nihánj taj xna'anj se vaa ta'nij Diose me ní' a*

28 Dan me se ase vaa ta'nij vaa nij soj rihanj, ne me rá 'unj se vaa yo'o canoco' raan soj man Jesucristó, che'é rej asa' ca'na' uún so' rihaan chumiij

nihánj, ne se guun na'aj soj a doj ma'. Tananj guun niha' rá soj ca'mii soj ga so' ei.

<sup>29</sup> Dan me se ne'en soj se vaa síi sa' inanj me Jesucristó, ne che'é dan ne'en soj se vaa nu' nij síi 'yaj sa' ro', taran' nij so' me síi cunuu sa' nimán qui'yaj so' adonj.

### 3

<sup>1</sup> Dan me se xcaj soj cuentá se vaa cunuu 'ee uxrá rá Rej ní' Diose ni'yaj so' man ní', ne ndaa ta'nii Diose guun ní', qui'yaj Diose chuguanj. Ne ta'nij Diose me xa' ní' adonj. Che'é dan ne ne'en nij síi man rihaan chumii nihánj man ní' daj sij me ní' man chuguanj. 'O se tananj uún, ne ne ne'en nij so' man ma'an Diose uún a man adonj.

<sup>2</sup> Dan me se 'ee raj man nij soj, tinuj, nocoj, ne cuano nihánj me se ta'nij Diose me ní', ne ataa xcaj ní' cuentá daj sij guun ní' qui'yaj Diose vaa güii ei. Maan se ne'en ní' se vaa asa' ca'na' so', ne ase vaa so' ro', danj gaa ma'an ní' uún adonj. 'O se quene'en ní' man so', ne xcaj ya ní' cuentá daj vaa xa' so' nanj adonj.

<sup>3</sup> Ne nij síi nucuaj rá man nana nihánj se vaa ya vaa nana nihánj me se ya cunuu sa' nimán nij so' qui'yaj nij so', ne ase vaa sa' nimán Jesucristó ro', danj gaa sa' nimán nij so' uún adonj.

<sup>4</sup> Dan me se nu' nij síi 'yaj cacun' ro', nij so' me nij síi na'vej rá cunó rihaan Diose,

<sup>5</sup> ne ne'en nij soj se vaa ca'na' Jesucristó rihaan chumii nihánj, che'é rej ca'vee tinavij so' cacun' tumé yuvi, ne a doj cacun' taj tumé so' ma'.

<sup>6</sup> Ne taran' nij síi yo'o noco' man so' ro', ne 'yaj nij so' cacun' ma'. Ne nij síi noco' tucuaán 'yaj cacun' ro', nuveé sij ne'en man Jesucristó me nij so' man adonj.

<sup>7</sup> Dan me se ase vaa ta'nij vaa soj rihanj, tinuj, nocoj, ne se guun tihá' yu'unj a doj yuvi man soj man chuguanj. Síi 'yaj sa' ro', síi sa' me so', ne ase vaa ma'an Jesucristó vaa so' adonj.

<sup>8</sup> Ne síi 'yaj cacun' me se síi noco' se-tucuanj síi chree me so' ei. 'O se asij guun che'e Diose qui'yaj Diose chumii nihánj, ne sij 'yaj inanj cacun' me síi chree nanj adonj. Ne ca'na' ta'nii Diose rihaan chumii nihánj, che'é rej ca'vee tirí' so' nu' se vaa 'yaj síi chree yo' ei.

<sup>9</sup> Ne taran' nij síi cunuu sa' nimán qui'yaj Diose ro', ne 'yaj nij so' cacun' a ma'. 'O se Diose me síi qui'yaj cunuu sa' nimán nij so', ne se ca'vee yo'o qui'yaj so' cacun', ése ma'an Diose qui'yaj ca'ngaa naca nij so' nanj adonj.

<sup>10</sup> Ne nihánj me xcaj ní' cuentá ni'yaj ní', gaa ne cunuu yaan ní' ta'nii Diose do', ta'nii síi chree do' ei. Dan me se nij síi ne 'yaj se sa' ro', nuveé sij noco' man Diose me nij so' ma'. Dan me se nuveé sij 'ee rá man tinúu me nij so' a man adonj.

*Nana nihánj taj xna'anj se vaa no xcúún ní' cunuu 'ee rá ní' man tuvi' ní' a*

<sup>11</sup> 'O se nana nihánj me nana cuno soj asij guun che'e soj canoco' soj man Diose, ne nana nihánj taj se vaa no xcúún ní' cunuu 'ee rá ní' man tuvi' ní' chuguanj.

<sup>12</sup> Dan me se se qui'yaj ní' ndaa vaa qui'yaj síi cu'naj Caín gaa naá ma'. 'O se sij noco' tucuaán chi'ii me so', ne ticavi' so' tinúu so' adonj. Ne me che'é qui'yaj so' danj, rá soj ga. 'O se nu' rasuun qui'yaj so' me se inanj chi'ii ndo'o

qui'yaj ma'an so', ne tinúú so' me se sa' inanj vaa rasuun qui'yaj tinúú so', ne che'é dan guun xcoj ruvaá rá so' ni'yaj so' tinúú so' adonj.

13 Dan me se se ca'anj rá soj sese quitaj ri'yunj nij síi man rihaan chumii nihánj ni'yaj nij so' man soj, man tinuj, man nocoj.

14 Q se che'é se cunuu 'ee rá ní' man tinúú ní' ro', che'é dan ne'en ní' se vaa aj tanáj xco ní' chrej chi'ii chrej qui'yaj cavi' ní', ne aj cunuu sa' nimán ní', ne ca'vée cayaán ní' ga Diose ei. Ne síi ne 'ee rá man tuvi' me se adi' se vaa nij síi cavi' ro', vaa nij so' nanj adonj.

15 Dan me se xa' taran' nij síi nachri' ni'yaj man tinúú me se ase vaa síi ticavi' man tinúú ro', vaa nij so', ne ne'en soj se vaa daj chihaa míj se ca'vée gaá i'na' síi vaa danj rihaan Diose nu' cavii nu' ca'anj ma'.

16 Ne Jesucristó ro', me síi ca'vej rá cavi' che'é ní', ne che'é dan ne'en ní' se vaa 'ee rá so' man ní' adonj. Ne che'é dan no' xcúún ní' ca'nej nimán ní' cavi' ní' che'é tinúú ní' chuguanj.

17 Dan me se sese vaa ndo'o rasuun man rihaan chumii nihánj njcaj yo'o so', ne nda' se ne'en so' se vaa achiin ndo'o rasuun man tinúú so' tzaj ne na'vej rá so' racuj so' man tinúú so', ne nuveé sij aráj cochroj rihaan Diose me so' a man adonj.

18 Dan me se ase vaa ta'nij vaa soj chuguanj. Dan me se se guun cataj uun ní' nana uun se vaa aráj cochroj ní' rihaan Diose chuguanj. Qui'yaj ya ya ní' se sa' ndaa vaa me rá Diose qui'yaj ní', ne ya ya sij aráj cochroj rihaan Diose me ní' adonj.

*Nana nihánj taj xna'anj se vaa taj che'é guun na'aj ní' ni'yaj ní' Diose ma'*

19 Dan me se sese qui'yaj ní' danj, ne quene'en ní' se vaa sij nocoj ya nana ya me ní', ne dan me se guun ya ya rá nimán ní' rihaan Diose ei.

20 Q se nda' se ca'vée quinanó rá ní' che'é cacun' tumé ní', tzaj ne sa' doj vaa Diose rihaan nimán ní', ne Diose me síi ne'en cunudanj adonj.

21 Dan me se 'ee raj man nij soj, tinuj, nocoj. Ne sese nuvi' cacun' tumé ní', ne se cuchu'vi' ní' ca'mii ní' ga Diose ma'.

22 Dan me se me ma'an rasuun cachinj ní' rihaan Diose, ne rque Diose cunudanj se vaa cachinj ni'yaj ní' rihaan so', che'é se sij uno se-nana so' me ní', ne uun niha' rá so' ni'yaj so' se sa' 'yaj ní' ei.

23 Dan me se nihánj me se vaa me rá Diose qui'yaj ní' a. Me rá Diose cuchuman rá ní' ni'yaj ní' man ta'nii so' Jesucristó, ne me rá Diose cunuu 'ee rá ní' ni'yaj ní' man tuvi' ní' ndaa vaa ca'ne' Diose suun rihaan ní' a.

24 Ne síi uno se-nana Diose ro', so' me síi yo'o noco' man Diose, ne yo'o ne Diose ga so' adonj. Ne nihánj me rej ne'en ní' se vaa yo'o ne Diose ga ní' ei. Che'é se xcaj ní' cuentá se vaa 'yaj suun Nimán Diose nimán ní', che'é dan ne'en ní' se vaa ne Diose ga ní' adonj.

## 4

*Nana nihánj taj xna'anj me nana ca'vée cunó ní' a*

1 'Ee raj man nij soj, tinuj, nocoj. Ne se guun cunó soj me ma'an nana ma'. Asino xcaj soj cuentá sese nana rque Nimán Diose me nana ca'mii yo'o so', ne sese Nimán Diose me síi rque nana yo', ne ca'vée cunó soj nana yo' ei. 'Q se aj ca'na' ndo'o síi ne, ne taj nij so' se vaa sij nata' se-nana Diose me nij so', tzaj ne tu'va rma'an nij so' nanj ei. Dan me se danj tu'va nij so' rihaan nij síi man

rihaan chumiꞑ nihánj che'é se me rá nij so' cuchuman rá nij síꞑ man rihaan chumiꞑ nihánj chuguanj.

<sup>2</sup> Tzaj ne nihánj me se vaa qui'yaj soj, gaa ne ca'vee xcaj soj cuentá me nana me nana ca'mii Nimán Diose ei. Sese cataj yo'q so' se vaa Jesucristo me síꞑ ca'née Diose tinanii man yuvii rihaan sayuun, ne guun Jesucristo yuvii ca'na' so', cataj yo'q so', ne nana yo' me se-nana Nimán Diose adonj.

<sup>3</sup> Tzaj ne nu' nij síꞑ taj se vaa nuveé sij ca'née Diose man me Jesucristo me se nuveé nana rqué Nimán Diose me yo' ma'. 'O se se-nana nij síꞑ ne tu'va rma'an me yo', ne dan me se aj cuno soj se vaa ca'na' nij so', ne cataj nij so' se vaa sij ca'née Diose tinanii man yuvii rihaan sayuun me ma'an nij so' ei. Ne yaj nihánj me se aj man ndo'o nij so' rihaan chumiꞑ nihánj yaj cuano chuguanj.

<sup>4</sup> Tzaj ne yaj nihánj me se síꞑ cunuu sa' nimán qui'yaj Diose me nij soj, tinuj, nocoj. Ne aj qui'yaj canaan soj rihaan nij síꞑ ne cuano ei. 'O se nuu Nimán Diose nimán soj, ne nucaj doj Nimán Diose rihaan síꞑ chree vaj rihaan chumiꞑ nihánj chuguanj.

<sup>5</sup> Ne nij síꞑ ne yo', tzaj ne síꞑ man rihaan chumiꞑ nihánj me nij so', ne che'é dan inanꞑ a'mii nij so' ndaa vaa nari' nij so' rihaan chumiꞑ nihánj, ne uno nij síꞑ man rihaan chumiꞑ nihánj se-nana nij so' ei.

<sup>6</sup> Tzaj ne síꞑ cunuu sa' nimán qui'yaj Diose me ní', ne nij síꞑ ne'en man Diose ro', uno nij so' se-nana ní' adonj. Ne xa' síꞑ ne cunuu sa' nimán qui'yaj Diose, tzaj ne ne uno nij so' se-nana ní' a ma'. Che'é dan ne'en ní' me síꞑ nuu Nimán Diose nimán, ne ne'en ní' me síꞑ nuu nana tiha' yu'unj nimán chuguanj.

*Nana nihánj taj xna'anj se vaa no xcuún ní' cunuu 'ee rá ní' man tuvi' ní', che'é se 'ee rá Diose man ní' a*

<sup>7</sup> Ee raj man nij soj, tinuj, nocoj. Ne no xcuún ní' cunuu 'ee rá ní' man tuvi' ní' adonj. 'O se Diose me síꞑ rqué rej nucaj rihaan ní' cunuu 'ee rá ní' man tuvi' ní' a. Che'é dan nu' síꞑ 'ee rá man tuvi' me se síꞑ cunuu sa' nimán qui'yaj Diose me nij so' adonj. Ne ne'en nij so' man Diose adonj.

<sup>8</sup> Ne síꞑ ne 'ee rá man tuvi' me se ataa xcaj nij so' cuentá che'é Diose ei. 'O se ataa xcaj nij so' cuentá se vaa Diose me síꞑ 'ee inanꞑ rá man ní' adonj.

<sup>9</sup> Ne nihánj me cataj xna'anj 'unꞑ rihaan soj me che'é ne'en ní' se vaa 'ee rá Diose man ní' a. Dan me se nda' se orún' ya ta'núí Diose, tzaj ne ca'née Diose man ta'núí ma'an ya Diose rihaan chumiꞑ nihánj, che'é rej ca'vee gaa i'na' nimán ní' nu' cavii nu' ca'anꞑ qui'yaj so' a.

<sup>10</sup> Ne vaa che'é xcaj ní' cuentá se vaa ne caraꞑ cochroj ní' rihaan Diose asino yaan ma'. Tananꞑ asino yaan me se cunuu 'ee rá Diose ni'yaj Diose man ní', gaa ne ca'née so' man ta'núí so' che'é rej cavi' ta'núí so' ne tinavij ta'núí so' cacun' tumé ní' a.

<sup>11</sup> Ne che'é se cunuu 'ee rá Diose man ní' ro', che'é dan no xcuún ní' cunuu 'ee rá ní' man tuvi' ní', tinuj, nocoj.

<sup>12</sup> A doj yuvii ne quene'en rihaan man Diose nu' cavii nu' ca'na' ma'. Tzaj ne sese gaa 'ee rá ní' man tuvi' ní', ne ya ne Diose ga ní', ne aj cunuu sa' nimán ní' ndaa vaa guun rá Diose gaa cunuu 'ee rá Diose man ní' a.

<sup>13</sup> Dan me se che'é se rqué Diose Nimán Diose rihaan ní' ro', che'é dan ne'en ní' se vaa sij noco' man Diose me ní' ne yo'q ne so' nimán ní' a.

<sup>14</sup> Ne aj ne'en núj se vaa ca'née Rej ní' Diose man ta'núí so' rihaan chumiꞑ nihánj che'é rej tinanii so' man nij síꞑ man rihaan chumiꞑ nihánj rihaan sayuun, ne aj nata' núj nana yo' rihaan yuvii ei.

<sup>15</sup> Ne sí taj rihaan tuvi' se vaa ta'níi Diose me Jesucristó ro', so' me sí 'o noco' man Diose, ne 'o ne Diose ga so' chuguanj.

<sup>16</sup> Ne aj ne'en núj se vaa 'ee rá Diose man ní', ne amán rá núj se vaa 'ee rá so' man ní' ei.

Diose me sí 'ee rá man ní' ei. Ne sij 'o 'ee rá man tuvi' ro', so' me sí 'o noco' man Diose, ne 'o ne Diose ga so' ei.

<sup>17</sup> Ne che'é dan sese 'ee rá ní' man tuvi' ní', ne asa' quisij güii ca'ne' Diose cacun' che'é yuvij, ne se cuchu'vi' ní' ma'. 'O se quene'en ní' se vaa ase vaa qui'yaj Jesucristó ga vaj so' rihaan chumiij nihánj ro', danj qui'yaj ma'an ní' uún adonj.

<sup>18</sup> Che'é dan síi ya 'ee rá man tuvi' ro', a doj ne chu'vi' so' ma'. Síi chu'vi' me sí uun rá se vaa qui'yaj Diose sayuun man so', ne nuveé sij ya 'ee rá man tuvi' me sí guun danj rá ma'.

<sup>19</sup> Dan me se 'ee rá ní' man tuvi' ní' che'é se asino cunuu 'ee rá ma'an Diose man ní' a.

<sup>20</sup> Ne sese cataj yo'o so' se vaa aráj cochroj so' rihaan Diose, ne sese nachri' so' ni'yaj so' tinúú so', ne síi ne me so' ei. 'O se sese ruvi' ya tinúú so' ni'yaj so' tzaj ne ne 'ee rá so' man tinúú so', ne asa' ca'vee caraá cochroj so' rihaan Diose, sese ne ruvi' Diose ni'yaj so' ga.

<sup>21</sup> Ne nihánj me nana cataj xna'anj Jesucristó rihaan ní', ne cataj so' se vaa síi aráj cochroj rihaan Diose ro', no xcúún so' ga 'ee rá so' man tuvi' so' uún adonj, taj Jesucristó a.

## 5

<sup>1</sup> Cunudanj nij síi amán rá se vaa me Jesucristó síi ca'neé Diose tinanii man yuvij rihaan sayuun ro', aj cunuu sa' nimán nij so', qui'yaj Diose chuguanj. Ne che'é dan sese aráj cochroj ní' rihaan Diose, ne no xcúún ní' ga 'ee rá ní' man nij síi cunuu sa' nimán yo' ei.

<sup>2</sup> Ne sese aráj cochroj ní' rihaan Diose, ne sese uno ní' nana cataj xna'anj Diose rihaan ní', ne veé síi aráj cochroj rihaan ta'níi Diose me uún ní' adonj.

<sup>3</sup> Ne sese uno ní' nana cataj xna'anj Diose rihaan ní', ne sij aráj cochroj rihaan Diose me ní' chuguanj.

*Nana nihánj taj xna'anj se vaa sese cuchuman rá ní' ni'yaj ní' man Jesucristó, ne qui'yaj canaán ní' rihaan se nij man rihaan chumiij nihánj a*

Ne ne sayuun vaa cunó ní' rihaan Diose ma'.

<sup>4</sup> 'O se cunudanj nij síi cunuu sa' nimán qui'yaj Diose ro', qui'yaj canaán nij so' rihaan se nij man rihaan chumiij nihánj, ne che'é se amán rá ní' ni'yaj ní' man Jesucristó ro', che'é dan aj qui'yaj canaán ní' rihaan chumiij nihánj nanj ei.

<sup>5</sup> Dan me se síi amán rá se vaa Jesucristó me ta'níi Diose ro', so' me síi 'yaj canaán rihaan se nij man rihaan chumiij nihánj adonj.

<sup>6</sup> Nihánj me Jesucristó síi ca'na' cata' ne, ne 'o se ne ca'na' so' cata' ne uun so' ma'. Dan me se ca'na' so' cata' ne so', ne ca'na' so' cavi' so' che'é ní' uún adonj. 'O se Nimán Diose me se taj xna'anj Nimán Diose rihaan ní', ne amán ya rá ní', ése ya uxrá a'mii Nimán Diose adonj.

<sup>7</sup> 'O se va'nuj nij rasuun taj xna'anj rihaan ní' che'é Jesucristó ei.

<sup>8</sup> Dan me se Nimán Diose taj xna'anj rihaan ní' che'é Jesucristó, ne che'é se cata' ne Jesucristó, che'é dan xcaj ní' cuentá che'é so', ne che'é se cavi'



Jesucristó, che'é dan xcaj ní' cuentá che'é so', ne cuyaan a'mii va'nuj nij rasuun yo' a.

<sup>9</sup> Dan me se uno ní' nana nata' tuvi' ní' síi man rihaan chumiij nihánj rihaan ní', ne che'é dan vaa che'é cunō ní' nana nata' Diose rihaan ní' a. 'Q se sa' doj vaa Diose rihaan yuviij, ne nata' so' rihaan ní' che'é ta'níi so' a.

<sup>10</sup> Dan me se síi amán rá ni'yaj man ta'níi Diose ro', so' me síi cuno se-nana Diose a. Tzaj ne síi na'vej rá cuchuman rá se-nana Diose ro', so' me síi uun rá se vaa síi ne me Diose a. 'Q se ne cuchuman rá so' nana nata' Diose rihaan so' che'é ta'níi Diose ma'.

<sup>11</sup> Ne nana nata' Diose rihaan ní' taj se vaa ca'vee cayáan ní' ga Diose nu' cavii nu' ca'anj, qui'yaj Diose, che'é rej cavi' ta'níi Diose che'é ní' a.

<sup>12</sup> Síi noco' man ta'níi Diose me síi cayáan ga Diose nu' cavii nu' ca'anj ya ei. Tzaj ne síi na'vej rá canoco' man so' taj ma'. Se cayáan so' ga Diose ma'.

*Nana nihánj taj xna'anj se vaa xcaj ní' cuentá se vaa ca'vee cayáan ní' ga Diose nu' cavii nu' ca'anj a*

<sup>13</sup> Dan me se aj cachronj nana nihánj nayaá nij soj, che'é rej quene'en soj se vaa cayáan soj ga Diose nu' cavii nu' ca'anj, che'é rej me soj síi amán rá ni'yaj man ta'níi Diose ei.

<sup>14</sup> Ne cuano nihánj me se a doj ne chu'vi' ní' cachinj ni'yaj ní' 'o rasuun rihaan Diose a ma'. 'Q se aj ne'en ya ní' se vaa sese ca'vej rá so' nica'j ní' rasuun cachíin ni'yaj ní' rihaan so', ne rque so' adonj.

<sup>15</sup> Ne che'é se ne'en ní' se vaa cunō so' me ma'an nana cachinj ni'yaj ní' rihaan so', che'é dan ne'en ní' se vaa qui'yaj so' ndaa vaa cachinj ni'yaj ní' rihaan so' ei.

*Nana nihánj taj xna'anj che'é cacun' a*

<sup>16</sup> Dan me se sese ne'en ní' tinúú ní' 'yaj so' me ma'an cacun', ne cachinj ni'yaj ní' che'é so' rihaan Diose, ne Diose me síi caraá x'naa che'é cacun' qui'yaj so' adonj. Tzaj ne sese ne'en ní' man tinúú ní' 'yaj so' cacun' noco' ndo'o cacun' qui'yaj cavi' nu' so' rihaan Diose, ne taj che'é cachinj ni'yaj ní' rihaan Diose che'é so' a ma'. Dan me se vaa cacun' uun, ne vaa cacun' noco' ndo'o qui'yaj cavi' nu' ní' rihaan Diose adonj. Tzaj ne che'é cacun' noco' yo' me se se cachíin ni'yaj soj mei.

<sup>17</sup> Dan me se me ma'an se nij 'yaj ní' me cacun' chuguanj. Tzaj ne se cavi' nu' ní' rihaan Diose qui'yaj me ma'an cacun' yo' ma'. 'Q se ca'vee tinavij Diose cacun' yo' ei.

<sup>18</sup> Dan me se ne'en ní' se vaa nu' nij síi ca'ngaa nimán qui'yaj Diose ro', daj chihaa mǐj ne chéé nij so' xrej síi chree ma'. 'Q se tumé ta'níi Diose man nij so', ne se ca'vee qui'yaj chi'ii síi chree man nij so' a.

<sup>19</sup> Ne ne'en ní' se vaa síi noco' man Diose me ní' adonj. Tzaj ne cunudanj nij yuviij man rihaan chumiij nihánj noco' man síi chree ei.

<sup>20</sup> Ne ne'en ní' se vaa aj ca'na' ta'níi Diose, ne qui'yaj suun so' che'é ní', che'é rej ca'vee xcaj ní' cuentá che'é Diose ya, ne ne'en ní' se vaa me ní' síi noco' man ma'an ya ta'níi so' Jesucristó, ne Jesucristó ro', me ma'an ya Diose, ne so' me síi qui'yaj cayáan ní' ga Diose nu' cavii nu' ca'anj adonj.

<sup>21</sup> Ase vaa ta'nij vaa nij soj rihanj, tinuj, nocoj. Dan me se cataj 'unj rihaan soj, ne cutumé ndo'o soj man soj rihaan ya'anj acóy yuviij man rihaan chumiij nihánj ei. Ne se guun guun rá soj ni'yaj soj a 'o rasuun vaa danj ma'.

## Nihánj me síj vij yanj cartá qui'yaj sí cu'naj Juan ca'née so' rihaan nij yuvij noco' man Diose a

<sup>1</sup> Síi chii nga mej, ne achrón 'unj yanj nihánj nayaá taran' nij soj sij narii Diöse man sij nuu chre' rej achíin ni'yaj soj rihaan Diöse a. Dan me se 'ee raj man soj, che'é rej sij noco' nana ya me taran' ní' a. Ne nuveé orún' 'unj me síi 'ee rá man soj ma'. 'Q se taran' nij síi ne'en nana ya 'ee rá man soj adonj.

<sup>2</sup> 'Ee rá núj man soj che'é se nuu nana ya nimán ní', ne yo'o cunuú nana ya yo' nimán ní' nu' cavii nu' ca'anj ruguanj.

<sup>3</sup> Ne me rá 'unj qui'yaj Rej ní' Diöse do', ta'níi so' Jesucristó do', se luj che'é nij soj, ne me rá 'unj cunuú 'ee rá roj so' ni'yaj roj so' man soj, ne me rá 'unj gaa xej nimán soj qui'yaj roj so', ne yo'o canoco' soj nana ya ne gaa 'ee rá soj man tuvi' soj ei.

*Nana nihánj taj xna'anj se vaa yo'o qui'yaj ní' nana cataj xna'anj Diöse rihaan ní', ne gaa 'ee rá ní' man tuvi' ní' a*

<sup>4</sup> Guun niha' uxrá raj, che'é se xcaj 'unj cuentá se vaa ta'aj nij soj me síi yo'o noco' tucuáán ya, ndaa vaa cataj xna'anj Rej ní' Diöse rihaan ní' chuguanj.

<sup>5</sup> Ne nihánj me se achíin ni'yáá 'unj rihaan soj se vaa qui'yaj nij soj ndaa vaa cataj xna'anj Diöse rihaan ní' a. Ne nuveé nana ca'na' naca rihaan ní' me nana nihánj ma'. Maan se nana cataj xna'anj Diöse rihaan ní' asij guun che'é ní' canoco' ní' man so' me nana nihánj adonj. Ne nana nihánj taj se vaa cunuú 'ee rá ní' man tuvi' ní' a.

<sup>6</sup> Sese gaa 'ee rá ní' man tuvi' ní', ne síi 'yaj ndaa vaa cataj xna'anj Diöse rihaan ní' me ní' ei. Ne yo' me nana cataj xna'anj so' rihaan ní' asij guun che'e ní' canoco' ní' man so', ne me rá so' yo'o qui'yaj ní' nana yo' adonj.

<sup>7</sup> 'Q se yaj me se curihanj ndo'o nij síi tiha' yu'unj rihaan chumij nihánj, ne cataj nij so' se vaa nuveé sij guun yuvij me Jesucristó a. Che'é dan me nij so' síi tiha' yu'unj a'mii nana ne, ne taj nij so' se vaa ma'an nij so' me síi ca'née Diöse tinanii man yuvij rihaan sayuun a.

<sup>8</sup> Cütumé ndo'o soj man soj se gaa nanj ca'anj ni'ya nu' nij rasuun sa' qui'yaj canaán soj ma'. Tzaj ne yo'o canoco' soj nana ya, gaa ne ve'é naru'vee Diöse rihaan soj ei.

<sup>9</sup> Ne me ma'an síi tanáj se-tucuaj Jesucristó ro', nuvi' Diöse yáán ga so' ma'. Tzaj ne síi noco' raan se-tucuaj Jesucristó me se so' me síi yo'o yáán roj ta'nij Diöse ga so' adonj.

<sup>10</sup> Ne sese ca'na' 'o síi a'mii yo'ó nana rej yanj soj, ne se ca'vej rá soj catu so' rihaan soj, ne se ca'mii sa' soj ga so' ma'.

<sup>11</sup> 'Q se síi a'mii sa' ga so' me síi racuí man so' qui'yaj so' se chi'ii adonj.

*Nana nihánj taj xna'anj se vaa cuchí' Juan rej yanj nij so' a*

<sup>12</sup> Vaa ndo'o nana me rá 'unj cataj xna'anj 'unj rihaan soj, tzaj ne na'vej rá 'unj cachron 'unj cunudanj nij nana rihaan yanj nihánj, che'é se que'ee ndo'o nana me yo' ei. Tzaj ne cuchij rihaan soj, raj, gaa ne ca'vee ca'mii rihaan ma'an tuvi' ya ní', gaa ne guun niha' uxrá rá ní' gaa nari' tuvi' ní' chuguanj.

<sup>13</sup> Ne nij síi narii Diöse yanj chuman' nihánj ro', me rá taran' nij so' se vaa ve'é cayáán taran' soj ei.

## **Nihánj me síj va'nuj cartá qui'yaj síi cu'naj Juan, ne ca'néé so' yanj nihánj rihaan síi cu'naj Gayo a**

<sup>1</sup> Síi chii nga mej, ne achrón 'unj yanj nihánj nayaa so' sij cu'naj Gayo a. 'Ee raj mán so', che'é se sij noco' nana ya me ní' a.

<sup>2</sup> Dan me se me rá 'unj se vaa cavii sa' so' ne gaa nucaáa so' á. 'O se ya ya vaj avii sa' nimán so' nanj adonj.

<sup>3</sup> 'O se guun niha' uxrá rá 'unj, che'é se ca'na' doj tinúú ní' rihanj nihánj, ne nata' nij so' rihanj se vaa yo'q noco' so' tucuaán ya ei.

<sup>4</sup> Ne taj vaj yo'ó rasuun ca'vee qui'yaj guun niha' raj a ma'. Maan se orún' nana cunó 'unj se vaa ve'é noco' nij soj sij guun ta'nii 'unj man tucuaán ya, ne che'é nana yo' ro', uun niha' uxrá raj nanj adonj.

*Nana nihánj taj xna'anj se vaa ve'é racuíj síi cu'naj Gayo man nij síi chéé nata' se-nana Jesucristó a*

<sup>5</sup> Dan me se 'ee raj mán so', ne ve'é 'yáa so' racuíj so' man nij tinúú ní' nij síi 'na' yo'ó chuman', ne che'é dan síi ve'é noco' man síi 'nij ra'a man ní' mé so', raj adonj.

<sup>6</sup> Ne aj nata' nij so' rihaan nij síi amán rá yanj chuman' nihánj se vaa cunuu 'ee rá so' man nij so' chuguanj. Ne cunaj uxrá sese yo'q racuíj so' man nij so' gaa chéé nij so' que'ee chuman' yo' ei. 'O se síi 'yaj suun rihaan ma'an Diose me nij so' adonj.

<sup>7</sup> 'O se cavii nij so' nata' nij so' se-nana síi 'nij ra'a man ní', ne taj vaj a 'ó rasuun ne quirí' nij so' ra'a nij síi na'vej rá cunó se-nana Jesucristó a man chuguanj.

<sup>8</sup> Che'é dan no xcuún ní' racuíj ní' man taran' nij síi chéé che'é Diose, gaa ne guun ní' tuvi' nij so' síi nata' nana ya rihaan yuvii ei.

*Nana nihánj taj xna'anj che'é 'o síi chí'ii nimán a*

<sup>9</sup> Dan me se qui'yaj 'o yanj cartá ca'néé 'unj rihaan cunudanj nij síi amán rá ni'yaj man Jesucristó yanj chiháán so' a. Tzaj ne vaa yo'q tuvi' nij so' síi cu'naj Diótfefes, ne so' me síi me rá guun chij rihaan nij so', ne na'vej rá so' cunó so' se-nanaj ma'.

<sup>10</sup> Che'é dan, sese cuchí' uún 'unj rihaan so', ne cataj xna'anj 'unj rihaan so' che'é se nij 'yaj so' gaa tu'va so' nana nij che'é núj ei. Ne nuveé inanj nana nij a'mii so' ma'. Dan me se gaa uchi' nij tinúú ní' chiháán so', ne ne a'mii so' ga nij tinúú ní' ma'. Tananj uún, ne me ma'an síi me rá ca'mii ga nij tinúú ní', ne aráán so' chrej rihaan nij yuvii se gaa nanj ca'mii nij yuvii ga nij tinúú ní', ne ndaa rii so' xe' man nij yuvii chuguanj. Danj 'yaj síi cu'naj Diótfefes ei.

*Nana nihánj taj xna'anj se vaa ve'é qui'yaj ní' a*

<sup>11</sup> Dan me se 'ee rá 'unj mán so', tinuj. Ne se guun qui'yáa so' ndaa vaa 'yaj nij síi chí'ii ma'. Maan se qui'yáa so' ndaa vaa 'yaj nij síi vaa sa' á. 'O se síi 'yaj se sa' ro', me síi noco' man Diose adonj. Ne síi 'yaj se chí'ii ro', ne ne'en so' man Diose a ma'.

*Nana nihánj taj xna'anj che'é síi cu'naj Demetrio a*

<sup>12</sup> Cunudanj nij tinúú ní' taj xna'anj che'é síí cu'naj Demetrio se vaa síí vaa sa' me so', ne ya ya síí sa' me so' adonj. Yo' me nana taj xna'anj núj rihaan so', ne aj ne'én so' se vaa nana ya me nij nana ataj xna'anj núj rihaan so' a.

*Nana nihánj taj xna'anj se vaa cuchí! Juan rej yanj Gayo a*

<sup>13</sup> Vaa ndo'o nana guun rá 'unj cataj xna'anj 'unj rihaan so', tzaj ne na'vej rá 'unj cachron 'unj nu' nana yo' rihaan yanj nihánj a man chuguanj.

<sup>14</sup> Tzaj ne cuchij rihaan so', gaa ne ca'vee ca'mii ní' me ma'an nana rihaan tuvi' ní' ei.

<sup>15</sup> Dínj gaa nimán so' á. Me rá nij tinúú ní' se vaa ve'é cayáán so' á. Cataj so' rihaan 'o 'o nij tinúú 'unj yanj chiháán so' se vaa ve'é cumán nij so' raj a.

## Nihánj me 'o yanj cartá qui'yaj síi cu'naj Judas ca'néé so' rihaan nij yuvií noco' man Diose a

<sup>1</sup> 'Unj ro', me síi cu'naj Judas síi 'yaj suun rihaan Jesucristó, ne tinúú Santiagó mej a. Cachronj nana nihánj rihaan yanj ca'nej 'unj rihaan soj sij canacúun Diose man canoco' man so' a. Dan me se 'ee rá Rej ní' Diose man soj, ne nicaj yu'unj Jesucristó man soj se gaa nanj tanáj soj se-nana Diose a.

<sup>2</sup> Me raj gaa 'ee ndo'o rá Diose man soj ne gaa xej nimán soj qui'yaj Diose ne gaa 'ee ndo'o rá soj tuvi' soj qui'yaj Diose a.

### *Nana nihánj taj xna'anj che'é nij síi narqué tucuáán ne a*

<sup>3</sup> Dan me se guun ndo'o raj cachronj nana rihaan yanj ca'nej 'unj rihaan soj che'é daj gaa cavií sa' ndo'o taran' ní' vaa güii qui'yaj Diose, tinuj, nocoj. Tzaj ne yaj me se no xcúnj cachronj yo'ó nana rihaan yanj, ne cataj xna'anj 'unj rihaan soj se vaa terquee ndo'o soj canoco' raan soj se-tucuanj Diose tucuáán tucuachén nij síi nata' se-nana Jesucristó rihaan soj sij cunuu sa' rihaan Diose a.

<sup>4</sup> 'O se aj catúj yuve doj nij síi narqué tucuáán ne sca'núj soj, ne asij naá ndo'o nó nana rihaan danj Diose che'é nij so' se vaa vaa güii quiran' nij so' sayuun, qui'yaj Diose adonj. Sij na'vej rá cunó rihaan Diose me nij so', ne aj nari' nij so' nana se vaa me rá Diose ca'neé Diose cacun' xráá nij so', ne che'é dan taj nij so' se vaa ca'vee qui'yaj nij so' me ma'an se nij ga nij chana niha' rá a. Dan me se orún' Jesucristó me síi 'nij ra'a man ní', tzaj ne taj che'é cunó nij so' rihaan Jesucristó, rá nij so' a.

<sup>5</sup> Nda' se aj ne'en soj nu' nana no rihaan danj Diose, tzaj ne na'vej raj quini'yon soj nana yo', ne che'é dan noná uún 'unj nana nihánj xréé soj, ne dan me se síi 'nij ra'a man ní' ro', tinanii so' man taran' nij síi israelitá rihaan nij síi man Egiptó gaa naá, tzaj ne ta'aj nij so' ro', ne cuchuman rá ni'yaj man Diose, ne che'é dan cachén doj yo', gaa ne cavi' nij so', qui'yaj Diose a.

<sup>6</sup> Ne aj ne'en soj se vaa ta'aj nij se-mozó Diose ro', ne ca'vej rá nij so' cataj nij so' suun ca'ne' Diose rihaan nij so', ne curihanj nij so' rej guun rá Diose cumán nij so', ne che'é dan numíj nii man nij so', ne yo'ó veé danj gaa numíj nij so' cayáán nij so' rej rmi' ndaa se quisij güii guee güii ca'ne' Diose cacun' che'é nij so', ne daj chihaa míj se ca'vee quinanií nij so' ma'.

<sup>7</sup> Dan me se quiran' nij so' ndaa vaa quiran' nij síi man roj chuman' cu'naj Sodoma ga Gomorra ga yo'ó nij chuman' naj nichrun' a. Dan me se ase vaa se chi'íj qui'yaj ta'aj se-mozó Diose yo' ro', danj vaa se chi'íj qui'yaj nij síi man nij chuman' yo', ne ndaa guun rá nij so' cotoj nij so' ga chii chana do', ga xcuu do', ne che'é dan yuun che'e tucuayuu Diose ya'an chiháán nij so', ne che'é dan me ca'vee xcax ní' cuentá se vaa sese qui'yaj ní' se chi'íj, ne cacaa ní' rihaan ya'an nu' cavii nu' ca'anj, qui'yaj Diose adonj.

<sup>8</sup> Nda' se ne'en nij síi narqué tucuáán ne rihaan soj daj vaa sayuun quiran' nij síi israelitá do', nij se-mozó Diose do', nij síi man Sodoma do', tzaj ne taj se qui'yá' xcax nij so' cuentá ma'. 'O danj 'yaj nij so' se nij, ne ase vaa síi a'nu' vaa nij so', che'é se amán rma'an rá nij so' nana ne nanj ei. Ne che'é dan 'yaj ndo'o nij so' se chi'íj, ne tucuáá nij so' rihaan Diose, ne a'mii nij so' nana chi'íj che'é nij se-mozó Diose a.

<sup>9</sup> Tzaj ne ndaa sí cu'naj Migueé sí 'nij ra'a man nu' nij se-mozó Diose ro', gaa naá gaa cavi' Moisés ne canó tuvi' Migueé ga sí chree che'é cúu man Moisés, ne ne quisij rá Migueé ca'mii so' nana nij rihaan sí chree ma'. Maan se cataj Migueé rihaan sí chree se vaa sí 'nij ra'a man ní' me sí caxrii yuvaa man sí chree, cataj Migueé a.

<sup>10</sup> Tzaj ne ino 'yaj nij sí narqué tucuaán ne ga sí cu'naj Migueé yo', ne nda' se ne ne'en nij so' daj vaa nij se-mozó Diose, tzaj ne ne chu'vi' nij so' ca'mii nij so' nana nij che'é nij se-mozó Diose ma'. Ne ase vaa xcuu ne acaj cuentá 'yaj naá guun se vaa me rá qui'yaj ro', danj vaa nij sí narqué tucuaán ne, ne che'é dan quirí' nij so' vaa güii adonj.

<sup>11</sup> Niquee nij so' che'é sayuun quiran' nij so' nanj adonj. 'O se ase vaa qui'yaj sí cu'naj Caín gaa ticavi' so' man tinúu so' gaa naá ro', danj vaa 'yaj nij so', ne xcoj ruvaa rá nij so' ga tuvi' nij so' a. Ne ase vaa qui'yaj sí cu'naj Balaam gaa naá ro', danj vaa 'yaj nij so', ne me ndo'o rá nij so' qui'yaj canaán nij so' sa'anj, ne che'é dan tiha' yu'unj nij so' man tuvi' nij so' a. Ne ase vaa qui'yaj sí cu'naj Coré ro', danj vaa 'yaj nij so', ne dan me se tucuaá Coré rihaan Moisés, ne che'é dan chumánj yo'óo man nij tuvi' nij so', qui'yaj Diose a. Ne danj quiran' guee nij sí narqué tucuaán ne, quiran' uxrá nij so' sayuun vaa güii, qui'yaj Diose ei.

<sup>12</sup> Gaa nuu chre' soj chá soj chraa, ne ne chu'vi' nij sí narqué tucuaán ne yo' qui'yaj nij so' se nij, ne che'é dan ase vaa luj chí'ii ro', danj vaa nij so' rihaan soj ei. Sí taj ya'anj man ma'an me nij sí narqué tucuaán ne yo', ne ne racuíj nij so' man tuvi' nij so' ma'. Ase vaa ngaa no rma'an xta' ne ne aman' 'yaj ro', vaa nij so', ne vaj nij so' rej rque do', rej xraj do' adonj. Ne ase vaa chruun nuvi' vaj chruj man raá gaa sí dió cumán chruj raá ro', vaa nij so', ne chruun nacoo me nij so', ne chruun quiriháj nii quirí'ij nii rihaan yo'óo me uún nij so' adonj. Ase vaa ngaa ga chruun ro', danj vaa nij sí narqué tucuaán ne yo' ei. Asino yaan guun rá yuvi se vaa sí sa' me nij so', tzaj ne nuvi' suun sa' síj, 'yaj nij so' ma'.

<sup>13</sup> Ase vaa rii ndo'o na ya'anj yatan' chí'ii rej tu'va na ya'anj ro', danj vaa rii ndo'o nij so' se chí'ii 'yaj nij so' quene'en yuvi, ne ase vaa yati' natuná rej chéé 'o 'o yavii ro', danj vaa uún nij so', ne taj che'é gaa nucuaj rá ní' man nij so' ma'. Vaa güii, ne ca'nej Diose man nij so' cayáán nij so' rej rmi' ndo'o nu' cavii nu' ca'anj nanj ei.

<sup>14</sup> Sí cu'naj Enoc me se aj síj vatán' xii so' cachén, ne dan me se ta'nii ta'nij si'no sí cu'naj Adán me so', ne dan me se nata' so' che'é nij sí narqué tucuaán ne rihaan soj cuano, ne dan me se cataj sí cu'naj Enoc a: "Cuno soj ca'mij á. Vaa güii, ne ca'na' sí 'nij ra'a man ní' ga que'ee mij nij se-mozó so' nij sí guee,

<sup>15</sup> ne ca'ne' so' cacun' che'é cunudanj yuvi, ne cataj so' se vaa tumé nij sí ne noco' man Diose cacun' che'é nu' cacun' qui'yaj nij so' do', che'é nu' nana nij ca'mii nij so' che'é Diose do' a." Danj ca'mii Enoc che'é nij sí narqué tucuaán ne rihaan soj nihánj cuano a.

<sup>16</sup> Nij so' me se taj se qui'yá' carán' rá nij so' ni'yaj nij so' se vaa 'yaj Diose do', se vaa 'yaj tuvi' nij so' do' ma'. Inanj 'yaj nij so' se nij ndaa vaa me rá ma'an nij so', ne inanj danj 'yaj nij so' nanj chuguanj. Sí xta' inanj a'mii me nij so', ne ve'é ndo'o a'mii nij so' ga ru'vee che'é se inanj me rá nij so' quirí' nij so' sa'anj man nij ru'vee adonj.

*Nana nihánj taj xna'anj che'é tucuaán narqué Judas rihaan nij sí cuchumán ya rá ni'yaj man Jesucristó a*

<sup>17</sup> Tzaj ne soj ro', yo'o cunuû rá soj nana cataj xna'anj nij apóstol cune' Jesucristó sji 'nij ra'a man ní' man nata' rihaan yuvi che'é so', tinuj, nocoj.

<sup>18</sup> Nihánj me nana ca'mii nij so' rihaan soj a: "Asa' nichrun' ca'anj ni'ya chumij, ne ca'na' sí ca'nga' nacoq ni'yaj man nij sí amán rá ni'yaj man Jesucristó, ne inanj qui'yaj nij so' se nij, ne guun rá nij so' cachee nij so' ndaa vaa me rá ma'an nij so', ne se canoco' nij so' man Diose a man adonj". Danj vaa nana cataj nij apóstol che'é nij sí narqué tucuáán ne a.

<sup>19</sup> Nij sí narqué tucuáán ne yo' ro', 'yaj uun yanij nij sí noco' man Jesucristó rihaan tuvi' nij so' ei. Inanj che'é nee man nij so' acaj nij so' cuentá, ne che'é yo'ó rasuun ne acaj nij so' cuentá a ma'. Ne ase vaa xcuu vaa nij so', ne nuvi' nimán nij so' nuu a ma'.

<sup>20</sup> Tzaj ne soj me se yo'o raan canoco' soj se-tucuanj Diose tucuáán guee, tinuj, nocoj. Ne ca'vej rá soj raquíj Nimán Diose man soj cachinj ni'yaj soj rihaan Diose ei.

<sup>21</sup> Yo'o qui'yaj soj ndaa vaa me rá Diose, gaa ne yo'o gaa 'ee rá Diose man soj chuguanj. Na'vij soj güii cayáán ní' rihaan Diose nu' cavii nu' ca'anj qui'yaj Jesucristó sji 'nij ra'a man ní', che'é se 'ee rá so' man ní' ei.

<sup>22</sup> Xa' nij sí uun vij rá, tzaj ne naquiyaj nica soj nimán nij so' canoco' nij so' Diose ei.

<sup>23</sup> Nago' soj chrej nucuaj man yo'ó ta'aj nij sí tumé cacun' che'é rej quinanj nij so' rihaan ya'an a. Ne gaa 'ee rá soj man nij sí aj cuno se-nana nij sí narqué tucuáán ne ei. Tzaj ne chuchuvj' soj se gaa nanj qui'yaj soj ndaa vaa 'yaj nij so', ne quinachri' soj ni'yaj soj se chi'ii 'yaj nij so' ei.

*Nana nihánj taj xna'anj se vaa sa' uxrá vaa Diose daj a güii a*

<sup>24-25</sup> Sa' uxrá vaa orún' Diose sí tinanii man ní' rihaan sayuun, ne guun nucuaj so' caráán so' rihaan ní' se qui'yaj ní' cacun' man chuguanj. Guun nucuaj so' tumé so' man ní' ndaa se quisij güii cayáán ní' rihaan so' rej guun chij so', ne gaa nica nimán ní' güii yo', qui'yaj so', ne guun niha' uxrá rá ní', qui'yaj so' adonj. Ne Jesucristó sji 'nij ra'a man ní' me sí raquíj man ní', ne che'é dan cataj ní' se vaa sa' uxrá vaa Diose nu' cavii nu' ca'na', ne sa' uxrá 'yaj so' yaj, ne sa' uxrá qui'yaj so' nu' cavii nu' ca'anj, ne yo'o guun chij so' chuguanj. Veé danj gaa ya ei.

## Yanj nihánj taj xna'anj che'é nij rasuun tihaan naca Jesucristó rihaan síí cu'naj Juan a

<sup>1</sup> Nihánj me nij rasuun tihaan naca Jesucristó rihaan nij síí 'yaj suun rihaan so', ndaa vaa cataj xna'anj ma'an Diose rihaan so', ne rasuun guun ra'yanj ya vaa güii me nij rasuun yo' ei. Ne Jesucristó ro', so' me síí ca'née se-mozó rihaan síí cu'naj Juan síí nuu 'yaj suun rihaan so', ne dan me se xcaj síí cu'naj Juan cuentá che'é nu' nij rasuun nihánj, qui'yaj Jesucristó ei.

<sup>2</sup> Ne síí cu'naj Juan me síí ataj xna'anj nihánj rihaan nu' nij yuvij che'é nu' se-nana Diose ndaa vaa cataj xna'anj Jesucristó rihaan so', ne rasuun quene'en ma'an so' me nu' nij rasuun nihánj adonj.

<sup>3</sup> Ne cavij sa' uxrá nij síí nayaa nana nihánj rihaan tuvi', ne tananj uún ne cavij sa' nij síí a'née sa' nana nihánj, sese ya 'yaj nij so' ndaa vaa taj nana no rihaan yanj nihánj chuguanj. 'O se daj doj quisij ya güii ca'na' nij rasuun yo' ei.

<sup>4-5</sup> Dan me se 'unj sij cu'naj Juan me síí 'yaj yanj nihánj, ca'nej 'unj rihaan cunu' chij ya x'ne' nij soj sij man estado Asia sij amán rá ni'yaj man Jesucristó a. Dan me se me rá 'unj qui'yaj ndo'o Diose qui'yaj ndo'o Nimán Diose qui'yaj ndo'o Jesucristó qui'yaj ndo'o se luj che'é nij soj, ne me rá 'unj gaa xej nimán soj, qui'yaj nij so' adonj. Ne Diose ro', me síí nicun' yaj, ne asij naá nicun' so', ne vaa güii ca'na' so' adonj. Ne Nimán Diose ro', vaa guee inanj, ne chij ya se nucuaj nicaj so', ne nicun' so' rihaan xrúun Diose chruun xlá rej rii ta'nga' Diose ei. Ne dan me se Jesucristó me síí nata' nana ya rihaan ní', ne so' me síí cunuu i'na' uún asino yaan rihaan cunudanj nij síí cavi' síí cunuu i'na' uún vaa güii, ne uun chij so' rihaan cunudanj nij síí nicaj suun rey man rihaan chumij nihánj adonj.

Ne Jesucristó me síí 'ee rá man ní', ne aj tinanii so' man ní' rihaan cacun' tumé ní' gaa cavi' so' a.

<sup>6</sup> Ne cune' so' man ní' guun ní' síí nicaj suun rey ne guun ní' xrej nuu rihaan Rej so' Diose a. Ne ve'é guun chij so' nu' cavii nu' ca'anj adonj. Veé danj gaa ya ei.

<sup>7</sup> Dan me se ca'na' so' xráa ngaa, ne quene'en cunudanj nij yuvij man so', ne ndaa nij síí qui'yaj sayuun man so' quene'en man so', ne go' cunudanj nij yuvij man rihaan chumij cuxru' nimán nij so', che'é rej quinano ndo'o rá nij so' che'é cacun' tumé nij so' adonj. Veé danj gaa ya ei.

<sup>8</sup> Ne Diose síí 'nij ra'a man ní' taj:

—'Unj me se ase vaa letrá A ga letrá Z vaa 'unj a. Dan me se veé 'unj nicun' asij rque, ne veé 'unj canicun' nu' cavii nu' ca'anj adonj. Dan me se veé 'unj nicun' yaj, ne veé 'unj nicun' asij naá, ne vaa güii cuchí' yá 'unj rihaan soj a. Ne 'unj me síí guun nucuaj qui'yaj cunudanj a —taj Diose síí 'nij ra'a man ní' a.

*Nana nihánj taj xna'anj daj vaa Jesucristó gaa curuvi' so' rihaan síí cu'naj Juan a*

<sup>9</sup> 'Unj sij cu'naj Juan ro', tinúu soj mé 'unj, ne síí ran' sayuun ga soj mé 'unj, ne síí nucuaj nimán rihaan sayuun mej ga soj, ne danj ran' ní' che'é se sij me rá guun chij Diose rihaan chumij nihánj me nu' ní' a. Dan me se yáan 'unj yo'óo naj tanuu na ya'anj yo'óo cu'naj Patmos, ne yo' me rej ca'née nii manj



che'é se sij nata' se-nana Diose mej ne sij taj xna'anj nana che'é Jesucristó mej a.

<sup>10</sup> Ne 'o güii na'víj ní' rihaan síi 'nij ra'a man ní' me se quene'en nimanj rasuun, ne dan me se rej xcoj ro', nucuaj ndo'o ca'mii yo'q so' cunoj, ne daj se uun rá' gaa a'yánj nii chruun a'yánj ro', danj guun raj gaa cunoj se-nana so' adonj.

<sup>11</sup> Ne cataj so':

—'Unj ro', me ya síi canicun' asij rque, ne veé 'unj canicun' nu' cavii nu' ca'anj adonj —taj so' a. Dan me se cataj so'— Cachron so' nana che'é nu' nij rasuun quene'én so' rihaan yanj, ne ca'nej so' rihaan nij síi amán rá ni'yaj manj yanj chij chuman' á. Dan me se rihaan nij síi man Efeso do', rihaan nij síi man Esmirna do', rihaan nij síi man Pérgamo do', rihaan nij síi man Tiatira do', rihaan nij síi man Sardis do', rihaan nij síi man Filadelfia do', rihaan nij síi man Laodicea do', ca'nej so' yanj yo' á —taj so' cunoj a.

<sup>12</sup> Gaa ne canicaj 'unj ni'yaj 'unj man síi ca'mii nana dan rihanj, ne quene'enj chij aga' oró míi aga' taj aga' ya'an a.

<sup>13</sup> Ne tanuuj nij aga' taj aga' ya'an ro', quene'enj 'o síi nicaj yu'unj man yuvij, ne nuu so' yatzij xcaan, ne 'nij catuun so' merque caxra' anó ndaa rucuaa so' a. Ne merque aga' oró míi me yo' a.

<sup>14</sup> Ne raá so' do', yuvé raá so' do', me se catzij ndo'o vaa yo' a. Dan me se ase vaa cachij xraá matzinj catzij do', ase vaa yu've' do', danj vaa raá so' a. Ne rlij rihaan so' ro', ase vaa ya'an vaa yo', chuguun yo' a.

<sup>15</sup> Ne tacóo so' ro', ase vaa aga' bronce maree axrij ya'an nii man rque chrúun hornó vaa tacóo so' a. Ne daj se uun rá' unó' cayuj vaj chraá xij ro', danj guun raj cunoj nana ca'mii so' a.

<sup>16</sup> Ne ra'a so' rej nuva' so' ro', coró so' chij yati', ne neê espadá sihaa nu' niha rihaan curihanj tu'va so', ne ase vaa nucuaj ndo'o chuguun güii ro', danj vaa chuguun nu' so' ni'yaj 'unj man so' a.

<sup>17</sup> Dan me se gaa quene'én 'unj man so', ne naxrú' 'unj ca'anj quináá 'unj rihaan yo'óo tacóo so', ne ase vaa síi cavi' ro', danj vaa 'unj a. Dan me se cuta' so' ra'a so' rej nuva' so' xraj, ne cataj so':

—Se cuchu'vi' so' ma'. 'Unj ro', me síi táa yaan rihaan cunudanj, ne veé 'unj me síi noco' xco rihaan cunudanj adonj.

<sup>18</sup> Ne síi vaa i'na' mej a. Dan me se cavi' 'unj, tzaj ne cuano nihánj me se vaa i'na' uún 'unj, ne dan me se yo'q gaa i'na' 'unj nu' cavii nu' ca'anj adonj. Ne 'unj ro', me síi no xcúun cataj me síi cavi' ne me síi ca'anj rej man nij síi cavi' adonj.

<sup>19</sup> "Che'é dan me cachron so' nana rihaan yanj che'é nu' se vaa quene'én so' nihánj, ne dan me se cachron so' che'é rasuun man cuano, ne cachron so' che'é rasuun ca'na' rej rihaan ní' a.

<sup>20</sup> Ne nihánj me se cataj xna'anj 'unj che'é chij nij yati' taj ra'aj ne'én so' do', che'é chij nij aga' oró míi aga' taj aga' ya'an do' a. Dan me se chij nij yati' do', nij aga' taj aga' ya'an do', ma'an nij yuvij amán rá ni'yaj manj yanj chij nij aman' me nij rasuun yo' a —taj so' rihanj a.

## 2

*Nana nihánj me nana ca'anj rihaan nij síi amán rá ni'yaj man Jesucristó ne chuman' Efeso a*

<sup>1</sup> Gaa ne cataj so' rihanj a:

—Nana nihánj me nana cachron so' ca'nej so' rihaan nij sí amán rá ni'yaj manj ne chuman' Efeso á: “Dan me se nihánj me nana ca'mii 'unj sij nicaj chij yati' ra'a rej nuva' ei. Ne sij vaj sca'núj chij nij aga' oró míf taj aga' ya'an mej ei. Dan me se cunq soj sij ne chuman' Efeso a.

<sup>2</sup> Aj ne'én 'unj daj 'yaj soj se vaa 'yaj suun uxrá soj ne nucuaj ndo'o vaa nimán soj rihaan sayuun adonj. Ne aj ne'enj se vaa na'vej uxrá rá soj ni'yaj soj man nij sí chi'ii mei. Ne xa' nij sí tiha' yu'unj tu'va rma'an se vaa sij cune' Jesucristó nata' rihaan yuvij che'é so' me nij so', tzaj ne aj nuchruj raá soj che'é nij so', ne aj xcaj soj cuentá se vaa nuveé sij a'mii ya me nij so' a man adonj.

<sup>3</sup> Ne nucuaj ndo'o vaa nimán soj rihaan sayuun quiran' soj che'é rej sij nocq' manj me soj, ne ne ca'ne' a doj rá soj a ma'.

<sup>4</sup> Tzaj ne vaa 'o cacun' tumé soj rihanj se vaa asij rque doj me se caráj cochroj ndo'o soj rihanj, tzaj ne yaj me se do' do' ca'ne' rá soj aráj cochroj soj rihanj ei.

<sup>5</sup> “Che'é dan nanuj rá soj daj qui'yaj soj gaa ataa ca'anj yanj soj rihanj, ne canicaj nimán soj, ne guun rá soj ndaa vaa guun rá soj asino yaan á. Sese se canicaj nimán soj, ne cuchí' 'unj rihaan soj, ne ca'nee 'unj se-aga' soj aga' taj aga' ya'an rej nicun' yo' nanj adonj.

<sup>6</sup> Tzaj ne nihánj me se sa' qui'yaj soj, se vaa na'vej uxrá rá soj ni'yaj soj se vaa 'yaj nij sí nicolaíta, ne veé danj vaa guqe, ne na'vej rá ma'anj ni'yaj 'unj se vaa 'yaj nij so' uún ma'.

<sup>7</sup> Dan me se sese taj yu'uj xréé soj, ne no xcúún soj cunq soj nana nihánj nana taj xna'anj Nimán Diose rihaan nij sí amán rá ni'yaj manj ne 'o 'o chuman' a. Dan me se rihaan sí 'yaj canaán rihaan nu' sayuun me se rque 'unj chruj man raá chruun qui'yaj gaa i'na' yuvij nu' cavii nu' ca'anj ga Diose cha so', ne chruun yo' ro', nicun' rej sa' ndo'o rej rihaan ma'an Diose ei.” Veé danj sij nana cachron so' ca'nej so' rihaan nij sí amán rá ni'yaj manj ne chuman' Efeso a —taj so' rihanj a.

*Nana nihánj me nana ca'anj rihaan nij sí amán rá ni'yaj man Jesucristó ne chuman' Esmirna a*

<sup>8</sup> Gaa ne cataj uún so' rihanj a:

—Nana nihánj me nana cachron so' ca'nej so' rihaan nij sí amán rá ni'yaj manj ne chuman' Esmirna a: “Dan me se nihánj me nana ca'mii 'unj sij nicun' asij rque do', sij canicun' nu' cavii nu' ca'anj do', ne sij cavi' mej, tzaj ne cunuu i'na' ya uún 'unj ei.

<sup>9</sup> Ne'én 'unj daj vaa sayuun ran' nij soj sij man chuman' Esmirna, ne ne'én 'unj se vaa niqe ndo'o soj adonj. Tzaj ne rihaan Diose me se sí ru'vee me ya soj ei. Ne vaa nij sí tu'va rma'an taj se vaa yuvij israelitá me nij so', tzaj ne nuveé sij israelitá me ya nij so' ma'. Maan sij tucu'yón se-nana Satanás me nij so' nanj á. Ne ne'én 'unj se vaa a'mii nij so' nana nij che'é soj ei.

<sup>10</sup> “Tzaj ne a doj se kuchu'vi' soj che'é sayuun quiran' soj ma'. Dan me se sí chree ro', me se caxrij so' taga' man ta'aj soj, che'é rej kuchu'vi' soj ne tanáj soj tucuaán sa' ei. Ne chí' güii quiran' soj sayuun danj chuguanj. Dan me se ndá' se ticavi' nii man soj, tzaj ne yo'o canocq' soj manj, ne vaa güii rque 'unj 'o cachriin cunuú raá soj, che'é rej sij gaa i'na' nu' cavii nu' ca'anj ga Diose gún soj ei.

<sup>11</sup> Dan me se sese taj yu'uj xréé soj, ne no xcúún soj cunq soj nana nihánj nana taj xna'anj Nimán Diose rihaan nij sí amán rá ni'yaj manj ne 'o 'o

chuman' a. Dan me se se quiran' sí qui'yaj canaán yo' sayuun asa' cavi' uún nij sí tumé cacun' a ma'." Veé danj síj nana cachron so' ca'nej so' rihaan nij sí amán rá ni'yaj manj ne chuman' Esmirna a —taj uún so' rihanj a.

*Nana nihánj me nana ca'anj rihaan nij sí amán rá ni'yaj man Jesucristó ne chuman' Pérgamo a*

<sup>12</sup> Gaa ne cataj uún so' rihanj a:

—Nana nihánj me nana cachron so' ca'nej so' rihaan nij sí amán rá ni'yaj manj ne chuman' Pérgamo a: “Dan me se nihánj me nana ca'mii 'unj síj nicaj neé espadá síhaa nu' niha rihaan rihaan soj síj ne chuman' Pérgamo a.

<sup>13</sup> Ne'én 'unj rej ne nij soj, se vaa uun chij ndo'o Satanás rej yo' ei. Tzaj ne yo'o noco' soj manj, ne ne tanáj xco soj se-tucuanj 'unj ma'. Dan me se vaa sí cu'naj Antipas sí yo'o nata' rihaan yuvij che'é 'unj, ne nda' se ticavi' nii man so' rej ne soj rej ne ma'an Satanás, tzaj ne ne ca'ne' rá soj ga se-nanaj ma'.

<sup>14</sup> Tzaj ne vaa doj cacun' tumé soj rihanj, se vaa maan sca'núj soj 'nij sí noco' se-nana sí cu'naj Balaam sí tucu'yón rihaan sí cu'naj Balac se vaa ca'nej so' tucuaán chi'ii nimán nij sí israelitá se vaa cha nij sí israelitá rasuun rque nii rihaan nij ya'anj cacój nij tuví' Balac ne qui'yaj nij so' cacun' ga chana, ne dan me se quiri' nij sí israelitá rihaan Diose, qui'yaj cacun' yo' ei.

<sup>15</sup> Ne tananj uún, ne man ta'aj nij sí nicaj se-tucuanj nij sí nicolaíta sca'núj soj uún ei. Dan me se nachri' 'unj ni'yaj 'unj tucuaán yo' ei.

<sup>16</sup> “Che'é dan canicaj nimán soj, tanáj soj chrej chi'ii yo' ei. Se taj, ne ra'yanj cuchí' 'unj rihaan soj, ne nicaj 'unj neé espadá nuu tu'vaj cunu' 'unj ga nij soj adonj.

<sup>17</sup> Sese taj yu'uj xréé soj, ne no xcúún soj cunō soj nana nihánj nana taj xna'anj Nimán Diose rihaan nij sí amán rá ni'yaj manj ne 'o 'o chuman' a. Rihaan sí 'yaj canaán ro', rque 'unj se cu'naj maná se 'nij yuve cha so', ne caxrii 'unj 'o yahij catzii ston so', ne quino naca 'o se-chuvij yo'o so' nicaj sí qui'yaj canaán, ne dan me se taj a 'o sí ca'vee nayaa nana yo' a ma'. Maan se orún' sí nicaj yahij catzii yo' me sí quene'en me taj yo' nanj adonj.” Veé danj síj nana cachron so' ca'nej so' rihaan nij sí amán rá ni'yaj manj ne chuman' Pérgamo a —taj so' rihanj a.

*Nana nihánj me nana ca'anj rihaan nij sí amán rá ni'yaj man Jesucristó ne chuman' Tiatira a*

<sup>18</sup> Gaa ne cataj uún so' rihanj a:

—Gaa ne cachron so' nana nihánj ne ca'nej so' rihaan nij sí amán rá ni'yaj manj ne chuman' Tiatira a: “Dan me se nana nihánj me nana ca'mii 'unj ta'nij Diose cunō soj, ne 'unj ro', ase vaa ya'an vaa rlij rihanj, ne ase vaa aga' bronce marce vaa tacōj a.

<sup>19</sup> Ne'én 'unj daj 'yaj nij soj se vaa 'ee rá soj tinúú soj ne yo'o amán rá soj ni'yaj soj manj ne 'yaj suun soj che'é tinúú soj ne yo'o nucuaj vaa nimán soj rihaan sayuun a. Dan me se doj a 'yaj suun soj yaj adonj. Gaa guun che'e soj canoco' soj manj me se doj doj 'yaj suun soj nda' rá se 'yaj soj yaj ei.

<sup>20</sup> Tzaj ne vaa cacun' tumé soj rihanj se vaa a'vej rá soj cayáan chana cu'naj Jezabel ga soj a. Ne no' me ní taj se vaa chana nata' se-nana Diose me no', ne tucu'yón no' man yuvij, ne tiha' yu'unj no' man nij sí 'yaj suun rihaan ma'anj ei. Ndaa síj, gaa ne 'yaj nij so' cacun' ga chana ne chá nij so' rasuun rque nii rihaan ya'anj cacój nii uún adonj.

21 Ne ca'ne! raj cachēn doj güii che'é rej guun raj se vaa canicaj nimán no' ne tanáj no' chrej chí'ii ne canoco' no' chrej sa' adonj. Tzaj ne na'vej rá no' canicaj rá no' ne tanáj no' se chí'ii 'yaj no' ma'.

22 Che'é dan nihánj me se quiri'ij 'unj man no' rihaan chruun camá, ne nij qui'yaj cacun' ga no' ro', quirān' uxrá nij so' sayuun, qui'yáj adonj. Danj quirān' nij so' sese se canicaj nimán nij so' ne se tanáj xcō nij so' se vaa 'yaj nij so' ga no' ei.

23 Ne yo'ō cavi' ta'níi chana yo', qui'yáj, gaa ne quene'en cunudanj nij síi amán rá ni'yaj manj ne 'ō 'ō chuman' se vaa 'unj me síi acaj ndo'ō cuentá daj vaa raā yuvií do', daj vaa nimán yuvií do', ne naru'vee 'unj rihaan 'ō 'ō nij soj che'é se vaa 'yaj 'ō 'ō nij soj chuguanj.

24 "Ne nihánj me se ca'mii 'unj rihaan yo'ó nij soj sij man chuman' Tiatira sij ne noco' tucuáán chí'ii yo' a. 'O se tucuáán sca' yuve ndo'ō me tucuáán noco' yo'ó nij so', rá ma'an nij so', tzaj ne se-tucuanj Satanás me yo' rihaan soj, ne ne nari' soj tucuáán yo' a ma'. Dan me se taj che'é cutá' 'unj doj suun xráa soj a ma'.

25 Maan se yo'ō noco' soj tucuáán nicaj soj ndaa se quisij güii cuchí' 'unj rihaan soj ei.

26 Ne síi 'yaj canaán yo'ō 'yaj suun suun ca'ne' 'unj rihaan ndaa se cuchí' 'unj rihaan soj ro', guun chíj so' rihaan nij chuman' na'vej rá canoco' manj, qui'yáj adonj.

27 Ne nicaj so' vará aga' hierró, ne tumé so' man nij so', ne dan me se ndaa rá se vaa 'yaj nii gaa uxra' nii xruj ro', danj gaa qui'yaj síi guun chíj yo' chuguanj.

28 Dan me se ase vaa guun chíj ma'anj qui'yaj Réj Diose ro', danj gaa guun chíj so', ne rque 'unj yati' xta'ngaa urihanj rej nichrun' rá ranga' rihaan so' adonj.

29 Sese taj yu'uj xréé soj, ne nō xcúun soj cunō soj nana nihánj nana taj xna'anj Nimán Diose rihaan nij síi amán rá ni'yaj manj ne 'ō 'ō chuman' a." Veé danj síj nana cachron so' ca'nej so' rihaan nij síi amán rá ni'yaj manj ne chuman' Tiatira a —taj so' rihanj a.

### 3

*Nana nihánj me nana ca'anj rihaan nij síi amán rá ni'yaj man Jesucristó ne chuman' Sardis a*

1 Gaa ne cataj uún so' rihanj a:

—Nana nihánj me nana cachron so' ca'nej so' rihaan nij síi amán rá ni'yaj manj ne chuman' Sardis a: “Dan me se nihánj me nana ca'mii 'unj sij nicaj Nimán Diose do', chíj nij yati' do', rihaan soj sij man chuman' Sardis, ne Nimán Diose ro', vaa guēē so', ne chíj ya se nucuaj nicaj so' a. Ne'en 'unj daj 'yaj nij soj, ne dan me se síi vaa i'na' ya nimán me soj, rá yuvií, tzaj ne ase vaa síi cavi' nimán vaa soj rihanj nanj adonj.

2 Dan me se narií soj nej rihaan soj ruguanj. Tumé soj man ma'an soj, ne ca'nej soj se nucuaj nimán tinúú soj nij síi daj doj cavi' nimán á. 'O se xcaj 'unj cuentá se vaa nu' se 'yaj soj, nuveé se aran' rá Diose me nij yo' ma'. Tadó soj ei.

3 "Che'é dan nanuj rá soj nana tucu'yón nii man soj do', nana cunō soj do', ne yo'ō qui'yaj soj ndaa vaa taj nana yo', ne canicaj nimán soj canoco' soj chrej sa' ei. Sese se tumé soj man soj, ne ase vaa 'na' síi ituu ro', danj gaa

cuchij rihaan nij soj, ne se quene'en uxrá soj me orá me cuchij rihaan soj man adonj.

<sup>4</sup> Tzaj ne man ta'aj tuvi' soj sij man chuman' Sardis ne qui'yaj cacun' mei. Ne che'é dan ase vaa síi nuu yatzíj naruvii ro', danj vaa nij so' cuano rihanj chuguanj. Ne nij so' ro', vaa güii cunuú nij so' yatzíj catzii, ne cachee nij so' gaj adonj. 'O se no xcúun nij so' qui'yaj nij so' danj adonj.

<sup>5</sup> Dan me se cunudanj nij síi 'yaj canaán ro', vaa güii rque nii yatzíj catzii cunuú so', ne daj chihaa mój se tiri' 'unj se-chuvii so' no rihaan yanj no se-chuvii nij síi gaa i'na' ga Diose nu' cavii nu' ca'anj ma'. Ne nata' 'unj rihaan Réj Diose, rihaan nij se-mozó so' do', se vaa me nij so' síi noco' manj adonj.

<sup>6</sup> Sese taj yu'uj xréé soj, ne no xcúun soj cunó soj nana nihánj nana taj xna'anj Nimán Diose rihaan nij síi amán rá ni'yaj manj ne 'o 'o chuman' a." Veé danj síj nana cachron so' ca'nej so' rihaan nij síi amán rá ni'yaj manj ne chuman' Sardis a —taj so' rihanj a.

*Nana nihánj me nana ca'anj rihaan nij síi amán rá ni'yaj man Jesucristó ne chuman' Filadelfia a*

<sup>7</sup> Gaa ne cataj uún so' rihanj a:

—Nana nihánj me nana cachron so' ca'nej so' rihaan nij síi amán rá ni'yaj manj ne chuman' Filadelfia a: “Dan me se nihánj me nana ca'mii 'unj sij vaa sa' inanj sij ca'née ya Diose rihaan chumii cunó soj a. Ne 'unj ro', me síi uun chij ndo'o ndaa vaa guun chij síi cu'naj David gaa naá adonj. Dan me se sese ca'núj 'unj ta'yaa, ne taj síi quisij naráan ta'yaa yo' ma'. Ne sese caráan 'unj ta'yaa, ne taj síi quisij ca'nuu uún ta'yaa yo' ma'.

<sup>8</sup> Dan me se aj ne'én 'unj daj 'yaj nij soj a. Ne nihánj me se xcaj soj cuentá se vaa aj ca'núj 'unj ta'yaa rej rihaan soj, ne taj síi quisij naráan ta'yaa yo' ma'. Ne nij soj me se nda' se nuveé sij nucuaj ndo'o nimán me soj, tzaj ne yo'o 'yaj soj se-nanaj, ne ne cataj soj se vaa nuveé sij noco' manj me soj ma'. Yo'o taj soj se vaa sij noco' manj me soj adonj.

<sup>9</sup> Ne vaa nij síi tu'va rma'an se vaa sij israelitá me nij so', tzaj ne nuveé sij israelitá ya me nij so' ma'. Maan se síi ne me nij so', ne síi tucu'yón se-nana Satanás me uún nij so' ei. Dan me se nagoj man nij so' rihaan soj, ne cuchí' nij so' rihaan soj, ne canicun' ruj nij so' rihaan soj, ne quene'en nij so' se vaa sij cunuu 'ee raj man me soj adonj.

<sup>10</sup> Che'é se aj qui'yaj soj nu' se-nanaj nana taj se vaa no xcúun soj gaa nucuaj nimán soj rihaan sayuun ro', che'é dan tinanii 'unj man soj rihaan sayuun ca'na' rihaan nu' chumii nihánj vaa güii, asa' xcaj 'unj cuentá daj vaa nimán cunudanj nij yuvii man rihaan chumii adonj.

<sup>11</sup> “Dan me se daj doj cuchij rihaan soj chuguanj. Nicaj raan soj tucuáan nicaj soj, gaa ne se ca'vee ca'neé nii cachriin cunuú raá soj cachriin qui'yaj canaán soj rihaan soj ei.

<sup>12</sup> Ne síi qui'yaj canaán ro', me se ase vaa 'o chraan xcaan nicun' tacóo nuvíi noco' rej na'víj yuvii rihaan Diose ro', danj gaa so' rihanj, qui'yaj, ne se curihanj uún so' rej né 'unj ma'. Ne rihaan so' ro', cachron 'unj va'núj nana, ne dan me se cachron 'unj se-chuvii Diose síi noco' 'unj, ne cachron 'unj se-chuvii chuman' ne Diose noco' 'unj chuman' cu'naj chuman' Jerusalén chuman' naca nanj rihaan chumii nihánj, ne cachron 'unj se-chuvii ma'anj nana naca ya cachron 'unj rihaan so' adonj.

<sup>13</sup> Sese taj yu'uj xréé soj, ne no xcúun soj cunó soj nana nihánj nana taj xna'anj Nimán Diose rihaan nij síi amán rá ni'yaj manj ne 'o 'o chuman' a.”

Veé danj sĭj nana cachron so' ca'nej so' rihaan nij sĭí amán rá ni'yaj manj ne chuman' Filadelfia a —taj so' rihanj a.

*Nana nihánj me nana ca'anj rihaan nij sĭí amán rá ni'yaj man Jesucristó ne chuman' Laodicea a*

<sup>14</sup> Gaa ne cataj uún so' rihanj:

—Nana nihánj me nana cachron so' ca'nej so' rihaan nij sĭí amán rá ni'yaj manj ne chuman' Laodicea a: “Dan me se nana nihánj me nana ca'mii 'unj sĭj qui'yaj nu' nana cataj xna'anj 'unj rihaan soj a. Dan me se 'unj me sĭí nata' ya se-nana Diose rihaan soj ndaa vaa me rá Diose qui'yáj, ne 'unj me sĭí qui'yaj nu' se man rihaan chumiĭ nihánj ei. Ne qui'yáj nu' se vaa me rá Diose qui'yáj ei.

<sup>15</sup> Dan me se ne'enj nu' se vaa 'yaj soj, ne nuveé se acoj ne nuveé se ya'aan me soj mei. Ca'vee doj a sese guun soj se acoj inanĭj ni', ase se ya'aan inanĭj ni' a.

<sup>16</sup> Dan me se che'é se ase vaa na guun vaa soj ne nuveé se acoj nuveé se ya'aan nuveé me soj, ne che'é dan ne se uun soj rihanĭj ma'. Dan me se maan che'é se danj vaa soj ro', che'é dan ticamanĭj man soj rihaan yo'óo nanĭj adonĭj.

<sup>17</sup> Dan me se taj soj se vaa ru'vee inanĭj soj, ne taj vaj a doj rasuun ne achiĭn rihaan soj, rá soj a. Tzaj ne ne ne'en soj sese ase vaa sĭí niqne ndo'o vaa soj, ne ase vaa sĭí achiĭn caridad rihaan vaa soj, ne ase vaa tuchrii vaa soj, ne ase vaa sĭí canĭj nuvi' sagan' ro', vaa nu' soj nanĭj adonĭj.

<sup>18</sup> “Che'é dan narquej rej nucuaĭj man soj se vaa quiraan soj aga' oró mĭí rihanĭj aga' cachén ya'an ne cunuu sa' inanĭj, gaa ne ca'vee cunuu ru'vee ya ya soj rihanĭj ei. Ne quiraan soj yatzĭj catziĭ rihanĭj, ne ca'vee cunuú soj, ne se quene'en yuviĭ se vaa nuvi' sagan' soj ne se guun na'aj soj se vaa nuvi' sagan' soj ma'. Ne quiraan soj rmedió sa' rihanĭj, ne caxriĭ soj rliĭ rihaan soj, gaa ne ca'vee quene'en soj, ne xcaĭj sa' soj cuentá ei.

<sup>19</sup> Dan me se 'unj ro', taj xna'anĭj 'unj rihaan nu' nij sĭí 'ee raj man daj qui'yaj nij so', ne qui'yáj sayuun man nij so' sese se cuno nij so' rihanĭj chuguanĭj. Che'é dan guun niha' rá soj cuno soj rihanĭj, ne canicaĭj nimán soj canoco' soj chrej sa' doj á.

<sup>20</sup> Nihánj me se ase vaa 'o sĭí nicun' ta'yaa ne tica'mii ta'yaa ro', vaa 'unj a. Ne sese vaa yo' o so' cuno se-nanaĭj, ne sese ca'nuu so' ta'yaa, ne catuu 'unj rihaan so', ne chaj chraa ga so', ne so' cha chraa ga 'unj, ne ve'é qui'yaj núj ei.

<sup>21</sup> Ne sĭí qui'yaj canaán ro', cayáán so' rihaan xruún 'unj chruun xlá sa' ga 'unj, ne guun chij so' gaj, qui'yáj, ndaa vaa qui'yaj Réj Diose gaj ei. Dan me se gaa qui'yaj canaán ma'anĭj, ne cayáán 'unj rihaan xruún Réj Diose chruun xlá sa' ga so', ne guun chij 'unj ga so', qui'yaj so' chuguanĭj.

<sup>22</sup> Sese taj yu'uj xréé soj, ne no xcúún soj cuno soj nana nihánj nana taj xna'anĭj Nimán Diose rihaan nij sĭí amán rá ni'yaj manj ne 'o 'o nij chuman' adonĭj.” Veé danj sĭj nana cachron so' ca'nej so' rihaan nij sĭí amán rá ni'yaj manj ne chuman' Laodicea a —taj so' rihanĭj a.

## 4

*Nana nihánj taj xna'anĭj se vaa quene'en Juan ma'an chruun xlá sa' rej uun chij Diose a*

<sup>1</sup> Quisĭj ca'mii so' nu' nana dan, gaa ne quene'én 'unj 'o ta'yaa taj ya'núĭ rej xta' a. Gaa ne cunó 'unj ca'mii uún sĭí ca'mii asino yaan rihanĭj, ne se-nana

so' ro', daj se uun rá' unó' a'yánj nii chruun a'yánj ro', danj guun raj gaa cunoj se-nanā so' a. Ne cataj so' rihanj a:

—Cavij so' ca'na' so' nihánj, gaa ne tihanj rihaan so' nu' se vaa guun rej rihaan so' á —taj so' rihanj a.

<sup>2</sup> Ne ra'yánj quene'en nimanj rasuun, ne quene'enj chruun xlá sa' ndo'o rej xta', ne vaa síi taj chruun xlá yo' síi uun chij ndo'o,

<sup>3</sup> ne ase vaa yahij jaspe do', ase vaa yahij cornalina do', danj vaa so' curuvi' so' a. Ne ase vaa xcuáá cu'lúu ro', danj vaa nu' anicaj chruun xlá sa' yo', ve'é chuguun yo', ne ase vaa chuguun yahij esmeralda ro', danj vaa chuguun yo' a.

<sup>4</sup> Ne nu' anicaj chruun xlá sa' yo' ro', nicun' yo'ó icō ca'anj chruun xlá sa', ne taj icō ca'anj síi uun chij rihaan nij chruun xlá sa' yo', ne nuu nij síi uun chij yatzij catzji, ne nuu raá nij so' cachriin aga' oró mii a.

<sup>5</sup> Ne rej nicun' chruun xlá nicun' tanu tuvi' me se raan ndo'o, ne carjin ndo'o, ne caguáj ndo'o tu'vii a. Ne chij aga' chuguun táá ya'an ro', nicun' rihaan chruun xlá sa', ne chij aga' chuguun yo' ro', me Nimán Diose síi guee inanj síi nicaj chij ya se nucuaj a.

<sup>6</sup> Ne rej rihaan chruun xlá sa' yo' ro', nuu 'o na ya'anj, tzaj ne nuveé na ya me yo' ma'. Maan scuraan inanj me yo', ne ase vaa yahij cristal danj vaa yo' a.

Ne nu' anicaj chruun xlá sa' yo' ne tanu yo'ó nij chruun xlá me se nicun' ca'anj xcuu, ne nu' anicaj man nij xcuu man rlij rihaan nij xo' a.

<sup>7</sup> Ne yo'ō xcuu ro', ase vaa chuvaá vaa xo' a. Ne xcuu vij ro', ase vaa scúj le'ej vaa xo' a. Ne xcuu va'nuj ro', ase vaa rihaan snó'o vaa rihaan xo' a. Ne xcuu ca'anj ro', ase vaa xtaa vaj rej xta' vaa xo' a.

<sup>8</sup> Ne vaa vatan' scachee 'o 'o nij xo' taj xráá nij xo', ne ase vaa scachee xtāj vaa scachee nij xo' yo' a. Ne nu' xráá xo' nu' rque xo' nu' man rlij rihaan xo' adonj. Ne nuvii nigan' me se ne a'ne' rá nij xo' ga suun taj: “Sij guee ndo'o me Diose síi 'nij ra'a man ní' síi uun nucuaj 'yaj cunudanj a. Ne so' me síi nicun' yaj, ne asij naá nicun' so', ne vaa güii cuchí' so' rihaan chumij a”, taj ca'anj nij xcuu yo' a.

<sup>9</sup> Ne gaa ca'mii sa' nij xcuu che'é Diose síi taj rihaan chruun xlá sa' yo' síi cayáán nu' cavii nu' ca'anj, ne gaa nago' nij xo' gracia rihaan so',

<sup>10</sup> ne canicun' ruj icō ca'anj nij síi uun chij yo' rihaan síi taj rihaan chruun xlá sa' yo', ne quina'vij nij so' rihaan so', che'é rej me so' síi cayáán nu' cavii nu' ca'anj, ne tagüéj nij so' cachriin nuu raá nij so' rej rihaan chruun xlá sa' yo' a. Gaa ne cataj nij so':

<sup>11</sup> —No xcúún ndo'o so' Diose sji 'nij ra'a man núj ca'mij sa' núj che'é so' ne guun chij ndo'o so' á. 'O se so' me síi qui'yaj cunudanj rasuun, ne maan che'é se guun rá so' cumān nij rasuun yo' ro', che'é dan guun cunudanj nij rasuun, qui'yáá so' adonj —taj icō ca'anj nij síi uun chij yo' rihaan Diose a.

## 5

*Nanā nihánj taj xna'anj che'é yanj do', che'é matzinj le'ej no xcúún nuxra' yanj do' a*

<sup>1</sup> Ne rej nuva' síi taj rihaan chruun xlá sa' yo' ro', quene'enj 'o yanj, ne no nanā nu' rej rque yanj nu' rej xraj yanj nu' a. Ne no chij selló yánj tu'va yanj yo', ne aráán selló yo' nu' anicaj tu'va yanj yo' a.

<sup>2</sup> Gaa ne quene'én 'unj yo'q se-mozó Diose síi nucuaj ndo'o, ne nucuaj ndo'o xná'anj so', cataj so', ne:

—Me síi nq xcúún ca'neē nij selló nq aráán tu'va yanj ne nuxra' so' yanj ga —taj so', xná'anj so' a.

<sup>3</sup> Ne taj vaj a 'ó síi ne rej xta' do', síi ne rihaan chumiij do', síi ne rej rque chumiij do', guun nucuaj nuxra' yanj ne ni'yaj so' yanj yo' a ma'.

<sup>4</sup> Che'é dan ta'vee uxraj che'é se ne nari' nii man a 'ó síi ni'yanj nimán nuxra' yanj yo' ni'yaj man yanj yo' a man adonj.

<sup>5</sup> Gaa ne yo'q tuvi' nij síi uun chij cataj rihanj a:

—Se ta'veé so' ma'. Xcaj so' cuentá, ne aj qui'yaj canaán síi chuvaá ta'núú ta'nij si'no síi cu'naj Judá síi cayáán gaa naá, ne yo'q ta'núú ta'nij si'no David me uún so', ne che'é dan ca'vee ca'neē so' chij nij selló nq tu'va yanj ne nuxra' so' yanj yo' nanj adonj —taj so' rihanj a.

<sup>6</sup> Gaa ne quene'én 'unj se vaa tanuú nij chruun xlá sa' do', tanuú ca'anj nij xcuu do', tanuú nij síi uun chij do', nicun' 'o matzinj le'ej, ne matzinj aj ticavi' nii man asij rque me yo' a. Ne chij cúú taj raá xo', ne chij nij rlij rihaan xo', ne nij rlij rihaan xo' ro', nij yo' me Nimán Diose síi guēe inanj síi nicaj chij ya se nucuaj síi aj ca'neé Diose rihaan nu' chumiij a.

<sup>7</sup> Dan me se cuchi' xo' rihaan síi taj rihaan chruun xlá sa' yo', ne quita'aa xo' yanj oro' ra'a síi taj rihaan chruun xlá rej nuva' so' a.

<sup>8</sup> Ne gaa quita'aa xo' yanj, ne canicun' ruj ca'anj nij xcuu do', icó ca'anj nij síi uun chij do', rihaan matzinj le'ej yo' a. Ne nicaj 'o 'o nij so' ya'ánj sa' do', co'oo aga' oró mii caraa squií xlá rque do', ne squií xlá yo' ro', me nij nana achúin ni'yaj nij síi sa' noco' man Diose rihaan ma'an Diose a.

<sup>9</sup> Gaa ne achráá nij so' chra' naca rihaan matzinj le'ej, cataj nij so', ne:

—No xcúún so' nıcaj so' yanj ne ca'neē so' selló yánj aráán nq tu'va yanj yo' á. 'O se ticavi' nii mán so', ne dan me se nicaj so' ton mán so' quiránj so' man 'o 'o nij yuviij man rihaan chumiij nihánj, ne dan me se quiránj so' man nij yuviij a'mii nu' yo'ó xna'ánj, ne quiránj so' man nij yuviij man daj a chuman' man daj a yo'óo noco'o do', quiránj so' che'é Diose á.

<sup>10</sup> Gaa ne guun chij Diose rihaan nij so', qui'yáá so', ne guun nij so' xrej nuu rihaan Diose, qui'yáá so', ne vaa güii guun chij nij so' rihaan chumiij adonj —taj chra' achráá nij so' a.

<sup>11</sup> Gaa ne quene'en uún 'unj, ne cunó 'unj se-nana que'ee mıj mıj se-mozó Diose nicun' nu' anicaj chruun xlá sa' do', nij xcuu do', nij síi uun chij do' a.

<sup>12</sup> Ne nucuaj ndo'o ca'mii nij se-mozó Diose yo', cataj nij so' a:

—No xcúún ndo'o matzinj le'ej ticavi' nii man guun nucuaj ndo'o so' do', nıcaj so' nu' rasuun sa' do', cavii ndo'o raá so' do', ca'mii sa' taran' ni' che'é so' do', guun chij ndo'o so' do' adonj —taj nij se-mozó Diose ni'yaj nij so' matzinj le'ej yo' a.

<sup>13</sup> Gaa ne cunó 'unj se vaa ca'mii cunudanj nij rasuun qui'yaj Diose rasuun man rej xta' do', rasuun man rihaan chumiij do', rasuun man rque chumiij do', rasuun man rihaan na ya'anj do', rasuun man rque na ya'anj do' a. Ne cataj nij rasuun:

—Rihaan síi taj rihaan chruun xlá sa' do', rihaan matzinj le'ej do', ca'mii sa' taran' ni' nu' cavii nu' ca'anj, ne guun chij roj so' nu' cavii nu' ca'anj ei —taj cunudanj nij rasuun a.

<sup>14</sup> Gaa ne:

—Veé danj gaa ya ei —taj ca'anj nij xcuu yo' a.

Gaa ne canicun' ruj nij síi uun chij, ne na'víj nij so' rihaan Diose a.



## 6

*Nana nihánj taj xna'anj se vaa ca'néj matzinj le'ej chij nij selló yánj caráán tu'va yanj yo' a*

<sup>1</sup> Gaa ne quene'én 'un̄j se vaa ca'néj matzinj le'ej yo' yo'o tuvi' nij chij selló caráán tu'va yanj libró yo', gaa ne cunoj ca'mii yo'o tuvi' ca'an̄j nij xcuu, ne ase uun rá' gaa aguáj tu'vii ro', danj guun raj gaa ca'mii xo' a. Ne:

—Cuva' so' n̄i'yaj so' ei —taj xcuu yo' a.

<sup>2</sup> Gaa ne quene'én 'un̄j se vaa cavii 'o cuayó catzii, ne síi taj xráa cuayó yo' ro', nicaj so' curuvej, ne rque nii cachriin cunuú raá so' man so', ne sij 'yaj canaan̄ ndo'o me so', ne cavii so' qui'yaj canaan̄ so' a.

<sup>3</sup> Ne gaa ca'néj matzinj le'ej selló vij̄ n̄o tu'va yanj yo', ne cunó 'un̄j ca'mii xcuu v̄j a. Ne xcuu v̄j cataj:

—Cuva' so' n̄i'yaj so' ei —taj xo' a.

<sup>4</sup> Gaa ne cavii yo'o cuayó, ne cuayó mar̄e me xo' a. Gaa ne ca'ne' nii suun rihaan síi taj xráa cuayó yo' se vaa quisij cayáán d̄inj yuv̄ij rihaan chum̄ij, qui'yaj so', ne ticavi' ndo'o yuv̄ij tuvi' yuv̄ij, qui'yaj so' a. Ne rque nii 'o neé espadá xij rihaan so' a.

<sup>5</sup> Gaa ne gaa ca'néj matzinj le'ej selló va'n̄uj, gaa ne cunoj ca'mii xcuu va'n̄uj a. Ne cataj xo':

—Cuva' so' n̄i'yaj so' ei —taj xo' a.

Gaa ne quene'énj se vaa cavii cuayó maruú, ne síi taj xráa cuayó ro', 'nij ra'a so' aga' romaná aga' a'néé ta'nga' nij rasuun a.

<sup>6</sup> Gaa ne cunó 'un̄j nana cavii rej tanuú ca'an̄j nij xcuu, ne nana yo' cataj:

—Nu' sa'an̄j 'yaj canaan̄ yuv̄ij rque 'o güii ro', nu' yo' me quino v̄j kiló 'núú trigó do', vat̄an̄ kiló 'núú cebada do', qui'yáa so' á. Tzaj̄ ne se tiri' so' casté chá do', na vinó do' ma' —taj nana yo' a.

<sup>7</sup> Gaa ne gaa ca'néj matzinj le'ej yo' selló ca'an̄j n̄o tu'va yanj me se cunó 'un̄j ca'mii xcuu ca'an̄j yo' a. Ne cataj xo':

—Cuva' so' n̄i'yaj so' ei —taj xo' a.

<sup>8</sup> Gaa ne quene'én 'un̄j, ne dan me se cavii cuayó daj, ne síi taj xráa cuayó daj ro', ta'naj 'yaj avi' yuv̄ij cu'naj so', ne rej xcó so' ro', noco' rej ca'an̄j nij síi cavi' a. Gaa ne ca'ne' nii suun rihaan roj so' se vaa guun chij roj so' rihaan 'o ta'aj nij yuv̄ij man rihaan chum̄ij, ne nicaj roj so' neé espadá nicaj roj so' x'naa na'aan rque nicaj roj so' chi'lii yuvaá nicaj roj so' xcuu quij nicaj roj so', ticavi' roj so' man nij yuv̄ij yo' a.

<sup>9</sup> Gaa ne gaa ca'néj matzinj le'ej selló 'un' n̄o tu'va yanj yo', ne quene'én 'un̄j rej rque mesá altar, ne rque mesá altar me se naj nij nimán̄ nij síi cavi' che'é se-nana Diose che'é yan nata' nij so' nana ya rihaan yuv̄ij a.

<sup>10</sup> Ne nucuaj̄ ndo'o aguáj̄ nij so', cataj̄ nij so', ne:

—Ndaa me güii ca'ne' so' cacun' che'é nij síi man rihaan chum̄ij, ne qui'yáa so' sayuun man nij so' che'é ton cayanj man n̄uj qui'yaj̄ nij so' ga. 'O se so' me síi vaa sa' inanj, ne síi uun chij ya rihaan n̄uj mé so' á —taj̄ nij nimán̄, aguáj̄ nij so' a.

<sup>11</sup> Gaa ne rque nii yatzi'j xcaan̄ catzii rihaan 'o 'o nij so', gaa ne cataj xna'an̄j nii rihaan nij so' se vaa ga inaj̄ nimán̄ nij so' doj̄ ndaa se quisij̄ cavi' nu' nij tinúú nij so' síi 'yaj̄ suun gā nij so' síi cavi' ndaa vaa cavi' ma'an̄ nij so' a.

<sup>12</sup> Gaa ne quene'én 'un̄j se vaa ca'néj matzinj le'ej yo' selló vat̄an̄ n̄o tu'va yanj yo', gaa ne cachén̄ ndo'o yuún, ne guun maruú rihaan güii, ne nda' rá

se vaa maruꝝ yatꝓj maruꝝ ro', danj vaa güii a. Ne ase vaa ton ro', danj vaa rihaan yavii a.

<sup>13</sup> Ne cayuu nij yati' man xta' rihaan yo'óo, ne nda' rá se vaa ayuu chruj higó rihaan yo'óo gaa o' nana yuvaꝝ raꝝ chruun man chruj higó ne tinasqui' ndo'o nana raꝝ chruun yo' ro', danj vaa ayuu yati' a.

<sup>14</sup> Ne quixra' rej xta', ne ase vaa yanj gaa nacué nii yanj ro', danj guun rej xta' yo' a. Ne nasqui' nu' quij nu' yo'óo taj rihaan na ya'anj do' a.

<sup>15</sup> Gaa ne dan me se nij sí nicaj suun do', nij sí sa' do', nij sí uun chij rihaan tanuu do', nij sí ru'vee do', nij sí nucuaj do', nu' nij mozó do', nu' nij sí ne uun mozó do', catúj yuve nij so' rque yu'uj yuvej do', rque nij yuvej naj quij do' a.

<sup>16</sup> Gaa ne cataj nij so' rihaan nij quij rihaan nij yuvej rihaan:

—Cayuu nij soj xraá núj, ne caxrii yuvej soj man núj, ne se gaa nanj quene'en sí taj rihaan chruun xlá sa' yo' man núj, ne se caxrij yuvaꝝ matzinj le'ej yo' man núj ruguanj.

<sup>17</sup> O se aj quisij güii gueꝝ güii caxrii yuvaꝝ roj so' man núj, ne se quisij rá núj canicun' núj a ma' —taj nij so' rihaan quij do', rihaan yuvej do' a.

## 7

*Nana nihánj taj xna'anj che'é nij sí israelitá cata' ta'nga' caan rihaan che'é Diose a*

<sup>1</sup> Veé dan, gaa ne quene'én 'unj ca'anj se-mozó Diose nicun' ca'anj nij scúj chumij nihánj, ne caráán nij so' chrej rihaan ca'anj nij nana avii rihaan chumij, se cavii nij nana rihaan yo'óo rihaan na ya'anj rihaan a doj chruun rihaan a.

<sup>2</sup> Ne ca'anj nij se-mozó Diose ro', aj ca'ne' Diose suun rihaan nij so' qui'yaj nij so' sayuun man yo'óo do', man na ya'anj do' a. Dan me se quene'én 'unj yo'ó se-mozó Diose cavii rej síj güii, ne nicaj so' selló no se-ta'nga' Diose a. Dan me se caguáj so' rihaan ca'anj nij se-mozó Diose, cataj so', ne:

<sup>3</sup> —Se guun qui'yaj soj sayuun man yo'óo do', man na ya'anj do', man chruun do' ma'. Ca'ne' rá soj doj tzin', ne ndaa quisij cuta' núj ta'nga' caan rihaan nij sí 'yaj suun che'é Diose, ne ca'vee ei —taj so', caguáj so' a.

<sup>4</sup> Gaa ne cunó 'unj me daj nij so' cuta' nii ta'nga' caan rihaan, ne cientó táá yavij chihaa ca'anj míj yuvi me nij so', ne sij man 'o' o' x'ne' nij yuvi israelitá me ún nij so' a.

<sup>5</sup> Dan me se chuvij míj nij so' me ta'núí ta'nij si'no sí cu'naj Judá a. Ne chuvij míj nij so' me ta'núí ta'nij si'no sí cu'naj Rubén a. Ne chuvij míj nij so' me ta'núí ta'nij si'no sí cu'naj Gad a.

<sup>6</sup> Ne chuvij míj nij so' me ta'núí ta'nij si'no sí cu'naj Aser a. Ne chuvij míj nij so' me ta'núí ta'nij si'no sí cu'naj Neftalí a. Ne chuvij míj nij so' me ta'núí ta'nij si'no sí cu'naj Manasés a.

<sup>7</sup> Ne chuvij míj nij so' me ta'núí ta'nij si'no sí cu'naj Simeón a. Ne chuvij míj nij so' me ta'núí ta'nij si'no sí cu'naj Leví a. Ne chuvij míj nij so' me ta'núí ta'nij si'no sí cu'naj Isacar a.

<sup>8</sup> Ne chuvij míj nij so' me ta'núí ta'nij si'no sí cu'naj Zabulón a. Ne chuvij míj nij so' me ta'núí ta'nij si'no sí cu'naj José a. Ne chuvij míj nij so' me ta'núí ta'nij si'no sí cu'naj Benjamín a.

*Nana nihánj taj xna'anj che'é nij sí man 'o' o' chuman' a*

<sup>9</sup> Veé dan, gaa ne quene'én 'unj que'ee ndo'o yuvii, ne taj vaj síi guun nucuaj qui'yaj contá man nij yuvii a man chuguanj. Ne síi man cunudanj chuman' naj rihaan chumii me nij so', ne síi man 'o 'o x'ne' yuvii me nij so', ne síi a'mii nu' xna'ánj a'mii yuvii me uún nij so', ne dan me se canicun' nij so' rihaan chruun xlá sa' yo' do', rihaan matzinj le'ej yo' do' a. Ne yatzij xcaan catzii nuú nij so', ne oro' nij so' ra'a chruun yuun a.

<sup>10</sup> Ne nucuaj ndo'o caguáj nij so', cataj nij so', ne:

—Diose síi noco' ní' man síi taj rihaan chruun xlá sa' do', matzinj le'ej do', me roj síi tinanii man ní' rihaan sayuun adonj —taj nij so' a.

<sup>11</sup> Gaa ne cunudanj nij se-mozó Diose ro', canicun' nij so' nu' anicaj xrúun Diose chruun xlá sa' do', nij síi uun chij do', ca'anj nij xcuu do', gaa ne canicun' ruj nij so' rihaan chruun xlá sa' yo', ne toco' nij nij so' rihaan nij so' rihaan yo'óo, ne na'víj nij so' rihaan Diose a.

<sup>12</sup> Ne cataj nij so':

—Veé danj gaa ya ei. Ve'é inanj ca'mii ní' rihaan Diose síi noco' ní' man nu' cavii nu' ca'anj á. So' me síi avii ndo'o raá, ne nago' ní' graciá rihaan so', ne so' me síi nucuaj ndo'o nu' cavii nu' ca'anj adonj. Veé danj gaa ya ei —taj nij so' ni'yaj nij so' Diose a.

<sup>13</sup> Gaa ne xná'anj yo'o tuvi' nij síi uun chij manj, cataj so':

—Ne nij síi nuu yatzij xcaan catzii ro', me sij me nij so', ne me rej cavii nij so', rá so' ga —taj so', xná'anj so' manj a.

<sup>14</sup> Gaa ne cataj 'unj rihaan so' a:

—Ne ne'én 'unj me síi me nij so', man señor. Tzaj ne so' me síi ne'en, raj a —taj 'unj rihaan so' a.

Gaa ne cataj so' rihanj a:

—Nij síi nihánj ro', me nij síi cachén rihaan que'ee ndo'o sayuun, gaa guun sayuun nocoo rihaan chumii adonj. Ne cavi' matzinj le'ej che'é nij so', ne cayanj ton man matzinj le'ej che'é nij so', ne canoco' nij so' man matzinj le'ej, ne che'é dan naruvii sagan' nij so', ne cunuú catzii sagan' nij so', qui'yaj ton cayanj man matzinj le'ej adonj.

<sup>15</sup> Che'é dan me nicun' nij so' rihaan xrúun Diose chruun xlá sa', ne nuvíj nigan' nicun' nij so' rá nuvíj nocoo ne rej xta' 'yaj suun nij so' rihaan Diose, ne Diose síi taj rihaan chruun xlá sa' yo' ro', ma'an so' cayáan ga nij so', ne qaráan so' rihaan sayuun che'é nij so' a.

<sup>16</sup> Ne daj chihaa mój se quina'aan uún rque nij so' do', se canacoo nij so' na do', se go' naán xráá nij so' do', se cunuú cachi' rá nij so' do', a ma'.

<sup>17</sup> 'O se ma'an matzinj le'ej nicun' ma'an rej rihaan chruun xlá sa' yo' ro', cutumé man nij so', ne ca'anj nıcaj so' man nij so' rej xra' na sa', ne co'oo nij so', gaa ne yo'o gaa i'na' nimán nij so', qui'yaj na yo' a. Ne ma'an Diose ro', me síi tinacoo na ayanj rihaan nij so' ei —taj síi uun chij yo' rihanj a.

## 8

*Nana nihánj taj xna'anj che'é selló yánj chij do', che'é aga' nuu squíi do' a*

<sup>1</sup> Gaa ne gaa ca'néj matzinj le'ej selló chij nq tu'va yanj yo', gaa ne yuun che'e cunuú dınj rej xta' 'o yanéj orá a.

<sup>2</sup> Gaa ne quene'én 'unj chij nij se-mozó Diose nij síi nicun' rihaan Diose, se vaa rqué nii chij chruun a'yánj rihaan nij so' a.

<sup>3</sup> Gaa ne ca'na' yo'óo se-mozó Diose uún, ne canicun' so' rihaan mesá altar aga' oró mii nicun' rihaan xrúun Diose chruun xlá sa' a. Ne noco' ra'a so' aga'

acaa squíí, ne aga' oró míí me aga' yo' a. Gaa ne rque ndo'o nii squíí man so' che'é rej ricatze' so' squíí rihaan mesá altar che'é nij síí vaa sa' rihaan Diose gaa achíín ni'yaj nij so' rihaan Diose a.

<sup>4</sup> Gaa ne cavii yachruu squíí noco' ra'a se-mozó Diose yo' rihaan ma'an Diose, gaa cachíín ni'yaj nij so' rihaan Diose a.

<sup>5</sup> Gaa ne dan me se ca'anj nicaj se-mozó Diose yo' aga' acaa squíí yo' rihaan mesá altar, gaa ne caraa ndo'o so' ru'vi' ya'an man rihaan mesá altar yo' rá aga', gaa ne tagüéj so' ya'an yo' rihaan chumii a. Gaa ne caguáj tu'vii, ne cariin ndo'o, ne quiraan ndo'o, ne cachén ndo'o yuún, qui'yaj se-mozó Diose yo' gaa tagüéj yo' squíí rihaan chumii a.

*Nana nihánj taj xna'anj daj guun gaa ca'yánj nij se-mozó Diose chij nij chruun a'yánj a*

<sup>6</sup> Gaa ne chij nij se-mozó Diose nicaj chij nij chruun a'yánj ro', yuun che'e guun rá nij so' ca'yanj nij so' nij chruun a'yánj yo' a.

<sup>7</sup> Gaa ne ca'yánj yo' o so' xrúún so', gaa ne maan yahij do', ya'an do', nachej ga ton me se caman' yo' rihaan chumii a. Gaa ne cacaa nu' 'o va'núj scuj yo'óó man rihaan chumii, ne cacaa 'o va'núj scuj nij chruun nicun' rihaan chumii, ne nu' coj chrin' ya'lij cacaa uún a.

<sup>8</sup> Gaa ne ca'yánj se-mozó Diose mozó vij chruun a'yánj, gaa ne cayuu 'o ya'an xij rque na ya'anj a. Ne ase vaa quij xcaan vaa ya'an xij yo' a. Gaa ne 'o va'núj scuj na ya'anj yo' ro', cunuu ton a.

<sup>9</sup> Ne cavi' 'o xcuu rihaan daj a va'núj xcuu man rque na ya'anj, ne quiri' 'o va'núj scuj nij rihoo chéé rihaan na ya'anj, qui'yaj ya'an yo' a.

<sup>10</sup> Gaa ne ca'yánj se-mozó Diose mozó va'núj chruun a'yánj, gaa ne cavii 'o yati' xij ndo'o rej xta', ne yati' yo' ro', ya'an inanj me yo', ne chuguun yo', ne adi' chuguun aga' taj ya'an raá ro', danj chuguun yo' a. Ne quinij yati' yo' rque 'o va'núj scuj nij chráá man rihaan chumii do', rque nij na yu'uj man rihaan chumii do' a.

<sup>11</sup> Ne se-chuvií yati' yo' ro', me "yati' e'", ne cunuu e' nu' na quinij yati' yo' rque, gaa ne cavi' que'ee yuvií, qui'yaj na e' yo', che'é se cunuu e' na yo', qui'yaj yati' a.

<sup>12</sup> Gaa ne ca'yánj se-mozó Diose mozó ca'anj chruun a'yánj, gaa ne quiran' chi'ii 'o va'núj scuj rihaan güii do', 'o va'núj scuj rihaan yavii do', 'o va'núj scuj nij yati' do', ne dan me se yo' o cunuú rmi' 'o va'núj scuj nij yo', ne dan me se ne cuchuguun nij yo' 'o va'núj scuj rej ranga' do', ne ne cuchuguun nij yo' 'o va'núj scuj rej nií do', a ma'.

<sup>13</sup> Gaa ne quene'én 'unj, ne cunó 'unj caguáj yo' o xtaa vaj tanuu rihaan risca' xta', ne dan me se cunó 'unj se vaa nucuj ndo'o caguáj xtaa yo', taj xo', ne:

—Ai. Ai. Nique nij síí ne rihaan chumii che'é sayuun quiran' nij so' asa' quisj ca'yánj ya'núj nij se-mozó Diose síí nichrun' ca'yanj chruun a'yánj á —taj xtaa, caguáj xo' a.

## 9

<sup>1</sup> Gaa ne ca'yánj se-mozó Diose mozó 'un' chruun a'yánj, gaa ne quene'én 'unj se vaa cavii yo' o yati' rej xta' quinij yo' rihaan yo'óó, gaa ne rque nii raga' rihaan so' nuxra' so' tu'va yu'uj cunuú ndo'o rej man nij nana chree a.

<sup>2</sup> Gaa ne nuxra' so' tu'va yu'uj cunuú ndo'o, gaa ne curihanj ndo'o catze' tu'va yu'uj yo', ne ase vaa catze' avii chrúún hornó xij ro', danj vaa catze'

cavii tu'va yu'uj yo' a. Gaa ne caráán rihaan güii, ne guun rmi' rihaan chumii, qui'yaj catze' yo' a.

<sup>3</sup> Gaa ne curihanj ndo'o rquíi rque catze' yo', ne ca'anj nij rquíi rihaan nu' chumii, gaa ne guun nucuaj nij rquíi yo' qui'yaj nij xo' ndaa vaa 'yaj nij xcuun, qui'yaj nii a.

<sup>4</sup> Gaa ne cataj xna'anj nii rihaan nij xo' se vaa se qui'yaj sayuun nij xo' man coj chrin' do', man coj do', man cuéj do', man nij chruun do' a. Maan se qui'yaj nij xo' sayuun man inanj nij yuvii nuvi' se-ta'nga' Diose cata' caan rihaan a.

<sup>5</sup> Ne ne nó xcúun nij xo' ticavi' nij xo' man nij yuvii ma'. Maan se 'un' ya yavii qui'yaj ndo'o nij xo' sayuun man nij yuvii a. Ne a'ngaj ndo'o man yuvii rej xtáj nij xo' a. Ne ase vaa sayuun 'yaj xcuun gaa xtáj xcuun man yuvii vaa sayuun qui'yaj nij rquíi man yuvii yo' a.

<sup>6</sup> Ne güii vaj nij rquíi yo' rihaan chumii me se guun ndo'o rá nij yuvii cavj' nij yuvii, tzaj ne se ca'vee cavj' nij yuvii a ma'.

<sup>7</sup> Ne nij rquíi me se ase vaa cuayó taj síi ca'anj cunu' ro', danj vaa nij xo' curuvi' uun nij xo', ne ase vaa cachriin aga' oró míi ro', danj vaa se nuu raá nij xo' a. Ne ase vaa rihaan yuvii ro', danj vaa rihaan nij xo' a.

<sup>8</sup> Ne vaa yuvé raá nij xo', ne ase vaa yuvé raá chana vaa yuvé raá nij xo', ne ase vaa cúu yan' chavaa vaa cúu yan' nij xo' a.

<sup>9</sup> Ne caráán aga' hierró nu' rucuaa nij xo' a. Ne daj se uun rá' gaa unó' que'ee cuchri' xuun cuayó 'anj rej cunu' nii ro', danj guun raj gaa cunoj cariin scachee nij xo' gaa chéé nij xo' xtá' a.

<sup>10</sup> Ne ase vaa tane' xcuun vaa tane' nij xo', ne guun nucuaj nij xo' xtáj nij xo' man yuvii, ne che'é dan guun nucuaj nij xo' qui'yaj nij xo' sayuun man yuvii 'un' ya yavii a.

<sup>11</sup> Ne se-mozó Diose síi tumé yu'uj cunu' ro', uun chij so' rihaan nij rquíi yo' a. Ne se-chuvii se-mozó Diose yo' me Abaddón xna'ánj hebreo, ne Apolión cu'naj so' xna'ánj griego, ne nana yo' taj se vaa sij tiri' rasuun me so' a.

<sup>12</sup> Dan me se navij 'o tuvi' nij sayuun quiran' nij yuvii, ne ataa ca'na' yavij roj sayuun quiran' yuvii a.

<sup>13</sup> Gaa ne dan me se ca'yánj se-mozó Diose mozó vatan' chruun a'yánj, gaa ne cunoj nana ca'mii 'o so' rej tanuu nij xcúu mesá altar aga' oró míi nicun' rihaan Diose a.

<sup>14</sup> Gaa ne ca'mii so' rihaan se-mozó Diose mozó nicaj chruun a'yánj vatan', cataj so':

—Naché so' man ca'anj nij se-mozó Diose síi numii tu'va chráá xij cu'naj Eufrates á —taj so' rihaan se-mozó Diose yo' a.

<sup>15</sup> Gaa ne nache so' ca'anj nij se-mozó Diose síi cune' Diose cavii maan orá yo', maan güii yo', maan yavii yo', maan yo' ya yo', che'é rej ticavi' nij so' 'o yuvii rihaan daj a va'nuj yuvii man rihaan chumii nanj adonj.

<sup>16</sup> Ne vij ciento míj míj síi taj xráá cuayó me nij síi nocó' man ca'anj nij se-mozó Diose yo', taj nii cunoj a.

<sup>17</sup> Ne dan me se gaa naqui'ya nu' rasuun nihánj rihaan 'unj, qui'yaj se-mozó Diose yo', ne quene'én 'unj man nij cuayó do', man nij síi taj xráá nij cuayó do', ne nij so' ro', me se nicaj nij so' aga' caráán rucuaa nij so', ne dan me se no se maree ndo'o, ne no se maree risca', ne no se míi, ndaa vaa chuguun yo'óo azufre acaa a. Ne ase vaa raá chavaa vaa raá nij cuayó, ne curihanj ya'an curihanj catze' curihanj yo'óo azufre curihanj tu'va nij xo' a.

<sup>18</sup> Ne che'é ya'an do', catze' do', yo'óo azufré do', curihanj tu'va nij cuayó ro', che'é dan cavi' 'o yuvij rihaan daj a va'nuj yuvij man rihaan chumij, qui'yaj nij xo' a.

<sup>19</sup> 'O se guun nucuaj nij cuayó ticavi' nij xo' man yuvij che'é rasuun cavii tu'va nij xo' do', che'é tane' nij xo' do' a. 'O se ase vaa xcuáa vaa tane' nij xo', ne vaa raá xcuáa yo', ne chá nij xo' man yuvij, quene'enj a.

<sup>20</sup> Ne vaa yuvij quinanii rihaan nij cuayó yo', tzaj ne ne çanicaj nimán nij so' tanáj xcó nij so' chrej chi'ij ma'. Tananj yo'ó na'vij nij so' rihaan nij nana chree do', rihaan ya'anj cacóy yuvij do', ne ya'anj cacóy nij yuvij me se aga' oró míi do', aga' platá catzii do', aga' cobre maree do', yahij do', chruun do', me uun nij yo' a. Ne dan me se nuvi' rihaan yo' ni'yaj yo' do', nuvi' xreé yo' cunó yo' do', a ma'. Ne chéé nij yo' do', a ma'.

<sup>21</sup> Dan me se ne çanicaj nimán nij yuvij ca'ne' rá nij yuvij ga suun ticavi' tuvi' do', ga suun a'mii ga síi chruun do', ga suun 'yaj cacun' ga chana do', ga suun 'yaj ituu si'yaj tuvi' do', a man adonj.

## 10

### *Nana nihánj taj xna'anj che'é yanj rque se-mozó Diose çá síi cu'naj Juan a*

<sup>1</sup> Gaa ne quene'én 'unj yo'ó se-mozó Diose síi nucuaj ndo'o cavii rej xtá' ne nanij rihaan yo'óo, ne nu' anicaj man so' niquee so' ngaa, ne nda' rá se vaa nicun' xcuáa cu'lúu ro', danj vaa nicun' raá so', ne chuguun nu' anicaj raá so', ne chuguun rihaan so', ndaa vaa chuguun güii a. Ne ase vaa chraan acaa vaa tacóo so' a.

<sup>2</sup> Ne nicaj so' 'o yanj cunii a. Ne cuta' so' 'o tacóo so' rej nuva' so' rihaan na ya'anj, ne cuta' so' yo'óo tacóo so' rej nichruun so' rihaan yo'óo a.

<sup>3</sup> Ne nucuaj ndo'o caguáj so', ndá' adi' se aguáj chuvaá aguáj so' a. Ne gaa caguáj so' me se çij yá caguáj tu'vii cunoj a.

<sup>4</sup> Ne gaa quisij çij caguáj tu'vii, gaa ne guun raj cachronj nana caguáj tu'vii rihaan yanj, tzaj ne cunoj nana cavii rej xtá', ne nana cunoj taj:

—Ca'nej yuve so' nana caguáj tu'vii, ne se cachron so' nana yo' rihaan yanj ma' —taj nana cavii rej xtá' cunoj a.

<sup>5</sup> Gaa ne se-mozó Diose síi nicun' tacóo rihaan na ya'anj do', rihaan yo'óo do', me se naxcaj ra'a so' rej nuva' so' rej xtá',

<sup>6</sup> ne cuta' so' raá Diose síi çayáan nu' cavii nu' ca'anj síi qui'yaj rej xtá' ga nu' se man rej xtá', síi qui'yaj chumij ga nu' se man rihaan chumij, síi qui'yaj na ya'anj ga nu' se man rque na ya'anj, se vaa se ca'vee guun raan a doj a ma'.

<sup>7</sup> Dan me se asa' quisij güii ca'yanj se-mozó Diose mozó çij chruun a'yánj me se quisij nu' se vaa guun rá Diose qui'yaj so', ndaa vaa nata' so' rihaan nij síi nata' se-nana so' síi 'yaj suun che'é so' a, taj se-mozó Diose yo' a.

<sup>8</sup> Gaa ne cavii doj nana rej xtá', rej cavii nana cunoj asij rque doj, ne cataj nana yo':

—Cavii so' nijaj so' yanj nicaj se-mozó Diose síi taj tacóo rihaan na ya'anj do', rihaan yo'óo do' á —taj nana yo' rihanj a.

<sup>9</sup> Gaa ne cavii 'unj rihaan se-mozó Diose yo', ne cataj 'unj rihaan so' se vaa rque so' doj yanj cunii yo' rihanj a. Gaa ne cataj so' rihanj a:

—Veé yanj nihánj nijaj so', ne çá nu' so' man yo' a. Dan me se tu'vá so' ro', gaa tzi' ndo'o nda' adi' catzi' xtaan, tzaj ne rque so' me se guun e', qui'yaj yanj yo' adonj —taj se-mozó Diose yo' rihanj a.

<sup>10</sup> Gaa ne dan me se nicaj 'unj yanj cunii rque se-mozó Diose yo' rihanj, ne chá nu' 'unj man yo', ne ase tzi' catzi' xtaan ro', danj vaa tzi' yo' tu'vaj a. Ne gaa quisij chaj man yo', ne cunu e' rquej, qui'yaj yo' a.

<sup>11</sup> Gaa ne cataj nii rihanj a:

—Vaa che'é ca'mii natáj uún so' che'é yuvij man que'ee chuman' man que'ee yo'óo nocoo do', che'é yuvij a'mii que'ee xna'ánj a'mii yuvij do', che'é que'ee sí nicaj suun rey do' ei —taj nii rihanj a.

## 11

### *Nana nihánj taj xna'anj che'é vij sí nata' rihaan yuvij che'é Diose a*

<sup>1</sup> Gaa ne rque nii 'o rihaa ase vaa 'o vará a'née ta'nga' manj, ne cataj Diose rihanj a:

—Cavij so' ne xcaj ta'ngá' so' nuvíi nocoo rej ne Diose, ne xcaj ta'ngá' so' mesá altar, ne qui'yaj contá so' nij sí na'víj rihaan Diose do' á.

<sup>2</sup> Tzaj ne xa' rej rihaan nuvíi, tzaj ne se xcaj ta'ngá' so' man yo' ma'. 'O se ca'vee ca'na' nij sí yanj rej yo', ne vij chihaa vij yavii yuun che'e ru'maan che'é nij so' nu' chuman' guee yo' adonj.

<sup>3</sup> Ne cune! 'unj man vij roj sí nata' rihaan yuvij che'é 'unj, ne 'o mój táá yavij cientó ne táá ya'núj chihaa güii me se ca'mii natáj roj so' rihaan yuvij, ne cunuú roj so' yatzij ya' a —taj Diose rihanj a.

<sup>4</sup> Roj so' ro', me roj chruun man chruj olivó raa do', roj aga' taj aga' ya'an nicun' rihaan sí 'nij ra'a chumij nihánj do' a.

<sup>5</sup> Ne sese guun rá yo'o so' qui'yaj chi'ij so' man roj so', ne avii ya'an tu'va roj so', ne acaa sí taj ri'yunj man roj so', qui'yaj ya'an avii tu'va roj so', ne yuun che'e caví' sí 'na' guun rá qui'yaj chi'ij man roj so' a.

<sup>6</sup> Ne guun nucuaj roj so' caráán roj so' rej xta', che'é yan se caman' a doj maan nu' güii ca'mii natáj roj so' a. Ne guun nucuaj roj so' naqui'yaj roj so' ton man na a. Ne guun nucuaj roj so' qui'yaj chi'ij roj so' man chumij ndaa vaa me rá ma'an roj so' qui'yaj roj so' a.

<sup>7</sup> Ne asa' quisij ca'mii natáj roj so' se-nana roj so', gaa ne cavij xcuu yuvaa yu'uj cunuú ndo'o yo' a. Ne cunu' xo' ga roj so', ne qui'yaj canaán xo', ne ticaví' xo' man roj so' a.

<sup>8</sup> Gaa ne cúu man roj so' ro', quinaj uun yo' rihaan callé rá chuman' nocoo a. Ne chuman' nocoo yo' me se sese ca'mii cachron ní', ne Sodoma do', Egiptó do', cu'naj chuman' yo' a. Ne yo' me rej cachron nii rihaan rcutze man ma'an sí 'nij ra'a man roj sí nata' yo' asij rque doj a.

<sup>9</sup> Ne cunudanj nij yuvij man daj a chuman' do', cunudanj nij yuvij a'mii nu' nij xna'ánj do', cunudanj nij yuvij man daj a yo'óo nocoo do', ni'yaj man roj sí cavi' va'nuj güii táá yanée yo' a. Ne ne ca'vej rá nij yuvij yo' cachin' nii man roj so' rihaan yo'óo santó ma'.

<sup>10</sup> Ne nu' nij sí man rihaan chumij me se guun niha' ndo'o rá nij so' che'é se cavi' roj sí nata' yo', ne ndaa narque nij yuvij rasuun rihaan tuvi' nij yuvij che'é se cavi' roj so' a. Dan me se gaa vaa i'na' roj so' me quiran' ndo'o nij yuvij sayuun, qui'yaj roj so' a.

<sup>11</sup> Ne gaa quisij va'nuj güii táá yanée yo', gaa ne catúj uún nana rque roj so', qui'yaj Diose, ne cunuun i'na' uún roj so', ne canicun' caya roj so', ne dan me se nu' nij yuvij quene'en man roj so' me se cuchu'vi' ndo'o nij so' a.

<sup>12</sup> Gaa ne cuno roj so' nana nucuaj sca' ndo'o cavij rej xta', ne nana yo' cataj: —Cavij roj soj ca'na' roj soj nihánj á —taj nana yo' cuno roj so' a.

Gaa ne catúj roj so' rque ngaa, cavii roj so' xtá', ne ca'anj roj so' a. Dan me se nij síi taj ri'yunj man roj so' me se quene'en nij so' se vaa cavii roj so' rej xtá' a.

<sup>13</sup> Ne maan orá dan cachén ndo'o yuún, ne canee 'o ve' rihaan daj a chí' ve' ne chuman' yo', ne cavi' chíj míj yuvi, qui'yaj yuún, ne cuchu'vi' ndo'o yo'ó nij yuvi, ne guun che'e nij so' ca'mii sa' nij so' che'é Diose síi nicun' rej xtá' a.

<sup>14</sup> Dan me se quisíj vj sayuun yo', ne nichrun' quisij sayuun va'núj a.

*Nana nihánj taj xna'anj daj guun gaa ca'yánj se-mozó Diose mozó chíj chruun a'yánj a*

<sup>15</sup> Gaa ne dan me se ca'yánj se-mozó Diose mozó chíj chruun a'yánj, gaa ne ca'mii ndo'o nij síi man rej xtá', cataj nij so':

—Nihánj me yuun che'e guun chíj síi 'nij ra'a man ní', ne guun chíj síi ca'néé so' tinanii man yuvi rihaan sayuun, ne dan me se guun chíj roj so' rihaan chumij, ne dan me se yo'o guun chíj Diose nu' cavii nu' ca'anj nanj adonj —taj nij síi man rej xtá' a.

<sup>16</sup> Ne icó ca'anj nij síi uun chíj taj rihaan chruun xlá sa' rej rihaan Diose me se ca'anj canicun' ruj nij so' rihaan Diose, ne toco' nij nij so' rihaan nij so' rihaan yo'óó, ne quina'vív nij so' rihaan Diose a.

<sup>17</sup> Dan me se cataj nij so':

—Narque núj graciá rihaan so', Diose sji 'nij ra'a man núj á. So' me síi guun nucuaj qui'yaj cunudanj a. Ne síi nicun' yaj mé so', síi nicun' asij naá mé so' á. Dan me se guun ni'yaj ní' se vaa yaj me se guun nucuaj ndo'o so', qui'yáá so', ne guun chíj so' rihaan chumij a.

<sup>18</sup> Dan me se ca'maan rá nij síi man rihaan chumij ni'yaj nij so' man so', gaa ne ca'ná' so', ne caxrij yuvaá so' man nij so' a. Ne quisíj güii ca'ne' so' cacun' che'é nij síi cavi' ne naru'vee so' rihaan nij síi 'yaj suun rihaan so' nij síi ca'mii natáj se-nana so' do', rihaan nij síi vaa sa' rihaan so' do', rihaan nij síi aráj cochroj rihaan so' do' a. Dan me se ca'vee se síi niqee me nij so' ni', ca'vee se síi sa' ata suun me nij so' ni', tzaj ne naru'vee so' rihaan nij so' a. Ne tiri' so' man nij síi tiri' chumij a —taj icó ca'anj nij síi uun chíj rihaan Diose a.

<sup>19</sup> Gaa ne naxra' ta'yaa rihaan nuvi nocoo rej ne Diose rej xtá', ne rá nuvi nocoo me se curuvi' se-chrunj Diose chrúun guęę qui'yaj nii gaa ca'mii Diose se-nana Diose rihaan síi cu'naj Moisés gaa naá a. Gaa ne quiraan ndo'o, ne cariin ndo'o, ne canu ndo'o, ne cavii ndo'o nana yuvaá, ne caguáj tu'vii, ne cachén yuún, ne caman' ndo'o maan yahij nanj adonj.

## 12

*Nana nihánj taj xna'anj che'é chana do', che'é xcuáá tu'vii do', curuvi' rej xtá' a*

<sup>1</sup> Gaa ne dan me se naqui'yaa 'o rasuun nocoo curuvi' rej xtá' rihaan 'unj, qui'yaj Diose, ne chana me yo', ne sagan' chana yo' ro', me güii, ne táá tacóo no' xráá yavii a. Ne nuu raá no' 'o cachriin no' chuvij yati' a.

<sup>2</sup> Ne chana yo' ro', nuú rque, ne ve'ee uxrá rque no' che'é se me rá no' cuchruj no' ne'ej, ne che'é dan ta'vee ndo'o no' a.

<sup>3</sup> Ne naqui'yaa uun yo'ó rasuun rej xtá' rihaan 'unj, qui'yaj Diose, ne xcuáá tu'vii xij maree me yo' a. Ne vaa chíj raá xo', ne chí' cúú táá raá xo', ne chíj cachriin nuú raá xo' a.



4 Ne tane' xo' me se cuxuun yo' yo'o va'nuj scuj nij yati' man rej xta', ne cayuu nij yati' rihaan yo'óo, qui'yaj xo' a. Ne canicun' xcuáa tu'vii yo' rihaan chana cuchruj ne'ej, che'é rej cha nu' xo' man ne'ej cuchruj chana yo' a.

5 Gaa ne cuchruj no' ne'ej sno'o, ne so' ro', me síi nıcaj vará hierró ne cutúme man cunudañj nij yuviı man rihaan chumiı a. Gaa ne ca'néj nii ta'nıı chana yo', ne ca'anj nıcaj nii man ne'ej rihaan Diose rej táa so' rihaan chruun xla sa' yo' uun chij so' a.

6 Gaa ne cunanj chana ndaa rej tacaan rej qui'yaj ma'an Diose cane no', che'é rej ca'vee cayáan no', ne ca'vee rque Diose se cha no' 'o mıj táa yavıj cientó ne táa ya'nıj chihaa güıı a.

7 Gaa ne guun che'e nij síi man rej xta' cunu' nij so' a. Dan me se se-mozó Diose síi cu'naj Miguee ga yo'óo nij se-mozó Diose nuu rihaan so' me se cunu' ndo'o nij so' ga xcuáa tu'vii a. Ne tananj xcuáa tu'vii do', nij se-mozó ma'an xcuáa tu'vii do', cunu' ndo'o nij so' ga nij tuvi' se-mozó Diose Miguee,

8 tzaj ne ne guun nucuaj nij so' qui'yaj canaan nij so' man Miguee a man adonj. Ne taj rej cuman nij so' rej xta', qui'yaj nij tuvi' Miguee a man chuguanj.

9 Ne xcuáa tu'vii yo' ro', xcuáa cayáan asij naa tempó me xo', ne síi chree do', Satanás do', cu'naj xo', ne síi tiha' yu'unj man cunudañj nij yuviı man rihaan chumiı me uún xo' nanj adonj. Ne go' nii man xcuáa tu'vii xij yo' rihaan chumiı ga nij se-mozó so' a.

10 Gaa ne cunó 'unj nana nucuaj ca'mii yo'o so' rej xta', ne cataj so':

—Nihánj me se guun che'e Diose tinanii Diose man yuviı rihaan sayuun, ne guun nucuaj ndo'o so', ne guun chij ndo'o so' adonj. Ne guun chij síi ca'née so' tinanii man yuviı rihaan sayuun a. 'O se síi cuta' cacun' xraá tinúú ní' nuviı nıgan' rihaan Diose ro', quirii yanıj nii man so' nanj adonj.

11 Ne qui'yaj canaan nij tinúú ní' man xcuáa tu'vii che'é ton cayanj man matzinj le'ej yo' che'é nij tinúú ní', ne che'é se nata' nij so' nana ya sa' rihaan yuviı ro', che'é dan qui'yaj canaan nij so' rihaan xcuáa tu'vii yo' nanj ei. Ne nij so' me se ne chucu'vi' nij so' sese cavı' nij so' che'é nana sa' nata' nij so' ma'.

12 Che'é dan guun niha' rá nij soj rej xta' do', sij ne rej xta' do' ei. Tzaj ne niqúe ndo'o soj sij man rihaan chumiı do', na ya'anj do', nanj adonj. 'O se quiri'ıj nii man síi chree rihaan roj soj, ne che'é dan nuu yuvaq uxrá rá so' nanj chuguanj. 'O se ne'en síi chree se vaa nichrun' ca'na' sayuun quiran' so' nanj ei —taj nana ca'mii yo'o so' rej xta' a.

13 Gaa ne dan me se gaa xcaj xcuáa tu'vii yo' cuentá se vaa quiri'ıj nii man xo' rihaan chumiı, gaa ne canoco' ndo'o xo' man chana cuchruj ne'ej yo' a.

14 Tzaj ne rque nii vij scachee xtaa xij man chana, che'é rej ca'vee cavii no' ca'anj no' rej tacaan rej ne no' qui'yaj Diose, ne yo' me rej rque Diose se cha no' va'nuj yo' táa yanée, ne gan' ndo'o cunanj no' rihaan xcuáa tu'vii a.

15 Tzaj ne quirii ndo'o xcuáa yo' na tu'va xo' rej vaj chana, ne ase vaa chraá vaa na ca'née xo' rej vaj chana, che'é rej guun rá xo' rnuu chana qui'yaj chraá yo', rá xo' a.

16 Gaa ne racıj yo'óo man chana, ne dan me se nuxra' yo'óo tu'va yo'óo, ne chumanj yo'óo nu' chraá quirii xcuáa tu'vii tu'va yo' a.

17 Gaa ne ca'maan ndo'o rá xcuáa tu'vii ni'yaj xo' man chana, gaa ne cavii xo' cunu' xo' ga yo'óo nij ta'nıı no' síi uno rihaan Diose síi nata' se-nana

Jesucristó rihaan yuvii a. Gaa ne canicun' xo' rihaan yo'óo chruu naj tu'va na ya'anj a.

## 13

### *Nana nihánj taj xna'anj che'é xcuu yuvaa cavii na ya'anj a*

1 Gaa ne quene'én 'unj se vaa cavii 'o' xcuu yuvaa rque na ya'anj, ne chij ya raa xo', ne chi' cúu raa chij cúu yave xo', ne táa chi' cachriin raa nij cúu taj raa xo' a. Ne quij ndo'o vaa se-chuvii xo' nó rihaan xo' a.

2 Ne ase vaa sni'yó vaa xo', ne ase vaa tacóo xcuu osó vaa tacóo xo', ne ase vaa tu'va chuvaa vaa tu'va xo' a. Ne xcuu yuvaa cavii rque na ya'anj ro', guun nucuaj ndo'o xo' guun chij xo', qui'yaj xcuáa tu'vii a.

3 Ne yo'o raa xo' ro', aj quiran' chi'ii ndaa se daj doj se cavi' xo', tzaj ne quinahuun sa' uún man xo' a. Ne caráya'anj nij yuvii man nu' rihaan chumii ni'yaj nij yuvii man xcuu yuvaa yo',

4 ne quina'víj nij yuvii rihaan xcuáa tu'vii yo', che'é se guun nucuaj xcuu yuvaa yo' guun chij yo', qui'yaj ma'an xcuáa tu'vii yo' a. Ne quina'víj uún nij yuvii rihaan xcuu yuvaa uún, cataj nij yuvii:

—Me 'ó sí ca'vee qui'yaj ndaa vaa 'yaj xcuu yuvaa nihánj ga. Taj vaj a doj sí guun nucuaj cunu' ga xo' ma' —taj nij yuvii ni'yaj nij yuvii man xcuu yuvaa yo' a.

5 Gaa ne ca'vej rá Diose guun nucuaj xo' ca'mii xta' ndo'o xo' ndaa rihaan ma'an Diose a. Ne ca'vej rá Diose guun chij xo' vij chihaa vij yavii a.

6 Gaa ne dan me se ca'mii ndo'o xo' nana chi'ii ni'yaj xo' man Diose do', ve' mantá rej ne Diose do', che'é nij sí ne rej xta' ga Diose do' a.

7 Ne ca'vej rá Diose cunu' xo' ga nij sí vaa sa' nimán rihaan Diose, ne dan me se qui'yaj canaán ya xo' man nij so' a. Ne ca'vej rá Diose guun chij xo' rihaan 'o' o' ta'aj yuvii do', rihaan nij yuvii man cunudanj chuman' naj rihaan chumii do', rihaan nij yuvii a'mii cunudanj nij xna'ánj a'mii yuvii do', rihaan nij yuvii man nu' nij yo'óo nocoo do' a.

8 Ne quina'víj cunudanj nij yuvii man rihaan chumii rihaan xo' a. Ne nij sí quina'víj rihaan xo' me se nuvi' se-chuvii nij so' no' rihaan danj matzinj le'ej sí cavi' rihaan rcutze, ne che'é dan se gaa i'na' nij so' rihaan Diose nu' cavii nu' ca'anj ma'. Ne nij sí ne quina'víj rihaan xcuu yuvaa yo' me se aj nó se-chuvii nij so' rihaan yanj yo' asij ataa qui'yaj Diose chumii nanj adonj.

9 Dan me se sese taj yu'uj xréé yo'o so', ne no' xcuún so' cunoo so' nana nihánj adonj.

10 Dan me se sí 'yaj atúj yuvii taga' ro', vaa güii catuu ma'an so' uún nanj adonj. Ne sí o' neé espadá man tuvi' me se cavi' ya ma'an so', qui'yaj neé espadá nanj adonj. Nihánj me se xcaj ní' cuentá che'é nij sí vaa sa' rihaan Diose, se vaa yo'o Diose gaa nucuaj rá nij so', ne yo'o Diose cuchuman rá nij so' ni'yaj nij so', ne yo'o gaa nucuaj nimán nij so' rihaan sayuun ei.

### *Nana nihánj taj xna'anj che'é xcuu yuvaa cavii rque yo'óo a*

11 Gaa ne quene'én 'unj yo'óo xcuu yuvaa cavii rque yo'óo, ne táa vij cúu raa xo', ne ase vaa cúu taj raa matzinj le'ej ro', danj vaa cúu taj raa xo' a. Ne a'mii xo' ndaa vaa a'mii ma'an xcuáa tu'vii a.

12 Ne dan me se ca'na' xo' rihaan xcuu yuvaa cavii rque na ya'anj, ne guun chij xo' rihaan yuvii ndaa vaa uun chij ma'an xcuu cavii rque na ya'anj yo' a. Dan me se quina'víj nij yuvii man nu' rihaan chumii rihaan xcuu yuvaa

cavii rque na ya'anj xcuu nahuun sa' gaa daj doj se cavi', qui'yaj xcuu yuvaā cavii rque yo'óo yo' a.

<sup>13</sup> Ne qui'yaj suun ndo'o xo' suun nocgo quene'en nij yuvii, ne ndaa cavii ya'an rej xta' ne quiniy ya'an rihaan yo'óo, qui'yaj xo' a.

<sup>14</sup> Dan me se qui'yaj suun xo' suun nocgo rihaan xcuu yuvaā cavii rque na ya'anj yo', qui'yaj ma'an xo', ne che'é suun nocgo yo' me se tiha' yu'unj ndo'o xo' man nij sí man rihaan chumi, ne cataj xo' rihaan nij so' se vaa qui'yaj nij so' 'o se-tinanga' xcuu cavii rque na ya'anj yo' xcuu quiran' chi'ij qui'yaj neé spadá ne cunuu i'na' uún a.

<sup>15</sup> Dan me se guun nucuj xo' qui'yaj xo' nayón nana nimán se-tinanga' xcuu cavii rque na ya'anj yo', ne qui'yaj uún xo' ca'mii se-tinanga' yo', ne taran' nij sí na'vej rá na'vij rihaan se-tinanga' yo' ro', me se ticavi' xo' man taran' nij so' a.

<sup>16</sup> Gaa ne qui'yaj xcuu cavii rque yo'óo yo' fuerzá man cunudanj yuvij se vaa cuta' nii ta'nga' ra'a nij yuvij rej nuva' nij yuvij, ne se taj, ne caan rihaan nij yuvij cata' ta'nga' a. Dan me se danj qui'yaj nii man nij sí ata' suun do', man nij sí cheé ma'an do', man nij sí nique do', man nij sí ru'vee do', man nij mozó do', man nij sí ne uun mozó do' a.

<sup>17</sup> Ne dan me se sese nuvi' ta'nga' yo' ra'a yo'o so' do', rihaan yo'o so' do', ne ne ca'vee quiraan so' rasuun do', cutu'vee so' rasuun do', qui'yaj se-tinanga' xcuu yo' a man adonj. Ne ta'nga' yo' ro', me se-chuvij xcuu cavii rque na ya'anj, ne dan me se número me yo' ei.

<sup>18</sup> Ne nihánj me se cavij raā soj sij nayaa nana nihánj, ne sese cuu raā soj, ne nuchruj raā soj daj taj se-número xcuu yuvaā cavii rque na ya'anj yo' ei. 'O se número yo' ro', me se-chuvij yo'o snó'o nanj chuguanj. Ne vatan' cientó táa ya'núj chihaa vatan' me número yo' ei.

## 14

*Nana nihánj taj xna'anj che'é cientó táa yavij chihaa ca'anj mij nij sí vaa sa' rihaan Diose a*

<sup>1</sup> Gaa ne quene'én 'unj se vaa nicun' matzinj le'ej yo' raā quij cu'naj Sion, ne nicun' 'o cientó táa yavij chihaa ca'anj mij nij so' ga so', ne no se-chuvij matzinj le'ej do', se-chuvij Rej matzinj le'ej do', caan rihaan nij so' a.

<sup>2</sup> Gaa ne cunó 'unj se vaa ca'mii nana cavii rej xta', ne ase vaa uun ayuj vaj chraá xij do', ase uun aguáj ndo'o tu'vii do', danj vaa nana yo', ne ase vaa chra' achraá nii ya'ánj vaa nana yo' a.

<sup>3</sup> Ne achraá nij so' chra' naca inanj rihaan sí taj chruun xlá sa' yo' do', rihaan ca'anj nij xcuu nicun' nu' anicaj chruun xlá sa' do', rihaan nij sí uun chij do' a. Ne taj vaj a 'o nij sí ca'vee nari' cachraa chra' yo' ma'. Maan se orún' cientó táa yavij chihaa ca'anj mij nij sí vaa sa' yo' ro', me nij sí guun nucuj nari' chra' yo' nanj adonj. Nij so' ro', me nij sí nari' Diose rihaan chumi, ne nij so' me sí tinanii matzinj le'ej man rihaan sayuun gaa cavi' so' a.

<sup>4</sup> Ne ne cunuu chi'ij nij so' rihaan Diose che'é chana ma'. 'O se sí vaa sa' inanj me taran' nij so' nanj adonj. Ne sí canocó' xcó matzinj le'ej me rej ma'an vaj xo' me uún nij so' a. Ne nij so' me nij sí táa yaan rihaan taran' yo'óo nij sí man rihaan chumi' sí cunuu sa' rihaan Diose do', rihaan matzinj le'ej do', gaa cavi' matzinj le'ej yo' a.

<sup>5</sup> Ne dan me se taj vaj a doj nana ne ne ca'mii nij so' ma'. 'O se sij vaa sa' inanj me nij so' nanj ei.

*Nana nihánj taj xna'anj daj ca'mii va'nuj nij se-mozó Diose a*

<sup>6</sup> Gaa ne quene'én 'unj yo'ó se-mozó Diose vaj tanuu rihaan risca' xta', ne nicaj so' nana sa' nana che'é se vaa quiran' yuvij nu' cavii nu' ca'anj nata' so' rihaan nij sí man cunudanj nij yo'óo nocoo man rihaan chumii do', rihaan nij sí man cunudanj nij chuman' do', rihaan nij sí a'mii cunudanj nij xna'ánj a'mii nij yuvij do', rihaan 'o 'o ta'aj nij yuvij man rihaan chumii do' a.

<sup>7</sup> Gaa ne dan me se nucuaj ndo'o ca'mii so', cataj so', ne:

—Caraa cochroj nij soj rihaan Diose, ne ve'é ca'mii soj che'é so' ei. 'O se aj quisij orá ca'ne' so' cacun' che'é yuvij nanj adonj. Dan me se na'vij soj rihaan so', che'é se so' me sí qui'yaj rej xta' do', yo'óo do', na ya'anj do', rej avii na do' a —taj se-mozó Diose yo' cunoj a.

<sup>8</sup> Gaa ne canoco' yo'ó se-mozó Diose xcó tuvi' so', ne cataj so':

—Aj quiri' nu' chuman' nocoo chuman' cu'naj Babilonia, ne qui'yaj ndo'o nij sí man rihaan chumii cacun' chi'ii, qui'yaj chuman' yo', ne nihánj me se caxrii yuvaa Diose man nij so' che'é cacun' chi'ii qui'yaj nij so' chuguanj —taj yo'ó se-mozó Diose yo' a.

<sup>9</sup> Gaa ne canoco' se-mozó Diose mozó va'nuj rej xco roj tuvi' so', ne nucuaj ndo'o ca'mii so', cataj so', ne:

—Sese na'vij yo'q so' rihaan xcuu yuvaa yo' do', rihaan se-tinanga' xcuu yuvaa yo' do', ne sese ca'vej rá yo'q so' cata' ta'nga' caan rihaan so' do', ra'a so' do',

<sup>10</sup> ne ya co'q so' na vinó sayuun nucuaj caraa Diose rque tazá, ne na vinó yo' ro', me sayuun qui'yaj Diose man so' asa' caxrij yuvaa Diose man so', ne dan me se cacaa so' rihaan ya'an do', rihaan yo'óo azufre' acaa do', ni'yaj nij se-mozó Diose mozó vaa sa' do', ni'yaj matzinj le'ej do' a.

<sup>11</sup> Ne dan me se nu' cavii nu' ca'anj cavii catze' rej quiran' nij so' sayuun, ne yo'q danj quiran' nij so' nuvii nigan' nanj adonj. Danj quiran' nij sí na'vij rihaan xcuu yuvaa yo' do', rihaan se-tinanga' xcuu yuvaa yo' do', sí ca'vej rá cata' ta'nga' se-chuvii xcuu yo' do' a —taj se-mozó Diose mozó va'nuj yo' a.

<sup>12</sup> Ne nihánj me rej xcaj ni' cuentá che'é nij sí vaa sa' rihaan Diose, se vaa yo'q vaa nucuaj nimán nij so' rihaan sayuun ei. 'O se nij so' me sí yo'q uno nana taj xna'anj Diose, ne yo'q amán rá nij so' ni'yaj nij so' Jesucristó a.

<sup>13</sup> Gaa ne cunó 'unj yo'ó nana cavii rej xta', ne nana yo' cataj rihanj a:

—Cachron so' nana nihánj rihaan yanj á. Cachron so' se vaa nij sí nocoo' man sí 'nij ra'a man soj me se sese cavi' nij so' rej rihaan yaj, ne vaa che'é guun niha' rá nij so' ei. 'O se cavii sa' nij so' nanj á. Ne Nimán Diose taj se vaa ca'ne' rá nij so' ga suun 'yaj suun, ne naraan rá nij so' a. 'O se yuun che'é cavii sa' nij so' che'é suun sa' aj qui'yaj suun nij so' adonj, cachron so' á —taj nana cavii rej xta' yo' a.

*Nana nihánj taj xna'anj che'é sayuun quiran' nij sí man rihaan chumii nihánj a*

<sup>14</sup> Gaa ne quene'én 'unj se vaa curuvi' 'o ngaa catzii rej xta', ne táá 'o sí nicaj yu'unj man yuvij xráá ngaa, ne nuu raq so' 'o cachriin aga' oró mii, ne nocoo' ra'a so' 'o aga' seraa cuyuu a'ne' coj, ne sihaa uxrá seraa yo' a.

<sup>15</sup> Gaa ne yo'ó se-mozó Diose curihanj rque nuvii nocoo, ne nucuaj ndo'o caguáj so' rihaan sí taj xráá ngaa yo' a. Dan me se cataj so', ne:

—Tacuachén so' sagá' so' aga' sihaa tacóo nij rasuun man rihaan yo'óo, ne cutá so' se man rihaan yo'óo cuaj ei. 'O se quisij orá cutá ni' se man rihaan

yo'óo ñanj adonj. 'Q se aj cachij nu' se man rihaan yo'óo ñanj á —taj se-mozó Diose rihaan síi taj xráa ngaa yo' a.

16 Gaa ne síi taj xráa ngaa yo' ro', me se tacuachén so' saga' so' tacóo nij rasuun man yo'óo, ne dan me se cuta so' nu' rasuun cachij man rihaan yo'óo yo' a.

17 Gaa ne curihanj yo'ó se-mozó Diose uún rque nuvíi nocoo ne rej xta', ne ma'an so' nicaj yo'ó aga' seraa cuyuu sihaa uún a.

18 Gaa ne curihanj yo'ó se-mozó Diose uún rej nicun' mesá altar, ne síi guun chij rihaan ya'an me so', ne nucuaaj ndo'o caguáj so' rihaan síi nicaj yo'ó aga' sihaa yo' a. Dan me se cataj so', ne:

—Tacuachén so' sagá' so' aga' seraa sihaa tacóo nij rasuun man rihaan yo'óo, ne naqui'yaj chre' so' nij chruj uvá cachij rihaan yo'óo á. 'Q se aj cané nu' nij chruj uvá ñanj ei —taj so' rihaan tuvi' mozó so' a.

19 Gaa ne dan me se tacuachén se-mozó Diose yo' saga' so' aga' seraa tacóo nij rasuun man rihaan yo'óo, gaa ne naqui'yaj chre' so' nij chruj uvá cachij man rihaan chumii, gaa ne caraa sa' so' nij chruj uvá yo' rque 'o xruj xij rej rii nii na man nij chruj uvá, ne dan me se rej yo' me rej quiran' uxrá nij chruj uvá yo' sayuun qui'yaj Diose vaa ñanj adonj.

20 Gaa ne dan me se rej tu'va chuman' quirii nii man chruj uvá, ne rej yo' me canuu nii man chruj uvá yo', ne curihanj ndo'o ton rque xruj xij yo', ne quisij ton yo' ndaa tu'va nij cuayó yo' rej nuu rtá, ne va'nuj cientó táa yo'ó icó kilómetro ya cunánj ton yo' rej gan' rihaan yo'óo a.

## 15

### *Nana nihánj taj xna'anj che'é chij se-mozó Diose nij síi nicaj sayuun a*

1 Gaa ne quene'én 'unj yo'ó rasuun curuvi' rej xta' qui'yaj Diose, ne se xij ndo'o me yo', ne rasuun caráya'anj yá' me yo' a. Dan me se quene'énj chij se-mozó Diose, ne chij sayuun ca'na' me nicaj nij se-mozó Diose yo' a. Ne asa' quisij guun sayuun yo' rihaan chumii qui'yaj Diose, gaa ne ca'ne' rá Diose ga suun axrij yuvaa man chumii a.

2 Gaa ne quene'én 'unj na ya'anj, ne ndaa raan ma'an rihaan na ya'anj yo', ne ase vaa raan vidrió ro', danj vaa raan yo', ne ase vaa ya'an vaa yo', ne nij síi qui'yaj canaán rihaan xcuu yuvaa yo' do', rihaan se-tinanga' xcuu yuvaa yo' do', rihaan número uun se-chuvii xcuu yuvaa yo' do', nij so' me nij síi nicun' rihaan na ya'anj vidrió yo', ne nicaj nij so' ta'anj Diose nicun' nij so' yo' a.

3 Ne achráa nij so' chra' qui'yaj síi cu'ñaj Moisés síi qui'yaj suun che'é Diose gaa naá, ne xra' matzinj le'ej me chra' yo' a. Ne nihánj me nana cachráa nij so' a:

—Xij ndo'o ne ya'anj ndo'o vaa nu' suun qui'yaj suun so', Diose sij ne'en qui'yaj cunudanj sij 'nij ra'a man núj á. Tucuáán nica ne tucuáán ya me nu' tucuáán cuchruj so', ne síi nicaj suun rey uun chij rihaan cunudanj yuvii mé so' á.

4 Me síi se ca'vej rá caraa cochroj rihaan so', ga man Señor. Ve'é ca'mii cunudanj yuvii ni'yaj nij yuvii mán so' a. 'Q se orún' so' me síi sa' inanj, ne ca'na' cunudanj nij yuvii man rihaan chumii, ne na'vij nij yuvii rihaan so' á. 'Q se quene'én nij so' nu' nij suun nica qui'yaj suun so' adonj —me chra' cachráa nij síi qui'yaj canaán yo' a.

5 Gaa ne quene'én 'unj se vaa naxra' ta'yaa rihaan nuvíi nocoo rej ne Diose rej xta' rej xcaj yuvii cuentá che'é so' a.

<sup>6</sup> Gaa ne curihanj chij nij se-mozó Diose nij sí nicaj sayuun rque nuví nocoo yo', ne nuu nij so' yatzíj linó sa' inanj naruvii chuguun, ne 'nij catuun nij so' merque caxra' anó ndaa rucuaa nij so', ne merque aga' oró mí inanj me nij merque yo' a.

<sup>7</sup> Gaa ne yo' o' tuvi' ca'anj nij xcuu ro', rque xo' chij co'oo aga' oró mí rihaan chij nij se-mozó Diose, ne sayuun qui'yaj Diose caxrii yuvaa Diose man nij sí man rihaan chumij ro', maan ndaa araa ma'an sayuun yo' rque nij co'oo a. Ne Diose, tzaj ne so' me sí gaa i'na' nu' cavii nu' ca'anj adonj.

<sup>8</sup> Ne che'é se ve'é ndo'o 'yaj Diose ne che'é se nucuaj ndo'o Diose, che'é dan caraa catze' rá nuví nocoo yo', ne taj vaj sí guun nucuaj catuu rque nuví nocoo yo' ndaa se quisij chij nij sayuun nicaj chij nij se-mozó Diose tagüéj nij so' rihaan chumij a.

## 16

*Nana nihánj taj xna'anj che'é sayuun man rque co'oo nicaj chij nij se-mozó Diose a*

<sup>1</sup> Gaa ne cunó 'unj se vaa nucuaj ca'mii 'o' sí ne rá nuví nocoo yo' rihaan chij nij se-mozó Diose, cataj so':

—Cavii nij soj, tucuayuu soj se man rque se-co'oo soj rihaan yo'óó, che'é rej caxrii yuvaa Diose man nij sí man rihaan yo'óó á —taj sí ne rá nuví nocoo yo' a.

<sup>2</sup> Gaa ne guun yaan 'o' se-mozó Diose, cavii so' ca'anj so', ne tucuayuu so' se nuu rque se-co'oo so' rihaan yo'óó a. Gaa ne dan me se canó ndo'o luj ri'yuj chí'ii man nij sí no se-ta'nga' xcuu yuvaa sí na'víj rihaan se-tinanga' so' a.

<sup>3</sup> Gaa ne se-mozó Diose mozó vj, ne tucuayuu so' se man rque se-co'oo so' rihaan na ya'anj yo', ne ase vaa ton man xnangá ro', danj vaa nu' na ya'anj yo' a. Gaa ne cunudanj nij xcuu do', xcuaj do', cavi' rque na ya'anj yo' a.

<sup>4</sup> Gaa ne se-mozó Diose mozó va'núj, ne tucuayuu so' se man rque se-co'oo so' rihaan nij chráá do', rihaan nij rej avii na do' a. Gaa ne guun ton man nu' nij na yo' a.

<sup>5</sup> Gaa ne cunó 'unj ca'mii se-mozó Diose sí tumé na, se vaa cataj so':

—Cunaj uxrá 'yáá so' sji nicun' yaj sji nicun' asij naá, ne sji sa' inanj mé so' á. 'Q se ma'an so' me sí cataj xna'anj se vaa guun nu' nij rasuun nihánj nanj adonj.

<sup>6</sup> 'Q se nij sí man rihaan chumij ro', tucuayuu nij so' ton man nij sí sa' do', ton man nij sí nata' se-nana so' do', rihaan yo'óó, ne nihánj me se rque so' ton rihaan nij so' co' o' ma'an nij so' yaj adonj. Dan me se yaj me nayon ya cuentá ndaa vaa qui'yaj nij so' gaa naá ei —taj se-mozó Diose sí tumé na yo' a.

<sup>7</sup> Gaa ne cunó 'unj se vaa ca'mii mesá altar, ne cataj yo':

—Veé danj vaa, Diose sji 'nij ra'a man núj sji guun nucuaj qui'yaj cunudanj a. Nana ya ne nana nica me nu' nana cataj xna'anj so' gaa ca'ne' so' cacun' che'é nij yuvij yo' —taj yo' uún a.

<sup>8</sup> Gaa ne se-mozó Diose mozó ca'anj ro', me se tucuayuu so' se man rque se-co'oo so' rihaan güii a. Gaa ne guun nucuaj güii cacaa nij yuvij qui'yaj güii a.

<sup>9</sup> Gaa ne cacaa ndo'o nij yuvij, gaa ne dan me se nda' se Diose me sí uun chij rihaan nu' nij sayuun yo', tzaj ne ca'mii chí'ii nij yuvij ni'yaj nij yuvij man Diose, ne ne canicaj nimán nij yuvij ca'mii sa' nij yuvij che'é Diose a ma'.

10 Gaa ne se-mozó Diose mozó 'un' ro', me se tucuayuu so' se man rque se-co'oo so' rihaan chruun xlá rej taj xcuu yuvaa a. Gaa ne yuun che'e cunuu rmi' nu' rej quirii ta'nga' xo' rihaan, ne dan me se que'ee ndo'o man nij sí guun chij xo' rihaan, ne ndaa chá ruj ma'an nij so' tu'va nij so' che'é yan a'ngaj man nij so' a.

11 Gaa ne dan me se ca'mii chi'ii nij so' che'é Diose, che'é se que'ee ndo'o man nij so' ne canó luj chi'ii ri'yuj man nij so' a. Tzaj ne ne canicaj nimán nij so' tanáj nij so' se chi'ii qui'yaj nij so' a ma'.

12 Gaa ne se-mozó Diose mozó vatán' ro', me se tucuayuu so' se man rque se-co'oo so' rihaan chráá xij cu'naj chráá Eufates, gaa ne canacoó nu' na man rque chráá yo', qui'yaj so' a. Ne dan me se guun chráá yo' chrej cachén nij sí nicaj suun rey cavii rej síj güii ca'na' nij so' a.

13 Gaa ne quene'én 'un' se vaa curihanj va'nuj nana chi'ii tu'va xcuáá tu'vii do', tu'va xcuu yuvaa do', tu'va sí nata' nana ne do', ne ase vaa riquij vaa va'nuj nij nana chi'ii yo' a.

14 'O se nana chree me nij so', ne vaj nij so' 'yaj suun nij so' suun nocoo ne'en nij yuvii, ne dan me se cavii nij so' ca'anj nij so' rej ne nij sí nicaj suun rey uun chij rihaan nu' nij yuvii man rihaan chumii a. Gaa ne cunu chre' cunudanj nij sí nicaj suun rey, qui'yaj nij nana chree, che'é rej cunu' nij sí nicaj suun rey yo' ga Diose asa' quisíj güii ca'ne' Diose cacun' che'é yuvii a. Ne Diose me sí guun nucuaj qui'yaj cunudanj ei.

15 Ne nihánj me se-nana sí 'nij ra'a man ní' a:

—Dan me se ase vaa 'na' yuve sí ituu ro', danj gaa cuchí' 'un' rihaan soj á. Ne cavii sa' sí ne otoj, ne ni'yaj ranga' nij so', ne tumé sa' nij so' sagan' nij so' yatzíj catzií á. Dan me se se gaa canj nij so' cachee nij so', ne se cunó chrej na'aj rihaan nij so' ni'yaj yuvii man nij so' ma' —taj sí 'nij ra'a man ní' ni'yaj so' man nij sí ne tumé cacun' a.

16 Gaa ne dan me se cunuu chre' nij sí nicaj suun rey yo' rej cu'naj Armagedón xna'ánj hebreo, qui'yaj va'nuj nij nana chree yo' a.

17 Gaa ne se-mozó Diose mozó hij me se tucuayuu so' se man rque se-co'oo so' rihaan nana a. Gaa ne nucuaj ca'mii sí taj chruun xlá sa' nicun' rá nuví nocoo, cataj so', ne:

—Quisíj guun yo' á —taj so' a.

18 Gaa ne quiraan, ne cariin ndo'o, ne caguáj ndo'o tu'vii, ne cachén uxrá yuun yuvaa, ne nucuaj doj yuun yo' rihaan nu' nij yuun cachén rihaan chumii nihánj asij guun che'e yuvii cayáan yuvii rihaan chumii nihánj a.

19 Dan me se quixra' ta'aj chuman' xij nocoo yo', ne cunuu va'nuj ta'aj chuman' xij yo', ne canee cunudanj yo'ó nij chuman' naj rihaan chumii, qui'yaj yuun a. Dan me se na'nuj rá Diose chuman' nocoo cu'naj Babilonia se vaa rque so' 'o aga' na vinó 'na' sayuun co'ó chuman' yo', ne na vinó yo' ro', me se vaa caxríj yuvaa Diose man chuman' yo' a.

20 Gaa ne cunanj cunudanj nij yo'óo naj tanuu rihaan na ya'anj do', cayuu cunudanj nij quij xcaan do', ne ne curuvi' a 'ó nij quij a ma'.

21 Ne caman' ndo'o maan yahij xráá nij yuvii, ne vij chihaa chi' kiló me 'o 'o chraan yu've' yo' cayuu xráá nij yuvii a. Gaa ne guun che'e nij so' ca'mii chi'ii nij so' ni'yaj nij so' man Diose che'é maan yahij go' xráá nij so' qui'yaj Diose a. 'O se sayuun uxrá vaa sayuun quiran' nij so' nanj adonj.

## 17

*Nana nihánj taj xna'anj che'é chana niha' rá ga chii a*

<sup>1</sup> Gaa ne dan me se ca'na' yo' o' tuvi' chij nij se-mozó Diose nicaj chij nij co'oo, gaa ne cataj so' rihanj a:

—Cuva' so' nihánj, ne tijaán 'unj rihaan so' daj gaa sayuun quirañ' chana niha' rá ga chii chana taj rihaan que'ee nij na ya'anj ei.

<sup>2</sup> Dan me se qui'yaj chi'ii nij sí nicaj suun rey uun chij rihaan chumij ga no', gaa ne ase 'yaj nij sí xno' ro', danj qui'yaj nij sí man rihaan chumij, che'é se qui'yaj chi'ii nij so' ga no' chuguanj —taj se-mozó Diose rihanj a.

<sup>3</sup> Gaa ne ca'anj nimán 'unj rej tacaan, qui'yaj uún se-mozó Diose a. Gaa ne dan me se quene'én 'unj 'o chana taj xraá xcuu yuvaa maree, ne nó ndo'o se-chuvji xo' xraá xo', ne nij nana yo' me se inanj nana chi'ii me nij yo', ne vaa chij raá xo', ne táa chi' cúu raá xo' a.

<sup>4</sup> Ne chana yo' ro', nuú no' yatzij tintá ga yatzij maree, ne nó aga' oró míi do', yahij chuguun tu'vee ndo'o do', rmii raan perlá tu'vee ndo'o do', nó rihaan sagan' a. Ne nicaj ra'a no' yo' o' aga' tazá aga' oró míi, ne ndaa araa ayanj ma'an inanj nij se chi'ii rque aga' oró yo', ne dan me se inanj se chi'ii qui'yaj ma'an no' me se vaa araa man rque saga' no' a.

<sup>5</sup> Ne caan rihaan no' ro', nó se-chuvji no', ne nana yuve me se-chuvji no', ne dan me se chuman' nocoo cu'naj Babilonia cu'naj no', ne nii taran' nij chana niha' rá ga chii me no', ne nii cunudanj nij se chi'ii man rihaan chumij me uún no' a.

<sup>6</sup> Gaa ne quene'én 'unj se vaa xno chana yo', che'é se aj co'o ndo'o no' ton man nij sí vaa sa' rihaan Diose do', ton man nij sí nata' se-nana Jesucristó do' a. Ne ca'anj ndo'o raj ni'yaj 'unj man no' a.

<sup>7</sup> Gaa ne xná'anj se-mozó Diose manj, cataj so', ne:

—Me che'é ca'anj rá so' ga. 'O se cataj xna'anj 'unj rihaan so' nana yuve nana che'é chana do', che'é xcuu yuvaa atá man no' xcuu taj chij cúu yave do', che'é chi' cúu taj raá chij cúu yave xo' do' a.

<sup>8</sup> Xcuu yuvaa ne'én so' ro', me sí cayáan asij rque doj, tzaj ne taj vaj so' rihaan chumij cuano ma'. Ne rej rihaan ní' me se vaa cavii uún so' yu'uj cunuu ndo'o, gaa ne ca'anj so' rej quirí' nu' so' ei. Tananj uún, ne vaa nij sí man rihaan chumij sí ne no' se-chuvji rihaan yanj no' se-chuvji nij sí gaa i'na' nu' cavii nu' ca'anj asij ataa qui'yaj Diose chumij, ne ca'anj rá nij so' ni'yaj nij so' xcuu yuvaa yo', che'é se quene'én nij so' se vaa asij rque doj cayáan xo', ne taj vaj xo' cuano ma'. Ne rej rihaan ní' me se ca'na' uún xo' adonj.

<sup>9</sup> Ne nihánj me xcax sí avii raá cuentá a. Dan me se chij nij raá xcuu yuvaa yo' ro', me chij quij, ne ne chana yo' xraá nij quij yo' a. Ne chij sí nicaj suun rey me uún chij nij raá xcuu yuvaa yo' a.

<sup>10</sup> Dan me se 'un' nij so' ro', aj quirí' ne aj navij cachén nij so' suun a. Ne yo'ó so' ro', ne cuano, ne ataa quisij yo'ó so' uún, ne asa' ca'na' yo'ó so', ne doj cayáan so' rihaan suun nanj á.

<sup>11</sup> Ne ma'an xcuu yuvaa yo' me se sí cayáan asij rque me so', ne taj vaj so' ne cuano ma'. Ne sí nicaj suun rey tunj me so', tzaj ne yo' o' tuvi' yo'ó chij nij sí nicaj suun rey me uún so', ne cavii so', ne quirí' nu' so' nanj adonj.

<sup>12</sup> Ne chi' nij cúu taj nij raá xcuu yuvaa ro', me chi' nij sí nicaj suun rey uún a. Dan me se ataa cayáan nij so' qui'yaj nij so' suun a. Tzaj ne asa' qui'yaj nij so' suun rey me se orún' orá nii guun nij so' sí nicaj suun rey ne guun chij nij so' ga ma'an xcuu yuvaa yo' ei.



<sup>13</sup> Dan me se yo'o cyaan gaa rá taran' nij so', ne nayon xcuu yuvaá rihaan nij so' guun chij ma'an xcuu yuvaá, qui'yaj ma'an nij so' adonj.

<sup>14</sup> Gaa ne cunu' taran' nij so' ga matzinj le'ej, tzaj ne qui'yaj canaan nij tuvi' matzinj le'ej rihaan nij so' ei. 'Q se matzinj le'ej ro', me síi 'nij ra'a man nu' síi uun chij, ne síi nicaj suun rey uun chij rihaan nu' síi nicaj suun rey me uún so' adonj. Ne nij tuvi' so' ro', me nij síi canacúun so' canoco' man so', ne dan me se aj narii so' man nij so', ne yo'o amán rá nij so' ni'yaj nij so' man so' ei —taj se-mozó Diose rihanj a.

<sup>15</sup> Gaa ne cataj uún so':

—Nij na quene'én so' rej ne chana niha' rá ga chii ro', me que'ee yuvij do', yuvij man que'ee chuman' do', yuvij a'mii que'ee xna'ánj a'mii yuvij do' a.

<sup>16</sup> Ne xcuu yuvaá yo' do', chi' nij cúu taj raá xcuu yuvaá do', nachri' ndo'o nij so' ni'yaj nij so' man chana niha' rá ga chii yo' a. Ne quirí' nu' no', qui'yaj nij so', ne cánj uun gaa no', qui'yaj nij so', ne cha nij so' man no', ne cacaa nu' no', qui'yaj nij so' nanj ei.

<sup>17</sup> 'Q se ma'an Diose caxrij chrej rque nij so' se vaa qui'yaj nij so' ndaa vaa me rá ma'an so' qui'yaj nij so', ne che'é dan yo'o vaa rá taran' nij so', ne nayon xcuu yuvaá rihaan nij so' guun chij xo', qui'yaj nij so', ne veé danj guun chij ya xo' ndaa se quisij ya nu' se-nana Diose ei.

<sup>18</sup> Ne ma'an chana quene'én so' ro', no' me chuman' nocoo 'nij ra'a man nij síi nicaj suun rey uun chij rihaan chumij a —taj se-mozó Diose rihanj a.

## 18

### *Nana nihánj taj xna'anj se vaa canee nu' chuman' Babilonia a*

<sup>1</sup> Veé dan, gaa ne quene'én 'unj yo'ó se-mozó Diose cavii rej xtá' nanij rihaan yo'óo, ne síi nucuaj ndo'o me so' a. Ve'é ndo'o curuvi' so', ne chuguun rihaan yo'óo, qui'yaj so' a.

<sup>2</sup> Gaa ne nucuaj ndo'o caguáj so', cataj so', ne:

—Canee nu' chuman' nocoo cu'naj Babilonia, ne guun chihanj nana chree man yo', ne taga' nuu nij nana chi'ij do', yachrúu do', me yo' yaj ei.

<sup>3</sup> 'Q se chuman' yo' me se rqué ndo'o no' na vinó co'o cunudanj nij yuvij man rihaan chumij, ne na vinó yo' ro', me sayuun quiran' nij so' che'é cacun' chi'ij qui'yaj nij so' ga no' a. Dan me se qui'yaj ndo'o nij síi nicaj suun rey cacun' ga no', ne nij síi naránj natu'vej ro', guun ru'vee ndo'o nij so' che'é rej ca'néj nu' nij so' nu' se sa' man chuman' yo' nanj adonj —taj se-mozó Diose yo' a.

<sup>4</sup> Gaa ne cunó 'unj nana ca'mii yo'ó so' rej xtá', ne dan me se cataj so':

—Curihanj soj sij nocó' manj chuman' yo' ei. Se guun qui'yaj soj cacun' ndaa vaa 'yaj nij síi man chuman' yo' mei. Curihanj soj do', se quiran' soj sayuun ndaa vaa quiran' nij so' ei.

<sup>5</sup> 'Q se aj ne'en Diose se vaa nocoo ndo'o cacun' taj xráá nij so', ne nihánj me se qui'yaj Diose sayuun man nij so' chuguanj.

<sup>6</sup> Dan me se ase vaa qui'yaj chuman' yo' sayuun man yuvij ro', danj gaa qui'yaj guéé soj sayuun man chuman' yo', ne vij naru'vee soj sayuun man chuman' yo' ei. Dan me se rque ma'an aga' tazá tinachej chuman' yo' na co'o yuvij ro', veé maan rque aga' tazá yo' ro', vij guun che'e soj caraa soj na co'o ma'an chuman' yo' á.

<sup>7</sup> Dan me se ca'mii xtá' ndo'o no', ne nano' ndo'o no' se sa' gaa rihaan no', ne che'é dan qui'yaj ndo'o soj sayuun ndaa ca'ngaj ma'an nimán no', qui'yaj

soj, ne ndaa que'ee ndaa cúu man no', qui'yaj soj, gaa ne xri' ndo'o rá no' ei. Dan me se taj nimán no': "Ne amán raj daj chihaa mǐj mei. Ma'anj me chana reiná uun chij ya, ne ne chu'vij ma'. Nuveé chana cavi' nica mej, ne se quirán' 'unj sayuun daj chihaa mǐj ma'", taj no' a.

8 Ne che'é dan rque orún' güii me se ca'na' nu' nij sayuun quirán' no', ne dan me se cavi' ndo'o yuvii rque no' do', quinanó ndo'o rá nij yuvii do', cachén ndo'o x'naa rque no' do', cacaa nu' no', qui'yaj ya'an do', nanj ei. 'Q se nucuaj ndo'o Diose sǐi 'nij ra'a man soj sǐi ca'ne' cacun' che'é chuman' yo' nanj chuguanj —taj nana ca'mii sǐi ca'mii rej xta' a.

9 Dan me se ta'vee ndo'o nij sǐi nicaǐ suun rey uun chij rihaan chumiǐ ni'yaj nij so' man chuman' yo' asa' quene'en nij so' se vaa avii ndo'o catze' rej acaa chuman' yo' a. 'Q se nij so' me sǐi qui'yaj ndo'o cacun' chi'ii ga no', ne cutun' ndo'o nij so' se sa' ga no' a.

10 Ne dan me se gan' canicun' nij so' rej naj chuman' yo', che'é rej cuchu'vi' nij so' quene'en nij so' sayuun quirán' no' a. Ne cataǐ nij so':

—Ai. Ai. Ná'unj. Niqué so' chuman' nocoo chuman' nucuaj chuman' cu'naj Babilonia ei. 'Q se rque orún' orá ca'na' sayuun rihaan so' che'é cacun' tumé so' a —cataǐ nij sǐi nicaǐ suun rey yo', ni'yaj nij so' man chuman' Babilonia yo' a.

11 Ne nij sǐi naránj natu'vej rihaan chumiǐ ro', ta'vee ndo'o nij so', ne quinanó ndo'o rá nij so' ni'yaj nij so' chuman' yo' a. 'Q se se ca'vee cane' a doǐ si'yaj nij so' rasuun,

12 aga' oró míi do', aga' platá catzii do', yahij chuguun tu'vee ndo'o do', rmii raan perlá do', yatzǐj linó do', yatzǐj sedá do', yatzǐj tintá do', yatzǐj maree do', nu' chruun gun' daj do', nu' rasuun rii nii man cúu marfil do', nu' rasuun rii nii man chruun sa' do', nu' rasuun rii nii man aga' bronce maree do', nu' rasuun rii nii man aga' hierró ndo'o do', nu' rasuun rii nii man yahij mármol do'.

13 quíi canelá do', coj gun' daj do', na gun' daj do', squíi cu'naj mirra do', squíi xlá do', na vinó do', casté do', hariná do', 'núu trigó do', scúj do', matzinj do', cuayó do', cuchri' do', ndaa ma'an yuvii guun mozó do', se cane' daj chihaa mǐj uún rasuun yo', qui'yaj nij so' a ma'.

14 Ne nij sǐi naránj natu'vej ro', ca'mii nij so' rihaan chuman' yo', cataǐ nij so', ne:

—Ne nij chruj niha' ndo'o rá so' cha so' ro', navij nu' chruj yo', ne nu' se tu'vee ndo'o do', nu' se chuguun do', ca'anj ni'ya nij yo' rihaan so', ne daj chihaa mǐj se nari' uún so' man nij rasuun sa' vaa danj yaj a ma' —cataǐ nij sǐi naránj natu'vej rasuun a.

15 Ne nij so' ro', me nij sǐi cunuu ru'vee qui'yaj chuman' yo', ne gan' canicun' nij so' ga no', che'é se cuchu'vi' nij so' ni'yaj nij so' sayuun quirán' no' a. Dan me se ta'vee nij so', ne quinanó ndo'o rá nij so',

16 ne cataǐ nij so':

—Ai. Ai. Niqué ndo'o so' chuman' nocoo nanj á. Chuman' nuu yatzǐj linó mé so', ne yatzǐj tintá do', yatzǐj maree do', nuú so', ne aga' oró míi do', yahij chuguun tu'vee ndo'o do', rmii raan perlá do', nó rihaan so',

17 tzaj ne rque orún' orá navij nu' nij yo' quiri' tananj —cataǐ nij sǐi naránj natu'vej yo' a.

Ne cunudanj nij sǐi tuguáj rihoo chéé rihaan na ya'anj do', nu' nij sǐi 'yaj suun rihaan rihoo chéé rihaan na ya'anj do', canicun' nij so' rej gan' a.

18 Dan me se gaa quene'en nij so' rej avii catze' yan acaa chuman', gaa ne caguaj nij so', cataj nij so':

—Me rej naj yo'ó chuman' nocqo doj rihaan chuman' nihánj, rá soj yaj onj —cataj nij so' a.

19 Dan me se caraa nij so' yo'óó tachruu raá nij so', ne ta'vee ndo'o nij so', ne quinano rá nij so', ne cataj uún nij so', ne:

—Ai. Ai. Niqué so' chuman' nocqo nanj á. Dan me se guun ru'vee taran' núj sij si'yaj rihoo cheé rihaan na ya'anj, qui'yaj rasuun sa' tu'vee man rqué so' tzaj man. Tzaj ne nihánj me se rque orún' orá navij nu' so' nanj asuun.

20 Tzaj ne guun niha' rá nij soj sij ne rej xtá' do', sij vaa sa' rihaan Diose do', sij ca'née Jesucristó nata' rihaan yuvij che'é so' do', sij nata' se-nana Diose do', ni'yaj soj chuman' yo' á. 'Q se qui'yaj Diose sayuun man chuman' yo' che'é cacun' qui'yaj chuman' yo' rihaan soj ei —cataj uún nij sí tuguáj rihoo cheé rihaan na a.

21 Gaa ne yo'o se-mozó Diose sí nucuaj ndo'o ro', naxcaj so' yo'o yuvej xij, ne yuvej xij caxra' ndo'o me yo', ne quirir'ij so' man yo' rque na ya'anj, ne cataj so':

—Veé danj gaa quiran' guée so' chuman' nocqo cu'naj Babilonia ei. Dan me se quirir'ij nii man so' rque na ya'anj, ne daj chihaa mij se nari' uún nii man so' rque na ya'anj a ma'.

22 Ne daj chihaa mij se cuno nii chra' rque se-callé so' chuman' a ma'. Se cuno nii cachraa ya'ánj do', cachraa rihuu do', cachraa chruun a'yánj do', rqué so' a ma'. Ne se gaa sí qui'yaj me ma'an suun do', se gaa máquina váj nihaj do', se gaa a'ó rasuun rqué so' a ma'.

23 Ne se cuchuguun a'ó aga' ya'an rej náá so' do', se nara'aa yuvij rej náá so' do', se cuno nii ca'mij cachraa yuvij do', rqué so' a ma'. 'Q se nij sí naránj natu'vej ne rqué so' ro', me se nij sí ru'vee doj rihaan cunudanj nij ru'vee man rihaan chumij me nij so' adonj. Ne nij rmedió chí'ij cane' rqué so' ro', me se tiha' yu'unj yo' man cunudanj nij yuvij man rihaan chumij chuguanj.

24 Ne ma'an so' tumé cacun' se vaa cavi' nij sí nata' se-nana Diose cavi' nij sí vaa sa' rihaan Diose cavi' cunudanj nij sí ticavi' nii rihaan chumij adonj —taj se-mozó Diose yo', ca'mii so' rihaan chuman' nocqo cu'naj Babilonia a.

## 19

1 Veé dan, gaa ne cunó 'unj nana ca'mii nucuaj que'ee yuvij nicun' rej xtá', ne cataj nij yuvij:

—Caraa guée ní' rihaan Ya'anj ei. Diose sí noco' ní' man ro', so' me sí tinanii man ní' rihaan sayuun, ne guun chij ndo'o so', ne sí nucuaj ndo'o me so' adonj.

2 'Q se nana ya nana nica inanj me nu' nana a'mii so' gaa a'ne' so' cacun' che'é yuvij adonj. 'Q se yaj me naru'vee Diose rihaan nij yuvij che'é nu' cacun' qui'yaj nij yuvij rihaan Diose a. Che'é dan qui'yaj so' sayuun man chuman' nocqo chuman' guun chana niha' rá ga chii, che'é se quirir' nu' chumij, qui'yaj no' do', che'é nu' nij sí nuu rihaan ma'an Diose sí cavi' qui'yaj chuman' nocqo yo' do' a —taj nij yuvij yo' a.

3 Gaa ne cataj uún nij sí ca'mii rej xtá' yo':

—Caraa guée ní' rihaan Ya'anj ei. Ne nu' cavii nu' ca'anj me se yo'o cavij catze' rej acaa chuman' yo' a —taj uún nij so' a.

<sup>4</sup> Gaa ne canicun' ruj icō ca'anj nij sí uun chij do', ca'anj nij xcuu do', rihaan Diose sí taj rihaan chruun xlá sa' yo', ne na'v'ij nij so' rihaan so', cataj nij so':

—Veé danj gaa ya ei. Caraa guee ní' rihaan Ya'anj ei —taj nij so' a.

*Nana nihánj taj xna'anj che'é cha'anj nara'aa matzinj le'ej yo' a*

<sup>5</sup> Gaa ne cunō 'unj doj nana cavii rej nicun' chruun xlá sa', ne cataj nana yo':

—Ca'mii sa' inanj soj rihaan Diose sí noco' ní' man á. Dan me se soj sij 'yaj suun rihaan so' sij aráj cochroj rihaan so' ro', ta'aj soj me sí nique, ne ta'aj soj me sí sa' atá suun, ne ca'mii sa' taran' soj che'é so' á —taj nana cavii rej nicun' chruun xlá sa' yo' a.

<sup>6</sup> Gaa ne cunō 'unj doj nana ca'mii que'ee ndo'o yuvii, ne ase uun rá' unō' cayuj vaj chráá xij do', ase uun rá' unō' aguáj ndo'o tu'vii do', danj guun raj gaa cunoj se-nana nij so', ne cataj nij so':

—Caraa guee ní' rihaan Ya'anj ei. 'O se guun che'e Diose sí 'njij ra'a man ní' guun chij so' ei. Sí uun nucuaj qui'yaj cunudanj me so' adonj.

<sup>7</sup> Dan me se guun niha' uxrá rá' ní', ne ca'mii sa' ní' che'é so' á. 'O se nihánj me se anuú cha'anj nara'aa matzinj le'ej, ne chana xcaj so' man ro', aj quisij qui'yaj chuvii no' man no' nara'aa no' ga so' ei.

<sup>8</sup> Ne rque' nii yatzíj linó sa' inanj cunuú no', ne ndaa too chuguun ma'an yatzíj yo', ne naruvii sa' ndo'o yatzíj yo' a. Ne yatzíj yo' ro', me nu' se sa' qui'yaj nij sí vaa sa' rihaan Diose adonj —cataj nij yuvii yo' a.

<sup>9</sup> Gaa ne cataj yo'o so' rihanj a:

—Cachron so' nana nihánj rihaan yanj á. Dan me se vaa che'é gaa niha' rá' nij sí canacúun nii man cha xti'nō cha'anj nara'aa matzinj le'ej yo', cachron so' á —taj so' rihanj, ne cataj uún so'— Nana nihánj me nana ya ca'mii ma'an Diose adonj —taj uún so' a.

<sup>10</sup> Gaa ne canicun' ruj 'unj rihaan so' quina'v'ij 'unj rihaan so' a. Tzaj ne cataj uún so' rihanj a:

—Se qui'yáa so' danj ma'. 'O se 'unj ro', me sí 'yaj suun ga nij tinuj nij soj sij nata' se-nana Jesucristó rihaan yuvii a. Rihaan orún' Diose na'v'ij so' ei. 'O se nu' nana ca'mii nij sí nata' se-nana Diose ro', me nana rque' Nimán Diose rihaan nij so', ne se-nana Jesucristó me nana yo' adonj —taj so' rihanj a.

*Nana nihánj taj xna'anj che'é sí taj xráa cuayó catzii a*

<sup>11</sup> Gaa ne quene'én 'unj se vaa naxra' rej xtá', gaa ne cavii 'o cuayó catzii, ne sí taj xráa cuayó yo' ro', me sí cu'naj sí sa' a'mii nana ya a. Ne sí nō xcúun atá suun cu'naj uún so', ne a'ne' nica' so' cacun' che'é yuvii, ne sa' uxrá unu' so' a.

<sup>12</sup> Ne ase vaa ya'an chuguun vaa rlij rihaan so', ne que'ee ndo'o cachriin nuú raá so' a. Ne nó se-chuvii so' xráa so', tzaj ne dan me se orún' so' me sí ne'en daj cu'naj so' a.

<sup>13</sup> Ne nuu so' yatzíj quixíj ndo'o ton man, ne tucu'náj nii se-nana Diose man so' a.

<sup>14</sup> Ne canoco' nij tanuu man rej xtá' xcó so', ne táa nij so' xráa cuayó catzii, ne nuu taran' nij so' yatzíj linó sa' catzii naruvii sa' a.

<sup>15</sup> Ne 'njij tu'va so' ne' espadá sihaa, ne yo' me se vaa go' so' xráa nij yuvii man rihaan chumii, ne nica' so' vará aga' hierró, ne tumé ma'an so' man nij yuvii a. Ne ma'an so' me sí ca'ne' cacun' che'é yuvii, ne quirii so' nu' cacun' atá yuvii, ne ndá' rá se vaa ru'maan che'é nii chruj uvá ne rii nii nu' na uvá

ro', veé danj gaa guee qui'yaj so', ne cavií nu' cacun' ata yuvii, qui'yaj so' a. Dan me se racuíj so' man Diose síi uun nucuaj qui'yaj cunudanj axríj yuvaa Diose man nij síi tumé cacun' a.

<sup>16</sup> Ne rihaan sagan' so' ne rihaan ta'maan so' do', nó se-chuvii so', ne síi 'nii ra'a man nu' nij síi uun chij, ne síi nicaj suun rey uun chij rihaan nu' nij síi nicaj suun rey me se-chuvii so' a.

<sup>17</sup> Gaa ne quene'én 'unj se vaa nicun' 'o se-mozó Diose tanuu rihaan güii, ne nucuaj ndo'o caguáj so' rihaan cunudanj nij xtaa do', rihaan cunudanj yachrúu do', cataj so', ne:

—Ca'na' cunudanj soj cunuu chre' soj, ne qui'yaj chuvii Diose cha xti'no soj ei.

<sup>18</sup> Ne dan me se nee man síi nicaj suun rey do', nee man tanuu uun chij doj do', nee man síi nucuaj do', nee man cuayó do', nee man nij síi taj xráa cuayó do', nee man mozó do', nee man síi ne uun mozó do', nee man síi nique do', nee man síi sa' ata suun do', cha soj á —cataj se-mozó Diose rihaan nij xo' a.

<sup>19</sup> Gaa ne quene'én 'unj man xcuu yuvaa yo' ga nij síi nicaj suun rey uun chij rihaan chumii ga nij tanuu nuu rihaan nij so', ne dan me se aj nuu chre' nij so' cunu' nij so' ga síi taj xráa cuayó catzii do', ga nij tanuu nuu rihaan so' do' a.

<sup>20</sup> Tzaj ne quita'aa nii man xcuu yuvaa yo' do', man síi nata' nana ne síi qui'yaj suun nocoo rihaan xcuu yuvaa do' a. Ne suun nocoo qui'yaj so' me se veé danj tiha' yu'unj ndo'o so' man nij síi ca'ne' rá quino se-ta'nga' xcuu yuvaa yo' man do', síi quina'víj rihaan se-tinanga' xcuu yuvaa che'é suun nocoo quene'en nij so' do' a. Gaa ne dan me se quiri'íj nii man roj so' rque na ya'anj rej acaa ndo'o yo'ó azufre, ne veé danj vaa i'na' roj so' quiri'íj nii man roj so' rihaan na ya'anj yo' a.

<sup>21</sup> Gaa ne neé espadá nuu tu'va síi taj xráa cuayó catzii yo' ro', me se cavi' yo'ó nij síi nocó' xcó roj so', qui'yaj neé espadá yo' a. Dan me se chá nij xtaa do', chá nij yachrúu do', man nee man nij síi cavi' yo' ndaa daj quisíj caraa ma'an rque nij xo' a.

## 20

### *Nana nihánj taj xna'anj che'é míj nij yo' numii xcuáa tu'vii a*

<sup>1</sup> Gaa ne quene'én 'unj yo'o se-mozó Diose cavii rej xta', ne nani so' 'na' so', ne oro' so' aga' ne' ga raga' yavé 'nii tu'va yu'uj cunuu rmi' ndo'o yo' a.

<sup>2</sup> Gaa ne quita'aa so' xcuáa tu'vii xcuáa cayáan gaa naá a. Ne xcuáa tu'vii yo' ro', me síi chree, ne Satanás cu'naj so' a. Gaa ne dan me se nicaj se-mozó Diose aga' ne' numíj se-mozó Diose man so' rque 'o míj ya yo' a.

<sup>3</sup> Gaa ne quiri'íj se-mozó Diose man so' rque yu'uj cunuu rmi' ndo'o, ne caxríj so' raga', ne cahrón so' 'o ta'nga' selló ya tu'va yu'uj cunuu rmi' ndo'o yo', che'é rej yo'o qui'nij yuve xcuáa yo', gaa ne se gaa nanj tiha' yu'unj uún xcuáa tu'vii yo' doj man nij yuvii man rihaan chumii rque 'o míj ya yo' a. Dan me se gaa quisíj míj nij yo' yo', gaa ne naché uún xcuáa tu'vii yo' doj tzin' a.

<sup>4</sup> Gaa ne dan me se quene'én 'unj chruun xlá sa', ne vaa nij síi taj nij chruun xlá sa' yo' a. Dan me se ca'ne' Diose suun rihaan nij so' se vaa ca'ne' nij so' cacun' che'é nij yuvii a. Ne quene'én 'unj man yo'ó nij síi ne rej yo' a. Ne nij so' ro', me nij síi sa' cavi' che'é se-nana Jesucristó nana nata' nij so' do', che'é se-nana Diose do' a. Ne nij so' ro', ne na'vij nij so' rihaan xcuu yuvaa do', rihaan se-tinanga' xcuu yuvaa do' ma'. Ne ne ca'vej rá nij so' cata' se-ta'nga'

xcuu yuvaa yo' caan rihaan nij so' do', ra'a nij so' do' ma'. 'O se cunuu i'na' uún nij so', ne 'o mǐj yo' cayáán nij so' ne guun chij nij so' ga Jesucristó a.

<sup>5</sup> Ne xa' yo'ó nij síi cavi', tzaj ne ne cunuú i'na' uún nij so' ndaa se quisíj ya nu' mǐj yo' yo' a. Tzaj ne nij síi taj rihaan chruun xlá sa' yo' ro', nij so' me nij síi cunuú i'na' uún asino yaan rihaan cunudanj nij yuvií a.

<sup>6</sup> Dan me se síi vaa sa' inanj me se síi cavii sa' ndo'o me nij so', che'é se síi cunuú i'na' uún asino yaan me nij so' ei. Se ca'vee daj chihaa mǐj caví' uún nij so' a ma'. Tzaj ne guun nij so' xrej cayáán rihaan Diose do', rihaan Jesucristó do', ne guun chij nij so' ga Jesucristó nu' mǐj ya yo' yo' ei.

<sup>7</sup> Gaa ne asa' quisíj mǐj nij yo', gaa ne curihanj uún síi cu'naj Satanás taga' nuú so',

<sup>8</sup> gaa ne cavii so' tiha' yu'unj so' man nij síi man rihaan nu' cachra' chumii adonj. Dan me se tiha' yu'unj so' man nij síi ne chuman' Gog do', man nij síi ne chuman' Magog do', gaa ne cunuú chre' taran' nij so', qui'yaj so', che'é rej cunu' nij so' a. Ne ase vaa que'ee ndo'o nij yo'óo chruu naj tu'va na ya'anj ro', danj gaa que'ee nij tuvi' nij so' nanj ei.

<sup>9</sup> Dan me se cavii nij so' rihaan taa, ne tucuachriin nij so' man rej ne nij tanuu sa' nij síi vaa sa' rihaan Diose do', man ma'an chuman' 'ee rá Diose man do' a. Gaa ne maan ora' yo' cavii ndo'o ya'an rej xta' nanij yo' rihaan yo'óo, gaa ne cacaa nu' nij síi chi'ii yo', qui'yaj ya'an yo' nanj adonj.

<sup>10</sup> Gaa ne dan me se síi chree síi tiha' yu'unj man nij so' ro', qui'ri'lj nii man so' rque na ya'anj rej acaa ndo'o yo'óo azufre, ne yo' me rej nuú xcuu yuvaa do', síi nata' nana ne do' a. Gaa ne dan me se nuvíi nigan' quiran' ndo'o nij so' sayuun nu' cavii nu' ca'anj nanj adonj.

*Nana nihánj taj xna'anj che'é chruun xlá xij catzii rej ca'ne' Diose cacun' che'é yuvií a*

<sup>11</sup> Gaa ne dan me se quene'én 'unj 'o chruun xlá xij catzii, ne quene'én 'unj 'o síi taj chruun xlá yo', ne cuchu'vi' ndo'o nu' chumii do', nu' rej xta' do', ni'yaj roj yo' man so' a. Dan me se naxuun roj yo' man roj yo' rihaan síi taj chruun xlá, ne 'o se ne nari' roj yo' rej quinaj roj yo' a ma'.

<sup>12</sup> Gaa ne quene'én 'unj man nij síi cavi' uún a. Dan me se síi sa' ata suun do', síi niqwe' do', síi nocoo do', síi cunii do', quene'én 'unj, ne nicun' nij so' rihaan síi taj chruun xlá xij catzii yo' a. Gaa ne nuxra' nii nij yanj libró a. Dan me se nuxra' nij so' man yo'óo yanj libró no se-chuvii nij síi gaa i'na' nu' cavii nu' ca'anj ga Diose a. Dan me se ca'ne' Diose cacun' che'é nij síi cavi' yo', ne ni'yaj so' nana no rihaan nij yanj libró yo' nana taj xna'anj ndaa vaa qui'yaj nij so' gaa vaa i'na' uún nij so' rihaan chumii a.

<sup>13</sup> Dan me se narqué na ya'anj nu' nij síi cavi' rque na ya'anj, ne me rej ma'an naj nij síi cavi' yo' nurihanj nij so' canicun' nij so' rihaan síi taj chruun xlá xij catzii yo' a. Dan me se ni'yaj Diose rihaan yanj libró, ne ca'ne' Diose cacun' che'é 'o 'o nij so' ndaa vaa qui'yaj 'o 'o nij so' a.

<sup>14</sup> Dan me se ma'an ta'naj 'yaj avi' yuvií do', nu' rej naj nimán nij síi cavi' do', qui'ri'lj Diose man nij yo' rihaan ya'an cacaa nij yo' a. Ne rihaan ya'an yo' ro', me rej yo'óo caví' ya uún nii nu' cavii nu' ca'anj a.

<sup>15</sup> Ne xa' taran' nij síi nuvi' se-chuvii rihaan yanj no se-chuvii nij síi gaa i'na' nu' cavii nu' ca'anj, tzaj ne qui'ri'lj nii man nij so' rihaan ya'an, ne yo'óo cacaa nij so' ei.

## 21

*Nana nihánj taj xna'anj che'é rej xta' naca do', che'é yo'óo naca do' a*

<sup>1</sup> Dan me se cachén nu' rasuun nga, gaa ne quene'en 'unj rej xta' naca do', yo'óo naca do' a. 'O se aj navij nu' rej xta' nga do', yo'óo nga do', ne na ya'anj me se nuvi' yo' naj a ma'.

<sup>2</sup> 'O se 'unj sij cu'naj Juan me quene'en se vaa cavii chuman' guęę chuman' Jerusalén naca rej xta' rej ne Diose, ne nanij yo', ne ase uun rá' ni'ya' chana nara'aa ro', danj guun raj ni'yaj 'unj man chuman' yo' a.

<sup>3</sup> Gaa ne dan me se cunó 'unj nana ca'mii síi taj chruun xlá sa', cataj so', ne: —Ni'yaj soj ei. Nihánj me rej cayáán Diose ga yuvií a. Dan me se cayáán so' ga nij yuvií, ne taj ya'anj so' man nij yuvií, ne dan me se cayáán rcua'aan Diose ga nij so', ne Diose síi noco' nij so' man me so' nanj adonj.

<sup>4</sup> Ne ma'an Diose ro', na've nu' na ayanj rihaan nij so', ne se cavi' uún nij so' a ma'. Ne se nanó rá nij so' do', se ta'vee nij so' a doj do', se quiran' nij so' a doj sayuun do', a ma'. 'O se aj cachén nu' rasuun nga yo' nanj adonj —taj síi taj rihaan chruun xlá sa' yo' a.

<sup>5</sup> Gaa ne cataj uún so':

—Ni'yaj soj ei. Nihánj me se qui'yaj naca uún 'unj man cunudanj nij rasuun nanj ei —taj so', gaa ne cataj uún so'— Cachron so' nana nihánj rihaan yanj á. 'O se nana ya me nana nihánj, ne vaa che'é gaa nucuaj rá soj manj se vaa qui'yáj nu' rasuun nihánj ei —taj so' a.

<sup>6</sup> Gaa ne cataj uún so' rihanj— Aj quisíj qui'yáa 'unj nu' rasuun nanj á. Ne ase vaa letrá A do', ase vaa letrá Z do', vaa 'unj, ne dan me se sij nicun' asij rque mej, ne veé 'unj canicun' nu' cavii nu' ca'anj nanj adonj. Ne rihaan síi nacoó na me se rque 'unj na co'ó so', ne gaa i'na' so' nu' cavii nu' ca'anj, qui'yaj na yo' ei. Ne dan me se co'ó uun so' na, ne se ca'néj 'unj a doj sa'anj man so' a ma'.

<sup>7</sup> Ne síi 'yaj canaán ro', me se guun so' síi nicaj cunudanj rasuun si'yáa 'unj, ne 'unj ro', me se guun Diose taj ya'anj man nij so', ne nij so' ro', guun ta'níj ne'ej adonj.

<sup>8</sup> Tzaj ne xa' nij síi cunánj rihaan sayuun do', nij síi ne noco' raan manj do', nij síi 'yaj se chi'íi do', nij síi ticavi' tuvi' do', nij síi 'yaj chi'íi ga chana do', nij síi chruun do', nij síi na'v'j rihaan ya'anj acój yuvií do', taran' nij síi ne do', me se vaa rej cacaa nij so' rihaan ya'an, ne rej acaa ndo'o yo'óo azufre me yo' ei. Yo' me rej cavi' uún nij so' nu' cavii nu' ca'anj nanj chuguanj —taj síi taj rihaan chruun xlá sa' yo' a.

*Nana nihánj taj xna'anj che'é chuman' Jerusalén naca a*

<sup>9</sup> Gaa ne ca'na' yo'ó tuvi' chij nij se-mozó Diose síi nicaj chij nij co'oo araa ndaa ayanj ma'an chij nij sayuun a. Gaa ne cataj so' rihanj a:

—Cuva' so' nihánj, ne tiháan 'unj chana xcaj matzinj le'ej man rihaan so' á —taj so' rihanj a.

<sup>10</sup> Gaa ne dan me se ca'anj nicaj so' nimanj raá quij xcaan, gaa ne tihaan so' chuman' guęę cu'naj Jerusalén rihanj, ne cavii chuman' yo' rej xta' rej ne Diose, ne nanij yo' rihaan yo'óo a.

<sup>11</sup> Ne chuman' yo' ro', me se ma'an ta'an Diose me 'yaj chuguun cunudanj chuman' yo' nanj adonj. Ne chuguun yo' ndaa vaa chuguun yahij chuguun tu'vee ndo'o a. Dan me se ase vaa yahij jaspe vaa yo', chuguun ndo'o yo' a.

<sup>12</sup> Dan me se nicun' 'o chingá chraan xij xcaan nu' anicaj tu'va chuman' yo', ne taj chuvij ta'vaa tu'va chingá yo', ne nicun' se-mozó Diose tu'va 'o 'o

ta'yaa yo' a. Ne nó se-chuvij chuvij nij x'ne' nij yuvij israelitá rihaan chuvij nij ta'yaa yo' a.

13 Dan me se rej síj güii rihaan chingá chraan ro', táa va'núj nij ta'yaa, ne rej norte rihaan chingá ro', táa ya'núj nij ta'yaa, ne rej sur rihaan chingá chraan ro', táa ya'núj nij ta'yaa, ne rej ata' güii rihaan chingá chraan ro', táa ya'núj nij ta'yaa yo' a.

14 Ne vaa chuvij yuvej xij naj tacóo che'é chingá chraan yo', ne rihaan chuvij nij yuvej yo' ro', nó se-chuvij chuvij nij apóstol cune' matzinj le'ej man nata' se-nana so' rihaan yuvij a.

15 Ne se-mozó Diose sí ca'mii ga 'unj ro', nicaj so' 'o vará aga' oró míi, che'é rej xcaj ta'nga' so' chuman' do', nij ta'yaa do', nu' chingá do' a.

16 Ne dan me se cuyaan vaa rej xcaan ga rej caxra' man chuman' yo' a. Gaa ne xcaj ta'nga' so' chuman' yo', ne vij míj táa yavij cientó kilómetro vaa chuman' yo' rej xcaan do', rej caxra' do', rej xta' uún do' a. Dan me se cuyaan vaa rej xcaan do', rej caxra' do', rej xta' do', man chuman' yo' a.

17 Gaa ne dan me se xcaj ta'nga' so' rej xcaan xta' chingá yo', ne va'núj chihaa ca'anj metró taj doj vaa chraan chingá yo' xta' a. Dan me se ase vaa xcaj ta'nga' yuvij rasuun ro', danj vaa xcaj ta'nga' se-mozó Diose yo' nu' chingá yo' a.

18 Ne inanj yahij jaspe me nu' chraan yo', ne inanj aga' oró míi sa' me nu' chuman' yo', ne ase vaa vidrió ro', danj vaa nu' aga' oró míi sa' yo' a.

19 Ne canó me a' yahij chuguun tu'vee ndo'o ro', nó rihaan tacóo chuman' yo' a. Dan me se yo'ó yuvej xij naj tacóo chraan ro', me yahij jaspe, ne yo'ó yuvej ro', me yahij zafiro, ne yo'ó yuvej ro', me yahij ágata, ne yo'ó yuvej ro', me yahij esmeralda a.

20 Ne yo'ó yuvej ro' me yahij ónice, ne yo'ó yuvej ro', me yahij cornalina, ne yo'ó yuvej ro', me yahij crisólito, ne yo'ó yuvej ro', me yahij berilo, ne yo'ó yuvej ro', me yahij topacio, ne yo'ó yuvej ro', me yahij crisopraso, ne yo'ó yuvej ro', me yahij jacinto, ne yo'ó yuvej ro', me yahij amatista a. Ne nu' nij yahij yo' ro', nó rihaan 'o 'o nij yuvej xij naj tacóo chingá chuman' yo' a.

21 Ne chuvij nij ta'yaa taj rej atúj yuvij rque chuman' ro', me rmii perlá nanj a. Dan me se orún' rmii perlá yo' me 'o 'o nij ta'yaa a. Ne inanj aga' oró míi sa' me nu' nij callé taj rque chuman' yo', ne ase vaa raan vidrió ro', vaa nu' aga' oró míi yo' a.

22 Ne nuvi' nuvií nocoo quene'én 'unj rque chuman' yo' ma'. 'O se ma'an Diose sí 'nij ra'a man ní' sí uun nucuaj qui'yaj cunudanj ga ma'an matzinj le'ej me roj sí guun nuvií rque chuman' yo' nanj adonj.

23 Ne ne achii güii do', yavii do', chuguun rihaan chuman' yo' a ma'. 'O se ma'an Diose chuguun rihaan chuman' yo', ne ma'an matzinj le'ej yo' guun aga' chuguun rque nu' chuman' yo' nanj chuguanj.

24 Ne cunudanj nij yuvij man rihaan chumij, curuvij' ni'yaj nij so' cachee nij so', qui'yaj ma'an chuman' yo' a. Ne nij sí nicaj suun rey ro', me se nicaj nij so' nu' si'yaj nij so' rasuun sa', 'na' nij so' rque chuman' yo' a.

25 'O se inanj rej ranga' gaa yo', ne daj chihaa míj se caráan nii ta'yaa taj tu'va chuman' yo' ma'. 'O se taj vaj rej nij chuman' yo' ma'.

26 Ne nu' rasuun sa' nicaj cunudanj nij yuvij man rihaan chumij me se ca'anj nicaj nii nu' rasuun sa' yo' rque chuman' yo' a.

27 Tzaj ne taj vaj a doj se chi'ii catuu rque chuman' yo' ma'. 'O se sí 'yaj se chi'ii do', sí a'mii ne do', se catúj nij so' daj chihaa míj rque chuman' yo' a



man adonj. Tzaj ne orún' nij sí nō se-chuvji rihaan danj matzinj le'ej yanj libró nō se-chuvji nij sí gaa i'na' ga Diose nu' cavii nu' ca'anj ro', orún' nij so' me nij sí catuū rque chuman' yo' nanj adonj.

## 22

<sup>1</sup> Gaa ne tihaan se-mozó Diose yo' 'o chráa rihanj, ne chráa nuu na 'yaj vaa i'na' yuvij ga Diose nu' cavii nu' ca'anj me chráa yo' a. Ne ndaa chuguun raan ma'an chráa yo' a. Ne chráa yo' ro', me avii tacóo chruun xlá sa' xrúun Diose do', xrúun matzinj le'ej do' a.

<sup>2</sup> Ne tanuū callé nocoo taj rque chuman' yo' nicun' chruun 'yaj vaa i'na' yuvij ga Diose nu' cavii nu' ca'anj a. Dan me se nu' niha tu'va chráa yo' nicun' chruun yo' a. Ne vaa chuvij chruj rii chruun yo', ne dan me se ino vaa chruj rii chruun yo' 'o 'o yavii, ne dan me se cunu' yo' mán chruj raá chruun yo' a. Ne coj man ra'a chruun yo' ro', 'yaj nahuun sa' cunudanj nij yuvij man rihaan chumij a.

<sup>3</sup> Ne taj vaj a doj rasuun chree man yo' a ma'. Ne chruun xlá sa' xrúun Diose do', xrúun matzinj le'ej do', nicun' chuman' yo', ne yo' me rej man nij sí 'yaj suun rihaan so' a.

<sup>4</sup> Ne rihaan ya quene'en nij so' rihaan ma'an ya Diose, ne quino se-chuvji Diose caan rihaan nij so',

<sup>5</sup> ne taj vaj rej nij quene'en nij so' rej yo' a ma'. Ne se cachiin aga' chuguun do', naán güii do', rihaan nij so' a ma'. 'O se ma'an Diose sí 'nij ra'a man ní' chuguun rihaan nij so', ne dan me se guun chij nij so' nu' cavii nu' ca'anj ga Diose nanj chuguanj.

### *Nana nihánj taj xna'anj se vaa nichrun' ca'na' uún Jesucristó a*

<sup>6</sup> Gaa ne cataj uún se-mozó Diose yo' rihanj a:

—Vaa che'é gaa nucuaj rá so' man nana ya nihánj ei. Ne Diose sí 'nij ra'a man ní' sí uun chij nimán nij sí nata' se-nana so' ro', ca'neé so' man se-mozó so' rihaan nij sí 'yaj suun rihaan so', che'é rej tihaan se-mozó so' rihaan nij so' rasuun nichrun' guun adonj —taj se-mozó Diose yo' rihanj a.

<sup>7</sup> Dan me se:

—Nichrun' cuchij rihaan soj ei —taj Jesucristó rihaan ní' a.

Dan me se cavij sa' sí uno nu' nana nō rihaan yanj nihánj nana taj xna'anj daj guun rej rihaan ní' a.

<sup>8</sup> 'Unj sij cu'naj Juan ro', me sí cuno nu' nana nihánj, ne 'unj me sí quene'en nu' rasuun nihánj a. Dan me se gaa quisij cunó 'unj do', quene'én 'unj do', gaa ne canicun' ruj 'unj na'vij 'unj rihaan se-mozó Diose sí tihaan nu' rasuun nihánj rihanj a.

<sup>9</sup> Tzaj ne cataj so' rihanj a:

—Se qui'yáa so' danj ma'. 'O se sí 'yaj suun rihaan Diose ga so' do', ga taran' nij tinúú so' nij sí nata' se-nana Diose sí 'yaj nu' nana nō rihaan yanj nihánj do', mej nanj adonj. Rihaan orún' Diose na'vij so' á —taj so' rihanj a.

<sup>10</sup> 'O se cataj uún so'— Se caráan yuve so' se-nana Diose nana taj xna'anj daj guun rej rihaan ní' nu' nana nō rihaan yanj nihánj ma'. 'O se nichrun' quisij güii guun nu' nij rasuun nihánj nanj adonj.

<sup>11</sup> Che'é dan nij sí 'yaj cacun' ro', yo'o qui'yaj nij so' cacun', ne sí chi'ij nimán ro', yo'o gaa chi'ij nimán so' á. Ne sí vaa nica nimán, tzaj ne yo'o naqui'yaj sa' so' nimán so', ne sí vaa sa' rihaan Diose ro', yo'o gaa sa' so' rihaan Diose á —taj se-mozó Diose yo' a.

<sup>12</sup> Dan me se Jesucristó taj:

—Nichrun' cuchij rihaan soj ei. Ne nicaj 'unj se naru'vee 'unj rihaan soj chuguanj. Dan me se naru'vej rihaan 'o 'o soj ndaa vaa rasuun qui'yaj 'o 'o soj adonj.

13 Dan me se ase vaa letrá A do', ase vaa letrá Z do', vaa 'unj a. Dan me se 'unj ro', me sí taj yaan rihaan cunudanj, ne veé 'unj me sí noco' xcó cunudanj a. Ne veé 'unj me sí nicun' asij gaa guun chumij, ne veé 'unj ro', me sí canicun' nu' cavii nu' ca'anj a.

14 "Cavii sa' uxrá nij sí na'nu' sagan' ne navij cacun' ata' so' a. 'O se cunocúun nij so' cha' nij so' chruj man' raa' chruun 'yaj gaa i'na' yuvij ga' Diose nu' cavii nu' ca'anj, ne catuu' nij so' ta'yaa' taj tu'va' chuman' yo' a.

15 Tzaj ne xa' nij sí 'yaj ndaa vaa 'yaj chuvee, tzaj ne xe' ro', quinaj nij so' do', nij sí chruun do', nij sí 'yaj se chí'ij ga' chana' do', nij sí ticavi' man' tuvi' do', nij sí na'vij rihaan ya'anj cacó' yuvij do', nij sí niha' rá ca'mij nana' ne do' a.

16 "O se 'unj Jesucristó ro', me se ca'née 'unj se-mozó 'unj cuchí' so' rihaan nij soj nata' so' nana' nihánj rihaan soj, che'é rej ca'anj soj cataj xna'anj soj nana' nihánj rihaan cunudanj nij sí amán rá ni'yaj man' ne 'o 'o chuman' adonj. 'Unj ro', me ta'ní' ta'nij si'no' sí cu'naj David, ne noco' xna'anj tuví' so' gaj ei. Ne ase vaa yati' xta'ngaa avii nichrun' rá ranga' ro', vaa 'unj rihaan chumij adonj —taj Jesucristó a.

17 Ne dan me se Nimán Diose do', chana' guun nica' Jesucristó do', taj roj so': "Cuvá' so' ei", taj roj so' a. Ne sí uno nana' nihánj ro', cataj so': "Cuvá' so' á", cataj so' rihaan tuvi' so' a.

Ne sí nacoq na ro', ca'na' so', ne co'q so' na 'yaj vaa i'na' yuvij ga' Diose nu' cavii nu' ca'anj, sese me rá so' a. Se naru'vee so' a 'o cha'aa che'é na yo' ma'. 'O se co'q uun so' na yo' nanj adonj.

18 Dan me se 'unj ro', me sí nata' nu' nana' no' rihaan yanj nihánj rihaan nij soj, ne nana' taj xna'anj daj guun rej rihaan ní' me nana' nihánj chuguanj. Ne sese nuta' yo'q so' doj yo'q nana' uún rihaan yanj nihánj, ne quirán' so' nu' sayuun taj xna'anj yanj nihánj, qui'yaj Diose adonj.

19 Ne sese tirj' yo'q so' ta'aj nij nana' no' rihaan yanj nihánj nana' taj xna'anj daj guun rej rihaan ní', gaa ne daj chí'haa' mij se chá' so' chruj man' raa' chruun 'yaj gaa i'na' yuvij ga' Diose nu' cavii nu' ca'anj ndaa vaa taj xna'anj yanj nihánj, qui'yaj Diose ma'. Ne se cayáan so' chuman' guée, ndaa vaa taj xna'anj yanj nihánj, qui'yaj Diose ma'.

20 Dan me se Jesucristó sí nata' ya nana' nihánj me se taj so', ne:

—Ra'yanj cuchij rihaan soj ei —taj so' rihaan ní' a.

“Veé danj gaa ya ei. Cuvá' so' Jesucristó, cuvá' so' s'ij 'nij ra'a man' nú' á”, taj ní' rihaan Jesucristó adonj.

21 Dan me se me rá 'unj qui'yaj ndo'o Jesucristó s'ij 'nij ra'a man' ní' se luj che'é nij soj nanj ei. Veé danj gaa ya ei.